


Tuhun saá ña najándacoo Jesucristo nu̯ yo:

El Nuevo Testamento en el mixteco de

Silacayoapan



New Testament in Mixtec, Silacayoapan (MX:mks:Mixtec,
Silacayoapan)

Tuhun saá ña najáandacoo Jesucristo nu yo: El Nuevo Testamento en el mixteco de Silacayoapan

New Testament in Mixtec, Silacayoapan (MX:mks:Mixtec, Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f

Contents

San Mateo	1
San Marcos	56
San Lucas	89
San Juan	150
Hechos	194
Romanos	249
1 Corintios	271
2 Corintios	293
Gálatas	307
Efesios	315
Filipenses	323
Colosenses	328
1 Tesalonicenses	333
2 Tesalonicenses	338
1 Timoteo	341
2 Timoteo	347
Tito	352
Filemón	355
Hebreos	357
Santiago	373
1 Pedro	379
2 Pedro	386
1 Juan	390
2 Juan	396
3 Juan	397
San Judas	398
Apocalipsis	400

Tuhun vaha naca hyi Mateo saha ña naja Jesucristo

Chichi naquixi Jesucristo (Lc. 3:23-38)

¹ Ña yóho cúu quivi na nasacuu tásáhnú jícó Jesucristo, mé a naquixi chichi David xihín chichi Abraham:

² Abraham nasacuu tátá Isaac ta Isaac nasacuu tátá Jacob ta Jacob nasacuu tátá Judá xihín java ga ñani da. ³ Judá nasacuu tátá Fares xihín Zara ta náná ndívi da yóho nasananí ña Tamar. Ta Fares nasacuu tátá Esrom ta Esrom nasacuu tátá Aram. ⁴ Ta Aram nasacuu tátá Aminadab ta Aminadab nasacuu tátá Naasón ta Naasón nasacuu tátá Salmón. ⁵ Ta Salmón nasacuu tátá Booz, da cúu jahyi ña naní Rahab. Booz nasacuu tátá Obed ta Obed yóho nasacuu da jahyi ña naní Rut cán. Ta mé Obed yóho nasacuu tátá Isaí. ⁶ Ta Isaí nasacuu tátá rey David ta rey David yóho nasacuu tátá Salomón, da cúu jahyi ña nasacuu ñájíhí Urías nu cuítí cán.

⁷ Ta Salomón nasacuu tátá Roboam ta Roboam nasacuu tátá Abías ta Abías yóho nasacuu tátá Asa. ⁸ Ta Asa nasacuu tátá Josafat ta Josafat nasacuu tátá Joram ta Joram nasacuu tátá Uzías. ⁹ Ta Uzías nasacuu tátá Jotam ta Jotam nasacuu tátá Acáz ta Acáz nasacuu tátá Ezequías. ¹⁰ Ta Ezequías nasacuu tátá Manasés ta Manasés nasacuu tátá Amón ta Amón nasacuu tátá Josías. ¹¹ Ta Josías nasacuu tátá Jeconías xihín java ga ñani da. Ta nasacuu da tiempo tá natiin soldado na Israel já nasandaca ñahá da na cán ñuu Babilonia.

¹² Ta tá nasanduu na Israel ñuu Babilonia cán já nacacu Salatiel ta tátá Salatiel nasacuu Jeconías. Ta Salatiel nasacuu tátá Zorobabel. ¹³ Ta Zorobabel nasacuu tátá Abiud ta Abiud nasacuu tátá Eliaquim ta Eliaquim nasacuu tátá Azor. ¹⁴ Ta Azor nasacuu tátá Sadoc ta Sadoc nasacuu tátá Aquim ta Aquim nasacuu tátá Eliud. ¹⁵ Ta Eliud nasacuu tátá Eleazar ta Eleazar nasacuu tátá Matán ta Matán nasacuu tátá

Jacob. ¹⁶ Ta Jacob nasacuu tátá José, da nasacuu yí María. Ta María cúu ña nasacuu náná Jesucristo, mé a nachindahá Ndióxi cacomí a cuéntá saha ñayivi.

¹⁷ Ña cán quéa janda tá nacasáhá cácu jahyi Abraham janda quiahva naxinu coo a quivi nacasáhá cácu jahyi David já nayaha uxu comi generación. Ta tá quiahva nacasáhá cácu jahyi David janda quiahva natiin na Babilonia na Israel já ñehe ñahá na cuahan na nayaha inga uxu comi generación. Ta nayaha inga uxu comi generación nani nasanduu na Israel ñuu Babilonia janda quiahva naxinu coo quivi nacacu Jesús, mé a nachindahá Ndióxi cacomí a cuéntá saha ñayivi.

Tá nacacu Jesús (Lc. 2:1-7)

¹⁸ Joho nasahiin tá nacacu Jesucristo: Mé María, ña cacuu náná Jesús cán sa nasahan ña tuhun ña ña tandaha ña xihín José. Joo tá cámaní coo da xihín ña já nacandaa ini da ña ñuhu jahyi ña. Ta ña yóho nasacuu a ña naja inima yí Ndióxi. ¹⁹ Ta José, da cacuu yí María cán cúu dá da cáca ndinuhu ña ndaa. Ta naca han da ña nasahiin ña xihín inga dataa joo coo naxeen da cahan núu da saha ña nuú ñayivi. Saha ña cán quéa nasacu ini da jándacoo jehé da ña. ²⁰ Ta nani cáhvi ini da saha ña caja da anda jávi naquixi in sani nu dá ta nandaca náha in táto Ndióxi nu dá. Ta tañu mé sani cán naca han xihín dá. Já nacachi a já:

—José, da naquixi chichi David, a cáyihví tohún tandahún xihín María jan jáchi naja inima yí Ndióxi ña ñuhu jahyi ña. ²¹ Ta tá sa nacacu jahyi María já chican ndó quivi á ná cananí a Jesús jáchi jaca a ñayivi nuú cuachi tá ná candeé ini na mé a —nacachi a.

²² Tóco ndihi ña yóho nayaha ña ná xinu coo nuú tuhun Ndióxi ña naca hyi in profeta sanahá ndivaha cán ta já nacachi da cán já:

²³ Vaxi quivi cañuhu jahyi in ña tacú, ña a ñaha coo ta xihín.

Ta tá sa nacacu jahyi ña cán já cacu na quivi á cananí a Emanuel.

Ta tuhun yóho cúní cachi a: in Ndióxi xoho.

²⁴ Ta tá nandicaxí ini José já naja da tá in nacachi táto Ndióxi cán xihín dá. Ta

já natandaha dá xihin María. ²⁵ Joo coo nasahiin da xihin ña tá quiahva íin in daṭaa xihin ñájíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

2

Tá naxito nihni na ndichí Jesús

¹ Ta nacacu Jesús in ñuu naní Belén ña ndácaan estado Judea. Ta mé tiempo cán nasacomí rey Herodes cuénta sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúu ná na jácuaha xihin quimi ta naquixi na chí nu cána candii. ² Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá íin da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihin rí yóho sa nacandaa ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndáca tuhún na.

³ Ta tá naxini johu rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini tóco ndihi ñayivi ñuu Jerusalén cán. ⁴ Sahá ña cán quéa nacana rey Herodes cán tóco ndihi na sacuaha nuú jutu xihin na jánaḥa ley Moisés cán. Ta já nandaca tuhún da na saḥa ndá ñuu cúu nu cáchí tuhun Ndióxi cacu da nasahan Ndióxi tuhun a chindahá a cacomí a cuénta sahá ñayivi. ⁵ Já nacachi na cán já xihin dá:

—Ñuu Belén, ña ndácaan estado Judea cán cúu nuú cáchí tuhun Ndióxi cacu da jáchi quiahva já nacahyí in profeta sanahá tá nacachi da já:

⁶ Vatí ñuu Belén, ña ndácaan estado Judea, cúu á in ñuu loho ndivaha tañu ñuu náhnu cán joo íin saḥa a, jáchi tañu ñayivi ñuu cán ndindita in da cacomí cuénta sahá na Israel, na cúu cuénta Ndióxi, já nacahyí in profeta sanahá.

⁷ Tá nandihí já nacana xóo rey Herodes na ndichí cán ta já nandaca tuhún da na cán saḥa ndá quivi nanaha quimi cán mé rí nu ná. ⁸ Anda já nachindahá da na ñuu Belén. Já nacachi da já xihin ná:

—Cuáhán ndo ñuu Belén cán ta ndaca tuhún vaha ndó ndaja cáa sahá taa loho nacacu jan. Ta tá sa nandiñehe ndó a já quixi ndó caxi tuhun ndó xihin i já ná cūhun ri yehe va caja cáhnu i ña —nacachi Herodes xihin na.

⁹ Ta xihin ña yóho naquee na ndichí cuahan tucu na. Ta quimi, rí naxini na nu cuítí cán já ndáca tucu rí na cuahan na. Ta tá naxinu rí chí nuú íin mé a loho cán anda já nasacandichi rí. ¹⁰ Ta cájji ndivaha ini na tá xini na mé quimi cán. ¹¹ Tá nandihí já naquihvi na ini vehe já naxini na mé a loho cán xihin María, náná a. Ta já nacaxítí na nu á ta já nacaja cáhnu na ña. Ta tá nandihí já nasuná na yuhú saṭo ñehe na ta já najoco na jiuḥun cuáan nuú a xihin jusa vaha xihin in ña támi sahan naní mirra nu mé a loho cán. ¹² Tá nandihí já naquixi in sani nu ná ta xihin mé sani cán nacachi Ndióxi xihin ná ña ná a ndicó coo na chí nu íin rey Herodes. Sahá ña cán quéa nandijama na íchi cuánúhu ná ñuu na.

Tá ñehe na Jesús cuahan na Egipto

¹³ Ta tá sa naquee na ndichí cán cuahan na já naquixi in sani nuú José ta nandaca náḥa in táto Ndióxi nu dá. Já cáchí a já xihin dá:

—Cuándacoún ndiquehe ña loho jan xihin María, náná a ta cunún cūhun xihin ná chí ñundáhyi nación Egipto. Ta cán coún xihin ná janda quiahva ná caxi tuhun i xuhun. Jáchi caca nuu Herodes ndinducú da ña loho jan ña cahní ñahá da —nacachi táto Ndióxi cán xihin José.

¹⁴ Anda já nandaco José já naquee da Jesús xihin María, náná a já naqueta ñuu na cuahan na chí Egipto. ¹⁵ Ta cán nasanduu na janda quiahva naxihí Herodes. Tóco ndihí ña yóho nayaha já ná xinu coo nuú tuhun nacachi Ndióxi sanahá tá nacahyí in profeta já: “Nasahiin jahyi i nación Egipto ta nacana i da ná ndicó coo da”, cáchí tuhun Ndióxi.

Tá nasahnda Herodes chuun ña ná cahní na na valí

¹⁶ Ta ndaja coo naxini Herodes cán ña najándahvi na ndichí cán da sahá ña coo naxinu ga na nu dá. Ña cán quéa a juú quiahva naxojo ini da. Ta chí nasahnda da

chuun ña ná cahní ndihi na taa valí, na ivi cuia chí ninu, mé na ndúu ñuu Belén xihín ñuu válí cátahan xihín á. Jáchí sa nacaxi tuhun na ndichí cán xihín dá ña naxini na mé quimi anda tátuhun ivi cuia. ¹⁷ Ta tá nandíhi naxihí na valí yóho já naxinu coo nuú tuhun nacahyí profeta Jeremías sanahá ndivaha tá nacahyí da já:

¹⁸ Ñuu Ramá jandá joho ndáhví tácu cáyuhú cóhó ñañaha sácu ñá.

Ta ñá sácu yóho cúu ñá Raquel. Sácu ñá sahá jahyi ñá.

Ta co cúní ñá ndico ini ñá jáchí naxihí jahyi ñá, cáchí tuhun Ndióxi.

¹⁹ Joo tá sa naxihí Herodes já naquixi tucu sani nuú José nu ín da nación Egipto cán. Ta nandaca náha in tátō Ndióxi nu dá já cáchí a já xihín dá:

²⁰ —Cuándacoún ta ndiquehe Jesús xihín María, náná a ta cuahán ndicó coo xihín ná chí ñundáhyi Israel. Jáchí sa naxihí va na ndúcú cahní ña loho jan —cáchí tátō Ndióxi.

²¹ Anda já nandicoo José ta ñéhe da Jesús xihín María, náná a cuahan na ndicó coo na chí ñundáhyi Israel. ²² Joo tá ñañehe da tuhun ña nandicojo Arquelao chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa nacaxi tuhun tátō Ndióxi tañu sani nu dá sahá ña cán quéa nandijama da íchi ta cuahan da chí estado Galilea. ²³ Ta naxinu coo na in ñuu naní Nazaret nuú nasanduu na. Ta xihín ña yóho naxinu coo nuú tuhun nacahyí na profeta sanahá ña cacuu Jesús da ñuu Nazaret.

3

Tá nacasáhá Juan, da jácandúta ñayivi cáhan ndojó da yucú íchí cán

(Mr. 1:1-8; Lc. 3:1-9, 15-17; Jn. 1:19-28)

¹ Mé tiempo cán Juan, da jácandúta ñayivi naxinu da yucú íchí cuéntá estado Judea cán. Ta nacasáhá jánaha da ñayivi. ² Já cáchí da já xihín ná:

—Xíní ñúhú jándacoo ndó ña núu cája ndó ta ndicó coo ini ndó nu Ndióxi jáchí sa nacayati quivi cacomí Ndióxi cuéntá sahá ñayivi —cáchí da xihín ná.

³ Mé Juan yóho cúu dá da nacahan profeta Isaías sahá tá nacahyí da já:

Vaxi quivi tá cahan cóhó in da tañu yucú íchí ta cachi da já xihín ñayivi:

“Caja tiaha ndó íchi nuú quixi xitoho í, ta cuná ndó in íchi ndacú nu mé á ña ná ndihvi a ínimá ndo”, cáchí tuhun Ndióxi.

⁴ Ta jáhma nasandixi Juan yóho nasacuu a ña nacavaha na xihín íji camello ta nasandico in ní jáhndá tóco da. Ta naxixi da tica xihín ñuñu yucú. ⁵ Ta naqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán nasaa na nu Juan taa joho na nu cahan da. ⁶ Ta tá nanahma na cuachi na nu Ndióxi já najácandúta Juan na ini yuta Jordán.

⁷ Joo tá naxini Juan ña janda joho xínu coo cuahá na fariseo xihín na saduceo nu dá ña ná jácandúta da na já nacasáhá xójo ndivaha ini da ta já nacachi da já xihín ná:

—Mé ndó cúu ndó tátuhun coo jáchí cúu ndó na quini. Cahan ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi.

⁸ Xíní ñúhú caja ndó ña vaha já ná cuni ñayivi ña mé a ndaa táhyi najándicoo ndó ña núu nasacaja ndó jihna. ⁹ Ta a cahan ndo ña jácacu Ndióxi ndohó sahá ña cúu ndó na naquixi chichi Abraham. Jáchí coo saha toho ña jan nu Ndióxi tá co jándacoo ndó cuachi ndó. Jáchí mé a ndaa ná cahan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. ¹⁰ Mé ndó cúu ndó tátuhun in yító, dó sa ñatiin na hacha cuahan na cahnda na. Ta tóco ndihi yító, dó co sahan cuihi vaha nuu, tahnda do ta quee dó nu ñúhu cayi do. Quiahva já caja ri Ndióxi xihín ndó tá co cúní ndó ndicó coo ini ndó nu mé á. ¹¹ Mé a ndaa cája ndúta i ndohó xihín ticuú ta xihín ña yóho náha ña nandicó coo ini ndó nu Ndióxi. Joo vaxi inga da ta da cán cúu da jándicutú ínimá ndo xihín ínimá yii Ndióxi ta ña cán cacuu a tátuhun ñúhu cáyi. Ta da cán ín cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa da. ¹² Mé da vaxi cán caxi da ñayivi vaha tañu ñayivi quini. Cúu á tátuhun in dataa tá jáxixi da trigo xihín pala já ná quee xehe á já cacu vaha da ña. Ta xehe nacana cán

cuhun a cayi a xihin ñúhu ita ña a ndáhva toho —cáchi Juan xihin na cán.

*Tá nacandúta Jesús
(Mr. 1:9-11; Lc. 3:21-22)*

¹³ Naquee Jesús chí estado Galilea cuahan yuta Jordán nu ndácaan Juan jácandúta dá ñayivi ña ná jácandúta da mé á. ¹⁴ Joo nu cuití coo naxeen toho Juan jácandúta dá Jesús. Ña cán quéa nacachi da já xihin Jesús:

—Yóhó cúu da ndítahan jácandúta yehe. Ta cáa johó vasún yóho ña ná jácandúta i yohó —nacachi Juan cán xihin Jesús.

¹⁵ Já nanducú nehe Jesús tuhun nu dá já nacachi a já xihin dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —nacachi a.

Xihin ña yóho nacandúsa Juan ta chí najácandúta dá Jesús. ¹⁶ Ta tá nandihí nacandúta Jesús já naqueta ini ticuí cán. Anda já nanuna indivi ta naxini Jesús nanuu ínima yii Ndióxi jatá ta nasacaa tá quiahva cáa in ndijata. ¹⁷ Tá nandihí já naxini johó a cáhan in a indivi ta já cáchi a cán já:

—Yóhó cúun jahyi maní i ta cáji ndivaha ini i xuhun —nacachi a.

4

*Xíto ndojó tiñáhá sacuahá Jesús
(Mr. 1:12-13; Lc. 4:1-13)*

¹ Tá nandihí já ndáca ínima yii Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuahá mé á.

² Ta cán nasahin a tixi ivi jícó quivi. Nuú ta ndiví coo naxixi a ta tá nandihí já naxinu joco nu á. ³ Já nacayati tiñáhá sacuahá nuú Jesús ña coto ndojó ñahá ri já nacachi rí já xihin á:

—Tá ta jivi ndusa jahyi Ndióxi cúun cahnda chuun ña ná nduu yuu yóho pan —nacachi rí cán xihin Jesús.

⁴ Anda já nacachi Jesús já xihin rí:

—Já cáchi tuhun Ndióxi: “A juú pan cuití cuxu ñayivi já catacu na, vaha. Xíní ñúhú ri a caja na ña sáhdá tuhun Ndióxi nu ná

já quéa cuu catacu na nu Ndióxi” —nacachi Jesús xihin rí.

⁵ Tá nandihí já ndáca tiñáhá sacuahá cán Jesús cuahan xihin rí ñuu Jerusalén, ña yii cán ta já najándaa rí a nu jícó jini veñuhu cáhnu ndácaan cán. ⁶ Ta já nacachi rí já xihin á:

—Tá ta jivi ndusa jahyi Ndióxi cúun jácana mún chí ninu jáchi já cáchi tuhun Ndióxi:

Cahnda Ndióxi chuun nu tátó mé á ña ná candaa na yohó.

Ta ndinehe ndáha na yohó,

já quéa ná a ndicuehe sahun tá ná cachi-hin sahun xihin yuu, já cáchi tuhun Ndióxi —nacachi rí xihin Jesús.

⁷ Ta já nanducú nehe Jesús tuhun nu rí já nacachi a já xihin rí:

—Cáchi tucu tuhun Ndióxi já: “A coto ndojó tohún Ndióxi, xitohún” —nacachi Jesús xihin ri.

⁸ Ta tá nandihí já ndáca tucu tiñáhá sacuahá cán Jesús nasahan xihin rí in jini yucu jícó ndivaha. Ta já nanaha rí ndaja táhan ñuu ndúu ñuyiví nu á ta najánaaha rí tóco ndihi ña náhnu ndúu cán nu á. ⁹ Ta já nacachi tucu rí já xihin Jesús:

—Tóco ndihi ña yóho quiahva i nuun tá ná caxítún nuú i caja cáhnún yehe —nacachi rí quini cán xihin Jesús.

¹⁰ Anda já nacachi Jesús já xihin rí:

—Satanás, cuahán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —nacachi Jesús xihin rí cán.

¹¹ Tá nandihí já nacaxoo tiñáhá sacuahá cán cuahan ri. Ta já naxinu java tátó Ndióxi chindeé na Jesús.

*Tá nacasáhá cáxi tuhun Jesús tuhun
Ndióxi nuú na estado Galilea
(Mr. 1:14-15; Lc. 4:14-15)*

¹² Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuahan chí estado Galilea.

¹³ Joo coo nacandoo a ñuu Nazaret chí naquee a cuahan coo a chí ñuu Capernaum ña ndácaan yuhú tañuhú, dó ndácaan ñundáhyi cuénta na naquixi chichi Zabulón xihin na naquixi chichi Neftalí. ¹⁴ Tóco

ndihi ña yóho nayaha ña ná xinu coo nuú tuhun načahyí profeta Isaías sanahá tá načahyí da já:

15 Ñayivi ndúu ñundáhyi Zabulón xihín na ndúu ñundáhyi Neftalí, ña ñúhu inga xoo yuta Jordán yati yuhú tañuhú,

ta jári na ndúu Galilea, mé estado nu ndúu ñayivi, na co cúu chichi Israel,

16 mé na cán nasanduu na nuú naá ndivaha ta viti naxini na in ñaha yehe ndivaha.

Jándiyehé á nu ná ña ná a quiví na, joo catacu na anda ama cáa quivi nu ín Ndióxi, načahyí Isaías sanahá.

17 Ta chí mé tiempo já načasáhá Jesús cáhan ndojó a nuú ñayivi ta já cáchi a já xihin ná:

—Xini ñuhú jándacoo ndó cuachi cája ndó ta ndicó coo ini ndó nu Ndióxi jáchi sa načayati quiví cacomí a cuéntá sahá ñayivi —ñacachi Jesús.

Tá cána Jesús comí da tává tiyacá ña ná caca tuun da xihin á

(Mr. 1:16-20; Lc. 5:1-11)

18 Tá xica Jesús cuahan yuhú tañuhú Galilea, nandinehé a ivi taa, da cúu ñani. In da naní Simón ta cáhan na Pedro xihin dá. Ta da inga cán naní da Andrés. Ndívi da yóho cúu dá da tává tiyacá ta ñúhu na jácana na ñunu ná ini tañuhú cán. 19 Já ñacachi a já xihin ndívi da:

—Naha quíi ndó candico ndó yehe caca tuun ndó xihin i. Táva ndó tiyacá viti joo caja i ña ná cuu tavá ndo ñayivi tañu cuachi —cáchi a.

20 Ta chí ivi laá najándacoo da ñunu da ta nandico da Jesús.

21 Ta nani xica Jesús cuahan chága chí nuú já naxini a inga ivi tucu taa, da cúu ñani. In da naní Jacobo ta inga da naní Juan, da cúu jahyí Zebedeo. Ta ndívi mé da yóho ñúhu da ini barco da xihin tátá da ndája vaha da ñunu dá. Ta nacana Jesús ndívi da yóho. 22 Ta chí ivi laá najándacoo da barco da xihin tátá da ta načasáhá xica tuun da xihin Jesús.

Jánaha Jesús nuú cuahá ndivaha ñayivi (Lc. 6:17-19)

23 Níi cúu estado Galilea naxica nuu Jesús cáhan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quiví cacomí Ndióxi cuéntá sahá ñayivi ñuyiví. Ta nandaja vaha Jesús na quíhvi tá nuú cuehe ndóho na. 24 Ta níi cúu ñundáhyi cuéntá Siria nandicujita nuu tuhun sahá ña cája Jesús. Sahá ña cán quea néhe na na quíhvi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu ínimá quini ini xinu na nu á ta ndijáa na xihí yihí xihin na quíhvi saha néhe na vaxi na nuú Jesús. Ta nandaja vaha mé á na.

25 Ta cuahá ndivaha ñayivi ndíco na Jesús. Cúu ná na naquixi estado Galilea xihin na ndúu uxu ñuu cuéntá Decápolis xihin na ñuu Jerusalén xihin na estado Judea xihin na naquixi ñundáhyi chí xoo oriente nu ndacaan yuta Jordán cán.

5

Tá cáhan ndojó Jesús jini yucu (Lc. 6:20-23)

1 Tá naxini Jesús ña ndíco cuahá ndivaha ñayivi mé á já nandaa jini yucu ta já nasacoo a cán. Ta načayati na xica tuun xihin á nu á. 2 Ta já načasáhá jánaha nu tóco ndihi na ndúu cán já ñacachi a já xihin ná:

3 —Tahví nacuu ñayivi tá ndícuni na xini ñuhú na ña chindeé Ndióxi na jáchi na cán cúu na cacomí Ndióxi cuéntá saha.

4 Tahví nacuu na ndúu cuéha jáchi na cán cúu na quiahva Ndióxi tuhun ndéé ini.

5 Tahví nacuu na co ndíñehe jícó mé jáchi na cán cúu na ñehe táhvi ndiquehe na ña nasahan Ndióxi tuhun a quiahva nu ná.

6 Tahví nacuu na xica ini caja ña cuni Ndióxi. Na cán cúu na caja Ndióxi ña ná xinu nuú ña cúu ini na.

7 Tahví nacuu na cándahví ini saha ñayivi jáchi na cán cacuu na cándahví ri ini Ndióxi saha.

8 Tahví nacuu na co ndácaan quini ínimá jáchi na cán cúu na cuni Ndióxi.

9 Tahví nacuu na ndíhi ini ña ná coo vaha na xihin ñayivi jáchi na cán cúu na cáchi Ndióxi cúu ná jahyí mé á.

10 'Tahví nacuu na ndóho ini sahá ña cája na ña sáhdá Ndióxi nu ná cajú na jáchi na cán cúu na cacomí Ndióxi cuéntá saha.

11 'Tahví nacuu ndó tá cánahá ñayivi xihin ndó ta cajú xíxi na xihin ndó sahá ña cándeé ini ndó yehe. Ta tahví nacuu ndó tá jácojo na cuachi jíquí jata ndó sahá ña cándeé ini ndó yehe.

12 'Xíní ñúhú cajji ndivaha ini ndó ta coo vaha ini ndó jáchi ndiquehe ndó in ña vaha ndivaha cajú Ndióxi indiví. Xíní ñúhú ndicuhun ini ndó ña quiahva já nacaja xíxi na xihín na profeta, na nasanduu sanahá.

Cúu yó tátuhun ñúhu jándiyehé nuú ñayivi ñuyívi

(Mr. 9:50; Lc. 14:34-35)

13 'Mé ndó cúu ndó tátuhun ñijí yívi na. Sa xíní ndó ña cajú ñijí ña ná ndihaji ñaha xíxi ndó. Ta quiahva já cajú ndó xihín ñayivi ñuyívi. Joo tá ná ndihi ña ohva ñijí cán a cúu ga ndicó coo a cahohva tucu a sahá ña cán queá jandá cuíta va íchi cuani nihni ñayivi ña jáchi coo chuun toho a.

14 'Jári mé ndó cúu ndó tátuhun ñúhu jándiyehé nuú ñayivi ndúu ñuyívi. Ta mé ñúhu cán cúu á tátuhun in ñuu cánúu jata in yucú jíco ta a cúu toho ndacaan jehé a. 15 Jáchi coo chíñúhu ná in lámpara ta tá nu ndíhí já chíjehé na ña tíxi in sató. Ña cajú na xihín á queá chínúu jíco na ña já ná jándiyehé a nu tóco ndihi na ndúu vehe. 16 Quiahva já xíní ñúhú ndihi ini ndó cajú vaha ndó ña ná cacuu ndó tátuhun in ñúhu cáyi nuú ñayivi. Jáchi tá ná cuni na ña vaha cajú ndó já queá cuu cajú cáhnu na Ndióxi, tátá yo, ña ín indiví.

Jánaħa Jesús saħa ley Moisés

17 'A juú cahán ndó ña naquixi i ñuyívi yóho ña cacu xóo i ña nasahnda ley Moisés xihín ña najánaħa na profeta, vaha. Co váxi toho i cacu xóo i ña. Vaxi i nu ndó jáxinu coo i tóco ndihi ña cáchi mé ley já ná naha i nu ndó ndía cúu ndusa ña. 18 Mé a ndaa ná cahán i xihín ndó ña a ndíhi saħa mé ley nani ín indiví xihín ñuyívi yóho. Ni in túhún toho tuhun, a ndíhi saħa jandá quiahva ná yaha tóco ndihi ña ndítahan yaha. 19 Sahá ña cán queá ndá na co cúní cajú ña sáhdá ley Moisés vatí cúu á ña loho ndivaha ta

ni co cúní na jánaħa na ñayivi ña ná cajú na ña cáchi a já queá cacuu na in na coo cuaha saħa taħu na cacomí Ndióxi cuéntá saħa. Joo na cajú ña cáchi mé ley ta jánaħa na ñayivi ña ná cajú na ña, mé na cán cacuu na na cáhnu ndivaha taħu na cacomí Ndióxi cuéntá saħa. 20 Mé a ndaa ná cahán i xihín ndó ña tá ná cajú cuití va ndó tá quiahva cajú na jánaħa ley Moisés xihín na fariseo já queá a cúu ndihvi ndó nuú cacomí Ndióxi cuéntá sahá ñayivi.

Jánaħa Jesús ña co ndítahan cojo ini ñayivi (Lc. 12:57-59)

21 'Mé ndó sa xíní ndó ña nacachi Moisés xihín tásáħnu jíco ndó sanahá tá nacachi da já: "A cáhni ndó ndíi jáchi ndá na ná cahni ndíi tandaa quívi cajú víi jutixia saħa ná." 22 Joo yehe cáchi i xihín ndó viti ña ndá na ná cajú cuehe xihín ñani táhan na tandaa quívi cajú víi jutixia saħa ná. Ta jári na cánahá xihín ñani táhan na, á cáchi na cúu ná ñayivi táchi já vaxi quívi tá candichí na nu juéxe cáhnu ta cuu cuhun na indayá sahá.

23 'Sahá ña cán queá tá ta ñéhe ndó in ñaha cuahan ndó joco ndó nu náa Ndióxi ta nani cuahan ndó cán ndicuhun ini ndó ña ín in ñani táhan ndó ta co cúní táhan vaha na xihín ndó 24 já queá mé jan yati nu náa ndítahan jándacoo tóo ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihín ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

25 'Tá sácú in na saħa ndó cuhun ndó vecaa ta cúní na candaca na ndohó cuhun ndó nu juéxe, xíní ñúhú nducú ndó ndá quiahva ndique táhan máni ndó xihín ná nani núná nu ndó cajú ndó ña. Já queá ná a ndíquiahva na cán ndohó ndáħa juéxe jáchi cuu ndiquiahva juéxe cán ndohó ndáħa na policia ta chicaan na ndohó vecaa. 26 Mé a ndaa cáchi i xihín ndó ña cañuhu ndó cán jandá quiahva ná chahvi ndó tóco ndihi jihún yicá ndó.

Jánaħa Jesús saħa cuachi cajú in datqa tá cúní da coo da xihín in ña co cúu ñajihí da

27 'Mé ndó sa xíní ndó ña nasahnda ley Moisés chuun sanahá ta já nacachi a já:

“Coto a cóo ndó xihin ñájíhí á yí ñani táhan ndó.”²⁸ Joo yehe cáchí i xihin ndó viti ña ndá da sándehe in ñañáha ta cáhvi núu ini da xihin ñá já queá cómí tá cómí da cuachi nu Ndióxi jáchí cúú á tátuhun sa íin da xihin ñá.

²⁹ Ña cán queá cáchí i xihin ndó ña tá nduchú núu cuáha ndó queá jándacava ndohó nuú cuachi, tavá ndó ña jácana xicá ndó ña ná cuhun a jáchí vaha chága ña ná ndihi sahá in nduchú núu ndó a juú ga ña ná cuhun in ní yiquí cuñu ndó ini indayá.³⁰ Ta tá ndahá cuáha ndó queá caja ña ná ndacava ndó nuú cuachi, chituhun ndó ña ta jácana xicá ndó ña ná cuhun a jáchí vaha chága ná ndihi saha ndáha ndó a juú ga ña ná cuhun ní yiquí cuñu ndó ini indayá.

Jánaḡa Jesús ña co ndítahan nuú dataa jándacoo da ñájíhí da

(Mt. 19:9; Mr. 10:11-12; Lc. 16:18)

³¹ Ta mé ndó sa xini ndó ña nasahnda ley Moisés chuun sanahá já cáchí a já: “Ndá da cuni jándacoo ñájíhí da ndítahan cavaha da in tutu quiahva da nu ña ta sa íin vaha va cuu jándacoo da ña.”³² Joo yehe cáchí i xihin ndó viti ña ni in túhún toho ta co ndítahan jándacoo da ñájíhí da. Jáchí ndá da jándacoo ñájíhí da cája da ña ná caja ñá cuachi tá ná tandaha tucu ñá. Jári da tandaha xihin ñá cómí ri da cuachi nu Ndióxi. Joo tá ná candaa ini da ña íin ñájíhí da xihín inga dataa já queá cuu ndusa jándacoo da ña.

Jánaḡa Jesús ña ndítahan caja na tá sahan na tuhun na nuú ñayivi

³³ Mé ndó sa xini ndó ña nasahnda ley Moisés chuun sanahá já cáchí a já: “Xini ñúhú jáxinu coo ndó tóco ndihi ña nasahan ndó tuhun ndó caja ndó tá tává ndó quivi Ndióxi.”³⁴ Joo yehe cáchí i xihin ndó viti ña ná quiahva ndó tuhun ndó nuú ñayivi joo a tává ndó quivi ni in ñaha. A tává ndó quivi indivi jáchí indivi cúú nu íin coo Ndióxi.³⁵ Ta ni a tává ndó quivi ñundáhyi jáchí ñundáhyi cúú nu sáni mé á ta ni a tává ndó quivi ñuu Jerusalén jáchí cúú á ñuu naçaxi Ndióxi, mé á cúú á rey cáhnu ndivaha.³⁶ Ta ni a tává ndó quivi yiquí jini ndó tá sahan ndó tuhun ndó nuú ñayivi jáchí co ndéé ndó ndaja yaa ndó á ndaja tuún ndó ni in túhún íjini ndó.³⁷ Tá sahan

ndó tuhun ndó nuú ñayivi xini ñúhú cachi ndó: “Ajan, caja i ña.” Á tá coo xini ñúhú cachi ndó: “Uhun, a cuú caja i ña.” Jáchí tá cachi ndó inga tuhun já caja ndó ña cuni ña quini.

Jánaḡa Jesús ña ndítahan caja cáhnu ini saha táhan ñayivi

(Lc. 6:29-30)

³⁸ Mé ndó sa xini ndó ña nasahnda ley Moisés chuun sanahá já cáchí a já: “Tá quiahva cája ñayivi xuhun quiahva já caja ri yóhó va xihin ná. Ta tá ná caní in da nduchú núún já queá ndítahan caní mún nduchú núú da. Tá ná tavá da nuhún já ndítahan nuun tavá ri yóhó va nuhú da”, cáchí ley Moisés.³⁹ Joo yehe cáchí i xihin ndó viti: A cája ihvi ndó xihín ñayivi, na cája núu xihin ndó. Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na a.⁴⁰ Ta tá cuni in na candaca na ndohó cuhun ndó nu juéxe sahá ña cuni na candaa na cotó ndó já queá quiahva ndó ña nu ná ta janda cotó ndéé ndó quiahva ndó nu ná.⁴¹ Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xini ñúhú cojo ndó ña anda ivi kilometro cuhun ndó.⁴² Ta ndá na ná caça in ñaha nu ndó quiahva ndó ña nu ná. Ta ndá na xica too ñaha nu ndó, quiahva too ndó ña nu ná.

Xini ñúhú quihvi ini na co cuni mi

(Lc. 6:27-28, 32-36)

⁴³ Mé ndó sa xini ndó ña nasahnda ley Moisés chuun sanahá já cáchí a já: “Quihvi ini ndó na xini táhan vaha xihin ndó ta candají ndó na co cuni táhan xihin ndó”, cáchí ley Moisés.⁴⁴ Joo yehe cáchí i xihin ndó viti: Ndítahan quihvi ini ndó na co cuni táhan xihin ndó. Ta cahan vaha ndó xihín na canahá xihin ndó. Ta caja vaha ndó xihín na candají ndohó. Ta caça tahvi ndó nu Ndióxi sahá na cája xixi xihin ndó.⁴⁵ Jáchí xihín ña yóho náha ña cúú ndó jahyi Ndióxi, tátá yo, mé á íin indivi. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha.⁴⁶ A cáhán ndó ña caja Ndióxi cuahá ñamaní xihin ndó tá quihvi ini cuití ndó na quihvi ini ndohó va jáchí janda ñayivi quini, na jataca jiuhún

cuénta impuesto cája na já. ⁴⁷ Ta a cáhán ndo ña ñacaja ndó cuahá ña vaha tá ná cahan Ndióxi cuití ndó xihín ñani táhan ndó jáchi janda ñayivi co xini Ndióxi cája na já. ⁴⁸ Xini ñúhú caja ndaa ndó xihin tóco ndihi ñayivi tá quiahva cája ndaa Ndióxi, tátá yo, mé a íin indiví —nacachi Jesús.

6

Jánaqa Jesús ña ndítahan chindeé yo na ndahví

¹ Já nacachi tucu Jesús já:

—A ndúcú ndó caja vaha ndó nuú ñayivi sahá ña ná cuni táhyí na ña cája ndó já candoo vaha ndó nu ná. Jáchi tá ná caja ndó já coó toho ñaha ñehé táhvi ndó nu Ndióxi, tátá ndo íin indiví. ² Sahá ña cán quea tá chindeé ndó ñayivi, na ndímaní ñaha nuu, a cáca nuu ndó cahan lándá ndó ña nuú ñayivi tá quiahva cája na co cúu ná tá quiahva ndaa na. Jáchi na cán sahan na ñaha nuú na ndahví ini veñuhu xihín nu táca ñayivi íchi já ná cuu cuni táhyí tóco ndihi ñayivi ña vaha cája na. Jáchi na cán cuni na ña ná caja cáhnu ñayivi na. Mé a ndaa cáchi i xihin ndó ña sa yahvi na cúu mé ña cája cáhnu ñayivi na. ³ Ña ndítahan caja ndó tá chindeé ndó na ndímaní ñaha nuu quea caja ndó ña ná a cándaq ini ni in ñayivi ña cája ndó ⁴ ta xini ñúhú caja jehé ndó ña. Ta Ndióxi, tátá ndo sándehe a ña vaha cája ndó xihin ñayivi ta mé á quea chahvi a sahá ña cája ndó jan.

Jánaqa Jesús ñayivi ndaja cacá tahví na nu Ndióxi

(Lc. 11:2-4)

⁵ Tá xica tahví ndo nu Ndióxi a cája ndó tá quiahva cája na co cúu ná tá quiahva ndaa na jáchi catóo na candita na veñuhu xihin cáyé ña cacá tahví na nu Ndióxi ña ná cuni táhyí ñayivi na. Mé a ndaa ná cahan i xihin ndo sa yahvi na cúu mé ña xini ñayivi na. ⁶ Joo ndóhó, tá xica tahví ndó nu Ndióxi, tátá ndo íin indiví ndítahan quihvi ndó ini vehe ndó ta chicaji tuun ndó yehé a ta jan cuu cacá tahví jehé ndo nu Ndióxi. Jáchi jan íin Ndióxi, tátá ndo xihin ndo taa johó a nu cahan ndo ta caja mé á ñamaní xihin ndó.

⁷ Ta tá xica tahví ndó nu Ndióxi, a cahan tucu tucu ndó mé tuhun ña coo saha jáchi

ñayivi, na co xini Ndióxi cán cája na já. Ta cáhán na taa johó Ndióxi na sahá ña cuaha cahan na joo a juú ña ndaa. ⁸ Joo a cája ndó tá quiahva cája na cán jáchi Ndióxi, tátá ndo sa xini va mé á ndá quea xini ñúhú ndo janda tá camani cacá ndó ña nu á. ⁹ Ña yóho quea ndítahan cachi ndó tá xica tahví ndó nu Ndióxi:

Tátá Ndióxi, ña íin indiví, cáhnu ná cacuu quivi ndó.

¹⁰ Ná tandaa quí quivi cacomí ndó cuénta sahá nde.

Ta ná coo tá íin cuni mé ndó coo ñuyivi yóho tá quiahva íin indiví cája ndó.

¹¹ Quiahva ndó nuú nde ña ndímaní nuú nde cuxu nde in in quivi.

¹² Caja cáhnu ini ndó sahá cuachi nde tá quiahva cája cáhnu ini mé nde sahá ña núu cája ñayivi xihin nde.

¹³ Ta a quiahva ndó ñamaní ña ná coto ndojó tiñahá sacuaqa ndehe já ná a cája nde cuachi nu ndó.

Jáchi comí ndó cuénta saha tóco ndihi ñayivi,

ta cúu cája ndó tóco ndihi ñaha, ta cáhnu cúu mé ndó anda ama cáa quivi.

Já ná coo, quiahva já cachi ndó tá xica tahví ndó nu Ndióxi.

¹⁴ Jáchi tá cája cáhnu ini ndó sahá ña núu cája inga na xihin ndo já quea caja cáhnu ri ini Ndióxi, tátá ndo, mé a íin indiví sahá ndo. ¹⁵ Ta tá co cuni ndo caja cáhnu ini ndó sahá ña núu nacaja inga na xihin ndo já quea a cája cáhnu ini Ndióxi sahá cuachi cája ndó.

Jánaqa Jesús ndaja ndítahan caja na tá cajuhun na

¹⁶ Tá cajuhun ndó a cája ndó tá quiahva cája na co cúu ná tá quiahva ndaa na. Na cán cuni na ña ná cuni táhyí tóco ndihi ñayivi ña xijuhun na sahá ña cán quea cája cueha nuu na já ná ndínehe jícó ñahá na. Mé a ndaa cáchi i xihin ndo ña sa yahvi na cúu ña xini ñayivi na. ¹⁷ Joo ndóhó, tá ná cajuhun ndó ndítahan cuchú nuú ndo ta ndaja vií ndó mé ndó. ¹⁸ Já quea ná a cuni ñayivi ña xijuhun ndó ta in túhún Ndióxi, tátá ndo, mé a íin tuun xihin ndó cándaq ini ña mé a ndaa xijuhun ndó ta mé á quea chahvi a sahá ña cája ndó jan.

Indiví cúú nu ndítahan ndaja tútú ñayivi ña vaha

(Lc. 12:33-34)

¹⁹ 'A ndúcú ndó játaca cuahá ndivaha ndó ña cuicá canduu nu ndo ñuyívi yóho jáchi yóho cúú nu quíhvi tiquíji ñaha ndó jándihi rí sahá ta já tívi ndihi ñaha ndó. Ta jári cuu quíhvi ta cuíhná caja cuíhná da ña. ²⁰ Vaha chága ná játaca ndó ña vaha indiví jáchi cán coó quíhvi toho tiquíji jándihi rí sahá ñaha ndó. Ta mé cán ni in ñaha co tívi ta ni ta cuíhná a cúu ndíhvi caja cuíhná. ²¹ Jáchi nuú ndajaja tútú ndo ña ndáyahvi nu ndó, cán coo ri ínimá ndo.

Nduchú núú yo cúú á tátuhun lámpara ña jándiyehé nu xíca í

(Lc. 11:34-36)

²² 'Nduchú núú yo cúú á tátuhun in lámpara jándiyehé nu yó já xíní yo nu xíca í. Ta tá tívi vaha nduchú núú yo já cuu candehé vaha í nu xíca í. ²³ Joo tá co tívi nduchú núú yó já queá xíca yó nu naá ndivaha. Ta tá cáhan yo ña cúú yó na xíca nu yéhe ndivaha ta cáa ví yó cája í cuachi já queá cúú yó tátuhun na xíca nu naá ndivaha.

In ñaha cúú Ndióxi ta inga ñaha cúú jjuhún

(Lc. 16:13)

²⁴ 'Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quíhvi ini chága na. Á tá coó ta caja ndívi vaha na chuun nuú in xitoho na ta inga na cán a cája chúun vaha na nuu. Ta quiahva já in ri xihín ndóhó va jáchi a cúu caja cáhnu ndó Ndióxi tá chínúu ndó ínimá ndó jatá jjuhún ndo.

Ndaá Ndióxi na cúú cuéntá mé á

(Lc. 12:22-31)

²⁵ 'Candehé ndo ña cáhan i xihín ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quívi. Ta ni a ndícani ini ndó sahá jáhma candixi ndó. Jáchi tá tácu ndo, ña jan cúú ña cáhnu chága a juú ga ña cuxu ndó. Ta in chága sahá yiquí cuñu ndó a juú ga jáhma ndíxi ndó jan. ²⁶ Candehé ndó laa ndáchi nu táchi jan: rí jan ni co xútu rí ta ni a vája sahan rí jáquee rí ta ni co yáca ri nu táan vaha ri nuní ri. Ta Ndióxi, tátá ndo, mé a

in indiví sahan ña xíxi rí jan nu ri. Á co xíní ndó ña in chága sahá mé ndó a juú ga laa cán. Sahá ña cán queá quiahva mé á ña xíní ñuhú ndó catacu ndó. ²⁷ Ta coó sahá toho ña ndícani nahá ini ndó jáchi a cúú ndaja jícó ndó mé ndó java metro chága sahá ña ndícani ini ndó.

²⁸ 'Ta ni co ndítahan ndícani ini ndó sahá jáhma candixi ndó. Candehé ndo ndá quiahva ndató sáhnu itá yúcu. Mé ita jan ni co cája chúun a ta ni co cávaha jáhma á. ²⁹ Joo mé a ndaa ná cáhan i xihín ndo ña ñúchi chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuicá. ³⁰ Candehé ndó ndaja ndáa vaha Ndióxi yucu ita vatí in too a viti ta itaan cáyi a jándihi sahá. Ndaja ga ví caja Ndióxi xihín ndóhó ña quiahva mé á tóco ndihi ña xíní ñuhú ndó catacu ndó. Joo mé ndó co cándusa ndó ña candaa mé á ndohó. ³¹ Ña cán queá a ndícani ini ndó sahá ndá ña cuxu ndó á sahá ña coho ndó á sahá ña candixi ndó. ³² Jáchi na co xíní íchi cuéntá Ndióxi, na cán cúu na ndícani cuahá ini sahá tóco ndihi ña yóho. Joo cúu ndó cuéntá Ndióxi, tátá ndo in indiví ta xíní vaha mé á ña ndímaní nu ndó catacu ndó. ³³ Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuéntá sahá ndó ta já quiahva mé á ña ndímaní nu ndo catacu ndó. ³⁴ A ndícani ini ndó sahá ña quixi nu ndó inga quívi itaan jáchi Ndióxi cuití va xíní a ndía vaxi nu ndó quívi itaan ta coó sahá ndícani ini ndó sahá ña ndoho ndó itaan.

7

Co ndítahan candehé ndaa yó ñayivi

(Lc. 6:37-38, 41-42)

¹ 'A candehé ndaa ndó ñayivi já ná a cándehé ndaa Ndióxi ndohó. ² Jáchi tá quiahva cája ndó xihín inga ñayivi quiahva já caja ri Ndióxi xihín ndóhó va. Sahá ña cán queá tá quiahva sándehé ndaa ndó ñayivi quiahva já caja ri Ndióxi xihín mé ndó. ³ Jáchi ndá cuéntá queá sándehé ndó ña núu cája ñani táhan ndó ta co sándehé ndo ndá quiahva náhnu chága ña núu cája mé ndó. Cúú á tátuhun ndácaan in xehé loho nduchú núú ñani táhan ndó nani ndácaan

in yító ndúhu cáhnu ini nduchú núú ndo. ⁴ Ta tá a cuú cuni ndó yitó cáhnu ndácaan ini nduchú núú mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” ⁵ Jándahvi ndó mé ndó xihín ña cája ndó. Xíní ñúhú tavá ndó yitó cáhnu ndácaan nduchú núú mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó.

⁶ A quiahva ndó ña yii cuénta Ndióxi nuú ñayivi quini. Jáchi tá cája ndó já cuú á tátuhun tá ná quiahva ndó ñaha yii nuú tina ta tiahva náá ndicó coo rí tiin rí ndohó. Ta jári cuú á tátuhun tá ná quiahva ndó ñaha yahvi ndivaha tátuhun perla nu cóchi jáchi cuu cuani nihni rí ña.

*Ndaja caja í caca í ñamaní nu Ndióxi
(Lc. 11:9-13; 6:31)*

⁷ Ndá ñaha ndímani nu ndó xíní ñúhú caca ndó ña nu Ndióxi ta já quiahva mé á ña nu ndo. Ndinducú ndó ña cuni ndo ta ñehe ndó ña caja Ndióxi. Cuú á tátuhun catí ndáha ndo yéhe ta já nuna yéhe nu ndo. ⁸ Jáchi na xíca in ñaha, na cán cuú na ñehe va. Ta na ndúcú ñaha, na cán cuú na ndíñehe ña. Ta na catí ndáha yéhe, na cán cuú na ndínuna yéhe nuu.

⁹ Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe rí ndó quiahva ndó yuu nu á ña ná caxi a. ¹⁰ Ta ama ná quiahva rí ndó in coo nu á caxi tá xíca tiyacá nu ndó cuxu a. Co cája ndó já. ¹¹ Candehé ndó. Vatí mé ndó cuú ndó ñayivi cája cuachi joo xíni vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndo, mé a íin indivi xihín ndo. Quiahva mé á ña vaha nu ndo tá ná caca ndó ña nu mé á.

¹² Candehé ndó. Tá quiahva cuni ndó caja ñayivi xihín ndo quiahva já ndítahan caja rí ndohó va xihín ná jáchi ña yóho quea sáhdá ley Moisés xihín ña nacañyí na profeta caja ndó.

*Yéhe táhan cuú nuú quihvi na cuhun indivi
(Lc. 13:24)*

¹³ Cuú á tátuhun íin ivi yéhe. In yéhe cuú á ña táhan ndivaha ta xíní ñúhú ndinducú ndó ndihvi ndó cán. Jáchi inga yéhe cuú

á ña ndíca ndivaha nuú ndihvi na cuhun indayá. Ta cuahá ndivaha ñayivi cuú na xíca íchi ndíca cuahan na indayá nuú ndihi saha ná. ¹⁴ Joo ña cuú íchi ña ndáca ñayivi yéhe táhan nu ndihvi na indivi cuú á íchí táhan ndivaha ta yáncá ndivaha caca nuu í nu á. Ta chá ndivaha cuú na ndihvi cán.

*Xihín cuhi cúun nuú in yító cuu ndicuni ndá yító cuú dó
(Lc. 6:43-44)*

¹⁵ Cuénta coo ndó xihín na tuhún, na cáchi cáhan na cuénta Ndióxi jan. Jáchi uun ndivaha cása na nu ndo. Joo cuú ná tátuhun ndivahyí quini ndivaha vatí náha na tátuhun ndicachi loho. ¹⁶ Cuú ndicuni ndó na xihín ña cája na. Jáchi ñayivi quini co cája vaha toho na. Cuú á tátuhun tá a cuú cuun uva nuú tohíñú ta ni a cuú jáquee ndó titó ñuhú nuú tohíñú. ¹⁷ Ña cán quea tóco ndihi yitó vaha ndinuhu cuhi vaha cuití cúun nu do. Joo yitó quini ndinuhu cuhi quini cuití cúun nu do. ¹⁸ Dó cuú yitó vaha cán a cuú toho cana cuhi quini nu do ta ni yitó quini cán a cuú cuun cuhi vaha nu do. ¹⁹ Ta tóco ndihi yító, dó co cána cuhi vaha nuu, tahnda do ta quee dó nu cándaha ñúhu ña cayi do. ²⁰ Saha ña cán quea xihín ña cája ñayivi já cuu ndicuni ndó á cuú ná ñayivi vaha á cuú ná na quini.

*A juú ndihi toho ñayivi ndihvi na nuú cacomí Ndióxi cuénta saha ná
(Lc. 13:25-27)*

²¹ A juú ndihi toho na cáchi cuú yehe xitoho na cuhun na nuú cacomí Ndióxi cuénta saha ná. Na cája ña sáhdá Ndióxi, tátá i, mé a íin indivi na cán cuití cuú na cacomí mé á cuénta saha. ²² Jáchi tá ná xinu coo quivi caja ví Ndióxi saha ñayivi já quea casahá cahan cuahá ndivaha ñayivi xihín i ta já cachi na já: “Jesús, mé ndó cuú xitoho nde ta xihín quivi mé ndó naxica nuu nde cáhan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínimá ñayivi ta xihín quivi mé ndó nacaja cuahá ndivaha nde ña xituhún”, cachi na xihín i. ²³ Ta anda já nducú ñehe e tuhun nu ná já cachi i já xihín ná: “Co xíni toho i yo cuú ndohó. Caxoo ndó nuú i jáchi ndinuhu ña quini cája ndó”, cachi i xihín ná.

Sácú Jesús quiahva sahá ivi da nacavaha vehe

(Mr. 1:22; Lc. 6:47-49)

²⁴ Ndá na xini joho ña cáhan i ta cája na ña, na cán cúu ná tátuhun in dataa, da ín xini túni ta nacavaha da vehe da jata in tóto. ²⁵ Ta tá naxinu javi já nasahnu yuta ta naxinu tachí quini jata vehe cán joo cóo nandicava vehe da jáchi tóyíí cándichi vehe da jata tóto cán. ²⁶ Joo na xini joho nu cáhan i ta có cája na ña, na cán cúu ná tátuhun in dataa, da có xini túni ta nacavaha da vehe da nuú ñuti. ²⁷ Tá nandihí já naxinu javi já nasahnu yuta ta naxinu tachí quini jata vehe cán. Anda já nandicava vehe da ta chí nandihí saha chí uun —nacachi Jesús jánaḥa ñayivi.

²⁸ Ta tá nandihí nacahan Jesús ña yóho já tóco ndihí ñayivi nacatontó na xini joho na ndá quiahva jánaḥa mé á ²⁹ jáchi tá jánaḥa mé á nu ná cáhan tá quiahva cáhan in da ín saha cahnda chuun ta có cáhan toho a tá quiahva cája na jánaḥa ley Moisés.

8

Tá nandaja vaha Jesús in da ndóho cuehe táhyi

(Mr. 1:40-45; Lc. 5:12-16)

¹ Tá nanuu Jesús jata yucu nuú nasanúu a cán já ndíco cuahá ndivaha ñayivi jata cuahan. ² Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihin á:

—Cuu ndaja vaha ndó yehe, xitoho i tá cúni ndó —nacachi da xihin Jesús.

³ Tá nandihí já nacani ndaa ndáḥa Jesús da já nacachi a já xihin dá:

—Cúni ña ná ndivahún ña cán quea nandivahún viti —cáchi a xihin dá.

Tá nacachi Jesús já chí ivi laá nandindaa cuehe táhyi nandoho da cán. ⁴ Anda já nacachi Jesús já xihin dá:

—Candehé. A cáxi tuhun tohún ña yóho xihin ni in túhún ñayivi. Cuáhán ndacún nahun mún nuú jutu. Ta ndítahan jocún ñaha nu Ndióxi tátuhun sáhdá ley Moisés sanahá caja na sa nandivaha. Já ná candaḥa ini tóco ndihí ñayivi ña sa nandindaa va cuehe nasandohún —nacachi Jesús xihin da cán.

Tá nandaja vaha Jesús in da cája chuun nuú in jefe soldado

(Lc. 7:1-10)

⁵ Tá nandihí Jesús ñuu Capernaum já nacayati in da sáhdá chuun nuú soldado naquixi ñuu Roma nu Jesús jáchi cúni da caça da in ñamaní nu á.

⁶ Já nacachi da já xihin á:

—Á có cúni ndó caja ndó ñamaní ndaja vaha ndó mozo i, datacú jáchi cándúhu da vehe quíhvi da naxihí tuchu yiquí cuñu da ta a juú quiahva cáhíhvi yiquí cuñu da —nacachi da cán xihin Jesús.

⁷ Já nacachi Jesús já xihin dá:

—Vaha va, cuhun i ndaja vaha i da —nacachi Jesús.

⁸ Anda já nacachi tucu da sáhdá chuun nuú soldado cán já xihin Jesús:

—Candehé ndó. Cóo saha toho yehe ña ná ndihvi ndó vehe e. Joo cahnda cuití ndó chuun janda nu ín ndó yóho ta já ndivaha va mozo i. ⁹ Jáchi ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuú. Ta tá chindahá i in da ña ná cuhun da nu cúni mí i cuhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caja da ña sáhdá i ta cája da ña —nacachi da cán.

¹⁰ Tá naxini joho Jesús ña yóho já nacatontó a já nacachi a já xihin na ndíco cuahan cán:

—Mé a ndaa ná cáhan i xihin ndo ña a ñaha cuni i tañu na Israel in da candeé cáhnu nahá ini Ndióxi tá quiahva candeé cáhnu ini da yóho Ndióxi. ¹¹ Candehé ndo ná cáhan i xihin ndo ña quixi ñayivi ndi-jáá ní cúu saha ñuyiví ta cacoo na cuxu na xihin Abraham ta xihin Isaac ta xihin Jacob indiví nu ín Ndióxi cómi a cuénta sahá ñayivi. ¹² Joo cuahá na Israel, na nanditahan nuú coo cán a cóo toho na cán. Ña caja Ndióxi xihin na cán quea cuita na jata véhe cuhun na nuú naá ndivaha. Ta cán cuacu ndivaha na janda quiahva chicáhña mé nuhu ná —cáchi Jesús.

¹³ Tá nandihí já nacahan tucu Jesús xihin da sáhdá chuun nuú soldado cán já nacachi a já xihin dá:

—Cuanúhu vehún. Nandivaha mosún tá quiahva cúnun jáchi nacandúsún yehe — nacachi Jesús xihin dá.

Chí mé hora já nandivaha mozo da cán.

Tá nandaja vaha Jesús ñá cúu xojo Pedro
(Mr. 1:29-31; Lc. 4:38-39)

¹⁴ Nasahan Jesús vehe Pedro ta tá naxinu a cán cándúhu ñá cúu xojo Pedro quíhvi ña jáchi chícaan cáhni ndeé ña. ¹⁵ Anda já natiin Jesús ndáha ñá quíhvi cán ta chí nandindaa cáhni ña. Ta já nandacoo ñá cán cája ndívi ñá nu ná.

Tá nandaja vaha Jesús cuahá ndivaha na quíhvi

(Mr. 1:32-34; Lc. 4:40-41)

¹⁶ Ta tá nacuaá já ñehe cuahá ndivaha na na quíhvi xihin na ñúhu ínimá quini ini nuú Jesús. Ta xihin in túhún tuhun nacahan mé á natavá ínimá quini ñúhu ínimá ñayivi ta jári nandaja vaha mé á tóco ndihi na quíhvi.

¹⁷ Ta tóco ndihi ña yóho nayaha já ná xinu coo nuú tuhun ña nacahyí profeta Isaías tá nacachi da já: “Mé á nandiquehe ndihi a ña cávita iní ta naxojo ndihi a cuehe yo”, cáchi tuhun Ndióxi.

Na cúni candico Jesús

(Lc. 9:57-62)

¹⁸ Tá naxini Jesús ña a juú quiahva cándíhi táhan ñayivi ndúu na xihin á já nasahnda chuun ña ná cojo cava na inga xoo tañuhú cán. ¹⁹ Joo nacayati in da jánahe ley Moisés nu á já nacachi da já xihin á:

—Maestro, cúni candico i ndohó ndá nacuu nuú cuhun ndo —nacachi da xihin á.

²⁰ Já nanducú ñehe Jesús tuhun nu dá já nacachi a já xihin dá:

—Ndicuii cúu rí ta vatí ín cáva ñúhu rí. Ta laa cúu rí ta vatí ín táca ñúhu rí. Joo yehe, da nachindahá Ndióxi nduu ñayivi, chí ni nuú cuju mí i coó va —nacachi Jesús xihin dá.

²¹ Ta inga da sa xíca xihin á nacachi da já xihin á:

—Maestro, quiahva jihna ndó ñamani nuú i ña ná cuhun i jánduxu tátá i já quixi i candico i ndohó —nacachi da xihin á.

²² Já nacachi Jesús já xihin dá:

—Xíni ñuhú candicún yehe viti jáchi ná cuhun mé ñayivi, na a ñaha cacu ndaa ínimá

jánduxu na ndii jan —nacachi Jesús xihin dá.

Tá najacatáji Jesús tachí xihin tañuhú tá ndícojo do

(Mr. 4:35-41; Lc. 8:22-25)

²³ Ta ndaja coo naquihvi Jesús ini in barco ta cátahan na xíca tuun xihin á cán cuahan na. ²⁴ Ta nani xíca na nuú tañuhú cán cuahan na ta in náa cuití naxinu in tachí quini ndivaha nuú tañuhú cán. Ta a juú quiahva ndeé nacasahá ndícojo ticuú cán janda quiahva nandichutú ticuú ini barco cán. Joo cándúhu Jesús ini barco quíji va. ²⁵ Anda já ndáva na xíca tuun xihin á cán nasahan na ndínehe na ña. Já nacayuhú na já cáchi na xihin á:

—Chindeé ndó ndehe, xitoho nde. Jáchi cácoo barco cahá tañuhú cuahan do —nacachi na xihin á.

²⁶ Anda já nanducú ñehe Jesús tuhun nu ná já nacachi a já xihin ná:

—Ndá cuénta quea yíhvi nahá ndo. Ndá cuénta quea co cándeé ini ndó yehe —nacachi a.

Já nandacoo a ta jánani a tachí quini cán xihin tañuhú cán ta já nacatáji uun tóco ndihi a cán. ²⁷ Tá naxini na xíca tuun xihin á cán ña yóho já nacatontó na ta nacasahá ndáca tuhún táhan na já cáchi xihin táhan na já:

—Ta ndá da cúu dataa yóho ña janda tachí xihin tañuhú cándúsa nu cáhan da —cáchi xihin táhan na cán.

Tá naqueta ivi da ñúhu ínimá quini ini nuú Jesús

(Mr. 5:1-20; Lc. 8:26-39)

²⁸ Tá naxinu coo Jesús inga xoo tañuhú cán nu ín ñundáhyi cuénta Gadara já naqueta ivi da ñúhu ínimá quini ini tañu nu ndúxu ndii. Ta nacayati da nuú Jesús. Ndívi mé da ñúhu ínimá quini ini yóho cúu dá tátuhun quíti, rí cuehe ndivaha. Sahá ña cán quea ni in túhún ñayivi a cuú yaha chí íchi cán. ²⁹ Tá naxini da Jesús já nacasahá da cáyuhú da nu á já cáchi da já xihin á:

—Ndá cuénta quea vasún quihvi nuún xihin nde, Jesús, da cúu in túhún jiní já jahyi Ndióxi. Á vasún jándoho yachún ini nde tá cámaní yii ndindaa tiempo ndoho ini nde —nacachi rí quini cán xihin Jesús.

³⁰ Ta ndaja coo yati cán nasanduu cuahá ndivaha cóchí xíxáhan rí. ³¹ Ta mé rí quini ñúhu ini ndíví dataa cán naxica tahví rí nu Jesús já cáhí rí já xihín á:

—Tá ta ná tavún ndehe ini da yóho, quiahva ñamaní nuú nde ña ná cuhun nde ndihvi nde ini cóchí ndúu cáa —nacachi rí xihín Jesús.

³² Anda já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndíví dataa cán já nasahan rí nandihvi rí ini cóchí cán. Ta chí ivi laá xínu tóco ndihi cóchí cán cuahan rí núu rí nu ndáyí yuhú tañuhú cán. Ta najáqueta nuu rí mé rí ini tañuhú chí nacandaa rí ticuúí já naxihí rí.

³³ Ta chí a juú quiahva nayihví da ndáa cóchí chí naxinu ndivaha da cuahan da. Ta tá naxinu da ñuu já nacasáhá da ndícani da ndaja cáa ña nayaha xihín ndíví da nasañuhu ínima quini ini cán. ³⁴ Anda já naqueta tóco ndihi ñayivi ñuu cán cuahan na candehe ná Jesús. Ta tá naxini na mé á já naxica tahví na nu á ña ná quee a cuhun a.

9

Tá nandaja vaha Jesús in da naxihí tuchu saha

(Mr. 2:1-12; Lc. 5:17-26)

¹ Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á. ² Ta cán ñéhe na in da quíhvi, da naxihí tuchu saha ta cándúhu da nu yívi loho ñéhe na nacasaá na nu á. Ta tá naxini Jesús ndá quiahva candeé ini da cán mé á já nacachi a já xihín da quíhvi cán:

—Candehe, jahyi a. A ndícani toho inún jáchi cája cáhnu ini i sahá cuachún viti —nacachi Jesús xihín dá.

³ Java táhan da jánaha ley Moisés nacasáhá da cáhán da já: “Mé da yóho ndája núu da Ndióxi xihín tuhun cáhan da jáchi ni in túhún toho ñayivi a cuú caja cáhnu ini sahá cuachi.” ⁴ Joo sa nacandaa ini Jesús ña cáhvi ini da cán sahá ña cán quea nandaca tuhún a da já nacachi a já xihín dá:

—Ndá cuéntá quea cáhvi núu ini ndó sahá yehe. ⁵ Á cáhán ndo ña ihvi chága cachi i xihín da yóho: “Nacaja cáhnu ini i sahá

cuachún viti.” Á tá coo ta cachi i xihín dá: “Cuándacoo ta cuáhán.” ⁶ Candehe vaha ndo ná naha i nu ndo ña in sahá i, da nachindahá Ndióxi nduu ñayivi caja cáhnu ini i sahá cuachi cája ñayivi ñuyívi yóho —nacachi Jesús xihín dá.

Tá nandihí já nandicahan tucu a xihín da naxihí tuchu saha cán:

—Ta viti cáhan i xuhun cuándacoo ndiquehe xito lohún ta cuanúhu vehún —nacachi Jesús xihín dá.

⁷ Chí ivi laá nandacoo da quíhvi cán ta já naquee da cuanúhu dá. ⁸ Tá naxini ñayivi ndúu cán ña nacaja Jesús yóho já nayihví na ta nacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

Tá nacana Jesús Mateo ña caca tuun da xihín á

(Mr. 2:13-17; Lc. 5:27-32)

⁹ Tá nandihí já naquee Jesús cuahan ta nani xica cuahan já naxini a in dataa naní Mateo, da in coo nu sácoo da jataca jjuhún cuéntá impuesto. Ta nacana Jesús da já nacachi a já xihín dá:

—Naha quí candícun yehe.

Anda já nandaca ndichi Mateo ta nacasáhá ndíco da Jesús.

¹⁰ Tá nandihí já in coo Jesús xíxi a vehe da cán ta cán naxinu coo cuahá táhan na jataca jjuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xica tuun xihín a cán. ¹¹ Ta tá naxini na fariseo ña ndúu na cán xíxi na xihín Jesús já nacasáhá na ndáca tuhún na na xica tuun xihín Jesús cán já:

—Ndá cuéntá quea xíxi xitoho ndó xihín na jataca jjuhún cuéntá impuesto ta xihín java ga na cája cuachi —nacachi na fariseo cán.

¹² Joo tá naxini joho Jesús ña yóho já nacachi a já xihín na fariseo cán:

—Ñayivi in vaha coo xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. ¹³ Ta yehe coo vaxi toho i cana i na sa in vaha. Vaxi i cana i ñayivi, na cája cuachi ña ná jándacoo na cuachi cája na. Xíní ñúhú cuhun ndo jácuaha vaha ndó ña cúni cachi tuhun Ndióxi tá cáhí a já: “Ña cúni quea ná

candáhví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáchí tuhun Ndióxi —cáchí Jesús xihín ná.

Cáhan Jesús ndá saha queá cajuhun na
(Mr. 2:18-22; Lc. 5:33-39)

¹⁴ Tá nandihí na xíca xihín Juan, da jácandúta ñayivi cán naxinu coo na nu Jesús. Já ñacasáhá ndáca tuhún na mé á já ñacachi na já xihín á:

—Ndávaha co xíjuhun toho na xíca xihín yóhó nani cuahá ndivaha xíjuhun mé nde xihín na fariseo —ñacachi na cán xihín Jesús.

¹⁵ Anda já nanducú ñehe Jesús tuhun nu ná já ñacachi a já xihín ná:

—Á cáhán ndo canduu cuéha na ndúu in vicó tándaha nani íin mé da tándaha cán xihín ná. Uhun. Jáchi cáji ini na. Joo xinu coo quívi candaa na da tándaha cán anda jáví casáhá cajuhun na. Ta cáchí i xihín ndo ña vaxi quívi candaa na yehe nuú na yóho ta anda jáví casáhá na xíca tuun xihín i cajuhun na —ñacachi Jesús.

¹⁶ Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in tuhun jáhma saá jáchi tá nandihí ndíndí a, sáhdá chága ví a jahmá yatá cán ta jándacáhnú chága ví a yávi ña nandicahmá na cán. ¹⁷ Ta ni co táán na vino saá ini vóso ní yatá jáchi jácáhdí mé vino cán ní ta cuíta mé vino cán ta tívi vóso ní cája dó. Sáhá ña cán queá ndítahan taán yo vino saá ini vóso ní saá ná a ndíhi saha vino xihín vóso —cáchí Jesús.

Tá nandaja vaha Jesús jahyi jíhí Jairo xihín in ña ñacani ndaa ndáha jáhma á
(Mr. 5:21-43; Lc. 8:40-56)

¹⁸ Ta nani cáhan Jesús cándichi a naxinu coo in da sáhdá chuun nuú na Israel. Já ñacaxítí da nu á ta já ñacachi da já xihín á:

—Jacá naxihí uun ña loho cúu jahyi jíhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ña —ñacachi da cán xihín Jesús.

¹⁹ Anda já ñaquee Jesús cuahan xihín da cán ta ndáca na xíca tuun xihín á cán cuahan na. ²⁰ Ta ndaja coo cán íin in ñáñáha, ña ndítahví ní ña tíxi uxu ivi cuia. Ta ñacayati ña chí jata Jesús já ñacani ndaa

ndáha ña yuhú jáhma á. ²¹ Jáchi ñacahán ña: “Tá ná cani ndaa cuití ndáha í jáhma Jesús já ndivaha í”, ñacahán ña. ²² Joo nandicoto nihni jata Jesús nu ña ta tá naxini a ña já ñacachi a já xihín ña:

—A cáyihví tohún, jahyi a. Nandivahún jáchi ñacandúsún yehe —ñacachi Jesús xihín ña.

Ta chí mé hora já nandivaha ña.

²³ Ta tá naxinu coo Jesús vehe da sáhdá chuun nuú na Israel cán já naxini a ña sa ndúu música cán ña ná cuhun na jánduxu na jahyi da cán. Ta naxini a jándá joho sácu cóhó ñayivi ndúu na. ²⁴ Ta chí já ñacachi a já xihín tóco ndihí na cán:

—Cuahán queta ndó jata véhe. Jáchi coo naxihí toho ña loho yóho. Quiji cuití va ña —ñacachi Jesús xihín ñayivi ndúu cán.

Joo ñacasáhá na cán sácu ndaa ñahá na.

²⁵ Ta chí ñatavá Jesús na jata véhe. Ta tá ñacayati a nu ña cán já ñatiin a ndáha ña chí ivi laá nandacoo ña. ²⁶ Ta ní cúu ñundáhyi cán nandicuíta nuu tuhun sahá ña ñacaja Jesús cán.

Tá nandaja vaha Jesús ivi da cuáa

²⁷ Tá ñaquee Jesús cuahan já ndíco ivi da cuáa jata cuahan da já ñacasáhá cáyuhú cóhó da já cáchí da já xihín á:

—Jesús, da ñaquixi chíchi David caja ndó ñamaní candáhví loho ini ndó ndehe —cáchí da cáyuhú da jata Jesús.

²⁸ Ta ndaja coo ñaquihvi Jesús ini in vehe ta já ñacayati ndíví da cuáa cán nu á. Já ñacasáhá ndáca tuhún a da cán já ñacachi a já xihín dá:

—Á cáhán ndo ña cuu caja i jándiyehé nuu ndo —ñacachi Jesús xihín da cán.

—Ajan, xitoho nde. Cándusa nde ña cuu caja ndó ña —ñacachi ndíví da cuáa cán xihín Jesús.

²⁹ Tá nandihí já ñacani ndaa ndáha Jesús nduchú núu da cán ta já ñacachi a já xihín ndíví da cán:

—Ná coo tá quiahva cúni ndo jáchi cándeé ini ndó yehe —cáchí a.

³⁰ Tá nandihí já ñacasáhá sándehe ndíví da cuáa cán. Ta ñasahnda Jesús chuun nu dá ña ná a cáxi tuhun da nuú ñayivi sahá ña ñacaja mé á xihín dá.

³¹ Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña nacaja Jesús xihín dá.

Tá nandaja vaha Jesús in da níhi

³² Nani naquee da cuáá cán cuahan da já nasaa java ñayivi nu Jesús ñéhe na in da níhi, da ndácaan ínima quini ini. ³³ Ta tá natavá Jesús ínima quini ini da cán chí ivi láá nacasáhá cahan da. Ta a juú quiahva nacatontó ñayivi ta já cáchí na já:

—Ni in túhún tañu coó naxini nde in ñaha tátuhun ña yóho ñundáhyi Israel —nacachi na cán.

³⁴ Joo na fariseo cán nacasáhá cáchí na já:

—Rí cúú tiñáhá sacuahá nu rí quini sáhan rí ndée rí nuú Jesús yóho ña ná tavá a ínima quini ini ñayivi —nacachi na fariseo cán.

Táhnda ini Jesús sahá ñayivi

³⁵ Ndiáá ñuu náhnu xihín ñuu válí naxica nuu Jesús jánaḥa tuhun Ndióxi ini veñuhu na cán. Ta nacaxi tuhun a tuhun vaha xihín ñayivi ña sa nacayati quiví cacomí Ndióxi cuéntá saḥa ná. Ta nandaja vaha mé á tá nuú cuehe ndóho ñayivi. ³⁶ Ta tá naxini Jesús ñayivi cuaha cán já natahvi ini a saḥa ná jáchí ndóho ini na ta cávitá ini na tátuhun ndicachi, rí coó da candaa ñahá. ³⁷ Anda já nacachi Jesús já xihín na xica tuun xihín a cán:

—Mé á ndaa ndúu cuahá ndivaha ñayivi, na cúní cuni johó tuhun Ndióxi joo chá cuití na cúní cuhun na cahan na ña xihín ñayivi. Cúú á tátuhun ín cuahá ndivaha ní ña xíní ñúhú jáquee joo ndímaní ñayivi jáquee na ña. ³⁸ Sahá ña cán queá xíní ñúhú caça tahví ndó nu Ndióxi ña ná chindahá mé á chága na cája chúun cuéntá mé á —cáchí Jesús xihín ná.

10

Chindahá Jesús na xica tuun xihín á ña ná cuhun na cahan na tuhun Ndióxi xihín ñayivi (Mr. 3:13-19; Lc. 6:12-16)

¹ Tá nandihi já nacana Jesús ndíhuxu ivi na xica tuun xihín á cán. Ta já nasahan ndée nu ná ña ná cuu tavá na ínima quini ini ñayivi. Ta nasahan ndée nu ná ña ná ndaja vaha na tá nuú cuehe ndóho ñayivi.

² Ña yóho cúú quiví ndíhuxu ivi na cúú

apóstol xica tuun xihín á cán: Da nu cuití cán naní da Simón ta cahan ri na Pedro xihín dá. Ta inga da cán cúú Andrés ñani da. Ta inga da cúú Jacobo xihín ñani da, Juan. Ndívi da yóho cúú dá jahyi Zebedeo. ³ Tañu na cán ndácaan ri Felipe xihín Bartolomé xihín Tomás xihín Mateo, da najátaca jiuḥún cuéntá impuesto. Ta cán ndácaan ri Jacobo, da cúú jahyi Alfeo xihín Lebeo, da cahan ri na Tadeo xihín. ⁴ Ta cán ndácaan ri Simón, da naxica cuéntá na cananista xihín Judas Iscariote, mé da najicó túhún Jesús tá nu ndíhí cán.

⁵ Tá nachindahá Jesús ndíhuxu ivi na cán já nacachi a já xihín ná:

—Coto a cuhun ndó chí ñuu ñayivi tóho, na coo cúú na Israel. Ta ni a quíhvi ndó ñuu ñúhu chí estado Samaria. ⁶ Vaha chága ná cuhun ndó cahan ndó tuhun Ndióxi xihín na Israel jáchí cúú ná tátuhun ndicachi, rí nandiñúhú. ⁷ Cuahán ndó caxi tuhun ndó xihín ná ña sa nacayati quiví cacomí Ndióxi cuéntá saḥa ñayivi. ⁸ Ta ndaja vaha ndó na quíhvi ta jánditacu ndó ndii ta ndaja vaha ndó na ndóho cuehe táhyi. Ta tavá ndó rí quini ñúhu ínima ñayivi. Ta a quehe ndó yahvi sahá ña cája ndó jáchí coó naxeen ndó ndée ñéhe ndó jan. ⁹ A cáñehe toho ndó ni jiuḥún cuáán ni jiuḥún cúxú ni jiuḥún caa cuahá caca nuu ndó. ¹⁰ Ta ni a cáñehe ndó yátí cuhun ndó íchí. Ta ni a cáñehe ndó inga naha jáhma ndó cuhun xihín ndó. Ta ni a cáñehe ndó inga ndusa ndó cuhun ndó. Ta ni garróte a cáñehe ndó cuhun ndó. Jáchí ndítahan nuú ñayivi quiahva na ña nu ndó.

¹¹ Tá ná xinú coo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinú quiví quee ndó cuhun ndó. ¹² Ta tá ná xinú coo ndó vehe jan cahan Ndióxi ndó xihín ná. ¹³ Ta tá ná ndiquehe vaha ñayivi vehe jan ndohó já queá cachi ndó xihín ná ña ná coo vaha ini na. Joo tá coo cúní na ndiquehe vaha na ndohó já queá a cahan ndó xihín ná ña ná coo vaha ini na. ¹⁴ Ta tá coo cúní na ndiquehe vaha na ndohó ta ni coo cúní na cuni johó na nu cahan ndó já queá cuahán queta ndó vehe jan á ñuu jan ta catí ndó ña yácá saḥa ndó já ná naha ña cuahan cuachí na cán jata mé va na. ¹⁵ Jáchí mé a ndaa ná

cahan i xihin ndo ña tá ná xinu coo quivi caja ví Ndióxi sahá ñayivi ndúu ñuyíví já queá jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihin ñuu Gomorra sanahá sahá ña coo nandiquehe na ndohó.

Vaxi quivi caja xixi ñayivi xihin na xica cáhan tuhun Ndióxi

¹⁶ Candehé ndo. Yehe chindahá i ndohó cuhun ndó tañu ñayíví quini. Cúu ndó tátuhun ndicachi válí tañu ndivahyí ña cán queá xíní ñúhú cuéntá vaha coo ndó tá quiahva cája coo. Ta xíní ñúhú coo mánsó ndo tá quiahva cája ndijata. ¹⁷ Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta caní na ndohó ini veñuhu. ¹⁸ Ta saha mí i cañehe na ndohó cuhun ndó nuú na cúu gobernador á nuú na cómí cuéntá sahá in nación. Ta já ná cuu ndicani ndó sahá i nuú na cán ta xihin nuú na tóho, na coo cúu na Israel. ¹⁹ Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihin ná já queá quiahva mé va Ndióxi tuhun nu ndó ña ná cuu cahan ndó sahá i nuú na cán. ²⁰ Jáchi a juú jiní mé ndó quixi ña cahan ndo. Ínima yíi Ndióxi cacuu ña quiahva tóco ndihi ña cahan ndo.

²¹ Ta java taa jicó túhún da ñani da ta java da jicó túhún da jahyi da ña ná cahní ñahá na. Ta java na ndicuíta na caní táhan na xihin tátá na ña ná cahní ñahá na. ²² Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. ²³ Tá ná ndicuíta na caja xixi na xihin ndó in ñuu já cunu ndó cuhun ndó inga ñuu. Jáchi mé a ndaa ná cahan i xihin ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáá ñuu ndácaan ñundahyi Israel.

²⁴ Candehé ndo. Ni in túhún toho da xica jácuaha tiaha chága da nu mé dá jánaña ñahá cán. Ta ni in túhún mozo coo cúu dá da cáhnu chága nuú xitoho da. ²⁵ In da jácuaha ndítahan cajji íní da tá sa xini ndihi da ña xini maestro da. Ta da cúu mozo ndítahan cajji ini da tá ná xinu da cacuu da cáhnu

tátuhun xitoho da. Candehé ndo. Tá ná cachi ñayivi xihin da cúu xitoho ndó ña cúu da Beelzebú, rí cúu tiñahá sacuaña ndaja ga ví cachi na xihin ndohó.

Yo já ndítahan cayihví yo

(Lc. 12:2-7)

²⁶ Candehé ndo. A cáyihví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá. ²⁷ Ña cáhan yehe xihin ndó nuú naá xíní ñúhú cahan ndó ña ndiví táhyí nani yehe candii. Ta ña cáhan jehé e xihin ndo xíní ñúhú ndaa ndó jiní véhe cayuhú ndó ña. ²⁸ A cáyihví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihin ínima ndo. Ndióxi queá xíní ñúhú cayihví ndo jáchi mé á cuu jándihi a saha yiquí cuñu ndó ta cuu jácana mé á ínima ndo ini indayá anda ama cáa quivi.

²⁹ Candehé ndo. Laa válí ndáchí rí nu táchi ta núu ndivaha jicó na rí. Joo ni in rí cán coo cúyu nu ñúhu ña quivi rí tá coo sahan Ndióxi, tátá ndó ñamaní. ³⁰ Ta viti caja ndó cuéntá xihin mé ndó. Janda ijí jiní ndó jan ndáhvi tá in tá in a nu Ndióxi. ³¹ Ña cán queá a cáyihví toho ndó jáchi ndiyahvi chága ndo nu Ndióxi a juú ga cuahá ndivaha laa válí.

Tá cáhan cáxi ñayivi ña cúu ná cuéntá Jesús

(Lc. 12:8-9)

³² Ndá na cáxi tuhun nuú ñayivi ña cuahan na cuéntá mí i já queá cachi mí i sahá na nu Ndióxi, tátá i, mé a íin indiví, ña mé a ndaa cúu ndusa na cán cuéntá mí i. ³³ Joo ndá na ná cachi xihin ñayivi ña coo xini toho na yehe já queá ni yehe a ndícuni toho i na ña cúu ná cuéntá mí i nu Ndióxi, tátá i, mé a íin indiví.

Cája Jesús ña sáhdá java táhan ñayivi

(Lc. 12:51-53; 14:26-27)

³⁴ A cáhán toho ndó ña naxinu i ñuyíví yóho caja i ña ná coo vaha ini ñayivi. Coo cája i já. Jáchi ña vaxi yehe caja i queá ná cahnda java táhan na. ³⁵ Vaxi i jáceni táhan i dataa xihin tátá da sahá yehe. Ta vaxi i jáceni táhan i in ñañaha xihin náná ña sahá yehe. Ta vaxi i jáceni táhan i ña cúu sanu

xihín xojo ñá sahá yehe. ³⁶ Ta ndaja vehe mé ñayivi ndicujita na cani táhan na sahá yehe.

³⁷ Ta ndá na cúní chága tátá na á náná na a juú ga yehe já quéa coó saha toho na cacuu na cuéntá mí i. Ta ndá na quíhvi ini chága jahyi yíi na á jahyi jíhí na a juú ga yehe já quéa coó saha toho na cacuu na cuéntá mí i. ³⁸ Ndá na co cúní ndoho ini sahá ña candico na yehe ta co ín tiahva na quivi na sahá i já quéa coó saha toho na cacuu na cuéntá mí i. ³⁹ Jáchí ndá na cátóo coo chága na ñuyiví yóho, na cán cúú na ndihi saha. Joo na sahan ndeé ini quivi sahá i, na cán cúú na ñehe táhvi na catacu na anda ama cáa quivi.

Ña quiahva Ndióxi nuú ñayivi
(Mr. 9:41)

⁴⁰ Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyiví yóho. ⁴¹ Ndá na ndíquehe vaha in profeta vaxi cuéntá Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndíquehe in ta vaha sahá ña cúú dá ñayivi vaha já quéa ndiquehe na cán yahvi na tá quiahva cáa yahvi ndiquehe ta vaha cán. ⁴² Ta ndá na ná quiahva ñaha vatí in yáxi ticuí nuú in na cúú jahyi i yóho sahá ña ndíco na íchi cuéntá mí i, mé a ndaa ná cahan i xihín ndó ña chahvi Ndióxi sahá ñamaní cája na xihín ná —cáchi Jesús.

11

Juan, da jácandúta ñayivi nachindahá da java da xíca xihín dá nuú Jesús
(Lc. 7:18-35)

¹ Tá nandihí nanaha Jesús nuú na xíca tuun xihín á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

² Mé tiempo já nasandacaan Juan vecaa, mé dá cúú dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nachindahá da java na xíca xihín dá nu á ³ ña ná ndaca tuhún na Jesús á jivi ndusa cúú á Cristo, mé a chindahá Ndióxi

cacomí a cuéntá sahá ñayivi, á ndítahan candati na inga ga quixi. ⁴ Tá nandihí nandaca tuhún da cán Jesús sahá ña yóho já nacachi Jesús já xihín ná:

—Cuáhán ndó ndicani ndó nu Juan tóco ndihí ña naxini ndó cája i xihín tóco ndihí ña naxini johó ndó cahan i. ⁵ Ta ndicani ndó nu dá ña ndínuna nuú na cuaá ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. ⁶ Tahví nacuu na co jándacoo ña cándéé ini na yehe —nacachi Jesús.

⁷ Tá naquee na nachindahá Juan cán cuahan na já nacasahá Jesús cahan xihín ñayivi já cáchi a já xihín ná:

—Ndía nacahan ndo cuni ndó tá naqueta ndó nasahan ndó sándehe ndo Juan yucú íchí cán. A juú da cán cúú ta láhá já quíji nuu da tátuhun quíji nuu in tóyoó cája tachí. ⁸ Ndía naqueta ndó candehé ndó. A juú da cán cúú ta ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá cúú da ndúu vehe rey cuití va. ⁹ Ndía nasahan ndó candehé ndó cán. Á coo nasahan ndó cuni johó ndó nu cahan in da cúú profeta nu ndo. Mé a ndaa da cán cúú dá in profeta ta ín chága saha dá a juú ga inga profeta nasanduu sanahá. ¹⁰ Jáchí mé Juan cúú dá da cahan tuhun Ndióxi saha tá cáchi a já:

Chindahá i in da cánúu cuhun nu mún, já ná caja tiahva da íchi nuú quisún, já nacahyi a sanahá.

¹¹ Candehé ndo ná cahan i xihín ndo. Tañu tóco ndihí ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúú ná na coó saha, na cán cúú na cáhnu chága a juú ga Juan.

¹² Jandá quiví naxinu Juan, da jácandúta ñayivi ta jandá viti ñuhú ndíhi ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúú na ñehe táhvi cacomí Ndióxi cuéntá saha. ¹³ Jandá tá cámani xinu Juan tóco ndihí ña nacahyi na profeta xihín ña nacahyi Moisés

cáhan ña vaxi quiví cacomí Ndióxi cuénta sahá ñayivi. ¹⁴ Ta tá cúní ndo candúsa ndó ña ñacahyí na cán sanahá já cuu candaa ini ndó ña Juan cúú dá da ñacahan na cán saha tá ñacachi na ña ndítahan quixi tucu profeta Elías ñuyiví yóho. ¹⁵ Na ín johó, ná cuni johó na.

¹⁶ 'Ná cahan i xihin ndó ndaja ín ñayivi ndúu tiempo viti. Cúú ná tátuhun na valí sácoo sáíquí na nuú yahvi ta cáyuhú na nuú java ga na valí ndúu cán ta já cáchí na já: ¹⁷ "Nativí nde tótiví nu ndo joo coo ñaxeen ndó cata sáhá ndo. Ta ñaxita cuéha ndivaha nde nu ndo ta ni coo ñasacu ndó." ¹⁸ Quiahva já ín ñayivi ndúu tiempo viti jáchí tá ña quixi Juan, da jácandúta ñayivi ta ñaxijuhun da ta ni coo ñaxihi da vino joo ñacachi ndó saha dá ña ndácaan ínima quini ini da. ¹⁹ Ta tá ñaxinu yehe, da ñachindahá Ndióxi nduu ñayivi ta xíxi i pan ta xíxi i vino já ñacasáhá cáchí ndó sahá i ña cúú u in ña ndehé ndivaha ta xíxi ndivaha i. Ta cáchí ndó ña cátóo ndivaha i cacuu amigo na cája cuachi xihin na jataca jjuhún cuénta impuesto. Joo na cúní cándaa ini ña ndaa, na cán cúú na cándaa ini ña cája Juan ta cája ri yehe ña ndaa —ñacachi Jesús xihin ná.

Ñayivi sáa ini coo cúní na caha na ña cúní Ndióxi
(Lc. 10:13-15)

²⁰ Tá ñandihí já ñacasáhá Jesús jáñani a ñayivi ndúu ndíjáá ñuu nuú ñacaja cuaha chága mé á ña xituhún. Jáchí vatí ñacaja cuaha mé á ña xituhún nu ná coo ñandicó coo ini na nu Ndióxi. Ña cán quea ñacachi Jesús já xihin ná:

²¹ —Ndáhví ñahá ñacuu ndó, na ñuu Corazín. Ta ndáhví ñahá ñacuu ndó, na ñuu Betsaida. Cuaha ndivaha ña náhnu ñacaja i nu ndo joo coo ñaxeen ndó ndicó coo ini ndó jándacoo ndó cuachi ndó. Sanahá ñajándihí Ndióxi sahá ñuu Tiro xihin sahá ñuu Sidón sahá cuachi na. Tá ná sahan i caha i ña náhnu nuú na cán tá quiahva ñacaja i nu mé ndó, sa ñajándacoo va na cán cuachi na, nduu. Ta chí iví laá ndaca ndixi na jahmá ndii ta jácuyu na yaa yiquí jini na, nduu. Jáchí xihin ña yóho jáñaha na ña ñandicó coo ini na sahá cuachi na.

²² Mé a ndaa ná cahan i xihin ndo tá ná xinu quiví caha vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Tiro xihin ñuu Sidón sanahá. ²³ Ta viti cahan i xihin ndó, na ndúu ñuu Capernaum. Janda indiví cúní ndó cuhun ndó joo sahá ña sáa ini ndó cuhun ndó janda indayá, caha Ndióxi. Jáchí tá ná caha i ña xituhún nuú ñayivi ñuu Sodoma tá quiahva ñacaja i nu ndóho ta ni a ndíhi sahá ñuu cán, nduu. ²⁴ Mé a ndaa ná cahan i xihin ndo ña tá ná xinu quiví caha vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Sodoma sanahá —ñacachi Jesús.

Tá ñacajii ndivaha ini Jesús
(Lc. 10:21-22)

²⁵ Mé tiempo cán ñacahan Jesús já ñacachi a já:

—Cája cáhnu i ndohó, tátá Ndióxi, ña cúú xitoho tóco ndihí ñaha ndúu indiví xihin ñuyiví. Jáchí najánañaha ndó ña ndíchí ndivaha nuú ñayivi, na coo cuaha saha nuú java ga na. Ta ñacaja ndó ña ná a cuú candaa ini na ndíchí xihin na tácu ini ñaha mé ndó. ²⁶ Já ñacaja ndó jáchí já ñasacu ini ndó caha ndó —ñacachi Jesús.

²⁷ Anda já ñacachi a já xihin na ndúu cán: —Ñandiquiahva tátá i tóco ndihí ñaha ndahá i ña ná cacomí i cuénta sahá. Ta ni in túhún toho ñayivi coo xini vaha na yehe, da cúú in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na coo xini vaha na yo cúú tátá i. In túhún yehe, da cúú jahyi a xini vaha i yo cúú mé á. Ta yehe cúú da caxi ndá ñayivi jáñaha i nuú sahá Ndióxi, tátá i já ná candaa vaha ini na yo cúú mé á. ²⁸ Naha ndihí ndó nuú i, na sa ñacanaá cája chúun. Taxi ndó ña ndójo ndó jan nuú i ta já yehe caha i ña ná ndiquehe ndé ndo. ²⁹ Yehe cúní ña ná ndiquiahva ndó mé ndó ndahá i. Ta ña yóho cúú á tátuhun in yúcu chínúu na sahá jiquí tindiquí. Ta xini ñuhú catiahva ndó caha ndó tá quiahva cája yehe. Jáchí coo cama jini i xihin ñayivi ta cúú u ña manso ndivaha. Quiahva já caha ndó já ñehe ini ndo ndiquehe ndé ndo. ³⁰ Jáchí yúcu chínúu i jata ndo xihin ñaha jácojo i

jata ndo cúu á ña cama ñúhú laá —ñacachi Jesús.

12

Ña nacaja na xica tuun xihín Jesús in quivi ndíquehe ndée ñayivi

(Mr. 2:23-28; Lc. 6:1-5)

¹ Ta ndaja coo in quivi ndíquehe ndée ñayivi xica Jesús cuahan tañu nuú naxutu na trigo. Ta sahá ña cuico na xica tuun xihín Jesús sahá ña cán quéa ñacasáhá na túhún na java yucu jini trigo cán ta tává na trigo sáxi na. ² Tá naxini na fariseo ña yóho já ñacasáhá na cáhan cuachi na nuú Jesús. Já cáchi na já:

—Candehé. Na xica tuun xuhun jan cája na chuun ña co ndítahan caja ñayivi quivi ndíquehe ndée yó —ñacachi na xihín Jesús.

³ Já nanducú ñehe Jesús tuhun nu ná já ñacachi a já xihín ná:

—Á a ñaha toho cahvi ndó nuú tuhun Ndióxi nu cáhan sahá ña nacaja David sanahá tá ñacuico da xihín na xica xihín dá. ⁴ Ña nacaja da quéa ñaquihvi da ini veñuhu Ndióxi ta naxixi da pan ña yii. Ta ni nu mé dá ta ni nuú na xica xihín dá cán co cáni a nuú cuxu na pan cán. In túhún jutú cuití va cáni a nuú cuxu na pan cán. ⁵ Ta á a ñaha toho cahvi ndó ña ñacahyí Moisés nu ley tá ñacahyí da ña co cája toho jutú cuachi nu Ndióxi vatí cája chúun da veñuhu quivi ndíquehe ndée ñayivi. ⁶ Mé a ndaa ná cahan i xihín ndo ña ín chága sahá i, da cándichi yóho a juú ga sahá veñuhu nu cája cáhnu na Ndióxi jan. ⁷ Mé ndó co cándaá toho ini ndó ña cuni cachi tuhun Ndióxi tá cáchi a já: “Yehe cuni ña ná candahví ini ndó ñayivi jáchi vaha chága ña yóho a juú ga ña ná joco ndó quítí nuú i”, cáchi tuhun Ndióxi. Jáchi tá ná cándaá ini ndó tuhun yóho, nduu ta a chicaan toho ndó cuachi jata ñayivi, na coo cuachi. ⁸ Candehé ndó. Yehe, da ñachindahá Ndióxi nduu ñayivi, ín sahá i cahnda i chuun sahá quivi ndíquehe ndée ñayivi —ñacachi Jesús.

Tá nandaja vaha Jesús in da nahichi ndáha

(Mr. 3:1-6; Lc. 6:6-11)

⁹ Tá nandihí já ñaquee Jesús cuahan já nandihvi a veñuhu mé ñuu cán. ¹⁰ Ta cán

nasandacaan in dataa, da nahichi ndáha. Ta sahá ña ndúcú na fariseo ndúu cán ndá quiahva caja na já ná cuu chicaan na cuachi jata Jesús sahá ña cán quéa nandaca tuhún na mé á já ñacachi na já:

—Á sahan Ndióxi ñamaní ndaja vahún na quihvi quivi ndíquehe ndée yo —ñacachi na cán xihín á.

¹¹ Anda já ñacachi Jesús já xihín ná:

—Candehé ndó. Tá ín in ndicachi loho jana ndo ta tá ná ndicava rí ini in táhvi quivi ndíquehe ndée yo, ama ná a cuhun ndó tavá ndó ri. ¹² Ta ndiyahvi chága ñayivi a juú ga ndicachi. Ña cán quéa sahan Ndióxi ñamaní cája í ña vaha quivi ndíquehe ndée yo —ñacachi Jesús xihín ná.

¹³ Tá nandihí ñacachi a já xihín dataa, da nahichi ndáha cán já:

—Jándacaá ndáhun —ñacachi a xihín dá.

Tá najándacaá da ndáha dá já nandivaha ndáha dá. Ta cáa tá quiahva cáa inga ndáha da cán. ¹⁴ Joo tá ñaqueta na fariseo cán já ñacasáhá na jándique táhan na tuhun na ña cahní na Jesús.

Ña cáhan Isaías sahá Jesús

¹⁵ Tá ñañehe Jesús tuhun ña ndúcú na cán cahní ñahá na já ñaquee a cuahan va ta cuahá ndivaha ñayivi ndíco jata cuahan. Ta ndaja táhan na quihvi nandaja vaha Jesús. ¹⁶ Ta ñasahnda Jesús chuun nuú na sa nandivaha cán ña ná a cáxi tuhun na nuú ñayivi yo cúu mé á. ¹⁷ Tóco ndihí ña yóho ñayaha já ná xinu coo nuú tuhun ñacahyí profeta Isaías tá ñacahyí da já:

¹⁸ Yóho ín da cája chúun cuéntá mí i, mé dá ñacaxi i.

Quihvi ndivaha ini i da ta cájii ín i xihín ña cája da.

Ta jáchutu ndaa i ínima dá xihín ínima yii mí i,

ñá ná jánaha da nuú ñayivi ndúu ñuyiví ndá quiahva cája víi i saha ná.

¹⁹ Ta ni a cáhan cuachi toho da ta ni a cáyuhú cóhó da,

já quéa a cuni joho ñayivi xica cállé nu cáhan da.

²⁰ Tá quiahva a jácuachi toho da ndoo, dó sa ñatahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúní ndahva janda quiahva ná quee vaha ña ndaa xihín ña ihví.

²¹ Ta ndaja táhan ñayivi ndúu níí cúú ñuyíví tandaa candeé ini na mé dá, ñacahyí Isaías sanahá.

Jácojo na cuachi jatá Jesús ña cája chúun a xihín ndée tiñáhá sacuahá

(Mr. 3:20-30; Lc. 11:14-23; 12:10)

²² Java ñayivi ñéhe na in da cuaá ta cúú dá da níhi jáchi ndácaan rí quini ini da. Ta tá nandaja vaha Jesús da já ñasandehé da ta nandicahan da. ²³ Tá naxini ñayivi ndúu cán ña yóho já ñacatóntó ndivaha na já ñacasáhá ndáca tuhún táhan na já cáchí na já:

—Á a juú da yóho cúú da ñaquixi chichi rey David —cáchí xihín táhan na.

²⁴ Tá naxini johó na fariseo ña cáhan ñayivi cán já ñacasáhá cáchí mé na fariseo cán já:

—Taa yóho cúú tává da rí quini ñúhu ini ñayivi jáchi mé Beelzebú, rí cúú tiñáhá sacuahá nu rí quini cán sáhan rí ndée rí nu dá cája da ña —ñacachi na.

²⁵ Ta sa xini va Jesús ña cáhvi ini na cán sahá ña cán quea ñacachi a já xihín ná:

—Tá sáhdá java táhan ñayivi ndúu in nación ta ndúu na cuaha táhdá já cásáhá cáni táhan ndaja táhan mé va na já cama chá ndihi sahá nu ndúu na cán. Ta quiahva já vaha ri xihín in ñuu á in vehe tá sáhdá java táhan ndaja táhan mé ná já quea jándihi na sahá ná. ²⁶ Ta quiahva já yáha xihín Satanás, rí cúú tiñáhá sacuahá. Ta tá ná tavá rí inga rí quini ini ñayivi á tá ná cani táhan ndaja táhan mé rí já quea ndihi sahá ndée ña cómi rí. ²⁷ Mé ndó cáchí ndo ña tává i rí quini ini ñayivi xihín ndée Beelzebú, rí cúú tiñáhá sacuahá. Joo tá mé a ndaa cúú ndusa ña cáchí ndo sahá i jan, ndáchí quehe na cúú cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihín ndée tiñáhá sacuahá. Ña yóho náha ña co cáhvi ndaa ini ndó.

²⁸ Candehé ndo. Yehe tává i ínimá quini ini ñayivi xihín ndée ínimá yíi Ndióxi. Ta xihín ña yóho náha cáxí a ña sa naxinu coo quivi cacomí Ndióxi cuéntá sahá ndó.

²⁹ Candehé ndo. Sácú u in quiahva nu ndo. Ni in dataa a cúu ndihvi da caja cuíhná da ñaha vehe in da ndacú joo tá ná cató da da ndacú cán já cuu quehe da ñaha da cán.

³⁰ 'Ndá na coo cuahan xoo i, cúú ná na coo cúní yehe. Jáchi ndá na coo chindeé yehe xihín ña cája i, cúú ná na sáji nuu nuú i.

³¹ 'Ña cán quea cáchí i xihín ndo ña caja cáhnu ini Ndióxi sahá tá nuú cuachi cája ñayivi xihín sahá tá nuú tuhun quini cáhan na. Joo tá ná cáhan núu na sahá ínimá yíi Ndióxi já quea a cája cáhnu toho ini Ndióxi sahá ña ñacaja na. ³² Caja cáhnu ini Ndióxi janda sahá ndá na ná canahá xihín yehe, da ñachindahá Ndióxi nduu ñayivi joo tá ná canahá na xihín ínimá yíi Ndióxi já quea a cája cáhnu toho ini Ndióxi sahá ná ni nani tácu na ndúu na ñuyíví yóho ta ni tá cuhun na cavií sahá ná nu Ndióxi.

Xihín cuíhi cúun nuú in yito cuu ndicuní ndá yito cúú dó

(Lc. 6:43-45)

³³ 'Xini ñúhú jándee ndó yitó vaha ña ná cuun cuíhi vaha nu do. Jáchi tá ná jándee ndó yitó núu já quea cuíhi núu cuun nu do. Jáchi xihín cuíhi cúun nuú in yito cuu ndicuní ndá yito cúú dó. ³⁴ Mé ndó cúú ndó tátuhun coo jáchi cúú ndó na quini sahá ña cán quea cáhan ndó tuhun quini ta a cuú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínimá ná. ³⁵ In taa vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in taa quini cáhan da ndinuhu ña núu jáchi ña núu quea ndácaan ínimá dá. ³⁶ Mé a ndaa ná cáhan i xihín ndo ña tá ná ndindaa quivi caja vii Ndióxi sahá ñayivi ndúu ñuyíví anda jáví ndiquiahva ñayivi cuéntá nu Ndióxi sahá ndaja táhan tuhun núu ñacahan na ñuyíví yóho. ³⁷ Jáchi sahá mé tuhun ñacahan ndó jan caja vii Ndióxi sahá ndo. Ta xihín ña jan cachi Ndióxi ña á in cuachi ndó á coo cuachi ndó —cáchí Jesús.

Xíca ñayivi quini ña ná caja Jesús ña xitúhún nu ná

(Mr. 8:12; Lc. 11:29-32)

³⁸ Java na fariseo xihín na jánaha ley Moisés ñacahan na xihín Jesús já ñacachi na já xihín á:

—Maestro, cúnĭ nde ña ná caja ndó in ñaha xitúhún nuú nde já ná cuni nde — ñacachi na xihín Jesús.

³⁹ Já nanducú ñehe Jesús tūhun nuú ña cán já ñacachi a já xihín ná:

—Ñayivi quini, ña co cúnĭ cándúsa Ndióxi, ña yóho cúú ña cúnĭ cuni ña xitúhún. Joo a cúnĭ toho na ña. Ña cuni ndusa na quéa ña ndoho ĩ tá quiahva ñandoho Jonás, ña ñasacuu profeta sanahá. ⁴⁰ Jáchi tá quiahva ñasandacaan Jonás unĭ quivĭ xihín unĭ ñuú tixi tiyacá cáhnu tá ñacocó rí ña quiahva já ndacaan ri yehe, ña ñachindahá Ndióxi nduu ñayivi tixi ñundáhyĭ unĭ quivĭ xihín unĭ ñuú.

⁴¹ Ta ñayivi ñasanduu Nínive sanahá cán ndacuĭta na chĭcaan ña cuachi jatá ndó tá ná xĭnu quivĭ caja viĭ Ndióxi sahá cuachi ñayivi ndúu viti. Jáchi mé ña ñasanduu ñuu Nínive cán najándacoo na cuachi cája na tá ñacahan Jonás xihín ná ña ñacachi Ndióxi coo. Ta yehe ĩn chága sahá ĩ a juú ga Jonás joo co cándúsa ndó yehe. ⁴² Jári tá ná xĭnu quivĭ caja viĭ Ndióxi sahá cuachi ñayivi ndúu tiempo viti andá já ndacuĭta in ña ñasacomí cuéntá sahá ñayivi ndúu chí xoo sur sanahá ta chĭcaan ña cuachi jatá ñayivi ndúu tiempo viti. Jáchi mé ña cán vatĭ ñasahĭin xĭcá ndivaha ña ñu rey Salomón sanahá ñasahan ña cuni johó ña tūhun ndíhĭ cáhan ña. Ta yehe ĩn chága sahá ĩ a juú ga Salomón joo co cándúsa ndó yehe.

Jánaha Jesús ña cuahá tañu ndícó coo tucu ínima quini ini ñayivi vatĭ sa ñaquee rĭ
(Lc. 11:24-26)

⁴³ Tá quéta in ínima quini ini in ñataa já quée rí cuahan rí xĭca nuu rí ndijáa yucú íhĭ ndínducú rí nuú candoo rí. Ta tá co ndíñehe rí ña já cásahá cáhvi ini rí já: ⁴⁴ “Coho ndícó coo tucú ini da nuú ñasandacaan í cán jáchi cúú á tátuhun vehé”, cáhán rĭ. Ta tá xĭnu coo rí ini da cán já sándehe rĭ ña ĩn viĭ va ĩni ña cán tá quiahva viĭ ini vehe tá ñatihvi á ta ñandaca ndójó vaha tóco ndihĭ ñaha ini a. ⁴⁵ Andá já quée tucu mé rí quini cán cuahan rí quehe rí usa ga rí quini chága a juú ga mé rí já xĭnu ndihĭ rí ndihvi rí ini ñataa cán. Ta mé ña cán ndiquini chága ña a juú ga tá

ñasandacaan in tálaá rí ini da. Quiahva já ndoho ri ñayivi quini ndúu tiempo viti — cáhĭ Jesús.

Náná Jesús xihín ñani a cúnĭ ña cuni na a
(Mr. 3:31-35; Lc. 8:19-21)

⁴⁶ Nani cáhan yĭi va Jesús xihín ñayivi já ñaxĭnu coo náná Jesús xihín ñani a ña ná cáhan ña xihín á cúnĭ ña. Joo ñacandoo na ndíta na jatá véhe. ⁴⁷ Já ñasahan in na cáxi tūhun na nuú Jesús já cáhĭ ña já xihín á:

—Jatá véhe cáa ĩn nánún xihín ñanún ta cáhan ña xuhun cúnĭ ña — ñacachi na xihín Jesús.

⁴⁸ Joo nanducú ñehe Jesús tūhun nuú ña cán já ñacachi a já xihín ná:

—Cáhan ĩ xihín ndó ndá ña cúú ndusa náná ĩ xihín ñani ĩ — ñacachi Jesús xihín ná.

⁴⁹ Andá já ñanaha ndáha mé á ña xĭca tuun xihín á cán já ñacachi a já:

—Ña yóho cúú ná tátuhun náná ĩ xihín ñani ĩ. ⁵⁰ Jáchi ndá ña cája ña cúnĭ Ndióxi, tátá ĩ, mé a ĩn indivĭ, ña cán cúú ná tátuhun ñani ĩ xihín quiahva ĩ xihín náná ĩ — ñacachi Jesús xihín ña cán.

13

Sácú Jesús quiahva sahá in ña sátá tata
(Mr. 4:1-9; Lc. 8:4-8)

¹ Sa mé quivĭ já ñaqueta Jesús vehe cán já ñasahan ñasacoo a yati yuhú tañuhú cán.

² Ta sahá ña ñataca cuahá ndivaha ñayivi nu á sahá ña cán quéa ñandaa mé á jatá in barco loho ta ñasacoo a jatá do cán nani ndúu ñayivi ñutĭ yuhú tañuhú cán. ³ Andá já ñacasahá jánaha cuahá ñaha nu ná ta ñasacu a quiahva nu ná já ñacachi a já xihín ná:

—In ña sátá tata ñaquee da cuahan ña cata da ña. ⁴ Ta tá sátá ña ña cuahan ña já ñacuyu java ña íhĭ ta cán ñaxĭnu laa ta ñasaxĭ rí ña. ⁵ Ta java ña ñacuyu a tañu yuu nuú coo cuaha ñuhú. Ta cama chá ñanduta mé tata jáchi coo cúná ñuhú nuú ñacuyu a. ⁶ Joo tá ñaqueta candĭi já najáhĭchĭ ñaha sahá ña coo cuaha yóho a chí ñandihĭ sahá. ⁷ Ta java tata ñacuyu tañu tohĭnú ta tá ñasahnu tohĭnú cán já ñanditáha ndihĭ a ñacaja tohĭnú. ⁸ Ta java tata ñacuyu a nu ñuhú vaha ta já ñasahan cuahá ñaha ña jáquee na nu á. Java ña ñasahan in ciento

a nuú in in tata ta java ña nasahan uní jícó uxu a ta java ña nasahan oco uxu a nuú in in tata. ⁹ Na ín johó, ná cuni johó na —nācachi Jesús.

Ndicani Jesús ndá saha quéa nasacu a quiahva nu ná

(Mr. 4:10-12; Lc. 8:9-10)

¹⁰ Na xíca tuun xihín Jesús cán nācayati na nu á já nācasáhá ndáca tuhún na mé á ndá cuéntá quéa jánahá mé á xihín quiahva cuití va nuú ñayivi. ¹¹ Andá já nācachi Jesús já xihín ná:

—Ña coó nācandaā ini ndó jihna ña cán cāndaā ini ndó viti jáchi nāsuná Ndióxi xíní túní ndó cāndaā ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúú nā sácú u quiahva nuu. ¹² Jáchi ndá na sa ín ñaha nuu, ñehe táhvi na coo chága ñaha nu ná. Joo na co á ñaha nuu, janda ña chá ín nu ná ndindaa. ¹³ Sahá ña cán quéa cáhan i xihín ndinuhu quiahva xihín mé ndó jáchi vatí sándehe na joo cúú ná tátuhun na co tívi nuu. Ta vatí xíní johó na joo cúú ná tátuhun na jóho jáchi co cāndaā ini na ña cáhan i xihín ná. ¹⁴ Ta xihín ña yóho xínu coo nuú tuhun nācachi profeta Isaías sanahá ndivaha tá nācachi da já:

Vatí xíní johó na joo cúú ná tátuhun na jóho jáchi co cāndaā ini na ña cáhan i xihín ná.

Ta vatí sándehe na joo cúú ná tátuhun na co tívi nuu.

¹⁵ Jáchi nandaji xíní túní tóco ndihi ñayivi ñuu yóho.

Ta ndájí tuun johó na ta ndájí tuun nduchú núu na.

Ña cán quéa a cuú cuni johó na, ta ni a cuú cāndaā ini na ña xíní johó na.

Ta xihín ña yóho co ndícó coo na nuú i ña ná ndaja vaha i na, nācāhyí Isaías sanahá.

¹⁶ Joo tahví nācuu ndó jáchi cāndaā ini ndó ña sándehe ndó xihín ña xíní johó ndó. ¹⁷ Mé a ndaa ná cáhan i xihín ndó ña cuahá ndivaha na profeta xihín cuahá ndivaha ñayivi vaha nāxica ini na cuni na ña xíní ndó yóho viti joo coó nāxini na ña ta nāxica

ini na cuni johó na ña xíní johó ndó yóho joo coó nāxini johó na ña.

Ndicani Jesús ña cúní cachi quiahva nasacu a nu ná

(Mr. 4:13-20; Lc. 8:11-15)

¹⁸ Cuni johó ndó ña cúní cachi quiahva nasacu u sahá da sātá tata cán. ¹⁹ Ñayivi, na xíní johó tuhun vaha sahá ña sa nācayati quiví cacomí Ndióxi cuéntá sahá ñayivi joo co cāndaā ini na ña, na cán cúú ná tátuhun tata ña nācuyu íchi cán. Jáchi xínu tiñáhá saçuaha ta tává rí tuhun Ndióxi cán ínima ná. ²⁰ Ta tata ña nācuyu tañu yuu cán náha ndá quiahva ín ñayivi, na cájji ndivaha ini ndiquehe tuhun Ndióxi. ²¹ Joo sahá ña co ñehe íní yóho a cuhun cúná a sahá ña cán quéa chá tiempo cuití va cāndusa na tuhun Ndióxi. Jáchi tá casáhá ndóho ini na sahá tuhun Ndióxi chí jándacoo va na ña. ²² Ta tata ña nācuyu tañu tohíñú cán náha ndá quiahva ín ñayivi, na xíní johó tuhun Ndióxi joo co jándacoo na íchi nāxica na jihna. Ta casáhá ndicani ini na sahá ñaha ñuyiví yóho ta casáhá na cātóo na canduu cuahá ñaha cuicá nu ná ta casáhá ndicají ini na caja na ña núu. Sahá ña cán quéa cúú á tátuhun tata ña co cána ñaha jáquee na nuu jáchi coó nācāhnu na xihín tuhun Ndióxi. ²³ Joo tata ña nācuyu nuú ñuhú vaha cán náha ndá quiahva ín ñayivi, na xíní johó tuhun Ndióxi ta cāndaā ini na ña ta cája na ña cájji ini Ndióxi xihín. Java na cúú ná tátuhun yucu trigo ña nasahan in ciento a nuú in in tata. Ta java na cúú ná tátuhun tata ña nasahan uní jico uxu a nuú in in tata. Ta java na cúú ná tátuhun tata ña nasahan oco uxu a nuú in in a —nācachi Jesús xihín ná.

Sácú Jesús quiahva sahá yucu quini nána tañu trigo

²⁴ Andá já nasacu Jesús inga quiahva nuú ñayivi ndúu cán já nācachi a já xihín ná:

—Tá ná casáhá cacomí Ndióxi cuéntá sahá ñayivi já cacuu a tátuhun tá nāxutu in dataā trigo ña vaha nu ñuhú dá. ²⁵ Joo tá sa ndúu ndihi na quijí na já nāxinu coo in da co cúní táhan xihín dá ta nāchihin da tata yucu quini tañu trigo cán já nāquee da cuahan da. ²⁶ Ta tá nācāhnu trigo cán ta nācasáhá cána yóco a já nāndutā ri yucu

quini cán. ²⁷ Anda já nasahan na cája chúun cán cahan na xihín xitoho na já nacachi na já: “Candehé ndo. Tata vaha quéa nachihin ndó nu ñúhu ndo joo co cánda ini nde ndáchi naquixi yucu quini nanana xihín á yóho”, nacachi na cán xihín xitoho na. ²⁸ Anda já nanducú ñehe da cán tuhun nu ná já nacachi da já xihín ná: “Ndá da co cúní yehe, da cán cúú da nacaja ña yóho”, nacachi da. Anda já nacachi na cája chúun nu dá cán já xihín dá: “Á co cúní ndó ña ná quihvi nde tuhun ndihi nde yucu quini cáa tañu trigo”, nacachi na xihín dá. ²⁹ Anda já nacachi da já xihín ná: “Ná coo mé á jáchi tiaha náa nani tuhun ndó yucu quini jan cuu tuhun ndó yucu trigo xihín á. ³⁰ Vaha chá ná quiahva í ñamaní cuahnu a xihín trigo janda quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáquee ña ná tavá xoo na yucu quini jihna ñúhú ta ná cató na ña tá nuhni tá nuhni ña ná chican ñúhu ná ña. Ta anda jáví ná jataca na trigo taán vaha na ini yaca ñaha í”, nacachi da —cáchi Jesús sácú a quiahva nu ná.

Sácú Jesús inga quiahva saha ndíqui mostaza
(Mr. 4:30-32; Lc. 13:18-19)

³¹ Ta nasacu Jesús inga quiahva nu ná já nacachi a já xihín ná:

—Tá ná xinú coo quiví cacomí Ndióxi cuéntá saha ñayivi já cúú á tátuhun in ndíqui mostaza ña chíhin in dataa nu ñúhu da. ³² Cúú á ndíqui loho chága nu tóco ndihi ndíqui válí ín ñuyiví. Joo sáhnú a janda quiahva ndúu a in yító, dó cáhnú nu ndíhi yító nu xinú coo laa cávaha rí choho rí nu ndáha do —cáchi Jesús.

Sácú Jesús quiahva sahá yusá naxaa
(Lc. 13:20-21)

³³ Ta nasacu Jesús inga quiahva nu ná já nacachi a já xihín ná:

—Tá ná cacomí Ndióxi cuéntá saha ñayivi já cacuu a tátuhun tá cává táhan in ñáñaha uní táhnda náhnú harina xihín loho yusá naxaa ña ná jánañu a tóco ndihi mé yusa cán —nacachi Jesús.

Sácú Jesús quiahva cuití va nuú ñayivi
(Mr. 4:33-34)

³⁴ Xihín ndinuhu quiahva cuití najána ha Jesús tóco ndihi ña yóho nuú ñayivi. ³⁵ Já nacaja Jesús ña ná xinú coo nuú ña nacachi in da profeta sanahá tá nacachi da já:

Xihín ndinuhu quiahva cuití va cahan i xihín ñayivi, ta cahan i sahá ñaha nasahin jehé nu ná janda mé saha tá cámaní cava sahá sahá ñuyiví —cáchi tuhun Ndióxi.

Ndicani Jesús ña cúní cachi quiahva nasacu a sahá yucu quini nanana tañu trigo cán

³⁶ Tá nandihí nandindayí Jesús ñayivi cuaha ndúu cán já naquihvi a ini vehe. Anda já nacativi na xica tuun xihín a cán nu á já nacachi na já xihín á:

—Ná ndicani ndó nuú nde ndía cúní cachi quiahva nasacu ndó sahá yucu quini nanana tañu trigo cán —nacachi na.

³⁷ Anda já nacachi Jesús já xihín ná:

—Da xútu tata vaha cúú yehe, da nachindahá Ndióxi nduu ñayivi. ³⁸ Ta ñúhu nu xútu u tata cúú á ñayivi ñuyiví. Ta tata vaha cán cúú á yuhú nuú na cómí Ndióxi cuéntá saha. Ta yucu quini cán cúú á yuhú nuú ñayivi quini, na cúú cuéntá rí quini. ³⁹ Ta da co cúní táhan xihín i nasahan da naxutu da yucu quini nu ñúhu cán ta cúú dá yuhú nuú tiñahá sacuaaha. Ta tiempo jáquee na cán cúú á tá ná xinú coo quiví caha víi Ndióxi sahá ñayivi ndúu ñuyiví. Ta na xica jáquee cán cúú ná tát Ndióxi. ⁴⁰ Ta tá quiahva nacaja na cán xihín yucu quini tá najátaca na ña ta nachican ñúhu na ña quiahva já yaha ri xihín ñayivi ñuyiví yóho tá ná tandaa quiví ndihi sahá ñuyiví. ⁴¹ Ta yehe, da nachindahá Ndióxi nduu ñayivi chindahá i tát mí i ña ná cahnda java táhan na na cómí i cuéntá saha xihín na co cúú cuéntá mí i. Jáchi na cán jácahan na inga na caha na cuachi xihín java ga na cája ña núu. ⁴² Ta jáqueta nuu i na ini indayá ta cán cuacu na anda quiahva chicahña nuhu na jáchi ndóho ndivaha ini na. ⁴³ Ta anda já na cája ña cúní Ndióxi ndiyihvi ndaa na tá quiahva yehe candii nuú cacomí Ndióxi cuéntá saha ná, mé á cúú á tátá na. Ndá na in johó, ná cuni johó na.

Sácú Jesús quiahva sahá sató jihún ndacaan jehé

44 'Tá ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndíñehe dá in sató jiuhún ña ndácaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jiuhún cán.

Sácú Jesús quiahva sahá in jíqui sándacu na ña yahvi ndivaha

45 'Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha. 46 Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

Sácú Jesús quiahva sahá in ñunu táva tiyacá

47 'Ta tá ná cacomí Ndióxi cuéntá sahá ñayivi cacuu a tátuhun in ñunu jácana na nuú tañuhú ta já tíin na tá nuú tiyacá. 48 Ta tá sa nachutú ñunu cán já táva na tiyacá cán yuhú tañuhú ta cán sácoo na ndácahnda java na ri. Ta rí vaha cán táan vaha na ini toyicá na joo rí núu cán xíta ri cája na. 49 Quiahva já yaha ri xihín ñayivi tá ná ndihí sahá ñuyíví. Jáchi queta tátó Ndióxi ndacahnda java na vaha tañu na quini. 50 Ta ñayivi quini cán chicaan na ini indayá ta cán cuacu na janda quiahva chicáñña nuhu na jáchi ndóho ndivaha ini na —cáchi Jesús.

Tá jánaha Jesús sahá ña saá xihín ña yatá

51 Tá nandihí já nandaca tuhún Jesús na já nacachi a já:

—Á cándaá ini ndó tóco ndihí ña cáhan i yóho —cáchi a.

—Ajan, cándaá ini nde ña —nacachi na cán xihín á.

52 Anda já nacachi Jesús já xihín ná:

—Tá jácuaha in da jánaha ley Moisés sahá ndaja ndiquiahva da mé dá ndáha Ndióxi cacomí a cuéntá saha dá já cúu dá tátuhun in dataa, da íin ñaha ini vehe. Ta xini vaha da táva da ñaha da á cúu á ña saá á ña yatá —cáchi a.

Tá cuahan Jesús ñuu Nazaret (Mr. 6:1-6; Lc. 4:16-30)

53 Tá nandihí najánaha Jesús xihín quiahva yóho já naquee a cuanúhu a. 54 Tá naxinu a ñuu mé á já nacasáhá jánaha ini veñuhu cán. Ta jandá johó cátóntó ñayivi ñuu cán já cáchí na já:

—Ta ndájá nacatiahva nahá ri da yóho ña xini da. Ta ndaja cája da ñaha xituhún yóho. 55 Á a juú da yóho cúu jahyi da cája chúun xihín yító. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. 56 Ta sa mé ñuu yóho ndúu ri quiahva da jan. Ndájá nacatiahva nahá da ña jánaha da nu yo, dá já —nacachi xihín táhan na cán.

57 Ta chí coó naxeen na candúsa ñahá na. Sahá ña cán queá nacachi a já xihín ná:

—Vatí tóco ndihí ñayivi cája cáhnu na in profeta joo na vehe da xihín na ñuu da co candúsa na da —cáchi Jesús.

58 Ta coó nacaja cuahá Jesús ña xituhún ñuu cán jáchi coó nacandúsa toho ñayivi cán mé á.

14

Tá naxihí Juan, da nacaja ndúta ñayivi (Mr. 6:14-29; Lc. 9:7-9)

1 Mé tiempo cán naxini johó Herodes, da cúu gobernador cán ña ndítuhún na sahá Jesús. 2 Anda já nacachi da já xihín mozo da:

—Á a juú Jesús cúu á Juan, da najácandúta ñayivi ta viti nanditacu tucu da. Sahá ña cán queá íin ndée da cája da tóco ndihí ña cája da yóho —cáchi Herodes.

3 Jáchi janda mé saha natiin Herodes Juan nacató ñahá da ta nachicaan da da vecaa. Ta nacaja da ña yóho sahá Herodías, ña nasacuu ñájihí Felipe, ñani da. 4 Jáchi mé Juan najánani ñahá da sahá ña íin Herodes xihín ña ta já nacachi da:

—Co ndítahan cóun xihín ñájihí ñanún —nacachi Juan xihín dá.

5 Ta janda já nanducú Herodes cahní da Juan joo a cúu caja da ña jáchi yíhvi da ñayivi sahá ña cándúsa na ña cúu Juan in profeta nachindahá Ndióxi. 6 Joo in tañu nani ndácaan Juan vecaa já nacavaha Herodes víco sahá quivi nacacu da. Ta nandaca ndíchí ña cúu jahyi Herodías cán naxita sahá ña nu ndihí na ndúu víco cán.

Ta a juú quiahva nacajii ini Herodes xihín ña yóho. ⁷ Sahá ña cán quéa quivi Ndióxi tává da tá sahan da tuhun da nu ña cán ña quiahva da nu ña ndá ña cuni mé ña caca ña nu dá. ⁸ Tá nandihhi nandaca tuhún jihna ña náná ña já ndáva ña nasahan ña nu Herodes já cáhí ña já xihín dá:

—Viti ñuhú cuni ña ná quiahva ndó yiquí jíní Juan, da jácanduta ñayivi nuú i ini in cohó cáhnu —nacachi ña xihín dá.

⁹ Tá nacachi ña já xihín Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ña cán ta sahá ña cuni da candoo vaha da nuú na ndúu víco xihín da cán sahá ña cán quéa nasahnda da chuun ña ná quiahva na ña nu ña. ¹⁰ Chí nasahnda da chuun ña ná chituhun ná yiquí jíní Juan ini vecaa cán. ¹¹ Ta já nachicaan na yiquí jíní da ini in cohó cáhnu já nasahan na ña nu ña cán. Anda já nandiquiahva ña cán ña ndáha náná ña.

¹² Anda jáví naxinu na naxica xihín Juan cán já nasahan na nandiquehe na yiquí cuñu da ta najánduxu na da. Ta já nasahan na nacaxi tuhun na ña yóho nuú Jesús.

Tá nasahan Jesús ña cuxu uhun mil taa
(Mr. 6:30-44; Lc. 9:10-17; Jn. 6:1-14)

¹³ Tá naxini johó Jesús saha Juan já naquee xoo a ini in barco loho cuahan nuú co ndúu ñayivi. Joo tá naxini johó ñayivi ña cuahan Jesús já naquee na ñuu na ndíco na cuahan sahá na nu ín a. ¹⁴ Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja vaha mé á na quíhvi naquixi tañu na cán. ¹⁵ Ta tá sa cáhini cuahan já nacayati na xica tuun xihín a cán nu á. Já cáhí na já xihín á:

—Sa nahini va ta a juú xoo nu ndúu ñayivi quéa yóho. Ndindayí ndó ñayivi ná cuhun na ñuu válí yati jan já ná cueen na ña cuxu na —nacachi na cán xihín á.

¹⁶ Anda já nacachi a já xihín ná:

—Co xíní ñuhú toho quee na cuhun na. Mé ndó quiahva ndó ná cuxu na —nacachi Jesús.

¹⁷ Anda já nacachi tucu na cán já xihín á:

—Co mé ñaha va cuxu na yóho. Uahun víxí pan xihín ivi laá tiyacá cuití va ín yóho —nacachi na xihín Jesús.

¹⁸ —Taxi ndó a chóho —nacachi Jesús xihín ná.

¹⁹ Anda já nasahnda Jesús chuun ña ná ndaca nduu ndihi na cán nuú yucu. Anda já natiin a ndíhuhun pan xihín ndíví tiyacá cán já nasandehé a chí indiví já nandiquiahva ndixahvi nu Ndióxi. Tá nandihhi já nasahnda java pan ta nasahan ña nuú na xica tuun xihín á cán ta na cán nandicahnda na ña nuú ñayivi cuaha cán.

²⁰ Ta tóco ndihi na naxixi na janda quiahva nachutú na. Ta tá nandihhi naxixi na já najátaca na ña nacandoo cán ta najácutú na uxu ivi toyicá xihín ña nacandoo cán.

²¹ Ta tóco ndihi na naxixi cán nasacuu na tátuhun uhun mil taa. Co cáhan sahá najihí xihín na valí.

Tá naxica sahá Jesús nuú tañuhú
(Mr. 6:45-52; Jn. 6:16-21)

²² Ta tá nandihhi já nacaja Jesús ña ná ndihvi na xica tuun xihín á cán ini in barco ña ná cuhun cuéé na inga xoo tañuhú cán nani candoo tóo mé á jándindayí a ñayivi cuaha cán. ²³ Ta tá sa najánduta tóco ndihi ñayivi já nandaa mé á yucu cuahan caca tahví a nu Ndióxi. Tá nandihhi já nacuaá ta in tuhún mé á ndacaan xica tahví a nu Ndióxi cán. ²⁴ Ta ndaja coo barco loho, dó candooj na xica tuun xihín á cán sa naxinu coo dó janda mahñú tañuhú cuahan do. Ta ndícojo ndivaha tañuhú jáchi xoo cuahan na vaxi tachí. ²⁵ Joo tátuhun sa cuahan tívi já xica sahá Jesús cuahan nuú tañuhú naxinu a nu ná. ²⁶ Ta tá naxini na xica sahá Jesús vaxi a nuú tañuhú cán já nacatontó na. Ta nacasahá na cáyuhú cóhó na sahá ña yíhvi na já cáhí na já:

—Ínima quéa vaxi yóho —cáhí na.

²⁷ Joo ivi laá nandicahan Jesús xihín ná já cáhí a já:

—Ndacú coo ini ndó jáchi yehe va cúu u. A yíhvi toho ndó —nacachi a xihín ná.

²⁸ Anda já nacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —nacachi da xihín Jesús.

²⁹ Ta já cáhí Jesús já:

—Naha quíi —cáchi a xihín dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús. ³⁰ Joo tá naxini da tachí ndeé xícó nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáchi da já xihín Jesús:

—Chindeé ndó yehe, xitoho i —nacachi da xihín á.

³¹ Ta cama chá natiin Jesús ndáha da ta já nacachi a já xihín dá:

—Ndá cuéntá quéa co cándéé chága inún yehe ta nacasáhá cáhvi ivi johó inún —nacachi Jesús xihín dá.

³² Ta tá nandaa ndívi na jata barco já nacatáji tachí cán. ³³ Anda já nacaja cáhnu na ñúhu ini barco cán Jesús já cáchi na já xihín á:

—Mé a ndaa táhyí cúu jivi ndusa ndó in túhún jiní já jahyi Ndióxi —nacachi na xihín á.

Tá nandaja vaha Jesús na quíhvi ndúu ñundáhyi Genesaret

(Mr. 6:53-56)

³⁴ Ta já naxica loho ga na nuú tañuhú cán já naxinu coo na ñundáhyi Genesaret.

³⁵ Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasaá na nu á.

³⁶ Ta na quíhvi cán naxica tahví na nu á ña ná quiahva ñamaní caní ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

15

Ña cája quini ínimá ñayivi

(Mr. 7:1-23)

¹ Ndaja coo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchi na já xihín á:

² —Ndávaha co cája na xíca tuun xuhun ña nacachi tásáhnu jíco yo caja na. Ndávaha xíxi na tá cámani ndahá na tá quiahva sáhdá ley caja na —nacachi na cán xihín Jesús.

³ Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá quéa jándacoo ndó ña sáhdá Ndióxi nu ndó caja ndó. Ta ña cája ndó quéa ndíco ndó costumbre mé va ndó. ⁴ Jáchi sáhdá Ndióxi chuun já cáchi a já: “Caja cáhnún tátún xihín nánún.” Ta jári cáchi a: “Ndá na ná chícaan cháhan jata tátá na á náná na, ndítahan quivi na”, cáchi a. ⁵ Joo ndóhó, jánaha ndó nuú ñayivi ña cuu cuahan na já xihín tátá na á náná na: “A cuú chindeé e ndóhó jáchi sa nasacu xoo i ñaha i quiahva i ña nu Ndióxi”, cáchi na. ⁶ Tá ná cachi na ña yóho já quéa co ndúsa ga chindeé na tátá náná na. Quiahva johó cája ndó ta sácu xóo ndó ña nasahnda Ndióxi chuun nu ndo ta ndája ndó a tátuhun in ñaha ña coo saha. Jáchi ndíco cáhnu ndó ña najándacoo tásáhnu jíco ndo nu ndo. ⁷ Co cúu ndó tá quiahva ndáa ndó. Mé a ndaa nacahan profeta Isaías saha ndo sanahá tá nacahyí da ña nacachi Ndióxi:

⁸ Yuhú ninu uun na cája cáhnu na yehe.

Ta co cája cáhnu na yehe xihín ndinuhu ínimá na.

⁹ Ta mé a uun quéa cája cáhnu na yehe, jáchi ña jánaha na nuú ñayivi cuití va cúu á ña quíxi jiní mé va na, nacachi profeta Isaías sanahá ndivaha —nacachi Jesús xihín na cán.

¹⁰ Tá nandihí já nacana Jesús tóco ndihi ñayivi ndúu cán já nacachi a já xihín ná:

—Cuni johó vaha ndó ña cáhan i xihín ndó ta ná candaa ini ndó ña. ¹¹ A juú ñaha xíxi ñayivi ndája quini ínimá ná. Tuhun quini quéta yúhu ná ña jan quéa cája quini ñahá —nacachi Jesús.

¹² Tá nandihí já nacayati na xíca tuun xihín Jesús cán nu á já nacachi na já xihín á:

—Chí a váha mé nacuu ini na fariseo tá naxini johó na ña nacachi ndó jan —nacachi na cán.

¹³ Anda já nacachi Jesús já xihín ná:

—Ñayivi, na co ndíquehe vaha tuhun Ndióxi cúu ná tátuhun in yíto, dó coo najándee Ndióxi, tátá i ña ín indiví. Sáhá ña co cúu dó cuéntá mé á já tandaa quívi ña tuhun mé á do anda yóho do. ¹⁴ Sáhá ña cán quéa co ndítahan ndicani ini ndó sahá na jan jáchi na cuáa va cúu ná. Ta a cúu toho caja in da cuáa candaca da inga da cuáa

cuhun da jáchi ndívi já da ndacava da yávi —ñacachi Jesús.

15 Tá nandihí já ñacachi Pedro já xihín Jesús:

—Ndicani loho ndó nuú nde ndaja cáa ña cáchí ndó ña co cája quini toho ña xíxi ñayivi mé ná jáchi co cándaá ini nde ña —ñacachi Pedro xihín Jesús.

16 Já ñacachi Jesús já xihín ná:

—Á coó toho xíní túni ri ndóhó va, vaha. 17 Jáchi co cándaá ini ndó ña tóco ndihí ñaha xíxi ñayivi a cuú caja quini a na. Jáchi ña xíxi ñayivi co xínu a ini ínima ná joo xínu coo ña tixi va na já queta tucu a yiquí cuñu na. 18 Ña cuu ndaja quini ñayivi cuú ña quíxi ínima ná tátuhun tuhun cáhan na xihín ña cája na. 19 Jáchi chí ínima ñayivi quíxi ña cáhvi núu ini na tátuhun ña cáhvi ini na cahni na ndii. Ta sa mé cán quíxi ña cáhvi ini in dātaa coo da xihín ñájíhí ñani táhan da á xihín in ña co cuú ñájíhí da. Ta sa mé cán quíxi ña ndiáva íni da caja cuíhná da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cánahá da xihín Ndióxi. 20 Tóco ndihí ña cáhvi núu ini ñayivi caja na, ña yóho quéa ndája quini a na. Joo co cáquini toho ñayivi sahá ña co ndáhá na tá cámaní cuxu na tá quiahva ín costumbre na —ñacachi Jesús xihín na xíca tuun xihín á cán.

*Tá ñacandeeé ini in ñá tóho Jesús
(Mr. 7:24-30)*

21 Tá nandihí já naquee Jesús cuahan chí ñundáhyi cuéntá Tiro xihín cuéntá Sidón cán. 22 Ta nu xíca cuahan cán naqueta in ñáñáha ñundáhyi Canaan nu á já cáyuhú ña já cáchí ña já xihín á:

—Xitoho i, da naquixi chichi David caja ndó ñamaní candáhví loho ini ndó yehe. Chindeé ndó jahyi jíhí i jáchi rí quini ndácaan ini ña —ñacachi ñáñáha cán xihín Jesús.

23 Joo ni in túhún tuhun coó nanducú ñehe Jesús nu ña. Anda já ñacativi na xíca tuun xihín a cán nu á já ñacachi na já xihín á:

—Taxi ndó ña jan ná quee ña cuhun ña jáchi cáyuhú ña ndácaa ña jata yó vaxi ña —ñacachi na cán xihín Jesús.

24 Anda já ñacachi Jesús xihín ñáñáha cán já:

—Ñachindahá Ndióxi yehe vaxi i nuú ñayivi Israel cuití va, mé na cuú tátuhun ndicachi, rí nandiñuhú —ñacachi Jesús.

25 Anda já ndáva ña cán naixinu coo ña ñacaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

26 Anda já ñacachi Jesús já xihín ñá:

—A váha toho candaa i pan ndahá na valí ta já cana i ña nuú tina —ñacachi Jesús xihín ñá cán.

27 Anda já ñacachi ñá cán já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácuyu jahyi xitoho rí —ñacachi ñá cán xihín Jesús.

28 Anda já ñacachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiahva cúni mún —ñacachi Jesús xihín ñá.

Chí mé hora já nandivaha jahyi jíhí ña.

Ndája vaha Jesús cuahá na quíhvi

29 Tá nandihí já naquee Jesús cuahan já naixinu coo a yati yuhú tañuhú Galilea. Já nandaa in jiní yúcu ta cán nasacoo a. 30 Ta já ñacasáhá ñataca cuahá ndivaha ñayivi já ñehe na na quíhvi saha xihín na cuaá xihín na níhí xihín na réncó ndáha. Ta cuahá ga nuú na quíhvi ñehe na ñacasaa na ñachinduu na na nu Jesús. Ta nandaja vaha mé á na. 31 Ta xihín ña yóho a juú quiahva ñacatóntó na tá naixiní na ña ñacasáhá ndícahan na níhí. Ta ñacatóntó na tá naixiní na ña nandivaha ndahá na réncó ta ndícaca vaha na quíhvi saha ta quiahva já nandivaha rí na cuaá. Ta ñacasáhá na cája cáhnu na Ndióxi, mé a cómi cuéntá sahá na Israel.

*Tá nasahan Jesús ña cuxu comi mil natqa
(Mr. 8:1-10)*

32 Anda já ñacana Jesús na xíca tuun xihín á já ñacachi a já xihín ná:

—Táhnđa ndivaha ini i sahá ñayivi yóho jáchi sa naixinu uní quívi ndúu na xihín i ta chí coo ga ña cuxu na. Ta co cúni chindahá i na nuhu na vehe na jáchi cámaní cuxu na ta tiahva náá cuitá na ta cuyu na íchi —ñacachi Jesús.

³³ Anda já nacachi na xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nacachi na cán xihín Jesús.

³⁴ Já nacachi Jesús já:

—Ndaja pan cómi ndo.

Já nacachi na cán já:

—Usa pan xihín java tiyacá válí.

³⁵ Anda já nasahnda Jesús chuun ña ná cacoo ndihi ñayivi nu ñúhu cán. ³⁶ Ta

já natiin a ndíhusa pan cán xihín java tiyacá válí cán já nandiquiahva ndixahvi nu Ndióxi. Ta já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuaha cán.

³⁷ Ta naxixi tóco ndihi na janda quiahva nachutú tixi na. Ta tá najánditaca na ña nacandoo cán já nachutú usa toyicá xihín ña. ³⁸ Ta na naxixi cán cúu ná comi mil taa ta co cáhan sahá najihí xihín na válí.

³⁹ Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuénta Magdala.

16

Cúni na fariseo xihín na saduceo cuni na in ña xitúhún caja Jesús

(Mr. 8:11-13; Lc. 12:54-56)

¹ Ta ndaja coo naxinu coo na fariseo xihín na saduceo nu Jesús. Ta sahá ña cuni na coto ndojó cuití ñahá na sahá ña cán quea naxica na nu á ña ná caja in ña xitúhún cuénta indivi já ná candaa ini na á mé a ndaa cúu á ña nachindahá Ndióxi. ² Anda já nanducú ñehe Jesús tuhun nu ná já nacachi a já xihín ná:

—Tá nahini já cáchi ndo já: “Tiempo vaha ndivaha cacuu a jáchi ndiyéhe cuhá indivi”, cáchi ndo. ³ Ta naha cáchi ndo já: “Viti ndusa quea cuun ndeé ndivaha javi jáchi in víco ndivaha ta in víco cuhá indivi”, cáchi ndo. Co cúu ndó tá quiahva ndaa ndó. Ndá cuénta quea tiahva ndó ndicuni ndó ndá quea coo tá sándehe ndó indivi joo co tiahva ndó ndicuni ndó ndá tiempo cúu á viti. ⁴ Ñayivi quini, na co cuni candúsa Ndióxi, na cán cúu na xíca ña ná caja i ña xitúhún nu ná. Joo ni in túhún toho

ñaha xitúhún a cája ga i nu ná. In túhún ña candehé na cacuu a ña tandaa quivi ndoho i tá quiahva nandoho profeta Jonás sanahá ndivaha —nacachi Jesús xihín ná.

Já naquee a cuahan.

Tá sácú Jesús quiahva sahá na fariseo (Mr. 8:14-21)

⁵ Ta ndaja coo naxinu coo a inga xoo tañuhú xihín na xíca tuun xihín á cán ta nandindojó na cán cañehe na pan cuxu na.

⁶ Tá nandihí já nacachi Jesús já xihín ná:

—Candehé ndo. Cuénta coo ndó xihín na fariseo ta xihín na saduceo jan jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

⁷ Joo na xíca tuun xihín á cán ndítuhún xihín táhan na ña nacachi Jesús já sahá ña coo pan ñehe na cuahan xihín ná.

⁸ Ta tá nacandaa ini Jesús ña cáhan na já nacachi a já xihín ná:

—Ndá cuénta quea co cándee cáhnu ini ndó yehe ta cáhan ndo ña cáchi i ña yóho xihín ndo sahá ña co ñehe ndó pan vaxi ndó. ⁹ A ñaha cánda ini ndó. Ndítahan ndicuhun ini ndó ña nandaja cuhá i uhun víxi pan tá naxixi uhun mil taa. Ta sa xini ndó ndaja toyicá najácutú ndo xihín ña nacandoo cán. ¹⁰ Ta ndítahan ndicuhun ini ndó ña nacaja i xihín usa pan tá nandicahnda i ña naxixi comi mil taa ta sa xini ndó ndaja toyicá najácutú ndo xihín ña nacandoo cán. ¹¹ Ndá cuénta quea co cánda toho ini ndó ña coo nacachi i ña yóho xihín ndó sahá ña coo pan ñehe ndó vaxi ndó. Joo nacachi i ña cuénta coo ndó xihín na fariseo ta xihín na saduceo jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

¹² Tá nacachi Jesús ña yóho já nacandaa ini na xíca tuun xihín á cán ña a juú toho sahá yusa naxaa cáhan Jesús saha. Ña cuni Jesús cachi a xihín ná quea cuénta vaha ná coo na xihín ña jánaha na fariseo xihín na saduceo.

Tá cáxi tuhun ndaa Pedro ña cúu Jesús mé a nachindahá Ndióxi cacomí a cuénta sahá ñayivi

(Mr. 8:27-30; Lc. 9:18-21)

¹³ Tá naxinu coo Jesús ñundáhyi Cesarea cuéntá Filipino já nandaca tuhún a na xíca tuun xihín á cán já nacachi a já xihín ná:

—Ndá da cáchi ñayivi cúu yehe, da nachindahá Ndióxi nduu ñayivi —nacachi Jesús.

¹⁴ Já nacachi na cán já:

—Java na cáchi na ña cúu ndó Juan, da nacaja ndúta ñayivi. Ta java na cáchi na ña cúu ndó profeta Elías. Ta java na cáchi na ña cúu ndó profeta Jeremías. Ta java na cáchi na ña cúu ndó in táhan profeta nasanduu sanahá —nacachi na.

¹⁵ Anda já nacachi Jesús já xihín ná:

—Ta ndóhó ri, ndá da cáchi ndó cúu u —nacachi a.

¹⁶ Anda já nanducú ñehe Simón Pedro tuhún nu Jesús já nacachi da já xihín á:

—Mé ndó cúu Cristo, ña nachindahá Ndióxi cacomí cuéntá sahá ñayivi. Ta cúu ndó in tuhún jini já jahyi Ndióxi, mé a tácu ín indiví —nacachi da.

¹⁷ Anda já nanducú ñehe Jesús tuhún nu dá já nacachi a já xihín dá:

—Tahví nahá cúun, Simón, jahyi Jonás jáchi ni in tuhún ñayivi coo nacaxi tuhún ña yóho xuhun. In tuhún tátá i, mé a ín indiví nanaha ña yóho nuun. ¹⁸ Ta quiahva joho cáchi ri yehe saha yóhó: Yohó cúun Pedro ta quivun cuni cachi a tóto. Ta cúun tátuhun yuu ndúhu saha in vehe nuú cavaha i veñuhu mí i jáchi yóhó caca nuún cahun saha i nuú ñayivi já ná quee vaha na xihín tiñahá sacuaaha já ná a cuhun na indayá. ¹⁹ Ta caja i xuhun ña ná cuu ndicanún nuú ñayivi ndaja ndiquiahva na mé ná ndaha i cacomí i cuéntá saha ná. Cacuu a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá saha ná. Tá co sahun ñamaní ná ndihvi ñayivi cán já quea a quiahva toho i ñamaní nu ná. Joo tá sahun ñamaní nu ná ndihvi na cán já quea quiahva ri yehe ñamaní nu ná —cáchi a xihín Pedro.

²⁰ Anda já nasahnda Jesús chuun nuú na xíca tuun xihín á cán ña ná a cáxi tuhún na xihín ni in tuhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

Tá cáxi tuhún Jesús ña quivi a (Mr. 8:31-9:1; Lc. 9:22-27)

²¹ Ta janda mé quivi já nacasahá Jesús cáxi tuhún a xihín na xíca tuun xihín á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuaaha veñuhu xihín ndahá na sacuaaha nuú jutú xihín ndahá na jánaha ley Moisés. Ta caja xíxi ri na cán va xihín á ta cahni ñahá na. Joo tá ná xinu uní quivi nditacu tucu a. ²² Anda já natavá xóo Pedro Jesús já nacasahá da jánani ñahá da já nacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamaní ndoho ndó já —nacachi Pedro xihín Jesús.

²³ Joo nacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúu tiñahá sacuaaha. Tá quiahva ín na sáji nuu nu ná quiahva já ún nuú i. Jáchi co cáhvi inún tá quiahva cáhvi ini Ndióxi joo cáhvi inún tá quiahva cáhvi ini ñayivi cuéntá ñuyíví yóho —nacachi Jesús xihín dá.

²⁴ Anda já nacachi Jesús já xihín na xíca tuun xihín a cán:

—Ndá na cuni candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coo caja toho a ná quivi na sahá i. ²⁵ Jáchi ndá na catóo coo chága ñuyíví yóho ndihi saha ná. Joo ndá na sahan ndeé ini quivi saha i xihín saha tuhún Ndióxi, ñehe táhvi ná catacu na anda ama cáa quivi. ²⁶ Vatí ná quee vaha in na ñuyíví yóho ta cómi na tóco ndihi ñaha ñuyíví yóho joo ndá chuun quea tá nu ndihí ndihi saha ná indayá. Jáchi ni in ñaha a cuú chahvi in na saha ínima ná ña ná a cuhun na indayá. ²⁷ Jáchi yehe, da nachindahá Ndióxi nduu ñayivi quixi tucu u xihín ndée Ndióxi, tátá i ta xihín ndée tátó Ndióxi. Mé tiempo cán nahá ndaja cáhnu cúu yehe. Anda já chahvi i nuú in in ñayivi saha ñaha nacaja na nani nasanduu na ñuyíví yóho. ²⁸ Mé a ndaa ná cahan i xihín ndo ña java na ndúu yóho a quíví toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

17

Tá nandijama nuu Jesús quiahva cáa
(Mr. 9:2-13; Lc. 9:28-36)

¹ Tá nayaha iñu quivi já nandaa Jesús in yucú jicó ta ndáca táhan Pedro xihín Jacobo xihín ñani da Juan cuahan na xihín á. ² Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yéhe ña. ³ Ta ndaja coo nandaca náha Moisés xihín Elías ta nacasáhá ndítuhún da xihín Jesús. ⁴ Anda já nandicahan Pedro xihín Jesús já nacachi da já xihín á:

—Vaha cúu ndúu nde yóho, xitoho nde. Tá cúní ndó cavaaha nde uní vehe tiyahvá válí. In a coo mé ndó ta inga coo Moisés ta inga coo Elías —cáchi Pedro.

⁵ Ta nani cáhan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johu na ña cáhan in a ta já cáchi a já:

—Da yóho cúu jahyi maní i ta cájii ini i xihín dá. Cuni johu ndó nu cáhan da —nacachi mé a cán.

⁶ Tá naxini johu na xica tuun xihín Jesús cán ña cáhan yóho já nacaxítí na janda quiahva naxinu nuu ná nu ñúhu. Ta a juú quiahva ná yihví na. ⁷ Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

⁸ Tá tá nandiñehe na cán nuu ná já naxini na ña íin in túhún jini mé va Jesús.

⁹ Tá tá nanuu na jini yucu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná ndítacu tucu yéhe, da nachindahá Ndióxi nduu ñayivi —nacachi Jesús.

¹⁰ Já nacachi na cán já xihín á:

—Ndávaha cáchi na jánahá ley Moisés ña ndítahan quixi jihna ñúhú profeta Elías —nacachi na.

¹¹ Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. ¹² Joo mé a ndaa ná cahan i xihín ndo ña sa naquixi

va Elías joo coo naxeen na ndicuni na da. Ta nacaja na tá quiahva cúní mé ná xihín dá. Ta quiahva já jándoho ri na ini yéhe, da nachindahá Ndióxi nduu ñayivi —nacachi Jesús.

¹³ Anda jáví nacandaa ini na xica tuun xihín Jesús cán ña cáhan Jesús saha Juan, da najácandúta ñayivi tá nacachi a ña sa naquixi va Elías.

Tá nandaja vaha Jesús in da loho ndácaan
ínima quini ini

(Mr. 9:14-29; Lc. 9:37-43)

¹⁴ Tá tá sa nanuu na ta naxinu coo na nu ndúu cuahá ñayivi cán já naxinu coo in dātaa ta já nacaxítí da nu Jesús. Já nacachi da já xihín á:

¹⁵ —Candáhví loho ini ndó jahyi i, xitoho i jáchi xihí yihí da ta ndóho ndivaha ini da. Ta cuahá tañu ndícava da nu ñúhu ita á ini ticuítí. ¹⁶ Tá ñéhe e da nacasaá i nuú na xica tuun xihín ndó yóho joo coo nacuu ndaja vaha na da —nacachi da xihín Jesús.

¹⁷ Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi íin i xihín ndo ta a ñaha candeé ini ndó yéhe. Cúu ndó ñayivi quini ndivaha chí co ndeé ga ini i xihín ña cája ndó. Taxi ndó ta loho jan chóho —nacachi Jesús.

¹⁸ Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

¹⁹ Tá nandihí já nacahan jehé na xica tuun xihín Jesús cán xihín á já nacachi na já:

—Ndávaha coo nacuu caja nde tavá nde ínima quini nasandacaan ini da loho jan —nacachi na xihín Jesús.

²⁰ Já nacachi Jesús já xihín ná:

—Coó nacuu caja ndó jáchi co candeé cáhnu ini ndó yéhe. Mé a ndaa cáchi i xihín ndó, loho tíin ndivaha cáa in ndíqui mostaza joo ndúu dó in yito cáhnu. Tá candeé loho ini ndó yéhe viti vaxi quivi candeé chága ini ndó yéhe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yucu ña ná caxoo a ta chí caxoo ndusa ña. Tóco ndihí ñaha cuu caja ndó tá ná candeé ini ndó yéhe. ²¹ Joo

tá cún̄i ndó tavá ndó ínima quini tátuhun rí yóho xín̄i ñúhú cajuhun ndó ta cacā tahvi ndó nu Ndióxi —cáchi Jesús xih̄in ná.

Tá cáxi tūhun tucu Jesús ña quivi a (Mr. 9:30-32; Lc. 9:43-45)

²² Ta ndaja coo xíca tūtú ndihi na xíca tuun xih̄in Jesús cán cuahan na xih̄in á chí estado Galilea. Ta já nandican̄i Jesús nuú na cán ña tandaa quivi ndiquiahva ñayivi mé á ndáha na cahni ñahá, mé a nachindahá Ndióxi nduu ñayivi. ²³ Ta nacachi a xih̄in ná ña tá sa ná yaha un̄i quivi já nditacu tucu a. Tá nacachi Jesús ña yóho xih̄in na xíca tuun xih̄in á cán já nacacuéha ndivaha ini na.

Tá nacquhvi Jesús jiuhún impuesto cuéntá veñuhu cáhnu ñuu Jerusalén

²⁴ Tá naxinu coo Jesús ñuu Capernaum xih̄in na xíca tuun xih̄in á já naxinu coo na jataca jiuhún impuesto cuéntá veñuhu nu Pedro. Já nacachi na já xih̄in dá:

—Á co cháhvi toho Jesús, da jánaha ndohó jan jiuhún impuesto cuéntá veñuhu ñuu Jerusalén —nacachi na xih̄in Pedro.

²⁵ Anda já nacachi Pedro já:

—Cháhvi a ña —nacachi da.

Anda já nandihvi Pedro ini vehe nu ndácaan Jesús joo jihna ñúhú nandicañan Jesús xih̄in dá já nacachi a já:

—Ndía cáhvi inún, Simón. Yo já ndítahan nuú cháhvi jiuhún cuéntá impuesto nuú na sáhdá chuun ñuyívi yóho. Á na ñuu mé ná á na ñuu tóho —nacachi Jesús.

²⁶ Já nacachi Pedro já:

—Na tóho va sá cháhvi jiuhún cája na —nacachi Pedro.

Já nacachi tucu Jesús já:

—Sahá ña cán quéa mé na ñuu co cháhvi toho na. ²⁷ Joo mí co cún̄i yo ña ná ndicuita na xohó sahá ña cán quéa cuhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jiuhún caa. Ta cañehe a cuhún chahvún saha mún ta saha mí i jáchi queta va —nacachi Jesús xih̄in Pedro.

18

Ndicani Jesús ndá na cúu na ñin chága saha (Mr. 9:33-37; Lc. 9:46-48)

¹ Mé tañu já nacayati na xíca tuun xih̄in Jesús nu á já nacasáhá ndáca tuhún ñahá na já nacachi na já xih̄in á:

—Yo já cacuu da cáhnu chága tá ná tandaa quivi cacomí Ndióxi cuéntá sahá ñayivi —nacachi na xih̄in Jesús.

² Anda já nacana Jesús in da loho já nasacandichi a da mahñú java na cán. ³ Já nacachi a já:

—Mé a ndaa ná cañan i xih̄in ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuéntá saha ndo. ⁴ Na cún̄i cacuu na cáhnu chága tá cacomí Ndióxi cuéntá sahá ñayivi ndítahan nduu na tátuhun in na coó saha ta já nduu na tátuhun ta loho yóho. ⁵ Ta ndá na ná ndiquehe in aloho tátuhun da yóho sahá ña cún̄i na yehe, na cán cúu na ndiquehe ri na yehe viti.

Tá jándacava ñayivi inga na nuú cuachi (Mr. 9:42-48; Lc. 17:1-2)

⁶ Ta ndá na ná jándacava in na ndahvi, na cándeé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú. ⁷ Ndáhvi nahá nacuu ñayivi ñuyívi yóho jáchi mé a ndaa ñin cuahá ndivaha ña núu ñuyívi yóho. Ña cán quéa ndácava cuahá ñayivi nuú cuachi joo ndáhvi nahá nacuu na jándacava inga na nuú cuachi.

⁸ Sahá ña cán quéa tá ndáha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhún a. Jáchi vaha chága ná cuhún réncó ndó á lundu ndó indivi a juú ga ña ná cuhún ní yiquí cuñu ndó indayá nu cáyi ñúhu ita anda ama cáa quivi. ⁹ Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhún a. Jáchi vaha chága ná cuhún ndó indivi xih̄in in tuhún nduchú núu ndo a juú ga ña ná cuhún ndó xih̄in ndívi nduchú núu ndo indayá nu cáyi ñúhu ita.

Tá sácú Jesús quiahva sahá in ndicachi, ri nandiñuhú (Lc. 15:3-7)

¹⁰ Coto a quéhe núu ndó ni in na cúu cuéntá mí i jáchi cáchi i xih̄in ndó ña táto Ndióxi, mé na ndáa na cán ní tiempo ndíta na nu Ndióxi, tátá i indivi. ¹¹ Jáchi yehe, da

nachindahá Ndióxi nduu ñayivi naquixi i jaca u ñayivi, na caja cuachi.

¹² 'Cuni johu ndó ná cahan i xihin ndo: Tá cómi in dataa in ciento ndicachi ta tá ndiñuhú in rí já quea ña caja da quea jandaco da comi jico sahun comi rí cán yucu ta já quee da cuhun da ndinducú da mé rí nandiñuhú cán. ¹³ Ta tá ndiñehe dá ri cajii chága ini da saha rí nandiñuhú cán a juu ga sahá comi jico sahun comi rí sa nduu nu dá cán. ¹⁴ Ta quiahva já ndoho ri Ndióxi, tátá i jáchi co cuni mé á ña ná ndihi sahá ni in na candeé ini mé á.

Ndítahan caja cáhnu ini sahá ñani táhan i (Lc. 17:3)

¹⁵ 'Tá caja quini ñani táhan ndó xihin ndo já quea tavá xoo ndó da ta cahan ndó xihin dá ña ná ndicuni da ña a váha toho caja da. Ta tá ná tahvi ini da sahá cuachi caja da já quea sa nandiquehe táhan maní tucu ndó xihin dá. ¹⁶ Joo tá co cuni da cuni johu da nu cahan ndo já quea ndítahan nu ndó cana ndó in á ivi chága ñani táhan ndó já ná cacuu na testigo sahá ña cahan ndo. ¹⁷ Ta tá co cuni da cuni johu da nu cahan na cán xihin dá já quea ndítahan cuhun ndó nu tóco ndihi na cúu cuéntá Jesús táca veñuhu. Ta tá co cuni da cuni johu da nu cahan ndihi na cán xihin dá já quea ndítahan caja ndó xihin dá tá quiahva caja ndó xihin in da tóho, da co cándusa Ndióxi á in da jataca jjuhún cuéntá impuesto.

¹⁸ 'Mé a ndaa ná cahan i xihin ndo ña tóco ndihi ñaha ná cató ndo ñuyivi yóho candico a janda indivi. Ta tóco ndihi ña ná ndaxi ndo ñuyivi yóho janda indivi ndaxi ña.

¹⁹ 'Ta jari cahan i ña yóho xihin ndó. Tá jandique táhan tuhun ivi ndó ñuyivi yóho ta tá mé a ndaa in cúu ndó sahá ña xica tahvi ndó nu Ndióxi, mé á in indivi já quea quiahva tátá i ña nu ndo. ²⁰ Jáchi nu nduu ivi á uní na ta táca na cuéntá mí i já quea tañu na cán ndacaan i —nacachi Jesús.

Tá sácú Jesús quiahva sahá in da co cuni caja cáhnu ini da sahá inga da

²¹ Ta ndaja coo nacayati Pedro ndaca tuhún da Jesús já nacachi da já:

—Xitoho i, ndaja tañu xini ñuhú caja cáhnu ini i sahá ñani táhan i tá caja núu da

xihin i. Á ndítahan nuú i caja cáhnu ini i saha dá janda usa tañu —nacachi da xihin Jesús.

²² Já nacachi Jesús já xihin dá:

—A juu janda usa tañu cuití ndítahan caja cáhnu inún sahá ñani táhún. Vaha janda comi ciento comi jico uxu tañu ndítahan nuun caja cáhnu inún sahá ñani táhún.

²³ 'Cáchi i ña yóho xihin ndó jáchi tá cómi Ndióxi cuéntá sahá ñayivi cúu á tátuhun ña nayaha xihin in rey tá nacasahá da jataca da cuéntá nuú na yíca nu dá. ²⁴ Mé tañu já ñehe na in da yíca cuahá millón nu dá nacasa na. ²⁵ Ta sahá ña coo nacuu chahvi da ña yíca da sahá ña cán quea nasahnda rey chuun ña ná jico na mé dá xihin ñajhí da xihin jahyi válí da ta janda ñaha da viti ña ná cuu ndiquehe rey cán cuéntá da. ²⁶ Anda já nacaxití da yíca cán nu mé rey já nacasahá xica tahvi da já cáchi da já: “Caja ndó ñamaní, xitoho i candati tóo chága ndó yehe, ndahvi i, já chahvi ndihi i ña yíca i nu ndo”, nacachi da xica tahvi da nu rey cán. ²⁷ Anda já nacandahvi ini rey cán da ta nacaja cáhnu ini a saha tóco ndihi ña yíca da já najaní a da cuahan da.

²⁸ 'Ta tá naqueta da yíca cán cuahan da já nandique táhan da xihin inga da cúu mozo. Ta mé mozo cán yíca da loho va nuú da cán. Ta já nacasahá da ndaca yihí da cuéntá nuú da cúu mozo jácuahnú ñaha da. Já cáchi da já: “Chahvún ña yícun nuú i”, cáchi da cán.

²⁹ Anda já nandacava xití mé da cúu mozo cán nu dá já nacasahá xica tahvi da nu dá já cáchi da já xihin dá: “Cajún ñamaní candati tóo chágun yehe, ndahvi i, já chahvi ndihi i ña yíca i nuun”, nacachi da cúu mozo cán.

³⁰ Joo coo naxeen da ta ña nacaja da quea nasahan da nachicaan da da cúu mozo cán vecaa janda quiahva ná cuu chahvi ndihi da ña yíca da nu dá. ³¹ Ta tá naxini java ga na cúu mozo cán ña yóho já nandihivi ndivaha ini na ta chí ndáva na nasahan na nacaxi tuhun na nu mé rey cán ndaja caa ña nacuu. ³² Anda já xójo ndivaha ini mé rey cán chí nacana da da nasayicá cán já nacachi da já xihin dá: “Mozo quini ndivaha cúu yóho. Cuahá ndivaha jjuhún nasayicun nuú i joo nacaja cáhnu ini i saha tóco ndihi a jáchi naxica tahvún nuú i.

³³ Quiahva já ndítahan ri nu yóhó va caja cáhnu inún sahá ña yíca ñani táhún nuun jáchi já nacaja i xuhun”, nacachi rey cán.

³⁴ Ta sahá ña xójo ndivaha ini mé rey cán xihín dá sahá ña cán quea nandiquiahva da da yíca cán ndáha na jácaxáhan ñahá cán janda quiahva ná chahvi da saha tóco ndihi ña yíca da —cáchi Jesús.

³⁵ Já nacachi tucu Jesús já:

—Quiahva já caja ri Ndióxi, tátá i, mé a ín indivi xihín ndóhó va tá co cája cáhnu ini ndó sahá ñani táhan ndó xihín ndinuhu ini ndó —cáchi Jesús.

19

Jánaha Jesús nuú na sa natandaha ña co ndítahan jándacoo táhan na (Mr. 10:1-12; Lc. 16:18)

¹ Tá nandihí nacachi Jesús ña yóho já naquee a estado Galilea já naxinu coo a estado Judea, ña ín inga xoo yuta Jordán cán.

² Ta a juú quiahva cuahá ñayivi nandico jatá ta nandaja vaha mé á na quihvi.

³ Joo ndaja coo java na fariseo nacayati na nu Jesús sahá ña coto ndojó ñahá na cuni na. Já nacachi na já xihín á:

—Á núná nuú in dataa jándacoo da ñájihí da saha ndá ña nacuu —nacachi na fariseo cán.

⁴ Anda já nacachi Jesús já:

—Á a ñaha cahvi ndó tuhun Ndióxi nu cáchi a ña janda mé saha tá nacavaha Ndióxi ñayivi nu cuítí já nacavaha dataa ta nacavaha ñañaha. ⁵ Ta nacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájihí da. Já xinu ndiví na cán cacuu na tátuhun in víxí yiquí cuñu na. ⁶ Sahá ña cán quea co cúu ga na ivi yiquí cuñu sahá ña nanduu na tátuhun in túhún yiquí cuñu na. Sahá ña cán quea co ndítahan nuú da cán janí táhan da ña najácatáhan Ndióxi tá natandaha ná —nacachi Jesús.

⁷ Anda já nandaca tuhún tucu na cán Jesús já nacachi na já:

—Joo já cachi ndó xihín nde: ndá cuéntá quea nasahnda ri Moisés chuun ña cuu cavaha in dataa in tutu quiahva da nu ñájihí da ta xihín ña cán cuu jándacoo da ña —nacachi na cán xihín Jesús.

⁸ Já nacachi Jesús já:

—Sahá ña táhyí ndivaha ínimá ndo sahá ña cán quea sahan Moisés ñamaní nu ndó ña cuu cavaha ndó tutu quiahva ndó nu ñájihí ndo ña ná jándacoo ndó ña. Joo tá nacavaha Ndióxi ñayivi nu cuítí coo nacacuni toho a coo ña yóho. ⁹ Cuni johó ndó ná cahan i xihín ndo. Tá ná jándacoo in dataa ñájihí da ta co cúu á sahá ña nacaja ña cuachi xihín inga ta ta tá tandaha dá xihín inga ña já quea cája da cuachi nu Ndióxi. Ta quiahva já ín ri cuachi da ná tandaha xihín ña nacandoo cán —cáchi Jesús.

¹⁰ Tá naxini johó na xíca tuun xihín Jesús cán ña yóho já nacachi na já:

—Tá ta quiahva já cája janda vaha chága ná a tandaha ñayivi, dá já —nacachi na cán.

¹¹ Já nacachi Jesús já:

—A juú ndihí ñayivi candaa ini ña cahan i yóho. Ndinuhu na ndínuna xíní túni cája Ndióxi, na cán cúu na cándaa ini ña yóho.

¹² Ndúu java dataa ta a cuú tandaha da jáchi já nacacu da ta já ta cúu mé va da. Ta java da a cuú tandaha da jáchi já nacaja ñayivi xihín ná ta já ta cúu mé va na. Ta java da a tandaha da jáchi cúni da ndiquiahva níí da mé dá nu Ndióxi ña ná cacomí a cuéntá saha dá. Ta ndá ndó, na ndínuna xíní túni, candaa ini ndó ña yóho —nacachi Jesús.

Cája yíi Jesús na valí

(Mr. 10:13-16; Lc. 18:15-17)

¹³ Tá nandihí já ñéhe na java na valí nacasaa na nu Jesús ña ná chinúu a ndahá a jini ná ta já caca tahví a nu Ndióxi saha ná. Joo ndaja coo na xíca tuun xihín á cán nacasahá na cája cuehe na xihín na ndáca na valí cán. ¹⁴ Já nacachi Jesús xihín na xíca tuun xihín á cán já:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho —nacachi Jesús.

¹⁵ Tá nandihí já nachinúu Jesús ndáha á jini na valí cán. Anda já naquee a cuahan.

Ndítuhún in da cuíca xihín Jesús

(Mr. 10:17-31; Lc. 18:18-30)

¹⁶ Ta ndaja coo naxinu in dataa nu ín Jesús ta nandaca tuhún ñahá da já nacachi da já:

—Maestro, mé ndó cúú ndó taa vaha ña cán quéa ndáca tuhún i ndohó ndíá ndítahan caja i já ná ñehe táhvi i cuhun i indiví coo i anda ama cáa quívi —ñacachi da xihín Jesús.

¹⁷ Já ñacachi Jesús já xihín dá:

—Ndá cuéntá quéa cáchún xihín i ña cúú u da vaha. Ni in tuhún toho ñayivi coo cúú ná na vaha ñuyíví yóho. In tuhún Ndióxi cuití va quéa vaha. Tá cúnun catacún nu ín mé á já quéa xíní ñúhú cajún ña sáhdá tuhun Ndióxi —ñacachi Jesús xihín dá.

¹⁸ Já ñacachi da cán já:

—Ndá cúú mé ña ndítahan caja i —ñacachi da.

Já ñacachi Jesús já xihín dá:

—Coto a cáhnún ndii. Coto a cóun xihín ñájíhí á yí ñani táhún. Coto a cája cuíhnún. Coto a cáhun ña tuhún sahá ñayivi. ¹⁹ Ndítahan caja cáhnún tátún xihín nánún. Ta ndítahan quíhvi inún ñani táhún tá quiahva quíhvi inún mún —ñacachi Jesús.

²⁰ Já ñacachi da yúta cán já xihín á:

—Janda taa loho ñasacuu u ñacasáhá i cája i tóco ndihi ña sáhdá Ndióxi caja i. Ndíá cúú ga ndítahan caja i —ñacachi da.

²¹ Já ñacachi Jesús já xihín dá:

—Tá ta cúnun cacuún in taa ndacú nu Ndióxi cuáhán jicún tóco ndihi ñahún jan ta ndacahndún jiuhún jan nuú na ndahví já ñehe táhvun coo cuahá ñahún indiví. Ta tá ñandihí já quisún candicún yehe —ñacachi Jesús.

²² Tá ñaxini johó da yúta cán ña yóho já ñaquee cuéha ndivaha da cuahan da jáchi da cuicá ndivaha cúú dá.

²³ Anda já ñacachi Jesús xihín na xíca tuun xihín á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná. ²⁴ Jáchi janda cama chága cuu yaha in camello ini in yávi sahá yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —ñacachi a.

²⁵ Tá ñaxini johó na xíca tuun xihín Jesús cán ña yóho já ñacatontó ndivaha na ta ñandaca tuhún táhan na já cáchí na já:

—Ndá na cúú na cuu cacu ndaa ínima, dá já —cáchí na.

²⁶ Ñandicoto nihni Jesús nu ná já ñacachi a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha coo íhvi toho nu Ndióxi —ñacachi Jesús.

²⁷ Anda já ñacachi Pedro já:

—Joo ndehe, najándacoo ndihi nde ñaha ñasacomí nde ta ndíco nde ndohó. Ndíá ñehe táhvi nde caja ndó —ñacachi Pedro xihín Jesús.

²⁸ Anda já ñacachi Jesús já xihín dá:

—Mé a ndaa ná cachi i xihín ndo. Tá ná tandaa quívi nduu saá tóco ndihi ñaha já cacoo yehe, da ñachindahá Ndióxi nduu ñayivi nuú ndicáhnú ndivaha i. Ta cán cacoo ri ndóhó, na ñaxíca tuun xihín i nuú uxu ivi táyi vaha. Ta cán caja víí ndó sahá ndíhuxu ivi táhdá na ñaquixi chichi Israel.

²⁹ Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúú na ñehe ná cuahá chága ví ñaha. Ta jatá ña cán ñehe táhvi ná catacu na nu Ndióxi anda ama cáa quívi. ³⁰ Ta ndúu cuahá na ín saha ñuyíví yóho viti joo vaxi quívi cacuu na na coo saha nu Ndióxi. Ta ndúu cuahá na coo saha ñuyíví yóho viti joo vaxi quívi cacuu na na ín saha nu Ndióxi —ñacachi Jesús.

20

Sácú Jesús quiahva sahá java da sáhdá uva

¹ Já ñacachi Jesús já sácú a quiahva:

—Nuú cacomí Ndióxi cuéntá sahá ñayivi cúú á tátuhun ña yóho: Ín in dataa naha chá ñaquee da cuahan da nducú da mozo caja chúun da cahnda da uva nu ñúhu dá.

² Ta ñacandoo da chahvi da in jiuhún caa naní denario in quívi. Ta já ñachindahá da mé mozo cán cuahan da caja chúun da nu ñúhu dá. ³ Tá ñandihí já ñaquee tucu da xihín ñaha ñúhu cán tátuhun caa in naha já ñandítahan da java da ndúu núná uun nuú yahvi. ⁴ Já ñacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já chahvi i ndohó tá quiahva ndítahan nu ndó quehe ndó”, ñacachi da. Já ñaquee mozo cán cuahan

da jáquee da nu ñúhu dá. ⁵ Ta tá ñacuu caxiví já ñaqueta tucu da xihín ñaha ñúhu cán cuahan da ta ñatiin da java ga da caja chúun xihín dá. Ta tá ñacuu caa uní ñatiin chága da da jáquee nu ñúhu dá. ⁶ Ta tá ñacuu tátuhun caa uhun sahini ñaqueta tucu da ta nuú yahvi cán ñaxini chága da da ndúu núná uun. Já ñacachi da já xihín da ndúu cán: “Ndá cuénta quéa sa ñacuu ndiví yaa ndúu ndó yóho”, ñacachi da xihín da ndúu cán. ⁷ Ta ñanducú ñehe da cán tühun já cáchi da já: “Co cája chúun nde jáchi coo ña quíxi ndúcú nde caja chúun nde”, ñacachi da cán. Anda já ñacachi da xihín ñaha ñúhu cán já: “Cuahán ri ndóhó va cahnda ndó uva nu ñúhu i. Ta já chahvi i ndóhó tá quiahva ndítahan nu ndó quehe ndó”, ñacachi da.

⁸ Ta tá sa ñacuaá já ñacachi da xihín ñaha ñúhu cán xihín da cómi chuun nu mozo cán ña ná cana da da cúu mozo cán já ná quehe yahvi da sahá chuun ñacaja da. Ta da ñaquihvi ñacaja chúun nu ndihí cán, da cán cúu da jihna ñúhú ná quehe yahvi. Tá ñandihí cán ná quehe yahvi da ñaquihvi nu cuití. ⁹ Anda já ñacasaa da ñaquihvi caja chúun caa uhun sahini já ñaquehe in in da cán in denario. ¹⁰ Ta ndaja coo tá ñacani a nuú da ñaquihvi caja chúun janda naha cán quehe yahvi da já quéa ñacahán da ña cuaha chága jühún ndiquehe da nuú da ñaquihvi caa uhun sahini cán. Joo quiahva já in denario ñaquehe ri in in da cán. ¹¹ Sahá ña cán quéa ñacasahá da cáhan cuachí da xihín da xihín ñaha ñúhu cán. ¹² Já ñacachi da já: “Da ñandai cuu caja chúun nu ndihí cuití yóho in hora cuití ñacaja chúun da. Ta tá quiahva ñachahvi ndó ndehe, da ñacaja chúun ndiví yaa nu ndítahyí quiahva já ñachahvi ri ndó nuú da cáa va”, ñacachi da cáhan cuachí da cán. ¹³ Anda já ñacachi da xihín ñaha ñúhu cán xihín in táhan mozo cán já: “Candehé, amigo. Co cája quini toho i xuhun. Á a juú in denario ñacandoo i chahvi i nuun. ¹⁴ Jühun ña ndítahan quehún ta cuanúhun. Jáchi cúní chahvi i nuú da ñacaja chúun in hora cuití va tá quiahva ñacandoo i chahvi i nu yóho. ¹⁵ Jáchi núná nuú i caja i ña cúní mí i xihín jühún i. Ta co ndítahan cahihvi

inún sahá ña vaha ini i”, ñacachi da xihín ñaha ñúhu cán xihín da cáhan cuachí cán — ñacachi Jesús sácú a quiahva.

¹⁶ Ta ñacachi tucu a já:

—Sahá ña cán quéa ndúu cuahá ña in saha ñuyiví yóho viti joo vaxi quiví cacuu na ña coo saha nu Ndióxi. Ta ndúu cuahá ña coo saha ñuyiví yóho viti joo vaxi quiví cacuu na ña in saha nu Ndióxi — ñacachi a.

Cáxi tühun tucu Jesús ña quivi a
(Mr. 10:32-34; Lc. 18:31-34)

¹⁷ Ta tá sa ñaquee tucu Jesús cuahan chí Jerusalén já íchi cán ñatavá xóo a ndihuxu ivi ña xíca tuun xihín á cán já ñacachi a já xihín ná:

¹⁸ —Candehé ndo. Yóho ndáa í cuahan yó chí Jerusalén nuú ndiquiahva na yehe, da ñachindahá Ndióxi nduu ñayivi ndahá ña sacuaaha nuú jutú xihín nuú ña jánaha ley Moisés. Ta ña cán cúu ña cacu ini sahá ndaja quivi i. ¹⁹ Anda já ndiquiahva na yehe ndahá ña tóho ña ná cuacu ndaa na yehe. Ta caní na yehe ta já cata caa na yehe ndica crúxu joo tá ná yaha uní quiví já nditacu tucu u — ñacachi Jesús.

Tá ñaxíca náná Jacobo xihín Juan ñamaní nuú Jesús

(Mr. 10:35-45)

²⁰ Anda já ñacayati ñájihí Zebedeo, ña cúu náná Jacobo xihín Juan nuú Jesús. Ta ndáca ña ndiví jahyi ña ñacasaa ña ñacaxítí ña nu á jáchi cúní ña caa ña in ñamaní nuú Jesús. ²¹ Anda já ñacachi Jesús já xihín ña:

—Ndá quéa cúní ndó — ñacachi a.

Já ñacachi ña cán já:

—Ña cúní quéa ná caja ndó ñamaní cahnda ndó chuun ña ná cacoo in in jahyi i xoo jín ndó. In da xoo cuaha ta in da xoo íti jín ndó indiví tá ná cacomí ndó cuénta sahá ñayivi — ñacachi ña cán.

²² Anda já ñacachi Jesús já xihín ña:

—Co cándaq ini ndó ña xíca ndó nuú i — ñacachi a.

Anda já ñacachi a já xihín Jacobo xihín Juan cán:

—Á cuu ndoho ini ndó tá quiahva ndítahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á in tiahva ndó ndoho ini ndó

tá quiahva ndítahan nuú i ndoho ini i anda quiahva ná quivi i —nācachi Jesús xih̄in ndíví da cán.

—Cuu caja nde ña —nācachi ndíví da cán xih̄in Jesús.

²³ Anda já nācachi tucu a já xih̄in dá:

—Mé a ndaa tandaa quivi coho ndó ña ova ñúhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xica ndó cacoo in ndó xoo cuáha i ta in ndó xoo íti i a juú yehe cúu dá cuu quiahva i ña nu ndo. Jáchi sa nandicaxi Ndióxi na ñehe táhvi cacoo cán —nācachi a.

²⁴ Joo ndaja coo tá naxini johō ndíhuxu chága na xica tuun xih̄in Jesús cán ña yóho já nacasáhá na xójo ini na xih̄in ndíví da cúu ñani cán. ²⁵ Anda já nācana Jesús tóco ndihi na xica tuun xih̄in a cán já nācachi a já xih̄in ná:

—Sa xini ndó ndaja cája na sáhndá chuun nuú ñayivi ndúu ñuyiví yóho. Ña cája na queá jácandíhi na ñayivi ta cája na tá quiahva cúni mé ná. ²⁶ Joo co ndítahan coo ña cán tañu mé ndó jáchi ndá da cúni cacuu da cáhnu chága tañu ndó xini ñúhú cacuu da in da cája chúun cuéntá ndihi ndó. ²⁷ Ta ndá da cúni cacuu da nu cuítí tañu ndóhó ndítahan cacuu da da cája ndíví nuú ndihi ndó. ²⁸ Jáchi ni yehe, da nachindahá Ndióxi nduu ñayivi coo naquixi i ñuyiví yóho ña ná caja ndíví ñayivi nuú i. Ña naquixi i caja i queá caja ndíví i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cūhun na indayá —nācachi a.

Tá nandaja vaha Jesús ivi da cuaá

(Mr. 10:46-52; Lc. 18:35-43)

²⁹ Ta tá naqueta Jesús ñuu Jericó xih̄in na xica tuun xih̄in á cán já ndíco cuahá ndivaha ñayivi jatá cásahan na. ³⁰ Ta ndaja coo yati jín ichi cán nasanduu coo ivi da cuaá ta tá naxini johō da ña yáha Jesús cuahan já nacasáhá ndíví da cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —cáchí da.

³¹ Anda já nacasáhá cája cuehe ñayivi xih̄in ndíví da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —nācachi da.

³² Anda já nandaca ndichi Jesús já nācana ndíví da cuaá cán. Ta já nandaca tuhún a da já nācachi a já xih̄in dá:

—Ndía cúni ndó ña ná caja i xih̄in ndo —nācachi a.

³³ Já nācachi ndíví da cuaá cán já:

—Candehé nde cúni nde, xitoho.

³⁴ Anda já nācandáhví ini Jesús da ta nācane ndaa ndáha á nuu dá. Chí ivi laá nanuna nuú da cuaá cán ta nacasáhá da ndíco da jatá Jesús cuahan da.

21

Ndíhvi Jesús ñuu Jerusalén

(Mr. 11:1-11; Lc. 19:28-40; Jn. 12:12-19)

¹ Ta tá sa ja chá xinu coo na ñuu Jerusalén já naxinu na in ñuu loho naní Betfagé yati jín yúcu naní olivo. Ta cán nasahnda Jesús chuun nuú ivi táhan da xica tuun xih̄in á cán. ² Já nācachi a já xih̄in dá:

—Cuáhán ndó ñuu loho jan ta tá ná xinu coo ndó jan ndiñehe ndo in búrrō jíhi ndíco ndaa rí ta xih̄in mé rí jan cándichi inga búrrō loho. Ndaxí ndó rí ta cañehe ndó ndíví rí quixi ndó. ³ Ta ndá na ná cuahan xih̄in ndo já queá cachi ndó xih̄in ná ña xini ñúhú xitoho ndó rí joo tá ná ndihi chuun rí já nducú ñehe tucu da rí, já cachi ndó xih̄in ná —nācachi Jesús xih̄in ndíví da cán.

⁴ Tóco ndihi ña yóho nayaha já ná xinu coo nuú ña nācahyí in da profeta já:

⁵ Joho cachi ndó xih̄in na ñuu Jerusalén: “Candehé ndo. Ndáhví uun cáa da cómí cuéntá saha ndó.

Vaxi da nu ndo ta canúu da jata búrrō jíhi, jahyi in rí ndiño, canúu da vaxi da nu ndo”, cáchí tuhun Ndióxi.

⁶ Ta ndíví da xica tuun xih̄in Jesús cán nasahan da nācāja da tá ín nasahnda Jesús chuun nu dá. ⁷ Já ñehe da búrrō jíhi cán xih̄in búrrō loho, jahyi rí naxinu na nuú Jesús. Anda já nachojó na cotó ndéé na jata rí ta nandaa Jesús jata rí. ⁸ Ta mé cuahá ñayivi ndúu cán nacasáhá na chinduu na cotó ndéé na ichi mé nuú yaha Jesús cán. Ta java na nacasáhá na sáhndá na ndahá yito ta chinduu na do ichi mé nuú yaha Jesús cuhun a. ⁹ Ta ñayivi cuahan chí nuu ta jári

na vaxi chí jatá naçasáhá na cáyuhú na já cáchí na já:

—Cája cáhnu í da naquixi chichi David yóho. Ndicáhnu nahá ná cacuu da cómi cuéntá saha yo jáchi cúú dá da vaxi yuhú nuu Ndióxi. Cáhnu ná cacuu Ndióxi —cáchi ñayivi cuaha cán cáyuhú na cásahan na xihín á.

¹⁰ Ta tá nandihvi Jesús ñuu Jerusalén cán tóco ndihi ñayivi naçasáhá catóntó ndivaha na. Já cáchí xihín táhan na já:

—Ndá da cúú da yóho —cáchi xihín táhan na.

¹¹ Java táhan na cán cáchí na:

—Da yóho cúú in profeta, da ñuu Nazaret cuéntá estado Galilea —cáchi xihín táhan na.

Tá nataxí Jesús na ndúu jícó ñaha yéhe veñuhu

(Mr. 11:15-19; Lc. 19:45-48; Jn. 2:13-22)

¹² Anda já nandihvi Jesús veñuhu cáhnu cán já naçasáhá táxi ndihi a na ndúu jícó xihín na ndúu xéen cán. Ta naxicó ñehe a mesa na ndúu ndijama jjuhún cán ta naxicó ñehe a táyi sácoo na ndúu jícó ndijata. ¹³ Já naçasáhá cáchí a já xihín ndihi na cán já:

—Já cáchí tuhun Ndióxi já: “Vehe mí i cacuu a vehe nuú quixi na caça tahví na nu Ndióxi”, cáchí tuhun Ndióxi. Joo ndóhó nandai cuu ndó yóho caja cuíhná ndo nuú ñayivi —nacachi Jesús xihín ná.

¹⁴ Tá nandihvi já nacayati java na cuaa xihín java na réncó nu á ini mé veñuhu cáhnu cán ta nandaja vaha mé á na. ¹⁵ Joo xójo ndivaha ini na sacuaha nuú jutú xihín na jánahe ley Moisés tá naxini na ña xituhún nacaja mé á ta tá naxini johó na ña cája cáhnu na valí cán mé á tá cáchí na já: “Cája cáhnu í da naquixi chichi David.” Saha ña cán quea xójo ini na ¹⁶ ta já nacachi na já xihín Jesús:

—Á xini johún ña cáhan na valí yóho —nacachi na xihín Jesús.

Já nacachi Jesús já:

—Ajan, xini johó i ña cája cáhnu na Ndióxi. Á coo nacahvi ndó tuhun Ndióxi nu cáchí a já:

Janda na valí ta janda na chíchí nacaja Ndióxi xihín ná,

ña ná cuu caja cáhnu na mé á, cáchí tuhun Ndióxi —nacachi Jesús xihín na cán.

¹⁷ Anda já najándacoo a na já naqueta jatá ñuu cán cuahan chí ñuu Betania ta cán nasahin a.

Tá nachicaan Jesús cháhan jatá titó ñuhú
(Mr. 11:12-14, 20-26)

¹⁸ Ta inga quiví itaan tá nandicó coo a cuahan chí Jerusalén já naçasáhá cuico a cuahan. ¹⁹ Ta yuhú ichi cán naxini a cándichi in titó ñuhú. Ta chí nasahan sádehé a á lin cuíhi nu do caxi a. Joo coo ñaha ná ndiñehe a. Ndáha uun dó cán cuití va lin. Anda já nacachi a já xihín do:

—Ni in túhún ga tañu a cána cuíhi nu yóho —nacachi a xihín do.

Chí ivi laá nahichi titó ñuhú cán. ²⁰ Tá naxini na xica tuun xihín Jesús cán ña yóho já nacatóntó na já cáchí na já:

—Ndá cuéntá quea nahichi titó ñuhú cán ivi tuhun —nacachi na xihín Jesús.

²¹ Ta nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña tá ná candeé ini ndó yehe ta ni loho co cáhvi ivi johó ini ndó já quea cuu caja ndó ña náhnu chága nuú ña nacaja i yóho. Ta janda cuu cachi ndó xihín in yucu: “Caxoo ta cuahán jáquetún mún ini tañuhú”, ta chí já ndusa coo. ²² Ta tá ná candeé ini ndó yehe nani xica tahví ndo nu Ndióxi ta co cáhvi ivi johó ini ndó já quea ñehe ndó ña xica ndo nu á —nacachi Jesús.

Tá ndaca tuhún na Jesús yo sahan ndéé nu á ña jánahe mé á nuú ñayivi

(Mr. 11:27-33; Lc. 20:1-8)

²³ Tá nandihvi já nandihvi Jesús ini veñuhu cáhnu cán ta nani jánahe tuhun Ndióxi nuú na ndúu cán naxinu na sacuaha nuú jutú xihín na sacuaha nuú na Israel cán nu á. Já nacachi na já xihín á:

—Yo já sahan ñamaní nuun cajún ña cajún yóho —nacachi na.

²⁴ Anda já nanducú ñehe Jesús tuhun nu ná já nacachi a já:

—Ta ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamaní nuú i caja i ña cája i yóho. ²⁵ Ta viti cachi ndó xihín i yo já nachindahá Juan ña ná

quixi da caja ndúta dá ñayivi. Á Ndióxi nāchindahá da á ñayivi nāchindahá ñahá —ñacachi Jesús ndáca tuhun a na.

Já ñacasáhá ndítuhún xihín táhan na já cáchí na já:

—Tá ná cachí ña Ndióxi quéa nāchindahá Juan ta já nducú ñehe Jesús tuhun nu yo já cachi da xoho: “Ndá cuéntá quéa coo naxeen ndó candúsa ndó da, dá já”, cachi Jesús xoho. ²⁶ Ta tá ná cachí ña ñayivi cúu na nāchindahá Juan já yihví yo ña ndicuíta ñayivi xihín yo. Jáchi tóco ndihi na cándúsa na ña ñaquixi Juan jáyaha da ña ñacahan Ndióxi nuú ñayivi —cáchí na ndítuhún xihín táhan na.

²⁷ Sahá ña cán quéa ñacachi na já xihín Jesús:

—Coo xini toho nde yo já nāchindahá Juan.

Anda já ñacachi Jesús já xihín ná:

—Ta ni yehe a cáxi tuhun i nu ndo yo já ñasahan ñamani nuú i caja i ña yóho —ñacachi Jesús xihín na cán.

Sácu Jesús quiahva sahá ivi da cúu jahyi in dataa

²⁸ Anda já ñacachi tucu Jesús xihín na cán já:

—Cuni johó ndó ña ñayaha in tañu. Ín in dataa ta ñasahin ivi jahyi ta da. Ta ñasahan da nuú in táhan da cán já ñacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, ñacachi da xihín jahyi da. ²⁹ Já ñacachi jahyi da já xihín dá: “A cūhūn toho i jáchi coo xíca ini i cūhūn i”, ñacachi da. Joo tá ñandihí ñacahvi ini da ña a váha ná cuu ini da chí já ñaquee da cuahan da caja chúun da nu ñuhú tátá da. ³⁰ Ta jári ñasahan tátá da cáhan da xihín inga jahyi da ta quiahva já ñasahnda ri da chuun nuú da cán. Ta da cán ñacachi da já xihín tátá da: “Ajan. Cūhūn i”, cáchí da. Joo tá ñandihí coo ñasahan toho da. ³¹ Ta viti cachi ndó xihín i ndá da cúu da ñacaja ña cūni tátá da —ñacachi Jesús.

Já ñacachi na cán:

—Da nu cuítí.

Anda já ñacachi tucu Jesús já:

—Mé a ndaa ná cahan i xihín ndo ña ín chága sahá na játaca jiuhún cuéntá impuesto xihín najihí xíca jii ña ná cacomí Ndióxi cuéntá saha ná a juú ga ndohó. ³² Jáchi ñaquixi Juan, da jácandúta ñayivi najánaha da ndohó ndaja ndítahan caja ndó ta coo naxeen ndó candúsa ndó da. Joo na játaca jiuhún cuéntá impuesto xihín najihí xíca jii ñacandúsa na ña ñacahan da. Ta vatí ñaxini ndó ña yóho joo coo naxeen ndó ndijama ndó ña cája ndó jáchi coo naxeen ndó candúsa ndó mé Juan.

Sácu Jesús quiahva sahá java mozo, da ñacaja quini xihín xitoho da (Mr. 12:1-12; Lc. 20:9-19)

³³ Cuni johó ndó ná cacu u inga quiahva nu ndo. Ñasahin in dataa ta najánde cuaha dá tó uva nu ñuhú dá. Ta ñasacu da in corra yito nu do. Ta ñacavaha da in nuú cūhni mé uva cán ña cavaha vino. Ta ñacavaha da in nu jícó canúu da já cuu candaa da tóco ndihi dó cán.

’Anda já ñasahan ndojó da ñuhú dá nuú java na caja chúun na ña. Ta já ñaquee da cuahan xíca da. ³⁴ Ta tá ñaxinu tiempo jáquee na já nāchindahá da java mozo da ña ná cūhūn na nuú na ndúu cája chúun ñuhú da cán ña ná ndiquiahva na nu dá ña cáni nu dá ndiquehe da saha ñuhú dá ña ñasahan ndojó da nuú na cán. ³⁵ Joo ndaja coo na cája chúun nu ñuhú cán ñatiin na in táhan da cúu mozo da cán ta ñacani na da. Ta inga táhan da cán ñasahní na. Ta inga táhan da cán ñandicuíta ñee na xihín yuu. ³⁶ Joo mé da xihín ñaha ñuhú cán nāchindahá cuaha chága da mozo da ñasahan da nu ñuhú dá. Ta tá quiahva ñacaja na xihín mé java mozo ñasahan nu cuítí cán quiahva já ñacaja ri na xihín tóco ndihi mozo cán.

³⁷ Tá ñandihí já ñasacu ini da xihín ñaha ñuhú cán chindahá da jahyi da jáchi ñacahán da: “Cája i cuéntá coo toní ñuhú na xihín jahyi i”, ñacahán da xihín ñaha ñuhú cán. ³⁸ Joo tá ñaxini na cája chúun ndojó ñuhú cán ña vaxi da cúu jahyi da xihín ñaha ñuhú cán já ñacachi xihín táhan na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñuhú

yóho. Cóho cahní yó da já ná candoo ñúhu yóho ndáha mí”, ñacachi xihín táhan na cán. ³⁹ Ña cán quéa ñatiin na da ta ñatavá ña da janda yuhú cútú ta cán ñasahní ña da — ñacachi Jesús sácú a quiahva.

⁴⁰ Anda já ñandaca tuhún Jesús ña ndúu cán já ñacachi a já:

—Ndía cáhan ndo caja da xihín ñaha ñúhu yóho xihín ña cája chúun nu ñúhu dá — ñacachi a.

⁴¹ Anda já ñacachi ña cán já xihín Jesús:

—Ña caja da quéa cahní da ña quini, mé ña ñacaja chúun too nu ñúhu da cán. Ta já ndiquiahva ndojó da ñúhu da nuú java ga ña ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saha ñúhu dá — ñacachi ña cán xihín Jesús.

⁴² Já ñacachi Jesús já xihín ña cán:

—Á a ñaha cahvi ndó tuhun Ndióxi nu cáchi a:

Mé yuu ña najácana da cávaha vehe, ña cán cúu ña ñanduu yuu ndúhu sahá vehe ña ín chága saha.

Ña yóho quéa ñacaja Ndióxi, ta cúu á in ñaha cáhnu ndivaha nu yo, cáchi tuhun Ndióxi.

⁴³ Ña cán quéa cáhan i xihín ndó ña cacu xoo Ndióxi ndohó ña ná a cácomí ga mé á cuénta saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuénta saha ná, mé ña ndiquiahva na nu á ña cáni nu á ndiquehe a. ⁴⁴ Ta cáchi i xihín ndó ña yehe cúu u tátuhun mé yuu cáhan i saha. Ta ndá ña ná ndicava jatá yuu cán chí chachi xéhe ña. Quiahva já ndihi sahá ñayivi tá co cúní ña candúsa na yehe. Ta tá mé yuu cán ná yaha ndicava jatá in na já caji ndihí ñahá. Quiahva já ndihi sahá ñayivi ini indayá tá co cúní ña candúsa na yehe — ñacachi Jesús.

⁴⁵ Tá ñaxini joho ña cúu sacuaña nuú jutu xihín ña fariseo cán ña yóho, ñacandaa táhyí ini na ña saha mé ná cáhan Jesús.

⁴⁶ Sahá ña cán quéa ñanducú ña tiin na mé á joo coo ñacuu caja na sahá ña ñayihví ña ñayivi jáchi cándúsa ñayivi cán ña cáhan Jesús cuénta Ndióxi.

22

Sácú Jesús quiahva sahá vicó tándaha (Lc. 14:15-24)

¹ Tá ñandihí já ñacasáha tucu Jesús jáñaha ñayivi xihín ndinuhu quiahva. Já cáchi a já xihín ná:

² —Nuú cacomí Ndióxi cuénta sahá ñayivi cúu á tátuhun ña ñayaha xihín in rey tá ñacavaña da in vicó ña tándaha jahyi ta da. ³ Ñachindahá da mozo da ña ná cuhun da cana da ña ndítahan quixi. Joo coo ñaxeen na quixi na mé vicó. ⁴ Anda já ñachindahá chága da mozo da ña ná caxi tuhun da nuú ña ndítahan quixi cán ña sa ñacaja ndíví da ña cuxu na. Sa ñaxihí tindiquí xihín java ga quítí, rí ñandaha. Sa ñacandíví ndihí ñaha cuénta vicó tándaha sahá ña cán quéa ná quixi na. Ña yóho cúu chuun ñatahnda nu mozo cán cachi da xihín ña ndítahan quixí cán. ⁵ Joo co ndáa ña cán cuhun ña. In táhan da cán ñaquee da cuahan da candehé da nu ñúhu dá. Ta inga da ñaquee da cuahan da caja ndahvi da. ⁶ Ta java ga ña cán ñatiin na mozo mé rey cán ta ñacaja xixi na xihín dá janda quiahva ñasahní ñahá ña. ⁷ Anda já ñaxojo ndivaha ini rey cán sahá ña cán quéa ñachindahá da soldado da ña ná cuhun na cahní ña ña ñasahní ndii cán ta ná chicaañ ñúhu dá ñuu na. ⁸ Anda já ñacachi tucu rey cán já xihín java ga mozo da: “Sa ñacandíví tóco ndihí ñaha ña coo vicó joo ña ñacana i cán coo saha toho na quixi na vicó. ⁹ Ña cán quéa cuahán ndó ndijáá cáyé náhnu ta ndá ñayivi ñacuu cana ndó ña ná quixi na vicó tándaha yóho”, ñacachi rey cán ñasahnda da chuun nu mozo da. ¹⁰ Anda já ñaquee mozo da ñasahan ña ndijáá cáyé ta ndaja cáa mé ñayivi najátaca na. Ñayivi vaha xihín ña quini viti ñataca ñacaja na. Ta já najácutú ña vehe nuú coo vicó tándaha cán xihín ñayivi.

¹¹ Anda já ñandihvi rey nu ñúhu ña cán já ñaxini da ndácaañ in dataa, da co ndíxi jáhma ña ndíxi ña ndúu vicó tándaha.

¹² Ta ñacayati mé rey nu dá já ñacachi da já xihín dá: “Amigo, ndaja ñacajún ñaquihvún yóho tá co ndíxi tohún jáhma ña ndíxi ña ndúu vicó tándaha”, ñacachi rey xihín da cán. Joo coo ñanducú ñehe

da tuhun nu rey. ¹³ Anda já nasahnda rey chuun nu mozo da. Já nacachi da já xihín ná: “Cató ndó ndáha dá xihín saha dá. Ta jácana ndó da chí jata nuú naá yávi. Cán cuacu ndivaha da anda quiahva cahña nuhu da”, cáchi da. ¹⁴ Jáchi cuahá ndivaha cúu ná nacana Ndióxi ña ná cacomí a cuéntá saha joo chá cúu ná ndiquiahva na ndáha mé á ña ná cuu caxi a na —nacachi Jesús.

Ndacá tuhún na Jesús á ndítahan nu ná chahvi na jiuhún cuéntá impuesto
(Mr. 12:13-17; Lc. 20:20-26)

¹⁵ Tá nandihí já naquee na fariseo nasahan na jándique táhan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jata. ¹⁶ Ña cán quéa nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaá ini nde ña jánaha ndó ña ndaa saha íchi cuéntá Ndióxi. Ta co quehe ndó cuéntá tá cáhan núu ñayivi saha ndo. Ta cándaá ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. ¹⁷ Saha ña cán quéa cuni nde candaa ini nde ndía cachi ndó sahá ña yóho: Á ndítahan nuú nde chahvi nde jiuhún cuéntá impuesto nuú da cómi cuéntá sahá ñuu Roma. Á chahvi nde ña á a chahvi toho nde ña —nacachi na cán xihín Jesús.

¹⁸ Joo sa nacandaa ini Jesús ña cáhvi núu ini na sahá ña cán quéa nacachi a já xihín ná:

—Co cúu ndó tá quiahva ndaa ndó jáchi cuni ndó coto ndojó cuití ndó yehe. ¹⁹ Jánaha ndó in táhan jiuhún ña chahvi ndó impuesto jan nuú i —nacachi Jesús.

Anda já nasahan na in jiuhún caa naní denario nu á. ²⁰ Tá naxini Jesús ña yóho já nacachi a já xihín ná:

—Yo nahná ta yo quivi quéa ndaa nu á —nacachi a.

²¹ Já nacachi na cán já xihín á:

—Ñéhe a nahná xihín quivi da cómi cuéntá sahá ñuu Roma —nacachi na.

Anda já nacachi tucu Jesús já:

—Ndiquiahva ndó ña cúu ñaha da cómi cuéntá sahá ñuu Roma jan nu dá. Ta ndiquiahva ndó ña cúu ñaha Ndióxi nu á —nacachi a.

²² Tá naxini johó na cán ña yóho já nacatontó na ta najándacoo na a naquee na cuahan na.

Tá ndacá tuhun na Saduceo Jesús á mé a ndaa nditacu ndii

(Mr. 12:18-27; Lc. 20:27-40)

²³ Ta sa mé quivi já nasahan java na saduceo cahan na xihín Jesús. Ta mé na saduceo yóho co cándusa na ña nditacu tucu na sa naxihí. Saha ña cán quéa nandaca tuhún na Jesús já cáchi na já xihín á:

²⁴ —Maestro, nu ley nacahyí Moisés sanahá natahnda chuun ta cáchi a já: “Tá tándaha in dataa xihín ñájihí da ta tá xihí da ta coó jahyi da cacu já quéa ndítahan nuú ñani da tándaha dá xihín ña cuáan nacandoo cán. Ta já ná coo jahyi da cán xihín yuhú nuú ñani da”, cáchi ley Moisés. ²⁵ Ta viti cuni johó ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuití cán natandaha dá xihín in ñañáha. Tá nandihí já naxihí da. Joo sahá ña coó jahyi da nacacu xihín ñájihí da sahá ña cán quéa nandiquehe ñani da, da chí ivi jata dá ña cuáan cán. ²⁶ Ta quiahva já nandoho ri da chí ivi cán jáchi naxihí da ta coó jahyi da nacacu xihín ña. Ta janda ndíhusa ñani cán natandaha xihín ña ta ndíhusa da naxihí ta ni in da coó nacacu jahyi xihín ña. ²⁷ Ta tá nu ndihí naxihí ri ñañáha cán va. ²⁸ Ta viti cachi ndó xihín nde tá ná xinú quivi nditacu tucu ndii, ndá da cacuu ndusa yí ña cán jáchi ndíhusa ñani cán natandaha xihín ña ñuyiví yóho —nacachi na saduceo cán xihín Jesús.

²⁹ Anda já nacachi Jesús já:

—A váha toho cáhan ndo jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúu ndee Ndióxi.

³⁰ Jáchi mé quivi tá ná nditacu tucu ndii a tándaha ga ná ta ni a quiahva na jahyi jíhí na tándaha ná. Cacuu na tátuhun táto Ndióxi nduu indiví ta co tándaha na cán.

³¹ Joo sa xini yo ña nditacu tucu ndii. Á a ñaha cahvi ndó tuhun Ndióxi nu cáchi a já:

³² “Yehe cúú Ndióxi ña cǎja cǎhnu Abraham ta yehe cúú Ndióxi ña cǎja cǎhnu Isaac ta yehe cúú Ndióxi ña cǎja cǎhnu Jacob viti”, ñacachi a. Ta ña yóho cúnĭ cachi a ña tácu yĭĭ va Abraham xihín Isaac xihín Jacob vatĭ sa ñaxihĭ yiquí cuñu na —ñacachi Jesús.

³³ Tá ñaxini jōho ñayivi ndúu cǎn ña yóho já ñacatóntó ña xihín ña jánaħa Jesús nu ná.

Tá cǎħan Jesús ndá ley quea cǎhnu chǎga (Mr. 12:28-34)

³⁴ Tá ñañehé ña fariseo tuħun ña ñaquee vaħa Jesús ñasaħnu a nuú ña saduceo já ñanditútú ndihi na. ³⁵ Ta in táhan mé da cǎn, da jánaħa ley Moisés ñandaca tuħún da Jesús jáchĭ cúnĭ da coto ndojó da mé á. Já ñacachi da já:

³⁶ —Maestro, ndía cúú ña cǎhnu chǎga sǎhnda ley Moisés cǎja í —ñacachi da cǎn xihín Jesús.

³⁷ Já ñacachi Jesús já xihín dá:

—Ña cǎhnu chǎga nu ley Moisés cúú ña yóho: “Ndítahan quĭhvi ini ndó Ndióxi, xitoho ndó xihín tóco ndihi ínima ndó ta xihín ndinuhu ini ndó ta xihín tóco ndihi xínĭ túnĭ ndo.” ³⁸ Ña yóho cúú ley nu cuití ta cúú á ña cǎhnu chǎga nu tóco ndihi ley. ³⁹ Ta tá quiahva ín ña nu cuití yóho quiahva já ín ri ña chí jvi va ta cǎchĭ a já: “Xínĭ ñúhú quĭhvi ini ndó ñani táhan ndó tá quiahva quĭhvi ini ndó mé ndó.” ⁴⁰ Ta jata ndívĭ ña yóho tíin tóco ndihi ley Moisés xihín ña najánaħa ña profeta sanaha —ñacachi Jesús xihín ña fariseo cǎn.

Ndaca tuħún ña Jesús ndáchĭ ñaquixi a (Mr. 12:35-37; Lc. 20:41-44)

⁴¹ Ta nani ñanditútú ndihi ña fariseo ndúu na nu Jesús cǎn já ñandaca tuħún a ña. ⁴² Já ñacachi a já xihín ná:

—Ndía cǎhvi ini ndó saħa Cristo. Ndá chĭchĭ cǎhán ndo vaxi a —ñacachi Jesús xihín ná.

Já ñacachi ña cǎn já:

—Vaxi a chĭchĭ David, da ñasaħnu rey sanaha —ñacachi ña cǎn xihín Jesús.

⁴³ Anda já ñacachi tucu Jesús já xihín ná:

—Tá ta mé a ndaa vaxi Cristo chĭchĭ David ndá cuénta quea ñacachi da ña cúú á xitoho da. Jáchĭ ñachutú ndaa ínima David xihín ínima yĭĭ Ndióxi tá ñacahyĭ da já:

⁴⁴ Já ñacachi Ndióxi xihín xitoho ĭ:

“Cacoo xoo cuaha ĭ yóho janda quiahva ná cǎja ĭ ña ná cacomún cuénta saħa ña co cúmĭ yohó”, ñacachi Ndióxi, ñacachi David.

⁴⁵ Ndávaha cǎchĭ ña ña vaxi Cristo chĭchĭ David tá ta sa mé David ñacachi da ña cúú á xitoho da —ñacachi Jesús.

⁴⁶ Ta chí ni in na coo ñacuu cǎja nducú ñeħe na tuħun nu á. Ta janda mé quĭvĭ já ni in ga ña coo ñasaħan ndeé ini ndaca tuħún chǎga ña mé á.

23

Chĭcǎan Jesús cuachi jatá ña fariseo xihín jatá ña jánaħa ley Moisés

(Mr. 12:38-40; Lc. 11:37-54; 20:45-47)

¹ Anda já ñacachi Jesús já xihín tóco ndihi ñayivi ta xihín ña xica tuun xihín á cǎn já:

² —Ña jánaħa ley xihín ña fariseo cúú ná ña ndítahan nu ndicani na ña cúnĭ cachi ley Moisés. ³ Ña cǎn quea xínĭ ñúhú cǎja ndó tóco ndihi ña jánaħa ña nu ndo. Joo a cǎja toho ndó tá quiahva cǎja mé ná jáchĭ co cǎja na ña jánaħa mé va na. ⁴ Jáchĭ cǎja na ña ná coo ĭhvi ndivaha ley janda quiahva co ndeé ini ñayivi cǎja na ña. Joo mé ná ni loho tíin co chindeé ñaha ña. ⁵ Ta cǎja na tóco ndihi ñaha ña ná cuni ñayivi na jáchĭ cǎtóo ña candĭco listoni náħnu ĭĭni ná xihín ĭco ndáħa ná nu ndaa tuħun Ndióxi. Ta cǎtóo ña coo lándá chǎga yuhú jáħma ná a juú ga java ga ñayivi. ⁶ Ta tá cuahan ña víco cǎtóo ña coo na nuú vaħa cuití va. Ta tá quĭhvi na veñuhu cǎtóo ña cacoo na nu sǎcco ña ín chǎga saħa. ⁷ Ta cǎtóo ña ña ná cǎħan tonĭ ñúhú ndivaha ñayivi xihín ná tá xica nuu na nuú yahvi. Ta chí a juú quiahva cǎtóo ña ña ná cachi ñayivi 'maestro' xihín ná.

⁸ Joo ndóhó co ndítahan nu ndó nducú ndó ña ná cǎħan ñayivi 'maestro' xihín ndo. Jáchĭ in ñani cúú ndihi ndó ta in tuħún cúú maestro ndo, mé á cúú Cristo. ⁹ Ta a cǎħan ndo tátá cǎhnu xihín ni in ñayivi ñuyívĭ yóho jáchĭ in tuħún Ndióxi cúú á tátá ndo ta mé á ín a indivĭ. ¹⁰ Ta a ndúcú ndo ña ná cǎħan ñayivi 'jefe' xihín ndó jáchĭ in tuħún laá va cúú jefe ndo, mé a cúú Cristo.

¹¹ Ndá da cúú da cǎhnu chǎga tañu ndó xínĭ ñúhú da cǎja chún da saħa ndihi ndó.

¹² Jáchĭ ndá ña ndíñeħe ĭcoco mé, jánuu ndáħa

Ndióxi na. Joo ndá na jánuu ndáha mé nu Ndióxi, jándiñehe jíco mé á na.

13 'Ndáhví naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi sáji nuu ndó nuú ñayivi já ná a çúu cacomí Ndióxi cuéntá saḥa ná. Ta ni ndóhó co ndíquiahva ndó mé ndó ndáha Ndióxi ná cacomí a cuéntá saḥa ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi. 14 Ndáhví nahá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi cándaa ndó vehe najihí cuáan ta tá nandihí cuahá ndivaha xíca tahví ndo nu Ndióxi jáchi cúni ndó jájahvi ndó nuú ña núu cája ndó. Saḥá ña cán queá cáchí i xihín ndó ña ndóhó cacuu ndó na ndoho chága ini, caja Ndióxi.

15 'Ndáhví nahá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi a juú quiahva xíca nuu ndó ndúcú ndo in tálaá ñayivi ña ná candico na ña jánaḥa ndo. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

16 'Ndáhví nahá naçuu ndó jáchi cúu ndó tátuhun na cuaá ndáca inga na cuaá. Jáchi jánaḥa ndó ñayivi ña tá sahan na tuhun na nuú inga ñayivi nani táva na quivi veñuhu cáhnu já queá co ndúsa jáxinu coo na tuhun na. Joo cáchí ndo ña tá táva na quivi jiuḥun cuáan ndácaan veñuhu cáhnu já queá ndúsa jáxinu coo na tuhun na, já cáchí ndo. 17 Joo tóntó ndivaha ndó ta cúu ndó tátuhun na cuaá viti. Jáchi co cándaa ini ndó ña íin chága saḥá veñuhu cáhnu a juú ga saḥá jiuḥun cuáan jáchi mé jiuḥun cuáan cúu á cuéntá Ndióxi saḥá ña ndácaan ini veñuhu cáhnu ña cúu cuéntá mé á. 18 Ta inga tucu ña jánaḥa ndó nuú ñayivi cúu ña yóho: Tá sahan in na tuhun na nuú ñayivi nani táva na quivi nu náa Ndióxi já queá co ndúsa jáxinu coo na tuhun na. Joo cáchí ndo ña tá táva ñayivi quivi ña sájoço na cánúu nu náa cán já queá ndúsa jáxinu coo na tuhun na, já cáchí ndo. 19 Joo tóntó ndivaha ndó ta cúu ndó tátuhun na cuaá. Jáchi íin chága saḥá nu náa cán a juú ga saḥá ña sájoço na cánúu

nu náa jáchi ña sájoço na cán cúu á cuéntá Ndióxi saḥá ña cánúu a nu náa cuéntá mé á. 20 Saḥá ña cán queá ndá na táva quivi nu náa já queá táva ndihí ri na quivi tóco ndihí ña sájoço na cánúu nu náa cán. 21 Ta ndá na táva quivi veñuhu cáhnu já queá táva ri na quivi Ndióxi jáchi cán íin mé á. 22 Ta ndá na táva quivi indivi já queá táva ri na quivi Ndióxi xihín quivi nu sáço a sáhdá a chuun.

23 'Ndáhví nahá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Mé ndó cávaha ndó uxu táhdá ña jáquee ndó ñundáhyi ndo ta sahan ndó in táhdá ña nu Ndióxi. Já cája ndó anda yucu válí ña támi sahan tátuhun menta xihín anís xihín comino. Joo co cája ndó ña íin chága saḥá ña sáhdá ley Moisés. Jáchi co cája ndó ña ndaa ta co cándáhví ini ndó ñayivi ta co cándeé ini ndó Ndióxi tá quiahva sáhdá ley caja ndó. Mé a ndaa xini ñúhu cája ndó tóco ndihí ña yóho joo a jándacoo ndó ña jóço ndó nu Ndióxi in táhdá nuú uxu táhdá ña ñéhe ndó. 24 Mé ndó cúu ndó tátuhun na cuaá ndáca inga na cuaá. Jáchi ndinuhu ini ndó cája ndó ña coo cuahá saḥa cuéntá ley Moisés joo sácú xoo ndó ña íin chága saḥa nu Ndióxi caja ndó. Cúu ndó tátuhun in da ndíhi ini da tavá da in ndicama loho ndácaan tása da ná a cóco da ri. Joo co íhvi toho nu dá cocó da in camello.

25 'Ndáhví nahá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi ndíhi ini ndó caja ndó costumbre ña ndícata ndó jata vaso xihín jata coho joo ña ñúhu ini a cán najátaca cuíhná ndo saḥá ña ndiáva ndivaha ini ndó ña núu. 26 Ndáhví nahá naçuu ndó, na fariseo jáchi cúu ndó tátuhun na cuaá. Ña ndítahan caja ndó nu cuítí queá ndaja vii ndó ínima ndó já cacuu ndó tátuhun in vaso á in coho sa nandicata vaha na jáchi nandivií ini a xihín jata viti.

27 'Ndáhví nahá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Cúu ndó tátuhun vehe válí ndíta camasanto nu táan na ndii. Ndató jándicuchu na jata joo chí ini a a juú quiahva quini sahan jáchi ndinuhu lásá ndii ñúhu ini a. 28 Quiahva já cúu mé

ndó jáchi ndáa ndó tátuhun ñayivi vaha ndivaha. Joo mé a ndaa co cúu ndó tá quiahva ndáa ndó jáchi ndinuhu ña núu ndácaan ínimá ndo.

²⁹ Ndáhví nahá nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Cávaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa. ³⁰ Ta cáchí ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahní profeta, na nasanduu sanahá”, cáchí ndo. ³¹ Ta xihín ña yóho náha táhyí a ña naquixi ndó chichi na nasahní profeta sanahá. ³² Cuáhán ndo jáxinu coo ndó mé cuachi nacasáhá cája tásáhnú jícó ndo sanahá.

³³ Mé ndó cúu ndó tátuhun coo jáchi cája ndó tá quiahva cája coo. A cúu cacu ndaa ínimá ndó ta chí tandaa quivi cuhun ndó indayá nu ndoho ndivaha ini ndó. ³⁴ Sahá ña cán quéa yehe chindahá i java profeta nu ndo xihín java na ndichí xihín java na jánaha tuhun Ndióxi nu ndo. Joo java na cahní ndó na ta java na cata caa ndó na ndica crúxu ta java na cani ndó na ini veñuhu ta java na taxi ndó na tá ñuu tá ñuu. ³⁵ Ña cán quéa caça Ndióxi cuéntá nu ndó saha tóco ndihi ñayivi ndaa, na nasahní ndo sanahá. Caça mé á cuéntá saha Abel, da nasacuu da ndaa janda quiahva naxinu coo a nuú caça mé á cuéntá saha Zacarías, da nasacuu jahyi Berequías. Mé da yóho nasahní ndó ini veñuhu tañu nu náa xihín nuú yíi ndivaha. ³⁶ Mé a ndaa ná cahan i xihín ndo ña caça Ndióxi cuéntá saha tóco ndihi ndijí jan nuú ñayivi ndúu tiempo viti.

Tá sácu Jesús sahá ñayivi ndúu ñuu Jerusalén
(Lc. 13:34-35)

³⁷ Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cáni ndó na xihín yuu na nachindahá Ndióxi nu ndó. Cuahá ndivaha tañu cúní jándataca ndihi i ndohó joo coo naxeen ndó cuni johó ndó. Cúu á tá quiahva cája nduxú tá játa rí jahyi válí rí tixi ndixi rí. ³⁸ Ta viti cuni johó ndó ña cahan i xihín ndo. Vaxi quivi tá jani

ndáha mé vehe ndó candoo a. ³⁹ Ta mé a ndaa ná cahan i xihín ndó ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í”, cachi ndó — nacachi Jesús xihín na cán.

24

Cáxi tuhun Jesús ña vaxi quivi ndihi sahá veñuhu cáhnú ndácaan ñuu Jerusalén

(Mr. 13:1-2; Lc. 21:5-6)

¹ Ta tá sa naquee Jesús veñuhu cáhnú Jerusalén cán cuahan já nacativi na xica tuun xihín á nu á ta nacasáhá na cahan na xihín á ndá quiahva cáa veñuhu cán. ² Joo nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña janda ni in yuu yóho a candoo jatá inga yuu jáchi vaxi quivi tá nditaní ndihi ña yóho — nacachi Jesús xihín na xica tuun xihín á cán.

Ña coo tá sa nacayati quivi ndihi sahá ñuyívi

(Mr. 13:3-23; Lc. 21:7-24; 17:22-24)

³ Anda já naquee Jesús cuahan chí yúcu nu cáa yitó olivo xihín na xica tuun xihín á. Ta nani ndúu na cán nacativi na xica tuun xihín á nu ín coo a cán já nacasáhá ndáca tuhún xóo na a já nacachi na já xihín á:

—Cúní nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quivi quixi tucu ndó ñuyívi yóho. Ta ndaja coo tá ná ndihi saha ñuyívi — nacachi na xihín Jesús.

⁴ Já nacachi Jesús já:

—Cuéntá coo ndó ná a jándahvi ni in na ndohó. ⁵ Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndo: “Yehe cúu Cristo, da nachindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na. ⁶ Ta jandá johó ñehe ndó tuhun ña ndicuíta ñayivi cani táhan na yóho á cáa. Joo a cáyíhví toho ndó jáchi já ndítahan coo. Joo ña yóho coo cúní cachi a ña naxinu coo quivi nu ndihí. ⁷ Jáchi ñayivi ndúu in nación ndicuíta na cani táhan na xihín na ndúu inga nación. Ta quixi tama ta quixi cuehe ta ndaja táhan quixi a táan. ⁸ Ta ña yóho cacuu a tondohó

ñā casáhá jihna ñúhú vaxi nuú ñayivi jáchi cámanj xinu cōo nuú ndoho chága ini na.

⁹ 'Anda já tiin na ndohó ta ndiquiahva na ndohó ndahá na cō cūni ndohó já ná caja xíxi na xihin ndo. Ta cahni na ndohó ta tóco ndihi ñayivi ndúu ñuyiví candají na ndohó sahá yehe. ¹⁰ Ta mé tañu já cuaha ná jándacoo na ñā candeé ini na yehe ta ndaja táhan mé ná candají táhan na ta ndaja mé ná jicó túhún táhan na. ¹¹ Ta quixi cuahá ndivaha na túhún ta cachi na cúu ná profeta cuéntá Ndióxi joo jándahvi na cuahá ndivaha ñayivi. ¹² Ta sahá ñā ndicuahá ndivaha ñā núu ñuyiví yóho sahá ñā cán quéa jándacoo cuahá ñayivi ñā quíhvi ini táhan na. ¹³ Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. ¹⁴ Ta ní cúu ñuyiví ndicuítá nuu túhun vaha cáhan sahá yehe já ná candaa ini ñayivi ndá quiahva cacomí Ndióxi cuéntá saha ná. Anda jávi ndihi saha ñuyiví.

¹⁵ 'Na cáhvi tutu ná candaa ini na ñā cáhan. Sanahá naçahyí profeta Daniel sahá in ñā quini ñā játiví ñahá. Tá ná cuni ndó ñā xinu cōo ñā yóho nuú yíi cuéntá Ndióxi ¹⁶ já quéa ndá na ndúu estado Judea xini ñúhú cunu na cūhun na chí yúcu. ¹⁷ Ta ndá na cándojó jini véhe, cō ndítahan nuu na tavá na ndá ñaha vehe na. ¹⁸ Ta ndá na ndúu yúcu, ná a ndicó cōo na vehe na ndiquehe na jáhma ná. ¹⁹ Ndáhvi naçuu najihí, na ñúhu jahyi mé quivi já. Ta ndáhvi naçuu najihí na néhe ndaa na valí táhan ñā chíchí yíi. ²⁰ Caca tahví ndo nu Ndióxi ñā ná a cácuu a tiempo vixi tá ná cunu ndó cūhun ndo. Ta cacā tahví ndo nu á ñā ná a cácuu a quivi ndiquehe ndéé ná. ²¹ Jáchi quivi ndoho ndivaha ini ñayivi cacuu a cán. Jáchi janda tá naçava sahá saha ñuyiví cōo nandoho ini na tá quiahva ndoho ini na mé quivi já. Ta tá ná yaha ñā jan, a ndicó cōo ga ñā ndoho ini na quiahva já. ²² Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá na sa naçaxi mé á sahá na cán ndaja cuítí mé á tiempo cán.

²³ 'Ta tá ná cachi in na xihin ndó: "Candehé ndo. Yóho íin Cristo, da nachindahá Ndióxi cacomí a cuéntá sahá ñayivi." Á tá ná cachi na: "Candehé ndo.

Cáa íin da", cachi na, já quéa a cándúsa toho ndó na. ²⁴ Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá ndivaha ñā náhnu xihín ñā xitúhún ñā ná jándahvi na ñayivi. Ta janda na sa naçaxi Ndióxi jándahvi na tá ná cuu caja na ñā. ²⁵ Candehé ndo jáchi sa naçaxi túhun yaxi ndihi i ñā yóho xihin ndo. ²⁶ Ñā cán quéa tá ná cachi na xihin ndo: "Candehé ndo. Yucú íchi cáa íin Cristo." Já quéa a cūhun ndó jan. Á tá ná cachi na xihin ndo: "Candehé ndo. Ini vehe yóho ndácaan da cúu Cristo." A cándúsa ndó na. ²⁷ Jáchi tá quiahva yehe tása quéta xoo nu cána candii ta xójo cava indivi quiahva já queta yehe, da nachindahá Ndióxi nduu ñayivi. ²⁸ Mé nu candúhu yiquí cuñu ndii cán cacuu nuú ndicutú tiyocó canduu rí.

Ndá quiahva coo tá ná quixi tucu Jesu-cristo
(Mr. 13:24-37; Lc. 21:25-33; 17:26-30, 34-36)

²⁹ 'Ta ivi laá tá jacá nayaha quivi ndoho nahá ini na cán já canaa nuú candii ta ni a ndiyehe ga yoo ta janda indivi quee quimi cuyu rí nu ñúhu ta janda indivi ñā naçavaha Ndióxi ndiquiji nuu. ³⁰ Anda já ndaca náha ñā xitúhún indivi já candaa ini ñayivi ñā vaxi yehe, da nachindahá Ndióxi nduu ñayivi. Ta ndaja táhan ñayivi ndúu ní cúu sahá ñuyiví ndahyi cóhó na ta já cuni na yehe quixi i tañu vico indivi xihin tóco ndihi ndeé e ta cuni na ndá quiahva cáhnu cúu yehe. ³¹ Ta já chindahá i tátó mí i ñā ná tiví cóhó na trompeta já ná nditaca tóco ndihi na naçaxi i tañu tóco ndihi ñuu janda ní cúu saha ñuyiví ta janda ní cúu sahá indivi.

³² 'Jacuaha ndó ñā cūni cachi mé quiahva sácú u nu ndó sahá yító tító ñúhú. Jáchi tá yúta ndáha dó cán ta já vaxi núma valí do já candaa ini ndó ñā sa naçayati tiempo ihni. ³³ Quiahva já cuu candaa ini ndó ñā tá ná cuni ndó ñā sa cúu tóco ndihi ñā naçaxi i xihin ndo yóho já cuu candaa cáxi ini ndó ñā sa naçayati tiempo quixi tucu yehe ñuyiví yóho. ³⁴ Mé a ndaa ná cahan i xihin ndo ñā yaha tóco ndihi ñā yóho ta

anda jáví quivi na ndúu tiempo viti. ³⁵ Ta ndihi saha indivi xihín ñuyivi joo a ndihi toho sahá tuhun nacahan i xihín ndo yóho jáchi coo tá coo tá quiahva nacachi i yóho.

³⁶ Joo ni in túhún toho ñayivi co xini na ndá quivi á ndá hora yaha ña yóho. Ni mé tátō Ndióxi ndúu indivi co xini na ndá quivi coo ña yóho. Ta ni yehe, da cúu in túhún jini já jahyi Ndióxi co xini ndá quivi coo ña yóho. In túhún Ndióxi, tátá i queá xini a. ³⁷ Tá quiahva nayaha tiempo tá nasahin Noé sanahá quiahva já yaha ri tá ná tandaa quivi quixi tucu yehe, da nachindahá Ndióxi nduu ñayivi. ³⁸ Jáchi mé tiempo cán tá camaní cuun javi quini cán já cáxixi ñayivi ta cáxihí na ta tándaha ná ndúu na janda quiahva naquihvi Noé ini barco cáhnu cán. ³⁹ Ta coo naquehe na cuénta janda quiahva naxinu coo javi quini cán ta najánaa dó sahá ndihi na. Quiahva já a quehe na cuénta saha ndá quivi quixi yehe, da nachindahá Ndióxi nduu ñayivi. ⁴⁰ Mé tiempo já canduu ivi dataa xútu da ta in da ndindita cuhun xihín i ta inga da candoo va. ⁴¹ Ta canduu ivi najihí ndico na ta in ña ndindita cuhun xihín i ta inga ña candoo va.

⁴² Xini ñúhú coo tiahva vaha ndó jáchi co xini ndó ndá quivi quixi tucu xitoho ndó. ⁴³ Xini ñúhú candaa vaha ini ndó ña tá xini in dataa ndá hora cuni quihvi ta cuihná vehe da já queá a cúju toho da jáchi candaa vaha da vehe da já ná a quihvi da cuihná vehe da. ⁴⁴ Sahá ña cán queá ndítahan canduu tiahva ri ndóhó va. Jáchi xinu coo yehe, da nachindahá Ndióxi nduu ñayivi mé hora tá coo cáhán ndo xinu coo i nu ndo.

Da cája chúun vaha ta da coo cája chúun vaha

(Lc. 12:41-48)

⁴⁵ Mé ndó ndítahan nu ndó cacuu ndó tátuhun in da ndichí jini, da cája chúun vaha nuú xitoho da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já naquee xitoho da cuahan da. ⁴⁶ Tahvi nacuu mé mozo cán tá xinu coo xitoho da ta ndítahan da cája chuun yii va da ña nacandoo nu dá caja da. ⁴⁷ Mé a ndaa ná cahan i xihín ndo ña quiahva xitoho da

cán chuun nu dá ña ná cacomí da cuénta saha tóco ndihi ñaha cómi xitoho da. ⁴⁸ Joo tá casáha da cája núu da ta cáhán da ña cayancá ndivaha xitoho da ndicó coo da. ⁴⁹ Ta sahá ña cán queá casáha da cája xixi da xihín java ga na cúu mozo xihín dá. Ta já cája ga da casáha xixi da ta xihí da ta já xini da. ⁵⁰ Ta ndaja coo xinu coo xitoho mozo cán mé quivi coo cáhán da ña xinu coo da. ⁵¹ Anda jáví jándoho quini xitoho da cán ini da jáchi coo cúu dá tá quiahva cája da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhñá nuhu ná —nacachi Jesús.

25

Sacú Jesús quiahva sahá ña nacaja uxu najihí, na tacú

¹ Já cáhí tucu Jesús já:

—Tá ná xinu coo quivi cacomí Ndióxi cuénta sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naquehe na candil ña ñúhu síti ini já cuahan na ndique táhan na xihín da tándaha cán. ² Uhun táhan na tacú cán cúu ná na tácu ini ta uhun na cán cúu ná na coo tácu toho ini. ³ Ndihuhun na coo tácu ini cán natiin na candil ñaha na cuahan na joo coo naquehe chága na síti ña jácutú tucu na candil tá sa cuni ndahva ña. ⁴ Joo na tácu ini cán ñehe na candil ñaha na ta ñehe ri na yúyú síti cuahan na ña jácutú na candil tá sa cuni ndahva ña. ⁵ Ta ndaja coo nacasáha cáyancá mé da tándaha cán sahá ña cán queá nanaa ini ndihi na ta naquiji va na. ⁶ Joo tá nacuu yati java ñuú já tácu cáyuhú java na já cáhí na já: “Candehé ndo. Sa vaxi da tándaha. Cuahán queta ndó ndiquehe ndó da”, cáhí na cáyuhú na cán. ⁷ Já nandacoo tóco ndihi na tacú cán ta nacasáha na cája ndivi na candil ñaha na. ⁸ Anda já nacasáha ndihuhun na coo tácu ini cán cáhan na xihín ndihuhun na tácu ini cán já cáhí na já xihín ná: “Caja ndó ñamaní quiahva loho ndó síti ndo nuú nde jáchi sa nandihí síti nde ta jalóho cuni ndahva candil ñaha nde”, cáhí na coo tácu ini cán. ⁹ Já nanducú ñehe ndihuhun na tácu ini cán tuhun nu ná já cáhí na já: “A cúu toho caja

nde quiahva nde síti nu ndó jáchi tiahva náá ndimaní dó nu mé nde. Vaha chága cuáhán mé ndó nu cáyahvi dó cueen ndó do”, nācachi nā tácu ini cán xihín ná. Já naquee nā cō tácu toho ini cán cuahan nā. ¹⁰ Joo nani naquee ndíhuhun nā cō tácu ini cán cuahan nā cueen na síti nā já naxinu da tándaḥa cán ta nandihvi ndíhuhun najihí tácu ini cán ini vehe nu ín vicó tándaḥa cán ta nandaji yéhe. ¹¹ Tá nandihí já nandai cuu ndíhuhun nā nasahan naxeen síti cán já cáti ndáḥa ná yéhe ta cáyuhú nā já cáchi nā já: “Cuná loho ndó yéhe nuú nde, xitoho”, cáchi nā cáyuhú nā ndíta na jata véhe. ¹² Anda já nanducú ñehe da tándaḥa cán tuhun nu ná já cáchi da já xihín ná: “Cō xini toho i yo cúu ndóhó”, nācachi da cán xihín ná —nācachi Jesús.

¹³ Já nācachi tucu Jesús já:

—Sahá ña cán queá xini ñúhú cuéntá vaha coo ri ndóhó va jáchi cō xini ndó ndá hora xinu cōo quiví cacomí Ndióxi cuéntá saḥa ndo —cáchi Jesús.

*Ña nācacha in taa xihín jiuḥún da
(Lc. 19:11-27)*

¹⁴ Ta já cáchi tucu Jesús já:

—Tá ná xinu cōo quiví cacomí Ndióxi cuéntá saḥa ñayivi já cacuu a tátuhun ña nayaha xihín in dataa. Tá naxinu cōo quiví quee da cuhun xicá da já nācana da java da cája chúun xihín dá. Ta já nandiquiahva da jiuḥún da ndahá da cán ña ná candaa da ña. ¹⁵ Ta tá quiahva tiahva in in da cañehe da jiuḥún quiahva já nasahan xitoho da nu dá. In táhan da cán nasahan xitoho da uhun mil nu dá ña ná candaa da ña. Ta inga da cán nañehe ivi mil. Ta inga da cán nañehe in mil. Anda já naquee xitoho da cuahan xicá da. ¹⁶ Ta ndaja coo da nandiquiahva xitoho uhun mil ndáḥa cán nācacha da ndahvi xihín jiuḥún xitoho da ta já nañehe dá inga uhun mil chága jatá. ¹⁷ Ta jári da nasahan xitoho ivi mil nu cán nācacha da ndahvi xihín jiuḥún cán ta nañehe dá inga ivi mil jatá. ¹⁸ Joo da nasahan xitoho in mil nu cán naṭiin da jiuḥún xitoho da ta já nasahan da nācaan da in yávi ta já najánduxu da ña.

¹⁹ Ta tá sa nayaha cuaha tiempo já nandicó cōo xitoho mozo cán. Ta já

nācasáhá cája vií da cuéntá xihín da cán. ²⁰ Ta já naxinu da nañehe uhun mil cán nuú xitoho da ta já nandiquiahva da inga uhun mil ña nañehe dá jatá jiuḥún cán nuú xitoho da. Ta já cáchi da já xihín xitoho da: “Candehé ndo uhun mil nasahan ndó nuú i. Joo yóho ín inga uhun mil nañehe e jatá”, nācachi da xihín xitoho da. ²¹ Anda já nācachi xitoho da já xihín dá: “Vaha ndivaha nācájún. Mozo vaha ndivaha cúu yóhó jáchi chá va nasahan i nuun ta vaha nācacha chúun ña. Sahá ña cán queá cacha i ña ná cacomún cuéntá saḥa cuaha chága ñaha. Ta viti cuu coún xihín i ta já ná cajii chága inún”, nācachi xitoho da. ²² Tá nandihí já naxinu cōo ri da nandiquehe ivi mil cán nuú xitoho da. Já nācachi da já xihín xitoho da: “Ivi mil nasahan ndó nuú i joo yóho ín inga ivi mil nañehe e jatá”, nācachi da xihín xitoho da. ²³ Anda já nācachi xitoho da já xihín dá: “Vaha ndivaha nācájún. Mozo vaha cúu yóhó jáchi chá va nasahan i nuun ta nācacha chúun vahún ña. Sahá ña cán queá cacha i ña ná cacomún cuéntá saḥa cuaha chága ñaha. Ta viti cuu coún xihín i ta já ná cajii chága inún”, nācachi xitoho da. ²⁴ Joo tá naxinu cōo ri da nañehe in mil ndahá xitoho cán já nācasáhá cáchi da já xihín xitoho da: “Candehé ndo, xitoho i. Sa cándaḥa vaha ini i ña cúu ndó in taa ndacú ndivaha tuhun. Ta vatí cō xútu ndó nuú in ñúhú joo jáquee tá jáquee ndó nu á. Ta jātaca ndó ña nuú cōo naxutu ndó ña. ²⁵ Sahá ña cán queá nayihví vi ta nasahan i najánduxu u jiuḥún nasahan ndó nuú i tixi ñúhú. Joo yóho ín jiuḥún ndo ndiquehe ndó ña”, nācachi da cán xihín xitoho da. ²⁶ Anda já nācachi xitoho da já xihín dá: “Cōo cúun in mozo vaha nuú i. Cúun da júsa ndivaha. Sa cándaḥa vaha inún ña jáquee e nu ñúhú ña cō xútu u, ²⁷ ña cán queá ndá cuéntá queá cōo nasahan tóun jiuḥún i banco já ná ndiquehe e jiqui á nuú nā cán tá ná ndicó cōo i, nduu”, nācachi xitoho da cán xihín dá. ²⁸ Anda já nācachi da xihín java nā ndúu cán: “Candaa ndó in mil jan ndahá da jan ta quiahva ndó ña nuú da sa cómi uxu mil jan. ²⁹ Jáchi da cája chúun vaha ñehe chága ví da ñaha já queá ná coo cuahá chága nu dá. Joo da cōo cája chúun

vaha janda ña chá cómi da ndindaa ndáha dá. ³⁰ Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaa ñayivi janda quiahva cáhña nuhu ná sahá ña ndóho ndivaha ini na”, ñacachi xitoho da, —ñacachi Jesús.

Tá ná cavii sahá ñayivi nu Ndióxi

³¹ Já ñacachi tucu Jesús já:

—Tá ná xinu quivi quixi yehe, da ñachindahá Ndióxi nduu ñayivi ta quixi i xihin tóco ndihi na cúu tátó Ndióxi. Anda já cacoo i nu sacoo na sáhdá chuun ta já ndicáhu ndivaha i. ³² Ta nditaca ñayivi ndúu ndíjáa ñuyiví nuú i. Ta já casahá i ndicahnda java táhan i na tá quiahva cája in da ndaa ndicachi tá sáhdá java da ndicachi xihin tijúhu ña ná a cáva táhan rí. ³³ Ta já chinduu u ñayivi cuénta mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuénta mí i, na cúu tátuhun tijúhu cán. ³⁴ Ta sahá ña cúu u da cómi cuénta sahá ñayivi sahá ña cán quea cachi i já xihin na ndúu xoo cuáha i cán já: “Cuáyaha ndó ná cacomí Ndióxi, tátá i cuénta saha ndo jáchi cúu ndó na ñacaja cuahá mé á ñamaní xihin. Jáchi janda tá cámaní cava sahá saha ñuyiví sa ñasacu tiaha mé á nuú canduu ndó ña cacomí a cuénta saha ndo. ³⁵ Jáchi ñasahan ndó ñaxixi i tá ñacuico i. Ta ñasahan ndó ticuui nuú i tá ñahichi ini i. Ta ñandiquehe vaha ndó yehe tá ñasacuu u da tóho ñaxinu i nu ndo. ³⁶ Ta ñajasá ndo jáhma nuú i tá co ñéhé e ña cándixi i. Ta tá ñasaquíhvi já ñachindeé ndó yehe. Ta tá ñasandacaan i vecaa já ñaxito nihni ndó yehe.” ³⁷ Anda já ndaca tuhún java na ñacaja vaha ta já cachi na já xihin i: “Ndá tañu quea ñaxini nde ña cuico ndó, xitoho nde ta já ñasahan nde ña xíxi ndó. Ta ndá tañu ñaxini nde ña íchi ndó ticuui ta já ñasahan nde ticuui nu ndo. ³⁸ Ta ndá tañu ñasacuu ndó da tóho ta ñandiquehe vaha nde ndohó. Ta ndá tañu ñaxini nde ña cámaní jáhma cándixi ndó ta ñajasá nde ña nu ndo. ³⁹ Ta ndá tañu quea ñaxini nde ña quíhvi ndo ta ñachindeé nde ndohó. Ta ndá tañu ñasandacaan ndó vecaa ta ñaxito nihni nde ndohó.” ⁴⁰ Anda já cachi yehe, da cómi cuénta sahá ñayivi já xihin ná: “Mé a ndaa ná cahan i xihin

ndó ña tá ñacaja ndó a xihin na cúu cuénta mí i, na coó saha nuú ñayivi ñuyiví já cúu á tátuhun ñacaja ndó a xihin mí i”, cachi i xihin na ndúu xoo cuáha i.

⁴¹ Anda já casahá cachi i já xihin na ndúu xoo íti i cán já: “Caxoo ndó nuú i jáchi cúu ndó na ñacatavi cháhan ta cuhun ndó indayá cañuhu ndó anda ama caa quivi. Jáchi ña jan cúu ña ñasacu tiaha Ndióxi ndacaan tiñahá sacuaña xihin tátó mé rí. ⁴² Jáchi coó ñasahan ndó ña xíxi i tá ñacuico i ta ni coó ñasahan ndó ticuui nuú i coho i tá ñahichi ini i. ⁴³ Da tóho cúu u ñaxinu coo i tañu ndó ta coó ñandiquehe vaha ndó yehe. Ta ñandimaní i ña cándixi i ta coó ñasahan ndó in jáhma loho nuú i. Ñasaquíhvi ta ñasandacaan i vecaa ta coó ñaxito nihni ndó yehe”, cachi i xihin na ndúu xoo íti i cán. ⁴⁴ Anda já nducú ñehe ri na cán tuhun nuú i já cachi na já xihin i: “Ndá tañu quea ñaxini nde ña cuico ndó ta ndá tañu quea ñaxini nde ña íchi ini ndó ticuui ta ndá tañu ñasacuu ndó da tóho ta ndá tañu ñandimaní jáhma ndo ta ndá tañu ñasahin quíhvi ndo ta ndá tañu ñasandacaan ndó vecaa ta coó ñachindeé nde ndohó”, cachi na ndúu xoo íti i cán xihin i. ⁴⁵ Anda já cachi i já xihin na coo cúu cuénta mí i já: “Mé a ndaa ná cahan i xihin ndo ña tá ta coo ñacaja ndó xihin ñani táhan ndó, na coo saha nuú ñayivi ñuyiví já quea coo ñacaja ndó ña xihin yehe”, cachi i xihin na coo cúu cuénta mí i. ⁴⁶ Ta já yaha ndihi na cán cuhun ná indayá anda ama caa quivi. Ta na ñacaja vaha cán yaha na nu Ndióxi catacu na anda ama caa quivi —cáchi Jesús.

26

Ndítuhún jehé na tiin na Jesús

(Mr. 14:1-2; Lc. 22:1-2; Jn. 11:45-53)

¹ Tá ñandihí ñacahan Jesús tóco ndihi ña yóho xihin ñayivi cán já ñacachi a xihin na xica tuun xihin á cán já:

² —Sa cándaa ini ndó ña tixi ivi quivi coo vicó pascua ta já ndiquiahva na yehe, da ñachindahá Ndióxi nduu ñayivi ndahá na cata caa yehe ndica crúxu —ñacachi Jesús xihin na xica tuun xihin á cán.

³ Anda já na sacuaña nuú jutú xihin na jánaña ley Moisés xihin na sacuaña veñuhu ñandique táhan na yéhé Caifás, da cúu

sacuaḥa chága nū ndíhi jutu cán. ⁴ Ta najándique táhan tuhun na ndá quiahva caja na tiin jehé na Jesús ña ná cahní ñahá na. ⁵ Já cáchi xihín táhan na já:

—Joo a tiin toho í da tañu mé víco jáchi tiaḥva náá ndivaa ñayivi —ñacachi na.

Tá nachojo in ñáñáha perfume jini Jesús
(Mr. 14:3-9; Jn. 12:1-8)

⁶ Ta ndaja coo íin Jesús ñuu Betania vehe Simón, da caḥan na xihín: ta nandoho cueḥe táhyi. ⁷ Já naxinu in ñáñáha nū á ta cáñee in yúyú ña alabastro ndáha ña. Ta ini mé yúyú cán ñuhu perfume, dó yahvi ndivaha. Ta já naxinu ña najácuyu ña do jini Jesús nani íin coo a nū mesa cán. ⁸ Tá naxini na xica tuun xihín Jesús cán ña yóho já ñacasáhá na xójo ini na já cáchi na já:

—Ndá cuénta quea tívi uun perfume yahvi ndivaha yóho. ⁹ Jáchi cuu jicó yó do ta já quehé cuahá jiuḥún saḥa do, nduu ta já cuu jasá yo jiuḥún cán nuú na ndahví —ñacachi na cán.

¹⁰ Ta ñacandaa ini Jesús ña cáhvi ini na cán ña cán quea ñacasáhá cáchi a já xihín ná:

—Ndá cuénta quea cája cueḥe ndó xihín ñáñáha jan jáchi ña vaḥa quea ñacaja ña yóho xihín i. ¹¹ Jáchi na ndahví níi tiempo canduu na tañu ndó joo yeḥe a cóo tuun toho i xihín ndo. ¹² Jáchi tá najácuyu ña perfume yiquí cuñu i já ñacaja tiaḥva ña yeḥe ná coo tiaḥva vi tá ná casaá quivi nduxu. ¹³ Mé a ndaa ná caḥan i xihín ndo ña níi cúu ñuyivi nuú caca nuu ñayivi caḥan na tuhun vaḥa saḥá i ndicani na ña ñacaja ña yóho xihín i já ndicuhun ini na saḥa ña —ñacachi a.

Jicó túhún Judas Jesús
(Mr. 14:10-11; Lc. 22:3-6)

¹⁴ Ta ndaja coo in táhan da uxu ivi xica tuun xihín Jesús, da nani Judas Iscariote ñasahan da caḥan da xihín na sacuaḥa nuú jutu. ¹⁵ Ta já cáchi da já xihín ná:

—Ndaja quiahva ndó nuú i tá ná ndiquiahva i Jesús nū ndo —ñacachi Judas xihín na sacuaḥa nuú jutu cán.

Anda já ñasahan na oco uxu jiuḥún cúxú nū dá saḥá Jesús. ¹⁶ Ta sa mé nani já ñacasáhá Judas ndúcú da ndaja cuu caja da ndiquiahva da Jesús ndáha ná.

Tá naxijini ndayí Jesús xihín na xica tuun xihín á

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Mé quivi nuú víco xíxi na pan, ña co quee yusá naxaa xihín cán já naxinu na xica tuun xihín Jesús cán nū á. Já ñacachi na já xihín á:

—Ndáchi cúni ndó cuhun nde caja ndívi nde cajini ndó vicó pascua —ñacachi na xihín á.

¹⁸ Anda já ñacachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jánaha ndeḥe cáchi xuhun: Cuhun i vehe ndó cajini i vicó pascua xihín na xica tuun xihín i jáchi sa nandindaa tiempo cuhun i viti” —ñacachi Jesús.

¹⁹ Já ñaquee na cán ñasahan na ñacaja na tá íin ñasahnda Jesús nū ná ta cán ñacaja ndívi na ña cajini na vicó pascua.

²⁰ Ta ndaja coo tá ñacuaá já ñasacoo Jesús nū mesa xihín ndíhuxu ivi na xica tuun xihín a cán. ²¹ Ta nani xijini na já ñacasáhá cáchi a já:

—Mé a ndaa ná caḥan i xihín ndó ña in táhan ndó, na xica tuun xihín i cacuu da jicó túhún yeḥe —ñacachi Jesús xihín ná.

²² Anda já ñacasáhá na cán cácuéha ndivaha ini na já ñacasáhá tá in tá in na ndáca tuhún na Jesús já cáchi na já xihín á:

—Á yeḥe cacuu da jicó túhún ndo, xitoho i —cáchi na ndáca tuhún ñahá na.

²³ Anda já nanducú ñeḥe Jesús tuhun nū ná já ñacachi a já xihín ná:

—Da ñaquihvi ndáha ini coho xíxi i, da cán cúu da jicó túhún yeḥe. ²⁴ Yeḥe cúu da ñachindahá Ndióxi nduu ñayivi ta ndítahan nuú i quivi i tá íin cáchi tuhun Ndióxi. Joo ndahví nahá ñacuu da jicó túhún yeḥe. Janda vaḥa chága ná a cácu da, nduu —ñacachi Jesús.

²⁵ Anda já nandicaḥan Judas, mé da jicó túhún ñahá cán já ñacachi da já xihín Jesús:

—Xitoho i, á yeḥe cúu da jicó túhún ndo —ñacachi da xihín á.

—Jivi mún cúu dá —ñacachi Jesús xihín dá.

²⁶ Ta nani xíxi na ndúu na ñatiin Jesús pan já nandiquiahva ndixahvi nū Ndióxi. Tá nandihi já ñasahnda java ña ta

nandicahnda ña nuú na xíca tuun xihín á cán. Ta já nacachi a já xihín ná:

—Júhun ndó jáchi ña yóho cúu tátuhun yiquí cuñu i —nacachi a.

²⁷ Tá nandihí já natiin a in vaso nu ñúhu tó uva já nandiquiahva ndixahvi nu Ndióxi já nacachi a já xihín na xíca tuun xihín á cán já:

—Coho ndihí ndó dó ñúhu ini vaso yóho.

²⁸ Jáchi dó yóho cúu dó tátuhun ñi i, dó cuíta sahá cuahá ñayivi já ná ndoo cuachi na. Tá ná cuíta ñi i já candaá ini ndó ña najáxinu coo Ndióxi tuhun a nasahan sanahá. ²⁹ Mé a ndaa ná cahan i xihín ndo ña a cóho ga i tó uva janda quiahva ná xinu coo quiví coho tucu u inga dó vaha chága xihín ndo tá ná xinu quiví cacomí Ndióxi, tátá i cuénta sahá ñayivi —nacachi a.

Cáxi tuhun Jesús ña chijehé tuhún Pedro ña xini da mé á

(Mr. 14:26-31; Lc. 22:31-34; Jn. 13:36-38)

³⁰ Ta tá nandihí naxita na in canto já naquee na cuahan na yucu yitó olivo. ³¹ Ta já nacachi Jesús já xihín ná:

—Mé ñuú viti jándacoo ndihí ndó yehe cuhun ndó sahá ña ndoho i. Já cáchi tuhun Ndióxi já: “Cahní i da ndaa ndicachi ta xihín ña yóho ndicuíta nuu ndicachi jana dá cuhun ri”, cáchi tuhun Ndióxi. ³² Joo tá sa ná nditacu tucu u já cuhun jihna ñúhu yehe estado Galilea anda já cuhun mé ndó —nacachi Jesús.

³³ Anda já nanducú ñehe Pedro tuhun nu á já nacachi da já xihín á:

—Vatí ná jándacoo tóco ndihí na mé ndó sahá ña ndoho ndó joo a jándacoo toho i ndohó —nacachi da xihín á.

³⁴ Anda já nacachi Jesús já xihín dá:

—Mé a ndaa ná cahan i xuhun ña mé ñuú viti tá camani cana chéle já chijehé tuhún ña xinun yehe uní táhnda —nacachi Jesús xihín dá.

³⁵ Anda já nacachi tucu da já:

—Vatí ná quivi i xihín ndo joo a chijehé tuhun toho i sahá ña xini i mé ndó —nacachi da xihín Jesús.

Ta quiahva já nacachi tóco ndihí java ga na xíca tuun xihín á cán.

Tá xíca tahví Jesús nu Ndióxi in nuú nani a Getsemani

(Mr. 14:32-42; Lc. 22:39-46)

³⁶ Anda já naxinu coo Jesús xihín na xíca tuun xihín á cán in nuú nani a Getsemani. Já nacachi a já xihín ná:

—Yóho cacoo ndó nani ná cuhun i cáca caça tahví i nu Ndióxi —cáchi a.

³⁷ Ta ndaca Pedro xihín ndiví da cúu jahyi Zebedeo cuahan xihín á. Ta já nacasahá cacuéha ndivaha ini a ta a juú quiahva táhvi ini a. ³⁸ Anda já nacachi a já:

—A juú quiahva cacuéha ini i chí quivi i cúu ini i. Yóho candati tóo ndó yehe ta coto a cúu ndo —nacachi Jesús.

³⁹ Ta já naquee mé á nasahan loho chága chí nuu já nacaxítí a janda quiahva naxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamani ña ná a ndóho i ña ihvi ndivaha vaxi nuú i ndoho i. Joo ná coo tá lín cuni mé ndó ta ná a cóo toho ña cuni yehe —cáchi Jesús.

⁴⁰ Tá nandihí já nandicó coo a nuú najándacoo a na xíca tuun xihín á cán ta já nandiñehe á na quiji na ndúu na. Anda já nacachi a já xihín Pedro:

—Á coo nacuu candita ndó ni in hora.

⁴¹ Xini ñúhu coo tiahva ndó ta caça tahví ndo nu Ndióxi já ná a cóto ndojó ri quini ndohó. Jáchi ínimá ñayivi cuni a ndinducú a Ndióxi joo yiquí cuñu na coo lín tiahva caja ña cuni Ndióxi —nacachi Jesús.

⁴² Anda já naquee tucu Jesús táhnda ivi cuahan tucu a caça tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamani ná a ndóho ini i ña jan já ná coo tá lín cuni mé ndó coo —cáchi a.

⁴³ Tá nandihí já nandicó coo tucu a nu ndúu na xíca tuun xihín á cán ta nandiñehe á na quiji tucu na ndúu na jáchi naquehe a mahnú na. ⁴⁴ Já naquee tucu a nasahan xíca tahví a nu Ndióxi táhnda uní ta sa mé tuhun cán nacahan tucu a. ⁴⁵ Anda já naquixi tucu a nu ndúu na xíca tuun xihín á cán já nacachi a já xihín ná:

—Vatí cuni ndó cuju ndó ta vatí cuni ndó ndiquehe ndée ndó joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi

nduu ñayivi ndahá ñayivi cája cuachi.
⁴⁶ Cuahán ndacoo ndó ná cohō. Jáchī sa vaxi da jicó túhún yehe —cáchi a.

Tá natiin na Jesús

(Mr. 14:43-50; Lc. 22:47-53; Jn. 18:2-11)

⁴⁷ Ta nani cáhan yī va Jesús já naxinu Judas, da cúu in táhan uxu ivi na xica tuun xihin á cán. Ta ndáca da cuahá ñayivi, ñéhe na machítí xihin yito viti. Ta na cán cúu ná na naquixi cuéntá na sacuahā nuú jutū xihin cuéntá na sacuahā veñuhu.

⁴⁸ Ta mé Judas, da ndiquiahva ñahá cán sa naçandoo da xihin na cán ña tatí yúhu dá sajóho Jesús jáchi naçachi da já xihin ná:

—Ndá da ná tatí yuhú u sajóho, da cán cúu dá tiin ndó —naçachi da.

⁴⁹ Chí ivi laá naçativi da nu Jesús já naçahan Ndióxi dá xihin á ta já naçatí yúhu dá sajóho mé á. ⁵⁰ Anda já naçachi Jesús já xihin dá:

—Cama chá cajún ña, amigo.

Anda já naçayati na nu Jesús ta natiin tuun na a.

⁵¹ Joo in táhan da xica tuun xihin Jesús cán, naçavá da machítí da ta já naçhitúhun da in johō da cúu mozo nuú da sacuahā chága nu ndíhi jutū cán. ⁵² Anda já naçachi Jesús já xihin dá:

—Chicaan vaha machítí jan jáchi ndá na sáhní xihin machítí, xihin machítí quivi ri na cán va. ⁵³ Á co cándaq inún ña cuu caça tahví i nu Ndióxi, tátá i ña ná chindahá mé á cuahā ndivaha tátō mé á ña ná chindeé na yehe. ⁵⁴ Cuu caja i ña joo xíní ñuhú yaha tá yaha ña naçahyí nuú tuhun Ndióxi ndoho i —cáchi Jesús.

⁵⁵ Ta já naçachi Jesús já xihin na naxinu tiin ñahá cán:

—Cája ndó xihin i tátuhun cája na xihin ta cuihná jáchi naçqueta ndó vaxi ndó tiin ndó yehe xihin machítí ta xihin yito viti. Ta ndijáá ní quivi naçahin i xihin ndo ini veñuhu cáhnu jánahā i tuhun Ndióxi nu ndo ta ni in tañu coo natiin ndó yehe. ⁵⁶ Joo tóco ndihi ña yóho yáha ña já ná xinū coo ña naçahyí na profeta sahá i ini tuhun Ndióxi sanahá —cáchi a.

Tá nandihí já naxinu ndihi na xica tuun xihin Jesús cán cuahan na ta najándacoo na mé á.

Tá ñéhe na Jesús cuahan na nuú nataca ndihi na sacuahā

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Tá natiin na cán Jesús já ñéhe na a cuahan na nuú Caifás, da cúu sacuahā chága nu ndíhi jutū. Ta cán sa nanditútú na jánahā ley Moisés ndúu na xihin na sacuahā veñuhu. ⁵⁸ Joo ndaja coo naçandico xicá Pedro Jesús anda quiahva naxinu da yéhe vehe da cúu sacuahā chága nu ndíhi jutū cán. Ta já nandihvi da naçacoo da nu ndúu soldado cán sándehe da ndá quea caja na xihin Jesús.

⁵⁹ Ta na sacuahā nuú jutū xihin tóco ndihi na cómi cuéntá sahá na Israel nataca na cán ndúcú na cuachi jácojo na jatá Jesús já ná cuu cahní ñahá na. ⁶⁰ Joo coo nañehe ná cuachi jíquí ña cuu chinúu na jatā mé á vatí naxinu coo cuahá na naçahan ña tuhún sahá. Anda jáví naxinu coo ivi ga da cáhan ña tuhún sahá. ⁶¹ Já naçachi da já:

—Naxini johō nde naçachi da jan já: “Jánditani i veñuhu cáhnu cán ta jácandichi tucu u ña tixi uní quiví”, cáchi da —naçachi na cán chícaan na cuachi jatá Jesús.

⁶² Anda já nandaca ndichi da cúu sacuahā chága nu ndíhi jutū cán já cáchi da já xihin Jesús:

—Á chí a ndúcú ñehún tuhun nuú nde sahá cuachi jácojo na jatun —naçachi da.

⁶³ Joo ni in tuhun coo nanducú ñehe Jesús nu dá. Anda já naçachi da cúu sacuahā chága nu ndíhi jutū cán já xihin á:

—Tavún quivi Ndióxi, ña tácu ín indiví ta cachún xihin nde á jivi ndusa yóho cúun Cristo, da cúu in túhún jiní já jahyí Ndióxi, da naçindahá mé á cacomí cuéntá sahá ñayivi —naçachi da xihin Jesús.

⁶⁴ Já nanducú ñehe Jesús tuhun nu dá já naçachi a já:

—Ajan, jivi yehe cúu u da cáchi ndó jan. Ta viti ná çahan i xihin ndo ña vaxi quivi tá cuni ndó yehe, da naçindahá Ndióxi nduu ñayivi cacoo i xoo cuáha Ndióxi, mé á ín cuahā ndée. Ta já cuni ndó yehe ndicó coo i ñuyiví yóho tañu vico tá ná quixi i chí indiví —naçachi a.

⁶⁵ Tá naxini johō da sacuahā chága nu ndíhi jutū cán ña yóho já nandatá da jáhma

dá ña ná candaa ini ñayivi ña xójo ini da. Ta já ñacachi da já:

—Ndája núu da yóho Ndióxi. Coó chicuu chága yó ñayivi ná cahan na xihin yo jáchi sa ñaxini johó ndihí ña ñacanáhá da yóho xihin Ndióxi. ⁶⁶ Ta ndaja xini ndó caja í xihin dá viti —ñacachi da.

Anda já ñacachi ndihi na cán já:

—Ín cuachi da jan ta ndítahan cuhun da quivi da —ñacachi na cán.

⁶⁷ Ta já ñacasáhá na xihnu ndaa na tójií na nu á. Ta ñacasáhá túxú na yiquí a. Ta java na cáni jahndá nuu á. ⁶⁸ Ta já cáchi na já xihin á:

—Cahan xihin nde yo ñacani yohó tá ta mé a ndaa cúun Cristo, da ñachindahá Ndióxi cacomí cuéntá sahá ñayivi —cáchi na xihin á.

Tá ñachijehé tuhun Pedro ña xini da Jesús (Mr. 14:66-72; Lc. 22:56-62; Jn. 18:15-18, 25-27)

⁶⁹ Ta ndaja coo ín coo Pedro yuhú yéhe da cúu sacuahá chága nu ndíhi jutú cán. Já ñacativi in ñañáha, ña cája chúun mé vehe cán. Já ñacasáhá cáchi ña já xihin dá:

—Yohó cúun in táhan da xica tuun xihin Jesús, da estado Galilea —ñacachi ña cán xihin dá.

⁷⁰ Joo ndaja coo ñachijehé tuhun Pedro nu ndíhi na cán ña xini da Jesús. Já cáchi da já:

—Co xini toho í ndá saha cáhun —ñacachi da xihin ña cán.

⁷¹ Ta tá sa ñaqueta da yéhe cán já ñaxini inga ñañáha da já ñacasáhá cáchi ña já xihin tóco ndihi na ndúu cán:

—Ñaxini í ñaxica tuun da yóho xihin Jesús, da ñuu Nazaret cán —ñacachi ña cán.

⁷² Ta já ñacasáhá tucu Pedro chíjehé tuhun da ña xini da Jesús ta ñatavá da quivi Ndióxi já cáchi da já:

—Co xini toho í ndá da cúu da jan —ñacachi Pedro xihin na cán.

⁷³ Chá va ñayaha ña yóho ta ñacayati java na ndúu cán nu Pedro. Já ñacachi na já xihin dá:

—Mé a ndaa táhyí jivi táhan na xica tuun xihin Jesús cúu ri yohó va jáchi cáhun tátuhun cáhan na cán —ñacachi na xihin dá.

⁷⁴ Anda já ñacasáhá Pedro cánahá da ta ñatavá da quivi Ndióxi ña co xini da Jesús. Já cáchi da já:

—Co xini toho í ndá da cúu da jan —ñacachi da.

Tá ñacachi da já chí ivi laá ñacana chéle. ⁷⁵ Anda já ñandicuhun ini Pedro ña ñacahan Jesús xihin dá tá ñacachi a xihin dá: “Tá cámaní cana chéle sa chíjehé tuhún ña xihun yehé uní tañu.” Anda já ñaqueta da jatá véhe ta a juú quiahva sácu da jáchi cácuéha ndivaha ini da.

27

Tá ñandiquiahva na Jesús ndáha Pilato (Mr. 15:1; Lc. 23:1-2; Jn. 18:28-32)

¹ Tá ñativi inga quivi itaan já ñandique táhan ndihi na sacuahá nuú jutú xihin na sacuahá veñuhu ña ndituhún na ndá quiahva jácojo na cuachi jatá Jesús já ná cuu cahni ñahá na. ² Sahá ña cán quéa ñacató na mé á ta ñéhe na a cuahan na ndiquiahva na mé á nu Pilato, da cúu gobernador ñuu cán.

Tá ñaxihi Judas

³ Ta ndaja coo ñaxini Judas, da ñajicó tuhún Jesús ña ñasacu ini na cán cahni na Jesús. Já ñacahvi ini da sahá ña núu ñacaja da chí ndáva da cuahan da nducú ñehe da ndíhoco uxu jiuahun cúxú nuú na sacuahá nuú jutú xihin nuú na sacuahá veñuhu. ⁴ Já ñacachi da já xihin na cán:

—Cuachi cáhnu ndivaha quéa ñacaja í jáchi ñajicó tuhún í in da coó cuachi.

Já ñacachi na cán já xihin dá:

—Co sáhní toho nde mé nde sahá ña yóho. Mún xini ndá quéa ñacajún —ñacachi na cán xihin dá.

⁵ Anda já ñacuihna Judas jiuahun cán ini veñuhu cáhnu. Ta já ñaqueta da ñasahan da ñacata caa da mé dá já ñasahní da mé dá.

⁶ Ta já najátaca na sacuahá nuú jutú jiuahun cán já ñacachi xihin táhan na já:

—A váha toho ña ná chicaan yó jiuahun yóho ini sató nu táan na jiuahun jóco na nu Ndióxi jáchi ndii ñaxihi sahá ña yóho —ñacachi na.

⁷ Ta tá sa ñandituhún vaha xihin táhan na já ñaxeen na in ñuhu xihin jiuahun cán.

Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nu jánduxu na na tóho. ⁸ Sahá ña cán quéa nasacu na quivi ñúhu cán ña cananí a yójo nuú naxita nji. Ta já naní a janda viti. ⁹ Ta xihín ña yóho naxinu coo nuú ña naca hyi profeta Jeremías sanahá tá nacachi da já sahá Jesús: “Natiin na ndíhocó uxu jiu hun cúxú jáchi ña jan nasacuu yahvi nasacu na Israel chahvi na saha dá. ¹⁰ Ta xihín mé jiu hun cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchi tuhun Ndióxi.

Tá cándichi Jesús nu Pilato

(Mr. 15:2-5; Lc. 23:3-5; Jn. 18:33-38)

¹¹ Ta ndaja coo cándichi Jesús nu Pilato, da cúu gobernador. Ta já nacasahá da cán ndáca tuhún ñahá da já cáchi da já xihín á:

—Á mé a ndaa cúun in rey, da cómi cuénta sahá na Israel.

—Ajan. Jivi ndusa cúu u tá quiahva cáchi ndó jan —nacachi Jesús xihín dá.

¹² Ta na sacua ha nuú jutu xihín na sacua ha veñuhu nachicaan na cuachi jatá Jesús joo ni in tuhun coo nanducú ñehe a nu ná. ¹³ Anda já nacachi Pilato já xihín Jesús:

—Á co xini johu tohún ndaja cuahá nuú cuachi jácojo na jatun —nacachi da.

¹⁴ Joo ni in tuhún tuhun coo nanducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

Sácú ini na ndaja caja na ña ná quivi Jesús

(Mr. 15:6-20; Lc. 23:13-25; Jn. 18:38-19:16)

¹⁵ Tañu mé víco pascua nasahin costumbre da cúu gobernador cán sá janí da in táhan da ndácaan vecaa. Ndá da cúni ñayivi janí da, da cán cúu da janí da. ¹⁶ Mé tañu já nasandacaan in da naní Barrabás vecaa. Níi cúu naxita nuu tuhun sahá da yóho. ¹⁷ Ta tá natata ndihi ñayivi já nandaca tuhún Pilato na já nacachi da já xihín ná:

—Yo cúni ndo ña ná janí i. Á Barrabás janí i á Jesús, da cáchi na cúu Cristo, da nachindahá Ndióxi cacomí cuénta sahá ñayivi. Yo janí i cúni ndo —nacachi da.

¹⁸ Nacachi Pilato ña yóho xihín ná jáchi sa cánda a vaha ini da ña sahá ña cáhivi ini na

xihín Jesús sahá ña cán quéa nandiquiahva na mé á nu dá. ¹⁹ Ta naní in coo da nu sácoo da sáhdá da chuun vechúun cán já nachindahá ñájihí da tuhun nu dá já nacachi ña já: “A quíhvi ndáhun Jesús jáchi cúu dá in ta ndaa. Nuú anda véhe nasaní i nacaja Jesús ta ndícani ndivaha ini i sahá”, nacachi ña.

²⁰ Joo ndaja coo na sacua ha nuú jutu xihín na sacua ha veñuhu cán najacahan na ñayivi ña ná caa na nu Pilato ña ná janí da Barrabás ta ná cahni da Jesús. ²¹ Anda já nacachi da cúu gobernador cán já xihín ná:

—Yo cúni ndó ña ná janí i.

—Anda já nacachi na cán já:

—Barrabás jan va janí ndó —nacachi na xihín dá.

²² Anda já nacachi tucu Pilato já xihín ná: —Ndía cúni ndó caja i xihín Jesús, da cáchi ndo cúu Cristo.

—Anda já nacachi tóco ndihi na cán já:

—Cata caa ndó da ndica crúxu.

²³ Anda já nacachi tucu Pilato já xihín ná: —Ndá cuachi nacaja da, vaha —nacachi da xihín ná.

Joo xihín ña yóho ví ga ví nacasahá cáyuhú na já cáchi na já:

—Cata caa ndó da ndica crúxu.

²⁴ Ta tá naxini Pilato ña co yaa na cán ta ví ga ví ndivaa na já natiin da ticuii ta nandahá da nu ndihi ñayivi cán ta já nacachi da já xihín ná:

—Xihín ña yóho jána ha i nu ndo ña coo cuachi toho ndójo i saha ndá ña ná caja ndó xihín da yóho jáchi coo cuachi toho da yóho. Jata mé ndó ná cuhun ndihi va —nacachi da xihín ná.

²⁵ Anda já nacachi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi sahá ña ná quivi da —nacachi na cán xihín dá.

²⁶ Anda já najaní Pilato Barrabás. Ta tá nandihí najacaxáhan na Jesús já nandiquiahva da a ndáha ná ña ná cata caa na a ndica crúxu.

²⁷ Anda já ñehe soldado cuénta gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da. ²⁸ Tá nandihí já natavá na jáhma á. Anda já nachinúu na in jahma cuahá túun jatá. ²⁹ Ta

ja nāchinúu na in tiyivi íñu jini á. Ta nāchiñee na in ndoo ndahá cuáha. Ta ja nācasáhá na caxítí na nu á ja sácu ndaa ichi ñahá na ja cáchí na ja xihín á:

—Cáhnú nahá ná cacuu yóhó, da cúu rey nuú na Israel —nācachi na.

³⁰ Ta nācasáhá xihnu ndaa na tójií na nuu á. Ta ja cándaa na ndoo cán ndáha á ta cáni na yiquí jini a xihín do. ³¹ Ta tá sa nāndihi nāsaçu ndaa ñahá na ja nācandaa na jáhma nāchinúu na jatá cán ta najācandixi tucu na a xihín jáhma mé á. Andá ja ñéhe na a cuahān na cata caa na a ndica crúxu.

Tá nācata caa na Jesús ndica crúxu

(Mr. 15:21-32; Lc. 23:26-43; Jn. 19:17-27)

³² Ta tá ñéhe na Jesús cuahān na cata caa na a ja nānditahan na in da naní Simón, da ñuu Cirene. Ta nācāja ndúsa na xihín dá ña ná ndicojo da crúxu nuú cata caa na Jesús. ³³ Ta nāxinu coo na xiqui naní Gólgota. Tuhun yóho cúni cachi a: nu ndúu lásá yiquí jini ndii. ³⁴ Mé cán nāsaħan na vino nu á, dó nācava táhan xihín ña ova ña ná coho a do. Joo tá nāxito ndojó a do coo nāxeen toho a coho a do.

³⁵ Ta tá sa nāndihi nācata caa na a ndica crúxu ja nāquehe na jáhma a nāndicahnda nu táhan na. Joo jihna ñuhú nāsaǰíquí na sahá ta da nāquee vaħa cán, da cán nāndiquehe jáhma á. Xihín ña yóho nāxinu coo nuú ña nācahyí profeta sanahá tá nācahyí da ja: “Nāndicahnda nu táhan mé ná cotó níhnu i ta ja nāsaǰíquí na sahá cotó maá i ta da nāquee vaħa cán nāndiquehe da ña”, cáchí tuhun Ndióxi. ³⁶ Ta ja nāsaçoo soldado cán ndúu na ndáá ñahá na. ³⁷ Ta jini ndica crúxu cán nācahyí na ndá saħa nācata caa na a ja cáchí a ja: “Da yóho cúu Jesús, da cúu rey nuú na Israel.”

³⁸ Ta sa mé ja nācata caa ri na ivi taa cuihná xihín Jesús: in da xoo cuáha ta inga da xoo íti. ³⁹ Chí cáva jini mé ñayivi yáha cán cánaħa na xihín á. ⁴⁰ Ta ja cáchí na ja:

—Yóhó cáhún jánditani veñuhu cáhnú cán ta tixi uní víxí quiví cáhún jácandichi tucún ña. Tá ta mé a ndaa cúun jahyi Ndióxi jáçacu mún ta cuáhān nuu ndica crúxu jan —nācachi na xihín Jesús.

⁴¹ Ta quiahva ja nācāja ri na saçuaha nuú jutú xihín na jánaħa ley Moisés xihín na

saçuaha veñuhu. Sácu ndaa na a ja cáchí na ja:

⁴² —Najāçacu da java ga ñayivi ta viti chí a cúu caja da jáçacu da mé dá. Tá ta mé a ndaa cúu dá rey nuú na Israel, ná nuu da ndica crúxu viti ñuhú ja ná candúsa nde da. ⁴³ Cāndeé ini da Ndióxi ta cáchí da cúu da jahyi Ndióxi ja quéa ná quixi Ndióxi chindeé a da tá ta mé a ndaa quihvi ini a da —nācachi na cán cánaħa na xihín Jesús.

⁴⁴ Quiahva ja cánaħa ri ndívi taa cuihná tácaa in in xoo jini a cán xihín á.

Tá nāxihí Jesús

(Mr. 15:33-41; Lc. 23:44-49; Jn. 19:28-30)

⁴⁵ Tá nāxinu coo caxivi ndaa nācanaá níi cúu ñuyiví ta janda caa uní saħini ja nācasáhá nāndiyehē tucu. ⁴⁶ Ta sa mé hora ja nācayuhú cóhó Jesús ja nācachi a ja:

—Elí, Elí, lama sabactani —ña yóho cúni cachi a: Ndióxi mí i, Ndióxi mí i, ndávaha najāndacoo ndáha ndó yehē.

⁴⁷ Ta java na ndíta cán tá nāxini johō na tuhun cáchí a ja nācachi na ja:

—Cána da profeta Elías —nācachi na cán.

⁴⁸ Ivi laá xínu in da nāsaħan da nāchindaxi da in ticoto ini vino iyá. Ta nācató da ña nuú in yitó ndoo ja nāchiñee da do yati yúhu Jesús ña ná coho a do. ⁴⁹ Joo na java ndíta cán nācachi na ja xihín dá:

—Cóho candehé yo á quixi Elías jáçacu a da —nācachi na cán.

⁵⁰ Andá ja nācayuhú cóhó tucu Jesús ja nāxihí a. ⁵¹ Ta ndaja coo nādatá java ndaa jáhmá ndeé ña sáji nuu nuú yii ndivaha veñuhu cáhnú ñuu Jerusalén cán. Janda jini á ta janda saħa nādatá. Ta mé hora ja nātaan ta ndijáa yuu tóto ndúu cán nādatá. ⁵² Ta nanuna cáva nu nāsañuhu na nāxihí ta cuahá ñayivi, na nāsaçu cuéntá Ndióxi nānditacu tucu na. ⁵³ Ta tá sa nānditacu tucu Jesús ja nāxinu na nāqueta cáva cán ñuu Jerusalén ta cuahá ndivaha ñayivi nāxini ñahá.

⁵⁴ Ta da cúu saçuaha nuú soldado cuéntá Roma xihín da ndáá Jesús xihín da cán tá nāxini da ña nātaan ta nāxini da java ga ña nāyaha cán ja nācasáhá yíhví ndivaha da. Já nācachi da ja:

—Mé a ndaa táhyí cúu da yóho in túhún jini ja jahyi Ndióxi —nācachi da.

⁵⁵ Ta mé cán nasandita cuahá najihí sándehe xicá nā Jesús. Mé nā cán cúu nā nacaja ndíví ñahá nū Jesús tá nandico nā mé á naquixi na janda estado Galilea. ⁵⁶ Tañu najihí cán nasandacaan María, ñá ñuu Magdala xihin María, ñá cúu náná Jacobo xihin José. Ta cán nasandacaan ri ñá cúu náná ndíví da cúu jahyi Zebedeo.

Tá nachicaan na yiquí cuñu Jesús ini cáva (Mr. 15:42-47; Lc. 23:50-56; Jn. 19:38-42)

⁵⁷ Ta ndaja coo nasahiin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihin Jesús. Ta tá sa nacuaá já naxinu da ⁵⁸ nasahan da cahan ndahví da xihin Pilato ñá ná ndiquiahva da yiquí cuñu Jesús nū dá. Anda já nasahnda Pilato chuun ñá ná ndiquiahva na ñá nū dá. ⁵⁹ Ta já nachitivi José cán yiquí cuñu Jesús xihin in jáhma vaha ñá vií. ⁶⁰ Ta já nachicaan da yiquí cuñu Jesús ini in yávi ñá saá ndácaan ndica cáva ñá jacá naacán da cuéntá mé dá. Ta tá nandihí já nachijahví da yuhú cáva cán xihin in yuu jáhnda cáhnu ta já naquee da cuahan da. ⁶¹ Ta nū yéhe mé cáva cán nasanduu coo María, ñá ñuu Magdala xihin inga ñá naní María cán.

Tá ndáá java soldado nū ndácaan Jesús

⁶² Ta ndaja coo sa nandihí nacaja ndíví na ñaha cuéntá quivi ndiquehe ndée nā. Ta inga quivi itaan najátaca táhan nā sacuaña nuú jutū xihin nā fariseo já nasahan nā nū Pilato. ⁶³ Já nacachi na já xihin dá:

—Vaxi nde nū ndo caça loho nde ñamaní nū ndó. Jáchi ndicuhun ini nde ñá tá nasatacu Jesús, da naxica jándahvi ñayivi cán nacachi da ñá tá sa ná yaha uní quivi já nditacu tucu da. ⁶⁴ Ñá cúní nde queá ná chindahá loho ndó nā cuhun candaa nuú nachicaan nā yiquí cuñu da cán janda quiahva ná yaha uní quivi. Jáchi tiahva náá xinu coo nā naxica tuun xihin dá ñuu ta caja cuíhná nā yiquí cuñu da. Ta já casáhá cachi na xihin ñayivi ñuu ñá nanditacu tucu Jesús tañu nā naxihí. Ta xihin ñá yóho jándahvi chága nā ñayivi a juú ga jihna —nacachi na.

⁶⁵ Anda já nacachi Pilato já:

—Cañehe ndó in táhnda soldado. Cuáhán ndó candaa ndó nū ndácaan da tá quiahva

xini mé ndó caja ndó —cáchi Pilato xihin ná.

⁶⁶ Anda já naquee nā cán nasahan nā já nachicají vaha chága nā nū ndácaan yiquí cuñu Jesús cán. Ta nasacu na sello yuu jáhnda cán ta já nasacu na soldado ñá ná candaa da ñá.

28

Tá nanditacu tucu Jesús

(Mr. 16:1-8; Lc. 24:1-12; Jn. 20:1-10)

¹ Tá sa nayaha quivi ndiquehe ndée ná ta nativi inga quivi itaan já naxinu María, ñá ñuu Magdala xihin inga María cán sándehe nā nuú nachicaan nā yiquí cuñu Jesús cán. ² In naá cuití nataan ndeé ndivaha. Nayaha ñá yóho jáchi nanuu in tátō Ndióxi indiví. Ta najátivi a yuu jáhnda nasajahvi nuú nasandacaan yiquí cuñu Jesús cán. Ta já nasacoo a jatá. ³ Ta yéhe mé tátō Ndióxi cán tá quiahva yéhe tasa. Ta jáhma ndíxi a cúu á jahmá yaa cachi. ⁴ Ta a juú quiahva ná yihví soldado ndúu cán nacaja tátō Ndióxi chí nacasáhá quíji ninu da. Ta já nacuyū da nū ñúhu tátuhun ndii naxihí. ⁵ Joo ndaja coo tátō Ndióxi cán nandicaan xihin najihí cán já nacachi a já xihin ná:

—A cáyihví toho ndó. Sa xini vaha i ñá ndínducú ndo Jesús, ñá nacata caa na ndica crúxu. ⁶ Coó toho a cán íin yóho jáchi sa nanditacu tucu a tá quiahva nacachi mé á xihin ndo. Naha ndó candehé ndo nuú nasahiin a já cuni ndó ñá coó ga íin nuú nasacu na ñá. ⁷ Ta cama ndó cuhun ndó caxi tuhun ndó xihin da naxica tuun xihin á ñá sa nanditacu tucu Jesús tañu nā sa naxihí. Ta viti cánuú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ñá nacachi i xihin ndo —nacachi tátō Ndióxi cán.

⁸ Anda já naquee mé najihí cán mé nuú nasandacaan yiquí cuñu Jesús. Ta vatí yihví nā joo cávatá ndivaha na ta sahá ñá cán queá xinu na cuahan nā caxi tuhun na ñá yóho nuú nā naxica tuun xihin Jesús cán. ⁹ Ta nani cuahan nā ivi laá sa íin va Jesús xihin ná. Já nacachi a já xihin ná:

—Ndióxi ná coo xihin ndo.

—Anda já nacayati nā cán nū á já nanumi na sahá ta nacaja cáhnu na a. ¹⁰ Anda já nacachi tucu Jesús já xihin ná:

—A cáyihví toho ndó. Cuáhán ndo caxi tuhun ndó xihín na cúu cuéntá mí i ña ná cūhun na estado Galilea jáchi cán cuni na yehe —ñacachi Jesús xihín najihí cán.

¹¹ Ta nani xinu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já ñacaxi tuhun da ña ñacuu nuú na sacuaḥa nuú jutū. ¹² Anda já najátaca táhan na sacuaḥa cán xihín na sacuaḥa veñuhu já najándique táhan na tuhun na ta já nasahan cuahá ndivaha na jjuhún nuú na soldado cán. ¹³ Já ñacachi na já xihín soldado cán:

—Coto a cahan ndó ña nanditacu Jesús. Ña cachi ndó cúu ña yóho: “Na naxica tuun xihín á cán, na cán cúu na ñaquixi ñuu ta ñacaja cuihná na yiquí cuñu a nani ñaquiji nde”, já cachi ndó xihín ndá na ná ndaca tuhún ndohó. ¹⁴ Ta a cáyihví toho ndó tá ná candaḥa ini da cúu gobernador sahá ña yóho jáchi cahan mé nde xihín dá ta chindeé nde ndohó ña ná a cája da ni in ñaha xihín ndo —ñacachi na sacuaḥa cán xihín soldado.

¹⁵ Anda já ñaquehe da cúu soldado cán jjuhún ta ñacaja da tá quiahva nasahnda na sacuaḥa cán chuun nu dá. Ta xihín ña yóho nandicuīta nuu tuhun sahá ña nayaha cán. Ta cahan na Israel cán sahá ña yóho janda quivi víti.

Tá sáhdá Jesús chuun nuú na naxica tuun xihín á

(Mr. 16:14-18; Lc. 24:36-49; Jn. 20:19-23)

¹⁶ Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yucu tá quiahva nasahnda mé Jesús chuun nu ná. ¹⁷ Ta tá naxini na mé á já ñacaja cáhnu na a. Joo java na cáhvi ivi johó ini na jáchi co cándúsa na ña nanditacu tucu a. ¹⁸ Anda já ñacayati Jesús nu ná já ñacachi a já xihín ná:

—Nasahan Ndióxi ndée nuú i caja i ña náhnu ndivaha indivi xihín ñuyivi yóho. ¹⁹ Sahá ña cán quea cuáhán ndo jánaḥa ndo nuú ñayivi nduu ndijáá ñuyivi ndaja caja na caca vaha na íchi cuéntá mí i. Ta caja ndúta ndó na xihín quivi Ndióxi, tátá i ta xihín quivi yehe, da cúu in tuhún jini já jahyi mé á ta xihín quivi ínima yii Ndióxi.

²⁰ Ta jánaḥa ndó na ña ná caja na tóco ndihi

ña nasahnda i nu ndó caja ndó. Ta mé a ndaa coo i xihín ndo ndijáá ní quivi janda quiahva ná xinu coo quivi ndihi saḥa ñuyivi. Já ná coo —ñacachi Jesús.

Tuhun vaha nacahyí Marcos saha Jesucristo

*Tá jácandúta Juan ñayivi yucú íchí
(Mt. 3:1-12; Lc. 3:1-9, 15-17; Jn. 1:19-28)*

¹ Quiahva johó nacava sáhá tuhun vaha cáhan saha Jesucristo, mé a cúu in túhún jini já jahyi Ndióxi.

² Sanahá nacahyí profeta Isaías ña nacahan Ndióxi xihín jahyi a. Já cáhí a já: Chindahá i in da canuú cuhun nu mún, ña ná caxi tuhun da nuú ñayivi saha yóhó ta já ndaja ndacú da íchí nuú yahún.

³ Ta cahan cóhó da tañu yucú íchí ta cachi da já xihín ñayivi:
“Caja tiahva ndó íchí nuú quixi xitoho í ta cuná ndó in íchí ndacú nu mé á ña ná ndihvi a ínimá ndo”, nacahyí Isaías.

⁴ Ta ndaja coo ín Juan yucú íchí ta nacasáhá cája ndúta dá ñayivi. Ta caxi tuhun da xihín ná ña tá cúní na caja cáhnu ini Ndióxi sahá cuachi na já ndítahan nu ná ndicó coo ini na ta já candúta ná. ⁵ Chí naquixi cuahá ndivaha ñayivi estado Judea xihín ñuu Jerusalén taa johó na nu cáhan da ta tá náhma na cuachi na já nacaja ndúta dá na ini yuta Jordán.

⁶ Ta nasandixi mé Juan yóho jáhma ña nacavaha na xihín íji camello ta nasandico in níi jáhndá tóco dá. Ta naxixi da tica xihín ñuñu yucú. ⁷ Tá caxi tuhun da nuú ñayivi já cáhí da já:

—Jatá yehe vaxi in da ín cuaha chága ndée dá a juú ga yehe chí coo sahá i ndica xítí i nu dá ña ndaxí i correa ndusa dá. ⁸ Yehe najácandúta i ndohó xihín ticuú joo mé da cán cúu da jándicutú ínimá ndó xihín ínimá yíi Ndióxi —nacachi Juan xihín ná.

*Tá nacandúta Jesús
(Mt. 3:13-17; Lc. 3:21-22)*

⁹ Mé tiempo já naquee Jesús ñuu Nazaret ña ndácaan estado Galilea. Naxinu a nu ín Juan ta najácandúta Juan Jesús ini yuta Jordán cán. ¹⁰ Ta tá naquee Jesús ticuú cán já naxini a nandinuna indiví ta nanuu ínimá yíi Ndióxi jatá mé á. Ta cáa ínimá yíi Ndióxi yóho tá quiahva cáa in ndijata. ¹¹ Ta

naxini johó na cáhan in a indiví ta já cáhí a já:

—Yóhó cúun jahyi máni i ta cájii ndivaha ini i xuhun.

*Tá naxito ndojó tiñhá sacuaqa Jesús
(Mt. 4:1-11; Lc. 4:1-13)*

¹² Ivi laá nasahan ínimá yíi Ndióxi ndáca Jesús yucú íchí nu coo ñayivi. ¹³ Ta cán nasahin a ivi jico quivi ta mé tiñhá sacuaqa naxito ndojó rí a. Ta cán ndúu quití quini joo naxinu java táto Ndióxi chin-deé na mé á.

*Cásahá Jesús cáhan tuhun vaha xihín ñayivi
(Mt. 4:12-17; Lc. 4:14-15)*

¹⁴ Tá nandihí nachicaan na Juan vecaa já nasahan Jesús estado Galilea caxi tuhun a nuú ñayivi tuhun vaha saha Ndióxi. ¹⁵ Já cáhí a já xihín ná:

—Sa naxinu tiempo viti ta nacayati quivi cacomí Ndióxi cuéntá sahá ñayivi. Ña ndítahan nu ndo quea jándacoo ndó cuachi cája ndó ta candúsa ndó tuhun vaha ña cuu jácacu ndohó —nacachi Jesús.

*Cána Jesús comí na caca tuun xihín á
(Mt. 4:18-22; Lc.: 5:1-11)*

¹⁶ In tañu xíca Jesús cuahan yati yuhú tañuhú Galilea. Ta naxini a in da naní Simón xihín Andrés, da cúu ñani. Ndíví mé da yóho cúu dá da tává tiyacá ta ñúhu da jácana da ñunu dá ini tañuhú. ¹⁷ Nacasáhá cáhí Jesús já xihín dá:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

¹⁸ Ta chí ivi laá najándacoo da ñunu dá ta nandico da Jesús.

¹⁹ Anda já naxica loho ga Jesús chí nuú já naxini a Jacobo xihín ñani da Juan, da cúu jahyi Zebedeo. Ndíví da yóho ñúhu da ini barco ndája vaha da ñunu dá. ²⁰ Nacana Jesús ndíví da yóho ta chí najándacoo da tátá da, Zebedeo cán ini barco xihín java ga da cája chúun xihín dá ta já nacasáhá xíca tuun da xihín Jesús.

*Tá ndácaan ínimá quini ini in dataa
(Lc. 4:31-37)*

21 Naxinu coo Jesús xihín na xíca tuun xihín á ñuu Capernaum. Ta tá natandaa quivi ndiquehe ndée ñayivi já naquihvi Jesús ini veñuhu ta ñacasáhá jánaḥa na cán. 22 Ta ñacatóntó tóco ndihi ñayivi sahá tuhun cáḥan mé á jáchi najánaḥa mé á tátuhun in da ín saḥa cahnda chuun ta co cáḥan tátuhun na jánaḥa ley Moisés. 23 Ini mé veñuhu cán ñasandacaan in dataa, da ndácaan ínimá quini ini. Ñacasáhá cáyuhú rí cán já cáchi rí já:

24 —Jesús, da ñuu Nazaret. Ndá cuéntá quéa quíhvi nuún xihín nde. Á vasún jándihún sahá nde. Sa xini vaha i yohó ta cándaá cáxí ini i ña cúun in da yí nachindahá Ndióxi —ñacachi rí cán.

25 Ta ñacasáhá Jesús jánani a rí quini ndácaan ini da cán. Já ñacachi a já:

—Caji yúhūn ta janí da yóho.

26 Ta tá quéta rí quini ndácaan ini da cán ñasahní yihí rí da ta cáyuhú cóhó rí já ñaqueta rí ini da cán. 27 Ñacatóntó tóco ndihi ñayivi chí ñacasáhá ndáca tuhún táhan na já cáchi na já:

—Ndía quéa yóho. Ta ndá ñaquixi tuhun saá jánaḥa da yóho jáchi cáḥan da xihín rí quini tátuhun in da sáhdá chuun ta chí cándúsa rí quee rí cūhūn rí —ñacachi na.

28 Ta chí cama chá ñandicujta nuu tuhun saḥa Jesús ní cúu estado Galilea.

Ta ñandaja vaha Jesús ñá cúu xojo Simón (Mt. 8:14-15; Lc. 4:38-39)

29 Tá ñaquee na veñuhu já cuḥan Jesús xihín Jacobo xihín Juan vehe Simón xihín ñani da, Andrés. 30 Ta ndaja coo cándúhu ñá cúu xojo Simón nuú xito nachicaan cáhni ndeé ña. Ta tá naxinu coo na cán já ñacaxi tuhun na nuú Jesús ña quíhvi ña. 31 Anda já ñacayati Jesús nu ña ta natiin a ndáḥa ña já ñandiñehe a ña chí ivi laá ñandindaa cáhni á ña. Anda já ñacasáhá cája ndíví ña ña cuxu na.

Ndája vaha Jesús cuahá ñayivi (Mt. 8:16-17; Lc. 4:40-41)

32 Tá ñaqueta nuu candii ta ñacuaá já ñehe ndihi ñayivi na quíhvi xihín na ñúhu ínimá quini ini ñacasaa na nu Jesús. 33 Ta tóco ndihi na ñuu ñandai cuu na yuyéhe nu ín Jesús. 34 Ñandaja vaha Jesús cuahá ñayivi, na ndóho tá nuú cuehe. Ta natavá

a cuahá ínimá quini ini ñayivi. Joo coo ñasahan Jesús ñamani nu rí quini ña ná cáḥan rí jáchi xini rí yo cúu Jesús.

Xíca nuu Jesús jánaḥa ñayivi estado Galilea

(Lc. 4:42-44)

35 Ta naha inga quiví itaan tá cámaní yíi tiví ñandacoo Jesús ta ñaquee a ñuu cuḥan nuú coo ñayivi ña caḥa tahví a nu Ndióxi. 36 Tá ñandacoo Simón xihín java ga da xíca tuun xihín Jesús já naxini na ña coo a ín chí ñaquee na cuḥan na ndinducú na mé á. 37 Ta tá ñandiñehe ñahá na já cáchi na já xihín á:

—Tóco ndihi ñayivi ndinducú na ndohó.

38 Joo cáchi Jesús já xihín ná:

—Cóho java ga ñuu yati yóho ña ná jánaḥa i tuhun vaha nuú na cán viti jáchi sahá ña yóho vaxi i —cáchi Jesús.

39 Ta chí naxica nuu Jesús ní cúu estado Galilea cáḥan tuhun vaha ini veñuhu in in ñuu cán ta tává a ínimá quini ndácaan ini ñayivi.

Tá ñandaja vaha Jesús in da ndóho cuehe táhyi

(Mt. 8:1-4; Lc. 5:12-16)

40 Ta ndaja coo ñacayati in dataa ndóho cuehe táhyi nuú Jesús ta ñacaxítí da nu á já ñacasáhá cáchi da já:

—Cuu ndaja vaha ndó yehe tá cúni ndó —cáchi da.

41 Ta ñatahvi ini Jesús saḥa dá. Anda já ñacani ndaa ndáḥa á da. Já cáchi a já:

—Cúni ña ná ndivahún ña cán quéa ñandivahún viti —ñacachi Jesús xihín dá.

42 Tá ñacachi a já chí ivi laá ñandindaa cuehe táhyi ña ñandoho da cán. Já ñandivií yiquí cuñu da. 43 Tá ñandihí najándindayí Jesús da ta ñasahnda chuun nu dá já cáchi a já xihín dá:

44 —Candehé. A cáhūn xihín ni in túhūn toho ñayivi ña ñacaja i xuhūn. Cuáhán ndacún nahūn mún nuú jutū. Ta ndítahan jocún ñaha nu Ndióxi tátuhun ñasahnda ley Moisés sanahá caja na sa ñandivaha. Já ná candaa ini tóco ndihi ñayivi ña sa ñandindaa va cuehe ñasandohún —ñacachi Jesús xihín dá.

45 Joo tá ñaquee da cuḥan da ñacasáhá da ndícani da nuú ndihi ñayivi ña ñandaja

vaha Jesús da sahá ña cán quéa coó nacuu ga ndihvi tívi Jesús ni in ñuu. Jata ñuu nuú co ndúu ñayivi nasahin a ta janda mé cán xínu coo ñayivi, na quíxi nuú ndijáá ñuu xito nihni na mé á.

2

Tá nandaja vaha Jesús in da naxihí tuchu saha

(Mt. 9:1-8; Lc. 5:17-26)

¹ Tá nayaha chá quívi já nandico coo tucu Jesús ñuu Capernaum. Ta nacandaa ini ñayivi ña íin a vehe. ² Ta chí cama chá nanditútu cuahá ñayivi chí co vati ga yuyehé cándita na. Já nacasáhá cáxi tuhun Jesús tuhun Ndióxi nu ná. ³ Anda já naxinu coo comi ta ta ñehe da in da naxihí tuchu saha. Nasaa da nu íin Jesús. ⁴ Joo naxini da ña a cuú xínu da yati nu íin Jesús sahá cuahá ñayivi chítú ndaa nu íin a cán. Chí nandaa da jini véhe ta nacasáhá da suná da jini véhe mé xoo nu íin Jesús. Ta mé cán najánuu da xito loho nu cánduhu da quíhvi chí yavi jini véhe cán. ⁵ Tá naxini Jesús ña cándeé ini da cán mé á já cáhí a já xihin mé da quíhvi cán:

—Candehé, jahyi a. Sa nacaja cáhnu ini i sahá cuachún viti —nacachi Jesús.

⁶ Joo java na jánaha ley Moisés ndúu coo cán nacasáhá cáhán na: ⁷ “Ndá cuénta quéa ndája núu da Ndióxi xihin tuhun cáhan da. Jáchí ni in túhún toho ñayivi a cuú caja cáhnu ini sahá cuachi. In túhún jini Ndióxi quéa cuu caja cáhnu ini sahá cuachi”, nacahán na. ⁸ Joo sa nacandaa ini Jesús ña cáhvi ini na cán chí nacachi a já xihin ná:

—Ndávaha cáhán ndo já. ⁹ Á cáhán ndó ña ihvi chága cachi i xihin da yóho: “Nacaja cáhnu ini i saha cuachún viti.” Á tá coo ta cachi i xihin dá: “Cuándaco, ndiquehe xitún ta caca nuún.” ¹⁰ Candehé vaha ndó ná naha i nu ndo ña íin sahá i, da nachindahá Ndióxi nduu u ñayivi caja cáhnu ini i sahá cuachi cája ñayivi ñuyivi yóho —nacachi Jesús xihin ná.

Anda já nacachi a xihin mé da naxihí tuchu saha cán:

¹¹ —Ta viti cáhan i xuhun cuándaco ndiquehe xito lohún ta cuanúhu —nacachi a.

¹² Chí ivi laá nandaco mé da quíhvi cán ta nandiquehe da xito loho da já naquee da cuahan da nuú ndihi na ndúu cán. Anda já nacatontó tóco ndihi na ta nacasáhá cája cáhnu na Ndióxi já cáhí na já:

—Ni in túhún tañu coo naxini nde in ñaha cáhnu tátuhun ña yóho —nacachi na.

Tá nacana Jesús Leví, da cáhan na Mateo xihin

(Mt. 9:9-13; Lc. 5:27-32)

¹³ Tá nandihí já nasahan tucu Jesús yuhú tañuhú cán ta tá nacayati cuahá ñayivi nu á já nacasáhá jánaha nu ná. ¹⁴ Nani xica Jesús cuahan nayaha nu íin in da naní Leví, jahyi Alfeo. Ta íin coo da nu sácoo da jataca jihún cuénta impuesto. Ta cáhí a já xihin dá:

—Naha quí candicun yehe.

Anda já nandaca ndichi Leví ta nandico da Jesús.

¹⁵ Tá nandihí nasahan Jesús vehe Leví ta nasaco a xíxi a xihin cuahá da jataca jihún cuénta impuesto xihin java ga na cája cuachi. Ta sa mé cán nasanduu ri java da xica tuun xihin Jesús xíxi da tañu na cán jáchi cuahá ñayivi ndico na Jesús. ¹⁶ Joo na jánaha ley Moisés xihin na fariseo tá naxini na íin coo Jesús xíxi a xihin na cán nacasáhá cáhí na já xihin da xica tuun xihin Jesús:

—Ndá cuénta quéa xíxi xitoho ndó xihin na jataca jihún cuénta impuesto ta xihin java ga na cája cuachi —nacachi na cán.

¹⁷ Tá naxini johu Jesús ña yóho nacasáhá cáhí a já:

—Ñayivi íin vaha coo xíní ñuhú toho na da cája tátá ñaha joo na quíhvi, na cán cuú na xíní ñuhú da cája tátá ñaha. Ta yehe coo vaxi toho i cana i na sa íin vaha. Vaxi i cana i ñayivi, na cája cuachi ña ná jándaco na cuachi cája na —nacachi Jesús.

Cáhan Jesús ndá saha quéa cajuhun na

(Mt. 9:14-17; Lc. 5:33-39)

¹⁸ In tañu tá xijuhun na xica xihin Juan xihin na xica xihin na fariseo naxinu coo java ñayivi nu Jesús ta nacasáhá ndaca tuhún na mé á já cáhí na já:

—Ndávaha coo xijuhun toho na xica tuun xihin yóho joo xijuhun mé nde, na xica xihin Juan xihin na xica xihin na fariseo —nacachi na.

19 Ta nanducú ñehe Jesús tuhun nu ná já ñacachi a já:

—Á cáhán ndo xíjuhun na ndúu víco tándaha nani in mé da tándaha cán xihín ná. Uñun. Jáchi cájji iní na nani in mé da tándaha xihín ná. Chí a cuú toho cajuhun na. 20 Joo xinu quivi candaa na mé da tándaha ta anda jávi casáha cajuhun na. Ta cáchi i xihín ndó ña vaxi quivi candaa na yehe nuú na yóho ta anda jávi casáha na xíca tuun xihín i cajuhun na —ñacachi Jesús.

21 Ta nasacu Jesús inga quiahva nu ná já cáchi a já:

—Ama ná jándaha ñayivi jahmá yata xihín in tuhun jáhma saá jáchi tá nandihí ndíndí a, sáhdá chága ví a jahmá yata cán ta jándacáhu chága ví a yávi ña nandicahmá na cán. 22 Ta ni co táán na vino saá ini vóso ní yata jáchi jácahndi mé vino cán ní ta cuita mé vino cán ta tívi vóso ní caja dó sahá ña cán quea ndítahan taán na vino saá ini vóso ní saá —ñacachi a.

Ña nacaja na xíca tuun xihín Jesús in quivi ndíquehe ndée ñayivi

(Mt. 12:1-8; Lc. 6:1-5)

23 In quivi ndíquehe ndée ñayivi nani xíca Jesús cuahan tañu nuú naxutu na trigo xihín na xíca tuun xihín á já ñacasáha tuhun na yucu jini trigo. 24 Tá naxini na fariseo ña cája na já ñacachi na já xihín Jesús:

—Candehé. Ndávaha cája na xíca tuun xuhun chuun ña co ndítahan caja na quivi ndíquehe ndée yo —ñacachi na fariseo.

25 Anda já ñacachi Jesús já xihín ná:

—Á a ñaha cahvi ndó nuú tuhun Ndióxi nu cáhan sahá ña nacaja David sanahá tá ñacuico mé dá xihín na xíca xihín dá. 26 Ña nacaja David quea ñaquihvi da veñuhu Ndióxi tá nasacuu Abiatar da sacuaña nuú jutú. Já naxixi da pan yii ña in tuhún jutú cúu da ndítahan nuú cuxu ña cán, nduu. Joo naxixi David ña ta nasahan da ña nuú java ga na xíca xihín dá.

27 Ta ñacachi tucu Jesús já xihín ná:

—Candehé ndo. Coó ñacavaha Ndióxi ñayivi ndoho ini na sahá quivi ndíquehe ndée ná jáchi nasacu ini a cavaha in quivi já ná cuu ndíquehe ndée ñayivi. 28 Ña cán quea yehe va, da ñachindahá Ndióxi nduu

ñayivi in sahá i cahnda i chuun sahá quivi ndíquehe ndée ñayivi —ñacachi Jesús.

3

Tá nandaja vaha Jesús in da nahichi ndáha

(Mt. 12:9-14; Lc. 6:6-11)

1 Naquihvi tucu Jesús ini veñuhu ta cán nasandacaan in dataa, da nahichi ndáha. 2 Ta ñacasáha nani na fariseo Jesús sádehé na á ndaja vaha mé á da cán quivi ndíquehe ndée ná já ná cuu chacaan na cuachi jatá. 3 Anda já cáchi Jesús xihín da nahichi ndáha cán já:

—Cuándaco ta candichi mahñú yóho —ñacachi Jesús.

4 Anda já nandaca tuhún a na java cán já cáchi a já xihín ná:

—Ndía cáchi ley ndítahan caja í mé quivi ndíquehe ndée ñayivi. Á chindeé yó ñayivi á caja í ña núu xihín ná. Á jácácu na á cahni yó na —ñacachi Jesús.

Joo ni in tuhún tuhun coó ñacahan na. 5 Ñacasáha xójo ini Jesús sádehé a nu ná. Joo táhvi tucu ini a saha ná jáchi cúu ná ñayivi saá ini. Ta cáchi a xihín mé dataa, da nahichi ndáha cán:

—Jándaca ndáhu.

Tá najándaca da ndáha dá ivi laá nandivaha ndáha dá. 6 Tá nandihí naquee na fariseo veñuhu já ñacasáha na jándique táhan na tuhun na xihín na cuénta Herodes ña cahni na Jesús.

Tá nanditútu cuahá ñayivi yuhú tañuhú

7 Joo nasahan Jesús xihín na xíca tuun xihín á yuhú tañuhú ta cuahá ndivaha ñayivi estado Galilea nandico na nasahan na. 8 Tá ñacandaa ini ñayivi ña náhu cája Jesús, ñaquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jin ñuu Tiro xihín Sidón jáchi candehé na Jesús cúni na. 9 Sahá ña yóho quea naxica Jesús ñamaní nuú na xíca tuun xihín á ña ná cacu tiahva na in barco nuú ndacaan mé á ña ná a cándíhi ñayivi cuaha cán ña. 10 Jáchi cuahá ndivaha ñayivi nandaja vaha mé á. Sahá ña cán quea tóco ndihí na quihvi cáti na jatá ña cani ndaa ndáha ná mé á cúni na.

11 Ta tá naxini na ñúhu ínima quini ini cán Jesús ivi laá ndícava xítí na nu á ta cásáhá cáyuhú cóhó na já cáchí rí quini ndácaan ini na cán já:

—Yóhó cúún da cúú in túhún jini já jahyi Ndióxi.

12 Joo jánani Jesús rí cán já sáhndá a chuun nu rí ña ná a cáxi tuhun rí yo cúú mé á.

Tá naxaxi Jesús uxu ivi da caca tuun xihin á

(Mt. 10:1-4; Lc. 6:12-16)

13 Tá nandihí já naquee xóo Jesús nasahan in xiqui ta tá nandihí nacana mé á java na xíca xihin á cán, mé na cuni a caxi a ta naxinu na cán nu Jesús. 14 Ta tañu na cán nandicaxi Jesús uxu ivi da caca tuun xihin á ta tá nandihí já nachindahá mé á da cahun da cahan da tuhun Ndióxi xihin ñayivi. 15 Ta nacaja mé á ña cuu ndaja vaha da na quíhvi ta cuu cahnda da chuun nu rí quini ña ná quee rí ini ñayivi. 16 Ña yóho cúú quívi uxu ivi da nandicaxi Jesús caca tuun xihin á: Simón, da nasacu tucu a quívi cananí Pedro 17 xihin Jacobo xihin ñani da, da naní Juan, jahyi Zebedeo. Ndívi da yóho nasacu a quívi cananí Boanerges ta mé tuhun yóho cuni cachi a cúú dá tátuhun jahyi in tasa ña cána indiví. 18 Naxaxi a Andrés xihin Felipe xihin Bartolomé xihin Mateo xihin Tomás xihin Jacobo, da cúú jahyi Alfeo xihin Tadeo xihin Simón, da naxica cuénta na cananista 19 xihin Judas Iscariote, mé da najicó túhún Jesús tá nu ndíhí.

Jácojo na cuachi jatá Jesús ña cája chúun a xihin ndé tiñáhá sacuahá

(Mt. 12:22-32; Lc. 11:14-23; 12:10)

Anda já naquihvi Jesús ini in vehe xihin na xíca tuun xihin á. 20 Ta inga tucu nachutú cuahá ñayivi nu ín a janda a cuú cuxu a xihin na xíca tuun xihin á cán. 21 Ta tá nañehé na vehe Jesús tuhun sahá ña yóho ivi laá naquixi na ña cañehe na mé á cahun a cuni na jáchi nacatachi Jesús cáhán na.

22 Jári na jánañá ley Moisés, na naquixi Jerusalén nacasáhá cahan na já cáchí na já:

—Taa yóho ndácaan Beelzebú ini da, rí cúú sacuahá nu rí quini. Ta xihin ndéé mé

rí cán tává da rí quini ini ñayivi —nacachi na.

23 Anda já nacana Jesús ñayivi já nasacu a in quiahva nu ná ja cáchí a já xihin ná:

—A cuú tavá tiñáhá sacuahá mé rí. 24 Jáchi tá sáhndá java táhan na ndúu in ñuu ta cáni táhan ndaja táhan mé va na já quea a ñeñe iní na coo nahá na. 25 Ta tá cásáhá sáhndá java táhan na ndúu in vehe ta cáni táhan na já a cuú ga canduu nahá na mé vehe cán. 26 Ta quiahva já tá ná casáhá rí quini ndúu ndáha tiñáhá sacuahá cáni táhan rí xihin mé va rí janda quiahva sáhndá java táhan rí já quea a cuú canduu nahá rí jáchi ndihí saha rí.

27 'Sácú u inga quiahva nu ndo. Ni in dataa a cuú ndihvi da caja cuíhna da ñaha vehe in da ndacú cán joo tá ná cató da da ndacú já cuu quehe da ñaha da cán.

28 'Mé a ndaa ná cahan i xihin ndo. Ndióxi cuu caja cáhnu ini a saha tá nuú cuachi cája ñayivi xihin saha tá nuú tuhun quini cahan na. 29 Joo tá ná cahan núu na saha ínima yí Ndióxi já quea a cája cáhnu ini Ndióxi saha ña nacaja na ta anda ama cáa quívi candojo na cuachi saha —nacachi Jesús.

30 Nacachi a ña yóho xihin na cán jáchi cáchí na ña ndácaan ínima quini ini a.

Naná Jesús xihin ñani a cuni na cuni na a
(Mt. 12:46-50; Lc. 8:19-21)

31 Tá nandihí naxinu naná Jesús xihin ñani a nu ín a joo nacandoo na jata véhe. Ta nachindahá na in na nasahan nacana ñahá. 32 Ta na ndúu coo xihin Jesús cáchí na já xihin á:

—Jata véhe cáa ín nánún xihin ñanún ta ndínducú na yohó —cáchí na xihin Jesús.

33 Anda já nacachi Jesús já xihin ná:

—Ná cahan i xihin ndo yo já cúú tátuhun náná i xihin ñani i.

34 Anda já nasandehé a nuú na ndúu coo tivyivi xihin á cán já cáchí a já xihin ná:

—Na yóho cúú ná tátuhun náná i xihin ñani i. 35 Jáchi ndá na cája ña cuni Ndióxi, na cán cúú ná tátuhun ñani i xihin quiahvá i xihin náná i —nacachi Jesús.

4

Sácú Jesús quiahva sahá in da sátá tata
(Mt. 13:1-9; Lc. 8:4-8)

¹ Nacasáhá tucu Jesús jánaḥa ñayivi yuhú tañuhú ta nataca cuahá ñayivi nu ín a cán. A juú quiahva cuahá cúú ná sahá ña cán quéa naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihi ñayivi nandaca ndita na nuú ñutí yuhú tañuhú cán. ² Já najánaḥa cuahá ñaha nuú na cán ta nasacu a quiahva nu ná já cáchi a já:

³ —Cuni johó ndó ña yóho: In da sátá tata naquee da cuahan da cata da ña. ⁴ Ta tá sátá da ña cuahan da nacuyu java ña íchi ta naxinu laa ta nasaxí rí a. ⁵ Ta java ña nacuyu a tañu yuu nuú coo cuahá ñuhu. Ta cama chá nanduta mé tata cán jáchi co cúná ñuhu nuú nacuyu a. ⁶ Joo tá naqueta candii já najáhichi a ña sahá ña coo cuahá yóho a chí nandihí sahá. ⁷ Ta java tata nacuyu a tañu tohíñú ta tá nasahnu tohíñú cán já nanditáḥa ndihi a nacaja tohíñú chí coo nasahan mé tata cán ndá ñaha jáquee na nu á. ⁸ Ta java tata nacuyu a nuú ñuhú vaha. Nanduta mé tata cán ta nasahnu a já nasahan cuahá ñaha ña jáquee na nu á. Java ña nasahan oco uxu a nuú in in tata ta java ña nasahan uní jico uxu a ta java ña in ciento a nuú in in tata.

⁹ Anda já nacachi tucu Jesús já xihín ná:

—Na ín johó, ná cuni johó na —nacachi a.

Ndícani Jesús ndá saḥa quéa nasacu a quiahva nu ná

(Mt. 13:10-17; Lc. 8:9-10)

¹⁰ Tá nacandoo Jesús xihín mé na uxu ivi xíca tuun xihín á cán xihín java ga na ndíco ñahá cán já nacasáhá ndáca tuhún na Jesús ña ndía cuni cachi a xihín quiahva nasacu a nuú na cán. ¹¹ Ta cáchi a já xihín ná:

—Ña coo nacandaa ini ndó jihna ña cán cándaa ini ndó a viti jáchi nasuná Ndióxi xíní túni ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saḥa, na cán cúú na sácú u quiahva nuu. ¹² Já quéa vatí sándeḥé na joo cúú ná tátuhun na co tívi nuu ta vatí xíní johó na joo cúú ná tátuhun na jóho jáchi co cándaa ini na ña cáhan i

xihín ná. Ta sahá ña cán quéa co ndíco coo na nu Ndióxi ta ni mé á co cája cáhnu ini sahá cuachi na.

Ndícani Jesús sahá da sátá tata cán
(Mt. 13:18-23; Lc. 8:11-15)

¹³ Ta já cáchi tucu a já xihín na xíca tuun xihín á:

—Ta tá co cándaa ini ndó quiahva, ña nasacu u yóho ndaja caja ndó cándaa ini ndó java ga quiahva ña cachi i xihín ndo.

¹⁴ Mé da sátá tata cán cúú dá tátuhun da xíca cáhan tuhún Ndióxi xihín ñayivi.

¹⁵ Java ga ñayivi cúú ná tátuhun tata ña nacuyu íchi. Táa johó na tuhún Ndióxi ta tá nandihí naxini johó na ña já vaxi tiñáhá sacuaḥa ta cája rí xihín ná ña ndíndójó na ña.

¹⁶ Ta java ñayivi cúú ná tátuhun tata ña nacuyu tañu yuu jáchi táa johó na tuhún Ndióxi ta cáji ini na ndíquehe na ña.

¹⁷ Ta tá quiahva ndiává yucu sahá ña co ñuhu cúná yóho a quiahva já ndóho ñayivi tá casáhá ndicuḥta ñayivi cája xíxi na xihín ná.

Ta tá casáhá ndóho ini na sahá tuhún Ndióxi ña naxini johó na cán chí ivi laá jándacoo va na ña cándeé ini na Ndióxi.

¹⁸ Ta java na cúú ná tátuhun tata ña nacuyu tañu tohíñú jáchi táa johó na tuhún Ndióxi

¹⁹ joo ndícani ndivaha ini na sahá ñaha ñuyíví yóho. Cátóo ndivaha na ñaha cuicá chí jándahvi na mé ná xihín ña cán ta xíca ini na coo tóco ndihi ñaha nu ná.

Ta cáva nuu táhan ñaha ñuyíví yóho xihín tuhún Ndióxi ini ínimá ná sahá ña cán quéa cávitá ini na ta co sáhnu na xihín tuhún Ndióxi.

²⁰ Joo ndúu java na xíní johó tuhún Ndióxi ta cándúsa na ña. Ta cája chuun vaha na xihín á ta já cuahnu na xihín á. Cúú ná tátuhun tata nacuyu nu ñuhú vaha.

Java na cúú ná tátuhun tata ña nasahan oco uxu a nuú in in a. Ta java na cúú ná tátuhun ña nasahan uní jico uxu a ta java na cúú ná tátuhun ña nasahan in ciento a nuú in in tata —

nacachi Jesús xihín na cán.

Sácú Jesús quiahva sahá in lámpara
(Lc. 8:16-18)

²¹ Ta cáchi tucu Jesús xihín ná:

—Coó toho chuun lámpara tá chícaan í ña tíxi sato á tíxi xito jáchi chuun ña quéa cánúu ña nu jíco já ná jándiyehé ña nu yo.

²² Ni in túhún toho ñaha a cuú coo jehé jáchi

xinu quivi já ndáca náha nu á. Ta ni in tuhun nacahan jehé ñayivi a cuú coo jehé nahá jáchi xinu quivi já candaá ini tóco ndihi ñayivi sahá tuhun nasahin jehé cán.

²³ Na íin johó, ná cuni johó na —nacachi a.

²⁴ Ta cáchi tucu a já xihin ná:

—Candehé vaha ndó ña taa johó ndó. Tá quiahva cája ndó xihin ñayivi quiahva já caja Ndióxi xihin ndó joo chága ví caja mé á xihin ndó. ²⁵ Jáchi da sa íin ñaha nuu, ñehe táhvi dá coo chága ñaha nu dá joo da coo ñaha nuu, janda ña chá íin nu dá ndindaa —nacachi Jesús.

Jánaħa Jesús nu ná ndá quiahva sáħnu tata

²⁶ Ta cáchi tucu Jesús já:

—Tá ndiquiahva ñayivi mé ná ndáħa Ndióxi ña ná cacomí a cuéntá saħa ná já cúú á tátuhun in dataa nachihin tata. ²⁷ Tá nandihí yáħa quivi tá quíji da ta ndácoo da já yáħa quivi xihin ñuú. Ta já ndúta mé tata cán ta sáħnu a joo mé da nachihin a cán coo xini da ndaja sáħnu a. ²⁸ Sáħnu a jáchi chuun nu mé ñúħu quéa caja ña ná cuahnu ña cán. Jihna ñúħu ndúta mé yucu trigo já cana yóco a ta nu mé yóco a cán ndicutú ndaa ndiqui á. ²⁹ Ta tá nachichi mé ndiqui a cán já quéa na cuahan na jáquee na ña jáchi naxinu coo quivi jáquee na ña —nacachi Jesús.

Sácú Jesús inga quiahva saħa ndiqui mostaza

(Mt. 13:31-32; Lc. 13:18-19)

³⁰ Ta cáchi tucu Jesús já:

—Viti sácú u inga quiahva nu ndó já ná candaá ini ndó ndá quiahva caja Ndióxi xihin ñayivi tá casáħa a cómí a cuéntá saħa ná. ³¹ Cúú á tátuhun in ndiqui mostaza ña chíhin na nuú ñundáhyi. Cúú á ndiqui loħo chága nu tóco ndihí ndiqui válí íin ñuyíví. ³² Joo tá nandihí nachihin na a nasahnu a ta nanduú a in yító, dó cáħnu nu ndíhi yító. Ta xihin ndahá náħnu dó sácú do cati ta janda laa ndíquehe ndée ri nu cati do —nacachi Jesús.

Sácú Jesús quiahva cuití va nuú ñayivi

(Mt. 13:34-35)

³³ Najánaħa Jesús tuhun Ndióxi nu ná. Ta nasacu cuahá quiahva nu ná tátuhun ña yóħo janda quiahva xinu nu mé ná

candaá ini na. ³⁴ Xihin mé quiahva cuití va najánaħa Jesús nuú ñayivi joo tá nacandoo Jesús xihin mé na xica tuun xihin á já ndícani cáxi ndihí a ñaha nuú na cán.

Tá najácatáji Jesús tañuhú tá ndícojo do

(Mt. 8:23-27; Lc. 8:22-25)

³⁵ Tá nacuaá mé quivi cán já nacachi Jesús já xihin na xica tuun xihin á:

—Cóħo inga xoo tañuhú yóħo.

³⁶ Anda já najándacoo na ñayivi já naquee na cuahan na xihin Jesús ini mé barco nuú sa ndácaan mé á. Ta ndáca táħan java ga barco cuahan dó xihin ná. ³⁷ Ta ndaja coo naxinu in tachí quini ndivaha. Ta nacasáħa ndícojo tañuhú ndíhvi dó ini barco já nacasáħa ndicutú ticuú ini mé barco cán. ³⁸ Ta chí xoo jata mé barco cán cándúħu Jesús quíji a ta cánúu jini á jata ña yíhi jini ná. Já najándacáxi ini na mé á ta cáchi na já xihin á:

—Maestro. Chí coo sáħní a mé á ña cuni ndihí saħa yo jáchi sácoo barco cahá ticuú cuahan do —nacachi na.

³⁹ Anda já nandacoo Jesús ta nacasáħa jánaní a tachí xihin tañuhú viti já cáchi a já: —Catáji ndó.

Já najáyaa tachí. Já nacandoo táji ní mé cán. ⁴⁰ Anda já nacachi Jesús xihin na xica tuun xihin á:

—Ndávaha nayihví nahá ndó. Ndávaha coo candeé ini ndó yeħe —nacachi a.

⁴¹ A juú quiahva nayihví mé na cán já nacasáħa caħan xihin táħan na:

—Ndá da cúú dataa yóħo ña janda tachí xihin tañuhú cándúsa nu caħan da —nacachi na cán.

5

Tá nandaja vaha Jesús in da ndácaan ínima quini ini

(Mt. 8:28-34; Lc. 8:26-39)

¹ Anda já naxinu na inga xoo mé tañuhú cán nu íin ñundáhyi cuéntá Gadara. ² Ta tá nanuu Jesús barco cán já naquee in dataa camasanto já naxinu da nuú Jesús. Mé da yóħo cúú dá da ndácaan ínima quini ini. ³ Ta íin va da nu ndúxu ndii ta ni in na a cuú cató na da ni xihin cadena a cuú cató na da. ⁴ Vatí cuahá tañu sa nacató na saħa dá xihin ndáħa dá joo sáħndá da cadena ta jácuachi

da ña ta ni in na a cuú caja xihín dá. ⁵ Ñuú ta ndiví xíca nuu da yúcu xihín nu ndúxu ndii cáyuhú da xíca nuu da ta jándicuehe da mé dá xihín yuú. ⁶ Joo tá naxini xíca da Jesús, ñihi chá nasahan da naxinu da nu íin a já nandicava xítí da nu á. ⁷ Ta cáyuhú cóhó da já cáchí da já xihín á:

—Ndá cuéntá quea vasún quihvi nuún xihín i. Yóhó cúun Jesús, da cuú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i —nacachi da.

⁸ Nacachi da ña yóho xihín Jesús jáchi nacasáhá sáhdá mé á chuun nu rí quini cán já cáchí a já:

—Ínima quini, janí da yóho.

⁹ Anda já nandaca tuhún Jesús mé rí quini cán já cáchí a já:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní nde jáchi cuaha cúu nde.

¹⁰ Ndáhví mé xíca tahví da cán nu Jesús ña ná a tává xíca a rí quini cuhun ri. ¹¹ Ta ndaja coo xíca nuu cuaha cóchí xixáhan rí yati yúcu cán. ¹² Sahá ña cán quea naxica tahví mé ínima quini cán nu Jesús já cáchí ri já:

—Chindahá ndehe ná cuhun nde ndihvi nde cóchí cáa.

¹³ Anda já nasahan Jesús ñamaní ta chí naquee ínima quini nasañuhu ini da cán já nandihvi rí ini cóchí xíca nuu cán. Ta tóco ndihí cóchí yóho xínu rí cuahan rí nanuu rí nu ndáyí já najáqueta nuu rí mé rí ini tañuhú chí nacandaa rí ticuúí já naxihí ri. Tátuhun ivi mil cóchí nandihí saha.

¹⁴ Ta ndaja coo mé da ndáa cóchí cán nayihví da chí xínu da cuahan da caxi tuhun da ña nayaha yóho nuú ñayivi ñuu Gadara xihín nuú java ga na ndúu yati cán. Naquee cuahá ñayivi mé cán candehe na ña nacuu. ¹⁵ Tá naxinu coo na nu íin Jesús naxini na íin coo da nasañuhu cuaha rí quini ini cán. Sa nandaca ndixi da jáhma ta sa nandicaxí táhyí ini da. Chí nayihví na. ¹⁶ Ta na naxini ña nacaja Jesús cán nacasáhá na ndicani na nuú ñayivi ña nandoho dataa, da nasañuhu rí quini ini cán xihín ña nandoho cóchí viti. ¹⁷ Anda já

nacasáhá na xíca tahví na nu Jesús ña ná quee a cuhun a.

¹⁸ Tá sa cuahan ndihvi Jesús ini mé barco cán já naxinu da nasañuhu rí quini ini cán já nacasáhá da xíca tahví da nu á ña ná quiahva ñamaní nu dá cuhun da xihín á. ¹⁹ Joo coo nasahan Jesús ñamaní nu dá já nacachi a xihín dá:

—Cuanúhu vehún ta ndicani nuú na vehún ndaja náhnu ñaha nacaja Ndióxi xuhun ta ndaja natahvi ini a sahun —nacachi a.

²⁰ Já naquee da cuahan da ta nacasáhá da ndicani da nuú ñayivi ndúu java ñuu cuéntá Decápolis tóco ndihi ña nacaja Jesús xihín dá. Chí catóntó na táa johu na ña.

Tá nandaja vaha Jesús jahyi jhí Jairo xihín in ña nacani ndaa ndáha jáhma á (Mt. 9:18-26; Lc. 8:40-56)

²¹ Tá nandihí nandihvi Jesús ini mé barco cán já naxinu coo a inga xoo tañuhú nuú naquixi a. Ta cán nanditútú cuahá ñayivi nu á mé yuhú tañuhú cán. ²² Já naxinu in da naní Jairo, da sáhdá chuun veñuhu. Tá naxini da Jesús nacaxítí da sahá. ²³ Ta ndáhví mé naxica tahví da nu á já cáchí da já:

—Xíhi jahyí i viti ñuhú. Caja ndó ñamaní ná cohó vehe chinúu ndó ndáha ndó jatá ña ná ndivaha ña já ná catacu ña —nacachi da.

²⁴ Anda já naquee Jesús cuahan xihín dá. Chí cándihí táhan mé ñayivi ndíco na jatá cuahan na. ²⁵ Ta tañu ñayivi cán ndácaan in ña quihvi. Sa naxinu uxu ivi cuia ndítahví nii ña. ²⁶ Nandoho ndivaha ini ña nuú na cája tátá ñayivi ta sa najátivi ndihi ña jjuhún ña catátá ña cúni ña. Joo a cuú ndivaha ña ta janda cája ndeé chága ví a xihín ña. ²⁷ Tá naxini johu ña saha Jesús já cuahan ña cayati ña chí jatá tañu tóco ndihí ñayivi cuahan jatá mé a cán. Ta nacani ndaa ndáha ña jáhma á ²⁸ jáchi nacahan ña: “Tá ná cani ndaa cuití ndahá yo jáhma á já ndavaha í”, nacahan ña. ²⁹ Ivi laá nahichí nii ña. Naxini cáxí ña nandivaha ña ta cuahan va cuehe nandoho ña. ³⁰ Jári Jesús ivi laá nacandaa ini a ña nandivaha in ñayivi nacaja ndeé mé á. Já nacasáhá

sándehe a chí jata tañu ñayivi. Já ñacasáhá ndáca tuhún á ña já cáchí a já:

—Ndá ndó ñacani ndaa ndáha jahmá i.

³¹ Ta ñanducú ñehe mé ña xíca tuun xihín á cán tuhun nu á já cáchí ña já xihín á:

—Sándehe vaha mé ndó ndá quiahva cándíhi táhan ñayivi vaxi na xihín ndo ta cáa ga mé ndó ndáca tuhún ndó ndá ña ñacani ndaa ndáha jahma ndo —ñacachi na.

³² Joo cáva nuu nuu Jesús sándehe a ndá ña ñacani ndaa ndáha jahma á. ³³ Ta mé ñá ñandivaha cán tá ñacandaa ini ñá ña ñayaha já ñacasáhá quíji ninu ñá sahá ña yíhvi ña. Já ñaxinu ñá ñasaxítí ña nu Jesús. Anda já ñacasáhá ña ndícani ñá nu á ndaja cáa ña ñacaja ñá. ³⁴ Anda já ñacachi Jesús já xihín ña:

—Jahyi a, ñandivahún jáchi ñacandúsún yehe. Cuanúhu ta a ndícani ga inún jáchi ñandindaa cuehun —ñacachi Jesús.

³⁵ Cáhan yij va Jesús xihín ñá cán tá ñaxinu java na ñaquixi vehe mé da sáhdá chuun veñuhu cán já ñacachi na já xihín dá:

—Sa ñaxihí va jahyi ndó. A jáquihvi ga ndó da xíca jánaha ñayivi jan —ñacachi na.

³⁶ Joo ñacaja Jesús tátuhun co xíni johó a nuú ñacahan ña. Ñacasáhá cáchí a já xihín da sáhdá chuun veñuhu cán:

—A cáyihvi tohún. Candúsa cuití vún yehe —cáchí a.

³⁷ Ta coó ñasahan Jesús ñamani nuú ña cuaha ndúu cán cuhun ña xihín á. Na ñasahan cuití xihín á cúu Pedro xihín Jacobo xihín Juan, da cúu ñani Jacobo.

³⁸ Tá ñaxinu ña vehe mé da sáhdá chuun veñuhu cán já ñaxini a ndíváá ñayivi sácu ndivaha na cáyuhú ña ndúu na cán. ³⁹ Já ñaquihvi a vehe ta já cáchí a já:

—Ndávaha ndíváá nahá ndo ta sácu cuaha ndo. Ta coó ñaxihí toho ñáloho yóho joo quíji cuití va ñá —ñacachi a xihín ña cán.

⁴⁰ Joo ñacasáhá ña sácu ndaa na a. Anda já ñatavá Jesús tóco ndihi ñayivi jata véhe. Na ñaquihvi xihín á ñasacuu tátá náná ña xihín ña xíca tuun xihín á. Ta ñacayati a nu cándúhu mé ñáloho cán. ⁴¹ Já ñatiin a ndáha ña ta ñacasáhá cáchí a já xihín ña:

—Talita, cumi —ñacachi a. Mé tuhun yóho cúni cachi a: Ñáloho cáhan i xuhun cuándacoó.

⁴² Ivi laá ñandacoó ñáloho, ñá ndacaan uxu ivi cuia ta ñacasáhá ña xíca nuu ñá. Já ñacatóntó tóco ndihi ñayivi. ⁴³ Joo ñasahnda Jesús chuun nuú ña ndúu cán ña ná a cáxi tuhun na ña ñayaha yóho nuú java ga ñayivi. Ta ñasahnda a chuun nu ná ña ná quiahva na ña cuxu mé ñáloho cán.

6

Íin Jesús ñuu a Nazaret

(Mt. 13:53-58; Lc. 4:16-30)

¹ Naquee Jesús cuanúhu á ñuu a. Já naquee ña xíca tuun xihín á cuahan ña xihín á. ² Tá ñaxinu quívi ndíquehe ndée ná já ñacasáhá Jesús jánaha ñayivi ini veñuhu cán. Ta cuahá ñayivi ñaxini johó nuú ñacahan ta chí ñacatóntó ña ta ndáca tuhún xihín táhan na já cáchí ña já:

—Ndájá ñacatiahva nahá da yóho ña jánaha dá nu yo. Ndá ñaquixi ña ndíchí jini dá. Ndá ñaquixi ñaha xituhún cája da.

³ Á a juú da yóho cúu da cája chúun xihín yíto, da cúu jahyi María. Ta ñani da cúu Jacobo xihín José xihín Judas xihín Simón. Ta quiahva da jan ndúu ñuu yóho xihín mí —cáchí ña ndáca tuhún táhan na.

Ta chí coó ñaxeen na candúsa ñahá ña. ⁴ Sahá ña cán quea ñacachi Jesús já xihín ná: —Vatí tóco ndihi ñayivi cája cáhnu na in profeta joo ña vehe da xihín ña ñuu da co cándúsa na da —ñacachi Jesús.

⁵ Chí coó ñacuu caha Jesús ña náhnu nuú ña cán. Java va ña quíhvi cuití va ñachinúu a ndahá jini ná já ñandaja vaha a ña. ⁶ Ta chí ñacatóntó Jesús sahá ña co cándúsa na mé á. Sahá ña cán quea ñaquee Jesús cuahan jánaha ñayivi java ga ñuu válí ndúu yati cán.

Tá ñachindahá Jesús uxu ivi ña xíca tuun xihín á caxi tuhun na nuú ñayivi saha mé á
(Mt. 10:5-15; Lc. 9:1-6)

⁷ Tá najánditaca Jesús ndíhuxu ivi ña xíca tuun xihín á cán já ñachindahá a ña tá ivi tá ivi cañehe táhan na cuhun ña. Ta ñasahan ndée nu ná ña ná cuu tavá ña ínimá quini ñúhu ini ñayivi. ⁸ Ta ñasahnda a chuun nu ná ña ná a cáñehe toho na ñaha cuhun

na íchi. In túhún ña cuu cañehe na cuhun na cúu in garrote, dó tiin ndaa na. Joo a cuú cañehe na ni yátí ni pan ni jiuhún. ⁹ Ndítahan cayihi na ndusa ta in túhún cotó na ndítahan candixi na cuhun na. ¹⁰ Ta nacachi a já xihin ná:

—Tá ná xinu coo ndó in vehe, canduu ndó mé vehe jan anda quiahva xinu quivi quee ndó cuhun ndo. ¹¹ Ta ndá ñuu co cuni na ndiquehe vaha na ndohó ta ni co cuni na taa johó na nu cáhan ndo já quea cuahán queta ndó cuhun ndo ta catí ndó ña yacá saha ndo já ná nahá ña cuahan cuachi na cán jata mé va na. Mé a ndaa ná cahan i xihin ndo ña tá ná xinu quivi caja vií Ndióxi sahá ñayivi ndúu ñuyivi já quea jándoho chága Ndióxi ini ñayivi ñuu jan sahá ña coo nandiquehe na ndohó a juú ga tá quiahva najándoho a ini na ñuu Sodoma xihin Gomorra sanahá —nacachi Jesús xihin ná.

¹² Anda já naquee mé na xica tuun xihin á cuahan na caxi tuhun na nuú ñayivi ña ndítahan nu ná ndicó coo ini na jándacoo na cuachi cája na. ¹³ Ta natavá cuaha ná ínima quini nasañuhu ini ñayivi ta tá naxojo na síti jini ñayivi quihvi já nandivaha na.

Tá naxihi Juan, da nacaja ndúta ñayivi (Mt. 14:1-12; Lc. 9:7-9)

¹⁴ Nañehe Herodes, mé da cómi cuénta sahá ñayivi cán tuhun sahá Jesús jáchi ní cúu nandicujita nuu tuhun sahá. Ta já cáchi Herodes já saha Jesús:

—Á a juú Jesús cúu á Juan, da najácandúta ñayivi ta viti nanditacu tucu da. Sahá ña cán quea in ndée da cája da tóco ndihi ña cája da yóho —cáchi da.

¹⁵ Ta java na cáchi na já:

—Á a juú da yóho cúu Elías, da nasacuu profeta.

Ta java na cáchi na já:

—Á a juú da yóho cúu in profeta tátuhun na profeta nasanduu sanahá ndivaha.

¹⁶ Tá naxini johó Herodes ña yóho já nacasáhá cáchi da já:

—Jivi ndusa da yóho cúu Juan, da najácandúta ñayivi, da nasahnda i chuun ná chituhun ná jico dá joo viti nanditacu tucu da —nacachi da.

¹⁷ Jáchi mé Herodes yóho sa nasahnda da chuun ña ná tiin na Juan, da najácandúta ñayivi ta nacató na da já nachicaan na da vecaa. Nacaja da ña yóho sahá Herodías, ña nasacuu ñájíhi Felipe, ñani mé Herodes jáchi sa naquehe Herodes ña cacuu ña ñájíhi mé dá. ¹⁸ Ta natiin Herodes mé Juan jáchi já nasacahan Juan já xihin dá:

—Coo ndítahan coún xihin ñájíhi ñanún —nacachi da.

¹⁹ Sahá ña cán quea naxojo ini Herodías xihin Juan. Ta cuni ña cahní ña da joo a cuú caja ña. ²⁰ Jáchi yihvi Herodes Juan sahá ña xini da ña cúu Juan in taa ndaa, da co cája cuachi. Ña cán quea coo nasahan Herodes ñamani nu mé Herodías caja ña ña núu xihin dá. Ta taa johó Herodes nu cáhan Juan vatí cáhvi ivi johó ini da sahá ña xini johó da joo cáji ini da taa johó da nu cáhan da. ²¹ Joo in quivi nanuna nu Herodías cahní ña Juan jáchi nacaja Herodes in víco cuénta quivi nacacu da. Mé já nacana da da náhnu ndúu nu dá ña ná quixi na cuxu na xihin dá. Ta nacana da tóco ndihi na cúu sacuahá nuú soldado xihin tóco ndihi ñayivi in saha estado Galilea. ²² Ta ndaja coo ña cúu jahyi jíhi Herodías naquihvi ña nu ndúu na xixi na ta nacasáhá ña xita sahá ña nuú ndihi na cán. Ta nacatóo Herodes xihin na ndúu xixi xihin dá ndá quiahva naxita sahá ña sahá ña cán quea nacachi Herodes xihin ña:

—Ndía cuni mún, cacún ña nuú i jáchi quiahva i ña nuun —nacachi da.

²³ Ta nasahan da tuhun da nu ña cán ña quiahva da tóco ndihi ñaha ná cacá ña nu dá vatí ñahñu táhvi ndaa ñundáhyi ña cómi da chuun saha nacachi da quiahva da nu ña. ²⁴ Já naquee ña cán cuahan ña caxi tuhún ña nu náná ña ña nacachi Herodes xihin ña. Ta nandaca tuhún ña náná ña ndía cacá ña nu dá ta já nacachi mé náná ña já xihin ña:

—Caca yiquí jini Juan, da jácandúta ñayivi —nacachi Herodías.

²⁵ Ta cama chá naquihvi tucu ña cán nu ndacaan Herodes já cáchi ña já xihin dá:

—Viti ñuhú cuni ña ná quiahva mé ndó yiquí jini Juan, da jácandúta ñayivi nuú i ini in cohó cáhnu —nacachi ña.

26 Ta ndaja coo naçasáhá naçacuéha ndivaha ini Herodes sahá ña naçica ña cán yiquí jíní Juan. Joo sahá ña sa nasahan da tuhun da nu ña ta sa naçini johó tóco ndihi na ndúu xíxi xihín dá cán ña naçachi da xihín ña sahá ña cán quéa ndúsa caja da ña cúni ña. 27 Chí ivi laá naçindahá da in soldado veca ña ná cañehe da yiquí jíní Juan quixi a. 28 Naçinu soldado cán veca já naçitúhún dá jico Juan já ñehe da ña ini in cohó cáhnu já nandiquiahva da ña nu ña cán já nandiquiahva ña a nu náná ña.

29 Tá naçandaa ini na naçica xihín Juan ña naçaja na xihín dá já nasahan na nandiquehe na yiquí cuñu da já najánduxu na da.

Tá nasahan Jesús ña cuxu uhun mil taa
(Mt. 14:13-21; Lc. 9:10-17; Jn. 6:1-14)

30 Tá nandihí já nandique táhan tucu na xíca tuun xihín Jesús xihín á já naçasáhá ndícani na nu á ña naçaja na xihín ña najánaha na. 31 Já naçachi Jesús xihín ná:

—Naha ndó ná cohó ndiquehe ndée loho í nu cáa xóo.

Naçachi a já xihín ná jáchi cuahan vaxi ñayivi xíca nuu cuaha chá na mé cán ta chí co sahan na ñamaní cuxu na. 32 Anda já nandihvi Jesús xihín na xíca tuun xihín á ini in barco já naçee na cuahan na in nu cáa xóo. 33 Joo cuahá ñayivi nandicuni na Jesús tá naçee a cuahan. Já xínu cuahá ñayivi tá nuú ñuu cán cuahan sahá na xoo nuú cuahan Jesús ini barco. Ta jihna ga mé ná naçinu yuhú tañuhú cán a juú ga Jesús. 34 Tá nanuu Jesús barco cán já naçini a cuahá ndivaha ñayivi. Já natahvi ini a sahá ná jáchi tá quiahva ndúu ndicachi, rí coó xitoho quiahva já ndúu na. Anda já naçasáhá jánaha cuahá ñaha nu ná. 35 Ta tá sa cáhini cuahan naçinu na xíca tuun xihín á já cáchi na já:

—Sa nahini va ta a juú xoo nu ndúu ñayivi quéa yóho. 36 Ndindayí ndó ñayivi ná cuhún na ñuu válí xihín nuú yati yóho já ná cueen na ña cuxu na —naçachi na xíca tuun xihín Jesús.

37 Tá nandihí já nanducú ñehe Jesús tuhun já cáchi a já:

—Mé ndó quiahva ndó ná cuxu na —naçachi Jesús xihín na cán.

Ta naçachi na já xihín á:

—Ndá cuu caja nde quiahva nde ña cuxu na yóho jáchi jjuhún cuahá ndivaha xíní ñúhú nde já cuu cueen nde pan cuxu ñayivi cuaha yóho. Ta ni a quéta toho ivi ciento denario —naçachi na.

38 Já naçachi tucu Jesús já xihín na cán:

—Ndaja pan cómi ndo. Cuahán ndo candehé ndo.

Tá nasahan na sándehe na já cáchi na já xihín á:

—Íin uhun pan xihín ivi tiyacá.

39 Anda já nasahnda Jesús chuun nu ná ña ná jácaco na ndihi ñayivi tá táhnda nuú yucu cuí cán. 40 Ta nasaco na java táhnda in ciento na ta java táhnda ivi jico uxu na. 41 Anda já natiin Jesús ndíhuhun pan xihín ndíví tiyacá ta sándehe a indiví já nandiquiahva ndixahvi nu Ndióxi. Ta nasahnda java pan já nasahan ña nuú na xíca tuun xihín á já ná ndicahnda na ña nuú ñayivi. Tá quiahva já nasahnda tiyacá já nanditahnda rí nu tóco ndihi ñayivi cán. 42 Já naçixi tóco ndihi ñayivi cán ta naçutú tixi ndihi na. 43 Ta mé pan xihín tiyacá ña naçandoo naçixi na najáçhutú na uxu ivi toyicá. 44 Ta naçixi uhun mil dataa cán.

Tá naçica sahá Jesús nuú tañuhú
(Mt. 14:22-27; Jn. 6:16-21)

45 Tá nandihí naçaja Jesús ña ná ndihvi na xíca tuun xihín á ini in barco ña ná cuhún cuéé na inga xoo tañuhú já xinu na Betsaida nani ndíndayí a ñayivi já saa mé á cán ndique táhan xihín ná. 46 Ta tá sa nandindayí ndihi a ñayivi naçee a cuahan yucu caça tahvi a nu Ndióxi. 47 Tá naçuaá sa ndácaan barco maññú tañuhú cán ta Jesús íin yíi va nu ñúhu. 48 Ta naçini a ña ndóho ini na xíca tuun xihín á jáchi a cuú jácaca na barco ini ticuú jáchi mé xoo nuú cuhún na vaxi tachí. Tá sa cuahan tívi já xíca sahá Jesús cuahan nuú ticuú xoo nu ndúu na ta tá naçayati a nu ndúu na jalóho yaha saa cuhún a, nduu. 49 Joo tá naçini na xíca sahá Jesús nuú ticuú naçahán na cúu á in ínimá já naçayuhú cóho na. 50 Jáchi tóco ndihi na naçini ñahá nayihvi na. Joo nandicahan Jesús já cáchi a já:

—Ndacú coo ini ndó jáchi yehe va cúu u. A yíhvi toho ndó —naçachi Jesús.

⁵¹ Tá nandaa Jesús jata barco nu cándójó na já najáyaa tachí. Chí nācatóntó mé na xíca tuun xihín á cán. ⁵² Jáchi a ñaha tacu vaha ini na sahá ña nācaja Jesús tá nandaja cuaha mé á pan xihín tiyacá jáchi nandaji tuun xíní túní ná.

Tá nandaja vaha Jesús na quíhvi ndúu ñundáhyi Genesaret (Mt. 14:34-36)

⁵³ Naxinu na inga xoo tañuhú ta nācató ndaa na barco yuhú tañuhú cán já nasaa na ñundáhyi Genesaret. ⁵⁴ Tá quéta Jesús xihín na xíca tuun xihín á ini barco cán ivi laá nandicuni ñayivi mé á. ⁵⁵ Já xínu na cuahan na ndijáá ñuu válí ndúu yati cán ndúcú na na quíhvi já ñéhe na na nuú xito cása na nu Jesús. ⁵⁶ Ta ndá ñuu nācuu nu quíhvi Jesús cúú á ñuu nāhnu á ñuu válí á yúcu já quéta ñayivi sácú na na quíhvi yuhú íchi. Ta já xíca tahví na nu Jesús ña ná quiahva ñamaní caní ndaa ndáha ná a vatí loho yuhú jahmá a. Ta ndá na nācani ndaa ndáha mé á ivi laá nandivaha na.

7

Ña cája quini ínima ñayivi (Mt. 15:1-20)

¹ In tañu na fariseo xihín java na jánaha ley Moisés, na naquixi ñuu Jerusalén nācayati na nu ín Jesús. ² Ta naxojo ini na tá naxini na ña ndúu coo java na xíca tuun xihín Jesús xíxi na tá cámani ndahá na tá quiahva ín costumbre na Israel. ³ Jáchi jánaha na fariseo xihín ndihi na Israel ña a cuú cuxu na tá cámani ndahá vaha na tá quiahva ín costumbre tásahnu jícó na. ⁴ Ta jári jánaha na ña tá ndícó coo na sáhan na yahvi xíní ñuhú ndahá na tá quiahva ín costumbre na já ná cuu cuxu na. Ta ín cuahá ga nuú ñaha jánaha na ndítahan caja na tátuhun ña ndícata na yáxi xíhi na xihín tindoho xihín cohó caa anda xito quíji na viti, ndítahan ndicata na. ⁵ Anda já nācasahá na fariseo xihín na jánaha ley Moisés cáchi na já xihín Jesús.

—Ndávaha co cája na xíca tuun xuhun tá quiahva nācachi tásahnu jícó yo caja í. Ndávaha xíxi na tá cámani ndahá na tá quiahva sáhdá ley caja í —nācachi na. ⁶ Já nācachi Jesús já xihín ná:

—Mé a ndaa nācahan profeta Isaías saha ndo jáchi co cúú ndó tá quiahva ndaa ndó.

Já nācahyí da já:

Yuhú ñinu uun na cája cáhnu na yehe.

Ta co cája cáhnu na yehe xihín ndinuhu ínima ná.

⁷ Mé a uun va quéa cája cáhnu na yehe, jáchi ña jánaha na nuú ñayivi cúú á ña quixi jini mé cuití va na, nācahyí Isaías sanahá.

⁸ Jáchi najándacoo ndó ña nāсахnda Ndióxi nu ndó caja ndó ta nācasahá ndíco cáhnu ndó costumbre ña nācaja tásahnu jícó ndo. Ta sahá ña yóho ndícata ndó tindoho xihín yáxi xíhi ndó ta cája ndó cuahá chága costumbre yatá —nācachi Jesús xihín ná.

⁹ Já nācachi tucu a já xihín ná:

—Sahá ña cúní ndo candíco cáhnu ndó costumbre mé va ndó sahá ña cán quéa najándacoo ndó ña nāсахnda Ndióxi caja ndó. ¹⁰ Jáchi já cáchi ley Moisés: “Caja cáhnún tátún xihín nánún”, ta jári cáchi a já: “Ndá na ná chican chahan jata tátá na á jata náná na, ndítahan quivi na”, cáchi ley Moisés. ¹¹ Joo ndóhó jánaha ndó nuú ñayivi ña cuu cahan na já xihín tátá na á náná na: “A cuú chindee e ndóhó jáchi sa nācacu xoo i ñaha i quiahva i ña nu Ndióxi”, cáchi na.

¹² Tá ná cachi na ña yóho já quéa co ndúsa ga chindee na tátá na á náná na. ¹³ Quiahva joho cája ndó sácu xoo ndó ña nāсахnda Ndióxi nu ndo ta ndája ndó a tátuhun in ñaha ña coo saha. Jáchi ndíco cáhnu ndó costumbre ña najándadacoo tásahnu jícó ndó nu ndo ta quiahva já jánaha ndó nuú jahyi ndó. Ta cuahá ga ñaha tátuhun ña yóho cája ndó —nācachi Jesús.

¹⁴ Anda já nācana tucu Jesús ñayivi já nācachi a já xihín ná:

—Cuni joho ndihi ndó nu cahan i xihín ndo ta canda ini ndó ña. ¹⁵ Ni in ñaha xíxi ñayivi a cuú caja quini ínima ná. Ña cuu ndaja quini ñayivi cúú ña quixi ínima na tátuhun ña cahan na xihín ña cája na. ¹⁶ Na ín joho, ná cuni joho na —cáchi Jesús.

¹⁷ Tá nandihí nandihvi Jesús ini in vehe ta nācando cuahá ñayivi jata véhe. Já nandaca tuhún na xíca tuun xihín á ña ndía cúní cachi a xihín tuhun nācahan xihín

na. ¹⁸ Ta nanducú ñehe a tuhun nu ná já nacachi a já:

—Á coó toho xíní túni ri ndóhó va, vaha. Jáchi co cánda ini ndó ña tóco ndihi ñaha xíxi ñayivi a cuú caja quini a na. ¹⁹ Jáchi ña xíxi ñayivi co xínu a ini ínima ná joo xínu coo a tixi na já queta tucu a yiquí cuñu na — nacachi Jesús.

Xihín tuhun yóho nacachi Jesús xihín ná ña cuu cuxu na tóco ndihi ñaha ña xíxi ñayivi jáchi co ndája quini a ínima ná. ²⁰ Ta nacachi tucu Jesús já:

—Ña cuu ndaja quini ñayivi cúu ña quíxi ínima ná tátuhun tuhun cáhan na xihín ña cája na. ²¹ Jáchi chí ini ínima ná quéta ña cáhvi núu ini na tátuhun ña cáhvi ini in dataa coo da xihín ñájíhí ñani táhan da á tá xíca ini da coo da xihín in ñáñáha, ña co cúu ñájíhí da á tá cáhvi ini na cahní na ndii. ²² Ta sa mé cán quéta ña xíca ini na caja cuíhna na ta jári xíca ini na coo cuahá ndivaha ñaha nu ná. Ta sa mé cán quéta ña núu cája na ta cáhan na ña tuhún ta cája na tá nuú cuachi ta cáhíhvi ini na ta catóo na cáhan na saha táhan na ta cája cáhnu na mé ná ta quíhvi cája na. ²³ Tóco ndihi ña núu yóho ña cáhvi ini ñayivi caja na, quíxi a ínima ná ta ndája quini a na.

*Tá nacandeeé ini in ñá tóho Jesús
(Mt. 15:21-28)*

²⁴ Já naquee Jesús cuahan chí ñundáhyi cuénta Tiro xihín Sidón. Ta naquihvi a in vehe coo a ta co cúni a ña ná candaa ini na ñuu ña iin a cán joo coo nacuu coo jehé a. ²⁵ Chá va ta nacandaa ini in ñáñáha ña íin Jesús vehe cán. Ta íin in jahyi jíhí ña, ña ndácaan ínima quini ini. Ta ndaja coo nasaa ñá ta nacaxítí ña saha Jesús. ²⁶ Ta cúu ñá ñá tóho cuénta ñundáhyi Sirofenicia. Ta naxíca tahví ñá nu Jesús ña ná tavá a ínima quini ndácaan ini jahyi ñá. ²⁷ Anda já nacachi Jesús já xihín ña:

—Jihna ñúhú ndítahan nuú i chindeé e na Israel anda jávi cuu chindeé e ndóhó, na tóho jáchi íin in tuhun ta cáhí a ña a váha toho candaa í pan xíxi na valí ta jácana í ña nuú tina — nacachi Jesús.

²⁸ Anda já nacachi mé ñá tóho cán já xihín Jesús:

—Mé a ndaa cáhan ndó, xitoho. Joo anda tina, rí ndúu tixi mesa xíxi rí ña jácu yu jahyi xitoho rí — nacachi ñá.

²⁹ Anda já nacachi Jesús já xihín ñá:

—Vaha va nacahun. Saha ña cán quéta cáhí i xuhun cuanúhu viti jáchi sa naqueta va ínima quini nasandacaan ini jahyún — nacachi Jesús.

³⁰ Ta tá naxinu ñá vehe já naxini ñá cándúhu jahyi ñá nuú xito ta sa coó ga ínima quini cán ndácaan ini jahyi ñá.

Tá nandaja vaha Jesús in da jóho, da a cuú cáhan

³¹ Naquee Jesús ñundáhyi cuénta Tiro ta nayaha chí ñuu Sidón xihín java ga ñuu cuénta Decápolis cán já naxinu coo a tañuhú Galilea. ³² Cán ñehe na in dataa nacasa na nu Jesús. Cúu dá da jóho ta cúu dá da níhi. Ta naxíca na nu á ña ná chinúu a ndáha á jini dá já ná ndivaha da. ³³ Já natavá xoo Jesús da tañu ñayivi cán. Já najáquihvi a in nducu ndáha jóho da ta naxihnu a tójí a já nacani ndaa a tójí a yáa dá. ³⁴ Tá nandihí nasandehé a indiví já ndísaa ndísaa ínima á já nacachi a já xihín dá:

—Efata — nacachi a ta ña yóho cúni cachi: Ná ndinuna.

³⁵ Ivi laá nandinuna jóho mé da jóho cán ta nandivaha yáa dá já nacasahá cáhan vaha da. ³⁶ Ta nasahnda Jesús chuun nuú ndihi na ña ná a cáxi tuhun na ña yóho nuú ni in ñayivi. Joo tá nacachi a ña yóho já quéta ví ga ví cáhan na. ³⁷ Chí catóntó ndihi ñayivi tá xíni jóho na ña ta cáhan xihín táhan na já cáhí na já:

—Vaha ndivaha cája Jesús tóco ndihi ñaha jáchi jánditacu a na jóho ta jándicahan mé á na níhi — nacachi na.

8

*Tá nasahan Jesús ña cuxu comi mil ñayivi
(Mt. 15:32-39)*

¹ Mé já nanditútú tucu cuahá ñayivi ta chí coó mé ñaha cuxu na. Anda já nacana Jesús na xíca tuun xihín á já nacachi a já xihín ná:

² —Táhnda ndivaha ini i saha ñayivi yóho jáchi sa naxinu uní quívi ndúu na xihín i yóho ta chí coó ga ñaha cuxu na. ³ Ta co cúni chindahá i na nuhu na vehe na jáchi cámani

cuxu na ta tiahva náá cuitá na ta cuyu na íchi jáchi sa cáni ndivaha naquixi java na — nacachi Jesús.

⁴ Andá já nacachi na xíca tuun xihín á cán já:

—Ndaa cáhan ndo. Ta ni mí, a cuú quiahva í ña_cuxu na jáchi coó toho ñayivi ndúu yóho nuú cueén ña_cuxu na —nacachi na.

⁵ Andá já nandaca tuhún Jesús na já cáchi a já xihín ná:

—Ndaja pan cómi ndo.

Já nacachi na cán já:

—Usa ña.

⁶ Andá já nasahnda Jesús chuun nuú ñayivi ña ná cacoo na nu ñúhu. Já natiin a ndíhusa pan cán. Ta nandiquiahva ndixahvi nu Ndióxi. Já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuaha cán. ⁷ Ta jári nasacomí na java tiyacá válí ta nandiquiahva mé á ndixahvi nu Ndióxi saha ri já nasahnda chuun nu ná ña ná ndicahnda na ri. ⁸ Ta naxixi tóco ndihi na ndúu cán andá quiahva nachutú tixi na ta tá nandihí najácutú na janda usa toyicá xihín ña nacandoo. ⁹ Tátuhun comi mil ñayivi naxixi. Ta tá nandihí já najándidayí Jesús na. ¹⁰ Já nandihvi a ini barco xihín na xíca tuun xihín á já naquee na cuahan na ñundáhyi cuéntá Dalmanuta.

Cúni na fariseo ña ná caja Jesús in ña xituhún nu ná

(Mt. 16:1-4; Lc. 12:54-56)

¹¹ Andá já naxinu na fariseo nu Jesús já nacasáhá ndítuhún na xihín á. Ta sahá ña cúni na coto ndojó cuití ñahá na sahá ña cán quea naxica na nu á ña ná caja in ña xituhún, ña quixi indiví já ná candaa ini na á mé a ndaa cúu á ña nachindahá Ndióxi. ¹² Ndísaa ndísaa ini Jesús jáchi ndíhi ini a xihín ná já cáchi a já:

—Ndá saha quea xíca na yóho ña ná caja i in ña xituhún. Mé a ndaa ná cahan i xihín ndó ña a cája i ñaha xituhún nuú na yóho — nacachi a.

¹³ Andá já nandihvi tucu Jesús ini mé barco cán ta najándacoo a na cán já naquee a cuahan inga xoo tañuhú.

Tá cáhan Jesús sahá ña jánaha na fariseo (Mt. 16:5-12)

¹⁴ Ta ndaja coo nandindójó mé na xíca tuun xihín a cán cañehe na ñaha_cuxu na joo nasahin in pan cuití va xihín ná ini barco cán. ¹⁵ Andá já nasahnda Jesús chuun nu ná já cáchi a já xihín ná:

—Candehé ndo. Cuénta coo ndó xihín na fariseo ta xihín na cúu cuénta Herodes jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

¹⁶ Coó nacandaa ini na ña cáchi a ña cán quea nacasáhá ndítuhún xihín táhan na já cáchi na já:

—Sahá ña coó pan ñehé vaxí sahá ña cán quea cáhan Jesús ña yóho xoho —nacachi na.

¹⁷ Sa nacandaa ini Jesús ña cáhan na ta já nacasáhá cáchi a já:

—Mé ndó cáchi ndó ña coó pan ñehé vaxí jáchi co candaa ini ndó ta ni co cája ndó cuénta sahá ña jánaha i. Nandaji tuun xini túni ndo. ¹⁸ Cúu ndó tátuhun na co tívi nuú xihín na coó johó jáchi vatí xini ndo ta xini johó ndó joo co candaa ini ndó. Á co ndícuhun ini ndó ña nacaja i ¹⁹ tá nandicahnda i ndíhuhun pan nuú uhun mil taa. Ndaja toyicá nanditaca nacaja ndó xihín ña nacandoo cán —nacachi Jesús.

Já nanducú ñehe na tuhún nu á:

—Uxu ivi ña.

²⁰ Ta nacachi tucu Jesús xihín ná já:

—Ta tá nandicahnda i usa pan nuú comi mil ñayivi, ndaja toyicá nanditaca nacaja ndó xihín ña nacandoo —nacachi a.

Já nanducú ñehe na tuhún nu á:

—Usa ña.

²¹ Andá já nacachi a já xihín ná:

—Camaní yii va candaa ini ndó —nacachi a.

Tá nandaja vaha Jesús in da cuaá ñuu Betsaida

²² Tá nandihí naxinu na ñuu Betsaida já ñehe na in da cuaá nacasaa na nu Jesús. Já naxica tahví na nu á ña ná caní ndaa ndáha á da. ²³ Ta chí natiin a ndáha da cuaá cán já natavá a da yuhú ñuu. Nachindaa tójií a nduchú núu da já nachinúu a ndáha á jini dá. Já nandaca tuhún a da á cuu candehé da. ²⁴ Tá já nacachi da cán já sánehé da:

—Sándehe e java taa joo tá quiahva ndáa yító quiahva já ndáa da xíca nuu da xíní i — nacachi da.

²⁵ Anda já nachinúu tucu Jesús ndáha á nduchú núú da já nasandehé ndaa da. Anda jáví nandivaha nduchú núú da ta nacasáhá sándehe cáxi vaha da tóco ndihi ñaha. ²⁶ Ta nachindahá Jesús da cuanúhu da vehe da já nacachi a já xihín dá:

—A ndíhvún mahñú ñuu ni a ndícanún ña yóho nuú ñayivi ndúu jan —nacachi a.

Tá cáxi tuhun ndaa Pedro ña cúú Jesús mé a nachindahá Ndióxi cacomí cuéntá sahá ñayivi

(Mt. 16:13-20; Lc. 9:18-21)

²⁷ Tá nandihí já nasahan Jesús xihín na xíca tuun xihín á ñuu válí ndácaan Cesarea cuéntá Filipino. Nani xíca na cuahan na íchi nandaca tuhún a na já cáchí a já xihín ná:

—Ndá da cáchí ñayivi cúú yehe — nacachi a.

²⁸ Já nacachi na cán já:

—Java na cáchí na ña cúú ndó Juan, da nacaja ndúta ñayivi. Ta java na cáchí na ña cúú ndó profeta Elías. Ta java na cáchí na ña cúú ndó in táhan profeta nasanduu sanahá —nacachi na.

²⁹ Anda já nandaca tuhún tucu Jesús na já cáchí a já xihín ná:

—Ta ndóhó ri, ndá da cáchí ndo cúú u — nacachi a.

Anda já nacachi Pedro já xihín á:

—Mé ndó cúú Cristo, mé a nachindahá Ndióxi cacomí cuéntá sahá ñayivi — nacachi da.

³⁰ Anda já nasahnda Jesús chuun nu ná ña ná a cáxi tuhun na ña yóho nuú ni in ñayivi.

Cáxi tuhun Jesús ña quivi a

(Mt. 16:21-28; Lc. 9:22-27)

³¹ Anda já nacasáhá jánaaha Jesús nu ná ña tandaa quiví ndoho ndivaha ini mé á, da nachindahá Ndióxi nduu ñayivi. Ta na sacuaaha veñuhu xihín na sacuaaha nuú jutú xihín na jánaaha ley Moisés candají na mé á janda quiahva ná cahní ñahá na. Joo tá ná xinu uní quiví nditacu tucu a. ³² Cáxi ndivaha nacahan Jesús ña yóho xihín ná ta chí anda já natavá xóo Pedro Jesús já nacasáhá jánani da a sahá ña

nacachi a xihín ná. ³³ Joo nacava Jesús ta nandicoto nihni a nuú na xíca tuun xihín á já nacasáhá ndícuehe a xihín Pedro já cáchí a já xihín dá:

—Cuáhán quee Satanás, rí cúú tiñahá sacuaaha. Co íin xíní túnun tá quiahva íin xíní túní Ndióxi jáchi cáhvi inún tá quiahva cáhvi ini ñayivi ñuyiví yóho —nacachi a.

³⁴ Anda já nacana Jesús na xíca tuun xihín á xihín java ga ñayivi já nacachi a já xihín ná:

—Ndá na cúni candico yehe ndítahan nu ná ndíhi chága ini na sahá yehe a juú ga saha mé ná. Ta ndítahan coo tiaha na ndoho ini na sahá yehe. Ta coo caja toho a ná quivi na sahá i. ³⁵ Jáchi ndá na cátóo coo chága ñuyiví yóho ndíhi saha ná. Joo ndá na sahan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quivi. ³⁶ Vatí ná quee vaha in na ñuyiví yóho ta cómi na tóco ndíhi ñaha ñuyiví joo ndá chuun quea tá nu ndíhi ndíhi saha ná indayá. ³⁷ Jáchi ni in ñaha a cúú chahvi in na saha ínimá ná ná a cühun na indayá. ³⁸ Candehé ndo. Mé tiempo viti cája ñayivi cuahá cuachi ta co xéen na caja na ña sáhdá Ndióxi nu ná. Ta ndá na cácahan nuu sahá i xihín sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúú yehe jáchi quixi i xihín ndeé Ndióxi ta xihín ndeé táto yíi mé á viti —nacachi Jesús.

9

¹ Ta nacachi tucu Jesús já xihín ná:

—Mé a ndaa ná cahan i xihín ndo. Java na ndúu yóho a quiví toho na janda quiahva ná xinu quiví cuni na cacomí Ndióxi cuéntá sahá ñayivi xihín ndeé mé á —nacachi a.

Tá nandijama Jesús quiahva cáa

(Mt. 17:1-13; Lc. 9:28-36)

² Tá nayaha iñu quiví já nandaa Jesús in yucú jícó ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán nandijama quiahva cáa. ³ Ta a juú quiahva nandiyehé jáhma ndíxi a chí nandiyaa cachi ña. Ni in ñayivi ñuyiví yóho a cúú ndicata yaa nahá jáhma tá

quiahva yaa nanduu jáhma á. ⁴ Anda já na xíca tuun xihín Jesús naxini na Elías xihín Moisés ndúu na ndítuhún na xihín á. ⁵ Ta já nacachi Pedro já xihín Jesús:

—Maestro, vaha cúu ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías —nacachi da.

⁶ Nayihví ndivaha na xíca tuun xihín Jesús sahá ña cán quéa co xini mé Pedro ndía cáa cáhan va da. ⁷ Anda já nanuu in vico jata ná já najajahvi a na ta tañu vico cán naxini johu na ña cáhan in a já cáchi a já:

—Da yóho cúu jahyi maní i. Cuni johu ndó nu cáhan da.

⁸ Ta tá nandicoto nihni na sa coó ga na naxini na ta janda in túhún Jesús naxini na.

⁹ Tá sa cuahan nuu na jini yucu cán já nasahnda Jesús chuun nu ná ña ná a cáxi tuhun na nuú ñayivi ña naxini na anda quiahva ná xinu quivi nditacu tucu mé a nachindahá Ndióxi nduu ñayivi. ¹⁰ Sahá ña cán quéa nachijehé tuhun na sahá joo nandítuhún xihín táhan na ndía cuni cachi Jesús tá nacachi a ña nditacu tucu a. ¹¹ Anda já nacasahá ndaca tuhun na mé á já cáchi na já xihín á:

—Ndávaha cáchi na jánaha ley Moisés ña ndítahan quixi jihna ñúhú profeta Elías —nacachi na.

¹² Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xini ndó ndá quiahva cáchi tuhun Ndióxi sahá da chindahá Ndióxi nduu ñayivi. Cáchi a ña ndoho ini da ta candají na da. ¹³ Joo cáxi tuhun i nu ndó ña sa naquixi va Elías ta nacaja na tá quiahva cuni mé va na xihín dá ta tá quiahva cáchi tuhun Ndióxi ndoho da quiahva já ndoho da —nacachi Jesús.

Tá nandaja vaha Jesús in taa loho ndacaan ínima quini ini

(Mt. 17:14-21; Lc. 9:37-43)

¹⁴ Tá ndihi já nandicó coo Jesús xihín na cán nu ndúu java ga na xíca tuun xihín á cán. Já naxini na cuahá ndivaha ñayivi nacava nuu na na cán. Jári ñúhu java na jánaha ley Moisés cáni táhan yúhu ná xihín na xíca tuun xihín Jesús. ¹⁵ Tá naxini

ñayivi yóho Jesús chí nacatontó ndihi na já nandava nihni na nasahan na cáhan Ndióxi ná xihín á. ¹⁶ Anda já nandaca tuhún Jesús na já cáchi a já xihín ná:

—Ndá saha ndítuhún ndó xihín na jan —nacachi a.

¹⁷ In da cándichi cán nanducú ñehe da tuhun nu Jesús já cáchi da já:

—Maestro, yóho ñehe e jahyi i nacasaa i nu ndó jáchi ndacaan in ínima quini ini da ta nandaja níhi ñahá ri. ¹⁸ Ndá nacuu tín rí da, jándacava rí da nu ñúhu ta já casahá cána cuyu chiquiñu yúhu dá ta cáhñá nuhu dá. Xihín ña yóho casahá jácuita rí da. Ta sa naxica i ñamaní nuú na xíca tuun xihín ndó ña ná tavá na mé ínima quini yóho joo coo nacuu caja na ña —nacachi da.

¹⁹ Já nacachi Jesús já xihín ná:

—Ndáhví nahá nacuu ndó jáchi sa cuahá ndivaha quivi ín i xihín ndo ta a ñaha candeé ini ndó yehe. Ta chí co ndeé ga ini i xihín ña cája ndó. Taxi ndó da loho jan chóho —nacachi a.

²⁰ Chí ñehe na da loho cán nasaa na nu Jesús. Ta tá naxini mé rí quini ndacaan ini da loho Jesús ivi laa nacaja rí ña ná quivi yihí da loho cán já tiví nuu da nandicava da nu ñúhu xihín chiquiñu cána yúhu dá.

²¹ Anda já nandaca tuhún Jesús tátá da cán já cáchi a já xihín dá:

—Á sanahá ndóho jahyún ña yóho —nacachi a.

Já nacachi tátá da cán já:

—Janda tá loho da cája rí já xihín dá.

²² Ta cuahá tañu chacaan rí quini da ini yávi núhu xihín ini ticuú viti ña cahní ñahá ri cuni ri. Ña cán quéa xíca tahví i nu ndó ña ná candáhví loho ini ndó ndehe ta chindeé ndó ndehe tá ta cuu caja ndó ña —nacachi da.

²³ Anda já cáchi Jesús já xihín dá:

—Cuu caja i ña tá cándúsún yehe. Jáchi cuu caja i tóco ndihi ñaha xihín ñayivi tá candeé ini na yehe —nacachi a.

²⁴ Ivi laa nacayuhú tátá mé da loho cán já cáchi da já:

—Cándusa vi joo chindeé ndó yehe ná candusa chaga i —nacachi da.

²⁵ Ta tá naxini Jesús ña nacasahá chutú cuahá ñayivi já nandicuehe mé á xihín mé rí quini cán já cáchi a já xihín ri:

—Ínima quini, rí nandaja níhi ta nandaja jóho da loho yóho, sáhdá i chuun nuun ña ná queún cuhun ta a ndícó coo gaún ndihvún ini da —nacachi a.

²⁶ Anda já nacayuhú cóhó rí quini cán já nasahní yihí tucu rí da. Chí naqueta rí cuahan rí ta najándacoo rí da loho cán tátuhun in ndii sahá ña cán quéa nacasáhá cáchí ñayivi ña sa naxihí va da jan. ²⁷ Joo natiin Jesús ndáha dá já nandiñehe a da. Ta já nandaca ndichi da cán.

²⁸ Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cáchí na já xihín á:

—Ndávahe coo nacuu caja ndehe tavá nde ínima quini nasandacaan ini da loho jan —nacachi na.

²⁹ Já nacachi Jesús já xihín ná:

—Tá cúní ndó tavá ndo tá ínima quini táhan rí yóho ndítahan cajuhun ndó ta cacá tahví ndo nu Ndióxi —nacachi a.

Cáxi tuhun tucu Jesús ndaja coo nuú quivi a

(Mt. 17:22-23; Lc. 9:43-45)

³⁰ Tá naquee na cuahan na nayaha na chí estado Galilea ta co cúní Jesús ña ná candaa ini ñayivi ³¹ jáchi jánaaha Jesús nuú na xíca tuun xihín á cúní a. Ta cáchí a xihín ná ña vaxi quivi ndiquiahva ñayivi mé á, da nachindahá Ndióxi nduu ñayivi ndahá ñayivi ta cahni ñahá na joo tá ná yaha uní quivi nditacu tucu a. ³² Joo coo nacandaa ini na ña cahan xihín ná ta yíhví na ndaca tuhún na mé á sahá tuhun cahan.

Ndicani Jesús ndá na cúu na ún chága saha
(Mt. 18:1-5; Lc. 9:46-48)

³³ Ta ndaja coo naxinu na ñuu Capernaum ta tá sa ndúu na vehe já nacasáhá ndaca tuhún Jesús na xíca tuun xihín á já cáchí a já xihín ná:

—Ndía ndítuhún ndó saha tá vaxi ndó íchi —nacachi a.

³⁴ Joo coo nanducú ñehe na cán tuhun nu á jáchi íchi nuú naquixi na nandítuhún cuaha ná saha ndá da cúu da cáhnu chága tañu mé ná. ³⁵ Anda já nasacoo Jesús já nacana ndíhuxu ivi da xíca tuun xihín á já nacasáhá cáchí a já xihín dá:

—Ndá ndó, na cúní cacuu na nu cuítí ndítahan ndaja núu ndó mé ndó cacuu ndó

na nu ndíhí ta caja ndíví ndo nu ndíhi na —nacachi a.

³⁶ Tá nandihí já nacana Jesús in da loho já nasacu a da mahnú nu ndúu na já nasañehe ndaa da já nacasáhá cáchí a já:

³⁷ —Ndá na ná ndiquehe vaha in da loho tátuhun da yóho sahá ña quíhvi ini na yehe, ndiquehe ri na yehe viti. Ta ndá na ndiquehe yehe, a juú in túhún yehe ndiquehe na vaha jáchi ndiquehe ri na tátá i, mé a nachindahá yehe —nacachi a.

Tá ndúu java na ndiquehe saha yo já quéa cuahan na xoo í

(Mt. 10:42; Lc. 9:49-50)

³⁸ Anda já nacachi Juan já:

—Maestro, naxini nde in dataa ta cahan da quivi mé ndó já tavá da ínima quini ñúhu ini ñayivi. Joo co xíca nuu da xihín yo sahá ña cán quéa nasaji nuu nde nu dá caja da ña —nacachi da.

³⁹ Joo nacachi Jesús já:

—A cáji nuu ndó nu dá jáchi tá cája in na ña xitúhún xihín quivi i já quéa a cuú caca nuu na cahan núu na sahá i. ⁴⁰ Jáchi ndá na co ndíndita caja xíxi xoho, mé na cán cuahan na xoo mí. ⁴¹ Ta ndá na ná quiahva in ñaha nu ndó vatí in yáxi ticuúí sahá ña ndícó ndó yehe mé a ndaa ná cahan i xihín ndo ña chahvi tá chahvi Ndióxi sahá ñamaní cája na xihín ndó —nacachi Jesús.

Tá jándacava ñayivi inga na nuú cuachi
(Mt. 18:6-9; Lc. 17:1-2)

⁴² Ta cáchí tucu Jesús já:

—Ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihí sahá na cahá tañuhú. ⁴³ Tá ndáha ndo quéa jándacava ndohó nuú cuachi chitúhún ndó a jáchi vaha chága ná cuhun ndó indiví xihín in túhún ndáha ndo a juú ga cuhun ndó xihín ndíví ndáha ndo indayá nuú co ndáhva ñúhu cáyi. ⁴⁴ Ta cán ni ticujú co xihí ni ñúhu cáyi co ndáhva. ⁴⁵ Tá saha ndo quéa jándacava ndohó nuú cuachi chitúhún ri ndó ña jan va jáchi vaha chága ná cuhun réncó ndó indiví xihín in túhún saha ndo a juú ga cuhun ndó xihín ndíví saha ndo indayá nuú co ndáhva ñúhu cáyi. ⁴⁶ Ta cán ni ticujú co xihí ta ni ñúhu cáyi co ndáhva. ⁴⁷ Tá nduchú núu ndó quéa jándacava ndohó nuú

cuachi tavá ndó ña jáchi vaha chága ná coo cóhó nuu ndó cuhun ndó nuú cacomí Ndióxi cuéntá saha ndo a juú ga ña ná coo ndíví nduchú núu ndo cuhun ndó indayá. ⁴⁸ Ta cán ni co xihí ticujú ta ni ñúhu cáyi co ndáhva.

⁴⁹ Tá quiahva ndíví jjuhún cuáán cája ñúhu cáyi quiahva já ndíví ínimá ñayivi xihín ña ndóho ini na. Ta tóco ndihi ñaha jóco na nu Ndióxi chícaan na ñi yívi na já co tívi a. ⁵⁰ Vaha va cája ñi jáchi xihín ñi ndihaji ña xíxi na joo tá co óhva ña já a cuú caja ohva tucu yó a já ná caja chúun tucú ña. Ndítahan nu ndóhó caja ndó tátuhun cája ñi ta já canduu víi xihín táhan ndó — cáchí Jesús.

10

Jánaha Jesús nuú na sa natandaha ña co ndítahan jándacoo táhan na

(Mt. 19:1-12; Lc. 16:18)

¹ Naquee Jesús ñuu Capernaum cuahan. Já nasahan estado Judea xihín ñundáhyi íin inga xoo yuta Jordán. Cán ñacasáha nanditaca tucu ñayivi nu á chí jánaha tucu a na tá quiahva ñacaan mé á cája. ² Anda já nacayati java na fariseo nu Jesús sahá ña coto ndojó ñaha na cuni na. Nacachi na já xihín á:

—Á núná nuú in dataa jándacoo da ñájíhi da —nacachi na.

³ Já nanducú ñehe Jesús tuhun nu ná já cáchí a já xihín ná:

—Ndaja cáchí ley Moisés ña ndítahan caja ndó —nacachi a.

⁴ Anda já nacachi na cán já:

—Tá ná quiahva in dataa in tutu nu ñájíhi da sahá ña cuni da jándacoo da ña já queá sahan ley Moisés ñamaní jándacoo da ña —nacachi na.

⁵ Anda já nacachi Jesús já xihín ná:

—Sahan ley Moisés ñamaní yóho nu ndo jáchi táhyi ndivaha ínimá ndo. ⁶ Joo janda mé saha tá nacavaha Ndióxi ñayivi nu cuítí já nacavaha in túhún taa xihín in túhún ñáha. ⁷ Sahá ña cán queá ndítahan nuú dataa jándacoo da tátá da xihín náná da já ndique táhan da xihín ñájíhi da. ⁸ Já xinu ndíví na cán cacuu na tátuhun in víxi yiquí cuñu na sahá ña cán queá co cúu

ga na ivi yiquí cuñu sahá ña nanduu na tátuhun in túhún yiquí cuñu. ⁹ Sahá ña cán queá co ndítahan nuú na cán janí táhan na ña najácátahan Ndióxi tá natandaha ná — nacachi Jesús xihín ná.

¹⁰ Ta tá nandicó coo tucu na vehe já ñacasáha tucu na xíca tuun xihín á cán ndáca tuhún na Jesús sahá ña nacahan.

¹¹ Ta nanducú ñehe Jesús tuhun nu ná já nacachi a já:

—Tá ná jándacoo in dataa ñájíhi da ta tándaha dá xihín inga ñáñáha já queá cája da cuachi nu ñájíhi nuú da jáchi íin da xihín inga ñáha. ¹² Ta tá ná jándacoo in ñáñáha yí ña ta tándaha ña xihín inga da cája ri ña cán va cuachi nu yí ña jáchi íin ña xihín inga dataa —nacachi Jesús.

Cája yíi Jesús na valí

(Mt. 19:13-15; Lc. 18:15-17)

¹³ Anda já ñehe na java na valí ñacasaa na nu Jesús ña ná cani ndaa ndáha á na. Joo mé na xíca tuun xihín á cán ñacasáha na cája cuehe na xihín mé na ndáca na valí cán.

¹⁴ Tá naxini Jesús ña cája na já nandicuehe a já cáchí a já xihín na xíca tuun xihín á:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁵ Mé a ndaa ná cahan i xihín ndo ndá na co cuni ndiquiahva na mé ná ndáha Ndióxi tátuhun cája na valí yóho já queá a cúu cacomí Ndióxi cuéntá saha ná —nacachi a.

¹⁶ Anda já ñacasáha Jesús ñehe ndaa na valí ta chínúu a ndáha á jini ná já cája yíi á na.

Cáhan in da cuicá xihín Jesús

(Mt. 19:16-30; Lc. 18:18-30)

¹⁷ Tá cuahan tucu Jesús íchi já xínu in dataa ñacasaa da nasaxítí da nu á já cáchí da já xihín á:

—Maestro, mé ndó cúu ndó taa vaha ña cán queá ndáca tuhún i ndóhó ndía ndítahan caja i já ná ñehe táhvi cuhun i indiví coo i anda ama cáa quivi —nacachi da.

¹⁸ Já nacachi Jesús já xihín dá:

—Ndá cuéntá queá cáchún xihín i ña cúu u da vaha. Ni in túhún toho ñayivi co cúu ná na vaha ñuyíví yóho. In túhún Ndióxi cuítí va queá vaha. ¹⁹ Sa xini vún ña sáhdá

Ndióxi nuun cajún já cáchi a já: “Coto a cóún xihín ñájíhí á yí ñani táhún. Coto a cáhnún ndii. Coto a cája cuíhnún. Coto a cáhún ña tuhún sahá ñayivi. Coto a jándahvún ñayivi. Ta caja cáhnún tátún xihín nánún” —ñacachi Jesús xihín dá.

²⁰ Já ñacachi da cán já:

—Maestro, janda tá ñasacuu u ña loho ñacasahá i cája i tóco ndihi ña sáhná Ndióxi caja i —ñacachi da.

²¹ Ñasandehé Jesús nu dá ta táhná ini a saha dá já ñacachi a já xihín dá:

—Inga ñaha cámaní cajún: Cuáhán jicún tóco ndihi ñahún jan ta ndacahndún jiuhún jan nuú na ndahví já ñehe táhvun coo cuahá ñahún indiví. Ta tá ñandihí já quisún candicún yehe —ñacachi Jesús.

²² Joo tá ñaxini johó da cuicá cán ña ñacachi Jesús ivi laá ñacavitá ini da já ñaquee cuéha dá cuahan da jáchi ín cuahá ndivaha ñaha da.

²³ Anda já ñacasahá sándehe Jesús nuú na xica tuun xihín a cán já ñacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná —ñacachi a.

²⁴ Chí ñacatóntó mé na xica tuun xihín á cán sahá tuhun ñacahan joo ñandicahan tucu Jesús já cáchi a já:

—Jahyi a, ndaja yáncá cáa sahá in na cándeé ini jiuhún ndiquiahva na mé ná ndáha Ndióxi ña ná cacomí a cuéntá saha ná. ²⁵ Jáchi janda cama chága cuu yaha in camello ini in yávi saha yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —ñacachi Jesús.

²⁶ Anda já ñacatóntó ndihi mé na xica tuun xihín á cán tá ñaxini johó na ña yóho. Já ñacasahá ndáca tuhún táhan na já cáchi na já:

—Ndá na cúu na cuu cacu ndaa ínima, dá já —ñacachi na.

²⁷ Ñandicoto nihni Jesús nu ná já cáchi a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha co íhvi toho nu Ndióxi —ñacachi a.

²⁸ Anda já ñacachi Pedro já xihín Jesús:

—Joo ndehe najándacoo ndihi nde ña ñasacomí nde ta ndíco nde ndohó —ñacachi da.

²⁹ Já ñanducú ñehe Jesús tuhun nu ná já cáchi a já:

—Mé a ndaa ná cahan i xihín ndo ña ndá na jándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi ná sahá yehe xihín sahá tuhun cahan i, ³⁰ na cán cúu na ñehe cuaha chága ví ñaha ñuyiví yóho jatá ña najándacoo na tátuhun vehe na, ñani na, quiahva na, náná na, jahyi na, ñundáhyi ná viti vatí ná ndicuítá ñayivi caja xixi na xihín ná. Joo ñehe táhvi ná catacu na anda ama cáa quivi xihín Ndióxi. ³¹ Ta ndúu cuahá na ín sahá ñuyiví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyiví yóho viti joo vaxi quivi cacuu na na ín saha nu Ndióxi —ñacachi a.

*Cáxi tuhun tucu Jesús ña quivi a
(Mt. 20:17-19; Lc. 18:31-34)*

³² Ta ndaja coo cuahan Jesús xihín na xica tuun xihín á chí íchi ndaa cuahan chí Jerusalén. Cánuu Jesús cuahan xihín ná. Ta ñacatóntó na cán ta yíhvi na cuahan na xihín á. Anda já ñatavá xóo tucu a ndihuxu ivi na xica tuun xihín á já ñacasahá cahan xihín ná ña ndoho a chága chí nuu. ³³ Já ñacachi a já:

—Candehé ndo. Yóho ndaa í cuahan yo chí Jerusalén nuú ndiquiahva na yehe, da ñachindahá Ndióxi nduu ñayivi ndahá na sacuaña nuú jutú xihín nuú na jánaha ley Moisés. Na yóho cúu na cacu ini sahá ndaja quivi i. Anda já ndiquiahva na yehe ndahá na tóho. ³⁴ Cuacu ndaa na yehe ta cani na yehe ta cuhna na tójíi na nuú i ta já cahní na yehe. Joo tá ná yaha uní quivi nditacu tucu u —ñacachi Jesús xihín ná.

*Tá ñaxica Jacobo xihín Juan ñamaní nu Jesús
(Mt. 20:20-28)*

³⁵ Anda já ñacayati Jacobo xihín Juan, jahyi Zebedeo nu Jesús já ñacachi da já xihín á:

—Maestro, cúní nde caça nde in ñamaní nu ndo —ñacachi da.

³⁶ Já ñacachi Jesús já xihín dá:

—Ndía maní cúní ndó caja i xihín ndo —
nācachi a.

³⁷ Já nācachi da cán já xihín á:

—Ñā xíca nde nū ndo quēa ná quiahva
ndó ñamaní nuú nde cacoo in in nde xoo
jín ndo. In nde coo xoo cuáha ta in nde
coo xoo íti jín mé ndó indiví nuú coo ndó
cacomí ndó cuéntá sahá ñayivi —nācachi
da.

³⁸ Anda já nācachi Jesús já xihín dá:

—Co cándaā ini ndó ñā xíca ndó nuú i. Á
cuu ndoho ini ndó tá quiahva ndítahan nuú
i ndoho ini i. Jáchi ñā vaxi nuú i ndoho ini
i cúu á tátuhun coho i in yáxi ndutá ova.
Á in tiahva ndó ndoho ini ndó tá quiahva
ndítahan nuú i ndoho ini i anda quiahva
ná quivi i —nācachi a.

³⁹ Já nācachi da cán já:

—Cuu caja nde ñā.

Já nācachi Jesús já xihín dá:

—Mé a ndaa tandaa quivi coho ndó ñā
ova ñūhu ini yáxi, mé ñā coho i. Ta tandaa
quivi ndoho ndivaha ini ndó tá quiahva
ndoho ini i anda quiahva ná quivi i. ⁴⁰ Joo
sahá ñā cacoo in ndó xoo cuáha i ta in
ndó xoo íti i a juú nuú i quiahva i ñā nū
ndo. Jáchi sa nādicaxi Ndióxi na ñehe
táhvi cacoo cán —nācachi Jesús xihín dá.

⁴¹ Tá naxinu joho uxu chága na xíca tuun
xihín Jesús cán ñā yóho já nācasáhá xójo
ini na xihín Jacobo xihín Juan viti. ⁴² Joo
nācana Jesús na já nācachi a já xihín ná:

—Sa xíní ndó ndaja cája na sáhdá chuun
nuú ñayivi ndúu ñuyíví yóho. Ñā cája
na quēa jácandíhi na ñayivi ta cája na tá
quiahva cúní mé ná. ⁴³ Joo co ndítahan coo
ñā cán tañu mé ndó jáchi ndá da cúní cacuu
da cáhnu chága tañu ndó xíní ñūhú cacuu da
in da cája ndíví nuú ndihi ndó. ⁴⁴ Ta ndá da
cúní cacuu taa nū cuítí tañu ndóhó ndítahan
cacuu da da cája ndíví nū ndihi ndó. ⁴⁵ Jáchi
ni yehe, da nāchindahá Ndióxi nduu ñayivi
coo nāquixi i ñuyíví yóho ñā ná caja ndíví
ñayivi nuú i. Ñā nāquixi i caja i quēa caja
ndíví i nū ná ta ndiquiahva i mí i quivi i já
ná cuu cacu ndaa ínimā cuahá ñayivi ná a
cūhun na indayá —nācachi a.

*Tá nandaja vaha Jesús in da cuáá naní
Bartimeo*
(Mt. 20:29-34; Lc. 18:35-43)

⁴⁶ Anda já naxinu na ñuu Jericó. Ta tá
sa naqueta tucu Jesús cuahan jatá ñuu cán
xihín na xíca tuun xihín á xihín cuahá ga
ñayivi ta mé yuhú íchi cán íin coo in da cuáá
naní Bartimeo, jahyi Timeo sáti da. ⁴⁷ Ta
tá naxini joho da ñā cáyati Jesús, da ñuu
Nazaret vaxi da já nācasáhá mé da cuáá
cán cáyuhú cóhó da já cáchi da já:

—Jesús, da nāquixi chichi David caja
ndó ñamaní candáhvi loho ini ndó yehe —
nācachi da.

⁴⁸ Joo nācasáhá cuahá ñayivi cája cuehe
na xihín dá ñā ná caji da yúhu dá. Joo ví ga
ví cáyuhú da já cáchi da já:

—Ndóhó, da nāquixi chichi David caja
ndó ñamaní candáhvi loho ini ndó yehe —
nācachi da.

⁴⁹ Anda já nādaça ndichi Jesús já
nācachi a já:

—Cana ndó da ná quixi da.

Já nācana na da cuáá cán já cáchi na já
xihín dá:

—A ndícani inún. Candichi jáchi cána
Jesús yohó —nācachi na.

⁵⁰ Anda já najácana da cotó ndeé da ta
nādaça ndichi da já nāsaā da nū íin Jesús.

⁵¹ Anda já nādaça tuhún Jesús da já cáchi
a já xihín dá:

—Ndía cúnun ná caja i xuhun.

Já nācachi mé da cuáá cán já:

—Candehé e cúní, xitoho.

⁵² Já nācachi Jesús já xihín dá:

—Cuu nuhu vún viti. Sa nāndivahún
jáchi nācandee inún yehe —nācachi a.

Chí ivi laá nādaça ndehé da cuáá cán. Já
nāndico da Jesús íchi cán cuahan da.

11

Ndihvi Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

¹ Tá naxinu na yati ñuu Jerusalén jín ñuu
Betfagé xihín ñuu Betania ñā ndique táhan
nuú xihín yúcu yitó Olivo já nāsañda Jesús
chuun nuú ivi da xíca tuun xihín á. ² Já
cáchi a já xihín dá:

—Cuáhán ndo ñuu loho ndácañ yati jan.
Tá ná xinu coo ndó jan ndiñehe ndó in
búrro ndico ndaa, rí cámaní yíi ndaa na.
Ndaxí ndó rí ta cañehe ndó rí quixi ndó.

³ Ta ndá na ná ndaça tuhún ndohó saha

ri já queá cachi ndó xihin ná ña xíní ñúhú xitoho ndó ri viti joo tá ná ndihi chuun rí já ndixi tucu rí, já cachi ndó xihin ná — ñacachi Jesús xihin da.

⁴ Ta ñaquee da cán cuahan da já ñandiñehe dá mé búrró cán ndíco ndaa rí jín yéhe yuhú íchi já ñandaxí da ri.

⁵ Ta ndaja coo java ña ndúu cán ñacasáhá cáchi ña já:

—Ndía cája ndó. Ndávaha ndaxí ndo búrró jana nde jan —ñacachi na.

⁶ Anda já ñanducú ñehe mé da xíca tuun xihin Jesús cán tuhun nu ná ta ñacachi da tá quiahva ñacachi Jesús xihin dá. Anda já ñañehe dá ñamaní cañehe da rí cuhun da.

⁷ Tá ñandihí já ñehe da búrró cán ñacasáa da nu Jesús já ñachojó da cotó ndéé da jata ri já ñandaa Jesús jata ri. ⁸ Ta cuahá ñayivi ñacasáhá ña chínduu na cotó ndéé ña íchi ta java na ñacasáhá ña sáhdá ña ndáha yító já chínduu na do íchi. ⁹ Ta ña cuahan chí nuu ta jári ña vaxí chí jata ñacasáhá ña cáyuhú ña já cáchi ña já:

—Cája cáhnu í Ndióxi. Ndicáhnu nahá ná cacuu da cómi cuéntá saha yo jáchi cúu dá da vaxí yuhú nuu Ndióxi. ¹⁰ Cáhnu ná coo quiví tá casáhá Ndióxi cacomí a cuéntá saha yo. Tá quiahva ñasacomí David, tátá yo cuéntá sahá ñayivi sanahá quiahva já cacomí mé á cuéntá saha yo. Cáhnu ná cacuu Ndióxi —cáchi ñayivi.

¹¹ Anda já ñandihvi Jesús ñuu Jerusalén ta já ñaxinu a veñuhu cáhnu cán. Ta tá ñandihí ñasandehé ndihi a níi xoo cán já ñaquee a cuahan chí ñuu Betania xihin ndíhuxu ivi ña xíca tuun xihin á jáchi sa nahini ta cuahan cuáa va.

Tá nachicaan Jesús cháhan jata titó ñuhú (Mt. 21:18-19)

¹² Tá ñaquee na Betania inga quiví itaan já ñacasáhá cuíco Jesús cuahan. ¹³ Tá ñaxini xíca a in titó ñuhú vaha dó ndoco ndáha. Ñasahan Jesús sádehé a á in cuíhi nu do joo coo rí ná ñehe a. Ndáha uun va dó cán in jáchi a juú tiempo coo rí cán queá. ¹⁴ Anda já ñacahan Jesús xihín titó ñuhú cán já cáchi a já xihin do:

—Ni in ga ña a cáxi ga cuíhi nu yóhó — cáchi a xihin do.

Ta ñaxini johó ña xíca tuun xihin á cán tuhun yóho.

Tá ñataxí Jesús ña ndúu jícó ñaha yéhe veñuhu

(Mt. 21:12-17; Lc. 19:45-48; Jn. 2:13-22)

¹⁵ Tá ñandihí já ñaxinu ña Jerusalén. Ta tá ñandihvi Jesús veñuhu cáhnu cán já ñacasáhá táxi a ña ndúu jícó cán xihín ña ndúu xéen viti. Ta ñaxicó ñehe a mesa na ndúu ndíjama jiuhún ñayivi ta ñaxicó ñehe a táyi sácoo ña ndúu jícó ndíjata. ¹⁶ Ta chí coo ñasahan ñamaní nuú ñayivi cañehe na ñaha ndihvi na veñuhu. ¹⁷ Anda já ñacasáhá jána ña nu ná já cáchi a já xihín ná:

—Já cáchi tuhun Ndióxi: “Vehe míi cacuu a vehe nuú quixi na caça tahví ña nuú i saha tóco ndihi ñayivi ñuyívi”, cáchi tuhun Ndióxi. Joo ndóhó ñandai cuu ndó yóho caja cuíhna ndo nuú ñayivi —ñacachi Jesús xihín ná.

¹⁸ Tá mé ña sacua ña nuú jutú cán xihín ña jána ña ley Moisés ñaxini johó na ña yóho já ñacasáhá ña ndúcú ña ndá quiahva cahni ña a jáchi yíhví ñahá ña sahá ña catóntó ndihi ñayivi xihín ña jána ña mé á nu ná. ¹⁹ Joo tá ñacuaá já ñaquee Jesús ñuu cuahan xihín ña xíca tuun xihín á.

Tá nahichi titó ñuhú, dó coo cuíhi nuu (Mt. 21:20-22)

²⁰ Ta naha chá inga quiví itaan ñayaha na nu cándichi mé titó ñuhú cán já ñaxini na ña nahichi do janda yóho do nahichi. ²¹ Anda já ñandicuhun ini Pedro saha mé titó ñuhú já cáchi da já xihín Jesús:

—Maestro, candehe ndó titó ñuhú, dó ñacahan cuehe ndó xihín. Sa nahichi dó viti —ñacachi da.

²² Já ñacachi Jesús já xihín dá:

—Candeé ini ndó Ndióxi. ²³ Jáchi mé a ndaa ná cahan i xihín ndo ña tá ná cachi ndó xihín yúcu yóho: “Caxoo ta cuahán jáquetún mún ini tañuhú”, ta tá coo cáhvi ivi johó ini ndó ta tá cándusa ndó coo tá in cáchi ndó ta chí já ndusa coo. ²⁴ Sahá ña cán queá cáchi i xihín ndo ña tóco ndihi ñaha xíca tahví ndó nu Ndióxi ta tá cándusa ndó ña sa ñañehe ndó a já queá ñehe ndusa ndó a. ²⁵ Ta tá ndúu ndó xíca tahví ndo nu Ndióxi xíní ñuhú caja cáhnu ini ndó saha ndá ña xójo ini ndó xihín já ná caja cáhnu

ri ini Ndióxi, tátá ndo ña íin indivi sahá cuachi ndó. ²⁶ Joo tá co cája cáhnu ini ndó sahá ñayivi já quea ni Ndióxi, tátá ndo ña íin indivi a cája cáhnu ini a sahá cuachi ndó —ñacachi a.

Tá nandaca tuhún na Jesús ña ndáchí quíxi ndéé á ña cája cuahá nuú ñaha
(Mt. 21:23-27; Lc. 20:1-8)

²⁷ Anda já nandicó coo tucu na ñuu Jerusalén. Ta tá xica Jesús chí veñuhu cáhnu cán já ñacayati na sacuahá nuú juu xihín na jánañá ley Moisés xihín na sacuahá veñuhu nu á. ²⁸ Já nandaca tuhún na Jesús já cáchí na já xihín á:

—Yo já sahan ñamaní nuun cajún ña cajún yóho —ñacachi na.

²⁹ Já ñacachi Jesús já xihín ná:

—Ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndo yo já nasahan ñamaní nuú i caja i ña cája i yóho. ³⁰ Cachi ndó xihín i yo já nachindahá Juan ña ná quixi da caja ndúta da ñayivi. Á Ndióxi nachindahá da, á ñayivi nachindahá ñahá. Nducú ñehe quí ndó tuhun nuú i viti —ñacachi Jesús xihín ná.

³¹ Anda já ñacasahá ndítuhún xihín táhan na cán já cáchí na já:

—Tá ná cachí ña Ndióxi quea nachindahá Juan ta já nducú nehe Jesús tuhun nu yo já cachi da xoho: “Ndá cuéntá quea coo ñaxeen ndó candúsa ndó da, dá já”, cachi Jesús xoho. ³² Ta tá ná cachí: “Ñayivi cúu na nachindahá Juan”, já ndicuita ñayivi xihín yo —ñacachi na ndítuhún xihín táhan na.

Já cáchí na jáchí yíhví na ñayivi jáchí tóco ndihi ñayivi ñacahán na saha Juan ña cúu dá da nachindahá Ndióxi jáyaha da tuhun cáhan mé á nuú ñayivi. ³³ Sahá ña cán quea ñacachi na já xihín Jesús:

—Co xini toho nde yo nachindahá Juan.

Anda já ñacachi a já xihín ná:

—Ta ni yehe a caxi tuhun i nu ndo yo já nasahan ndéé nuú i caja i ña yóho —ñacachi a.

12

Sácú Jesús quiahva sahá java mozo, da ñacaja quini xihín xitoho
(Mt. 21:33-46; Lc. 20:9-19)

¹ Anda já ñacasahá Jesús sácú a quiahva nuú ñayivi já ñacachi a já xihín ná:

—Ñasahin in dataa najándee cuaha dá tó uva nu ñúhu dá ta já ñasacu da in corra yíto nu do. Ta ñacavaha da in nuú cuhni mé uva cán ña cavaha vino. Ta ñacavaha da in nu jícó canúu da já cuu candaa da tóco ndihi dó cán.

² Tá nandihí já nasahan ndojó da ñúhu dá nuú java na caja chúun na ña já ñaquee da cuahan xicá da. ³ Ta tá ñaxinu tiempo jáquee na já nachindahá da in mozo da nuú na cája chúun ñúhu da cán ña ná ndiquiahva na ña cáni nu dá ndiquehe da saha ñúhu da ña nasahan ndojó da nuú na cán. ⁴ Joo mé na cája chúun tóo ñúhu cán ñatiin na mozo da cán já ñacani na da. Tá nandihí já nanducú ñehe na da nuú xitoho da joo coo ñaha ná sahan na nu dá. ⁵ Anda já nachindahá tucu mé da xihín ñaha ñúhu cán inga mozo. Joo da yóho ñacaja xixi tucu na xihín dá jáchí ñacani na da xihín yuu. Ta najándicuehe na jini dá já ñacasahá cáñahá na xihín dá. ⁶ Ta mé da xihín ñaha ñúhu cán nachindahá tucu da inga mozo da ta nasahní na da. Ta nachindahá cuahá ga da mozo da nasahan cán. Ta java da ñacani na ta java da nasahní na.

⁷ Ñacandoo in túhún jahyi mé da xihín ñaha ñúhu cán ta quíhví ndivaha ini da jahyi da. Joo tá nu ndihí já nachindahá da jahyi da jáchí cáhán da: “Cája i cuéntá coo toni ñúhú na xihín jahyi i”, ñacahán da. ⁸ Joo mé na cája chúun ñúhu cán ñacasahá ndítuhún xihín táhan na já cáchí na já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, ñacachi xihín táhan na cán. ⁹ Anda já ñatiin na da cán ta nasahní na da já najácana na yiquí cuñu da jata cútú cán —ñacachi Jesús.

¹⁰ Anda já nandaca tuhún Jesús ñayivi ndúu cán já cáchí a já:

—Á co xini ndó ndía caja da xihín ñaha ñúhu yóho viti. Ña caja da quea quixi da ta cahní ndihi da na cája chúun tóo nu ñúhu dá. Já ndiquiahva da ñúhu dá nuú java ga na já ná caja chúun na nu á.

10 'Á cō xíní ndó ña cáchí tūhun Ndióxi. Ña cáchí a quéa:

Mé yū ña najácana da cávaha vehe, ña cán cúu ña nanduu yū ndúhu sahá vehe ña iin chága saha.

11 Ña yóho quéa ñacaja Ndióxi ta cúu á in ñaha cáhnu ndivaha nu yō, cáchí tūhun Ndióxi —ñacachi Jesús.

12 Anda já ñacasáhá ndúcú na sacuaaha tiin na Jesús chicaoan na a vecaa jáchi ñacandaa ini na ña saha mé ná ñacacu a quiahva yóho. Joo sahá ña yihví na ñayivi najándacoo na a ta ñaquee na cuahan na.

Ndáca tūhún na Jesús á ndítahan nu ná chahvi na jūhún cuénta impuesto
(Mt. 22:15-22; Lc. 20:20-26)

13 Tá nandihí já ñachindahá na java na fariseo xihín na cúu cuénta Herodes nu Jesús ña ná coto ndojó ñahá na xihín tūhun cáhan mé á já ná chicaoan na cuachi jatá.

14 Anda já naxinu na nu Jesús já cáchí na já xihín á:
—Maestro, xíní nde ña ndinuhu ña ndaa cáhan mé ndó. Ta cō quéhe ndó cuénta tá cáhan núu ñayivi saha ndo. Ta cánda ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínimá ná. Ta cánda ini nde ña jánaaha ndó ña ndaa saha íchi cuénta Ndióxi. Ta viti cūni nde ndaca tūhún nde ndohó á ndítahan nuú nde chahvi nde jūhún cuénta impuesto nuú da cómi cuénta saha yō ñuu Roma. Á chahvi nde ña, á a chahvi toho nde ña —ñacachi na.

15 Joo sa ñacanda ini Jesús ña cō cúu ná tá quiahva ndáa na ña cán quéa ñacachi a já xihín ná:

—Cánda cáxi táhyí ini i ña cūni ndó coto ndojó cuití ndó yehe. Jánaaha ndó in táhan jūhún jan nuú i ná candehe e ña —ñacachi a.

16 Já ñasahan na mé jūhún cán nu á ta tá naxini a ña já ñacachi a já xihín ná:

—Yo ñahná ta yo quivi quéa ndaa nu á.

Já ñacachi na cán já xihín á:

—Ñehe a quivi xihín ñahná da cómi cuénta saha yō ñuu Roma —ñacachi na xihín á.

17 Anda já ñacachi Jesús já xihín ná:

—Ndiquiahva ndó ñaha da cómi cuénta saha ndó ñuu Roma jan nu dá. Ta

ndiquiahva ndó nu Ndióxi ña cúu ñaha mé á —ñacachi a.

Chí ñacatóntó mé na cán sahá ña ñacachi Jesús xihín ná.

Ndáca tūhún na saduceo Jesús á mé a ndaa nditacu ndii
(Mt. 22:23-33; Lc. 20:27-40)

18 Anda já ñasahan java na saduceo cáhan na xihín Jesús. Ta mé na saduceo yóho cō cándusa na ña ndítacu tucu na sa naxihí. Sahá ña cán quéa nandaca tūhún na Jesús já cáchí na já xihín á:

19 —Maestro, nu ley ñacahyi Moisés sanahá ñatahnda chuun ta cáchí a já: “Tá tándaha in dataa xihín ñájihí da ta tá cōo jahyi ñá cacu xihín dá ta tá ná xinu quivi quivi da cán já quéa cáchí ley Moisés ña ndítahan tándaha tucu ñájihí da xihín da cúu ñani mé ndii cán já ná cōo jahyi da cán xihín yuhú nuú ñani da”, já cáchí ley Moisés. 20 Ta viti cuni johō ndó ná cacu nde in quiahva nu ndó. Ñasahin usa ñani ta da nu cuití ñatandaha dá xihín in ñañáha. Tá nandihí naxihí da joo cōo jahyi da ná cacu xihín ñá cán. 21 Ta ñatandaha ñani da, da chí ivi xihín ña cuáan cán. Ta já naxihí ri da cán va ta ni da yóho cōo ñacacu jahyi xihín ñájihí ñani. Ta quiahva já ñandoho ri ñani da, da chí uní. 22 Anda quiahva naxinu ndihusa da ñatandaha xihín ña ta ni in da cōo ñacacu jahyi xihín ña. Tá nu ndihí naxihí ri mé va ñá. 23 Ta viti ndáca tūhún nde ndohó ndá da cacuu ndusa yí ñá cán tá ná xinu quivi nditacu tucu ndii jáchi ndihusa va ñani da cán ñatandaha xihín ñá —ñacachi na.

24 Anda já ñanducú ñehe Jesús tūhun nu ná já cáchí a já xihín ná:

—A váha toho cáhvi ini ndó jáchi cō xíní ndó ndaja cáhan tūhun Ndióxi ta ni cō xíní ndó ndá quiahva cáhnu cúu ndee Ndióxi. 25 Jáchi tá ná nditacu tucu ndii a tándaha ga na ta ni a quiahva na jahyi jíhí na tándaha ná. Cacuu na tátuhun tátō Ndióxi ndúu indiví ta cō tándahá na cán. 26 Joo sa xíní yō ña nditacu tucu ndii. Á a ñaha cahvi ndó ña ñacahyi Moisés sahá ña ñacahan Ndióxi xihín dá tañu tohíñú, dó cándaha ñúhu cán. Já ñacachi a já xihín dá: “Yehe cúu Ndióxi cája cáhnu Abraham ta yehe cúu Ndióxi cája

cáhnú Isaac ta yehe cúú Ndióxi cája cáhnú Jacob”, nācachi a. ²⁷ Ta ña yóho cúní cachi a ña tácu yí va Abraham xihín Isaac xihín Jacob vatí sa naxihí yiquí cuñu na. Sahá ña cán quéa cō xíní ndó ndá saha cáhan ndo — nācachi a.

Tá cáhan Jesús ndía cúú ña cáhnú chága sáhná Ndióxi caja í
(Mt. 22:34-40)

²⁸ Ta ndaja coo in da jánaha ley Moisés nācayati da nu Jesús jáchi sa naxini johó da ña nācahan Jesús xihín na ndúu cán. Sahá ña xíní da ña nanducú ñehe ndaa Jesús tuhun nuú na cán sahá ña cán quéa nācaça tuhún da Jesús já cáchi da já xihín á:

—Ndía cúú ña cáhnú chága sáhná Ndióxi caja í — nācachi da.

²⁹ Já nācachi Jesús já xihín dá:

—Ña cáhnú chága cúú ña cáchi tuhun Ndióxi yóho: “Taa johó ndó, na Israel. Ín in túhún jini Ndióxi ta mé á cúú xitoho í. ³⁰ Ta ndítahan quihvi ini ndó mé Ndióxi, xitoho ndó xihín tóco ndihi ínima ndo ta xihín ndinuhu ini ndó. Ta quihvi ini ndó a xihín tóco ndihi xíní túní ndo ta xihín tóco ndihi ndée ndo.” Ña yóho cúú ña nu cuítí sáhná Ndióxi caja ndó. ³¹ Tá cúní coo ña nu cuítí já cúní coo ri ña chí ivi va ta cáchi a: “Quihvi ini ndó ñani táhan ndó tá quiahva quihvi ini ndó mé ndó.” Cōó ga inga ña sáhná Ndióxi caja ndó cacuu ña cáhnú chága nuú ña yóho — nācachi a.

³² Anda já nācachi mé da jánaha ley Moisés cán xihín Jesús:

—Vaha chá nācahan ndó, Maestro. Mé a ndaa quéa nācahan ndo ña ín in tálaá cuítí Ndióxi ta cōó inga ga Ndióxi. ³³ Ta ndítahan quihvi ini mé á xihín tóco ndihi ínima yō ta xihín ndinuhu ini ta xihín tóco ndihi xíní túní yō ta xihín tóco ndihi ndée yō. Ta ndítahan quihvi ini ñani táhan í tá quiahva quihvi ini mí. Ndíyahvi chága ña yóho a juú ga tóco ndihi ñaha jóco na nu Ndióxi ta ndíyahvi chága ña a juú ga ñaha chícaan ñúhu ná nu náa — nācachi da.

³⁴ Tá naxini Jesús ña nanducú ñehe vaha da cán tuhun nu á já cáchi a já xihín dá:

—Jalóho cúní ña cacomí Ndióxi cuéntá sahn — nācachi Jesús.

Tá nandihí cán ni in ga na cōó nācahan ndeé ini na ndaça tuhún ga na mé á.

Ndāça tuhún na Jesús ndáchí naquixi a
(Mt. 22:41-46; Lc. 20:41-44)

³⁵ Ndācaan Jesús veñuhu cáhnú jánaha nuú ñayivi já cáchi a já xihín ná:

—Ndávaha cáchi na jánaha ley Moisés ña vaxi Cristo chichi David. ³⁶ Ta sa mé David tá nāchutú ndaa ini da xihín ínima yí Ndióxi já nācachi da já:

Já nācachi Ndióxi xihín xitoho í:

“Cacōo xoo cuáha í yóho, anda quiahva ná caja í ña ná cacomún cuéntá sahá na cō cúní yohó”, nācachi Ndióxi sanahá.

³⁷ Ndávaha cáchi na ña vaxi Cristo chichi David joo mé tiempo cán nācachi David ña cúú á xitoho da — nācachi Jesús.

Ta cuaha ndivaha ñayivi cáji íni na táa johó na nu cáhan Jesús.

Chícaan Jesús cuachi jatá na jánaha ley Moisés

(Mt. 23:1-36; Lc. 11:37-54; 20:45-47)

³⁸ Tá jánaha Jesús na já cáchi a já xihín ná:

—Cuéntá coo ndó xihín na jánaha ley Moisés jáchi cátóo na cándixi na jáhma nání caca nuu na. Ta cátóo na cahan toní ñúhú ndivaha ñayivi xihín ná tá xíca nuu na nuú yahvi. ³⁹ Ta tá cuahan na veñuhu cátóo na cacōo na nu sácōo na ín chága saha. Ta tá cuahan na víco nuú vaha cátóo na coo na. Cuéntá coo ndó xihín na yóho. ⁴⁰ Jáchi cándaa na vehe najihí cuaan ta tá nandihí cuahá ndivaha xíca tahvi na nu Ndióxi jáchi cúní na jájahvi na nuú ña núu cája na. Mé a ndaa ná cahan í xihín ndo ña mé na jánaha ley Moisés yóho cacuu na na ndoho chága ini caja Ndióxi — cáchi Jesús.

Ña najoco in ña cuaan ndáhví
(Lc. 21:1-4)

⁴¹ In tañu ín coo Jesús ini veñuhu cáhnú cán yati nu ín satō nu táan na jihún jóco na nu Ndióxi. Ta sándehe a ndá quiahva táan ñayivi jihún ini mé satō cán. Ta naxini a cuahá ta cuicá xínu cōo táan cuahá na jihún ini mé satō cán. ⁴² Ta mé já naxinu cōo in ña cuaan ndáhví ta nataán ña ivi jihún ña núu yahvi ini mé satō cán. ⁴³ Já nācana Jesús na xíca tuun xihín á ta já cáchi a já xihín ná:

—Mé a ndaa ná caḥan i xih̄in ndo ña cuaha chága j̄iuh̄un naṣaḥan ñá cuáan ndáhv̄i yóho a juú ga tóco ndihi java ga na cán. ⁴⁴ Jách̄i tóco ndihi na cán naṣaḥan na ña yójo nu ná joo ñá cuáan ndáhv̄i yóho naṣaḥan ñá nu Ndióxi tóco ndihi ña cómi ñá catacu ñá —naçachi a xih̄in ná.

13

Cáxi tuhun Jesús nu ná ña vaxi quivi ndihi sahá veñuhu cáhnu ñuu Jerusalén

(Mt. 24:1-2; Lc. 21:5-6)

¹ Tá naçee Jesús veñuhu cáhnu cán já naçachi in da xica tuun xih̄in a cán já:

—Maestro, candehe ndó ndaja náhnu yuu naçavaḥa na veñuhu yóho ta ndaja jícó ndivaḥa naçavaḥa na ña —naçachi da.

² Anda já naçachi Jesús já xih̄in dá:

—Mé a ndaa náhnu a joo ndá chuun cúu á jách̄i ni janda in yuu yóho a cándo jatá inga yuu jách̄i vaxi quivi tá nditan̄i ndihi ña yóho —naçachi a.

Ndicani Jesús ña coo tá ná cayati quivi ndihi saḥa ñuyivi

(Mt. 24:3-28; Lc. 21:7-24; 17:22-24)

³ Anda já naṣaḥan na cán yucu yito Olivo, ña xito ndaa táhan xih̄in veñuhu cáhnu cán. Ta tá in coo Jesús cán já na xinu Pedro xih̄in Jacobo xih̄in Juan xih̄in Andrés já naçahan jehé na xih̄in á já cáchi na já:

⁴ —Cúni nde ña ná çaxi tuhun ndó xih̄in nde ndá ama coo tóco ndihi ña yóho. Ta ndaja coo tá sa naçayati mé quivi cán —naçachi na.

⁵ Já naçachi Jesús já xih̄in ná:

—Cuéntá coo ndó ta a quiahva ndó ñaman̄i jándahvi ni in ñayivi ndohó. ⁶ Jách̄i cuahá ndivaḥa na quixi na cuéntá mí i ta caḥan na ña tuh̄un tá cachi na já xih̄in ndó: “Yehe cúu Cristo, da naçindahá Ndióxi cacomí cuéntá sahá ñayivi.” Ta xih̄in ña yóho cuahá ndivaḥa ñayivi jándahvi na.

⁷ Joo tá naçasáhá xini joho ndó ña yóho cáa cúu tondóho, a cáyhvi toho ndó jách̄i quiahva já ndítahan coo. Joo cámaní yii xinu coo quivi nu ndihí. ⁸ Jách̄i ñayivi ndúu in nación ndicuita na caní táhan na xih̄in na ndúu inga nación ta caní táhan na in ñuu xih̄in na inga ñuu. Ta quixi nditáan ndijáá nu ndúu ñayivi já xinu tama ndeé

ta já casáhá na ndivaḥa na. Ta tóco ndihi ña yóho cúu á tá çava sahá sahá ña núu vaxi nuú ñayivi jách̄i cámaní xinu coo chága nuú ndoho ini na.

⁹ Joo candaa vaḥa ndó mé ndó jách̄i ndiquiahva na ndohó ndahá na cómi chuun ta caní na ndohó ini veñuhu. Ta sahá yehe cañehe na ndohó nuú na cómi cuéntá sahá ñayivi xih̄in nuú na cúu jutixia ta já cuu caḥan ndó sahá i nuú na cán. ¹⁰ Joo jihna ñúhú xini ñúhú ndicuita nuu tuhun vaḥa saḥa mí i nu tóco ndihi ñayivi anda jávi ndihi saḥa ñuyivi yóho. ¹¹ Ta tá ná cañehe na ndohó cuhun ndó nuú na jutixia, a ndicani ini ndó sahá ndá tuhun caḥan ndó xih̄in ná. Mé hora já caḥan ndó ña quiahva Ndióxi nu ndó caḥan ndo. Jách̄i a juú jini mé ndó quixi ña caḥan ndo. Ínima yii Ndióxi cacuu ña quiahva tóco ndihi ña caḥan ndo. ¹² Ta java ta jicó tuh̄un da ñani da ta java da jicó tuh̄un da jahyi da ña ná cañí ñahá na. Ta cuaha ná ndicuita na caní táhan na xih̄in tátá na ta cañí ñahá na. ¹³ Ta ndaja táhan ñayivi ndúu ñuyivi yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na jan cacuu na çacu ndaa ínima.

¹⁴ Na cáhvi tutu ná candaa ini na ña caḥan. Daniel cúu da naçahyí sanahá sahá in ña quini ña jativí ñahá. Tá ná cuni ndó ña cándichi in a nuú co ndítahan coo a já ndítahan nuú na ndúu estado Judea cunu na cuhun na chí yucu. ¹⁵ Ta ndá na cánúu jini vehe mé quivi já co ndítahan nuu na tavá na ñaha vehe na. ¹⁶ Ta ndá na ndúu yucu co ndítahan ndicó coo na vehe na ndiquehe na jáhma ná. ¹⁷ Ndáhv̄i najihí, mé na ñúhu jahyi mé quivi já. Ta ndáhv̄i na ñehe ndaa na valí táhan ña chíchi yii. ¹⁸ Çaçá tahvi ndo nu Ndióxi ña ná a cacuu a tiempo vixi tá ná cunu ndó cuhun ndo já ná a ndóho chága ini ndó. ¹⁹ Jách̄i quivi ndoho ndivaḥa ini ndó cacuu a cán. Jách̄i janda tá naçava sahá saḥa ñuyivi coo nandoho ini na tá quiahva ndoho ini na mé quivi jan. Ta tá ná yaha ña jan, a ndicó coo ga ña ndoho ini na quiahva já. ²⁰ Ta tá ná a ndája cuítí Ndióxi tiempo yóho ni in ñayivi a cúu çacu ndaa. Joo naçacu ini a ndaja cuítí a mé

tiempo yóho jáchi quíhvi ini a tóco ndihi na naçaxi mé á.

²¹ Ta tá ná cachi in na xihin ndó: “Candehé ndo, yóho ín Cristo, da nachindahá Ndióxi cacomí cuéntá sahá ñayivi”, á tá ná cachi na: “Candehé ndo, cáa ín da”, cachi na já queá a cándúsa toho ndó na. ²² Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan na cuéntá Ndióxi ta jári caja na cuahá nuú ña náhnu xihín ña xituhún ña ná jándahvi na ñayivi. Ta anda na sa naçaxi Ndióxi jándahvi na tá ná cuu caja na ña. ²³ Xíni ñúhú candehé vaha ndó mé ndó jáchi sa naçaxi tuhun yachí ndihi i ña yóho xihin ndo —naçachi Jesús.

Ndaja coo tá ná xinu coo quivi quixi tucu Jesús

(Mt. 24:29-35,42,44; Lc. 21:25-36)

²⁴ Já cáchi tucu Jesús já:

—Joo tá sa nayaha tóco ndihi ña nandoho ini ñayivi já canaá nuú candii ta a ndíyehé ga yoo. ²⁵ Anda indivi quee quimi cuyu rí nu ñúhu ta quiji nuu indivi ña naçavaha Ndióxi. ²⁶ Anda já cuni na yehe quixi i tañu vico xihin tóco ndihi ndée cáhnu i, da nachindahá Ndióxi nduu ñayivi. Ta cuni na ndá quiahva cáhnu cúu yehe. ²⁷ Ta tá nandihí já chindahá i táto mí i ña ná jánditaca na na sa naçaxi i tañu tóco ndihi ñuu janda nú cúu sahá ñuyíví ta janda nú cúu sahá indivi.

²⁸ Catiahva ndó ña cuni cachi mé quiahva sácú u nu ndó sahá titó ñúhú. Tá yúta ndáha dó cán ta vaxi núma válí do já candaa ini ndó ña vaxi tiempo ihní. ²⁹ Ta quiahva já cacuu ña yóho tá ná cuni ndó yaha tóco ndihi ña yóho. Jáchi anda jáví candaa ini ndó ña naçayati tiempo quixi tucu yehe ñuyíví yóho. ³⁰ Mé a ndaa ná cahan i xihin ndó ña yaha tá yaha tóco ndihi ña naçachi i xihin ndo ta anda jáví quivi na ndúu tiempo viti. ³¹ Ta ndihi sahá indivi xihin ñuyíví joo a ndíhi toho sahá tuhun naçahan i xihin ndó yóho. Jáchi coo tá coo va ña.

³² Joo ni in túhún toho ñayivi co xini na ndá quivi á ndá hora yaha ña yóho. Ta ni mé táto Ndióxi ndúu indivi co xini na ndá

quivi coo ña yóho. Ta ni yehe, da cúu in túhún jini já jahyi Ndióxi co xini ndá quivi coo ña yóho. In túhún Ndióxi, tátá yo queá xini a.

³³ Sahá ña cán queá cañuhu ini ndó sahá ña yóho. Coo tiahva ndó ta caça tahví ndo nu Ndióxi jáchi co xini ndó ndá quivi xinu coo ña yóho. ³⁴ Jáchi ña yóho cúu á tátuhun in dataa quéta cuahan xicá joo tá cámaní quee da cuhun da jándacoo tóo da vehe da nu mozo da ña ná candaa na ña. Ta sahan da chuun caja in in mozo da. Ta nuú da ndáá yehé nasahnda da chuun ña ná candaa vaha da ña. ³⁵ Sahá ña cán queá xini ñúhú coo tiahva ndó jáchi co xini ndo ndá quivi xinu coo mé da cúu xitoho vehe. Co xini ndo á cacuu a tá naçuaá tóo á cacuu a java ñuu táji á cacuu a tá naçana chéle á cacuu a tá sa nativi. ³⁶ Cuéntá coo ndó. A juú tiahva náá xinu coo da ta ndiñehé dá ndohó ndúu ndó quiji ndo. ³⁷ Ña cahan i xihin ndó cahan i xihin ndihi na: Xíni ñúhú coo tiahva ndó sahá mé quivi quixi tucu u —naçachi Jesús.

14

Ndítuhún jehé na tiin na Jesús

(Mt. 26:1-5; Lc. 22:1-2; Jn. 11:45-53)

¹ Tá cámaní ivi quivi caja na vico pascua xihin vico tá xixi na pan ña co quee yusá naçaa xihin já naçasáhá na saçuahá nuú jutú xihín na jánahá ley Moisés ndúcú na ndá quiahva caja na tiin jehé na Jesús já cuu cahní na a. ² Ta já cáchi xihin táhan na:

—A tiin toho í da mé vico jáchi tiahva náá ndivaa ñayivi —naçachi na.

Tá nachojo in ñañáha perfume jini Jesús

(Mt. 26:6-13; Jn. 12:1-8)

³ Ta ndaja coo ín Jesús ñuu Betania vehe Simón, da cahan na xihin: taa nandoho cuehe táhyi. Ta naní ndúu coo na nu mesa cán naçinu in ñañáha ta ñehe ña in yúyú alabastro nachutú jini a xihin perfume, dó támi ndivaha sahan ta cúu dó perfume yahvi ndivaha. Ta natahví ña yóho mé yúyú cán já nachojó ña do jini Jesús. ⁴ Ta java na ndúu cán naçasáhá na jáa ná xihin ña já naçasáhá cáchi xihin táhan na já:

—Ndávaha nativi uun perfume yóho.

⁵ Coo jicó yó do, nduu ta yaha ga nuú

uni ciento denario quehé saha dó ta xihín jiuhún cán cuu chindeé yó nā ndahví, nduu —cáchi nā.

Sahá ñā cán quéa naxojo ini na xihín ñáñáha cán ta naxahan núu na saha ñā.

⁶ Anda já naxachi Jesús já xihín ná:

—A cahan ndó xihín ñā. A jáquihvi ndó ñā. Ñā vaha quéa naxaja ñā yóho xihín i.

⁷ Jáchi nā ndahví níi tiempo canduu na tañu ndó ta cuu caja ndó ñā vaha xihín ná ndá tañu cúní mé va ndó joo yehe a cóo tuun toho i xihín ndo. ⁸ Mé ñā yóho naxaja ñā janda nuú naxinu ndée ñā caja ñā xihín i. Sa najándicuchu yachi va ñā yóho yiquí cuñu i xihín perfume, dó támi sahan jan ñā ná coo tiahva vi tá ná casa quivi nduxu.

⁹ Mé a ndaa ná cahan i xihín ndo ní cúu ñuyiví nuú caca nuu ñayivi cahan na tuhun vaha saha mí i já quéa ndicani na ñā naxaja ñā yóho xihín i já ndicuhun ini na saha ñā —naxachi a.

Jícó túhún Judas Jesús

(Mt. 26:14-16; Lc. 22:3-6)

¹⁰ Ta ndaja coo in táhan da uxu ivi xica tuun xihín Jesús, da naní Judas Iscariote nasahan da cahan da xihín na sacuaña nuú jutú. Já nasahan da tuhun da nuú nā cán ñā ndiquiahva da Jesús ndáha ná. ¹¹ Tá naxini johó nā cán ñā naxachi da xihín ná naxavatá nā ta nasahan na tuhun na nu mé Judas ñā quiahva na jiuhún nu dá. Ta sa mé nani já naxasáhá Judas ndúcú da ndaja cuu caja da ndiquiahva da Jesús nu ná.

Tá naxijini ndayí Jesús xihín nā xica tuun xihín á

(Mt. 26:17-29; Lc. 22:7-23; Jn. 13:21-30; 1 Co 11:23-26)

¹² Mé quivi nuú víco pascua tá xíxi na pan ñā co quée yusá naxaa xihín já sáhní nā ndicachi válí jóco nā nu Ndióxi. Já nandaca tuhún nā xica tuun xihín Jesús mé á já cáchi nā já xihín á:

—Ndáchi cúní ndó cuhun nde caja ndíví nde cajíní ndó víco pascua —naxachi na.

¹³ Anda já naxindahá Jesús ivi da xica tuun xihín á já cáchi a já xihín dá:

—Cuáhán ndó ñuu jan jáchi jan ndiñehe ndó in dataa ñehe da in yoo ticuiví ta candico ndó da cuhun ndo. ¹⁴ Tá ná xinu da vehe nuú ndihvi da já cachi ndó xihín da

cúu xitoho vehe cán já: “Da jánaha ndehe cáchi xuhun: Ndáchi in nuú coo i cajíní i vicó pascua xihín nā xica tuun xihín i.”

¹⁵ Anda já jánaha mé da cán in cuarto cáhnu ñā cánúu jiní vehe piso ñinu. Sa in tiahva va ñā. Cán caja ndíví ndo ñā cajíní —naxachi Jesús xihín ná.

¹⁶ Já naquee mé nā xica tuun xihín Jesús cán cuahan nā ta tá naxinu nā ñuu cán nasahin tá in cáchi Jesús xihín ná. Já naxaja ndíví nā ñā cajíní na vicó pascua mé cán.

¹⁷ Tá naxuaá naxinu Jesús xihín ndihuxu ivi nā xica tuun xihín á. ¹⁸ Ta tá ndúu coo na nu mesa xíxi nā já naxachi Jesús já xihín ná:

—Mé a ndaa ná cahan i xihín ndo ñā in táhan ndó, da ndúu coo xíxi xihín i nu mesa yóho cacuu da jicó túhún yehe —naxachi a.

¹⁹ Anda já naxasáhá nā cán cácuéha ini na já naxasáhá tá in tá in na ndaca tuhún nā mé á já cáchi nā já xihín á:

—Á yehe cacuu da jicó túhún mé ndó.

Já naxachi inga tucu da já:

—Á a juú yehe cacuu da.

²⁰ Anda já naxachi Jesús já:

—In táhan ndó da cúu uxu ivi, da in ndúu xíxi xihín i ini cohó i, da cán cúu da jicó túhún yehe. ²¹ Yehe cúu da naxindahá Ndióxi nduu ñayivi ta ndítahan nuú i quivi i tá in cáchi tuhun Ndióxi. Joo ndáhví nahá naxuu da jicó túhún yehe. Janda vaha chága ná a cácu da, nduu —naxachi a.

²² Nani xíxi na ndúu na natiin Jesús pan já nandiquiahva ndixahvi nu Ndióxi. Tá nandihi nasahnda java ñā ta nasahan ñā nu ná já cáchi a já xihín ná:

—Juhun ndó jáchi ñā yóho cúu tátuhun yiquí cuñu i —naxachi a.

²³ Tá nandihi natiin a in vaso nu ñúhu tó uva já nandiquiahva ndixahvi nu Ndióxi. Ta nasahan mé á do nuú nā cán ta tá in tá in na naxihi na do. ²⁴ Já naxachi a já xihín ná:

—Dó yóho cúu dó tátuhun níi i, dó cuita sahá cuahá ñayivi. Tá ná cuita níi i já candaa ini ndó ñā najaxinu coo Ndióxi tuhun a nasahan sanahá. ²⁵ Mé a ndaa ná cahan i xihín ndo ñā a cóho ga i tó uva janda quiahva ná xinu coo quivi coho tucu u

inga dó vaha chága tá ná xinu quivi cacomí Ndióxi cuéntá sahá ñayivi —ñacachi a.

Cáxi tuhun Jesús ña chijehé tuhun Pedro ña xini da mé á

(Mt. 26:30-35; Lc. 22:31-34; Jn. 13:36-38)

²⁶ Tá nandihí naxita na in canto já ñaquee na cuahan na yucu yitó Olivo.

²⁷ Anda já ñacachi Jesús já xihin ná:

—Tóco ndihí ndó jándacoo ndó yehe ñuú viti jáchi já cáchi tuhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cuhun ri”, cáchi tuhun Ndióxi. ²⁸ Joo tá nandihí nditacu tucu u ta já cuhun jihna ñuhú yehe estado Galilea anda já cuhun mé ndó —ñacachi a.

²⁹ Anda já ñacachi Pedro já xihin Jesús:

—Vatí ná jándacoo ndihí na mé ndó joo a jándacoo toho i ndohó —ñacachi da.

³⁰ Anda já ñacachi Jesús já xihin dá:

—Mé a ndaa ná cahan i xuhun mé ñuú viti tá camaní cana ivi chéle já chijehé tuhún ña xínun yehe uní tañu —ñacachi a.

³¹ Já ñacasáhá ndúcú ndéé Pedro cáhan da já cáchi da já:

—Vatí ná quivi i xihin ndo joo a chíjehé tuhun toho i sahá ña xini i mé ndó —ñacachi da.

Ta mé quiahva já ñacachi ndihí na cán xihin á.

Tá xica tahví Jesús tañu yitó olivo nani a Getsemani

(Mt. 26:36-46; Lc. 22:39-46)

³² Anda já naxinu na cán in nuú nani Getsemani já ñacachi Jesús já xihín na xica tuun xihin á:

—Yóho cacoo ndó nani ná cuhun i cáa caça tahví i nu Ndióxi —ñacachi a.

³³ Ta ndáca Pedro xihin Jacobo xihin Juan cuahan xihin á. Ta ndaja coo ñacasáhá cácuéha ini a ta a juú quiahva táhvi ini a. ³⁴ Já ñacachi a já xihin ná:

—Cácuéha ndivaha ini i chí quivi i cúu ini i. Yóho candoo too ndó ta coto a cúju ndo —ñacachi a.

³⁵ Anda já ñaquee Jesús cuahan chága chí nuu já ñacaxítí a janda quiahva naxinu coo nuu á nu ñuhu cán. Já naxica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuu. ³⁶ Já cáchi a já xica tahví a nu Ndióxi:

—Tátá Ndióxi, tóco ndihí ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuu i ndoho i. Joo ná coo tá in cuni mé ndó ta ná a cóo toho ña cuni yehe —ñacachi a.

³⁷ Anda já nandicó coo a nu ndúu na xica tuun xihin á cán ta já nandiñehe á na quiji na ndúu na. Já ñacasáhá cáchi a já xihin Pedro:

—Á quiji vún, Simón. Á coo ñacuu candidún ni in hora. ³⁸ Xini ñuhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cuni a ndinducú a Ndióxi joo yiquí cuñu na co in tiahva caja ña cuni Ndióxi —ñacachi a.

³⁹ Anda já ñaquee tucu a cuahan caça tahví a nu Ndióxi. Ta sa mé tuhun ñacahan nu cuítí cán ñacahan tucu a chí ivi. ⁴⁰ Ta tá nandicó coo a nandiñehe tucu a na xica tuun xihin á cán ndúu na quiji na jáchi ñaquehe a mahnú na. Ta chí co xini na ndá tuhun nducú ñehe na nu Jesús sahá ña quiji na. ⁴¹ Tá nandicó coo a táhndá uní já ñacachi a já xihin ná:

—Vatí cuni ndó cuju ndo ta vatí cuni ndó ndiquehe ndéé ndo joo a cúu caja ndó ña viti. Jáchi sa naxinu coo hora ndiquiahva na yehe, da ñachindahá Ndióxi nduu ñayivi ndahá ñayivi cája cuachi. ⁴² Cuahán ndacoo ndó ná cohó. Jáchi sa vaxi da jícó túhún yehe —ñacachi a.

Tá natin na Jesús

(Mt. 26:47-56; Lc. 22:47-53; Jn. 18:2-11)

⁴³ Ta nani cáhan yij va Jesús cándichi a já naxinu Judas, da cúu in táhan da uxu ivi xica tuun xihín Jesús cán. Ta xihin mé da cán vaxi cuahá ñayivi ñehe na machiti xihin yitó viti. Mé na vaxi cán cúu ná na vaxi cuéntá na sacuahá nuú jutú xihín nuu na jánaha ley Moisés xihín nuu na sacuahá veñuhu. ⁴⁴ Ta mé Judas, da ndiquiahva mé á nuú na cán sa ñacandoo da xihín na cán ña tatí yuhu dá sajóho Jesús jáchi ñacachi da já xihin ná:

—Mé da ná tatí yuhú u sajóho, da cán cúu dá tiin ndó ta cató tuun ndó da cañehe ndó cuhun ndo —ñacachi da.

⁴⁵ Ta tá naxinu da cán chí ivi laá ñacayati da nu Jesús já cáchi da já xihin á:

—Maestro, maestro.

Já natatí yúhu dá sajóho a. ⁴⁶ Anda já natiin tuun na Jesús.

⁴⁷ Joo in táhan da xíca tuun xihín Jesús cán natavá da machiti da já nachitúhun dá in johó da cúu mozo da sacuaḥa nuú jutú cán.

⁴⁸ Anda já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín ta cuíhná jáchi naqueta ndó vaxi ndó tiin ndó yehe xihín machiti ta xihín yító.

⁴⁹ Ndijáá ní quivi nasahin i tañu ndó jan ta najánaḥa i ndohó ini veñuhu cáhnu ta ni in tañu coó natiin ndó yehe. Joo tóco ndihi ña yáha yóho xíní ñúhú yaha ña já ná xinú coo nuú ña nacahyi sahá i ini tuhun Ndióxi —nacachi a.

⁵⁰ Anda já naxinu ndihi na xíca tuun xihín Jesús cán cuahan na ta najándacoo na mé á.

Tá naxinu in datacú cuahan da

⁵¹ Joo in datacú catíví da in túhún jiní sávana ndíco da jatá na cán cuahan da ta natiin na da. ⁵² Joo najaní da mé dá ta nacandoo sávana da já naxinu lahla da cuahan da.

Nasacu na Jesús nuú nataca ndihi na sacuaḥa

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Anda já nasañehe na Jesús nasahan na nuú da cúu sacuaḥa chága nu ndíhi jutú. Ta nandique táhan tóco ndihi na sacuaḥa nuú jutú xihín na sacuaḥa veñuhu xihín na jánaḥa ley Moisés. ⁵⁴ Ta nasandico xíca Pedro Jesús anda quiahva naxinu da yéhe vehe da cúu sacuaḥa chága nu ndíhi jutú cán. Já nasacoo da xihín da ndáá veñuhu cáhnu cán xitúní da yati yávi núhu cán.

⁵⁵ Ta na sacuaḥa nuú jutú xihín tóco ndihi na cómi cuéntá sahá na Israel nataca na cán ndúcú na cuachi jácana na jatá Jesús já cuu cahní ñahá na. Joo coó cuachi jíquí ná ñehe ná chínúu na jatá mé á. ⁵⁶ Ta cuaha ná nacasáhá cáhan na ña tuhún saha Jesús joo coo xínu tuhun cáhan na jáchi a cuú ndique táhan vaha tuhun na. ⁵⁷ Ta nandaca ndichi java da cáhan da tuhun jíquí saha Jesús já cáchí da já:

⁵⁸ —Naxini johó nde nacachi da jan já: “Jánditani i veñuhu cáhnu cán, ña nacavaḥa ñayivi ta tixi uní quivi jácandichi tucu u inga ga ña a cuú cavaḥa ndahá ta” —nacachi da.

⁵⁹ Joo ni já coó nacuu ndique táhan tuhun na xihín ña nacachi na cán.

⁶⁰ Anda já nandaca ndichi mé da cúu sacuaḥa chága nu ndíhi jutú tañu na cán já nandaca tuhún da Jesús já cáchí da já xihín á:

—Á chí a ndúcú ñehún tuhun nuú nde sahá cuachi jácojo na jatun —nacachi da.

⁶¹ Joo coó nacahan Jesús ni in tuhun xihín ná já táji ní já va nasahin a. Mé da cúu sacuaḥa chága nu ndíhi jutú cán nacasáhá ndáca tuhún tucu da a já cáchí da já xihín á:

—Á jivi ndusa yóho cúun Cristo, da cúu in túhún jiní já jahyi Ndióxi yíi, mé da nachindahá Ndióxi cacomí cuéntá sahá ñayivi —nacachi da.

⁶² Anda já nacachi Jesús já:

—Ajan, jivi yehe cúu dá. Ta vaxi quivi tá cuni ndó yehe, da nachindahá Ndióxi nduu ñayivi cacoo i xoo cuáha Ndióxi, mé a in cuaha ndée. Ta já cuni ndó yehe ndicó coo i ñuyívi yóho tañu vico tá ná quixi i chí indivi —nacachi a.

⁶³ Anda já nandatá da cúu sacuaḥa chága nu ndíhi jutú jáhma da ña ná candaḥa ini ñayivi ña xójo ini da. Já cáchí da já:

—Ndá chicuu chága yó ñayivi ndicani nu yo. Xihín ña nacahan da yóho candaḥa iní ña ndája núu da Ndióxi. ⁶⁴ Á sa naxini johó ndó ña ndája núu da Ndióxi xihín tuhun nacahan da. Ndaja xíní ndó caja í xihín dá viti —nacachi da.

Anda já nandique táhan tuhun ndihi ñayivi ña ndácaan cuachi nu Jesús ña cán quea ndítahan quivi a.

⁶⁵ Java na nacasáhá na xihnu ndaa na tójí nu á ta java na nachicaji na jáhma nu á já nacasáhá cáni na jahnda nuu á já ndáca tuhún ñahá na já cáchí na já xihín á:

—Cahan xihín nde yo nacani yohó viti —nacachi na.

Ta janda na ndáá veñuhu cáhnu cán viti nacasáhá cáni na jahnda nuu á.

Tá naxijehé tuhun Pedro ña xini da Jesús (Mt. 26:69-75; Lc. 22:56-62; Jn. 18:15-18, 25-29)

⁶⁶ Ta ndaja coo Pedro íin yijí dá xítúni da cán já naxinu in ñá cája chúun xihín da cúu sacuahá chága nu ndíhi jutú. ⁶⁷ Já naxini ñá xítúni Pedro ta nahá vaha nasandehé ñá nu dá já cáchí ña já:

—Yóhó cúun táhan da xica tuun xihín Jesús, da ñuu Nazaret —ñacachi ñá.

⁶⁸ Joo naxijehé tuhun da ña xini da Jesús já cáchí da já:

—Uhun. Co xini toho i da ta co xini toho yehé ndá saha cáhun —cáchí Pedro.

Anda já nacayati da yuyehé ta ivi laa nacana chéle. ⁶⁹ Tá naxini mé ñá cája chúun xihín da cúu sacuahá chága nu ndíhi jutú cán ña nasandichi too da yehé cán já nacasáhá ña cáxi tuhun ña xihín tóco ndihi ñayivi ndúu cán já cáchí ña já:

—Candehé ndó. Da caa cúu in táhan da xica tuun xihín Jesús —ñacachi ñá.

⁷⁰ Nacachi tucu Pedro ña co xini da Jesús. Chá va nayaha ña yóho ta já nacachi na ndúu xítúni cán xihín Pedro:

—Táhan ri da caa va cúu yóhó jáchi cúun da Galilea ta cáhun tátuhun cáhan na cán —ñacachi na.

⁷¹ Anda já nacasáhá Pedro canahá da ta natavá da quivi Ndióxi ña co xini da Jesús já nacachi da já:

—Ni co xini mí i ndá taa cúu da jan, da cáhan ndó saha jan —ñacachi da.

⁷² Tá nacachi da já ivi laa nacana chéle ña chí ivi. Anda já nandicuhun ini Pedro ña nacachi Jesús xihín dá tá nacachi a já: “Tá camaní cana ivi chéle sa chíjehé tuhún ña xínun yehé uní tañu.” Tá nandicuhun ini Pedro ña yóho já nacasáhá sácu ndivaha da.

15

Tá nandiquiahva na Jesús ndáha Pilato (Mt. 27:1-2, 11-14; Lc. 23:1-5; Jn. 18:28-38)

¹ Tá nativi inga quivi itaan já nandique táhan na sacuahá nuú jutú xihín na sacuahá veñuhu xihín na jánahá ley Moisés xihín ndihi na cómi cuénta saha na Israel. Já nacató na Jesús ñehe na a cuahan na já nandiquiahva na mé á nu Pilato. ² Ta mé

Pilato nandaca tuhún da Jesús já cáchí da já xihín á:

—Á mé a ndaa cúun in rey, da cómi cuénta saha na Israel.

—Ajan. Jivi cúu u tá quiahva cáchí ndo jan —ñacachi Jesús xihín dá.

³ Ta najácojo na sacuahá nuú jutú cán cuahá cuachi jata Jesús. ⁴ Já nandaca tuhún tucu Pilato Jesús já nacachi da já xihín á:

—Ndavaha co ndúcú ñehún tuhun nuú i. Candehé ndaja cuahá nuú cuachi jácojo na jatun —ñacachi da.

⁵ Joo ni in tuhun coo nacahan Jesús. Tá naxini Pilato ña co ndúcú ñehe Jesús tuhun já nacatontó da saha ña cája.

Sácu ini na saha Jesús ndaja caja na ña ná quivi a

(Mt. 27:15-31; Lc. 23:13-25; Jn. 18:38-19:16)

⁶ Tañu mé víco pascua nasahin costumbre Pilato ña janí da in da ndacaan vecaa. Ndá da cuni ñayivi janí da, da cán cúu da janí da. ⁷ Ta ndaja coo mé já ndacaan in da naní Barrabás vecaa xihín java ga da naxica xihín dá. Ndacaan da vecaa saha ña nasahní da ndii tá nandivaa ñayivi. ⁸ Chí naxinu ñayivi nu Pilato já nacasáhá na cáhan na xihín dá ña ná caja da tá quiahva sá caja da. ⁹ Joo nandaca tuhún Pilato na já cáchí da já:

—Á co cuni ndó ña ná janí i da cúu rey nuú ñayivi Israel yóho —ñacachi da.

¹⁰ Nacachi Pilato ña yóho jáchi xini da ña nandiquiahva na sacuahá nuú jutú cán Jesús nu da saha ña cáhiví ini na xihín á.

¹¹ Joo na sacuahá nuú jutú cán nacasáhá na jándinihi na ñayivi ña ná cachi na xihín Pilato ña ná janí da Barrabás. ¹² Tá nandihí já nandaca tuhún Pilato na já nacachi da já xihín ná:

—Ndía cuni ndó caja i xihín da cáchí ndó cúu rey nu ndóhó, na Israel —ñacachi da.

¹³ Anda já nanducú ñehe ñayivi cán tuhun nu Pilato já cáchí na já xihín dá:

—Cata caa ndó da ndica crúxu.

¹⁴ Já nacachi Pilato já xihín ná:

—Ndá cuachi nacaja da, vaha.

Joo ví ga ví cáyuhú cóhó na já cáchí na já:

—Cata caa ndó da ndica crúxu.

15 Ta sahá ña cuni Pilato candoo vaha da nuú ñayivi najani da Barrabás. Ta tá nandihí najacaxáhan na Jesús já nandiquiahva da a ndáha na cuhun cata caa ñahá na ndica crúxu.

16 Anda já ñéhe soldado Jesús cuahan na yuyéhe vechúun cán. Já najánditaca soldado cán java ga táhan da. 17 Já nachinúu na in jahma cuhá túun jatá Jesús ta nachinúu na in tiyivi íñu jini á. 18 Tá nandihí já nacasáha na cáyuhú na já cáhí na já:

—Cáhnú nahá ná cacuu yóhó, da cúu rey nuú na Israel —cáhí na sácu ndaa ñahá na.

19 Tá nandihí nacasáha cáni na yiquí jini a xihín in ndoo ta nacasáha na xihnu ndaa na tójií na nuú á já nacasáha na cáxítí na nuú á ña cája na tátuhun cája cáhnú na a. 20 Tá nandihí nasacu ndaa na a já natavá na jáhma cuhá túun ña nasanúu jatá. Ta najándaca ndixi na a xihín jáhma mé á já nasáñehe na a cuahan na cata caa na a ndica crúxu.

Tá nacata caa na Jesús ndica crúxu

(Mt. 27:32-44; Lc. 23:26-43; Jn. 19:17-27)

21 Tá ñéhe na Jesús cuahan na cata caa na a ndica crúxu já nandique táhan na xihín in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúu tátá Alejandro xihín Rufo. Já nacaja ndúsa ná xihín dá ña ná ndicojo da crúxu nuú cata caa na Jesús.

22 Já nasáñehe na Jesús nasahan na in xiquí naní Gólgota. Tuhun yóho cuni cáhí a: nuú ndúu lásá yiquí jini ndii. 23 Cán nasahan na vino nuú Jesús, dó nacava táhan xihín jusa ña naní mirra. Joo coó naxeen toho a coho a do. 24 Anda já nacata caa na a ndica crúxu. Já nacasáha soldado cán sájiquí da saha jáhma Jesús ta nacachi xihín táhan da ña ndá da ná quee vaha cuu quehe in in jáhma Jesús.

25 Ta cúu á tátuhun caa in naha tá nacata caa na Jesús ndica crúxu cán. 26 Ta jini ndica crúxu cán nacahyí na ndá sahá nacata caa na a ta já cáhí a já: “Da yóho cúu rey nuú na Israel.” 27 Ta sa mé já nacata caa na ivi ta cuihná xihín Jesús: in da xoo cuáha ta in da xoo íti. 28 Ta xihín ña yóho naxinu coo tuhun Ndióxi tá cáhí a já: “Taño ta quini nasacu na a.”

29 Chí cáva jini mé ñayivi yáha cán cánahá na xihín á já cáhí na já:

—Candehé. Yóhó cáhún ña jánditanun veñuhu cáhnú cán ta tixi uní víxí quivi cáhún jácandichi tucún ña. 30 Jáca cu mún. Cuahán nuu ndica crúxu jan —nacachi na sácu ndaa ichi na.

31 Ta quiahva já cája na sacua ha nuú jutu cán xihín na jána ha ley Moisés sácu ndaa ñahá na. Ta nacasáha cáhan xihín táhan na já cáhí na já:

—Nacuu nacaja Jesús jáca cu da java ga ñayivi joo viti a cuú jáca cu da mé dá. 32 Tá ta mé a ndaa cúu dá Cristo, da cúu rey nuú na Israel ná nuu da ndica crúxu viti ñuhú já ná candúsa nde da —cáhí na.

Ta janda da ivi táhan ndáca ndica crúxu jini á cán cánahá da xihín á.

Tá naxihí Jesús

(Mt. 27:45-56; Lc. 23:44-49; Jn. 19:28-30)

33 Tá naxinu coo caxivi ndaa nacanaá níi cúu ñuyiví ta janda caa uní sahini já nacasáha nandiyehé tucu. 34 Ta sa mé hora já nacayuhú cóhó Jesús já cáhí a já:

—Eloi, Eloi, lama sabactani —nacachi a. Tuhun yóho cuni cáhí a: Ndióxi míi, Ndióxi míi, ndávaha najándacoo ndáha ndó yehé.

35 Ta java na ndíta cán naxini johó na tuhun cáhí a. Já nacachi na já:

—Cuni johó ndó jáchi cána da profeta Elías —nacachi na.

36 Anda já xinu in da nasahan da nachindaxi da in ticoto ini vino iyá. Já nacató da mé ticoto cán nuú in yitó ndoo já nachitivi da do yati yuhu Jesús ña ná coho a do. Já nacachi da já xihín java da cán:

—Cóho candehó á quixi Elías januu a da ndica crúxu —nacachi da.

37 Anda já nacayuhú cóhó Jesús já naxihí a. 38 Anda já nandatá java ndaa jáhma ndeé ña sáji nuu nuú yií ndivaha veñuhu cáhnú ñuu Jerusalén cán. Janda jini á ta janda sahá nandatá. 39 Ta ndaja coo in dataa, da sáhdá chuun nuú soldado cuéntá Roma nasahin da nu ndáca Jesús cán ta tá naxini da naxihí a já nacachi da já:

—Mé a ndaa táhyí cúu da yóho in túhún jini já jahyi Ndióxi —nacachi da.

40 Ta nasanduu java najihí ta sádehé xicá na Jesús. Taño na yóho nasandacaan

ñá naní María, ñá ñuu Magdala xihín María, ñá cúu náná Jacobo, da loho chá nuú José xihín in ñá naní Salomé. ⁴¹ Nasandico najihí yóho jata Jesús ta nachindee ñahá na tá nasahin a estado Galilea. Cuahá ga najihí nasanduu cán ta java na cúu ná na nasahan xihín á ñuu Jerusalén jihna tá cámaní quivi a.

Tá najánduxu na Jesús

(Mt. 27:57-61; Lc. 23:50-56; Jn. 19:38-42)

⁴² Tá nacuaá too uun quivi viernexe tá cámaní casaá quivi ndiquehe ndée na Israel já nayaha tóco ndihi ña yóho. ⁴³ Ta ndaja coo in in da naní José, da ñuu Arimatea, da cúu táhan na cómi cuénta sahá na Israel. Mé José yóho ndáti da casaá quivi cacomí Ndióxi cuénta sahá ñayivi ñuyivi yóho. Ta nasahan ndee ini da cuhun da cahan máni dá xihín Pilato sahá yiquí cuñu Jesús ña ná quiahva mé Pilato ña nu dá. ⁴⁴ Chí nacatontó Pilato tá nacandaá ini da ña sa naxihí Jesús. Já nacana da da sáhdá chuun nuú soldado da já nandaca tuhún ñahá da á sa naxihí Jesús. ⁴⁵ Tá nacaxi tuhun da cán nu Pilato ña sa naxihí Jesús já nasahan Pilato ñamaní nuú José ña ná ndiquehe da yiquí cuñu Jesús. ⁴⁶ Anda já naxeen José in jahmá vaha ta najánuu da yiquí cuñu Jesús ndica crúxu já nachitiví da ña xihín mé jahmá vaha cán. Tá nandihí já nachicaan da mé yiquí cuñu Jesús cán ini in yávi ndácaan ndica cáva. Tá nandihí já nachijahvi da yuhú cáva cán xihín in yuu jáhdá cáhnu. ⁴⁷ Ta ndaja coo María, ñá ñuu Magdala xihín María, náná José nasandehé na nuú nasacu na yiquí cuñu Jesús ini mé cáva cán.

16

Tá nanditacu tucu Jesús

(Mt. 28:1-10; Lc. 24:1-12; Jn. 20:1-10)

¹ Ta tá sa nayaha quivi ndiquehe ndée na já nasahan María, ñá ñuu Magdala xihín María, ñá cúu náná Jacobo xihín Salomé viti naquee na cuahan na cueen na java nuú ñaha támi sahan ña chindáá na yiquí cuñu Jesús. ² Ta naha chá mé quivi domingo tá naqueta candii já cuahan na nuú nachicaan na yiquí cuñu Jesús cán. ³ Ta nani xica na cuahan na ichi cán já ndítuhún

xihín táhan na ndá quiahva caja na tava na yuu ndáji nuú ndácaan yiquí cuñu Jesús cán. Já cáchi na já:

—Yo tava toho yuu ndáji nuu nuú quihví ini nu ndácaan yiquí cuñu Jesús —cáchi xihín táhan na cáshan na jáchi cáhnu ndivaha mé yuu cán.

⁴ Joo tá naxinu na mé cáva cán já naxini na ña coó ga yuu ndáji yuhú cáva cán. ⁵ Ta tá nandihvi na mé cáva cán já naxini na cáa in in dataa ndíxi jahmá yaa ña cáni. In coo da xoo cuáha ta cúu dá da yúta. Tá naxini najihí yóho da cán chí nayihví na. ⁶ Anda já nacahan da cán já cáchi da já:

—A yihví toho ndó. Xini yehe ña ndínducú ndo Jesús ña Nazaret, ña nacata caa na ndica crúxu. Candehé ndo nuú nasacu na a. Coó ga in viti jáchi nanditacu tucu a. ⁷ Ta viti cuahán ndo caxi tuhun ndó xihín na naxica tuun xihín á ta xihín Pedro ña cánuú mé á cuahan estado Galilea. Tá cuhun ndó cán já cuni ndó a tá quiahva nacachi mé á xihín ndo —nacachi tátó Ndióxi.

⁸ Já naquee na cán xinu na cuahan na jáchi nayihví ndivaha na anda quiji ninu na. Coó nacahan na xihín ni in ñayivi jáchi nayihví ndivaha na.

Tá naxini María, ñá ñuu Magdala Jesús

(Jn. 20:11-18)

⁹ Tá nandihí nanditacu tucu Jesús ta tá nativi mé quivi domingo já ña nu cuítí naxini Jesús nasacuu ña María, ñá ñuu Magdala, mé ña natavá Jesús usa rí quini nasandacaan ini ña. ¹⁰ Ta tá naxini ña mé á já naquee ña cuahan ña caxi tuhun ña nuú na naxica tuun xihín Jesús ña tácu a. Ta ndúu cuéha ini na ta sácu na ndúu na tá nasaa ña. ¹¹ Ta nacaxi tuhun ña nu ná ña nanditacu tucu Jesús ta naxini ña mé á joo coó naxeen na candúsa na ña.

Tá naxini ivi da naxica tuun xihín Jesús mé á

(Lc. 24:13-35)

¹² Ta tá nandihí já nandijama Jesús ndá quiahva cáa já nandaca náha á nuú ivi táhan na cuahan yúcu, na naxica tuun xihín á. ¹³ Joo tá nandicuni na mé á já naquee na cuahan na caxi tuhun na xihín na java cán joo coó naxeen na candúsa na tuhun nacahan ndiví na yóho xihín ná.

Sáhná Jesús chuun nuú na xica tuun xihin á

(Mt. 28:16-20; Lc. 24:36-49; Jn. 20:19-23)

¹⁴ Tá nandihí cán nandaca náha Jesús nuú ndíhuxu in na naxica tuun xihin á nani ndúu na xíxi na. Já nacasáhá jánani a na jáchi nandaja táhyí na ínima ná ta coó naxeen na candúsa na ña naxini na java cán Jesús tá nandihí nanditacu tucu a. ¹⁵ Já nacasáhá cáchi Jesús já xihin ná:

—Cuáhán ndo ní cúú ñuyiví yóho ta caxi tūhun ndó xihín ndihí ñayivi tūhun vaha sahá i. ¹⁶ Ta ndá na ná candúsa yehe ta candúta ná já quéa cacu ndaa ínima ná ta a cūhun na indayá. Joo na co candúsa yehe, na cán cúú na cūhun na ndoho ini na indayá anda ama cáa quiví. ¹⁷ Joo na cāndeé ini yehe cāja na ña xitúhún. Ta xihín quiví yehe tavá na ínima quini ndacaan ini ñayivi. Ta ndacahan na tūhun saá ña coó nacaiahva na. ¹⁸ Ta tá ná tiin ndáha ná coo ta tá ná coho na ña cúú cahní ñahá, a cahní toho a na. Ta tá ná chinúu na ndáha ná jiní na quíhvi já ndivaha mé na quíhvi cán — nacachi Jesús.

Tá nandaa Jesús cuahan indiví

(Lc. 24:50-53)

¹⁹ Tá nandihí nacahan Jesús, xitoho í tóco ndihí tūhun yóho xihin ná anda já nandindita cuahan indiví ta nasacoo a xoo cuáha Ndióxi, tátá yo. ²⁰ Tá nandihí já naquee na naxica tuun xihin á cán cuahan na caxi tūhun na tūhun vaha saha Jesús ndijáá ñuu. Ta já nachindeé Jesús, xitoho í na cán ta náha ña cúú á ña ndaa cahan na jáchi nacaja mé á ña cúú cāja na cuahá nuú ña xitúhún. Já ná coo.

Tuhun vaha nacahyí Lucas sahá Jesucristo

Ndicani Lucas ndavaha nacahyí da tuhun yóho

¹ Sa xini vahún, Teófilo ña sa cuahá ñayivi ndúcú na cahyí na tá cáa tá in ña nayaha tañu nde. ² Ta najánaha na nuú nde tóco ndihi ña naxini na janda mé saha. Mé na yóho cúu ná na naxica nuu nacahan na tuhun vaha saha Jesús nuú ñayivi. ³ Ta cuni ri yehe va cahyí i ña jáchi cuéé cuéé nandaca tuhún i ndaja cáa anda mé saha já ná cuu cahyí vií ndihi i ña nu mún, Teófilo, da quíhvi ndivaha ini i. ⁴ Jáchi cuni ña ná candaá vaha inún ndaja cáa ña ndaa ña najánaha na nuun.

Cáxi tuhun in tátō Ndióxi ña cacu Juan, da jácandúta ñayivi

⁵ Mé tiempo cán nasacuu Herodes rey nuú na Judea. Ta nasahin in da cúu jutú naní Zacarías. Ta nasacuu da cuéntá in táhnda jutú naní Abías. Ta ñájíhí da naní ña Elisabet, ña naquixi chichi Aaron, da nasacuu jutú sanahá. ⁶ Mé Zacarías yóho xihín ñájíhí da nasacuu na ñayivi naxica ndaa nu Ndióxi. Ta xihín ndinuhu ini na nacaja na ña sáhnda Ndióxi nuú tuhun mé á caja na. Ta ni in túhún toho ñayivi coo nacuu ñehe iní na cahan núu na saha ná. ⁷ Joo coo toho jahyí na nacacu jáchi coo nacuu canduu jahyí Elisabet cán. Ta mé tiempo já sa nacayatá ndivaha ndívi na.

⁸ Ta ndaja coo in quivi nanditahan nuú mé táhnda jutú xica xihín Zacarías cán caja chuun na cuéntá Ndióxi. ⁹ Tóco ndihi jutú cán nasajíquí na ndá da ná quee vaha ta da cán cacuu da quíhvi chiníhmá ini veñuhu cáhnu ndacaan ñuu Jerusalén cán. Ta naquee vaha Zacarías. ¹⁰ Ta nani chiníhmá Zacarías cán ini veñuhu já nanditútu ñayivi ndúu na yéhe ñuhu cán ndícahán na Ndióxi. ¹¹ Ta nani chiníhmá Zacarías nu náa cán ndacaan da já nacanáha in tátō Ndióxi nu dá cándichi a xoo cuáha nu náa nu chiníhmá da cán. ¹² Tá naxini Zacarías tátō Ndióxi cán, nayihví ndivaha da ta ni co xini da ndía caja

da. ¹³ Joo nandicahan tátō Ndióxi cán xihín dá já nacachi a já:

—A yíhvi tohún, Zacarías jáchi sa naxini johó Ndióxi nuú naxica tahvún nu á. Saha ña cán quea caja mé á ña ná cacu in jahyí Elisabet, ñájíhún. Ta cacún quivi dá cananí da Juan. ¹⁴ A juú quiahva cavatún ta cajii inún caja ta loho jan tá ná cacu da. Ta cuahá ga java na cajii iní na caja da tá ná cacu da. ¹⁵ Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xini na xihín. Ta cacuu da in da jándicutú ndaa Ndióxi xihín inima yii mé á janda tá cámaní cacu da. ¹⁶ Ta mé jahyún jan caja da ña ná ndicó coo cuahá na Israel nu Ndióxi, xitoho na. ¹⁷ Ta jihna ñúhú mé Juan cuhun da caja tiahva da ñayivi janda ná quixi mé á chindahá Ndióxi. Tá quiahva nandicutú ndaa inima profeta Elías xihín inima yii Ndióxi quiahva já ndicutú ndaa inima Juan xihín á já ná coo ndéé dá caja da ñaha tátuhun nacaja Elías. Ta caja mé Juan ña ná ndique táhan máni ñayivi xihín jahyí na. Ta caja da ña ná coo johó ñayivi sáá ini já ná caja na ña cuni Ndióxi. Quiahva já caja da cacu tiahva da ñayivi janda quiahva ná xinu quivi quixi da nasahan Ndióxi tuhun a chindahá a —nacachi tátō Ndióxi cán xihín Zacarías.

¹⁸ Anda já nandaca tuhún Zacarías cán tátō Ndióxi já nacachi da já xihín á:

—Ndaja caja i candaá ini i á mé a ndaa táhyí coo tá in cáhún coo jáchi sa nacayatá ndivaha i ta quiahva já nacayatá ri ñájíhí vi —nacachi Zacarías cán.

¹⁹ Anda já nanducú ñehe tátō Ndióxi cán tuhun nu dá já cáchi a já xihín dá:

—Yehe cúu Gabriel ta chuun Ndióxi xica nuu i cája i. Mé a cán nachindahá yehe ña ná quixi i caxi tuhun i ña yóho xuhun. ²⁰ Joo viti sahá ña coo nacandúsún ña nacachi i xuhun candoo níhun ña ná a cúu cahun janda quiahva ná xinu quivi cacu jahyún. Sa vaxi quivi coo tá in nacachi i xuhun coo —nacachi tátō Ndióxi cán xihín dá.

²¹ Joo ndaja coo ñayivi ndíta ndáti yéhe ñuhu cán sa nacasáhá ndíhi ini na sahá ña sa nacanáha tá coo Zacarías cán quéta jata véhe. ²² Joo tá naqueta Zacarías veñuhu coo nacuu cahan da ni in túhún tuhun xihín ná. Xihín ña yóho nacandaá ini na ña naxini da

in ñaha ñacaja Ndióxi nu náa yii mé á cán. Jandá ndáha uun da cúu nuú na cán jáchi ñacandoo níhi dá.

²³ Ta tá sa najáxiñu Zacarías quivi cája chúun da veñuhu cán já ñaquee da cuanúhu dá vehe da. ²⁴ Tá sa nayaha ña yóho já ñaquee jahyi Elisabet, ñájíhi Zacarías cán. Ta tixi uhun yoo coo ñaquee ñá caca nuu ñá. Ta ñacahán ña: ²⁵ “Ñacaja Ndióxi ña yóho xihín i viti já ná a cándehé ndaa nahá ga ñayivi yehe”, ñacahán ña.

Cáxi tuhun táto Ndióxi xihín María ña cacu Jesús

²⁶ Tá ñaxinu iñu yoo ñúhu jahyi Elisabet cán já ñachindahá Ndióxi mé Gabriel, táto mé á in ñuu naní Nazaret ndácaan estado Galilea. ²⁷ Ñasahan táto Ndióxi yóho Nazaret ñaxito nihni a in ñá tacú naní María, ñá ñatiin tuhun in da naní José ña ná tandaha ñá xihín dá. Mé José yóho ñaxixi da chichi David, da ñasacomí cuénta sahá ñayivi Israel sanahá. ²⁸ Ñandihvi táto Ndióxi cán nu ín ñá ta já ñacachi a já xihín ña:

—Cáhan Ndióxi yehe xuhun, María jáchi cúun in ña ñañehé táhvi nu Ndióxi. Ín Ndióxi xuhun ta ñacaja cuaha chága ñamaní xuhun a juú ga xihín java ga najíhi —ñacachi táto Ndióxi cán xihín ña.

²⁹ Joo tá ñaxini María táto Ndióxi cán já ñacatóntó ña táa johó ñá ña cáhan mé a cán xihín ña. “Ta ndá cuénta quea cáhan táto Ndióxi yóho já xihín yo”, ñacahán ña. ³⁰ Anda já ñacachi táto Ndióxi cán já xihín ña:

—A yíhvi tohún, María jáchi cúun in ña ñañehé táhvi nu Ndióxi. ³¹ Ta viti quee jahyún ta tá sa ñacacu a já cacún quivi á ná cananí a Jesús. ³² Mé jahyún ñan cacuu a ña cáhnu. Ta cachi ñayivi saha dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuénta sahá ñayivi tá quiahva ñasacomí David, da cúu tásáhnu jícó da cuénta sahá ñayivi. ³³ Quixi da cacomí da cuénta sahá ñayivi Israel ta anda ama cáa quivi cacomí da cuénta saha ná —ñacachi táto Ndióxi cán xihín María.

³⁴ Anda já ñandaca tuhún María táto Ndióxi cán já cáchi ña já xihín á:

—Ndaja coo cacu jahyi i ta ni in túhún toho ña coo ín xihín i —ñacachi ñá xihín á.

³⁵ Anda já ñanducú ñehe táto Ndióxi cán tuhun nu ñá já cáchi a já:

—Ínima yii Ndióxi quea quixi jándicutú yohó. Ta ndée Ndióxi, mé á cáhnu nu ndíhi a cán cava nuu a yohó táto tuhun caja in vico. Sahá ña cán quea tá ná cacu jahyún ñan cacuu da in da yii ñacaxi Ndióxi caja chúun nu mé á. Ta cachi ñayivi saha dá ña cúu dá in túhún jini já jahyi Ndióxi. ³⁶ Ta cáxi tuhun i xuhun ña cacu jahyi Elisabet, ña cúu táhún cán vatí sa ñacayatá ña. Ta viti sa ñaxinu iñu yoo ñúhu jahyi ñá, mé ña ñacachi ñayivi saha ña a cúu coo jahyi ñá. ³⁷ Jáchi Ndióxi cuu caja tóco ndíhi ñaha —ñacachi táto Ndióxi cán xihín María.

³⁸ Anda já ñacachi María já:

—Ndióxi cúu xitoho i ta ná caja mé á tá quiahva cúni a xihín i. Ná coo tá ín cáchi ndó coo.

Tá ñandihvi ñacachi María cán ña yóho já ñaquee táto Ndióxi cán cuahan.

Xíto nihni María Elisabet, ña cúu táhan ña

³⁹ Ta mé tañu quivi já já xínu María ñasahan ña in ñuu ndácaan chí yucu cuénta Judea cán. ⁴⁰ Ta tá ñaxihvi ña vehe Zacarías, yii Elisabet cán já ñacahan Ndióxi ña xihín Elisabet. ⁴¹ Ta tá ñaxini johó Elisabet ñacahan Ndióxi María xihín ña chí ñacandita ña loho ndácaan tixi Elisabet cán chí ivi laá ñandicutú ndaa ña xihín ínima yii Ndióxi. ⁴² Anda já ñacayuhú cóho Elisabet já ñacachi ñá já xihín María:

—Ni in túhún toho najíhi coo ñacaja maní Ndióxi xihín tá quiahva ñacaja maní á yohó. Ta ñacaja yii mé á jahyún. ⁴³ Ta coo saha toho yehe ná quisún yóho, ña cúu náná xitoho i coto nihnún yehe. ⁴⁴ Jáchi tá ñaxini johó uun i ña ñacahan Ndiósun xihín i ivi laá ñacanda jahyi i ini tixi i jáchi ñacajii ín i a. ⁴⁵ Tahví ñacuún jáchi ñacandúsun ña ñacachi Ndióxi, xitoho í xuhun. Jáchi caja tá caja mé á ña ñacachi a caja —ñacachi Elisabet cán xihín María.

⁴⁶ Anda já ñacachi María já:

Cája cáhnu i Ndióxi, xitoho í xihín ínima i.

⁴⁷ Ta cájii ndivaha ini i xihín ña cája Ndióxi, mé a jácacu yehe.

48 Jáchí nandicuhun ini a sahá yehe, ñá ndáhví, ñá cúú in mozo mé á.

Ta cachi ñayivi ndúu viti xihín na vaxi quiví canduu ñuyiví yóho ña ñacaja cuaha Ndióxi ñamaní xihín i.

49 Jáchí mé Ndióxi, mé a cuu caja tóco ndihi ñaha ñacaja cuaha ña náhnu xihín i.

Ta yii ndivaha quiví mé á.

50 Ta ní tiempo táhvi ini mé á saha tóco ndihi ñayivi, na cája cáhnu mé á.

51 A juú quiahva náhnu ñaha ñacaja mé á.

Nasahnu a nuú na ndínehe jícó mé.

52 Ta ñacandaa mé á chuun ndahá da náhnu ta najánuu ndáha mé á da.

Ta nandínehe jícó mé á na najánuu ndáha mé ñuyiví yóho.

53 Ta najándicutú ndaa mé á ñaha nuú na nandimaní ñaha cuxu.

Ta ñacandaa mé á ña nasacomí na cuicá já naxatá a na cán ná quee na cuhun na.

54 Náchindee a na Israel, na cája chúun cuéntá mé á.

Ta coó nandindójó a tahvi ini a saha ná.

55 Jáchí quiahva já nasahan mé á tuhun a caja anda ama cáa quiví xihín Abraham ta xihín tásáhnu jícó yo, na ñaquixi chichi mé dá, já ñacachi María cája cáhnu ñá Ndióxi.

56 Ta ñacandoo María nasahin ñá vehe Elisabet tixi uní yoo. Anda já ñaquee ñá cuanúhu ñá vehe ñá.

Tá ñacacu Juan, da jácandúta ñayivi

57 Tá nandindaa quiví cacu jahyi Elisabet já ñacacu in ta loho. 58 Ta tóco ndihi ñayivi ndúu yati xihín ñá xihín na cúú táhan ñá nasahan na xito nihni na ña. Ta cájii íni na jáchi ñacandaa ini na ña ñacaja Ndióxi cuahá ñamaní xihín ña. 59 Ta tá naxinu ña loho cán una quiví já nasahan na ñachicaan na marca yiquí cuñu a tátuhun ín costumbre na. Ta ñacahán na cananí a Zacarías tá quiahva naní tátá a. 60 Joo já ñacachi Elisabet já:

—A cananí toho da já. Juan va cananí da —ñacachi ñá xihín na cán.

61 Anda já ñacachi na cán já xihín ña:

—Ndá cuéntá quéa cananí jahyún já ta ni in túhún toho na vehún coó naní já.

62 Anda já ñacuu ndáha ná nu Zacarías cán ña ndáca tuhún na da ndaja coo cananí

ñá loho cán. 63 Anda já naxica Zacarías cán in tutu nu ná ta já ñacahví da já: “Juan cananí da.” Tá ñacahvi na cán ña yóho já ñacatóntó ndihi na. 64 Ta chí sa mé hora já nandicahan tucu Zacarías. Já ñacasahá da cája cáhnu da Ndióxi. 65 Xihín tóco ndihi ña ñayaha yóho ñacatóntó ndihi na nasanduu yati xihín Zacarías cán. Ta ní cúú ñuu válí ñúhu chí yucu cuéntá Judea cán nandicuítanu tuhun saha tóco ndihi ña ñayaha yóho. 66 Ta tóco ndihi na naxini johó ña yóho ñacasahá ndícani ini na sahá. Já ñacasahá ndáca tuhún táhan na já cáhí xihín táhan na já:

—Ndá ta cacuu ta loho yóho tá ná cuahnu da.

Ñacachi na ña yóho jáchi naxini táhvi na ñamaní náhnu cája Ndióxi xihín ta loho cán.

Cája cáhnu Zacarías Ndióxi

67 Anda já nandicutú ínimá Zacarías, tátá Juan cán xihín ínimá yii Ndióxi. Já ñacasahá da cáhan da tuhun sahan Ndióxi nu dá cáhan da. Já ñacachi da já:

68 Cáhnu ná cacuu Ndióxi, mé a cúú xitoho ñayivi ñaquixi chichi Israel.

Jáchí ñaquixi a jácacu a mí, na cúú cuéntá mé á.

69 Náchindahá Ndióxi mé a jácacu mí ná a cuhun yó indayá.

Ta ín ndée á caja tóco ndihi ña náhnu.

Ta ñaquixi a chichi David, da ñacaja chúun cuéntá Ndióxi sanahá.

70 Ta janda sanahá ndivaha nasahan Ndióxi tuhun a ña caja mé á ña yóho.

Ta já najáyaha na profeta cán tuhun ñacahan Ndióxi nuú ñayivi.

71 Ña ñacachi mé á quéa jácacu a mí ndahá na ihvi yo xihín ndáha na coo cúní mí.

72 Ta ñacachi a tahvi ini a saha tásáhnu jícó yo, na nasanduu sanahá cán.

Ta a ndíndójó toho mé á sahá tuhun yii nasahan nu ná jáchi ña yii cúú tóco ndihi tuhun sahan Ndióxi nuú ñayivi.

73 Ña yóho cúú tuhun ñacachi Ndióxi jáxinu coo a nuú tá nasahan mé á tuhun a nu Abraham, da nasacuu tásáhnu jícó yo cán.

74 Ta ñacachi mé á xihín dá ña jácacu a mí ndahá ña cō cūnī mí já ná a cáyihví yō caja chúun í cuéntá mé á.

75 Ta já ná cacuú ñayivi ndaa, ña ñandiquiahva mé caja ña cūnī mé á tóco ndihi quivi ndúú ñuyiví yóho, ñacachi Zacarías nu ndíhi ñayivi cán.

76 Anda já ñacasáhá ña cáhan ña xihín ña loho jahyi da já cáchí ña já xihín á:

Ta yóhó, jahyi a, cachi ñayivi sahun ña cūnī in profeta Ndióxi, mé a cūú cáhnu nu ndíhi a.

Ta jihna ñúhú cūhún jácāhún ñayivi ña ná cacu tiahva na ínimā ná ndiquehe na mé a chindahá Ndióxi vaxi.

77 Ta xihín ña yóho cuu caxi tuhún xihín ñayivi ña cája cáhnu ini Ndióxi sahá cuachi na.

Já ná cuu cacu ndaa ínimā ná ná a cūhūn ña indayá.

78 Sahá ña quíhvi ini Ndióxi mí ta sahá ña táhvi ini mé á saha yō sahá ña cán quēa janda indivi nu ín mé á ñachindahá a in a cuu chindeé a mí ná ndihví ichí saá cuéntá mé á.

79 Jáchi vaxi a jándiyehē a nuú ñayivi ndúu nuú naá ña ná caca na íchi nuú cuu coo vaha ini na xihín Ndióxi, ñacachi Zacarías xihín jahyi loho da.

80 Já ñacasáhá sahnu taa loho cán cuahan ña. Ta ndíndacú ña xihín ñaha Ndióxi viti. Ta ñasahin da yucú íchí nuú cō ndúu cuahá ñayivi janda quiahva ñaxinu quivi ñacasáhá jánahá ña nuú ña Israel.

2

Tá ñacacu Jesús ñuu Belén

(Mt. 1:18-25)

1 Ta mé tiempo cán tá ñasacomí Augusto cuéntá sahá ñayivi ndúu ñuyiví já ñasahnda da chuun ña ná nditaca quivi ndaja táhan ñayivi cómí ña cuéntá saha.

2 Ta mé tañu nu cuítí tá ñanditaca quivi ná já ñasacuu Cireneo gobernador estado Siria. 3 Ta tóco ndihi ñayivi ñanditahan nu ná cūhūn ña tá ñuu tá ñuu nuú ñacacu tásahnu jíco ña ná quee quivi ná. 4 Sahá ña cán quēa ñaquee José ñuu Nazaret cuéntá Galilea cán já ñasahan ña ñuu Belén ña ndácaan estado Judea nuú ñacacu David jáchi ñaquixi da chichi David. 5 Ñasahan

María xihín José ñuu Belén quee quivi ná. Mé María yóho cūú ña ñaxica ña cacuu ñájihí ña. Ta sa já ñúhu jahyi ña cuahan ña ñuu Belén. 6 Ta nani ñasanduu na ñuu Belén cán ñaxinu quivi cacu jahyi María. 7 Ta ñacacu jahyi nuú ña. Ta ñachitiví ña a ticoto já ñachindúhu ña a nu xixáhan quítí cán. Mé nu sánduu quítí cán ñacacu jahyi María jáchi cō ñañehē ná vehe canduu na jáchi sa ñacatáñu va vehe nuú canduu ñayivi xínu cō ñuu Belén cán.

Cáxi tuhun táto Ndióxi xihín ña ndáa ndicachi ña ñacacu Jesús

8 Ñasanduu java ña ndáa ndicachi ña ná ñuu yati ñuu Belén cán. 9 Ta in náa cuítí ñanaha táto Ndióxi mé á nu ná. Ta chí ñandiyihvi ndaa nu ndúu ña cán ñacaja Ndióxi ta ñayihví ndivaha na. 10 Joo ñandicahan táto Ndióxi cán xihín ná já ñacachi a já:

—A yíhvi toho ndó jáchi tuhun vaha quēa ñehē e vaxi i cahan i xihín ndo. Ta xihín ña yóho cajii ndivaha ini tóco ndihi ñayivi.

11 Jáchi mé quivi viti ñacacu in a jácacu a ndohó nuú cuachi ndó ta mé á cán cūú Cristo, xitoho ndó, ña ñachindahá Ndióxi cacomí a cuéntá saha ndo. Ta ñacacu a ñuu Belén nuú ñacacu David sanahá. 12 Tá ná cūhūn ndo cán já cuni ndó ña loho cán catíví a ticoto cándúhu á nu xixáhan quítí. Tá ná cuni ndó ña yóho já candaa ini ndó ña cáhan i ña ndaa xihín ndo —ñacachi táto Ndióxi xihín ña ndáa ndicachi cán.

13 Ta nani cáhan táto Ndióxi cán ñaxinu cō cuaha chága táto Ndióxi nu ín a cán. Mé táto Ndióxi yóho ñaquixi na indivi ta cája cáhnu na Ndióxi já cáchí ña já:

14 Cáhnu ná cacuu Ndióxi ín indivi. Ta ná coo vaha ini tóco ndihi ñayivi ndúu ñuyiví, mé ña cajii ini xihín ñamaní cája Ndióxi xihín ná, ñacachi táto Ndióxi cán.

15 Ta tá sa ñandicó cō táto Ndióxi cán cuahan chí indivi já ñacasáhá cáchí xihín táhan ña ndáa ndicachi cán já:

—Cōho quí yō ñuu Belén candehé yō ña ñacachi Ndióxi, xitoho í xōho ña ñacuu ñuu Belén cán.

16 Já xínu na ñasahan ña ta tá ñaxinu cō na cán já ñandíñehē ná María xihín José xihín mé ña loho cándúhu nu xixáhan

quíti cán. ¹⁷ Anda já nacasáhá nandicani na ndáá ndicachi cán nu ná ña nacachi tátō Ndióxi xihin ná sahá ña loho cán. ¹⁸ Ta chí cātóntó tóco ndihi ñayivi tá xini johō na ña ndicani na ndáá ndicachi cán nu ná. ¹⁹ Joo nandicuhun ini María tóco ndihi ña nayaha ta ndicani ini ñá sahá. ²⁰ Tá nandihí já naquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johō na xihín saha tóco ndihi ña naxini na jáchi nasahjin tá in nacachi tátō Ndióxi cán xihin ná.

Tá ñehe na lee loho Jesús cuahan na ndiquiahva na cuénta saha mé á veñuhu cáhnu ñuu Jerusalén

²¹ Tá nayaha una quivi nacacu lee jahyi María cán já nachicaan na marca yiquí cuñu a tá quiahva in costumbre na. Ta nasacu na quivi á cananí a Jesús jáchi quiahva já nacachi tátō Ndióxi cán xihin María ña ndítahan cananí a janda tá cámaní cañuhu jahyi ñá.

²² Ta nu ley Moisés, ña nacañyí da sanahá cáchí a ña tá ná ndihi nacacu jahyi in ñáñaha, a cúu quihvi ñá veñuhu anda ná yaha sáhdá ley quivi. Ta tá sa nayaha quivi cán já naquehe María xihin José mé lee loho Jesús cán. Já ñehe na ña cuahan na ndiquiahva na cuénta sahá nu Ndióxi veñuhu cáhnu ñuu Jerusalén cán. ²³ Nacaja na ña yóho jáchi já cáchí ley nasahnda Ndióxi sanahá: “Tóco ndihi ta valí, na cúu jahyi nuú najihí, ndítahan ndiquiahva na ña nu Ndióxi.” ²⁴ Ta jári najoco na ña sáhdá ley Moisés coo tá nandihí nacacu jahyi na. Ta ña yóho cúu ivi ndiyuu á ivi ndijata.

²⁵ Ta ndaja coo mé tiempo cán nasahjin in dataa naní Simeón ñuu Jerusalén cán. Ta nasacuu da in ta vaha ndivaha, da cája cáhnu Ndióxi. Ta ndáti da xinu coo quivi chindahá Ndióxi in da chindeé na Israel já ná a ndóho ga ini na. Ta nandicutú ndaa ínima dá xihin ínima yii Ndióxi. ²⁶ Ta mé a cán quea nacachi xihin dá ña a quiví toho da janda quiahva ná cuni táhyí da Cristo, mé a nasahan Ndióxi tuhun a chindahá a. ²⁷ Ta mé ínima yii Ndióxi ndáca Simeón cuahan da veñuhu mé quivi naxinu María xihin José cán caja na xihin

Jesús tá quiahva sáhdá ley Moisés caja na. ²⁸ Tá nandique táhan da xihin ná já natiin da Jesús já nasañehe ndaa da a. Já nacasáhá da cája cáhnu da Ndióxi já cáchí da já:

²⁹ Tátá Ndióxi, sa cuu quiahva ndó ñamani quivi yaa i viti,

jáchi sa najaxinu coo ndó nuú tuhun ndó, ña nasahan ndó nuú yehe, da cúu mozo ndo.

³⁰ Jáchi naxini i xihín nuú i mé a nachindahá ndó jacacu ndehe.

³¹ Nasacu ndó a ña ná jacacu a ndaja táhan ñayivi.

³² Mé a yóho jándiyehé a nuú na coo naquixi chichi Israel.

Ta saha mé a yóho cahan vaha ñayivi saha na Israel, na cúu cuénta mé ndo, nacachi Simeón.

³³ Chí nacatóntó José xihin María táa johō na ña cahan Simeón saha Jesús. ³⁴ Tá nandihí naxica tahví Simeón nu Ndióxi saha ná anda já nacasáhá cáchí da já xihin María, náná Jesús:

—Nacaxi Ndióxi ta loho yóho ña ná caja da ná cuhun cuahá na Israel ndoho ini na ta caja da ña ná cacu ínima cuahá na cán. Naquixi da nu Ndióxi joo candají cuaha ná da ³⁵ já náha táhyí ña cáhvi ini in in na cán. Ta yóhó, María tahví ndivaha inún saha ña yóho ta cacuu a tátuhun tuxú na machiti ínimun —nacachi Simeón xihin María.

³⁶ Ta mé cán nasahjin ri in ñá naní Ana, ñá jáyaha tuhun cáhan Ndióxi nuú ñayivi. Ta nasacuu ñá jahyi da naní Fanuel, da naquixi chichi Aser. Mé Ana yóho nacayatá ña. Tá yuta ñá natandaha ña joo usa laa cuia nasahjin ñá xihin yí ña já naxihí da.

³⁷ Ta viti sa naxinu comi jícó comi cuia in cuaan ña. Nuú ta ndiví in tuun ñá veñuhu cája cáhnu ñá Ndióxi. Xijuhun ñá ta xica tahví ña nu mé á. ³⁸ Mé hora in Simeón ndítuhún da xihin María já naxinu coo Ana cán. Ta tá nandihí nandiquiahva ñá ndixahvi nu Ndióxi já nacasáhá cáhan ñá saha ña loho Jesús cán nuú ñayivi, na ndáti quixi quiví chindahá Ndióxi da chindeé na ñuu Jerusalén. Ta cáchí ñá ña jivi mé Jesús cán quea ndáti na quixi.

Tá nandicó coo na ñuu Nazaret

³⁹ Tá nandihí nacaia José xihín María ña sáhdá ley Moisés cája na cán já cuanúhu na ñuu Nazaret, ña ndácaan estado Galilea cán. ⁴⁰ Ta mé taa loho Jesús sáhdá da ta ndíndacú da. Ta johó ndíndíhí ga ví jini dá cuahan da. Ta cuahá ndivaha ñamaní cája Ndióxi xihín dá.

Ndácaan Jesús veñuhu cáhnu ñuu Jerusalén

⁴¹ Tá nu cuia sáhan náná tátá Jesús víco pascua ñuu Jerusalén. ⁴² Ta tá naxinu Jesús uxu ivi cuia já ndáca táhan mé á xihín ná tá cuahan na víco ñuu Jerusalén cán jáchi já nasahin costumbre ñayivi cája na tañu víco cán. ⁴³ Ta tá sa nayaha víco cán já nandicó coo José xihín María cuahan na. Joo coo naxini na ña nacandoo Jesús ñuu Jerusalén cán. ⁴⁴ Tañu ñayivi cuaha cán cátahan da vaxi da, nacaán na. Ta tá sa naxinu ní in quivi xica na cuahan na já nacasáhá ndínducú na da tañu ñayivi cúu táhan na xihín tañu na xini táhan xihín ná. ⁴⁵ Joo coo nandínehe ná da. Anda já nandicó coo tucu na ñuu Jerusalén ndínducú na da.

⁴⁶ Janda quivi uní ví já nandínehe ná Jesús ini veñuhu cáhnu cán. Cáa ín coo da tañu na jánaha ley Moisés cán. Taa johó da nu cáhan na ta ndáca tuhún da na sahá java ga ñaha. ⁴⁷ Ta chí cátontó tóco ndihí ñayivi tá xini johó na tuhun ndúcú ñehe da nuú na jánaha ley Moisés cán jáchi náha ña ndíhí jini dá. ⁴⁸ Tá naxini María xihín José ña ndácaan Jesús tañu na jánaha ley Moisés cán já nacaatontó na. Anda já nacaachi María já xihín Jesús:

—Jahyi maní i. Ndá cuéntá quéa nacajún ña yóho xihín nde. Yehe xihín tátún a juú quiahva ndícani ini nde xica nuu nde ndínducú nde yohó —nacaachi María xihín Jesús.

⁴⁹ Anda já nacaachi Jesús já:

—Ndá cuéntá quéa ndínducú ndó yehe. Á coo xini toho ndó ña ndítahan ndihí ini i cája i chuun nasahnda tátá i, mé á ín indivi nuú i cája i, vaha —nacaachi Jesús xihín ná.

⁵⁰ Joo ni María ni José coo nacandaá ini na ña nacaachi Jesús cán xihín ná.

⁵¹ Anda já nandicó coo Jesús cuahan xihín ná ñuu Nazaret. Ta nacaia da tóco

ndihí ña cuni na. Ta nandicuhun ini María ña nacaia Jesús ini veñuhu cáhnu cán. ⁵² Ta sáhdá Jesús ta cátaacu ini da cuahan. Ta cájii ini Ndióxi xihín ña cája Jesús. Ta quiahva já cájii ri ini ñayivi va xihín ña cája da.

3

Cásahá Juan cáhan da tuhun Ndióxi xihín ñayivi yucú íchí cán

(Mt. 3:1-12; Mr. 1:1-8; Jn. 1:19-28)

¹ Tá naxinu sahan cuia cómi Tiberio cuéntá sahá ñayivi ñuyivi já nasacuu Poncio Pilato gobernador nuú na ndúu estado Judea. Ta da naní Herodes nasacuu gobernador nuú na ndúu estado Galilea. Ta ñani Herodes, da naní Felipe cán nasacuu gobernador nuú na ndúu Iturea xihín nuú na ndúu Traconite. Ta da naní Lisnias nasacuu gobernador nuú na ndúu Abilinia. ² Ta Anás xihín Caifás nasacuu da sacuaaha nu ndihí jutú. Mé tiempo cán nacaahan Ndióxi xihín Juan, da cúu jahyi Zacarías, mé nu ín da yucú íchí cán. ³ Anda já nayaha Juan ndíjáá ñuu válí ñuhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná caja cáhnu ini Ndióxi sahá cuachi na ta já ná candúta ná. ⁴ Tóco ndihí ña yóho nayaha tá ín nacaachi Isaías tá nacaahí da sanahá:

Vaxi quivi tá cahan cóhó in da tañu yucu íchí ta cachí da já:

“Caja tiavha ndó íchí nuú quixi xitoho í, ta cuná ndó in ichí ndacú nu mé á ña ná ndihvi a ínima ndó.

⁵ Tóco ndihí ña cúu táhvi ná ndicutú ndihí a.

Tóco ndihí yucu xihín xiqui ná ndicava ndaa ndihí a.

Tóco ndihí ichí ndícaava ná ndíndacú ndihí a.

Ta íchí ña coo ín ndaa nuu ndíndaa ndihí nu a.

⁶ Ta tóco ndihí ñayivi ndúu ñuyivi cuni na ndá quiahva jácaacu Ndióxi ñayivi”, já cáhí tutu nacaahí Isaías sanahá ndivaha.

⁷ Ta nacasáhá ñayivi ndái cuu na nu ín Juan ña ná jácandúta da na joo nacasáhá xójo ndivaha ini da xihín ná já cáhí da já:

—Mé ndó cúú ndó tátuhun coo jáchi cúú ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. ⁸ Xíni ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácaacu Ndióxi ndohó sahá ña cúú ndó na naquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cahan i xihin ndó ña janda yuu nduu nu ñúhu jan cuu caja Ndióxi ña ná nduu a ñayivi quixi chichi Abraham. ⁹ Mé ndó cúú ndó tátuhun in yíto, dó sa ñatiin na hacha cuahan na cahnda na. Ta tóco ndihi yíto, dó co sahan cuíhi vaha nuu, tahnda do ta quee dó nu ñúhu cayi do. Quiahva já caja rí Ndióxi xihin ndóhó tá co cúni ndó ndicó coo ini ndó nu mé á —ñacachi Juan xihin ñayivi cán.

¹⁰ Anda já ñacasahá ñayivi cán ndáca tuhún na da já cáchi na já xihin dá:

—Ndía ndítahan nuú nde caja nde.

¹¹ Já cáchi Juan já xihin ná:

—Ndá na nduu ivi cotó ná quiahva na in a nuú na coo ñaha nuu. Ta ndá na íin ña cuxu ná cahnda java táhan na ña xihin na coo a nuu —cáchi Juan xihin na cán.

¹² Tañu na nandai cuu cán ñaxinu ri java da játaca jiuhún cuénta impuesto ña candúta dá. Ta nandaca tuhún da Juan já ñacachi da já:

—Maestro, ndía ndítahan nuú nde caja nde.

¹³ Anda já ñacachi Juan já xihin dá:

—Quehe ndó jiuhún nuú ñayivi tá quiahva sáhdá ley cuití va quehe ndó —ñacachi Juan xihin da cán.

¹⁴ Ta jári java da cúú soldado nandaca tuhún da Juan já ñacachi da já:

—Ta ndehe ri ndía ndítahan caja nde.

Já ñacachi Juan já xihin dá:

—A cándaa ndó ña cómi ñayivi. A jáyihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coo ñacaja na ña. Ta xíni ñúhú coo vaha ini ndó xihin yahvi quehe ndó sahá chuun cája ndó —ñacachi Juan xihin da cán.

¹⁵ Tóco ndihi ñayivi ndihi ini na jáchi cúni na candaa ini na ña á mé Juan cúú Cristo,

da nachindahá Ndióxi cacomí cuénta sahá ñayivi. ¹⁶ Joo nandicahan Juan xihin tóco ndihi ñayivi já ñacachi da já xihin ná:

—Mé a ndaa cája ndúta i ndohó xihin ticuú. Joo vaxi inga da ta da cán cúú da jándicutú ínimá ndo xihin ínimá yii Ndióxi ta ña cán cacuu a tátuhun ñúhu cáyi. Ta da cán íin cuaha chága ndée dá a juú ga yehe. Ta chí coo sahá i ndica xítí i nu dá ña ndaxi i correa ndusa dá. ¹⁷ Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihin pala já ná quee xehe á já cacu vaha da ña. Ta xehe ñacana cán cuhun a cayi a xihin ñúhu ita ña a ndáhva toho —ñacachi Juan.

¹⁸ Quiahva johó ñacahan Juan nuú ñayivi tá ñacaxi tuhun da tuhun vaha nu ná. Ta cuahá java ga ñaha cahan da xihin ná caja na. ¹⁹ Inga ñaha ñacaja da quea najánani da Herodes, da cúú gobernador jáchi ñasahin Herodes xihin Herodías, ña cúú ñájíhi ñani da, Felipe. Ta najánani Juan da sahá java ga ña núu ñacaja da. ²⁰ Joo ñacaja johó Herodes mé dá ta coo ñaxeen da coo johó da nu cahan Juan xihin dá. Ña ñacaja da quea ñacaja chága da ña núu tá nachicaan da Juan vecaa.

Tá ñacandúta Jesús

(Mt. 3:13-17; Mr. 1:9-11)

²¹ Tá cámaní ndácaan Juan vecaa, cája ndúta dá ñayivi ta já najácandúta ri da Jesús. Ta nani xíca tahví Jesús nu Ndióxi já ñanuna indiví. ²² Ta ñanuu ínimá yii Ndióxi jata Jesús. Ta nasacaa ínimá yii Ndióxi yóho tá quiahva cáa in ndijata. Tá ñandihí já ñaxini johó na ña cahan in a indiví já ñacachi a já:

—Yóhó cúún jahyi maní i ta cájii ndivaha ini i xuhun —ñacachi a.

Ña yóho cúú quiví na nasacuu tásáhu jícó Jesús

(Mt. 1:1-17)

²³ Nasandacaan Jesús tátuhun oco uxu cuia tá ñacasahá jánañu tuhun Ndióxi nuú ñayivi. Ta ñacahan ñayivi ña nasacuu a jahyi José. Ta José cán nasacuu da jahyi Elí, ²⁴ ta tátá Elí nasananí Matat. Ta tátá Matat nasananí Leví. Ta tátá Leví nasananí Melqui. Ta tátá Melqui nasananí

Jana. Ta tátá Jana ñasanani José. ²⁵ Ta tátá José ñasanani Matatías. Ta tátá Matatías ñasanani Amós. Ta tátá Amós ñasanani Nahum. Ta tátá Nahum ñasanani Esli. Ta tátá Esli ñasanani Nagai. ²⁶ Ta tátá Nagai ñasanani Maat. Ta tátá Maat ñasanani Matatías. Ta tátá Matatías ñasanani Semei. Ta tátá Semei ñasanani José. Ta tátá José ñasanani Judá. ²⁷ Ta tátá Judá ñasanani Joana. Ta tátá Joana ñasanani Resa. Ta tátá Resa ñasanani Zorababel. Ta tátá Zorababel ñasanani Salatiel. Ta tátá Salatiel ñasanani Neri. ²⁸ Ta tátá Neri ñasanani Melqui. Ta tátá Melqui ñasanani Adi. Ta tátá Adi ñasanani Cosam. Ta tátá Cosam ñasanani Elmodam. Ta tátá Elmodam ñasanani Er. ²⁹ Ta tátá Er ñasanani Josué. Ta tátá Josué ñasanani Eliezer. Ta tátá Eliezer ñasanani Jorim. Ta tátá Jorim ñasanani Matat. ³⁰ Ta tátá Matat ñasanani Leví. Ta tátá Leví ñasanani Simeón. Ta tátá Simeón ñasanani Judá. Ta tátá Judá ñasanani José. Ta tátá José ñasanani Jonán. Ta tátá Jonán ñasanani Eliaquim. ³¹ Ta tátá Eliaquim ñasanani Melea. Ta tátá Melea ñasanani Mainán. Ta tátá Mainán ñasanani Matata. Ta tátá Matata ñasanani Natán. ³² Ta tátá Natán ñasanani David. Ta tátá David ñasanani Isai. Ta tátá Isai ñasanani Obed. Ta tátá Obed ñasanani Booz. Ta tátá Booz ñasanani Salmón. Ta tátá Salmón ñasanani Naasón. ³³ Ta tátá Naasón ñasanani Aminadab. Ta tátá Aminadab ñasanani Aram. Ta tátá Aram ñasanani Esrom. Ta tátá Esrom ñasanani Fares. Ta tátá Fares ñasanani Judá. ³⁴ Ta tátá Judá ñasanani Jacob. Ta tátá Jacob ñasanani Isaac. Ta tátá Isaac ñasanani Abraham. Ta tátá Abraham ñasanani Taré. Ta tátá Taré ñasanani Nacor. ³⁵ Ta tátá Nacor ñasanani Serug. Ta tátá Serug ñasanani Ragau. Ta tátá Ragau ñasanani Peleg. Ta tátá Peleg ñasanani Heber. Ta tátá Heber ñasanani Sala. ³⁶ Ta tátá Sala ñasanani Cainán. Ta tátá Cainán ñasanani Arfaxad. Ta tátá Arfaxad ñasanani Sem. Ta tátá Sem ñasanani Noé. Ta tátá Noé ñasanani Lamec. ³⁷ Ta tátá Lamec ñasanani Matusalén. Ta tátá Matusalén ñasanani Enoc. Ta tátá Enoc ñasanani Jared. Ta tátá Jared ñasanani Mahalaleel. Ta tátá Mahalaleel ñasanani

Cainán. ³⁸ Ta tátá Cainán ñasanani Enós. Ta tátá Enós ñasanani Set. Ta tátá Set ñasanani Adán. Ta Ndióxi ñacavaha Adán.

4

Xíto ndojó tiñáhá sacuaḥa Jesús (Mt. 4:1-11; Mr. 1:12-13)

¹ Tá ñandihi cán ñaquee Jesús yuta Jordán. Ta ñandicutú ndaa ínima mé á xih̄in ínima ȳii Ndióxi ta mé a cán ñasandaca Jesús ñasahan yucú íchí nuú cō ndúu ñayivi. ² Ta cán ñasah̄iin Jesús t̄ixi īvi jico qūiv̄i ta ñaxito ndojó tiñáhá sacuaḥa mé á. Ta tóco ndihi qūiv̄i cán coó ñaxixi a ta tá ñandihi já ñacasáhá cuico a. ³ Andá já ñacachi tiñáhá sacuaḥa cán já xih̄in á:

—Tá t̄a jivi ndusa jahyi Ndióxi cúun, cahnda chuun ña ná nduu yūȳ yóho pan.

⁴ Andá já ñanducú ñehe Jesús tuhun nū ri já ñacachi a já:

—Já cáchi tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú caja ri na ña sáhdá tuhun Ndióxi nū ná já quéa ná cuu catacu na nū Ndióxi”, — ñacachi Jesús xih̄in rí cán.

⁵ Tá ñandihi já ndáca tiñáhá sacuaḥa cán Jesús ñasahan rí in j̄ini yucú j̄icó xih̄in á já ñanah̄a rí tóco ndihi ñuu ndúu ñuyiví nū á in tóo loho joho. ⁶ Andá já ñacachi rí já xih̄in á:

—Candehé ndaja náhnu cúú ñuu ndúu ñuyiví ta yeḥe sáhdá ī chuun nuú ndaja táhan ña ta cuu jasá ī ña nū yóhó jáchi cuu jasá ī ña yo nū cúni mí ī jasá ī ña. ⁷ Ta quiahva ī ña nūun tá ná caxitún nuú ī caja cáhnún yeḥe —ñacachi rí xih̄in á.

⁸ Joo ñanducú ñehe Jesús tuhun nū ri já cáchi a já:

—Satanás, cuáhán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nū” —ñacachi Jesús xih̄in tiñáhá sacuaḥa cán.

⁹ Tá ñandihi já ndáca tucu tiñáhá sacuaḥa cán Jesús ñasahan rí ñuu Jerusalén xih̄in á. Ta najándaa rí a nū j̄icó j̄ini veñuhu cáhnu ndácañ cán já ñacachi rí já xih̄in á:

—Tá t̄a jivi ndusa jahyi Ndióxi cúun jácana mún chí ninu. ¹⁰ Jáchi nuú tuhun Ndióxi ndáa in tuhun ña cáchi a já:

Cahnda Ndióxi chuun nu tátó mé á ña ná candaa na yohó.

11 Ta ndiñehe ndáha ná yohó já quéa ná a ndícuēhe sahun tá ná cachihin sahun xihín yuu, cáchí tuhun Ndióxi —nācachi rí xihín Jesús.

12 Anda já nanducú ñehe Jesús tuhun nu rí já cáchí a já:

—Íin inga tucu nuú nācahyi tuhun Ndióxi ta cáchí a já: “A coto ndojó tohún Ndióxi, xitohún” —nācachi Jesús xihín rí cán.

13 Ña cán quéa naquee xóo tóo tiñáhá sacuaḥa nu Jesús ta naquee rí cuahan rí jáchi coó nañehe íni rí ndá quiahva coto ndojó chága rí a.

Tá nacasáhá cáxi tuhun Jesús tuhun Ndióxi nuú na estado Galilea (Mt. 4:12-17; Mr. 1:14-15)

14 Ta ndaja coo nandicó coo Jesús estado Galilea. Ta íin cuahá ndéē a jáchi nandicutú ndaa ínima mé á xihín ínima yii Ndióxi. Ta ndijáá ñayivi ndúu cán nacasáhá na cahan na saha mé á. 15 Ta nacasáhá a jánaḥa tuhun Ndióxi nuú ñayivi ini veñuhu in in ñuu na. Ta tóco ndihi na cahan vaha na sahá ña cāja mé á.

Tá nasahiin Jesús ñuu Nazaret (Mt. 13:53-58; Mr. 6:1-6)

16 Tá nandihí já cuanúhu Jesús ñuu Nazaret nuú nasahnu a. Ta mé quivi ndíquehe ndéē ná cán, nasahan mé á veñuhu. Ta nācāja tá quiahva sá cāja mé á já nandaca ndichi a cahvi a tuhun Ndióxi nuú ñayivi. 17 Nasahan na libro nācahyí profeta Isaías nu á ña ná cahvi a ña nuú na ndúu veñuhu cán. Ta tá nasuná a libro cán já nandíñehe á nu ndaa ña cáchí a já:

18 Chútú ndaa ínima i xihín ínima yii Ndióxi, jáchi nācaxi mé á yehe ña ná cuhun i caxi tuhun i tuhun saá ña vaha nuú na ndahvi.

Ta nāchindahá mé á yehe ña ná ndaja vaha i na íin cuéha ini.

Ta nāchindahá mé á yehe ña ná caxi tuhun i nuú na ndúu ndahá tiñáhá sacuaḥa ndá quiahva cāja na queta na ndáha rí.

Ta nāchindahá mé á yehe ña ná cuná i nduchú núu nā cuáá já ná cuu candehé na.

Ta nāchindahá a yehe ña ná candaa i ña ndóho ini ñayivi.

19 Ta nāchindahá mé á yehe ña ná cahan i xihín ñayivi ña sa naxinu coo tiempo vaha ndivaha jáchi cúní Ndióxi cāja cuahá ñamani xihín ñayivi, já cáchí ña nācahyi Jesús nuú na cán.

20 Tá nandihí já nāchicaji Jesús libro cán já nandiquiahva mé á ña nuú da cāja chuun veñuhu cán ta nasaco a. Na ñúhu veñuhu cán sándehe na nu mé á. 21 Saha ña cán quéa nācachi a já xihín ná:

—Mé quivi viti naxini ndó naxinu coo nuú tuhun nācahyí Isaías sanahá ndivaha —nācachi Jesús xihín na cán.

22 Ta ndijáá ñayivi cán cahan vaha na saha Jesús ta cātóntó na sahá ña ndató ndivaha tuhun cahan xihín ná. Já nacasáhá ndaca tuhún táhan na já cáchí na já:

—Á a juú da yóho cúu jahyi José cán — cáchí na cahan xihín táhan na.

23 Anda já nācachi Jesús xihín na cán já:

—Cāja i cuénta cúní ndó cachi ndó tuhun yóho xihín i: “Yohó, da cúu doctor ndaja vaha jihna mún.” Ta xihín ña yóho cúní ndó cachi ndó xihín i: “Ña náhnu naxini johó nde nācájún ñuu Capernaum cán, cāja ña mé ñuu mún yóho ná cuni nde.”

24 Anda já nācahan chága Jesús xihín ná já nācachi tucu a já:

—Mé a ndaa ná cahan i xihín ndo ña ni in túhún toho ñayivi co ndíquehe vaha na profeta mé ñuu da. 25 Mé a ndaa ná cahan i xihín ndo. Tá nasahiin profeta Elías sanahá já nasanduu cuahá ri na cuáan tañu ñayivi Israel ta nandoho ndivaha ini na jáchi naquixi in joco ndeé ndivaha sahá ña coó nācuun javi tixi uní cuia java. 26 Joo coo nāchindahá toho Ndióxi Elías ña ná cuhun da chindeé da na ndúu nación Israel cán. Ña nācāja Ndióxi quéa nāchindahá a da nuú in ña cuáan nasahiin ñuu Sarepta yati ñuu Sidón cán. 27 Ta quiahva já nasahiin ri tiempo tá nasacuu Eliseo profeta. Mé tiempo cán nasanduu cuahá na nandoho cuēhe táhyi nación Israel cán. Joo in túhún da nandaja vaha da cán, da naní Naamán,

da naquixi ñuu tóho naní Siria —nācachi Jesús xihín nā cán.

²⁸ Tá naxini johō nā ñúhu veñuhu cán ña nācachi Jesús xihín ná já naxojo ndivaha ini na xihín á. ²⁹ Já nandicuita na xihín á ta natavá nā Jesús yuhú ñuu. Ta cán najándaa na a jini yucú jícó nu cánúu ñuu cán. Já nācāhān nā chindahá nihni na a janda ninu. ³⁰ Joo nayaha Jesús cuahan nu ná já naquee a cuahan va.

In da nasandacaan ínimā quini ini
(Mr. 1:21-28)

³¹ Anda já naquee Jesús cuahan ñuu Capernaum, ña ndácaan estado Galilea. Ta cán nācasáhá jánaḥa tuhun Ndióxi nuú ñayivi mé quivi ndiquehe ndée ná. ³² Ta chí catóntó nā tá quiahva jánaḥa Jesús nu ná jáchi cáhan mé á tátuhun in da íin saḥa cahnda chuun.

³³ Mé ini veñuhu nu ndácaan Jesús jánaḥa cán nasandacaan in dataa, da ndácaan in ínimā quini ini. Já nācayuhú ínimā quini cán nu Jesús já cáchi rí já:

³⁴ —Jándacoo táji ndeḥe, Jesús, da ñuu Nazaret. Ndá cuéntá queá quíhvi nuún xihín nde. A vásún jándihún sahá nde. Sa xini vaha i yohó ta cándaḥa cáxi ini i ña cúun in da yíi nāchindahá Ndióxi —nācachi ínimā quini cán xihín Jesús.

³⁵ Anda já nācasáhá Jesús jánaḥa a ínimā quini ndácaan ini dataa cán já nācachi a já xihín rí:

—Caji yuhun ta janí da yóho —nācachi Jesús xihín rí.

Tá nācachi a já chí najándacava rí quini dataa nuú nā cán já naqueta rí ini da cán. Ta coó nācāja rí ni in ña núu xihín dá. ³⁶ Tóco ndihi ñayivi nasanduu cán nayihví ndivaha na. Ta já nācasáhá cáchi xihín táhan na já:

—Íin ndivaha sahá tuhun cáhan Jesús yóho jáchi xihín ña cáhan da sáhdá da chuun xihín ndée dá ta tává da ínimā quini ta chí queé rí cuahan rí —nācachi xihín táhan nā cán.

³⁷ Ta níi cúu ñuu válí cán nandicuita nuu tuhun saḥa Jesús.

Ndája vaha Jesús ña cúu xojo Simón Pedro
(Mt. 8:14-15; Mr. 1:29-31)

³⁸ Anda já naquee Jesús veñuhu cán já cuahan vehe in da naní Simón. Tá naxinu a cán já naquihvi a ini vehe da. Ta naxini a ña quíhvi ña cúu xojo Simón cán, ña chícaan cáhni ndeé ña. Chí naxica tahví nā nu Jesús ña ná ndaja vaha mé á ña. ³⁹ Anda já nācayati Jesús nu ña já nāsaḥnda chuun nuú cueḥe cán ña ná quee a. Já nāndindaa ña chícaan cáhni á ña chíivi laá nandicoo ña já nācasáhá cája ndíví ña ña cuxu na.

Ndája vaha Jesús cuahá nā quíhvi
(Mt. 8:16-17; Mr. 1:32-34)

⁴⁰ Tá naqueta nuu candii mé quivi cán já ñéhe ñayivi nā quíhvi ndúu nu ná naxinu nā nu Jesús. Tá nuú cueḥe nasandoho nā cán ta tá nāchinúu Jesús ndáḥa á jini in in na já nāndivaha na nācāja mé á. ⁴¹ Ta cuahá táhan nā quíhvi cán nācana ínimā quini ini na nācāja mé á. Ta tá quéta rí quini cán já cáyuhú cóhó rí nu Jesús já cáchi rí já:

—Yóho cúun in túhún jini já jahyi Ndióxi —cáchi rí xihín Jesús.

Joo najánaḥa Jesús ínimā quini cán ta co cúni a quiahva ñamaḥi ña ná caḥan rí jáchi xini vaha rí cán ña cúu mé á Cristo, da nāchindahá Ndióxi cacomí cuéntá sahá ñayivi.

Jánaḥa Jesús tuhun Ndióxi nuú ñayivi ndúu estado Galilea
(Mr. 1:35-39)

⁴² Tá nativi inga quivi itaan já naquee Jesús ñuu cán ta cuahan in nu cáa xóo. Joo nācasáhá ñayivi ndínducú nā mé á janda quiahva naxinu nā nu íin a jáchi cúni nā caji na nuú á ná a jándacoo a nā. ⁴³ Anda já nācachi Jesús já xihín ná:

—Ndítahan nuú i cūhun i caxi tuhun i xihín ñayivi ndúu java ga ñuu ña vaxi quivi cacomí Ndióxi cuéntá saḥa ná. Jáchi chuun yóho nāchindahá Ndióxi yeḥe vaxi i —nācachi Jesús xihín nā cán.

⁴⁴ Chí naxica nuu Jesús jánaḥa tuhun Ndióxi nuú ñayivi ini veñuhu estado Galilea cán.

5

Cája Jesús ña ná cuu tiin cuahā ná tiyacá
(Mt. 4:18-22; Mr. 1:16-20)

¹ In tañu íin Jesús yuhú tañuhú naní Genesaret. Ta a juú quiahva natāca ñayivi

chí ñacasáhá cándíhi na Jesús jáchi cúní na cuni joho na tuhun Ndióxi. ² Ta ñaxini Jesús ivi barco ndíta dó yati yuhú tañuhú cán. Coó ñá ñúhu ini dó jáchi sa ñaquee ñá tává tiyacá ta yati jíin va ndícata ñá ñúnu dá. ³ Anda já ñaquihvi Jesús ini in táhan barco cán, do cúu ñaha Simón. Ta ñacachi Jesús xihín Simón ña ná jácaxicá loho da do. Tá ñandihi já ñasacoo Jesús ini barco já ñacasáhá jánaña nuú ñayivi janda mé ini barco cán. ⁴ Ta tá sa ñandihi ñacahan xihín ñayivi cán já ñacachi a já xihín Simón:

—Cañehe barco yóho ná cuhun dó xoo nu cúná chága ticui ta jácanún ñúnun tavún tiyacá —ñacachi Jesús xihín dá.

⁵ Anda já ñanducú ñehe Simón tuhun nu Jesús já cáchi ñá já xihín á:

—Maestro, nini yaa ñuu ñacaja chúun ñe ña ndúcú ñe tává ñe tiyacá. Ta coó ñaha ñatavá ñe. Joo tá sa cáchi mé ndó já caji i tá íin cáchi ndo cuhun i jácana i ñúnu i ini tañuhú —ñacachi Simón xihín Jesús.

⁶ Ta tá ñacaja ña ñacachi Jesús xihín dá já a juú quiahva cuahá tiyacá ñatavá ñá chí janda ñúnu dá cán ñacasáhá táhnda.

⁷ Anda já ñacuu ndáha dá nuú java ga ñá tává tiyacá ñúhu ini inga barco ña ná quixi da chindeé táhan da xihín dá. Anda já ñaquixi ñá cán chindeé táhan da xihín Simón. Já ñajacutú ñá ndíví barco cán xihín tiyacá chí janda ndúcú cacoo dó cán cahá tañuhú xihín ña cuahá tiyacá ñaquee ini dó. ⁸ Tá ñaxini Simón Pedro cán ña yóho já ñacaxítí ñá nu Jesús já cáchi ñá já xihín á:

—A cáyati ndó nuú i, xitoho i jáchi cúu u in ña cája cuachi.

⁹ Já ñacachi Simón jáchi ñayihví ñá. Ta quiahva já ñayihví ñá ñachindeé táhan xihín dá cán sahá ña cuaha nahá tiyacá ñatavá ñá. ¹⁰ Quiahva já ñayihví ri Jacobo xihín Juan, ñá cúu jahyi Zebedeo. Ndíví ñá yóho chindeé táhan da xihín Simón cán. Ta já ñacachi Jesús já xihín Simón:

—A cáyihví tohún jáchi viti casáhún caca nuún tavún ñayivi tañu cuachi tá quiahva ñacajún tá ñatavún tiyacá ini tañuhú —ñacachi Jesús xihín dá.

¹¹ ña cán quéa tá ñatavá ñá cán barco ñá yuhú tañuhú cán já ñajándacoo ndihi da ñaha da ta ñandico ñá Jesús.

Tá ñandaja vaha Jesús in ñá ndóho cuehe táhyi

(Mt. 8:1-4; Mr. 1:40-45)

¹² Ta ñadaja coo íin Jesús in ñuu ta já ñaxinu coo in ñá ndóho cuehe táhyi nu á. Ta tá ñaxini ñá Jesús já ñacaxítí ñá nu á janda quiahva ñacani ndaa nu dá nu ñúhu. Já ñacasáhá xica tahví ñá nu á já cáchi ñá já xihín á:

—Cuu ñadaja vaha ndó yehe, xitoho i tá cúní ndo —ñacachi ñá xihín Jesús.

¹³ Anda já ñacani ndaa ndáha Jesús ñá ñá ñacachi a já:

—Cúní ña ná ndivahún ña cán quéa ñandivahún viti —ñacachi Jesús.

Tá ñacachi Jesús já chí ivi ñá ñandindaa cuehe táhyi ñandoho ñá cán. ¹⁴ Anda já ñasahnda Jesús chuun nu dá ña ná a ndícani ñá nuú ñayivi sahá ña ñacaja xihín dá. ña ñacachi a xihín dá quéa:

—Cuahán ñacacún jánahún mún nuú jutú. Ta ndítahan jocún ñaha nu Ndióxi tátuhun ñasahnda ley Moisés sanahá caji ña sa ñandivaha. Já ná candaa ini ñayivi ña sa ñandindaa va cuehe ñasandohún —ñacachi Jesús xihín ñá cán.

¹⁵ Joo ví ga ví ñacasáhá ndícuija nuu tuhun sahá ña cája Jesús. Sahá ña cán quéa táca cuahá ndivaha ñayivi cuni joho na nu cáhan mé á xihín ná. Ta jári táca ñá jáchi cúní ña ña ná ñadaja vaha mé á ña. ¹⁶ Joo tává xoo Jesús mé á xoo nuú coó ñayivi ta cán sa xica tahví a nu Ndióxi.

Ndája vaha Jesús in ñá ñaxihí tuchu saha

(Mt. 9:1-8; Mr. 2:1-12)

¹⁷ In tañu ndacaan Jesús ini in vehe jánaña nuú ñayivi. Tañu ña cán ñasanduu coo java ña fariseo xihín java ña jánaña ley Moisés. Tóco ndihi na cúu ná ña ñaquixi ndijáá ñuu válí ñúhu estado Galilea cán xihín ñuu válí ñúhu estado Judea xihín ñuu Jerusalén viti. Ta náha Jesús ña ñehe a ndée Ndióxi jáchi ndivaha ñayivi cája mé á. ¹⁸ Mé hora já ñaxinu coo java ñataa ta ñehe ñá in xito loho nu cándúhu in ñá quihvi, ñá ñaxihí tuchu saha. Ta cúní ñá jáquihvi ñá ñá cán ini vehe nu ndacaan Jesús cán já chindúhu dá ñá nu Jesús, ñacahan ñá. ¹⁹ Joo coo ñacuu caji ñá quihvi ñá jáchi ñanditútú ndivaha ñayivi ndúu na yéhe vehe cán.

Sahá ña cán quéea nandaa da jiní vehe já n̄tavá da teja cándójó cán. Já najánuu da x̄ito loho nu cándúhu mé da quíhvi cán tañu tóco ndihi ñayivi ñúhu ini vehe cán janda quiahva naxinu x̄ito da quíhvi cán nu ín Jesús. ²⁰ Tá naxini Jesús ña cándeé ini da ñéhe da quíhvi cán mé á já n̄acachi a já x̄ihín da quíhvi cán já:

—Candehé. Sa n̄acaja cáhnu ini i sahá cuachún viti —n̄acachi Jesús x̄ihín dá.

²¹ Anda já n̄acasáhá na jánaha ley Moisés x̄ihín na fariseo cán cáhán na: “Ndá da cúu da yóho ta ndá cuéntá quéea ndája núu da Ndióxi x̄ihín tuhun cáhan da. Jáchi ni in túhún toho ñayivi a cúu caja cáhnu ini sahá cuachi. In túhún jiní Ndióxi quéea cuu caja cáhnu ini sahá cuachi”, n̄acahán na cán.

²² Joo Jesús sa n̄acandaa va ini a ña cáhvi ini na cán sahá ña cán quéea n̄acachi a já x̄ihín ná:

—Ndávaha cáhán ndo já. ²³ Á cáhán ndo ña ihvi chága cachi i x̄ihín da yóho: “N̄acaja cáhnu ini i saha cuachún viti.” Á tá coó tá cachi i x̄ihín dá: “Ndicoo ta cuanúhu.” ²⁴ Candehé vaha ndo ná naha i nu ndo ña ín sahá i, da n̄achindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —n̄acachi Jesús x̄ihín na cán.

Anda já n̄acachi tucu a x̄ihín da naxihi tuhuhu saha cán já:

—Ta viti cáhan i xuhun, cuándacoo ndiquehe x̄ito lohún ta cuanúhu.

²⁵ Tá n̄acachi Jesús já chí ivi laa n̄andicoo da nu ndíhi ñayivi ndúu cán jáchi n̄andivaha saha dá. Ta n̄andiquehe da x̄ito loho da nu n̄asandúhu dá. Anda já cája cáhnu da Ndióxi naquee da cuanúhu dá vehe da. ²⁶ Ta tóco ndihi ñayivi n̄asanduu cán n̄acatontó na ta n̄acaja cáhnu na Ndióxi sahá ña n̄acaja Jesús. Ta a juú quiahva yíhvi na já n̄acachi na já:

—Ña náhnu ndivaha va quéea n̄axiní quivi viti —n̄acachi na.

Cána Jesús in da naní Leví, da cáhan na Mateo x̄ihín, ña ná caca da x̄ihín á (Mt. 9:9-13; Mr. 2:13-17)

²⁷ Tá n̄andihí já naquee Jesús x̄ica cuahan. Ta cán naxini a in da j̄ataca jiuhún cuéntá impuesto. Mé da yóho naní da Leví ta ín coo da nu s̄acoo na j̄ataca jiuhún

cuéntá impuesto cán. Anda já n̄acachi Jesús já x̄ihín dá:

—Naha quí candicun yehe —n̄acachi a x̄ihín dá.

²⁸ Anda já n̄andaca ndichi Leví cán ta najándacoo da tóco ndihi ñaha cán ta já n̄acasáhá ndíco da Jesús x̄ica da. ²⁹ Tá n̄andihí já n̄acavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na j̄ataca jiuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. ³⁰ Joo na fariseo x̄ihín na jánaha ley Moisés n̄acasáhá na cáhan núu na sahá na x̄ica tuun x̄ihín Jesús já n̄acachi na já:

—Ndá cuéntá quéea x̄ixi ndó x̄ihín na j̄ataca jiuhún cuéntá impuesto ta x̄ihín java ga na cája cuachi —n̄acachi na cán x̄ihín na x̄ica tuun x̄ihín Jesús.

³¹ Anda já n̄anducú ñehe Jesús tuhun nuú na cán já n̄acachi a já x̄ihín ná:

—Ñayivi ín vaha co x̄iní ñúhú toho na da cája tátá ñahá joo na quíhvi, na cán cúu na x̄iní ñúhú da cája tátá ñahá. ³² Ta yehe coó vaxi toho i cana i na sa ín vaha. Vaxi i cana i ñayivi, na cája cuachi ña ná jándacoo na cuachi cája na —n̄acachi Jesús x̄ihín na cán.

Ndáca tuhún na Jesús ndá cuéntá quéea co x̄ijuhun da x̄ica tuun x̄ihín á (Mt. 9:14-17; Mr. 2:18-22)

³³ Anda já n̄acasáhá ndáca tuhún tucu na Jesús já cáchi na já x̄ihín á:

—X̄iní nde ña x̄ica tahví ndivaha va na n̄asaxica tuun x̄ihín Juan ta j̄ari x̄ijuhun ndivaha va na cán. Ta quiahva já cája na fariseo. Joo na x̄ica tuun x̄ihín yóhó jan ní tiempo x̄ixi na pan ta x̄ihi na vino. Ndá cuéntá quéea cája na já —n̄acachi na cán x̄ihín Jesús.

³⁴ Anda já n̄anducú ñehe Jesús tuhun nu ná já cáchi a já x̄ihín ná:

—Cúu á tátuhun tá cája na víco tándaha ta ín va mé da tándaha cán x̄ihín ná já quéea co ndítahan nu ná cajuhun na. Quiahva já ín ri x̄ihín yehe va. Coó saha cajuhun na x̄ica tuun x̄ihín i jáchi ín vi x̄ihín ná viti. ³⁵ Joo vaxi quivi ndindaa i nuú na yóho. Anda já casáhá na yóho cajuhun na —n̄acachi Jesús x̄ihín na cán.

³⁶ Anda já nasacu Jesús quiahva nu ná já nacachi a já xihín ná:

—Ni in túhún toho ñayivi co sáhdá na in túhún jáhma saá já ndicahmá na in jáhma yatá. Jáchi tá ná caja na já jativí na jáhma saá cán. Ta ni co ndíque táhan vaha in jáhma yatá tá jándaha na ña xihín in túhún jáhma saá. ³⁷ Ta ni in túhún toho ñayivi co táan na vino saá ini in níi yatá. Jáchi tá ná caja na já já queá jácandí va vino saá níi yatá cán. Ta xihín ña yóho tiví níi cán ta tiví ri dó cúu vino cán va. ³⁸ Ña ndítahan caja na queá taán na vino saá ini níi saá já ná cuu cañuhu vaha dó cán ta mé níi co cáhndí a. ³⁹ Ta ni in túhún táhan na xihí vino yatá co xíca na vino saá coho na jáchi cáhí na ña vaha chága xihí dó yatá —nacachi Jesús xihín quiahva sácú a nuú na cán.

6

Tá na xíca tuun xihín Jesús túhun na yucu jini trigo quivi ndíquehe ndée ñayivi
(Mt. 12:1-8; Mr. 2:23-28)

¹ In quivi ndíquehe ndée ñayivi nani xíca Jesús cuahan xihín na xíca tuun xihín á já nayaha na tañu nuú naxutu na trigo. Já nacasáhá na cán túhun na yucu jini trigo cán já tává na trigo já chíníhni ndáha ná a ta sáxí na cásahan na. ² Tá naxini java na fariseo cán ña cája na já nacachi na já:

—Ndávaha cája ndó chuun ña co ndítahan caja ndó quivi ndíquehe ndée yo —nacachi na fariseo cán xihín na xíca tuun xihín Jesús.

³ Anda já nanducú ñehe Jesús túhun nu ná já nacachi a:

—Á a ñaha cahvi ndó nuú túhun Ndióxi nu cáhan sahá ña nacaja David sanahá tá nacuico da xihín na xíca xihín dá. ⁴ Ña nacaja da cán queá naquihvi da ini veñuhu Ndióxi ta natiiin da pan yii já naxixi da ña ta nasahan da ña nuú na xíca xihín dá ña ná cuxu na. Joo jutú cuití va cúu na ndítahan nuú cuxu ña cán, nduu. ⁵ Ta yehe va, da nachindahá Ndióxi nduu ñayivi ín sahá i cahnda i chuun sahá quivi ndíquehe ndée ñayivi —nacachi Jesús xihín na cán.

Tá nandaja vaha Jesús in da nahichí ndáha
(Mt. 12:9-14; Mr. 3:1-6)

⁶ Inga tucu quivi ndíquehe ndée ná já naquihvi Jesús ini in veñuhu ta nacasáhá jánahá nu ná. Ta ini mé veñuhu cán nasandacaan in dataa, da nahichí ndahá cuáha. ⁷ Ta ndaja coo na jánahá ley Moisés xihín na fariseo nání na Jesús sándehe na ña á ndaja vaha mé á da cán quivi ndíquehe ndée na. Ta xihín ña yóho cáhán na cuu ñehe ini na jácojo na cuachi jatá. ⁸ Joo sa xini va Jesús ña cáhvi ini na cán. Sahá ña cán queá nacachi a já xihín da nahichí ndáha cán já:

—Cuándacoo ta candichi mahñú yóho —nacachi Jesús xihín dá.

Anda já nandaca ndichi da cán nuú Jesús.

⁹ Anda já nacasáhá Jesús cáhan xihín java ga na ndúu cán já nacachi a já xihín ná:

—Cuni johó ndó ná ndaca túhún i ndohó. Ndía cáhí ley ndítahan caja í mé quivi ndíquehe ndée ñayivi. Á chindeé yo ñayivi á caja í ña núu xihín ná. Á jácací na á cahní yó na —nacachi Jesús xihín ná.

¹⁰ Anda já nandicoto nihni Jesús nuú ndihi na nacava nuu ndúu xihín á cán. Ta nacachi a já xihín da nahichí ndáha:

—Jándacaa ndáhun.

Ta tá najándacaa da cán ndáha dá chí ivi laá nandivaha ndáha dá. ¹¹ Joo tóco ndihi na java ndúu cán naxojo ndivaha ini na. Já nacasáhá ndítuhún xihín táhan na ña ndá queá cuu caja na já ná cuu jándihi na saha Jesús.

Tá nacaxi Jesús uxu ivi da cacuu apóstol
(Mt. 10:1-4; Mr. 3:13-19)

¹² Mé tañu já naquee Jesús nasahan in jini yucu caça tahví a nu Ndióxi. Ta níi cúu ñuú naxica tahví a nu Ndióxi. ¹³ Ta tá sa nativi já nacana mé á na xíca xihín á. Ta tañu na cán nacaxi a uxu ivi da cacuu da in táhdá ta cananí apóstol, da chindahá a caca nuu cáhan túhun Ndióxi. ¹⁴ Nacaxi a da naní Simón, da nasacu tucu a quivi cananí Pedro. Ta nacaxi a da cúu ñani Pedro, da naní Andrés. Ta nacaxi a Jacobo xihín Juan xihín Felipe xihín Bartolomé ¹⁵ xihín Mateo xihín Tomás xihín Jacobo, da cúu jahyi Alfeo. Ta nacaxi a Simón, da naxica cuéntá na cananista. ¹⁶ Ta nacaxi ri a Judas, ñani Jacobo xihín Judas Iscariote, mé da najicó túhún Jesús tá nu ndihí.

Jánaha Jesús nuú cuahá ñayivi
(Mt. 4:23-25)

¹⁷ Tá nandihí nanuu Jesús jini yúcu xihín na xíca tuun xihín á já naxinu a yojó ndaa nasahjin a xihín ná. Ta cán nasanduu ri cuahá ndivaha ñayivi táhan na naquixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihí ñayivi yóho naxinu na cuni johó na nu cáhan Jesús. Ta naxinu na jáchi cúní na ña ná ndaja vaha mé á na. ¹⁸ Ta tóco ndihí na nasañuhu ínima quini ini nandaja vaha ri Jesús na jáchi natavá a ínima quini nasañuhu ini na. ¹⁹ Ta tóco ndihí ñayivi cúní na caní ndaa ndáha ná Jesús jáchi xihín ndée mé á ndája vaha tóco ndihí na quíhvi.

Jánaha Jesús ndá quiahva cajii chága ini
já ná a cánduu cuéha yo
(Mt. 5:1-12)

²⁰ Tá nandihí já nasandehé Jesús nuú na xíca tuun xihín á já nacasáhá cáchí a já xihín ná:

—Tahví nacuu ndó, na cándahví jáchi ndóhó cúu na cacomí Ndióxi cuéntá saha.

²¹ Tahví nacuu ndó, na cuíco viti ñúhú jáchi ndóhó cacuu na chutú ndaa tá ná ndihí.

Tahví nacuu ndó, na sácu viti jáchi ndóhó cacuu na casáhá cuacu tá nu ndihí.

²² Tahví nacuu ndó tá cándají ñayivi ndóhó ta casáhá táxi na ndóhó á cánahá na xihín ndó. Ta tahví nacuu ndó tá quehe núu na ndóhó sahá ña cáhan na ña cúu ndó na núu ndivaha. Tá ná caja na tóco ndihí ña yóho xihín ndó sahá ña cándeé ini ndó yehe, da nachindahá Ndióxi nduu ñayivi, tahví nacuu ndó. ²³ Já queá ndítahan cájii ndivaha ini ndó mé quívi já jáchi sa naxica tahví Ndióxi in ña vaha ndivaha ín indiví quiahva nu ndó. Jáchi tá quiahva cája xíxi na jan xihín ndó viti quiahva já nacaja xíxi ri tásánu jícó na jan xihín na nasacuu profeta sanahá.

²⁴ Joo ndáhvi nacuu ndó, na cuicá viti jáchi sa nacajii ndivaha va ini ndó ñuyívi yóho.

²⁵ Ndáhvi nacuu ndó, na nachutú ndaa viti jáchi ndóhó cúu na quixi tama nuu.

'Ndáhvi nacuu ndó, na sácu viti jáchi ndóhó cúu na cuacu xihín ña cacuéha ini ndó.

²⁶ 'Ndáhvi nacuu ndó tá ná casáhá ñayivi cahan vaha na saha ndó jáchi quiahva já nacahan vaha tásánu jícó na jan sahá na profeta túhún nasanduu najándahvi ñayivi sanahá.

Xíní ñúhú quíhvi ini na co cúní mí
(Mt. 5:38-48; 7:12)

²⁷ Tóco ndihí ndó, na xíní johó nu cáhan i yóho, ndítahan quíhvi ini ndó na co cúní ndóhó. Ta xíní ñúhú caja vaha ndó xihín ndá na cándají ndóhó. ²⁸ Xíní ñúhú caça tahví ndó nu Ndióxi ña ná caja yii á na nachicaan cháhan jata ndó. Ta caça tahví ndó nu Ndióxi sahá na cánahá xihín ndó. ²⁹ Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na. Ta tá ná candaa na jahmá ndee ndó quiahva ndó ñamaní ña ná quehe ri na cotó ndó tá já cúní na. ³⁰ A cájihnda ndó nuú na xíca ñaha nu ndó. Ta ndá na cándaa ña cúu ñaha ndó, a ndíndaca ndó ña nu ná. ³¹ Tá quiahva cúní ndó caja ñayivi xihín ndó quiahva já ndítahan caja ri ndóhó va xihín ná.

³² Jáchi tá quíhvi ini ndó ñayivi sahá ña quíhvi ri ini na cán ndóhó va, ndía vaha cája ndó jáchi quiahva já cája ñayivi quini. ³³ Ta tá cája vaha cuití ndó xihín na cája vaha xihín mé ndó, ndía vaha cája ndó jáchi quiahva já cája ri ñayivi quini va. ³⁴ Ta tá sahan tóo ndó ñaha ndó nuú ñayivi sahá ña cáhan ndó caja na ñamaní xihín mé ndó, ndía vaha cája ndó jáchi quiahva já cája ri ñayivi quini va. ³⁵ Joo ndóhó, xíní ñúhú quíhvi ini ndó na co cúní ndóhó. Ta xíní ñúhú caja vaha ndó xihín ñayivi. Ta xíní ñúhú quiahva tóo ndó ñaha ndó ta a cándati ndó ña ná nducú ñehe na cán ña nu ndó. Tá ná caja ndó já já queá ñehe táhvi ndó ña vaha ndivaha caja Ndióxi ta nduu ndó jahyi Ndióxi, mé a cúu Ndióxi cáhnu ndivaha. Jáchi mé Ndióxi cándahví ini a ndá na co ndíquiahva ndixahvi nu mé á ta cándahví ri ini a ñayivi quini va. ³⁶ Xíní ñúhú táhnda ini ndó sahá ñayivi tá quiahva táhnda ini Ndióxi saha ná.

*Co ndítahan candehé ndaa yó ñayivi
(Mt. 7:1-5)*

³⁷ A candehé ndaa ndó ñayivi já ná a caja Ndióxi já xihín ndo. A chícáan ndó cuachi jatá inga na já ná a quéhe Ndióxi cuéntá sahá cuachi mé ndó. Caja cáhnu ini ndó saha ná já ná caja cáhnu ini Ndióxi saha mé ndó. ³⁸ Jasá ndo ñaha nuú ñayivi já ná ñehe ndó ñaha nu Ndióxi. Cúú á tátuhun cája ñayivi tá jáchutú na in ndoño xihín nuní ta quíji nihni na ndoño já ná ndituun a ta jácuyu chága na nuní já táan na ña ini a janda quiahva xíta ña yuhú ndoño cán. Tá quiahva cája mé ndó xihín ñayivi quiahva já caja Ndióxi xihín ndo jáchi tá cuaha sahan ndó nuú ñayivi quiahva já cuaha quiahva ri Ndióxi nu ndóhó va —ñacachi Jesús xihín na cán.

³⁹ Tá nandihí já nasacu a quiahva nu ná já ñacachi a já:

—A cuú toho caja in ta cuáá candaca da inga da cuáá cuhun da jáchi ndívi já da ndicava da yávi. ⁴⁰ Ni in túhún toho da xíca jácuaha tiaha chága nu mé da jánaha ñaha cán. Joo tá ná xinu quívi já catiaha va da da já candaá ini da tóco ndihí ña xíní da najánaha ñaha cán.

⁴¹ Jáchi ndá cuéntá quéa sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúú á tátuhun ndácaan in xehe loho nduchú núu ñani táhan ndó nani ndácaan in yíto ndúhu cáhnu ini nduchú núu ndo.

⁴² Ta tá a cuú cuni ndó yitó cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” Jándahvi ndó mé ndó xihín ña cája ndó. Xíní ñúhú tavá ndo yíto cáhnu ndácaan nduchú núu mé ndó já ná nuna nu ndó cuni va da ndó já ná cuu tavá ndó xehe loho ndácaan nduchú núu ñani táhan ndó —ñacachi Jesús.

Tá xíní yo cuíhi in yíto já candaá ini ndá yíto cúú dó

(Mt. 7:17-20; 12:34-35)

⁴³ Anda já ñacasáhá tucu a cáchi já:

—Coó toho yitó va da cúun cuíhi quini nuu. Ta ni coó yitó quini cuu cuun cuíhi va da nuu. ⁴⁴ Jáchi xihín cuíhi cúun nuú

in in yíto candaá ini ndá yíto cúú dó. A vája cúú tuhun sáhdá ñayivi tití ñúhu nuú tohíñú. Ta ni a vája cúú tuhun sáhdá na uva nuú tonáña yúcu. ⁴⁵ In ta va ha cáhan da ndinuhu ña va ha jáchi ndinuhu ña va ha ñúhu ínimá dá. Ta in ta quini cáhan da ndinuhu ña núu jáchi ña núu quéa ndácaan ínimá dá. Jáchi yúhu ñayivi cána tóco ndihí ña nandicutú ñúhu ínimá ná —ñacachi Jesús.

Sácú Jesús quiahva sahá ivi da ñacava ha vehe

(Mt. 7:24-27)

⁴⁶ Cáhan tucu Jesús já cáchi a já:

—Ndá cuéntá quéa cáhan xitoho nahá ndó yehe ta co cája ndó ña sáhdá i nu ndo. ⁴⁷ Ná cáhan i xihín ndó ndaja in da vaxi nuú i cuni johó da tuhun cáhan i ta cája da ña cáchi i. ⁴⁸ Cúú dá tátuhun in dataa ñacava ha vehe. Tá ñacasáhá da tává da sahá vehe da já nasata cúná da já ná chinúu da vehe da jatá tóto. Ta tá nasahnu cuahá yuta já ñacani ndaa ñihí ticuíí cán jatá vehe da. Joo coó nandicava vehe da ñacaja ticuíí cán jáchi tóyíí cándichi vehe da jatá tóto cán. ⁴⁹ Joo ndá da xíní johó nu cáhan i ta co cája da ña cáchi i, cúú dá tátuhun inga dataa, da ñacava ha vehe nu ñúhu uun. Ta coó nasata da nuú nanduxu sahá. Ta tá nasahnu cuahá yuta já ñacani ndaa ñihí ticuíí cán jatá vehe da. Ta xihín ña yóho nandicava vehe da ta chí nandihí saha chí uun —ñacachi Jesús.

7

Tá ndaja va ha Jesús in da cája chúun nuú in jefe soldado

(Mt. 8:5-13)

¹ Tá nandihí ñacahan Jesús xihín ñayivi cán já ñaquee a cuahan chí Capernaum. ² Mé ñuu Capernaum cán nasahin in dataa, da sáhdá chuun nuú soldado ñaquixi ñuu Roma. Mé da yóho nasahin in mozo da ta quíhvi ndiva ha ini da mozo da. Joo ndaja coo mé mozo da yóho quíhvi ndeé da ta janda ja chá quivi da. ³ Tá ñaxini johó da sáhdá chuun nuú soldado yóho sahá Jesús já ñachindahá da java na sacua ha táhan na ñaquixi chíchi Israel já ná cacá na ñamani nuú Jesús quixi a ndaja va ha mozo da cán.

⁴ Tá naxinu na cán nuú Jesús nacasáhá xíca tahví ndivaha na nu á já cáchi na já xihin á:

—Íin sahá da sáhdá chuun nuú soldado yóho ña ná chindeé ndó da. ⁵ Jáchi quíhvi ini da tóco ndihi ñayivi ndúu nación Israel ta sa mé da jan cúu da nasahnda chuun ña ná cavaha na veñuhu nde —nacachi na cán xihin Jesús.

⁶ Anda já naquee Jesús cuahan xihin ná. Joo tá sa jalóho xinu coo na vehe da sáhdá chuun nuú soldado cán já nachindahá da java amigo da nuú Jesús ná cahan na yuhú nu da já nacachi na já:

—A jándihi ndó mé ndó ndihvi ndó vehe e, xitoho i jáchi coo saha toho i ña ná ndihvi ndó vehe e. ⁷ Sahá ña cán quea coo nasahan ndeé ini i cuhun i ndinducú u mé ndó. Joo janda nu in ndó jan cahnda ndó chuun ña ná ndivaha mozo i já ndivaha da. ⁸ Jáchi ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da ña ná cuhun da nu cuni mí i cuhun da ta cuahan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caja da ña sáhdá i ta caja da ña —nacachi na.

⁹ Tá naxini johó Jesús tóco ndihi ña nacahan amigo da sáhdá chuun nuú soldado cán xihin á já nacatontó a xihin dataa cán. Anda já nasandehé a nu tóco ndihi ñayivi ndíco cuahan cán já nacachi a já xihin ná:

—Mé a ndaa ná cahan i xihin ndo ña a náha cuni i tañu na Israel in da cándeé cáhnu nahá ini Ndióxi tá quiahva cándeé cáhnu ini da yóho Ndióxi —nacachi Jesús xihin na ndíco jatá cán.

¹⁰ Ta tá nandicó coo na cúu mozo da sáhdá chuun nuú soldado cán vehe da já naxini na ña sa nandivaha va da nasaquíhvi cán.

Tá najánditacu Jesús jahyi in ña cuáan

¹¹ Tá sa nayaha ña yóho já naquee Jesús cuahan chí in ñuu naní Naín xihin na xíca tuun xihin á. Ta a juú quiahva cuahá ñayivi ndíco cuahan. ¹² Tá naxinu coo a yati yuhú ñuu cán já naxini a ñayivi ñéhe na in ndii cuahan na jánduxu na. Mé ndii cán nasacuu da in túhún já nu náná da, ña cúu

ñá cuáan. Ta a juú quiahva cuahá ñayivi ñuu cán ndáca táhan xihin ña cuahan na jánduxu na jahyi ña. ¹³ Tá naxini Jesús ña já natahvi ini a saha ña. Anda já nacachi a já xihin ña:

—A cuácu gaun.

¹⁴ Anda já nacayati Jesús nuú sató ndii cán já nacani ndaa ndáha á do. Anda já nasacuita na ndójo sató ndii cán. Ta nacahan Jesús xihin da cúu ndii cán já nacachi a já xihin dá:

—Yehe cahan i xuhun, da tacú, cuándacoo —nacachi Jesús xihin dá.

¹⁵ Anda já nasacoo da nasacuu ndii cán ta nacasáhá da cahan da. Já nandiquiahva Jesús da nu náná da. ¹⁶ Tá naxini tóco ndihi ñayivi cuahan cán ña nacaja Jesús já yíhvi na. Ta nacasáhá na cája cáhnu na Ndióxi já cáchi na já:

—In profeta cáhnu ndivaha cúu da naxinu coo tañu mí yóho viti.

Ta nacachi tucu na:

—Ndióxi quea naxinu coo nu yo ña ná chindeé a ñayivi cuéntá mé a —nacachi na.

¹⁷ Ta níi cúu ñayivi cuéntá estado Judea xihin na ndúu yati cán nacandaa ini na saha ña nacaja Jesús cán.

Juan, da jácandúta ñayivi, nachindahá da java da xíca xihin dá nu Jesús

(Mt. 11:2-19)

¹⁸ Ta ndaja coo nañehe Juan, da jácandúta ñayivi, tuhun saha tóco ndihi ña nacaja Jesús yóho jáchi nandicani na xíca xihin Juan ña nu dá. Sahá ña cán quea nacana da ivi táhan da xíca xihin da ¹⁹ já nachindahá da na nu Jesús ña ná ndaca tuhún na mé á á jivi ndusa cúu á Cristo, mé a chindahá Ndióxi cacomí cuéntá saha ñayivi, á ndítahan candati na inga ga quixi. ²⁰ Tá naxinu na xíca xihin Juan nu in Jesús já nacachi na já xihin á:

—Da naní Juan, da xíca jácandúta ñayivi, da cán cúu da nachindahá ndehe vaxi nde ndaca tuhún nde ndohó á cúu ndó Cristo, ña chindahá Ndióxi cacomí cuéntá saha ñayivi, á ndítahan candati nde inga ga —nacachi na cán xihin Jesús.

²¹ Mé hora naxinu coo na cán nu in Jesús já naxini na nandaja vaha Jesús cuahá ñayivi quíhvi, na nasandoho tá nuú cuehe.

Ta natavá a ínima quini nasañuhu ínima java na. Ta cuahá ndivaha na cuahá nandinuna nuu nacaja Jesús. ²² Sahá ña cán quéa tá nanducú ñehe Jesús tuhun nuú na xíca xihín Juan cán já nacachi a já xihín ná:

—Cuahán ndó ndicani ndó nu Juan saha tóco ndihi ña naxini ndó cája i xihín tóco ndihi ña naxini johó ndó cahán i. Ta ndicani ndó nu dá ña ndínuna nuú na cuahá ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. ²³ Tahví nacuu na co jándacoo ña cándeé ini na yehe —nacachi Jesús xihín ná.

²⁴ Tá naquee na nachindahá Juan cán cuahan na já nacasahá Jesús cahán saha Juan nuú ñayivi cán já cáchi a já xihín ná:

—Ndía nacahán ndó cuni ndó tá naqueta ndó nasahan ndó sándehe ndó Juan yucú íchí cán. A juú da cán cúu ta láhá já quíji nuu da tátuhun quíji nuu in tíyoó cája tachí. ²⁵ Ndía naqueta ndó candehé ndó. A juú da cán cúu ta ndíxi jahmá lándá ndivaha. Sa xíni vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá ta cája da ña cuni yiquí cuñu da, mé da cán cúu da ndúu vehe rey cuití va.

²⁶ Ndía nasahan ndó naxini ndó cán. Á coó nasahan ndó cuni johó ndó nu cahán in da cúu profeta nu ndó. Mé a ndaa da cán cúu dá in profeta ta ín chága saha dá a juú ga inga profeta nasanduu sanahá. ²⁷ Jáchi mé Juan cúu dá da cahán tuhun Ndióxi saha tá cáchi a já:

Chindahá i in da canuú cuhun nu mún, já ná caja tiahva da íchí nuú quisún, já nacahyi a sanahá.

²⁸ Candehé ndó ná cahán i xihín ndó. Tañu tóco ndihi ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúu ná na coó saha, na cán cúu na cáhnu chága a juú ga Juan —nacachi Jesús.

²⁹ Tá naxini johó tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahán já cúu na najácandúta Juan ta tañu na cán nasañuhu java ri na játaca jjuhún cuénta

impuesto. ³⁰ Joo na fariseo xihín na jánaha ley Moisés, na coó najácandúta Juan cán, na cán cúu na naqueehe núu na tóco ndihi ñamaní cuni Ndióxi caja xihín ná. ³¹ Anda já nacachi Jesús já xihín ná:

—Ná cahán i xihín ndó ndaja ín ñayivi ndúu tiempo viti. ³² Cúu ná tátuhun na valí sácoo sájiquí nuú yahvi ta cáyuhú na nuú java ga na valí ndúu cán já cáchi na já: “Nativí nde tótíví nu ndo joo coó naxeen ndó cata sahá ndó. Ta naxita cuéha ndivaha nde nu ndo ta ni coó nasacu ndó.”

³³ Quiahva já ín ñayivi ndúu tiempo viti jáchi naquixi Juan, da jácandúta ñayivi ta naxijuhun da ta coó naxihi da vino joo nacachi ndó saha dá ña ndacaan ínima quini ini da. ³⁴ Ta tá naxinu yehe, da nachindahá Ndióxi nduu ñayivi ta xíxi i pan ta xíxi i vino já nacasahá cáchi ndó sahá i ña cúu u in ta ndehé ndivaha ta xíxi ndivaha i. Ta cáchi ndó ña cátoó ndivaha i cacuu u amigo na cája cuachi xihín na játaca jjuhún cuénta impuesto. ³⁵ Joo na cuni cándaa ini ña ndaa, na cán cúu na cándaa ini ña cája Juan xihín yehe ña ndaa —nacachi Jesús xihín na cán.

Ín Jesús vehe Simón, da cúu fariseo

³⁶ In táhan da fariseo nacana da Jesús ña ná cuhun a cuxu a vehe da. Anda já nasahan Jesús vehe da já nasacoo a nu mesa. ³⁷ Joo ndaja coo in ñañáha, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihín in yúyú alabastro, ña nachutú ndaa xihín síti támi sahan nacasaá ña nu Jesús. Mé ñañáha yóho cúu ña in ña cája cuahá cuachi. ³⁸ Ta sácu ña nacaxítí ña saha Jesús ta xihín ticuú nuu ña najácuchu ña sahá. Ta tá nandihí já najáhíchi ña do xihín ijí jini ña. Anda já natatí yúhu ña sahá. Ta nachojó ña síti támi sahan cán jatá saha á. ³⁹ Tá naxini mé da fariseo, da nacana Jesús vehe da cán ña yóho já nacahán da já: “Tá profeta ndusa ná cacuu da yóho ta sa cándaa va ini da ndá ña cúu ña cáni ndaa ndáha saha dá jáchi cúu ña ña cája cuahá cuachi”, nacahán Simón cán.

⁴⁰ Anda já nacachi Jesús já xihín da fariseo cán:

—Candehé Simón, cuni johó ná cahan i xuhun —nacachi Jesús xihin dá.

Anda já nacachi Simón cán já xihin Jesús:

—Cahan mé á xihin i, xitoho i —nacachi da.

⁴¹ Anda já nasacu Jesús in quiahva nu dá já nacachi a já xihin dá:

—Nasanduu ivi dataa ta nasayicá da jiuhún nu mé da sahan too a cán. In da nasayicá uhun ciento ta inga da nasayicá ivi jico uxu. ⁴² Ta ni in da cán co ndée da chahvi da ña yicá da sahá ña cán quea nacaja cáhnu ini da sahan too jiuhún cán sahá ña yicá ndívi da cán. Ta viti cachún xihin i, Simón, ndá da cáhún tixi ndívi da yóho cacuu da da quihvi ini chága mé da, da nacaja cáhnu ini saha cuéntá ña nasayicá da cán —nacachi Jesús xihin Simón.

⁴³ Anda já nanducú ñehe Simón cán tuhun nu Jesús já nacachi da já xihin á:

—Cája i cuéntá ña quihvi ini chága da nasayicá cuahá jiuhún cán nu dá —nacachi da.

Anda já nacachi Jesús já xihin Simón:

—Mé a ndaa cáhún —nacachi a.

⁴⁴ Anda já nasandehé Jesús ña nachojo síti sahá cán já nacachi a já xihin Simón:

—Candehé vaha ñañaha jan, Simón. Naquihvi i vehún joo coo nasahún ticuú ndoo sahá i. Joo ñañaha yóho najacuchu ña sahá i xihin ticuú nu ña. Ta tá nandihí já najahichí ña sahá i xihin ijí jiní ña.

⁴⁵ Ta yóho, coo natatí yuhún sajóho yehe tá nasaa i vehún. Joo ña yóho, janda nani naquihvi ña vehún tátí yuhu ña sahá i. Ta anda viti ñuhú cája ña a. ⁴⁶ Ta ni coo nachojó tohún síti jiní i tá naxinu i vehún. Joo ña yóho nachojó ña síti támi sahan sahá i. ⁴⁷ Ta cáhí i xuhun, Simón, ña xihin ña cája ña yóho nahá ña mé a ndaa quihvi ini ña yehe jáchi nacaja cáhnu ini i sahá cuachi ña vatí cuahá ndivaha cúu á. Joo ndá na cáhán ña chá cuití va cuachi cája cáhnu ini i saha, na cán cúu ri na chá cuití quihvi ini na yehe —nacachi Jesús xihin Simón.

⁴⁸ Anda já nacasáhá cáhí a já xihin ñañaha cán:

—Sa nacaja cáhnu ini i sahá cuachún viti.

⁴⁹ Ta tóco ndihí java ga na nataca ndúu coo nu mesa vehe Simón cán nacasáhá cáhí xihin táhan na já:

—Ndá ta cúu da yóho jáchi janda cuachi cája ñayivi cája cáhnu ini da saha —nacachi xihin táhan na cán.

⁵⁰ Anda já nacachi Jesús já xihin ñañaha cán:

—Nacacu ndaa ínimun jáchi nacandee ínún yehe. Cuanúhu ta a ndícani ga ínún viti —nacachi Jesús xihin ña.

8

Tá java najihí chindeé na Jesús

¹ Tá nandihí nayaha ña yóho já nacasáhá Jesús xica nuu a cuahá ñuu náhnu xihin ñuu válí ña caxi tuhun a xihin ná ña sa nacayati quiví cacomí Ndióxi cuéntá saha ná. Ta ndíco ndíhuxu ivi na apóstol cán mé á. ² Ta nasandaca táhan java ri najihí xihin á, na natavá mé á ínimá quini ini xihin na nandaja vaha mé á nuú cuhe nasandoho na. Tañu najihí yóho nasandacaan ña naní María, ña cahan na Magdalena xihin. Mé María yóho cúu ña natavá Jesús usa ínimá quini ini. ³ Ta catáhan ri in ña naní Juana cuahan ña xihin na cán. Mé Juana cúu ña ñajihí da naní Chuza, da cómi cuéntá sahá vehe Herodes. Ta jári in ña naní Susana naxica nuu ña xihin Jesús. Cuaha chága najihí naxica nuu na xihin á ta nachindee ñahá na xihin ña cómi na.

Sácú Jesús quiahva sahá in da sátá tata

(Mt. 13:1-17; Mr. 4:1-12)

⁴ Naqueta ñayivi cuahá ñuu jáchi cúní na cuni na Jesús. Ta tá sa nataca cuahá ñayivi nu in Jesús, nacasáhá cahan xihin ná. Ta nasacu a in quiahva nu ná já nacachi a já xihin ná:

⁵ —In da sátá tata naquee da cuahan da cata da ña. Ta tá sátá da ña cuahan da já nacuyu java ña íchi. Ta tá nayaha ñayivi já nachiníhni saha johó na a ta já naxinu laa nasaxí rí ña. ⁶ Ta java tata cán nacuyu a tañu yuu. Ta tá nanduta mé tata cán, cama chá nahichí a jáchi íchí ndivaha tañu yuu cán. ⁷ Ta java ga tata cán nacuyu a tañu tohíñú ta tá nanduta ña já nanditaha ndihí a nacaja tohíñú, dó nasahnu xihin á cán.

⁸ Joo java tata nacuyu a nu ñuhú vaha. Ta tá nasahnu a já najáquee na cuahá ñaha nu á. Janda in ciento tata nacana jatá in in nuú tata cán —nacachi Jesús xihin ná.

Ta tá nandihí nandicaní Jesús ña yóho nu ná já nacahan cóhó a nu ná já nacachi a já xihín ná:

—Ndá ndó, na ín johó, ná cuni johó ndó —nacachi Jesús xihín na cán.

⁹ Anda já nacasáhá na xíca tuun xihín á cán ndáca tuhún na mé á ndía cúní cachi quiahva nacachi a xihín ñayivi cán. ¹⁰ Ta nanducú ñehe Jesús tuhun nu ná já nacachi a já xihín ná:

—Ña coó nacandaa ini ndó jihna, ña cán cándaa ini ndó viti jáchí nasuná Ndióxi xíní túní ndó candaa ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já quéa vatí sándehé na joo cúu ná tátuhun na co tívi nuu. Ta vatí xíní johó na, cúu ná tátuhun na johó jáchí co cándaa ini na ña cáhan í xihín ná —nacachi Jesús xihín na xíca tuun xihín á cán.

Ndicani Jesús ña cúní cachi quiahva nasacu a nuú na cán

(Mt. 13:18-23; Mr. 4:13-20)

¹¹ Anda já nacachi Jesús já xihín ná:

—Ña yóho cúní cachi quiahva nasacu u nuú ñayivi yóho: Mé tata cán cúu á yuhú nuú tuhun Ndióxi, ña xíca java na cáhan na xihín ñayivi. ¹² Mé tata ña nandicava íchí cán náha nu yó ndá quiahva ín java ñayivi. Xíní johó na tuhun Ndióxi joo tá nandihí já vaxi tiñáhá sacuahá ta cája rí xihín ná ña ndíndójó na ña já ná a cándúsa na tuhun Ndióxi ña ná a cácu ndaa ínima ná. ¹³ Ta tata ña nandicava tañu yuu cán náha nu yó ña ndúu java ñayivi ta xíní johó na tuhun Ndióxi ta cájii íní na ndíquehe na ña. Joo sahá ña co ñehe íní yóho á cuhun cúná a sahá ña cán quéa chá tiempo cuití va cándúsa na tuhun Ndióxi. Jáchí tá cásáhá ndóho ini na sahá tuhun Ndióxi chí jándacoo va na ña. ¹⁴ Ta tata ña nandicava tañu tohíñú cán náha nu yó ña ndúu java ñayivi ta xíní johó na tuhun Ndióxi joo co jándacoo na íchí naxíca na jihna. Ta cásáhá ndícani ini na sahá ñaha ñuyíví yóho ta cásáhá na catóo na canduu cuahá ñaha cuíca nu ná ta cásáhá ndicají ini na caja na ña núu. Sahá ña cán quéa cúu á tátuhun tata ña co cána ñaha jáquee na nuu jáchí coó nasahnu na xihín tuhun Ndióxi. ¹⁵ Joo tata

ña nandicava nu ñuhú vaha cán náha nu yó ña ndúu java ñayivi ta xíní johó na tuhun Ndióxi xihín ndinuhu ini na ta cája na ña sáhndá a nu ná. Ta sahá ña ndíco cáhnu na Ndióxi ta co jándacoo na mé á sahá ña cán quéa cúu ná tátuhun tata nasahan cuahá ñaha ña cuu jáquee na nuu jáchí sáhnu na xihín tuhun Ndióxi —nacachi Jesús ndícani a nuú na xíca tuun xihín á cán.

Sácú Jesús in quiahva sahá in lámpara

(Mr. 4:21-25)

¹⁶ Ni in tuhún toho ñayivi co ndícahmi na in lámpara ta anda já chíjahi na jatá xihín in ñaha. Ta ni co chícaan jehé na ña tíxi xito. Ña cája na quéa chínúu jícó na ña já ná yehe a nuú na quíhvi ini vehe cán. ¹⁷ Ni in tuhún toho ñaha a cuú coo jehé nahá jáchí xínu quívi já ndáca náha nu á. Ta ni in tuhun nacahan jehé ñayivi a cuú coo jehé nahá jáchí xínu quívi já candaa ini tóco ndihí ñayivi sahá tuhun nasahin jehé cán.

¹⁸ Sahá ña cán quéa ndítahan coo johó vaha ndó nu cáhan í xihín ndó. Jáchí da ín ñaha nuu, ñehe táhvi dá coo chága ñaha nu dá joo da coó ñaha nuu, janda ña lohó ín nu dá ndindaa —nacachi Jesús.

Tá naxínu coo náná Jesús xihín ñani a nu ín a

(Mt. 12:46-50; Mr. 3:31-35)

¹⁹ Anda já naxínu coo náná Jesús xihín ñani a mé nu ín a cán. Joo coó nacuu cayatí na nu á jáchí a juú quiahva nachutú ñayivi ndúu na xihín á cán. ²⁰ Anda já nasahan in da caxi tuhun da xihín Jesús já cáchí da já xihín á:

—Jata véhe cáa ín nánún xihín ñanún ta cahan na xuhun cúní na —nacachi da cán xihín Jesús.

²¹ Anda já nacachi Jesús xihín tóco ndihí ñayivi ndúu cán já:

—Ndá na xíní johó tuhun Ndióxi ta cája na ña cáchí a, na cán cúu ná tátuhun náná í xihín ñani í —nacachi Jesús xihín ná.

Tá najacatáji Jesús tachí xihín tañuhú tá ndícojo do

(Mt. 8:23-27; Mr. 4:35-41)

²² In quívi naquihvi Jesús ini in barco xihín na xíca tuun xihín á. Ta já nacachi a já xihín ná:

—Cóho inga xoo tañuhú yóho.

Anda já naquee na cuahan na. ²³ Ta nani xójo cava na tañuhú cán cuahan na já nanaá ini Jesús naquiji á. Ta in náá cuití naxinu in tachí quíni ndivaha nuú tañuhú cán ta nacasáhá ndíndita dó ta jáchutú do ini barco cán. Ta chí iyo ndivaha cáa jáchí cuu cacoo barco cahá ticuúí. ²⁴ Anda já nasahan na ndíñehe na Jesús já nacachi na já xihín á:

—Maestro, Maestro. Cácoo barco yo cahá ticuúí cuahan do —nacachi na xihín á.

Anda já nandicoo Jesús já nacasáhá jánani a tachí xihín ticuúí ndícojo cán. Tá nandihí já najáyaá mé á tachí xihín ticuúí chí táji ní uun nacandoo nuú tañuhú cán. ²⁵ Anda já nacachi Jesús já xihín na xíca tuun xihín á:

—Ndaja vaha co cándeé ini ndó yehe —nacachi a.

Joo na cán nayihví na ta nacatóntó na. Ta chí jandá ndáca tuhún táhan na já cáchí na já:

—Ndá da cúu dataa yóho ña anda tachí xihín tañuhú cándusa nu cáhan da —nacachi xihín táhan na cán.

Tá natava Jesús ínimá quini nasañuhu ini in dataa ñuu Gadara

(Mt. 8:28-34; Mr. 5:1-20)

²⁶ Tá nandihí já cuahan na ta naxinu coo na ñundáhyi cuéntá Gadara, ña cándoo inga xoo tañuhú ta ndícoto nihni táhan xihín estado Galilea. ²⁷ Tá nanuu Jesús barco cán já nacayati in dataa, da ñuu Gadara cán nu á. Mé da yóho sa nacannahá ndivaha ñuhu ínimá quini ini da. Ta já cáa vichí láhlá da xíca nuu da. Ta ni co íin da vehe. Tañu nu jánduxu na ndíi cán va íin tuun da. ²⁸ Tá naxini da Jesús nandicava xítí da nu á ta já nacayuhú da já nacachi da já xihín á:

—Ndá cuéntá quea vasún quihvi nuún xihín i. Yóhó cúun Jesús, da cúu in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i.

²⁹ Nacachi da ña yóho xihín Jesús jáchí nacasáhá sáhdá mé á chuun nu ínimá quini cán ña ná quee rí ínimá da cán. Ta cuahá tañu nasatiin rí da. Ta vatí nacató na ndáha dá xihín saha dá xihín cadena joo nasahnda túhún dá ña nacaja rí quini cán. Ta já nacaja rí ña ná cunu da cuhún da chí

yucú íchí nuú co ndúu ñayivi. ³⁰ Nandaca tuhún Jesús mé rí quini cán já nacachi a já xihín rí:

—Ndaja nanún.

Anda já nanducú ñehe da cán tuhún nu á já nacachi da já xihín á:

—Legión naní i.

Nacachi da cán ña naní da Legión jáchí cuahá ndivaha rí quini nandihvi rí ini da. ³¹ Ta mé rí quini ñuhu ini da cán naxíca tahví rí nu Jesús ña ná a chindahá a rí cuhún rí nu ndúu ínimá ndíi. ³² Ta yati in ndíca yucu cán nasanduu cuahá ndivaha cóchí xixáhan rí. Saha ña cán quea naxíca rí quini cán ñamaní nu Jesús ña ná ndihvi rí ini cóchí ndúu cán. Anda já nasahan Jesús ñamaní nu rí. ³³ Chí naquee rí quini dataa cán cuahan rí já nandihvi rí ini cóchí cán. Ta tóco ndihí cóchí yóho xínu rí cuahan rí nanuu rí nu ndáyí já najáqueta nuu rí mé rí ini tañuhú cán ta já nacandaa rí ticuúí já naxihí rí.

³⁴ Tá naxini mé dataa ndáa cóchí cán ña yóho já naxinu da cuahan da caxi tuhún da ña nayaha yóho nuú ñayivi ñuu Gadara cán xihín nuú java ga na ndúu yati cán.

³⁵ Anda já naqueta ñayivi sándehe na ña nacuu cán. Ta tá naxinu coo na nu íin Jesús cán já naxini na íin coo mé da nasañuhu rí quini ini cán saha Jesús. Ta sa nandaca ndixi da jáhma ta chí sa nandicaxí táhyí ini da. Tá naxini na ña yóho chí nayihví na.

³⁶ Ta na naxini nuú natavá Jesús rí quini ini dataa cán, na cán cúu na nandicani ña nuú na coo naxini cán. ³⁷ Tá naxini johó na ñuu Gadara cán ndaja nasahjin já naxíca tahví ndihí na nu Jesús ña ná quee a cuhún a jáchí yihví ndivaha na. Saha ña cán quea nandihvi tucu Jesús ini barco cán ña ná quee a cuhún a. ³⁸ Joo tá cámaní quee a cuhún a já nacasáhá da naqueta rí quini ini cán xíca tahví da nu Jesús ña ná quiahva mé á ñamaní cuhún da xihín á. Joo nasahnda Jesús chuun nu dá ña ná cándoo da. Já nacachi a já xihín dá:

³⁹ —Cuanúhu vehún. Ta já ndicanún nuú na vehún ndaja náhnu ñaha nacaja Ndióxi xuhún —nacachi Jesús xihín da cán.

Anda já naquee da cán cuahan da. Já nandicani da nu tóco ndihi na Gadara cán ndaja cáa ña ñacaja Jesús xihín dá.

Tá nandaja vaha Jesús jahyi jhí Jairo xihín in ña ñacani ndaa ndáha jáhma á

(Mt. 9:18-26; Mr. 5:21-43)

⁴⁰ Tá nandicó coo Jesús inga xoo tañuhu cán, a juú quiahva cávatá ñayivi naxinu na ndiquehe na mé á jáchi mé cán nasanduu na ndáti na mé á. ⁴¹ Anda já ñacasaá in dataa naní Jairo, da sáhdá chuun veñuhu. Mé Jairo yóho naxinu da ñacaxítí da saha Jesús já naxica tahví da nu á ña ná cuhun a vehe da. ⁴² Jáchi xihí ña loho cúu jahyi jhí da ta in já cúu ña nu dá ta ndacaan ña tátuhun uxu ivi cuia. Chí naquee Jesús cuahan ta nani xíca cuahan vehe Jairo cán a juú quiahva cuahá ñayivi ndíco na jatá cuahan na ta chí janda cándíhi na mé á cuahan na.

⁴³ Ta tañu ñayivi cuahan cán ndacaan in ñañáha ta ndítahví nii ña tixi uxu ivi cuia. Ta najándihi ndihi ña jjuhún ña nuú na cája tátá ñayivi joo ni in na coo ñacuu caja tátá ñahá. ⁴⁴ Joo ñacayati ña chí jata Jesús ta natiin ña yúhu jáhma á. Chí ivi laá nasacuiin nii ña cán.

⁴⁵ Anda já ñacasáhá Jesús ndáca tuhún a tóco ndihi ñayivi já ñacachi a já xihín ná:

—Ndá ndó ñacani ndaa ndáha yehe — ñacachi a xihín ná.

Joo ni in na coo nasahan tuhun nu á. Sahá ña cán queá ñacachi Pedro xihín java ga da xíca tuun xihín mé á cán já xihín á:

—Maestro, a juú quiahva cándíhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá na ñacani ndaa ndáha ndohó — ñacachi da cán xihín á.

⁴⁶ Anda já ñacachi Jesús já:

—Íin in na ñacani ndaa ndáha yehe jáchi ñacandaá ini i ña nandivaha in na xihín ndée mí i — ñacachi Jesús.

⁴⁷ Joo ndaja coo mé ña nandivaha cán tá naxini ña ña ñacandaá ini Jesús sahá ña ñacaja ña já nandiquiji ninu ña xihín ña yíhví ña ta já naxinu coo ña ñacaxítí ña nu Jesús. Ta nu ndíhi ñayivi ndúu cán ñacasáhá ña ndícani ña nu á ndá cuéntá queá ñacani ndaa ndáha ña mé á chí ivi laá

nandivaha ña. ⁴⁸ Anda já ñacachi Jesús já xihín ña:

—Jahyi a, nandivahún jáchi ñacandúsún yehe. Cuanúhu. Ta a ndícani ga inún — ñacachi Jesús xihín ña.

⁴⁹ Ta nani cáhan Jesús xihín ña cán já naxinu in da ñaquixi chí vehe Jairo, da sáhdá chuun veñuhu cán. Já ñacachi da cán já xihín dá:

—Sa naxihí va jahyi ndó. A jáquihvi ga ndó da xíca jánaha ñayivi jan.

⁵⁰ Joo tá naxini joho Jesús ña ñacachi da cán já ñacachi a já xihín Jairo:

—A cáyhví tohún. Candúsa cuití vún yehe chí ndivaha va jahyún — ñacachi Jesús xihín dá.

⁵¹ Tá naxinu coo Jesús vehe Jairo cán coo naxeen a quiahva ñamaní ña ná quihvi ñayivi ini vehe cán xihín á. Na ñaquihvi xihín á nasacuu Pedro xihín Jacobo xihín Juan xihín tátá mé ña loho cán xihín náná ña. ⁵² Jandá joho ndíváa ñayivi sácu ndivaha na ndúu na saha ña loho cán. Anda já nandicahan Jesús xihín ná já ñacachi a já:

—A cuácu ndó. Coó naxihí toho ña loho yóho. Quíji cuití va ña — ñacachi a xihín ná.

⁵³ Joo ñacasáhá na cán sácu ndaa na Jesús jáchi xini na ña sa naxihí ña loho cán ta sa cúu ña ndíi. ⁵⁴ Anda já natiin Jesús ndáha ña naxihí cán já ñacahan cóhó a xihín ña já ñacachi a já:

—Ñá loho, cuándacoo.

⁵⁵ Chí ivi laá nanditacu ña loho cán já nandicoo ña. Ta nasahnda Jesús chuun ña ná quiahva na ña cuxu ña. ⁵⁶ Chí a juú quiahva ñacatóntó tátá náná ña loho cán sahá ña ñacaja Jesús. Joo nasahnda Jesús chuun nu ná ña ná a ndícani na nuú ni in ñayivi sahá ña nayaha.

9

Tá nachindahá Jesús ndíhuxu ivi na xíca tuun xihín á ña ná cuhun na caxi tuhun na tuhun Ndióxi nuú ñayivi

(Mt. 10:5-15; Mr. 6:7-13)

¹ Najánditaca Jesús ndíhuxu ivi na xíca tuun xihín á já nasahan ndée nu ná ña ná cuu tavá na tá nuú ínima quini ñúhu ini ñayivi ta nasahan ndée mé á nu ná ña ná

cuu ndaja vaha na tá nuú cuehe ndóho ñayivi. ² Nasahnda Jesús chuun nu ná ña ná caxi tuhun na xihín ñayivi ña sa ñacayati quiví cacomí Ndióxi cuéntá saha ná. Ta nasahnda chuun nu ná ña ná ndaja vaha na ña quíhvi. ³ Ta ñacachi a já xihín ná:

—A cáñehe ndó ñaha cuhun ndó íchi. Ni garróté ni yátí ni pan ni jiuhún a cáñehe ndó cuhun ndó. In túhún cotó cañehe ndó cuhun xihín ndó. ⁴ Tá ná xinu coo ndó in vehe, canduu ndó vehe jan janda quiahva ná ndindaa quiví quee ndó cuhun ndó. ⁵ Ta ndá ñuu nuú coo cúní ña ndiquehe vaha na ndohó, cuáhán quee ndó ñuu jan ta catí ndó ña yácá saha ndó já ná ñaha ña cuahan cuachi ña cán jata mé va na —ñacachi Jesús xihín ná.

⁶ Anda já ñaquee ña cán cuahan ña ta nasahan ña naxica nuu na ndijáá ñuu válí. Xíca na cáxi tuhun na nuú ñayivi tuhun vaha cáhan saha Jesús, mé a cuu jácacu ñahá. Ta ndája vaha na ña quíhvi.

Tá naxihí Juan, da ñacaja ndúta ñayivi
(Mt. 14:1-12; Mr. 6:14-29)

⁷ Ta ndaja coo Herodes, da cúu gobernador cán ñacandaá ini da saha tóco ndihi ña cája Jesús. Ta chí coo xíní da ndíá cahán da jáchi java na cáchí ña xihín dá ña cúu Jesús mé Juan, da najácandúta ñayivi ta viti ñanditacu tucu da cáchí java na xihín dá. ⁸ Ta java ri na cáchí ña ña cúu Jesús profeta Elías, mé da naxica nuu sanahá ta viti naxinu tucu da nu ná. Ta java na cáchí ña ña cúu á in táhan ña profeta nasanduu sanahá joo túní queá ñanditacu tucu a xíca nuu a, cáchí ña. ⁹ Anda já ñacachi Herodes já xihín ná:

—Mí yehe cúu da nasahnda chuun ña ná chituhun ná jico da naní Juan cán. Ta coo xíní ndá da cúu da naní Jesús yóho. Jáchi mé a ndaa xíní johó i ña cája cuahá ndivaha da ña náhnu —ñacachi Herodes cán.

Ta chí cúní Herodes cuni da Jesús.

Sáhan Jesús ña cuxu uhun mil taa
(Mt. 14:13-21; Mr. 6:30-44; Jn. 6:1-14)

¹⁰ Tá ñandicó coo ña ñachindahá Jesús caca nuu cahan tuhun Ndióxi xihín ñayivi cán nu ín mé á já ñandicani na nu á saha tóco ndihi ña ñacaja na nuú nasahan ña. Anda já ñehe Jesús ña nasahan ña in nu

cáa xóo yati chí ñuu Betsaida cán. ¹¹ Joo tá ñacandaá ini ñayivi ndá xoo cuahan Jesús já ndíco ña cuahan ña. Ta ñandiquehe vaha Jesús ña ta ñandicani a nu ná ña sa ñacayati quiví cacomí Ndióxi cuéntá saha ná. Ta ñandaja vaha mé á ña quíhvi.

¹² Ta tá sa cáhini cuahan já ñacayati ndíhuxu ivi ña apóstol cán nu Jesús já ñacachi na já xihín á:

—Cahan ndó xihín ñayivi ná quee na cuhun ña ndiquehe ndée ná ta ná nducú ña ña cuxu na ñuu válí xihín nuú yati chá yóho nu ndúu ñayivi jáchi coo ñaha mé va nu ndúu yóho —ñacachi ña cán xihín Jesús.

¹³ Anda já ñacachi Jesús já xihín ná:

—Mé ndó quiahva ndó ná cuxu na —ñacachi a xihín ná.

Anda já ñacachi ña cán já xihín á:

—Uhun víxí pan xihín ivi laá tiyacá cuití va ín nuú nde. Ta ama ná cuhun ri ndehe cueen nde ñaha cuxu tóco ndihi ñayivi ndúu yóho —ñacachi ña cán.

¹⁴ Jáchi ñayivi cán cúu ná tátuhun uhun mil taa. Anda já ñacachi tucu Jesús já xihín ña xíca tuun xihín á:

—Cacu coo ndó ña tá táhndá ivi jico uxu, ivi jico uxu ña.

¹⁵ Chí nasacu coo ndíhuxu ivi ña apóstol cán ña. ¹⁶ Anda já ñatiin Jesús ndíhuhun pan xihín ndíví tiyacá cán já nasandehé a chí indiví já ñandiquiahva ndixahvi nu Ndióxi sahá ña cán. Tá ñandihí já nasahnda java táhvi a ña já nasahan ña nuú ña xíca tuun xihín á cán já ñanditahnda ña cuxu ñayivi ndúu cán. ¹⁷ Ta tóco ndihi na ñañehé naxixi janda quiahva ñachutú tixi na. Tá ñandihí já ñajáchutú ña uxu ivi toyicá xihín ña ñacandoo naxixi ndihi ña cán.

Tá náhma Pedro ña cúu Jesús mé a ñachindahá Ndióxi cacomí cuéntá sahá ñayivi

(Mt. 16:13-28; Mr. 8:27-9:1)

¹⁸ In tañu tá ñacana xóo Jesús xihín ña xíca tuun xihín á ña caça tahví a nu Ndióxi já ñandaca tuhún mé á ña já ñacachi a já xihín ná:

—Ndá da cáchí ñayivi cúu yehe —ñacachi a xihín ná.

¹⁹ Anda já ñanducú ñehe ña cán tuhun nu á já ñacachi na já xihín á:

—Java ñayivi cáchí na ña cúu ndó Juan, da najácandúta ñayivi. Ta java na cáchí na ña cúu ndó profeta Elías. Ta cáchí java ga ví na ña cúu ndó in táhan profeta nasanduu sanahá, da nanditacu tucu xíca nuu viti — nacachi na xíca tuun xihín Jesús cán.

²⁰ Anda já nandaca tuhún Jesús na já nacachi a já xihín ná:

—Ta ndóhó ri ndá da cáchí ndo cúu u — nacachi a xihín ná.

Anda já nacachi Pedro já xihín á:

—Mé ndó cúu Cristo, ña nachindahá Ndióxi cacomí cuéntá sahá ñayivi — nacachi da xihín á.

²¹ Joo nacachi Jesús xihín na xíca tuun xihín a ña coto a ndícani na ña yóho nuú ni in túhún ñayivi. ²² Anda já nacachi a já xihín na cán:

—Yehe cúu u da nachindahá Ndióxi nduu ñayivi ta ndítahan nuú i ndoho ndivaha ini i. Ta na sacuahá veñuhu xihín na sacuahá nuú jutú xihín na jánaha ley Moisés candají na yehe ta anda já cahní na yehe. Joo tá ná xinú uní quiví já nditacu tucu u — nacachi a xihín ná.

²³ Tá nandihí já nacachi tucu a já xihín ndihí na xíca tuun xihín á cán já:

—Ndá na cúní candico yehe ndítahan nu ná ndihí chága ini na sahá yehe a juú ga saha mé ná. Ta ndijáá ní quiví ndítahan coo tiaha na ndoho ini na sahá yehe ta coó caja toho a ná quiví na sahá i. ²⁴ Jáchi ndá na cátóo coo chága ñuyíví yóho ndihí saha ná. Joo ndá na sahan ndeé ini quiví saha i ñehe táhvi ná catacu na anda ama cáa quiví. ²⁵ Vatí ná quee vaha in na ñuyíví yóho ta cómí na tóco ndihí ñaha ñuyíví joo ndá chuun quea tá nu ndihí ndihí saha ná indayá. ²⁶ Ndá na cácahan nuu saha i xihín saha tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi saha na cán tá ná quixi i cacomí i cuéntá sahá ñayivi. Mé tiempo cán naha ndaja cáhnu cúu yehe jáchi quixi i xihín ndeé Ndióxi ta xihín ndeé táto mé á viti. ²⁷ Mé a ndaa ná cahan i xihín ndo ña ndúu java na ndíta yóho ta ni a quiví toho na janda quiahva ná xinú quiví cuni na cacomí Ndióxi cuéntá sahá ñayivi — nacachi Jesús xihín na cán.

Tá nandijama Jesús quiahva cáa
(Mt. 17:1-8; Mr. 9:2-8)

²⁸ Ta tá nayaha tátuhun una quiví nacachi Jesús ña yóho xihín ná já nandaa jiní in yúcu ña caça tahví a nu Ndióxi. Ta ndáca táhan Pedro xihín Jacobo xihín Juan cuahan na xihín á. ²⁹ Ta nani xíca tahví Jesús nu Ndióxi já nandijama quiahva cáa nuu á. Ta janda jáhma ndíxi a cán nandiyaa cachí ña ta chí a juú quiahva yehe ña. ³⁰ Anda já naxini na ivi taa ndúu da ndítuhún da xihín Jesús. In da cán cúu Moisés ta inga da cán cúu Elías. ³¹ A juú quiahva ndató ndíyehe ndaa nu ndúu na cáhan na xihín Jesús ta ndítuhún na sahá ña jándoho na ini a ñuu Jerusalén ta já quiví a. ³² Ta vatí cúní cuju Pedro xihín java ga na cátahan xihín dá cán nasandita na. Ta naxini na ndá quiahva cáhnu cúu Jesús xihín da ivi táhan ndúu xihín á cán. ³³ Ta tá nacasáhá cáxíca Moisés xihín Elías cán nu Jesús cuahan na já nacachi Pedro já xihín Jesús:

—Maestro, ndaja vaha cúu á ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías — nacachi da.

Joo chí co xini mé va Pedro ndía cáa cáhan da. ³⁴ Ta nani cáhan da ndíta na já nanuu in vico jata ná ta najájahví a na. Ta chí nacasáhá yíhvi na xíca tuun xihín Jesús cán tá naxini na nacava nuu vico cán na. ³⁵ Anda já naxini johó na cáhan in a tañu vico cán já nacachi a já:

—Da yóho cúu jahyi maní i. Cuni johó ndó nu cáhan da.

³⁶ Tá nandihí naxini johó na ña cáchí a cán já naxini na ña ín in túhún jiní mé va Jesús. Ta mé na xíca tuun xihín á cán nasahíin táji yúhu ná sahá ña naxini na ta coó nandicaní na sahá nuú ni in túhún ñayivi.

Tá nandaja vaha Jesús in taa loho ndacaan ínima quini ini
(Mt. 17:14-21; Mr. 9:14-29)

³⁷ Ta inga quiví itaan tá nanuu Jesús xihín na xíca tuun xihín á jiní yúcu cán já naqueta cuahá ndivaha ñayivi cuahan na ndique táhan na xihín Jesús. ³⁸ Anda já nandicahan cóhó ndivaha in dataa tañu

tóco ndihi ñayivi cán já ñacachi da já xihin Jesús:

—Maestro, caja ndó ñamaní candehe loho ndó jahyí i jáchi in túhún jini já cúú dá nuú i. ³⁹ Ta ndácaan in ínima quini ini da ta tín rí dá ta cája rí xihin dá ña ná ndahyi cóhó da. Ta cája rí ña ná quivi yihí da ta já cána cuyu chiquiñu yúhu dá. A juú quiahva cája xíxi rí quini cán xihin dá ta chí co cuni rí janí rí da. ⁴⁰ Sa ñaxica tahví i nuú ña xíca tuun xihin ndo ña ná tavá ña mé rí quini cán joo coo ñacuu caja na ña —ñacachi da cán xihin Jesús.

⁴¹ Anda já ñacachi Jesús já:

—Ndáhví nahá ñacuu ndó jáchi sa cuahá ndivaha quivi in i xihin ndo ta a ñaha candeé ini ndó yehe. Cúú ndó ñayivi quini ndivaha chí co ndéé ga ini i xihín ña cája ndó. Taxi ndó taa loho jan chóho —ñacachi Jesús xihin ná.

⁴² Ta tá cáyati taa loho cán cuahan da nu Jesús já ñacaja rí quini cán ña ná ndicava da nu ñúhu ta cán ñacaja rí ña ná quivi yihí tucu da. Anda já najanani Jesús rí quini cán já ñandivaha taa loho cán ta ñandiquiahva mé á da nu tátá da. ⁴³ Ta tóco ndihi ñayivi ñasanduu cán ñacatontó ña tá ñaxini na ña náhnu cája Ndióxi.

Ta nani catontó ña ndúu na sahá ña náhnu cája Jesús cán já ñacasáhá cáhan mé á xihín ña xíca tuun xihin á. Já ñacachi a já xihin ná:

⁴⁴ —Cuni johó vaha ndó ña yóho ta coto a ndíndójó ndó ña. Tiin na yehe, da ñachindahá Ndióxi nduu ñayivi ta já ndiquiahva na yehe ndahá java dataa —ñacachi Jesús xihin ná.

⁴⁵ Joo ni in táhan ña xíca tuun xihin á cán coo ñacandaá ini na ndía cuni cachi Jesús. Jáchi coo ñanuna xíní túní ná ña ná candaá ini na ña. Ta yíhví ña ndaça tuhún ña mé á ña ná ndicani a ña nu ná.

Ndicani Jesús ndá ña cúú ña in chága saha (Mt. 18:1-5; Mr. 9:33-37)

⁴⁶ Tá ñandihí já ñacasáhá ña xíca tuun xihin Jesús cán ndítuhún xihin táhan na saha ndá da cúú da cáhnu chága tañu mé ná.

⁴⁷ Anda já ñaxini Jesús ña cáhvi ini ña cán já ñatiin a in taa loho já ñasacu ndichi a da jin á. ⁴⁸ Já ñacachi a já xihin ná:

—Ndá ña ná ndiquehe vaha taa loho yóho sahá ña quíhví ini ña yehe, ndiquehe ri na yehe viti. Ta ndá ña ndiquehe yehe, ndiquehe ri na tátá i, mé a ñachindahá yehe. Ndá ña coo saha mé tañu tóco ndihi ndó, ña cán cúú ña in chága saha nu Ndióxi —ñacachi Jesús xihín ña cán.

Tá ndúu java ña ndiquehe saha yo já queá cuahan na xoo í

(Mr. 9:38-40)

⁴⁹ Anda já ñacachi Juan já xihin Jesús:

—Maestro, ñaxini nde in dataa ta cáhan da quivi mé ndó já tává da ínima quini ñúhu ini ñayivi. Joo coo xíca nuu da xihin yo sahá ña cán queá ñasaji nuu nde nu dá caja da ña —ñacachi da cán.

⁵⁰ Anda já ñacachi Jesús já xihin dá:

—A cáji nuu ndó nu dá sahá ña cája da ña. Jáchi ndá da coo ndíndita caja xíxi xoho, mé da cán cuahan da xoo mí —ñacachi Jesús.

Jánani Jesús Jacobo xihin Juan

⁵¹ Tá ñacayati quivi ndíndita Jesús cuhun a indiví coo ñayíhví a quehe a íchi cuahan chí ñuu Jerusalén. ⁵² ñachindahá Jesús java ña xíca xihin á ña ná cuhun cuéé ña in ñuu loho ndácaan estado Samaria cán já ná nducú ña nuú canduu tóo na chí ñaquee na cuahan ña. ⁵³ Joo coo ñaxeen toho ña Samaria cán ndiquehe na Jesús jáchi ñaxini na ña cuahan chí ñuu Jerusalén. ⁵⁴ Tá ñaxini Jacobo xihin Juan cán ña yóho já ñacachi da já xihin Jesús:

—Á coo cuni ndó, xitoho i ña ná cahnda nde chuun ña ná cuyu ñúhu cáyi indiví já ná jánaá nde sahá ñayivi yóho tá quiahva ñacaja profeta Elías sanahá —ñacachi na xihin á.

⁵⁵ Anda já ñandicoto nihni Jesús nu ná já ñacasáhá jánani a ña já ñacachi a já xihin ná:

—Coo xíni ndó ña a váha toho cáhvi ini ndó já. ⁵⁶ Jáchi coo ñaquixi toho yehe, da ñachindahá Ndióxi nduu ñayivi, ña ná jánaá i sahá ñayivi. Ñaquixi i ñuyiví yóho jáchi cuni ña ná cacu ndaa ínima ná —ñacachi Jesús xihín ña cán.

Anda já ñaquee na cuahan ña inga ñuu loho.

Ña cuni candico Jesús

(Mt. 8:19-22)

⁵⁷ Ta nani xíca na cuahān nā já nacachi in dataa já xihin Jesús:

—Cúni candico i ndohó ndá nacuu nuú cuhun ndo —nacachi da.

⁵⁸ Anda já nanducú ñehe Jesús tuhun nu dá já cáchí a já xihin dá:

—Ndicuui cúu rí ta vatí íin cáva ñúhu rí. Laa cúu rí ta vatí íin táca ñúhu rí. Joo yehe, da nachindahá Ndióxi nduu ñayivi chí ni nuú cuju mí i coó va —nacachi a xihin dá.

⁵⁹ Tá nandihí já nacachi Jesús já xihín inga da:

—Naha quí candico yehe.

Joo nanducú ñehe da cán tuhun nu Jesús já cáchí da já xihin á:

—Quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —nacachi da xihin Jesús.

⁶⁰ Anda já nacachi Jesús já xihin dá:

—Ná cuhun mé ñayivi, na a ñaha cacu ndaa ínima jánduxu na ndii jan. Joo yóhó, cuahán caxi tuhun nuú ñayivi ña sa nandindaa quívi cacomí Ndióxi cuéntá saha ná —nacachi Jesús xihin dá.

⁶¹ Anda já nacativi inga dataa nu Jesús já nacachi da já xihin á:

—Jesús, candico i ndohó cúni. Joo quiahva ndó ñamaní nuú i ná cuhun loho i ndindayí jihna ñúhú i na vehe e já quixi i candico i ndohó —nacachi da xihin Jesús.

⁶² Anda já nacachi Jesús já xihin dá:

—Ndá da cásahá ndíco yehe ta já ndíco coo tucu da cuahān da chí jata, cúu dá da coó chuun toho cacomí Ndióxi cuéntá saha. Jáchi da cán cúu dá tátuhun da tiin yata ta cásahá da xútu da cuahān da joo tá nandihí ndicoto nihni tucu da chí jata ta chí coo saha dá cacomí Ndióxi cuéntá saha dá —nacachi Jesús.

10

Chindahá Jesús uní jico uxu taa cuhun da cahan da tuhun Ndióxi xihín ñayivi

¹ Tá nandihí já nacaxi Jesús inga uní jico uxu chága dataa. Ta tá ivi tá ivi da nachindahá a da cuahān da já ná cuhun cuéé da cahan da tuhun Ndióxi xihín ñayivi ndúu tóco ndihí ñuu nuú nasacu ini Jesús cuhun a coto nihni a ñayivi. ² Anda já nacachi a já xihin ná:

—Mé a ndaa ndúu cuahá ndivaha ñayivi, na cúni cuni johó tuhun Ndióxi joo coó cuahá na cúni cuhun cahan ña xihin ná. Cúu á tátuhun vaha ndivaha nacana ní nuú utu joo ndímaní na jáquee ña. Ña cán quéa xíní ñúhú cacá tahví ndo nuú da xihín ñaha utu cán ña ná chindahá chága da na jáquee nuú utu da. Quiahva já ndítahan cacá tahví ndo nu Ndióxi ña ná chindahá chága mé á na cacá nuu cahan tuhun Ndióxi xihín ñayivi já ná ndiquehe vaha na ña. ³ Mé ndó cúu ndó na chindahá i cuhun cacá nuu cahan tuhun Ndióxi. Mé a ndaa iyo ndivaha cáa nuú cuhun ndo jáchi cacuu ndó tátuhun ndicachi válí tañu cuahá ndivahyí. ⁴ Tá naquee ndó cuahān ndo coto a cáñehe ndó yátí cuhun ndo ni jihún ni inga ndusa ndó a cáñehe ndó cuhun ndo. Ta a cacuíta ndó cahan Ndióxi ndó xihín ñayivi ndique táhan xihín ndó íchi. ⁵ Ta tá ná xinu coo ndó in vehe, jihna ñúhú cahan Ndióxi ndó xihín na ndúu vehe cán já cachi ndó já xihin ná: “Ná coo vaha ini ndó, na ndúu vehe yóho”, cachi ndó xihin ná. ⁶ Ta tá mé a ndaa íin vaha ini ñayivi ndúu vehe cán já a cándo nuu toho tuhun nacachi ndó xihín na cán. Joo tá co íin vaha ini na cán já a quéhe ndó cuéntá saha ña nacachi ndó ña ná coo vaha ini na jan jáchi a juú na coo vaha ini cúu toho na jan. ⁷ Tá ná xinu coo ndó in vehe nu ndiquehe vaha na ndohó, canduu ndó mé vehe jan. Ta a cáca nuu ndó tá vehe tá vehe nducú ndo nuú coo ndó. Ta ndá ñaha íin nu ná sahan na nu ndo cuxu ndó á coho ndó, tiin ndó a ndáha ná. Jáchi ndítahan nuú in dataa ndiquehe da ña catacu da saha chuun cája da. ⁸ Ta tá ná xinu coo ndó in ñuu nu ndiquehe vaha na ndohó, cuxu ndó ndía cúu mé a sahan na nu ndo. ⁹ Ta ndaja vaha ndó ndá na quíhvi ndúu cán. Ta cachi ndó já xihin ná: “Sa nacayati quívi cacomí Ndióxi cuéntá saha ndo”, cachi ndó xihin ná. ¹⁰ Joo tá ná xinu coo ndó in ñuu nuú coo cúni na ndiquehe vaha na ndohó, cuahán ndó cáyé ñuu cán já cachi ndó já xihin ná: ¹¹ “Janda ña yacá natiin ndaa saha nde ñuu ndó yóho quíji nihni nde ta xihín ña yóho náha nde ña cuahān cuachi ndó jata mé va ndó. Jáchi sa nacaxi tuhun va nde xihin ndo ña sa nacayati quívi cacomí Ndióxi

cuéntá sahá ñayivi”, cachi ndó xihín ná — ñacachi Jesús xihín ná cán.

¹² Anda já ñacachi tucu a já xihín ná:

—Tá ná xinü cõo quiví caja vií Ndióxi sahá ñayivi já jándoho chága mé á ini ñayivi ñuu jan a juú ga tá quiahva najándoho a ini na ñuu Sodoma sanahá —ñacachi Jesús xihín ná.

Cáhan Jesús sahá ñuu nu ndúu ñayivi, na cõo cúnijándacoo cuachi

(Mt. 11:20-24)

¹³ Anda já ñacachi tucu Jesús xihín ná já:

—Ndáhví nahá ñacuu ndó, na ñuu Corazín. Ta ndáhví nahá ñacuu ndó na ñuu Betsaida. Cuahá ndivaha ña náhnu ñacaja i nu ndõ joo cõo ñaxeen ndó ndicó cõo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva ñacaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndíí ta jácuyu na yaá yíquí jíní na, nduu. Jáchi xihín ña yóho jánaha na ña ñandicó cõo ini na sahá cuachi na. ¹⁴ Joo tá ná xinü quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva ñandoho ini ñayivi ñasanduu ñuu Tiro xihín ñuu Sidón sanahá. ¹⁵ Ta viti cáhan i xihín ndó, na ndúu ñuu Capernaum. Janda indivi cúní ndó cuhun ndó joo sahá ña sáá ini ndó cuhun ndó janda indayá, caja Ndióxi —ñacachi Jesús.

¹⁶ Anda já ñacachi a xihín ná xica tuun xihín á já:

—Ndá na xini johõ nu cáhan ndõ ta cája na ña cáhí ndõ já quéa cúú á tátuhun cája na ña cáhí yehe xihín ná caja na. Ta ndá na cándají ndõhó cúú á tátuhun cándají ri na yehe va. Ta ndá na cándají yehe, cándají ri na Ndióxi, mé a ñachindahá a yehe quixi i ñuyiví yóho —ñacachi Jesús xihín na chindahá mé á cuhun cáhan tuhun Ndióxi xihín ñayivi cán.

Anda já ñacache na cuahan na.

Tá ñandicó cõo ndihuni jico uxu na ñachindahá Jesús caca nuu cáhan tuhun Ndióxi

¹⁷ A juú quiahva cájii íní na uní jico uxu na ñachindahá Jesús cáhan tuhun Ndióxi

cán tá ñandicó cõo na. Já ñacachi na já xihín Jesús:

—Tá cáhan ndõ quiví ndó sáhdá ndõ chuun nu ínima quini ta chí xini johõ rí ta cája rí ña sáhdá ndõ nu rí —ñacachi na cán xihín Jesús.

¹⁸ Anda já ñacachi Jesús já xihín ná:

—Mé a ndaa quéa cáhan ndõ jan. Jáchi ñaxini i xihín nuú mí i ndá quiahva ñacache Satanás, rí cúú tiñahá sacuahá indivi ta ñandicava rí nu ñúhu tátuhun in tasa.

¹⁹ Chí ñasahan i ndéu nu ndóhó ña ná cuu cahnda ndó chuun nuú tiñahá sacuahá. Já cuu cuani nihni ndó jatá cõo xihín jata líhma ta a ndóho ndó ni in ñaha. Ta ñasahan i ndéu nu ndõ ña ná cuu quee vaha ndó nuú ndihi ña núu cúní tiñahá sacuahá caja rí xihín ndõ. ²⁰ Vatí cájii ini ndó sahá ña cándusa rí quini nu sáhdá ndó chuun nu rí joo ndítahan cájii chága ini ndó sahá ña sa ñacache va quiví ndó ña cuhun ndó indivi —ñacachi Jesús xihín ná.

Tá ñacajii ndivaha ini Jesús

(Mt. 11:25-27; 13:16-17)

²¹ Ta chí mé hora já ñacaja ínima yíi Ndióxi ña ná cájii ndivaha ini Jesús. Já ñacasahá cáhí a já:

—Cája cáhnu i ndõhó, tátá Ndióxi, ña cúú xitõho tóco ndihi ñaha ndúu indivi xihín ñuyiví. Jáchi najánaha ndó ña ndichí ndivaha nuú ñayivi, na cõo cuahá saha nuú java ga na. Ta ñacaja ndó ña ná a cúu candaa ini na ndichí xihín na tácu ini ñaha mé ndó. Já ñacaja ndó jáchi já ñasacu ini ndó caja ndó —ñacachi Jesús.

²² Anda já ñacachi a já xihín na ndúu cán:

—Ñandiquiahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi cõo xini vaha na yehe, da cúú in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na cõo xini vaha yo cúú tátá i. In túhún yehe, da cúú jahyi a xini vaha i yo cúú mé á. Ta yehe cúú da caxi ndá ñayivi jánaha i nuú sahá Ndióxi, tátá i já ná candaa vaha ini na yo cúú mé á —ñacachi Jesús.

²³ Anda já ñasandehé a nuú na xica tuun xihín á cán. Já ñacasahá cáhí a já xihín mé cuití na:

—Tahví nacuu ñayivi tá ná cuu candehé na tóco ndihi ña xíní mé ndó viti. ²⁴ Mé a ndaa ná cahan i xihin ndo ña cuaha táhan na profeta nasanduu sanahá ta cuaha táhan na nasacomí cuénta sahá ñayivi sanahá cúní na cuni na tóco ndihi ña xíní ndo cája i. Joo coó naxini na ña. Ta cúní na cuni johó na ña xíní johó ndó cáhan i xihin ndo. Joo coó naxini johó na ña.

Sácu Jesús quiahva sahá in da Samaria, da nacaja vaha

²⁵ Ta ndaja coo in da jánaha ley Moisés nandaca ndichi da cahan da xihin Jesús jáchi cúní da coto ndojó ñahá da. Ta nacachi da já xihin á:

—Maestro, ndía ndítahan caja i já ná cuu catacu u indiví anda ama cáa quivi —nacachi da xihin á.

²⁶ Anda já nanducú ñehe Jesús tuhun nu dá já nacachi a já xihin dá:

—Ndaja cáchi ley Moisés. Ndaja cáchi ley tá cáhvún ña —nacachi Jesús xihin dá.

²⁷ Anda já nanducú ñehe da jánaha ley Moisés cán tuhun nu Jesús já nacachi da já:

—“Quihvi inún Ndióxi, xitohún xihin tóco ndihi inimun ta xihin ndinuhu inún. Ta quihvi inún a xihin tóco ndihi ndéun ta xihin tóco ndihi xíní túnun. Ta quihvi inún ñani táhún tá quiahva quihvi inún mún” —nacachi da cán nanducú ñehe da tuhun nu Jesús.

²⁸ Anda já nacachi Jesús já xihin dá:

—Mé a ndaa vaha va nacahun. Cuáhán caja tóco ndihi ña yóho já ñehe táhvun cat-acún indiví anda ama cáa quivi —nacachi Jesús xihin dá.

²⁹ Joo da jánaha ley Moisés cán cúní da candoo vaha da nuú ñayivi ndúu cán sahá ña cán quéa cáchi da já xihin Jesús:

—Yo já cúu ñani táhan i.

³⁰ Anda já nandicani Jesús nu dá já cáchi a já xihin dá:

—In tañu naquee in dataa ñuu Jerusalén cuahan da íchi ña nanuu cuahan chí ñuu Jericó. Ta ndaja coo cán naqueta java ta cuíhná nu dá. Ta natiin na da ta nacaja cuíhná ndihi na ñaha da janda jáhma dá viti naquee na. Tá nandihí já nacani quini ndivaha na da janda quiahva nasahní tóo na da. Já naquee na cuahan na. ³¹ Ta ña

vaha quéa nayaha in jutú mé íchi cán. Joo tá naxini ñahá da já nayaha saa da cuahan va da. ³² Ta sa mé íchi cán nayaha ri in da naquixi chichi Leví ta tá naxini da da nandicuehe cándúhu íchi cán já nayaha saa da cuahan da. ³³ Jári in da Samaria xíca cuahan mé íchi cán. Joo tá naxini da da nandicuehe cándúhu íchi cán chí natahvi ini da saha dá. ³⁴ Anda já nacayati da nu cándúhu dá. Já nacaja tátá da nuú nandicuehe da quihvi cán xihin síti xihin vino viti. Ta já nacató da nuú nandicuehe cán xihin ticoto. Tá nandihí najánda da da jata búrró jana dá já ñehe ñahá da cuahan da. Já nanducú da vehe coo tóo da quihvi cán ña ná candaa na da. ³⁵ Ta inga quivi itaan tá nasacu ini da Samaria cán quehe da íchi cuhun da já natavá da ivi jiuhún caa nasahan da nuú da xihin ñaha vehe cán. Já nacachi da já xihin dá: “Cajún ñamaní candaa vahún da quihvi yóho. Ta tá ná chicaan chágun jiuhún xihin dá, a ndícani toho inún jáchi chahvi mí vi ña nun tá ná ndicó coo i”, cáchi da Samaria cán —nacachi Jesús.

³⁶ Anda já nandaca tuhún Jesús da jánaha ley Moisés cán já nacachi a já xihin dá:

—Ta viti cachún xihin i tixi ndihuni da nayaha íchi nuú nasanduhú da nandicuehe nacaja ta cuíhná yóho, ndá da cúu da nanaha ña mé a ndaa táhyí quihvi ini da ñani táhan da —nacachi Jesús.

³⁷ Anda já nacachi da jánaha ley Moisés já:

—Da natahvi ini sahá da nandicuehe jan, da jan cúu da cája i cuénta nanaha da ña mé a ndaa quihvi ini da ñani táhan da —nacachi da cán.

Anda já nacachi Jesús já xihin dá:

—Ta viti cuáhán ri yóhó va, quihvi inún ñani táhún tá quiahva nacaja da Samaria yóho —nacachi a xihin dá.

Tá nasahan Jesús vehe Marta xihin María

³⁸ Naquee Jesús íchi xíca cuahan janda quiahva naxinu coo a in ñuu loho. Ta cán nandiquehe vaha in ña naní Marta mé á vehe ñá. ³⁹ Ta nasahin in quihvi Marta yóho, ña naní María. Ta naxinu coo María nasacoo ña yati saha Jesús jáchi cúní ña cuni johó ña nu cáhan mé á. ⁴⁰ Joo ndaja

coo a juú quiahva ndíhi ini mé Marta cája ndíví ñá ñaha cuxu na ndácaan ña. Anda já nacayati ñá nu Jesús já nacachi ñá já xihín á:

—Candehé ndo, xitoho i. Á co sándehe toho ndó ña in túhún mí i cája ndíví i ñaha ta ñá cúu quihví i jan co chindeé loho ñá yehe. Cahan loho ndó xihín ña ná chindeé ñá yehe —nacachi Marta cán xihín Jesús.

⁴¹ Anda já nanducú ñehe Jesús tuhun nu ña já cáchi a já xihín ña:

—Marta loho, a juú quiahva ndícani inún ta ndíhi inún jáchi ín ndivaha chuun nuun.

⁴² Joo ín in túhún ñaha ña ín chága saha ta cúu á ña ndítahan cajún. Ta María, ñá cúu quihvun yóho nacaxi ñá ña vaha chága. Ta ni in na a cúu caji nuu nu ñá cuni joho ña tuhun cahan i —nacachi Jesús xihín ña.

11

Jánaḥa Jesús na xíca tuun xihín á ndaja caja na caça tahví na nu Ndióxi
(Mt. 6:9-15; 7:7-11)

¹ In tañu xíca tahví Jesús nu Ndióxi ndácaan. Ta tá nandíhi naxíca tahví a já nacachi in táhan da xíca tuun xihín á cán já xihín á:

—Jánaḥa ndó ndeḥe, xitoho nde caça tahví nde nu Ndióxi, tátá yo tá quiahva nacaja Juan, da nacaja ndúta ñayivi. Jáchi najánaḥa da nuú na nasaxíca xihín dá ndá quiahva caja na caça tahví na nu Ndióxi —nacachi da cán xihín Jesús.

² Anda já nacachi Jesús já xihín na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña ín indiví, cáhnu ná cacuu quiví ndo.

Ná tandaa quí quiví cacomí ndó cuéntá sahá nde.

Ta ná coo tá ín cúní mé ndó coo ñuyiví yóho tá quiahva ín indiví cája ndó.

³ Quiahva ndó nuú nde ña ndímaní nuú nde cuxu nde in in quiví.

⁴ Caja cáhnu ini ndó sahá cuachi nde tá quiahva cája cáhnu ini nde saha tóco ndíhi ña núu cája ñayivi xihín nde.

Ta a quiahva ndó ñamaní ña ná coto ndojó tiñáhá sacuaḥa ndeḥe já ná a cája

nde cuachi nu ndo, já cachi ndó caça tahví ndo —nacachi Jesús.

⁵ Anda já nasacu Jesús in quiahva nu ná já nacachi a já xihín ná:

—Cúu á tátuhun tá ná cuhun ndó vehe in amigo ndo java ñuú táji ta já cachi ndó já xihín dá: “Amigo, á a quiahva tóun uní pan nuú i ⁶ jáchi nacasaḥ in da xíní táhan xihín i vehe e ta cúu dá da nasahan xíca ta coó ñaha nuú i quiahva i cuxu da”, cachi ndó xihín amigo ndo. ⁷ Ta viti ná caja í cuéntá nducú ñehe da ndácaan ini vehe cán tuhun nu ndo já cachi da já: “A jáquihvún yehe jáchi ndájí tuun yéhe. Ta ndúu jahyi válí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihín ndo ná caja í cuéntá. ⁸ Mé a ndaa ná cahan i xihín ndo ña vatí co cúní da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihví ndó da. Sahá ña cán quea ndacoo da quiahva da tóco ndíhi ña xíní ñúhú ndo nu ndo. ⁹ Ña cán quea cahan i ña yóho xihín ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúní ndo ta ñehe ndó ña caja Ndióxi. Cúu á tátuhun catí ndáḥa ndo yéhe ta já nuna yéhe nu ndo. ¹⁰ Jáchi na xíca, na cán cúu na ñeḥe va. Ta na ndúcú ñaha, na cán cúu na ndíñeḥe va. Ta na catí ndáḥa yéhe, na cán cúu na ndínuna yéhe nuu.

¹¹ Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxí a. Ta ama ná quiahva ndó coo caxí a tá xíca cuñu tiyacá caxí a. ¹² Ta ama cuéhe ri ndó quiahva ndó líhma caxí jahyi ndó tá xíca ndívi nu ndo. ¹³ Vatí cúu ndó ñayivi cája cuachi joo xíní vaha ndó quiahva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a ín indiví xihín ndo. Quiahva mé á ínima yíi á nu ndá na ná caça ña nu á —nacachi Jesús.

Chícaan na cuachi Jesús ña ñeḥe a ndeé tiñáhá sacuaḥa
(Mt. 12:22-30; Mr. 3:20-27)

¹⁴ In tañu tává Jesús ínima quini ini in dataa, da nanduu níhi, nacaja rí quini. Ta

tá sa nacana mé rí quini ini da cán nacaja Jesús anda já nandicahan tucu da. Ta chí nacetóntó cuahá ñayivi ndúu cán tá naxini na ña yóho. ¹⁵ Joo java na nacasáhá cáhí na já saha Jesús:

—Taa yóho cúu távā da rí quini ñúhu ini ñayivi jáchi mé Beelzebú, rí cúu tiñáhá sacuaḥa nu rí quini cán, sahan rí ndée rí nu dá cája da ña —nacachi na.

¹⁶ Ta java ga na cúni na coto ndojó na Jesús sahá ña cán quea naxica na nu á ña ná caja mé á ñaha xitúhún quixi indiví já ná cuni na. ¹⁷ Joo xini vaḥa va Jesús ña cáhvi ini na cán sahá ña cán quea nacachi a já xihín ná:

—Tá sáhdá java táhan ñayivi ndúu in ñuu ta ndúu na cuahá táhdá já casáhá cáni táhan ndaja táhan mé va na já cama chá ndihi sahá ñuu nu ndúu na cán. Ta quiahva já yáha xihín na ndúu in vehe tá casáhá sáhdá java táhan na ta cáni táhan na já cama chá ndihi sahá vehe na. ¹⁸ Ta quiahva já yáha xihín Satanás, rí cúu tiñáhá sacuaḥa va. Tá ná cani táhan ndaja táhan mé rí já quea ndihi saha ndée ña cómi ri. Cáhan i ña yóho xihín ndo jáchi cáhí ndo ña távā i rí quini ini ñayivi xihín ndée Beelzebú, rí cúu tiñáhá sacuaḥa. ¹⁹ Joo tá mé a ndaa cúu ndusa ña cáhí ndó sahá i jan, ndáchí quehe na cúu cuéntá mé ndó jan ndée távā na rí quini ini ñayivi. Ama ná cachi ndó ña távā ndó rí quini xihín ndée tiñáhá sacuaḥa. Ña yóho náha ña co cáhvi ndaa ini ndó. ²⁰ Joo yehe xihín in túhún ndée Ndióxi távā i ínimā quini ini ñayivi. Ta xihín ña yóho náha cáxi a ña sa naxinu coo quiví cacomí Ndióxi cuéntá saha ndo —cáhí Jesús.

²¹ Ta sácú Jesús quiahva nu ná ta xihín ña yóho jánaḥa ña quee vaḥa mé á xihín tiñáhá sacuaḥa. Já cáhí a já:

—Ín in dataa ta tóyíí cáa da ta ñéhe da ndá chúun chindeé da mé dá. Ta nani ndáá da vehe da mé a ndaa coo toho ñaha ndoho ñaha da jáchi ndáá vaḥa da ña. ²² Joo tá ná quixi inga taa, da ndacú chága a juú ga mé da cán ta quee vaḥa da xihín dá já candaa ndihi da ndá chúun ña nacandee ini da mé dá. Ta já caja tá cúni mé da ndacú chága cán xihín ñaha da inga cán.

²³ Ndá na coo cuahān xoo i, cúu ná na coo cúni yehe. Jáchi ndá na coo chindeé yehe xihín ña cája i, cúu ná na sáji nuu nuú i.

Jánaḥa Jesús ña cuahá tañu ndicó coo tucu rí quini ini ñayivi vatí sa naquee rí
(Mt. 12:43-45)

²⁴ Tá quéta in rí quini ini in dataa já quee rí cuahān rí xíca nuu rí ndijáá yucú íchí ndínducú rí nuú candoo rí. Ta tá coo ndíñehe rí ña já casáhá cáhvi ini rí já: “Cóho ndicó coo tucú ini da nuú nasandacaan í cán jáchi cúu á tátuhun vehe”, cáhán ri. ²⁵ Ta tá xinu coo rí ini da cán já sándehe ri ña ín ví va ini da cán tá quiahva ví ini vehe tá natihvi á ta nandaca ndójó vaḥa tóco ndihi ñaha ini a. ²⁶ Anda já quee tucu mé rí quini cán cuahān ri quehe rí usa ga rí quini chága a juú ga mé rí já xinu ndihi rí ndihvi rí ini da cán. Ta mé da cán ndiquini chága da a juú tá nasandacaan in tálaá rí ini da —nacachi Jesús.

Ndá na cúu na tahví chága nacuu

²⁷ Ta nani cáhan Jesús tuhun yóho nuú ñayivi já nacayuhú cóhó in ñáñáha tañu ñayivi cuahā cán já nacachi ñá já:

—Tahví nacuu ñá najácacu yohó, mé ñá najácuáñnu yohó —nacachi ñá xihín Jesús.

²⁸ Anda já nacachi Jesús já:

—Tahví chága nacuu ñayivi tá xini johō na tuhun Ndióxi ta cája na ña cáhí a —nacachi Jesús.

Xíca ñayivi quini ña ná caja Jesús ña xitúhún cuni na

²⁹ Tá ndítaca cuahá ñayivi nu ín Jesús já nacasáhá mé á cáhan xihín ná já nacachi a já:

—Quini ndivaḥa va ñayivi ndúu tiempo viti. Xíca na ña ná caja i ñaha xitúhún nu ná. Joo coo toho ña cán coo. Ña cuni ndusa na quea ndoho i tá quiahva nandoho Jonás, da nasacuu profeta sanahá. ³⁰ Jáchi mé ñayivi nasanduu sanahá ñuu Nínive cán nacandaa ini na ña nachindahá Ndióxi Jonás nu ná. Ta quiahva já candaa ri ini na ndúu viti ña nachindahá ri Ndióxi yehe va, da nanduu ñayivi. ³¹ Tá ná xinu quiví caja víi Ndióxi sahá cuachi ñayivi ndúu tiempo viti anda já ndicuita in ña nasacomí cuéntá sahá ñayivi ndúu chí sur sanahá ta chicaan ñá cuachi

jatá ñayivi ndúu tiempo viti. Jáchi mé ñá cán vatí ñasahjin xícá ndivaha ñá nu rey Salomón sanahá ñasahan ñá cuni johó ñá tuhun ndíchi cáhan da. Ta yehe in chága sahá i a juú ga Salomón joo co cándusa ndó yehe. ³² Ta jári ñayivi ñasanduu Nínive sanahá cán ndicuita na chicaan na cuachi jatá ndo tá ná xinu quiví caja vií Ndióxi sahá cuachi ñayivi ndúu viti. Jáchi mé na ñasanduu ñuu Nínive cán najándacoo na cuachi cája na tá ñacahan Jonás xihin ná ña ñacachi Ndióxi coo. Ta yehe in chága sahá i a juú ga Jonás joo co cándusa ndó yehe.

Nduchú núu yo cúu á tátuhun in lámpara (Mt. 5:15; 6:22-23)

³³ Ni in túhún toho ñayivi co chicaan ñúhu ná in lámpara ta já quéhe na ña sácú na in nuú jehé. Ni co chicaan na ña tixi sato. Ña cája na queá chínúu jícó na ña já ná yehe nuú na quihvi ini vehe cán. ³⁴ Nduchú núu yo cúu á tátuhun in lámpara jándiyehé a nu yo já xini yo nu xica í. Ta tá tivi vaha nduchú núu yo já cuu candehé vaha í nu xica í. Joo tá co tivi nduchú núu yo já queá xica í nu naá ndivaha. ³⁵ Cuénta coo ndó a juú cahán ndo ña cúu ndó na xica nu yehe ta cáa ví ndó cája ndó cuachi tátuhun na xica nu naá. ³⁶ Tá ná quiahva ndó ñamaní jándiyehé Ndióxi inima ndo já a cája ga ndó cuachi jáchi a cánehe ga ndó inima quini. Tá cája ndó ña cuni Ndióxi já cúu á tátuhun in lámpara jándiyehé inima ndo —ñacachi Jesús.

Chicaan Jesús cuachi jatá na fariseo xihin jatá na jánaha ley Moisés

(Mt. 23:1-36; Mr. 12:38-40; Lc. 20:45-47)

³⁷ Tá ñandihí ñacahan Jesús já ñacana in da fariseo Jesús ña ná cuhun a cuxu a vehe da. Tá ñandihí já ñasahan Jesús vehe da já ñaquihvi a ñasacoo a nu mesa xihin java na cán. ³⁸ Joo ndaja coo da fariseo cán chí ñacatóntó da jáchi ñaxini da ña coo ñandahá Jesús cacoo a cuxu a tá quiahva in costumbre mé na fariseo cán. ³⁹ Anda já ñacachi Jesús já xihin da fariseo cán:

—Ndóhó, na fariseo, ndíhi ini ndó cája ndó costumbre ña ndícata ndó jatá vaso xihin jatá cohó viti joo co ndíhi ini ndó ndícata ndó ini a. Quiahva já cája mé va

ndó jáchi ndíhi ini ndó ndahá ndo tátuhun costumbre ndo joo co ndíhi ini ndó ndaja vií ndo inima ndo nuú ñachutú ndaa xihin ñaha quini cáhvi ini ndó. ⁴⁰ Ndaja tóntó jini ndo. A co xini toho ndó ña tá ñacavaha Ndióxi ñayivi já ñacavaha mé á yiquí cuñu na ta ñacavaha mé á inima ná. ⁴¹ Caja ndó ñamaní xihin na ñahví xihin ndinuhu ini ndó já ná coo vií ndó nu Ndióxi.

⁴² Ndáhví ñacuu ndó, na fariseo. Mé ndó tá cáchi ndo sahan ndó ñaha nu Ndióxi já cávaha ndó uxu táhnda ñaha ndó cán. Ta in a sahan ndó nu Ndióxi ta quéhe ndihí ndó ña java cán. Quiahva já cája ndó xihin minu estila xihin yucu lotá ta quiahva já cája ndó xihin tá nuú ñaha cána nu ñúhu ndo. Joo co cája ndó ña ndaa xihin ñayivi. Ta ni co quihvi ini ndó Ndióxi. Joo ña cuni Ndióxi caja ndó queá ná caja ndaa ndó ta ná quihvi ini ndó a. Ta a ndíndójó ndó quiahva ndó ñaha nu Ndióxi.

⁴³ Ndáhví ñacuu ndó, na fariseo. Jáchi tá sahan ndó veñuhu catóo ndo cacoo ndó nu sácoo na náhnu. Ta cuni ndó ña ná cahan Ndióxi toní ñúhú ndivaha ñayivi xihin ndo tá ndique táhan na xihin ndo íchi.

⁴⁴ Ndáhví ñacuu ndó, na jánaha ley Moisés. Ta ndáhví ñacuu ndó, na fariseo. Jáchi co cúu ndó tá quiahva ndaa ndó. Mé ndó cúu ndó tátuhun yávi nu táan na ndii jáchi núu cája ndó. Vatí xójo cava ñayivi yáha na nuú ñanduxu ndii cán joo co xini na ña cúu á in yávi nu ñúhu ndii jáchi coo yuu ñáñi a —ñacachi Jesús.

⁴⁵ Anda já ñanducú ñehe in da jánaha ley Moisés cán tuhun nu Jesús já ñacachi da já xihin á:

—Maestro, xihin tuhun cáhan jan jándihivi ri a ndehé va.

⁴⁶ Anda já ñacachi Jesús já xihin dá:

—Ndáhví ñacuu ri ndóhó va, na jánaha ley Moisés. Jáchi cája ndó ña ná coo ihvi ndivaha ley já ná a cúu caja ñayivi ña. Joo mé ndó cája ndúsa ndó xihin ná ña ná caja na ña vatí ni mé ndó a cúu caja ndó ña.

⁴⁷ Ndáhví ñacuu ndó jáchi cúu á tátuhun cávaha ndó ñáñi nu jánduxu ndó na profeta, na ñasahní tásáhnu jícó ndo sanahá. ⁴⁸ Ta xihin ña yóho náha ndó ña cáji ini ndó xihin ña ñacaja tásáhnu jícó ndo sanahá tá ñasahní na na profeta. Ta viti cúu á

tátuhun chindeé táhan ndó xihín na cán jáchi mé ná nasahní na na profeta ta mé ndó nacavaha ndó nuú nanduxu na.

⁴⁹ 'Xini vaha Ndióxi ñayivi ta ndaa nacahan mé á tá nacachi a já: "Chindahá i java profeta xihín java apóstol nu ndo. Joo mé ndó cahní ndo java na ta java na ndicuita ñee ndó na", nacachi Ndióxi sanahá. ⁵⁰ Joo viti caça Ndióxi cuéntá nuú ñayivi ndúu tiempo viti saha tóco ndihi na profeta, na naxihi ndijáá tiempo janda nani nacava sahá saha ñuyivi. ⁵¹ Caça Ndióxi cuéntá nuú ñayivi ndúu tiempo viti sahá na profeta ndii naxihi sanahá. Caça mé á cuéntá sahá Abel, da naxihi nacaja Caín cán. Ta caça mé á cuéntá sahá ndijáá na profeta naxihi tiempo naquixi cán janda quiahva naxinu coo a nuú caça cuéntá sahá ndii Zacarías. Mé da yóho nasahní na da ini veñuhu sanahá tañu nu náa xihín nuú yii ndivaha. Ña cán quea cahan i xihín ndó ña caça Ndióxi cuéntá sahá tóco ndihi ndii jan nuú ñayivi ndúu tiempo viti.

⁵² 'Ndáhví nacuu ndó, na jánaha ley Moisés. Jáchi cája ndó ña ná a cúu candaá ini ñayivi ña cáchi tuhun Ndióxi. Ta xihín ña yóho cúu ndó na sáji nuu cuití va jáchi ni co sahan ndó ñamaní nu ná ña ná candúsa na ña ndaa. Ta mé ndó vatí xini ndó cúu á ña ndaa joo co cája ndó ña cáchi a —nacachi Jesús xihín na jánaha ley Moisés cán.

⁵³ Tá nacachi Jesús ña yóho já naxojo ndivaha ini na jánaha ley Moisés cán xihín na fariseo cán xihín á. Ta já nacasáhá na ndáca tuhún cuaha chága na mé á sahá ña cúní na jáquihvi cuití ñahá na. ⁵⁴ Ta nasacu cuaha ná tuhun ihvi nu á jáchi ndúcú na ndá quiahva chican na cuachi jatá xihín in tuhun ña ná yaha yuhu á cahan.

12

Jánaha Jesús sahá na co cúu ná tá quiahva ndaa na

¹ Ta nani cahan Jesús cán nacasáhá táca cuahá ndivaha ñayivi. Cuaha mil na nacasáhá ndái cuu na cán. Janda quiahva cándíhi táhan ndaja táhan mé ná xihín á cuahan ná. Nu cuití nacahan Jesús xihín na xíca tuun xihín á já cáchi a já:

—Cuéntá coo ndó xihín na fariseo jáchi cúu ná tátuhun yusa naxaa quée xihín harina ña cávaha na pan. Co cúu ná tá quiahva ndaa na. ² Ta ni in tuhún toho ñaha a cúu coo jehé nahá jáchi cana tá cana tuhun sahá. ³ Tóco ndihi tuhun nacahan jehé ndó ñuu já vaxi quivi cuni johó ñayivi ña ndiví táhyí. Tóco ndihi ña nacahan jehé ndo tá ndáji yéhe já vaxi quivi candaá ini tóco ndihi ñayivi ñuu saha —nacachi Jesús xihín na xíca tuun xihín á.

Yo já ndítahan cayihví yo
(Mt. 10:26-31)

⁴ Anda já nacasáhá cahan Jesús xihín ndihi na cán já cáchi a já:

—Candehé ndo, na cúu amigo i. Cúni cahan i xihín ndo ña a cáyhvi toho ndó ñayivi, na cuu cahní yiquí cuñu ndó. Jáchi ña jan cúu ndihi va ña cája na ta a cuú caja na ni in ñaha xihín ínima ndó. ⁵ Ta viti ná cahan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán quea cuu caja ña ná quivi ndó ta tá nandihí cuu chican ínima ndo ini indayá. Mé a cán quea ndítahan ndusa cayihví ndo.

⁶ 'Sa xini vaha ndó ña uhun laa válí yahvi rí ivi jiuhún. Vatí núu ndivaha sahan ñayivi rí joo co ndíndójó toho Ndióxi saha rí jáchi ndaa mé á rí. ⁷ Quiahva já in rí saha mé ndó nu Ndióxi. Jáchi janda ijí jiní ndó jan ndáhví tá in tá in a nu Ndióxi. A cáyhvi toho ndó jáchi ndiyahvi chága ndóhó nu Ndióxi a juú ga cuahá laa válí.

Tá cahan cáxi ñayivi ña cúu ná cuéntá Jesús

(Mt. 10:32-33; 12:32; 10:19-20)

⁸ 'Mé a ndaa ná cahan i xihín ndó ña ndá na cáxi tuhun nuú ñayivi ña cuahan na cuéntá mí i já quea cachi mí i, da nachindahá Ndióxi nduu ñayivi saha ná ña mé a ndaa cúu ndusa na cán cuéntá mí i. Já cachi i xihín tátó Ndióxi. ⁹ Joo ndá na ná cachi xihín ñayivi ña co xini toho na yehe já quea ni yehe a ndícuni toho i na ña cúu ná cuéntá mí i nu tátó Ndióxi.

¹⁰ 'Ta ndá na ná cahan núu saha yehe, da nachindahá Ndióxi nduu ñayivi, caja cáhnu ini i saha ná. Joo ndá na ná cahan núu saha

ínima yíi Ndióxi, na cán cúu na a cajú cáhnu ini toho Ndióxi saha.

¹¹ Tá ná tiin na ndohó ña cañehe na ndohó cuhun ndó nahma ndó nuú na sacuahá veñuhu á nuú na jutixia sahá i, a ndícani toho ini ndó ña ndá tuhun queá cahan ndó nuú na cán. ¹² Jáchi tá ná xinu coo hora cahan ndó nuú na cán, jánaña ínima yíi Ndióxi nu ndo ndá tuhun nducú ñehe ndó nuú na cán —ñacachi Jesús xihin ná.

In da cuicá, da ñacaja quíhvi

¹³ In táhan da ndácaan tañu ñayivi cuaha cán ñacahan da xihin Jesús já ñacachi da já xihin á:

—Maestro, cahan loho ndó xihin ñani i ña ná cahnda java da ñaha ña najándacoo tátá nde nuú nde tá naxihi na —ñacachi da xihin Jesús.

¹⁴ Anda já nducú ñehe Jesús tuhun nu dá já ñacachi a já xihin dá:

—A juú juéxe cúu yehe já coo i cahnda java i ñaha ndó, vaha.

¹⁵ Anda já ñacachi tucu a já xihin na ndúu cán:

—Cuni johu vaha ndó. Cuénta coo ndó ña ná a ndiáva nahá ini ndó canduu cuahá ñaha cuicá nu ndo. Jáchi a juú saha ña ndúu cuahá ñaha cuicá nu ndó chí cuu catacu nahá chága ndó, vaha —ñacachi Jesús.

¹⁶ Anda já nasacu a in quiahva nu ná já ñacachi a já xihin ná:

—Ñasahin in da cuicá ta a juú quiahva nasahnu vaha ñaha nu ñúhu dá. ¹⁷ Anda já ñacasahá mé da cuicá cán ndícani ini da já ñacahan da já: “Ndáchí taán toho í cuahá nahá ñaha ñacana nu yo yóho jáchi coo ga nuú cañuhu a”, ñacahan da. ¹⁸ Anda já ñacahan tucu da já: “Ña caja í queá ndícani ndihi í yáca ní ñaha í já cavaña í ña náhnu chága. Ta cán taán yo ndihi ña ñacana nu yo ta cán taán yo tóco ndihi java ga ña cómi yo. ¹⁹ Anda já cachi i já xihin mí i: Sa cuahá ndivaha va ñaha nasacu vahún viti. Ta queta ña cusún tixi cuahá ndivaha cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajii cuití ini vún, já va cachi i xihin mí i”, ñacahan da. ²⁰ Joo ñacahan Ndióxi já ñacachi a já xihin dá: “Taa quíhvi, sa mé

ñuú viti quivi vún. Ta tóco ndihi ña nasacu vahún jan a juú ña cusún cúu á. Ndá na cúu mé va na cuxu ña jan”, ñacachi Ndióxi xihin dá. ²¹ Quíhvi ndivaha cajú ñayivi tá ndája tútú na ñaha ñuyívi yóho joo co ñúhu ini na saha Ndióxi ña ná caja na ña cuni mé á. Sahá ña cán queá cúu ná na ndahví ndivaha nu mé á —ñacachi Jesús xihin ná.

Ndaá Ndióxi na cúu ndusa jahyi mé á (Mt. 6:25-34)

²² Tá nandihí já ñacahan Jesús xihin na xíca tuun xihin á cán já ñacachi a já xihin ná:

—A ndícani toho ini ndó sahá ña cuxu ndó catacu ndó ta ni saha jáhma candixi ndó. ²³ Jáchi cáhnu chága mé ndó a juú ga ña xíxi ndó xihin ña ndíxi ndó. ²⁴ Candehé ndó rí naní ticacá jan. Co xútu rí ta ni co jáquee rí. Ta ni coo yáca nu taán rí ñaha rí. Joo sahan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan. ²⁵ A ndícani toho ini ndó jáchi coo toho a ñehe ndó ndícani ini ndó. Ni in túhún toho ndó a cúu ndaja jícó ndo mé ndó java metro chága sahá ña ndícani ini ndó. ²⁶ Tá ta ni loho ña yóho a cúu caja ndó, ndía ndóho ndó ndícani nahá ini ndó caja ndó java ga ñaha, dá já.

²⁷ Candehé ndo ndá quiahva ndató sahnu ita. Co cajú chúun a ta ni co cávaha jáhma á. Joo mé a ndaa ná cahan i xihin ndo ña ñúchí chága ita yóho ñacaja Ndióxi a juú ga jáhma vaha ndivaha nasandixi rey Salomón sanahá, da ñasahin cuahá ñaha cuicá. ²⁸ Candehé ndó ndaja ndáa vaha Ndióxi yucu ita vatí íin tóo a viti ta itaan cáyi a jándihí sahá. Ta ndiyahvi chága mé ndó a juú ga yucu ita. Joo co cándusa ndó ña candaa mé á ndohó. Ña cán queá xini ñúhú candee ini ndó Ndióxi ña quiahva tá quiahva mé á jáhma candixi ndó. ²⁹ Ta a ndícani ini ndó ndaja caja ndó ñehe ndó ña cuxu ndó xihin ña coho ndó. ³⁰ Jáchi ñayivi, na co xini íchi cuénta Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuénta Ndióxi, mé a cúu tátá ndo ta xini vaha mé a ña ndímaní nu ndó catacu ndó. ³¹ Joo ndítahan nu ndó ndiquiahva ndó mé ndó ndáha Ndióxi ña ná

cacomí a cuéntá saha ndo já quiahva mé á nu ndo ña ndímaní nu ndo catacu ndó.

Indiví cúu nu ndítahan ndaja tútú ñayivi ña vaha

(Mt. 6:19-21)

³² 'A cáyhvi toho ndó jáchi mé ndó cúu ndó tátuhun ndicachi válí janá i. Mé a ndaa chá va cúu ndó joo cáji ini Ndióxi ña cómi a cuéntá saha ndo. ³³ Jicó ndó ña cómi ndo ta jasá ndó ñaha nuú na ndímaní ñaha nuu. Jáchi quiahva já ndaja tútú ndó ñaha vaha indiví nuú cuhun ndo. Jáchi mé cán a ndíhi sahá ña vaha cómi ndo. Ta ni na cuíhná a cuú quíhvi na caja cuíhná ñaha ndó cán. Ta ni tiquíj a cuú jándihi rí sahá ñaha ndó cán. ³⁴ Jáchi nuú nandaja tútú ndo ña ndáyahvi nu ndo, cán coo ri ínimá ndo.

Náha Jesús ña xíní ñúhú canduu tiahva ñayivi cuhun na xihin mé á

³⁵ 'Xíní ñúhú canduu tiahva ndó candati ndó ndá hora ndicó coo tucu u quixi i ndiquehe e ndohó. ³⁶ Xíní ñúhú cacuu ndó tátuhun mozo tá ndati tiahva da ndicó coo xitoho da, da cuahan víco tándaha. Ndáti tiahva da cuná da yéhe nu dá tá ná xinu coo da caní ndáha dá yéhe. ³⁷ Tahví nacuu mozo tá co quíj da ndúu da tá ná xinu coo xitoho da. Mé a ndaa ná cahan i xihin ndo ña janda mé da cúu xitoho da cán ndiquehe ñahá da ta já cacoo da da nu mesa da ta já chicao da coho cuxu mozo da. ³⁸ Coó caja toho a ña ná xinu coo xitoho da java ñuu táji á tá sa yati tiví, tahví nacuu mozo cán tá ndita da ndúu da tá naxinu xitoho da nu dá. ³⁹ Candehé ndo jáchi xíní ñúhú candaa ini ndó ña yóho. Tá xíní in dataa ndá hora cúní na cuíhná quíhvi na vehe da já queá a cúju da jáchi ndáa vaha da vehe da já ná a quíhvi na caja cuíhná na ñaha vehe da. ⁴⁰ Quiahva já xínú ñúhú canduu tiahva ri ndohó va jáchi quixi tucu yehe, da nachindahá Ndióxi ndúu ñayivi mé quívi coo cáhán ndo quixi i —nacachi Jesús xihin ná.

In mozo vaha xihin in mozo a váha

(Mt. 24:45-51)

⁴¹ Anda já nandaca tuhún Pedro Jesús já nacachi da já xihin á:

—Á nuú ndehe cuití nasacu ndó quiahva yóho á nasacu ndó ña nuú ndaja táhan ñayivi ndúu yóho.

⁴² Anda já nacachi Jesús já xihin dá:

—Ña cahan i yóho cahan i ña xihin da tácu ini, da cája vaha ndusa. Cúu á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúu mozo xihin dá cán. Anda já naquee mé xitoho da cuahan da. ⁴³ Tahví nacuu mé mozo cán tá xínu coo xitoho da ta ndíñehe dá da cája da chuun ña nacandoo nu dá caja da. ⁴⁴ Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuéntá saha tóco ndíhi ñaha cómi xitoho da. ⁴⁵ Joo da cúu mozo yóho tá ná casahá da cahan da ña cayancá ndivaha xitoho da ndicó coo da ta sahá ña cán queá casahá da cája xíxi da xihin java ga na cúu mozo xihin dá cán. Ta já cáa ga da casahá xíxi da ta xíhi da ta já xíni da. ⁴⁶ Ta ndaja coo xinu coo xitoho mozo cán mé quívi coo cáhán da. Anda jáví jándoho quini xitoho da cán ini da jáchi coo nacaja da ña ndítahan caja da. Ta ndoho da yóho tá quiahva ndóho tóco ndíhi na sáa ini, mé na coo cája ña sáhdá xitoho na nu ná caja na.

⁴⁷ 'Tá ná candaa ini mozo ña cúní xitoho da caja da joo coo in tiahva da caja da ña ta ni coo cúní da caja da ña sáhdá xitoho da nu dá, da cán cúu da ndoho ndivaha ini. ⁴⁸ Joo tá in in mozo ta coo cándaa vaha ini da ndá queá cúní xitoho da caja da ta ndaja coo cája da in ñaha ña coo táhán ini xitoho da xihin já queá chá cuití va ndoho ini da. Tá ná caja Ndióxi cuahá ñamaní xihin in ñayivi já queá ndítahan caja chúun cuaha ná nu mé á. Ta tá sa cándéé ini ñayivi inga na já queá ndinuhu ñamaní náhnu chaga caca na cán ña ná caja na xihin ná.

Cája Jesús ña sáhdá java táhan ñayivi

(Mt. 10:34-36)

⁴⁹ 'Yehe naquixi i ñuyiví yóho cahnda java táhan i ñayivi já ná ñaha na cúní cuhun xoo mí i xihin na coo cúní cuhun xoo i. Ta ña yóho cúu á tátuhun naquixi i chícaan ñúhu i ñuyiví yóho. Ta cúní ña ná ndíhi quí chuun naquixi caja i yóho. ⁵⁰ Vaxi quívi ndoho ndivaha ini i ta a juú quiahva ndíhi ini i ndáti xinu coo mé quívi jan. ⁵¹ A cáhán toho

ndó ña naxinu i ñuyívi yóho caja i ña ná coo vaha ini ñayivi. Ña vaxi yehe caja i quea ná cahnda java táhan na. ⁵² Jáchi viti xihin chí nuu cacuu a tátuhun canduu uhun ñayivi in vehe joo a cúní táhan na sahá yehe jáchi ivi na cacuu cuénta mí i ta uní na candají yehe. Á tá coo ta uní na quihvi ini yehe ta ivi na candají ri yehe. ⁵³ Ta jári da cúu tátá caní táhan da xihin jahyi da sahá yehe. Ta jári ndicuíta dataa caní táhan da xihin tátá da sahá yehe. Ta jári najihí caní táhan na xihin jahyi jíhí na sahá yehe. Ta jári najihí caní táhan na xihin náná na sahá yehe. Ta jári ndicuíta najihí caní táhan na xihin sanu na sahá yehe. Ta jári ndicuíta najihí caní táhan na xihin xojo na sahá yehe —nacachi Jesús.

Có cúní ñayivi candaq ini na yo cúu Jesús (Mt. 16:1-4; Mr. 8:11-13)

⁵⁴ Anda já nacachi tucu Jesús já xihin ñayivi:

—Mé ndó tá xíní ndo ndicuíta vico vaxi a ñuu ndó chí xoo nu quea candii já cáhí ndó ña cuun javi ta chí cúun ndusa dó. ⁵⁵ Ta tá xíní ndo vaxi tachí chí xoo sur já cáhí ndo ña ihní ndivaha coo ta chí ihní ndusa sahijn. ⁵⁶ Co cúu ndó tá quiahva ndaa ndó. Candaq vaha ini ndó ña cúu ñuyívi ta candaq ini ndó cahan ndó ndá quea coo tá sándehe ndó indiví. Joo co cúní ndó candaq ini ndó ña jánaha i nu ndo.

Ndítahan caja vaha ndó xihin na co cúní ndohó (Mt. 5:25-26)

⁵⁷ Ndávaha co távavaha ndó cuénta ndía quea vaha ta ndía quea a váha. ⁵⁸ Tá sácú ini na saha ndó cuhun ndó vecaa ta ndáca táhan ndó xihin na cán cuahan ndó nuú na jutixia, xíní ñuhú nducú ndó ndá quiahva ndique táhan maní tucu ndó xihin ná nani xíca ndó íchi cuahan ndo. Já quea ná a cáñehe na cán ndohó cuhun ndó nu juéxe jáchi da cúu juéxe cán ndiquiahva da ndohó ndáha policía ta policía cán chicaan da ndohó vecaa. ⁵⁹ Mé a ndaa ná cahan i xihin ndo ña tá ndacaan ndó vecaa jan chí a cána ndó janda quiahva ná chahvi ndihi ndó ña yíca ndo nuú da cán já janí da ndohó —nacachi Jesús xihin ná.

13

Cáhan Jesús ña ndítahan jándacoo ñayivi cuachi cája na

¹ Mé tiempo já naxinu coo java na ndi-cani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quea cáhí na ña nacatáhan níi da naxihí xihin níi quíti, rí jóco da. ² Anda já nacachi Jesús já xihin ná:

—Á cáhan ndo ña naxihí da Galilea yóho sahá ña ín chága cuachi da a juú ga java ga na Galilea. ³ A juú a já jáchi quiahva já ndihi ri saha ndohó va tá ná a jándacoo ndó cuachi cája ndó. ⁴ Sanahá ndivaha já naxihí sahun uní taa jáchi nandicava in torre naní Siloé jata ná. Á cáhan ndo ña nandicava torre cán jata na yóho jáchi nasahijn chága cuachi na a juú ga na ñuu Jerusalén. Joo co cúu á quiahva já. ⁵ Mé a ndaa ná cahan i xihin ndo ña quiahva já ndihi ri saha ndohó va tá ná a jándacoo ndó cuachi cája ndó —nacachi Jesús xihin ná.

Sácú Jesús quiahva saha in titó ñuhú, dó co cána cuihi nuu

⁶ Anda já nasacu Jesús in quiahva nu ná já nacachi a já xihin ná:

—In dataa najánde da in titó ñuhú nu ñuhú dá. Ta tá nayaha tiempo já nasahan da sándehe da do ña á cána titó ñuhú nu do. Joo co mé rí nandiñehe dá. ⁷ Anda já nacachi da já xihin da ndáá ñuhú dá cán: “Cáñehe, sa naxinu uní cuia já cuítí quixi i ndúcú u titó ñuhú nu yíto yóho. Ta coo ñaha cána nu do. Vaha chága ná candún do jáchi ndá chuun quea candichi uun dó cája táñu dó nu ñuhú i”, nacachi da xihin da ndáá ñuhú dá cán. ⁸ Anda já nacachi da ndáá ñuhú dá cán já xihin dá: “Quiahva ndó ñamaní, xitoho i ña ná coo too ga dó cuia víti ná jatayi i ñuhú saha do ta ná chicaan loho i tata saha do. ⁹ Ta xihin ña yóho jonáa cana cuihi nu do. Ta tá coo ñaha cána nu do já cahnda ndó do tá cúní ndo”, nacachi mozo cán xihin xitoho da —nacachi Jesús.

Mé quivi ndiquehe ndée ñayivi ndája vaha Jesús in ña xíca tojo

¹⁰ Ta ndaja coo in quivi ndiquehe ndée ná já nasandacaan Jesús veñuhu jánaha tuhun Ndióxi nuú ñayivi. ¹¹ Ta mé ini

veñuhu cán nasandacaan in ñañaña, ña quihvi sahun uní cuia. In ínima quini cúu rí naquihvi ini ña ta nacaja rí ña ná nditojo ña ta chí ni loho a cuú jándicaa ña mé ña. ¹² Tá naxini Jesús ña já nacana mé á ña já nacachi a já xihín ña:

—Ndaja vaha i yohó viti —nacachi Jesús xihín ña.

¹³ Anda já nachojó a ndaha á jata ña chí mé hora já nandicaa yiquí cuñu ña ta nacasaha ña cája cáhnu ña Ndióxi. ¹⁴ Joo mé da cúu sacuaña veñuhu cán nacasaha ndíquehe da jáchi nandaja vaha Jesús ñañaña cán mé quivi ndíquehe ndée ná. Já nacasaha cáchi da cán já xihín ñayivi ndúu ini veñuhu cán já:

—Ín iñu quivi núná nu yó cája chúun í ta tañu quivi já cuu quixi ndó catátá ndo tá cúni ndo. Joo a quixi ndó catátá ndo quivi ndíquehe ndée yó —nacachi da xihín ná.

¹⁵ Anda já nacachi Jesús já xihín da sacuaña veñuhu:

—Co cúu ndó tá quiahva ndaa ndó. Cája mé ndó chuun quivi ndíquehe ndée yo tá ndaxí ndo tindiquí á búrró jana ndó sahan ndó jácoho ndó ri ticuí. ¹⁶ Ta viti candehé ndo ñañaña yóho. Cúu ña ña naquixi chíchi Abraham ta sa ín sahun uní cuia naquehe cuehe ña nacaja Satanás, mé tiñahá sacuaña. Ta mé ndó cáhán ndo ña a váha toho nacaja i ña najani i ñañaña yóho ndaha cuehe ña nandoho ña tixi cuahá cuia. Joo mé a ndaa nanditahan nuú i janí i ña ndahá cuehe yóho coo caja toho a cúu á quivi ndíquehe ndée yo —nacachi Jesús.

¹⁷ Tá nacachi Jesús ña yóho chí a juú quiahva nacacahan nuú na co cúni Jesús cán. Joo tóco ndihi java ga ñayivi cán cájii ndivaha ini na jáchi naxini na ña cája Jesús ña náhnu ndivaha.

Sácú Jesús quiahva sahá in ndíqui mostaza

(Mt. 13:31-32; Mr. 4:30-32)

¹⁸ Tá ndihi já nacachi tucu Jesús já:

—Ná ndicani i nu ndó ndaja ín nu ndíquiahva ñayivi mé ná ndaha Ndióxi ña ná cacomí a cuénta saha ná. ¹⁹ Cúu á tátuhun in ndíqui mostaza ña chíhin in dataa nu ñuhu dá. Ta mé ndíqui loho yóho sáhnu a janda quiahva ndúu a tátuhun in

yitó cáhnu nu xínu coo laa chójó ri táca ri nu ndaha do —nacachi Jesús.

Sácú Jesús quiahva saha ndaja cája yusá naxiaa tá quee a xihín harina

(Mt. 13:33)

²⁰ Anda já nacachi tucu Jesús já:

—Ná ndicani i nu ndo ndaja ín nu ndíquiahva ñayivi mé ná ndaha Ndióxi ña ná cacomí a cuénta saha ná. ²¹ Cúu á tátuhun tá cávaha na pan ta quee yusá naxaa xihín harina. Cúu á tátuhun tá cáva táhan in ñañaña loho yusá naxaa xihín uní táhnda náhnu harina ña ná janañu a tóco ndihi mé yusa cán —nacachi Jesús.

Táhán ndivaha yéhe nuú quihvi ñayivi cuhun na indiví

(Mt. 7:13-14, 21-23)

²² Nandíquehe Jesús íchi cuahan chí ñuu Jerusalén ta ndijáá ñuu náhnu xihín ñuu válí nu yáha janaña mé á tuhun Ndióxi cuahan.

²³ Ta ndaja coo nandaca tuhún in da Jesús já nacachi da já xihín á:

—Xitoho í, á chá cuití va ñayivi cacuu na cacu ndaa ínima cuhun chí indiví —nacachi da xihín Jesús.

Anda já nanducú ñehe Jesús tuhun já cáchi a já xihín dá:

²⁴ —Cúu á tátuhun ín in yéhe táhán loho nuú ndihvi ñayivi indiví. Ña cán quea xini ñuhú ndó ndihi ini ndó ndihvi ndó chí yéhe loho cán jáchi cuahá ndivaha ñayivi ndítihvi na ña quihvi na joo a cúu quihvi na. ²⁵ Jáchi tá quiahva ín in xitoho vehe quiahva já ín Ndióxi. Jáchi tá ná ndicoo da cúu xitoho vehe cán chícaji tuun da viti yéhe vehe da já xínu coo ndó cándichi ndó jata véhe cáni ndaha ndó yéhe já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhe ná quihvi nde”, cachi ndó xihín dá. Ta já nducú ñehe da cán tuhun nu ndó cachi da já xihín ndo: “Cuahán ndo jáchi co xini toho i ndohó.”

²⁶ Ta já casahá mé ndó cachi ndó já xihín dá: “Cuahá tañu sa naxixi nde ta naxihi nde xihín ndo. Ta ní cáyé ñuu nde naxica nuu ndó najanaña ndó ñayivi.” ²⁷ Anda já nducú ñehe da cán tuhun nu ndo já cachi da já xihín ndo: “Sa nacahan vi xihín ndo ña co xini toho i ndá na cúu ndohó. Caxoo ndihi ndó nuú i jáchi cúu ndó ñayivi cája

ndinuhu ña núu.” 28 Ta cán ndusa queá cuacu cóhó ndo ta casáhá cahñá nuhu ndó xihín ña cojo ini ndó. Jáchi cán cuni ndó Abraham xihín Isaac xihín Jacob xihín tóco ndihi na profeta. Cuni ndó ña ndúu na indivi cán ta cómí Ndióxi cuéntá saha ná. Ta a juú quiahva tahnda ini ndó jáchi tavá xóo Ndióxi ndohó ña ná a ndíhvi ndó nu ndúu na cán. 29 Jáchi xinu ñayivi ndúu ndijáá ñuyíví nu Ndióxi ta ndaca nduu na nuú cacomí Ndióxi cuéntá sahá ñayivi. 30 Ta mé quivi cán já cuni ndó java ñayivi, na coo saha mé nuú ñayivi ta nduu na na ín chága saha nu Ndióxi. Ta cán cuni ndó java na ndíñehe jícó mé viti ta a cóo toho saha ná nu Ndióxi —ñacachi Jesús.

Táhnda ini Jesús ta sácu a sahá ñayivi ndúu ñuu Jerusalén
(Mt. 23:37-39)

31 Mé quivi já naxinu coo java na fariseo nu Jesús já ñacachi na já xihín á:

—Cuáhán inga ñuu cóun jáchi sácú ini Herodes cahñí da yohó —ñacachi na xihín á.

32 Anda já ñacachi Jesús já xihín ná:

—Cuáhán ndó cahan ndó xihín da cátóo jándahvi ñayivi jan ta cachi ndó xihín dá ña tavá i ínima quini ñuhu ini ñayivi ta ndája vaha i na quíhvi ta caja tá caja i ña yóho janda quiahva ná xinu coo quivi jándihi i chuun yóho. 33 Joo sa mé Jerusalén jan quivi vi jáchi jan cúu nu sáhní na profeta. Ta viti ndítahan caca nuu yií vi íchi xíca i cuahan i yóho —ñacachi Jesús.

34 Anda já ñacachi tucu Jesús já:

—Ndáhví nahá ñacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na ñachindahá Ndióxi nu ndó xihín yuu. Cuahá ndivaha tañu cúní jánditaca ndihi i ndohó joo coo ñaxeen ndó. Cúu á tá quiahva cája nduxú tá játaca rí jahyi válí rí tíxi ndíxi rí. 35 Ta viti cuni johó ndó ña cahan i xihín ndo. Vaxi quivi janí ndáha mé vehe ndó candoo a. Ta mé a ndaa ná cahan i xihín ndo ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í” —ñacachi Jesús.

14

Tá nandaja vaha Jesús in da naquihvi cuiñu

1 Ta ndaja coo in quivi ndíquehe ndée ná já ñasahan Jesús ñaxixi a vehe in da cúu sacuaña nuú na fariseo. Ta java ga na fariseo cán ñacasáhá nání na Jesús ndúu na. 2 Ta mé yati nu Jesús cán ñasahin in dataa, da naquihvi cuiñu yiquí cuñu. 3 Anda já nandaca tuhún Jesús na jánaha ley Moisés xihín na fariseo já ñacachi a já xihín ná:

—Á núná nu yó ndaja vaha í in da quíhvi mé quivi ndíquehe ndée yo, á co núná toho nu yó cája í ña —ñacachi Jesús xihín ná.

4 Joo táji ñasahin yuhú na cán. Anda já nandaja vaha Jesús da quíhvi cán já ñacachi a xihín dá ña ná quee da cuhun da. 5 Ta já ñacachi a já xihín na fariseo cán:

—Mé ndó tá ndicava búrró á tindiQUI jana ndo ini in táhvi chí ivi laá tavá ndó rí. Ta coo caja toho a á cúu á quivi ndíquehe ndée yo —ñacachi Jesús.

6 Joo coo ñacuu nducú ñehe na tuhun nu Jesús.

7 Anda já naxini Jesús ña jandá johó ndácaxi na ñataca cán nuú vaha cacoo na já najánaha nu ná ndía vaha chága ndítahan caja na. Já ñacachi a já:

8 —Tá ná cana in na yohó cuhun in víco tándaha, a ndúcú tohún cacoun nu sácoo na náhnú. Jáchi cuu xinu coo in da ín chága saha a juú ga yohó. 9 Ta da ñacana yohó víco cán cuu cachi da já xuhun: “Quiahva nu ín cóun jan ná cacoo da yohó”, cachi da xuhun. Anda já cacahan nuun já queún cuhun cacoun janda nu ndíhí. 10 Ña ndítahan cajún queá cacoun janda nu ndíhí. Já queá tá ná xinu da ñacana yohó nu iún já cachi da já xuhun: “Amigo, cuáhán yaha nu ndúu na náhnú cóun.” Xihín ña yóho ndindita jícún nuú na ndúu coo nu mesa xixi xuhun cán. 11 Jáchi ndá na cája cáhnú mé, na cán cacuu na ñanuu ndáha johó. Ta na co ndíñehe jícó mé, na cán cúu na ndicáhnú —ñacachi Jesús.

12 Anda já ñacahan Jesús xihín mé da ñacana ñahá cán já ñacachi a já xihín dá:

—Tá ná cavaña cuahún ña cajáhnú na á ña cajíni na, a cána tohún na cúu amigún jan ni na cúu ñanún jan ta ni a cána tohún

na cúu táhún ta ni a cánún na cuicá ndúu yati xuhun jan. Jáchí tá ná caja na víco cana ri na jan va yohó ta xihín ña jan táhnda cuéntá sahá ñamaní ñacajún xihín na cán. ¹³ Ña ndítahan cajún tá ná cavahún in víco queá canún na ndahví ta canún na réncō ta canún na cuaá. ¹⁴ Ta já cajii ínún jáchí na cán a cúu toho caja na chahvi na ñamaní ñacajún xihín ná ñuyívi yóho. Joo vaxi quiví tá ná nditacu ñayivi ñasañehe ínima vaha ñuyívi yóho já chahvi Ndióxi ñamaní ñacajún jan —ñacachi Jesús xihín ná.

Sácú Jesús quiahva sahá in dataa, da ñacana cuaha chá ñayivi ña ná cuhun na víco vehe da

(Mt. 22:1-10)

¹⁵ Tá ñaxini johō in táhan da ín coo nu mesa xihín Jesús cán ña yóho já ñacachi da já xihín á:

—Tahví ñacuu na ná ñehe táhvi cuhun indiví ña ná cacomí Ndióxi cuéntá sahá ná —ñacachi da xihín Jesús.

¹⁶ Anda já ñasacu Jesús in quiahva nu dá já ñacachi a já xihín dá:

—In dataa ñacavaha da in víco cáhnu ta ñacana cuahá ndivaha da ñayivi. ¹⁷ Ta tá sa ñaxinu coo hora cajini na já ñasahnda da chuun nu mozo da ña ná cuhun da cana da na ña quixi na ndaca nduu na nu mesa. Já ñacachi da já xihín ná: “Naha quíi ndo jáchí sa ñacandíví ndihi ñaha”, ñacachi mozo xihín na cán. ¹⁸ Joo tóco ndihi na cán ñacasáhá na cáhan na ña a cúu toho cuhun na. Ta in táhan da cán ñacasáhá cáhí da já xihín mé mozo cán já: “Jacá ñaxeen uun i in ñúhu ta xíní ñúhú cuhun i candehé e nu á. Cáhnu coo ínún”, ñacachi da xihín mozo cán. ¹⁹ Ta inga da ñacachi da xihín mé mozo cán já: “Jacá ñaxeen e uhun yúntá tindiquí ta viti cúní cuhun i coto ndojó i ri. Cáhnu coo ínún”, ñacachi da xihín mozo cán. ²⁰ Ta inga tucu da ñacasáhá cáhí da já: “Jacá ñatandaha vi sahá ña cán queá a cúu toho cuhun i”, ñacachi da xihín mozo cán. ²¹ Tá ñandicó coo mozo cán nuú xitoho da já ñandicani ndihi da nuú xitoho da ña ñacachi na cán xihín dá. Anda já ñacasáhá ñandicuehe xitoho da cán já ñacachi tucu da já xihín mozo da: “Ta viti cuahán camún ndijáá cáyé ñuu játacún na ndahví xihín na réncō

xihín na cuaá. Cañehún na quisún yóho ná cuxu na”, ñacachi xitoho da cán xihín dá. ²² Tá ñandihí já ñasahan mozo cán já ñacaja da ña ñacachi xitoho da xihín dá. Ta tá ñandicó coo da já ñacachi da já xihín xitoho da: “Sa ñacaja i tá ín ñasahnda ndó nuú i. Joo yójo tá yójo nuú cuu canduu chága na”, ñacachi da xihín xitoho da. ²³ Anda já ñacachi xitoho da já xihín dá: “Cuahán ndijáá cáyé xihín ndijáá íchí ta xihín ña ndúsa játacún na ña ná quixi na já ná chutú vehe e. ²⁴ Jáchí ni in túhún toho táhan na ñacana i quixi vehe e nu cuítí cán, a quixi ga na cajini na ña ñacatáhan vehe e”, ñacachi da xihín mozo da —ñacachi Jesús.

Ndítahan jándacoo í ndá ña ndáyahvi nu yo tá ta mé a ndaa cúní yó candicō yó Jesús

(Mt. 10:37-38)

²⁵ Cuahá ñayivi ndíco na jata Jesús cuahan na. Anda já ñandicó coo játa nu Jesús já ñacachi a já xihín ná:

²⁶ —Ndá na cúní jácuaha xihín i xíní ñúhú quihvi ini chága na yehe a juú ga tátá na xihín náná na. Ta xíní ñúhú quihvi ini chága na yehe a juú ga ñájihí na á jahyi na á ñani na á quiahva na. Ta xíní ñúhú quihvi ini chága na yehe a juú ga mé ná. ²⁷ Ta ndá na co ndíco yehe sahá ña yíhvi na quivi na, mé a ndaa coo saha toho na cacuu na cuéntá yehe. ²⁸ Tá cúní ndó cavaha ndó in vehe jícó ña cája ndó queá tavá vaha ndó cuéntá ña á queta jiuhún ndo á a queta já ná jáxinu ndó ña. ²⁹ Jáchí tá ná a tává jihna ndó cuéntá ta casáhá ndó cavaha ndó vehe ndó joo tá ñandihí co queta ga jiuhún ndó ña ná jáxinu coo ndó ña já queá cacahan nuu ndo jáchí casáhá ñayivi cuacu ndaa na ndohó. ³⁰ Já cachi na já xihín ndo: “Taa jan ñacasáhá da cavaha da vehe da joo coo ñacuu jáxinu dá ña”, já cachi na cuacu ndaa na ndohó —ñacachi Jesús.

³¹ Anda já ñacachi tucu Jesús já:

—Tá ná cani táhan in rey, da cómí uxu mil soldado xihín inga rey, da cómí oco mil soldado já queá xíní ñúhú ndicani vaha ini da ña á cuu quee vaha da xihín da inga rey cán tá ná quihvi táhan da xihín dá. ³² Ta tá ñatavá vaha da cuéntá ña a cuú quee vaha da xihín rey, da cómí oco mil

soldado cán janda xicá va ín da já chin-dahá da java nātaā ña ná cuhun da caca da ñamanī nuú inga rey cán ña ná ndico va tondóhó. ³³ Quiahva já ín ri xihín ndóhó va. Ndá ndóhó, na co cuni jándacoo tóco ndihi ña cómi ndo sahá yehe já quea coo saha toho ndó cacuu ndó cuénta yehe — ñacachi Jesús.

Cahan Jesús ña tá jándacoo ñayivi íchi cuénta mé á cúu ná tátuhun ñii, ña co óhva ga (Mt. 5:13; Mr. 9:50)

³⁴ Anda já ñacachi tucu Jesús já:

—Ña vaha ndivaha cúu ñii yívi na joo coo chuun toho a tá co óhva ña. ³⁵ Mé ñii, ña co óhva ga jan ni co váha ña jácana í nu ñúhu yo jáchi co ndahá toho ñúhu yo cája ña. Ña cája na xihín ñii jan quea sátá va na ña. Na ín johó, ná cuni johó na —ñacachi Jesús.

15

Sácú Jesús quiahva sahá in ndicachi, ri nandiñúhú (Mt. 18:10-14)

¹ Cuahá na játaca jiuhún cuénta impuesto xihín cuahá na cája cuachi ñacasahá na cáyati na nu ín Jesús jáchi cuni na cuni johó na nu cahan mé á. ² Sahá ña cán quea ñacasahá na fariseo xihín na jánaha ley Moisés cahan núu na sahá. Já cáchi xihín táhan na já:

—Taa jan ndiquehe vaha da ñayivi cája cuachi ta xíxi da xihín ná —cáchi xihín táhan na cán.

³ Anda já ñasacu Jesús in quiahva nu ná já ñacachi a já xihín ná:

⁴ —Mé ndó tá cómi ndo in ciento ndicachi ta tá in cuití ndiñúhú in ndicachi jana ndo ña cája ndó quea jándacoo ndó comi jico sahun comi rí cán yucu ta já quee ndó cuahan ndó ndinducú ndó rí nandiñúhú cán janda quiahva ndiñehe ndó rí. ⁵ Ta tá ndiñehe ndó rí já cávatá ndo já quehe ndó rí chínúu ndó rí sahá jiqui ndo vaxi ndó. ⁶ Ta tá xínu coo ndó vehe ndó já játaca ndó ñani táhan ndo xihín na xíní táhan xihín ndó. Já casahá cáchi ndó já xihín ná: “Xíní ñúhú cajii íní ndó xihín i jáchi cájii íní i sahá ña nandiñehe e ndicachi janá i, rí nandiñúhú cán”, cáchi ndó xihín ná. ⁷ Mé a ndaa ná cahan i xihín ndo ña quiahva já ta janda

chága ví cájii ini na ndúu indivi tá jándacoo in ñayivi cuachi cája na a juú ga sahá comi jico sahun comi ñayivi, na cája tá cája ña vaha.

Sácú Jesús quiahva sahá in jiuhún, ña nandiñúhú

⁸ Ta viti ná cahan tucu u inga quiahva xihín ndo. In ñáñaha ñasahin uxu jiuhún caa ña yahvi ndivaha nu ña. Ta tá ndiñúhú in táhan ña cán já ndicahmi ña ñúhu ta tíhvi ña vehe ña jáchi ndihi ini ña ndinducú ña ña ta víi víi ndinducú ña ña janda quiahva ná ndiñehe ña ña. ⁹ Ta tá sa nandiñehe ña ña já játaca ña ñani táhan ña xihín na xíní táhan xihín ña já casahá cáchi ña já xihín ná: “Xíní ñúhú cajii íní ndó xihín i jáchi cájii íní i sahá ña nandiñehe e jiuhún i, ña nandiñúhú”, cachi ña cán —ñacachi Jesús.

¹⁰ Anda já ñacachi tucu Jesús já:

—Mé a ndaa ná cahan i xihín ndó quiahva já cájii íní tátó Ndióxi ndúu indivi tá jándacoo in ñayivi cuachi cája na — ñacachi Jesús.

Tá najándacoo in dataa tátá da ta ñaquee da cuahan xicá da

¹¹ Anda já ñasacu Jesús in quiahva nu ná já ñacachi a já:

—In dataa ñasahin ivi jahyi taa da. ¹² Ta da loho chá cán ñacachi da já xihín tátá da: “Taá i, á a váha ná ndicahnda va ndó ñaha cómi ndo já ná ndiquehe e ña cáni nuú i ndiquehe e”, ñacachi da cán xihín tátá da. Anda já ñasahnda java tátá da ñaha, in táhnda ñaquehe mé dá ta in táhnda ñaquehe ñani da. ¹³ Ta chá va quivi ñayaha já najicó ndihi da loho chá cán ñaha ña ñañehe dá nu tátá da ta xihín jiuhún ñacana cán ñaquee da cuahan xicá ndivaha da chí ñuu tóho. Ta cán ñacasahá da játiví ndaja ñacuu johó da jiuhún da ña cája da ña núu. ¹⁴ Ta tá sa najativí ndihi da jiuhún da já ñaxinu in tamá ndeé ndivaha mé nu ín da cán. Já ñacasahá ñaxinu joco nu dá ta ñacasahá cuico da. ¹⁵ Anda já ñaquee da ñasahan da ndúcú da chuun caha da nuú in dataa mé nu ín da cán. Ta ñasahan da cán chuun nu dá ña ná cuhun da candaa da cóchi janá da cán. ¹⁶ Ta tá cuni coo ndiava já cuni coo ña sáxi cóchi cán. Ta chí caxi da ña cán janda quiahva

chutú tixi da cúni da. Joo co sáhan na ña nu dá. ¹⁷ Anda já ñacasáhá da ndícani ini da já ñacahán da já: “Cuaha chá mozo táhan na cája chúun nu tátá i chí yójó johó ñaha xixáhan na ta yóho xihí va yehe joco íin i. ¹⁸ Ña caja i quéa ndicó coo tucu u nu íin tátá i ta já cachi i já xihín ná: Tátá maní i, ñacaja i cuachi nu Ndióxi ta ñacaja ri cuachi nu ndóhó va. ¹⁹ Ta chí coo saha mí vi cacuu u jahyi ndó sahá ña ñacaja i. Ndiqeehe ndó yehe ná cacuu u tátuhun in mozo va ndó, já cachi i cuhun i nu tátá i”, ñacahán da. ²⁰ Anda já ñaquehe da íchi cuanúhu dá vehe tátá da.

”Ta janda xicá va vaxi da já ñaxini tátá da mé dá já ñandicuni a da. Ta ñatahvi ini a saha dá. Já xínu a ñasahan ñehé a da já ñanumi a da ta ñatati yuhu á sajóho da. ²¹ Anda já ñacachi da já xihín tátá da: “Tátá maní i, ñacaja i cuachi nu Ndióxi ta ñacaja ri cuachi nu ndóhó va. Ta chí coo saha mí i cacuu u jahyi ndó”, ñacachi da xihín tátá da. ²² Ta ndaja coo tátá da ñacasáhá cáhan xihín java ga mozo já ñacachi a já xihín ná: “Cama ndó ta tavá ndó jáhma, ña vaha ta jácandixi ndó jahyi i. Ta chicaan ndó in jéhe nducu ndáha dá. Ta chicaan ndó ndusa saha dá. ²³ Ta cañehe ndó chélo, rí ndató ñandaha jan já ná quivi rí cuxú jáchi caja i in víco viti. ²⁴ Jáchi jahyi i yóho tá ñaquee da cuahan da ñacahán i ñaxihí da. Joo viti ñandicó coo da nuú i. Sahá ña cán cúu á tátuhun ñanditacu tucu da. Ñasacuu da tátuhun da ñandiñuhú joo viti ñandee va da”, ñacachi tátá da cán. Anda já ñacasáhá na cája na víco.

²⁵ Joo ndaja coo da cúu ñani da, da sacuaña chága cán, ndácaan da cája chúun da yucu va. Ta tá ñandicó coo da já ñaxini johó da tívi musica ta cáxita sáhá na. ²⁶ Anda já ñacana da in da cája chúun cán já ñandaca tuhún ñahá da ndía cúu. ²⁷ Anda já ñacachi da cája chúun cán xihín dá: “Cúu víco jáchi ñandicó coo ñanún. Ta ñasahnda tátún chuun ña ná quivi chélo, rí ndató ñandaha cán jáchi cáji iní na ña ñacasaa vaha ñanún ta coo a ñandoho da”, ñacachi da cán. ²⁸ Joo ndaja coo da sacuaña cán najoo da ta chí coo ñaxeen da quihvi da nu cúu víco cán. Sahá ña cán ñaqueta

tátá da jata véhe já cáhan ndahví a xihín dá ña ná quihvi da. ²⁹ Anda já ñacasáhá cáchi da já xihín tátá da: “Taá i, sa cándaa vaha ini ndó ña sa cuahá ndivaha cuia cája chúun i nu ndo ta cája i tóco ndihi ña sáhdá ndó nuú i caja i. Joo ni in túhún toho tañu coo ñasahan ndó ni in tijúhu loho nuú i ña ná caja i in víco loho cuxu u xihín na xíní táhan xihín i. ³⁰ Joo viti ñasahní ndó chélo, rí ndató ñandaha jan, ña cája ndó víco jáchi ñacasaa ñani i jan. Ta mé da jan ñaxica nuu da ñajátivi ndaja ñacuu da jiuhún ndo xihín ñajihí xica jii”, ñacachi da cán xihín tátá da. ³¹ Anda já ñacachi tátá da já xihín dá: “Candehé jahyi a. Mé a ndaa níi tiempo íun xihín i. Ta ñaha mé vún cúu ndihi ña íin nuú i. ³² Joo mé a ndaa ndítahan nu yo caja i víco ta cajii iní yo viti jáchi ñandicó coo ñanún, mé da ñacahán yo ña ñaxihí. Ta viti ñacasaa da cúu á tátuhun ñanditacu tucu da. Ñasacuu a tátuhun ñandiñuhú da joo ñandiñehe yo da viti”, ñacachi a cán xihín jahyi a —ñacachi Jesús.

16

Ndíndaa chuun ndáha in mozo jáchi coo ñacaja vaha da nuú xitoho da

¹ Anda já ñasacu tucu Jesús inga quiahva nuú na xica tuun xihín á. Já ñacachi a já xihín ná:

—Ñasahiin in taa cuicá ta ñasahiin in da ndáa ñaha da. Joo java ñayivi ñasahan na chicaan na cuachi jata dá nuú xitoho da ña jativí ndaja ñacuu johó da ña cúu ñaha xitoho da. ² Anda já ñacana xitoho da mé dá já ñacachi da já xihín dá: “Johó cáchi ñayivi ñaquixi na cáhan na sahun sahá ña cán quéa táxi i cuéntá nuun ña ndicanún nuú i ndaja cáa chuun ñacajún jáchi ndindaa chuun ndáhun ta a cácuu gaún da ndáa ñaha i”, ñacachi xitoho da cán xihín dá. ³ Anda já ñacasáhá da cúu mozo cán ndícani ini da já ñacahán da já: “Ndiá caja i viti jáchi ndindaa va chuun ndahá i caja xitoho i. Ta co ndée toho i caja i chuun vee. Ta tá ná caca nuu i cuati i ta cacahan va nuú i. ⁴ Sa xíní vi ndía caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, ñacahán da. ⁵ Anda já ñacana da tá in tá in na yicá nuú

xitoho da. Ta tá naxinu da nu cuítí cán nu dá já nandaca tuhún ñahá da já nacachi da já xihin dá: “Ndaja yícún nuú xitoho i”, nacachi da xihin da yíca cán. ⁶ Já nanducú ñehe da cán tuhún já nacachi da já: “In ciento lata síti yíca i nuú xitohún”, nacachi da cán xihin dá. Anda já nacachi da cúu mozo cán já xihin dá: “Candehé nu tutu yóho ndáa ndaja yícún nuú xitoho i. Joo cacoo quíi jan ta cahyí ña yícún ivi jico uxu lata síti cuítí va”, nacachi mozo cán xihin da yíca nuú xitoho da cán. ⁷ Tá nandihí já nandaca tuhún da inga da yíca nuú xitoho da já nacachi da já xihin dá: “Ta yóho ri ndaja yícún nuú xitoho i”, nacachi da. Anda já nanducú ñehe da yíca cán tuhún nu dá já nacachi da já xihin dá: “In ciento maquila trigo yíca i nu dá”, nacachi da cán. Anda já nacachi tucu da ndáa ñaha cán já: “Candehé yóho ndáa ndaja yícún. Joo cacoo quíi jan ta cahyí ña yícún comi jico maquila trigo cuítí va”, nacachi da ndáa ñaha cán xihin dá. ⁸ Tá nandihí já nacachi xitoho da xihin dá ña mé a ndaa cúu dá in da ndíchí jini jáchi xihin ña nacaja da cán candoo vaha da nuú ñayivi yíca nuú xitoho da vatí coó nacaja vaha da nuú xitoho da — nacachi Jesús xihin quiahva sácú a nuú na xíca tuun xihin á cán.

Anda já nacachi tucu a já xihin ná:

—Ñayivi cátóo canduu vaha ñuyiví yóho xini vaha chága na ndaja cája na candoo vaha nu táhan na a juú ga na sa xíca íchi cuéntá Ndióxi.

⁹ Ñayivi ndúu ñuyiví yóho cája na ña núu xihin ña cómi na. Joo ndóhó, xini ñuhú caja ndó ndinuhu ña vaha xihin ña cómi ndó. Jáchi ña jan quéa cuni Ndióxi caja ndó. Jáchi tá ná xinú quiví quivi ndó já ndiquehe vaha na ndóhó indiví sahá ña nacaja vaha ndó xihin ña nasacomí ndó.

¹⁰ Ta ndá da xihin ndinuhu ini ndáa da ñaha da vatí loho cúu á quiahva já caja ri da candaa da ñaha da tá cuaha cúu á. Joo ndá da co ndáa da ñaha da xihin ndinuhu ini da vatí loho cúu á quiahva já a candaa vaha da ñaha da tá cuaha cúu á. ¹¹ Ta tá co ndáa vaha ndó ñaha ñuyiví yóho já quéa ni Ndióxi a quiahva toho a ñaha cuéntá indiví nu ndó jáchi a catiahva ndó candaa ndó ña. ¹² Ta tá co tiáhva ndó candaa ndó ña nasahan too

inga na nu ndo, náha ña a cúu ndiquiahva na ña cacuu ñaha mé ndó nu ndo jáchi a catiahva ndó candaa ndó ña.

¹³ Ni in tuhún toho mozo a cúu caja chúun nuú ivi xitoho. Jáchi candají da in xitoho da ta inga xitoho da quihvi ini chága da. Á tá coó ta caja ndíví vaha da chuun nuú in xitoho da ta inga da cán a cája chúun vaha da nuú. Ta quiahva já in ri xihin ndóhó va jáchi a cuú caja cáhnu ndó Ndióxi tá chínúu ndó ínima ndó jatá jihún ndo —nacachi Jesús.

¹⁴ Ta nu cáhan Jesús cán ndíta na fariseo, na cátóo ndivaha jihún táa johó na nu cáhan mé á. Ta nacasahá na sácú ndaa na Jesús. ¹⁵ Anda já nacachi Jesús já xihin ná:

—Cája ndó tátuhun cúu ndó ñayivi vaha nuú ñayivi joo sa xini vaha Ndióxi ínima ndo. Ndá ña cáhvi ini ñayivi ndáyahvi chága, ña jan quéa co ndáyahvi nu Ndióxi — nacachi Jesús xihin ná.

Ndítahan nuú ñayivi caja na ña nasahnda Ndióxi anda quiahva ná naá saha ñuyiví xihin indiví

¹⁶ Anda já nacachi tucu Jesús já:

—Janda tá cámaní xinú Juan, da nacaja ndúta ñayivi já nasahin ley Moisés xihin ña najánaha na profeta sanahá. Joo viti ndijáa ndícuíta nuu tuhún Ndióxi cuahan ña vaxi quiví cacomí Ndióxi cuéntá sahá ñayivi. Ta ndá na cuni ndiquiahva na mé ná ndáha Ndióxi ndítahan nu ná ndihí ini na ndihvi na íchi cuéntá mé á.

¹⁷ Joo janda quiahva ná naá saha ñuyiví xihin indiví ndítahan nuú ñayivi caja na tóco ndihí ña sáhnda ley. Jáchi janda vaha chága in a ná ndihí sahá ñuyiví xihin indiví a juú ga ña ná ndihí sahá in tuhún tuhún ndácaan nu ley Moisés —nacachi Jesús.

Tá jándacoo táhan na sa natandaha (Mt. 19:1-12; Mr. 10:1-12)

¹⁸ Anda já nacachi tucu Jesús já:

—Tá jándacoo in dataa ñájihí da ta tándaha dá xihin inga ñáñaha já quéa cája da cuachi nu Ndióxi. Ta ndá da tándaha xihin in ñáñaha, ña najándacoo yí, cája ri da cán va cuachi nu Ndióxi —nacachi Jesús.

Ña nandoho in da cuicá xihin ña nandoho in da naní Lázaro

19 Ndícani Jesús nuú ñayivi já ñacachi a já xihín ná:

—Ñasahiin in da cuicá ta a juú quiahva vaha jáhma ñasandixi da ta chí a juú quiahva ñúchí ñacaja cutú da vehe da jáchi ndijáá níi quivi ñasacaja da víco nu xíxáhan cuicá ndivaha da. 20 Ta ñasahiin in da ndahví naní Lázaro. Quihvi da ta ndóho da cuehe ndihi táhyi. Ta ndahví cáa da íin coo da nu ñúhu yuyéhé da cuicá cán. 21 Ta mé da ndahví yóho cúni da jáchutú da tixi da xihín ña ndícava nu mesa da cuicá cán. Ta xihín ña ndeé quihvi da ndahví yóho chí janda tina xínu coo rí yácó ndaa rí nuú ndihi nanana níi da cán. 22 Ta ndaja coo in quivi ñaxihí da ndahví cán. Já ñaxinu tátó Ndióxi já ñéhe na da cuahan da coo da indivi nu íin Abraham. Ta jári da cuicá cán va ñaxihí da ta ñasahan na najánduxu ná da. 23 Ta nani ndóho ini da cuicá cán ndácaan da indayá já ñandiñehe da nuu dá. Já ñaxini xicá da Abraham. Ta ñaxini da íin Lázaro xihín dá. 24 Anda já ñacasáhá da cuicá cán cáyuhú da já ñacachi da já: “Tátá Abraham, candahví loho ini ndó yehe. Ta ná chindahá ndó Lázaro ná quixi da yóho quiahva loho da ticuú jándaxi loho da yaá i jáchi ndóho ndivaha ini i indayá yóho nu cáyi ñuhú ita.” 25 Anda já ñacachi Abraham já xihín dá: “Jahyi a, xini ñuhú ndicuhun inún ña vaha ndivaha ñasahiún ñuyíví. Ta Lázaro yóho ndahví ndivaha ñandoho da ñuyíví sahá ña cán quea co ndóho ga ini da yóho viti nani ndóho inún jan viti. 26 Ta a cúu saa toho Lázaro nu íin jan jáchi íin in táhvi cúná ndivaha tañu ndehe, na ndúu xoo chóho xihín ndóhó, na ndúu xoo chí jan. Sahá ña cán quea a cuú cuhun na ndúu xoo chóho chí jan ta ni na ndúu xoo chí jan a cuú quixi xoo chóho”, ñacachi Abraham xihín da cán. 27 Anda já ñacachi da cuicá cán já xihín Abraham: “Tá ta já ta caja loho ndó ñamani, tátá Abraham ña ná chindahá loho ndó Lázaro ña ná cuhun da vehe tátá i 28 ná cahan loho da xihín na vehe e. Jáchi ndúu uhun ñani i ta co cúni i ña ná quixi na cán yóho ndoho ini na tá quiahva ndóho ini i viti”, ñacachi da cuicá cán xihín Abraham. 29 Joo ñanducú ñehe Abraham tuhun nu dá já ñacachi da já xihín dá: “Sá íin va ley ñacahyí Moisés xihín ña ñacahyí na profeta

nuú na cán. Vaha va ná caja na ña cáchi a”, ñacachi Abraham xihín dá. 30 Anda já ñanducú ñehe da cuicá cán tuhun nu Abraham já ñacachi da já xihín dá: “Mé a ndaa quea cahan ndó jan, tátá Abraham. Joo vaha chága ná chindahá ndó in táhan na sa ñaxihí já ná cahan na xihín ñani i já ná jándacoo cama na cuachi cája na”, ñacachi da xihín Abraham. 31 Anda já ñacachi tucu Abraham já xihín dá: “Tá co cúni ñanún caja da ña ñacahyí Moisés xihín ña ñacahyí na profeta quiahva já a cándusa toho ri na ndiquehe vaha na in ndii tá ná nditacu a cuhun a cahan xihín ñanún”, ñacachi Abraham xihín da cuicá cán —ñacachi Jesús xihín ñayivi.

17

Tá jácahan táhan ñayivi caja na cuachi
(Mt. 18:6-7, 21-22; Mr. 9:42)

1 Anda já ñacachi Jesús já xihín na xica tuun xihín á:

—Níi tiempo quixi ñaha ña cája ña ná ndicají ini ñayivi caja na cuachi. Joo ndahví ñacuu na tá ná jándicava na inga na nuú cuachi. 2 Janda vaha chága ná candico in yuú yojó jico ná ta ná ndihi saha ná cahá tañuhú a juú ga ña jándicava na na ndahví yóho nuú cuachi. 3 Cuéntá coo ndó xihín ña cája ndó.

“Tá ná caja ñani táhan ndó cuachi nu ndo, jánani ndó da. Ta tá ná tahvi ini da sahá cuachi ñacaja da, caja cáhnu ini ndó saha dá. 4 Ta vatí usa táhndá ná caja da cuachi nu ndo in quivi ta já vaxi tucu da nu ndo usa táhndá ta já cásáhá cáchi tucu da xihín ndo ña a ndícó coo ga da caja da ña já ndítahan nu ndó caja cáhnu ini ndó saha dá —ñacachi Jesús.

Cúni na xica tuun xihín Jesús candeé cáhnu chága ini na mé á

5 Tá ñandihí já ñacachi na xica tuun xihín Jesús cán já xihín á:

—Vá ná caja ndó ña ná candeé chága ini nde ndohó —ñacachi na xihín á.

6 Anda já ñacachi Jesús já xihín ná:

—Tá ná candeé ini ndó yehe vatí cúu á tátuhun in ndiquí mostaza cuu cáchi ndó xihín in yíto cáhnu ña ná cuhun dó candichi dó ini tañuhú ta chí já ndusa coo.

Ña ndítahan caja in da nuú xitoho da

⁷ Tá íin in mozo ndo ta chindahá ndó da yúcu ña ná tiin da yaṭa á candaa da quití jana ndo ta tá ná ndicó coo da cán já ama ná cachi ndó xihín dá ña ná yaḥa da cacoo da nu mesa cuxu da. ⁸ Ña caja ndó quéa cachi ndó já xihín dá: “Jácatáhan ñaha ná cajíni i ta caja ndívi ná cuxu u. Ta tá sa nandíhi naxixi i já cuxu mún tá cúnun”, ña jan va quéa caḥan ndó xihín mozo ndo. ⁹ Ta ama ná ndiquiahva ñayivi ndixahvi nu mozo na tá nandíhi naṭaja da in chuun naṣahnda na nu dá caja da. ¹⁰ Ta quiahva já ndítahan coo ri xihín ndóhó va. Tá ná ndíhi naṭaja ndó tóco ndíhi chuun naṣahnda Ndióxi nu ndo já ndítahan nu ndó cachi ndó já: “Mé nde cúu nde mozo coo saḥa ta naṭaja cuití va nde chuun ndítahan nuú nde caja nde”, já ndítahan cachi ndó —naṭachi Jesús xihín na cán.

Tá nandaja vaḥa Jesús uxu ṭaa ndóho cueḥe táhyi

¹¹ Ta nani xíca Jesús cuḥan chí ñuu Jerusalén já nayaha chí xoo nu íin lindero na Samaria xihín na Galilea. ¹² Ta tá naxinu coo a in ñuu loho já naqueta uxu ṭaa ndóho cueḥe táhyi nu á joo naṣacuṭita xíca da nu á. ¹³ Já naṣasáhá cáyuhú da nu Jesús já naṭachi da já xihín á:

—Jesús, maestro, candáhví loho ini ndó ndeḥe —naṭachi da xihín Jesús.

¹⁴ Tá naxini Jesús ndíhuxu da cán já naṭachi a já xihín dá:

—Cuáhán ndó naḥa ndó mé ndó nuú na cúu juṭu —naṭachi Jesús xihín dá.

Ta nani xíca ndíhi da cuḥan da nandivií yiquí cuñu da ta nandindaa cueḥe da. ¹⁵ Ta ndaja coo in táhan ndíhuxu da cán tá naxini da ña nandivií yiquí cuñu da já naṭavatá ndivaha da. Ta naṣasáhá da cája cáhnu da Ndióxi cáyuhú cóhó da já nandicó coo da nu Jesús. ¹⁶ Já naṭaxítí da nu á janda quiahva naxinu taan da nu ñúhu jáchi ndíquiahva ndivaha da ndixahvi nu á. Ta mé dataa yóho cúu dá da Samaria. ¹⁷ Anda já naṭachi Jesús já xihín dá:

—Uxu cúu da nandivaha naṭaja i. Joo in da cán coo naxeen toho da ndicó coo da ndiquiahva da ndixahvi nuú i. ¹⁸ In túhún da tóho yóho cuití va cúu da nandicó coo

ndíquiahva ndixahvi nu Ndióxi —naṭachi Jesús.

¹⁹ Anda já naṭachi Jesús já xihín dataa cán:

—Candichi ta cuáhán. Nandivahún jáchi naṭandúsún yeḥe —naṭachi Jesús.

Ndaja coo tá ná xinu coo quiví cacomí Ndióxi cuéntá saḥá ñayivi

(Mt. 24:23-28, 36-41)

²⁰ Ta ndaja coo na fariseo naṣasáhá na ndáca tuhún na Jesús ña ndá ama casáhá Ndióxi cacomí a cuéntá saḥá ñayivi. Anda já nanducú ñeḥe Jesús tuhún nu ná já naṭachi a já xihín ná:

—A cúu cuni ndó nuú cacomí Ndióxi cuéntá saḥá ñayivi. ²¹ Coó toho ñayivi cachi xihín ndo: “Yóho íin a”, á “Cáa íin a.” Mé a ndaa ná caḥan i xihín ndo sa naxinu va quiví ta viti tañu mé ndó naṣasáhá cómí Ndióxi cuéntá saḥá ñayivi —naṭachi Jesús xihín na fariseo cán.

²² Anda já naṣasáhá cáchí a já xihín na xíca tuun xihín á:

—Vaxi quiví tá cúni ndó cuni ndó yeḥe, da nachindahá Ndióxi nduu ñayivi vatí ná coo i in quiví cuití va. Joo a cóo toho i xihín ndo. ²³ Ta queta ñayivi cachi xihín ndo: “Yóho íin da.” Á tá coo ta cachi na xihín ndo: “Cán íin da”, cachi na xihín ndo. Joo coto a cúhún ndó candehé ndo. A candico ndó jata ná cūhún ndo. ²⁴ Jáchi tá ná xinu ndusa quiví quixi yeḥe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quiví quixi yeḥe, da nachindahá Ndióxi nduu ñayivi.

²⁵ Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yeḥe. ²⁶ Tá quiahva naṣahin tiempo tá naṣahin Noé sanahá quiahva já coo ri tá ná xinu coo quiví quixi ri yeḥe, da nachindahá Ndióxi nduu ñayivi.

²⁷ Jáchi mé tiempo cán xíxi na ta xíhi na ta cája na vicó tándaha janda quiahva naxinu quiví naquihvi Noé ini barco cáhnu. Já naxinu javi quini ndivaha ta najahvi ñuyiví xihín ticuiví já naxihí ndíhi ñayivi naṣanduu tiempo cán. ²⁸ Ta quiahva já naṣahin ri mé tiempo tá naṣatacu Lot sanahá. Jandá johó cáxixi ñayivi ta jandá johó cáxixi na

ta jandá johó xéén na ñaha ta jandá johó jícó na ñaha ndúu na jandá johó cáxutu na ta jandá johó cávaha na vehe na. ²⁹ Ta tá naxinu quiví najándacoo Lot ñuu Sodoma cán já naqueta da cuahan da xihín na vehe da já nacuyu ñúhu xihín yuu cáyi chí indivi ta já naxihí ndihi ñayivi nasanduu cán. ³⁰ Quiahva já caja ñayivi mé tiempo já jáchi ndihi ini na catacu na janda quiahva xinu coo quiví quixi tucu yehe ñuyiví yóho, mé da naxindahá Ndióxi nduu ñayivi.

³¹ "Ta ndá ndó, na ndúu jata véhe ndó mé quiví já a quihvi ndó ini vehe ndó ña tavá ndó ñaha cómi ndó. Ta ndá ndó, na ndúu yucu a ndixi ndó vehe ndó. ³² Nditahan ndicuhun ini ndó ndaja nandoho ñá cúu ñájihí Lot jáchi nacava jata nuu ña sándehe ñá ña najándacoo ñá ta já nandihí saha mé ñá cán. ³³ Ndá na chínúu ínima jata ñaha ñuyiví yóho, na cán cúu na ndihí saha. Joo ndá na ndiquiahva mé ndáha mí i ta ín tiahva na quivi na sahá i, na cán cúu na catacu anda ama cáa quiví.

³⁴ 'Mé a ndaa ná cahan i xihín ndo ña tá ná xinu quiví cán já ndiquehe e na cúu cuéntá mí i. Cacu a tátuhun tá ndúu ivi na quíj na in xito ta in na ndiquehe e ta inga na candoo va sahá ña coo nacandúsa na mí i. ³⁵ Ta tá ndúu ivi na ndíco na ta in ñá ndindita cuhun xihín i ta inga ñá candoo va. ³⁶ Ta tá ndúu ivi dataa yucu xutu da ta in da ndindita cuhun xihín i ta inga da candoo va —nacachi Jesús.

³⁷ Tá naxini johó na xíca tuun xihín Jesús ña yóho já ndaca tuhún na mé á já nacachi na já xihín á:

—Ta ndachi yaha tóco ndihi ña cáhí ndó xihín nde yóho, xitoho.

Anda já nacachi Jesús já xihín ná:

—Tá quiahva cája tiyocó tá táca rí nu cándúhu in quítí, rí naxihí quiahva já caja ñayivi taca na nuu i tá ná xinu quiví quixi i —nacachi Jesús.

18

Tá naxíca in ña cuáan ñamāni nuú da cúu juéxe

¹ Nasacu Jesús in quiahva nu ná jáchi xihín quiahva yóho cúní a jánaha nu ná ña ní tiempo xíní ñúhú caca tahví na nu

Ndióxi ta co ndítahan cuitá ini na xihín á. ² Já nacachi a já xihín ná:

—In ñuu nasahin in juéxe ta coo nasahin toní ñúhú da xihín Ndióxi ta ni co sáhní da mé dá cúu ñayivi. ³ Ta mé ñuu cán nasahin in ña cuáan. Ta ndijáá ní quiví sahan ña cahan ndahví ña xihín mé juéxe cán ña ná caja vii da sahá ña sahá in na co cúní táhan xihín ña. ⁴ Ta sa cuahá quiví ta já cúu va ña sahan ña nu dá ta co cúní da caja vii da saha ña. Joo tá nandihí já nacahan da já: "Vatí coo toní ñúhú i xihín Ndióxi ta ni co sáhní i mí i cúu ñayivi ⁵ joo já caja tá caja vii i saha ña cuáan yóho jáchi jándihí ndivaha ña yehe sahá ña cán ndiquehe e saha ña já ná a quixi ga ña jándihí ña ini i", nacahan da cúu juéxe cán —nacachi Jesús xihín ná.

⁶ Anda já nacachi Jesús já xihín na ndúu cán já:

—Ña yóho quéa nacachi juéxe, da co ñéhe ínima vaha cán. ⁷ Joo cáhnu ga ví ñaha caja Ndióxi tá ná ndiquehe a sahá na cúu cuéntá mé á tá xíca tahví na nu á ñuu ta ndiví. Jáchi ndátí tiahva chindee a na cúu cuéntá mé á. ⁸ Mé a ndaa ná cahan i xihín ndo ña ivi laá ndiquehe mé á saha ná. Joo in ñaha cúní ndaca tuhún i ndohó. Á ndiñehé e ñayivi cándeé ini na yehe tá ná xinu quiví quixi tucu u ñuyiví yóho —nacachi Jesús xihín ná.

Sácu Jesús quiahva sahá in da fariseo xihín sahá da jataca jiuhún cuéntá impuesto

⁹ Anda já nasacu Jesús inga quiahva nuú java ñayivi, na ndiñehé jícó mé, na cáhán ña mé cuití na cája ña vaha. Ta já nacasáh cáhí a já xihín ná:

¹⁰ —In tañu ivi taa nasahan da veñuhu caca tahví da nu Ndióxi. In táhan da cán cúu fariseo ta inga da cán cúu da jataca jiuhún cuéntá impuesto. ¹¹ Ta nani xíca tahví da fariseo cán nu Ndióxi cándichi da já cáhí da já: "Tátá Ndióxi, ndiquiahva i ndixahvi nu ndo jáchi co cája i tá quiahva cája java ga ñayivi. Jáchi java na cája cuíhná na ta quini cája na ta cátóo na coo na xihín ñájihí ñani táhan na. Ta jári ndiquiahva i ndixahvi nu ndo jáchi co cája i tá quiahva cája da jataca jiuhún cuéntá impuesto yóho. ¹² Jáchi yehe ivi tañu xíjuhun i in in semana ta tá cháhvi na yehe sahá chuun cája i já

cávaha i uxu táhndá ta já jóco i in táhndá nu mé ndó”, cáchí da fariseo cán. ¹³ Joo da játaca jiuhún cuéntá impuesto cán xíca xíca nasandichi da ta chí ni nuu dá co cúní da ndiñehe da indivi sahá ña cáhan da ña coó saha dá caja da ña. Ña cája da queá cáni da yica ndíca da ta já cáchí da já xíca tahví da nu Ndióxi: “Tátá Ndióxi, candáhví ini ndó yehe jáchí cúu u in da cája cuachi”, cáchí da. ¹⁴ Mé a ndaa ná cahan i xihin ndo ña nacaja cáhnu ini Ndióxi sahá da játaca jiuhún cuéntá impuesto já cuanúhu va da joo coó nacaja cáhnu ini a sahá da fariseo cán. Nacaja cáhnu ini Ndióxi sahá da játaca jiuhún cuéntá impuesto jáchí ndá na ndiñehe jícó mé jánuu ndáha Ndióxi na. Joo ndá na jánuu mé nu Ndióxi já jándiñehe jícó mé á na —nacachi Jesús xihin ná.

Cája yii Jesús na valí
(Mt. 19:13-15; Mr. 10:13-16)

¹⁵ Ta cuahá ñayivi ñehe na na valí naxinu coo na nu Jesús já ná caní ndaa ndáha á na. Joo tá naxini na xíca tuun xihin Jesús cán ña yóho, nacasáhá na cája cuehe na xihin mé na ndáca na valí cán. ¹⁶ Joo nacana Jesús na já nacachi a já xihin ná:

—Quiahva ndó ñamaní ná quixi na valí nuú i. Ta a cájí nuu ndó nu ná jáchí cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁷ Mé a ndaa ná cahan i xihin ndo ndá na co cúní ndiquiahva na mé ná ndáha Ndióxi tátuhun cája na valí yóho já queá a cúu cacomí Ndióxi cuéntá saha ná —nacachi Jesús xihin ná.

Cáhan in da cuicá xihin Jesús
(Mt. 19:16-30; Mr. 10:17-31)

¹⁸ In táhan da sáhná chuun cán nandaca tuhún da Jesús já nacachi da já xihin á:

—Maestro, mé ndó cúu ndó taa vaha ña cán queá ndáca tuhún i ndohó ndíá ndítahan caja i já ná ñehe táhví i cuhun i indivi coo i anda ama cáa quiví —nacachi da xihin Jesús.

¹⁹ Anda já nacachi Jesús já xihin dá:

—Ndá cuéntá queá cáhún xihin i ña cúu u da vaha. Ni in túhún toho ñayivi coo cúu ná na vaha ñuyiví yóho. In túhún Ndióxi cuití va queá vaha. ²⁰ Sa xini vún ña sáhná Ndióxi nuun cajún já cáchí a já: “Coto a coún

xihin ñájihí á yí ñani táhún. Coto a cáhnún ndii. Coto a cája cuíhnún. Coto a cáhun ña tuhún sahá ñayivi. Ta caja cáhnún tátún nánún” —nacachi Jesús xihin da cuicá cán.

²¹ Anda já nanducú ñehe da cán tuhun nu Jesús já nacachi da já xihin á:

—Janda taa loho i nacasáhá i cája i tóco ndihi ña sáhná Ndióxi caja i —nacachi da xihin Jesús.

²² Tá naxini johó Jesús ña nacachi da yóho xihin á já nacachi a já xihin dá:

—Inga ñaha cámaní cajún: Cuáhán jicún tóco ndihi ñahún jan ta ndicahnda jiuhún jan nuu na ndahví já ñehe táhvun coo cuahá ñahún indivi. Ta tá nandihí já quisún candicún yehe —nacachi Jesús xihin dá.

²³ Tá naxini johó da cuicá cán ña nacachi Jesús xihin dá já nacacuéha ndivaha ini da jáchí iin cuahá ndivaha ñaha dá. ²⁴ Tá naxini Jesús ña nacacuéha ini da cuicá cán já cáchí a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná. ²⁵ Jáchí janda cama chága cuu yaha in camello ini in yávi saha yitucú a juú ga ña ná ndiquiahva in na cuicá mé ná ndáha Ndióxi ña ná cacomí a cuéntá saha ná —nacachi Jesús.

²⁶ Tá naxini johó ñayivi ndíta cán ña nacachi Jesús já nacachi na cán já:

—Ndá na cúu na cuu cacu ndaa ínima, dá já.

²⁷ Anda já nacachi Jesús já xihin ná:

—Ndióxi queá cuu caja tóco ndihi ñaha vatí ñayivi a cuú caja na ña —nacachi Jesús xihin ñayivi ndúu cán.

²⁸ Anda já nacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —nacachi da xihin Jesús.

²⁹ Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihin ndo ña ndá na jándacoo vehe á tátá náná na á ñani na á ñájihí na á jahyi na sahá ña cúní na ña ná cacomí Ndióxi cuéntá saha ná, ³⁰ na cán cúu na ñehe cuahá chága ñaha ñuyiví yóho jata tóco ndihi ña najándacoo na. Ta vaxi quiví

ja ñehe táhvi ri na catacu na indivi anda ama cáa quivi —ñacachi Jesús.

Cáxi tuhun tucu Jesús ña quivi a
(Mt. 20:17-19; Mr. 10:32-34)

³¹ Tá nandihí ja ñatavá xóo Jesús ndíhuxu ivi na xíca tuun xihín á cán. Já ñacachi a já xihín ná:

—Viti cohó chí ñuu Jerusalén nuú xinu coo tóco ndihi ña ñacahyí na profeta sahá yehe, da ñachindahá Ndióxi nduu ñayivi. ³² Jáchi mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihín i. Cuihna ndaa na tójí na yehe. ³³ Cani na yehe. Ta tá nandihí ja cahni na yehe. Joo tá ná yaha uní quivi já nditacu tucu u tañu na ñaxihí —ñacachi Jesús.

³⁴ Joo na xíca tuun xihín á cán ni loho coo ñacandaa ini na ña cuni Jesús cachi a xihín ná. Jáchi cúu á ñaha ña coo ñacuu candaa ini na saha.

Tá ñandaja vaha Jesús in da cuaá ñuu Jericó

(Mt. 20:29-34; Mr. 10:46-52)

³⁵ Tá ñacayati Jesús ñuu Jericó cán ta yati jín íchi nu xíca mé á cuahan cán ín coo in da cuaá sáti da. ³⁶ Ta tá ñaxini johó da ña yaha cuahá ñayivi cuahan na já ñacasáhá da ndáca tuhún da ndía cúu. ³⁷ Anda já ñacachi na já xihín dá:

—Jesús, da ñuu Nazaret, da cán cúu da yaha cuahan yóho —ñacachi na xihín dá.

³⁸ Anda já ñacasáhá da cuaá cán cáyuhú da já cáchi da já:

—Jesús, da ñaquixi chichi David, caja ndó ñamaní candáhvi loho ini ndó yehe — cáchi da.

³⁹ Joo ñayivi, na cánúu cuahan xihín Jesús cán ñacasáhá na cája cuehe na xihín dá ña ná caji da yúhu dá. Joo ví ga ví ñacasáhá da cáyuhú da já cáchi tucu da:

—Ndóhó, da ñaquixi chichi David, caja ndó ñamaní candáhvi loho ini ndó yehe — cáchi da cáyuhú da.

⁴⁰ Anda já ñacandichi Jesús já ñasahnda chuun ña ná cañehe na da cuaá cán nu á. Ta tá ñaxinu da nu á já ñandaca tuhún a da.

⁴¹ Já ñacachi a já xihín dá:

—Ndía cúnun ná caja i xuhun —ñacachi Jesús xihín dá.

Anda já ñanducú ñehe da cuaá cán tuhun nu á já ñacachi da já:

—Ndaca ndehé e cuni i, xitoho i — ñacachi da.

⁴² Tá nandihí ja ñacachi Jesús já xihín dá: —Candehé viti. Nandivahún jáchi candeé inún yehe —ñacachi Jesús xihín dá.

⁴³ Chí ivi laá nanuna nuú da cuaá cán. Ta chí a juú quiahva cája cáhnu da Ndióxi. Ndíco da Jesús cuahan da. Ta jári tóco ndihi ñayivi tá ñaxini na ña yóho já ñacasáhá na cája cáhnu na Ndióxi.

19

Tá cáhan Jesús xihín in da naní Zaqueo

¹ Tá nandihí ja ñandihvi Jesús ñuu Jericó cán já xíca mahñú ñuu cuahan. ² Ta cán ñasahín in da cuicá naní Zaqueo, da cúu da sacuaña nuú na játaca jihún cuénta impuesto. ³ Ta cuni da cuni da Jesús joo a cúu cuni ñahá da jáchi cáti cuahá ndivaha ñayivi nu Jesús. Ta mé dá coo xinu coo da cuni ñahá da jáchi cúu dá da ndihí. ⁴ Chí xinu da ñacanuú da nuú ñayivi cuaha cán já ñandaa da nuú in yito yati mé jín íchi, mé nuú yaha Jesús cán ña ná cuni ñahá da. ⁵ Ta tá ñayaha Jesús yati saha yito cán já ñandiñehe nuú á nu cánúu da cán. Já ñacachi a já xihín dá:

—Zaqueo, cuánuu quí jáchi cuni coo tóo i vehún quivi viti —ñacachi Jesús xihín dá.

⁶ Anda já ndáva nihni Zaqueo ñanuu da nu yito cán. Já cávatá da ñandiquehe vaha da Jesús cañehe da a cuahan da xihín á vehe da. ⁷ Joo tá ñaxini tóco ndihi java ga ñayivi cán ña yóho já ñacasáhá na cáhan núu na saha Jesús. Ta cáchi na ña cuahan mé á coo tóo a vehe in dataa, da cája cuahá cuachi. ⁸ Ta tá sa ndúu ndihi na vehe Zaqueo já ñandaca ndichi Zaqueo já ñacachi da já xihín Jesús:

—Candehé ndo, xitoho i. Cahnda java ndaa i ñaha cómi i ta já ndicahnda i ña nuú na ndahví. Ta ndá na ñacaja cuíhna i ñaha, na cán quiahva i comi táhnda chága ñaha nuú jáchi najándahvi i na —ñacachi Zaqueo cán.

⁹ Anda já ñacachi Jesús já xihín ná:

—Quivi viti cája cáhnu ini Ndióxi saha cuachi da yóho xihín cuachi na vehe da

jáchí xihín ña ñacaja da yóho viti náha ña mé a ndaa cándeé ini da Ndióxi tá quiahva ñacaja Abraham. ¹⁰ Ta yehe, da ñachindahá Ndióxi nduu ñayivi ñaquixi i ndinducú u ña xíca nuu cája cuahá cuachi jáchi cacu ndaa ínimá ná cúni —ñacachi Jesús xihín ná ta já ñaquee a cuahan tucu a íchi chí ñuu Jerusalén.

Tá nasahan in dataa jiuhún da nuú uxu mozo da

(Mt. 25:14-30)

¹¹ Ta nani xini johó ñayivi ña cáhan Jesús já nasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco cuahan cán ñacahán ña ña tá xinu coo a ñuu Jerusalén cán chí i vi laá va casahá Ndióxi cacomí a cuéntá sahá ñayivi vatí a juú a já. ¹² Anda já ñacachi Jesús já xihín ná:

—Nasahiin in dataa, da cúu jahyi in rey. In quivi ñaquee da cuahan xíca da ña ndicojo da chuun cacuu da rey. Tá ñandihi nasacu ini da nuhu da ñuu da. ¹³ Joo tá camaní nuhu da já ñacana da uxu mozo da. Ta nasahan da in in jiuhún nuú in in da cán ta mé jiuhún cán cúu á ña íin ndivaha yahvi. Anda já ñacachi da já xihín mozo dá: “Caja ndó ndahvi xihín jiuhún yóho janda quiahva ná xinu quivi ndicó coo tucu u quixi i”, ñacachi da xihín mozo da. Já ñaquee da cuanúhu dá. ¹⁴ Ta ndaja coo ñayivi ñundáhyi xíca cándají ña da. Sahá ña cán queá ñachindahá ña in táhnda táto ña ná cachi na xihín tátá da ña coo cúni toho na ña ná cacomí da cán cuéntá sahá ná. ¹⁵ Joo já ñandicojo da cán chuun cacuu da rey mé ñundáhyi xíca. Ta tá ñaxinu coo da cán já nasahnda da chuun ña ná cuhun ña cana na mozo da, da nasahan da jiuhún nu cán. Jáchi cúni da candaá ini da ndaja jiuhún ñañehe in in da cán jatá jiuhún da. ¹⁶ Tá ñandihi já ñaxinu coo in táhan da ñañehe jiuhún cán nu dá já ñacachi da já: “Candehé ndó, xitoho i. Nasahan ndó in jiuhún nuú i ta viti ñanduu a uxu”, ñacachi da. ¹⁷ Anda já ñanducú ñehe da cúu rey cán tuhun nu dá já ñacachi da já xihín dá: “Vaha ndivaha ñacajún xihín ña yóho. Náha ña mé a ndaa cúun in mozo vaha jáchi ñacaja ndihún tá íin ñacachi i

xuhún cajún xihín jiuhún i vatí loho queá nasahan i nuun caja chúun. Ta viti caja i ña ná cacomún cuéntá sahá uxu ñuu”, ñacachi rey cán xihín dá. ¹⁸ Tá ñandihi já ñaxinu coo inga táhan da ñañehe jiuhún cán nu dá já ñacachi da já: “Candehé ndó, xitoho i. Nasahan ndó in jiuhún nuú i ta viti ñanduu a uhun”, ñacachi mozo cán. ¹⁹ Anda já ñacachi da cúu rey já xihín dá: “Vaha ñacajún sahá ña cán queá caja i ña ná cacomún cuéntá sahá uhun ñuu”, ñacachi rey cán xihín dá. ²⁰ Ta tá ñandihi já ñaxinu coo inga táhan da cán já ñacachi da já: “Candehé ndó, xitoho i. Yóho íin mé jiuhún nasahan ndó nuú i. Náchicaan vaha i ña nu jáhma i ²¹ sahá ña yíhvi i ndohó. Jáchi cúu ndó in ta cuehe ndivaha. Ta cátóo ndó ndiquehe maní uun ndó ñaha. Ta cátóo ndó ña ná caja chúun inga ñayivi já jandá xinu uun ndó ndiquehe ndó ñaha ñañehe ná jatá chuun cája ndó”, ñacachi mozo cán. ²² Anda já ñanducú ñehe da cúu rey cán tuhun nu mozo da já ñacachi da já xihín dá: “Coo cúun in mozo vaha nuú i. Xihín tuhun cáhun chícáun cuachi jatun jáchi coo cúnun caja chúun sahá i. Cáchún ña xini vahún cúu yehe in da cuehe ndivaha ta cátóo i quehe e jiquí jiuhún i vatí coo ñacaja chúun i sahá. ²³ Sahá ña cán queá ndá cuéntá queá coo nasahan tóun jiuhún i, dá já. Já queá tá ná ndicó coo i já ná ndiquehe e jiquí á nuú ña cán, nduu”, ñacachi rey cán xihín mozo da. ²⁴ Tá ñandihi já ñacachi tucu rey xihín java ga ñayivi ndíta cán já: “Candaa ndó jiuhún ndáha dá ta quiahva ndó ña nuú da cómi uxu a jan”, ñacachi da cúu rey cán. ²⁵ Anda já ñacachi ña ndíta cán já xihín rey: “Candehé ndó, xitoho i. Ndá túni quiahva ri nde jiuhún yóho nuú da sa cómi uxu a cáa jáchi sa cuahá va jiuhún cómi da cáa”, ñacachi na xihín rey cán. ²⁶ Já ñacachi rey cán já: “Mé a ndaa ná cahan i xihín ndó, ña ndá ña sa íin ñaha nuu, mé ña cán ñehe táhvi ná coo chága ña nu ná. Joo ndá ña coo ñaha nuu sahá ña coo cája chúun na já queá janda ña loho cómi ña ndindaa”, ñacachi rey cán. ²⁷ Ta ñacachi tucu da já: “Cuahán ndó quehe ndó ñayivi quini, ña coo cúni yehe, ña coo ñaxeen ña ná cacomí i cuéntá sahá ña cán já ná quixi na. Ta cahní ndó ña

na quivi na nuu táhyí i”, nācachi rey cán — nācachi Jesús ndicani a nuú ñayivi.

Ndihvi Jesús ñuu Jerusalén

(Mt. 21:1-11; Mr. 11:1-11; Jn. 12:12-19)

²⁸ Tá nandihvi nācachi Jesús ña yóho xihín ná já naquehe tucu a íchi xíca cuahan chí ñuu Jerusalén. ²⁹ Ta tá sa naxinu coo a jiní yúcu yitó olivo cán nuú ja chá xinu coo a ñuu Betfagé xihín ñuu Betania cán já nasahnda chuun nuú ivi táhan da xíca tuun xihín á cán. ³⁰ Já nācachi a já xihín dá:

—Cuahán ndo ñuu loho ndácaan jan. Ta tá ná xinu coo ndó jan ndiñehe ndó in búrrō ndíco ndaa jan, rí a ñáha yíi ndaa na. Ndaxí ndó rí ta cañehe ndó rí quixi ndó. ³¹ Ta ndá na ná ndaca tuhún ndohó ña ndá cuéntá quea ndaxí ndó rí já cachi ndó já xihín ná: “Mé a cúu xitoho nde xíní ñúhú a rí”, cachi ndó xihín ná —nācachi Jesús xihín da cán.

³² Já naquee ndíví da cuahan da. Ta tá quiahva nācachi Jesús coo chí quiahva já ndusa nasahjin. ³³ Jáchi nani ndaxí da búrrō cán ndúu da já nācahan mé na xihín jana rí cán saha rí já nācachi na cán já:

—Ndá cuéntá quea ndaxí ndó búrrō jana nde jan —nācachi na cán.

³⁴ Anda já nanducú ñehe da xíca tuun xihín Jesús cán tuhun nu ná já nācachi da já:

—Ndaxí nde rí jáchi mé a cúu xitoho nde, xíní ñúhú a rí —nācachi da.

³⁵ Já naquehe da rí ñehe da cuahan da nu Jesús. Anda já nachojó ñayivi jáhma ná jata rí já najándaa na Jesús jata rí. ³⁶ Ta nani xíca búrrō cán cuahan rí xihín Jesús já nachinduu ñayivi jáhma ná íchi nuú yaha rí cán xihín á. ³⁷ Ta yati ñuu Jerusalén, mé nuú ndica yúcu naní yitó Olivo cán já nācasáhá cáyuhú tóco ndihi na cúu cuéntá mé á cán. Cāja cáhnu na Ndióxi xihín ña cájii íní na saha tóco ndihi ña náhnu naxini na nācāja Jesús. ³⁸ Já cáchí na já cáyuhú na:

—Ndicáhnu nahá ná cacuu da cómi cuéntá saha yo yóho jáchi cúu dá da vaxi yuhú nuu Ndióxi. Viti cájii ini na ndúu indiví. Cáhnu ná cacuu Ndióxi —cáchí na cáyuhú na.

³⁹ Anda já nācachi java na fariseo ñúhu tañu ñayivi cán já xihín Jesús:

—Maestro, jánani ndó na ndíco jata ndó yóho ná a cáyuhú cóhó na —nācachi na xihín Jesús.

⁴⁰ Joo nanducú ñehe Jesús tuhun nu ná já nācachi a já xihín ná:

—Mé a ndaa ná cahan i xihín ndo ña tá ná catáji yuhú na yóho janda já yuu ndúu jiiín íchi jan casáhá cáyuhú a caja cáhnu a yehe —nācachi Jesús.

⁴¹ Tá nācayati chága Jesús ñuu Jerusalén cán ta tá naxini a ñuu cán já nācasáhá táhvi ini a sácu a sahá. ⁴² Já nācachi a já:

—Cúni jánaha i ndohó ndía ndítahan caja ndó já ná coo vaha ínimā ndó nu Ndióxi. Joo co cúni toho ndó candaā ini ndó ña. Ta viti a cúu ga candaā ini ndó ña. ⁴³ Jáchi vaxi quivi tá quixi na co cúni ndohó ta caji nuu na nu ndo ta cani táhan na xihín ndo. Ta ni in xoo a cúu cunu ndó jáchi níí cúu caji nuu na cán já ná a quee ndó. ⁴⁴ Ta jándihvi na saha ndo jáchi cahni na tóco ndihi ndó, na ndúu cán. Ta ni in yuu a cándoō jata inga yuu jáchi ña cuyu cacuu ndihi a. Já ndoho ndó jáchi co candaā ini ndó ña naquixi i jaca cu u ndohó já ná a ndíhi saha ndo —nācachi Jesús.

Tá nataxi Jesús na ndúu jícó ñaha yéhe veñuhu

(Mt. 21:12-17; Mr. 11:15-19; Jn. 2:13-22)

⁴⁵ Tá naxinu coo Jesús ñuu Jerusalén cán já nandihvi a veñuhu cáhnu ndácaan ñuu cán. Já nācasáhá táxi a na ndúu jícó cán xihín na ndúu xéen cán. ⁴⁶ Jáchi nācāja cuehe a xihín ná ta já nācachi a já:

—Já cáchí tuhun Ndióxi: “Vehe mí i cacuu a nuú quixi na caça táhvi na nuú i”, cáchí a. Joo ndohó nandai cuu ndó yóho cája cuíhna ndó nuú ñayivi —nācachi Jesús.

⁴⁷ Ndijáá ní quivi sahan Jesús veñuhu cáhnu cán jánaha tuhun Ndióxi nuú ñayivi. Joo na cúu sacuaaha nuú jutū xihín na jánaha ley Moisés xihín na sacuahá ñuu ndúcú na ndá quiahva caja na cahni na Jesús. ⁴⁸ Joo co ñehe íní na ndaja caja na cahni na Jesús jáchi tóco ndihi ñayivi cúni na taa johō na nu jánaha Jesús.

20

Tá nandaca tuhún na Jesús ña yo sahan ñamaní nu á jánaha ñayivi

(Mt. 21:23-27; Mr. 11:27-33)

1 Ta ndaja coo in quivi ndácaan Jesús veñuhu cáhnu jánaħa ñayivi ndaja cuu cacu ndaa ínima ná já naxinu na cúu sacuaħa nuú jutū xihín na jánaħa ley Moisés ta cátaħan ri na sacuaħa veñuhu naxinu coo na xihín ná nu ndácaan Jesús cán. 2 Anda já nacachi na já xihín Jesús:

—Ndá saħa quéa jánaħún ña yóho. Yo já saħan ñamaní nuun cajún ña cájún yóho —nacachi na cán xihín Jesús.

3 Anda já nanducú ñehe Jesús tuħun nu ná já nacachi a já xihín ná:

—Ndáca tuħún ri yeħe va ndohó. Cachi ndó xihín i: 4 Yo já nachindahá Juan ña ná quixi da caja ndúta dá ñayivi. Á Ndióxi nachindahá da, á ñayivi nachindahá ñahá —nacachi Jesús xihín na cán ndáca tuħún a na.

5 Anda já nacasáħa ndítuhún xihín táhan na sacuaħa cán já cáħi na já:

—Ndía cachi yó xihín Jesús yóho. Jáħi tá ná cáħi ña Ndióxi quéa nachindahá Juan já nducú ñehe Jesús tuħun nu yo já cachi a já xoho: “Ndá cuénta quéa coo naxeen ndó candúsa ndó da, dá já”, cachi Jesús xoho. 6 Ta tá ná cáħi ñayivi va cúu na nachindahá Juan já ndicuħta ñayivi ta caħní na mí xihín yuu. Jáħi tóco ndihi ñayivi cándaa vaħa ini na ña Ndióxi quéa nachindahá Juan jáyaha da tuħun cáħan mé á nuú ñayivi —nacachi xihín táhan na cán.

7 Saħa ña cán quéa nacachi na xihín Jesús ña co xini toho na yo já nachindahá Juan ña ná quixi da caja ndúta dá ñayivi. 8 Anda já nanducú ñehe Jesús tuħun nu ná já nacachi a já xihín ná:

—Ta ni yeħe a cáxi tuħun i xihín ndó yo já nasahan ñamaní nuú i caja i ña yóho —nacachi Jesús xihín ná.

Sácú Jesús quiahva saħa java mozo, da nacaja quini xihín xitoho da

(Mt. 21:33-44; Mr. 12:1-11)

9 Tá nandihí já nacasáħa Jesús cáħan xihín ñayivi ta já nasacu a quiahva yóho nu ná já nacachi a já:

—Nasahin in dataa ta najándeħe cuaha dá tó uva. Ta tá nandihí já nasahan ndojó na mé dó uva cán. Anda já naquee da cuahan xicá da cuaha tiempo. 10 Ta tá

naxinu coo tiempo jáquee na uva nu dó uva ñaha da cán já nachindahá da in mozo da ña ná cuħun da ndiquehe da uva, rí ndítahan nu dá ndiquehe da. Joo mé na cája chún tóo ñuhu dá cán natiin na mé mozo cán ta nacani na da ta já cáa uun da nandicó coo da nacaja na. 11 Tá nandihí já nachindahá mé da xihín ñaha ñuhu cán inga tucu mozo da. Joo quiahva já nacaja ri na xihín da cán va. Nacanaħa na xihín dá ta nacani na da. Ta já cáa uun da nachindahá tucu na da nuú xitoho da. Coó ñaha nasahan na nu dá. 12 Ta mé da xihín ñaha ñuhu cán nachindahá tucu da inga mozo da ta quiahva já nacaja ri na xihín da cán va. Najándicueħe na da ta já nataxí na da.

13 Ta tá nu ndihí já nacahan mé da xihín ñaha ñuhu cán já: “Ña caja i viti quéa chindahá i jahyi maní i jáħi cája i cuénta coo toní ñuhú na xihín dá tá ná cuni na da”, nacahan mé da xihín ñaha ñuhu cán. Ta tá nandihí já nachindahá da jahyi maní dá. 14 Joo tá naxini na cája chún tóo ñuhu dá cán ña vaxi jahyi da já nacachi xihín táhan na cán já: “Candehé ndo. Yóho vaxi da cúu jahyi xitoho í. Ta tá ná xinu quivi xitoho í ta da yóho cacuu da ndicojo chuun saħa ñuhu yóho. Cóħo caħní yó da já ná candoo ñuhu yóho ndáħa mí”, nacachi xihín táhan na cán. 15 Anda já natavá na da cúu jahyi xitoho cán jaħa cútū ta cán nasahní na da —nacachi Jesús.

Anda já nandaca tuħún Jesús ñayivi ndúu cán já nacachi a já xihín ná:

—Á co xini ndó ndía caja da xihín ñaha ñuhu viti. 16 Ña caja da quéa quixi da ta caħní ndihi da na nacaja chún tóo nu ñuhu dá. Já ndiquiahva da ñuhu dá nuú java ga na já ná caja chún na nu á —nacachi Jesús.

Tá naxini joho na ndíta cán ña yóho já nacachi ndihí na já:

—A cándee Ndióxi coo ña jan já —nacachi na cán.

17 Joo nasandehé Jesús nu ná já nacachi a já:

—Ta viti cachi ndó xihín i ndía cuni cachi tuħun Ndióxi tá cáħi a já:

Mé yuu ña najácana da cávaha veħe,

ñā cān cúu ñā nānduu yū ndúhu sahá vehe
ñā ín chága saha, cáchí tuhun Ndióxi.

18 Ta yehe cúu u tátuhun in tóto cáhnu. Ta ndá nā ná yaha ndicava jata tóto cān chí chachi ndihi na. Quiahva já ndihi sahá ñayivi tá cō cūni nā candúsa na yehe. Ta mé tóto cáhnu cān tá ná yaha ndicava jata in ñayivi chícaji ndihi ñahá a cān. Quiahva já ndihi sahá ñayivi ini indayá tá cō cūni nā candúsa na yehe —nācachi Jesús.

Ndáca tuhún nā Jesús á ndítahan nu ná chahvi na jiuhún cuénta impuesto
(Mt. 21:45-46; 22:15-22; Mr. 12:12-17)

19 Chí sa mé hora já cūni nā cúu sacuaḥa nuú jutu xihín nā jánaha ley Moisés cān tiin na Jesús jáchi nācandaā ini na ñā saha mé va nā cān sácú Jesús mé quiahva nuú ñayivi cān. Joo cōo nātiin na Jesús jáchi ñayihví nā ñayivi ndúu táa johō nu cáhan Jesús cān.

20 Ñā nācaja na quēa nāchindahá nā java dataa ñā ná canāni da Jesús. Ta ndája da mé dá ñā cúu dá taa vaha ndivaha joo cō cúu da tá quiahva ndáa da. Ta xihín ñā yóho cūni da cayati da nu Jesús ná candehé da á yaha yúhu á cáhan ndá ñaha ñā cuu cūhun da jicó tuhún da mé á nuú da cúu gobernador. 21 Sahá ñā cān quēa nācayati da nu Jesús ta nāndaḥa tuhún da mé á já nācachi da já xihín á:

—Maestro, cāndaā ini nde ñā cáhan ndó ta jánaha ndó ñā ndāa. Ta cāndaā ini nde ñā tá cáhan ndó sahá in ñaha cája ñayivi cúu á sahá ñā sándehe ndó janda ínima ná. Ta cāndaā ini nde ñā jánaha ndó ñā ndāa saha íchi cuénta Ndióxi. 22 Sahá ñā cān quēa cūni nde cāndaā ini nde viti á ndítahan nuú nde chahvi nde jiuhún cuénta impuesto nuú da cómi cuénta saha yō ñuu Roma, á cō ndítahan toho nuú nde caja nde ñā —nācachi nā cān xihín Jesús.

23 Joo sa nācandaā va ini Jesús ñā cáhvi núu va ini na sahá ñā cān quēa nānducú ñehe a tuhun nu ná já nācachi a já xihín ná:

—Cāndaā cáxi táhyi ini i ñā cūni ndó coto ndojó cuití ndó yehe. 24 Jánaha ndó in táhan jiuhún jan nuú i. Yo nahná ta yo quivi quēa ndáa nu á —nācachi a xihín ná.

Já nācachi na já:

—Ñehe a quivi xihín nahná da cómi cuénta sahá yō ñuu Roma —nācachi na xihín á.

25 Anda já nācachi Jesús já xihín ná:

—Ndiquiahva ndó ñaha da cómi cuénta saha ndó ñuu Roma jan nu dá. Ta ndiquiahva ndó nu Ndióxi ñā cúu ñaha mé á nu á —nācachi Jesús xihín ná.

26 Chí cōo nācuu caja na jándahvi na Jesús nuú ñayivi ndúu cān jáchi vii nānducú ñehe ndihi Jesús tuhun nu ná. Ta chí johō cātóntó ndihi ñayivi xihín quiahva nānducú ñehe Jesús tuhun nu ná. Chí nācatáji nā cān.

Ndáca tuhún nā saduceo Jesús á mé a ndāa ndítacu tucu ndii
(Mt. 22:23-33; Mr. 12:18-27)

27 Tá nāndihi já nāquee java nā saduceo cuahan nā cáhan nā xihín Jesús. Ta mé nā saduceo cō cāndúsa na ñā ndítacu tucu nā sa naxihí. Tá nasaa nā nu ín Jesús já nācachi na já xihín á:

28 —Maestro, nu ley nācahyi Moisés sanahá nātahnda chuun ta cáchí a já: “Tá tándaha in dataa xihín ñájihí da ta tá cōo jahyi ná cacu xihín dá ta tá ná xinu quivi quivi da já quēa cáchí ley Moisés ñā ndítahan tándaha tucu ñájihí da xihín da cúu ñani mé ndii cān já ná cōo jahyi da cān xihín yuhú nuú ñani da”, já cáchí ley Moisés. 29 Ta viti cuni johō ndó ná cacu nde in quiahva nu ndo. Nāsaḥiin usā ñani. Ta da nu cuití cān nātandaḥa dá. Joo nāyaha tiempo naxihí da ta cōo toho jahyi da nācacu xihín ñájihí da. 30 Anda já nātandaḥa tucu ñā cuān cān xihín ñani chí ivi mé ndii cān. Joo nāxinu quivi naxihí ri da yóho va ta chí cōo jahyi da nācacu xihín ná cān. 31 Anda já nātandaḥa da chí uní cān xihín ñā. Joo ni da cān ni java ga ñani da cōo nācuu cacu jahyi xihín ñā. Ndíhusa da nātandaḥa xihín ñā ta ndíhusa da naxihí. Joo ni in da cōo nācacu jahyi xihín ñā. 32 Tá nu ndíhí já naxihí ri mé va ñá. 33 Ñā cūni nde cāndaā ini nde quēa, ndá da cacu ndusa yí ñá cān tá ná xinu quivi ndítacu tucu ndii. Jáchi ndíhusa va ñani da cān nātandaḥa xihín ñā —nācachi nā cān ndáca tuhún nā Jesús.

³⁴ Anda já nanducú ñehe Jesús tuhun nu ná já nacachi a já:

—Nani ndúu ñayivi ñuyiví yóho cuití va tándaha ná. ³⁵ Jáchi ndá na nanditacu tucu ta nañehe táhvi ná coo na indiví já queá co tándaha na ta ni co sáhan toho na jahyi jhí na tándaha ná. ³⁶ Jáchi mé cán cacuu na táuhun tát Ndióxi já a quívi ga na. Ta cacuu na jahyi Ndióxi jáchi sa nanditacu na tañu ndii. ³⁷ Ta sa xini yo ña nditacu tucu ndii jáchi já nacachi Moisés sanahá tá nacahyí da sahá ña naxini da tañu tohíñú, dó cándaha ñuhu cáyi cán. Tá nacahan da sahá Ndióxi, nacachi da ña janda viti cája cáhnu Abraham xihín Isaac xihín Jacob mé Ndióxi vatí naxihí na sanahá. ³⁸ Ta ña yóho cuni cachi a ña tácu yí va Abraham xihín Isaac xihín Jacob vatí sa naxihí yiquí cuñu na. Jáchi tóco ndihi na cúu cuénta Ndióxi, tácu na nu mé á —nacachi Jesús xihin ná.

³⁹ Anda já nacachi java na jánaha ley Moisés cán já xihin á:

—Vaha va nacahan ndó, Maestro.

⁴⁰ Ta chí coo nasahan ndeé ga ini na ndaca tuhún chága na mé á.

Jánaha Jesús nuú ñayivi ña cúu Cristo ta ta cúu á Ndióxi

(Mt. 22:41-46; Mr. 12:35-37)

⁴¹ Anda já nacachi Jesús já xihin ñayivi ndúu cán:

—Ndávaha cáchi ñayivi ña vaxi Cristo chichi David. ⁴² Ta ndaa ini Salmos ña nacahyí David já nacachi da já:

Ndióxi queá nacachi já xihin xitoho i:

“Coo xoo cuáha i yóho,

⁴³ janda quiahva ná caja i ña ná cacomún cuénta sahá na co cuni yohó”, nacachi Ndióxi, já nacahyí David sanahá.

⁴⁴ Ndávaha cáchi na ña vaxi Cristo chichi David joo mé tiempo cán nacachi David ña cúu á xitoho da —nacachi Jesús.

Cáhan Jesús sahá cuachi na jánaha ley Moisés

(Mt. 23:1-36; Mr. 12:38-40; Lc. 11:37-54)

⁴⁵ Tóco ndihi ñayivi ndúu cán naxini joho na tá nacasahá Jesús cáchi a xihin na xica tuun xihin á já:

⁴⁶ —Cuénta coo ndó xihin na jánaha ley Moisés jáchi cátóo na cándixi na jahmá nani

caca nuu na. Ta cátóo na cahan toní ñúhú ndivaha ñayivi xihin ná tá xica nuu na nuú yahvi. Ta tá cuahan na veñuhu cátóo na cacoo na nu sácoo na ín chága saha. Ta tá cuahan na víco cátóo na coo vaha na. ⁴⁷ Ta cándaa na vehe najihí cuáan. Ta tá nandihí cáni ndivaha cája na xica tahvi na nu Ndióxi jáchi cuni na jájahvi na nuú ña núu cája na. Mé a ndaa ná cahan i xihin ndo ña na jánaha ley Moisés cacuu na na ndoho chága ini caja Ndióxi nu ndihí —nacachi Jesús.

21

Ña najoco in ña cuáan ndáhví

(Mr. 12:41-44)

¹ Ta ndaja coo ndacaan Jesús ini veñuhu cáhnu cán ta sándehe a ndá quiahva táan na cuicá jiuhún ini sató nu jóco ñayivi jiuhún nu Ndióxi. ² Ta jári naxini a naxinu coo in ña cuáan ndáhví ta nataán ña ivi jiuhún ña núu yahvi ini mé sató cán. ³ Anda já nacachi Jesús já xihin na xica tuun xihin á cán:

—Mé a ndaa ná cahan i xihin ndo ña cuaha chága jiuhún nasahan ña cuáan ndáhví yóho a juú ga tóco ndihi java ga na cán. ⁴ Jáchi tóco ndihi na java cán sáhan na ña yójo nu va na. Joo ña cuáan ndáhví yóho nasahan ña nu Ndióxi tóco ndihi ña cómi ña catacu ña —nacachi Jesús.

Cáxi tuhun Jesús ña vaxi quivi ndihi sahá veñuhu cáhnu ndacaan Jerusalén cán

(Mt. 24:1-2; Mr. 13:1-2)

⁵ Java ñayivi cán ndítuhún na sahá veñuhu cáhnu ñuu Jerusalén ndíta na. Ta ndítuhún na sahá yuu ndató ndivaha nacavaha veñuhu cán. Ta cahan na sahá ñaha najoco ñayivi nu Ndióxi ndaa cán. Anda já nacachi Jesús já xihin ná:

⁶ —Vaxi quivi ndihi saha tóco ndihi ña ndíta ndó sándehe ndo yóho. Ta ni janda in yuu a cándojo jatá inga yuu ña nditani cacuu tóco ndihi ña yóho —nacachi Jesús xihin ná.

Ña coo tá ná cayati quivi ndihi saha ñuyiví

(Mt. 24:3-28; Mr. 13:3-23)

⁷ Anda já ndaca tuhún na Jesús já nacachi na já xihin á:

—Maestro, ndá ama coo tóco ndihi ña yóho. Ta ndaja coo tá sa ñacayati mé quivi cán —ñacachi na xihin Jesús.

⁸ Anda já ñacachi Jesús já:

—Cuénta coo ndó ta a quiahva ndó ñamaní jándahvi ñayivi ndohó. Jáchi quixi cuahá ndivaha na cuénta mí i ta cahan na ña tuhún tá cachi na já xihin ndo: “Yehe cúu Cristo, da ñachindahá Ndióxi cacomí a cuénta sahá ñayivi.” Ta cachi na já: “Viti ñaxinu coo tiempo ndihi saha ñuyívi”, cachi na xihin ndo. Joo coto a cándusa ndó candico ndó jata ná cuhun ndo. ⁹ Tá ná cuni johó ndó ña cáni táhan ñayivi ñuyívi yóho, a cáyihví toho ndó. Jáchi ndusa já ndítahan coo. Joo cámaní yii va jáxinu coo quivi ndihi sahá ñuyívi —ñacachi Jesús xihin ná.

¹⁰ Anda já ñacahan chága Jesús xihin ná já ñacachi a já:

—Ñayivi ndúu in nación ndicujta na cani táhan na xihin na ndúu inga nación ta cani táhan na in ñuu xihin na inga ñuu. ¹¹ Ta quixi cuahá ña taan tá sa ñacayati quivi ndihi sahá ñuyívi. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yihví ndivaha na tá cuni na java ñaha xituhún ndivaha.

¹² Joo tá cámaní xinu coo quivi coo tóco ndihi ña yóho já ndicujta ñayivi caja xixi na xihin ndó, na cándusa yehe. Ta cañehe na ndohó cuhun ndó ini veñuhu na ta cán caja víi na saha ndo sahá ña cándeé ini ndó yehe. Ta taán na ndohó ini veca ta já cañehe na ndohó cuhun ndó cavií saha ndó nuú na cúu jutixia xihin nuú na cómi cuénta sahá ñayivi. Tóco ndihi ña yóho ndoho ndó sahá ña cándeé ini ndó yehe.

¹³ Ta xihin ña yóho cuu ñehe íni ndo cahan ndó sahá i nuú na cán. ¹⁴ Ta a ndícani ini ndó saha ndá tuhun cahan ndó saha mé ndó nuú na cán tá ná xinu ndó nu ná.

¹⁵ Jáchi mí i quiahva i tuhun nu ndo ta ndaja ndíchí i jini ndo já ná cuu nducú ñehe vaha ndó tuhun nuú na cán. Ta chí a cuú quee vaha yuhú na cán xihin ndo. ¹⁶ Joo cuahá ñayivi jicó tuhún na ndohó. Ta chí janda tátá ndo á ñani ndó á táhan ndó á na xini táhan xihin ndo, na cán cacuu na jicó tuhún ndohó cuahá tañu. Ta java táhan ndó, na

cándeé ini yehe quivi ndó caja na. ¹⁷ Ta ndijáa ñayivi ñuyívi candají na ndohó sahá ña cándeé ini ndó yehe. ¹⁸ Joo ni in ñaha a ndóho ndó anda ni in íj jini ndó a ndíhi saha. ¹⁹ Ta tá coo ñacuitá ndo xihin tóco ndihi ña núu caja na xihin ndo já xinu ndó canduu ndó indiví anda ama cáa quivi.

²⁰ Tá ná cuni ndó ña ñacava tiyivi soldado jata ñuu Jerusalén ndúu da, xini ñuhú candaa ini ndó ña sa ñaxinu quivi ndihi sahá ñuu cán. ²¹ Ña ndítahan caja ndó mé quivi cán quea cunu ndó cuhun ndó chí yucu tá ndúu ndó chí estado Judea. Ta ndá ndó, na ndúu ñuu Jerusalén xini ñuhú jándacoo ndó ñuu jan ta cunu ndó cuhun ndo. Ta ndá ndó, na ndúu yucu, a ndíco coo ga ndó ndihvi ndó ñuu Jerusalén yóho. ²² Jáchi mé quivi já cacuu a quivi ndoho ini ñayivi já ná xinu coo tóco ndihi nuú ña ñacachi tuhun Ndióxi coo sanahá ndivaha. ²³ Ndáhvi ñacuu najihí tá ñuhu jahyi na mé quivi já. Ta ndáhvi ñacuu na tá ñehe ndaa na na valí táhan ña chíchí yii. Jáchi ndoho ndivaha ini ñayivi ndúu ñuyívi mé quivi já sahá ña xójo ndivaha ini Ndióxi xihin na cán. ²⁴ Java ñayivi quivi na caja soldado ta java na cato ná já cañehe na na cuhun na ndijáa chí ñuu tóho canduu na jáchi ndihi sahá ñuu Jerusalén yóho. Ta já quixi na ñuu tóho ta casahá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

²⁵ Anda já cuni ndó ña náhnu ndivaha chí nuú candii xihin nuú yoo xihin nuú quimi viti. Ta ñayivi ñuyívi yóho yihví ndivaha na ta chí a cánda ini na ndia caja na jáchi quini ndivaha tacu nuú ndicojo tañuhú. ²⁶ Ta chí janda quivi tóo ñayivi xihin ña yihví na jáchi casahá ndicani ndivaha ini na saha tóco ndihi tondohó vaxi ñuyívi yóho. Jáchi janda mé candii xihin yoo xihin quimi ndiquiji nuu a. ²⁷ Anda já cuni ndó yehe, da ñachindahá Ndióxi nduu ñayivi, quixi i tañu vico xihin tóco ndihi ndeé cáhnu i ta chí ndiyihví ndaa mé nuú quixi i. ²⁸ Tá ná casahá yaha tóco ndihi ña cáchí i xihin ndo yóho, xini ñuhú ndindeé ini ndó ta ndiñehe ndó nuu ndó jáchi sa ñacayati quivi jácacu Ndióxi ndohó cuhun ndó coo ndó indiví —

naçachi Jesús xihin ná.

22

Sácú Jesús quiahva sahá titó ñuhú
(Mt. 24:32-35; Mr. 13:28-31)

²⁹ Anda já nasacu a in quiahva nu ná já naçachi a já:

—Xíní ñuhú candehé ndo ndá quiahva cája chúun in titó ñuhú, á ndá yito nacuu. ³⁰ Tá ná cuni ndó ña jandá johu cana núma do já cánda ini ndó ña nacayati tiempo javi. ³¹ Ta quiahva já tá ná cuni ndó ña sa cúu yáha tóco ndihi ña cáchi i xihin ndo yóho já cánda ini ndó ña sa nacayati quivi casahá Ndióxi cacomí a cuénta sahá ñayivi.

³² 'Mé a ndaa ná cahan i xihin ndo ña cuni ñayivi ndúu mé tiempo já yáha tóco ndihi ña naçachi i xihin ndo já quivi na. ³³ Mé a ndaa ña cúu indivi xihin ñundáhyi yóho ndihi sahá joo tuhun naçahan yehe xihin ndo a ndihi toho sahá jáchi coo tá coo tá ín naçachi i xihin ndó coo.

³⁴ 'Cuénta coo ndó. Xíní ñuhú candati tiahva ndó quivi quixi i ndiquehe e ndohó. A cáca nuu ndó yóho cáa ña caja ndó ña cuni yiquí cuñu ndó. A cóho ndó caca nuu ndó. Ta a ndihi nahá ini ndó ndicani ini ndó sahá ñaha ñuyivi yóho. ³⁵ Tá ná xinu quivi quixi i cacuu a tátuhun tá sácú jehé in dataa in trampa nuú in quiti sahá ña cuni da tiin da ri. Mé quiti cán coo xini rí ndáchí ín jehé trampa tiin nahá cán. Quiahva já coo xini ñayivi ndúu ñuyivi ndá quivi quixi tucu u ñuyivi yóho. ³⁶ Xíní ñuhú canduu tiahva ndó quivi quixi i. Ní tiempo xini ñuhú caça tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu coo vaha ndó indivi já ná cuu coo vii ndo nuú yehe, da nachindahá Ndióxi nduu ñayivi —naçachi Jesús jána nuú ñayivi cán.

³⁷ Nini quivi nasahin Jesús ini veñuhu cáhnu jána tuhun Ndióxi nuú na cán. Ta tá ñuu já sahan quiji a yucu yitó Olivo cán. ³⁸ Ndijáa ní quivi naha chá naxinu coo ñayivi veñuhu cáhnu cán jáchi cuni na cuni johu na ña jána Jesús nu ná.

Jándique táhan na tuhun na ña cahní na Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ta yati tandaa víco pascua tá xíxi ñayivi pan ña coo quée yusá naxiaa xihin. ² Já naçasahá na sacuaça nuú jutú xihín na jána ley Moisés ndúcú na ndaja caja na cahní na Jesús. A cuú caja na cahní tívi na ña jáchi yihví na canahá ñayivi xihin ná.

³ Joo ndaja coo tiñahá sacuaça nandeta nuu rí ínimá in táhan uxu ivi da xíca tuun xihín Jesús. Mé da cán naní da Judas ta Judas Iscariote cahan na xihín dá. ⁴ Ta nasahan Judas cahan da xihín na sacuaça nuú jutú ta xihín na sacuaça nuú policía ndáa veñuhu. Ta nandituhún da xihín ná ña cuu caja da jicó túhún da Jesús ta ndiquiahva nahá dá mé á nu ná. ⁵ Xihín ña yóho nacajii íni na cán ta nasahan na tuhun na nu Judas ña quiahva na jiuhún nu dá. ⁶ Ta naçandúsa Judas caja da ña chí naçasahá da ndúcú da ndaja caja da ndiquiahva da Jesús nuú na cán tá coo ñayivi ndúu xihín á.

Xíini Jesús víco pascua xihín na xíca tuun xihín á

(Mt. 26:17-29; Mr. 14:12-25; Jn. 13:21-30; 1 Co 11:23-26)

⁷ Natandaa mé víco tá xíxi na pan ña coo quée yusá naxiaa xihin. Mé víco yóho nasacaja na ña tá nu cuía ta sáhní na ndicachi válí jóco na nu Ndióxi. ⁸ Mé quivi já nasahnda Jesús chuun nu Pedro xihín nu Juan já naçachi a já xihín dá:

—Cuáhán ndó caja ndívi ndo ña cajíní víco pascua —naçachi a xihín dá.

⁹ Anda já naçachi da cán já xihín á:

—Yo vehe cuni ndó cuhun nde ná caja ndívi nde ña cuxú.

¹⁰ Anda já nanducú ñehe Jesús tuhun nu dá já naçachi a já:

—Tá ná quihvi ndó ñuu Jerusalén jan já cuni ndó in dataa ta ndójo da in yoo ticuif cuahan da. Candico ndó jata dá cuhun ndo janda quiahva cuni ndó ndá vehe quihvi da. ¹¹ Ta já cuhun ndó cahan ndó xihín mé da xihín ñaha vehe cán já cachi ndó já xihín dá: “Da jána ndehe cúu da cáchi

xuhun: Ndáchí íin nuú coo i cajíni i vicó pascua xihín na xíca tuun xihín i.” ¹² Anda já jánaha mé da cán in cuarto cahnú ña cánúu jini véhe piso ninu. Sa íin tiaha va ña. Cán caja ndívi ndó ña cajíni —nacachi Jesús.

¹³ Anda já naquee ndívi da cán cuahan da. Ta tá íin nacachi Jesús xihín dá coo quiahva já ndusa nasahin. Ta chí nacaja ndívi da tóco ndihi ña cajíni na vicó pascua.

¹⁴ Tá naxinu coo hora cajíni na já nasacoo Jesús xihín tóco ndihi na xíca tuun xihín á nu mesa. ¹⁵ Anda já nacachi Jesús já xihín ná:

—Sa xíca ndivaha ini i cajíni i vicó pascua yóho xihín ndó nani íin tóo i xihín ndo jáchi vaxi quivi quivi i. ¹⁶ Jáchi mé a ndaa ná cahan i xihín ndo janda ná xinu quivi cacomí Ndióxi cuénta sahá ñayivi anda jávi cajíni tucu u vicó pascua xihín ndo —nacachi Jesús xihín ná.

¹⁷ Anda já natiin a in vaso nu ñúhu tó uva ta nandiquiahva ndixahvi nu Ndióxi. Ta já nacachi a já xihín na xíca tuun xihín á:

—Coho ndó dó ñúhu ini vaso yóho ta cahnda java ndó dó nu táhan ndó. ¹⁸ Jáchi a ndíco coo ga i coho i tó uva janda quiahva ná xinu coo quivi cacomí Ndióxi cuénta sahá ñayivi —nacachi Jesús xihín ná.

¹⁹ Tá nandihini natiin a pan ta nandiquiahva ndixahvi nu Ndióxi sahá. Anda já nasahnda java ña já nasahan ña nuú na xíca tuun xihín á cán já nacachi a já xihín ná:

—Mé pan yóho cúu á tátuhun yiquí cuñu i jáchi ndiquiahva i mí i quivi i sahá ndihi ndó. Xíní ñúhú caja ndó ña yóho ña ná ndicuhun ini ndó ña naxihí i saha ndo —nacachi Jesús xihín ná.

²⁰ Tá sa nandihini naxijíni na ta já natiin a vaso nu ñúhu tó uva ta já nacachi a já:

—Dó ñúhu ini vaso yóho cúu dó tátuhun níi i jáchi cahní na yehe ta cuíta níi i saha ndihi ndó. Ta xihín ña yóho xinu coo nuú tuhun nasahan Ndióxi nuú ñayivi sanahá tá nacachi a jácau a ñayivi.

²¹ Cuni johó vaha ndó ná cahan i xihín ndo. Nu mesa yóho íin coo da jicó túhún yehe. ²² Jáchi janda sanahá nasacu ini Ndióxi ña ndítahan ndoho ini yehe, da

nachindahá mé á nduu ñayivi. Joo ndáhvi nacuu da jicó túhún yehe —nacachi Jesús.

²³ Xihín ña nacachi Jesús yóho nasahá na xíca tuun xihín á cán ndáca tuhún táhan na saha ndá da cúu da sácú ini cuhun jicó túhún ñahá.

Ndítuhún ihvi xihín táhan na xíca tuun xihín Jesús

²⁴ Tá nandihini já nasahá ndítuhún ihvi xihín táhan da xíca tuun xihín Jesús cán sahá ndá da cúu da íin chága saha. ²⁵ Sahá ña cán quéa nacachi Jesús já xihín ndihi da cán:

—Ndijáá ñuyívi sáhdá rey chuun nuú ñayivi tá quiahva cúni mé dá. Ta jári cúni da ña ná cachi ñayivi saha dá ña cúu dá da cája vaha. ²⁶ Joo coo nditahan coo ña cán tañu mé ndó. Ña ndítahan caja ndó quéa tá in ndó cúni ndó cacuu ndó da íin chága saha, xíní ñúhú jánuu ndáha ndó mé ndó tátuhun da loho chága nu ndihi ndó. Ta ndá da cúni cahnda chuun, xíní ñúhú cacuu da tátuhun in da cája ndívi nu mesa xitoho da. ²⁷ Mé ndó sa cánda vaha ini ndó ña íin chága sahá da íin coo nu mesa a juú ga da cája ndívi ñahá. Joo yehe najánuu ndáha i mí i ta nanduu u tátuhun in da cája ndívi nu ndo.

²⁸ Ndóhó cúu ndó na nasanduu tuun xihín i nu tóco ndihi ña ihvi naquixi nuú i. ²⁹ Sahá ña cán quéa tá quiahva nacaja tátá i ñamaní xihín i ña ná cacomí i cuénta sahá ñayivi quiahva já caja i ñamaní xihín ndó ³⁰ ña ná nditútú ndó canduu ndó xihín i tá ná cacomí i cuénta sahá ñayivi. Ta já ná cuu caja vii ndo sahá na naquixi ndihuxu ivi táhdá na naquixi chichi Israel —nacachi Jesús xihín ná.

Cáxi tuhun Jesús ña chijehé tuhun Pedro ña xíni da mé á

(Mt. 26:31-35; Mr. 14:27-31; Jn. 13:36-38)

³¹ Anda já nandicahan Jesús já nacachi a já xihín Pedro:

—Simón, cuni johó vahún. Jáchi naxica Satanás, mé tiñhá sacuaña ñamaní ña ná coto ndojó rí tóco ndihi ndó tá quiahva jáxixi na trigo. ³² Joo sa naxica tahví i nu Ndióxi saha yóhó, Simón já ná a jándacoun ña cándéé inún yehe. Ta tá sa nandíco coo

inún xihín ña cajún jan, ndítahan chindeún java ga na cändeé ini yehe já ná coo ndacú na íchi cuéntá mí i —nacachi Jesús xihín dá.

³³ Anda já nanducú ñehe Pedro tuhun nu Jesús já nacachi da já xihín á:

—Candehé ndo, xitoho i. Yehe sa ín tiahva i cuhun i vecaa xihín ndo. Ta janda ná cahní na yehe xihín ndo tá cúní na jáchi sa ín tiahva vī —nacachi da xihín Jesús.

³⁴ Já nacachi Jesús já xihín dá:

—Candehé Pedro ná cahan i ña ndaa xuhun. Mé quiví viti tá camañi cana chéle já uní tañu chijehé tuhún sahá i ta cahún ña co xini tohún yehe —nacachi Jesús xihín dá.

Cáxi tuhun Jesús ña sa cáyati hora ndoho ini a

³⁵ Tá nandihí já nandaca tuhún Jesús na xíca tuun xihín á cán já nacachi a já xihín ná:

—Jihna nachindahá i ndohó cuhun ndó cahan ndó tuhun Ndióxi ta nacachi i xihín ndo ña ná a cáñehe ndó yátí ni jiuhún ta ni inga ndusa a cáñehe ndó cuhun xihín ndo. Á nandimaní ñaha nu ndo tá nasahan ndo já —nacachi Jesús xihín ná.

Já nacachi na já:

—Ni in ñaha coó nandimaní nuú nde —nacachi na.

³⁶ Anda já nacachi tucu a já xihín ná:

—Joo viti coó ga ña cán coo. Viti cáchi i xihín ndo ña tá ín yátí nu ndo, xíní ñúhú cañehe ndó ña cuhun ndo. Cañehe ndó jiuhún ndo tá ná quee ndó cuhun ndo. Ta tá coó machiti nu ndó, xíní ñúhú jicó ndó jahmá ndeé ndo já cueen ndó machiti ña ná coo tiahva ndó. ³⁷ Jáchi sanahá nacahyi a nu libro yíi Ndióxi ta sahá yehe nacahan tá nacachi a já: “Nacachi ñayivi cúú dá taa quini sahá ña cán quea nachitáhan na da xihín ñayivi quini.” Tóco ndihí ña nacahyi nuú tuhun Ndióxi sahá yehe sanahá xíní ñúhú xinu coo a viti —nacachi Jesús.

³⁸ Anda já nacachi na xíca tuun xihín á cán já:

—Candehé ndo, xitoho nde. Yóho ñehe nde ivi machiti —nacachi na.

—Sa ín vaha —nacachi Jesús xihín ná.

Cuahan Jesús Getsemaní caca tahví a nu Ndióxi

(Mt. 26:36-46; Mr. 14:32-42)

³⁹ Tá nandihí já naquee Jesús cuahan yucu yito Olivo nu sá sahan tuun a caca tahví a nu Ndióxi. Ta já ndíco ndihí na xíca tuun xihín á cán jatá cuahan na. ⁴⁰ Ta tá sa naxinu coo na cán já nacachi a já xihín ná:

—Caca tahví ndó nu Ndióxi já ná a ndícava ndó nuú cuachi tá ná coto ndojó tiñahá ndohó —nacachi Jesús xihín ná.

⁴¹ Tá nandihí já natavá xóo Jesús mé á tañu na cán já nasahan tátuhun in quiahva nu xinu coo in yuu tá jání yó ña xihín ndáha yo. Quiahva já nacaxíca mé á tañu na cán já nacaxítí a xíca tahví a nu Ndióxi. ⁴² Já nacachi a já:

—Tátá Ndióxi, á cuu caja ndó ñamaní já ná a ndóho i ña ihvi ndivaha ña vaxi nuú i ndoho i. Joo ná coo tá ín cúní mé ndó ná a cóo toho ña cúní yehe —cáchi Jesús xíca tahví a.

⁴³ Anda já nacanáha in tátó Ndióxi indiví já naxinu a sahan tuhun ndeé ini Jesús.

⁴⁴ Ta nacasahá ndóho ndivaha ini Jesús jáchi nacacuéha ini a. Sahá ña cán quea nanducú ndeé chága ví a xíca tahví a nu Ndióxi. Ta chí ndícaa mé teen á nu ñúhu ta dó cán cúú dó tátuhun nīi cúyu nu ñúhu.

⁴⁵ Ta tá nandihí naxíca tahví a nu Ndióxi já nandaca ndichi a já naquee a cuahan nu ndúu na xíca tuun xihín á cán. Ta nanditahan mé á na ndúu na quíji na. A juú quiahva cándíi ini na sahá ña cán nanaa ini na naquiji na. ⁴⁶ Anda já nacachi a já xihín ná:

—Ndá cuéntá quea quíji ndo ndúu ndó. Cuahán ndacoo ndó ta caca tahví ndó nu Ndióxi já ná a ndícava ndó nuú cuachi tá ná coto ndojó tiñahá ndohó —nacachi Jesús xihín ná.

Tá natiin na Jesús

(Mt. 26:47-56; Mr. 14:43-50; Jn. 18:2-11)

⁴⁷ Janda cahan chá va Jesús xihín na xíca tuun xihín á cán cándichi a já naxinu cuahá ndivaha ñayivi nu ín a. Ta in táhan da uxu ivi xíca tuun xihín á, da naní Judas cán, da cán cúú da ndáca ñayivi vaxi da. Ta nacayati da tatí yúhu dá sajóho Jesús. ⁴⁸ Anda já nacachi Jesús já xihín dá:

—Judas, tatí yuhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúní

yehe, da nachindahá Ndióxi nduu ñayivi — ñacachi Jesús.

49 Tá naxini tóco ndihi na ndúu xihin Jesús cán ña cúu já ñacasáhá ndáca tuhún na mé á já ñacachi na já:

—Á cúni ndó, xitoho nde ña ná ndicuita nde xihin machiti cani táhan nde xihin ná —ñacachi na.

50 Joo in táhan da xíca tuun xihin Jesús cán najándicuehe da in da cúu mozo da sacuahá nuú jutú cán jáchi nachituhun dá johó xoo cuáha da. 51 Joo já ñacachi Jesús já xihin ná:

—Sa ín vaha. A cáni táhan ndó xihin ná —ñacachi Jesús.

Tá nandihí já ñacani ndaa ndáha mé á johó mozo cán já nandaja vaha mé á da. 52 Ta ñacasáhá cáhan Jesús xihin na sacuahá nuú jutú cán xihin na sacuahá nuú policía ndáá veñuhu xihin na sacuahá veñuhu cán, mé na ñacasaa tiin na Jesús já ñacachi a já xihin ná:

—Cája ndó xihin i tátuhun cája na xihin taa cuíhna jáchi ñaqueta ndó vaxi ndó tiin ndó yehe xihin machiti ta xihin yito. 53 Joo coo a ná caja toho ndó xihin i tá ñasahin i tañu ndó veñuhu cán. Joo núna nu ndó viti caja núu ndó jáchi ñasahan Ndióxi ñamaní ña ná tiin ndó yehe. Jáchi ñacuaá viti ta chindeé tiñáhá sacuahá ndohó caja ndó ña núu —ñacachi Jesús xihin na cán.

Tá nachijehé tuhun Pedro ña xini da Jesús (Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Anda já ñatiin na Jesús. Já ñéhe na a cuahan na vehe da cúu sacuahá nuú jutú cán. Ta xíca xíca ndíco Pedro jata ná cuahan da. 55 Ta tá naxinu coo ñayivi cán yuhú yéhe da cúu sacuahá nuú jutú cán já nandicahmi na ñúhu ñasacoo na xítúni na. Já naxinu coo ri Pedro ñasacoo da tañu na cán xítúni da. 56 Joo ndaja coo in ñañáha cája chúun vehe jutú sacuahá cán naxini ñá ín coo da xítúni da yávi núhu cán. Ta ñacasáhá sándehe ña nu dá já cáchi ñá já:

—Da xíca tuun xihin Jesús cúu ri da ín coo yóho va —ñacachi ñá cán.

57 Joo ñacasáhá Pedro chíjehé tuhun da já ñacachi da já:

—Candehé, ñañáha. Co xini toho i ndá da cúu da jan —ñacachi Pedro xihin ñá cán.

58 Chá va ta naxini inga dataa Pedro ta já ñacachi da já xihin dá:

—In táhan da xíca tuun xihin Jesús cáa cúu ri yóho va —ñacachi da cán xihin Pedro.

Anda já ñacachi Pedro já:

—Uhun. A juú toho táhan na cán cúu yehe —ñacachi da.

59 Ta tá sa ñayaha tátuhun in hora já ñacachi inga dataa já:

—Mé a ndaa da xíca tuun xihin Jesús cúu ri da yóho va jáchi cúu dá da estado Galilea.

60 Anda já ñacachi Pedro já xihin dá:

—Co xini toho i ndá saha cáhun — ñacachi Pedro.

Tá chí mé hora já nani cáhan Pedro xihin dataa cán já ñacana chéle. 61 Anda já nandicoto nihni Jesús nasandehé a nu Pedro. Tá nandicuhun ini Pedro saha tuhun ñacachi Jesús xihin dá tá cámani tiin na a tá ñacachi a já: “Mé quivi viti tá cámani cana chéle já uní tañu chíjehé tuhún saha i ta cáhun ña co xini tohún yehe”, ñacachi a xihin dá. 62 Anda já ñaqueta Pedro cuahan da já ñacasáhá sacú ndivaha da.

Tá sacú ndaa na Jesús

(Mt. 26:67-68; Mr. 14:65)

63 Ta java dataa, da ndúu ndáa Jesús cán ñacasáhá da sacú ndaa da ña. Ta ñacani ñahá da. 64 Nachicaji da nuu á ta ñacani da jahnda nuu á já ñacasáhá da ndáca tuhún da mé á já cáchi da já xihin á:

—Cachi yo já ñacani jahnda nuun — cáchi da xihin á.

65 Ta cuahá chága nuú ña núu cáhan na xihin á ña cánahá na xihin á.

Ndája ndíchi na Jesús

(Mt. 26:59-66; Mr. 14:55-64; Jn. 18:19-24)

66 Ta tá sa ñativi já ñataca na sacuahá nuú na Israel cán xihin na sacuahá nuú jutú cán xihin na jánaha ley Moisés cán viti. Já ñéhe na Jesús cuahan na cavii saha nuú na cán. Ta tá sa nanditútú ndihi na cán ndúu na já nandaca tuhún na Jesús já ñacachi na já xihin á:

67 —Caxi tuhun xihin nde á cúun Cristo, da nachindahá Ndióxi cacomí cuénta saha ñayivi —ñacachi na xihin á.

Anda já ñacachi Jesús já xihin ná:

—Tá ajan ná cachi i xihín ndo ta chí a cándúsa toho ndó yehe. ⁶⁸ Ta cája i cuéntá a cáhan ndó xihín i tá ná ndaça tuhún i ndohó. Ta cája i cuéntá ni a cándúsa ndó janí ndó yehe. ⁶⁹ Joo viti sa natandaa quivi cuhun yehe, da nachindahá Ndióxi nduu ñayivi ta coo i xoo cuáha Ndióxi indivi jáchi in ndée mé á caja tóco ndihi ñaha — nacachi Jesús xihín ná.

⁷⁰ Anda já nacasáhá tóco ndihi na cán ndáca tuhún na mé á já nacachi na já:

—Á jivi ndusa yóhó cúun in tuhún jiní já jahyi Ndióxi, dá já —nacachi na.

Anda já nacachi Jesús já xihín ná:

—Ajan. Jivi cúu u tá in cáchi ndó jan — nacachi Jesús.

⁷¹ Anda já nacasáhá tóco ndihi na cán cáhan na já nacachi na já:

—Co ndítahan ndinducú chága yó ñayivi cacuu testigo nuú ña cáhan da yóho jáchi sa xini johó í ña cáhan da ta chícáan da cuachi jata mé dá —nacachi na cán.

23

Tá nandiquahva na Jesús ndáha Pilato

(Mt. 27:1-2, 11-14; Mr. 15:1-5; Jn. 18:28-38)

¹ Anda já nandaca ndichi ndihi na cán já ñehe na Jesús nasahan na nu Pilato. ² Ta cán nacasáhá na chícáan na cuachi jata já nacachi na já sahá:

—Natiin nde da yóho jáchi xica nuu da jándivaa da ñayivi ñuu nde. Cáchi da ña co ndítahan toho nuú nde chahvi nde jjuhún cuéntá impuesto nuú da cómi cuéntá saha yó ñuu Roma. Ta cáchi da ña mé dá cúu dá Cristo, da chindahá Ndióxi cacomí cuéntá sahá ñayivi. Ta cáchi da cúu dá in rey — nacachi na cán xihín Pilato.

³ Anda já nandaca tuhún Pilato Jesús já nacachi da já xihín á:

—Á mé a ndaa cúun in rey, da cómi cuéntá sahá na Israel —nacachi da cán xihín Jesús.

Anda já nacachi Jesús já xihín dá:

—Ajan. Jivi cúu u tá quiahva cáchi ndó jan.

⁴ Anda já nandicahan Pilato xihín na sacuaña nuú jutú cán ta xihín ñayivi ndúu cán já nacachi da já:

—Co ndíñehe mí vi ndá cuachi quéa nacaja da yóho —nacachi Pilato.

⁵ Joo ñayivi cuaha cán nacasáhá cáyuhú cóhó chága na já cáchi na já:

—Mé da jan naxica nuu da jándivaa da tóco ndihi ñayivi estado Judea xihín ña jánaña da nu ná. Ta janda Galilea nacasáhá da jándivaa da ñayivi. Ta viti naxinu da ñuu nde cája da já —nacachi ñayivi cáyuhú na.

Tá ñehe na Jesús cuahan na nu Herodes

⁶ Tá naxini johó Pilato ña nacachi ñayivi cán já nandaca tuhún da na á cúu Jesús da estado Galilea. ⁷ Ta tá nacachi na ña ndusa cúu Jesús da estado Galilea já nachindahá Pilato Jesús ña ná cuhun a nuú Herodes, da cúu gobernador nuú ñayivi estado Galilea. Jáchi mé tañu já nasahin too da ñuu Jerusalén. ⁸ Tá naxini Herodes Jesús já nacajii iní da jáchi sa janda jihna cuni da Jesús cuni da. Jáchi cuahá tañu nandicani ñayivi nu dá sahá ña cája Jesús. Ta cuni da cuni da ña ná caja Jesús in ñaha xituhún. ⁹ Ta cuahá ndivaha ñaha nandaca tuhún Herodes cán Jesús joo coo nanducú ñehe a tuhun nu dá. ¹⁰ Ta tañu ñayivi cán ñúhu ri na sacuaña nuú jutú xihín na jánaña ley Moisés ta chí a juú quiahva nducú ndée na chícáan na cuachi jata Jesús. ¹¹ Anda já nacasáhá Herodes cája xixi da xihín Jesús ta quiahva já cája ri na cúu soldado da cán xihín á. Ta najácandixi na Jesús xihín jahmá lándá tátuhun jáhma sándixi in rey. Nacaja na já xihín á jáchi cuni na cuacu ndaa ñahá na. Tá nandihí já nachindahá tucu Herodes Jesús ña ná cuhun a nu Pilato. ¹² Ta chí mé quivi já nandique táhan máni Herodes xihín Pilato jáchi jihna co cuni táhan toho da, nduu.

Sácú ini na ndaja caja na cahní na Jesús

(Mt. 27:15-26; Mr. 15:6-15; Jn. 18:39-19:16)

¹³ Anda já najánditaca Pilato na cúu sacuaña nuú jutú cán xihín na jutixia xihín java ñayivi. ¹⁴ Já nacachi da já xihín ná:

—Mé ndó ñehe ndó da yóho nacasañ da nuú i. Ta cáchi ndó ña xica nuu da jándivaa da ñayivi. Joo sa naxini ndó ña nandaja ndíchí i da nu ndo. Ta ni in tuhún toho cuachi táhan ña cáhan ndó saha jan coo nanditahan i nu dá. ¹⁵ Ta ni Herodes coo

cuachi ná ndiñehe jata dá sahá ña cán queá nanducú ñehe da da nuú i. Cuni joh vaha ndó: Coó saha cúu á ña quivi da. ¹⁶ Ña caja i queá jándoho i ini da. Anda já janí vi da cuhun da —nacachi Pilato cán xihín ná.

¹⁷ Tañu víco pascua cán nasahin costume nū Pilato janí da in táhan da ñúhu vecaa ña ná candoo vaha da nuú ñayivi. ¹⁸ Sahá ña cán queá nacasahá cáyuhú tóco ndihi ñayivi nū dá já cáchí na já:

—Cahní ndó da jan ta janí ndó Barrabás nuú nde —cáchí na cáyuhú na.

¹⁹ Mé Barrabás yóho ndácaan da vecaa jáchi najátaca cuaha dá ñayivi ta nandicuita da xihín na sacuaaha ñuu Jerusalén cán ta cúu dá da sáhní ndii. Sahá ña cán queá ndácaan da vecaa. ²⁰ Joo cúni Pilato janí da Jesús sahá ña cán queá nacahan tucu da xihín ñayivi. ²¹ Joo ví ga ví nacasahá na cán cáyuhú cóho na nū dá já cáchí na já:

—Cata caa ndó da ndica crúxu. Cata caa ndó da.

²² Ta anda já nacahan tucu Pilato ña cúu uní xihín ná já nacachi da já:

—Coó toho ña núu nahá nacaja toho da yóho. A cúu cahnda i chuun ña ná cahní na da jáchi coó cuachi da. Ña caja i queá cahnda i chuun ña ná jándoho na ini da. Anda já janí vi da —nacachi Pilato.

²³ Joo ví ga ví ndúcú ndéé na cán cáyuhú na ña ná cata caa na Jesús ndica crúxu. Ta xihín ña ndúcú ndéé na cán cahan na ta ndúcú ndéé ri na sacuaaha nuú jutū cán cahan na. Sahá ña cán queá natahnu ini Pilato. ²⁴ Ta nacandúsa da caja da ña cúni na cán xihín Jesús. ²⁵ Ta najaní da Barrabás jáchi da cán nacahan mé ná saha ña ná janí dá. Ta mé Barrabás yóho nasandacaan da vecaa sahá ña najándivaa da ñayivi ta sahá ña nasahní da ndii. Anda já nandiquiahva da Jesús nū ná ña ná caja na tá cúni mé ná xihín á.

Tá nacata caa na Jesús ndica crúxu

(Mt. 27:32-44; Mr. 15:21-32; Jn. 19:17-27)

²⁶ Ta tá ñehe na Jesús cuahan na cata caa na a já naxini na in da naní Simón, da ñuu Cirene vaxi da ndihvi da ñuu Jerusalén. Ta já najácuhun ndáha ná da ña ná ndacojo da

crúxu nuú taca Jesús cán. Ta nandico da Jesús cuahan da.

²⁷ Ta a juú quiahva cuahá ñayivi ndíco jata cuahan na. Ta cuahá najihí sácu ndivaha na ta cáyuhú na cuahan na jata jáchi táhnda ini na sahá. ²⁸ Joo nandicoto nihni Jesús nū ná já nacachi a já xihín ná:

—Najihí, na ñuu Jerusalén, a cuácu toho ndó sahá yehe. Saha mé va ndó ta sahá jahyi ndó viti ndítahan cuacu ndó. ²⁹ Jáchi vaxi quivi já casahá ñayivi cachi na já: “Tahví nacuu najihí, na coó nacacu jahyi. Ta tahví nacuu na coó jahyí chíchí”, cachi na jáchi ndóho ndivaha ini na. ³⁰ Mé tiempo já casahá ñayivi cachi na já: “Vá ná cuyu yúcu jata yo já ná quivi”, cachi na. Ta cachi na xihín java yúcu: “Chijehé ndó ndehe”, já cachi na sahá ña ndóho ndivaha ini na. ³¹ Candehé ndo ndá quiahva jándoho na ini i ta cúu u tátuhun in yitó cuí, dó tácu. Ta cája xíxi na xihín i joo xíxi chága caja na xihín ndóhó jáchi cúu ndó tátuhun in yitó íchí —nacachi Jesús xihín na cán.

³² Ta tá ñehe na Jesús cuahan cata caa na a ndica crúxu já ñehe ri na ivi da cúu da quini cuahan na cata caa na da já ná quivi da xihín á. ³³ Ta tá naxinu coo na in nuú naní lásá yiquí jíní ndii cán nacata caa na a ndica crúxu. Ta nacata caa ri na ivi da quini cán va: in da xoo cuáha Jesús ta inga da xoo íti a. ³⁴ Ta tá cata caa na Jesús ndica crúxu já nacachi a já:

—Tátá Ndióxi caja cahnú ini ndó sahá ña cája ñayivi yóho xihín i. Jáchi coo xini na ndia cája na —nacachi Jesús.

Ta ndaja coo java soldado cán nacasahá da sájiquí da saha jáhma Jesús já queá ndá da ná quee vaha ndiquehe da jáhma á. ³⁵ Ta ñayivi ndúu cán sándehe na nū táca Jesús ndica crúxu nani na cúu jutixia nasacuita na ndúu na sácu ndaa ñahá cán já cáchí na já:

—Najácau da java ga ñayivi. Ta viti ná jácau da mé dá tá mé a ndaa cúu dá Cristo, da nacaxi Ndióxi cacomí cuénta sahá ñayivi —cáchí na sácu ndaa ñahá na.

³⁶ Ta jári java soldado sácu ndaa da Jesús ndúu da. Ta nacayati da cán nū Jesús já nachiñee da vino, dó iyá yúhu á ña ná coho a do. ³⁷ Ta já cáchí da já cáyuhú da nū á:

—Tá ta mé a ndaa cúun rey, da cómi cuénta sahá na Israel chindeé mún já ná a quívún —cáchi da.

³⁸ Ta nachindaa na in tabla ndica crúxu yati jini Jesús ta nu mé tabla cán nacañhi na: “Da yóho cúu rey nuú na Israel.” Ta mé ña yóho nacañhi na ña tuhun griego, ña cáhan na nación Grecia xihín tuhun latín, ña cáhan na ñuu Roma xihín tuhun hebrero, ña cáhan na Israel viti.

³⁹ Ta in táhan da quini tácaa ndica inga crúxu yati jin á cán nacasáhá da cáñhá da xihín á. Já cáchi da já:

—Tá mé a ndaa cúun Cristo, da nachindahá Ndióxi cacomí cuénta sahá ñayivi chindeé mún já ná a quívún. Ta chindeé ndeñe já ná a quíví nde —cáchi da.

⁴⁰ Joo inga táhan da quini tácaa inga xoo jin a cán nacasáhá da jáñani da da cáhan xihín Jesús cán já nacachi da já xihín dá:

—Á co yíhví tohún Ndióxi. Jáchi in cúu yo ndóho iní yóho ⁴¹ joo mé Jesús yóho coó toho cuachi nacaja da. Ta mé cuití ví ndítahan ndoho iní ña ná chahví sahá cuachi nacaja í —nacachi da cán jáñani da inga da tácaa cán.

⁴² Tá nandihí já nacachi da já xihín Jesús:

—Jesús, caja ndó ñamañi ndicuhun ini ndó sahá i tá ná casáhá ndó cacomí ndó cuénta sahá ñayivi —nacachi da xihín Jesús.

⁴³ Anda já nacachi Jesús já xihín dá:

—Mé a ndaa ná cáhan i xuhun ña mé quívi víti cuhún couñ xihín i indiví —nacachi a xihín dá.

Tá naxihí Jesús

(Mt. 27:45-56; Mr. 15:33-41; Jn. 19:28-30)

⁴⁴ Ta tátuhun caxivi já nacanaá ní cúu ñuyiví. Ta janda caa uní sahini já nacasáhá nandiyehé tucu. ⁴⁵ Nanaá nuú candii. Ta janda já nandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yíi ndivaha. ⁴⁶ Anda já nacayuhú cóhó Jesús já cáchi a já:

—Tátá Ndióxi, ndáha mé ndó jándacoo i inima i.

Ta tá nacachi a ña yóho já naxihí va.

⁴⁷ Ta ndaja coo da sáhdá chuun nuú soldado cuénta Roma cán tá naxini da tóco

ndihí ña nayaha yóho já nacasáhá cája cáhnu da Ndióxi já nacachi da já:

—Mé a ndaa táhyí coó toho cuachi da yóho —nacachi da.

⁴⁸ Ta tóco ndihí ñayivi nasanduu cán, na naxini nuú naxihí Jesús jandá johó cáni na yica ndicá na sahá ña táhnda ini na saha Jesús já cuanúhu va na. ⁴⁹ Joo tóco ndihí na xini táhan xihín Jesús nacandoo na ndíta xicá na sáñdehé na. Ta tañu na cán nasanduu ri najihí táhan na naquixi xihín á janda estado Galilea cán.

Tá nachicaañ na yiquí cuñu Jesús ini cáva
(Mt. 27:57-61; Mr. 15:42-47; Jn. 19:38-42)

⁵⁰ Ta ndaja coo nasahin in dataa naní José, da ñuu Arimatea ña ndacañ estado Judea cán. Ta cúu dá in taa vaha, da cája ña ndaa cuití va. Ta cúu da in táhan na cómi cuénta sahá na Israel. ⁵¹ Mé José yóho coó natahan ini da xihín ña nacaja java ga na cán jáchi ndátí da casa quívi cacomí Ndióxi cuénta sahá ñayivi. ⁵² Ta nasahan da cáhan ndahví da xihín Pilato ña ná ndiquiahva da yiquí cuñu Jesús nu dá. ⁵³ Ta chí nasahan Pilato ñamañi nu dá chí nasahan da najánuu da yiquí cuñu Jesús ndica crúxu cán. Já nachitíví ñahá da xihín jáhma vaha ta já nachicaañ ñahá da ini in yávi ndacañ ndica cáva. Ta ni in túhún toho ndii a ñaha chícañ na ini mé cáva cán. ⁵⁴ Mé quívi cán nasacuu a quívi cája ndíví ñayivi ñaha vehe na jáchi ja chá cacuu a quívi ndíquehe ndeé ná sahá ña cán quea ndíhi ini na jáxinu na chuun cája na.

⁵⁵ Ta najihí, na nasandico jata Jesús janda tá naquixi a chí estado Galilea cán nasahan na sáñdehé na ndica cáva nuú najáquea nuu na yiquí cuñu Jesús cán. ⁵⁶ Ta tá nasaa na vehe na já nacaja ndíví na perfume xihín java ga ñaha támi sahan ña ná jándicuchu na yiquí cuñu Jesús. Ta inga quívi itaañ nandiquehe ndeé ná tá quiahva nasahnda Ndióxi caja na janda sanahá.

24

Tá nanditacu tucu Jesús

(Mt. 28:1-10; Mr. 16:1-8; Jn. 20:1-10)

¹ Ta tá sa nayaha quívi ndíquehe ndeé ná ta naha chá quívi domingo já naquee

tucu najihí cán cuahan na nuú nachicaan na yiquí cuñu Jesús ini cáva cán. Já ñéhe na perfume, dó ñacaja tiahva na cán. Ta ndáca táhan java ga najihí xihín ná cuahan na. ² Ta tá ñaxinu coo na cán já ñaxini na ña coó ga yuu ndáji ndaa yuhú cáva nuú ñasandacaan yiquí cuñu Jesús. ³ Anda já ñaquihvi na ini cáva cán joo coó ga yiquí cuñu Jesús ñanditahan na. ⁴ Ta chí ñayihví na ta co xini na ndía caja na. Ta jonáa va ñaxini na ndíta ivi dataa yati jín ná. Ta a juú quiahva ndató yéhe jáhma ndíxi da cán. ⁵ Ta chí a juú quiahva yíhví najihí já ñacandayi na janda quiahva ñaxinu jini ná nu ñúhu. Anda já ñacachi dataa cán já xihín ná:

—Coo ndítahan toho ndinducú ndo in da tácu tañu nu sánduu ndii. ⁶ Coó toho Jesús ín yóho jáchi sa ñanditacu va. Xini ñúhu ndicuhun ini ndó ña ñacachi a xihín ndo tá ñasahin a estado Galilea. ⁷ Mé á cúu á da ñachindahá Ndióxi nduu ñayivi ta sa ñacachi a xihín ndo ña ndiquiahva na mé á ndahá ñayivi quini. Ta ñacachi a xihín ndó ña cata caa na a ndica crúxu ta tá ná xinu uní quivi já nditacu tucu a —ñacachi dataa cán.

⁸ Anda já ñandicuhun ini najihí cán ña ñacachi Jesús xihín ná. ⁹ Chí ñaquee na cuahan na já ñandicani ndihi na sahá ña yóho nuú na uxu in ñaxica tuun xihín Jesús xihín nuú java ga na ndúu cán viti. ¹⁰ Mé najihí cán, na ñasahan cáxi tuhun ña yóho nuú na apóstol cán ñasacuu María, ña ñuu Magdala xihín Juana xihín María, ña cúu náná Jacobo xihín java ga najihí. ¹¹ Joo na apóstol, na ñaxica tuun xihín Jesús cán ñacahán na ña cuénto uun va queá. Sahá ña cán queá coo ñaxeen na candúsa na ña ñacachi najihí cán xihín ná.

¹² Joo ndaja coo ñaqueta Pedro xínu da cuahan da sándehé da ini cáva nuú nachicaan na yiquí cuñu Jesús cán. ñaxini da jáhma vaha ña ñasativí a cán joo coó toho yiquí cuñu a. Ta chí ñacatónto da ñaquee da cuanúhu dá vehe da.

Cátahan Jesús cuahan xihín ivi na cuahan chí ñuu Emaús
(Mr. 16:12-13)

¹³ Ta mé quivi já ivi táhan na cúu cuéntá Jesús ñaquee na cuahan na in ñuu naní

Emaús. Mé ñuu cán ñéhe táhan tátuhun uxu in kilometro xihín ñuu Jerusalén. ¹⁴ Ta ndítuhún na cán cásahan na saha tóco ndihi ña ñacuu ñuu Jerusalén cán. ¹⁵ Ta nani ndítuhún na cásahan na já ñacayati Jesús nu ná já ñacasáhá xica mé á xihín ná cuahan na. ¹⁶ Ta vatí sándehé na cán nu Jesús joo coó ñacuu ndicuni na mé á. ¹⁷ Anda já ñandaca tuhún Jesús na cán já ñacachi a já:

—Ndía ndítuhún ndó cásahan ndo. Ta ndavaha cácuéha ini ndó cásahan ndo —ñacachi a xihín ná.

¹⁸ Já in táhan na cán, da naní Cleofas ñanducú ñéhe da tuhun nu á já ñacachi da já:

—Níi cúu va ñandicuita nuu tuhun sahá ña ñacuu ñuu Jerusalén tañu quivi yóho. In tuhún yóho tañu na ndúu cán cúu da co xini ña ñayaha —ñacachi da.

¹⁹ Anda já ñacachi Jesús já xihín ná:

—Ndía ñacuu, vaha.

Já ñacachi na cán já xihín á:

—Ñaquixi in da naní Jesús chí ñuu Nazaret ta ñasacuu da in profeta cáhnu ndivaha jáchi cuahá ndivaha ña náhnu ñacahan da. Ta cuahá ndivaha ña náhnu ñacaja da nu Ndióxi xihín nuú ñayivi. ²⁰ Joo na sacuaña nuú jutú xihín na jutixia ñuu nde ñatiin na mé Jesús ta já ñandiquiahva na da ña ná cahní na da ta já ñacata caa na da ndica crúxu. ²¹ Joo mé nde ñacahán nde ña mé Jesús cán cacuu da da ndáti nde chindeé da ndehe, na Israel yóho já ná a cája xixi ga na ñuu Roma xihín nde, ñacahán nde. Joo ñandihí va viti jáchi sa ñayaha uní quivi ñaxihí da cán. ²² Vatí ñaqueta java najihí tañu nde yóho najáyihví na ndehe jáchi naha chá ñasahan na nuú ñanduxu Jesús cán. ²³ Ta cáchi na ña coó ga yiquí cuñu Jesús ndácaan cán. Sahá ña cán queá ñaxinu na nuú ñasanduu nde ta ñandicani na nuú nde ña ñacanáha java táto Ndióxi nu ná ta ñacachi na ña tácu va Jesús. ²⁴ Ta java táhan da xica tuun xihín nde cán ñasahan da sándehé da ini cáva cán ta chí já ndusa cáa tá quiahva cáchi najihí. Ta co mé Jesús ñaxini na —ñacachi na cán xihín Jesús.

²⁵ Anda já ñacachi Jesús já xihín na cán:

—Ñayivi tónto ndivaha cúu ndó. Jáchi yáncá ndivaha já xínu ini ndó candúsa ndó

ña ndaa ña ñacahan na profeta sanahá. ²⁶ Á co cándaa ini ndó ña jihna ñúhú ñanditahan nuú da cúu Cristo ndoho ini da ta tá sa ñandihí já ndiñehe jíco Ndióxi da já ndacojo da chuun cacomí da cuéntá sahá ñayivi —ñacachi Jesús.

²⁷ Anda já ñacasáhá ndícani a nu ná ña ñacahyi nuú tuhun Ndióxi nu cáhan saha tóco ndihí ña ndítahan ndoho da cúu Cristo. Ñacasáhá ndícani a janda libro ñacahyi Moisés sanahá janda quiahva ñaxinu a nu tóco ndihí libro ña ñacahyi na profeta sanahá.

²⁸ Ta tá ñaxinu coo na ñuu nuú cuahan na cán já ñacaja Jesús tátuhun yáha saa cuahan. ²⁹ Joo mé na cán ñacaja ndúsa ná xihin á ña ná coo tóo a xihin ná. Já ñacachi na já xihin á:

—Yóho candoo ndó coo tóo ndó jáchi sa ñahini cuí va ta ja chá cuaá —ñacachi na xihin á.

Anda já ñaquihvi Jesús ini vehe ña candoo a xihin ná. ³⁰ Ta tá ñasacoo a nu mesa xihin ná já ñatiin a in pan já ñandiquiahva ndixahvi nu Ndióxi sahá. Ta ñasahnda java ña já ñasahan ña nu ná. ³¹ Ta chí ivi laá ñanuna xini túni ná ta já ñandicuni na mé á ña cúu á Jesús. Joo ivi laá ñajándiñúhú a mé á nu ná. ³² Anda já ñacachi xihin táhan na já:

—Íchi quéa cájii ndivaha ini tá ñandicani Jesús tuhun Ndióxi nu yo tá vaxí íchi xihin á —ñacachi xihin táhan na cán.

³³ Chí ivi laá ñaquehe tucu na íchi ña ndicó coo tucu na ñuu Jerusalén. Tá ñaxinu na cán ñandiñehe ná ña ndítutú ndíhuxu in táhan na ñaxica tuun xihin Jesús cán ndúu na xihin java ga na ndúu cán. ³⁴ Anda já ñacachi na cán xihin ndívi na yóho:

—Mé a ndaa táhyí ñanditacu tucu Jesús, xitoho í. Ta ñaxini Simón mé á —ñacachi na.

³⁵ Anda já ñacasáhá ndívi na cán ndícani na ña ñasandaca táhan na xihin Jesús ñasahan na. Ta ñandicani na ña ñandicuni na mé á nani ñasahnda java mé á pan ña cuxu na.

Náha Jesús mé á nuú na ñaxica tuun xihin á
(Mt. 28:16-20; Mr. 16:14-18; Jn. 20:19-23)

³⁶ Ta nani ndítuhún yii ná ndúu na já ñaxinu coo Jesús ñandaca ndichi a mahnú na cán já ñacahan Ndióxi á xihin ná já ñacachi a já:

—Ná caja Ndióxi ña ná coo vaha ini ndó.

³⁷ Joo ñayihví na cán ta ñacahan na ña cúu á in ínimá ndii va. ³⁸ Joo já ñacachi Jesús já:

—Ndá cuéntá quéa yíhví ndo. Ta ndá cuéntá quéa co cándúsa ndó ña cúu yehe Jesús. ³⁹ Candehé ndó ndahá i ta candehé ndó sahá i. Sa mé yehe cúu vi. Cani ndaa ndáha ndó yehe ta candehé vaha ndó yehe. Jáchi in ínimá ndii coo toho yiquí cuñu a tá quiahva sándehe ndó ña in yiquí cuñu yehe —ñacachi Jesús xihin ná.

⁴⁰ Ta nani cáhan Jesús xihin ná já ñacasáhá náha ndáha á xihin sahá nu ná. ⁴¹ Joo cámaní yíi candúsa na cán ña cúu mé á Jesús jáchi ñacatóntó na ta cájii ndivaha ini na ña cán quéa ñacachi tucu Jesús já xihin ná:

—Ndá ñaha in nu ndó ná cuxu u —ñacachi Jesús xihin ná.

⁴² Anda já ñasahan na in tuhun tijacá ñayata nu á xihin in ñimá ñuñu nu á. ⁴³ Já ñatiin a ña ndáha ná já ñaxixi a ña nani sándehe na a. ⁴⁴ Tá ñandihí já ñacachi a já xihin ná:

—Sa ñayaha tá in ñacachi i xihin ndó jihna. Sa ñaxinu coo tá in ñacahyi Moisés xihin na profeta sanahá sahá ña ndítahan ndoho i. Ta jári David tá ñacahyi da libro Salmos já ñacahan ri da cán va sahá ña ndoho i —ñacachi a xihin ná.

⁴⁵ Anda já ñacaja Jesús ña ná ndinuna xini túni ná já ná cándaa ini na ña cuni cachi tuhun Ndióxi cán. ⁴⁶ Ta ñacachi a já xihin ná:

—Janda sanahá ñacahyi ña ndítahan quivi yehe, da cúu Cristo, da ñachindahá Ndióxi cacomí cuéntá sahá ñayivi. Joo ñacahyi ri ña ndítahan nditacu tucu u quivi uni. ⁴⁷ Ña cán quéa ndítahan nuú ñayivi caca nuu na cahan na tuhun vaha sahá i níi cúu ñuyiví já ná ndicó coo ini ñayivi ta jándacoo na cuachi cája na. Anda já caja cáhnu ini Ndióxi sahá ndihí cuachi na. Ta janda ñuu Jerusalén xini ñúhú ñayivi casáhá na cahan na tuhun vaha sahá i ta já cuhun na janda ndijáá ñuyiví. ⁴⁸ Ta ndóho

cúu nā naxini ndaja cáa ña nandoho i ña cán quéa ndítahan nu ndó cūhun ndó caxi tūhun ndó tóco ndihi ña yóho nuú ñayivi. ⁴⁹ Cuni johu vaha ndó jáchi chindahá i ínimā yīi Ndióxi já ná cañuhu a ini in in ndó. Jáchi quiahva já nacachi Ndióxi, tátá i tá nasahan tūhun a nu ndo. Joo ndítahan canduu ndihi ndó ñuu Jerusalén yóho janda quiahva ná ndicutú ndaa ínimā ndo xihin ndé Ndióxi ña quixi indiví —nacachi Jesús xihin ná.

Tá nandaa Jesús cuahan indiví

(Mr. 16:19-20)

⁵⁰ Anda já ndáca Jesús nā cán nasahan nā xihin á yuhú ñuu Betania. Ta nandiñehe a ndáha á já nacaja yīi á na. ⁵¹ Ta tá cája yīi á na já natavá xóo a mé á já nandaa cuahan indiví. ⁵² Tá nandihí nacaja cáhnu nā cán Jesús já cávatá ndivaha na nandicó coo na ñuu Jerusalén. ⁵³ Ta níi tiempo nasanduu tuun na veñuhu cáhnu cája cáhnu na Ndióxi. Já ná coo.

Tuhun vaha nacahyí Juan sahá ña nacaja Jesucristo

Jesucristo cúú á tuhun Ndióxi ta nanduu a ñayivi

¹ Tá nacava sáhá saha ñuyiví sa íin va mé á naní tuhun Ndióxi. Nasahiin mé á xihin Ndióxi ta in cúú mé á xihin Ndióxi. ² Ta janda mé saha sa íin va xihin Ndióxi. ³ Ta mé a cán cúú á Jesucristo ta nacaja Ndióxi ña nacava mé á tóco ndihi ñaha. Ta ni in túhún toho ñaha íin, a cóo tá ná a cava mé á ña, nduu. ⁴ Ta mé á quéa cája ña ná catacu tóco ndihi ñaha ta mé á jándiyéhe a ínima ñayivi já ná ndicuni na yo cúú mé á. ⁵ Mé Jesucristo cúú á tátuhun in ñuhu cáyi ña jándiyéhe a xoo naá ta a cuú ndahva ña.

⁶ Ta ndaja coo nachindahá Ndióxi in dataa naní Juan. ⁷ Naquixi da caxi tuhun da xihín ñayivi ña cúú Jesucristo ña jándiyéhe ínima ñayivi, na ndúu nuú naá já ná cuu candusa na mé á sahá ña nacahan da. ⁸ Mé Juan yóho coo cúú dá mé á jándiyéhe ínima ñayivi. Naquixi cuití da caxi tuhun da xihín ñayivi ña mé Jesucristo quéa jándiyéhe ínima ñayivi. ⁹ Mé Jesucristo naxinu a ñuyiví yóho ta cúú ndusa mé a ña jándiyéhe ínima tóco ndihi ñayivi.

¹⁰ Naquixi mé a naní tuhun Ndióxi ta nasahiin a ñuyiví yóho. Ta xihín ña nacaja Jesucristo nacava Ndióxi ñuyiví. Joo ñayivi ndúu ñuyiví yóho coo naxeen na candaa ini na yo cúú mé á. ¹¹ Naquixi Jesucristo ñuyiví ña nacava mé á joo na ñuu mé á coo naxeen toho na ndiquehe vaha na mé á. ¹² Joo ndá na ná ndiquehe vaha mé á ta candeé ini na mé á já quéa sahan mé á ñamaní nu ná ña ná nduu na na cúú cuéntá Ndióxi. ¹³ Ta na cán cúú na nanduu jahyi mé á. Ta coo cúú á sahá ña nacacu na ñuyiví yóho ta ni coo cúú á sahá ña cúní in ta cacu in jahyi da. Nanduu na jahyi mé á jáchi já nasacu ini mé á coo.

¹⁴ Mé Jesucristo, mé a naní tuhun Ndióxi cán nanduu a in ta ta naquixi a nasahiin a tañu nde. Ta tóco ndihi ña nasacaja mé á nasacuu a ña ndaa. Ta a juú quiahva quíhvi ini a ñayivi. Ta naxini nde ndá quiahva

cáhu cúú mé á jáchi sahá ña cúú mé á in túhún jini já jahyi Ndióxi sahá ña cán quéa nacaja Ndióxi ña ná ndicáhu ndivaha mé á. ¹⁵ Tá nandicani mé Juan sahá Jesús nuú ñayivi já nacachi da já saha mé á:

—Mé a yóho cúú á ña nacahan i sahá nu ndo tá nacachi i xihin ndo ña vaxi inga a jatá yehe. Ta nacachi i xihin ndo ña íin chága saha mé a cán a juú ga yehe jáchi janda tá cámaní yí cacu u sa íin va mé á — nacachi Juan.

¹⁶ Ta sahá ña íin ndivaha ñamaní nu mé á sahá ña cán quéa a juú quiahva ñehe táhvi tóco ndihí nu mé á. ¹⁷ Nacahyí Moisés ley Ndióxi sanahá. Joo Jesucristo, mé á cúú á ña ndaa naquixi a ñuyiví yóho sahá ña quíhvi ndivaha ini a mí. ¹⁸ Ta ni in túhún toho ñayivi coo naxini na Ndióxi. In túhún Jesucristo, mé á cúú in túhún jini já jahyi Ndióxi, mé a cán quéa xini ndá quiahva íin Ndióxi jáchi in cúú á xihín á ta mé a quéa nanaha ña yóho nu yo.

Ndicani Juan nuú ñayivi yo cúú Jesús (Mt. 3:11-12; Mr. 1:7-8; Lc. 3:15-17)

¹⁹ Ta ndaja coo java na sacaha nuú na Israel, na ndúu ñuu Jerusalén cán nachindahá na java jutú xihín java na naquixi chichi Leví nu íin Juan ña ná ndaca tuhún na da á cúú dá da nasahan Ndióxi tuhún a chindahá a ñuyiví. ²⁰ Ta cáxi táhyí nacahan Juan xihín ná ña coo cúú dá da cán ta já nacachi da já:

—A juú toho yehe cúú da nacachi Ndióxi chindahá a cacomí cuéntá sahá ñayivi — nacachi Juan.

²¹ Anda já nandaca tuhún tucu na da já nacachi na já xihín dá:

—Yo já cúú yóhó, dá já. Á a juú yóhó cúú profeta Elías — nacachi na.

—A juú toho yehe cúú profeta Elías — nacachi Juan.

Anda já nacachi tucu na já xihín dá:

—Á a juú toho yóhó cúú profeta da nacachi Ndióxi chindahá a, dá já — nacachi na.

Joo nanducú ñehe Juan tuhún nu ná já nacachi da já xihín ná:

—Ni in túhún toho da cáhí ndó jan coo cúú yehe.

²² Anda já nacachi tucu na já xihín dá:

—Ndítahan ndicani lohún nuú nde yo cúu yóhó. Jáchi java na nachindahá na ndehe ña ná quixi nde ndaca tuhún nde yóhó. Ta tá co cúnun caxi tuhún xihín nde yo cúu yóhó, ndá cuhun nde quehe nde tuhun nducú ñehe nde nuú na nachindahá ndehe cán —nacachi na.

²³ Anda já nacachi Juan já xihín ná:

—Yehe cúu da xica nuu tañu yucú íchi ta cáyuhú cóhó i já cáchi i já xihín ñayivi: “Cuná ndó in íchi ndacú nu mé á ña ná ndihvi a ínimá ndo” —nacachi Juan xihín ná tá quiahva nacahyí profeta Isaías sanahá.

²⁴ Ta na nandaca tuhún Juan cán nasahan na jáchi já natahnda chuun nacaja na fariseo, mé na sáhdá chuun ñuu Jerusalén cán. ²⁵ Já nacachi tucu na já xihín Juan:

—Ndá cuéntá queá cája ndúta yóhó ñayivi tá ta co cúun Cristo, da nachindahá Ndióxi cacomí cuéntá sahá ñayivi. Ta ndá cuéntá queá jácandutun ñayivi tá ta ni co cúun Elías ta ni co cúun mé profeta, da nacachi Ndióxi chindahá a —nacachi na cán.

²⁶ Anda já nacachi Juan já xihín ná:

—Yehe cája ndutá i ñayivi xihín ticuú joo tañu mé ndó íin in da co xini ndo. ²⁷ Ta vaxi in da jatá yehe ta íin cuaha chága saha dá a juú ga yehe. Ta chí ni coó sahá i ndaxí i correa ndusa dá —nacachi Juan xihín na nasahan ndáca tuhún ñahá cán.

²⁸ Tóco ndihi ña yóho nayaha chí ñuu Betábara ña ndacaan inga xoo yuta Jordán nuú nacaja ndúta Juan ñayivi.

Jesús cúu á tátuhun in ndicachi rí jóco na nu Ndióxi

²⁹ Ta inga quiví itaan já naxini Juan cáyati Jesús vaxi a nu íin da. Já nacachi Juan já xihín ñayivi ndúu cán:

—Candehé ndo. Da vaxi jan cúu dá tátuhun ndicachi jóco na nu Ndióxi. Ta da jan cúu da jándoo cuachi ñayivi ndúu ñuyiví. ³⁰ Da jan cúu da cáchi i saha ña vaxi in da jatá yehe ta íin cuaha chága saha dá a juú ga yehe. Jáchi janda tá camaní cacu yehe sa íin va mé da jan. ³¹ Ta ni mí i coó naxini i ndá quiahva cáa da joo nacasáhá i jácandutá i ñayivi xihín ticuú já ná candaa ini na Israel yo cúu mé dá —nacachi Juan.

³² Ta nandicani da ña naxini da já nacachi da já:

—Sa xini xihín nuu mí i ndá quiahva nanuu ínimá yii Ndióxi jatá Jesús. Mé ínimá yii Ndióxi cán nanuu a indiví ta cáa tá quiahva cáa in ndijata. ³³ Mé a ndaa coó naxini toho yehe yo cúu mé da yóho, nduu. Joo Ndióxi, mé a nachindahá yehe jácandutá i ñayivi xihín ticuú, mé a cán queá nacachi já xihín i: “Ndá da ná cunún ná nuu ínimá yii mí i ta sacoo a jata dá, da cán cúu da jándicutú ini ñayivi xihín ínimá yii mí i”, nacachi Ndióxi xihín i. ³⁴ Ta viti mé a ndaa sa xini vi yo cúu mé á ta cáxi tuhun i xihín ndo ña mé á cúu á in tuhún jiní já jahyi Ndióxi —nacachi Juan.

Tá nacasáhá java ñayivi ndíco na Jesús xica na xihín á

³⁵ Ta inga quiví itaan nasahin tucu Juan cán xihín ivi na xica xihín dá. ³⁶ Já naxini da ña yáha Jesús cuahan já nacachi Juan já xihín na xica xihín dá cán:

—Candehé ndo. Da jan cúu tátuhun ndicachi, rí jóco na nu Ndióxi —nacachi Juan.

³⁷ Tá naxini johó da ndíta xihín da cán ña yóho já ndíco da jatá Jesús cuahan da. ³⁸ Tá naxini Jesús ña ndíco da cán jatá já nandicoto nihni a nu dá já nacachi a xihín ndíví da cán já:

—Ndía cuni ndo —nacachi a.

Já nacachi da cán já xihín á:

—Maestro, ndájá íin vehe ndó já —nacachi da.

³⁹ Anda já nducú ñehe Jesús tuhun nu dá já nacachi a já:

—Cóho ná cuni ndó, dá já —nacachi a.

Já ndáca táhan da nasahan da xihín á sádehé da nu íin a. Ta nasacuu a tátuhun caa comi sahini já nasanduu da xihín á.

⁴⁰ In táhan da naxini johó ña nacachi Juan ta ndíco da jatá Jesús cán naní da Andrés, da cúu ñani Simón, da cáhan na Pedro xihín cán. ⁴¹ Mé Andrés yóho ndáva da nasahan da ndínducú da ñani da, da naní Simón cán. Tá tá nandiñehe ñahá da já nacachi da já xihín dá:

—Nanditahan nde da nachindahá Ndióxi cacomí cuéntá sahá ñayivi, mé a cúu Cristo —nacachi da.

⁴² Tá nandihí já ndáca Andrés cán ñani da ñasahan da nu Jesús. Ta tá ñaxini Jesús da já ñacachi a já xihín dá:

—Yóhó cúún Simón, jahyi Jonás. Joo yehe chinúu i quivun cananún Cefas viti — ñacachi Jesús.

Quivi Cefas yóho in cúu va xihín Pedro ta cúni cachi a in tóto.

Cána Jesús Felipe xihín Natanael ña ná caca tuun da xihín á

⁴³ Ta inga quivi itaan já ñaquee Jesús cuahan chí estado Galilea. Ta cán ñanditahan mé á da naní Felipe já ñacachi a já xihín dá:

—Naha quí caca tuún xihín i — ñacachi a xihín dá.

⁴⁴ Mé Felipe yóho cúu dá da ñuu Betsaida ta mé ñuu cán cúu ri ñuu Andrés xihín Pedro. ⁴⁵ Ta ndaja coo Felipe yóho ndáva da ñasahan da ñandinducú da Natanael ta tá ñandínehe ñahá da já ñacachi da já xihín dá:

—Ñanditahan nde da ñacahyí Moisés saha nu ley sanahá. Ta jári ña profeta ñacahyí ri na saha dá. Ta mé dá cúu Jesús, jahyi José, da ñuu Nazaret — ñacachi Felipe xihín Natanael cán.

⁴⁶ Anda já ñacachi Natanael já:

—Ndá quehe ri ñaha vaha quixi chí ñuu Nazaret ñan — ñacachi da.

Anda já ñacachi Felipe já xihín dá:

—Cóho candehún — ñacachi da.

Anda já ñaquee da cuahan da nu in Jesús.

⁴⁷ Ta tá ñaxini Jesús ñacayati Natanael nu á já ñacachi a já:

—Da yóho cúu ndusa in da ñaquixi chichi Israel ta cúu dá ña cája ña ndaa cuití va — ñacachi Jesús.

⁴⁸ Tá ñaxini joho Natanael ña yóho já ñandaca tuhún da Jesús já ñacachi da já xihín á:

—Á xini ndó yehe, vaha.

Anda já ñacachi Jesús já xihín dá:

—Janda tá cámaní quee Felipe cuhun da cana da yóhó já ñaxini i in coún saha titó ñuhú — ñacachi Jesús xihín Natanael.

⁴⁹ Anda já ñacasahá cáchí da já xihín Jesús:

—Maestro, jivi ndusa cúu ndó in tuhún jini já jahyi Ndióxi ta cúu ndó ña cómi cuénta sahá ñayivi Israel — ñacachi da xihín Jesús.

⁵⁰ Anda já ñanducú ñehe Jesús tuhun nu dá já ñacachi a já:

—Ñacandúsún yehe sahá ña ñacachi i xuhun ña ñaxini i in coún saha titó ñuhú. Joo náhnu chága ñaha cunún xihín nduchú núún caja i — ñacachi Jesús xihín dá.

⁵¹ Anda já ñacachi tucu Jesús já:

—Mé a ndaa ná cahan i xihín ndo ña cuni ndó xihín nuu ndó ña nuná indiví. Ta cuni ndó táto Ndióxi ndaa na ta nuu na xinu na nu in yehe, da ñachindahá Ndióxi nduu ñayivi — ñacachi Jesús.

2

Tá ñasahan Jesús in vicó tándaha

¹ Tá ñayaha uní quivi já ñasahin in vicó tándaha ñuu Caná ña ndacaan estado Galilea cán. Ta ñasahan María, náná Jesús mé víco cán. ² Ta jári ñacana na Jesús xihín na xica tuun xihín á ta chí ñasahan ndihi na mé víco cán. ³ Joo ndaja coo nani cúu víco cán ñandihí va vino xíhi na. Ta tá ñaxini náná Jesús ña yóho já ñacachi ñá já xihín Jesús:

—Sa ñandihí va vino xíhi na — ñacachi ñá xihín á.

⁴ Já ñacachi Jesús já xihín ñá:

—Co xini ñuhú toho cahan ndó já xihín i jáchi cámaní yí va ndindaa hora caja i ñaha xituhún — ñacachi Jesús xihín ña.

⁵ Tá ñandihí já ñacachi náná Jesús já xihín na jácaca vino cán:

—Ndá ñaha ná cahnda Jesús nu ndó caja ndó, caja ndó ña — ñacachi ñá xihín ná.

⁶ Ta mé vehe nu cúu víco cán ñasahin in iñu yoo náhnu ña ñacavaha na xihín yuu. Mé yoo cán ñasacuu a nu táan na Israel cán ticuí, dó ndája vií na mé ná tá quiahva sáhdá ley nu ná caja na. Ta tátuhun comi jícó á in ciento litro ticuí quéta ini in in yoo náhnu cán. ⁷ Tá ñandihí já ñacachi Jesús já xihín na jácaca vino cán:

—Jácutú ndihí ndó yoo náhnu ñan xihín ticuí.

Ta chí najácutú jini ndaa na yoo náhnu cán xihín ticuí. ⁸ Tá ñandihí já ñacachi tucu Jesús já xihín ná:

—Ta viti tavá loho ndó do ta quiahva ndó do ná coto ndojó da cómi chuun saha víco yóho —nacachi Jesús.

Já ñéhe na do nasahan na nuú da cómi chuun saha víco cán. ⁹ Joo sa nacaja Jesús ña ná nduu ticuúí cán vino. Ta naxito ndojó da do joo co xini da ndájá naquixi dó. In túhún na xini cúu na naxini ña nandaja Jesús cán ticuúí ña ná nduu dó vino. Tá naxito ndojó mé da cómi chuun yóho do ja nacatontó da ta nacana da mé da tándaha cán. ¹⁰ Já nacachi da ja xihin dá:

—Ndijáá ñayivi tá cája na in víco ja sahan na vino vaha nu cuítí nuú na táhan cán. Ta tá sa naxihi cuahá na ja sahan na dó núu cán. Joo yóho nasacu vahún vino vaha ta ja viti sahún do nuú na táca víco —nacachi da.

¹¹ Ña xituhún yóho nacaja Jesús ñuu Caná cuéntá estado Galilea nasacuu a ña xituhún nu cuítí nacaja Jesús ja ná cuni ñayivi ndá quiahva cáhnu cúu mé á. Ta xihin ña yóho nacandeeé ini na xica tuun xihin a cán mé á.

¹² Tá sa nayaha ña yóho ja naquee a cuahan xihin na xica tuun xihin á chí ñuu Capernaum. Ta ndáca táhan náná a xihin ñani a ndíco na cuahan na xihin á. Ta nasanduu na ñuu Capernaum cán chá quivi cuítí va.

Tává Jesús na ndúu jícó veñuhu cáhnu ñuu Jerusalén

(Mt. 21:12-13; Mr. 11:15-18; Lc. 19:45-46)

¹³ Tá nacayati quivi caja na Israel víco pascua ja naquee Jesús nasahan chí ñuu Jerusalén. ¹⁴ Ta tá naxinu coo a veñuhu cáhnu ndácaan Jerusalén cán ja naxini a ña jandá johó ndúu na jícó. Java na jícó tindiqui xihin ndicachi xihin ndijata viti ta java na ndúu coo ndíjama jiuhún. ¹⁵ Ta chí natiin Jesús yóho ta nacavaha in churrú xihin á ja nacasáhá táxi ndihi a na ndúu jícó cán. Ta janda tindiqui xihin ndicachi jana ná natavá a ri quee rí cuhun ri. Ta ja naxinu coo a nu ndúu na ndíjama jiuhún cán ja naxicó ñéhe a mesa na ja nacuyu ndihi jiuhún na nu ñúhu. ¹⁶ Ta nasahnda a chuun nuú na jícó ndijata cán ja nacachi a ja:

—Tavá ndihi ndó ña jícó ndó jan. A cája ndó xihin vehe tátá i ña cúu á nu cáyahvi ñaha —nacachi Jesús xihin ná.

¹⁷ Tá nandihí ja nandicuhun ini na xica tuun xihin Jesús cán ña cáhí tuhun Ndióxi. Já cáhí a ja: “A juú quiahva xójo ini i sahá ña co cája cáhnu ñayivi vehe Ndióxi”, cáhí tuhun Ndióxi.

¹⁸ Tá naxini na Israel cán ña nacaja Jesús ña yóho ja nandaca tuhún na mé á ja nacachi na ja xihin á:

—Xini ñúhu cajún in ñaha xituhún ja ná cuni nde ña mé a ndaa ín sahún tasún na ndúu jícó veñuhu yóho —nacachi na xihin Jesús.

¹⁹ Anda ja nanducú ñéhe Jesús tuhun nu ná ja nacachi a ja xihin ná:

—Tá ná janditaní ndó veñuhu yóho ta tixi uní quivi ja jácandichi tucu u ña —nacachi Jesús xihin ná.

²⁰ Anda ja nacachi na Israel cán ja xihin á:

—Co cándúsa nde ña cáhún jáchi nacaja chúun na ivi jico inu cuia ja naxinu veñuhu jan. Ta yóho cáhún ña tixi uní víxí quivi jácandichi tucún ña, vaha —nacachi na cán xihin Jesús.

²¹ Joo co cáhan toho Jesús sahá veñuhu cáhnu cán jáchi cáhan mé á saha yiquí cuñu a. ²² Ña cán quea tá naxihi Jesús ta nanditacu tucu a tixi uní quivi ja nandicuhun ini na xica tuun xihin á cán sahá tuhun nacahan mé á nuú na Israel yóho. Ta chí nacandúsa na tuhun Ndióxi ta nacandúsa na tóco ndihi ña nacahan Jesús xihin ná.

Sa xini va Jesús ínimá ñayivi

²³ Cuahá ñayivi ñuu Jerusalén cán nacandúsa na Jesús nani nasahin a víco pascua cán sahá ña náhnu xihin ña xituhún nacaja nu ná. ²⁴ Vatí nacachi na cándúsa na mé á joo coo nacandúsa toho Jesús na jáchi xini vaha mé á ndá ínimá ñéhe in in na cán. ²⁵ Ta co xini ñúhu toho a ña caxi tuhun na xihin á ndá quiahva ín in in ñayivi jáchi sa xini ndihi va mé á ínimá ná.

3

Ndituhún Nicodemo xihin Jesús

1 Nasahiin in da xíca cuéntá na fariseo naní Nicodemo ta cúú dá da sacuahá nuú na Israel cán. 2 Ta ñuú naqueta da cuahan da coto nihni da Jesús. Ta tá naxinu coo da nu á já nacachi da já xihín á:

—Maestro, cándaá cáxí ini nde ña nachindahá Ndióxi ndohó vaxi ndó nuú nde ña ná jánaha ndó nuú nde. Jáchí ni in túhún toho ñayivi a cuú caja ña náhnu cája mé ndó tá ta co ín Ndióxi xihín ná —nacachi da xihín Jesús.

3 Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihín ndo ña ni in túhún ñayivi a cuú cacomí Ndióxi cuéntá saha tá ná a ndicó coo tucu na cacu tucu na —nacachi a.

4 Anda já nandaca tuhún Nicodemo Jesús já nacachi da:

—Ndá quiahva cuu cacu tucu na tá sa nacayatá na. Ama ná ndihvi tucu na tixi náná na já cacu tucu na —nacachi Nicodemo xihín Jesús.

5 Anda já nacachi tucu Jesús já xihín dá:

—Cáhan i ña ndaa xihín ndo. Tá nacanduta ñayivi xihín ticuú ta tá nandicutú ndaa ínima ná xihín ínima yii Ndióxi já cúú á tátuhun cacu tucu na ta anda já cuu cacomí Ndióxi cuéntá saha ná.

6 Jáchí ñuyiví yóho cacu jahyi ñayivi ta sa já ñayivi cúú va na. Joo na jándicutú Ndióxi xihín ínima yii mé á, na cán cúú jahyi mé á.

7 Ta co ndítahan catóntó ndó tá cáxí i xihín ndó ña ndítahan cacu tucu ndihi ñayivi já ná cacomí Ndióxi cuéntá saha ná. 8 Jáchí cúú á tátuhun tá xícó tachí ndá xoo cúni mé á. Vatí xíní johó í xícó tachí joo co xíní yo ndá xoo quíxi a ta co xíní yo ndá xoo cuahan. Quiahva já ín ínima yii Ndióxi jáchí vatí co xíní ñayivi mé á joo xíní na ndá quiahva cája mé á tá ñúhu a ini na —nacachi Jesús xihín Nicodemo.

9 Tá nandihí já nacachi Nicodemo já xihín Jesús:

—Coo cándaá toho ini i ña cáxí ndo xihín i —nacachi da.

10 Anda já nacachi Jesús já xihín dá:

—Cúú ndó da jánaha nuú ñayivi Israel ta ndítahan candaa ini ndó ña yóho, nduu jáchí cúú ndó maestro cáhnu nu ná. 11 Mé a ndaa ná cahan i xihín ndo. Cáhan nde sahá ña

cándaá ini nde ta sahá ña naxini nde xihín nuú nde joo ndóhó co cándusa ndó ña cahan nde xihín ndo. 12 Cáhan i sahá ñaha ñuyiví yóho xihín ndo ta co cándusa ndó ña. Ndaja ga ví caja ndó tá ná cahan i sahá ñaha ín indiví.

13 'Ni in túhún toho ñayivi a ñaha ndaa cuhun chí indiví. In túhún da ndaa indiví cúú da nanuu, da naquixi ñuyiví yóho. Ta da cán cúú yehe, da nachindahá Ndióxi nduu ñayivi. 14 Sanahá ndivaha nacata caa Moisés in coo, rí nacavaha xihín caa nu yito yucú íchí. Quiahva já cata caa rí na yehe, da nachindahá Ndióxi nduu ñayivi ndica crúxu 15 já quéa ná cacu ndaa ínima ñayivi já ná a cuhun na indayá tá ná candeé ini na yehe. Ta xihín ña yóho catacu na anda ama caa quivi.

Quíhvi ndivaha ini Ndióxi ñayivi nduu ñuyiví

16 Jáchí saha ña naquihvi ndivaha ini Ndióxi ñayivi nduu ñuyiví sahá ña cán quéa nachindahá mé á in túhún jiní já jahyi a ñuyiví yóho. Já quéa tá ná candeé ini na mé á cuu cacu ndaa ínima ná já ná catacu na anda ama caa quivi. 17 Coo nachindahá Ndióxi jahyi a ña ná quixi da jándihi da sahá na nduu ñuyiví yóho. Nachindahá a jahyi a jáchí cúni a jácacu a ñayivi.

18 'Ta ndá na sa candeé ini yehe, ña cúú u jahyi Ndióxi, na cán cúú na cája cáhnu ini Ndióxi saha. Joo na coo naxeen cándusa ñahá cán, na cán cúú na co cája cáhnu ini Ndióxi saha jáchí coo naxeen na cándusa na da cúú in túhún jiní já jahyi mé á.

19 Ta na coo naxeen cándusa cán sa nasacu va Ndióxi saha ná cuhun na indayá jáchí nacaan na cája na ña núu. Saha ña cán quéa naxinu mé á cúú jahyi Ndióxi ñuyiví yóho ta cúni a jándiyéhe a nuú ñayivi. Jáchí catóo chága na canduu na nuú naá jáchí cája na ña núu. 20 Jáchí tóco ndihi na cája ña núu cándají na ña vaha, ña cúú tátuhun ña yehe. Ta co cúni na cayati na nuú ña yehe cán já ná a ndítivi ña núu cája na. 21 Joo na cája ña ndaa, na cán cúú na cayati chága nuú ña vaha, ña cúú tátuhun ña yehe já ná nahá ña mé a ndaa cája na ña cúni Ndióxi —nacachi Jesús.

Ndicani tucu Juan sahá Jesús

²² Tá sa nayaha ña yóho já naquee Jesús nasahan chí estado Judea xihín na xíca tuun xihín á. Ta cán nasahin a chá tiempo xihín ná jáchi najácandúta ná ñayivi mé cán. ²³ Ta jári Juan va najácandúta dá ñayivi chí ñuu naní Enón yati ñuu Salim cán jáchi cán ñúhu cuahá ticuú. Ta cuahá ñayivi nasahan na cán candúta ná. ²⁴ Tóco ndihi ña yóho nayaha tá cámaní tiin na Juan chican na da vecaa.

²⁵ In tañu java na xíca xihín Juan cán nacasahá na ndítuhún ihvi na xihín java na Israel sahá ña yóho: á ndiyahvi chága tá cája ndúta Juan ñayivi á tá cája ndúta na xíca tuun xihín Jesús ñayivi. ²⁶ Tá nandihí já ndáva na xíca xihín Juan nasahan na cáhan na xihín dá já nacachi na já:

—Maestro, dataa, da nandituhún xihín ndó inga xoo yuta Jordán cán, da nacahan mé ndó saha nuú nde cán, viti xíca nuu da jácandúta dá ñayivi ta jandá johó tóco ndihi ñayivi ndíco na da viti —nacachi na cán xihín Juan.

²⁷ Anda já nacachi Juan já xihín na cán:

—Ni in túhún toho ñaha a cúu caja ñayivi tá co sahan Ndióxi ñamaní nu ná caja na ña. ²⁸ Ta sa naxini johó ndó ña nacaxi tuhun yachi vi xihín ndo ña co cúu yehe da nasahan Ndióxi tuhun a chindahá a cacomí a cuénta sahá ñayivi. Nachindahá Ndióxi yehe já ná cacu tiahva i íchi nuú quixi mé da cán. ²⁹ Candehé ndo. Cúu á tátuhun tá cúu in víco tándaha. Ta da cúu amigo da tándaha cán ndáti da casa da. Ta cájii ini da tá xini johó da nu cáhan vatá da tándaha cán jáchi in ñájihí da xihín dá. Ta quiahva já cájii ini i jáchi casahá ñayivi ndíco na jatá Jesús viti. ³⁰ Mé Jesús jan ndicáhnú johó ga cuhun a. Ta yehe ndítahan nuu ndáha johó i cuhun i —nacachi Juan.

Jesús quea naquixi chí indivi

³¹ Mé Jesús naquixi chí indivi ta cáhnú chága mé á nu ndihi ñaha. Ta ñayivi nacacu ñuyiví yóho cáhan na sahá ñaha ñuyiví cuítí va. Joo mé á naquixi chí indivi cán cúu á ña cáhnú chága nu tóco ndihi ñaha. ³² Ta cáhan mé a cán sahá ña naxini xihín nuu a ta cáhan sahá ña naxini johó a. Joo ni in na co cúni candúsa na ña cáhan mé á. ³³ Joo ndá na cándúsa nu cáhan mé á, na cán cúu na

cánda cáxi ini na ña cáhan Ndióxi ña ndaa. ³⁴ Ndióxi quea nachindahá mé á ta cáhan ndinuhu tuhun Ndióxi jáchi co ndáhvi toho cúu ini Ndióxi jándicutú ndaa mé a cán xihín inima yii mé á. ³⁵ Ta Ndióxi, tátá a ña in indivi quíhvi ndivaha ini a in túhún jini já jahyi a ta nasahan ndée a nuú jahyi a ña ná cuu caja tóco ndihi ñaha. ³⁶ Ta ndá na cándeé ini mé a cúu in túhún jini já jahyi Ndióxi cán, na cán cúu na catacu anda ama cáa quivi. Joo na co cúni candúsa ñahá cán, na cán cúu na a ñéhe táhvi toho na catacu na xihín Ndióxi. Ña caja Ndióxi xihín ná quea chindahá a na cuhun na indayá anda ama cáa quivi.

4

Ndítuhún Jesús xihín in ñáñaha cuénta Samaria

¹ Ta ndaja coo na fariseo nacanda ini na ña cuaha chága ñayivi ndíco jatá Jesús ta cuaha chága ñayivi jácandúta Jesús a juú ga Juan. ² Vati a juú mé Jesús jácandúta ñayivi joo na xíca tuun xihín á cán jácandúta ñahá. ³ Ta tá naxini johó Jesús ña cáhan ñayivi sahá já naquee a estado Judea xihín na xíca tuun xihín á cuahan na ndíco coo na chí estado Galilea.

⁴ Ta nuú cuhun a Galilea cán ndúsa yaha ndaa estado Samaria já xinú a nuú cuhun a cán. ⁵ Ta naxinu a in ñuu loho naní Sicar cuénta mé Samaria cán yati nuú ñundáhyi ña najándicoo táhvi Jacob nu José, jahyi da. ⁶ Ta cán nasahin in chicoho ña naní chicoho Jacob. Ta cúu á tátuhun caxivi tá naxinu coo Jesús ñuu Sicar cán. Ta chí a váha ga nacanaá a sahá ña cán quea nasacoo a yati yuhú chicoho cán. ⁷ Ta nani in coo a cán já naxinu in ñáñaha cuénta Samaria tavá ña ticuú ini chicoho cán. Já nacachi Jesús já xihín ñá:

—Quiahva loho ticuú ná coho i —nacachi a xihín ñá. ⁸ Jáchi sa cuahan na xíca tuun xihín á ñuu cueen na ñaha cuxu na.

⁹ Anda já nacatontó ña jáchi coo xini táhan vaha na Israel xihín na Samaria. Ta nacachi ñá já xihín Jesús já:

—Ndá cuénta quea xíca yóhó, da Israel, ticuú nuú i cohún ta ñá Samaria va cúu yehe —nacachi ñá cán xihín Jesús.

10 Já nacachi a já xihin ñá:

—Tá ná candaa inún yo cúu yehe, da xíca ticuí nuun ta tá ná candaa inún ndá quiahva ín ñá cúni Ndióxi quiahva nuun já cacún ñá nuú i. Jáchi yehe cuu caja i ñá ná catacún anda ama caa quivi ta ñá yóho cuu a tátuhun ticuí, do a cúu ndihi saha —nacachi Jesús.

11 Anda já nacachi ñá cán já xihin á:

—Candehé ndo. Ni yáxi co ñéhe ndó tavá ndó ticuí ini chicoho yóho ta chicoho cúná ndivaha cúu ñá yóho. Ndá cuu caja ri ndó quiahva ndó ticuí cáchí ndo jan nuú i. 12 Tásáhnu jícó nde, da nani Jacob cán najándacoo chicoho yóho nuú nde. Ta nuú chicoho yóho naxihi da cán ticuí ta sa mé chicoho yóho naxihi ri jahyi da cán ta yóho naxihi ri quíti jana dá. Ama ná cuu quiahva mé ndó ticuí vaha chága a juú ga dó najándacoo Jacob nuú nde —nacachi ñá cán xihin Jesús.

13 Anda já nanducú ñehe Jesús tuhun nu ñá já nacachi a já:

—Ndá ñayivi nacuu va xíhi ticuí chicoho yóho já queá ichi tá ichi ini na. 14 Joo ndá na ná coho ticuí táhan dó sáhan yehe, na cán cúu na a ndícó coo ga na ichi ini na anda ama caa quivi. Jáchi cúu á tátuhun sa mé ini mé va na cana ticuí, dó a ndíhi saha ta catacu na anda ama caa quivi —nacachi Jesús xihin ñá.

15 Anda já nacachi ñá cán já xihin Jesús:

—Quiahva mé ndó ticuí, dó co ndíhi saha jan nuú i ñá ná a ichi ga ini i ticuí já ná a quíxi ga i yóho tavá i dó coho i —nacachi ñá xihin á.

16 Anda já nacachi Jesús já xihin ñá:

—Cuáhán cana yíun ná quíxi da yóho xuhun.

17 Anda já nanducú ñehe ñá cán tuhun nu á já nacachi ñá já:

—Coo toho yí i.

Anda já nacachi Jesús já xihin ñá:

—Mé a ndaa coo toho yíun. 18 Joo nasahjin uhun yíun ta da ín xuhun viti jan co cúu toho da yíun. Ndaa ndusa cáhun —nacachi Jesús.

19 Já nacachi ñá já xihin á:

—Jivi ndusa in profeta cúu mé ndó.

20 Tásáhnu jícó nde, na Samaria yóho

nacaja cáhnu na Ndióxi yati jini yúcu jan. Joo ndóhó, na Israel cáchí ndo ñá ndúsa ndítahan nuú nde cuhun nde ñuu Jerusalén caja cáhnu nde Ndióxi. Ta mé ndó ndaja cachi ndó —nacachi ñá cán xihin Jesús.

21 Anda já nanducú ñehe Jesús tuhun nu ñá já nacachi a já xihin ñá:

—Xíni ñúhú candúsún ñá cáhan i jáchi mé a ndaa vaxi quivi caja cáhnu ndihi ndó Ndióxi, tátá yo ndá xoo nacuu va. A cúni ñúhú ga ndó cuhun ndo jini yúcu caa ta ni a cúni ñúhú ga ndó cuhun ndó ñuu Jerusalén caja cáhnu ndó Ndióxi. 22 Joo ndóhó, na Samaria caja cáhnu cuáá ndo Ndióxi jáchi co xíni ndó a. Joo ndehe, na Israel xíni vaha nde yo cúu Ndióxi caja cáhnu nde. Jáchi chíchi mé nde, na Israel nasacu ini Ndióxi quíxi mé á jácacu ñayivi. 23 Ta viti naxinu quivi tá ndítahan caja cáhnu ñayivi Ndióxi, tátá yo xihin ndinuhu ini na tá quiahva cúni ínima yí Ndióxi jáchi quiahva já cúni Ndióxi, tátá yo ñá ná caja cáhnu ñayivi mé á. 24 A cúu cuni yó Ndióxi jáchi coo toho yíquí cuñu a sahá ñá cán queá xíni ñúhú caja cáhnu ñayivi mé á xihin ínima ná ta xihin ndinuhu ini na —nacachi Jesús xihin ñá.

25 Anda já nacachi tucu ñá cán já:

—Sa cándaa cáxí ini i ñá vaxi quivi quíxi da chindahá Ndióxi cacomí a cuéntá sahá ñayivi, mé da cúu Cristo. Ta tá ná quíxi da cán já ndicani ndihi da nuú nde ndaja coo —nacachi ñá cán xihin Jesús.

26 Anda já nacachi Jesús já xihin ñá:

—Da cán cúu yehe, da cáhan xuhun viti —nacachi Jesús xihin ñá.

27 Ta nani cáhan Jesús xihin ñá naxinu coo na xíca tuun xihin á já nacatóntó na jáchi naxini na ndítuhún a xihin in ñáñáha. Joo ni in túhún na coo nasahan ndee ini na cuhun na ndaca tuhún ñahá ndá a cúni ñá cán, á ndá saha ndítuhún a xihin ñá. 28 Tá nandihi já najándacoo ñá cán yoo ñá ta naquee ñá cuáhan ñá ñuu. Ta cán nacasahá cáhan ñá xihin na ñuu cán já cáchí ñá já xihin ná:

29 —Naha quí ndó. Candehé ndó in dataa, da nacahan ndihi da tá quiahva nacaja i. Á a juú da yóho cúu Cristo, da

naçachi Ndióxi chindahá a cacomí cuéntá sahá ñayivi —naçachi ñá cán xihín ná.

³⁰ Tá nandihí já naqueta ndihí na cán cuahán na xihín ña nu ín Jesús. ³¹ Joo tá cámaní xinu coo na nu ín Jesús já najácahan na xíca xihín á mé á ña ná cuxu a vatí loho.

³² Anda já naçachi Jesús já xihín na xíca tuun xihín á cán:

—Sa ín va ñaha cuxu u. Ta ndóhó, co xíní toho ndó ndá a queá —naçachi Jesús xihín ná.

³³ Tá nandihí já naçasáhá na cán ndáca tuhún táhan na já cáchí na já:

—Ndá na sa naquixi ñehe va ñaha cuxu a —cáchí xihín táhan na.

³⁴ Sahá ña cán queá naçachi Jesús já xihín ná:

—Tá quiahva ndíva ha ini ñayivi tá xíxi na quiahva já ndíva ha ini i tá cája i chuun ña nachindahá Ndióxi yehe caja i ñuyiví yóho. Ta xíní ñuhú caja i ña janda quiahva ná jáxinu coo i ña. ³⁵ Xíní ñuhú ndíñehe ndó nuu ndó candehé ndo ñayivi jáchí cúú ná tátuhun nuú naxutu na trigo. Joo co xíní ñuhú caja ndó tá quiahva cája ñayivi tá ndátí na comí yoo jáquee na trigo. Jáchí viti ñuhú ín tiaha ñayivi ndiquehe na tuhun Ndióxi. ³⁶ Ndá na xíca chindeé ñayivi ndiquehe na tuhun Ndióxi, na cán cúú ná tátuhun na xíca jáquee trigo. Ta a cája chúun uun toho na jáchí quehe na yahvi sahá chuun cája na. Ta na ndíquehe tuhun Ndióxi cán cúú na cuhun catacu indiví anda ama cáa quiví. Tá sahá na cán cavatá da naxutu xihín da najáquee. ³⁷ Jáchí ín in tuhun ta ndaa cáhan ña. Já cáchí a já: “In da xútu ta inga da jáquee jáchí cúú ndíví da da cája chúun nuú in xitoho.” ³⁸ Ta quiahva já nayaha xihín mé ndó jáchí yehe nachindahá i ndohó ña ná cuhun ndó chindeé ndo ñayivi ndíhvi na íchí cuéntá Ndióxi vatí coo nandoho ini ndó caxi tuhun ndó tuhun Ndióxi xihín ná. Jáchí inga na naçaxi tuhun tuhun Ndióxi xihín na cán joo ndóhó ñehe táhvi ndó chindeé ndó na ndíhvi na íchí cuéntá Ndióxi —naçachi Jesús xihín na xíca tuun xihín á cán nani cámaní xinu coo ñayivi ñuu cán nu á.

³⁹ Ta cuahá ñayivi ñuu Samaria cán naçandúsa na Jesús sahá ña naçahan

ñáñáha cán xihín ná jáchí naçachi ñá cán já xihín ná: “Naçachi mé á xihín i ndaja cáa tóco ndihí ña naçaja i.” ⁴⁰ Sahá ña cán queá tá naxinu coo na Samaria cán nu ín Jesús já naxica tahví na nu á ña ná coo chága xihín ná. Sahá ña cán queá naçandoo Jesús naçahin a ivi quivi xihín na cán. ⁴¹ Ta cuahá java ga na Samaria cán naçandúsa na Jesús sahá tuhun naçahan mé á xihín ná. ⁴² Já naçachi mé na Samaria cán xihín ñáñáha cán já:

—Naçandúsa nde yohó tá naçahún sahá Jesús nuú nde joo viti cándéé ini nde mé á jáchí naxini johó nde nu cáhan mé á. Ta viti ndusa cándúsa nde ña cúú á Cristo, mé á nachindahá Ndióxi jácaçu a ñayivi ñuyiví —naçachi na Samaria cán xihín ñá.

Tá nandaja vaha Jesús jahyi in da cája chúun cuéntá gobierno

⁴³ Tá sa nayaha ivi quivi naçahin Jesús mé Samaria cán já naquee tucu a cuahán chí estado Galilea. ⁴⁴ Jáchí sa naçachi mé Jesús já: “Ni in tuhún toho profeta co cája cáhnu na da ñuu da”, naçachi Jesús. ⁴⁵ Joo tá naxinu coo Jesús estado Galilea cán já nandiquehe vaha na cán mé á jáchí sa naçahan ri na cán vicó pascua ñuu Jerusalén ta cán naxini na ña náhnu naçaja mé á.

⁴⁶ Anda já naxinu coo tucu Jesús ñuu Caná cuéntá Galilea cán nuú nandaja mé á ticuí nanduu dó vino. Ta mé ñuu cán naçahin in dataa, da cája chúun cuéntá gobierno. Ta a juú quiahva quíhvi jahyi da cándúhu dá ñuu Capernaum. ⁴⁷ Ta tá naxini johó da cán ña sa naquee Jesús estado Judea ta ín a estado Galilea viti já ndáva da naçahan da nu á já naxica tahví da nu á ña ná cuhun a vehe da ndaja vaha jahyi da jáchí sa ndicáhví da cándúhu dá. ⁴⁸ Tá nandihí já naçachi Jesús já xihín dá:

—Ndúsa caja i ña náhnu xihín ña xituhún nu ndo já cuu candúsa ndó yehe á tá coo ta coo cúni ndó candúsa ndó yehe —naçachi Jesús.

⁴⁹ Anda já nanducú ñehe da cája chúun cuéntá gobierno cán tuhun nuú Jesús já naçachi da já xihín á:

—Á a cuú caja ndó ñamaní cūhun quíi ndó vehe e jáchi cūni quivi jahyi i —ñacachi da xihín Jesús.

⁵⁰ Anda já ñacachi Jesús já xihín dá:

—Cuáhán ndicó cōo ndó vehe ndó jáchi ñandivaha jahyi ndó —ñacachi Jesús xihín dá.

Ta ñacandúsa da cán ña ñacachi Jesús xihín dá chí ñaquee da ñandicó cōo da cuanúhu dá. ⁵¹ Ta tá sa yati xinu cōo da vehe da já ndáva nihni ña cuú mozo da ñasahan ña ñehe ná da já ñacachi na já xihín dá:

—Sa cō quíhvi ga jahyi ndó viti.

⁵² Anda já ñandaca tuhún da cán mozo da já cáchi da já:

—Ndá hora ñacasáhá ñandivaha jahyi i —ñacachi da xihín ná.

Já ñacachi ña cán já:

—Cuni tátuhun caa in sahini já ñandindaa ña chícaan cáhni á da.

⁵³ Xihín ña yóho ñacandaa ini da cán ña mé a ndaa ñandaja vaha Jesús jahyi da jáchi mé hora cán ñacachi Jesús xihín dá ña tácu tá tácu jahyi da. Sahá ña cán quea ñacandúsa mé dá xihín ña vehe da Jesús.

⁵⁴ Ta xihín ña yóho ñaxinu ivi ña xituhún ñacaja Jesús estado Galilea cán anda nani ñaquee a Judea já ñandicó cōo tucu a Galilea.

5

Tá ñandaja vaha Jesús in da quíhvi, da ín yuhú ticuúí nani Betesda

¹ Tá ñayaha ña yóho já ñaquee Jesús cuahan ñuu Jerusalén nu cája ña Israel víco.

² Ta mé nu quíhvi johó na ñuu Jerusalén cán ín in yéhe nani yéhe ndicachi. Ta yati cán ñasahin in vehe ta ín uhun yuyéhe nu quíhvi na ini a ta ini mé vehe cán ndácaan in pila cáhnu nu ñúhu ticuúí ta nani a Betesda tuhun hebreo. ³ Ta ní ini mé vehe cán ñacaníhni ña quíhvi ndúu na. Java ña cuú ná ña cuaá. Java na quíhvi saha. Ta java na ñaxihí tuchu. Ní cán ñacaníhni na ndúu na ndáti na ndicanda ticuúí cán. ⁴ Jáchi ndá tañu núu táto Ndióxi ta jándicanda mé á ticuúí cán. Ta ndá ña ná queta nuu nu cuítí ini mé ticuúí cán tá ñandihí ñandicanda do já ndivaha na ta cō cája toho a ndá cuehe ndóho na. ⁵ Ta tañu tóco ndihí ña quíhvi

ñasanduu cán ñasandacaan in dataa, da sa ín cōo sahun uní cuia quíhvi da. ⁶ Ta tá ñaxini Jesús cándúhu dá tañu ña quíhvi cán ta tá ñacandaa ini a ña sanahá ndivaha quíhvi da já ñandaca tuhún a da já ñacachi a já xihín dá:

—Á ndivahún cūnun.

⁷ Anda já ñanducú ñehe da cán tuhun nu á já ñacachi da já:

—Cōo ni in ñayivi yóho ña chindee ña yehe queta nuu i ini ticuúí tá ndicanda do. Jáchi tá jacá cáhán uun i jáqueta i mí i, sa ñaquee vaha va inga na nuú i. Ña cán quea a cuú ndivaha i —ñacachi da cán xihín Jesús.

⁸ Anda já ñacachi Jesús já xihín dá:

—Cuáhán ndacōo nditivún yívun ta cuanúhun —ñacachi Jesús xihín da cán.

⁹ Tá ñacachi Jesús já chí ivi laá ñandivaha da quíhvi cán já ñandiquehe da yívi dá já ñacasáhá da xica da. Ta sahá ña cuú á quívi ndiquehe ndée ná ¹⁰ sahá ña cán quea ñaqueta java ña sacuahá nuú ña Israel já ñacachi na já xihín dá:

—Viti cuú á quívi ndiquehe ndée yo ta cō ndítahan toho nuun cojún yívun caca nuún —ñacachi na xihín dá.

¹¹ Anda já ñanducú ñehe da cán tuhun nu ná já ñacachi da já:

—Mé da ñandaja vaha yehe cán cuú da ñasahnda chuun nuú i ña ná cojo i yívi cūhun i —ñacachi da cán xihín ná.

¹² Já ñandaca tuhún tucu ña Israel cán da já ñacachi na já:

—Yo já ñacachi xuhun ña ná ndicojún yívun cūhun —ñacachi ña cán.

¹³ Joo da cán cō xini da yo ñandaja vaha ñahá jáchi tá ñandaja vaha Jesús da já ñaquíhvi nuu a cán tañu ñayivi cuaha cán cuahan. ¹⁴ Tá ñandihí já ñanditahan Jesús da cán ini veñuhu cáhnu já ñacachi a já xihín dá:

—Candehé. Sa cō quíhvi gaún viti. A ndicó cōo gaún cajún cuachi jáchi tiaha náá quixi ña ndeé chága ví ndohún —ñacachi Jesús xihín dá.

¹⁵ Tá ñandihí já ndáva da cán ñasahan da cáxi tuhun da nuú ña Israel ña Jesús cuú ña ñandaja vaha ñahá. ¹⁶ Sahá ña cán quea ñacasáhá ña Israel cán cája xixi na xihín

Jesús. Ndúcu na cahní na a sahá ña cája chúun a ndája vaha mé á na quíhvi quívi ndíquehe ndée ná. ¹⁷ Anda já nacachi Jesús já xihín ná:

—Cája chúun ta cája chúun Ndióxi, tátá i sahá ña cán quea cája chúun ta cája chúun ri yehe va —nacachi Jesús.

¹⁸ Sahá ña cán quea ví ga ví cúní na Israel cán cahní na Jesús jáchi cáchí na co cája cáhnu a Ndióxi quívi ndíquehe ndée ná tá quiahva cáchí ley. Ta cúní na cahní na mé á jáchi cáchí a ña cúu á in túhún jini já jahyi Ndióxi ta xihín ña yóho ndája mé á tátuhun mé Ndióxi.

Ña cúu cája Jesús sahá ña cúu á in túhún jini já jahyi Ndióxi

¹⁹ Já nacachi Jesús já xihín na Israel cán:

—Mé a ndaa ná cahan i xihín ndo. Yehe cúu u in túhún jini já jahyi Ndióxi ta co cája i ni in ñaha cuénta mí i jáchi cája i ña xíní i cája Ndióxi, tátá i. Ta tóco ndihi ña cája tátá i ña cán cúu ña cája ri yehe va. ²⁰ Jáchi sahá ña quíhvi ini Ndióxi, tátá i yehe sahá ña cán quea náha mé á nuú i ndaja táhan ñaha cája mé á. Ta janda ñaha náhnu chága ví náha mé á nuú i ta chí catóntó ndihi ndó tá ná cuni ndó ña. ²¹ Jáchi tá quiahva cája Ndióxi, tátá i jánditacu a ndii ña ná catacu na quiahva já cuu caja ri yehe jánditacu u na cúní mí i catacu. ²² Ta mé Ndióxi, tátá i co cája vií toho a sahá ñayivi. Ña nacaja mé á quea nasahan ñamaní nuú i, da cúu in túhún jini já jahyi mé á, ña ná caja vií i saha ná. ²³ Já quea ná caja cáhnu ñayivi yehe tá quiahva cája cáhnu na Ndióxi, tátá i. Jáchi ndá na co cája cáhnu yehe náha ña co cája cáhnu na Ndióxi, tátá i jáchi mé a cán nachindahá yehe vaxi i.

²⁴ Mé a ndaa ná cahan i xihín ndo. Ndá na táa johó vaha nu cahan i ta cándusa na Ndióxi, mé a nachindahá yehe quixi i, na cán cúu na catacu anda ama cáa quívi. Ta a jándoho Ndióxi ini na indayá jáchi cúu á tátuhun sa najánditacu tucu Ndióxi na. ²⁵ Mé a ndaa ná cahan i xihín ndo ña vaxi quívi ta cúu á tiempo viti tá na co tácu cuni johó na ña cahan yehe, da cúu in túhún jini já jahyi Ndióxi. Ta ndá na ná ndiquehe vaha tuhun cahan i xihín ná catacu na anda ama cáa quívi. ²⁶ Jáchi tá quiahva cuu caja

Ndióxi catacu ñayivi quiahva já nacaja mé á ña ná caja ri yehe, da cúu in túhún jini já jahyi mé á, ña ná cuu catacu ñayivi. ²⁷ Ta nasahan mé á ñamaní nuú i ña ná caja vií i sahá ñayivi ñuyívi jáchi yehe cúu da naquixi indiví nduu in ñayivi. ²⁸ A catóntó ndo sahá ña cahan i xihín ndo yóho jáchi mé a ndaa vaxi quívi tá cuni johó tóco ndihi na sa naxihí nuú cahan i xihín ná ²⁹ já queta na camasanto. Ta na nacaja vaha cán nditacu na ta cuhun na catacu na anda ama cáa quívi. Ta na nacaja ña quini nditacu na ta cuhun na indayá ndoho ini na.

Náha Jesús ña ín saha cája tóco ndihi ña cája

³⁰ Tóco ndihi ña cája i a juú in túhún mí i caja ña. Tá quiahva sáhdá Ndióxi, tátá i chuun nuú i ña ná caja vií i sahá ñayivi quiahva já cája vií i saha ná. Ta cája vií ndaa i saha ná jáchi co ndúcu u caja i ña cúní mí i. Ña ndúcu u caja i cúu ña cúní Ndióxi, tátá i caja i jáchi mé á nachindahá yehe quixi i. ³¹ Jáchi tá saha mí i ná caca nuu i cahan i, co nditahan ndíquehe ndó ña cahan i sahá i. Co nditahan nuú i cahan i saha mí i ³² jáchi ín inga ña cahan sahá i ta ña cahan mé a cán sahá i cúu á ña ndaa. ³³ Ta mé ndó nachindahá ndo java na nasahan na ndaca tuhún na Juan sahá i. Ta ña ndaa nasacuu tóco ndihi tuhun nanducú ñehe da cán nu ndo. ³⁴ Vati co ndati i cándusa ndó yehe sahá ña cahan in ñayivi sahá i joo cuu cacu ndaa ínima ndó tá ná cándusa ndó ña cahan Juan sahá i. ³⁵ Jáchi mé Juan, da nacaja nduta ñayivi cán nasacuu da tátuhun in íti, dó jándiyéhe nuu ndo. Joo chá tiempo cuití va nacajii ini ndó xihín tuhun nacahan da. ³⁶ Ín inga ña cáhnu chága a juú ga ña nacahan Juan sahá i. Ta ña cán cúu á ña náhnu xihín ña xitúhún naxini ndó nacaja i. Ta ña yóho náha nu ndo yo cúu yehe ta náha ña cúu á ña ndaa ña nachindahá Ndióxi, tátá i yehe. Jáchi tóco ndihi ña cája i cúu á ña nacachi Ndióxi, tátá i xihín i caja i. ³⁷ Ta Ndióxi, tátá i, mé a nachindahá yehe náha tuhun sahá i. Joo ndóhó, co xíní johó ndó nu cahan mé á ta ni co xíní tívi ndó a. ³⁸ Ta ni coo tuhun mé á ndacaan ínima ndo jáchi co cándusa

ndó yehe, da nachindahá mé á quixi ñuyívi yóho. ³⁹ Vati jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cáa quivi joo co cándaá ini ndó ña mé tuhun Ndióxi cán cúú á ña cáhan sahá yehe. ⁴⁰ Ta co cúní ndó quixi ndó nuú i já ná caja i ña ná catacu ndó anda ama cáa quivi.

⁴¹ Co ndúcú toho i ña ná caja cáhnu ndó yehe. ⁴² Sa xini vaha i ínima ndo ta cándaá ini i ña co quíhvi ini ndó Ndióxi. ⁴³ Naxinu i ñuyívi yóho cuéntá Ndióxi, tátá i ta co cúní ndó ndiquehe vaha ndó yehe. Joo tá ná quixi in da cuéntá mé dá já ndiquehe vaha ndusa ndó da. ⁴⁴ Jáchi mé ndó cátóó ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Sahá ña cán queá ihvi ndivaha cúú ini ndó cándéé ini ndó in túhún jini Ndióxi. ⁴⁵ Coto a juú cahán ndo ña jácojo i cuachi jata ndo nu Ndióxi, tátá i. Mé ley nacañyí Moisés, ña cán cúú á chícaan cuachi jata ndó vatí cándéé ini ndó da. ⁴⁶ Tá ta mé a ndaa cándúsa ndó ña nacañyí Moisés sanahá já queá cándúsa ndó yehe jáchi sahá yehe nacañyí Moisés sanahá. ⁴⁷ Joo sahá ña co cándúsa ndó ña nacañyí Moisés sahá i sahá ña cán queá co cándúsa ndó ña cáhan i xihin ndo —nacachi Jesús xihin na Israel cán.

6

Sáhan Jesús ña cuxu uhun mil taa
(Mt. 14:13-21; Mr. 6:30-44; Lc. 9:10-17)

¹ Tá sa nayaha tóco ndihi ña yóho já naquee Jesús cuahan inga xoo tañuhú Galilea cán. Ta mé tañuhú cán cáhan tucu na xihin dó nani do Tiberias. ² Ta cuahá ndivaha ñayivi ndico jata Jesús cuahan na jáchi naxini na ña náhnu nacaja mé á tá nandaja vaha mé á na quíhvi. ³ Tá nandihí já nandaa Jesús in xiqui ta cán nasacoo a xihin na xica tuun xihin a cán. ⁴ Ta mé tiempo já sa cáyati vicó pascua ña cája mé na Israel cán. ⁵ Ta tá nandicoto nihni Jesús já naxini a ña ndico cuahá ñayivi jata vaxi na já nacachi a já xihin Felipe:

—Ndá já cájún cuéntá cohó cueen nahá yo ña cuxu tóco ndihi ñayivi yóho —nacachi Jesús xihin dá.

⁶ Nacachi Jesús ña yóho xihin Felipe jáchi cúní a cuni a ndía cachi da cán xihin á. Jáchi

sa xini vaha Jesús ndáa queá caja ña ná cuxu ndihi na cán. ⁷ Anda já nanducú ñehe Felipe tuhun nuú Jesús já nacachi da já xihin á:

—Ni ivi ciento denario ná cañehé, a quéta toho ña cán cueén pan ná quiahva in yuhú in yuhú cuxu in in ñayivi ndúu yóho —nacachi da cán xihin Jesús.

⁸ Anda já nacañan Andrés, da cúú in táhan na xica tuun xihin Jesús, da cúú ñani Simón Pedro. Já nacachi da já xihin Jesús:

⁹ —Yóho in in taa loho ta ñehe da uhun pan cebada xihin ivi tiyacá. Joo ama ná queta ri ña yóho cuxu tóco ndihi ñayivi jan —nacachi Andrés xihin Jesús.

¹⁰ Anda já nacachi Jesús já:

—Cahan ndó xihin ná ña ná cacoo na.

Anda já nasacoo ndihi na cán. Ta a juú quiahva ndató nasahnu yucu nuú nasacoo tátuhun uhun mil taa. ¹¹ Tá nandihí já natiin Jesús pan cán já nandiquiahva ndixahvi nu Ndióxi. Ta tá nandihí já nasahan ña nuú na xica tuun xihin á ta nandicahnda na ña nuú na ndúu coo cán. Ta quiahva já nacaja ri a xihin tiyacá va. Ta naxixi ndihi na janda quiahva nachutú tixi na. ¹² Ta tá nandihí já nacachi Jesús já xihin na xica tuun xihin á cán:

—Jánditaca ndó tóco ndihi ña nacandoo jan já ná a tívi ña —nacachi Jesús xihin ná.

¹³ Sahá ña cán queá najánditaca na ña ta najándicutú na uxu ivi toyicá xihin ña nacandoo. ¹⁴ Tá naxini ndihi ñayivi cán ña xituhún nacaja Jesús yóho já nacasahá cáchi xihin táhan na já:

—Jivi ndusa da yóho cúú profeta nacachi Ndióxi chindahá a ñuyívi yóho —cáchi xihin táhan na.

¹⁵ Joo naquee Jesús cuahan in túhún mé á coo a yucu jáchi xini mé á ña ndúcú ñayivi cañehe ndúsa na mé á jáchi cúní na ndaja na mé á rey nu ná.

Tá naxica sahá Jesús nuú tañuhú
(Mt. 14:22-27; Mr. 6:45-52)

¹⁶ Tá sa nacuaá já nanuu na xica tuun xihin Jesús xiqui cán cuahan chí yuhú tañuhú cán. ¹⁷ Ta chí sa nacanaá vaha va ta coo Jesús xinu coo nu ndúu na sahá ña cán queá nandaa na jata in barco ta nacasahá na jándicaca na do jáchi cúní na cuhun na ñuu Capernaum. ¹⁸ Ta ndaja

coo naçasáhá ndícojo ticuú nuú tañuhú cán jáchi naçasáhá xícó in tachi ndeé ndivaha. ¹⁹ Ta tá sa naçaxícá na uhun á iñu kilometro cuahan na xihin barco cán nuú ticuú já naxini na xica sáhá Jesús cuahan nuú ticuú já cáyati a nu barco cándójó na cán. Anda já naçasáhá yíhví na ndúu na. ²⁰ Ta tá naxinu coo Jesús nu ná já naçachi a já xihin ná:

—A cáyihví toho ndó jáchi yehe va cúu u —naçachi a xihin ná.

²¹ Anda já cávatá na najánda na a jata barco. Ta ivi laá sa naxinu coo na nuú cuahan na.

Ndinducú ñayivi Jesús

²² Tá nañivi inga quiví itaan já naçasáhá ñayivi ndinducú na Jesús jáchi naxini na ña coo nandaa toho a in túhún barco nasahin cán xihin na xica tuun xihin a jáchi mé cuítí na cán sa nandaa cuahan. ²³ Ta nani ndúu na yuhú tañuhú yati nuú nandaja cuaha Jesús pan tá nandihí nandiquiahva mé á ndixahvi nu Ndióxi cán já naxinu coo java barco, dó naquixi chí ñuu Tiberias. ²⁴ Ta sahá ña coo nanditahan na Jesús sahá ña cán quéa nandaa na barco cán já naquee na cuahan na ñuu Capernaum ndinducú ñahá na.

Jesús cúu á tátuhun pan xixi ñayivi já tácu na

²⁵ Tá naxinu coo na cán inga xoo tañuhú já nanditahan na Jesús. Ta naçasáhá ndáca túhún na mé á já cáchi na já:

—Maestro, ndá hora naxinu coo ndó yóho —naçachi na xihin á.

²⁶ Anda já naçachi Jesús já xihin ná:

—Mé a ndaa ná cahan i xihin ndo. Xica ndó ndinducú ndó yehe joo co cúu á sahá ña naçandaa ini ndó yo cúu yehe. Sahá ña náhnu naçaja i tá nasahan i ña naxixi ndó janda nachutú tixi ndó sahá ña cán quéa ndinducú ndó yehe. ²⁷ Co ndítahan ndihí nahá ini ndó sahá ña cuxu ndó ñuyiví yóho. Ña ndítahan caja ndó quéa ndinducú ndó ndá quiahva catacu ndó anda ama cáa quiví. Jáchi yehe cúu da nachindahá Ndióxi nduu ñayivi ta cuu caja i ña ná catacu ndó anda ama cáa quiví. Jáchi Ndióxi, tátá i náha ña mé a ndaa naçaxi a yehe caja i chuun yóho —naçachi Jesús xihin na cán.

²⁸ Anda já naçachi na cán já xihin á:

—Ndía ndítahan nuú nde caja nde já ná jáxinu coo nde ña cúni Ndióxi —naçachi na xihin Jesús.

²⁹ Já naçachi Jesús já xihin ná:

—Ña cúni Ndióxi caja ndó quéa ná candúsa ndó yehe, da nachindahá mé á ñuyiví yóho.

³⁰ Anda já naçachi tucu na cán já xihin á:

—Ndá ñaha xituhún chága cuu caja ndó nuú nde viti ña ná cuni nde ña já ná cuu candúsa nde ndohó. Ndá a náhnu quéa cuu caja ndó. ³¹ Jáchi mé tásáhnu jícó nde naxixi na pan tá naxica na yucú íchí nu co ndúu ñayivi cán. Já cáchi túhun Ndióxi já: “Naxixi na pan ña naquixi indiví naçaja Moisés” —naçachi na cán xihin Jesús.

³² Já naçachi Jesús já xihin ná:

—Mé a ndaa ná cahan i xihin ndo. A juú toho Moisés cúu da nasahan pan ña naquixi indiví nu ná. Jáchi Ndióxi, tátá i cúu ndusa ña nasahan pan naquixi indiví nu ná. Ta viti cúni Ndióxi quiahva in ñaha vaha chága nu ndo a juú ga ña nasahan Moisés nuú na cán sanahá. ³³ Jáchi yehe cúu u tátuhun pan ña nanuu indiví naçaja Ndióxi ña ná cuu catacu ñayivi anda ama cáa quiví —naçachi Jesús xihin na cán.

³⁴ Anda já naçachi na cán já xihin á:

—Nini quiví quiahva ndó táhan pan jan nuú nde, xitoho.

³⁵ Já naçachi Jesús já xihin ná:

—Yehe cúu u tátuhun mé pan jan. Tá ná ndiquehe ñayivi yehe já ndivaha ini na ta cúu á tátuhun a cuico ga na. Ta ndá na candúsa na mí i já cúu á tátuhun a íchí ga ini na ticuú. ³⁶ Joo cúu á tá quiahva naçachi i xihin ndo: co candúsa toho ndó yehe vatí xini ndó yehe. ³⁷ Joo tóco ndihí na vaxi nuú i cája Ndióxi, na cán cúu na candúsa yehe. Ta ndá na candúsa yehe, na cán co táxi i na ña ná queue na cuhun na. ³⁸ Jáchi vatí nanuu i indiví nu in Ndióxi joo coo naquixi i caja i ña cúni mí i. Vaxi i caja i ña cúni Ndióxi, tátá i jáchi mé á nachindahá yehe. ³⁹ Ta ña cúni Ndióxi quéa ña ná a quiahva i ñamaní ndihí sahá na nasahan mé á nuú i. Ña cúni mé á quéa ná jánditacu u tóco ndihí na tá ná xinu coo quiví nu ndihí. ⁴⁰ Ña cúni Ndióxi quéa ná catacu ñayivi, na cándéé ini yehe anda ama cáa quiví. Ta yehe, da cúu in túhún jini

já jahyi mé á jánditacu u na quivi nu ndíhi cuí —nacachi Jesús.

⁴¹ Anda já nacasáhá na Israel cán cáhan núu na sahá Jesús jáchi sa nacachi a ña cúu á tátuhun pan ta nacachi a ña nanuu a chí indiví. ⁴² Ta já nacachi xihin táhan na cán já:

—Á a juú jahyi José va cúu Jesús yóho. Ta xini vaha va mí yo cúu náná da xihin tátá da. Ta ndá cuéntá quea cáchi ri da ña naquixi da chí indiví, dá já —nacachi xihin táhan na cán.

⁴³ Anda já nacachi Jesús já xihin ná:

—A cáhan núu ga ndó sahá i. ⁴⁴ Jáchi jácahan Ndióxi, tátá i, ñayivi ña ná candúsa na yehe. Ta ni in túhún toho ñayivi a cuú candúsa na yehe tá ta co jácahan Ndióxi ínimá ná, mé á nachindahá yehe. Ta na cán cúu na jánditacu u quivi nu ndíhi. ⁴⁵ Já nacahyí na profeta sanahá: “Jánaḥa Ndióxi tóco ndihi ñayivi.” Ña cán quea tóco ndihi ñayivi, na xini johó nu cáhan Ndióxi ta cajú na ña jánaḥa mé á nu ná, na cán cúu na vaxi nuú i.

⁴⁶ Joo a juú cahán ndo ña cuu cuni java ñayivi Ndióxi, tátá i. Jáchi yehe, da nachindahá mé á ñuyivi yóho, cúu in túhún da xini ñahá. ⁴⁷ Mé a ndaa ná cahan i xihin ndo. Ndá na candeé ini yehe, na cán cúu na catacu anda ama cúa quivi. ⁴⁸ Jáchi yehe cúu u tátuhun pan ña cuu cajú ña ná catacu na. ⁴⁹ Sa xini ndó tásáhnú jícó ndo naxixi na pan yucú íchí sanahá joo naxihi tá naxihi na. ⁵⁰ Joo yehe cúu u tátuhun pan ña nanuu chí indiví já quea ndá na candúsa yehe cúu ná tátuhun na xixi pan ta já a quivi na. Jáchi tá ná cuxu na pan quiahva i nu ná já quea catacu na anda ama cúa quivi. ⁵¹ Yehe cúu u tátuhun mé pan xixi na. Nanuu i indiví ta a cúu ndihi sahá i. Ta jivi mé yiquí cuñu i cúu á tátuhun pan xixi na yóho ta vaxi quivi ndiquiahva i ña nu ná já ná cuu cacu ndaa ínimá ná. Ta tá ná cuxu na ña já catacu na anda ama cúa quivi —nacachi Jesús.

⁵² Anda já nacasáhá na Israel cán ndítuhún cuehe xihin táhan na já nacachi na já:

—Cáchi da yóho ña cúu yiquí cuñu da tátuhun pan xixi ñayivi. Ndaja cuu cajú ri

da quiahva da ña nu yo cuxú —cáchi xihin táhan na.

⁵³ Anda já nacachi Jesús já xihin ná:

—Mé a ndaa ná cahan i xihin ndo. A cuú catacu ndó anda ama cúa quivi tá ta co candúsa ndó yehe. Ta tá candúsa ndó yehe cúu á tátuhun xixi ndó yiquí cuñu i ta cúu á tátuhun xixi ndó nij i. ⁵⁴ Ndá na xixi na yiquí cuñu i ta xixi na nij i, na cán cúu na cacu ndaa ínimá ná ta jánditacu u na quivi nu ndíhi. ⁵⁵ Jáchi yiquí cuñu i cúu ndusa tátuhun in ñaha vaha ndivaha cuxu na ta nij i cúu dó tátuhun in dó vaha xixi na. ⁵⁶ Ndá na ná ndiquehe vaha yehe cúu á tátuhun ndiquehe vaha na in pan cuxu na ta cúu á tátuhun ndiquehe na ticuí xixi na. Já quea in nduu na xihin i ta já in nduu ri yehe va xihin mé ná. ⁵⁷ Ta sahá ña tácu Ndióxi, tátá i, mé a nachindahá yehe sahá ña cán quea tácu ri yehe va cajú mé á. Quiahva já vaha ri xihin ñayivi jáchi tá ná ndiquehe vaha na yehe já catacu na cajú i. ⁵⁸ Jáchi yehe cúu u ndusa tátuhun pan ña nanuu indiví. Ta co cúu á tátuhun ña nayaha xihin tásáhnú jícó ndo tá naxixi na pan naní maná yucú íchí cán jáchi tá nandihí naxihi tá naxihi na cán. Joo ndá na candeé ini yehe cúu ná tátuhun na xixi pan ña naquixi indiví. Ta na cán catacu na anda ama cúa quivi —nacachi Jesús.

⁵⁹ Tóco ndihi ña yóho najánaḥa Jesús nu ná ini veñuhu ñuu Capernaum cán.

Cuu catacu ñayivi anda ama cúa quivi tá ná candeé ini na Jesús

⁶⁰ Ta cuhá táhan na xica xihin Jesús cán tá naxini johó na ña nacahan mé á já nacasáhá cáhan núu na sahá já cáchi na já:

—Yáncá ndivaha candúsa í tuhun cáhan Jesús yóho. A cúu toho cajú í xihin á —nacachi na cán.

⁶¹ Tá naxini Jesús ña cáhvi núu ini na xica xihin a cán já nacasáhá cáchi a já xihin ná:

—Ndíhiví ndó sahá tuhun nacahan i yóho. ⁶² Ndaja ga ví ndíhiví ndó tá ná cuni ndó yehe ndaa i cuhun i indiví nuú nasahin i jáchi yehe cúu u da nachindahá Ndióxi nduu ñayivi. ⁶³ Nasahan Ndióxi in ínimá nuú in in ñayivi ña ná chindeé a na ndinducú na mé á. Joo yiquí cuñu ñayivi co chindeé toho a na ndinducú na mé á. Ta

tóco ndihi ña ñacahan i xihin ndo cúú á ña cuu xinu ini inima ndo ña ná catacu ndó anda ama cáa quivi. ⁶⁴ Joo ndúu java ndó cámaní yíi candúsa ndó ña cáhan i xihin ndo —ñacachi a.

Ñacachi Jesús ña yóho jáchi sa xini mé á anda saha ndá na cúú na co candúsa ñahá. Ta sa xini Jesús ndá da cúú da jicó túhún ñahá. ⁶⁵ Anda já ñacachi tucu a já:

—Sahá ña cán quéa cáchi i xihin ndó ña ni in túhún toho ñayivi a cuú candúsa na yehe tá co jácahan Ndióxi inima ná —ñacachi Jesús.

⁶⁶ Tá ñacachi Jesús ña yóho já quéa cuaha táhan na nasaxica xihin a cán najándacoo na mé á ta chí coo naxeen ga na caca nuu na xihin á. ⁶⁷ Anda já nandaca túhún Jesús ndíhuxu ivi na xica tuun xihin a cán já ñacachi a já xihin ná:

—Á cuhun ri ndóhó va cuni ndo —ñacachi a.

⁶⁸ Anda já nanducú ñehe Simón Pedro túhún nuú Jesús já ñacachi da já:

—Candehé ndo, xitoho i. Yo nuú ga cuu cuhun nde. Túhún cáhan ndó xihin nde caja ña ná cuhun nde catacu nde anda ama cáa quivi tá ná candúsa nde ña. ⁶⁹ Ta ndehe sa ñacandúsa va nde ndohó. Ta sa xini vaaha nde ña cúú ndó Cristo, ña in túhún jini já jahyi Ndióxi, ña tácu indivi —ñacachi Pedro cán xihin Jesús.

⁷⁰ Anda já ñacachi Jesús já:

—Mé a ndaa ñacaxi i ndíhuxu ivi ndó ña ná caca tuun ndó xihin i. Ta vatí ñacaxi i ndihi ndó joo in táhan ndó cúú dá cuéntá tiñahá sacuaḥa —ñacachi Jesús.

⁷¹ Ñacachi Jesús ña yóho saha Judas, jahyi Simón Iscariote jáchi mé Judas cán cúú dá da jicó túhún ñahá chága chí nuu vatí cúú dá in táhan da uxu ivi na xica tuun xihin Jesús cán.

7

Có cuni na cúú ñani Jesús candúsa na mé á

¹ Tá nayaha ña yóho já naxica nuu Jesús tá ñuu tá ñuu estado Galilea cán. Coó naxeen ga cuhun a chí Judea jáchi cán ñacasahá na ndúcú na mé á cahní na a. ² Joo saha ña ñacayati víco tá ndúu ñayivi vehe tayahvá válí cája na Israel ³ saha ña cán quéa ñacachi java ñani Jesús já xihin á:

—Ndía cájún coún yóho. Cuáhán chí Judea já ná cuni na xica xuhun cán ndaja ndaa ña náhnu cájún. ⁴ Jáchi tá cuni in dataa nahá da ña náhnu cája da já quéa co ndácoo jehé toho da cája da ña. Tá ta mé a ndaa cájún ña náhnu já quéa xini ñúhú cajún ña já ná cuni ní cúú ñayivi ndaja náhnu ñaha cájún —ñacachi ñani Jesús xihin á.

⁵ Ñacachi na cán ña yóho jáchi ni mé ñani a cán coo ñacandúsa ñahá. ⁶ Anda já ñacachi Jesús xihin na cán já:

—Cámaní yíi ndindaa hora cuhun i. Ta vaaha ri ndóhó ndá hora ñacuu va cuu cuhun ndó jan. ⁷ Jáchi ñayivi cája ña núu ñuyiví yóho a cuú candají toho na ndohó joo candají na yehe jáchi cáxi táhyí cáhan i xihin ná ña cája na ña núu. ⁸ Cuáhán mé ndó víco tá cuni ndó cuhun ndo jáchi yehe a cuhun toho i jáchi cámaní yíi xinu hora cuhun i —ñacachi a.

⁹ Ña yóho ñacachi Jesús xihin ñani a. Ta ñacandoo mé á estado Galilea cán.

Tá naxinu coo Jesús víco vehe tayahvá cán

¹⁰ Joo tá nandihí ñaquee ñani Jesús cán cuahan na víco já ñaquee ri Jesús cuahan mé víco cán. Joo coo naxeen a nahá tívi a mé á nuú ñayivi. ¹¹ Ta mé na sacuaḥa nuú na Israel cán ñacasahá na ndúcú na Jesús: “Ndá xica nuu da tañu víco cán”, cáhan na.

¹² Ta jandá johó ndítúhún yaá ñayivi saha Jesús xica nuu na víco cán. Java na cáchi na saha Jesús ña cúú dá ta cája vaaha. Ta java na cáchi na: “Có cúú toho da ta vaaha jáchi xica nuu cuití da jándahvi da ñayivi”, cáchi na.

¹³ Joo ni in na co sahan ndeé ini cahan saha nuú na sacuaḥa nuú na Israel cán jáchi yíhvi ñahá na.

¹⁴ Ta tá natahvi java víco cán já ñaquihvi Jesús ini veñuhu cáhnu ñuu Jerusalén cán já ñacasahá jánahá nuú ñayivi. ¹⁵ Ta tá xini johó na Israel cán nu cáhan Jesús chí cátontó na já ñacasahá ndáca túhún táhan na já cáchi na já:

—Ndájá ñacatihva nahá da yóho ña jánahá da nu yo jáchi a juú da naxica jácuaha cúú dá —ñacachi xihin táhan na cán.

¹⁶ Anda já ñacachi Jesús já xihin ná:

—Ña jánaha i nu ndo yóho co cúu á ña naquixi jini mí i jáchi cúu á ña quixi nu Ndióxi, tátá i, mé á nachindahá yehe. ¹⁷ Ta tá mé a ndaa sácú ini ndó caja ndó ña cuni Ndióxi já quea cuu candaa ini ndó á cáhan i cuéntá Ndióxi, á cáhan i cuéntá mí cuití vi. ¹⁸ Jáchi ndá na cáhan cuéntá mé ná já quea ndúcú na ña ná caja cáhnu ñayivi na. Joo ndá na ndúcú ña ná ndicáhnu mé á nachindahá ñahá cán, na cán cúu ndusa na cáhan ña ndaa ta co cája na ña co ndítahan nu ná caja na.

¹⁹ Mé a ndaa najándacoo Moisés ley nu ndo joo ni in túhún ndo co cája ndó ña cáhí a. Ta viti cuni ndó cahní ndó yehe — nacachi Jesús.

²⁰ Anda já nanducú ñehe na cán tuhun nu á já nacachi na já:

—Rí quini va ndácaan ini yóhó jáchi ni in túhún toho na co ndúcú cahní yohó — nacachi na cán.

²¹ Anda já nacachi Jesús já xihín ná:

—Chí catóntó ndivaha ndó sahá in túhún ña cáhnu nacaja i quivi ndíquehe ndée yo. ²² Joo candehé ndo. Moisés cúu da nasahnda chuun nu tásáhnu jícó yo ña ná chicao na marca yiquí cuñu na vatí a juú Moisés natavá sahá, vaha. Mé tásáhnu jícó yo natavá sahá ta mé ndó chicao tá chicao ndó marca yiquí cuñu taa valí vatí cúu á quivi ndíquehe ndée yo. ²³ Ta viti cáhí ndo xihín i ndaja cáa ri ña yóho. Mé ndó chicao ndó marca yiquí cuñu da valí vatí cúu á quivi ndíquehe ndée yo jáchi co cuni ndó vaha nuú ña nasahnda Moisés nu ndó. Ta viti xójo ini ndó xihín i sahá ña nandaja vaha i in ní yiquí cuñu in dataa quivi ndíquehe ndée yo. Ndaja cáa ri ña jan cáa já. ²⁴ Mé ndó ndaja nacuu cáhan núu ndó sahá ñayivi ta co ndítahan toho caja ndó já. Jáchi ndítahan nu ndó candaa ini ndó ña cúu ña ndaa —nacachi Jesús xihín na cán.

Ndicani Jesús ndáchí naquixi a

²⁵ Ta java na ñuu Jerusalén nacasáhá ndaca tuhún táhan na já cáhí na já:

—Á a juú da yóho cúu da xíca na ndúcú na cahní na. ²⁶ Nu ndíhi na cándichi da jánaha da ta ni in na co ndaa cúu da. Á tá coo ta janda na jutixia cáa cándusa na ña cúu

da Cristo, da nachindahá Ndióxi cacomí a cuéntá sahá ñayivi. ²⁷ Joo mí xini vaha í ndá ñuu naquixi da yóho ña cán quea xini yo ña co cúu toho da Cristo jáchi tá ná quixi ndusa Cristo cán ni in na a candaa ini ndá ñuu quixi da —nacachi na cán cáhan na sahá Jesús.

²⁸ Ta nani jánaha Jesús ini veñuhu cáhnu cán já nacasáhá cáhan cóhó a já nacachi a já:

—Mé a ndaa xini vaha ndó yehe ta xini ndó ndá ñuu naquixi i. Joo coo vaxi yehe cuéntá mí i. Mé Ndióxi nachindahá yehe vaxi i, mé a cán cája ña ndaa. Joo mé ndó co xini toho ndó a. ²⁹ Yehe xini vaha i yo cúu mé á jáchi naquixi i nu íin mé á ta nachindahá mé á yehe vaxi i —nacachi a.

³⁰ Anda já ndúcú na tiin na Jesús chicao na a vecaa joo ni in na coo nasahan ndee ini tiin ñahá jáchi cámaní yí ndindaa hora tiin na a. ³¹ Ta cuaha táhan ñayivi naxini johu nuú nacahan Jesús cán nacandusa na mé á ta já cáhí na já:

—Á a juú da yóho cúu Cristo jáchi tá ná quixi inga da ama ná caja da ñaha xituhún chaga a juú ga da yóho —nacachi na.

Ndúcú na fariseo chicao na Jesús vecaa

³² Tá naxini johu na fariseo ña cáhan núu ñayivi sahá Jesús já nandindee ini na ta nandindee ini ri na sacuaha nuú jutú cán chí nachindahá na java soldado cuéntá veñuhu cáhnu cán ña ná tiin na Jesús chicao na a vecaa. ³³ Anda já nacachi tucu Jesús já:

—Chá tiempo cuití va coo tóo i xihín ndo ñuyiví yóho jáchi tá nandihi já cuhun tucu u nu íin mé á nachindahá yehe. ³⁴ Anda jáví caca nuu ndó ndinducú ndó yehe joo a ndítahan ndó yehe jáchi a cúu cuhun ndó nuú coo i —nacachi Jesús.

³⁵ Tá naxini johu na Israel cán ña nacachi Jesús já nacasáhá ndaca tuhún táhan na já cáhí na já:

—Ta ndáchí já cuhun ri da yóho ña cáhí da ña a cúu nditahan í da. Á cuhun xíca da ñuu na tóho nu ndúu na Israel ña ná jánaha da nuú na griego. ³⁶ Ndía cuni cachi da xihín yó tá nacachi da ña ndinducú yó da ta a ndítahan toho í da. Jáchi nacachi da xihín yó ña a cúu coho nuú coo da —nacachi

xihin táhan na cán jáchi coó nacandaa ini na ña nacachi Jesús xihin ná.

Jesús cúu á tátuhun yuta ticuui

³⁷ Ta mé quivi nu ndíhi víco cán nasacuu a quivi cáhnu chága nuú na Israel. Ta mé quivi cán nandaca ndichi Jesús já nacayuhú a já nacachi a já:

—Ndá ndó íchi ini ticuui, naha ndó nuú i já ná caja i ña ná ndivaha ini ndó. ³⁸ Jáchi já nahyi a nuú tuhun Ndióxi: “Ndá na ná candeé ini yehe, ini mé ínimá ná cana tátuhun yuta ticuui, dó caja ña ná catacu na” —nacachi Jesús xihín na cán.

³⁹ Ña cúni Jesús cachi a xihín na yóho quea tá ná candeé ini na mé á já xinu quivi ndiquehe na ínimá yii Ndióxi ini ínimá ná. Vatí mé a ndaa a ñaha toho xinu ínimá yii Ndióxi ini ñayivi jáchi cámaní yii va ndindita Jesús ndicáhnu ndivaha mé á indivi.

Sa jín sa jín ñaha cáhan ñayivi sahá Jesús

⁴⁰ Java na ndúu tañu ñayivi cuaha cán tá naxini johó na ña yóho já nacasáhá cáchi na já:

—Jivi ndusa da yóho cúu profeta nacachi Ndióxi chindahá a ñuyivi yóho —cáchi na.

⁴¹ Ta java na cáchi na sahá Jesús ña cúu á Cristo, da nachindahá Ndióxi cacomí cuénta sahá ñayivi. Ta java na cáchi na ña a juú toho a jáchi cáhan na ña a cúu toho quixi Cristo estado Galilea. ⁴² Jáchi cáchi tuhun Ndióxi ña tá ná quixi Cristo ñuyivi yóho cacuu da da quixi chichi David, da nasacomí cuénta sahá ñayivi Israel sanahá. Ta cáchi tuhun Ndióxi ña cacu da cán ñuu Belén nuú nacacu mé David cán.

⁴³ Ta chí nacasáhá na sáhdá java táhan na sahá ña coó nandique táhan tuhun na saha Jesús. ⁴⁴ Ta java na cúni na tiin na a ña ná cañehe ñahá na cuhun a vecaa. Joo ni in na coó natiin ñahá.

Co cúni na jutixia candúsa na Jesús

⁴⁵ Tá nandihí já nandicó coo soldado cuénta veñuhu cán nu ndúu na fariseo xihín na sacuaḥa nuú jutú cán joo coó Jesús ñehe na ná casaa na. Já nacasáhá na ndúu cán ndaca tuhún ñahá na já cáchi na já:

—Ndá cuénta quea coó natiin ndó da —nacachi na cán xihín soldado.

⁴⁶ Anda já nanducú ñehe soldado cán tuhun nu ná já cáchi da já xihín ná:

—Nacatóntó nde naxini johó nde nu cáhan da jáchi ñúchí ndivaha cáhan da ta ni in tuhún na coó nacahan tá quiahva cáhan mé dá —nacachi soldado cán.

⁴⁷ Já nacachi na fariseo já xihín dá:

—Á jári ndóhó va najándahvi da jan viti.

⁴⁸ Jáchi janda ni in tuhún toho táhan na sacuaḥa ndúu tañu mé nde co cándúsa nde da jan. Ta ni in na fariseo co cándúsa na nu cáhan Jesús jan. ⁴⁹ Joo cháhan va vaxi jatá ñayivi candeé ini Jesús jan jáchi co xini na ña cáchi ley Moisés —nacachi na fariseo xihín soldado.

⁵⁰ Anda já nandicahan Nicodemo, da cúu in táhan na fariseo cán, mé dá nasahan da nandituhún xihín Jesús in ñuu. Já nacachi da já xihín na java ga cán:

⁵¹ —Cáchi ley ña a cuú tiin in ta ta já chicaan ndaja nacuu da vecaa. Ña cáchi ley quea ndítahan cuni johó í nuú cahan da já ná candaa ini ndaja caa ña nacaja da —nacachi Nicodemo.

⁵² Anda já nacaja cuehe na xihín Nicodemo já nacachi na já xihín dá:

—Á da Galilea cúu ri yóho va. Cuahán cahvi vaha tuhun Ndióxi já cunún ña co cána ni in profeta estado Galilea —nacachi na xihín Nicodemo.

⁵³ Tá nandihí já nandicuita nuu ndihí na cán cuánúhu ná vehe na.

8

Cája cáhnu ini Jesús sahá in ñañáha

¹ Ta ndaja coo naquee Jesús cuahan chí yucu yitó olivo. ² Ta tá nativi inga quivi itaan já nandicó coo tucu a veñuhu cáhnu cán. Ta tá nacayati ñayivi nu á já nasacoo a ta nacasáhá jánaha nu ná. ³ Ta ndaja coo na jánaha ley Moisés xihín na fariseo ñehe na in ñañáha nasaa na nu á. Mé ñañáha cán nanditahan na ña mé hora cándúhu ña xihín in dataa, da co cúu yii ña. Ta já ñehe na ña nasacu ndichi na ña nuú na ndúu cán. ⁴ Já nacachi na já xihín Jesús:

—Candehé ndo Maestro. Nanditahan nde ñañáha yóho cándúhu ña xihín in dataa, da co cúu yii ña. ⁵ Ta nu ley najándacoo Moisés nuú nde táhnda chuun ña ná cuun

nde yuu najihí cája já. Ta mé ndó ndía cachi ndó —nācachi na.

⁶ Nācachi nā cán já xihín Jesús jáchi cuni nā coto ndojó cuití ñahá nā ta cuni nā ñehe íní nā jácojo na cuachi jatá Jesús. Tá nandihí já nasacoo Jesús já nācasáhá cáhyí a nu ñúhu cán xihín nducu ndáha á. ⁷ Ta sahá ña ndúcú ndéé nā cán ndāca tuhún ñahá nā nandaca ndichi Jesús já nācachi a já xihín nā:

—Ndá ndó, nā coo nācaja cuachi jácana jihna ñúhú ndó yuú jata ña —nācachi a xihín nā.

⁸ Já nasacoo tucu a cáhyí a nu ñúhu cán xihín nducu ndáha á. ⁹ Ta tá naxini johó tóco ndihí nā cán ña nācachi Jesús já nācasáhá nā cácahan nuu ná ta tá in tá in na nācasáhá queé na cuahan nā. Ta jihna ñúhú ga nā yatá nācasáhá queé cuahan já ndíco nā yúta chāga cuahan nā. Ta tá sa naquee ndihí na cuahan nā já nācando mé Jesús xihín ña cán. ¹⁰ Anda já nandaca ndichi a ta nandaca tuhún a ña já nācachi a já xihín ña:

—Ndáchí cuahan nā jácojo cuachi jatun.

Á coo ga nā jácojo cuachi jatun viti —nācachi Jesús xihín ña.

¹¹ Anda já nācachi ña cán já xihín Jesús:

—Mé a ndaa coo ga nā.

Anda já nācachi Jesús já:

—Ta ni yehe a chicaan i cuachi jatun. Cuánúhu vehún ta a cája gaún cuachi —nācachi a.

Jesús cúú á tátuhun ñúhu ña jándiyéhe ínimā ñayivi

¹² Já nācasáhá tucu Jesús cáhan xihín ñayivi já cáchí a já xihín nā:

—Yehe cúú u tátuhun ñúhu ña jándiyéhe ínimā ñayivi ta ndá nā cāndéé ini yehe cúú á tátuhun a cáca ga nā nuú naá. Jáchi jándiyéhe e nu ná ta cája i ña ná catacu na anda ama cáa quivi.

¹³ Anda já nācachi nā fariseo já:

—Saha mé vún cáhun ta xihín ña jan nāhún ña cúnun ndíñehe jícun mún. Ta xihín ña jan náha ña co cáhun ña ndaa —nācachi na.

¹⁴ Anda já nācachi Jesús já xihín nā:

—Tóco ndihí ña cáhan i saha mí i cúú á ña ndaa ta ín sahá vatí mí i cáhan i ña. Jáchi

xini vaha i ndá naquixi i ta xini vaha i ndá cūhun i. Joo ndóhó, co xini toho ndó ndá naquixi i ta co xini toho ndó ndá cūhun i. ¹⁵ Mé ndó cātóó ndó cāndehé ndaa ndó ñayivi tá quiahva cája ñayivi ñuyiví. Joo yehe co cája toho i já. ¹⁶ Joo tá ná caja vii i sahá ñayivi, caja i ña tá quiahva ndítahan caja i jáchi cája i ña ndaa. Ta a juú in tuhún yehe caja vii saha ná jáchi Ndióxi, tátá i, mé a nāchindahá yehe, mé á cán quea caja vii saha ná xihín mí i. ¹⁷ Nu ley mé ndó cáchí a ña tá in nuú cáhan ivi ñayivi sahá ña nayaha já náha ña cúú á ña ndaa. ¹⁸ Ta viti cuni johó ndó jáchi quiahva já yáha ri xihín yehe va. Jáchi yehe cúú in testigo ta cáhan i saha mí i. Ta inga testigo cúú Ndióxi, tátá i, mé a nāchindahá yehe —nācachi Jesús xihín nā.

¹⁹ Anda já nandaca tuhún nā Jesús já cáchí nā já xihín á:

—Ndájá ín tátún jan —nācachi na.

Anda já nācachi Jesús já:

—Tá ná cuni ndó yo cúú yehe já cuu candaa ri ini ndó yo cúú tátá i. Joo co xini ndo yo cúú yehe ta cáchí ga ví tátá i co xini ndó a —nācachi Jesús.

²⁰ Tóco ndihí ña yóho nācachi Jesús xihín ná nani jánaha ini veñuhu cáhnu yati nuú nasahin sato ndéé jiuhún jóco nā cán. Joo ni in nā coo nasahan ndéé ini tiin ñahá chicaan vecaa jáchi coo nasahan Ndióxi ñamaní sahá ña cámaní yí ndindaa hora tiin na mé á.

Cáhan Jesús xihín ñayivi ña a cúú toho cūhun nā nuú cūhun mé á

²¹ Anda já nācasáhá tucu Jesús cáchí a já xihín nā:

—Vaxi quivi quee yehe cūhun i. Ta caca nuu ndó ndinducú ndó yehe joo a ndíñehe ndó yehe jáchi cája tá cája ndó cuachi janda quiahva xinu quivi quivi ndó. Ta sahá ña cán quea a cúú cūhun ndó nuú cūhun yehe cán —nācachi Jesús.

²² Anda já nācasáhá nā Israel cán ndítuhún xihín táhan na já cáchí nā já:

—Á cahní da yóho mé dá cuni da ña cán quea cáchí da xihín yo ña a cúú toho caja í cohó nuú cūhun da —cáchí nā.

²³ Já nācachi tucu Jesús já:

—Mé ndó cúú ndó ñayivi ndúu ñuyívi yóho joo yehe cúú u da ñaquixi chí indiví. Mé ndó cúú ndó cuéntá ñuyívi yóho joo yehe co cúú toho i cuéntá ñuyívi yóho. ²⁴ Sahá ña cán quéa ñacachi i xihín ndó ña caja ndó cuachi janda quiahva xinu quívi quivi ndó. Jáchi tá co cándúsa ndó ña cúú yehe da cáchi i cúú u, da ñachindahá Ndióxi, já quéa quivi ndó sahá cuachi ndó —ñacachi Jesús.

²⁵ Anda já ñandaca tuhún na cán Jesús já ñacachi na já xihín á:

—Ta ndá da cúú yóhó, dá já —ñacachi na.

Já ñacachi Jesús já:

—Janda sahá va ñacahan i xihín ndó yo cúú yehe. ²⁶ Ta ña xini johó i cáhan mé á ñachindahá yehe, ña cán cúú ña cáhan i xihín ñayivi ñuyívi. Ta ndinuhu ña ndaa quéa cáhan mé á. Ta mé a ndaa ín cuahá ndivaha ña núu cája ndó ta cuu tavá i sahá nu ndó tá ná caja vii i saha ndo —ñacachi Jesús.

²⁷ Joo coo ñacandaa ini na ña cáhan Jesús saha Ndióxi, tátá a tá ñacachi a já xihín ná. ²⁸ Sahá ña cán quéa ñacachi tucu a já xihín ná:

—Tá ñandihí ná cata caa ndó yehe, da ñachindahá Ndióxi nduu ñayivi ndica crúxu já quéa candaá ndusa ini ndó ña yehe cúú u da cáchi i cúú u. Ta ni in tuhún ñaha co cája i cuéntá mí i. Ta ña jánaha i nu ndo cúú ña najánaha Ndióxi, tátá i nuú i. ²⁹ Ta mé á ñachindahá yehe co najándacoo ndáha toho a yehe jáchi ín tuun Ndióxi, tátá i xihín i. Ta ní tiempo ña cája i cúú ña cáji ini Ndióxi xihín —ñacachi Jesús.

³⁰ Ta chí cuahá ñayivi ñacandúsa na Jesús tá ñaxini johó na tóco ndihí ña yóho.

Na ndúu ndáha rí quini xihín na ndúu ndáha Ndióxi

³¹ Anda já ñacahan Jesús xihín java na Israel, na sa ñacandúsa ñahá cán já ñacachi a já xihín ná:

—Tá ná caja ndó tá ín ñacahan i xihín ndo já ñaha ndó ña mé a ndaa táhyí cúú ndó na cuéntá mí i. ³² Ta já candaá ini ndó ña ndaa ta ña cán caja ña ná a cácuu ga ndó tátuhun in mozo, da ndúu ndáha rí quini —ñacachi Jesús.

³³ Anda já ñacachi na cán já xihín á:

—Na ñaquixi chichi Abraham cúú nde. Ta janda ni in tuhún tañu coo ñasacuu nde mozo. Joo yóhó cáchún xihín nde ña a cácuu ga nde mozo. Ndaja cáa ña cáa ri a já —ñacachi na.

³⁴ Já ñacachi Jesús já xihín ná:

—Mé a ndaa ná cáhan i xihín ndo. Tóco ndihí na sá caja cuachi cúú tá cúú na tátuhun mozo nuú cuachi jáchi cómi a cuéntá saha ná. ³⁵ Ta da cúú mozo nuú in xitoho, coo saha dá coo nahá da xihín xitoho da jáchi vaxi quívi ndítahan quee da cuhun da. Joo da cúú jahyi mé da cúú xitoho cán ín saha dá coo nahá da xihín tátá da jáchi cúú dá da vehe tátá da. ³⁶ Ta quiahva já ín xihín yehe, da cúú jahyi Ndióxi. Cája i ña ná a cácomí ga cuachi cuéntá saha ndo ta já a cácuu ga ndó tátuhun mozo nuú cuachi cája ndó. ³⁷ Ta sa cándaa vaha ini i ña cúú ndó ñayivi ñaquixi chichi Abraham. Joo mé ndó cuni ndó cahní ndó yehe jáchi co cuni ndó ndiquehe vaha ndó tuhun cáhan i. ³⁸ Cáhan i saha tóco ndihí ña nanaha Ndióxi, tátá i nuú i. Joo ndóhó cája ndó ña cáhan tátá ndo xihín ndó —ñacachi Jesús.

³⁹ Anda já ñacachi na cán já xihín á:

—Abraham cúú tátá nde jáchi chichi da cán ñaquixi nde —ñacachi na.

Já ñacachi Jesús já xihín ná:

—Tá jivi ndusa cúú ndó na ñaquixi chichi Abraham já quéa caja ndó tá quiahva ñacaja da cán, nduu. ⁴⁰ Joo ndúcú ndó cahní ndó yehe jáchi cáhan i ña ndaa xihín ndo tá cáchi i ña najánaha Ndióxi nuú i. Mé Abraham coo ñacaja toho da já. ⁴¹ Joo cája ndó ña núu tá quiahva cája tátá ndo —ñacachi Jesús.

Já ñacachi na cán já xihín á:

—A juú jahyi ndáhvi toho ñayivi cúú ndehe. Ndióxi cúú ndusa tátá nde —ñacachi na.

⁴² Já ñacachi Jesús já:

—Tá Ndióxi ndusa ná cacuu tátá ndo ta quihvi ini va ndó yehe, nduu. Jáchi Ndióxi ñachindahá yehe vaxi i ta ín i yóho viti. Coo vaxi toho i cuéntá mí i. Ndióxi quéa ñachindahá yehe vaxi i. ⁴³ Joo co cándaa ini ndó tóco ndihí ña ndícani i nu ndo ta cúú á sahá ña co cuni ndó cuni johó ndó nu cáhan i xihín ndo. ⁴⁴ Tátá ndo cúú tiñahá

sacuaḥa ta cája ndó ña cúní rí cán jáchi ñúhu ndó ndáḥa rí. Ta rí sáhní ndíi cúu rí cán janda mé saḥa. Ta ni in túhún tañu coo ñatiin rí ña ndaa já caḥan rí ña. Jáchi cáḥan rí ña túhún cuití va ta cuéntá mé rí quíxi ndihi ña túhún. ⁴⁵ Candehé ndo. Co cúní ndó candúsa ndó yeḥe jáchi cáḥan i ña ndaa xihín ndó. ⁴⁶ Ni in túhún toho ndó a cúu nahá nuú ñayivi ña ín cuachi i. Ta tá cáḥan i ña ndaa cuití va xihín ndó ndá cuéntá quea co candúsa ndó yeḥe, dá já. ⁴⁷ Jáchi ndá na cúu ndusa cuéntá Ndióxi táa johó na ña cúu túhún Ndióxi. Joo náḥa cáxi a ña co cúu ndó cuéntá Ndióxi jáchi co cúní ndó cuni johó ndó nu cáḥan mé á xihín ndo —ñacachi Jesús.

Janda tá cámaní cacu Abraham sa ín va Jesús

⁴⁸ Anda já ñacanahá na Israel xihín Jesús já ñacachi na já:

—Mé a ndaa cúun in da Samaria ta ndácaan rí quini inún —ñacachi na.

⁴⁹ Anda já ñacachi Jesús já xihín ná:

—Coó toho rí quini ndácaan ínima yeḥe. Ña cája i quea cája cáhnu i Ndióxi, tátá i. Joo quehe núu ndivaḥa ndó yeḥe. ⁵⁰ Co cúní toho i ña ná caja cáhnu ndó yeḥe vatí mé a ndaa cúní Ndióxi ña ná caja cáhnu ndó yeḥe. Ta mé a cán quea caja víi saḥa ndo. ⁵¹ Mé a ndaa ná caḥan i xihín ndó. Ndá na ná caja ña cáḥan i yóho, na cán catacu na anda ama cáa quivi —ñacachi Jesús.

⁵² Já ñanducú ñeḥe na cán túhún nu á já ñacachi na já xihín á:

—Viti ndusa cánda ini nde ña ndácaan rí quini inún jáchi cáchún ña tá ná caja nde ña cáhún já quea catacu nde anda ama cáa quivi. Joo xini vaḥa nde ña ñaxihí tá ñaxihí Abraham, táshnu jícó nde ta jári na profeta ñasanduu sanahá ñaxihí na. ⁵³ Á cáhnu chága yóho a juú ga Abraham, da ñasacuu táshnu jícó nde, dá já. Mé Abraham ñaxihí da ta jári mé na profeta ñaxihí ri na cán va. Á cájún cuéntá ña cúun da cáhnu chága a juú ga na cán, dá já —ñacachi na xihín Jesús.

⁵⁴ Já ñacachi Jesús já xihín ná:

—Tá ná caja cáhnu i mí i, coo saḥa toho ña cája i. Joo Ndióxi, tátá i jándicáhnu a yeḥe. Ta jári mé ndó cáchí ndo ña jivi mé a cán cúu Ndióxi cája cáhnu ndó. ⁵⁵ Joo co xini

toho ndó yo cúu mé á. Yeḥe xini yo cúu mé á. Tá ná cachi i ña co xini toho i mé á, cúu u in da túhún tátuhun mé ndó. Joo mé a ndaa xini vaḥa i yo cúu Ndióxi ta cája i ña cáchí mé á. ⁵⁶ Ta mé Abraham, da ñasacuu táshnu jícó ndo ñacajii ini da jáchi ñañeḥe dá túhún ña quixi yeḥe ñuyiví yóho. Ta a juú quiahva ñacajii ini da tá ñaxini da ña yóho —ñacachi Jesús.

⁵⁷ Anda já cánahá chága na Israel xihín á já ñacachi na já xihín á:

—Ni ivi jícó uxu cuia co ndácaan yóho viti. Ta ndaja cúu cáchún ñaxinún Abraham, da cúu táshnu jícó nde —ñacachi na.

⁵⁸ Já ñanducú ñeḥe Jesús túhún nu ná já ñacachi a já xihín ná:

—Mé a ndaa ná caḥan i xihín ndo. Janda tá cámaní cacu Abraham sa ín va yeḥe jáchi cúu u Ndióxi —ñacachi Jesús.

⁵⁹ Anda já ñatiin na Israel cán yuu ña janí na jatá. Joo ñandacoo jehé Jesús já ñayaha tañu na cán ta ñaquee a veñuhu cáhnu cán cuḥan.

9

Cája Jesús ña ná ndinuna nuú in dataa ñacacu cuáa

¹ In tañu tá xica Jesús cuḥan já ñaxini a in dataa, da ñacacu cuáa. ² Anda já ñacasahá na xica tuun xihín Jesús cán ndaca túhún na mé á saḥa da cuáa cán já cáchí na já xihín á:

—Maestro, ndá cuéntá quea ñacacu cuáa da yóho. Á ñacacu cuáa da saḥa cuachi ñacaja tátá da á náná da. Á ñacacu cuáa da saḥa cuachi ñacaja mé dá —ñacachi na.

³ Já ñanducú ñeḥe Jesús túhún nu ná já ñacachi a já xihín ná:

—Coó ñacacu cuáa toho da yóho saḥa cuachi mé dá ta ni saḥa cuachi tátá da á náná da. Ñacacu cuáa da já ná nahá i nuú ñayivi ndá quiahva náhnu ñaha cúu cája Ndióxi. ⁴ Jáchi ndítahan caja i chuun, ña ñachindahá tátá i caja i nani xica nuu i ñuyiví yóho. Ta cúu á tátuhun ndiví táhyí cúu á viti joo vaxi quivi a coo ga i caja i ña yóho ta já cacuu a tátuhun ñacuaá ndivaḥa. Ta mé tiempo já ni in na a cúu caja chúun. ⁵ Nani ín tóo i ñuyiví yóho cúu á tátuhun

jándiyéhe mí i nuú na ndúu ñuyívi yóho — nācachi Jesús.

⁶ Tá nāndihi nācachi Jesús ña yóho já nāxihnu a tójií a nu ñúhu. Ta xihín tójií a cán nācavaḥa in mbohla loho ndahyi ta nāchindaa mé á ña nduchú núú da cuaá cán. ⁷ Tá nāndihi já nācachi a já xihín dá:

—Cuáhán chicoḥo naní Siloé ta cán cuchún nuún —nācachi Jesús xihín dá. Mé tuhun Siloé yóho cúní cachí a: Da nāchindahá na.

Anda já naquee mé da cuaá cán nasahan da nāchichí nuú da ta tá nāndicó coo da cán sa sándeḥé va da nācasaa da. ⁸ Ta ndaja coo java na cúú ñani táhan da xihín java na nāxini ña sáti da cán tá nāxini na ña sándeḥé tucu da já nācachi na xihín táhan na já:

—Á a juú da yóho cúú da da cuaá sácco sáti yuhú íchi —cáchi xihín táhan na.

⁹ Ta já cáchi java na já:

—Jivi da jan cúú dá.

Ta java na cáchi na:

—A juú toho da jan cúú dá vatí quiahva já cáa da —nācachi na.

Joo mé da nasahin cuaá cán cáhan da xihín ná já cáchi da já:

—Jivi yeḥe cúú da nasacuu da cuaá cán —cáchi da.

¹⁰ Anda já nācasáhá na ndáca tuhún na da já cáchi na já xihín dá:

—Ndaja nācájún nanuná nuun —cáchi na.

¹¹ Já nācachi da cán já:

—Da naní Jesús cúú da nācavaḥa in mbohla loho ndahyi. Ta nāchindaa da ña nuú i ta nācachi da xihín i ña ná cuhun i cuchú nuú i chicoḥo naní Siloé. Ta já nasahan i nāchichí nuú i cán ta xihín ña yóho nanuná nuú i. Sándeḥé e viti —nācachi da.

¹² Já nāndaca tuhún tucu na cán da já cáchi na já:

—Ta ndájá cuahan da nāndaja vaha yohó viti —nācachi na.

—Co xini toho i —nācachi da xihín ná.

Ndája ndichí na fariseo da cuaá, da nāndivaha cán

¹³ Tá nāndihi ndáca na da nasacuu da cuaá cán nasahan da nuú na fariseo ¹⁴ jáchi nasacuu a quivi ndiquehe ndée na

tá nāndaja vaha Jesús da cuaá cán xihín mbohla loho ndahyi nāchindaa a nuú da cán. ¹⁵ Já nāndaca tuhún na fariseo cán da ndá quiahva nanuná nuú dá sándeḥé da viti. Já nānducú ñeḥe da tuhun nu ná já nācachi da já xihín ná:

—Nāchindaa da ndahyi nuú i ta nāchichí nuú i ta viti tívi nuú i sándeḥé e —nācachi da xihín ná.

¹⁶ Joo java na fariseo nācachi na xihín da nasacuu da cuaá cán já:

—Da nāndaja vaha yohó coó vaxi toho da cuéntá Ndióxi jáchi co cája cáhnu da quivi ndiquehe ndée yo —nācachi na.

Joo já cáchi java na fariseo já:

—Tá da cája cuachi ná cacuu Jesús jan ta a cúu caja da ñaha xituhún nahá tátuhun ña yóho, nduu —nācachi java na.

Chí coó nacuu ndique táhan vaha tuhun na fariseo cán sahá ña cán quéa nasahnda táhan ndaja táhan mé va na. ¹⁷ Já nācasáhá ndáca tuhún tucu na da nasacuu da cuaá cán já cáchi na já xihín dá:

—Ta viti nanuná nuun nācaja da jan. Yo já cúú dá cáchún —nācachi na.

Já nānducú ñeḥe da tuhun nu ná já nācachi da já xihín ná:

—Yeḥe cáchi i ña cúú dá in profeta —nācachi da.

¹⁸ Joo coó naxeen na Israel cán candúsa na ña nasacuu da da cuaá ta ni co candúsa na ña nanuná nuú dá. Sahá ña cán quéa nasahan na nacana na tátá náná da. ¹⁹ Ta já nāndaca tuhún na tátá da xihín náná da já nācachi na já xihín ná:

—Á jahyi ndó cúú da yóho. Á mé a ndaa sa já cuaá já cáa da nacacu da. Ta ndá cuéntá quéa sa tívi nuú dá viti —nācachi na.

²⁰ Anda já nānducú ñeḥe na cán tuhun nuú na Israel cán já nācachi na já xihín ná:

—Cándaq cáxi ini nde ña jahyi nde cúú da yóho. Ta xini vaha nde ña nacacu cuaá da. ²¹ Joo co xini nde ndaja nacuu nanuná nuú dá sándeḥé da viti. Ta ni co xini nde yo cúú da nasuná nuú dá. Jan ín mé jahyi nde. Nāca tuhún ndó mé dá. Sa quiahva cuahan mé da jan xihín ndo cúú á jáchi a juú da loho ga cúú dá jan —nācachi tátá da nasacuu da cuaá cán xihín na Israel cán.

²² Naçachi na ña yóho jáchi yíhvi na ña ná a quiáhva ga na Israel cán ñamaní nu ná ndíhvi na veñuhu. Jáchi mé na Israel cán najándique táhan na tuhun na ña a quiáhva ga na ñamaní nuú ñayivi quíhvi na ini veñuhu tá ta cáhan na ña cúu Jesús da nachindahá Ndióxi cacomí cuéntá sahá ñayivi. ²³ Sahá ña cán quéa naçachi tátá náná da nasacuu da cuáá cán xihín na Israel ña ndítahan ndaça tuhún na mé dá jáchi a juú ga da loho cúu da jan.

²⁴ Tá nandihí já naçana tucu na Israel da nasacuu da cuáá cán já naçachi na já xihín dá:

—Xíní ñuhú caja cáhnún Ndióxi ta a caja cáhnún Jesús jan jáchi xíní vaha nde ña cúu dá in da caja cuachi —naçachi na.

²⁵ Anda já naçachi da cán já xihín na Israel:

—Co xíní toho i á cúu dá da caja cuachi á cúu dá da co caja cuachi. Ña xíní ndusa i quéa nasacuu u da cuáá ta jivi da jan nasuná nuú i sándehe e viti —naçachi da xihín ná.

²⁶ Anda já naçasáhá ndáça tuhún tucu na da já cáchi na já xihín dá:

—Ta ndaja naçaja da nasuná da nduchú núún. Ndía naçaja da xuhun —naçachi na xihín dá.

²⁷ Anda já naçachi da nasacuu da cuáá cán já xihín ná:

—Sa naçachi vi xihín ndo ndá quiahva naçaja da nasuná da nuú i. Joo co cúní ndó candúsa ndó yehe. Ndá cuéntá quéa ndáça tuhún tucu ndó yehe. Á cuhun ri ndóhó va caca nuu ndó xihín dá cúní ndo, vaha —naçachi da xihín ná.

²⁸ Já naçasáhá na Israel cán cáhá na xihín dá ta já naçachi na já xihín dá:

—Yóhó va cúu da xíca nuu xihín da jan. Joo ndehe jácuaha nde ley Moisés cuití va.

²⁹ Jáchi cándaã vaha ini nde ña naçahan Ndióxi xihín Moisés. Joo mé Jesús jan co cúu dá cuéntá Ndióxi ta ni co xíní nde ndájá naquixi da jan —naçachi na xihín da nasacuu da cuáá cán.

³⁰ Anda já naçachi tucu da cán já xihín ná:

—Mé a ndaa catóntó vi xihín ña yóho jáchi jivi Jesús jan nasuná da nuú i ta ndóhó ni co cándaã ini ndó ndá da cúu dá ta ni co

xíní ndo ndájá naquixi da. ³¹ Sa xíní yo ña co xíní johó Ndióxi ña xíca tahví ñayivi cája cuachi nu á. Joo xíní johó mé á nu cáhan ñayivi tá cája cáhnu na mé á ta tá cája na ña cúní a. ³² Ta viti candehe ndo. Janda saha ñuyíví a ñaha cuni johó í ña ndícuná in dataa nduchú núú in da naçacu cuáá. ³³ Ta Jesús yóho a cúu toho caja cuná a nuú i tá ta co cúu á ña naquixi cuéntá Ndióxi —naçachi da.

³⁴ Anda já nanducú ñehe na cán tuhun nu dá já naçachi na já xihín dá:

—Anda tá naçacún nachutú ndaún xihín cuachi. Ta viti chí cúní ri yóhó jánahún ndehe —naçachi na Israel cán xihín dá.

Anda já naçaxí na da veñuhu cán.

Ñayivi, na sándehe cúu ná tátuhun na co tívi nuu

³⁵ Tá nandihí já naçandaã ini Jesús ña naçaxí na da nasacuu da cuáá cán veñuhu. Ta tá nanditahan tucu Jesús da já naçachi a já xihín dá:

—Á cándéé inún da nachindahá Ndióxi nduu ñayivi —naçachi Jesús xihín dá.

³⁶ Já naçachi da já xihín á:

—Cachi ndó xihín i yo já cúu dá ña ná cuu cándéé ini i da —naçachi da.

³⁷ Anda já naçachi Jesús já xihín dá:

—Sa naçaxí vún yehe ta jivi yehe, da cáhan xuhun yóho cúu da nachindahá Ndióxi nduu ñayivi —naçachi Jesús.

³⁸ Ta tá naçachi Jesús ña yóho já naçaxítí da cán nu á caja cáhnu da a já naçachi da já xihín á:

—Mé a ndaa cándéé ini i ndóhó, xitoho i —naçachi da.

³⁹ Anda já naçachi tucu Jesús já xihín dá:

—Yehe naquixi i ñuyíví yóho já ná naça i nuú ñayivi ndá quiahva ndáa ña caja na. Jáchi ndá na cándéé ini yehe cúu ná tátuhun na sa nandiyehé nuu. Joo ndá na cáhan ña cúu ná na sa nandiyehé nuu cúu ná tátuhun na cuáá —naçachi Jesús.

⁴⁰ Ta java na fariseo, na ndíta xihín Jesús cán tá naçaxí johó na ña yóho já nandaca tuhún na mé á já cáchi na já:

—Á co cáhún ña cúu ri ndehe va na cuáá —naçachi na.

⁴¹ Anda já naçachi Jesús já xihín ná:

—Tá ná ndicuni ndó ña cúu ndó tátuhun na cuaá ta coó toho cuachi ndó, nduu. Joo tá cáhí ndó ña tívi vaha ndivaha nuu ndo ta co xíní ñúhú ndó in na jánaħa ndohó saħá ña cán queáa ín tá ín cuachi ndó —naçachi Jesús xihín ná.

10

Jesús cúu á tátuhun in da ndáa ndicachi

¹ Andá já naçachi Jesús já:

—Mé a ndaa ná caħan i xihín ndo. Tá ná quihvi in dataa ini in corra nu ñúhu ndicachi joo co cúni da quihvi da chí yéhe nu quihvi mé rí ta ña cája da queáa ndáva ndojó da corra ri já náħa xicá a ña cúu dá da cuíħná. ² Joo mé da quihvi chí yéhe cúu dá da ndáa ndicachi. ³ Ta mé da ndáa yéhe corra nu ñúhu ndicachi cán suná da yéhe ña ná ndihvi da ndáa ndicachi ta jácana da rí cán tá quivi in in rí. Ta mé ndicachi cán ndicuni rí tachí dá já quéta rí cuahān rí caca nuu rí xihín dá. ⁴ Ta tá sa naqueta ndihi rí já ndáca da ri. Ta cánuú da nu ri cuahān da já vaha cuahān rí xihín dá jáchi ndicuni vaha rí tachí dá. ⁵ Joo co ndico rí jatá ñayivi tóħo jáchi co ndicuni rí tachí ná jáchi cúu ná na tóħo. Ña cája rí queáa xínu rí nu ná —naçachi Jesús xihín na fariseo.

⁶ Ta ña yóħo naçacu in quiahva naçacu Jesús nuu na fariseo joo coo naçandaa ini na ña cúni mé á cachi a xihín ná.

⁷ Andá já naçachi tucu Jesús já xihín ná:

—Mé a ndaa ná caħan i xihín ndo. Yehe cúu u tátuhun in yéhe nu yaha ndicachi já ndihvi rí corra ri. ⁸ Tóco ndihi na naquixi tá cámaní xínu i ñuyiví yóħo najándahvi na ñayivi ta cúu ná tátuhun na cuíħná. Joo coo naçeen na cúu cuéntá mí i, na cúu tátuhun ndicachi taa joho na nu cáħan na cán. ⁹ Yehe cúu u tátuhun in yéhe ta ndá na ná quixi nuú i quiahva i ñamaní nu ná quihvi na já ná çacu ndaa ínima ná. Cúu á tátuhun núná nuú ndicachi quihvi rí ini corra ri ta núná nuú rí queta tucu rí jáchi ín yucu cuí nu ri xixáħan rí.

¹⁰ Jáchi da cúu da cuíħná cán cája cuíħná da ri ta sáħní da ri ta jándihi da saħa ri. Joo yehe naquixi i ñuyiví yóħo já ná cuu catacu vaha ñayivi ta já ná cuu coo vaha na anda ama cáa quivi. ¹¹ Yehe cúu u tátuhun in da

ndáa vaha ndicachi. Jáchi da cán co yíħví da quivi da saħá ndicachi jana dá. ¹² Joo da quehe yahvi saħá ña ndáa da ndicachi, ndáa da ri saħa yahvi quehe da cán cuití va. Saħá ña cán queáa tá xíní da vaxi ndivahyí quehe rí in ndicachi, ña cája da queáa xínu da cuahān da ta jándacoo da ndicachi ndáħví cán. Jáchi co cúu dá da ndáa vaha rí ta ni jana dá co cúu ndicachi cán. Ta co sáħní da mé dá tá ná xínu coo ndivahyí ña ná tiin rí ndicachi cán cata nuu ñahá ri. ¹³ Da quehe yahvi cán jándacoo da ri jáchi co cúu rí jana mé dá ta co sáħní da mé dá cúu ndicachi.

¹⁴ Joo yehe cúu u tátuhun in da ndáa vaha ndicachi. Tá quiahva xíní vaha da cán ndá rí cúu ndicachi jana dá quiahva já xíní vaha i ndá na cúu cuéntá mí i. Ta jári xíní vaha mé ná yehe. ¹⁵ Tá quiahva xíní vaha Ndióxi, tátá i yehe ta xíní vaha i mé á quiahva já xíní vaha i na cúu cuéntá mí i. Ta saħá ña yóħo ín tiahva i ndiquiahva i mí i quivi i saħa ná jáchi cúu ná tátuhun ndicachi janá i. ¹⁶ Joo ndúu java ga ñayivi inga ñuu ta cacuu na cuéntá mí i. Xíní ñúhú ndiquehe e na cán ña ná cuni joho na nu cáħan i. Ta in nduu ndihi na ña ná candaa i tóco ndihi na.

¹⁷ Quihvi ini Ndióxi, tátá i yehe jáchi ndiquiahva i mí i quivi i saħa na cúu cuéntá mí i ta tá nandihí nditacu tucu u. ¹⁸ Ta ni in na a cúu cahní yehe ndaja naçacu joo ndiquiahva i mí i quivi i jáchi cúni caja i ña. Núná nuú i ndiquiahva i mí i quivi i ta núná nuú i nditacu tucu u. Ña yóħo cúu chuun naçahnda tátá i nuú i caja i —naçachi Jesús.

¹⁹ Tá naçini joho na Israel cán ña yóħo já naçasáħá na sáħndá táħan tucu na. ²⁰ Ta cuahā táħan na cán naçasáħá cáhí na já:

—Ndá cuéntá queáa táa joho ndó nu cáħan da jan ta da naçataçhi va cúu dá. Tiñáhá va ndácaħan ini da —cáhí xihín táħan na.

²¹ Joo java na cáħan vaha na saħá Jesús já cáhí na já:

—Ni in toho ñayivi a cúu caħan vaha nahá tátuhun cáħan Jesús yóħo tá ndácaħan tiñáhá ini ínima ná. Jáchi ama ná cuu caja ri tiñáhá jándiyehé rí nuú na cuaá —cáhí java na cán.

Cándají na Israel Jesús

²² Naxinu coo quivi cája na víco nu cuía ñuu Jerusalén tá cája cáhnu na quivi naxinu veñuhu cáhnu ñuu Jerusalén. Ta mé tiempo vixi nasacuu a cán. ²³ Ta jivi ini mé veñuhu cáhnu cán nasahin Jesús ta xíca nuu a yati yuyéhe naní Salomón. ²⁴ Já nacava tiyivi na Israel cán mé á já nacasáhá ndáca tuhún na mé á já nacachi na já xihin á:

—Ndaja cáa chí quivi caxi tuhun ndaun xihin nde ña á jivi ndusa cúun Cristo, da chindahá Ndióxi cacomí cuénta sahá ñayivi. Jáchi in ivi johó cáhun xíní nde ta co cándaa vaha ini nde á jivún á a juú tohún — nacachi na cán.

²⁵ Anda já nanducú ñehe Jesús tuhun nu ná já nacachi a já:

—Sa nacahan vi xihin ndó joo coo nacandúsa ndó yehe. Tóco ndihi ña náhnu cája i, cája i ña xihin ndéé sahan tátá i nuú i ta jivi mé ña náhnu jan náha nu ndó ña cúu u da nachindahá Ndióxi. ²⁶ Joo ndóhó co cándúsa ndó yehe jáchi coo cúu ndó tátuhun ndicachi janá i. ²⁷ Joo ñayivi, na cúu tátuhun ndicachi janá i, na cán cúu na ndícuni nu cáhan i ta ndícuni i na ña cúu ná cuénta mí i ta já ndíco na yehe. ²⁸ Ta caja i ña ná catacu na anda ama cáa quivi já ná a ndíhi saha ná. Ta ni in túhún ñayivi a cúu caja candaa na cán ndahá i tá sa ñúhu na ndahá i. ²⁹ Ndióxi, tátá i nasahan na cán nuú i ta mé á quea cáhnu chága nu tóco ndihi ñaha. Ta ni in na a cúu caja candaa na cán ndaha mé á. ³⁰ Yehe xihin Ndióxi, tátá i in cúu va nde —nacachi Jesús.

³¹ Anda já natiiñ tucu na Israel cán yuu cuun na Jesús ña cahní ñahá na. ³² Anda já nacachi Jesús já xihin ná:

—Cuahá ndivaha ña náhnu nacaja i nu ndó, ña nasahan tátá i ñamaní nuú i caja i nu ndo yóho ta viti cachi ndó xihin i ndá quea co táhan ini ndó xihin. Ndá cuénta quea vaxi ndó cuun ndó yuú yehe —nacachi Jesús.

³³ Anda já nacachi na cán já xihin á:

—Co nducú toho nde cuun nde yuu yohó sahá ña náhnu cájún. Cuun nde yuu yohó cúni nde jáchi ndája núun Ndióxi. Jáchi cúun in ta tátuhun ndehe ta ndájún mún cúun Ndióxi —nacachi na cán.

³⁴ Anda já nacachi Jesús já xihin ná:

—Nu ley najándacoo Moisés nu ndo cáhí a ña cúu ñayivi tátuhun Ndióxi sahá ña cúu ná jahyi mé á. ³⁵ Ta sa cándaa vaha ini ña a cuú tahnú ña cáhan tuhun Ndióxi. Ta nacachi Ndióxi xihin na nandiquehe tuhun mé á ña cúu ná tátuhun Ndióxi. ³⁶ Sahá ña cán quea ndá cuénta quea cáhí ndo ña nandaja núu i Ndióxi sahá ña cáhí i cúu u in túhún jiní já jahyi Ndióxi. Jáchi mé Ndióxi nacaxi a yehe ta nachindahá a yehe vaxi i ñuyiví yóho. ³⁷ Sahá ña cán quea co ndítahan candúsa ndó yehe tá ta co cája i ña náhnu tátuhun ña cája Ndióxi, tátá i. ³⁸ Joo tá cája i ña já quea xíní ñúhú candúsa ndó ña náhnu xíní ndo cája i vatí coo cúni ndó candúsa ndó yehe. Ta xihin ña yóho cuu candúsa ndó ña in cúu Ndióxi, tátá i xihin i ta in cúu yehe xihin mé á —nacachi Jesús.

³⁹ Anda já nducú tucu na tiin na a chicaan na a vecaa joo nachijehé a nu ná cuahan.

⁴⁰ Ta já naquee tucu a cuahan chí inga xoo yuta Jordán nuú nacaja ndúta Juan ñayivi nu cuítí cán. Ta nacandoo Jesús nasahin a cán. ⁴¹ Ta cuahá ñayivi nacasáhá na xínu na nu á ta já cáhí xihin táhan na já:

—Mé a ndaa coo toho ñaha xitúhún nacaja Juan. Joo tóco ndihi ña nacachi da cán saha Jesús yóho cúu á ña ndaa —nacachi xihin táhan na cán.

⁴² Ta cuaha ná nacandúsa na Jesús mé nuú nasahin a cán.

11

Tá najánditacu Jesús Lázaró

¹ Ta ndaja coo naquehe cuehe in da naní Lázaró, da ñuu Betania. Ta jivi mé ñuu yóho cúu ri ñuu María xihin Marta, quihvi ña. ² Mé María, ña cúu quiahva Lázaró yóho cúu ña ña naxojo perfume jatá sahá Jesús ta najándihichi ña do xihin ijí jiní ña. ³ Ta mé ña xihin quihvi ña nachindahá na chuun cuahan nuú Jesús ña cacáhví ndivaha Lázaró, da quihvi ini mé á.

⁴ Ta tá ñañehe Jesús tuhun yóho já nacachi a já:

—A juú cuehe cahní ñahá cúu toho ña yóho. Joo xihin cuehe yóho cuu nahá ndá quiahva cáhnu cúu Ndióxi. Ta xihin ña yóho nahá nuú ñayivi ndá quiahva cáhnu cúu

yehe, da cúu in túhún jini já jahyi Ndióxi — nācachi a.

⁵ Ta ndaja coo quíhvi ndivaha ini Jesús Marta xihín quíhvi ña ta quiahva já quíhvi ri ini a Lázaro viti. ⁶ Joo tá ñañehe Jesús tuhun ña quíhvi Lázaro já ñacandoo a ivi quívi chága mé nuú ñasahin a cán. ⁷ Ta tá ñandihí já ñacachi Jesús já xihín ña xíca tuun xihín á:

—Xihín ndo ná cohō tucú chí Judea — ñacachi a.

⁸ Anda já ñacachi ña cán já xihín á:

—Maestro, viti chá va ndúcú ñayivi ndúu cán cahní ña ndohó xihín yuu ta cáa tucu ri ndó cūhun ndo cúni ndo — ñacachi na.

⁹ Joo sá xini Jesús ña cámaní xinu quívi quívi a sahá ña cán queá ñacachi a já xihín ná:

—Candehé ndó. Uxu ivi hora ndáca in quívi ta tá xíca nuu ña ndiví a cúu toho cachihin saha ná jáchi tívi xíca yéhe nu xíca na. ¹⁰ Joo ndá ña xíca nuu ñuú cuu cachihin saha ná jáchi cō yéhe nu xíca na — ñacachi Jesús.

¹¹ Tá ñandihí já ñacachi tucu a já xihín ná:

—Sa ñaquiji va amigo yō Lázaro viti. Joo vílaá cūhun i ndiñehe e da — ñacachi Jesús.

¹² Anda já ñacachi ña cán já xihín á:

—Maestro, tá ta ñanaá ini da ñaquiji dá já queá ín vaha da, dá já — ñacachi ña cán.

¹³ Joo ña cúni cachi Jesús queá sá ñaxihí va Lázaro vatí ña xíca tuun xihín a cán ñacahan ña ña cúni mé á cachi a queá ñaquiji Lázaro cán tá quiahva quívi tóco ndihí ñayivi. ¹⁴ Anda já ñacahan cáxi táhyi tucu Jesús xihín ná já ñacachi a já:

—Ñaxihí va Lázaro. ¹⁵ Joo cájii va ini i ña coó i ná sahin i tá ñaxihí da jáchi ña yóho chindeé a ndohó já ná candúsa chága ndó yehe. Cōhō candehé yō Lázaro — ñacachi Jesús.

¹⁶ Anda já ñacasáhá Tomás, da cáhan ña cuatí xihín cán cáhan da xihín java ga ña xíca tuun xihín Jesús já cáchi da já:

—Cōhō ri mí ví quívi xihín mé dá, dá já — cáchi da.

Já ñaquee na cuahan ña.

Cúu cája Jesús ña ná nditacu tucu ña sá ñaxihí

¹⁷ Tá ñaxinu coo Jesús yati ñuu Betania cán já ñañehe á tuhun ña sá ñaxihí Lázaro ta sá ín comí quívi ñachicañ va na da ini in cáva. ¹⁸ Mé ñuu Betania cán ñehe táhan yati a xihín Jerusalén tátuhun uní kilometro ñehe táhan. ¹⁹ Ta cuaha táhan ña Israel cán ñasahan ña ndúu tóo na xihín Marta xihín María tá quiahva jáyaha na ini na sahá ña ñaxihí Lázaro quiahva na. ²⁰ Ta tá ñañehe Marta tuhun ña cáyati Jesús ñuu cán cuahan já ndáva ña ñasahan ñehe ñahá ña. Joo ñacandoo María vehe. ²¹ Tá ñandique táhan Marta xihín Jesús já ñacachi ña já xihín á:

—Xitoho, tá ná coo ndó yóho ta ni a quívi toho Lázaro quiahva i, nduu. ²² Joo cándaá vaha ini i ña tá ná caça ndó ña cúni mé ndó nu Ndióxi quiahva va mé a cán ña nu ndo — ñacachi Marta.

²³ Anda já ñacachi Jesús já xihín ña:

—Candehé Marta. A ndícani inún jáchi nditacu tucu va Lázaro, quiahvún ñan — ñacachi Jesús.

²⁴ Anda já ñacachi ña já xihín á:

—Sa xini vi ña nditacu tucu quiahva i tá ná xinu coo quívi nu ndihí tá ná nditacu tóco ndihí ña sá ñaxihí — ñacachi Marta.

²⁵ Já ñacachi Jesús já xihín ña:

—Yehe cúu da cuu caja ña ná nditacu tucu ndii ta cuu caja i ña ná catacu ñayivi anda ama cáa quívi. Ta ndá ña candeé ini yehe vatí ná quívi na catacu tá catacu na. ²⁶ Ta tóco ndihí ña candeé ini yehe catacu na anda ama cáa quívi ta a ndihí toho saha ná ini indayá. Á cándúsún ña cáhan i xuhun — ñacachi Jesús.

²⁷ Anda já ñacachi Marta já xihín á:

—Cándúsa i ndohó ña cúu ndó in túhún jini já jahyi Ndióxi ta cándúsa i ña mé ndó cúu Cristo, da ñachindahá Ndióxi quixi ñuyiví yóho — ñacachi ña xihín á.

Sácu Jesús saha Lázaro

²⁸ Tá ñandihí já ñaquee Marta ñasahan ña cana ña María quíhvi ña. Ta já ñacahan yaá ña xihín María já ñacachi ña já xihín ña:

—Sa ñaxinu coo Jesús, xitoho í ta ín a yóho. Cuahán nu ín a jáchi cána yohó — ñacachi Marta xihín quíhvi ña.

²⁹ Tá ñaxini joho María cán ña ñacachi quíhvi ña xihín ña chí ivi laá ndáva ña

nasahan ña nu in Jesús. ³⁰ Mé Jesús nasandati a cán yuhú ñuu, mé nuú nandique táhan xihin Marta cán. ³¹ Ta ndaja coo mé na Israel, na ndúu jáyaha ini ñá cán tá naxini na naquee númi joho ñá cuahan ña já nandicuita na ndico na jata ñá cuahan na. Jáchi nacañan na cuahan ñá cuacu ñá nu ndacañan Lázaro, quiahva ñá. ³² Ta tá naxinu coo ñá nu in Jesús já nacaxítí ña nu á já nacasáhá cáchí ña já xihin á:

—Tá ná coo ndó yóho, nduu ta ni a quíví toho Lázaro quiahva i —nacachi ñá.

³³ Ta tá naxini Jesús ña sácu cóhó María xihin na Israel, na ndico nasaa xihin ñá cán já natahvi ndivaha ini a janda quiahva nandisaa ini a. ³⁴ Anda já nandaca tuhún a María cán já nacachi a já xihin ña:

—Ndájá nachicañan ndó da já —nacachi Jesús.

—Naha quíí ndó, xitoho i. Candehé ndo nuú nachicañan nde da —nacachi María.

³⁵ Anda já nasacu Jesús. ³⁶ Tá naxini na Israel ña yóho já nacasáhá cáchí xihin táhan na já:

—Candehé ndo ndaja náha naquihvi ini Jesús yóho Lázaro —nacachi na.

³⁷ Ta java na nacasáhá cáchí na já:

—Mé Jesús yóho nasuná da nduchú núu na cuaá. Á chí a cuú cuití caja da chindeé da Lázaro já ná a quíví da, nduu —nacachi java na cán.

Jánditacu tucu Jesús Lázaro

³⁸ Tá nandihí já nacasáhá táhvi ndivaha tucu ini Jesús ta já nacayati a nuú nachicañan na yiquí cuñu Lázaro. Mé nuú ndacañan da cán nasacuu a in ndica cáva ta in yuu jáhnda cáhnu nasaji nuu yéhe cán. ³⁹ Anda já nandicañan Jesús xihin java na ndúu cán ña ná jácaxoo na yuu ndájí nuu nu ndacañan Lázaro cán. Joo ndaja coo Marta, ña cúu quiahva mé ndji cán nacasáhá ña cáchí ña já xihin Jesús:

—Candehé ndo, xitoho i. Sa quini cúu sahan ndii quiahva i jan jáchi sa in comí quíví naxihí da —nacachi ñá.

⁴⁰ Anda já nacachi Jesús já xihin ñá:

—Xíní ñuhú ndicuhun inún tá nacachi i xuhun ña tá ná candúsún Ndióxi já cunún

ndá quiahva cáhnu ñaha cuu caja mé á —nacachi Jesús.

⁴¹ Tá nandihí já najácaxoo na yuu cáhnu ña nasaji nuu nuú nasandacañan Lázaro. Já nandiñehe Jesús nuu á chí indiví já nacachi a já:

—Tátá Ndióxi, ndiquiahva i ndixahvi nu ndo jáchi naxini joho ndó nuú nacañan i xihin ndo. ⁴² Vatí mé a ndaa cándaq vaha ini i ña níí tiempo xini joho ndó nu cáhan i xihin ndo. Joo cáhan i ña yóho sahá ña ná cuni joho ñayivi ndúu xihin i yóho já ná candúsa na ña mé ndó nachindahá ndó yehe vaxi i ñuyíví yóho —nacachi Jesús ndiquiahva ndixahvi nu Ndióxi.

⁴³ Tá nandihí já nacayuhú cóhó a já nacachi a já:

—Lázaro, cuahán queta.

⁴⁴ Tá nandihí já naqueta Lázaro nuú nasandacañan da. Nacava nuu ndáha dá anda saha dá xihin ticoto ta ndáji jáhma nuu dá naqueta da vaxi da. Anda já nacachi Jesús xihin java na ndúu cán ña ná ndaxí na da já ná quee da cuhun da. Ta já nacaja na.

Jándique táhan na Israel tuhun na ña tiin na Jesús chícqañ na vecqa

(Mt. 26:1-5; Mr. 14:1-2; Lc. 22:1-2)

⁴⁵ Ta cuaha táhan na Israel, na ndaca táhan nasahan xihin María cán tá naxini na ña najánditacu tucu Jesús Lázaro cán já nacandúsa na mé á. ⁴⁶ Joo java táhan na Israel cán ndáva na nasahan na cáhan na xihin na fariseo ta nandicaní na nu ná ña nacaja Jesús. ⁴⁷ Anda já nacasáhá na fariseo xihin na sacuañ nuú jutu cán najátaca na tóco ndihí na sacuañ nuú na Israel já nacachi na já xihin ná:

—Ndía caja í xihin Jesús viti jáchi cuahá ndivaha ñaha xituhún cája da yóho. ⁴⁸ Xíní ñuhú caji nuu í nu dá jáchi tá ná a cájí nuu í nu dá vaxi quíví tá tóco ndihí ñayivi candeeé ini na mé dá. Ta xihin ña yóho xinu ini na jutixia ñuu Roma quixi na jándicani na veñuhu í ta jándihí na saha tóco ndihí mí, na Israel —nacachi na.

⁴⁹ Joo in táhan da ndúu cán naní da Caifás, da nasacuu da sacuañ chága nu ndíhi jutu mé cuía cán, nandicañan da já nacachi da já:

—Mé ndó cúú ndó ñayivi co xíní túni.
⁵⁰ Jáchí co cándaá ini ndó ña vaha chága ña ná quivi in ta nū ndíhi ñayivi já ná a ndíhi saha tóco ndihi ñayivi. Ña cán queá cáhán i ña vaha chága ná quivi Jesús jan já ná a ndíhi saha mí —ñacachi Caifás.

⁵¹ Joo coó ñacahan Caifás ña yóho sahá ña ñaquixi a jiní mé dá. Ndióxi queá najácahan ínima dá ña cáchi da já jáchí mé tiempo já ñasacuu da sacuaḥa chága nū ndíhi jutū ta najácahan Ndióxi ínima dá ña ná cachi da ña ndítahan quivi Jesús sahá na Israel. ⁵² Ta a juú sahá in túhún na Israel cuití va vaha jáchí mé Jesús ñandítahan quivi a saha tóco ndihi na cúú cuéntá Ndióxi, na ndícuíta nuu ndúu ndijáá ñuyiví já ná cuu coo in ñuu. ⁵³ Chí janda mé quivi já ñasacu ini na Israel cán cahní na Jesús.

⁵⁴ Sahá ña cán queá coó ñaxica nuu tívi ga Jesús tañu na Israel cán. Ña ñacaja mé á queá ñaquee a estado Judea cán já ñasahan chí in ñuu naní Efraín, ña ín yati xoo yucú íchí nuú coó ñayivi. Cán ñasahjin a xihín na xica tuun xihín á.

⁵⁵ Tá ñacayati quiví coo vicó pascua cája na Israel já ñaquee cuahá ñayivi ndúu ndijáá ñuu cán cuahan na chí Jerusalén jáchí cúni na ndaja vií na mé ná, ná coo tiahva na tá quiahva ñasahnda ley Moisés nū ná caja na tá camañi chá quiví coo vicó pascua. ⁵⁶ Tá ñataca ñayivi ñuu Jerusalén cán ñacasahá ndúcú na Jesús. Joo nani ñúhu na veñuhu cáhnu cán ndáca tuhún táhan na sahá Jesús já cáchi xihín táhan na já:

—Ndaja xíní ndo á quixi Jesús á a quíxi toho a vicó pascua yóho —ñacachi xihín táhan na cán.

⁵⁷ Ta na fariseo xihín na sacuaḥa nuú jutū ñasahnda na chuun ña ndá na ná cuni Jesús já ná cuhun na caxi tuhun na xihín na cán ndájá ín a jáchí cúni na tiin na a chicaan na a vecaa.

12

Tá ñachojó in ñañáḥa perfume sahá Jesús (Mt. 26:6-13; Mr. 14:3-9)

¹ Ta tá camañi iñu quiví coo vicó pascua já ñaquee Jesús ñasahan ñuu Betania, mé ñuu nū ín Lázaro, da najánditacu tucu mé á cán. ² Ta cán ñacaja ndíví na ña cajíni Jesús

jáchí cúni na caja cáhnu na mé á. Ta mé Marta cúú ña cája ndíví nū ná. Ta Lázaro cúú in táhan da ín coo nū mesa xíxi xihín Jesús. ³ Ta ndaja coo María ñasahan ña quehe ña tátuhun java litro perfume, dó yahvi ndivaha. Jáchí cúú dó dó ñacavaha xihín ndinuhu yucu támi sahan naní nardo. Najácuyu ña do jata saha Jesús. Ta tá ñandíhi já najáhichí ña sahá xihín ijí jiní ña. Ta ní ini vehe cán ñandícuíta nuu jíco perfume cán. ⁴ Anda já ñaxini in táhan da xica tuun xihín Jesús, da naní Judas Iscariote cán ña yóho. Mé Judas yóho cúú dá da jíco tuhún Jesús tá nū ndíhi ta já cáchi da já:

⁵ —Ndá cuéntá queá coó ñacayahvi perfume yóho já ná cana jjuhún jasá yó nuú na ndahví, nduu. Jáchí quiahva na uní ciento denario saha dó, nduu —ñacachi Judas cán. Ta in denario cúú ña quehe ñayivi cája chúun na in quivi.

⁶ Joo coó ñacachi Judas ña yóho sahá ña quíhvi ini ndusa da na ndahví, vaha. Ñacachi da já jáchí cúú dá da cuíhná ta ndáḥa mé dá ñúhu ndihi jjuhún ta cája cuíhná da ña tá cúni da. ⁷ Anda já ñacachi Jesús já xihín dá:

—A cáhun xihín ña jáchí ñasacu vaha ña do ña ná chojó ña do yiquí cuñu i. Jáchí sa xíní ña ña sa ñacayati quiví quivi i. ⁸ Ta ní tiempo canduu na ndahví jan tañu ndó ta ndá tañu cúni mé ndó cuu chindeé ndó na. Joo yeḥe a coo tuun toho i xihín ndo —ñacachi Jesús.

Sácú ini na sacuaḥa nuú jutū cahní na Lázaro

⁹ Cuahá na Israel cán ñañeḥe ná tuhun ña ín Jesús ñuu Betania. Sahá ña cán queá ñasahan na cán jáchí cúni na cuni na Jesús ta cúni na cuni na Lázaro, mé da najánditacu tucu Jesús. ¹⁰ Anda já ñasacu ini na sacuaḥa nuú jutū cán cahní ri na Lázaro viti. ¹¹ Jáchí saḥa Lázaro cán cuahá na Israel ñacasahá na cándeé ini na Jesús. Ta najándacoo na ndíco na jatá na sacuaḥa nuú na Israel.

Tá ñaquihvi Jesús ñuu Jerusalén

(Mt. 21:1-11; Mr. 11:1-11; Lc. 19:28-40)

¹² Ta inga quiví itaan cuahá ndivaha ñayivi ñaxinu coo na ñuu Jerusalén nuú coo vicó pascua. Ta tá ñacandaá ini na ña xínu

coo Jesús ñuu Jerusalén cán ¹³ já nasahan na nasahnda na ndáha tó ñuu já ndáva na nasahan na ñañehe ñahá na. Ta cáyuhú na já cáhí na já:

—Cája cáhnu í Ndióxi. Cáhnu nahá ná cacuu da cómí cuéntá sahá na Israel jáchi cúu dá da vaxi yuhú nuu Ndióxi —cáhí na.

¹⁴ Nanditahan Jesús in búrru ta nasanúu a ri tá quiahva ñacachi tuhun Ndióxi sanahá tá cáhí a já:

¹⁵ A cáyhívi toho ndó, na ndúu ñuu Sión.

Candehé ndó da cómí cuéntá sahá ndó jan, cánúu da jatá búrru loho vaxi da, cáhí tuhun Ndióxi.

¹⁶ Ta coo ñacandaa ini na xíca tuun xihín Jesús cán ndá cuéntá queá cája ñayivi já xihín á. Joo chága chí nuu tá sa nandindita Jesús cuahan indivi já ñacandaa ini na ña quiahva já ndáa nuu tuhun Ndióxi sanahá ña caja na xihín Jesús.

¹⁷ Mé ñayivi, na nasanduu xihín Jesús tá ñacahan xihín Lázaro ña ná queta da nuu nanduxu da ña nditacu da, mé na cán nandicani na nuu java ga ñayivi ña ñaxini na ñacaja Jesús cán. ¹⁸ Sahá ña cán queá ñaqueta ñayivi nasahan na ñehe ná Jesús jáchi ñañehe ná tuhun sahá ña cáhnu ñacaja mé a cán. ¹⁹ Tá ñaxini na fariseo ña yóho já ñacasáhá cáhí xihín táhan na já:

—Candehé ndo. Ndá cuu caja í quee vahá í xihín da jan. Jáchi tóco ndihi ñayivi cáti na cuahan na xihín da jan —ñacachi xihín táhan na fariseo cán.

Java na griego ndínducú na Jesús

²⁰ Tañu ñayivi cuaha ñaxinu coo cája cáhnu Ndióxi víco ñuu Jerusalén cán ñaxinu coo ri java na ñaquixi chí ñundáhyi cuéntá Grecia. ²¹ Ta mé na griego yóho ñacayati na nu Felipe, da ñuu Betsaida cuéntá Galilea cán. Ta já ñacasáhá na cáhan ndahví na xihín dá já ñacachi na já xihín dá:

—Cahan nde xihín Jesús cúni nde —ñacachi na.

²² Anda já ñaquee Felipe nasahan da caxi tuhun da xihín Andrés ta já ndáca táhan ndívi da nasahan da ndícani da ña nuu Jesús. ²³ Anda já ñacachi Jesús já xihín dá:

—Sa ñaxinu coo va tiempo caja cáhnu Ndióxi yehe, da ñachindahá mé á nduu ñayivi. ²⁴ Mé a ndaa ná cahan í xihín ndo.

Tá quiahva ndihi saha in ndiquí trigo tá ndícava ña ini ñundáhyi quiahva já ndítahan nuu í quivi í. Jáchi tá ná a ndíhi saha ndiquí trigo cán já in já cacuu va ña. Joo tá ná ndihi sahá ña cán já nduta ña ta já ndicuahá ndivaha ña. ²⁵ Ndá na cátóo chága cája ña cúni mé cuití na a juú ga ña cúni Ndióxi, na cán cúu na ndihi saha. Joo na cája ña cúni Ndióxi, na cán cúu na catacu anda ama cúa quivi. ²⁶ Ta ndá na cúni caja chúun cuéntá mí í ndítahan nu ná candico na yehe. Jáchi nuu coo yehe, cán coo ri na cája ña cúni yehe. Ta na cán cacuu na na ndíñehe jícó Ndióxi.

Cáxi tuhun Jesús ña quivi a

²⁷ Ta viti ñuhú cácuéha ndivaha ini í. Ta a cuú caca tahví í nu Ndióxi ña ná a quiahva mé á ñamaní ndoho ini í jáchi sahá chuun yóho ñaquixi í ñuyíví yóho. ²⁸ Ña ndítahan cachi í queá: “Tátá Ndióxi, cáhnu ná cacuu mé ndó” —ñacachi Jesús.

Tá ñacachi Jesús ña yóho, ñacahan Ndióxi indivi já ñacachi a já:

—Sa ñandaja cáhnu í mí í ta caja tucu u ña —ñacachi a.

²⁹ Ta ñayivi ndúu cán tá ñaxini johu na ña yóho já ñacachi na ña javi va cána. Ta java na ñacachi na tátó Ndióxi queá ñacahan.

³⁰ Anda já nandicahan Jesús xihín ná já ñacachi a já:

—A juú sahá yehe ñaxini johu ndó ña yóho. Joo ñacatácu a já ná cuni johu mé ndó. ³¹ Ta sa ñatandaa quivi cavií sahá ñayivi ndúu ñuyíví ta sa ñatandaa quivi ndihi sahá ña cája tiñáhá sacuahá, mé rí sáhndá chuun ñuyíví yóho. ³² Jáchi tá ná cata caa na yehe já caja í ña ná casáhá ñayivi níi cúu ñuyíví candee ini na yehe —ñacachi Jesús.

³³ Xihín ña yóho cúni mé á ndicani a nu ná ña quivi a ndica crúxu. ³⁴ Anda já ñacachi ñayivi ndúu cán já xihín á:

—Tá cáhvi nde ley Moisés ñacahyi sanahá já cándaa ini nde ña anda ama cúa quivi catacu da chindahá Ndióxi cacomí cuéntá sahá ñayivi. Yo já cúu da cáhun saha. Tá ta mé a ndaa cúun da ñachindahá Ndióxi nduu ñayivi, da catacu anda ama cúa quivi ndá cuéntá queá cáhún quivún —ñacachi na xihín Jesús.

³⁵ Já nacachi Jesús já xihin ná:

—Yehe cúu da jándiyehé ínimá ñayivi ta coo tóo loho chága i xihin ndo. Sahá ña cán quéa xíní ñúhú caca nuu ndó nani jándiyehé íchi cuhun ndo ta viti núná nu ndó caja ndó ña. Jáchi vaxi quiví quivi i caja na ta anda já cacuu a tátuhun canaá yávi ta já a cándaá ini ndó ndá xoo cuhun ndo. ³⁶ Xíní ñúhú candeé ini ndó yehe jáchi cúu u da jándiyehé nu ndó nani íin i xihin ndó. Anda jávi xinu coo ndó cacuu ndó ñayivi cuéntá mí i —nacachi Jesús.

Tá nandihí já naquee Jesús cuahan chíjehé a nu ná.

Có cándusa na Israel Jesús

³⁷ Vatí nacaja Jesús cuahá ña xitúhún nuú ñayivi cán joo coo naxeen na candúsa na mé á. ³⁸ Já nasahíin jáchi nanditahan xinu coo nuú tuhun ña nacahyí Isaías sanahá cán tá nacachi a já:

Tátá Ndióxi, có cúní na candúsa na tuhun ña cáhan i xihin ná.

Vatí xíní na ña náhnu cája mé ndó joo có cúní na candúsa na ndohó, já nacahyí Isaías sanahá.

³⁹ Sahá ña cán quéa coo nacuu candúsa ñahá ñayivi cán. Ta inga tucu tuhun nacahyí Isaías quéa cáchi já:

⁴⁰ Mé Ndióxi quéa najácuáá ñahá ta cóo nasuná a ínimá ná, já ná a cúu cándaá ini na yo cúu mé á, já ná a cúu ndicó coo na nu mé á ña ná ndaja vaha mé á na, nacahyí Isaías.

⁴¹ Quiahva já nacahan Isaías jáchi naxini mé dá ndá quiahva cáhnu cúu Jesús.

⁴² Ta cuahá táhan na Israel cán nacandéé ini na Jesús. Ta janda java na sacuahá nuú na Israel cán nacandéé ini na Jesús. Joo coo naxeen na nahá tuhun na sahá jáchi nayihví na taxí na fariseo cán na veñuhu. ⁴³ Jáchi cúní na candoo vaha chága na nuú ñayivi a juú ga nu Ndióxi.

Táhvi ini ñayivi sahá cuachi na tá xíní johó na nu cáhan Jesús

⁴⁴ Tá nandihí já nacahan cóhó Jesús já nacachi a já:

—Ndá na candeé ini yehe já quéa a juú in túhún yehe candeé ini na, vaha. Jáchi candeé ini ri na Ndióxi, tátá i, mé a nachindahá yehe vaxi i ñuyiví yóho.

⁴⁵ Ta ndá na xíní yehe xíní ri na mé a nachindahá yehe vaxi i ñuyiví. ⁴⁶ Yehe naquixi i ñuyiví yóho ña ná jándiyehé ínimá ñayivi já quéa ndá na ná candeé ini yehe, a cánduu ga na nuú naá. ⁴⁷ Joo na xíní johó nu cáhan i ta có cája na ña, a juú toho yehe chícáan cuachi jata ná. Joo tuhun cáhan i quéa chícáan cuachi jata ná. Jáchi coo vaxi i ñuyiví yóho chícáan i cuachi jata ñayivi. Naquixi i já ná cuu cacu ndaa ínimá ná. ⁴⁸ Ndá na cándají yehe ta có cúní na caja na ña cáchi i xihin ná, na cán cúu na cuhun indayá jáchi mé tuhun nacahan i cacuu a ña chícáan cuachi jata ná tá ná xinu coo mé quiví nu ndihí cuí. ⁴⁹ Jáchi có jánaha i ña quixi jini mé cuití i. Tóco ndihí ña cáhan i ta tóco ndihí ña jánaha i nuú ñayivi cúu á ña nachindahá Ndióxi, tátá i yehe jánaha i nu ná. ⁵⁰ Ta cándaá cáxi ini i ña tóco ndihí ña jánaha Ndióxi, tátá i caja ña ná cuhun na coo na indiví anda ama cáa quiví. Ta tóco ndihí ña cáhan i xihín ñayivi, cáhan i ña tá quiahva nasahnda Ndióxi, tátá i nuú i caja i —nacachi Jesús.

13

Jándoo Jesús sahá na xíca tuun xihín á

¹ Tácamañi in quiví coo vicó pascua já sa xíní Jesús ña sa naxinu coo quiví quivi a jándacoo a ñuyiví yóho já ndaa mé á ndique táhan xihín Ndióxi, tátá a. Níi tiempo naquihví ini Jesús tóco ndihí na cúu cuéntá mé á ndúu ñuyiví yóho ta cóo najándacoo mé á ña quíhvi ini a na.

² Ta ndaja coo íin Jesús xihín na xíca tuun xihín á xíjini na. Jihna sa najácahan tiñahá sacuahá Judas Iscariote, da cúu jahyí Simón, ña ná jicó túhún da Jesús. ³ Joo sa xíní vaha Jesús ña nasahan Ndióxi, tátá a tóco ndihí ndéé á nu mé á. Ta sa xíní a ña naquixi a nu Ndióxi ta jivi nu Ndióxi ndindita tucu a cuhun a. ⁴ Ta nani xíjini na nandaca ndichi Jesús já natavá a cotó níhnu a ta já natiin a in jáhma nachínee a tóco á. ⁵ Tá nandihí já nataán a ticuí ini in tisan loho já nacasahá jándoo a sahá na xíca tuun xihín a cán. Ta já najándihíchi a saha ná xihín jáhma cánee tóco á cán.

⁶ Ta tá nanditahan ndoo saha Simón Pedro já nandaca tuhún da Jesús já cáchi da já:

—Á mé a ndaa jándoo ndó sahá i, xitoho i —nacachi da.

⁷ Já nacachi Jesús já xihín dá:

—Viti ñuhú co cándaa toho inún ndía quea cája i yóho joo chága chí nuu já candaa inún ndá cuénta quea cája i já —nacachi Jesús.

⁸ Anda já nacachi Pedro já:

—Chí a quiahva toho mí i ñamaní nu ndó jándoo ndó sahá i —nacachi da.

Anda já nacachi Jesús já xihín dá:

—Tá ná a quiahvún ñamaní jándoo i sahún já a cúu cacuún cuénta mí i —nacachi Jesús.

⁹ Anda já nacachi tucu da já xihín Jesús:

—Tá ta já cáchi ndo quiahva va i sahá i jándoo ndó ta quiahva ri ñamaní jándahá ndó yehe ta quiahva ri ñamaní chihin ndó jini i viti —nacachi da.

¹⁰ Anda já nanducú ñehe Jesús tuhun nu dá já nacachi a já xihín dá:

—Tá sa nachichi vaha ñayivi já ndúu vii na ta saha cuití va ndó xini ñuhú ndicata i. Mé ndó, na xica tuun xihín i, sa ndúu vii ndo jáchi sa najándoo i cuachi ndó sahá ña candeé ini ndó yehe vatí a juú ndihi ndó ndúu vii —nacachi Jesús.

¹¹ Nacachi Jesús a juú ndihi na ndúu vii jáchi sa nacandaa va ini mé á ndá da cúu da jicó tuhún ñahá.

¹² Tá nandihí najándoo Jesús saha ná já nacandixi tucu a cotó níhnu a. Já nasacoo tucu a nu mesa já nacachi a já xihín ná:

—Cája i cuénta co cándaa vaha ini ndó ndá cuénta quea najándoo i saha ndo. Saha ña cán quea ndicani i ña nu ndo viti. ¹³ Mé ndó cáchi ndo maestro xihín i ta cáchi ndo cúu u xitoho ndó ta ndaa cáhan ndó jáchi jivi ndusa i. ¹⁴ Ta viti candeheé ndó. Yehe cúu u maestro ndo ta cúu u xitoho ndó ta najándoo i saha ndo. Saha ña cán quea quiahva já ndítahan caja ndó xihín ndaja táhan mé ndó. ¹⁵ Sa nasacu u in quiahva nu ndo ta ndítahan caja ndó tá quiahva nacaja mí i xihín ndo. ¹⁶ Xini ñuhú candaa ini ndó ña ni in tuhún toho mozo a cuú cacuu da da cáhnu chága a juú ga xitoho da. Ta mé a ndaa in chága sahá in da sáhdá chuun a

juú ga mé da cuahan caja chúun cán. ¹⁷ Tá nacandaa ini ndó ña cáhan i xihín ndo yóho ta tá ná caja ndó ña já quea cuu cajii ini ndó.

¹⁸ A juú saha tóco ndihi ndó cáhan i jáchi sa cándaa vaha ini mí i ndá ndó nacaxi i. Joo sahá in ndó ndítahan xinu coo nuú tuhun Ndióxi tá nacachi a já: “In da sacoo tuun xixi xihín i, da cán cúu da nandicuíta xihín i”, cáchi tuhun Ndióxi. ¹⁹ Sa cáxi tuhun cuéé e ña yóho xihín ndo já quea tá sa naxinu ña yóho já candeé ini ndó yehe, ña cúu u da cáchi i cúu u. ²⁰ Mé a ndaa ná cáhan i xihín ndo. Ndá na ná ndiquehe vaha in da ná chindahá i, cúu á tátuhun ndiquehe vaha na yehe. Ta ndá na ndiquehe vaha yehe, ndiquehe vaha ri na Ndióxi, mé a nachindahá yehe quixi i ñuyívi yóho —nacachi Jesús.

Cáxi tuhun Jesús ña cúu Judas da jicó tuhún ñahá

(Mt. 26:20-25; Mr. 14:17-21; Lc. 22:21-23)

²¹ Tá nandihí nacachi Jesús ña yóho já nacacuéha ndivaha ini a já nacachi a já:

—Mé a ndaa ná cáhan i xihín ndo. In táhan ndó cacuu da cuhun jicó tuhún yehe —nacachi Jesús.

²² Tá nandihí já nacasáhá na xica tuun xihín Jesús cán sándeheé nu táhan na. “Yo saha cáhan Jesús”, cáhan na. ²³ Jijn Jesús cán in coo in táhan da xica tuun xihín á, da quihvi ini mé á cán. ²⁴ Saha ña cán quea nacuu ndáha Simón Pedro nu dá ña ná ndaca tuhún da mé á saha ndá da cúu da jicó tuhún ñahá. ²⁵ Anda já nacativi chága da cán jijn Jesús já nacasáhá da ndaca tuhún ñahá da já nacachi da já:

—Ndá da cúu dá, xitoho i —nacachi da.

²⁶ Anda já nacachi Jesús já xihín dá:

—Viti ñuhú chindaxi i in tuhun pan ta ndá da ná quiahva i tuhun pan cán nuu, da cán cúu dá —nacachi Jesús.

Tá nandihí já nachindaxi a in tuhun pan já nasahan ña nu Judas Iscariote, da cúu jahyi Simón. ²⁷ Ta tá natiin Judas pan cán chí ivi laá nandihvi tiñahá sacuahá ini da. Já nacachi Jesús já xihín dá:

—Xini ñuhú ndihí inún cajún ña nasacu inún cajún —nacachi Jesús.

²⁸ Joo ni in tuhún java ga na ndúu coo xixi xihín Jesús cán coo nacandaa ini na ndá

cuéntá quéa nacachi Jesús ña yóho xihin Judas. ²⁹ Java na nacahán na ña nasahnda Jesús chuun nu Judas ña ná cuhun da cueen da ñaha cuéntá víco pascua. Ta java na nacahán na ña nasahnda chuun nu dá ña ná jasá da jjuhún nuú na ndahví jáchi ndáha mé dá ñúhu ndihi jjuhún. ³⁰ Tá nandihí natiin Judas pan nasahan Jesús nu dá chí ivi laá naquee da cuahan da. Ta sa ñuú va quéa cán.

Ndítahan quihvi ini táhan na cúu cuénta Jesús

³¹ Tá sa naqueta Judas cuahan da já nacasáhá cáchi Jesús já xihín na xíca tuun xihín á:

—Viti ndusa quéa nacasáhá ndicáhnu ndivaha yehe, da nachindahá Ndióxi nduu ñayivi. Ta sahá ña caja i ndicáhnu ndivaha Ndióxi, tátá i. ³² Ta tá náha yehe ndá quiahva cáhnu cúu Ndióxi, tátá i quiahva já náha ri Ndióxi ndá quiahva cáhnu cúu yehe, da nachindahá Ndióxi nduu ñayivi. Ta ja chá cámani coo tóco ndihi ña yóho. ³³ Candehé ndo, jahyi mání i. Ja chá cuití tiempo coo i xihín ndo. Anda já ndinducú ndó yehe joo a ndínehe ndó yehe. Ndítahan ndicuhun ini ndó tá nacachi i xihín na Israel ña a cúu cuhun na nuú cuhun yehe. Quiahva já cáchi ri xihín ndóhó va: A cúu cuhun ndó nuú cuhun i. ³⁴ Ta viti sáhdá i inga chuun nu ndo ta cúu á ña saá. Ta ña yóho cúu á: Ndítahan quihvi ini táhan ndó. Tá quiahva quihvi ini yehe ndohó quiahva já ndítahan quihvi ri ini táhan ndó. ³⁵ Jáchi tá ná quihvi ini táhan ndó já candaa ini tóco ndihi ñayivi ña mé a ndaa táhyí cúu ndó cuéntá mí i —nacachi Jesús.

Cáxi tuhun Jesús ña chijehé tuhun Pedro ña xini da mé á

(Mt. 26:31-35; Mr. 14:27-31; Lc. 22:31-34)

³⁶ Anda já nandaca tuhún Simón Pedro cán Jesús já nacachi da já xihín á:

—Xitoho i, ndájá cuhun ndó já —nacachi da.

—Anda já nacachi Jesús já xihín dá:

—A cúu toho cuhun yóhó nuú cuhun i viti. Joo cacuáchi lohún já xinu coun cán —nacachi Jesús.

³⁷ Anda já nacachi Pedro já xihín Jesús:

—Ndá cuéntá quéa cáchi ndo ña a cúu candico i ndohó cuhun i nuú cuhun ndó viti. Jáchi sa ín tiahva i quivi i saha ndo —nacachi Pedro.

³⁸ Já nanducú ñehe Jesús tuhun nu dá já nacachi a já xihín dá:

—Mé a ndaa ná cahan i xuhun. Vatí ín tiahvún quivún sahá i joo tá cámani cana chéle já uní tañu chijehé tuhún sahá i ta cahún ña co xini tohún yehe —nacachi Jesús xihín Pedro.

14

Ndáca Jesús ñayivi cuhun na nu Ndióxi, tátá a

¹ Já nacachi tucu Jesús já:

—Coto a ndícani ini ndó. Ndítahan candee ini ndó Ndióxi ta ndítahan candee ini ndó yehe. ² Mé nu ín Ndióxi, tátá i, cán ín cuahá ndivaha nu núná nu ndó canduu ndó. Tá ná a cóo nuú canduu ndó cán janda mé saha va sa nacaxi tuhun i xihín ndó, nduu. Ta cuhun i cacu tiahva i mé nuú canduu ndó cán. ³ Tá sa ná quee e cuhun i ta tá sa ná caja ndívi i nuú canduu ndó cán já quixi tucu u ndiquehe e ndohó já ná cuhun ndó canduu ndó xihín i mé nuú coo i cán. ⁴ Mé ndó sa xini ndó ndá íchi candico ndó já cuu saa ndó nuú cuhun i —nacachi Jesús xihín na xíca tuun xihín a cán.

⁵ Anda já nandicahan Tomás xihín Jesús já nacachi da já xihín á:

—Mé nde co xini toho nde ndájá cuhun ndo, xitoho nde. Ndaja caja ri nde candaa ini nde ndá íchi quehe nde cuhun nde —nacachi da xihín á.

⁶ Já nanducú ñehe Jesús tuhun nu dá já nacachi a já xihín dá:

—Yehe cúu tátuhun íchi ña ndítahan candico ñayivi ta yehe cúu da jánaha ña ndaa. Ta yehe cúu da cája ña ná catacu ñayivi anda ama cáa quivi. Ta in tuhún yehe ndítahan candee ini ñayivi já ná cuu xinu coo na nu Ndióxi, tátá i. ⁷ Tá xini ndó yo cúu yehe já xini ri ndó yo cúu Ndióxi, tátá i. Ta viti xihín chí nuu xini ndó a jáchi sa naxini ndó a —nacachi Jesús.

⁸ Anda já nacachi Felipe já xihín Jesús:

—Xitoho nde, jánaha ndó nuú nde yo cúu tátá ndo já ná cajji ini nde —nacachi da.

⁹ Anda já nacachi Jesús já xihín dá:

—Ndá cuéntá queá cáchún já jáchi janda jihna ndivaha va ín i xihín ndo ta sa ndítahan candaa ini ndó yo cúu yehe. Jáchi ndá na sa xini yo cúu yehe xini ri na yo cúu Ndióxi, tátá i. Sahá ña cán queá ndá cuéntá queá cuni ndó ña ná jánaha i tátá i nu ndo. ¹⁰ Xini ñuhú candúsa ndó ña in cúu va yehe xihín Ndióxi, tátá i ta in cúu va mé á xihín i. Tóco ndihi ña cáhan i xihín ndo yóho co cáhan i ña sahá ña quíxi a jini mé cuití vi. Cáhan i ña quixi nu Ndióxi jáchi ín mé á xihín i. Ta chuun cája i quixi a nu Ndióxi jáchi cája chúun mé á. ¹¹ Xini ñuhú candúsa ndó ña in cúu yehe xihín Ndióxi, tátá i ta in cúu Ndióxi, tátá i xihín i. Ta tá co cuni ndó candúsa ndó ña já queá xini ñuhú candúsa ndó ña sahá ña náhnu naxini ndó nacaja i. ¹² Mé a ndaa ná cahan i xihín ndo. Ndá na cándéé ini yehe, cuu caja na ña xitúhún tátuhun ña cája mí i. Ta janda ña náhnu chága cuu caja na jáchi cuhun i nu ín Ndióxi, tátá i. ¹³ Ta tóco ndihi ña caça ndó nu Ndióxi, xini ñuhú caça ndó ña xihín quivi mí i já ná caja i ña. Ta ndicáhnu Ndióxi, tátá i xihín ña caja i saha ndo. ¹⁴ Ta caja i ndá ña ná caça ndo nuú i tá ná caça ndó ña xihín quivi mí i.

Sáhan Jesús tuhun a ña chindahá a ínima yii Ndióxi cañuhu a ini ñayivi

¹⁵ Tá mé a ndaa quíhvi ini ndó yehe, caja tá caja ndó ña sáhdá i nu ndo caja ndó. ¹⁶ Ta caça i nu Ndióxi, tátá i ña ná chindahá mé á ínima yii mé á nu ndo. Ta chindeé mé á ndohó já ná quiahva tuhun ndéé ini ndó ta já cuu coo tuun a xihín ndo. ¹⁷ Joo ñayivi, na co cúu cuéntá mí i, a cúu ndiquehe na ña jáchi co cándaa ini na yo cúu mé á ta ni co cuni na ndiquehe vaha na ña. Joo ndohó xini vaha ndó a jáchi sa ín a xihín ndo ta ní tiempo cañuhu a ini ndó. ¹⁸ A jándacoo ndáha toho i ndohó jáchi ndicó coo tucu u já coo i xihín ndo. ¹⁹ Ja chá cuití ta a cuni ga ñayivi cuéntá ñuyivi yehe. Joo mé ndó cuni tá cuni ndó yehe. Ta sahá ña nditacu tucu u sahá ña cán queá cuu catacu mé ndó anda ama cáa quivi. ²⁰ Ta mé quivi cán candaa ini ndó ña mé a ndaa in cúu yehe xihín Ndióxi, tátá i. Ta candaa ini ndó ña quiahva já in cúu ndó xihín i ta in cúu yehe xihín mé ndó viti. ²¹ Ndá na ndiquehe vaha

tuhun cáhan i ta cája na ña, náha na xihín ña yóho ña mé a ndaa quíhvi ini na yehe. Ta mé Ndióxi, tátá i quíhvi ini a ndijáá na quíhvi ini yehe. Ta quíhvi ri ini yehe na ta nahá i mí i nu ná —nacachi Jesús.

²² Anda já in da naní Judas, da co cúu toho da naní Judas Iscariote, nandaca tuhún da Jesús já nacachi da já xihín á:

—Xitoho nde, ndá cuéntá queá cáchí ndó ña nahá ndó mé ndó nuú nde joo a náha toho ndó mé ndó nuú ñayivi cuéntá ñuyivi —nacachi da.

²³ Já nanducú ñehe Jesús tuhun nu dá já nacachi a já xihín dá:

—Ndá na quíhvi ini yehe, na cán cúu na cája ña cáhan i. Ta já quíhvi ini Ndióxi, tátá i na ta já quixi nde coo nde xihín ná. ²⁴ Joo na co quíhvi ini yehe, na cán cúu na quehe núu tuhun cáhan i. Ta mé tuhun cáhan i nu ndó yóho co cúu á ña quíxi jini mí i. Cúu á tuhun Ndióxi, tátá i, mé a nachindahá yehe quixi i ñuyivi yóho.

²⁵ Tóco ndihi ña yóho ndícani i ña nu ndó viti nani ín i xihín ndo. ²⁶ Joo ínima yii Ndióxi, mé a chindahá Ndióxi yuhú nuú i quixi a, chindeé a ndohó. Mé a cán queá jánaha tóco ndihi ñaha nu ndo. Ta jándicuhun a ini ndó tóco ndihi ña nacachi i xihín ndo.

²⁷ Tá sa ná quee e cuhun i já caja i ña ná coo vaha ini ndó. Joo a cácuu a tátuhun tá cája ñayivi cuéntá ñuyivi. “Ná coo vaha ini ndó”, cáchí xihín táhan na joo co ín vaha ini xihín táhan na. Coto a ndícani nahá ini ndó ta coto a yíhvi ndo jáchi caja i ña ná coo vaha ini ndó. ²⁸ Sa naxini johu ndó ña nacachi i xihín ndo ña quee e cuhun i ta ndicó coo tucu u já coo i xihín ndo. Ta tá mé a ndaa quíhvi ndusa ini ndó yehe já queá cajii ini ndó sahá ña cáchí i cuhun i nu ín Ndióxi, tátá i. Ta ín chága saha mé á a juú ga yehe. ²⁹ Sa ndícani cuéé vi ña yóho nu ndo já queá tá ná xinu coo ña cáchí i xihín ndo coo já queá cuu candúsa ndó yehe.

³⁰ Ja chá cuití va coo i ñuyivi yóho nditúhún i xihín ndo jáchi sa natandaa hora xinu rí quini, rí cómi cuéntá sahá ñayivi ñuyivi yóho vatí mé a ndaa co ndéé rí caja rí ni in ñaha xihín i. ³¹ Joo yaha tá yaha ña cuni rí caja rí xihín i. Ta xihín ña yóho

candaa ini ñayivi ndúu ñuyíví ña mé a ndaa quíhvi ini ndusa i Ndióxi, tátá i ta cája i ña nasahnda mé á nuú i caja i. Candichi ndó. Xihín ndo ná coho —ñacachi Jesús xihín na xíca tuun xihín a cán.

15

Jesús cúú á tátuhun in tó uva

¹ Andá já ñacachi tucu Jesús já xihín ná: —Yehe cúú ndusa tátuhun in tó uva ta Ndióxi, tátá i cúú á tátuhun da ndája vií saha mé tó uva cán. ² Ta ñayivi cúú ná tátuhun ndáha tó uva cán. Ta ndá na co xeén caja ña cuni Ndióxi jácaxoo a na nu mé á tá quiahva cája da ndája vií dó cán tá chítuhun dá ndáha tó uva, ña co cána uva nuu. Joo tá cána cuaha uva nu do já quea ndája vií da ndáha do ta ndíjatá da do já ná cana cuaha chága uva nu do. Quiahva já cája ri Ndióxi xihín ñayivi, na cája ña cuni mé á. ³ Joo mé ndó sa ñandivií va ndó jáchi ñaxini johó ndó ña jánaha i nu ndo. ⁴ Xíni ñúhú in cacuu ndó xihín i tá quiahva in cúú yehe xihín ndo. Jáchi in ndáha tó uva a cuú cana uva nu do tá co tীন dó tóco tó uva cán. Quiahva já ín ri xihín ndóhó va. A cúu caja ndó ña cuni Ndióxi tá coo in cúú ndó xihín i.

⁵ Yehe cúú u tátuhun tó uva ta ndóhó cúú ndó tátuhun ndáha mé tó uva cán. Ta ndá na in cúú xihín i tá quiahva in cúú u xihín ná já quea cuu caja ndihi na ña cuni Ndióxi. Cacuu a tátuhun cána cuaha uva vaha nu ndáha tó uva cán. Jáchi mé a ndaa ni in túhún ñaha a cúu caja ndó tá ná a chindeé yehe ndohó. ⁶ Ta ndá na co cuni in cacuu xihín i, na cán cúú ña jácaxoo Ndióxi. Ta cúú ná tátuhun in ndáha tó uva, dó sa ñahichi ta nditaca dó cuhun dó cayi do.

⁷ Tá in ná cacuu ndó xihín i ta tá ná caja ndó ña najánaha i nu ndo já cuu caça ndó ndá ña cuni mé ndó nuú i já quiahva i ña nu ndo. ⁸ Mé Ndióxi, tátá i ndicáhnu ndivaha tá ná caja ndó ña cuni a xihín ndinuhu ini ndó. Ta xihín ña yóho náha ndó ña cúú ndó cuéntá mí i. ⁹ Quíhvi ini i ndohó tá quiahva quíhvi ini Ndióxi, tátá i yehe. Xíni ñúhú coo tuun ndó xihín i jáchi quíhvi ini i ndohó. ¹⁰ Tá ná caja ndó tóco ndihi ña sáhná i nu ndo caja ndó já quea coo tuun ndó xihín i jáchi quíhvi ini i ndohó. Quiahva já cája

ri yehe va. Cája i tóco ndihi ña nasahnda Ndióxi, tátá i caja i ta xihín ña yóho ín tuun i xihín á jáchi quíhvi ini a yehe.

¹¹ 'Cáxi tuhun i ña yóho xihín ndo já ná cajii íni ndo tá quiahva cájii íni yehe. Ta xihín ña yóho ndicutú ndaa ínima ndo xihín ña cájii ini ndó. ¹² Cuni johó ndó ña sáhná i nu ndo yóho: Nditahan quíhvi ini táhan ndó tá quiahva quíhvi ini yehe ndohó. ¹³ Tá mé a ndaa táhyí quíhvi ini ñayivi ñani táhan na já quea ín tiahva na quívi na saha ná. ¹⁴ Mé ndó cúú ndó amigo i tá cája ndó ña sáhná i nu ndó caja ndó. ¹⁵ Cáchi i xihín ndo ña cúú ndó amigo i jáchi cáxi tuhun ndihi i xihín ndo ña cáhan Ndióxi, tátá i xihín i. Ta a cáhan ga i xihín ndo ña cúú ndó mozo jáchi in mozo co xini toho da ndaja cá ña cája xitoho da. ¹⁶ Mé ndó coo ñacaxi ndó yehe caca nuu i xihín ndo. Joo mí i ñacaxi i ndohó ña ná caca nuu ndó xihín i. Ta najánaha i ndohó ndá quiahva caja ndó já ná cacuu ndó tátuhun in yíto, dó sahan cuahá cuíhi ña a ndíhi saha. Tá ná caja ndó ña cuni Ndióxi já quiahva tátá i ndá a cuni mé ndó tá ná caça ndó ña xihín quívi mí i. ¹⁷ Ña yóho quea sáhná i nu ndó caja ndó: Quíhvi ini táhan ndó.

Cándají ñayivi cuéntá ñuyíví Jesús ta cándají ri na na cúú cuéntá mé á

¹⁸ Candehé ndo. Tá ná casáha candají ñayivi cuéntá ñuyíví ndohó xini ñúhú ndicuhun ini ndó ña jihna ñúhú ga ñacandají ri na yehe va. ¹⁹ Tá ná caja ndó tá quiahva cája ñayivi ñuyíví já quea quíhvi ini va na cán ndohó. Jáchi já cája xihín táhan mé na cán. Joo yehe ñacaxi i ndohó ña ná quee ndó tañu na cán. Saha ña cán quea co cuni na cán ndohó jáchi co cúú ga ndó na ñuyíví yóho. ²⁰ Coto a ndíndójó ndo ña ñacahan i xihín ndo tá ñacachi i ña ni in túhún toho mozo a cúu cacuu da da cáhnu chága nuú xitoho da. Ta ni mé ndó co cúú ndó na náhnu chága a juú ga yehe. Jáchi tá quiahva ñacaja xíxi na xihín yehe quiahva já caja xíxi ri na xihín ndóhó va. Tá ná candúsa na ña ñacahan i xihín ná quiahva já candúsa ri na ña ná cahan ri ndóhó va xihín ná. ²¹ Tóco ndihi ña yóho caja na xihín ndo saha ña cándéé ini ndó yehe. Jáchi co

xíni na Ndióxi, tátá i, mé a nachindahá yehe vaxi i ñuyívi yóho.

²² "Tá ná a quixi toho i ñuyívi yóho caxi tuhun i xihín ñayivi, nduu coó toho na jácojo cuachi jata ná, nduu. Joo viti naquixi i ñuyívi yóho ta ndítahan nu ná ndiquiahva na cuénta sahá cuachi na. ²³ Ndá ñayivi cándají yehe, cándají ri na Ndióxi, tátá i. ²⁴ Nacaja i ña náhnu nu ná joo coó nacandúsa na yehe sahá ña cán quea ndójo na cuachi. Ta ni in túhún toho ñayivi coó nacaja ña náhnu tá quiahva nacaja i nu ná. Vatí naxini na ña náhnu nacaja i joo cándají na yehe ta cándají na Ndióxi, tátá i. ²⁵ Joo xihín tóco ndihi ña cúu yóho xinu coo nu ley najándacoo Moisés nu ná sanahá tá cáchí a já: "Chí coó saha ná candají na yehe", já nacachi Moisés sanahá.

²⁶ "Tá ná quixi ínima yii Ndióxi, mé a chindahá i cuénta Ndióxi, tátá i, mé a cán quea cahan vaha sahá i. Ta jánaha ña ndaa saha Ndióxi ta chindee a ñayivi. ²⁷ Ta jári mé ndó cahan vaha ndó sahá i jáchi janda saha tá nacasáhá cája chúun i ñuyívi yóho nasanduu tuun ndó xihín i —nacachi Jesús.

16

¹ Já nacachi tucu Jesús já:

—Caxi tuhun i ña yóho xihín ndó já ná a jándacoo ndó ña cándée ini ndó yehe. ² Jáchi vaxi quívi tá taxí ñayivi ndohó veñuhu. Ta ndá na ná cahní ndohó cahan na ña cája chúun na cuénta Ndióxi. ³ Caja na ña yóho jáchi coo xíni na yo cúu Ndióxi, tátá i ta ni coo xíni na yehe. ⁴ Sa caxi tuhun cuée e ña yóho xihín ndó já quea tá ná xinu coo quívi cán já ndicuhun ini ndó ña sa nacaxi tuhun yachi vi xihín ndo ña já coo.

Ña cája ínima yii Ndióxi

'Coó nacaxi tuhun i ña yóho xihín ndó jihna jáchi nasahin i xihín ndo. ⁵ Já chá cuhun i coo i xihín Ndióxi, tátá i, mé a nachindahá yehe ñuyívi yóho joo ni in ndó coo ndaca tuhún ndó yehe ndájá cuhun i. ⁶ Ña cája ndó quea cácuéha ndivaha ini ndó sahá ña ndícani i tóco ndihi ña yóho nu ndo. ⁷ Joo mé a ndaa ná cahan i xihín ndo: Vaha chága ná quee e cuhun i. Jáchi tá ná a quee yehe cuhun i já a cúu quixi ínima yii Ndióxi coo a xihín ndo ta mé a cán

chindee a ndohó. Joo tá ná quee e cuhun i já chindahá i mé á quixi a nu ndo. ⁸ Ta tá ná xinu a cán jánaha cáxi táhyí a nuú ñayivi ña cája na cuachi. Ta jánaha nu ná ndaja ín íchi cuénta ña ndaa. Ta jánaha nu ná ndá quiahva cavií sahá ñayivi caja Ndióxi. ⁹ Ta jánaha cáxi táhyí a ña ín cuachi na jáchi coo cándée ini na yehe. ¹⁰ Ta jánaha ínima yii Ndióxi ndaja ín íchi cuénta ña ndaa jáchi quee e cuhun i nu ín Ndióxi, tátá i ta a cúní ga ndó yehe. ¹¹ Ta jánaha cáxi táhyí a ña caja víi Ndióxi sahá cuachi jáchi sa nacaja víi a sahá tiñahá sacuaḥa vatí viti ñuhú cómi rí cuénta sahá ñayivi ñuyívi yóho.

¹² 'Ín cuahá ndivaha ñaha cúní cahan chága i xihín ndo. Joo vatí já va viti jáchi a cándoo ga jini ndo. ¹³ Tá ná xinu ínima yii Ndióxi, mé a cúu ña ndaa, mé a cán candaca ndohó íchi cuénta ña ndaa. Ta a cahan toho a cán ña quixi jini mé á jáchi cahan mé á ña xíni johó a cahan Ndióxi. Ta caxi tuhun a xihín ndo ndá a coo chága chí nuu. ¹⁴ Ta mé a cán caja cáhnu a yehe jáchi jánaha nu ndó ña cúní mí i jánaha i nu ndo. ¹⁵ Tóco ndihi ñaha jánaha Ndióxi, tátá i cúu ri a ña jánaha yehe va. Sahá ña cán quea cáchí i xihín ndó ña ínima yii mé á caxi tuhun a xihín ndó ña cúní mí i jánaha i nu ndo.

¹⁶ Já chá cuití coo i xihín ndo ta a cúní ga ndó yehe jáchi quee e cuhun i nu ín Ndióxi, tátá i. Joo tá nandihí já cuni tucu ndó yehe —cáchí Jesús.

¹⁷ Anda já nacasáhá java na xíca tuun xihín a cán ndaca tuhún táhan na já cáchí xihín táhan na já:

—Ndía cúní ri Jesús cachi a xoho tá cáchí a ña ja chá cuití va ta a cúní ga i mé á ta tá nandihí já cuni tucu mé á. Ta cáchí a ña cúu á sahá ña quee a cuhun a nu ín Ndióxi, tátá a. ¹⁸ Ndía cúní ri a cachi a ña ja chá cuití va cuni mé á. Co cándaa vaha toho iní ndía cúní mé á cachi a xihín tuhun yóho —nacachi xihín táhan na.

¹⁹ Joo nacandaa ini Jesús ña cúní na ndaca tuhún na mé á sahá ña cán quea nacachi a já xihín ná:

—Nacachi i xihín ndó ña ja chá cuití ta a cúní ga ndó yehe ta tá nandihí já cuni tucu ndó yehe. Ta viti cúní ndo ndaca tuhún ndó yehe ndía cúní cachi ña yóho. ²⁰ Mé a

ndaa ná caħan i xih̄in ndo. Tandaag quiv̄i cuacu ndó ta cacuéħa ndivaha ini ndó ta ñayivi ñuyiví yóho cavatá ndivaha na sahá ña ndoho i. Ta vatí cacuéħa ini ndó joo in cuití ndajama ña ĵan ta já cajji ndivaha ini ndó. ²¹ Cacuu a tátuhun tá xinū cõo hora cacu ĵahyi in ñañáħa ta já casáhá ndóho ini ñá. Joo tá sa ñacacu ĵahyi ñá ndíndójó ndihi ñá sahá ña ñandoho ini ñá jáchi sa ñacacu ĵahyi ñá ta cájji ndivaha ini ñá xih̄in á. ²² Quiahva já ndóho ini ndó xih̄in ña táhnda ini ndó viti. Joo ndicó cõo tucu yeħe já cuni táhan tucú ta já ndicutú ndaa ínima ndó xih̄in ña cájji íní ndo. Ta ni in na a cúu caja caji nuu nuú ña cájji íní ndo ĵan.

²³ Mé quiv̄i cán cõo ga ñaha caça ndó nuú i. Jáchi mé Ndióxi, tátá i quiahva tóco ndihi ña xini ñuhú ndo tá ná caça ndó ña nu á xih̄in quiv̄i mí i. ²⁴ Ĵanda viti a ñaha caça ndó ñaha nu Ndióxi, tátá i xih̄in quiv̄i yeħe. Joo viti xini ñuhú caça ndó ña cuni ndó nu mé á xih̄in quiv̄i yeħe ta já quiahva mé á ña nu ndo. Ta xih̄in ña yóho cuu ndicutú ndaa ini ndó xih̄in ña cájji íní ndo.

Naquee vaħa Jesús nu tóco ndihi ña núu ñuyiví yóho

²⁵ Xih̄in quiahva cuití ñacahan i ña yóho xih̄in ndo. Joo tandaag quiv̄i ta a caħan ga i xih̄in quiahva nu ndo. Ña caja i quéa cáxi táhyi caħan i saħa Ndióxi, tátá i nu ndo. ²⁶ Ta mé quiv̄i cán caça ndó ña cuni ndó nu Ndióxi, tátá i xih̄in quiv̄i mí i. Sa núna nu ndó caça tahví ndó nu á ta cõ xini ñuhú ga caça tahví yeħe nu mé á saħa ndo. ²⁷ Jáchi sa quíhv̄i ini tátá i ndohó sahá ña quíhv̄i ini ndó yeħe ta sahá ña ñacandúsa ndó ña ñachindahá mé á yeħe vaxi i. ²⁸ Mé nu ín Ndióxi, tátá i ñaquee e vaxi i ñuyiví yóho. Ta yach̄i chá ta jándacoo i ñuyiví yóho já ndicó cõo tucu u cuhun i nu ín Ndióxi, tátá i — ñacachi Jesús.

²⁹ Anda já ñacachi na xica tuun xih̄in á cán já:

—Viti ndusa quéa caħan cáxi táhyi ndo xih̄in nde ta cõ sácú ga ndó quiahva nuú nde. ³⁰ Ta viti ndusa cándaã ini nde ña xini ndo tóco ndihi ñaha. Ta ni cõ xini ñuhú toho ndó ña ná ndaça tuhún nde ndohó jáchi sa xini va ndó ña cuni nde candaã ini nde.

Sahá ña cán quéa cándúsa nde ña ñaquixi ndó nu ín Ndióxi — ñacachi na.

³¹ Já ñanducú ñeħe Jesús tuhun nu ná já ñacachi a já xih̄in ná:

—Á ja víti ndusa cándúsa ndó yeħe. ³² Joo sa ñaxinū cõo va hora ndicuita nuu ndó ndá ñacuu cuhun ndo ta jándacoo in tuhún ndó yeħe. Vatí mé a ndaa a cándoo mé toho i jáchi ín Ndióxi, tátá i xih̄in i. ³³ Cáxi tuhun i ña yóho xih̄in ndo já ná coo vaħa ini ndó sahá ña in cúu ndó xih̄in i. Mé a ndaa ndoho tá ndoho ini ndó ñuyiví yóho. Joo a cáyhvi toho ndó jáchi yeħe ñacandee e ñasahnū i nu tóco ndihi ña núu ñuyiví yóho — ñacachi Jesús xih̄in na xica tuun xih̄in á cán.

17

Xica tahví Jesús nu Ndióxi sahá na xica tuun xih̄in á

¹ Tá ñandih̄i ñacachi Jesús tóco ndihi ña yóho xih̄in na xica tuun xih̄in á cán já ñandiñeħe a nuú á chí indivi já ñacachi a já:

—Tátá Ndióxi, sa ñaxinū cõo quiv̄i quivi i. Caja ndó ña ndicáħnu ndivaha mí i, da cúu in tuhún ĵini já ĵahyi mé ndó já ná cuu caja cáħnu ri yeħe va ndohó. ² Jáchi mé ndó ñasahan ndó nuú i ña ná cacomí i cuéntá saħa tóco ndihi ñayivi já ná cuu caja i ña ná catacu na anda ama cáa quiv̄i jáchi cúu ná na ñasahan ndo nuú i. ³ Ta tá xini na yo cúu mé ndó ta tá xini na yo cúu yeħe, da ñachindahá ndó ñuyiví yóho já cuu catacu na anda ama cáa quiv̄i. Jáchi in tuhún mé ndó cúu ndusa Ndióxi.

⁴ Sa ñacaja cáħnu i ndohó nani ín i ñuyiví yóho ta sa ñajáxinū cõo ndihi i ña ñasahnda ndó nuú i caja i. ⁵ Ta viti xica tahví i nu ndo, tátá Ndióxi ña ná ñaha ndo nuú ñayivi ndaja cáħnu cúu yeħe nu mé ndó jáchi quiahva já in cáħnu ñasacuu u xih̄in ndó ĵanda tá cámaní cava saħá saħa ñuyiví.

⁶ Ta ñacaxi ndó na cacuu cuéntá mí i tañu ñayivi cuéntá ñuyiví yóho. Ta sa ñacaxi tuhun i xih̄in ná yo cúu mé ndó. Ñacaxi ndó na ta ñandiquiahva ndó na nuú i. Ta ñacandúsa na tuhun ndó. ⁷ Ta viti cándaã ini na ña tóco ndihi ña saħan ndó nuú i quixi a cuéntá mé ndó. ⁸ Ta sa ñacaxi tuhun i xih̄in ná tóco ndihi ña ñasahan ndó nuú i

ta nandiquehe vaha na ña. Ta sa ñacandaa ini na ña mé a ndaa ñaquixi i cuénta mé ndó. Ta ñacandúsa na ña ñachindahá ndó yehe.

⁹ 'Co xica tahví i nu ndó sahá ñayivi cuénta ñuyívi yóho. Joo xica tahví i nu ndó sahá na ñasahan ndó nuú i jáchi cúu ná cuénta mé ndó. ¹⁰ Tóco ndihi na cúu cuénta mí i cúu ná cuénta mé ndó viti. Ta tóco ndihi na cúu cuénta mé ndó cúu ri na cuénta yehe va. Ta ndicáhnu ndivaha mí i sahá ña cája na.

¹¹ 'A cóo ga i ñuyívi yóho jáchi saa i nu ín mé ndó. Joo na ñacaxi ndó yóho canduu tóo na ñuyívi yóho. Tátá Ndióxi, yí ndivaha cúu mé ndó. Xica tahví i nu ndó ña ná candaa vaha ndó na cúu cuénta mé ndó jáchi xihín ndée mé ndó cuu candico na íchi cuénta mé ndó. Já quea in ná nduu ndihi na tá quiahva in cúu mé ndó xihín yehe. ¹² Jáchi nani ín i xihín ná ñuyívi yóho ndaa i na xihín ndée mé ndó. Ta ni in túhún toho táhan na ñasahan ndó nuú i cacomí i cuénta saha cán coo nandihí saha. In túhún da nandihí saha cúu da janda sanahá ñasahín saha ña ndihi saha dá já ná cuu xinu coo nuú ña ñacahyi nuú tuhun Ndióxi sanahá.

¹³ 'Ta viti quee e ñuyívi yóho saa i nu ín ndó jan. Joo cahan i ña yóho xihín ndó nani ín i ñuyívi yóho já ná ndicutú ndaa ini na yóho xihín ña cájii ín na tá quiahva cájii ín mí i. ¹⁴ Sa ñacaxi tuhun i tuhun mé ndó nu ná. Joo na cúu cuénta ñuyívi cándají na na cúu cuénta mí i jáchi coo cúu ná cuénta ñuyívi yóho tá quiahva coo cúu toho yehe cuénta ñuyívi yóho. ¹⁵ Co xica tahví i nu ndó ña ná tavá ndó na ñuyívi yóho. Ña cuni quea ná chindee ndó na já ná a quee vaha tiñahá sacuaña xihín ná. ¹⁶ Tá quiahva coo cúu toho i da cuénta ñuyívi yóho quiahva já coo cúu ga na cán ñayivi cuénta ñuyívi. ¹⁷ Ta xica tahví i nu ndó ña ná ndaja vii ndó na xihín tuhun mé ndó ña jánaha ndó nu ná jáchi tuhun mé ndó cúu ña ndaa. ¹⁸ Ta tá quiahva ñacaja ndó ñachindahá ndó yehe tañu na ñuyívi yóho quiahva já chindahá ri yehe va na cúu cuénta mí i tañu ñayivi cuénta ñuyívi. ¹⁹ Ta ndiquiahva i mí i caja i ña cuni mé ndó já quea ná cuu ndiquiahva

na yóho mé ná ndaha mé ndó sahá ña sa xini na ña ndaa.

²⁰ 'Ta a juú sahá na yóho cuití va xica tahví i nu ndó, vaha. Xica tahví ri nu ndó sahá na ná candúsa yehe chága chí nuu sahá tuhun cahan mé na yóho xihín ná. ²¹ Tátá Ndióxi, xica tahví i nu ndó ña ná caja ndó ña in ná nduu tóco ndihi na cúu cuénta mé ndó yóho. Ta caja ndó ña in ná nduu ndihi na xihín yó tá quiahva in cúu ndó xihín yehe ta in cúu yehe xihín mé ndó. Jáchi tá ná caja ndó ña in ná nduu tóco ndihi na já cuu candúsa ñayivi cuénta ñuyívi ña mé a ndaa ñachindahá ndó yehe vaxi i. ²² Ñacaja i ña ndicáhnu na cán tá quiahva ñandaja cáhnu ndó yehe. Já quea in ná nduu ndihi na tá quiahva in cúu mé ndó xihín yehe. ²³ Ta in cúu yehe xihín ná tá quiahva in cúu mé ndó xihín i já ná xinu coo ndihi na cacuu na tátuhun in víxi ñayivi. Ta já ná cuni ñayivi cuénta ñuyívi ña mé a ndaa ñachindahá ndó yehe vaxi i. Ta já ná cuni na ña quihvi ini ndó na tá quiahva quihvi ini ndó yehe.

²⁴ 'Tátá Ndióxi, ñacaja ndó ña cómi i cuénta sahá na yóho. Ta cuni ña ná coo na xihín i nuú coo i já ná cuni na ndá quiahva cáhnu cúu u jáchi ñacaja ndó ña ná ndicáhnu ndivaha i. Jáchi janda tá camaní cava sáhá saha ñuyívi quihvi ini ndó yehe. ²⁵ Tátá Ndióxi, cája ndó ña ndaa. Ta ñayivi cuénta ñuyívi yóho coo xini toho na ndohó. Joo yehe xini vaha i ndohó ta na cúu cuénta mí i yóho sa cándaa vaha ini na ña ñachindahá ndó yehe. ²⁶ Sa ñacaja i ña ná candaa ini na yo cúu mé ndó ta cája i ña ná candaa chága ini na saha ndó. Ta xihín ña yóho candaa ini na ña quihvi ini ndó na tá quiahva quihvi ini ndó yehe ta já in ná nduu na xihín i —ñacachi Jesús xica tahví a nu Ndióxi.

18

Tá natiin na Jesús

(Mt. 26:47-56; Mr. 14:43-50; Lc. 22:47-53)

¹ Tá nandihí ñaxica tahví Jesús nu Ndióxi já ñaqueta mé á xihín na xica tuun xihín a cán cuahan chí inga xoo yivi nani Cedrón. Ta yati cán cáa cuaha yitó cuhi nuú ñaquihvi Jesús xihín na xica tuun xihín

á. ² Ta Judas Iscariote, mé da jíco tühún ñahá cán sa xini vaha da nu sáhiin Jesús xihín na xica tuun xihín á jáchi cuahá tañu nanditútú ndihi na cán. ³ Ña cán quéa ndáca da in táhndá soldado ta ndáca da java policía, na ndáa veñuhu cáhnu ñuu Jerusalén cán. Cúu ná na nāchindahá na sacuaḥa nuú jutu xihín na fariseo. Ta jandá johō ñeḥe na ñaha ná cani na a cuahān na ta ñeḥe ri na ití yúsá jándiyéḥe na nu ná. ⁴ Joo sa xini vaha Jesús ndiá ndítahan ndoho a sahá ña cán quéa naqueta nu ná já nandaca tühún a na já nācachi a já xihín ná:

—Yo ndínducú ndo já —nācachi a.

⁵ Já nanducú ñeḥe na cán tūhun nu á já nācachi na já xihín á:

—Ndínducú nde Jesús, da ñuu Nazaret —nācachi na.

—Yeḥe cúu u da ndínducú ndo —nācachi a.

Ta tañu na cán ndácaan ri Judas, da najicó tühún ñahá cán. ⁶ Tá nācachi Jesús: “Yeḥe cúu u da ndínducú ndo”, já naxica játa na ta nacyu na nu ñúhu. ⁷ Já nandaca tühún tucu Jesús na já nācachi a já xihín ná:

—Yo ndínducú ndo já —nācachi a.

Já nanducú ñeḥe na cán tūhun nu á já nācachi na já xihín á:

—Jesús, da ñuu Nazaret ndínducú nde —nācachi na.

⁸ Anda já nācachi tucu Jesús já xihín ná:

—Sa nācachi vi xihín ndo ña yeḥe cúu u da ndínducú ndo. Sahá ña cán quéa quiahva ndó ñamaní nuú na yóho ña ná quee na cuhun na —nācachi Jesús.

⁹ Nācachi Jesús ña yóho já ná a tীন na na xica tuun xihín a cán já ná xinu coo nuú tūhun ña nācachi mé á tá naxica tahví a nu Ndióxi tá nācachi a já: “Tátá Ndióxi, ni in tühún toho táhan na nasahan ndó nuú i coo nandihí saḥa jáchi nasandaa vaha i na.” ¹⁰ Ta ndaja coo nasañee in machítí nu tóco Simón Pedro. Já natuhun da ña ta nāchitūhun dá johō cuāha in da naní Malco, da cúu mozo nuú da cúu sacuaḥa chága nu ndíhi jutu. ¹¹ Anda já nācachi Jesús já xihín Pedro:

—Chicaan vaha machítí jan. Jáchi sa nasacu ini Ndióxi, tátá i ndoho ini i tóco

ndihi ña vaxi nuú i ta in tiahva i ndoho ini i —nācachi Jesús.

Ñeḥe na Jesús cuahān na nuú da sacuaḥa chága nu ndíhi jutu

(Mt. 26:57-58; Mr. 14:53-54; Lc. 22:54)

¹² Tóco ndihi soldado cán xihín da sáhndá chuun nu dá xihín java na ndáa veñuhu cán naṭiin na Jesús ta nācató na a. ¹³ Jihna ñúhú ñeḥe na a nasahan na nu Anás, da cúu xojo Caifás, da sacuaḥa chága nu ndíhi jutu mé cuia cán. ¹⁴ Mé Caifás yóho cúu dá da nācachi xihín na Israel ña vaha chága ña ná quivi in ta nu ndíhi ñayivi já ná a ndíhi saḥa tóco ndihi ñayivi.

Chíjehé tūhun Pedro ña xini da Jesús

(Mt. 26:69-70; Mr. 14:66-68; Lc. 22:55-57)

¹⁵ Ta ndaja coo Simón Pedro xihín inga táhan da xica tuun xihín Jesús cán ndíco na játa nu ñeḥe na a cuahān na. Ta da inga cán xini táhan vaha da xihín da sacuaḥa chága nu ndíhi jutu ña cán quéa nañeḥe dá ñamaní ndihvi da xihín Jesús yuyéḥe vehe jutu cán. ¹⁶ Joo nācando Pedro játa vehe yati yéḥe cán. Joo da inga cán nandicó coo da já naxica da ñamaní nu ná ndáa yéḥe vehe jutu cán ña ná quiahva ña ñamaní nu Pedro quihvi da. Sahá ña cán naquihvi Pedro chí yuyéḥe vehe cán. ¹⁷ Ta mé ña ndáa yéḥe cán nandaca tühún ña Pedro já nācachi ña já xihín dá:

—A a juú in táhan da xica tuun xihín Jesús cúu yóho —nācachi ña.

Anda já nācachi Pedro já xihín ña:

—Co cúu toho i in táhan da xica tuun xihín á —nācachi Pedro.

¹⁸ Ta mé ñuu cán vixi xini na cúu mozo xihín na ndáa veñuhu cán. Sahá ña cán quéa nandicahmi na ñúhu ta nandaca nduu na xitúni na ta tañu na cán cándichi ri Pedro xitúni da.

Ndája ndichí da sacuaḥa chága nu ndíhi jutu Jesús

(Mt. 26:59-66; Mr. 14:55-64; Lc. 22:66-71)

¹⁹ Tá nandihí já nācasáhá da sacuaḥa chága nu ndíhi jutu cán ndája ndichí da Jesús já nandaca tühún da mé á sahá na naxica tuun xihín á. Ta nandaca tühún da

mé á sahá ña najánaḥa nuú ñayivi. ²⁰ Anda já naçachi Jesús já xihín dá:

—Coó naçahan jehé toho i xihín ñayivi tá najánaḥa i nu ná. Níi tiempo najánaḥa i tuhun Ndióxi nu ná ini veñuhu ta quiahva já najánaḥa i nu ná nu táca na ini veñuhu cáhnu ñuu Jerusalén. Ta ni in túhún toho ñaha coó najánaḥa jehé e nu ná. ²¹ Ta viti cachi ndó xihín i ndá cuéntá quéa ndáca tuhún ndó yehe sahá ña yóho. Cuáhán ndó ndáca tuhún ndó ñayivi, na najánaḥa i nu cán já ná ndicani na cán nu ndó ndaja cáa ña najánaḥa i nu ná. Jáchi xini vaha na ña naçahan i xihín ná —naçachi Jesús.

²² Tá naçachi Jesús ña yóho já naçani in da ndáa veñuhu cán jahndá nuú á já naçachi da já xihín á:

—A váha toho ndiñehe yuhun nuú da sacuaḥa chága nu ndíhi jutú —naçachi da.

²³ Anda já naçachi Jesús já xihín dá:

—Tá co váha ná caja i, caḥan xihín i ndá cúu ña coó naçaja vaha i. Joo tá naçaja vaha i ndá cuéntá quéa cánún yehe —naçachi Jesús.

²⁴ Tá nandihí já nasañehe na Jesús nuú Caifás, da sacuaḥa chága nu ndíhi jutú cán ta sa já ndíco a xihín yóho ñehe na a cuahan na.

Chíjehé tuhun tucu Pedro ña xini da Jesús
(Mt. 26:71-75; Mr. 14:69-72; Lc. 22:58-62)

²⁵ Ta ndaja coo ín coo yíi Pedro xítúni da xihín java na ndúu cán. Ta já naçasahá na cán ndáca tuhún na da já naçachi na já xihín dá:

—Á a juú táhan da xíca tuun xihín Jesús cúu yóho —naçachi na.

Joo nachijehé tuhun Pedro ña xini da Jesús já naçachi da já:

—Co cúu toho i in táhan da xíca tuun xihín á —naçachi da.

²⁶ Joo tá nandihí já nandaca tuhún in da cúu mozo nuú da sacuaḥa chága nu ndíhi jutú cán, da cúu in táhan da nachituhun Pedro johó. Ta naçachi da já xihín Pedro:

—Cája i cuéntá naxini i yohó nu cáa cuaha yitó cuihi nuú natiin na Jesús cán —naçachi da.

²⁷ Joo nachijehé tuhun tucu Pedro ña xini da Jesús ta ivi laá naçana chéle tá quiahva naçachi Jesús xihín dá coo.

Ñehe na Jesús cuahan na nu Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ta tá nativi yaa já natavá na Jesús vehe Caifás cán já ñehe na a cuahan na vechúun nu ndácaan da cúu gobernador cuéntá ñuu Roma. Joo mé na Israel coó naxeen na ndihvi na vechúun cán jáchi cáchi ley na ña tá ná ndihvi na vehe na tóho já cuu yuxu na ta já a cúu cajini na vicó pascua ña coo quivi itaan. ²⁹ Sahá ña cán quéa naqueta Pilato, da cúu gobernador jata véhe caḥan da xihín na Israel já naçachi da já:

—Ndá cuachi naçaja da yóho —naçachi Pilato.

³⁰ Já nanducú ñehe na Israel cán tuhun nu dá já naçachi na já:

—Ta tá a juú ta quini ná cacuu da yóho ta a cañehe toho nde da quixi da nu ndó, nduu —naçachi na.

³¹ Já naçachi Pilato já xihín ná:

—Mé ndó cañehe ndó da cuhun ndó. Caja vii ndó saḥa dá tá quiahva sáhdá ley mé ndó —naçachi Pilato.

Já naçachi na Israel cán já xihín dá:

—Ña cuni nde quéa ná cata caa ndó da ndica crúxu jáchi cúu nde na Israel ta co ñehe toho nde ñamaní cahní nde ñayivi —naçachi na.

³² Ta xihín ña yóho naxinu coo nuú ña naçachi Jesús tá naçachi a ndá quiahva quivi a. ³³ Tá nandihí já nandihvi tucu Pilato ini vechúun cán ta naçana da Jesús já nandaca tuhún ñahá da já naçachi da já xihín á:

—Á mé a ndaa cúun in rey, da cómi cuéntá sahá na Israel —naçachi da.

³⁴ Já naçachi Jesús já xihín dá:

—Á jini mé ndó naquixi ña ndáca tuhún ndó yehe. Á ndáca tuhún ndó yehe sahá ña naçachi ñayivi sahá i —naçachi a.

³⁵ Anda já naçachi Pilato já xihín Jesús:

—Co cándaq ini i saḥa ña yóho jáchi co cúu yehe da Israel. Mé ñayivi Israel jan xihín na sacuaḥa nuú jutú cúu na nandiquiahva yohó ndahá i. Ndía naçajún, vaha —naçachi Pilato.

³⁶ Já nanducú ñehe Jesús tuhun nu dá já n̄acachi a já xih̄in dá:

—C̄o cómi i cuéntá sah̄á ñayivi tátuhun cája ñayivi cuéntá ñuyiví. Jáchi tá ná cacomí i cuéntá sah̄á ná tátuhun na ñuyiví já queá cuu caja i xih̄in na cómi i cuéntá sah̄á ña ná caní táhan na xih̄in na Israel ña ná a t̄in na yehe. Joo c̄o cómi toho i cuéntá sah̄á ná tátuhun cája ñayivi cuéntá ñuyiví —n̄acachi a.

³⁷ Anda já n̄acachi tucu Pilato já xih̄in Jesús:

—Á cúun da cómi cuéntá sah̄á ñayivi, dá já —n̄acachi da.

Já n̄acachi Jesús já xih̄in dá:

—Ña ndaa queá cáhan ndó jan. Yehe cúu u da cómi cuéntá sah̄á ñayivi cuéntá mí i jáchi n̄acacu u ñuyiví yóho ña ná caja i já. Ta naquixi i já ná caxi tuhun i ña ndaa xih̄in ñayivi. Ta tóco ndihi na cúu cuéntá ña ndaa xini joh̄o ña cáhan i —n̄acachi a.

³⁸ Já n̄acachi tucu Pilato já xih̄in á:

—Yo xini ndia cúu ña ndaa —n̄acachi da.

Tá nandihí já naqueta tucu Pilato vechúun cahan da xih̄in na Israel já n̄acachi da já xih̄in ná:

—Chí c̄o ndíñehe mí v̄i ndá cuachi queá n̄acaja da yóho. ³⁹ Tañu mé víc̄o pascua ín in costumbre ndo ña ná janí i in da s̄a ndacaan vec̄a. Ta viti cachi ndó xih̄in i á c̄o cúni ndó ña ná janí i da cúu rey nuú na Israel —n̄acachi Pilato.

⁴⁰ Ta já n̄acasáhá tóco ndihi na cán cáyuhú cóhó na já cáchí na já:

—A janí toho ndó Jesús jan. Vaha chága ná janí ndó Barrabás jan —cáchí na cáyuhú na nu Pilato.

Ta Barrabás cán nasacuu da in t̄a cuihná.

19

Sácu na sah̄á Jesús quivi a

¹ Anda já nasahnda Pilato chuun ña ná jácaxáhan na Jesús xih̄in churrú. ² Ta da cúu soldado cán najehén da in tiyivi xih̄in íñu já nachinúu da a jiní á ta nachinúu da in jáhma cuáhá túun jatá. ³ Tá nandihí já n̄acativí da nu á s̄acu ndaa ichi ñahá da já n̄acachi da já xih̄in á:

—Cáhn̄u nahá ná cacuu yóhó, da cúu rey nuú na Israel —n̄acachi da.

Anda já cáni da nu á.

⁴ Tá nandihí já naqueta tucu Pilato chí jat̄a já n̄acachi da já xih̄in tóco ndihi na ndúu cán:

—Candehé ndo. Tavá ñehe e Jesús nu ndo já ná candaa ini ndó ña c̄oó toho cuachi da ndítahan i —n̄acachi da.

⁵ Tá nandihí já natavá ñehe Pilato Jesús ta s̄a já cánuu tiyivi íñu jiní á. Ta s̄a já tácaa jahmá cuáhá túun jat̄a naqueta. Anda já n̄acasáhá cáchí Pilato já:

—Candehé ndo. Yóho ín da —n̄acachi da.

⁶ Joo na sacuaña nuú jut̄u xih̄in na ndáá veñuhu tá n̄axini na Jesús já n̄acasáhá na cáyuhú cóhó na já cáchí na já:

—Cata caa ndó da ndica crúxu, cata caa ndó da —cáchí na.

Anda já n̄acachi Pilato já xih̄in ná:

—Mé ndó cañehe ndó da c̄uhun ndo cata caa ndó da ndica crúxu tá cúni ndo. Jáchi yehe c̄o ndítahan i ndá cuachi n̄acaja da —n̄acachi Pilato.

⁷ Anda já n̄acachi na Israel cán já xih̄in Pilato:

—Nu ley mé nde ndítahan quivi da jáchi cáchí da cúu dá in túhún jiní já jahyi Ndióxi —n̄acachi na.

⁸ Tá n̄axini joh̄o Pilato cán ña yóho já nayihví chága ví da. ⁹ Já naquihvi tucu Pilato xih̄in Jesús ini vechúun cán já n̄andaça tuhún da mé á já n̄acachi da já xih̄in á:

—Ndá ñuu naquisún já —n̄acachi da.

Joo c̄oó nanducú ñehe Jesús tuhun nu dá.

¹⁰ Já n̄acachi tucu Pilato já:

—Ndá cuéntá queá c̄o cúnun nducú ñehún tuhun nuú i. Á c̄o xini tohún ña cuu cahnda i chuun ña ná cata caa na yóho ndica crúxu. Ta cuu janí ri yóho ña ná queún c̄uhun tá cúni —n̄acachi da.

¹¹ Anda já nanducú ñehe Jesús tuhun nu dá já n̄acachi a já xih̄in dá:

—Ni in túhún toho ñaha c̄o núna nu ndó caja ndó xih̄in i tá c̄o sahan Ndióxi, tátá i ñamaní nu ndo. Joo mé a ndaa ín chága cuachi nuú da nandiquiahva yehe ndáha ndó a juú ga ndóhó —n̄acachi Jesús.

¹² Anda já nanducú Pilato ndá quiahva caja da janí da Jesús ña ná quee a c̄uhun

a. Joo coó naxeen na Israel ta nacasáhá na cáyuhú cóhó na nu dá já cáchí na já:

—Tá ná janí ndó Jesús jan já queá náha ña co cúu ndó da ñehe táhan vaha xihín da cómí cuéntá sahá ñayivi ñuu Roma. Jáchi Jesús jan cáchí da ña cúu dá da cómí cuéntá sahá ñayivi ta xihín ña yóho jándihíhvi da emperador, da cómí cuéntá sahá ñayivi ñuu Roma —nacachi na.

¹³ Tá naxini johó Pilato ña yóho já nasahnda da chuun ña ná tavá na Jesús. Ta nasacoo mé dá nu sácoo da sáhdá chuun vechúun. Mé nu sácoo da cán naní a Gabata tuhun hebreo. Mé tuhun yóho cúní cachi a nuú naquihvi piso yuu. ¹⁴ Nayaha tóco ndihi ña yóho tá cámaní in quívi coo víco pascua. Ta cúu á tátuhun caxivi ta nandaca ndichi Pilato já nacachi da já xihín na Israel cán:

—Jan íin da cúu rey nu ndo —nacachi da.

¹⁵ Joo na cán nacasáhá tucu na cáyuhú cóhó na nu dá já cáchí na já:

—Cahní ndó da. Ná quivi da. Cata caa ndó da ndica crúxu —cáchí na.

Já nacachi Pilato já xihín ná:

—Ama ná cata caa ri da cúu rey nu ndó ndica crúxu —nacachi Pilato.

Anda já nacachi na sacuahá nuú jutú cán já:

—Da cómí cuéntá sahá ñuu Roma, in túhún da cán cuití va cúu rey nuú nde —nacachi na cán.

¹⁶ Anda já nandiquihva Pilato Jesús nu ná ña ná cañehe na a cūhūn na cata caa na a ndica crúxu.

Cáta caa na Jesús ndica crúxu

(Mt. 27:32-44; Mr. 15:21-32; Lc. 23:26-43)

¹⁷ Nachinúu na in crúxu joco Jesús já ndójo a do cuahan chí xiquí naní a nu ndúu lásá yiquí jíní ndíi. Ta cáchí na Gólgota xihín á tuhun hebreo. ¹⁸ Ta cán nacata caa na a ndica crúxu ta nacata caa ri na inga ivi da xihín á, in in da in in xoo jín á. Ta tácaa Jesús mahnú ndíví da cán. ¹⁹ Ta nasahnda Pilato chuun ña ná cūhūn java na chítivi ndaa na in tabla ndica crúxu yati jini Jesús cán. Ta nu tabla cán nacahyí na: “Da yóho cúu Jesús, da ñuu Nazaret, da cúu rey nuú na Israel.” ²⁰ Ta cuahá na Israel nacahvi na ña nacahyi cán jáchi yati yuhú

ñuu Jerusalén nacata caa na Jesús. Ta ña ndáa nu tabla cán nacahyí na ña tuhun hebrero ña cáhan na Israel xihín tuhun latín ña cáhan na ñuu Roma xihín tuhun griego ña cáhan na nación Grecia. ²¹ Ta tá naxini na sacuahá nuú jutú cán ña yóho já nacachi na já xihín Pilato:

—A cáhyí toho ndó ña cúu da jan rey nuú na Israel. Vaha chága ná cahyí ndó ña cáchí da cúu dá rey nuú na Israel —nacachi na.

²² Já nanducú ñehe Pilato tuhun nu ná já nacachi da já xihín ná:

—Coo tá coo ña sa nasacu u ta a tává toho i ña —nacachi da.

²³ Tá nandihí nacata caa mé soldado Jesús ndica crúxu, já natiin da jahmá a ta nandicahnda nu táhan ndicomí dá ña. Ta cotó ndéé a cúu á ña nacavaha níi na ña jini á ta janda sahá ta coó nacucu na ña. Ta natiin da ña ²⁴ ta já nacachi xihín táhan da já:

—Ná a jácuachí toho í jáhma jan já ná coo níi yí va. Ña cuu caja í queá cajíquí yo sahá ta ndá da ná quee vaha, da cán ndiquehe jáhma jan —nacachi xihín táhan da cán.

Nacaja da ña yóho já ná xinu coo nuú tuhun Ndióxi nacahyi sanahá tá nacachi a já: “Nandicahnda nu táhan mé ná jahmá i ta já nasajíquí na sahá cotó ndéé e ta da naquee vaha cán nandiquehe da ña.” Quiahva já nacahyi tuhun Ndióxi sanahá. Ta quiahva já nacaja soldado cán xihín jáhma á.

²⁵ Ta jín mé crúxu nuú nacata caa na Jesús cán nasandichi náná a xihín quihvi ña cán xihín María, ña cúu ñájíhí Cleofas xihín María, ña ñuu Magdala. ²⁶ Tá naxini Jesús ña cándichi náná a saha crúxu ta tá naxini a cándichi yehe, da naní Juan, da xíca tuun xihín á, da quihvi ndivaha ini mé á chí já nacachi a já xihín náná a:

—Da jan cúu tátuhun jahyi ndó viti —nacachi Jesús.

²⁷ Tá nandihí já nacachi a já xihín mé da xíca tuun xihín a cán:

—Candaa vaha ña jáchi cúu ña tátuhun nánún viti —nacachi Jesús.

Tá naxini johó da ña yóho já nandiquehe vaha da María cán ndáa da ña tátuhun náná da.

Tá naxihi Jesús

(Mt. 27:45-56; Mr. 15:33-41; Lc. 23:44-49)

²⁸ Tá sa nayaha tóco ndihi ña yóho já sa xini vaha Jesús ña sa naxinu coo tóco ndihi ña nacachi tuhun Ndióxi coo. Ta naxinu coo nuú ña nacyi nuú tuhun Ndióxi sahá Jesús sanahá tá nacachi a já:

—Íchi ini i ticuií.

²⁹ Mé cán nasandichi in tindocho naxutu jini xihin vino iyá. Ta najándaxi na in tico to xihin vino cán já nacató da ña nuú in yito naní hisopo ta já naxitivi na ña yati yuhu Jesús ña ná coho a do. ³⁰ Anda já naxihi Jesús mé vino iyá cán já nacachi a já:

—Sa nayaha tóco ndihi ñaha ña ndítahan ndoho i —nacachi a.

Já nanditoo jico á. Naxihi a.

Tá natuxú na in yito tátuhun póyá yicá ndíca Jesús

³¹ Ta ndaja coo nasahan na Israel cán naxica na ñamaní nu Pilato ña ná cahnda da chuun ña ná cahnu da lásá sahá da tácaa ndica crúxu cán já ná quivi yachi da. Jáchi coo naxeen na Israel cán ña ná taca ndii ndica crúxu inga quivi itaan. Jáchi cacuu a quivi ndiquehe ndée ná ta cacuu a in quivi yii ndivaha nu ná. ³² Sahá ña cán quea naquee soldado nasahan da já nasahnu da lásá sahá ndívi da tácaa ndica crúxu jiin Jesús cán. ³³ Joo tá nacayati da nu Jesús ña cahnu da lásá sahá, naxini da ña sa naxihi va mé á sahá ña cán quea coo nasahnu da lásá sahá.

³⁴ Joo in táhan soldado cán natuxú da in yito tátuhun póyá yicá ndíca a já nacana ni xihin ticuií cán. ³⁵ Ta yehe cúu u da ndícani ña yóho nu ndo ta naxini i ña xihin nuú i. Ta cúu á ña ndaa. Ta cánda cáxi ini i ña cáhan i ña ndaa já ná candúsa ndó ña ndícani i nu ndo. ³⁶ Jáchi tóco ndihi ña yóho nayaha já ná xinu coo nuú tuhun Ndióxi tá cáchi a já: “Ni in túhun toho lásá da, a cáhnu na”, já cáchi tuhun Ndióxi. ³⁷ Ta inga tucu cáchi tuhun Ndióxi já: “Cuni tucu na da, da natuxú na póyá yicá ndíca”, já nacyi na nuú tuhun Ndióxi sanahá.

Tá najánduxu na Jesús

(Mt. 27:57-61; Mr. 15:42-47; Lc. 23:50-56)

³⁸ Tá sa nayaha tóco ndihi ña yóho já naxinu coo in da naní José, da ñuu Arimateo, nu Pilato. Ta naxica da ñamaní nu Pilato ña ná ndiquehe da yiquí cuñu Jesús cañehe da cuhun da. Mé José yóho cúu dá cuéntá Jesús joo coo nanaha tuhun da sahá jáchi yíhvi da na Israel. Ta ndaja coo nasahan Pilato ñamaní nu dá ña ná ndiquehe da yiquí cuñu Jesús. Chí nasahan da nandiquehe da ña. ³⁹ Ta jári ín in da naní Nicodemo ta ñehe da tátuhun oco uxu kilo perfume, dó nacavaha xihin ña naní mirra ta xihin ña naní aloes. Mé Nicodemo yóho cúu da da nasahan nandituhun xihin Jesús tá ñuu. ⁴⁰ Ña cán quea natin José xihin Nicodemo yiquí cuñu Jesús ta naxitivi na ña xihin in jáhma vaha ña nachindaxi da xihin mé perfume cán. Jáchi quiahva já ín costumbre na Israel cája na tá jánduxu na ndii. ⁴¹ Ta yati nuú nacata caa na Jesús cán nasahin nu caa cuaha yito cuíhi. Ta tañu yito cán nasahin in yávi ndica cáva nuú cuu chicaan na ndii. Mé cáva cán nasacuu a ña saá jáchi ni in ndii a ñaha chicaan na ini ña cán. ⁴² Ta cán nachicaan da yiquí cuñu Jesús jáchi yati nasahin a. Ta númi dá jáchi sa naxitivi quivi ndiquehe ndée na Israel.

20

Tá nanditacu tucu Jesús

(Mt. 28:1-10; Mr. 16:1-8; Lc. 24:1-12)

¹ Ta tá sa nayaha mé quivi ndiquehe ndée ná ta naha vaha chá quivi domingo tá cámani queta candii já nasahan María, ña ñuu Magdala nuú nachicaan na yiquí cuñu Jesús cán. Já naxini ña ña nacaxoo yuu cáhnu nasandaji yuhú cáva cán. ² Anda já naxinu ña nasahan ña nu ín Simón Pedro xihin inga da naxica tuun xihin Jesús, da quíhvi ndivaha ini mé á cán. Ta tá naxinu coo ña nu dá já nacachi ña já xihin dá:

—Natavá na yiquí cuñu xitoho i ta yo xini ndájá nasacu na ña —nacachi ña.

³ Anda já naqueta Pedro xihin inga da naxica tuun xihin Jesús cán ndáva da cuahan da nuú nasandacaan Jesús. ⁴ In nuú xinu ndívi da cuahan da. Joo nihi chága xinu da inga cán a juú ga Pedro ña cán quea jihna ñuhú da naxinu coo da nuú

nandacaan Jesús cán. ⁵ Anda já nacandayi da sándehe da nuú nasandacaan Jesús cán. Já naxini da ñúhu ticoto nasativí a cán cuití va. Joo coó nandihvi da janda mé ini cáva cán. ⁶ Anda já naxinu coo Simón Pedro ta nandihvi da cán. Ta naxini da mé ticoto nasativí yiquí cuñu Jesús cán. ⁷ Ta naxini da ticoto ña nasativí jini á nacaxoo jiin ña cán ta nanditivi vaha ña. ⁸ Anda já nandihvi ri da inga cán, da naxinu jihna ñuhú. Ta tá naxini da ña coó yiquí cuñu Jesús ndacaan já nacandusa da ña nanditacu tucu a. ⁹ Jáchí coó nacandaa ini na cúu cuéntá mé á ña cáhí tuhun Ndióxi nu cáhí a ña nditacu tucu Jesús. ¹⁰ Tá nandihí já ndáca táhan ndíví da naxica tuun xihín Jesús cán nandicó coo da vehe nuú nasanduu na.

*Tá naxini María, ña ñuu Magdala Jesús
(Mr. 16:9-11)*

¹¹ Ta nani nayaha tóco ndihi ña yóho, nandicó coo María mé nuú nasandacaan yiquí cuñu Jesús. Sácu ñá íin ñá yuhú cáva cán. Ta nani sácu ñá nacandayi ñá ndicoto nihni ñá ini cáva cán. ¹² Já naxini ñá ivi táto Ndióxi, ña ndíxi jahmá yaa. Ndáa ndúu coo a nuú nasahiin yiquí cuñu Jesús: in a nuú nasahiin jini Jesús ta inga nuú nasahiin sahá. ¹³ Anda já nandaca tuhún táto Ndióxi cán María já nacachi a já xihín ñá:

—Ndá cuéntá queá sácún —nacachi a.

Já nacachi ñá já xihín á:

—Sácu u jáchí naquehe na yiquí cuñu Jesús, xitoho i ta co xini ndájá nasacu na ña —nacachi ña.

¹⁴ Tá jacá nacachi uun ñá ña yóho já nandicoto nihni ñá já naxini ñá in a cándichi a nu ñá já va joo coó nandicuni ña ña cúu á Jesús. ¹⁵ Anda já nandaca tuhún Jesús ña já nacachi a já xihín ñá:

—Ndá cuéntá queá sácún. Yo já ndínducún —nacachi a.

Ta nacahan María ña mé da cahan xihín ñá cúu dá da ndáá mé yitó cuíhi cáa cán. Sahá ña cán queá já nacachi ñá já:

—Tá natavún yiquí cuñu Jesús ña nasandacaan ini cáva yóho, caxi tuhún xihín i ndájá nasacún ña já ná cuhun i ndiquehe e ña —nacachi María.

¹⁶ Anda já nacachi Jesús já xihín ña:

—María.

Anda já nacava nuu ñá já nandicuni ñá Jesús ta nacahan ñá tuhun hebreo xihín á já nacachi ñá já:

—Raboni —mé tuhun yóho cúni cachi a maestro.

¹⁷ Já nacachi Jesús já xihín ña:

—A tíin tuún yehe. Jáchí a ñaha toho ndindita i cuhun i indivi nu íin Ndióxi, tátá i. Joo cuáhán caxi tuhún xihín na cúu cuéntá mí i ña cuhun i nu íin Ndióxi, tátá i, mé a cúu tátá mé ndó viti. Cúu á Ndióxi nu mí i ta cúu ri a Ndióxi nu mé ndó —nacachi Jesús.

¹⁸ Anda já ndáva María, ña ñuu Magdala nasahan ñá nandicani ña nuú na naxica tuun xihín Jesús cán ña naxini ñá mé á. Ta nandicani ñá ña nacachi Jesús xihín ña.

*Tá naxini na naxica tuun xihín Jesús mé á
(Mt. 28:16-20; Mr. 16:14-18; Lc. 24:36-49)*

¹⁹ Ta tá nacuaá mé quivi domingo cán já nanditútú tóco ndihi na naxica tuun xihín Jesús cán. Ñúhu tuun na ini vehe ta nachicaji tuun na yéhe jáchí yíhvi na xinu na Israel cán tiin ñahá na. Ta in cuití naxinu coo Jesús nu ná ta nandaca ndichi a mahñú ndaa nu ndúu na cán. Já nacahan Ndióxi a xihín ná já nacachi a já:

—Ná coo vaha ini ndó —nacachi a.

²⁰ Ta tá nacachi a ña yóho já najánaña ndáha á xihín yicá ndicá a nu ná ña ná candaa ini na ña jivi cúu mé á. Ta nacajii íni na tá naxini na a. ²¹ Tá nandihí já nacachi tucu Jesús já xihín ná:

—Ná coo vaha ini ndó. Tá quiahva nacaja Ndióxi, tátá i nachindahá a yehe ñuyiví yóho quiahva já chindahá ri yehe va ndohó cuhun ndo caxi tuhun ndó xihín ñayivi saha mí i —nacachi Jesús.

²² Anda já nativi a nu ná já nacachi a já xihín ná:

—Ndiquehe ndó ínima yii Ndióxi. ²³ Ta tá ná caja cáhnu ini ndó sahá cuachi ñayivi, na cán cúu na sa nacaja cáhnu ini Ndióxi saha. Ta tá ná a cája cáhnu ini ndó sahá cuachi, na cán cúu na coó nacaja cáhnu ini Ndióxi saha —nacachi Jesús.

Tá naxini xihín nuu Tomás Jesús

²⁴ In táhan da naxica tuun xihín Jesús, da naní Tomás, da cahan na cuatí xihín cán, coó toho da nasahiin xihín na cán tá

naquixi Jesús nu ndúu na. ²⁵ Tá nandihí já nacaxi tuhun na java cán xihín dá já nacachi na já:

—Naxini nde Jesús, xitoho í —nacachi na.

Já nanducú ñehe Tomás tuhun nu ná já nacachi da já xihín ná:

—A cándusa toho i ña cáchí ndo janda quiahva ná cuni xihín nuú i ndáha Jesús ta já jáquihvi i nducu ndahá i ini yávi nuú naquihvi clavo nacaja na cán. Ta xíní ñúhú jáquihvi i nducu ndahá i ini yávi nacaán na yicá ndícá a cán. Anda jávi candúsa i ndohó —nacachi da.

²⁶ Tá nayaha una quivi já nandique táhan tucu na naxica tuun xihín Jesús cán ini in vehe. Ta mé tañu já nasahiin Tomás xihín ná. Ta quiahva já nasaji tuun tucu na yéhe vehe nu ñúhu na cán. Anda já in cuití naxinu coo Jesús nu ná ta nandaca ndichi a mahñú na cán ta nacañan Ndióxi á xihín ná já nacachi a já xihín ná:

—Ná coo vaha ini ndó —nacachi a.

²⁷ Tá nandihí já nacachi a já xihín Tomás:

—Naha quíi jáquihvi nducú ndáhun ini ndahá i ta candehé ini ndahá i nuú naquihvi clavo. Ta jáquihvi nducú ndáhun yicá ndícá i já ná cunún nuú najándicuehe na yehe. A cáhvi ivi joho inún jáchi xíní ñúhú candúsún yehe —nacachi Jesús.

²⁸ Anda já nacañan Tomás já nacachi da já:

—Mé ndó cúu xitoho i ta cúu ndó Ndióxi ña cája cáhnu i —nacachi da.

²⁹ Anda já nacachi Jesús já xihín dá:

—Mé a ndaa cándúsún yehe viti jáchi naxinún yehe. Joo cajii ini ñayivi, na cándusa yehe vatí coo i xíní na xihín nuu ná —nacachi Jesús.

Cáñan Juan ndá sahá nacañi da libro yóho

³⁰ Cuahá ndivaha java ga ña xitúhún nacaja Jesús nuú na naxica tuun xihín a cán vatí coo ná cahyi a nu libro yóho. ³¹ Joo ña yóho nacañi a já ná candúsa ndó ña cúu Jesús da nachindahá Ndióxi cacomí cuénta sahá ñayivi, mé a cúu in túhún jini já jahyi Ndióxi. Ta sahá ña candeé ini ndó mé á cuu catacu ndó anda ama cáa quivi.

21

Náha Jesús mé á nuú usa táhan na naxica tuun xihín a cán

¹ Tá sa nayaha ña yóho já nanaha tucu Jesús mé á nuú na naxica tuun xihín á nani nasanduu na yati yuhú tañuhú naní Tiberias cán. Ta quiahva joho nasahiin a. ² In tañu ndúu tútú Simón Pedro xihín Tomás, da cáñan na cuatí xihín cán. Ta jári ndúu Natanael, da ñuu Caná cuénta Galilea cán xihín ndíví da cúu jahyi Zebedeo cán. Ta nasanduu ri inga ivi ga táhan da naxica tuun xihín Jesús. ³ Anda já nacañan Simón Pedro xihín tóco ndihi na cán já nacachi da já xihín ná:

—Cuhun i tavá i tiyacá —nacachi da.

—Cuhun ri ndehe va tavá nde tiyacá xuhun —nacachi na cán xihín dá.

Já nandihvi ndihi na ini barco cuahñan na tavá na tiyacá. Joo coo tiyacá natavá na mé ñuu cán. ⁴ Ta tá sa cuahñan ndúcú tivi já nacañaha Jesús yuhú ticuú cán. Joo na naxica tuun xihín a cán coo xini na ña cúu á Jesús. ⁵ Anda já nacañan Jesús ndaca tuhún á na já nacachi a já xihín ná:

—Á coo toho tiyacá natavá ndo, ñani —nacañan a.

—Coo mé rí ná tavá nde —nanducú ñehe na tuhun nu á.

⁶ Anda já nacachi tucu Jesús já xihín ná:

—Jácana tucu ndó ñunu ndó chí xoo cuaha barco jan já tavá ndó ri —nacachi a.

Anda já najácana na ñunu ná cán xoo cuaha barco ta tá nandihí chí coo ndéé na tavá na ñunu cán jáchi a juu quiahva nachutú ndaa ña xihín tiyacá. ⁷ Anda já nandicahñan yehe, da quihvi ndivaha ini mé a cán já nacachi i já xihín Pedro:

—Cúu á Jesús, xitoho í —nacachi i.

Tá naxini joho Simón Pedro ña cúu a cán Jesús já nandicandixi da cotó da jáchi coo toho cotó da ndíxi da, nduu. Tá nandihí já ndáva da cuahñan da jitá da ticuú chí yuhú tañuhú cán. ⁸ Tá nandihí já naxinu coo java ga na naxica tuun xihín Jesús cán xihín barco na chí yuhú tañuhú já ñúhu na ñunu nachutú xihín tiyacá cán nasaa na janda yuhu. Jáchi tátuhun in ciento metro nasandichi barco na yuhú tañuhú cán tá natavá na tiyacá. ⁹ Tá naxinu coo na cán

nu ñúhu já naxini na cáyi ñúhu. Ta naxini na cánúu in tiyacá yáta rí nu ñúhu cán. Ta naxini na ña sa ín pan cuxu na viti. ¹⁰ Anda já naxachi Jesús já xihín ná:

—Taxi ndó java tiyacá, rí jacá natavá ndó jan —naxachi a.

¹¹ Anda já ndáva Simón Pedro nasahan da nandaa da jata barco cán já ñúhu da ñúnu, ña naxutú ndaa xihín tiyacá náhu cán, naxinu da janda yúhu. Ta nasacuu rí in ciento ivi jico sahun uni. Ta vatí cuaha ndivaha cúu rí coó natahnda ñúnu nuú nasañuhu rí cán. ¹² Anda já naxachi Jesús já xihín ná:

—Naha ndó cajini ndó —naxachi a.

Ta ni in túhún na cán coó nasahan ndeé ini na ndaca tuhún na yo cúu mé á. Jáchi sa naxandaa cáxi ini na ña cúu á Jesús, xitoho na. ¹³ Tá nandihí já natiin Jesús pan cán já nasahnda java ña já nasahan ña nu ná. Ta quiahva já naxaja ri a xihín tiyacá va, nandicahnda ri já nasahan rí nu ná.

¹⁴ Xihín ña yóho naxinu uni tañu nanaha Jesús mé á nuú na naxica tuun xihín á janda naní nanditacu tucu a.

Cáhan Jesús xihín Simón Pedro

¹⁵ Tá nandihí naxijini na já nandaca tuhún Jesús Simón Pedro já naxachi a já xihín dá:

—Simón, da cúu jahyi Jonás á quíhvi ini chágún yehe a juú ga na java yóho —naxachi a.

Já naxachi da cán já:

—Mé ndó cúu ndó xitoho i ta sa xini vaha ndó ña quíhvi ini i ndohó —naxachi da.

Já naxachi Jesús já xihín dá:

—Xini ñúhú candaa vahún na cúu cuénta mí i tá quiahva ndáa vaha pastó ndicachi válí jana dá —naxachi a.

¹⁶ Anda já naxachi tucu Jesús já xihín dá:

—Simón, da cúu jahyi Jonás, á quíhvi inún yehe —naxachi a.

Anda já naxachi da já xihín á:

—Mé ndó cúu ndó xitoho i ta cándaa vaha ini ndó ña quíhvi ini i ndohó —naxachi da.

Já naxachi Jesús já xihín dá:

—Xini ñúhú candaa vahún na cúu cuénta mí i tá quiahva ndáa vaha pastó ndicachi jana dá —naxachi a xihín dá.

¹⁷ Anda já nandaca tuhún tucu a da táhnda uni já naxachi a já xihín dá:

—Simón, da cúu jahyi Jonás, á mé a ndaa quíhvi inún yehe —naxachi a.

Tá naxini mé Simón Pedro cán ña naxinu uni táhnda ndaca tuhún Jesús da sahá ña yóho já naxacuéha ini da já naxachi da já xihín Jesús:

—Jesús, mé ndó xini vaha ndó tóco ndihí ñaha. Mé ndó xini vaha ndó ña quíhvi ini i ndohó —naxachi da.

Já naxachi Jesús já xihín dá:

—Xini ñúhú candaa vahún na cúu cuénta mí i tá quiahva ndáa vaha pastó ndicachi jana dá. ¹⁸ Jáchi mé a ndaa ná cahan i xuhun. Tá nasacuún ta yúta chá já ndicandisún jáhmún ña cúnun ta já cuahún ndá nu cuni mún cuhun. Joo tá ná cayatún já jácaún ndáhun ta inga na jácandixi yohó jáhmún. Ta já tiin ndaa na yohó cuhún xihín ná nuú co cuni mún cuhun —naxachi a.

¹⁹ Xihín ña yóho cuni Jesús ndicani a nu Pedro cán ndá quiahva quivi da ña ná caja cáhu da Ndióxi. Tá nandihí já naxachi Jesús já xihín dá:

—Xini ñúhú candicún yehe —naxachi a.

Ndaca tuhún Pedro saha Juan nu Jesús

²⁰ Nani xica na cáshan na xihín Jesús já nandicoto nihni Pedro chí jata dá já naxini da tácaa Juan vaxi da. Mé Juan yóho cúu dá da quíhvi ndivaha ini mé Jesús. Ta sa mé Juan yóho cúu yehe, da nasahin coo jin á tá naxijini na vicó pascua. Ta cúu yehe, da nandaca tuhún mé á saha ndá da cúu da jicó túhún ñahá. ²¹ Tá naxini Pedro ndico da yóho jata ná já nandaca tuhún da Jesús já naxachi da já xihín á:

—Ta ndaja coo Juan yóho, xitoho i. Ndaja quivi da —naxachi Pedro.

²² Anda já nanducú ñehe Jesús tuhun nu dá já naxachi a já xihín dá:

—Tá cuni yehe ña ná catacu da janda quiahva ná xinu coo quivi ndicó coo i ñuyivi yóho, co ndítahan toho ndihí inún sahá. Ña ndítahan cajún quéa candicún yehe —naxachi a.

²³ Ta sahá ña naxachi Jesús ña yóho sahá ña cán quéa nandicuita nuu tuhun tañu tóco ndihí na naxica tuun xihín Jesús cán.

Ta cáhí nā sahá i ña a quíví toho i. Joo a juú toho ña yóho quéa cúní Jesús cachi a xihín ná. Ña nacachi Jesús quéa tá cúní mé á catacu u janda quiahva ná ndicó coo mé á, co ndítahan toho ndihi ini Pedro sahá ña cán.

²⁴ Ta jivi mé da cáhan nā saha cán cúu yehe, da cáhyí tóco ndihi ña yóho. Ta tóco ndihi na xíní nā ña cúu á ña ndaa.

²⁵ Cuahá ndivaha nuú ñaha nacaja chága Jesús. Tá ná cacu ini i cáhyí i tá in tá in ña nacaja mé á, cája i cuéntá a quéta toho ñuyíví yóho coo libro cahān sahá ña nacaja mé á. Já ná coo.

Tuhun vaha nacahyí Lucas sahá ña nacaja na apóstol

Nasahan Jesús tuhun a quixi ínima yii Ndióxi

¹ Jihna sa nacahyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña nacaja Jesús ta cáhan ndihi a sahá ña najánaḥa mé á tá nacasáhá cája chúun a ² ta janda tá nandaa cuahan indiví. Tá nasahiin a ñuyiví yóho ta cámani cūhun a indiví já nacaxi Jesús uxu ivi dataa cacuu da apóstol ña ná caja chúun na cuénta mé á. Ta nacaja ínima yii Ndióxi ña ná cuu jánaḥa Jesús nuú na cán ña ndítahan nu ná caja na. ³ Tá tá sa naxihí Jesús ta nanditacu tucu a já naxica nuu a ñuyiví yóho tixi ivi jícó quivi. Ta nanaḥa mé á nuú ndihi na cúu apóstol já ná candaa ini na ña mé a ndaa nanditacu tucu a. Tá najánaḥa nu ná ña cūni Ndióxi cacomí a cuénta sahá ñayivi.

⁴ Tá cámani ndaa Jesús cūhun a indiví já nasahiin a xihín na apóstol já nasahnda mé á chuun nu ná já cáchí a já xihín ná:

—Xíní ñuhú candati ndó ñuu Jerusalén yóho anda quiahva xinu ínima yii Ndióxi cañuhu a ini ínima ndo. Jáchi nasahan tátá i tuhun a nu ndo ña quixi ínima yii mé á ndacaan ini ínima ndo ña cán quea najánaḥa i ndohó ña nacachi mé á. ⁵ Mé a ndaa najácandúta Juan ñayivi xihín ticuú joo tixi chá quivi jándicutú Ndióxi ndohó xihín ínima yii mé á —cáchí Jesús xihín ná.

Tá nandaa Jesús cuahan indiví

⁶ Ta ndaja coo tá nataca na cán xihín Jesús já nacasáhá ndaca tuhún na mé á já cáchí na já xihín á:

—Jesús, xitoho nde, á viti quea quiahva ndó ñamani nuú nde, na Israel cacomí nde cuénta sahá mé nde já ná a cacomí ga gobierno ñuu Roma cuénta sahá nde —nacachi na xihín á.

⁷ Anda já nanducú ñehe Jesús tuhun nu ná já nacachi a já:

—Co ndítahan toho nu ndóhó candaa ini ndó ndá quivi caja Ndióxi, tátá yo ña jan.

Jáchi in tuhún mé á cuití va quea xini a ndá quivi yaha ña sáhdá mé á coo. ⁸ Joo ndítahan nu ndó candati ndó yóho anda quiahva ná quixi ínima yii Ndióxi cañuhu a ini ndó. Já ná nduu ndeé ini ndó ña ná cuu jánaḥa ndó nuú ñayivi sahá i. Anda já ndítahan nu mé ndó cahan ndó sahá i ñuu Jerusalén yóho xihín estado Judea xihín estado Samaria. Anda já quee ndó cūhun ndó cuahá ñuu xicá níi cúu ñuyiví jánaḥa ndó nuú ñayivi cán saḥa mí i —nacachi Jesús xihín ná.

⁹ Tá nandihí nacahan Jesús ña yóho xihín ná ta nani sádehé cáxi na cán nu Jesús ndíta na já nandaa cuahan indiví. Já naxinu in vico nachijahvi ñahá a chí coo naxini ga na mé á. ¹⁰ Ta nani ndíta na cán sádehé na nuú nandaa Jesús cuahan indiví já nandicoto nihni na ta sa ndíta ivi taa ndíxi jahmá yaa jin ná. ¹¹ Já nacachi da já xihín ná:

—Taa Galilea, ndávaḥa sádehé ndó indiví nuú nandaa Jesús cuahan. Jáchi tá quiahva naxini ndó nandindita cuahan indiví quiahva já cuni tucu ndó a ndicó coo tucu a ñuyiví yóho —nacachi ndíví da cán xihín ná.

Nacaxi na Matías caja da chuun ña najándacoo Judas

¹² Tá nandihí nandaa Jesús cuahan indiví já naquee na apóstol yucu nani yitó olivo cán já nandicó coo na ñuu Jerusalén. Ta mé yucu cán cándoo a tátuhun in kilómetro jatá ñuu Jerusalén. ¹³ Tá naxinu coo na ñuu Jerusalén cán já nandaa na vehe cánúu jícó jáchi mé vehe cán nasanduu too na. Tóco ndihí na nasanduu cán nasacuu Pedro xihín Jacobo xihín Juan xihín Andrés xihín Felipe xihín Tomás xihín Bartolomé xihín Mateo xihín Jacobo, da cúu jahyi Alfeo xihín Simón, da naxica cuénta cananista xihín Judas, da cúu ñani Jacobo. ¹⁴ Níi tiempo nasataca ndíhuxu in na yóho xihín ñani Jesús xihín María, náná Jesús xihín java ga najihí cacá tahví na nu Ndióxi.

¹⁵ Ta ndaja coo in quivi nataca tátuhun in ciento oco na cúu cuénta Jesús. Já nacandichí Pedro mahñú na cán ta já nacachi da já xihín ná:

16 —Candehé ndo, ñani i, na cúu cuéntá Jesús. Nasahiin tá iin nacachi ínima yii Ndióxi coo. Jáchí nacaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahan na vecaa. 17 Mé Judas yóho nasacuu da da naxica xihin yo ta nacaja chúun da cuéntá Jesús xihin yo. 18 Joo najicó tühún da Jesús ta naquehe da jiuhún sahá ña núu nacaja da. Ta xihín jiuhún cán naxeen da in ñúhu. Ta tá nandihí já najándicava ndayi da mé dá ta nandata tixi da chí nacana cuyu ndihí xiti da. 19 Tá nañehé ñayivi ñuu Jerusalén tuhun ña sa naxihí Judas cán já nachinúu na quiví mé ñúhu naxeen da cán cananí a Acéldama. Mé tuhun cán cúni cachi a yójo nuú naxita nii jáchí cán naxita nii Judas tá naxihí da. 20 Jáchí já cáhí in Salmo ndácaan ini libro yii Ndióxi tá nacahan saha Judas já cáhí a já:

Ná candoo ndáha vehe da, ta ni in ñayivi ná a canduu ga ini a. Ta sa mé cán ndácaan inga tucu Salmo ta cáhí a:

Inga tucu da ná ndicojo chuun nasandojo da, cáhí tuhun Ndióxi.

21 Anda já nacachi tucu Pedro já xihin ná: —Tañu mí yóho ndúu java na naxica nuu xihin yo tá naxica í xihin Jesús, xitoho í nani nasahiin a ñuyiví yóho. 22 Java na yóho nasanduu na xihin yo tá najácandúta Juan Jesús xihín ticuiví ta nasanduu na xihin yo janda quiahva nandaa Jesús cuahan indiví. Ña cán quéa ndítahan nu yó caxí in da tañu na yóho já ná caca da xihin yo caxi tuhun da nuú ñayivi ña nanditacu tucu Jesús — nacachi Pedro xihín na cán.

23 Sahá ña cán quéa nacana ivi da tañu ñayivi cán. Anda já nasacu ini na caxi na in da tañu ndiví da. In da nacana na cán nasananí José ta naní tucu da Barsabás ta inga tucu quiví dá nasacuu Justo. Ta da inga cán nasananí Matías. 24 Anda já naxica tahví ndihí na cán nu Ndióxi já nacachi na já:

—Tátá Ndióxi, sa xini ndó ndía cáhvi ini tóco ndihí ñayivi. Ña cán quéa caja ndó ñamaní jána ndó nuú ndé ndá da cúu da sa nacaxi ndó 25 cacuu apóstol ña ná

caja da mé chuun ña najándacoo Judas. Mé Judas nacaja da cuachi cáhnu nu ndo ña cán quéa viti in da nu ndítahan nu dá coo da — nacachi na xihin Ndióxi.

26 Anda já nasajiquí na ndá da cuu quee vaha. Naquee vaha Matías chí nandique táhan da xihín na uxu in apóstol cuéntá Jesús cán.

2

Tá nanuu ínima yii Ndióxi jatá na cúu cuéntá Jesús

1 Tá naxinu coo quiví coo víco Pentecostés já nanditaca ndihí na cúu cuéntá Jesús ndúu tútú na ini in vehe. 2 In cuití naxini johó na in a níhi naquixi a chí indiví. Tá quiahva níhi xícó tachí ndeé quiahva já níhi a naquixi a. Ta já naxini johó ndihí na ndúu coo vehe cán ña. 3 Anda já naxini na in ñaha ña cáa tá quiahva cáa ñuhú ita. Anda já nanditahnda ña nasandójó a jiní in in na cán. 4 Ta nachutú ndaa ínima ndihí na cán xihin ínima yii Ndióxi. Chí nacasáhá nandicahan na tuhun, ña coó nasatiahva na jáchí já nacaja ínima yii Ndióxi.

5 Mé tiempo já nasanduu java na Israel, na cája cáhnu Ndióxi ñuu Jerusalén cán. Mé na Israel yóho naquixi na ndijáá ñuu jatá ñuyiví. 6 Tá naxini johó na cán ña níhi xójo cúu cán já nacasáhá ndítaca na. Joo tá naxinu na nu ndúu na cúu cuéntá Jesús cán já nacatontó na jáchí naxini johó na cahan na cúu cuéntá Jesús cán mé tuhun cahan na vatí coo cúu ná na ñuu na. 7 Chí nacatontó ndivaha na cán já nacasáhá ndítuhún xihin táhan na já cáhí na já:

—Tóco ndihí na cúu cuéntá Jesús yóho cúu ná na naquixi estado Galilea. 8 Ndá cuéntá quéa cahan na tuhun cahan in in mí. 9 Jáchí sa jín sa jín ñuu naquixi mí. Java í naquixi nación Partia ta java í naquixi nación Media ta java í naquixi nación Elam ta java í naquixi nación Mesopotamia ta java í naquixi estado Judea ta java í naquixi estado Capadocia ta java í naquixi estado Ponto ta java í naquixi estado Asia 10 ta java í naquixi estado Frigia ta java í naquixi estado Panfilia ta java í naquixi nación Egipto ta java í naquixi ñuu cuéntá Africa, ña xicá chága a juú ga ñuu Cirene. Ta

ndúu java ñayivi ñaquixi ñuu Roma yóho. Ta java na cán cúu ná ña ñaquixi chichi Israel ta java na co cúu ná ña ñaquixi chichi Israel joo cája cáhnu na Ndióxi, mé a cája cáhnu mí. ¹¹ Ta sa mé yóho ndúu java ñayivi ñaquixi nación Creta xihin nación Arabia. Ta xini johu ndihí cáhan ña cúu cuénta Jesús yóho tuhun cáhan in in mí. Ta cáhan ña sahá ñaha xituhún cája Ndióxi xihin ná — cáchi ndihi ña sándehe cán.

¹² Ta chí co xini ña ndúu sándehe cán ndia cahan ña sahá ña cúu cuénta Jesús cán. Jáchi ñacatontó ndivaha na janda ndaca tuhun táhan mé ná ndúu na já cáchi ña já:

—Ndia cuni cachi ña cája ña yóho.

¹³ Joo java ña ndúu cán ñacasahá sácu ndaa ñahá ña já cáchi ña já:

—Ña xihí va cúu ña yóho.

Cáhan ndojó Pedro nuú ñayivi

¹⁴ Anda já ñacandichi Pedro xihin ndihuxu in ga ña apóstol cán já ñacasahá cáhan cóhó ña xihin tóco ndihi ña cán já cáchi ña já:

—Cuni johu vaha ndó ña cáhan i xihin ndó, ñayivi Israel, ña estado Judea xihin ndihi ndó ña tóho ndúu ñuu Jerusalén viti.

¹⁵ Mé ndó cáhan ndo ña ñaxini tóco ndihi ñayivi ndúu yóho. Joo co cúu ná ña ñaxini jáchi jacá caa in naha va queá. ¹⁶ Ña cája ña yóho queá ñacachi ña naní Joel sanahá tá ñacahan ña xihin ñayivi ña ndítahan coo. Mé ña cán cúu ña ñacachi ña cáchi Ndióxi coo já ñacachi ña já:

¹⁷ Tá sa ñacayati quivi ndihi saha ñuyivi yóho já cáchi Ndióxi já:

“Chindahá i ínimá yii mí i cañuhu a ini tóco ndihi ñayivi.

Ta tóco ndihi jahyi yii ndo xihin jahyi jíhi ndo caxi tuhun na xihin ndó tuhun cahan i xihin ná.

Ta ña tacú cuni ndímáhnú ña ñaha ñaha i nu ná.

Ta ña yatá quixi sani nu ná caja i.

¹⁸ Ta mé tiempo já chindahá i ínimá yii mí i ña ná cañuhu a ini ña cája chúun cuénta mí i, á cúu ná ña á cúu ná ñaha.

Ta caja i ña ná cahan ña sahá i nuú ñayivi.

¹⁹ Ta cuahá ndivaha ña náhnú caja i indivi xihin ñuyivi ta cuni ñayivi ña.

Cuni na ñi xihin ñúhu cáyi xihin ñihma ña ndindita tátuhun vico núhú.

²⁰ Ta canaá nuú candii ta ndicuahá ñi nuú yoo.

Ña yóho cacuu ña yaha tá sa ñacayati quivi xinu yehe, mé á cúu xitoho na caja vii i sahá ñayivi ñuyivi.

Mé quivi cán cacuu a in quivi cáhnu ndivaha.

²¹ Joo cacu ndaa ínimá tóco ndihi ña ná ndicahán quivi i”, ñacachi Ndióxi ini libro ñacahyí Joel sanahá —ñacachi Pedro.

²² Anda já ñacachi tucu Pedro já:

—Cuni johu vaha ndó tuhun cáhan i xihin ndó, ña Israel. Jáchi cáhan i saha Jesús, mé a ñaquixi ñuu Nazaret. Jáchi ñatahan ini Ndióxi xihin tóco ndihi ñaha ñacaja mé Jesús. Ta ñaxini xihin nu ndó ña náhnú xihin ña xituhún ñacaja mé á nu ndo xihin ndée ñacahan Ndióxi nu a. Ta sa cándaá vaha ini mé ndó ña yóho. ²³ Joo tá ñatiin ndó Jesús já najáxinu coo ndó ña ñacacu ini Ndióxi coo sanahá ndivaha. Ta mé ndó ñandiquiahva ndó Jesús ndáha ña quini. Ta ñacaja ndó ña ná cata caa na Jesús ndica cruxu. ²⁴ Joo najánditacu Ndióxi Jesús já ná a cóo a nu ndóho ini ña sa ñaxihí jáchi ni in ñaha a cúu caja ña ná coo Jesucristo nu ndúu ña sa ñaxihí. ²⁵ Sanahá ndivaha ñacahyí rey David sahá Jesús já ñacachi ña já:

Xini vaha i ña ní tiempo íin ndó xitoho i, xihin i,

ta íin ndó xoo cuáha i chindeé ndó yehe saha ña cán queá co yíhví toho i.

²⁶ Sahá ña cán queá ñacajii ndivaha ini i,

ta ñacahan vatá ndivaha i.

Jáchi vatí ná quivi i cacuu u ndii joo coo vaha ini i.

²⁷ Jáchi caja ndó ña ná nditacu tucu u já ná a cándo ña ínimá i nu ndúu ínimá ndii.

Ta ni a quiahva toho ndó ñamaní tahyi yiquí cuñu i jáchi cúu u jahyi máni ndo.

²⁸ Najánaha ndó nuú i ndaja caja i ña cuni ndo.

Jáchutú ndaa ndó ínimá i xihin ña cájii ini i jáchi já íin va ndó xihin i, ñacahyí

David sanahá ndivaha —cáchi Pedro xihín na ndúu cán.

²⁹ Anda já nacachi tucu Pedro já xihín ná: —Candehé ndo, ñani i ná ndicani i nu ndo ña cúní cachi ña yóho. Sa cándaá cáxi iní ña sa naxihí David, da nasacuu tásáhnú jícó yo. Ta najánduxu na da ta ín yíi va nuú najánduxu na da. ³⁰ Nacachi David ña yóho jáchi nasacuu da profeta. Jáchi mé Ndióxi quéa nasahan tuhun a nu dá ta nacachi a xihín dá ña quixi Jesucristo chichi mé dá ta nacachi a ña cacomí mé Jesucristo cán cuéntá sahá ñayivi Israel. ³¹ Sa nacandaá ini David ña caja Ndióxi chí nuu sahá ña cán quéa nacachi da xihín ñayivi ña nditacu tucu Jesús tá nandihí quivi a. Ta nacaxi tuhun David nu ná ña a jándicoo toho Ndióxi ínima Jesús nu ndúu ínima ndii ta ni a quiahva toho mé á ñamani tahyi yiquí cuñu mé Jesús cán. ³² Ta viti cándaá iní ña naxinu tuhun nacahyi David jáchi naxini tóco ndihí ña najánditacu Ndióxi Jesús. ³³ Ta najándindita cáhnú ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínima yíi mé á nu Jesús jáchi ña yóho cúu tuhun nasahan Ndióxi sanahá. Ta tóco ndihí ña naxini ndó xihín nuu ndo ta naxini johó ndó yóho cúu á ña naquixi cuéntá Ndióxi. ³⁴ Ta sa xíni yo ña co cáhan David saha mé dá jáchi a juú David cúu da nandaá indiví, vaha. Sa mé David cúu dá da nacachi tuhun yóho:

Nacachi Ndióxi xihín xitoho i:
“Naha xoo cuáha jíin i cacoún,

³⁵ janda quiahva ná cacu u na cándají yohó tixi sahun”, nacachi Ndióxi — já nacahyi David sanahá.

³⁶ Anda já nacachi tucu Pedro já:

—Ña cán quéa cúní ña ná candaá ini tóco ndihí ndó ña cáhan i xihín ndó, na Israel. Mé Jesús, mé a nacata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuéntá sahá ñayivi —nacachi Pedro xihín na ndúu cán.

³⁷ Tá naxini johó na cán ña nacachi Pedro xihín ná ivi laá natahvi ini na já nacasáhá ndáca tuhún na Pedro xihín java ga na apóstol cán já cáchi na já xihín ná:

—Ndía ndítahan caja nde, ñani, na cúu cuéntá Jesús.

³⁸ Anda já nanducú ñehe Pedro tuhun nu ná já cáchi da já xihín ná:

—Xíni ñúhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já quéa ná caja cáhnú ini Ndióxi sahá cuachi ndó ta já ñehe táhvi ndó quiahva Ndióxi ínima yíi mé á nu ndo. ³⁹ Jáchi nasahan Ndióxi tuhun a caja ña jáchutú ndaa ínima ndo xihín ínima yíi mé á ta quiahva já caja ri a xihín jahyi ndó ta jári xihín na tóho, na ndúu xíca. Jáchi já caja mé á xihín ñayivi nacaxi mé á —nacachi Pedro xihín ná.

⁴⁰ Ta cuahá ndivaha java ga tuhun nacahan Pedro xihín ná ta já najácahan da na já nacachi da já xihín ná:

—Candee ini ndó Jesús já ná jácacu a ndohó já ná a cühun ndó indayá nuu cühun ñayivi cája cuachi —nacachi Pedro xihín ná.

⁴¹ Cuahá ñayivi nandiquehe vaha na tuhun nacahan Pedro ta nacandee ini na Jesús. Ta mé quivi já nacandúta tátuhun uní mil ñayivi já nandihvi na íchi cuéntá Jesús. Ta nandique táhan na cán xihín java ga na cúu cuéntá Jesús. ⁴² Ta ndinuhu ini na jácuaha na ña jánaha na apóstol nu ná. Ta cándusa táhan tóco ndihí na ta ndítutú na xíca tahvi na nu Ndióxi. Ta níi tiempo sá taca na ndicahnda java táhan na pan cuxu na.

Ña nacaja ñayivi tá nacasáhá na ndíco na íchi cuéntá Jesús

⁴³ Mé tiempo já nasahan Ndióxi ñamani nuu na apóstol cán ña ná cuu caja na cuahá ndivaha ñaha xituhún xihín cuahá ña náhnú ndivaha ta chí cántontó tóco ndihí ñayivi tá xíni na ña yóho. ⁴⁴ Ta tóco ndihí na cúu cuéntá Jesús cán in nanduu ndihí na ta ndicahnda java ñaha nu táhan na. ⁴⁵ Ta jícó na ñaha cómi na ta já ndicahnda na jiuhún na nuu na ndímaní ñaha nuu. ⁴⁶ Ta ndijáá níi quivi ndítutú na cája cáhnú na Ndióxi veñuhu cáhnú ndácaan ñuu Jerusalén cán. Ta tá ndíque táhan na vehe já ndicahnda java táhan na pan cuxu na ta cávatá ndivaha xihín táhan na cája na já. Ta ni in na co ndíñehe jícó mé. ⁴⁷ Nacaja cáhnú na Ndióxi ta tóco ndihí ñayivi ndúu ñuu Jerusalén ín vaha ini na xihín na cán. Ta nini quivi nacaja Ndióxi ña nandicuahá na cúu

cuéntá Jesús, mé na jácacu ndaa Ndióxi ínima.

3

Ndivaha in taa réncō cāja Pedro

¹ In quiví tátuhun cāa uní sahini cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caça tahví na nu Ndióxi. ² Ta mé yuyéhé ñuhu cán ín coo ín da naxihí tuchu saha. Ta janda tá nacacu da cáa da já. Ta ndijáá ní quiví ñéhe na da cuahan da yuyéhé ñuhu cáhnu naní yéhé ñúchí. Ta cán ín coo da sáti da nuú ñayivi ndíhvi ini veñuhu cán. ³ Ta tá naxini da réncō cán cuahan quíhvi Pedro xihín Juan ini veñuhu cán já nacata ñee da ndáha dá nu ná sáti da. ⁴ Anda já nandicoto nihni Pedro xihín Juan nuú da réncō cán já nacachi Pedro já xihín dá:

—Candehé nuú nde.

⁵ Anda já nasandehé cáxi da cán nu ná jáchi cáhán da quiahva na jjuhún nu dá.

⁶ Joo já nacachi Pedro xihín dá já:

—Coó toho jjuhún i quiahva i nuun joo ña ín nuú i ña cán quiahva i nuun. Ín ndivaha ndée Jesucristo, mé á ñuu Nazaret sahá ña cán quéa sáhdá i chuun nuun ña ná candichún cacún —nacachi Pedro xihín dá.

⁷ Anda já natiin Pedro ndahá cuáha da cán ta nandíhehe da da já nacandichi da chí ivi laá nandíhvi ndée saha dá já nanditacu tuchu saha dá. ⁸ Anda já nacandita mé da nasahíin réncō saha cán já nacandichi da ta já nacasáhá da xíca da. Cándita da cāja cáhnu da Ndióxi nandíhvi da xihín ná ini veñuhu cán. ⁹ Ta tóco ndihi ñayivi ndúu cán naxini na cándita da cāja cáhnu da Ndióxi. ¹⁰ Ta a juú quiahva nacatóntó na ta nayíhvi na sahá ña naxini na cán. Jáchi nandicuni na da cán cúu da da nasacuu réncō, da nasahíin coo sáti yéhé ñuhu naní yéhé ñúchí cán.

Cáhan ndojó Pedro nuú ñayivi ndúu yéhé ñuhu cáhnu cán

¹¹ Mé da nasacuu taa réncō cán natiin tuun da Pedro xihín Juan ta chí coo cúni da janí ñahá da. Ta tóco ndihi ñayivi nacatóntó na xínu na cuahan na candehé na da réncō

cán nu ndíta da yéhé ñuhu, ña naní yéhé Salomón. ¹² Tá naxini Pedro nacasáhá táca cuahá ñayivi nu ín da já nacasáhá cáchi da já xihín ná:

—Cuni johō vaha ndó, ñayivi Israel. Cátóntó ndivaha ndó sandehé ndó ndehé jáchi cáhán ndo ña nandaja vaha nde da yóho xihín ndée mé nde. Á tá coó ta cáhán ndo ña nandaja vaha nde da sahá ña ndícahán ndivaha nde Ndióxi. ¹³ Joo coo ín toho a tá quiahva cáhán ndo. Jáchi mé Ndióxi, ña nacaja cáhnu Abraham xihín Isaac xihín Jacob, tásáhnu jícó yo nandaja vaha mé á da yóho. Ta mé Ndióxi cán nacaja ña ná nduu cáhnu ndivaha Jesucristo, jahyi mé á. Joo mé ndó nandiquiahva ndó a ndahá na jutixia. Ta tá cúni Pilato janí da Jesús já nasaji nuu ndó nu dá cāja da ña. ¹⁴ Mé Jesús cúu á ña yii ndivaha ta ndinuhu ña ndaa cuití va cāja. Joo mé ndó nacandají ndó a ta naxíca ndó nu Pilato ña ná janí da in da sáhní ndii. ¹⁵ Tá nandíhi já nasahní ndó Jesús, mé a cúu cāja ña ná catacu ñayivi anda ama cáa quiví. Ta vatí naxihí a nasacuu a ndii joo najánditacu tucu Ndióxi mé á. Ta cándaa cáxi ini nde ña cáhán nde ña ndaa xihín ndo. ¹⁶ Ta sa mé Jesús cúu á ña cándeé ini nde. Ta sahá ña cándeé ini nde mé á sahá ña cán quéa nandivaha da cándichi nu ndó yóho. Ta xíni ndó da nandivaha yóho ta cándaa cáxi ini ndó nandíhvi ndée saha dá sahá ña cándeé cáhnu ini nde Jesús.

¹⁷ Candehé ndo, ñani i. Sa xíni vaha nde viti ña tá nasahní ndó Jesús coo nacandaa ini ndó ndía nacaja ndó. Ta ni na cúu jefe ndo coo nacandaa ini na ndía nacaja na. ¹⁸ Joo xihín ña yóho najáxinu coo Ndióxi tuhun nasahan nu yó sanahá tá nacachi na profeta cuéntá Ndióxi ña ndítahan ndoho ini Jesucristo, mé a natchindahá Ndióxi cacomí cuéntá sahá ñayivi. ¹⁹ Sahá ña cán quéa xíni ñúhú jándacoo ndó cuachi cāja ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já cāja Ndióxi ña ná ndivaha ini ndó. ²⁰ Janda jihna nacaxi Ndióxi Jesucristo ná chindahá a ña ná quixi a ñuyíví yóho já ná cacomí a cuéntá sahá ñayivi. ²¹ Ta viti ín Jesucristo indiví ndáti a tandaa quiví cāja Ndióxi ña

nduu víi tóco ndihi ñaha. Já ndítahan coo jáchi sanahá ndivaha ñacahan Ndióxi xihín na profeta mé á sahá ña yóho ta mé ná ñacaxi tuhun na ña nuú ñayivi. ²² Ta ña yóho cúu tuhun ñacahan Moisés nu tásáhnú jíco yo já ñacachi da já xihín ná: “Tañu mé ndó jan cana in profeta caja Ndióxi, xitoho í tá quiahva ñacaja mé á xihín mí i. Ta coto a quéhe núu ndó ni in túhún tuhun cahan mé profeta jan xihín ndo. ²³ Jáchi tóco ndihi ñayivi, na co cúní candúsa tuhun cahan mé profeta jan ndihi saha ná ta a ñéhe táhvi ga na coo na xihín na ñuu Ndióxi”, ñacachi Moisés sanahá —ñacachi Pedro xihín ná.

²⁴ Ta ñacahan chága Pedro xihín ná já cáchi da já xihín ná:

—Tóco ndihi na profeta ñacahan na sahá ña yáha tiempo viti. Ta profeta Samuel cúu da ñacasahá cahan sahá ña yóho. Ta tóco ndihi java ga na profeta ñaquixi tá nu ndihí ñacahan na cán saha tiempo viti. ²⁵ Náchindahá Ndióxi na profeta sanahá ña ná caxi tuhun na xihín yo ña sahan Ndióxi tuhun a nu yó, na Israel. Ñacaja vaha mé á saha yo tá ñacachi a já xihín Abraham, da ñasacuu tásáhnú jíco yo: “Xihín ña caja na quixi chíchún chí nuú já caja cuahá ndivaha i ñamaní xihín tóco ndihi ñayivi ndúu ndijáá ñuyíví”, ñacachi a. ²⁶ Tá najánditacu Ndióxi Jesucristo, jahyi mé á jihna ñuhú ga nu mé ndó, na Israel náchindahá a ña já ná caja yíi á ndohó já ná jándicoo ndó cuachi cája ndó —ñacachi Pedro.

4

Ndíquehe Pedro xihín Juan saha mé dá nuú na sacuahá veñuhu

¹ Ta janda cahan chá va Pedro xihín Juan nuú ñayivi cán já ñaxinu java da cúu jutú xihín da sáhdá chuun nu policia veñuhu cán. Ta tañu na yóho ñaxinu ri na saduceo. ² Xójo ndivaha ini na jáchi jánahá Pedro xihín Juan nuú ñayivi ña sa ñanditacu tucu Jesucristo. Ta xihín ña yóho náha ña vaxi quívi nditacu tucu ndii. ³ Sahá ña cán quéa ñatiin na cán Pedro xihín Juan ta ñataán na da vecaa. Ta cán ñacandoo da janda inga quívi itaan jáchi sa ñacuaá va. ⁴ Joo cuahá ndivaha ñayivi ñacandúsa tuhun ñacahan

Pedro ta xihín ña yóho ñandicuaña chága na cúu cuéntá Jesús. Jáchi na ñacandúsa cán ñasacuu na tátuhun uhun mil dataa.

⁵ Ta ndaja coo na cúu sacuahá nuú ñayivi Israel cán xihín na sacuahá veñuhu xihín na jánahá ley Moisés ñandique táhan ndihi na inga quívi itaan. ⁶ Ta tañu na cán ndacaan ri da naní Anás, da cúu sacuahá nuú jutú. Ta tañu na cán ñasandacaan ri Caifás xihín Juan xihín Alejandro xihín tóco ndihi na cúu na vehe na sacuahá nuú jutú cán. ⁷ Anda já ñatavá na Pedro xihín Juan vecaa. Ta ñéhe na da cuahan na nuú ñataca na cán ta ñasani ndichi na da mahñú na ñataca cán ta já ñandaca tuhún na da já cáchi na já xihín dá:

—Ndaja ñacaja ndó ñandaja vaha ndó da ñasaquíhvi saha cán. Yo já ñasahan ndée nu ndó ña cúu cája ndó ña yóho —cáchi na ndaca tuhún ñahá na.

⁸ Ta ñacaja Ndióxi ña ná ndicutú ndaa ínima Pedro xihín ínima yíi Ndióxi ña cán quéa ñacasahá da ndúcú ñehe da tuhun nu ná já cáchi da já xihín ná:

—Cuni johó vaha ndó, na sacuahá ñuu xihín na sacuahá veñuhu Israel. ⁹ Ñandaca tuhún ndó ndehe ndaja ñacaja nde ñandaja vaha nde da ñasaquíhvi saha cán. ¹⁰ Cuni johó ndó ná ndicani nde sahá ña yóho nu ndo ta já ná cuu candaá ri ini tóco ndihi ñayivi Israel ña mé dataa, da cándichi nu ndo yóho ñandivaha da xihín ndée Jesucristo, ña ñuu Nazaret. Mé a cán ñacata caa mé ndó ndica crúxu cán ta tá ñandihí já najánditacu ñahá Ndióxi. ¹¹ Ta mé Jesús yóho cúu á ña cahan tuhun Ndióxi saha, ña cúu á tátuhun yuu ndúhu, ña ñacandají na cávaha vehe. Ta mé ndó cúu ndó tátuhun na cávaha vehe cán, na ñacandají Jesús. Joo viti ñaxinu a cúu á tátuhun yuu ña ín chága saha ñacaja Ndióxi. ¹² Jáchi ni in túhún toho ñayivi ndúu ñuyíví a cúu jácacu mí ña ná a cúhun yó indayá. In túhún Jesucristo quéa náchindahá Ndióxi nu yo já ná cacu ndaa ínima yo —ñacachi Pedro xihín ná.

¹³ Tá ñaxini na sacuahá cán ña co yíhvi Pedro ni Juan ndíta da cahan da xihín ná já ñacatóntó na jáchi sa xíni na ña coó tiahva da tutu. Ta ñaxini na ña cúu dá da ndahví, da ñaxica xihín Jesús. ¹⁴ Ta ni co ñéhe ín na

sacuaḥa cán cachi na xihin Pedro ña cúu dá da tuhún jáchi sa nuu táhyi na já va cándichi da nandivaha saḥa cán. ¹⁵ Anda já natavá too na da cán já naçasáhá ndítuhún xihin táhan na. ¹⁶ Já cáchi na já:

—Ndía caja í xihin ndívi da yóho viti jáchi sa naçandaa ini ndihi ñayivi ñuu Jerusalén ña xituhún naçaja da. Ta ni mí, a cúu cachí ña cúu á ña tuhún. ¹⁷ Joo cóho jáyihví yó na ná a caḥan chága na saḥa Jesús nuú ni in tuhún toho ga ñayivi. Jáchi co cuni yo ña ná ndicuita nuu tuhun saḥa Jesús —cáchi na ndítuhún xihin táhan na.

¹⁸ Anda já naçana tucu na Pedro xihin Juan ta naçahnda na chuun nu ná ña ná a jánaḥa ga na saḥa Jesús ta ni ná a caḥan ga na quívi Jesús. ¹⁹ Anda já nanducú ñehe Pedro xihin Juan tuhun nu ná já cáchi da já xihin ná:

—Cahvi vaḥa ini ndó, na sacuaḥa. Á cáhán ndó ña vaḥa chága caja nde ña sáhdá ndóhó á ña sáhdá Ndióxi nuú nde caja nde. ²⁰ Jáchi a cuú jándacoo nde caḥan nde saḥá ña naçini nde xihín saḥá ña naçini joho nde —cáchi da xihín na sacuaḥa cán.

²¹ Anda já naçahan cueḥe na sacuaḥa cán xihín dá ña ná a jánaḥa chága da saḥa Jesús. Joo tóco ndihi ñayivi cája cáhnu na Ndióxi saḥá ña naçaja da cán. Ña cán queá najani ñahá na jáchi coo nañeḥe íni na ndá quiahva caja xíxi na xihín dá. ²² Ta mé da nandivaha cán naçinu chága da nuú ivi jícó cuia tá nandivaha saḥa dá.

Xíca tahví na cúu cuéntá Jesús nu Ndióxi

²³ Ta tá sa najani Pedro xihin Juan já naçee da cuahan da nuú naçandu java ga na cúu cuéntá Jesús cán. Ta já nandicani na nuú na cán ña naçahan na sacuaḥá nuú jutu xihín na sacuaḥá veñuhu cán xihín ná. ²⁴ Tá naçini joho java ga na cúu cuéntá Jesús cán ña ndicani da nu ná já naçasáhá tóco ndihi na xíca tahví na nu Ndióxi já cáchi na já:

—Tátá Ndióxi. Mé ndó cúu Ndióxi ña naçavaḥa indivi xihín ñuyívi xihín tañuhú xihín tóco ndihi ñaha. ²⁵ Saḥahá ndivaha tá najándicutú ndaa ndó ínimá David, tásáhnu jícó nde xihín ínimá yii mé ndó já naçachi ndó já xihín dá ta já naçahyí da:

Ndá cuéntá queá ndíva naçahá ñayivi ndúu ñuyívi ta ndinuhu ña núu cáhvi ini na caja na.

²⁶ Tóco ndihi da cómi cuéntá saḥá ñayivi ndúu ñuyívi xihín da sáhdá chuun nuú ñuu nandique táhan na cani táhan na xihín Ndióxi.

Ta cani táhan na xihín mé a naçaxi Ndióxi chindahá a cacomi cuéntá saḥá ñayivi, naçachi ndó sanahá.

²⁷ Ta mé a ndaa queá yóho jáchi ini ñuu yóho najátaca táhan Herodes xihín Poncio Pilato xihín na tóho xihín na Israel viti. Najátaca táhan na caja núu na xihín Jesús, da cúu jahyi yii mé ndó, mé a naçaxi ndó.

²⁸ Joo xihín ña naçaja na yóho naçinu coo nuú ña naçacu ini mé ndó coo janda jihna ndivaha jáchi cuu caja ndó tóco ndihi ña cuni ndó caja ndó. ²⁹ Ta viti candeḥé ndo, tátá Ndióxi ndá quiahva cuni na caja xíxi na xihín nde. Ta quiahva ndó ñamani ná candeé ini nde ndohó já ná a yíhví nde caḥan nde tuhun vaḥa saḥa mé ndó xihín ndá nuú ñayivi naçuu jáchi mé nde cúu nde na cája chúun nu ndo. ³⁰ Ta xíca tahví nde nu ndo ña ná cuu ndaja vaḥa nde na quíhví xihín ndée mé ndó. Ta ná caja ndó ñamani ña ná caja cuahá nde ñaha xituhún xihín cuahá ña náhnu ná cuni ñayivi ña xihín ndée Jesucristo, jahyi yii mé ndó cája nde tóco ndihi ña yóho —cáchi na xíca tahví na nu Ndióxi.

³¹ Tá nandihí naçica tahví na nu Ndióxi já naçuiji nuu vehe nu ndúu tútú na cán. Ta já nandicutú ndaa ínimá ndihi na cán xihín ínimá yii Ndióxi ta nandindeé ini na caḥan na tuhun Ndióxi nuú ñayivi.

Sáhdá java táhan na cúu cuéntá Jesús ñaha cómi na

³² Cuahá ndivaha naçacu na cúu cuéntá Jesús cán joo chí in jiní ndihi na. Ta ni in tuhún na co cájhnda ñaha nu táhan jáchi cáchi na: “Ñaha tóco ndihí queá.” ³³ Xihín ndée sahan Ndióxi nu ná cáxi tuhun na apóstol ña nanditacu tucu Jesús. Ta naçaja Ndióxi cuahá ndivaha ñamani xihín tóco ndihi na cúu cuéntá Jesús cán. ³⁴ Ta ni in na coo nandimaní ñaha nuu jáchi na íin ñaha nuu tátuhun vehe á ñuhu najicó na ña ta ñeḥe na mé jiuḥún cán ³⁵ ta sahan na ña

nuú na apóstol já ná ndicahnda mé ná ña nuú in in na xini ñúhú a. ³⁶ Já ñacaja in dataa naní José, da ñaquixi chichi Leví. Ta cúu dá da ñacacu in isla naní Chipre. Mé da yóho ñachinúu na apóstol quivi dá naní da Bernabé ta mé tuhun yóho cúni cachi a da sahan tuhun ndeé ini ñayivi. ³⁷ Ta mé da naní Bernabé yóho najicó da ñúhu dá ta já ñasahan da mé jiuhún da cán nuú na apóstol.

5

Cája Ananías xihin Safira cuachi nu Ndióxi

¹ Joo mé tañu já in da naní Ananías xihin Safira, ñájíhí da najicó na in ñundáhyi ná. ² Joo coo ñandiquiahva ndihi da jiuhún ña ñacayahvi ñúhu cán nuú na apóstol. Ta ñacachi da xihin ná ña cán cúu ndihi va ña ñaquehe da saha ñúhu. Joo najándique táhan tuhun da xihin ñájíhí da ña ná candoo chá jiuhún cán nu ná. ³ Ta tá ñaxinu coo Ananías ndiquiahva da jiuhún cán nu Pedro já ñacachi Pedro já xihin dá:

—Ndá cuéntá quea ñasahun ñamaní nu tiñáhá sacuahá ñandihvi rí ínimun, Ananías. Ta ñasacu inún jándahvún ínimayii Ndióxi ta já ñaquehún táhan jiuhún ñachahvi na sahá ñúhu jan. ⁴ Ñaha mé vún ñasacuu ñúhu jan, nduu. Ta tá najicún ña, ñaha mé vún cúu ri jiuhún jan va. Ñachahvi inún cajún ña núu yóho ta xihín ña ñacajún yóho a juú nu mé nde cuití va ñacahún ña tuhún joo ñacahún ña tuhún nu Ndióxi — ñacachi Pedro xihin dá.

⁵ Tá ñaxini joho Ananías ña ñacachi Pedro xihin dá ivi laá ñandicava da ñaxihí da sahá cuachi ñacaja da nu Ndióxi. Ta tóco ndihi na ñacandaa ini sahá ña ñayaha yóho ñayihví ndivaha na. ⁶ Anda já ñaxinu java da tacú já ñachitíví na ndii cán já ñéhe na a cuahan na jánduxu na.

⁷ Ta tá sa ñayaha tátuhun uní hora já ñaquihvi ñájíhí Ananías nu ndácaan Pedro cán. Joo ni coo xini ña ña ñandoho yí ña. ⁸ Anda já ñandaca tuhún Pedro ña já cáchí da já xihin ña:

—Á mé a ndaa najicó ndó ñúhu ndo ta ñachahvi na tá quiahva ñacachi yíun xihín i sahá — ñacachi Pedro.

Anda já ñanducú ñéhe ña cán tuhun nu dá já cáchí ña já xihin dá:

—Ajan, quiahva já najicó nde ña.

⁹ Anda já ñacachi Pedro já xihin ña:

—Mé ndó najándique táhan ndó tuhun ndó coto ndojó ndo ínimayii Ndióxi. Candehé. Jata vehe jan vaxi na ñasahan najánduxu yíun. Ta viti cañehe ri na yohó va cuhun na jánduxu na — ñacachi Pedro xihin ña.

¹⁰ Tá ñacachi Pedro já ivi laá ñandicava ña saha dá ñaxihí ña sahá cuachi ñacaja ña. Tá ñaxinu coo da tacú, da ñasahan najánduxu yí ña cán já ñaxini na cándúhu ri mé va ña ñaxihí ña. Anda já ñatavá na ña ta najánduxu na ña in xoo mé nuú najánduxu na yí ña cán. ¹¹ Ta tóco ndihi na cúu cuéntá Jesús cán xihin tóco ndihi java ga na tá ñacandaa ini na sahá ña ñayaha yóho ñayihví ndivaha na.

Sahan Ndióxi ndeé nuú na apóstol já ná caja na cuahá ñaha xitúhún

¹² Ta ñacaja Ndióxi ña ná cuu caja na apóstol cán cuahá ñaha xitúhún xihín cuahá ña náhnu tañu ñayivi cán. Ta tóco ndihi na cúu cuéntá Jesús ñasataca na yéhe ñúhu cáhnu naní yéhe Salomón. ¹³ Ta java ga ñayivi, na coo ndico íchi cuéntá Jesús cán yihví na catáhan na xihín na cúu cuéntá Jesús yóho. Joo ndijáá java ga ñayivi cán in toni ñúhú na xihín na apóstol cán. ¹⁴ Ta cuahá ndivaha ñayivi ñacasahá cándúsa na Ndióxi, ña viti najihí viti. ¹⁵ Ta sahá ña náhnu cája na apóstol yóho ñatavá na na quihvi jata véhe ta ñachinduu na na nuú xito á nu yívi mé nuú yaha Pedro cán. Já quea tá ná yaha da vatí candahvi cuití da ná cani ndaa jata java na cán ña ná ndivaha na. ¹⁶ Ta cuahá ñayivi ndúu java ñuu válí ndúu yati cán ñéhe na na quihvi xihín na ñúhu ínimayii quini ini vaxi na ñuu Jerusalén ta cán ñandivaha ndihi na.

Jándoho na ini na apóstol

¹⁷ Anda já da cúu sacuahá nuú jutú cán xihín na cúu cuéntá Saduceo cán ñacasahá cáhiví ndivaha ini na xihín na apóstol. ¹⁸ Sahá ña cán quea ñatiin na na apóstol cán ta ñataán na na vecaa. ¹⁹ Joo ñuu ñaxinu

coo in táto Ndióxi ta nasuná a yéhe caa cán ta natavá a na ta já nacachi a já xihin ná:

20—Cuáhán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndíjama ñayivi ná ndihvi na íchi cuéntá mé á —nacachi a xihin ná.

21 Ña cán quéa tá nativi inga quivi itaan já nandihvi na apóstol veñuhu cáhnu cán ta nacasáhá na jánaħa na nuú ñayivi cán.

Joo da cúu sacuaħa nuú jutū cán xihin tóco ndihi na sacuaħa cómi cuéntá saħa nación Israel cán nasahnda na chuun nu policia cán ña ná cuħun na tavá na na apóstol ñuhu vecaa cán ná quixi na nuú na sacuaħa cán. 22 Joo tá naxinu coo na cúu policia vecaa cán coo nandíñehe toho ñahá na. Ta já nandico coo na caxi tuhun na xihin na sacuaħa cán. 23 Já cáchi na já:

—Tá naxinu nde yéhe caa já naxini nde ndájí tuun a ta ndíta soldado ndáá vaħa da ña. Joo tá nandihvi nde ini vecaa sándehe nde coo na apóstol cán ná ndiñehé nde.

24 Tá naxini johō na sacuaħa nuú jutū xihin da cúu sacuaħa nu policia veñuhu xihin java ga na sacuaħá veñuhu cán ña yóho já nacasáhá ndáca tuhún táhan na saħá ña ndítahan quixi nu ná chí nuu saħá ña cája na apóstol yóho.

25 Mé hora já naxinu coo in dataa ta cáchi da já xihin ná:

—Na apóstol nataán ndó vecaa cuni cán, ndíta na jatá veñuhu jánaħa na ñayivi —nacachi da cán xihin ná.

26 Anda já nasahan da cúu sacuaħa nuú policia xihin java ga policia já natiiin tucu da na apóstol nasañehe da na nuú na sacuaħa veñuhu cán. Joo coo nacaja xixi na xihin ná jáchi nayihvi na ndicuĭta ñayivi cuaħa cán cani na na xihin yuu. 27 Ta tá naxinu coo na xihin na apóstol nu ndúu na sacuaħa veñuhu cán já nasacu ndichi na na nu ná. Anda já nacachi da cúu sacuaħa nuú jutū cán já xihin ná:

28—Mé nde nasahnda nde chuun nu ndó ña ná a jánaħa chága ndó saħá Jesús jan. Joo mé ndó sa najándicutú ndó Jerusalén xihin ña jánaħa ndó jan. Ta cúni ndó jácojo ndó cuachi jatá nde ña nasahní nde Jesús jan —cáchi da.

29 Anda já nanducú ñehe Pedro xihin java ga na apóstol cán tuhun nu ná já cáchi na já xihin ná:

—Ndítahan nuú nde caja jihna ñuhú ga nde ña sáhdá Ndióxi nuú nde, a juú ga ña sáhdá ñayivi nuú nde caja nde. Saħá ña cán quéa coo nacaja nde ña nacachi ndó xihin nde. 30 Ta mé Ndióxi nacaja cáhnu tásáħnu jícō yo sanahá nacaja ña ná nditacu Jesús, mé a nasahní ndo tá nacata caa ndó a ndica crúxu. 31 Joo nandíñehe jícō Ndióxi Jesús ta nasacu a ña xoo cuáha mé á ta nacaja ña ná nduu Jesús ña cacomí cuéntá saħá ñayivi Israel ta jácaacu a na já ná a cuħun na indayá. Ta tá ná ndicó coo ini na já caja cáhnu ini Ndióxi saħá cuachi cája na. 32 Ta naxini xihin nuú nde tóco ndihi ña yóho ta cáħan nde saħá ta quiaħva já cáħan ínima yii Ndióxi saħá ña yóho. Ta chindahá Ndióxi ínima yii mé á cañuhu a ini na cája ña cúni mé á —cáchi na apóstol xihin na cán.

33 Tá naxini johō na sacuaħa cán ña nacachi na apóstol já ivi laá naxojo ndivaħa ini na xihin ná chí cúni na cahní ñahá na. 34 Joo ndaja coo ín tañu na cán in da sacuaħa cúu fariseo naní Gamaliel, da ín toni ñuhú ñayivi xihin. Ta cúu dá da jánaħa ley Moisés nu ná. Nacandichi da tañu na sacuaħa cán já nasahnda da chuun ña ná tavá xóo na na apóstol cán jata véhe. 35 Anda já nacachi da já xihin na sacuaħa cán:

—Candehé ndo, nataa Israel. Cuéntá coo ndó a juú caja ndaja nacuu ndó xihin na apóstol yóho. 36 Xíní ñuhú ndicuhun ini ndó ña sanahá nandindita in da naní Teudas ta nacachi da xihin ñayivi ña cúu dá in da ín cuaħá saħa. Ta nasandico tátuhun comi ciento taa jata dá joo nasahní na da ta tá naxihí da já nandicuĭta nuu tóco ndihi ñayivi naxica jatá da cán ta xihin ña yóho nanaá saħá ndihi ña nacaja da. 37 Tá nandihí já nandindita inga tucu da naní Judas, da naquixi estado Galilea mé tiempo cándahvi ñayivi ñuu. Ta cuaħá ndivaħa ñayivi nandico jatá da cán joo nasahní ri na da cán va ta tóco ndihi na nasandico jata dá nandicuĭta nuu ndihi na. 38 Saħá ña cán quéa jácaħan i ndohó viti ná a quihvi ndáħa ndó na apóstol yóho. A quihvi nuu ndó xihin ña cája na jáchi tá jiní mé va na naquixi

ña cāja na já quea ndihi va sahá ña cāja na yóho. ³⁹ Joo tá Ndióxi nāchindahá na cāja na ña cāja na yóho já quea a cúu toho cāja ndó jándihi ndó sahá ña cāja na. Cuéntá coo ndó jáchī tiahva náá xihín Ndióxi canī táhan ndó —cáchī Gamaliel xihín na sacuahā cān.

⁴⁰ Tóco ndihi na sacuahā naxini jōho nuū nācāhan da cān, nātahan ini na xihín ña nācāhan da. Anda já nācana na nā apóstol ta já nācanī na nā xihín churú. Ta nācachi na xihín ná ña ná a cāhan ga nā saha Jesús nuū ñayivi. Anda já najanī ñahá na. ⁴¹ Ta cájī ndivaha ini na apóstol cān nāqueta na nu ñūhu na sacuahā cān jáchī nāsahan Ndióxi ñamanī nu ná ndoho ini na sahá Jesús. ⁴² Ta ndijáá ní quivī ini veñuhu cāhnu xihín ini vehe ñayivi cāhan na ta jānaha nā saha Jesucristo.

6

Cáxi na usā da cacuu diácono, da chíndeé na apóstol

¹ Ta mé tiempo cān ndicuahá ndivaha na cúu cuéntá Jesús. Ta ndaja coo na cāhan tuhun griego cān nācasáhá cāhan cuachī na nuū na Israel. Mé na cāhan tuhun griego yóho cáchī na ña co ndítahnda in nuū ñaha cāja na Israel tá ndítahnda ña cuxu na cuāan in in quivī. ² Anda já nāndaja tūtú ndihuxu ivi na apóstol cān tóco ndihi na cúu cuéntá Jesús já nācasáhá cáchī na já xihín ná:

—Ña ndítahan nu mé nde, na apóstol quea caxi tuhun nde tuhun Ndióxi nuū ñayivi. Sahá ña cān quea co yáchī nde ndicahnda nde ña cuxu ñayivi. ³ Sahá ña cān quea xíní ñūhú ndinducú mé ndó usā taa tañu ndó já ná cāja na chuun yóho. Joo xíní ñūhú cacuu na ñayivi cāndeé ini ndó. Ta xíní ñūhú cacuu na nā tácu ini. Ta xíní ñūhú cacuu na nā nāndicutú ndaa ínima xihín ínima yīi Ndióxi já ná cuu quiahva ndó chuun yóho nu ná. ⁴ Ta ña cāja mé nde quea ndinuhu ini nde caca tahví nde nu Ndióxi ta jānaha nde tuhun mé á nuū ñayivi —nācachi na apóstol xihín na cúu cuéntá Jesús cān.

⁵ Ta tóco ndihi na nātahan ini na xihín ña nācachi na apóstol. Sahá ña cān quea nācaxi na da nanī Esteban. Mé Esteban yóho cúu dá da cāndeé cāhnu ini Ndióxi. Ta cúu dá da nāndicutú ndaa ínima xihín ínima

yīi Ndióxi. Ta nācaxi na da nanī Felipe xihín Prócoro xihín Nicanor xihín Timón xihín Parmenas xihín Nicolás, da nāquixi ñuu Antioquía. Mé Nicolás yóho nācasáhá cāndúsa da tá quiahva cāndúsa na Israel, nduu joo nāndiquehe da íchī cuéntá Jesús. ⁶ Tá nāndihi já ñéhe na cúu cuéntá Jesús cān ndihusa na naxinu coo na nu ndúu na apóstol cān. Anda já nāxica tahví na nu Ndióxi saha ná. Ta nāchinúu na apóstol cān ndaha ná jinī in in ndihusa na cān ña ná cāja na chuun Ndióxi.

⁷ Ta nācasáhá ndicuita nuu tuhun cāhan saha Jesús chí nāndicuahá na cúu cuéntá Jesús ñuu Jerusalén. Ta cuahá na cúu jutū cān nācasáhá cāndeé ini na Jesús.

Tiin na Esteban

⁸ Ta ndaja coo nācāja cuaha Ndióxi ñamanī xihín in da nanī Esteban cān ta nāndicutú ndaa ínima dá xihín ínima yīi Ndióxi chí nācasáhá cāja da cuahá ñaha náhnu xihín ña xituhún nuū ñayivi. ⁹ Joo in quivī nācasáhá java na cāni táhan yūhu ná xihín mé Esteban. Na cān cúu ná cuéntá veñuhu nanī Esclavos Libertados xihín java na ñuu Cirene xihín na ñuu Alejandría xihín na ñuu Cilicia xihín java ga na nāquixi ñuu válí ndúu estado Asia nācasáhá cāni táhan yūhu ná xihín dá. ¹⁰ Joo a cuū quee vaha na xihín dá jáchī nāsahan ínima yīi Ndióxi tuhun ndíchī nuū mé Esteban cān ña ná nducú ñehe da nu ná. ¹¹ Anda já nāchahvi na cān java na já ná cāhan na tuhun tūhún saha Esteban. Ta nācachi na cān ña naxini jōho na ña nācanahá Esteban xihín Moisés ta nācanahá da xihín Ndióxi. ¹² Ta xihín ña yóho najāndivaa ná ñayivi xihín na sacuahā veñuhu xihín na jānaha ley Moisés. Ta já nātiin na da já ñéhe na da cuahan da nuū ndihi na sacuahā ñuu cān. ¹³ Ta nānducú na da cāndúsa cavaħa tuhun tūhún saha Esteban ta já nācasáhá cáchī da cāvaha ña tuhún já:

—Cānahá da yóho xihín veñuhu cāhnu Ndióxi yóho ta cānahá da xihín ley Moisés.

¹⁴ Ta naxini jōho nde cáchī da ña jātanī Jesús veñuhu cāhnu yóho, mé da nāquixi ñuu Nazaret ta ndijama da costumbre najāndacoo Moisés nu yo —cáchī da cāhan ña tuhún saha Esteban.

¹⁵ Anda já nandicoto nihni na sacuahá xihin tóco ndihi na ndúu coo cán nu Esteban já naxini na nandiyéhe nuu dá tátuhun in nuu tátó Ndióxi ndúu indiví.

7

Ndíquehe Esteban saha mé dá nuú na sacuahá

¹ Anda já nandaca tuhún da cúu sacuahá nuú jutú cán Esteban já nacachi da já xihin dá:

—Á ña ndaa cúu ndihi ña cáhan na yóho sahún.

² Anda já nanducú ñehe Esteban tuhun nu ná já nacachi da já:

—A juú toho ña ndaa quéa cáhan na jan sahá i. Joo cuni johó ndó ña ná cáhan i xihin ndo, na sacuahá xihín ñani i. Sanahá ndivaha tá nasahin tásáhnú jícó yo, da nasananí Abraham ñundáhyi Mesopotamia tá cámaní quee da cuhún da coo da ñuu Harán já nanaha Ndióxi mé á nu dá. Ta mé Ndióxi, xitoho í cúu á in Ndióxi cáhnú ndivaha. ³ Ta já nacachi a já xihin Abraham: “Jándacoo táhún ta jándacoo ñuún ta cuáhán inga ñuu nuú nahá i nuún coún”, nacachi Ndióxi xihin dá. ⁴ Anda já najándacoo Abraham ñundáhyi Caldea nuú nasahin da ta já naquee da cuahan da coo da ñuu Harán. Tá nandihí já naxihí tátá da ta janda já nasandaca Ndióxi Abraham naquixi da nu ndúu yó viti. ⁵ Joo cóo nasahan Ndióxi ñundáhyi nu dá tá nasahin da yóho. Ni in loho ñúhu cóo nasahan mé á nu dá mé tiempo cán. Joo nacachi a xihin dá ña quiahva ña nu dá chága chí nuu. Ta nacachi a xihin dá ña nduu a ñaha jahyi da tá ná quivi da vatí cámaní cacu jahyi Abraham mé tiempo já. ⁶ Ta nacachi Ndióxi xihin dá ña tóco ndihi jahyi da xihín na quixi chichi jahyi da cacuu na tátuhun na tóho jáchi canduu na inga ñuu, ña cóo cúu ñuu na. Ta cán caja chúun na joo a quéhe yahvi na sahá chuun caja na ta jándoho ndivaha na cán ini na tixi comi ciento cuia. ⁷ Nacachi tucu Ndióxi xihin dá já: “Joo jándoho i ini ñayivi, na caja xixi xihín ñayivi quixi chichún. Ta tá nandihí caja i ña ná queta na quixi chichún ta quixi na chóho já ná caja cáhnú na yehe.” ⁸ Ña yóho quéa

nacachi Ndióxi xihin Abraham tá nasahan tuhun a nu dá. Ta nacachi a xihin dá ña ná chicaan da marca yiquí cuñu da já ná a ndíndójó da sahá tuhun nasahan Ndióxi nu dá. Ta tá nacacu jahyi Abraham, da naní Isaac já nachicaan Abraham marca yiquí cuñu da tá naxinu una quivi nacacu da. Ta quiahva já nacaja ri Isaac xihin Jacob, jahyi da tá nacacu da. Ta sa mé quiahva já nacaja ri Jacob xihín uxu ivi jahyi da tá nacacu da. Ta jahyi Jacob yóho cúu tátá uxu ivi táhnda ñayivi Israel.

⁹ Ta mé jahyi Jacob yóho nasacuu tásáhnú jícó yo joo nacahihvi ini na xihín in ñani na, da naní José. Sahá ña cán quéa najícó na da cuahan da nación Egipto. Joo nasahin Ndióxi xihin dá. ¹⁰ Ta nachindee a da nu tóco ndihi ña nandoho ini da ta nasahan cuaha Ndióxi xihín túní dá. Ta nacaja mé á ña ná tahan ini Faraón, mé rey nación Egipto cán xihín ña cája José. Sahá ña cán quéa nasacu rey cán José ña ná nduu da gobernador saha tóco ndihi nación Egipto cán. Ta nacaja rey cán ña ná cacomí da cuéntá sahá vehe mé rey cán viti.

¹¹ Ta in tañu naxinu tama ndee ta nacasahá ndóho ndivaha ini tóco ndihi ñayivi ndúu nación Egipto. Ta quiahva já nandoho ri ini na ndúu ñundáhyi Canaán ta chí cóo ñehe ná ña cuxu tásáhnú jícó yo. ¹² Joo tá nacandaa ini Jacob ña íin trigo nación Egipto já nachindahá da jahyi da, na nasacuu tásáhnú jícó yo cán já nasahan na naxeen na ña cuxu na. Ta tá nasahan na nu cuítí yóho cóo nandicuni na ñani na José cán. ¹³ Joo tá nasahan na ña chí ivi chí Egipto cán já najánaha José mé dá nuú ñani da. Ta xihín ña yóho nacandaa ini da cúu rey nación Egipto cán ña cúu José da Israel. ¹⁴ Anda já nasahnda José chuun ña ná cañehe na Jacob, tátá da xihin tóco ndihi na vehe da quixi na canduu na ñundáhyi Egipto cán. Ta tóco ndihi na nasahan cán nasacuu na uní jico sahún ñayivi. ¹⁵ Já naquee Jacob cuahan da coo da Egipto xihin tóco ndihi na vehe da. Ta sa mé cán naxihí da ta cán naxihí jahyi da, na nasacuu tásáhnú jícó yo. ¹⁶ Já nachicaan na ndii cán ini cáva mé Egipto cán joo tá nayaha tiempo já natavá na lásá na já ñehe na ña nasahan na nachicaan na ini cáva mé

cama santo ña naxeen Abraham nuú jahyi in da naní Hamor ñuu Siquem cán.

17 Ta tá nacayati quiví xinu coo ña nasahan Ndióxi tuhun a nu Abraham coo já nacasáhá cácu cuahá jahyi na naquixi chichi Israel. Já nandicuaḥa ná nani ndúu na Egipto cán. 18 Anda já nacasáhá inga tucu rey cómi da cuéntá sahá ñayivi nación Egipto cán ta mé rey saá cán co xini toho da José. 19 Ta mé rey yóho najándahvi da tásáḥnu jícó yo cán ta nacasáhá cája xíxi da xihin ná. Ta nacaja ndúsa dá xihin ná ña ná jándacoo na jahyi na, na jacá nacacu já ná quivi na. 20 Ta mé tiempo já nacacu Moisés ta nasacuu da in ticuáhá loho ña natahan ini Ndióxi xihin. Ta najácuahnu tátá náná Moisés yóho mé dá tixi uní yoo mé vehe mé na cán. 21 Joo tá naxinu quivi ndítahan nu ná jándacoo na da já nandiquehe ña cúu jahyi rey Egipto cán da já najácuahnu ña da tátuhun jahyi ña. 22 Ta najácuaha Moisés tóco ndihi ña xini na ndichí nación Egipto cán. Ta nandindichí ndivaha jini dá. Ta nacaja cuahá dá ña náḥnu.

23 Ta tá naxinu Moisés ivi jico cuia já nasacu ini da coto nihni da ñani táhan da, na naquixi chichi Israel. 24 Tá nacasaá da nu ndúu na cán já naxini da cája xíxi in da Egipto xihin in da Israel. Ta cuni Moisés ndiquehe da sahá da Israel ña cán quea nasahní Moisés mé da Egipto cán. 25 Jáchi nacahán Moisés ña cuu candaa ini na Israel cán ña chindahá Ndióxi da já ná janí da na ndáḥa na Egipto cán. Joo coo nacandaa ini na ña yóho. 26 Ta inga quiví itaan tá naxinu coo Moisés nu ndúu na Israel cán já naxini da cáni táhan ivi da naquixi chichi Israel. Anda já nacasáhá Moisés sáḥndá java táhan da da cán já cáchi da já xihin ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” 27 Anda já nachindahá nihni da cája xíxi xihin ñani táhan cán Moisés já nacachi da já xihin dá: “Ni in toho na coo nasahan chuun nu yóho cacuún da cacomí cuéntá sahá nde já ná cuu caja viún sahá nde. 28 Á tá quiahva nacajún nasahnún da Egipto cán cuni quiahva já cúnun cajún xihin i”, nacachi da cán xihin Moisés. 29 Tá naxini johó Moisés ña yóho já nayihví ndivaha

da chí naxinu da cuahān da chí ñundáhyi cuéntá Madián já nasahjin da cán tátuhun in da toho. Ta cán natandaha dá ta nacacu ivi jahyi ta da.

30 Ta tá sa nayaha ivi jico cuia nasahjin Moisés Madián cán já nanaha in táto Ndióxi mé á nu dá tañu in tohínú cándaha ñúhu mé yucú íchí yati yucú naní Sinaí cán. 31 Ta chí nacatóntó Moisés xihin ña naxini da nacaja Ndióxi cán. Ta tá nacayati da sándeḥé da ña já naxini johó da cáḥan Ndióxi xihin dá já cáchi a já: 32 “Yeḥe cúu u Ndióxi nacaja cáḥnu tásáḥnu jícún Abraham xihin Isaac xihin Jacob.” Anda já nacasáhá quiji Moisés xihin ña yihví da ta coo nasahan ndeé ini da ndicoto nihni da nu cáḥan Ndióxi cán. 33 Anda já nacachi tucu Ndióxi já xihin dá: “Tavá ndusa sahun jáchi yii ndivaha cúu nu sánun jan. 34 Sa naxini i ndá quiahva ndáhví ndóho ñayivi cuéntá mí i, na ndúu Egipto ta naxini johó i nu tána na sahá ña jándoho na Egipto jan ini na. Sahá ña cán quea vaxi i chindeé e na ta yóho cacuún da chindahá i cuhun Egipto já ná tavún na nu ndóho ini na cán”, nacachi Ndióxi xihin Moisés.

35 Nacandají na Israel cán Moisés ta nacachi na xihin dá: “Coo na nasacu toho yohó ña ná cacomún cuéntá sahá nde já ná cuu caja viún sahá nde.” Joo Ndióxi quea nachindahá Moisés ña ná cacuu da da cacomí cuéntá sahá na Israel cán ta já ná jacacu da na. Jáchi já nacachi táto Ndióxi xihin dá tá nanaha mé á tañu tohínú cándaha ñúhu cán. 36 Ta mé Moisés nasahan tucu da mé Egipto cán ta natavá da tóco ndihi na Israel, na nasanduu Egipto cán ta nacaja da cuahá ñaha náḥnu xihin ña xituhún mé Egipto cán. Ta quiahva já nacaja da xihin tañuhú naní Tañuhú Cuahá tá nasuná da do nuú nayaha na Israel cán. Ta quiahva já nacaja da cuahá ña náḥnu yucú íchí nuú naxica na ivi jico cuia cán. 37 Ta mé Moisés nacaxi tuhun da xihin ñayivi já nacachi da já xihin ná: “Tá quiahva nacaja Ndióxi nachindahá a yeḥe nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, nacachi Moisés xihin ná. 38 Ta mé Moisés nasahjin da tañu ñayivi Israel, na nasacuu tásáḥnu

jícó yó tá naxica na yucú íchí cán. Ta xihin mé da cán nacahan tátō Ndióxi jini yúcu Sinaí cán. Ta cán nasahan Ndióxi ley nu dá já ná nahá da ña nu yó ña ná caca vaha í ichi cuéntá Ndióxi.

³⁹ Joo coó naxeen toho tásáhnū jícó yó cuni johō na nuú nacahan Moisés xihin ná. Ña cán quéa nacandají na da ta nacasahá ndúcú na ndicó coo na Egipto. ⁴⁰ Ta nani nasahin Moisés jini yúcu Sinaí cán já nacachi na xihin Aarón, ñani Moisés já: “Cúni nde ña ná cavahún tñiñu yúú Ndióxi caja cáhnu nde ta ná canuú a cūhun a nuú nde. Jáchi co cándaā ini nde ndiā nandoho Moisés, da natavá ndehe nuú nasanduu nde Egipto cán.” ⁴¹ Anda já nacavaha na in yoco ñehe nahná chélo ta já nasahni na quiti najoco na nuú mé yoco cán. Ta nacajii ndivaha ini na xihin yoco ña nacavaha mé na cán. ⁴² Anda já najándacoo Ndióxi na já ná caja cáhnu na ndá ña cúni na tátuhun quimi xihin yoo xihin candii. Já nacachi Ndióxi ini libro nacahyí na profeta sanahá: Ndóhó, na Israel, a juú nu mí i nasahni toho ndó quiti najoco ndó tañu ivi jico cuia nani naxica nuu ndó yucú íchí jan.

⁴³ Ña nacaja ndó quéa nacaja cáhnu ndó yoco ña nacavaha mé va ndó. Ta nacachi ndó ña cúu mé yoco cán inga ndiόxi naní Moloc. Ta nasañehe ndó ña xihin cati á tá cuahan ndo. Ta nacavaha ndó inga tñiñu quimi nacachi ndó cúu á inga tucu ndiόxi naní Renfán. Ta nasañehe ndó tñiñu cán cuahan ndó caja cáhnu ndó coó nacaja cáhnu ndó yehe.

Ña cán quéa tavá i ndohó ñundáhyi na Israel ta chindahá i ndohó in ñuu tóho xicá chága a juú ga Babilonia, nacachi Ndióxi xihin na cán —nacachi Esteban xihin na sacuahá ñuu cán.

⁴⁴ Já nacachi tucu Esteban já xihin ná:

—Vatí nacaja cáhnu tásáhnū jícó yó java ga yoco joo nasañehe tá nasañehe na in veñuhu ní quiti cuéntá Ndióxi tá naxica nuu na yucú íchí nuú co ndúu ñayivi cán. Jáchi janda jihna nasahnda Ndióxi chuun nu Moisés tá quiahva coo mé veñuhu ní

quiti cán ta nasahnda chuun nu dá ña ná cavaha da ña xihin ní quiti. Ta ini mé veñuhu cán nataán da yuu jáhnda nu ndáa ley nasahan Ndióxi nu dá sanahá. ⁴⁵ Tá sa nayaha cuahá cuia já naxihí Moisés já nandiquehe da naní Josué chuun ña cañehe da cuéntá saha tásáhnū jícó yó. Ta mé tásáhnū jícó yó nacani táhan na xihin na nasanduu ñundáhyi yóho. Ta nacaja Ndióxi ña ná quee vaha na Israel xihin na cán. Natavá Ndióxi na cán já ná canduu na Israel ñundáhyi yóho ta mé tiempo já na Israel ñehe na veñuhu ní quiti cuahan na. Ta já nasahin a xihin ná janda quivi nasacomí David cuéntá sahá na Israel. ⁴⁶ Nacaja Ndióxi cuahá ñamaní xihin David sahá ña cán quéa nasacu ini David cavaha da in nuú coo Ndióxi, mé a nacaja cáhnu Jacob sanahá. ⁴⁷ Joo da nacavaha mé vehe Ndióxi cán nasacuu Salomón, jahyi David. ⁴⁸ Ta sa cándaā ini ña a juú quiahva cáhnu cúu Ndióxi ta co ndácaan toho a ini veñuhu cavaha dataa. Ín in profeta ta nacahyí da ña nacachi Ndióxi já:

⁴⁹ Tátuhun in rey, da ín coo silleta vaha, ta chínúu da saha dá jatá in táyi loho, quiahva já ín coo i indivi ta chínúu i sahá i jata ñuyívi. Yehe cómi i cuéntá sahá indivi xihin ñuyívi sahá ña cán quéa coó toho vehe cuu cavaha ndó coo yehe, ta co xini ñuhú i in vehe nu ndiquehe ndée.

⁵⁰ Jáchi yehe cúu Ndióxi ña nacavaha tóco ndihi ñaha, já nacachi Ndióxi sanahá —nacachi Esteban xihin ná.

⁵¹ Anda já nacachi tucu Esteban já xihin ná:

—Joo mé ndó cúu ndó ñayivi saá ini ta cúu ndó tátuhun na co xini Ndióxi. Jáchi co cúni ndó cuni johō ndó ña cáchi Ndióxi xihin ndo ta co cúni ndó cándaā ini ndó tuhun Ndióxi. Ta ní co cúni ndó quiahva ndó ñamaní ndihvi ínima yii Ndióxi ini ínima ndo. Xíxi ndivaha nasahin ini tásáhnū jícó ndo ta quiahva já cája ri mé ndó viti. ⁵² Mé tásáhnū jícó ndo nacaja xixi ndivaha na xihin ndihi na profeta ta nasahni ñahá na mé na yóho naquixi na cáxi tuhun saha mé a quixi chí nuu, mé a co cája cuachi. Ta tá naxinu mé a cán já najicó

túhún ndó a ta nasahní ndó a. ⁵³ Ta mé ndó cúú ndó na nasahan táto Ndióxi ley nuu joo co cúni ndó caja ndó ña cáchi a —nacachi Esteban xihín ná.

Tá nasahní na Esteban

⁵⁴ Tá naxini johó na sacuaḥa cán tóco ndihi ña nacahan Esteban já naxojo ndivaha ini na xihín dá chí cáhñá nuhu na. ⁵⁵ Joo nandicutú ndaa ínima Esteban xihín ínima yii Ndióxi ta já nandicoto nihni da indiví já naxini da ndá quiahva cáhnu cúú Ndióxi ta naxini da cándichi Jesús xoo cuáha Ndióxi. ⁵⁶ Anda já nacachi Esteban já xihín ná:

—Candehé ndó. Núná indiví xíní i ta tívi cándichi Jesús xoo cuáha Ndióxi —nacachi Esteban xihín ná.

⁵⁷ Joo naxicaji tuun na cán johó na já ná a cúni johó na ña cáhan Esteban. Ta nacasáhá cáyuhú cóhó na cáti na cuahan na cani na da. ⁵⁸ Natavá na mé Esteban yuhú ñuu ta cán nacasáhá cúun na yuu dá. Ta mé na najáchojo cuachi jata Esteban cán natavá na cotó na ta nachinduu tóo na ña nuú in da tacú naní Saulo cándichi cán. ⁵⁹ Ta nani cúun na cán yuu Esteban já nacasáhá mé Esteban xíca tahví da nu Ndióxi já cáchi da já:

—Jesús, mé ndó cúú xitoho i. Ndiqeehe ndó ínima i viti.

⁶⁰ Anda já nacaxítí Esteban já nacasáhá cáyuhú cóhó da já nacachi da já:

—Jesús, xitoho i, a quéhe ndó cuéntá saḥa cuachi cája na yóho.

Tá nandihí nacachi Esteban tuhun yóho já naxihí da.

8

Cásáhá Saulo cája xíxi da xihín na cúú cuéntá Jesús

¹ Ta mé hora nasahní na Esteban cándichi Saulo sándehe da ta natahan ini da xihín na nasahní Esteban cán.

Ta mé quívi cán nacasáhá na cája xíxi chága na xihín na cúú cuéntá Jesús ndúu ñuu Jerusalén cán. Chí tóco ndihi na cúú cuéntá Jesús nandicuíta nuu na ndijáa chí estado Judea xihín estado Samaria. Joo mé na apóstol cuití va coo naxita nuu toho na. Nacandoo na ñuu Jerusalén. ² Ta java dataa

nandiquehe na yiquí cuñu Esteban cuahan na jánduxu na da tá quiahva ín costumbre na ta a juú quiahva nasacu na saḥa dá. ³ Ta mé Saulo nacaja xíxi chága da xihín na cúú cuéntá Jesús ta naquihvi da vehe tá vehe na ta ñúhu da na ta táva da na jata véhe. Coó caja toho á cúú ná taa á cúú ná ñaha ta já ñehe da na cuahan na vecaa.

Cáhan na cúú cuéntá Jesús tuhun vaha saḥa mé á nuú na estado Samaria

⁴ Ta na cúú cuéntá Jesús tá nandicuíta nuu na jata ñuu Jerusalén cán nacaxi tuhun na tuhun vaha saḥa Jesús ní cúú nu xíca na cuahan na. ⁵ Ta ndaja coo in da cúú cuéntá Jesús naní Felipe naqee da cuahan da chí in ñuu cuéntá Samaria ta cán nacasáhá da cáhan da saḥa Jesucristo nuú ñayivi. ⁶ Nacasáhá ndítútú cuahá ñayivi nu dá ta xihín ndinuhu ini na taa johó na nu cáhan da xihín ná jáchi naxini xihín nuu ná cuahá ñaha náhnu cája Felipe. ⁷ Nandaja vaha da cuahá ñayivi, na nasañuhu ínima quini ini chí cáyuhú cóhó mé ínima quini cán tá queta ini na quíhvi cán. Ta nandaja vaha ri da cuahá na naxihí tuchu ta nandaja vaha ri da na xíca réncó. ⁸ Saḥa ña cán queta nacajii ndivaha ini ñayivi ñuu cán xihín ña nacaja da.

⁹ Ta mé ñuu cán nasahin in da tají naní Simón. Mé Simón yóho nasacuu da in taa, da najándahvi ñayivi Samaria cán jáchi nasacachi da ña cúú dá in da ín ndivaha saḥa. ¹⁰ Ta tóco ndihi mé ñayivi ñuu cán, á cúú ná na ndahví á na náhnu, nasaxini johó na xihín ndinuhu ini na nuú nasacahan da, nduu. Ta nacachi na saḥa dá ña cája da ña náhnu tá quiahva cája Ndióxi. ¹¹ Ta nasacandúsa na nuú nasacahan da xihín ná jáchi tíxi cuaha tiempo najándahvi da na xihín ña tají. ¹² Ta ndaja coo nacasáhá na cándúsa na ñuu cán tuhun vaha cáhan Felipe saḥa Jesucristo, ña cacomí Ndióxi cuéntá saḥa ná tá ná candeé ini na Jesucristo. Ta já nacasáhá na cándúta ná, taa xihín ñaha viti. ¹³ Ta janda mé Simón cán nacandúsa da ta nacandúta dá já nacasáhá xíca nuu da xihín Felipe. Ta chí catóntó da xíní da ña náhnu xihín ña xituhún cája Felipe cán.

14 Ta tá nañehé na apóstol ndúu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já nachindahá na Pedro xihin Juan estado Samaria cán. 15 Ta tá naxinu coo Pedro xihin Juan estado Samaria cán já naxica tahví na nu Ndióxi sahá na cúu cuéntá Jesús cán ña ná chutú ndaa ínima ná xihin ínima yii Ndióxi. 16 Jáchí sa nacandúta ná cuéntá Jesucristo sahá ña cándéé ini na mé á joo a ñaha chutú ndaa ínima ná xihin ínima yii Ndióxi. 17 Anda já chójó Pedro xihin Juan ndáha dá jiní in in na cán nani xica tahví da nu Ndióxi já nachutú ndaa ínima ná xihin ínima yii Ndióxi.

18 Tá naxini Simón ña nachutú ínima na cúu cuéntá Jesús cán xihin ínima yii Ndióxi tá chinúu na apóstol ndáha ná jiní ná já cuni da cueen da ndée Ndióxi cán. 19 Já nacachi Simón já xihin ná:

—Quiahva ndó ndée cómi ndó jan nuú i já ná cacomí ri yehe va ña já quéa ndá na ná chinúu i ndahá i jiní ná cuu ndicutú ndaa ínima ná xihin ínima yii Ndióxi.

20 Anda já nanducú ñehe Pedro tuhun nu dá já cáchí da já xihin dá:

—Ná jándihi Ndióxi sahun xihin sahá jjuhún cómun jáchí cáhún ña cuu cueún ña jása maní uun Ndióxi nuú ñayivi. 21 Coó sahá tohún cajún ña cája nde yóho jáchí coo ín vaha toho ínimun nu Ndióxi. 22 Xíní ñúhú jándacoún ña núu cáhvi inún jan ta ndítahan caça tahvún nu Ndióxi já ná candehé mé á á caja cáhnu ini a sahun jáchí núu ndivaha cáhvi inún. 23 Jáchí náha cáxí ña cáhivi ndivaha inún. Cúu á tátuhun mé ña quini nacató a yohó chí cájún ña núu.

24 Anda já nanducú ñehe Simón tuhun nu Pedro já cáchí da já:

—Caça tahvi ndó nu Ndióxi sahá i já ná a quíxi ña núu cáchí ndó jan nuú i —nacachi da xihin ná.

25 Tá nandihí nandicani Pedro xihin Juan sahá ña nacaja Ndióxi xihin ná. Ta tá nandihí nacahan na tuhun Ndióxi nuú na cán já naquee na nasahan na cáhan na tuhun Ndióxi, ña cuu jácacu ñayivi ndijáá ñuu válí ñúhu chí estado Samaria cán. Anda jáví nandicó coo tucu na chí ñuu Jerusalén.

Cáhan Felipe saha Jesús nuú in da naquixi nación Etiopía

26 Tá sa nayaha ña yóho já naxinu in táto Ndióxi nu ín Felipe estado Samaria cán ta já cáchí a já xihin dá:

—Cuáhán chí sur nu quée íchí ña quéta ñuu Jerusalén cuahan chí ñuu Gaza —nacachi táto Ndióxi xihin dá.

Ta mé íchí cán yaha nuú co ndúu ñayivi jáchí íchí ndivaha. 27 Anda já naquee Felipe cuahan da. Ta íchí nu xica da cuahan da cán nandítahan da in dataa, da naquixi nación Etiopía. Mé da Etiopía yóho cúu dá in ta cáhnu nación dá jáchí cúu dá da cómi cuéntá sahá jjuhún ña cúu ñaha ña naní Candace, ña cómi cuéntá sahá ñayivi nación Etiopía. Mé da yóho sa nasahan da ñuu Jerusalén caja cáhnu da Ndióxi. 28 Ta tá cuahan tucu da íchí ndicó coo da Etiopía cán ta nani ín coo da jata carreta já cáhvi da libro nacahyí profeta Isaías. 29 Anda já nacahan ínima yii Ndióxi xihin Felipe já nacachi a já xihin dá:

—Cativi jjin carreta cuahan jan.

30 Anda já nacayati Felipe jjin carreta cán ta já naxini johó da cáhvi da Etiopía cán libro Isaías. Anda já nandaca tuhún Felipe da já cáchí da já xihin dá:

—Á cándaq inún ña cáhvún jan.

31 Anda já nanducú ñehe da Etiopía cán tuhun nu Felipe já nacachi da já:

—Ndaja caja i candaq ini i ña cáhvi i tá coó na ndicani nuú i ndía cuni cachi a —nacachi da Etiopía cán xihin Felipe.

Anda já naxica da ñamaní nu Felipe ña ná ndaa da jata carreta da já ná cacoo da xihin dá ta ná ndicani da nu dá ña cuni cachi a. Chí ndaa Felipe carreta cán.

32 Ta cáhvi da Etiopía cán tuhun Ndióxi nu cáchí a:

Tá quiahva ñehe na in ndicachi cuahan rí quivi rí quiahva já nasañehe na da cuahan da quivi da.

Ta tá quiahva cája ndicachi tá coo ndáhyi rí nani ndíjata na rí quiahva já nacaja mé dá jáchí coo nasuná da yuhu dá cahan da.

33 Nacaja xixi ndivaha na xihin dá ta coo nacaja ndaa na xihin dá.

Jáchí janda na naquixi chichi nuú naquixi mé dá coo nandiquehe na saha dá.

Ña ñacaja na quea ñasahní ña ña já ná a cóo ga ña ñuyíví yóho, cáchí ñuhun Ndióxi ñu cáhvi ña Etiopía cán.

³⁴ Anda já ñandaca ñuhun ña Etiopía cán Felipe já cáchí ña já xihín dá:

—Ta viti caja ndó ñamaní ndicani ndó nuú ñi ndía cúní cachi a yóho. Á saha mé va profeta yóho cáhan ña á sahá inga va da cáhan ña.

³⁵ Anda já ñacasáhá Felipe ndicani da nuú ña cán ña ñacahyí Isaías já ñandicani ña ñuhun vaña saha Jesús ñu dá. ³⁶ Ta tá yáha ña cuahan ña ñu ñúhu ticuúí já ñacachi ña Etiopía cán já xihín Felipe:

—Yóho ñúhu ticuúí. Á cuu caja ndúta ndó yehe —ñacachi ña xihín Felipe.

³⁷ Anda já ñacachi Felipe xihín dá:

—Tá cándeé ini ndó Jesús xihín ndinuhu ini ndó ta cuu va candúta ndo.

Anda já ñanducú ñehe ña cán ñuhun ñu Felipe já cáchí ña já:

—Cándusa ña cúní Jesucristo in túhún ñini já jahyi Ndióxi —ñacachi ña Etiopía cán.

³⁸ Chí ñivi laá ñasahnda ña Etiopía cán chuun ña ná caní ndichi na carreta cándójó ña cuahan ña cán. Anda já ñanuu ndíví ña cuahan ña ñu ñúhu ticuúí ta já ñajácandúta Felipe ña Etiopía cán. ³⁹ Tá ñandihí ñaquee na ini ticuúí cán já ñéhe ínimá yíí Ndióxi Felipe cuahan ña inga xoo chí cóo ñaxini táhan chága ña xihín ña Etiopía cán. Joo cájji ini ña Etiopía cán cuahan ña íchi. ⁴⁰ Tá ñandicotó ñihni Felipe sa íni ña in ñuu naní Azoto. Ta tá ñuu tá ñuu cuahan ña cáhan ña ñuhun vaña saha Jesús nuú ñayivi anda quiahva ñaxinu cóo ña ñuu Cesarea.

9

Ndíquehe Saulo íchi cuénta Jesús

(Hch. 22:6-16; 26:12-18)

¹ Joo ndaja coo ña naní Saulo cája xíxi tá cája xíxi ña xihín ña cúní cuénta Jesús. Ta sácú ini ña ndaja caja ña cahní ña ña. Ta sahá ña cúní ña jándihí ña saha ná sahá ña cán quea ñasahan ña cáhan ña xihín ña cúní sacuaña nuú jutú ² ña ná quiahva ña in carta ñu cáhan ña ñéhe dá ñamaní quihvi ña veñuhu ñúhu ñuu Damasco já ná ndinducú ña ña ndíco íchi cuénta Jesús já ná cató ña ña cañehe ña ña quixi ña cuhun ña

vecáa ñuu Jerusalén. Co cája toho a á cúní ná ña á ñáha. Chí ñaquee Saulo ñuu Jerusalén xihín mé carta. ³ Joo nani xíca ña cuahan ña íchi tá sa yati xinu cóo ña ñuu Damasco já in náa cuití ñandiyihvi ndaa ñúhu ña ña. Mé ñúhu yóho ñaquixi a chí indiví. ⁴ Chí ñivi laá ñandicava Saulo ñu ñúhu. Anda já ñaxini joho ña cáhan in a xihín dá já cáchí ña já xihín dá:

—Saulo, Saulo. Ndá cuénta quea cája xísun xihín ñi —cáchí ña xihín dá.

⁵ Anda já ñacasáhá ndaca ñuhun Saulo já cáchí ña já:

—Yo cúní ndó, ña cáhan. Ndaja naní ndo —cáchí ña.

Anda já ñanducú ñehe a cán ñuhun ñu dá já cáchí ña já xihín dá:

—Yehe cúní ña Jesús, mé ña cája xísun xihín. Ta xihín ña cájun yóho cúní á táñuhun cája xísun xihín mé vún jáchi cájun táñuhun cája in ñindiquí tá sání ndaa rí ñu yócó poya ta jándicuehe rí mé va rí.

⁶ Anda já ñacasáhá quíji Saulo xihín ña yíhvi ña já ñacachi ña já:

—Cáhan ndó xihín ñi, xitoho ñi ndía quea cúní ndó ná caja ñi —cáchí ña.

Anda já ñanducú ñehe Jesús ñuhun ñu dá já cáchí ña já xihín dá:

—Cuándacoo ña cuahán quihvi ñuu Damasco. Ta ñan cáhan ña xuhun ndía ndítahan cájun —cáchí Jesús.

⁷ Ta tóco ndihí ña cáshan xihín Saulo cán ñayihvi ndivaña ña jáchi ñaxini joho ña ña cáhan cán vatí cóo ñayivi ná xini ña. ⁸ Tá ñandihí já ñandacoo Saulo ñu ñúhu. Joo tá ñasuná ña nduchú nuú ña chí cóo tívi ga nuú dá. Sahá ña cán quea ñandá tén ndaa ña ña cuahan ña chí Damasco. ⁹ Cán ñasahin cuáá ña ñixi ñi quívi ta chí cóo ñaxixi ña ña ni ticuúí cóo ñaxihí ña.

¹⁰ Mé ñuu Damasco cán ñasahin in ña cúní cuénta Jesús naní Ananías. Ta ndaja coo ñaxini ndímáhnú ña Jesús ta ñacahan xihín dá já ñacachi ña já:

—Ananías.

Anda já ñanducú ñehe ña ñuhun ñu á já cáchí ña já:

—Yóho íni ñi. Ndía cúní ndo, xitoho ñi.

¹¹ Anda já ñacachi Jesús xihín dá:

—Candichi ña cuahán cáyé naní ña Ndacú Ndaa. Ta vehe ña naní Judas cán ndaca

tuhún sahá in da naní Saulo, da ñacacu ñuu Tarso. Viti ñúhú xíca tahví da nu Ndióxi ndácaan da. ¹² Jáchí ñaxini ndímáhnú da ña quíhvi mún, Ananías vehe nu ndácaan da. Ta ñaxini da ña chínúún ndáhun jiní dá ta já cuu candehé tucu da —ñacachi Jesús xihín Ananías.

¹³ Tá ñaxini johó Ananías ña yóho já ñacachi da já:

—Candehé ndo, xitoho i. Yíhvi i cuhún i jáchi sa cuahá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xihín na cúu cuéntá mé á, na ndúu ñuu Jerusalén. ¹⁴ Ta viti vaxi da jan ñuu yóho jáchi sa ñaxica da ñamaní nuú na sacuahá nuú jutú ña ná cuu játaca da tóco ndihi na cája cáhnu mé ndó já ná cañehe da na cuhún na vecaa —ñacachi Ananías.

¹⁵ Anda já ñacachi Jesús já xihín Ananías:

—Cuáhán quíi jáchi sa ñacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuéntá sahá na cán. Ta ñacaxi i da ña ná cahan da sahá i nuú na ñaquixi chichi Israel viti. ¹⁶ Ta jánaħa i nu dá ndá quiahva ndítahan ndoho ini da sahá i —ñacachi Jesús.

¹⁷ Anda já ñaquee Ananías cuahan da vehe nu ín Saulo cán. Tá ñaxinu da cán já ñachinúu da ndáħa dá jiní Saulo já ñacachi da já xihín dá:

—Ñani Saulo. Mé Jesús, xitoho í, mé á ñaxinún nuú ñaquisún íchi cán, mé á cán quéa ñachindahá yehe vaxi i já ná ndinuna nduchú núún já ná cuu candehé tucún. Ta já cúni Ndióxi ña ná ndicutú ndaħa ínimun xihín ínimá yíi mé á —ñacachi Ananías xihín Saulo.

¹⁸ Chí ivi laá ñacasáhá cúyu ñaha tátuhun runchu tiyacá nduchú núú Saulo chí ñanuna nuú dá sáñdehé tucu da. Anda já ñasahan Saulo ñacandúta dá. ¹⁹ Tá ñandihí já ñaxixi da ta ñandihvi tucu ndée dá ta ñasahin tóo da chá quívi xihín na cúu cuéntá Jesús ndúu ñuu Damasco cán.

Cáħan Saulo saħa Jesús nuú ñayivi ñuu Damasco

²⁰ Tá ñandihí já ñacasáhá Saulo jánaħa da tuhun Ndióxi ini veñuhu ta jánaħa da ña cúu Jesús in túhún jiní já jahyi Ndióxi. ²¹ Ta

tóco ndihi na táa johó nu cáħan da cátóntó na cája da. Já cáchi xihín táhan na já:

—Á a juú da yóho cúu da ñandicuita cája xíxi xihín na cúu cuéntá Jesús ñuu Jerusalén, nduu. Á a juú sa mé da yóho vaxi da tiin da na cúu cuéntá Jesús mé ñuu yóho já ná cuhún na nuú na sacuahá nuú jutú já ná taán ñahá na vecaa —ñacachi xihín táhan na.

²² Joo ví ga ví ndíndeé ini Saulo cáħan da tuhun Ndióxi. Ta náħa da nuú ñayivi ña mé Jesús cúu Cristo, mé á ñachindahá Ndióxi cacomí cuéntá sahá ñayivi. Janda quiahva já najáħaca da xíní túni na ñaquixi chichi Israel ndúu Damasco cán xihín tuhun cáħan da xihín ná.

Xínu Saulo nuú java na Israel jáchi cúni na cahni na da

²³ Tá sa ñayaha cuahá quívi já najándique táhan na ñaquixi chichi Israel cán tuhun na ña cahni na Saulo. ²⁴ Joo ñacandaħa ini Saulo ña ndúcú na cahni na da. Ta mé na ndúcú cahni Saulo cán ñasandati na ñuu ta ndiví yéhe ñuu cán janda quiahva ná queta da já ná cahni na da. ²⁵ Joo in ñuu na cúu cuéntá Jesús ndúu ñuu Damasco cán ñachicaan na da ini in toyicá cáhnu já najánuu na da ndíca náma cáhnu ndájí yuhú ñuu cán já ñacacu da ta ñaquee da cuahan da.

Cuahan Saulo ñuu Jerusalén

²⁶ Tá ñaxinu coo Saulo ñuu Jerusalén já ñanducú da ndique táhan da xihín na cúu cuéntá Jesús ndúu cán. Joo tóco ndihi na cán ñayihví na da jáchi co cándúsa na ña sa ñandiquehe da íchi cuéntá Jesús. ²⁷ Joo ñandiquehe Bernabé saħa Saulo. Ñasahan da najánaħa da da nuú na apóstol cán já ná ndique táhan na xihín dá. Ta ñandicani Bernabé nu ná ndaja ñasahin tá ñaxini Saulo Jesús íchi nu xíca da cuahan da chí ñuu Damasco. Ta ñandicani da ña ñacahan Jesús xihín Saulo. Ta ñandicani da ña coo ñayihví Saulo cahan da saħa Jesús ñuu Damasco. ²⁸ Anda já ñandiquehe na Saulo ta ñacandoo da ñuu Jerusalén. Ta ñacasáhá xíca nuu da xihín na apóstol. ²⁹ Ta co yíhvi da cáħan da sahá Jesús. Ta ñanditúhún da xihín na ñaquixi chichi Israel, na cáħan tuhun griego ndúu ñuu cán. Joo mé na

cán ndúcu na ndá quiahva caja na cahni na da. ³⁰ Tá nacandaa ini na cúu cuéntá Jesús ña ndúcu na cahni na Saulo já ñéhe na da cuahan da ñuu Cesarea. Anda já nachindahá na da cuanúhu dá ñuu Tarso.

³¹ Anda já nanduu vaha ini tóco ndihi na cúu cuéntá Jesús ndúu ndijáá estado Judea xihín estado Galilea xihín estado Samaria. Ta nandindacú chága ví ini na xihín tuhun Ndióxi. Ta xihín ndinuhu ini na cája cáhnu na Ndióxi. Ta chindeé ínima yii mé á na. Ta já nandicuaḥa chága na cuahan na.

Ndivaha in da naní Eneas

³² Ta ndaja coo xíca nuu Pedro xíto nihni da na cúu cuéntá Jesús ndúu ñuu válí cán. Ta já nasahan ri da xíto nihni da na cúu cuéntá Jesús ndúu ñuu Lida.

³³ Cán nanditahan da in dataa naní Eneas, da naxihí tuchu saha. Ta tixi una cuia nasandúhu dá jáchi a cuú caca da. ³⁴ Anda já naḥan Pedro xihín dá já nacachi da já:

—Eneas, viti ndája vaha Jesucristo yohó. Cuáhán ndacoo. Nditivún yívun —cáchi Pedro xihín dá.

Chí ivi laá nandacoo Eneas. ³⁵ Tóco ndihi na ndúu ñuu Lida xihín na ñuu Sarón naxini na da nandivaha yóho ta anda já najándacoo na costumbre yatá nasacaja na já nandiquehe na íchi cuéntá Jesús, xitoho í.

Nditacu in ñañáha naní Dorcas

³⁶ Ta ndaja coo nasahin in ñañáha, ña cúu cuéntá Jesús ñuu Jope. Ta mé ñañáha yóho naní ña Tabita ta tuhun griego cáchi na Dorcas xihín ña. Ta mé Dorcas yóho ní tiempo nandihí ini ña cája ña ñamaní xihín ñayivi ta nachindeé ña na ndahví. ³⁷ Ta mé tañu já naquehe cuehe Dorcas ta naxihí ña. Ta tá sa nandicata na yiquí cuñu ña já ñéhe na ña nasahan na nachindúhu ná ña piso nínu vehe cán. ³⁸ Ta yati va ñéhe táhan ñuu Jope cán xihín ñuu Lida nu íin Pedro. Tá nacandaa ini na cúu cuéntá Jesús ña íin yati Pedro já nachindahá na ivi dataa nasahan da cana da Pedro ña ná cūhun quí dá ñuu Jope cán.

³⁹ Anda já ndáca táhan Pedro cuahan da xihín ndíví dataa cán. Tá naxinu coo Pedro ñuu Jope cán já najáquihví na da ini vehe nu ndácaan mé ndii Dorcas cán.

Nataca tiyivi cuahá najihí cuaan ndúu na sácu ndivaha na saha ña naxihí cán. Ta najánaḥa na jáhma ña nacavaha Dorcas nu dá tá nasatacu ña. ⁴⁰ Anda já nacachi Pedro xihín ndihi ñayivi ndúu cán ña ná quee tóo na jata vehe. Tá sa naqueta na cán já nacaxítí da xíca tahví da nu Ndióxi. Anda já nacasáhá sándehe da ndii cán já nacasáhá cáchi da já xihín ña:

—Cuáhán ndacoo, Tabita.

Tá nacachi da já chí ivi laá nanuna nduchú núu ña nanditacu ña. Tá naxini ña Pedro já nasacoo ña. ⁴¹ Anda já natiin Pedro ndáha ña já nandínehe da ña. Anda já nacana da na cúu cuéntá Jesús xihín na cuaan cán ná quihvi tucu na cán jáchi sa nanditacu ña. ⁴² Tóco ndihi ñayivi ñuu Jope cán nacandaa ini na ña nanditacu Dorcas chí cuahá ná nacandúsa na Jesús ta nandihvi na íchi cuéntá mé á. ⁴³ Ta chí nacandoo Pedro cuahá quivi ñuu Jope cán. Nacandoo tóo da vehe in da naní Simón, da ndája víí ní quíti.

10

Cáhan Pedro tuhun vaha saha Jesús nu Cornelio

¹ Ta ndaja coo nasahin in dataa naní Cornelio ñuu Cesarea cán. Ta mé Cornelio yóho cúu dá da cómi chuun nuú iñu ciento soldado. Ta mé táhndá soldado yóho naní a Táhndá Italiano. ² Ta mé Cornelio yóho xihín tóco ndihi na vehe da cája cáhnu na Ndióxi xihín ndinuhu ini na. Ta jásá da jjuhún da ña chindeé da na naquixi chíchi Israel. Ta ní tiempo xíca tahví da nu Ndióxi. ³ In quivi tátuhun caa uní sahini nani xíca tahví da nu Ndióxi já naxini cáxi táhyí da naquihvi in tátō Ndióxi ini vehe nu ndácaan da já nacachi a já xihín dá:

—Cornelio.

⁴ Ta chí nayihví Cornelio sándehe da tátō Ndióxi cán. Anda já nacachi da já:

—Ndía cúní ndo, tátō Ndióxi.

Anda já nanducú ñehe tátō Ndióxi cán tuhun nu dá já cáchi a já xihín dá:

—Xíni joho Ndióxi tá xíca tahvún nu á ta sa xíni a ña nachindeé cuahún na ndahví. Ta táhán ini mé á xihín ña cájún. ⁵ Ta viti cúní Ndióxi ña ná chindahún java dataa ná cūhun da ñuu Jope já ná cana da da naní

Simón, da cáhan tucu na Pedro xihin ná quixi da. ⁶ In tóo Pedro vehe inga da naní Simón, da ndája vií níi quítí. Ta yati yuhú tañuhú in vehe da. Ta mé Pedro cán caxi tuhun da xuhun ndíá ndítahan nuun cajún —nacachi tátō Ndióxi cán.

⁷ Tá sa naquee tátō Ndióxi cán cuahan já nacana Cornelio ivi mozo da ta nacana da in táhan soldado, da cómi da cuéntá saha. Ta mé soldado yóho cúú dá in da cája cáhnu Ndióxi. Ta cándéé ini Cornelio da. ⁸ Ta tá nandihí nandicani Cornelio nu ndíhuni da ña nacachi tátō Ndióxi xihin dá já nachindahá ñahá da cuahan da ñuu Jope.

⁹ Ta inga quiví itaan xica na cán cuahan na íchi ta sa yati xinu coo na ñuu Jope. Ta cúú á tátuhun caxivi ta mé hora já nandaa Pedro jini véhe caça tahví da nu Ndióxi. ¹⁰ A juú quiahva cuíco Pedro chí naxica da ña cuxu da. Ta nani cája ndiví na ña cuxu da já najánaña Ndióxi in ñaha nu dá. ¹¹ Ta ña naxini da queá nandinuna indiví já nanuu in jáhma cáhnu tátuhun in sábaña ña ndíco ndícomí tito ta núu a vaxi ñuyiví yóho xini da. ¹² Ta mé ini jáhma cán ñúhu tá nuú quítí, rí comí saha xihin coo xihin laa viti. ¹³ Anda já naxini johó da cáhan in a xihin dá já nacachi a já:

—Pedro. Candichi ta cahní quítí jan casún.

¹⁴ Anda já nanducú ñehe Pedro tuhun já cáchí da já:

—A cája toho i já, xitoho i jáchi ni in túhún tañu a ñaha caxi i quití quini tátuhun rí yóho. Jáchi cáchí ley nasahan ndó nuú nde ña ná a cáxi toho nde ri —cáchí Pedro xihin á.

¹⁵ Anda já nacahan tucu a xihin dá já nacachi a já:

—Sa nandaja vií va Ndióxi rí jan. Saha ña cán queá co ndítahan cachún ña cúú rí rí quini —cáchí a xihin dá.

¹⁶ Tixi uní táhndá naxini da ña yóho nacaja Ndióxi. Anda já nandindita tucu jáhma cán cuahan chí indiví. ¹⁷ Chí nacasáhá ndicani ini Pedro ndíá cúní cachi ña naxini da. Ta xihin ña yóho naxinu coo ndíhuni dataa, da nachindahá Cornelio mé vehe nu in Pedro cán. Jáchi vaxi da ndaca tuhún da sahá vehe Simón janda quiahva nanditahan da ña. ¹⁸ Ndíta ndíhuni da cán

yuyéhé vehe Simón ta cáyuhú da ndáca tuhún da sahá in da naní Simón, da cáhan tucu na Pedro xihin. ¹⁹ Ta nani ndáca tuhún na yóho in yii va Pedro jini véhe cán ndicani ini da sahá ña naxini da nacaja Ndióxi cán. Anda já nacahan inima yii Ndióxi xihin dá já cáchí a já:

—Candehé, nandai cuu uní taa vehe yóho ta ndínducú da yohó. ²⁰ Cuáhán nuu cuhún xihin dá ta a ndicani inún jáchi mí i nachindahá i da vaxi —cáchí a xihin Pedro.

²¹ Anda já nanuu Pedro já naxinu da nu ndíta dataa nachindahá Cornelio cán. Já nacachi Pedro já xihin dá:

—Yehe cúú Pedro, da vaxi ndó ndínducú ndo ta viti cachi ndó xihin i ndá queá cúní ndo.

²² Anda já nanducú ñehe da cán tuhun nu Pedro já cáchí da já:

—Da naní Cornelio cúú da nachindahá ndehe vaxi nde. Mé Cornelio cúú dá in da cómi cuéntá sahá inu ciento soldado. Mé dá cúú dá in taa cája ña ndaa. Ta cája cáhnu da Ndióxi. Ta quíhvi ndivaha ini na Israel da. Ta nacahan in tátō Ndióxi xihin dá ña ná chindahá da ndehe cana nde ndohó cuhun ndó vehe da já ná cahan ndó xihin dá ndá queá cúní Ndióxi caja da —cáchí da xihin Pedro.

²³ Anda já najáyaha Pedro ndíhuni dataa cán ini vehe. Já nacandoo da cán naquiji da ñuu vehe Simón cán. Ta inga quiví itaan já naquee Pedro cuahan da xihin ndíhuni dataa cán. Ta ndáca Pedro java na cúú cuéntá Jesús ndúu ñuu Jope cán cuahan na xihin dá.

²⁴ Janda inga quiví itaan já naxinu coo na ñuu Cesarea nu in Cornelio ndáti da na. Mé Cornelio yóho sa najátaca da tóco ndihí na vehe da xihin java na ñehe táhan vaha xihin dá ndúu na xihin dá ndáti na saa Pedro. ²⁵ Tá naxinu coo Pedro vehe cán já naqueta Cornelio ndiquehe ñahá da. Ta tá nandihí já nacaxítí Cornelio nu Pedro ña caja cáhnu ñahá da. ²⁶ Joo nasacu ndichi Pedro da já nacachi Pedro já xihin dá:

—Candichi jáchi ñayivi xihin mé vún cúú yehe.

²⁷ Sa já cáhan Pedro xihin dá ndáca táhan da nandihvi da ini vehe. Ta tá nandihvi da cán já naxini Pedro nanditútú cuahá ñayivi

ndúu na cán. ²⁸ Anda já nacasáhá Pedro cáhan da xihín ná já cáchí da já:

—Sa xíní vaha ndó ña cúu yehe in da naquixi chichi Israel. Ta sa xíní ndó ña sáhndá ley nuú nde ña ná a cátahan nde xihín ñayivi tóho. Ta ni vehe na ná a ndíhvi nde cáchí ley. Joo viti najánaña Ndióxi nuú i ña coo cúu ndehe ñayivi vii chága a juú ga ndóhó, na tóho. ²⁹ Sahá ña cán quéa tá nacana ndó yehe ivi laá naquee e vaxi i. Ta ni coo nandaja ndíchí i da ndáca yehe vaxi i yóho. Ta viti cúní candaa ini i ndá cuéntá quéa nacana ndó yehe vaxi i —cáchí Pedro.

³⁰ Anda já nanducú ñehe Cornelio tuhun nu Pedro já cáchí da já:

—Janda comí quivi tátuhun hora viti, xíjuhun i ta xíca tahví i nu Ndióxi ndácaan i vehe e. Ta tá nasandehé e já naxini i in dataa ndíxí jahmá yehe cándichi da nuú i. ³¹ Já nacachi da já xihín i: “Cornelio, sa xíní johó Ndióxi nu xíca tahvún nu á. Ta quéhe a cuéntá sahá ñamaní cájún xihín na ndahví. ³² Ña cán quéa chindahá java dataa ná cuhun da ñuu Jope cana da Simón, da cáhan tucu na Pedro xihín ná quixi da cáhan da xuhun. Viti ín tóo da vehe in da naní Simón, da ndája vii níí quítí. Ta yati yuhú tañuhú ndácaan vehe da”, nacachi tátó Ndióxi cán xihín i. ³³ Sahá ña cán quéa ivi laá nachindahá i mozo i nasaa da nducú da ndóhó. Ta vaha nacaja ndó vaxi ndó. Ta viti nanditútú ndihi nde ndáti nde nu Ndióxi. Ta cúní nde cuni johó nde tóco ndihi ña nasahnda Ndióxi nu ndó cachi ndó xihín nde —cáchí Cornelio xihín Pedro.

Cáxi tuhun Pedro nuú ñayivi vehe Cornelio

³⁴ Anda já nacasáhá cáhan Pedro já nacachi da já:

—Viti candaa ini i ña coo na náhnu chága a juú ga inga na nu Ndióxi jáchí nu mé á in cúu ndihi ví. ³⁵ Ña cája mé á quéa ndíquehe vaha ndá ñayivi nacuu tá cándéé ini na mé á ta cája na ña vaha. Coó caja toho a á cúu ná na Israel á na tóho. ³⁶ Nacaxi tuhun Ndióxi nuú ñayivi Israel ndá quiahva cuu coo vaha ini na tá cándéé ini na Jesucristo, mé á cúu xitoho toco ndihí. ³⁷ Sa candaa ini ndó ndaja nasahin tá nacasáhá Juan cáxi tuhun da nuú ñayivi ndúu estado Galilea

ña ná ndicó coo ini na nuú cuachi na ta já ná candúta na. Ta nandicutita nuu tuhun ndijáá nu ndúu na Israel. ³⁸ Ta sa candaa ini ndó ndaja nacaja Ndióxi xihín Jesús, mé a naquixi ñuu Nazaret. Najándicutú ndaa Ndióxi Jesús xihín ínima yíí mé á ta najándicutú a ña xihín ndéé mé á. Ta mé Jesús naxica nuu a cája ndinuhu ña vaha xihín ñayivi. Ta nandaja vaha mé á na nasandoho ini nacaja tiñáhá sacuaña. Nacaja Jesús ña yóho jáchí nasahin Ndióxi xihín á. ³⁹ Ta mé nde, na apóstol cúu na naxini ña nacaja Jesús tóco ndihi ña yóho tá nasahin a estado Judea ta tá nasahin a ñuu Jerusalén. Anda já nasahni na mé á tá nacata caa na a ndica crúxu. ⁴⁰ Joo tá nayaha uní quivi já najánditacu Ndióxi Jesús ta nacaja Ndióxi ña ná ñaha Jesús mé á nuú nde. ⁴¹ Coó nanaha toho Jesús mé á nu tóco ndihi ñayivi. Nuú ndehe, na nacaxi Ndióxi cuití va nanaha Jesús mé á. Jáchí janda jihna nacaxi mé á ndehe ña ná cuni nde ña ta ná cáhan nde xihín ñayivi saha mé á. Ta tá sa nanditacu tucu a tañu ndii cán já naxixi nde xihín á. ⁴² Ta mé á nachindahá ndehe caxi tuhun nde nuú ñayivi saha Jesús ta ná ndicani nde nu ná ña nasacu Ndióxi mé Jesús ña ná caja vii a sahá ñayivi. Coó caja toho a á tácu na á naxihí na. ⁴³ Ta jári na profeta va janda sanahá nacahan na saha Jesús ta nacachi na ña caja cáhnu ini Ndióxi sahá cuachi ndijáá ñayivi tá ná cándéé ini na mé á —cáchí Pedro xihín ndihi na ndúu vehe Cornelio cán.

Jándicutú Ndióxi na coo naquixi chichi Israel xihín ínima yíí mé á

⁴⁴ Ta nani cáhan Pedro cándichi da já naxinu ínima yíí Ndióxi najándicutú a ínima tóco ndihi na táa johó ña cáhan da cán. ⁴⁵ Ta na cúu cuéntá Jesús, na naquixi chichi Israel, na ndáca Pedro vaxi xihín dá cán, nacatontó na tá naxini na nandicutú na tóho cán xihín ínima yíí Ndióxi. ⁴⁶ Ta xíní na ña cúu á ña ndaa jáchí naxini johó ña cája cáhnu na Ndióxi ta cáhan na inga tuhun ña coo nasatiahva na. ⁴⁷ Anda já nacachi Pedro já:

—Cája i cuéntá ni in túhún toho ñayivi a cúu caji nuu nuú na tóho yóho ña ná

candúta ná jáchi sa nandicutú ínima ná xihin ínima yii Ndióxi tátuhun nandicutú mé nde xihin á —cáchi Pedro.

⁴⁸ Anda já nasahnda Pedro chuun ña ná jácandúta ná na cuénta Jesucristo. Tá nandihi já naxica tahví na cán nu Pedro ña ná candoo da chága quivi xihin ná.

11

Ndicani Pedro nuú na cúu cuénta Jesús ndúu ñuu Jerusalén sahá ña nayaha vehe Cornelio

¹ Tóco ndihi na apóstol xihin na cúu cuénta Jesús ndúu estado Judea nañehe ná tuhun ña nandiquehe ri na coo naquixi chichi Israel tuhun Ndióxi. ² Ta tá nandico coo Pedro chí ñuu Jerusalén já nacasáha in táhnda na cúu cuénta Jesús ndúu ñuu cán cáhan núu na saha dá. Mé na yóho cáhan na ña ndítahan nuú na tóho cahnda loho na yiquí cuñu na tátuhun ín costumbre na Israel. ³ Já cáchi na já xihin dá:

—Ndá cuénta quéa nasahún naxito nihnún na coo naquixi chichi Israel. Ta ndá cuénta quéa naxisún xihin ná. A váha toho nacajún cáhan nde —nacachi na Israel cán xihin Pedro.

⁴ Anda já nacasáha Pedro ndicani da tóco ndihi ña nayaha janda saha. Já nacachi da já:

⁵—Nasahin i ñuu Jope. Ta nani xica tahví i nu Ndióxi já najánaaha mé á in ñaha nuú i. Ta ña naxini i cúu in jáhma cáhnu tátuhun sábaná nanuu chí indivi ta ndicomí xoo tito á naco. Ta chí janda yati nu in i naxinu a. ⁶ Ta tá nasandehé váha i ini a já naxini i ñuhu tá nuú quití, rí comí saha xihin tá nuú quití yucú xihin coo xihin laa ñuhu ini a naxini i. ⁷ Anda já naxini johó i cáhan in a já nacachi a já xihin i: “Pedro, cuáhán ndacoo cahni quití jan casún.” ⁸ Anda já nanducú ñehe e tuhun já nacachi i já: “A cáxi toho i rí yóho, xitoho i jáchi coo xini toho i cáxi i quití quini tátuhun rí yóho”, cáchi i xihin Ndióxi. ⁹ Anda já nacahan tucu a cán chí indivi já nacachi a já: “Sa nandaja vii va Ndióxi rí jan. Sahá ña cán quéa coo ndítahan cachún ña cúu rí rí quini”, nacachi Ndióxi xihin i. ¹⁰ Uní táhnda nayaha ña yóho nacaja Ndióxi. Anda já nandaa tucu tóco ndihi ña

cán cuahan tucu a chí indivi. ¹¹ Ta chí sa mé hora já naxinu coo uní ta ndinducú da yehe mé vehe nuú nasahin tóo i cán. Ta da cán naquixi da janda ñuu Cesarea ndinducú da yehe. ¹² Ta já nachindahá ínima yii Ndióxi yehe cuahan i xihin ná sahá ña cán quéa coo nayihví i cuhun i xihin ná. Ta ndáca i ñuu ñaní yóho nasahan da xihin i. Tá naxinu coo nde ñuu cán já naquihvi nde vehe Cornelio, da nachindahá da cán ndinducú yehe. ¹³ Ta tá sa ñuhu ndihi nde vehe Cornelio cán já nacasáha ndicani da nuú nde ña naxini da cándichi in táto Ndióxi ini vehe da ta nacachi a xihin dá já: “Chindahá java ta ná cuhun da ñuu Jope cana da in da naní Simón, da cáhan tucu na Pedro xihin. ¹⁴ Ta da cán caxi tuhun xuhun ta xihin ndihi na vehún ndaja caja ndó cacu ndaa ínima ndó”, nacachi táto Ndióxi xihin Cornelio cán. ¹⁵ Ta tá nacasáha i cáhan i xihin na vehe Cornelio cán já nandicutú ndaa ínima ná xihin ínima yii Ndióxi tá quiahva najandicutú a ínima mí jihna. ¹⁶ Xihin ña yóho nandicuhun ini i ña nacachi Jesús, xitoho i xihin yo tá nacachi a já: “Mé a ndaa najacandúta Juan ndohó xihin ticuú joo vaxi quivi jandicutú Ndióxi ndohó xihin ínima yii mé á”, nacachi Jesús. ¹⁷ Ta tá sa nasahan Ndióxi ínima yii mé á nuú na cán tá quiahva nacaja xihin mí sahá ña nacandúsa i Jesucristo, xitoho i ama ná caní táhan i xihin Ndióxi sahá ña cája mé á xihin na cán —nacachi Pedro.

¹⁸ Tá naxini johó na cán ña nacachi Pedro já nacaatáji ná ta nacaja cáhnu na Ndióxi já nacachi na já:

—Mé a ndaa sahan ri Ndióxi ñamaní nuú na tóho ña ná ndicó coo ini na jandacoo na cuachi cája na já ná coo na xihin mé á anda ama cáa quivi —nacachi na cúu cuénta Jesús, na naquixi chichi Israel cán.

Cuahá na ñuu Antioquia ndiquehe na ichi cuénta Jesús

¹⁹ Tá nandihi nasahní na Esteban já nacasáha cája xixi na xihin na cúu cuénta Jesús. Anda já nandicuíta nuu na cuahan na ta java na naxinu na janda chí estado Fenicia. Java na naxinu na cuahan na chí isla Chipre. Ta java na naxinu na chí ñuu Antioquia. Ta cán nacasáha cáhan

na tuhun Ndióxi nuú na naquixi chichi Israel cuití va. Joo coó naçaxi tuhun na ña nuú na tóho cán. ²⁰ Joo java na cúu cuéntá Jesús, na naquixi chí isla Chipre cán xihín na naquixi ñuu Cirene naxinu coo na ñuu Antioquía ta naçasáhá na cáhan na tuhun vaha saha Jesús, xitoho í xihín na coó naquixi chichi Israel ndúu cán. ²¹ Ta nasahan Ndióxi cuahá ndée mé á nu ná. Ta cuahá ndivaha ñayivi najándacoo na costumbre yata na ta nandiquehe na íchi cuéntá Jesús, xitoho í.

²² Tá naçandaa ini na cúu cuéntá Jesús ndúu ñuu Jerusalén tóco ndihi ña nayaha cán já nachindahá na Bernabé cuahan da janda ñuu Antioquía cán. ²³ Tá naxinu coo Bernabé ñuu Antioquía cán já naxini da ndá quiahva naçaja Ndióxi ñamaní xihín ñayivi ñuu cán chí naçajji ndivaha ini da. Ta naçahan da xihín ná ña ná candico na íchi cuéntá Jesús xihín ndinuhu ini na. ²⁴ Mé Bernabé yóho cúu dá in taa vaha. Ta chutú ndaa ínima da xihín ínima yji Ndióxi ta cándéé cáhnu ini da mé á. Ta cuahá ñayivi nandiquehe na íchi cuéntá Jesús, xitoho í sahá ña naçaja da.

²⁵ Tá nandihí já naquee Bernabé cuahan da ndinducú da Saulo chí ñuu Tarso. Ta tá nandinehe dá Saulo já ñehe da da cuahan da chí ñuu Antioquía. ²⁶ Ta nasanduu da xihín na cúu cuéntá Jesús mé ñuu cán tátuhun in cuia. Ta najánaha da tuhun Ndióxi nuú cuahá ndivaha ñayivi. Ta mé ñuu Antioquía cán cúu nuú nu cuití nasacu na quivi ná cananí na na cúu cuéntá Jesús.

²⁷ Ta mé tiempo já naxinu coo java na profeta mé ñuu Antioquía cán. Mé profeta yóho naquixi na chí ñuu Jerusalén ta tiahva na jáyaha na tuhun cáhan Ndióxi nuú ñayivi. ²⁸ Ta in táhan da profeta cán, da naní Agabo nandaca ndichí da tañu na cúu cuéntá Jesús mé vehe nuú nataca na cán. Já naçachi da já:

—Cáxi tuhun ínima yji Ndióxi xihín i ña quixi in tama ndeé ndivaha ndijáá ñuyivi yóho —naçachi da xihín ná.

Ta chí já ndusa nasahin jáchi naquixi in tama ndeé ndivaha tá nasacomí Claudio cuéntá sahá ñayivi ñuu Roma. ²⁹ Anda já na cúu cuéntá Jesús ñuu Antioquía cán najátaca

na jiuhún chindeé ñahá na cán. Ta ndá quiahva xinu coo nu mé ná quiahva na, quiahva já sahan na. Anda já nachindahá na ña nuú na cúu cuéntá Jesús ndúu estado Judea. ³⁰ Ta mé Saulo xihín Bernabé cúu da ñehe jiuhún cán cuahan da ndiquiahva da ña nuú na sacuaña cómi cuéntá sahá na cúu cuéntá Jesús ndúu estado Judea cán.

12

Tá naçasáhá ndóho chága ini na cúu cuéntá Jesús

¹ Ta mé tiempo já naçasáhá Herodes, da cómi cuéntá sahá ñuu Jerusalén cán cája xixi da xihín java na cúu cuéntá Jesús. ² Nasahnda da chuun ña ná cahní na Jacobo, ñani Juan xihín yuchú caní. Ta já naçaja na. ³ Ta tá naxini Herodes ña naçajji íní na sacuaña veñuhu Israel xihín ña nasahní da Jacobo já natin ri da Pedro. Ta ña yóho nasacuu a mé tiempo tá cája na Israel víco tá xixi na pan ña co cáva táhan yusá naxaa xihín. ⁴ Tá sa nachicaan Herodes Pedro vecaa já nasahnda da chuun nuú comi táhnda soldado ña ná candaa na da. Ta comi comi taa ndáca in in táhnda cán. Mé Herodes nasacu ini da tavá da Pedro vecaa ndiquiahva da da nuú ñayivi Israel ña ná cahní na da tá sa ná yaha víco. ⁵ Nani ndacaan Pedro vecaa ndáa vaha na da. Joo na cúu cuéntá Jesús xihín ndinuhu ini na xica tahví na nu Ndióxi saha dá.

Tává Ndióxi Pedro vecaa

⁶ Ta in ñuu sácú ini Herodes tavá da Pedro vecaa inga quivi itaan ña ndiquiahva da da nuú ñayivi, nduu. Joo mé ñuu já nani cánduhu Pedro quiji da tañu ivi soldado ta ndico jin ga cadena ndáha dá ta co cáhan sahá java ga soldado ndíta ndáa yéhe vecaa cán. ⁷ Ta in náá cuití naxinu coo in táto Ndióxi ini vecaa cán chí nandiyihvi ndaa ini a. Anda já naxinu coo mé táto Ndióxi nu cánduhu Pedro já naquiní a ndáha á yica ndicá da já nandicaxí ini da. Anda já naçachi a já xihín dá:

—Camún ndacoo quíun.

Anda já naçayu cadena ña nasandico ndáha Pedro. ⁸ Anda já naçachi tucu táto Ndióxi cán já xihín dá:

—Ndaja tuun níi tisún ta cayihi ndusun.

Ta tá sa ñacaja da ña já ñacachi tucu táto Ndióxi já xihín dá:

—Quehe ticachí níhnu chinúú jatun ná cohó candico yehe —cáchi a xihín dá.

⁹ Anda já tácaa Pedro jata táto Ndióxi cán cuahan da. Joo co xini da á jivi quea á a juú a. “Sání ví”, cáhán da. ¹⁰ Ta xica na cásahan na já nayaha na nu ndíta in táhnda soldado. Ta anda já nayaha na nu ndíta inga táhnda soldado. Ta tá sa ñaxinu coo na yéhe caa cán já ñanuna mé va já ñaquee na vecaa cuahan na. Ta tá sa ñaxica chá na cáyé cán já ñaquee táto Ndióxi cán cuahan ta já ñacandoo Pedro cán. ¹¹ Anda já ñacandaa ini Pedro ña nayaha. Ta ñacachi da já xihín mé dá:

—Viti ndusa cándaa ini i ña mé a ndaa táhyí quea ñacaja táto Ndióxi yóho. Mé Ndióxi ñachindahá a táto á já ná tava a yehe ndáha Herodes já ná a cáhni da yehe tá quiahva cuni na Israel —ñacachi da.

¹² Nani cáhán Pedro xica da cuahan da vehe María, ña cúu náná Juan, da nani tucu Marcos. Cán ñanditútú cuahá na cúu cuénta Jesús ndúu na xica tahví na nu Ndióxi saha Pedro. ¹³ Ta tá ñaxinu coo da vehe María cán já ñacasáhá cáti ndáha dá yéhe cán. Anda já ñaxinu coo in ña loho nani Rode ña candehé ña ndá na cándichi jata véhe cán. ¹⁴ Tá ñaxini johó ña cáhan da já ñandicuni ña tachí Pedro. Joo ñandindójó ña cuná ña yéhe sahá ña cájii íni ña. Ta já xinu ña ñandicó coo tucu ña ini vehe caxi tuhun ña xihín na java cán ña cándichi Pedro jata véhe. ¹⁵ Joo tá ñandicani ña ña yóho nu ná já ñacachi na já xihín ña:

—Tachí va cúu yóho.

—Jivi da —cáchi ña cán ndúcú ndée ña cáhan ña xihín ná.

Anda já ñacachi na cán já:

—Ndá ínimá va da quea jan jáchi vecaa va ndacaan Pedro —ñacachi na.

¹⁶ Joo ndaja coo Pedro cáti ndáha yii va da yéhe cán. Já ñaxinu coo na ñasuná na yéhe nu dá ta chí ñayihví na tá ñaxini na da.

¹⁷ Joo ñacuu ndáha dá nu ná ña ná a cáhan chága na. Anda já ñacasáhá da ndícani da nu ná ndaja ñacaja Ndióxi natavá a da vecaa cán. Ta já ñacachi da xihín ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuénta Jesús —ñacachi Pedro.

Anda já ñaqueta Pedro cuahan da.

¹⁸ Tá ñativi inga quiví itaan já ñacatónto soldado vecaa cán tá ñacandaa ini da ña coo Pedro ín vecaa ta coo ñaxini da ndáchí cuahan da. ¹⁹ Anda já ñasahnda Herodes chuun ña ná ndinducú na da. Joo coo ñandiñehe ná da. Anda já ñacasáhá da ndája ndichí da soldado vecaa cán ndáchí cuahan Pedro. Joo coo ñacuu cachi na cán ndáchí cuahan da. Sahá ña cán quea ñasahnda Herodes chuun ña ná cáhni ndihi na soldado da ñasandaa yéhe caa cán. Tá nayaha ña yóho já najándacoo Herodes estado Judea cán ta ñaquee da cuahan da chí Cesarea coo da.

Quiví ñaxihí Herodes

²⁰ A juú quiahva xójo ini Herodes xihín ñayivi ndúu ñuu Tiro xihín na ndúu ñuu Sidón. Joo ndíví ñuu cán ñajándique táhan na tuhun na cuhun na cahan na xihín dá. Coo vaha ini na xihín dá cuni na jáchi ñundáhyi rey cán cána tóco ndihi ña xixi na. Joo jihna ñuhú ñandique táhan máni ná xihín in da nani Blasto. Mé Blasto yóho ñasacuu da in da cáhnu cája chúun nu rey cán. Ta ñacahan na ña ná cahan ndahví da cán nu rey saha ná. ²¹ Ta ñasacu Herodes in quiví nditútú ndihi na nu dá. Ta tá ñatandaa mé quiví já ñasacandixi Herodes jáhma vaha ndivaha da, ña sácandixi rey. Ta ñasacoo da nu sácoo rey. Ta já ñacahan cóhó da xihín ñayivi. ²² Tá ñaxinu coo ña cáhan da já ñacasáhá ñayivi cán cáyuhú na já cáchi na já:

—Ndióxi cúu da yóho ta coo cúu dá ndá taa ñacuu —cáchi na cája cáhnu na Herodes cán.

²³ Ta chí sa mé hora já ñaxinu in táto Ndióxi ta ñacaja ña ná quehe Herodes cuehe jáchi coo ñacaja cáhnu da Ndióxi ta já ñasahan da ñamaní nuú ñayivi ña cáchi na cúu dá ndiόxi. Chí sa mé hora já ñaquihví ticujú yiquí cuñu da já ñaxihí da.

²⁴ Ta níi cúu ñandicujita nuu tuhun vaha saha Jesús xica cuahan. Ta chí ñandicuaaha chága na cúu cuénta Jesús.

²⁵ Ta ndaja coo ñandiquiahva Bernabé xihín Saulo mé jihún nuú na sacuaaha

veñuhu ndúu ñuu Jerusalén já nandicó coo da cuahan da ñuu Antioquia. Ta ndáca na Juan, da naní tucu Marcos cuahan da xihin ná.

13

Cája chúun Bernabé xihin Saulo cuénta Ndióxi

¹ Ta ndaja coo tañu na cúu cuénta Jesús ndúu ñuu Antioquia cán ndúu na cúu profeta ta ndúu ri na jánaħa tuhun Ndióxi. Ta ña yóho cúu quivi ná: Bernabé xihin Saulo xihin Simón, da cáħan na Taa Tuún xihin, xihin Lucio, da ñuu Cirene xihin Manaén, da nasahnu xihin Herodes. Mé Herodes yóho cúu dá da cómi cuénta sahá ñayivi estado Galilea. ² In quivi nani nanditutu ndihi na ndúu na xijuhun na ta cája cáħnu na Ndióxi já naħan inima yij mé á xihin ná já naçachi a já:

—Tavá jín ndó Bernabé xihin Saulo jáchi sa naçaxi mí i chuun quiahva i nu ná caha na —naçachi a.

³ Ta tá sa nandihí na xijuhun na ta tá nandihí na xica tahví na nu Ndióxi já naçojó na ndáħa ná jini Saulo xihin Bernabé já nandindayí na na cuahan na caha na chuun Ndióxi.

Cáħan Saulo xihin Bernabé tuhun vaha saħa Jesús isla Chipre

⁴ Tá nandihí já naçindahá inima yij Ndióxi Saulo xihin Bernabé cuahan na ñuu Seleucia. Ta cán nandaa na barco cuahan na isla Chipre. ⁵ Ta ndáca na Juan, da naní tucu Marcos cuahan da xihin ná já ná chindeé da na. Ta tá na xinu coo na ñuu Salamina nu sá ndichí barco cán já naçasáhá na cáħan na tuhun Ndióxi nu ñayivi táca veñuhu na Israel cán. ⁶ Ní cúu isla cán na xica nuu na janda quiahva na xinu coo na ñuu Pafos. Ta cán nanditahan na in da tají naquixi chichi Israel ta naní da Barjesús. Ta cúu dá in da tuhún jáchi cáchi da xihin ñayivi ña cáħan da cuénta Ndióxi. ⁷ Ta mé da tají yóho nasahin tuun da xihin in da naní Sergio Paulo, da cúu gobernador nu ñayivi isla Chipre cán. Ta naçacuu da da ndichí jini. Ta mé gobernador yóho naçana da Bernabé xihin Saulo jáchi cúni da cuni joho da tuhun Ndióxi. ⁸ Joo da tají naní Barjesús, da naní tucu Elimas naçasáhá da

sájí nuu da nuú Bernabé xihin nuú Saulo jáchi coo cúni da ña ná candeé ini gobernador cán Jesús. ⁹ Nandicutú ndaa inima yij Ndióxi ini Saulo, da cáħan na Pablo xihin já naçasáhá sándehe ndaa da nuú da tají cán. ¹⁰ Já naçachi da já xihin dá:

—Yóho cúun ta quini ta cúun jahyi tiñáhá, da xica jándahvi ñayivi. Coo cúun tóco ndihi ña vaha jáchi cúun caji nuun nuú ñayivi ná a ndiquehe na ichi cuénta Jesús. ¹¹ Ta viti jándoho Ndióxi inún. Jácuá a yóho ta ni a cúun nuú candii tixi chá quivi —naçachi Pablo xihin da tají cán.

Tá naçachi Pablo já chí ivi laá naçuaá da cán. Jánda tinn ndaa na da xica da jáchi coo tívi nuu dá. ¹² Tá na xini da cúu gobernador cán ña yóho chí ivi laá naçandúsa da Jesús. Jáchi chí catóntó da xini joho da tóco ndihi ña cáħan na saħa Jesús.

Xinu coo Pablo xihin Bernabé ñuu Antioquia ña ndácaan estado Pisidia

¹³ Nandaa Pablo xihin na xica xihin da barco ñuu Pafos cuahan na chí ñuu Perge ña ndácaan estado Panfilia. Joo nasahnda táhan Juan, da naní tucu Marcos xihin ná já nandicó coo da chí ñuu Jerusalén. ¹⁴ Tá nandihí já naçee Pablo xihin na xica xihin dá ñuu Perge já na xinu na ñuu Antioquia ña ndácaan estado Pisidia. Ta mé quivi ndiquehe ndée ñayivi nandihvi na veñuhu já nasacoo na. ¹⁵ Ta tá sa nandihí naçahvi na ley Moisés xihin ña naçahví na profeta já naçana na saçuaħa veñuhu cán Pablo xihin na xica xihin dá já naçachi na já xihin ná:

—Ñani i, tá iin tuhun vaha cúni ndó caħan ndó xihin ñayivi yóho cuu candichi ndó caħan ndó xihin ná viti —naçachi na cán xihin dá.

¹⁶ Anda já naçandichi Pablo já naçuu ndáħa dá nu ná catáji yuhu ná já naçasáhá cáchi da já xihin ná:

—Cuni joho ndó ñayivi Israel xihin tóco ndihi ndó, na cája cáħnu Ndióxi. ¹⁷ Mé Ndióxi, mé a cája cáħnu ñayivi nación Israel naçaxi a tásáħnu jícó yo ta naçaja mé á ña ná ndicuaħá ndivaha na nani naçacuu na na tóho nación Egipto cán. Joo tá nandihí já natavá mé á na xihin ndée mé á. ¹⁸ Ta cáħnu nasahin ini Ndióxi sahá cuachi na tañu ivi jico cuia nani na xica nuu na yucú

íchi cán. ¹⁹ Ta najándihi Ndióxi sahá usa nación ñayivi nasanduu ñundáhyi Canaán já najáyaha ñundáhyi jan ndáha tásáhnú jícó yo jáchi janda sanahá nasahan mé á tuhun a nu ná ña caja já xihín ná. ²⁰ Anda já nasahnda Ndióxi chuun nu juexe já ná cacomí na cuéntá saha ná tixi comi ciento java cuiá janda quiahva naxinu coo tiempo tá naquixi profeta Samuel, da jáyaha tuhun cáhan Ndióxi nuú ñayivi. ²¹ Anda já naxica tahví na Israel nu Ndióxi ña ná cacu mé á in rey ná cacomí da cuéntá saha ná. Saha ña cán quéa nasacu Ndióxi in da naní Saúl ná cacuu da rey nu ná. Nasacuu da jahyi Cis, da naquixi chichi Benjamín. Ta nasacomí Saúl cuéntá saha ná tixi ivi jico cuiá. ²² Tá nandihí já natavá Ndióxi Saúl já nachinúu a David ña ná cacomí da cuéntá saha ná. Já nacachi Ndióxi já saha dá: “Íin vaha ini i xihín David, jahyi Isaí jáchi xini ña caja mé dá tóco ndihi ña cuni”, nacachi Ndióxi saha David. ²³ Ta in da naquixi chichi mé David cán cúu Jesús, mé a nasahan Ndióxi tuhun a chindahá jácacu ñayivi Israel janda sanahá ndivaha. ²⁴ Ta janda tá cámaní quixi Jesús já naxica nuu Juan, da jácandúta ñayivi nacahan da xihín ñayivi ña ndítahan nu ná jándicoo na cuachi cája na ta ná candúta ná. ²⁵ Ta tá sa yati quivi da já nacachi da já xihín ñayivi: “A juú cahán ndo ña cúu yehe da nachindahá Ndióxi cacomí cuéntá saha ñayivi, vaha. Jáchi ja chá xinu inga da íin chága saha a juú ga yehe. Ta da cán cacomí cuéntá saha ndo ta cúu ndusa da cáhnu chága ta chí coó saha mí i caxítí i ndaxí i correa ndusa dá”, nacachi Juan xihín ñayivi cán.

²⁶ Cuni johó vaha ndó, ñani i, na naquixi chichi Abraham xihín tóco ndihi ndó, na cája cáhnu Ndióxi xihín ndinuhu ini. Mé Ndióxi cuni a ña ná candaá ini ndó ña nachindahá mé á Jesús ñuyiví yóho já ná jácacu a ndohó já ná a cuhun ndó in-dayá. ²⁷ Tóco ndihi na ndúu ñuu Jerusalén xihín na sacuaaha coó nacandaá ini na ña nachindahá Ndióxi Jesús ñuyiví yóho. Ta ni coó nacandaá ini na tuhun nacahyi profeta saha Jesús tá nasacahvi na ña veñuhu tá quivi ndíquehe ndée ná. Saha ña cán quéa nasahní na Jesús joo xihín ña nacaja na

yóho najáxinu coo na ña nacachi profeta sanahá. ²⁸ Ta vatí coó nañehe ná cuachi chicaan na jata Jesús joo naxica na ñamaní nu Pilato ña ná cahnda da chuun ña ná cahní na Jesús. ²⁹ Ta tá sa naxinu coo tóco ndihi ña cáchi tuhun Ndióxi saha mé á coo anda já najánuu na a ndica crúxu já najánduxu na ña. ³⁰ Joo najánditacu Ndióxi Jesús tañu ndii. ³¹ Ta tixi cuahá quiví nanaha Jesús mé á nuú na nasañehe táhan xihín á tá naquee a estado Galilea cuahan chí Jerusalén. Ta mé na cán cúu na xica cáhan saha mé á nuú ñayivi viti.

³² Saha ña cán quéa cáxi tuhun nde tuhun vaha saha Jesús nu ndóhó viti jáchi janda saha nacachi Ndióxi xihín tásáhnú jícó yo ña já coo. ³³ Ta tá najánditacu Ndióxi Jesús najáxinu coo a tuhun nasahan nu yó, na naquixi chichi na cán. Jáchi já nacahyi a nu Salmo ivi ta saha Jesús nacahan tá nacachi a já: “Jahyi mí i cúu yóhó. Ta yehe cája ña ná catacún quivi viti”, cáchi tuhun Ndióxi. ³⁴ Joo Ndióxi sa nasahan va tuhun a ña jánditacu a Jesús já ná a táhyi yiquí cuñu a. Jáchi já nacahyi a ini libro yii mé á já cáchi a já: “Nu yóhó quiahva i tóco ndihi ña vaha, ña nasahan i tuhun i nu David quiahva i nu dá”, cáchi tuhun Ndióxi. ³⁵ Já cáchi tucu inga Salmo já: “Mé ndó a quiahva toho ndó ñamaní tahyi yiquí cuñu i jáchi cúu u jahyi máni mé ndo, da cája chúun nu ndo”, cáchi tuhun Ndióxi. ³⁶ Ta sa xini yo co cáhan ña yóho sahá ña nacaja David jáchi tá nandihí nacaja da ña nasahnda Ndióxi nu dá já naxihí da ta najánduxu na da nuú nanduxu tásáhnú jícó da. Ta natahyi yiquí cuñu da cán. ³⁷ Joo yiquí cuñu Jesús coó natahyi toho a jáchi najánditacu Ndióxi ña. ³⁸ Ña cán quéa vaxi nde caxi tuhun nde ña yóho nu ndo, ñani i já ná candaá ini ndó ña cája cáhnu ini Ndióxi sahá cuachi ñayivi sahá ña nacaja Jesús tá naxihí a ndica crúxu. ³⁹ Ta cája cáhnu ini Ndióxi sahá cuachi ñayivi tá cándéé ini na Jesús. Jáchi ni in túhún ñayivi a cúu nduu ndaa nu Ndióxi sahá ña sácú vaha na ley Moisés. ⁴⁰ Joo cuéntá coo ndó a juú ndoho ndó ña nacachi na profeta sanahá tá nacachi na já:

⁴¹ Cuni johó vaha ndó, ndóhó na sácú ndaa ichi ña cáhan Ndióxi.

Catóntó ndo jáchi cama chá ndihi saha ndo. Jáchi yehe cúu Ndióxi ta cája i ña náhnu ndivaha,

joo co cándúsa ndó ña cája i vatí ndicani java na ña nu ndo, ñacachi Ndióxi sanahá —ñacachi Pablo xihín ná.

⁴² Ta tá ñaqueta Pablo xihín na xíca xihín dá veñuhu na Israel cán já ñaxíca ñayivi, na coo ñaquixi chichi Israel ñamaní nu dá ña ná cahan da xihín ná sahá tuhun Ndióxi inga quivi ndiquehe ndée ná. ⁴³ Tá ñaquee ndihi na veñuhu cán já cuahá na Israel xihín cuahá na tóho, na cándúsa ley Moisés ta cája cáhnu na Ndióxi ñacasahá na ndíco na jatá Pablo xihín jatá Bernabé. Ta Pablo xihín Bernabé janaha da na ña ná candeé cáhnu ini na Ndióxi já ná caja mé á ñamaní xihín ná.

⁴⁴ Ta tá ñaxinu coo inga quivi ndiquehe ndée ná já ñataca tátuhun tóco ndihi ñayivi ñuu veñuhu cán ña taa johó na tuhun Ndióxi cúni na. ⁴⁵ Joo tá ñaxini na ñaquixi chichi Israel cán ña ñataca cuahá ndivaha ñayivi já ñacasahá na Israel cáhivi ini na. Já ñacasahá na cahan núu na saha Pablo ta ñacanahá na xihín dá. ⁴⁶ Xihín ña cán ñandindeé chága ini Pablo xihín Bernabé já ñacasahá cáhí da já:

—Jihna ñúhú ndítahan nuú nde caxi tuhun nde tuhun Ndióxi nu mé ndó, na ñaquixi chichi Israel. Joo sándehe nde ña coo cúni toho ndó ndiquehe ndó ña. Ta cája nde cuéntá ña coo saha ndó cuhun ndó indivi. Sahá ña cán quéa vaha chága ná cuhun nde cahan nde tuhun Ndióxi xihín na coo ñaquixi chichi Israel. ⁴⁷ Jáchi já cáa chuun ñasahnda Ndióxi nuú nde tá ñacachi a já xihín nde:

Ñasacu yehe ndohó ña ná caxi tuhun ndó nuú ñayivi tóho ndúu ndijáá ñuyiví, já ná candaá ini na ndaja caja na ná cacu ndaa ínimá ná, ñacachi Ndióxi —ñacachi Pablo xihín ná.

⁴⁸ Tá ñaxini johó na tóho, na coo ñaquixi chichi Israel cán ña yóho chí ñacajii ini na já ñacasahá na cahan na ña cúu ndusa tuhun Ndióxi ña vaha. Ta tóco ndihi na ñacaxi Ndióxi cacu ndaa ínimá, ñandihvi na íchi cuéntá mé á. ⁴⁹ Já ñasahin nuú ñaxita nuu tuhun Ndióxi níi cúu ñundáhyi cán. ⁵⁰ Joo na ñaquixi chichi Israel cán najándivaa na java

ñajihí, na catóo cuhun veñuhu, na coo cahan núu ñayivi saha. Ta najándivaa na java dataa, da ín saha ñuu cán ña ná ndicuítá na xihín Pablo xihín Bernabé viti ta anda quiahva ná tavá ña da ñundáhyi cuéntá ñuu cán. ⁵¹ Anda já ñaquiji nihni Pablo xihín Bernabé ña yácá ndusá saha mé dá já ná nahá nuú na cán ña coo natahan ini da xihín ña cája na Israel cán. Já ñaquee da ñuu Antioquía cán cuahan da inga ñuu naní Iconio. ⁵² Ta na cúu cuéntá Jesús, na ñacandoo ñuu Antioquía cán ñandicutú ndaa ínimá ná xihín ínimá yii Ndióxi ta cájii ndivaha ini na.

14

Cáhan Pablo xihín Bernabé tuhun Ndióxi nuú ñayivi ndúu ñuu Iconio

¹ Tá ñaxinu Pablo xihín Bernabé ñuu Iconio já ñandihvi da veñuhu nu ndítaca na Israel cán. Ta cán ñacahan da tuhun vaha saha Jesús nu ná. Ta cuahá ndivaha na Israel xihín na coo ñaquixi chichi Israel ñacandeé ini na Jesús. ² Joo java na Israel, na coo ñacandúsa tuhun Ndióxi ñacasahá na cáva na jiní ñayivi, na coo ñaquixi chichi Israel ña ná cahan núu na sahá na cúu cuéntá Jesús. ³ Sahá ña cán quéa ñasanduu nahá chága ví Pablo xihín Bernabé mé ñuu cán. Ta coo ná yihví na cahan chága ví na tuhun Ndióxi jáchi candeé ini na Jesús, xitoho na. Ta ñasahan Ndióxi ndée á nu ná ña ná cuu caja na cuahá nuú ña náhnu ta xihín ña yóho ñacandaá ini ñayivi ña mé a ndaa táhyi quíhvi ini ndusa Ndióxi ñayivi. ⁴ Joo ñayivi ñuu cán ñacasahá na sáhdá táhan na jáchi java na cuahan na jatá na Israel ta java na cuahan jatá na apóstol cán. ⁵ Anda já na Israel xihín na coo ñaquixi chichi Israel najándique táhan na tuhun na xihín na jutixia ñuu cán ña ndúcú na canahá quini na xihín na apóstol ta nducú na cahní na da xihín yuu. ⁶ Joo tá ñacandaá ini Pablo xihín Bernabé ña sácú ini na cán caja xíxi na xihín dá já ñaxinu da cuahan da chí estado Licaonia. Ñaxinu coo da ñuu Listra xihín ñuu Derbe xihín java ga ñuu válí ñúhu ndijáá chí cán. ⁷ Ta cán ñacahan ri da tuhun vaha saha Jesús nuú ñayivi ndúu cán va.

Cúun na yuu Pablo ñuu Listra

8 Tá naxinu coo da ñuu Listra cán já nandique táhan da xihin in dataa, da a cuú caca. Ta íin coo da cán jáchi cúú dá da quíhvi saha janda tá nacacu da cáa da já. 9 Ta íin coo da quíhvi saha yóho táa johu da nu cáhan Pablo. Anda já nandicoto nihni Pablo nu dá ta cándaq ini Pablo ña cuu ndivaha da jáchi cándeé ini da quíhvi cán Ndióxi. 10 Sahá ña cán quea nacayuhú Pablo nu dá já cáchi da já:

—Cuáhán candichi —nacachi Pablo.

Ta chí ivi laá nacandita da ta nacasáhá xíca da. 11 Tá naxini ñayivi ñuu cán ña nandaja vaha Pablo da cán já nacasáhá na cán cáyuhú cóhó na mé tuhun cáhan na ñuu Licaonia, ña co cándaq ini Pablo. Já cáchi na já:

—Ndióxi cúú da yóho ña naquixi indivi túní a ñéhe cuití da nahná ñayivi —cáchi na cáyuhú na tuhun mé ná.

12 Nacachi na cán ña Bernabé cúú dá in ndióxi naní Júpiter. Ta Pablo cúú dá in ndióxi naní Mercurio cáchi na jáchi mé dá cúú da cáhan chága. 13 Ta da cúú jutú nuú veñuhu Júpiter, ña ndácaq yuhú ñuu cán ñéhe da tindiQUI xihin cuahá ita jáchi ndúcú ndihi na cán cahní na tindiQUI joco na rí nu Pablo xihin nuú Bernabé caja cáhnu na da. 14 Joo tá nacandaq ini Pablo xihin Bernabé ña ndúcú na cán caja cáhnu na da já nandatá da jáhma dá sahá ña co táhan ini da xihin ña cája na. Ta já nacasáhá na xínu na naquihvi na tañu ñayivi cán. Ta cáyuhú Pablo já cáchi da já xihin ná:

15 —Candehé ndo. A váha toho ña ndúcú ndó caja ndó yóho jáchi ñayivi xihin mé va ndó cúú ndehé. Ndá cuéntá quea cuni ndó caja cáhnu ndó ndehé. Ta chuun vaxi nde yóho quea caxi tuhun nde xihin ndó tuhun vaha saha Jesús. Ta já ndítahan nu ndo jándacoo ndó ña a váha jan. Ta candico ndó Ndióxi tácu, mé á nacavaha indivi xihin ñuyívi xihin tañuhú xihin tóco ndihi ñaha ndúu nuú in in ña cán. 16 Anda sanahá najándicoo ndáha Ndióxi ñayivi ndi-jáá nación caja na ndía cuni mé va na caja na. 17 Joo níí tiempo najánaq Ndióxi yo cúú mé á nu ná jáchi níí tiempo nacaja vaha mé á xihin ná. Mé a chindahá javi nu yo. Ta mé á cája ña ná cana vaha ñundáhyi yo. Ta

cája mé á ña ná a cámaní ña cuxú já ná cajii íní yo —nacachi Pablo xihin na cán.

18 Ta vatí nacahan Pablo tuhun yóho xihin ná joo ihvi ndivaha já nacava da jiní ñayivi cán ña ná a cáhni na tindiQUI joco na nu dá ña caja cáhnu na da.

19 Tá nandihí já naxinu coo java na Israel, na naquixi ñuu Antioquia xihin java na naquixi chí ñuu Iconio. Já nacava na jiní ñayivi já nacaTi na nacuun na yuu Pablo. Ta tá sa nacahan na naxihí da já ñúhu na da nasahan na najácana na da yuhú ñuu. 20 Joo na cúú cuéntá Jesús nataca na ta nacava nuu na nu cándúhu Pablo ta já nandacoo da já naquihvi tucu da ñuu cán. Ta inga quivi itaan já naquee da xihin Bernabé cuahan da ñuu Derbe.

21 Tá naxinu coo ndíví da cán ñuu Derbe já nacasáhá da cáxi tuhun da nuú ñayivi sahá Jesús ta cuaha ná nandiquehe íchi cuéntá Jesús ñuu cán. Anda javí nandico coo Pablo xihin Bernabé chí ñuu Listra xihin ñuu Iconio já naquee da cuahan da chí Antioquia. 22 Ta mé ñuu cán najácahan da na cúú cuéntá Jesús ña ná coo ndacú chága na ta ná a jándacoo na ña cándeé ini na Jesús. Ta nacachi da ña já ndusa ndoho ndivaha ini na janda quiahva ná xinu coo na cacomí Ndióxi cuéntá saha ná. 23 Tá nandihí já nasacu Pablo xihin Bernabé java da sacuaqha ña ná cacomí da cuéntá sahá na cúú cuéntá Jesús in in ñuu cán. Ta tá nandihí naxijuhun na ta naxica tahví na nu Ndióxi saha ná já nandiquiahva da na ndáha Ndióxi ña ná candaa mé á na jáchi cándeé ini na mé á.

Ndicó coo Pablo xihin Bernabé ñuu Antioquia ña ndácaq estado Siria

24 Tá nandihí já nayaha Pablo xihin Bernabé chí estado Pisidia janda quiahva naxinu coo na ñundáhyi cuéntá Panfilia. 25 Ta nacahan na tuhun vaha saha Jesús nuú ñayivi ñuu Perge. Anda já naquee na cuahan na chí ñuu Atalia. 26 Ta ñuu Atalia cán nandaa na barco já nandico coo na chí Antioquia nuú naquee na jihna. Jáchi mé cán cúú nuú nandiquiahva na da ndáha Ndióxi ña ná caja da chuun mé á. Ta viti sa najándihí da chuun natahnda nu dá cán. 27 Tá naxinu coo Pablo xihin

Bernabé mé ñuu Antioquía cán já najátaca da tóco ndihi na cúu cuéntá Jesús ndúu ñuu cán já nandicani da tóco ndihi ña ñacaja Ndióxi xihín dá. Nandicani da ndá quiahva nasahan Ndióxi ñamaní nuú na coó naquixi chichi Israel ña ná ndiquehe na íchi cuéntá mé á. ²⁸ Ta ñacandoo nahá Pablo xihín Bernabé ñuu Antioquía cán xihín na cúu cuéntá Jesús.

15

Ndítaca na sacuahá cuéntá Jesús

¹ Ta ndaja coo mé tiempo já java dataa, da naquixi chí estado Judea naxinu da ñuu Antioquía cán. Ta ñacasáhá na jánaha na nuú na cúu cuéntá Jesús ña ndítahan nu ná caja na ña cáhí ley Moisés ña ná chicaan na marca yiquí cuñu na já ná cuu jácacu Ndióxi na. ² Joo Pablo xihín Bernabé ñacasáhá cáni táhan ndeé yúhu dá xihín na Judea cán sahá ña yóho. Ta sahá ña nanditúhún cuaha ná sahá ña yóho sahá ña cán quéa nasacu ini na cúu cuéntá Jesús cán chindahá na Pablo xihín Bernabé xihín java ga da cúu cuéntá Jesús ña ná cuhun na ñuu Jerusalén já ná nditúhún chága na sahá ña yóho xihín na apóstol ta xihín na sacuahá cómi cuéntá sahá na cúu cuéntá Jesús ndúu Jerusalén cán.

³ Anda já na cúu cuéntá Jesús ndúu Antioquía ñachindahá na na cán chí ñaquee na cuahan na. Ta nu xica na cuahan na cán ñayaha na chí ñundáhyi Fenicia xihín ñundáhyi Samaria. Ta cán nandicani na nuú na cúu cuéntá Jesús ndá quiahva nandiquehe na coó naquixi chichi Israel íchi cuéntá Jesús ta já najándacoo na costumbre yata nasacaja na jihna. Chí ñacajii ndivaha ini na cúu cuéntá Jesús cán tá naxini johu na ña yóho.

⁴ Tá naxinu coo Pablo xihín Bernabé xihín java ga na cán ñuu Jerusalén já nandiquehe vaha na cúu cuéntá Jesús ndúu ñuu cán na. Ta jári na apóstol xihín na sacuahá veñuhu cán nandiquehe vaha na na. Anda já nandicani Pablo nuú na cán tóco ndihi ña náhnu ñacaja Ndióxi xihín dá. ⁵ Joo java na fariseo, na sa ndiquehe íchi cuéntá Jesús ñandaca ndichi na já ñacasáhá cáhí na já:

—Ndítahan nuú na cúu cuéntá Jesús, na coó naquixi chichi Israel chicaan na marca yiquí cuñu na. Ta ndítahan nu mí cahan í xihín ná ña ná cacu vaha na ley Moisés — ñacachi na fariseo cán.

⁶ Anda já ñataca na apóstol xihín na sacuahá veñuhu ña ná nditúhún na ndaja coo sahá ña yóho. ⁷ Sa nanditúhún cuahá ndivaha na cán sahá ña yóho. Anda já ñandaca ndichi Pablo tañu na cán ta já ñacachi da já:

—Sa xini vaha ndó, ñani í ña ñacaxi Ndióxi yehé jihna ña ná caxi tuhún í tuhun vaha saha Jesús nuú na coó naquixi chichi Israel já ná candeé ri ini na cán va Jesús ña ná jácacu Ndióxi na. ⁸ Ta mé Ndióxi, mé a xini ndaja cáa ínimá in in ñayivi, mé a cán quéa najánaha nu yo ña ndiquehe vaha mé á na tóho. Jáchi nasahan ínimá yii mé á nu ná tá quiahva ñacaja xihín mí, na naquixi chichi Israel. ⁹ Ni in tuhún toho í coo cúu yo na vaha chága a juu ga inga na nu Ndióxi. Jáchi tá quiahva ñandaja víi Ndióxi mí sahá ña candeé ini Jesucristo quiahva já ñandaja víi ri a na cán va sahá ña candeé ini na Jesucristo. ¹⁰ Ta viti cúu á tátuhun nandindójó ndó ña ñacaja Ndióxi tá ñachindahá Jesucristo quivi a sahá cuachí. Ta viti cuni ndó caja ndúsa ndó xihín na tóho yóho ña ná cacu vaha na ley Moisés. Ta sa cándaá ini ndó ña ni mí ta ni tásáhnú jícó yo a cuú caja í cacu vaha í ley cán. ¹¹ Joo ña candeé cáhnú iní quéa ña jácacu maní uun Ndióxi mí sahá ña táhví ini Jesucristo saha mí. Ta quiahva já táhví ri ini a sahá na tóho cán va —ñacachi Pedro xihín ná.

¹² Ta xihín ña yóho ñacatáji yúhu tóco ndihi na cán. Ta táa johu na tá ñacasáhá Pablo xihín Bernabé ndicani da nu ná tóco ndihi ña náhnu xihín ña xitúhún ña nasahan Ndióxi ñamaní nu dá caja da nuú na coó naquixi chichi Israel cán. ¹³ Tá nandihí ñacahan da cán já ñacasáhá Jacobo cáhí da já:

—Cuni johu ndó ná cahan í xihín ndó, ñani í. ¹⁴ Sa ñacaxi tuhún Simón, da naní tucu Pedro nu yo tá nu cuítí ñacaja Ndióxi ñamaní xihín na tóho ta ñacaxi a na ña ná nduu na ñayivi cuéntá mé á. ¹⁵ Ta in quiahva cahan ña yóho xihín ña ñacahyí na

profeta sanahá tá n̄acahyí na ña n̄acachi Ndióxi:

¹⁶ Tá sa nayaha tiempo já ndicó coo tucu ú. Ta tá quiahva n̄acaja cáhnu ñayivi yehe tá tiempo nasacomí David cuéntá sahá ñayivi Israel, quiahva já vaxi quivi caja i ña ná caja cáhnu tucu na yehe.

¹⁷ Caja i já jáchi cuni ña ná ndinducú na tóho yehe ña ná cacuu u xitoho tóco ndihi na,

mé ná cúu ná n̄acaxi yehe ná cacuu na cuéntá mí i.

¹⁸ Ña yóho quéa n̄acachi Ndióxi sanahá ndivaha tá n̄acaxi tuhun a ndaja coo tiempo viti —n̄acachi Jacobo xihín na cán.

¹⁹ Já n̄acachi tucu Jacobo já xihín ná:

—Sahá ña cán quéa cáhan i ña co ndítahan caja ndúsa yó xihín na tóho cacu vaha na ley Moisés jáchi n̄acasahá ndico na íchi cuéntá Ndióxi viti. ²⁰ Joo ña ndítahan caja í quéa cahyí yo in carta ná cuhun a nuú na cúu cuéntá Jesús ndúu ñuu Antioquía já ná caja na ñamaní ña ná a cáxi na cuñu quiti, rí najoco ñayivi nuú tiniñu yúu. Ta ná a cóo na xihín na co cúu ñájihí na á yí ná. Ta coto ná a cáxi na cuñu quiti, rí nasahnú. Ta coto ná a cáxi na nij. ²¹ Jáchi janda sanahá najánaha na ña yóho nuú ñayivi ndijáá ñuu tá quivi ndíquehe ndéé ná tá jánaha na ley Moisés nu ná ini veñuhu —n̄acachi Jacobo xihín ná.

²² Anda já na apóstol xihín na sacuahá veñuhu cán xihín tóco ndihi na cúu cuéntá Jesús najándique táhan na tuhun na ña caxi na tañu tóco ndihi na cúu cuéntá Jesús cán java da ná cuhun ñuu Antioquía xihín Pablo xihín Bernabé. Ta da n̄acaxi na cuhun cúu Judas, da naní tucu Barsabás xihín Silas. Ndívi da yóho cúu da íin saha nuú na cúu cuéntá Jesús cán. ²³ Ta ña yóho cúu tuhun ndáa nu carta ñéhe na cán cuahan na:

“Tóco ndihi ndehe, na cúu apóstol xihín na sacuahá veñuhu xihín na cúu cuéntá Jesús ndúu ñuu yóho chindahá nde Ndióxi coo ndóhó, na cúu cuéntá Jesús, na coo naquixi chichi Israel, na ndúu ñuu Antioquía xihín ñundáhyi cuéntá Siria xihín Cilia jan. ²⁴ Sa nañehé nde tuhun ña naquee

java na cúu cuéntá Jesús ñuu yóho nasaa na chí jan tá coo n̄axica na ñamaní nuú nde cuhun na. Ta najáquihvi na ndohó ta najájana na jini ndó xihín tuhun cáhan na jáchi cáchi na xihín ndó ña ndítahan nu ndó chícáan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínima ndo. ²⁵ Sahá ña cán quéa ñúhu johó ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndohó. ²⁶ Mé Pablo xihín Bernabé yóho ndúu tiava da quivi da saha Jesucristo, mé a cúu xitoho í. ²⁷ Ta chindahá nde Judas xihín Silas já ná cáhan yúhu mé ná xihín ndo já ná ndicani na saha tóco ndihi ña yóho nu ndo. ²⁸ Mé ínima yíi Ndióxi najácahan ndehe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhdá ley Moisés. Joo ná cáhan nde xihín ndo ndia quéa co ndítahan caja ndó: ²⁹ Coto a cáxi ndó cuñu quiti, rí najoco na nuú tiniñu yúu. Ta coto a cáxi ndo nij ta a cáxi ndó cuñu quiti, rí nasahnú. Ta coto a cóo ndó xihín ñájihí á yí inga na. Tá ná cacu vaha ndó tóco ndihi ña yóho já quéa cúu ndó na cája vaha. Ña yóho cúu tuhun cáhan nde xihín ndo ta ná coo Ndióxi xihín ndo.” Ña yóho cáchi carta nachindahá na nuú na ñuu Antioquía cán.

³⁰ Anda já naquee na cán cuahan na ñuu Antioquía. Ta tá n̄axinu na ñuu Antioquía cán já najátaca na tóco ndihi na cúu cuéntá Jesús cán já n̄andiquiahva na carta nu ná.

³¹ Ta tá n̄andihí n̄acahvi na cúu cuéntá Jesús mé carta já n̄acajii ndivaha ini na jáchi n̄andindee chága ví ini na n̄acaja ña cáchi carta cán. ³² Mé Judas xihín Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndeé ini na cúu cuéntá Jesús.

³³ Nasanduu na cán chá quivi ta chí nasacu ini Judas xihín Silas ndicó coo da ñuu Jerusalén jáchi cán ndúu na nachindahá ñahá ñuu Antioquía. Já n̄andindayí na cúu cuéntá Jesús da ña ná coo vaha da tá cuhun da íchi. ³⁴ Joo nasacu ini Silas candoo da ñuu Antioquía cán. ³⁵ Ta n̄acandoo Pablo xihín Bernabé chága quivi ñuu Antioquía cán ta xihín cuahá java ga na najánaha

chága na tuhun vaha saha Jesús nuú ñayivi.

Cuahān tucu Pablo cahān da tuhun vaha saha Jesús nuú ñayivi

³⁶ Tá nayaha quivi já nacachi Pablo já xihin Bernabé:

—Cóho coto nihni na cúu cuéntá Jesús ndúu ndijáá ñuu nuú naxica nuu í nacahan yó tuhun Ndióxi jihna já ná candehé yo á ndíco yii va na Jesús —nacachi da.

³⁷ Cándúsa Bernabé cuhun da joo cúni da candaca tucu da Juan, da cahān na Marcos xihin ña cuhun da xihin ná. ³⁸ Joo Pablo nacahán da ña vaha chága ná a cáñehe na da cuhun da xihin ná jáchi najándacoo da na tá naxinu na estado Panfilia sahá ña coó naxeen ga da caca nuu da caja da chuun Ndióxi xihin ná. ³⁹ Nanditúhún cuaha ná sahá ña yóho joo coó nandique táhan tuhun na sahá ña cán quéa nasahnda táhan na. Sahá ña cán quéa ñañehe Bernabé Marcos cuahan xihin dá chí isla Chipre. ⁴⁰ Ta nacaxi Pablo Silas candaca táhan xihin dá. Ta naxica tahví na cúu cuéntá Jesús nu Ndióxi saha dá ña ná chindeé a da nuú cuhun da. Anda já naquee da cuahan da. ⁴¹ Nayaha da chí ñundáhyi Siria xihin ñundáhyi Cilicia ta ní cúu nuú cuahan da sahan da tuhun ndeé ini na cúu cuéntá Jesús ña ná candeeé chága ini na mé á.

16

Cátahan Timoteo xica da xihin Pablo xihin Silas

¹ Ta nayaha Pablo xihin Silas ñuu Derbe anda já naxinu coo na ñuu Listra. Ta cán nandiñehe ná in da cúu cuéntá Jesús, naní Timoteo, da cúu jahyi in ña cúu cuéntá Jesús, ña naquixi chíchi Israel. Ta tátá da cúu griego. ² Ta na cúu cuéntá Jesús ndúu ñuu Listra xihin na ndúu ñuu Iconio nacahan vaha na saha Timoteo. ³ Cúni Pablo ña ná catáhan Timoteo xihin dá caca nuu da xihin dá sahá ña cán quéa nacaja Pablo ña nachicaan na marca yiquí cuñu Timoteo tá quiahva cáchi ley Moisés já ná a cahān núu na Israel ndúu ndijáá ñuu válí cán saha dá. Jáchi sa xini vaha ndihi na cán ña cúu Timoteo jahyi in taa griego sahá ña cán quéa coó nachicaan na marca Timoteo tá loho chá da. ⁴ Ta já naquee ndihi na cán

cuahan na ta ní cúu ñuu nu xica na cuahan na cáxi tuhun na nuú na cúu cuéntá Jesús ña ná caja na ña nacachi na sacuaaha xihin na apóstol ndúu ñuu Jerusalén cán. ⁵ Xihin ña yóho nandindacú chága na cúu cuéntá Jesús ta candeé cáhnu chága ini na mé á. Ta in in quivi yaha johu ndícuaha chága ñayivi ndíhvi íchi cuéntá Jesús.

Ña naxini Pablo nacaja Ndióxi tá nasahin da ñuu Troas

⁶ Ta nasaji ínima yii Ndióxi na cán ña ná a cuhun na estado Asia cahān na tuhun vaha saha Jesús nuú ñayivi cán. Sahá ña cán quéa nayaha na ñundáhyi cuéntá Frigia xihin Galacia cuahan na. ⁷ Já naxinu coo na yúhu estado Misia. Ta chí cán yaha na cuhun na ñundáhyi cuéntá Bitinia nacahān na. Joo coó nasahan ínima yii Ndióxi ñamaní nu ná caja na ña. ⁸ Anda já nayaha saa na estado Misia janda quiahva naxinu coo na in ñuu naní Troas. ⁹ Ta in ñuu nani ín da mé ñuu Troas cán nasani ndímáhnú Pablo. Ta ña naxini da cúu in taa, da naquixi chí estado Macedonia. Ta cándichi da cahān ndahví da xihin Pablo já cáchi da já: “Naha ndó chí Macedonia yóho ña ná chindeé ndó ndehe.” ¹⁰ Tá nandicani Pablo ña yóho nuú nde chí ivi laá nacaja tiahva nde ñaha nde jáchi sa nacandaá cáxi ini nde ña mé Ndióxi quéa cána ndehe ña ná cuhun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

Xinu coo Pablo xihin na xica xihin da ñuu Filipos

¹¹ Tá nandihi já nandaa nde barco ñuu Troas já naquee nde cuahan ndacú nde isla naní Samotracia. Ta janda quivi itaan já naxinu coo nde ñuu Neápolis. ¹² Ta cán nanuu nde mé barco cuahan sahá nde chí ñuu Filipos. Mé ñuu Filipos cán cúu á ñuu ña ín chága saha nuú java ga ñuu válí ñúhu chí Macedonia cán. Ta ndíco a ñuu Roma. Ta nasanduu nde ñuu Filipos cán chá quivi. ¹³ Ta in quivi ndíquehe ndeé ná já naquee nde cuahan nde yuhú ñuu yati yuhú yuta nu sá taca ñayivi xica tahví na nu Ndióxi. Já nasaco nde cán ta nacasáhá nde cahān nde tuhun vaha saha Jesús nuú najihí, na táca cán. ¹⁴ In mé ñañáha cán naní ña Lidia ta cúu ña ña ñuu Tiatira. Mé Lidia yóho cúu

ñá ñá jíco jáhma vaha ña color ndíhí. Ta cúu ñá in ñá cája cáhnu Ndióxi. Ta nani xini joho ñá ña cáhan Pablo saha Jesús já nasuná Ndióxi xini túni ña já nacandúsa ñá ña cáhan Pablo cán. ¹⁵ Tá nandihí nacandúta ñá xihín na vehe ñá ta já cáhí ña já xihín nde:

—Tá ta mé a ndaa ndícuni ndó yehe ña cúu u cuéntá Jesús cajú ndó ñamaní saá ndó vehe e coo ndó —nacachi ñá xihín nde.

Ta nacaja ndúsa ñá xihín nde chí nacandoo too nde vehe ñá cán.

¹⁶ Ta ndaja coo in tañu tá cuahan nde nu sá xica tahví nde nu Ndióxi já nanditahan nde in ñá tacú, ñá ndacaan ínima quini ini. Ta cája ña cán ña ná ndicuni ini ñá. Mé ñá tacú yóho cúu ñá naxeen na. Ta mé xitoho ñá cán tává cuaha dá juhún sahá ña ndícuni ini ñá. ¹⁷ Ta mé ñá tacú yóho nacasáhá ña ndíco ñá jata Pablo xihín jata nde ta cáyuhú cóhó ña já cáhí ña já:

—Da cája cáhnu Ndióxi, ña cáhnu ín indivi cúu da cáshan yóho. Ta xica da cáxi tuhun da xihín ndó ndá quiahva cuu cacu ndaa ínima ndo —cáhí ña cáyuhú ña.

¹⁸ Já cuití já cuití cája ñá cuahá quivi janda quiahva co ndéé ga ini Pablo xihín ña cája ñá. Chí nandicoto nihni Pablo nu ñá já nacachi da já xihín ínima quini ndacaan ini ñá cán:

—Xihín quivi Jesucristo sáhdá i chuun nuun ña ná queún ini ñá loho yóho —cáhí Pablo.

Chí ivi laá naqueta ínima quini cán cuahan.

¹⁹ Joo tá naxini na cúu xitoho ñá cán ña a cóo ga cana juhún na cajú ñá cán já natiin na Pablo xihín Silas já ñehe na da nasahan na vehúun nuú na jutixia. ²⁰ Tá naxinu coo na cán já nacachi na já xihín da cúu juéxe cán:

—Da naquixi chichi Israel yóho nandai cuu da jándinihi da ñayivi ñuu í. ²¹ Jáchi jánaha da costumbre mé va da nuú ñayivi. Ta mí a cúu candúsa í ta ni a cúu cajú í costumbre da yóho jáchi cúu yó ñayivi ndíco ñuu Roma —nacachi na cán xihín juéxe.

²² Anda já nandicuita ñayivi xihín dá. Já nasahnda juéxe cán chuun ña ná tavá na jáhma Pablo xihín Silas ta ná cani na ndíví da xihín yito. ²³ Tá nandihí nacani quini ndivaha na da já nataán na da vecaa. Ta

nasahnda na chuun nuú da ndáá vecaa cán ña ná candaa vaha da da. ²⁴ Tá natahnda chuun yóho nuú da ndáá vecaa cán já nachicaan da Pablo xihín Silas janda sa vehe cuí vecaa cán. Ta já nachicaan da saha dá tañu ivi yito nani cepo já ná ndituun vaha da.

²⁵ Joo tátuhun java ñuu xica tahví Pablo xihín Silas nu Ndióxi ta xita da ña cája cáhnu da mé á nani táa joho java ga na ñúhu ini vecaa cán nu cáhan da. ²⁶ In jonáá cuití nacasáhá táan ndeé ndivaha chí janda yuu ndúhu sahá vecaa cán cánda. Anda já nanuna tóco ndihí yéhe caa cán ta nacuyu cadena nasandico tóco ndihí na nasañuhu vecaa cán. ²⁷ Anda já nandicaxí ini da ndáá vecaa cán ta tá naxini da núna yéhe caa cán já natuhun da yuchú caní dá ña cahní da mé dá jáchi nacahan da sa naquee ndihí na nasañuhu vecaa cán cuahan na. ²⁸ Joo nacayuhú Pablo nu dá já nacachi Pablo já xihín dá:

—A cahní tohún yohó jáchi yóho ndúu ndihí va nde.

²⁹ Anda já naxica da ndáá vecaa cán in lámpara já xinu da nandihvi da nu ndúu na vecaa. Ta chí quiji mé dá xihín ña yihví da já nacaxítí da nu Pablo xihín nu Silas. ³⁰ Tá nandihí já natavá da na já nacasáhá ndaca tuhún da na já nacachi da já:

—Ndía ndítahan cajú i já ná jaccu ndaa Ndióxi ínima i —nacachi da.

³¹ Anda já nanducú ñehe Pablo xihín Silas tuhun nu dá já cáhí da já xihín dá:

—Ndítahan candúsún Jesucristo, xitoho í já ná cacu ndaa ínimun xihín ínima tóco ndihí na vehún —nacachi da.

³² Anda já nacasáhá Pablo ndícuni da tuhun vaha saha Jesús nuú da cán xihín nu tóco ndihí na ndúu vehe da cán. ³³ Ta mé hora já nacaja tátá da ndáá vecaa cán nuú nandicuehe jata Pablo xihín jata Silas nuú nacani yito cán. Ta tá nandihí já nacandúta da ndáá vecaa cán xihín tóco ndihí na vehe da. ³⁴ Tá nandihí já ndaca da Pablo xihín Silas nasahan da xihín dá vehe da. Ta cán nacaja ndíví na ña cuxu Pablo xihín Silas. Ta chí nacajii ndivaha ini da ndáá vecaa cán xihín na vehe da jáchi sa nandiquehe na íchi cuéntá Jesús.

³⁵ Ta naha inga quiví itaān já nāchindahá nā cúu juéxe cán policia nuú da ndáá vecaa cán ña ná janí da Pablo xihín Silas vecaa. ³⁶ Anda já nācachi da ndáá vecaa cán já xihín Pablo:

—Nasahnda nā cúu juéxe chuun nuú i ña ná janí i ndohó cūhun ndo. Sahá ña cán quéa cáxi tuhun i xihín ndó cuáhán quee ndó ta ná cūhun Ndióxi xihín ndo — nācachi da xihín dá.

³⁷ Joo nācahan Pablo xihín da cúu policia cán já nācachi da já xihín ná:

—A váha toho nācaja na xihín nde jáchi cúu nde nā romano ta nā jutixia jan nācani quini na ndehe nū táhyí tóco ndihi ñayivi tá cámaní caja víi nā sahá nde. Ta tá nāndihi já nātaán jín ga nā ndehe vecaa. Ta viti cūni nā janí jehé nā ndehe quee nde cūhun nde. Joo a váha toho cája na já. Sahá ña cán quéa a quéta nde janda quiahva ná quixi mé ná tavá nā ndehe já quee nde — nācachi Pablo xihín da cúu policia cán.

³⁸ Anda já nasahan nā cúu policia nāndicani na nuú nā cúu juéxe ña nācachi Pablo xihín ná. Tá nācandaā ini nā cúu juéxe cán ña cúu Pablo xihín Silas da romano chí nayihví nā. ³⁹ Anda já nasahan nā nāxica nā ñamaní nū Pablo xihín nū Silas ña ná caja cáhnu ini da sahá ña nācaja na. Já nātavá nā da vecaa ta tá nāndihi já nāxica nā ñamaní nū dá ña ná quee da ñuu cán cūhun da. ⁴⁰ Tá nāquee Pablo xihín Silas vecaa já nasahan nā vehe ña naní Lidia. Ta tá nāndihi nāndique táhan da xihín nā cúu cuéntá Jesús ndúu cán já nasahan da tuhun ndéé ini na anda já nāquee da cuahan da.

17

Ndínihí ñayivi ñuu Tesalónica

¹ Nani xíca Pablo xihín Silas cuahan da íchi nayaha da chí ñuu naní Anfípolis xihín inga ñuu naní Apolonia anda quiahva nāxinu coo na ñuu Tesalónica. Cán nasahin veñuhu nū táca nā Israel. ² Ta sahá ña nācaan Pablo sahan da veñuhu quiví ndiquehe ndéé ná sahá ña cán quéa nāquihvi da veñuhu cán. Ta tixi uní semana nācahan da tuhun Ndióxi xihín ná mé quiví ndiquehe ndéé ná. ³ Ta nū libro yii

Ndióxi tává Pablo tuhun ndícani da nū ná ña ndítahan nuú Jesucristo ndoho ini a. Ta tá sa nāndihi nāxihí a já nditacu a jáchi já cáchi libro yii Ndióxi coo. Já nācachi Pablo já xihín ná:

—Mé Jesús, mé a cáhan i saha nū ndo yóho, mé a yóho cúu Cristo, ña nāchindahá Ndióxi cacomí cuéntá sahá ñayivi — nācachi Pablo.

⁴ Ta chí nācandúsa java nā Israel ña nācachi Pablo xihín ná. Anda já nācatáhan nā xihín Pablo xihín Silas xíca nuu na. Ta cuahá ri nā griego, nā sa cája cáhnu Ndióxi ndúu cán nācandúsa na ña nācachi Pablo xihín ná. Tá nācandúsa ri cuahá najihí, nā íin toní ñúhú ñayivi xihín ta nāndihvi na íchi cuéntá Jesús. ⁵ Joo nā Israel, nā co cándúsa Jesús nācasahá cáhivvi ini na. Sahá ña cán quéa najátaca na java taā quini, da coo chuun nū xíca nuu mé cáyé cán. Já nācasahá nā jándinihi na ñayivi mé ñuu Tesalónica cán. Anda já cáti na nasahan nā vehe in da naní Jasón. Ta xihín ña ndúsa nāquihvi na vehe da cán ña ndínducú nā Pablo xihín Silas ña tavá nā da ndíquiahva na da nuú nā sacuahā ñuu cán. ⁶ Joo coo nāndinehe ná Pablo xihín Silas cán sahá ña cán quéa janda mé Jasón, da xihín ñaha vehe cán ñúhu na da xihín java ga nā cúu cuéntá Jesús cuahan nā nuú nā jutixia ñuu cán. Tá nāndihi já cáyuhú nā já cáchi nā já xihín nā jutixia cán:

—Da naní Pablo xihín da naní Silas xíca nuu da níi cúu ñuyiví jájana da jini ñayivi. Ta quiahva já cūni da caja da xihín ñayivi ñuu í. ⁷ Ta da naní Jasón yóho nāndiquehe vaha da da cán vehe da. Ta xihín ña cája nā yóho náha ña co cája na ña sáhdá ley ñuu Roma ta ni co cája cáhnu na da cómi cuéntá sahá ñuu Roma. Jáchi mé nā yóho xíca na cáhan nā ña íin inga da cómi cuéntá sahá ñayivi. Ta cáchi nā cúu dá in da naní Jesús — nācachi na.

⁸ Tá nāxini johó ñayivi xihín nā jutixia cán ña yóho chí nācasahá nā ndívaā nā. ⁹ Joo nācahvi Jasón xihín java nā cúu cuéntá Jesús cán jiyuhún nuú nā jutixia cán já najaní ñahá nā.

Cuahan Pablo xihín Silas ñuu Berea

¹⁰ Ta tá sa nacuaá mé ñuuú já nachindahá na cúu cuéntá Jesús cán Pablo xihín Silas já ná cuhun da chí ñuu Berea. Ta tá naxinu coo da ñuu Berea cán já nandihvi da veñuhu na Israel cán. ¹¹ Ta nasuná chága na Israel cán ínimá ná a juú ga na ndúu ñuu Tesalónica chí cájii íní na nandiquehe na tuhun Ndióxi. Ta ndijáá níi quivi ndínducú na nuú tuhun Ndióxi ña á mé a ndaa cúu ña jánaħa Pablo nu ná. ¹² Ta cuaha táhan na naquixi chichi Israel cán nandiquehe na íchi cuéntá Jesús. Ta cuahá najihí griego, na tácu ini nación cán xihín cuahá nataa griego nandiquehe na íchi cuéntá Jesús. ¹³ Joo tá nañehé na Israel ñuu Tesalónica tuhun ña ín Pablo ñuu Berea cáhan da tuhun Ndióxi nuú ñayivi chí ivi laá nasahan na jándinihi na ñayivi ñuu Berea cán já ná ndicuita na xihín Pablo. ¹⁴ Joo ivi laá na cúu cuéntá Jesús cán nachindahá na Pablo cuahan da yati yuhú tañuhu nani nacandoo Silas xihín Timoteo ñuu Berea cán. ¹⁵ Ta java na cúu cuéntá Jesús ndáca na Pablo ta nasañehé na da janda ñuu Atenas. Ta tá nandicó coo na cán ñuu Berea já ñéhe na chuun ña ná cuhun quíi Silas xihín Timoteo ñuu Atenas ná ndique táhan da xihín Pablo.

Ín Pablo ñuu Atenas

¹⁶ Nani ndáti Pablo xinu coo Silas xihín Timoteo ñuu Atenas cán já nacasáhá ndíhi ini da jáchi níi cúu ñuu cán nachutú ndaa xihín cuahá tiniñu yúu ndícaħán ñayivi ñuu cán. ¹⁷ Sahá ña cán quéa nacasáhá Pablo cáhan da tuhun Ndióxi xihín na Israel ini veñuhu na. Ta quiahva já nacahan ri da tuhun Ndióxi xihín java na toho, na cája cáhnu Ndióxi cán. Ta jári ndijáá níi quivi cáhan da tuhun Ndióxi xihín ñayivi táca nuú yahvi ñuu cán. ¹⁸ Ta java taa, da jácuaha íchi cuéntá Epicureos xihín da jácuaha íchi cuéntá Estoicos nacasáhá ndítuhún na xihín Pablo. Joo java na cán cáchi na saħa Pablo ña cuahá ndivaha cáhan da ta coo cándaħa ini na ndá quéa cáhan da. Ta java na cáchi na já saħa dá:

—Á tá coo ta java ga ndiόxi xica nuu da cáhan da saħa —cáchi na.

Nacachi na ña yóho saħa Pablo jáchi naxica nuu mé dá cáhan da tuhun vaha

saha Jesús ta cáhan da ña nanditacu tucu Jesús. ¹⁹ Sahá ña cán quéa ndáca na Pablo cuahan ná in nuú naní Areópago jáchi cán cúu nu ndítaca ñayivi ndítuhún na. Ta tá naxinu coo Pablo cán já nacasáhá ndáca tuhún na da já cáchi na já xihín dá:

—Á cajún ñamaní caxi tuhún xihín nde ndá cúu ña saá ña xícún jánaħún nuú ñayivi. ²⁰ Jáchi sa nañehé nde tuhun ña cátóntó ñayivi xihín ña jánaħún nu ná ta viti cúní nde candaa ini nde ndía quéa jánaħún nu ná —nacachi na xihín Pablo.

²¹ Nacachi na já xihín Pablo jáchi tóco ndihi ñayivi Atenas xihín na toho ndúu cán ndijáá níi quivi ndinuhu ini na ndítuhún na ñaha saá, ña naxini johu na jánaħa inga na.

²² Anda já nacandichi Pablo tañu na ndúu mé nuú naní Areópago cán já nacachi da já xihín ná:

—Candehé ndó, ñayivi ñuu Atenas. Cándaa cáxi ini i ña cúu ndó ñayivi cátóo ndicahán cuahá nuú tiniñu yúu, ña cúu ndiόxi ndo ta ndícaħán ndó ña xihín ndinuhu ini ndó. ²³ Jáchi tá xica nuu i ñuu ndó já naxini i cuahá nunáa nu cája cáhnu ndó ña. Ta nu xica nuu i cán naxini i inga nunáa. Ta nunáa cán ndaa in tuhun ta cáchi a: “Naa yóho cúu nu ndícaħán nde ndiόxi co xini nde”, já naxini i cáchi a. Ta vatí co xini ndó Ndiόxi ndícaħán ndo cán joo cája cáhnu ndó ña. Ta mé Ndiόxi cán quéa cúní caħan i saħa nu ndó viti.

²⁴ Mé Ndiόxi cán quéa nacavaha ñuyiví xihín tóco ndihi ñaha ín ñuyiví yóho. Ta mé á cómi a cuéntá saħa indiví xihín ñuyiví. Ta co ndácaħan toho mé á ini veñuhu ña nacavaha ndahá ñayivi. ²⁵ Ta ni co xini ñuhú a chindeé ñayivi mé á jáchi sa mé á quéa cája ña ná catacu mí. Mé Ndiόxi quéa saħan tachí yó nu yo ta mé á saħan tóco ndihi ñaha nu yo.

²⁶ Mé Ndiόxi cán nacavaha in taa nu cuítí. Ta tóco ndihi ñayivi ndúu ñuyiví naquixi na chichi mé taa, da nacavaha Ndiόxi cán. Tá nandihí já najándicuita nuu Ndiόxi ñayivi naquixi chichi da cán níi cúu ñuyiví já nataħnda in in nación canduu a. Ta sa nasacu ini Ndiόxi ndaja tiempo canduu in in nación ñuyiví yóho ta nasacu ini mé á ndáchí coo in in nación. ²⁷ Já nacaja

Ndióxi jáchi cúni a ña ná ndinducú ñayivi mé á ta já ná ndiñehe ná íchi cuéntá mé á. Joo mé a ndaa yati va íin Ndióxi nu tóco ndihi ñayivi. ²⁸ Jáchi mé á cája ña ná catacú ta ná canda yiquí cuñu í. Sanahá nacachi java taa cuéntá mé ndó já: “Cúu yó na vehe Ndióxi.” ²⁹ Joo tá mé a ndaa cúu yó na vehe Ndióxi co ndítahan cahán yo ña Ndióxi cúu tiniñu yúu ña najándicuchu na xihín jihun cuáán á xihín jihun cúxú. Ta ni co ndítahan cahán yo ña Ndióxi cúu tiniñu yúu cávaha ndahá ñayivi xihín yuu. Jáchi jini mé va na jan cána ña cávaha na. ³⁰ Jihna nasacu ini Ndióxi ña a jándoho toho a ini ñayivi sahá cuachi nasacaja na jáchi co canda ini na ña cúni mé á, nduu. Joo viti sáhdá Ndióxi chuun nu tóco ndihi ñayivi ña ná ndicó coo ini na ta ná a cája cáhnu ga na tiniñu yúu. ³¹ Jáchi sa nasacu Ndióxi in quivi caja vii a saha tóco ndihi ñayivi nduu ñuyivi yóho. Ta sa nacaxi mé á Jesús ña caja vii ndaa mé á saha ná. Ta najánditacu tucu Ndióxi Jesús tá nandihí naxihí a. Ta xihín ña yóho nanaha nuú ñayivi ña mé a ndaa caja vii Jesús saha ná —nacachi Pablo xihín ndihi na cán.

³² Tá naxini johó na cán ña cáchi Pablo ña vaxi quivi nditacu ndii já nacasáhá java na cán sácu ndaa na da. Joo java na cáchi na já xihín dá:

—Vaha chága ná cahún sahá ña jan nuú nde inga tañu —cáchi na xihín dá.

³³ Anda já naquee Pablo nu Areópago cán cuahan da. ³⁴ Joo java ñayivi, na nacandúsa ña cáchi da nacasáhá ndico na da xica na. Tañu na cán nasandacaan in da naní Dionisio, da cúu táhan na ndítaca Areópago cán. Ta tañu na nacandúsa cán ndácaan ri in ñáñáha naní Dámaris. Ta jári java chága na cándúsa nandihvi na íchi cuéntá Jesús.

18

Xínu coo Pablo ñuu Corinto

¹ Tá nandihí já naquee Pablo ñuu Atenas cán já cuahan da chí ñuu Corinto. ² Ta mé cán nandique táhan da xihín in da Israel naní Aquila, da nasacuu estado Ponto. Ta jacá cúu saá va naxinu coo Aquila ñuu Corinto cán xihín ñájihí da, ña naní Priscila. Ta ndívi na yóho sa naquee na ñuu Roma ndácaan nación Italia jáchi Claudio, da cómi

cuéntá sahá na ñuu Roma cán nasahnda da chuun ña ná quee ndihi na Israel cuhun na. Ña cán quea naxinu Aquila xihín ñájihí da ñuu Corinto cán. Anda já nasahan Pablo naxito nihni da na nu nduu na cán. ³ Ta nacandoo Pablo vehe na cán cája chúun da xihín ná jáchi sa mé chuun ña cája na cán tiahva ri da cán va. Ta chuun nasacaja na quea cávaha na vehe lona, ña ndeé. ⁴ Ta tá xínu coo quivi ndiquehe ndeé ná já sahan da veñuhu na Israel cahan da tuhun Ndióxi xihín ná. Ta já najaxinu da ini na Israel xihín na tóho já nacasáhá na cándúsa na Jesús.

⁵ Ta ndaja coo najándacoo Silas xihín Timoteo estado Macedonia ta naxinu coo na ñuu Corinto cán. Anda jávi najándacoo Pablo chuun cája da cán já nacasáhá da ndúcú ndeé chága da cahan da tuhun Ndióxi nuú ñayivi. Ta cáxi táhyí cahan da xihín na naquixi chichi Israel ña mé Jesús cúu á ña ndáti na chindahá Ndióxi quixi. ⁶ Joo na naquixi chichi Israel cán coo nandiquehe na tuhun cahan Pablo ta nacasáhá cánahá na xihín dá ta cahan núu na saha Jesús. Anda já naquiji nihni Pablo jáhma dá já ná canda ini na ña co ndójo ga da cuachi sahá na Israel cán ta já nacachi da já xihín ná:

—Tá ná cuhun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa nacahan i tuhun Ndióxi xihín ndo ta co cúni ndó cándúsa ndó ña. Viti xihín chí nuu cuhun i cahan i tuhun vaha saha Jesús nuú na coo naquixi chichi Israel —nacachi Pablo xihín ná.

⁷ Já naqueta da veñuhu na cán cuahan da. Já nasaa da vehe in da naní Justo, da cája cáhnu Ndióxi. Ta yati jín veñuhu cán íin vehe da. ⁸ Ta in da naní Crispo, da sáhdá chuun veñuhu cán nacandúsa da Jesús, xitoho í xihín tóco ndihí na vehe da. Ta cuaha táhan mé na ñuu Corinto cán nandiquehe na íchi cuéntá Jesús ta nacandúta ná tá naxini johó na tuhun Ndióxi nacahan Pablo xihín ná. ⁹ Ta ndaja coo in nuú naquixi tátuhun in sani nu Pablo ta xihín ña cán nacahan Ndióxi xihín dá já nacachi a já:

—A yíhvún cahún sahá i nuú ñayivi ta coto a catáji yuhun cahan chágun xihín ná

saha i. ¹⁰ Jáchí íin vi xuhun ta ni in na a cúu tiin yohó ña ná caja xíxi na xuhun. Jáchí sa ndúu cuahá ndivaha ñayivi ñuu yóho, na cacuu cuéntá mí i —ñacachi Ndióxi xihín dá.

¹¹ Sahá ña cán queá ñasahin tóo Pablo in cuia java ñuu Corinto cán ta najánaha da tuhun Ndióxi nuú ñayivi cán.

¹² Joo mé tiempo cán ñacasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cúní na caja xíxi na xihín Pablo chí ñatiin na da já ñéhe na da cuahan da vechúun. ¹³ Ta mé cán ñacasáhá cáchí na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája í já —cáchí na cán xihín gobernador.

¹⁴ Anda já ndúcú Pablo candichi da cahan da joo mé Galión cán ñacasáhá cáchí da já xihín na Israel cán:

—Tá cuachi ndeé ná caja da yóho já queá cuu cuni johó i nu cahan ndo ná ndaja ndichi i saha dá, nduu. ¹⁵ Joo co cúní toho i caja víi sahá ña jan jáchí cúu á sahá tuhun cahan ndo xihín sahá quivi ñayivi Israel xihín saha ley mé va ndó ña cán queá vaha chága ná caja víi mé va ndó sahá ña yóho —ñacachi da cúu gobernador cán xihín ná.

¹⁶ Tá nandihí já ñatavá da na Israel vechúun cán. ¹⁷ Anda já ñatiin tóco ndihi na griego cán da naní Sóstenes, da sáhdá chuun veñuhu cán. Ta ñatiin na da mé nu táhyí mé da cúu gobernador cán ñacani na da. Joo coo ñasahní toho Galión mé dá sahá ña ñacaja na.

Ndicó coo tucu Pablo chí Antioquia

¹⁸ Cuahá va quivi ñacandoo tóo chága Pablo ñuu Corinto cán. Anda já nandindayí da na cúu cuéntá Jesús ndúu cán já ñaquee da cuahan da ñundáhyi cuéntá Siria. Ta ndáca da Aquila xihín Priscila cuahan na xihín dá. Ta tá ñaxinu da ñuu Cencrea tá cámaní ndaa da barco cuhun chága da chí nuu já najatá lahla da jini dá já ná xinu coo nuú tuhun ñacahan da. ¹⁹ Ta tá ñaxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila.

Ta ñaquee da cuahan da chí veñuhu ñuu Efeso cán nuú ñacahan da tuhun Ndióxi nuú na Israel, na táca cán. ²⁰ Tá nandihí já ñacasáhá cahan ndahví na Israel cán xihín Pablo ña ná candoo tóo da chága quivi xihín ná. Joo coo ñaxeen toho da. ²¹ Ña ñacaja da queá nandindayí da na já ñacachi da já xihín ná:

—Ndítahan cuhun i coo i Jerusalén jáchí sa nandindaa quivi vaxi víco. Joo ndicó coo tucu u coto nihni i ndohó tá cúní Ndióxi —ñacachi Pablo xihín ná.

Tá nandihí já ñandaa da barco ñaquee da ñuu Efeso. ²² Ta tá ñaxinu coo da ñuu Cesarea já ñaquee da cuahan da chí ñuu Jerusalén cahan Ndióxi da xihín na cúu cuéntá Jesús ndúu cán. Tá nandihí já ñaquee da cuahan da chí inga ñuu naní Antioquia. ²³ Ta tá nandihí ñasahin da chá quivi cán já ñaquee tucu da cuahan da tá in tá in ñuu válí ñuhu chí estado Galacia xihín estado Frigia ña quiahva da tuhun ndeé ini na cúu cuéntá Jesús ndúu cán.

Cahan Apolos tuhun Ndióxi nuú na ñuu Efeso

²⁴ Mé tañu já ñaxinu coo in da ñaquixi chichi Israel naní Apolos mé ñuu Efeso cán. Mé Apolos yóho cúu dá da ñacacu ñuu Alejandría. Ta cúu dá in da tiahva vaha tuhun Ndióxi ta tiahva vaha da jánaha da ña nuú ñayivi. ²⁵ Mé Apolos yóho sa najácuaha vaha da íchi cuéntá Jesús, xitoho í ta xihín ndinuhu ini da cahan da saha mé á nuú ñayivi. Ta cáxí táhyí jánaha da saha Jesús nu ná. Ta ñacahan da xihín ná ña ndítahan candúta ñayivi tá quiahva najáandúta Juan ñayivi jihna. Joo coo xini vaha da tóco ndihi ña najánaha Jesús. ²⁶ Chí já ñaquihvi mé Apolos veñuhu cán cahan da tuhun Ndióxi xihín ñayivi jáchí co yíhví da cahan da xihín ná. Ta ndaja coo ñaxini johó Priscila xihín Aquila nu cahan da. Ta tá nandihí já ñéhe na da cuahan na já nandicani vaha chága na nu dá ndaja in íchi cuéntá Ndióxi. ²⁷ Ta tá ñasacu ini Apolos cuhun da chí estado Acaya já ñachindeé na cúu cuéntá Jesús da já ná cuu cuhun vaha da. Ta ñacahyí na in carta ñasahan na nu dá ná quiahva da ña nuú na cúu cuéntá Jesús ndúu cán já queá ná ndiquehe vaha

na da. Ta tá naxinu coo Apolos yóho estado Acaya cán naxindeé cuahá ndivaha da na cúu cuéntá Jesús, na nacandeé ini mé á sahá ña natahvi ini Ndióxi saha ná. ²⁸ Ta nu cáxi táhyí ndihi ñayivi nanaha da ña a juú ña ndaa cúu ña jánaha na Israel nuú ñayivi. Ta xihín tuhun Ndióxi nanaha da nu ná ña mé Jesús cúu Cristo, mé a nachindahá Ndióxi cacomí cuéntá sahá ñayivi.

19

Tá in Pablo ñuu Efeso

¹ Ta nani in Apolos ñuu Corinto cán já nayaha Pablo chí yucu janda quiahva naxinu coo da ñuu Efeso. Ta cán nandiñehe dá java na cúu cuéntá Jesús. ² Já nandaca tuhún da na já nacachi da já xihín ná:

—Á nandicutú ndaa ínima ndo xihín ínima yíi Ndióxi tá nacandúsa ndó Jesús — nacachi da xihín ná.

Já nanducú ñehe na cán tuhun nu dá já cáchi na já xihín dá:

—Chí a ñaha mé va candaá ini nde saha ínima yíi Ndióxi jan — nacachi na cán xihín Pablo.

³ Anda já nandaca tuhún Pablo na já cáchi da já xihín ná:

—Ndaja vaha nacandúta ndo, dá já.

Anda já nanducú ñehe na cán tuhun nu dá já nacachi na já:

—Nacandúta nde tá quiahva najánaha Juan — nacachi na.

⁴ Anda já nacachi tucu Pablo já xihín ná:

—Najácandúta Juan ñayivi já ná naha na nuú ñayivi ña nandijama na ta co cája ga na cuachi nasacaja na jihna. Joo nacahan Juan xihín ná ña ndítahan nu ná candúsa na inga da vaxi jata dá. Ta da nacahan Juan cán saha cúu Jesús, mé a nachindahá Ndióxi cacomí cuéntá sahá ñayivi — nacachi Pablo xihín ná.

⁵ Tá naxini johu na cán ña nacachi Pablo xihín ná chí ivi laá nacandúta ná cuéntá Jesús, mé a cúu xitoho í. ⁶ Ta tá nachojó Pablo ndáha dá jiní ná já naxinu ínima yíi Ndióxi najándicutú a ini na. Anda já nacasáhá na ndícahan na inga tuhun ña coo nasatiahva na. Ta jáyaha na tuhun nacahan Ndióxi nuú na ndúu cán. ⁷ Ta tixi ndihi na cán cúu ná tátuhun uxu ivi taa.

⁸ Ta tixi uní yoo nasahiin Pablo ñuu cán sahan da veñuhu jánaha da saha Jesús nuú ñayivi xihín ndinuhu ini da. Ta jáxinu da ini ñayivi ña ná ndihvi na íchi cuéntá Jesús já cuu cacomí mé á cuéntá saha ná. ⁹ Joo java na cán sáa ini na ta coo naxeen na candúsa na nu cáhan da. Ña nacaja na quéa nacasáhá cáhan nuu na saha tuhun vaha cáhan saha Jesús nuú ñayivi. Saha ña cán quéa natavá xoo Pablo na cúu cuéntá Jesús tañu na cán já nasahan ndaca da na in vehe escuela nu in in da naní Tiranno ta cán jánaha Pablo tuhun Ndióxi nu ná ndijáá níi quivi. ¹⁰ Já nasacaja Pablo tixi ivi cuia ta xihín ña cája da naxini johu ndihi na ndúu estado Asia tuhun vaha saha Jesús, xitoho í. Ta na naxini johu tuhun Ndióxi cán cúu ná na naquixi chichi Israel xihín na tóho viti. ¹¹ Ta nacaja Ndióxi ña ná cuu caja Pablo cuahá ña xituhún nuú ñayivi ndúu cán. ¹² Jáchi janda pañito á jáhma ña cáni ndaa Pablo cán ñehe na ña cuahan na ta jácani ndaa na ña na quihvi xihín á chí ndivaha na. Ta tá ñuhu ínima quini ini na janda rí cán quéta cuahan.

¹³ Joo java na Israel, na co cúu cuéntá Jesús xica nuu na táva na ínima quini ñuhu ini ñayivi. Ta ndaja coo nasacu ini na caja chúun na quivi Jesús, xitoho í, ña ná táva na ínima quini. Já nacachi na cán já xihín ínima quini ndácaan ini ñayivi:

—Xihín quivi Jesús ña xica nuu Pablo cáhan da saha, sáhdá nde chuun nuun ña ná queún cahun — nacachi na cán.

¹⁴ Já nacaja ndíhusa jahyi in da naní Esceva, da cúu da sacuahá nuú jutú veñuhu na Israel ndúu ñuu cán. ¹⁵ Joo tá nacachi na ña yóho xihín rí quini ñuhu ini in dataa já nanducú ñehe rí cán tuhun nu ná já cáchi rí já:

—Xini vi yo cúu Jesús ta xini ri ndá da cúu Pablo va. Joo mé ndó, co xini toho i ndohó — nacachi rí quini.

¹⁶ Tá nacachi ínima quini cán já chí ivi laá nandava dataa ndácaan ínima quini ini cán jata ndíhusa na cán ta nacaja xixi quini da xihín ná jáchi a juú quiahva ndacú da. Quini nacaja da cán xihín ná anda naxinu lahla ndihi na jata véhe ta chí a váha na nandicuehe na nacaja ínima quini cán. ¹⁷ Ta

chí nacandaa ini ndihi ñayivi ndúu ñuu Efeso cán sahá ña nayaha yóho vatí cúu ná na Israel á cúu ná na tóho ñañehe ndihi na tuhun. Sahá ña cán quea nayihvi na. Ta cuaha ná nacañan na ña cáhnu cúu quivi Jesús ña cúu xitoho í.

18 Ta cuaha táhan na cándusa Jesús cán nacasáhá na náhma na tóco ndihi cuachi nacaja na. 19 Ta cuahá na nasacuu na tají ñéhe ndihi na libro ña tají naxinu na ta nachicaan ñuhu ná ña nuú ndihi ñayivi. Tá najitá na cuénta sahá yahvi tóco ndihi libro nacayi cán naxinu a tátuhun ivi jico uxu mil jiuñun cúxú. 20 Já nacasáhá xíta nuu tuhun vaha saha Jesús. Ta náha ña mé a ndaa iin ndée Jesús caha tóco ndihi ñaha.

21 Tá sa nayaha ndihi ña yóho já nasacu ini Pablo cuñun da coto nihni da estado Macedonia xihin estado Acaya. Já quehe tucu da íchi cuñun da janda Jerusalén. Ta nacachi da ña tá sa nasahan da ñuu Jerusalén já vaha da cuñun da chí ñuu Roma. 22 Ta mé Pablo yóho nachindahá da ivi táhan da xíca chindeé táhan xihin dá ña ná cuñun da chí estado Macedonia. Ta da nachindahá da cán cúu Timoteo xihin Erasto ta mé Pablo nacandoo too chága da estado Asia.

Ndavaa ñayivi ndúu ñuu Efeso

23 Mé tiempo já a juú quiahva cuahá ñayivi ñuu Efeso nandivaa na sahá ña nandihvi cuahá ñayivi íchi cuénta Jesús. 24 In da naní Demetrio cúu dá da najandivaa na cán. Mé Demetrio yóho cávaha da tiniñu yúu xihin jiuñun cúxú ta mé tiniñu yúu cán ndaa tá quiahva cáa in veñuhu cuénta Diana, ña cúu ndióxi cája cáhnu na ñuu cán. Ta a juú quiahva vaha cána jiuñun na cája chuun xihin dá cán. 25 Sahá ña cán quea mé Demetrio yóho najátaca da tóco ndihi na cája chuun xihin dá ta najátaca ri da java ga táhan na cája mé chuun cávaha tiniñu yúu cán. Já nacachi da já xihin ná:

—Candehé ndo, sa cánda vaha ini ndó ña vaha ndivaha cána jiuñun yo xihin chuun cája í yóho ta ndúu vaha í cája ña. 26 Joo sa xini ndo ta ñehe mé ndó tuhun sahá da naní Pablo. Xíca nuu da cáhñan da xihin ñayivi ña a juú toho ndióxi cúu ña cávaha ndahá ñayivi. Ta sa cuahá ndivaha

ñayivi nacava da jini. Ta a juú in túhún ñuu Efeso yóho cuití va jáchi sa nacandee da nacava da jini cuahá na ndúu chí estado Asia viti. 27 Ta ihvi ndivaha cáa ña yóho jáchi cuu cáhnu da nuú chuun cája í ta nu cána jiuñun yo quea yóho. Ta janda veñuhu ndióxi yo, ña naní Diana cuu ndihi saha vatí níi cúu cáhñan vaha na saha veñuhu ña. Joo xihin ña cája Pablo yóho tá xíca nuu da cuu casahá ñayivi cáhñan núu na saha Diana ta cuu casahá na candají na ña cúu ndióxi yo, mé Diana yóho. Ta mé ña cúu ña ña cáhnu ndivaha ta ñayivi níi cúu estado Asia yóho xihin ñayivi níi cúu ñuyiví cája cáhnu na ña —nacachi Demetrio cán xihin java ga da cávaha tiniñu yúu cán.

28 Ta tá naxini joho ndihi na cán ña nacachi Demetrio chí ivi laá najaa quini na já nacayuhú na já nacachi na já:

—Cáhnu ná cacuu Diana, ña cúu ndióxi ndicahán na Efeso.

29 Ta xihin ña yóho tóco ndihi ñayivi ñuu cán nacasáhá na ndivaa na. Sahá ña cán quea ñatiin na ivi dataa, da naní Gayo xihin da naní Aristarco. Ndívi da yóho cúu da da estado Macedonia ta xíca nuu da xihin Pablo. Ta mé ñayivi cán ñatiin na da já ñuhu na da cuahñan da vehe nu ndítaca ñayivi cán. 30 Ndúcu Pablo quihvi nuu da tañu ñayivi cán ña cáhñan da xihin ná cúni da. Joo na cúu cuénta Jesús cán coo naxeen na ña ná cuñun da. 31 Ta jári java na jutixia cuénta estado Asia ndúu cán ta xini táhan vaha xihin Pablo sahá ña cán quea nachindahá na chuun nu dá ña ná a quihvi nuu da cáhñan da xihin na cán. 32 Tañu nu táca ñayivi ndivaa nahá cán sa jiin sa jiin ñaha cáyuhú na ndúu na. Jáchi cuahá na nataca cán ni co xini na nda cuénta quea nataca na tañu ñayivi cuaha cán. 33 Joo java ñayivi ndúu cán nandicani na ndaja cáa ña cúu cán nuú in da naní Alejandro. Ta java na Israel ndúu cán nachindahá na Alejandro já ná candichi da cáhñan da xihin ñayivi cán. Anda já nandinehe Alejandro ndaha dá já ná catáji too yuhu ná já nacasáhá ndíquehe da sahá na cúu cuénta Jesús. 34 Joo tá naxini ñayivi cán ña cúu Alejandro in da Israel chí ivi laá nacasáhá tóco ndihi na cán cáyuhú na já cáchi na já:

—Cáhnú ná cacuu Diana, ñá cúú ndióxi ndícahán na Efeso.

Ta coó ñacatáji na tixi ivi hora cáyuhú na mé tuhun yóho.

³⁵ Ta tá sa ñacatáji loho ñayivi já ñacasáhá da cúú da cáhyí tutu ñuu cán cáhan da xihín ñayivi já cáhí da já xihín ná:

—Candehé ndó, na Efeso. Sa cándaá ini ndihi ñayivi ndúu ñuyíví ña ndítahan nuú ñayivi ndúu ñuu Efeso candaa vaha na veñuhu ñá cúú ndióxi naní Diana. Jáchi mé ñá cúú ñá ñá cáhnú ndivaha ta indiví ñaquixi nahná ña ñandicava nu yo. ³⁶ Ta ni in na a cúu cachi ña cáhan i ña tuhún sahá ña cán quéa caja ndó ñamaní catáji ndo ta ndicaní vaha ini ndó sahá ña cúni ndó caja ndó. ³⁷ Jáchi ndíví da ndáca ndó ñacasaa ndó yóho co caja cuíhná da veñuhu Diana ta ni co cáhan núu da saha ña. ³⁸ Ta tá co táhan ini Demetrio xihín na cája chúun xihín dá sahá ña cája Pablo já ndítahan nu ná cuhun na vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja víi na sahá ñayivi. ³⁹ Joo tá inga ñaha quéa cúni ndó caja víi ndó saha, xini ñuhú nditaca ndihí já ná cuu caja víi yó sahá. ⁴⁰ Jáchi cája i cuénta cuu chicaan na cuachi jata yo sahá ña jándicuita í ñayivi caní táhan na saha tóco ndihi ña ñayaha quivi viti. Jáchi mé a ndaa co xini yo ndá tuhun nducú ñehé tá ná ndaca tuhún na mí ndá cuénta quéa ñandivaa nahá yo —ñacachi da xihín ná.

⁴¹ Tá ñandihí ñacachi da cáhyí tutu cán tuhun yóho xihín ñayivi cán já najánduta da na.

20

Cuahan Pablo estado Macedonia xihín estado Grecia

¹ Tá sa ñanduta ndihi ñayivi, na ñandivaa nahá cán já ñacana Pablo tóco ndihi na cúú cuénta Jesús jáchi cúni da cáhan da xihín ná sahá java ñaha ña ndítahan nu ná caja na. Ta tá ñandihí ñacahan da xihín ná já ñanumi da na ta ñandindayí da na já ñaquee da cuahan da chí Macedonia. ² Níí cúú estado Macedonia cán ñaxica nuu da sahan da tuhun ndéé ini na cúú cuénta Jesús xihín tuhún cáhan

da. Tá ñandihí já ñaquee da cuahan da ta ñaxinu da chí estado Grecia. ³ Ta ñacandoo da cán tixi uní yo. Ta tá ja chá quehe da barco cuhun da chí ñundáhyi cuénta Siria já ñañehe dá tuhun ña sácu ini na Israel cán cahnína da. Sahá ña cán quéa ñasacu ini da ña vaha chága ná cuhun sahá da já ná yaha tucu da chí Macedonia. ⁴ Ta ndáca táhan java na cúú cuénta Jesús cuahan na xihín Pablo. Ta na cán cúú na yóho: in da naní Sópater, da ñuu Berea xihín Aristarco xihín Segundo, da ñuu Tesalónica xihín Gayo, da ñuu Derbe xihín Timoteo. Ta tañu na cán cuahan ri Tíquico xihín Trófimo, da ñaquixi estado Asia. ⁵ Tóco ndihi na ndáca táhan xihín Pablo yóho ñasahan cuéé na chínuu candati na ndehe ñuu Troas. ⁶ Joo ndehe, da cúú Pablo xihín Lucas tá sa ñayaha víco tá xixi na pan ña co cáva táhan yusá ñaxaa xihín já ñandaa nde barco ñuu Filipo cuahan nde chí Troas. Ta janda quivi uhun já ñandique táhan nde xihín ndihí na cán. Ta chí ñacandoo tóo chága nde usa quivi ñuu Troas cán.

Xíto nihni Pablo ñuu Troas

⁷ Ta quivi domingo ñataca ndihi nde, na cúú cuénta Jesús ña cuxu nde pan yí. Ta sahá ña queta Pablo cuhun da inga quivi itaan sahá ña cán quéa najánaha cuaha dá nu ná janda quiahva ñaxinu java ñuu. ⁸ Tóco ndihi na cúú cuénta Jesús cán ñanditútú nde ndúu nde in vehe cánúu jiní ninu. Ta chí ndiyihví ndaa nu ndúu nde jáchi cuahá lámpara cáyi. ⁹ Ta ndaja coo in da loho naní Eutico íin coo da ventana xini johu da nu cáhan Pablo. Joo sahá ña cuaha cáhan Pablo sahá ña cán quéa ñanaá ini da loho cán chí ñaquiji da. Já najani dá ñandicava da janda nu ñuhú piso uní. Ta tá ñanuu na cúú cuénta Jesús cán ñandínehe na da janda ndii cúú dá. ¹⁰ Anda já ñanuu Pablo ta najáca da mé dá jata da loho cán ta ñanumi da da ta já ñacachi da já xihín na cúú cuénta Jesús cán:

—A cáyihví toho ndó jáchi tácu va da yóho —ñacachi Pablo chí najánditacu ñahá da.

¹¹ Anda já ñandaa tucu Pablo cuahan da vehe piso ninu cán. Já ñasahnda java da pan yí cán ta ñaxixi na ña. Anda já ñacahan chága da xihín ná janda quiahva

naṭivi. Já naṭee da cuahan da. ¹² Ta sahá mé da loho, da nandicava cán cájii íní na ndáca vaha na da cuahan na jáchi nanditacu da.

Qué Pablo ñuu Troas ta cuahan da chí ñuu Mileto

¹³ Nasacu ini Pablo cuhun sáhá da anda ñuu Asón. Joo mé nde nandaa nde barco nasahan nde mé ñuu cán jáchi janda cán naṭandoo nde ndique táhan nde xihin dá. ¹⁴ Ta tá nandique táhan nde ñuu Asón cán xihin dá já nandaa da xihin ndihi nde ini barco. Já naṭee nde cuahan nde ñuu Mitilene. ¹⁵ Casahan nde ini barco ta inga quivi itaan já nayaha nde yati isla Quío ta janda tá nayaha inga tucu quivi já naxinu coo nde ñuu Samos. Ta naṭee tucu nde cuahan nde janda quiahva naxinu coo nde ñuu Trogilio. Ta cán nandiquehe nde nde ta janda inga quivi itaan naxinu coo nde ñuu Mileto. ¹⁶ Co cuni Pablo cayancá da estado Asia sahá ña cán quéa coo nasahan nde ñuu Efeso. Númi da cuhun da ñuu Jerusalén coo da quivi víco Pentecostés jáchi nasacu ini da coo da víco cán tá ná quiahva Ndióxi ñamaní nu dá.

Cáhan Pablo xihin na sacuahá ñuu Efeso

¹⁷ Ta nani ndúu nde ñuu Mileto cán já nacana Pablo tóco ndihi na sacuahá veñuhu ñuu Efeso cán já ná quixi na. ¹⁸ Ta tá sa nataca na nu ndúu nde já nacachi da já xihin ná:

—Sa xini vaha ndó ndaja nacaja i janda quivi nu cuítí tá naxinu coo i estado Asia yóho. ¹⁹ Nii tiempo nasahin i tañu ndó cán nacaja chún i cuéntá Jesucristo, xitoho í. Ta coo nandinehe jícó i mí i sahá ña nacaja i. Ta cuahá tañu nasacu u saha ndo. Ta nandoho ini i sahá ña cuni na Israel cahní na yehe. ²⁰ Ta coo najandacoo i cáhan i tuhun Ndióxi xihin ndo jáchi xini vaha i ña jan cuu chindeé a ndohó. Ta najánaḥa i ndohó nu táhyí ñayivi ta jári ini vehe ndó. ²¹ Ta najánaḥa i nuú na Israel xihin nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihin ná ña ndítahan candeé ini na Jesucristo, xitoho í. ²² Ta viti cuhun i chí ñuu Jerusalén jáchi cuni ínimá yii Ndióxi ña ná cuhun i cán ta co xini ndía cuu ndoho i

ñuu cán. ²³ Ña xini ndusa i quéa ña nacaxi tuhun ínimá yii Ndióxi xihin i ña ndá ñuu nacuu nuú cuhun i ña jivi i chicaan ñayivi yehe vecaa á jivi i caja xixi na xihin i. ²⁴ Joo ni in ña yóho co cája toho a nuú i. Ta vatí ná cahní na yehe co yíhví toho i. Jáchi ña cuni mí i quéa cajii íní i jáxinu coo i chuun nasahan Jesucristo nuú i caja i. Ta ña yóho cúú á cáxi tuhun i nuú ñayivi tuhun vaha saha mé á ta saha ndá quiahva quíhví ini a ñayivi.

²⁵ 'Sa naxica nuu i tañu ndó ta nacahan i xihin ndó ña vaxi quivi cacomí Ndióxi cuéntá sahá ñayivi. Ta viti xini vaha i ña ni in ndó a cuni ga ndó yehe. ²⁶ Sahá ña cán quéa cáxi tuhun i xihin ndó quivi víti ña co ndójo ga i cuachi saha ndo tá ná jándicoo ndó íchi cuéntá Jesús. ²⁷ Jáchi sa nacaxi tuhun i nu ndo tóco ndihi ña sácú ini Ndióxi caja ta coo nachijehé tuhun toho i sahá nu ndo. ²⁸ Sahá ña cán quéa ndítahan candaa vaha ndó mé va ndó ta candaa vaha ndó tóco ndihi na cúú cuéntá Jesús ná cuahnu chága na xihin tuhun Ndióxi. Jáchi mé ínimá yii Ndióxi nasacu a ndohó ña ná cacomí ndo cuéntá sahá na cúú cuéntá mé á jáchi naxita nij mé á sahá ndihi na tá naxihí a ndica cruxu. ²⁹ Cáhan i ña yóho xihin ndo jáchi sa cándaḥa vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúú cuéntá Jesús. Ta tá quiahva cája ndivahyí jándihi rí sahá ndicachi quiahva já cacuni na jándihi na sahá na cúú cuéntá Jesús. ³⁰ Ta janda mé tañu mé ndó jan va cana java na ta jánaḥa na ña tuhún nuú ñayivi. Ta nducú na ndiquehe na na sa cúú cuéntá Jesús cuhun na jatá na cán. ³¹ Ña cán quéa cuéntá vaha coo ndó ná a jándahvi na ndohó. Xini ñúhú ndicuhun ini ndó ña tixi uní cuia coo najandacoo i cáhan i xihin ndó ndáa quéa ndítahan nu ndó caja ndó. Ta ñuu ta ndiví nacahan i xihin ndó sahá ña yóho ta chí anda nasacu u saha ndo ña ná caja ndó ña cuni Ndióxi.

³² Viti jándacoo i ndohó, ñani i, ndahá Ndióxi jáchi cáchi tuhun mé á ña quíhví ini a tóco ndihi ñayivi. Íin ndeé Ndióxi caja ndacú a ndohó já ná cuu coo ndó xihin tóco ndihi na nacaxi mé á caja ñamaní xihin. ³³ Ta xini ñúhú ndicuhun ini ndó ña

coó nandiava ini i quehe e jiuñún á jáhma vaha cómi java ga ñayivi. ³⁴ Ña ñacaja i quea ñacaja chúun i xihín ndahá i já ná a ndímaní ñaha catacu u ta já ná cuu catacu na xíca xihín i. ³⁵ Ta níi tiempo najánaha i nu ndo ña quiahva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicuhun ini ndó tuhun ñacachi Jesucristo tá ñacachi a: “Cájií chága ini na jása ñaha a juú ga na ñéhe á”, ñacachi Pablo xihín na sacuaña veñuhu ñuu Efeso cán.

³⁶ Tá nandihi ñacahan Pablo já ñacaxítí da já ñacasáhá xíca tahví da nu Ndióxi xihín ndihi na cúu cuéntá Jesús cán. ³⁷ Ta tóco ndihi na cán ñasacu na xihín dá ta ñanumi na da ta já ñatati yúhu ná sajóho da ña ndíndayí na da. ³⁸ Tóco ndihi na ñacacuéha ini na saha Pablo jáchi ñacachi da xihín ná ña a cúní ga na da. Tá nandihi já ndáca táhan ndihi na ñasahan na xihín dá janda nuú ñandaa da barco cán.

21

Cuahan Pablo chí ñuu Jerusalén

¹ Tá nandihi ñandindayí nde na cúu cuéntá Jesús cán já ñandaa nde barco ñaquee nde cuahan ndacú nde in ñuu naní Cos. Ta inga quiví itaan já ñaquee tucu nde cuahan nde chí inga ñuu naní Rodas. Ta já ñaquee nde cuahan nde chí ñuu naní Pátara. ² Ta mé cán ñandique táhan nde xihín in barco, dó cuhun chí estado Fenicia ta chí ñandaa nde dó cuahan nde. ³ Ta nani cásahan nde ini dó já ñaxini nde isla Chipre xoo íti nde. Joo ñayaha saa va nde janda quiahva ñaxinu coo nde ñuu Tiro ndácaan estado Siria jáchi mé cán ndítahan nu ná jánuu na ñaha ndójo dó. ⁴ Mé ñuu Tiro cán ñanditahan nde na cúu cuéntá Jesús ta ñacandoo tóo nde xihín ná tixi usa quiví. Ta najácahan ínimá yíi Ndióxi na cán ña ná caxi tuhun na xihín Pablo ña ná a cūhun da ñuu Jerusalén. ⁵ Joo tá sa ñayaha usa quiví já ñaquee nde cuahan nde chí ñuu Jerusalén. Ta ñaqueta tóco ndihi na cúu cuéntá Jesús cán xihín ñájhí na xihín jahyi válí na já ndáca táhan na xihín nde cuahan nde anda yuhú ñuu cán. Ta yatí yuhú tañuhú cán ñacaxítí ndihi nde ñaxíca

tahví nde nu Ndióxi. ⁶ Ta tá ñandindayí táhan nde já ñandaa nde barco ta na cán ñaquee na cuanúhu ná vehe na.

⁷ Ñaquee nde mé ñuu Tiro cásahan nde nuú tañuhú janda quiahva ñaxinu coo nde ñuu Tolemaida. Ta mé cán ñacahan Ndióxi nde xihín na cúu cuéntá Jesús ndúu cán. Ta chí ñacandoo nde in quiví xihín ná. ⁸ Ta inga quiví itaan já ñaquee nde cuahan nde janda quiahva ñaxinu coo nde ñuu Cesarea. Ta cán ñasahan nde vehe in da sáxica nuu cáhan tuhun Ndióxi xihín ñayivi. Mé da yóho nani da Felipe ta ñasacuu da in táhan ndíhusa da chindeé na apóstol veñuhu ñuu Jerusalén. Ta chí ñacandoo tóo nde vehe da cán. ⁹ Ta ñasahin cómi jahyi jhí da, na tacú. Ta tiaha ndícomi ná jáyaha na tuhun cáhan Ndióxi nuú ñayivi. ¹⁰ Tá sa ñacaja chá quiví ndúu nde vehe da cán já ñaxinu coo in profeta, da ñaquixi estado Judea ta nani da Agabo. ¹¹ Mé da yóho ñasaa da coto nihni da ndehe nu ndúu nde cán. Ta nani in da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihín mé cinturón ta já ñacachi da já:

—Cáchi ínimá yíi Ndióxi ña tá quiahva ñacaja i ñacató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho —ñacachi Agabo cán xihín nde.

¹² Tá ñaxini johó nde ña ñacachi Agabo yóho já ñacasáhá nde cáhan ndahví nde xihín Pablo ña ná a cūhun da ñuu Jerusalén. Ta jári na cúu cuéntá Jesús ndúu ñuu Cesarea cán cáhan ndahví na xihín dá ña ná a cūhun da. ¹³ Joo ñanducú ñehe Pablo tuhun nuú nde já ñacachi da já:

—Ndá cuéntá quea sácu cóhó ndo ta cája ndó ña cándií ini i. Candehé ndo ná cahan i xihín ndo. Coó caja toho a ná cató na yehe jáchi in tiaha i ndiquiahva i mí i quiví i saha Jesús, xitoho í mé ñuu Jerusalén cán —ñacachi da.

¹⁴ Coó ñacuu caja nde cava nde jiní dá ña ná a cūhun da. Chí coó ñacahan chága nde sahá ña yóho xihín dá ta ñacachi nde:

—Ná coo tá quiahva cúní Ndióxi va.

¹⁵ Tá nandihi já ñacaja tiaha nde ñaha nde ta já ñaquee nde cuahan nde ñuu

Jerusalén. ¹⁶ Ta ndáca táhan java na cúu cuénta Jesús ñuu Cesarea cán cuahan na xihín nde. Ta tañu na cán ndácaan in da naní Mnasón, da naquixi isla Chipre. Ta anda sanahá ndíco da íchi cuénta Jesús. Ta sa mé vehe da yóho sácú ini nde canduu tóo nde ñuu Jerusalén cán.

Xíto nihni Pablo da naní Jacobo

¹⁷ Tá naxinu coo nde ñuu Jerusalén já cávatá na cúu cuénta Jesús cán nandiquehe na ndehe. ¹⁸ Ta inga quiví itaan já ndáca Pablo ndehe nasahan nde cotó nihni nde Jacobo. Ta tá naxinu coo nde cán já naxini nde ña nataca tóco ndihi na sacuaña nuú na cúu cuénta Jesús cán. ¹⁹ Ta nacahan Ndióxi Pablo xihín ná já nacasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coo naquixi chichi Israel. ²⁰ Tá naxini johu na cán ña yóho já nacaja cáhnu na Ndióxi. Ta tá nandihí já nacasáhá cáchí na já xihín Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchi cuénta Jesús viti. Ta tóco ndihi na cáchí na ña ndítahan caja na ña sáhndá ley Moisés. ²¹ Joo nañehe ná tuhun ña xíca nuún jánahún nuú na Israel, na ndúu ñuu tóho ña co xini ñuhú ga caja na ña sáhndá ley Moisés ta ni marca cán co xini ñuhú chican ga na yiquí cuñu jahyi na. Ta jánahún na ña co ndítahan caja na costumbre najándacoo tásáhnu jícó yo nu yo. ²² Ta co xini nde ndía caja nde viti jáchi nditútú na ndúu Jerusalén yóho tá ná candaa ini na ña nacasaun yóho. ²³ Sahá ña cán quea caja nde cuénta ña vaha chaga ná cajún ña cáchí nde yóho: Cañehún comí ta ndúu tañu nde yóho já ná cuhun na xuhun. Jáchi sa naxinu coo quiví caja ndícomí da yóho ña nasahan da tuhun da nu Ndióxi caja da. ²⁴ Ná cuhún xihín dá já ná ndaja viún mún xihín dá tá quiahva sáhndá ley Moisés ta já ná chahvún nuú jatá jini dá. Ta xihín ña yóho cuni na Israel ña a juú ña ndaa cúu tóco ndihi tuhun cáhan ihvi na sahan. Ta xihín ña yóho cuni na ña caja tá cajún ña sáhndá ley Moisés. ²⁵ Ta sahá na tóho, na cúu cuénta Jesús, sa nacahyi nde in carta cuahan nu ná ña ná a jándihí na mé ná caja na ley Moisés. Joo

nacachi nde xihín ná ña ná a cáxí na cuñu quíti, rí najoco na nuú tiniñu yúu. Ta ná a cáxí na nii ta ni ná a cúxu na cuñu quíti, rí nasahnú. Ta ná a cóo na xihín ta a ñaha, na co cúu yí ná a ñájihí na. Ña yóho cúu tuhun nacahyi nde nu carta cuahan nuú na tóho —nacachi na sacuaña cán xihín Pablo.

²⁶ Anda já naquehe Pablo ndícomí dataa cán ndáca da cuahan xihín dá. Ta inga quiví itaan já nandaja vií da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña caxi tuhun da xihín ná ndá quiví xinu coo ña ndivií na já ná cuu joco in in da cán ñaha nu Ndióxi.

Tiin na Pablo veñuhu cáhnu ñuu Jerusalén cuahan da veca

²⁷ Tá ja chá xinu coo quiví usa já naxinu coo java da Israel, da naquixi chí estado cuénta Asia. Ta tá naxini na cán ndácaan Pablo ini veñuhu cáhnu cán já najándivaa na ñayivi já ná ndicuita na caja xíxi na xihín dá. ²⁸ Ta nacasáhá cáyuhú na nuú ñayivi já cáchí na já xihín ná:

—Candehé ndó, na Israel. Caja ndó ñamaní chindee ndó ndehe xihín da yóho jáchi níi cúu nu xíca da yóho cáhan núu da sahá ñayivi Israel ta jánahá da ñayivi ña co ndítahan nu ná candúsa na ley Moisés ta ni co ndítahan nu ná caja cáhnu na veñuhu cáhnu ndácaan Jerusalén yóho. Ta viti cája núu chaga da jáchi janda java da tóho, da ñuu Grecia najáquihvi da veñuhu í ta jáyuxu da veñuhu yí yóho xihín da tóho jan —cáchí na.

²⁹ Tóco ndihi ña yóho nacachi ta Israel naquixi Asia cán xihín ñayivi jáchi nacahan da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Nacahan na já jáchi naxini na ndáca táhan Trófimo xihín Pablo xíca nuu da ñuu Jerusalén cán.

³⁰ Xihín ña nacachi da naquixi Asia yóho nandivaa tóco ndihi ñayivi ñuu Jerusalén já xinu na naxinu coo na natiin na Pablo. Já ñuhu na da natavá na da jatá veñuhu cán ta ivi laá nachicaji na yéhe veñuhu cán. ³¹ Chí ndúcú na cañí na da joo da cúu jefe soldado cán nañehe dá tuhun ña nandivaa ndihi ñayivi ñuu Jerusalén cán. ³² Anda

já najátaca da cúu jefe soldado xihín java ga da náhnu já xínu da naxinu coo da nu ndívaá ñayivi cán. Tá naxini ñayivi cán vaxi da cúu jefe soldado cán xihín java soldado já najáyaa ñahá na chí coo cáni ga na Pablo. ³³ Anda já nacayati da cúu jefe soldado cán nu Pablo já natiin da da cuhun da vecaa. Ta nasahnda da chuun ña ná cató na da xihín ivi cadena. Tá nandihí já nacasáhá ndáca tuhún da ñayivi ña ndá da cúu da yóho ta ndíá nacaja da. ³⁴ Joo sa jíin sa jíin tuhun cáyuhú in in ñayivi cán. Sahá ña cán quéa coo nacuu candaa ini da cúu jefe soldado cán ndá cuachi quéa jácojo na jata Pablo jáchi a juú quiahva ndívaá na cán ndúu na. Sahá ña cán quéa nasahnda mé jefe soldado cán chuun ña ná cañehe na Pablo vehe nu ndúu soldado. ³⁵ Ta tá naxinu coo na cán nacahán na ndaa na cuani vehe soldado cán xihín Pablo joo coo nacuu ndaa na jáchi chí cándíhi táhan ñayivi cúni na cani na Pablo. Sahá ña cán quéa nasajocó soldado cán Pablo já ndaa na cuani vehe soldado cán xihín dá. ³⁶ Ta tóco ndihí na cán cáyuhú cóhó na ndícaa na jata soldado já cáchi na já:

—Cahní ndó da. Ná quivi da —cáyuhú na.

Ndíquehe Pablo saha mé dá nuú ñayivi cán

³⁷ Ta tá sa ndúcú na jáquihvi na Pablo ini vehe soldado cán já nacachi Pablo já xihín da cúu jefe soldado cán:

—Á quiahva ndó ñamaní nuú i ná cahan i ivi johu tuhun xihín ñayivi yóho.

Anda já nanducú ñehe da cúu jefe soldado cán tuhun nu Pablo já nacachi da já:

—Á tiahvún cahún tuhun griego, dá já.

³⁸ Á a juú toho yóhó cúu da naquixi nación Egipto viti chá va, da najácahan ñayivi ná ndicuita na cani táhan na xihín gobierno ta nasandaca da comi mil da sáhní ndii nasahan da chí yucú íchí nuú coo ñayivi. Á a juú toho yóhó cúu mé da cán —nacachi da cúu jefe soldado cán xihín Pablo.

³⁹ Anda já nanducú ñehe Pablo tuhun nu dá já nacachi da já:

—Jíin va cúu yehe jáchi cúu u in da naquixi chichi Israel ta nacacu u ñuu Tarso, in ñuu cáhnu ndácaan estado Cilicia. Ta viti á cuu quiahva loho ndó ñamaní nuú

i ná cahan i ivi tuhun xihín ñayivi yóho —nacachi Pablo xihín da cúu jefe soldado cán.

⁴⁰ Anda já nasahan da cán ñamaní nu Pablo ña ná cahan da xihín ñayivi. Anda já nandaca ndichi Pablo nuú cuani vehe cán já nandiñehe da ndáha dá nu ná já ná catáji yúhu ná. Ta tá sa nacatáji yúhu ná já nacasáhá cahan da tuhun hebreo xihín ná.

22

¹ Já nacasáhá Pablo cáchi da já xihín ná:

—Cuni johu ndó nu cahan i xihín ndóhó, na sacuaaha xihín ñani i jáchi cúni ndiquehe e sahá i viti —nacachi Pablo xihín ná.

² Tá naxini johu na cán ña cahan Pablo tuhun hebreo, mé tuhun cahan mé ná já nacatáji chága yúhu ná. Anda já nacachi Pablo já xihín ná: ³ —Yehe cúu u da naquixi chichi Israel. Ta nacacu u ñuu Tarso ndácaan estado Cilicia. Joo nasahnu u ñuu Jerusalén yóho ta mé yóho najácuaha vi xihín in da naní Gamaliel. Ta tá quiahva sáhdá ley Moisés, ña nasacu vaha tásáhnú jícó yo quiahva já nandihí ini i cája i. Níi tiempo nandihí ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi viti. ⁴ Naxica nuu i cája xixi i xihín na ndíco íchi cuéntá Jesús janda quiahva sáhní i na. Ta cuahá taa, ñaha viti naxica nuu i játaca i na ña ná cuhun na vecaa. ⁵ Ta xini vaha da cúu sacuaaha nuú jutú xihín ndihí na sacuaahá veñuhu ña cahan i ña ndaa xihín ndo. Jáchi mé na yóho cúu na nacahyí tutu nasahan na nuú i já ná ndiquiahva i ña nuú ñaní, na naquixi chichi Israel ndúu ñuu Damasco cán. Ta nasahan i cán ndínducú u na cúu cuéntá Jesús ña cañehe e na quixi i ñuu Jerusalén yóho caja xixi nde xihín ná.

Ndícani Pablo ndaja nacuu nandiquehe da íchi cuéntá Jesús

(Hch. 9:1-19; 26:12-18)

⁶ Joo nani xica i íchi cuahan i tátuhun caxivi cáa tá sa yati xinu coo i ñuu Damasco cán já in cuití nandiyehé ndaa nu íin i ta mé a yóho naquixi a indiví. ⁷ Chí nandicava i nu ñúhu ta já naxini johu i in a cahan xihín i já nacachi a já: “Saulo, Saulo ndá cuéntá quéa ndícuítún cája xísún xihín i”, nacachi a xihín i. ⁸ Anda já nacasáhá ndáca tuhún i já

cáchí i já: “Ndá na cúú ndóhó ta ndaja nani ndo”, nacachi i xihín á. Anda já nanducú ñehe a tuhun nuú i já cáchí a já: “Yehe cúú Jesús, da ñuu Nazaret ta xihín yehe ndícuítún cája xísún viti”, nacachi a cán xihín i. ⁹ Ta na cuahan xihín i cán nayihví na tá naxini na ña nandiyehé nu íin i cán. Joo coó naxini johó na ña cáhan xihín i cán. ¹⁰ Anda já nacachi i já xihín Jesús: “Cahan ndó xihín i, xitoho i ndía ndítahan caja i.” Anda jáví nacachi a já xihín i: “Candichi ta cuáhán ñuu Damasco nu cáhún cuhun jan. Ta ñuu jan ndicani in da nuun ndía ndítahan cajún”, nacachi Jesús xihín i. ¹¹ Ta chí nacuaá nuú i nacaja ña nandiyihví cán. Sahá ña cán queá jandá natiin ndaa na ndáca táhan i cán yehe cuahan nde janda quiahva naxinu coo nde ñuu Damasco cán.

¹² Ta mé cán nasahin in da nani Ananías, da cája ña sáhdá ley Moisés xihín ndinuhu ini da. Ta tóco ndihi na Israel ndúu Damasco cán cáhan na saha dá ña cúú dá taa vaha. ¹³ Ta mé Ananías yóho nasaa da naxito nihni da yehe. Já nacasáhá cáchí da já xihín i: “Saulo, ñani i candehé tucu viti.” Tá nacachi da já chí ivi laá nanuna nuú i já naxini i da. ¹⁴ Anda já nacachi da cán já xihín i: “Mé Ndióxi, ña nacaja cáhnu tásáhnu jícó yo, mé a cán queá naxi a yohó já ná candaá inún ndá queá sácú ini mé á caja xuhun. Ta naxi a yohó já ná cunún Jesús, mé a cája ndinuhu ña ndaa. Ta naxi a yohó já ná cuni johún nu cáhan Jesús. ¹⁵ Já queá cuhún cahún saha mé á nu tóco ndihi ñayivi. Já ná ndicanún nu ná sahá ña naxinún xihín ña naxini johún. ¹⁶ A cándati chágun viti. Cuándaco. Cándéé inún Jesucristo viti chí cuáhán candúta já ná ndoo cuachún, caja Ndióxi”, nacachi Ananías xihín i.

Ndicani Pablo ña naxindahá Ndióxi da cahan da tuhun vaha saha Jesús nuú na tóho

¹⁷ Tá nandihí já nandicó coo i ñuu Jerusalén ta nasahan i veñuhu cáhnu cán caça tahví i nu Ndióxi. Ta nani xíca tahví i cán já naxixi tátuhun in sani nuú i vatí ndíta i. ¹⁸ Ta naxini i Jesús, xitoho i já nacachi a já xihín i: “Camún cuáqueún ñuu Jerusalén yóho jáchi a cándúsa toho na yóho tuhun vaha cahún sahá i”, nacachi Jesús

xihín i. ¹⁹ Anda já nanducú ñehe e tuhun nu Jesús já cáchí i já xihín á: “Candehé ndo, xitoho i. Sa xini vaha tóco ndihi ñayivi ña naxica nuu i ndijáá veñuhu tiin i na cándéé ini ndóhó ta já nacani i na ta nataán i na vecaa. ²⁰ Ta sa xini na ña tá nasahní na Esteban, mé da naxica nuu cáhan tuhun vaha saha mé ndó, in nasacuu u xihín na nasahní ñahá cán. Jáchi táhan ini i cándichi i ndáá i jahmá ñayivi cán nani sáhní na Esteban”, nacachi i xihín Jesús. ²¹ Anda já nacachi Jesús já xihín i: “Cuáqueún cuhun jáchi chindahá xíca i yohó cuhún cahún sahá i nuú ñayivi tóho, na coó naxixi chíchi Israel”, nacachi Jesús xihín i —nacachi Pablo xihín na cán.

Cáhan chága Pablo xihín mé da cúú jefe nu ndihi soldado

²² Nasanduu táji na Israel cán nani cáhan Pablo xihín ná. Joo tá nacahan da sahá na tóho cán já nacasáhá cáyuhú na já cáchí na já:

—Cahní ndó da jan. Ná quivi da. Co ndítahan ga nu dá coo da ñuyivi yóho —cáchí na cán cáyuhú na.

²³ Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi. ²⁴ Sahá ña cán queá nasahnda da cúú jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihín churú ní já ná nahma da ndía nacaja da ta ndá saha queá ndícuíta ñayivi cán xihín dá. ²⁵ Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahan ndó xihín i á núná nu ndo jácaxáhan ndó in da cúú taa romano tá cámaní yíi caja víi ndó saha dá tá quiahva sáhdá ley romano jáchi yehe cúú u da romano —nacachi Pablo xihín soldado cán.

²⁶ Tá naxini johó da ña yóho chí ivi laá nasahan da cáxi tuhun da nu da cúú jefe soldado cán já cáchí da já xihín dá:

—Cuénta vaha coo ndó ta coto a cája xíxi ndó xihín da jan jáchi cúú dá taa romano —nacachi in soldado cán.

²⁷ Anda já nacayatí da cúú jefe soldado cán nu Pablo já nacasáhá ndáca tuhún ñahá da já cáchí da já:

—Á ndaa cúun taa romano —cáchi da.

—Ajan, taa romano cúu u —nacachi Pablo xihin dá.

²⁸ Anda já nacasáhá cáchi mé da cúu jefe soldado cán já xihin Pablo:

—Yehe nachahvi i cuahá ndivaha jjuhún já nacuu nanduu u in taa romano —nacachi da cán xihin Pablo.

Ta já cáchi Pablo já xihin dá:

—Joo yehe cúu u taa romano jáchi já nacacu u —nacachi Pablo.

²⁹ Tá naxini johu na cúni jácaxáhan Pablo cán ña yóho chí nayihví na já nacasáhá xíca játa na cáxoo na nu dá. Ta janda mé da cúu jefe soldado cán nayihví da jáchi sa natiin na da vatí cúu dá taa romano.

Ndíquehe Pablo saha mé dá nuú na sacuahá Israel

³⁰ Ta inga quivi itaan natavá da cúu jefe soldado cán cadena nasandico ndáha Pablo. Ta sahá ña cúni da cán candaa ini da ndá cuachi quea jácojo na jata Pablo sahá ña cán quea najátaca da na sacuahá nuú jutu xihin na sacuahá Israel. Anda já ñéhe da Pablo já nasacu da da nuú na cán.

23

¹ Anda já nasandehé Pablo nu tóco ndihi na sacuahá nuú na Israel cán já nacasáhá cáchi da já xihin ná:

—Candehé ndo, ñani i. Janda jihna ta janda quivi víti cája i ña cúni Ndióxi ta xini mé á ndaja ndacaan jiní i —nacachi Pablo.

² Joo da cúu sacuahá nuú jutu naní Ananías cán nasahnda da chuun nuú na ndíta yati xihin Pablo cán ña ná cani na jahnda yuhu dá. ³ Anda já nacachi Pablo xihin Ananías cán:

—Tá quiahva nacani na jahnda yuhú i quiahva já cani Ndióxi yohó, da co cúu tá quiahva ndáa da. Íun jan ndaja ndichún yehe jáchi jácojo na cuachi játa i ña co sácú vaha i ley. Joo yohó nandava ndojún ña sáhdá ley jáchi nasahndún chuun ña ná cani na yehe —nacachi Pablo xihin Ananías cán.

⁴ Anda já nacasáhá na ndúu cán cáhan na xihin Pablo já cáchi na já xihin dá:

—Cuénta cóun jáchi cánahún xihin da cúu jutu sacuahá chága nu ndíhi jutú cuénta Ndióxi —nacachi na xihin Pablo.

⁵ Anda já nacachi Pablo já:

—Cáhnú coo ini ndó, ñani i jáchi co xini toho i ña cúu da jan jutú sacuahá chága nu ndíhi jutú cuénta Ndióxi. Mé tuhun Ndióxi sáhdá chuun já cáchi a já: “A cánahún xihin da cómi chuun sahá ñuu ndó” —nacachi Pablo.

⁶ Tá nandihí já nandicuni Pablo ña ndúu java na saduceo ta ndúu ri java na fariseo mé cán. Sahá ña cán quea nacahan cóho Pablo já nacachi da já:

—Candehé ndo, ñani i. Yehe cúu u in da fariseo ta in fariseo nasacuu ri tátá i. Ta víti cája vii na yóho sahá i sahá ña cándúsa i ña vaxi quivi nditacu tucu ndii —nacachi Pablo.

⁷ Tá nacachi Pablo já ivi laá nandicuítá na fariseo xihin na saduceo ndituhún xihin táhan na já nasahnda java táhan na. ⁸ Jáchi na saduceo cán co cándúsa na ña vaxi quivi nditacu tucu ndii. Ta ni co cándúsa na ña ndúu tátó Ndióxi. Ta ni co cándúsa na ña íin ínimá ñayivi. Joo na fariseo cándúsa va na tóco ndihi ña yóho. ⁹ Tóco ndihi na cán cáyuhú na ndúu na. Sahá ña cán quea nandaca ndichi java na jánahá ley Moisés, mé na cuahan xoo na fariseo cán. Já nacasáhá cáchi na já xihin tóco ndihi ñayivi cán:

—Coó toho cuachi ná caja da naní Pablo yóho. Jáchi ndá ínimá yii quea nacahan xihin da yóho á tá coó ta ndá tátó Ndióxi quea nacahan xihin da yóho. Sahá ña cán quea tá ná cahan ihvi yó xihin da yóho cúu á tátuhun cáni táhan í xihin Ndióxi —nacachi na jánahá ley Moisés xihin ná.

¹⁰ A juú quiahva nacasáhá ndívaá ñayivi cán sahá ña cán quea nacasáhá yihví da cúu jefe soldado cán ña tiahva náa tiin na Pablo ta jácuachi na da. Sahá ña cán quea nasahnda da chuun ña ná quixi soldado tavá da Pablo tañu ñayivi cuaha cán. Ta já ná cañehe tucu na da cuhun da vehe soldado cán.

¹¹ Ta ñuu inga quivi itaan já nacanáha nuú Jesús, xitoho í nu Pablo ta nacahan xihin dá já nacachi a já:

—A ndícani ínún, Pablo jáchi tá quiahva nacahún sahá i nuú ñayivi ñuu Jerusalén yóho quiahva já cahun sahá i nuú ñayivi ndúu ñuu Roma —nacachi Jesús xihin dá.

Sácú ini na Israel cahní na Pablo

¹² Ta inga quiví itaān já najándique táhan java na Israel tuhun na ña cahní na Pablo. Ta ñacachi na a cúxu na ta ni ticuifí a cóho na janda quiahva ná cahní na Pablo. Ta ñacachi xihín táhan na ña cuhun cháhan jata ndá da ñaxixi á ñaxihí ticuifí nani tácu Pablo. ¹³ Ta yáha ga nuú ivi jico taa cúu da najándique táhan tuhun caja ña yóho. ¹⁴ Tá nandihí já ñaquee na ñasahan na cahan na xihín da sacuahā nuú jutū cān xihín na sacuahā nuú na Israel cān já ñacachi na já xihín ná:

—Tóco ndihi nde najándique táhan nde tuhun nde cahní nde Pablo. Ta ñachicaān nde cháhan jata ndá da ná cuxu nani tácu Pablo. ¹⁵ Sahá ña cān quēa caja ndó ñamañi jándique táhan ndó tuhun ndó xihín java ga na sacuahā jan já ná cahan ndó xihín da cúu jefe soldado já ná cañehe tucu da Pablo quixi da nu ndo. Ta cahan loho ndó xihín dá ña cūni ndó caja vii cuéé chāga ndó sahá ña ñacaja Pablo. Já va cachi ndó xihín da cúu jefe soldado cān ta ndehe canduu tiahva nde cahní nde da tá ná quixi da íchi —ñacachi na xihín na sacuahā cān.

¹⁶ Joo in taa loho, da cúu jaxi Pablo ñañehe dá tuhun ña sácú ini na cahní na Pablo sahá ña cān quēa xīnu da ñasahan da cáxi tuhun da nu Pablo vehe soldado cān. ¹⁷ Tá nandihí nandicani taa loho cān ña yóho nu Pablo já ñacana da in táhan da cúu soldado cān já ñacachi da já xihín dá:

—Cajún ñamañi candacún da loho yóho ná cuhun da nuú da cúu jefe nu soldado. Jáchi in tuhun cūni da yóho cahan da xihín da cān —ñacachi Pablo xihín dá.

¹⁸ Anda já ndāca soldado cān da cúu jaxi Pablo ñasahan da nuú da cúu jefe soldado cān já ñacachi da já xihín dá:

—Da naní Pablo ndācaān vehe soldado ñaxica da ñamañi nuú i ña ná candaca i da loho yóho quixi i ñehe e da jáchi in tuhun cūni da cahan da xihín ndo —ñacachi da.

¹⁹ Anda já natiin jefe soldado cān ndahá taa loho cān já natavá xóo da da já ñacasáhá ndāca tuhun ñahá da já ñacachi da já xihín dá:

—Ndía cūnun cahún xihín i —ñacachi da.

²⁰ Anda já ñacasáhá taa loho cān cáxi tuhun da já ñacachi da já:

—Najándique táhan na Israel tuhun na ña caca na ñamañi nu mé ndó ña ná cañehe tucu ndó Pablo nuú na sacuahā nuú na Israel cān ña cavií vaha chāga sahā dá. ²¹ Joo a cāndusa ndó caja ndó ña cūni na jáchi yáha chāga nuú ivi jico taa ndāti jehé na íchi ña cahní na Pablo. Ta nandique táhan tuhun na ña a cúxu na ni a cóho na ticuifí janda quiahva ná cahní na Pablo. Ta viti ndāti na candehé na á caja ndó ña cūni na —ñacachi jaxi Pablo cān xihín da cúu jefe soldado.

²² Ta tá nandihí já ñacachi da cúu jefe soldado cān xihín dá ña ná a ndicani da nuú ni in ñayivi sahá ña sácú ini na Israel caja na xihín Pablo. Chí ñaquee da loho cān cuahan da.

Chíndahá na Pablo cuahan da nuú gobernador naní Felix

²³ Anda já ñacana jefe soldado cān ivi da sáhdá chuun nuú soldado ta ñasahnda da chuun nu dá ña ná caja tiahva da ivi ciento soldado táhan da xica sahá xihín uní jico uxu soldado táhan da cāndójó cuáyí. Ta ñatahnda chuun nu dá ña ná caja tiahva da inga ivi ciento táhan da ñehe lanza já ná candaca na Pablo cuhun da ñuu Cesarea cān. Ta ná quee na cuhun na tátuhun caā in sacuaá. ²⁴ Ta ñasahnda da chuun ña ná caja tiahva na cuáyí canúu Pablo cuhun da. Ta ñasahnda da chuun ña ná candaa vaha na Pablo já ná cuu xīnu coo vaha da nuú da cúu gobernador naní Felix ñuu Cesarea cān. ²⁵ Ta ñachindahá da in carta cuahan xihín ná já ná ndiquiahva na ña nuú da cúu gobernador cān ta ña yóho cúu mé tuhun ñacahyi nu carta cān:

²⁶ “Yehe cúu Claudio Lisias ta chíndahá i carta yóho nu ndo, tá Felix. Ta nu carta yóho cáhan Ndióxi yehe xihín ndo, da cúu da cáhnu ñuu Cesarea cān. ²⁷ Candehé ndo, tá Felix. Chíndahá i da yóho nu ndo jáchi natiin na Israel da ta ndúcú na cahní na da. Joo tá ñacandaa ini i ña cúu dá da romano já ñasahan i xihín java soldado ta ñacandaa nde da ndáha na cān. ²⁸ Ta sahá ña cūni candaa ini i ndá cuachi jácojo na jata dá sahá ña cān quēa ñasañehe e da ñasahan i nuú na sacuahā nuú na Israel cān. ²⁹ Já ñacandaa ini i ña jácojo na cuachi jata dá sahā ley mé va na. Ta sahá ña coo cuachi ñacaja da nu mí sahá ña cān quēa

coó naxeen nde ña ná cahní na da ta ni janda vecaa co cáni nu dá cuhun da, cahní i. ³⁰ Joo nacandaa ini i ña sácú ini na Israel cahní na da sahá ña cán quea chindahá vaha i da nu mé ndó. Ta nacachi i xihín na xójo ini xihín dá ña ná saa na nu mé ndó cacu na saha dá ndía ndóho na xihín dá. Ña yóho cúu ndihi ña cahan i xihín ndo, tá Felix. Ndióxi ná coo xihín ndo”, cáchi carta cuahan xihín Pablo.

³¹ Ta nacaja mé soldado cán tá ín natahnda chuun nu dá. Ta já ñéhe ñuu na Pablo nasahan na janda ñuu Antípatris. ³² Ta inga quivi itaan já nandicó coo java soldado, da nasahan sahá cán chí vehe soldado. Joo java da cándójó cuáyi cán catáhan yii dá xihín Pablo cuahan da. ³³ Ta tá naxinu coo da ñuu Cesarea já nandiquiahva da carta cán nuú da cúu gobernador. Ta nandiquiahva ri da Pablo nuú da cán. ³⁴ Ta tá sa nandihí nacahvi da cúu gobernador carta cán já nacasáhá ndaca tuhún da Pablo saha ndá ñuu naquixi da. Ta tá nacandaa ini da ña cúu Pablo da ñuu Cilicia ³⁵ já nacachi da já xihín dá:

—Janda quiahva ná xinu coo na jácojo cuachi jatun anda já caja vii i sahn — nacachi Felix cán xihín Pablo.

Tá nandihí já nasahnda da chuun ña ná candaa vaha na Pablo nani ndacaan da vechuun Herodes cán.

24

Ndiquehe Pablo saha mé dá nuú da cúu gobernador naní Felix cán

¹ Ta tá sa nayaha uhun quivi já naxinu coo da cúu sacuaaha nuú jutu, da naní Ananías cán. Naxinu coo da ñuu Cesarea xihín java ga na sacuaaha ta ndaca da in da ndiquehe sahá na Israel naní da Tértulo. Tóco ndihi na yóho nacatáhan na nasahan na sácú na saha Pablo nuú gobernador cán. ² Ta tá nandihí já nasahan quehe na Pablo já naxinu da nuú ndihi na cán. Anda já nacasáhá Tértulo cán sácú da saha Pablo já nacachi da já:

—Ndiquiahva nde ndixahvi nu ndó, tá gobernador jáchi sahá ña ndichí jini ndó cúu ndáa vaha ndó ndehe. Ta coo tandóho tañu nde ta tóco ndihi nde ndúu táji nde.

³ Ñayivi ndúu ndijáá ñuu ín toni ñúhú na

xihín ndo ta ndiquiahva na ndixahvi nu ndo, tá Felix jáchi cája cuaha ndó ñamaní xihín nde. ⁴ Ta viti coo cúni nde jáquihvi nde ndohó joo caja ndó ñamaní cuni johó loho ndó ña cúni nde cahan nde xihín ndo yóho. ⁵ Candehé ndo, tá Felix. Nanditahan nde da naní Pablo yóho xíca nuu da jáquihvi da ñayivi. Ta ní cúu xíca nuu da sáhdá java táhan da ñayivi naquixi chichi Israel. Ta mé Pablo yóho cúu dá jini nuú in táhdá ñayivi, na naní nazarenos. ⁶ Ta jivi mé da yóho nanducú da jáyuxu da veñuhu cáhnu nde ndacaan ñuu Jerusalén cán. Sahá ña cán quea natiin nde da ta nanducú nde caja vii nde saha dá tá quiahva sáhdá ley mé nde caja nde. ⁷ Joo da cúu jefe soldado, da naní Lisias cán naquihvi da tañu nde ta xihín ña tóyí nacandaa da Pablo ndahá nde. ⁸ Ta nacachi da xihín nde ña ná quixi nde cahan cuachí nde nu mé ndó saha Pablo. Ta viti, tá Felix cuu ndaca tuhún ndó Pablo jan ta já nahma mé va da nu ndo. Ta xihín ña yóho cuu candaa ini ndó ña ndaa cahan nde sácú nde saha dá nu ndo —nacachi Tértulo cán xihín Felix.

⁹ Ta jári na Israel ndúu cán nacachi na ña jivi ndusa ña ndaa quea. ¹⁰ Anda já nandínehe gobernador cán ndaha dá ña ná cahan Pablo. Ta já cáchi Pablo já:

—Cáji ini i ndiquehe e saha i nu mé ndó, tá Felix jáchi sa cuahá cuia cája vii ndó sahá ñayivi Israel. ¹¹ Tá ná ndaca tuhún ndó ñayivi yóho já candaa ini ndó ña sa ín uxu ivi quivi naxinu coo i ñuu Jerusalén caja cáhnu i Ndióxi. ¹² Ta ni in tuhún toho ñayivi coo ndítuhún ihvi yehe xihín. Ta ni in tuhún toho ñayivi coo najándinihi i veñuhu cáhnu ndacaan Jerusalén cán. Ta ni na táca veñuhu válí ta ni na táca cáyé ñuu Jerusalén cán coo najándinihi i. ¹³ Ta na jácojo cuachi jatá i yóho a cúu caja na nahá na nu mé ndó ña ndaa cahan na sahá i. ¹⁴ Ña cúni ndusa i caxi tuhún i xihín ndihi ndó quea cája cáhnu i Ndióxi, mé a nacaja cáhnu tásáhnú jícó i tá quiahva najánaña Jesús caja í. Vatí cáchi na Israel yóho ña coo xíca i íchi ña ndaa. Joo cándusa i tóco ndihi ley nacahyí Moisés ta cándusa i ña nacahyí na profeta sanahá. ¹⁵ Ta tá quiahva cándusa na yóho quiahva já cándusa ri yehe va jáchi cándusa nde ña

vaxi quiví nditacu tóco ndihi na sa naxihí. Coó caja toho á cúu ná na vaha á na quini. ¹⁶ Sahá ña cán queá xini Ndióxi ña ndijáá ní quiví caja i ña vaha xihín ndinuhu ini i nu mé á xihín nuú ñayivi.

¹⁷ Sa ín chá cuia naxica nuu i java ga ñuu. Anda javí nandicó coo tucu u ñuu Jerusalén ña quiahva i jiuhún nuú na Israel ta joco i nu Ndióxi ña ndítahan nuú i joco i nu á. ¹⁸ Ta nani caja i mé ña yóho ndácaan i veñuhu cáhnu Jerusalén cán já java da Israel, da naquixi chí estado Asia cán naxini da yehe nu ndácaan i ve ñuhu cán. Ta tá nandihí nandaja vii i mí i tá quiahva sáhdá ley caja nde, coó ñayivi cuaha nasanduu cán ta ni in túhún toho na cán coó najándinihi i. ¹⁹ Ta na naquixi chí Asia cán, na cán va cúu na ndítahan cacu sahá i nu ndo, tá Felix tá ín a ndóho na xihín i. ²⁰ Joo na ndúu yóho coó saha toho na cacu na sahá i nu mé ndó. Á tá coó ná cahan na tá nandiñehe ná cuachi i tá nacaja vii na sahá i nuú na sacuahá nuú na Israel cán, dá já. ²¹ In túhún ña nacaja i tá caja vii na yóho sahá i queá nacayuhú u ta nacachi i: “Caja vii ndó sahá i sahá ña cándusa i ña vaxi quiví nditacu tucu ndii”, ña cán cúu ndihi va nacachi i xihín ná —nacachi Pablo cán xihín da cúu gobernador cán.

²² Sa xini vaha Felix cán ndaja ín ña jánaha na cúu cuéntá Jesús cán sahá ña cán queá cuni da candati tóo da caja vii da saha Pablo. Sahá ña cán queá já nacachi da já xihín na Israel cán:

—Candati ndó janda quiahva ná casaá da naní Lisias, da cúu jefe soldado ñuu Jerusalén já cuu caja vii i sahá da yóho —nacachi Felix.

²³ Tá nandihí já nasahnda Felix chuun nuú da sáhdá chuun nuú soldado cán ña ná chicaan tucu na Pablo vecaa. Ta nasahnda da chuun ña ná caja vaha da xihín Pablo ta ná quiahva da ñamaní nuú na xica xihín Pablo coto nihni na da ña ná caja ndívi na nu dá.

²⁴ Tá nayaha chá quiví já nacasaá tucu Felix cán xihín Drusila, ñájihí da, ñá cúu ña Israel. Nacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuéntá Jesús. ²⁵ Ta nandicani Pablo nu ná ña ndítahan nu ná

caja na ña ndaa cuití va ta ndítahan nu ná cahnu na nuú ña xica ini yiquí cuñu na caja. Ta nandicani Pablo nu ná ña vaxi quiví caja vii Ndióxi sahá cuachi ñayivi. Anda já nayihví Felix cán já nacachi da já xihín Pablo:

—Cuáhán viti. Tá núná nuú i já cana tucu u yohó quisún —nacachi Felix xihín Pablo.

²⁶ Mé Felix yóho ndáti da quiahva Pablo jiuhún nu dá já janí ñahá da. Sahá ña cán queá cuahá ndivaha tañu nacana da da ndituhún da xihín dá. ²⁷ Ta tixi ivi cuia já cuití nacaja da xihín Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó naxeen da janí da Pablo jáchi cuni da candoo vaha da nuú na Israel cán.

25

Ndiquehe Pablo saha mé dá nuú gobernador Festo

¹ Tá sa nayaha uní quiví nandicojo Festo chuun cúu dá gobernador já naquee da ñuu Cesarea cán nasahan da chí ñuu Jerusalén. ² Ta tá naxinu coo da cán nasahan na sacuahá nuú jutu xihín java ga na Israel, na ín chaga saha cahan cuachí na saha Pablo nu Festo. ³ Ta ñamaní cáhnu naxica na nu dá queá ña ná cahnda da chuun ná quixi Pablo chí ñuu Jerusalén yóho. Jáchi mé na cán nasacu ini na tiin na Pablo íchi cahni na da. ⁴ Joo coó nacandúsa Festo caja da ña cuni na sahá ña cán queá nacachi da xihín ná ña ndáá vaha na Pablo ñuu Cesarea cán. Ta sahá ña sácú ini da cuhun yachi da mé cán ⁵ sahá ña cán queá nacachi da xihín ná já:

—Ndá na cúu na sacuahá nu ndó jan xini ñuhú cuhun na ñuu Cesarea xihín i já ná cuu cacu na saha Pablo tá ín cuachi nacaja da —nacachi Festo xihín na Israel cán.

⁶ Ta nasahin Festo tátuhun uná á uxu quiví cuití va ñuu Jerusalén cán já nandicó coo tucu da chí ñuu Cesarea. Ta inga quiví itaan já nasacoo da nu silleta nu sácoco na caja vii sahá ñayivi. Anda já nasahnda da chuun ña ná cana na Pablo quixi da nu dá. ⁷ Ta tá naxinu coo Pablo nu Festo cán já tóco ndihi na Israel, na naquixi ñuu Jerusalén cán nacava nuu na jata Pablo já nacasahá jácojo cuaha ná cuachi ndeé jata dá. Joo

co ñéhe ná ndaja nahá na nu Festo cán ña cáhan na ña ndaa saha dá. ⁸ Ta ñacasáhá Pablo ndíquehe da saha mé dá já ñacachi da já:

—Ni in túhún toho cuachi coó ñacaja i xihín ley na Israel ta ni xihín veñuhu cáhnu coó ñacaja i cuachi. Ta ni nuú da cómi cuéntá sahá ñuu Roma coó ñacaja i cuachi —ñacachi Pablo xihín tóco ndihi ñayivi ndúu cán.

⁹ Ta sahá ña cúní Festo candoo vaha da nuú na Israel sahá ña cán queá nandaca tuhún da Pablo já ñacachi da já:

—Á cándúsún cuhún ñuu Jerusalén já ná caja vií i sahun cán —ñacachi da xihín Pablo.

¹⁰ Anda já nanducú ñehe Pablo tuhun nu dá já ñacachi da já:

—Uhun. Coó saha cúu á cuhun i ñuu Jerusalén jáchí viti ñuhú cándichi i nu mé ndó ta cúu ndó gobernador romano. Ta mé ndó ndítahan nuu caja vií sahá i jáchí sa cándaa cáxi ini ndó ña coó cuachi toho ñacaja i xihín na Israel jan. ¹¹ Joo tá ñacaja ndusa i cuachi, mé a ndaa co yíhvi toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jatá i sahá ña cán queá co ndítahan nu ndó ndiquiahva ndó yehe nuú na yóho. Ta viti xíca i ñamaní nu ndo ña ná chindahá ndó yehe ná cuhun i nuú emperador ñuu Roma ná caja vií mé dá sahá i —ñacachi Pablo xihín Festo cán.

¹² Tá nandihí já nanditúhún Festo cán xihín na sacuahá cája chúun nu dá cán ndaja ndítahan coo caja da. Anda já ñacachi tucu Festo cán já xihín Pablo:

—Vaha dá já. Nu emperador ín ñuu Roma ñacachún cuhun cúnun. Ta cán cuhun cavií sahun —ñacachi Festo xihín Pablo.

Tá ín Pablo nu rey Agripa

¹³ Tá nayaha chá quivi já naxinu coo in rey naní Agripa xihín ña naní Berenice ñuu Cesarea cán coto nihni na Festo. ¹⁴ Ta ñasanduu na chá quivi xihín Festo cán. Ta nani ndúu na cán nandicaní Festo nu rey Agripa ndaja cáa ña ndóho Pablo já ñacachi da já xihín dá:

—Ini vechúun yóho ndácaan in da naní Pablo ta anda tá ñasacuu Felix gobernador

já natiin na da. ¹⁵ Ta tá ñasahan i ñuu Jerusalén já sácú na sacuahá nuú jutú xihín na sacuahá nuú na Israel saha dá ña ná quivi da caja i. ¹⁶ Anda já nanducú ñehe e tuhun nu ná ña co sahan ley ñuu Roma ñamaní ña cahní na ñayivi tá coó na sácú saha dá ndíta nu táhyí da já ná cuu ndiquehe da saha dá nu ná. ¹⁷ Sahá ña cán queá tá nandai cuu na Israel cán ñuu Cesarea yóho já nandihí ini i já ñasahan i ñasacoo i inga quivi itaan nu sacoo na caja vií sahá ñayivi. Já ñasahnda i chuun ña ná cañehe na Pablo quixi da nuú i. ¹⁸ Tá naxinu coo na cán sácú na saha dá coó ñasacu na cuachi cáhnu saha dá tá quiahva cáhán i. ¹⁹ Joo cáchí na ña co cúní da cándusa da tá quiahva cándusa mé ná. Ta sácú na saha dá jáchí xíca da jánaha dá saha Jesús, mé a naxihí jihna. Joo jánaha Pablo ña tácu yíi va mé Jesús. ²⁰ Ta sahá ña co cándaa ini i ndaja caja i caja vií i sahá ña yóho sahá ña cán queá nandaca tuhún i Pablo ña á cándusa da cuhun da ñuu Jerusalén caja vií i saha dá. ²¹ Joo ñacachi da xihín i ña cúní da cavií saha dá nuú da cúu emperador naní Augusto, da ín ñuu Roma cán. Sahá ña cán queá ñasahnda i chuun ña ná cándaa vaha na da janda quiahva ná cuu chindahá i da nuú emperador já ná caja vií da cán saha dá —ñacachi Festo xihín rey Agripa cán.

²² Anda já ñacachi rey Agripa cán já xihín Festo:

—Cúní ri yehe va cuni johó i ndá quiahva cáhan da naní Pablo jan —cáchí Agripa.

Anda já ñacachi Festo já xihín dá:

—Itaan já cuni johún nuú cahan da —cáchí Festo.

²³ Ta inga quivi itaan naxinu coo rey Agripa xihín Berenice nu ín Festo cán. Ta ndíxi vaha ndivaha na nandihvi na xihín in yíco da cúu sacuahá nu soldado xihín nataa ín saha ñuu cán. Ta tá ñasanduu na já ñasahnda Festo chuun ña ná cuhun na quehe na Pablo. ²⁴ Ta tá ñasaa da nu ná já ñacachi Festo já:

—Mé ndó, rey Agripa xihín ndihi ndó, na nataca ndúu xihín nde yóho. Candehé ndó da naní Pablo cándichi yóho. Cuahá ndivaha táhan na Israel, na ndúu ñuu Jerusalén xihín na ndúu ñuu Cesarea yóho sácú na saha dá nuú i. Ta a juú quiahva

ndúcu ndéé na cáhan na ña ndítahan quivi da caja i. ²⁵ Joo yehe cáhan i ña co ndítahan toho nu dá quivi da jáchi coo cuachi cáhnu ná caja da. Ta sahá ña naxica mé dá cavií saha dá nuú emperador Augusto iin ñuu Roma cán sahá ña cán quéa sácú ini i chindahá i da cuhun da cán cavií saha dá. ²⁶ Joo co xini ndía cahyí i nuú da cúu emperador ñuu Roma sahá cuachi sácú na saha dá. Sahá ña cán quéa nasani ndichi i da nuú ndihi ndó xihín nu mé ndó rey Agripa já ná ndaja ndichi ndó da já ná ñehe íni i ndaa cahyí i nu carta chindahá i nu emperador ñuu Roma cán. ²⁷ Jáchi coo saha cúu á chindahá i da ñuu Roma tá a cuú cahyí i ndá cuachi jácojo na jata dá —nacachi Festo xihín na cán.

26

Ndiquehe Pablo saha mé dá nu rey Agripa

¹ Anda já nacachi rey Agripa cán já xihín Pablo:

—Viti va sahan nde ñamaní nuun ndiquehún sahun.

Anda já nandínehe Pablo ndáha da já nacasáha cáchi da já:

² —Cájji íni i ña cuu ndiquehe e saha mí i nu ndó, rey Agripa jáchi a juú quiahva cuahá cuachi jíquí jácojo na Israel jata i.

³ Cájji íni i cáhan i nu mé ndó, rey Agripa jáchi cándaa vaha ini ndó ndaja iin costumbre na Israel. Ta cándaa ini ndó ndá ñaha quéa ndítuhún táhan nde saha. Sahá ña cán quéa xíca tahví i nu ndó ña ná caja ndó ñamaní cáhnu coo ini ndó cuni johó ndó ña cáhan i xihín ndo yóho.

⁴ Tóco ndihi na Israel xini vaha na ña nacaja i tá nasacuu u da tacú. Ta anda viti xini na yehe ta xini na ña nacaja i ñuu i xihín ñuu Jerusalén. ⁵ Ta xini vaha na ña janda yuta i nasacuu u ta fariseo ta chí cuu ndicani na nu mé ndó tá cuni na. Ta ndehe, na fariseo cúu nde na cája ley Moisés xihín ndinuhu chága ini nde a juú ga inga na.

⁶ Ta sahá ña cándéé cáhnu ini i ña vaxi quivi jánditacu tucu Ndióxi tóco ndihi na naxihí sahá ña cán quéa na Israel yóho ñehe na yehe nacasa na caja vií na sahá i nu mé ndó. Ta mé Ndióxi quéa nasahan tuhun a nu tásáhnu jíco nde ña nditacu tucu ndii.

⁷ Tóco ndihi ñayivi táhan na naquixi chichi

ndihuxu ivi jahyi Israel cán ndáti na cuni na nuú jáxinu coo Ndióxi nuú tuhun a. Sahá ña cán quéa ñuu ta ndiví cája cáhnu na Ndióxi. Candehé ndo, rey Agripa. Sahá ña cándúsa i tá quiahva cándúsa na cán sahá ña cán quéa jácojo na Israel cuachi jata i viti —nacachi Pablo xihín rey Agripa.

⁸ Anda já nacahan Pablo xihín na Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii —nacachi Pablo xihín na Israel ndúu cán.

⁹ Anda já nacachi tucu Pablo xihín rey Agripa já:

—Yehe nacahan i jihna ña ndítahan caja xíxi i xihín na cúu cuénta Jesús, mé a naquixi ñuu Nazaret. ¹⁰ Sahá ña cán quéa já nacaja i ñuu Jerusalén jihna. Ta nasahan i naxica i ñamaní nuú na sacuaaha nuú jutu já ná quiahva na ñamaní nuú i caja i ña yóho. Ta tá nañehé e ñamaní já nataán cuahá i na cúu cuénta Jesús vecaa. Ta tá nasahní ñahá na, cájji ini i sahá ña cája na já xihín ná. ¹¹ Ta cuahá tañu nacaja xíxi i xihín ná ña ná cáhan ihvi na saha Jesús, mé a cándéé ini na. Níí cúu veñuhu naxica nuu i cája i já xihín ná. Ta janda ñuu tóho nasahan i nandicuita ñee e na jáchi nasaxojo ndivaha ini i xihín ná.

Ndicani Pablo ndaja nandihvi da íchi cuénta Jesús

(Hch. 9:1-19; 22:6-16)

¹² In tañu nañehé e ñamaní nuú na cúu sacuaaha nuú jutu ñuu Jerusalén ña ná cuhun i ñuu Damasco taán i na cúu cuénta Jesús vecaa. Sahá ña cán quéa naquee e cuahan i. ¹³ Candehé ndó, rey Agripa. Nani xíca i cuahan i íchi cán cúu á tátuhun caxivi já naxini i nandiyihvi ndaa in ñuhu indiví ta yehe chága ña a juú ga candii. Ta nacava nuu a jata i xihín jata da casahan xihín i cán.

¹⁴ Anda já nacuyu ndihi nde nu ñuhu ta já naxini johó nde in a cáhan tuhun hebreo já nacachi a já xihín i: “Saulo, Saulo ndá cuénta quéa ndicuitún cája xísún xihín i. Candehé. Cája xísún xihín mé vún. Ña cájun xihín i cúu á tátuhun ña cája tindiquí tá sání ndaa rí nu póyá”, nacachi a cán xihín i. ¹⁵ Anda já nacasáha ndaca tuhún i já cáchi i já: “Yo cúu mé ndó cáhan xihín i.”

Anda já nanducú ñehe a cán tuhun nuú i já nacachi a já: “Yehe cúu Jesús, mé a xíca nuún cája xísun xihin. ¹⁶ Ta viti cuáhán ndacoo, candichi. Nanaha i mí i nuun já ná caja chúun cuéntá mí i viti já ná ndicanún nuú ñayivi ndaja cáa ña naxinún viti ta já ná ndicanún nu ná java ga ñaha jánaha i nuun chága chí nuu. ¹⁷ Mí i jáca cu u yohó já ná a cáhni na Israel yohó ni na tóho a cáhni na yohó jáchi nu mé na tóho cán chindahá i yohó cuhún cahún sahá i viti. ¹⁸ Ta jánahún nu ná ndaja caja na jándicoo na íchi naá ndivaha nu xíca na viti. Jáchi ndítahan nu ná ndicaca na íchi mí i nu yehe ndivaha. Ta jánahún nu ná ña ná a ndíquiahva ga na mé ná ndahá tiñahá sacuahá. Ña ndítahan caja na quéa ndíquiahva na mé ná ndáha Ndióxi ta ná caja na ña cúni mé á. Ta ndítahan candeé ini na yehe já ná caja cáhnu ini i sahá cuachi na. Ta já ná cuu in nduu na xihín na nacaxi i ñehe táhvi ña cúni Ndióxi quiahva nu na”, nacachi Jesús xihín i tá nasahan i íchi ñuu Damasco.

Ndicani Pablo sahá chuun cája da

¹⁹ Candehe ndó, rey Agripa. Coó nacaja sáa ini i. Jáchi nacaja i tá ín nasahnda Jesús nuú i caja i. ²⁰ Sahá ña cán quéa ivi laá nacasahá cahán i tuhun vaha saha Jesús nuú ñayivi ñuu Damasco cán. Tá nandihí já naquee e nasahan i cahán i ña xihín na ndúu ñuu Jerusalén xihín na ndúu ndijáa ñuu estado Judea. Ta janda xihín na coó naquixi chichi Israel nacahan i saha Jesús. Ta nacachi i xihín ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná naha ña mé a ndaa táhyí nandiquehe na íchi cuéntá Jesús. ²¹ Ta sahá ña yóho cuití natiin na Israel yehe nani ndacaan i veñuhu cáhnu ñuu Jerusalén ta viti ndúcú na cahní na yehe. ²² Joo Ndióxi nachindeé a yehe sahá ña cán quéa coó najándihí na sahá i. Ta anda viti xíca nuu i cahán i tuhun Ndióxi nuú ñayivi ta coó caja toho a á cúu ná na ndahví á cúu ná na ín cuahá saha. Ta tóco ndihí ña jánaha i nu ná coo cúu á ña quixi jiní mí i jáchi cúu á ña nacachi na profeta xihín ña nacachi Moisés coo. ²³ Ta ña nacachi na cán quéa vaxi quiví quixi Jesucristo ñuyiví yóho ta a juú

quiahva jándoho na ini a. Ta cahní na ña ta tá nandihí jánditacu tucu a. Ta mé á cacuu ña nu cuití nditacu nuú tóco ndihí na sa naxihí. Ta mé á jánaha nuú ñayivi ndaja cuu cacu ndaa ínima ná coo caja toho a á cúu ná na Israel á cúu ná na tóho —nacachi Pablo xihín rey Agripa cán.

Cúni Pablo ná ndihvi Agripa íchi cuéntá Jesús

²⁴ Tá nacatáji loho Pablo nu cahán da já nacayuhú cóho Festo nu dá já cáchi da já:

—Nacatachi vún, Pablo. Nayaha ndivaha quiahva najacuahún sahá ña cán quéa nacatachun —nacachi Festo cán xihín Pablo.

²⁵ Anda já nacachi Pablo já xihín dá:

—Coó nacatachi toho i, tá Festo jáchi ndinuhu ña ndaa cahán i xihín ndo. ²⁶ Ta xíní vaha mé rey Agripa yóho ña cahán i ña ndaa. Ta coo yíhvi cahán i nu dá jáchi cándaa ini i ña xíní vaha mé dá ndá saha cahán i jáchi coo cúu á ñaha nayaha nuú jehé. ²⁷ Ta viti cachi ndó xihín i, rey Agripa á cándusa ndó ña nacahan na profeta sanahá. Cája i cuéntá cándusa ndó ña nacachi na —nacachi Pablo.

²⁸ Anda já nanducú ñehe rey Agripa cán tuhun já nacachi da xihín Pablo:

—Ja lóho cuití ta cavún jiní i ña ná nduu u cuéntá Jesús, nduu —nacachi rey Agripa.

²⁹ Anda já nacachi Pablo já xihín dá:

—Á yachi á cuee coo caja toho a. Ña xíca tahví i nu Ndióxi quéa ná xinú coo mé ndó, rey Agripa xihín tóco ndihí na ndúu yóho cacuu ndó tátuhun mí i jáchi candeé cáhnu ini i Jesús vatí mé a ndaa coo cúni ña ná candico ndáha ndo tátuhun yehe —nacachi Pablo xihín dá.

³⁰ Tá nandihí nacahan Pablo já nandaca ndichi rey Agripa cán xihín Berenice ta nandaca ndichi Festo xihín java ga na nasanduu coo xihín dá cán. ³¹ Já natavá táhan na ndítuhún na saha Pablo já cáchi xihín táhan na já:

—Co ndítahan toho nuú da yóho quivi da jáchi coo cuachi ndeé ná caja da ta janda ni vecaa co ndítahan ndacaan da —cáchi na.

³² Anda já nacachi rey Agripa cán já xihín Festo:

—Tá ná a cáhan da yóho ña cúní da cavií saha dá nuú da cúú emperador ñuu Roma ta cuu janí vún da, nduu —nacachi Agripa cán xihín Festo.

27

Chindahá na Pablo ñuu Roma

¹ Tá nasacu ini na chindahá na Pablo ná cuhun da chí nación Italia nu ndácaan ñuu Roma cavií saha dá já nandiquiahva na da xihín java ga da ndácaan vecaa cán nuú da naní Julio, da sáhdá chuun nu soldado cuéntá Roma. Mé Julio yóho cúú dá da cómí cuéntá sahá in táhdá soldado naní Augusto. Ta tañu na cuhun xihín Pablo cán cuahan ri yehe, da naní Lucas. ² Ta tañu nde cán cuahan ri da naní Aristarco, da ñuu Tesalónica, ña ndácaan estado Macedonia. Nandaa nde ini barco, dó naquixi chí Adramitio. Mé barco yóho cúú dó cuhun ndijáá ñuu válí ñúhu estado Asia cán. Cándójó nde barco cán cuahan nde. ³ Ta inga quiví itaan naxinu coo nde ñuu Sidón. Ta cán nacaja vaha da naní Julio cán xihín Pablo jáchi nasahan da ñamaní nu Pablo ña ná coto nihni da na xini táhan xihín dá ndúu ñuu Sidón cán já ná caja ndíví na nu dá. ⁴ Ta inga quiví itaan já nandihvi tucu nde barco já naquee nde ñuu Sidón cán. Ta sahá ña vaxi tachí xoo nuú cuhun barco cán sahá ña cán quea nayaha nde xoo íti isla Chipre jáchi coo xicó cuahá tachí cán. ⁵ Naxojo cava nde anda inga xoo tañuhú ta já nayaha nde in xoo estado Cilicia xihín estado Panfilia. Anda já naxinu coo nde ñuu Mira ndácaan estado Licia.

⁶ Mé ñuu Mira cán nandiñehé da sáhdá chuun nu soldado cán in barco, dó naquixi chí Alejandría ta cuhun do chí Italia. Ta najándaa da ndehe jata dó cán já naquee tucu nde cuahan nde. ⁷ Cuéé vaha va cuahan nde ta nandoho chá ini nde cuahan nde sahá ña cán quea cuahá quiví nacaja nde janda quiahva naxinu coo nde ñuu Gnido. Ta sahá ña xicó ndivaha tachí xoo nuú cuhun nde cán sahá ña cán quea nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. ⁸ Cuéé ndivaha cuahan nde já yaha nde yati yuhú tañuhú isla Creta cán. Anda jáví naxinu coo nde nuú

coo vaha barco naní Puerto Vaha yati ñuu Lasea.

⁹ Sa nayaha cuahá quiví ta nacacuáchi nde. Ta iyo ndivaha cáa cuhun nde xihín barco jáchi nacayati tiempo vixi. Sahá ña cán quea nacahan Pablo xihín ndihi na cán já cáhí da já xihín ná:

¹⁰ —Candehé ndo. Cája i cuéntá iyo ndivaha cáa coho xihín barco jáchi cuu ndihi saha barco xihín ña ndójo dó cuahan do. Ta janda mí cuu quiví —nacachi Pablo xihín ná.

¹¹ Joo coo naxeen da sáhdá chuun nuú soldado cán cuni johó da nu cáhan Pablo. Nacandúsa chága da nuú nacahan da ñehe barco xihín da xíñaha barco a juú ga nuú nacahan Pablo. ¹² Ña nacachi na quea a cúú candoo na yóho tiempo vixi jáchi xicó ndivaha tachí. Ta tóco ndihi na nacachi na ña vaha chága ná cuhun nde. Tiahva náá jana quee vaha nde xinu coo nde janda ñuu Fenice cáhan na. Mé ñuu Fenice cán ndácaan isla Creta ta coo xicó ndeé nahá tachí cán. Sahá ña cán quea nasacu ini na canduu na cán tiempo vixi.

Tá naxicó ndivaha tachí nuú tañuhú

¹³ Tá nandihí já nacasáhá vitá uun xicó tachí sahá ña cán quea nacahan na ña cuu va quee nde cuhun nde. Anda já naquee nde cuahan nde yati yuhu isla Creta cán xica nde cuahan nde. ¹⁴ Joo tá nandihí já naxinu tachí ndeé jata barco. Mé tachí ndeé cán vaxi a chí xoo norte xihín chí nu cána candii. ¹⁵ Ta nacasáhá ñúhu mé tachí ndeé cán barco cuahan do. Ta sahá ña coo nacuu caja nde jándicaca nde barco cán xoo nuú vaxi tachí sahá ña cán quea nasahan nde ñamaní ña ná cañehe a barco cuhun do tá quiahva cúní tachí. ¹⁶ Tá nandihí já nayaha nde jata in isla loho naní Clauda. Ta mé cán coo naxicó nahá tachí ndeé. Anda já nacasáhá nde jándaa nde lancha loho, dó jítá barco cáhnu cán. Joo nandoho chá ini nde já nacuu najándaa nde do jata barco cáhnu cán. ¹⁷ Tá nandihí já nacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sándaca barco cán ña ná cañehe mé tachí do. Nacaja na ña yóho jáchi yíhví na xinu coo barco xoo naní Sirte nu yájí tañuhú ta cán cuu cachihin dó ñutí. ¹⁸ Ta

chí coó nasacuijn tachj ndeé nahá cán inga quiví itaan sahá ña cán quéa nacasáhá na jácana nihni na ñaha ndójo barco cán ini tañuhú já ná ndicama dó. ¹⁹ Ta tá naxinu quiví unj janda mé nde viti nacasáhá nde jácana nde ña sácaja chúun barco cán ini tañuhú já ná ndicama chága do. ²⁰ Ta tixi cuahá ndivaha quiví coó naxini nde nuú candii ta ni quimi co tívi. Ta javi nacuun quini ndivaha dó ta a juú quiahva naxicó ndivaha tachj. Sahá ña cán quéa chí nasahnda vaha ini nde: “Yóho quiví viti”, nacañán nde.

²¹ Cuahá ndivaha quiví nayaha ta ni in nde co cúnj cuxu. Sahá ña cán nandaça ndichí Pablo tañu tóco ndihi na cán já nacasáhá cáchj da já:

—Tá ná coo johó ndó tá nacañan i xihjn ndo ta ná candoo í ñuu Creta, nduu. Ta ni a ndóho í ña ndóho í yóho viti ta ni a tiví toho ndihi ñaha nasandojo barco yóho, nduu. Joo coó naxeen ndó candúsa ndó ña nacañan i xihjn ndo. ²² Joo cáchj i xihjn ndó viti ña co ndítahan ndicani ini ndó. Jáchj ni in túhún toho ndó a quiví vatí mé barco ndihi saha do. ²³ Jáchj yehe cúu u cuéntá Ndióxi ta cája cáhnu i mé á. Ta mé ñuu janda véhe nanaha in tátó Ndióxi mé á nuú i. ²⁴ Ta já nacañi a já xihjn i: “A cáyihví tohún, Pablo. Jáchj ndítahan xinun tá xinun nuú da cúu emperador ñuu Roma cán. Ta saha yóhó jácacu ri Ndióxi tóco ndihi na ñuhu xuhun ini barco jan já ná a quiví na ini tañuhú”, já nacañi tátó Ndióxi xihjn i. ²⁵ Sahá ña cán quéa a ndicani ga ini ndó jáchj cándéé cáhnu ini i Ndióxi ta cándaá cáxí ini i ña coo tá ín nacañi tátó Ndióxi xihjn i. ²⁶ Joo in tachj ndeé caha ña ná tiví barco yóho yati in isla —nacañi Pablo xihjn na cán.

²⁷ Sa naxinu sañun quiví xíca nde ini barco cán cuahán nde. Ta in ñuu naxinu coo nde in xoo tañuhú naní Adria. Joo tá xoo johó tá xoo cáa ñéhe tachj nde cuahán nde. Joo tátuhun java ñuu já naxini da ñéhe barco cán ña cáyati nde yuhú tañuhú cuahán nde. ²⁸ Anda já nacasáhá chíquiahvá na ndá quiahva cúná tañuhú yati yuhu nu nduu nde cán. Ta quiahva cúná do nasacuu oco sañun in metro. Tá nacasáhá cáyati chága barco yuhu cán já

nachiquiahva tucu na. Ta cán sa yáji chága ta cúu á oco usa metro quiahva cúná a. ²⁹ Ta sahá ña yíhví na xinu coo barco caní ndaa dó tóto ñuhu yati cán sahá ña cán quéa natiin na rieta ña ndíco comí caa gáncho cáhnu nu cán. Ta najácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhví na ndáti na ná tiví. ³⁰ Joo ndaja coo java da cája chúun xihjn barco cán nacañán da quee jehé da xihjn lancha loho cán cuhun da. Sahá ña cán quéa nacasáhá da ndáxi da lancha loho cán ña jánuu da do nuú tañuhú ta já cuhun da, cáhán da. Ta nacasáhá cája da tátuhun táan chága da caa gáncho cán ini tañuhú já ná tiin a barco xoo chí nuu do. ³¹ Joo naxini Pablo ña cája da sahá ña cán quéa nacañi tuhun da nuú da sáhdá chuun nuú soldado ta xihjn nuú soldado cán já cáchj da já xihjn ná:

—Tá ná quee da jan cuhun da já quéa ndihi saha ndó ini tañuhú —nacañi Pablo.

³² Anda já nasahán soldado cán nasahnda da rieta ndíco lancha loho cán já najándicava da dó ini tañuhú.

³³ Ta tá sa yati tiví yaa já najacañan Pablo tóco ndihi na cán ña ná cuxu na vatí loho. Já nacañi da já xihjn ná:

—Sa nayaha sañun quiví co xíxi ndó ta ni co quíj j ndo. ³⁴ Sahá ña cán xíca i ñamaní nu ndó ña ná cuxu ndó vatí chá va. Xíní ñuhú cuxu ndó já ná coo ndéé ndo chindeé ndó mé ndó já ná cacu ndó. Jáchj cacu ndihí. Ta ni janda in túhún ijí jiní yo a ndíhi saha — nacañi Pablo xihjn ná.

³⁵ Tá nandihí nacañi Pablo ña yóho xihjn ná já natiin da in pan ta nu táhyí ndihi na cán nandiquiahva da ndixahvi nu Ndióxi. Tá nandihí já nasahnda java da ña ta nacasáhá da xíxi da. ³⁶ Xihjn ña yóho nandindeé ri ini na java cán ta nacasáhá na xíxi na. ³⁷ Ta tóco ndihi nde, na nasañuhu ini barco cán nasacuu nde iví ciento unj jícó sañun in ñayívi. ³⁸ Tá nandihí naxixi nde ña cúnj nde já nasata na trigo ini tañuhú já ná ndicama chága jata barco cán.

Cácoo barco caha tañuhú

³⁹ Joo tá natívi yaa já naxini na ñundáhyi. Joo coó nacu ndicuni da cája chúun xihjn

barco cán ndá ñuu cúú á. Ta tá nandihí já naxini na ña ín ñutí nu yájí yuhú tañuhú cán. Anda já nacañan na jácayati na barco yati yúhu cán. ⁴⁰ Sahá ña cán quea nasahnda na rieta ndíco barco cán já najani dó. Ta nacandoo caa ganchó ini tañuhú nacaja na. Ta tá nandihí já najánditayi na yító nuú jahnda ta xihín yító cán nacasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín tachí. Ta xihín ña yóho nacasáhá barco cán cáyati dó yuhú tañuhú. ⁴¹ Ta in cuití naxinu barco cán nu ndíque táhan ivi táhnda tañuhú. Ta sahá ña nacayají tañuhú nuú ñutí cán sahá ña cán quea nacatjin nuu barco cán. Ta ni loho ga coo nacuu cuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán quea nacasáhá cháchí dó. ⁴² Anda já nanducú soldado cahni ndihí da na cuahan vecaa ñuu Roma cán. Jáchi tiañva náá jítá na cuhun na nuú tañuhú ta cunu na cuhun na tá sa naqueta na yuhú tañuhú, cáhán na. ⁴³ Joo da sáhnda chuun nuú soldado cán coo nasahan da ñamaní ña ná caja na já jáchi cúni da jácacu da Pablo. Ña nacaja da quea nasahnda da chuun nuú na tiañva jítá ticuúí ña ná jácana na mé ná ini tañuhú cán já ná xinu na nu ñúhu. ⁴⁴ Ta na java, na co tiañva jítá ticuúí cán nacachi da xihín ná ña ná ndaa na jata yító á jata túhun barco cán já ná xinu na nu ñúhu. Anda javí naxinu coo vaha tóco ndihí nde nu ñúhu.

28

Ín Pablo isla Malta

¹ Tá sa naxinu coo vaha ndihí nde yuhú ñundáhyi cán já nacandañ ini nde ña naní a isla Malta. ² Ta vaha ndivaha nacaja ñayivi ndúu isla cán xihín nde. Nandicahmi na ñúhu jáchi nacasáhá cúun ga javí ta a juú quiahva vixi xíní nde. Chí nacañan na xihín nde ña ná cativi nde catúní nde. ³ Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naqueta in coo tañu títo cán xínu rí sahá ña ihní ñúhu. Ta natiin rí ndáha Pablo. ⁴ Ta tá naxini na isla Malta cán ña ndícaa coo

ndáha Pablo já nacasáhá cáchi xihín táhan na já:

—Ndá da sáhní ndii cúú da yóho jáchi vatí coo naxihí da ini tañuhú joo yóho cúni Ndióxi jándihí a saha dá —nacachi na.

⁵ Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da. ⁶ Tóco ndihí na cán ndátí na cuni na ña ná quihvi cuiñu ndáha dá á tá coo ta in cuití ndicava da quivi da, nacañan na. Ndátí na java cán cuni na ndaa ndoho Pablo joo tá sa nacañahá ndátí na coo ñaha ná ndoho toho Pablo cán. Anda já nandijama jiní ná ta nacasáhá na cáhan na ña cúú dá in ndióxi.

⁷ Yati nuú naxinu nde cán nasacuu a ñundáhyi da naní Publio, da cómi cuénta saha isla cán. Ta tixi uní quivi nandiquehe vaha ndivaha da ndehe ta vaha nacaja da xihín nde. ⁸ Ta ndaja coo quihvi tátá Publio cándúhu dá ndóho da cuehe nji ta chicaan cáhni ñahá. Ta já nasahan Pablo naxito nihni da da ta nacasáhá Pablo xica tahví da nu Ndióxi saha dá ta nacinúu Pablo ndáha dá jiní dá ta já ndivaha da. ⁹ Tá naxini java ga na quihvi ndúu isla cán ña nacaja Pablo já naquixi na nu dá ña ná ndaja vaha da na chí ndivaha na. ¹⁰ Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quivi ndaa nde barco cuhun nde já nasahan na ña xíní ñúhu nde cuhun nde.

Xínu coo Pablo ñuu Roma

¹¹ Nasanduu nde tátuhun uní yoo isla cán janda quiahva nandaa nde in barco, dó nasandati yaha tiempo vixi mé isla Malta cán. Mé barco cán naquixi dó chí Alejandro. Ta nuu do cándaa ivi tiniñu yúu ndióxi cája cáhnu na cán. In a naní a Cástor ta inga a naní Pólux. ¹² Naquee nde cuahan nde já naxinu nde in ñuu naní Siracusa ta cán nasanduu nde uní quivi. ¹³ Ta naquee nde cuahan nde yati yúhu tañuhú janda quiahva naxinu coo nde ñuu Regio. Joo inga quivi itaan já nacasáhá víi uun xíco tachí chí sur sahá ña cán quea tá sa nayaha ivi quivi já naxinu nde ñuu Puteoli. ¹⁴ Ta cán nanditahan nde java na cúú cuénta Jesús. Ta nacañan na xihín nde ña ná canduu nde in semana xihín ná ta já nacaja

nde. Ta tá nandihí já naquee nde cuahan sáhá nde chí ñuu Roma. ¹⁵ Ta ná cúú cuéntá Jesús ndúú ñuu Roma cán sá ñañehe ná tuhun ña xinu coo nde cán. Sáhá ña cán quéa naqueta na vaxi na ñehe ná ndehe. Java na naquixi janda ñuu nu sáhin yahvi cáhnu naní a Apio ta java na naquixi janda ñuu naní Uní Taberna. Tá naxini Pablo ná cán já nacasáhá ndiquiahva da ndixahvi nu Ndióxi ta nandindacú ini da. ¹⁶ Ta tá naxinu coo nde ñuu Roma já ndiquiahva da sáhdá chuun nuú soldado cán tóco ndihí da cuahan veca cán nuú in da cómi chuun saha mé veca ñuu Roma cán. Joo nasahan na ñamaní nu Pablo coo jín da vatí nasacu na in soldado ndáá ñahá.

Cáhan Pablo tuhun Ndióxi xihín na ñuu Roma

¹⁷ Tá sá naxinu uní quiví naxinu coo nde ñuu Roma cán já nacana Pablo tóco ndihí na sacuahá nuú na Israel ndúú ñuu Roma cán. Ta tá sá nataca ndihí na ndúú na já nacachi da já xihín ná:

—Candehé ndó, ñani i. Ni in túhún toho ñaha núú coo nacaja yehe xihín na Israel mé ñuu Jerusalén cán ta ni xihín costumbre nacaja tásáhnu jícó yo. Joo natiin na Israel yehe ta ndiquiahva na yehe nuú na cúú cuéntá gobierno ñuu Roma yóho. ¹⁸ Ta tá nandihí nandaja ndichí na yehe já nasacu ini na janí na yehe jáchi coo ñañehe ná cuachi i sáhá ña cuu cahní na yehe. ¹⁹ Joo ndaja coo na Israel coo naxeen na ña ná janí na cán yehe. Sáhá ña cán quéa naxica i ñamaní ña ná cavií sáhá i nu emperador ñuu Roma yóho. Joo yehe coo cuni toho i jácojo i cuachi jatá na Israel jáchi cúú ná na naquixi chichi nuú naquixi mí i. ²⁰ Sáhá ña cán quéa nacana i ndohó viti jáchi cuni cuni i ndohó já ná nditúhún i xihín ndo. Cuni ndicani i nu ndo ña ndico ndáha i xihín cadena yóho sáhá mé a nachindahá Ndióxi jácacu a ndihí yó, na Israel —nacachi Pablo xihín na Israel cán.

²¹ Anda já nanducú ñehe na cán tuhun nu Pablo já cáchi na já xihín dá:

—A ñaha quixi carta estado Judea nuú nde ña cáhan sáhá ña cájún. Ta ni na cúú táhan na Israel tá nandai cuu na ñuu yóho coo toho tuhun núú ñehe na ná casaa na nuú nde saha yóhó. ²² Joo cuni nde ña ná

ndicanún nuú nde ndia cándúsún jáchi níí cúú ñuyiví cáhan núú ñayivi sáhá na cúú cuéntá Jesús —nacachi na Israel cán xihín Pablo.

²³ Tá nandihí nasacu na in quiví cáhan Pablo xihín ná ta tá naxinu coo mé quiví cán nataca cuahá ndivaha ñayivi mé vehe nu íin Pablo cán. Ta naha ta janda sahini najánaha da nu ná ña cuni Ndióxi cacomí a cuéntá sáhá ñayivi. Ta xihín ña nacahyí Moisés sanahá ta xihín ña nacahyí na profeta já nandicani da nu ná saha Jesús ña ná candee ini na mé á. ²⁴ Java na cán nacandúsa na ña nacachi Pablo xihín ná joo java na coo naxeen na candúsa na. ²⁵ Ta sáhá ña coo nacuu ndique táhan vaha tuhun na Israel cán sáhá ña jánaha Pablo sáhá ña cán quéa nacasáhá na quéa na cuahan na. Tá naxini Pablo ña yóho já nacasáhá cáchi da já xihín ná:

—Mé a ndaa nacahan ínima yii Ndióxi nuú tásáhnu jícó yo tá nacahyí Isaías já:

²⁶ Cuáhán cáhan xihín ñayivi Israel jan já cachún já xihín ná:

Mé a ndaa táhyí cuni johó ndó joo a cánda iní ndó.

Ta vatí sandehé ndó in ñaha joo coo ndícuni ndó ña.

²⁷ Jáchi ihvi ndivaha cúú ini ndó ta coo cuni ndó caja ndó ña cáchi i.

Ta coo cuni ndó cuni johó ndó ña cáhan i xihín ndo.

Ta coo cuni ndó ndicuni ndó ña cája ndó cuachi.

Jáchi tá ná jándacoo ndó cuachi cája ndó, já quéa cuu caja cáhnu ini i saha ndo, ta já cuu coo vaha ini ndó, já nacachi ínima yii Ndióxi xihín tásáhnu jícó yo.

²⁸ Anda já nacachi tucu Pablo já xihín ná:

—Ta viti xini ñuhú canda iní ndó, na Israel ña sá naxini johó na coo naquixi chichi Israel tuhun vaha saha Jesús. Ta cája i cuéntá candúsa mé na cán ña —nacachi Pablo xihín ná.

²⁹ Tá nandihí nacahan Pablo ña yóho já nanditúhún cuehe xihín táhan na Israel cán ta já naquee na cuahan na.

³⁰ Nacandoo Pablo ivi níí cuia vehe nuú nachahvi ndojo da. Ta ndiquehe vaha da tóco ndihí na sahan xito nihni ñahá. ³¹ Ta ni coo yihví da cáxi tuhun da xihín ñayivi ña

cúni Ndióxi cacomí a cuéntá saha ná. Ta najānaha da tuhun vaha saha Jesucristo, xitoho íta ni in na cóo nasaji nuu nū dá caja da ña.

Carta nachindahá Pablo nuú na cúu cuéntá Jesús ndúu ñuu Roma

Cáhan Ndióxi Pablo xihín na cúu cuéntá Jesús

¹ Yehe cúu Pablo ta Jesucristo cúu xitoho i. Nacaxi Ndióxi yehe cacuu u in apóstol cuéntá mé á ta nachindahá a yehe cūhun i cahan i tuhun vaha saha Jesús nuú ñayivi.

² Sannah ndivaha nacaja Ndióxi ña ná cahyí na profeta mé á tuhun vaha sahá ini libro yíi Ndióxi. ³ Mé tuhun vaha yóho cáhan saha Jesucristo, xitoho í, mé a cúu in túhún jini já jahyi Ndióxi. Ta nanduu a in ñayivi nacacu ñuyívi yóho ta naquixi a chichi rey David. ⁴ Ta najánaha ínima yíi Ndióxi ñayivi ña cúu Jesús in túhún jini já jahyi Ndióxi, mé a cúu cája tóco ndihi ñaha. Jáchi tá sa naxihí Jesús já nanditacu tucu a ta xihín ña yóho náha ña cúu á in túhún jini já jahyi Ndióxi. ⁵ Ta sahá ña nacaja Jesucristo ndica crúxu sahá ña yóho nacaja Ndióxi ñamaní xihín ndihí. Já nachindahá Ndióxi mí ña ná cūhun í cuéntá mé á cahan í saha Jesús nu tóco ndihi ñayivi ndúu ñuyívi já ná cuu candeé ini na mé á ta já ná caja na ña cúni a. ⁶ Ta mé ndó, na cúu cuéntá Jesús ndúu ñuu Roma jan, nacaxi Ndióxi ndohó cacuu ndó cuéntá mé á.

⁷ Ña cán queá cáhyí i carta yóho nu ndó, na ndúu ñuu Roma jan. Jáchi cúni ndivaha Ndióxi ndohó ta nacaxi a ndohó nduu ndó ñayivi mé á. Ta ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja ña ná coo vaha ini ndó.

Cúni Pablo cūhun da ñuu Roma coto nihni da na cúu cuéntá Jesús ndúu cán

⁸ Ndiquiahva i ndixahvi nu Ndióxi sahá ña nacaja Jesucristo xihín in in ndó jáchi ñayivi ndúu ndijáá ñuyívi xini johu na ña candeé ini ndó Jesús. ⁹ Yehe cája chúun i cuéntá Ndióxi ta ndinuhu ini i cáxi tuhun i tuhun vaha saha Jesús, mé a cúu in túhún jini já jahyi Ndióxi nuú ñayivi. Ta xini vaha Ndióxi ña tóco ndihi quivi xica tahví i nu mé á sahá ndihi ndó. ¹⁰ Ta ndijáá nú

quivi xica tahví i nu Ndióxi ña ná quiahva ñamaní nuú i saa i jan coto nihni i ndohó tá cúni a. ¹¹ Jáchi cúni cuni i ndohó já ná caxi tuhun i xihín ndo ndá quiahva cúni ínima yíi Ndióxi caja ñamaní xihín ndo já ná ndindacú chága ndó cuéntá mé á. ¹² Ña cúni queá ná quiahva tuhun ndeé ini táhan í jáchi in candeé ini ndihí Ndióxi.

¹³ Cúni ña ná candaa ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo ín cuahá ña sáji nuu nuú i sahá ña cán queá cámaní saa i jan. Cúni chindeé e ndohó ña ná caca vaha ndó íchi cuéntá Jesús. Jáchi quiahva já nachindeé e java ga ñayivi, na co cúu chichi Israel. ¹⁴ Joo ndítahan nuú i caxi tuhun i tuhun Ndióxi nu tóco ndihi ñayivi ndúu ñuu náhnu xihín na ndúu yucú ñuhú. Ta cahan i tuhun Ndióxi xihín na ndichí jini ta xihín na co ndichí jini. ¹⁵ Ña cán queá xica ndivaha ini i saa i nu ndúu ndó ñuu Roma jan cahan i tuhun vaha saha Jesús xihín ndo.

Jáca Ndióxi ñayivi sahá tuhun vaha cáhan saha Jesús

¹⁶ Co cácan nuú i sahá tuhun vaha cáhan saha Jesús jáchi cúu á ndeé Ndióxi jáca a tóco ndihi ñayivi, na candeé ini mé á. Ta jihna ñuhú nacasahá Ndióxi jáca a ñayivi naquixi chichi Israel ta viti jáca a tóco ndihi ñayivi tá candeé ini na mé á vatí cúu ná na tóho á cúu ná na Israel. ¹⁷ Jáchi náha tuhun Ndióxi nu yo ndá quiahva ndúu ñayivi ndaa nu mé á. Ta cúu á sahá ña candeé ini mé á ta sahá ña yóho cuítí va jáchi coo a inga nuú ña caja í cacuu ñayivi ndaa nu Ndióxi. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña candeé ini na mé á.”

Tóco ndihi ñayivi ndúu ñuyívi cómi na cuachi nu Ndióxi

¹⁸ Janda indiví nu ín Ndióxi xójo ini a xihín tóco ndihi ñayivi cája cuachi ñuyívi yóho ta jándoho a ini na sahá cuachi cája na. Ta sahá ña núu cája na sáji nuu na nuú java ga ñayivi, na cúni candaa ini ña ndaa saha Ndióxi. ¹⁹ Jándoho Ndióxi ini ñayivi sahá cuachi cája na jáchi sa najánaha mé á ña ndaa nu ná ta sa xini na saha mé á

joo co cándúsa na ña. ²⁰ Janda sahá ñuyívi xíní ñayivi ña nacavaaha Ndióxi ñuyívi xihín indivi xihín tóco ndihi ñaha. Ta xihín ña yóho cuu candaá ini na ña ín Ndióxi ta cuu candaá ini na ña ín ndée mé á caja ña cúní a anda ama cáa quívi. Sahá ña cán queá a cúu cachi na ña co xíní na á ín Ndióxi á coo a. ²¹ Vatí candaá vaha ini na ña ín Ndióxi joo co caja cáhnu na mé á tátuhun ndítahan nu ná caja na. Ta ni co ndíquiahva na ndixahvi nu á. Ña caja na queá cáhvi núu ini na ta coo saha toho ña cáhvi ini na. Ta cúu ná tátuhun ñayivi tóntó jini, na xíca nuu nuú naá yávi. ²² Ta vatí cáchí na cúu ná na ndíchí jini joo cúu ná na tóntó jini. ²³ Najándacoo na ña caja cáhnu na Ndióxi, mé a tácu anda ama cáa quívi ta nacavaaha na tiniñu yúu ña ñéhe nahná taa, da xíhi yachí. Ta nacavaaha na nahná laa xihín nahná quíti xihín nahná coo. Ta nacasáhá caja cáhnu na ña.

²⁴ Sahá ña cán queá najándacoo Ndióxi na ña ná caja na tá nuú ña núu ña cúní na caja na. Anda jáví nacasáhá na caja quini na xihín yiquí cuñu táhan na. ²⁵ Co xeén na cándúsa na ña ndaa cáhan saha Ndióxi joo nacandúsa na ña tuhún. Ta nacaja cáhnu na ña nacavaaha Ndióxi ta coo nacaja cáhnu na mé Ndióxi, mé a nacavaaha tóco ndihi ñaha. Jáchi Ndióxi queá xíní ñuhú caja cáhnu í anda ama cáa quívi. Já ná coo.

²⁶ Sahá ña cán queá najándacoo Ndióxi na ña ná caja na ña xíca ini na caja na, ña co ndítahan caja na. Ta naxinu na janda nuú najándacoo najihí ña quíji na xihín yí na ta já nacasáhá quíji xihín táhan ndaja jihí mé va na. Ta ña yóho cúu á ña coo nasacu ini Ndióxi caja na. ²⁷ Ta quiahva já nacaja ri dataa. Najándacoo da ña quíji da xihín ñájihí da ta nacasáhá ndicají ini da caja da ña núu xihín táhan mé va da janda quiahva nacasáhá quíji xihín táhan mé dá. Chí nuú cacahan nuu yo queá caja xihín táhan da. Ta tá nandihí já casáhá ndóho ini yiquí cuñu na sahá ña núu caja na.

²⁸ Naxinu na nuú najándacoo xóo na Ndióxi ta co cúní ga na candaá ini na sahá. Sahá ña cán queá najándacoo xóo Ndióxi na ña ná cahvi núu ini na ta já caja tá caja na ña co ndítahan nu ná caja na. ²⁹ Nandicutú ndaa ínima ná xihín tá nuú ña núu, ña cúu

cuachi. Ta ndiáva íní na quehe na ñaha cómi inga ñayivi ta caja xíxi na xihín ná ta cáhivi ini na ta sáhní na ndii ta cáni táhan na ta jándahvi na ñayivi ta cáhvi núu ini na sahá inga na ta xíca nuu na cáhan tuhún na. ³⁰ Ta canahá quini ndivaha na xihín inga na ta cándají na Ndióxi ta yáha yúhu na xihín inga na ta caja ichi ini na ta caja cáhnu na mé va na. Ndiáva íní na ndaja caja chága na cuachi ta sáa ini na caja na ña cúní tátá náná na. ³¹ Co xíní túní na ta co jáxinu coo na tuhun sahan na nuú ñayivi. Co quíhvi ini na ñani táhan na ta co caja cáhnu ini na saha ná ta co táhnda ini na sahá ñayivi. ³² Xíní vaha na ña nasahnda Ndióxi nu ná ta xíní na ña ndítahan quívi na sahá cuachi caja na. Vatí candaá ini na ña yóho joo xihín ndinuhu ini na caja tá caja na ña núu. Ta janda cájii ini na tá caja java ñayivi mé ña núu.

2

Caja víi Ndióxi saha tóco ndihi cuachi

¹ Mé a ndaa cómi ndó cuachi nu Ndióxi. Sándehé ndaa ndó inga ñayivi sahá cuachi caja na joo chícaan ndó cuachi jata mé va ndó jáchi caja ndó mé cuachi cán. ² Sa xíní vaha í ña caja ndaa Ndióxi tá jándoho á ini ñayivi sahá cuachi caja na. ³ Mé ndó sándehé ndaa ndó cuachi caja java ga ñayivi ta cáhan ndo vaha caja Ndióxi tá chindahá na cuhun na indayá. Joo cáhan ndo ña caja cáhnu ini a saha mé ndó vatí caja ndó mé cuachi caja na cán. ⁴ Ndaja núu ndó Ndióxi, mé a cúní caja cuahá ñamaní xihín ndo jáchi xíní ndó ña co jándoho yachí Ndióxi ini na caja cuachi. Cúní Ndióxi ña ná ndicó coo ini ndó jándacoo ndó cuachi caja ndó. ⁵ Ihvi ndivaha cúu ini ndó jáchi co jándacoo ndó cuachi caja ndó. Nandicuhá cuachi ndó ta jándoho chága Ndióxi ini ndó tá ná tandaa quívi caja víi a sahá cuachi nacaja ñayivi. Mé quívi já ndaca náha ña cojo ini mé á saha cuachi ñayivi ta náha ña ín saha mé á jándoho a ini na cán. ⁶ Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyívi yóho. ⁷ Java ñayivi nacaja na ña vaha xihín ndinuhu ini na ta nacacúni na caja na ña ná cajii ini Ndióxi

xihin já ná cachi Ndióxi ña cúu ná ñayivi vaha. Ta nacacúni na coo na nu in Ndióxi anda ama cáa quivi. Ta mé na cán cúu na cuhun coo xihin Ndióxi anda ama cáa quivi. ⁸ Joo cojo ini Ndióxi tá jándoho a ini na sáa ini, na co cúni cuhun xoo ña ndaa jáchi cátóo na cuhun na xoo ña núu. ⁹ Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casáhá ndoho ini na coo naquixi chichi Israel. ¹⁰ Joo cajii ini Ndióxi xihin na cája ña vaha ta ndaja cáhnu a na ta caja mé á ña ná coo vaha ini ná. Jihna ñúhú já caja mé á xihin na naquixi chichi Israel já casáhá caja ri a já xihin na coo naquixi chichi Israel.

¹¹ Jáchi coo cúu á tátuhun cúni Ndióxi in ñayivi ta cándají a inga na jáchi in cúu ndihi ví nu Ndióxi. ¹² Vatí co cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. Ta vatí cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. ¹³ Jáchi tá cándaa ini na ña sáhdá ley Moisés ta coo cája na ña jáchi coo cáchi Ndióxi ña cúu ná ñayivi ndaa nu mé á. Ta tá cája na ña sáhdá mé ley Moisés anda jáví cáchi Ndióxi ña cúu ná ñayivi ndaa nu mé á. ¹⁴ Ñayivi, na coo naquixi chichi Israel coo xini na ña sáhdá ley Moisés. Cája mé ná ña sáhdá ley Moisés jáchi já xinu ini na caja na ña vatí coo xini na mé ley Moisés. ¹⁵ Ña cája mé ná náha nuú ñayivi ña nasacu Ndióxi ley mé á ini xini túni ná. Ta xihin xini túni ná cándaa ini na tá cája na ña vaha á tá cája na ña núu. Ta quiahva já xihin mé xini túni ná xini vaha na á cája na cuachi á cája na ña vaha ¹⁶ tá ná xinu quivi quiahva Ndióxi chuun nu Jesucristo caja víí a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha saha Jesús ña jánaha i nu ndo.

Na naquixi chichi Israel cándusa na ley Moisés

¹⁷ Ta mé ndó cáchi ndo cúu ndó na naquixi chichi Israel, na cándusa ley Moisés. Ta cáchi ndo cája chága Ndióxi ñamani xihin mé ndó a juú ga xihin java ga ñayivi. ¹⁸ Ta cáchi ndo ña sa xini ndó ña cúni Ndióxi caja ndó ta cáchi ndo ña sa

xini ndó caxi ndó ña vaha jáchi sa najacuaha ndó ley Moisés. ¹⁹ Ta cáchi ndó tiahvava vaha ndó chindeé ndó ñayivi ña ná ndihvi na íchi Ndióxi ta cáchi ndo ña cúu ndo tátuhun in lámpara jándiyéhe nuú ñayivi xica nuu nuú naa. ²⁰ Ta cáchi ndo ña tiahvava ndó jánaha ndó nuú ñayivi, na coo xini túni ta cáchi ndo ña tiahvava ndó jánaha ndó nuú ñayivi, na cámani catacu vaha ini. Cómí ndo ley Moisés sahá ña cán quéa cáhan ndo xini ndó tóco ndihi ña ndaa xihin tóco ndihi ñaha. ²¹ Mé ndó jánaha ndo ley Moisés nuú ñayivi joo jihna ñúhú ndítahan caja ndó ña. Mé ndó jánaha ndo nuú ñayivi ña a váha toho caja cuíhná na joo cúu ndó na cuíhná. ²² Mé ndó jánaha ndo nuú ñayivi ña a váha toho coo in ta xihin in ñañaha, ña coo cúu ñajihí da joo in ndó xihin ñajihí inga na. Mé ndó coo cúni ndó yoco ndindojo veñuhu ñayivi, na coo naquixi chichi Israel joo cája cuíhná ndo ña cuica ñúhu veñuhu na cán. ²³ Cája cáhnu ndó mé va ndó jáchi cómí ndo ley Ndióxi joo coo cája cáhnu ndó mé á jáchi coo cúni ndó caja ndó ña sáhdá mé ley. ²⁴ Ña cán quéa ndaa cáhan tuhun Ndióxi saha ndó tá cáchi a já: “Ñayivi, na coo naquixi chichi Israel cáhan núu na saha Ndióxi sahá ña cája mé ndó, na Israel”, cáchi tuhun Ndióxi.

²⁵ Tá cája ndó ña sáhdá ley Moisés já quéa ndiyahvi marca nachicaan na yiquí cuñu ndó. Joo tá coo cája ndó ña sáhdá ley Moisés já quéa coo ndiyahvi toho marca nachicaan na yiquí cuñu ndó. ²⁶ Na coo naquixi chichi Israel coo chicaan toho na mé marca jan yiquí cuñu na joo tá cája na ña sáhdá ley Moisés já ndiquehe Ndióxi na tá quiahva ndiquehe ri mé á na in marca yiquí cuñu. ²⁷ Ndá na cája ña cáchi ley vatí coo naquihvi marca yiquí cuñu na, in sahá na cán chicaan na cuachi jatá na coo cája ña cáchi ley vatí in a nu ná ta naquihvi marca yiquí cuñu na. ²⁸ Ña cán quéa tá ná caja in na naquixi chichi Israel mé costumbre ña ná cuni cuití va ñayivi ña já quéa a juú ña ndaa ña cúu ná cuénta Ndióxi. Ta ndá na chicaan na marca yiquí cuñu na coo cája na mé costumbre cuénta yiquí cuñu cuití va na. ²⁹ Ta ndá na naquixi chichi Israel tá mé a ndaa cúu ná cuénta Ndióxi ta cája

na ña cúní mé á cō cúú á sahá ña nasahnda loho na yiquí cuñu na. Cúú á sahá ña ñacaja ínima yíi Ndióxi ini na. Ta mé ña cán jácavatá ña ini Ndióxi jáchi xihín ínima yíi mé á cāja na ña cúní mé á.

3

¹ Sahá ña cán quéa ná ndaca tuhún i ndohó ña yóho: Á ín cuahá chága sahá ñayivi ñaquixi chichi Israel a juú ga sahá java ga ñayivi. Á ndiyahvi nu Ndióxi ña ñachicaan ña marca yiquí cuñu na. ² Ajan. Ín cuahá sahá ñayivi ñaquixi chichi Israel ta tá ñachicaan ña marca yiquí cuñu na ndiyahvi a nu Ndióxi jáchi nasacu ini a jándacoo a tuhun a nuú ña ñaquixi chichi Israel já ná cacomí ña cuéntá sahá. ³ Ta vatí ná cāja java ñayivi, ña cándéé ini mé á ña cō cúní mé á cāja na joo ama sahá ña cán a ndíjama toho Ndióxi jini á ña ná cāja ña núu xihín ná, vaha. ⁴ Cō cāja toho Ndióxi já. Ña cāja Ndióxi níi tiempo cúú ndinuhu ña ndaa vatí tóco ndihi ñayivi cáhan ña ña tuhún. Já cáchí tuhun Ndióxi já:

Xihín tuhun cáhan Ndióxi cándaa ini ña cúú á Ndióxi ña ndaa ta a cúu quee vaha ña chicaan cuachí jíquí jatá jáchi cúú mé á in Ndióxi ndaa, já cáchí tuhun mé á.

⁵ Ta viti ná cahan i xihín ndó tá quiahva cáhan ñayivi ñuyíví. Cáhan ña ña cō cāja vaha Ndióxi tá jándoho a mí sahá cuachí jáchi xihín cuachí jándindita jícó chága yó Ndióxi. Ta xihín ña cāja í náha ña cúú Ndióxi in Ndióxi ña ndaa ta mí cúú yó ñayivi cuachi. ⁶ Joo cō cáhan vaha na jáchi tá cō cāja ndaa Ndióxi, nduu já quéa a cúú cāja vií mé á sahá ndihi cuachi cāja tóco ndihi ñayivi ndúu ñuyíví.

⁷ Já cáchí ñayivi já: “Cóho ná cāja yó cuachi já ná candaa chága ini ñayivi ña cāja ndaa Ndióxi ta xihín ña yóho cāja cáhnu chága ña mé á”, cáchí ña. Joo cō cáhan vaha na jáchi tá cáhan yo ña xihín cuachi cāja í ndicáhnu chága Ndióxi já quéa cō cándaa ini ndá saha quéa jándoho Ndióxi ini ñayivi sahá cuachi na. ⁸ Joo java ñayivi cáchí ña: “Cóho ná cāja í cuachi já ná cāja cáhnu ini mé á sahá cuachí já ndicáhnu chága Ndióxi”, cáchí ña joo cō cáhan vaha

na. Ta java ñayivi cáhan ihvi ña sahá yehe ta chicaan ña cuachi jatá i ta cáchí ña ña jánahá yehe ña yóho nuú ñayivi. Ndítahan jándoho Ndióxi ini tóco ndihi ñayivi, ña jánahá ña yóho.

Tóco ndihi ñayivi ndúu ñuyíví cómí ña cuachi nu Ndióxi

⁹ Ña cán quéa a cúú cachi yó ña cúú mí ña vaha chága a juú ga inga ñayivi sahá ña ñaquixi chichi Israel. Jáchi sa najána ña nu ndo ña mí, ña ñaquixi chichi Israel xihín ña cō ña ñaquixi chichi Israel cúú yó ñayivi cāja cuachi. ¹⁰ Já cáchí tuhun Ndióxi já:

Cōó toho ni in ñayivi cāja ña ndaa.

¹¹ Ta cōó toho ni in ña cándaa ini ña ndaa, ta cōó ni in ña ndínducú Ndióxi.

¹² Nacaxoo na nu Ndióxi já ñaquehe na ichí núu cuahan ña.

Cōó ñayivi cāja ña vaha janda ni in tuhún ña cōó.

¹³ Quini ndivaha yúhu ná jáchi cúú á tátuhun in yávi ndii ña cámaní ndee ñúhu.

Cúú ná ñayivi tuhún ndivaha.

Tá quiahva cāja cōó tá tén rí ñayivi já cāja ña cán tá cáhan ña ña tuhún.

¹⁴ Ta mé cháhan cuití cáhan yúhu ná ta xihín ña yóho jatáhví ña ini ñayivi.

¹⁵ Níi tiempo ndícají ini na cahní ña ndii ta xihí ndii cāja na.

¹⁶ Ta ndá nu xínu ña jándoho na ini ñayivi jándacoo ndáhví ñahá ña.

¹⁷ Ta cō xini ña ndá a quéa canduu vaha na xihín ñayivi.

¹⁸ Ta ni cō cándaa ini na ña ndítahan nu ná cayíhví ña Ndióxi, cáchí tuhun Ndióxi.

¹⁹ Sa xini yó ña ndítahan nuú ña Israel cāja na tóco ndihi ña sáhdá ley Moisés jáchi cúú á cuéntá ña ñaquixi chichi Israel. Ta xihín ña yóho chicaan ley Moisés cuachi jatá mé ña cán ta náha ña tóco ndihi ñayivi ndúu ñuyíví cómí ña cuachi nu Ndióxi ta a cúú cachi na ña cō cómí ña cuachi. ²⁰ Ni in ñayivi a cúu nduu ndaa ña nu Ndióxi sahá ña cāja na tóco ndihi ñaha sáhdá ley Moisés. Ña cāja mé ley quéa ña ná candaa ini ña cómí yo cuachi nu Ndióxi.

Jácacu Ndióxi mí jáchi cándéé ini mé á

21 Viti jánaḥa Ndióxi nu yo ndá quiahva nduu ndaa yo nu mé á. Ta jári cáchi mé ley xihín na profeta sahá ña yóho. Ta co cúu á sahá ña cája í ña cáchi mé ley 22 joo sahá ña cándéé ini ñayivi Jesucristo já cája Ndióxi ña ná nduu ndaa na nu mé á. Já caja mé á xihín tóco ndihi na cándéé ini Jesucristo jáchi tá quiahva cája Ndióxi xihín na Israel quiahva já cája ri a xihín na co cúu na Israel. 23 Tóco ndihi ñayivi cómi na cuachi nu Ndióxi ta nacaxíca na nu á ta a cúu nduu na ñayivi vaha tá quiahva cúní mé á. 24 Joo nacaja Ndióxi in ñamaní cáhnu xihín yo já ná nduu ndaa yó nu mé á. Ta coó nachahví sahá jáchi nachahvi Jesucristo sahá cuachí tá naxihí a ndica crúxu. Ta viti co cómi ga yó cuachi nu mé á. 25 Nachindahá Ndióxi Jesucristo ña ná cuíta nií a sahá cuachí já ná cuu caja cáhnu ini Ndióxi saha yo tá ná cándéé ini Jesucristo. Xihín ña yóho náha ña cúu á in Ndióxi ndaa. Tá cámaní quivi Jesucristo sahá cuachí já coó naquehe Ndióxi cuéntá sahá cuachi. Já nacaja mé á jáchi cáhnu ndivaha ini a. 26 Ta xihín ña yóho náha ña mé a ndaa táhyí cúu á in Ndióxi ña ndaa janda quivi viti. Tóco ndihi na cándéé ini Jesús cúu ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúu á Ndióxi ndaa.

27 Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchi a cuu nduu ndaa yó nu Ndióxi sahá ña nasacu vaha í ley Moisés. Cúu á sahá ña cándéé ini Jesús. 28 Sahá ña cán quea sa xini yó viti ña nduu ndaa yó nu Ndióxi tá ná cándéé ini Jesús cuití va. Ta co cúu á sahá ña nasacu vaha í ña sáhdá ley Moisés.

29 Á cája Ndióxi ña yóho sahá na naquixi chichi Israel cuití va, vaha. Uñun. Jáchi jáca cu Ndióxi na naquixi chichi Israel xihín na coó naquixi chichi Israel. 30 Jáchi íin in tálaá Ndióxi ta mé Ndióxi yóho jáca cu a ñayivi tá ná cándéé ini na mé á vatí cúu ná na Israel á co cúu toho ná. 31 Á cacu xoo í ley Moisés, da já. Uñun. Vatí cándéé ini Jesús joo a cuu cacu xoo í ley Moisés jáchi náha ña cúu á ña ndaa ta ndiyahvi a nu yo.

4

Ña nacaja Abraham sanahá ndivaha

1 Ta ndá saha nacachi Ndióxi sahá Abraham, tásáhnú jícó yo ña nanduu da taa ndaa nu mé á. 2 Co cúu á sahá ña nacaja da ña nanduu da taa ndaa nu Ndióxi já ná a cája cáhnu da mé dá. Ta coó toho ñaha ña cuu caja cáhnu da mé dá saha. 3 Jáchi já cáchi tuhun Ndióxi: “Nacandéé ini Abraham Ndióxi sahá ña cán quea nanduu ndaa da nu mé á”, cáchi tuhun Ndióxi. 4 Ta viti ná caja í cuéntá cája chuun in dataa. Ta tá nandihí cháhvi na nu dá ta mé jjuhún cán co cúu á ña jása na nu dá. Cháhvi na nu dá jáchi cáni a nu dá quehe da ña sahá chuun nacaja da. 5 Jáchi a cúu ndaja ndaa ñayivi mé ná nu Ndióxi sahá ña cája na. Tá ná cándéé ini ñayivi Jesús, mé a nachahvi sahá cuachí anda jáví ndaja Ndióxi na ñayivi ndaa nu mé á. 6 Ta quiahva já nacahan rey David sahá ña yóho tá nacachi da ña tahví nahá nacuu da ndája ndaa Ndióxi vatí coó nacaja da ñaha ña ná cuu ndaja ndaa da mé dá nu Ndióxi. 7 Já nacachi David já:

Tahví nahá nacuu ñayivi tá nacaja cáhnu ini Ndióxi sahá ña núu nacaja na ta tá najándoo a cuachi na.

8 Ta tahví nahá nacuu ñayivi tá coó naquehe Ndióxi cuéntá sahá cuachi nacaja na, nacachi David sanahá ndivaha.

9 Á tahví nahá nacuu na nachicaan marca yiquí cuñu cuití va. Uñun. Jáchi nduu ndaa ñayivi nu Ndióxi sahá ña cándéé ini na mé á ta co cúu á sahá ña nachicaan na marca yiquí cuñu á coó a. Ta sa xini yó ña nacachi Ndióxi ña nanduu Abraham taa ndaa nu mé á sahá ña nacandéé ini da mé á. 10 Á nacachi Ndióxi ña cúu Abraham taa ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihín dá tá cámaní chicaan dá marca yiquí cuñu da. 11 Jihna ñuhú nacandéé ini Abraham Ndióxi anda jáví nacachi a ña cúu Abraham taa ndaa nu á. Tá nandihí já nachicaan da in marca yiquí cuñu da já náha ña mé a ndaa nanduu da taa ndaa nu Ndióxi jáchi nacandéé ini da mé á. Xihín ña yóho naxinu Abraham nanduu da tátuhun tátá tóco ndihi ñayivi, na cándéé ini Ndióxi vatí coó nachicaan na marca yiquí cuñu na. Ta vatí coó nachicaan na mé marca yóho yiquí

cuñu na joo cúu ná ñayivi ndaa nu Ndióxi. ¹² Ta quiahva já nanduu Abraham tátá na ín mé marca yiquí cuñu. Ta a juú sahá mé marca yóho cuití va jáchi nanduu da tátá na sahá ña cándéé cáhnu ini na Ndióxi tá quiahva nacandéé ini Abraham mé á tá cámaní chicaan da marca yiquí cuñu da.

Jáxinu coo Ndióxi tuhun sahan nu yo tá ná candéé ini mé á

¹³ Sanahá ndivaha nasahan Ndióxi tuhun a nu Abraham xihín nuú na naquixi chichi da. Nacachi Ndióxi ña tandaa quivi ñeñe táhvi ná ña ná nduu ñuyiví ñaha mé ná. Coó nasahan Ndióxi tuhun a nu Abraham sahá ña nacaja da ña sáhdá ley Moisés. Nasahan mé á tuhun a nu dá sahá ña nacandéé ini da mé á ta já nanduu ndaa da nu Ndióxi. ¹⁴ Joo tá mé a ndaa na nasacu vaha ley cúu na ñeñe táhvi cuhun indivi já quéa coó chuun cándéé ini Ndióxi, dá já. Jáchi xihín ña yóho jándacoo núu í tuhun nasahan Ndióxi nu yo ña caja mé á xoho. ¹⁵ Ndítahan nu Ndióxi jándoho a ini ñayivi tá co cája na ña sáhdá ley Moisés. Joo tá coó toho mé ley já quéa coó toho cuachi ñayivi nu ley.

¹⁶ Nasahan Ndióxi tuhun a nu Abraham sahá ña nacandéé ini da mé á. Ta sahan mé á tuhun a nu yo tá cándéé ini mé á. Coó a cája toho a á cája í ña sáhdá ley Moisés á co cája toho í ña jáchi mé a ndaa ndiquehé ña vaha sahan Ndióxi nu yo tá cándéé ini mé á tátuhun nacandéé ini Abraham mé á. Ta cúu á tátuhun nanduu Abraham tátá tóco ndihi na cándéé ini Ndióxi. ¹⁷ Já cáchi Ndióxi já xihín Abraham: “Nacaja í ña ná nduu mún tátá ñayivi ndúu cuahá nación”, já cáchi tuhun Ndióxi sanahá. Mé Abraham cúu dá tátuhun tátá ndihí nu Ndióxi. Nacandéé ini da Ndióxi, mé á cuu jánditacu tucu ndii ta xihín tuhun cáhan mé á cája ña ná coo ña coó nasahjin jihna.

¹⁸ Vatí coó naxinu nuú tuhun nasahan Ndióxi nu Abraham joo nacandéé tá nacandéé ini da Ndióxi ta nasandati da jáxinu coo mé á tuhun a. Já nanduu da chichi nuú naquixi cuahá ñayivi, na ndúu cuahá nación. Já nayaha jáchi já nacachi Ndióxi xihín dá sanahá: “Ndicuahá ndivaha ñayivi quixi chichún”, nacachi Ndióxi xihín dá. ¹⁹ Ta nacandéé ini

Abraham Ndióxi ña cacu jahyi da vatí sa nacayati quivi xinu da in ciento cuia ta vatí sa cándaá cáxi ini da ña jalóho cuití va quivi catacu da ñuyiví yóho xihín Sara, ñájihí da. Ta sa cándaá ini da ña a cuú ga cacu jahyi ná joo nacandéé ini da Ndióxi. ²⁰ Ta coó nacavitá ini da ta coó nandicaní ivi johó ini da sahá tuhun nasahan Ndióxi nu dá. Joo nanduu ndéé chága ví ini da já ná cándéé cáhnu chága ví ini da Ndióxi ta nacaja cáhnu da mé á. ²¹ Já naxinu ini da ña mé a ndaa táhyí ín ndéé Ndióxi ná jáxinu a tuhun sahan nuú ñayivi. ²² Nacandéé ini Abraham Ndióxi sahá ña cán quéa nacachi a ña nanduu da ta ndaa nu mé á.

²³ Ta tá cáchi tuhun Ndióxi ña nanduu Abraham ta ndaa nu Ndióxi sahá ña nacandéé ini da mé á já quéa coó nacahyi ña yóho sahá Abraham cuití va. ²⁴ Nacahyi ri a saha mí jáchi tá ná cándéé ini Ndióxi, mé á najánditacu Jesús, xitoho í tañu ndii já quéa ndiquehe Ndióxi mí ta ndaja mé á mí ña ná nduú ñayivi ndaa nu mé á. ²⁵ Ta nandiquiahva na Jesús ña ná quivi a ndica crúxu sahá cuachí. Ta tá nandihí nanditacu tucu a ña ná nduú ñayivi ndaa nu mé á.

5

Nacaja Ndióxi ña ná nduu ndaa yo nu mé á

¹ Sahá ña cán quéa coó ga cuachi jata yo jáchi nacandéé ini Ndióxi ta nandique táhan máni yó xihín á sahá ña nacaja Jesucristo, xitoho í. ² Ta sahá ña cándéé ini Jesucristo sahá ña cán quéa cája Ndióxi cuahá ñamaní xoho. Cándéé ini mé á ta cájii ini ndátí cuhun í coo í xihín mé á. ³ Ta quiahva já cájii ini tá ná quixi tondóhó nu yo jáchi sa xini yo ña ndindacú chága ini cuéntá Ndióxi tá ndóho í tondóhó. ⁴ Tá sa nandindacú ini cuéntá Ndióxi nacaja tondóhó anda jáví táhan ini Ndióxi xihín yo jáchi naxito ndojó mé á mí ta nandindacú chága ini cuéntá mé á. Tá natan ini Ndióxi xihín yo anda jáví candaá vaha ini ña jáxinu coo mé á tuhun nasahan a nu yo. ⁵ Tá ndátí ña nasahan Ndióxi tuhun a quiahva nu yo já a cándoó núu toho Ndióxi xihín yo jáchi najándicutú Ndióxi ínimá yo xihín ña quíhvi ini a mí.

Nacaja Ndióxi ña yóho xihin ínima yii mé á ña nasahan nu yo.

⁶ Sahá ña co ndée yo jácácu mí sahá ña cán queá naxihi Jesucristo saha yo ta coó nacayáncá a quivi a ta ni coó naxihi yachi a. Naxihi a mé quivi nanditahan quivi a sahá cuachi ñayivi quini. ⁷ Ihvi ndivaha cáa já queta in ñayivi quivi na sahá inga ñayivi vatí cúu ná na vaha. Joo mé a ndaa cuu queta in ñayivi coo tiaha na quivi na sahá in na cúu na vaha ndivaha. ⁸ Náha Ndióxi nu yo ña mé a ndaa táhyi quihvi ini a mí jáchi vatí cúu yó ñayivi cája cuachi joo naxihi tá naxihi Jesucristo saha yo. ⁹ Ta viti sa nanduú ñayivi ndaa nu mé á sahá nij Jesucristo, dó naxita saha yo. Ta sa saha mé á cacu ndaa ínima yo já ná a cójo ini Ndióxi sahá cuachi. ¹⁰ Nasacuú na coó naxini táhan vaha xihin Ndióxi joo sahá ña naxihi in túhún jiní já jahyi mé á sahá ña cán queá nandique táhan máni yó xihin á viti. Xihín ña yóho cuu cacu ndaa ínima yo jáchi nanditacu tucu Jesucristo ta sa nandique táhan máni yó xihin Ndióxi viti. ¹¹ Ta a juú ña yóho cuití va vaha jáchi cájii ndivaha iní xihin Ndióxi sahá ña nacaja Jesucristo, xitoho í. Sahá ña cán queá naxinu yó nandique táhan máni yó xihin Ndióxi.

Ña nacaja Adán xihín ña nacaja Jesucristo

¹² Ta sahá cuachi nacaja in taa naní Adán sahá ña cán queá nandihvi cuachi ñuyiví yóho ta tá nandihvi cuachi ñuyiví já nacasáhá xihí ñayivi. Tóco ndihí cája í cuachi ta sahá ña yóho ndítahan quivi ndihí. ¹³ Tá cámani quiahva Ndióxi ley mé á nu Moisés nasacomí tóco ndihi ñayivi cuachi. Joo co quehe Ndióxi cuéntá sahá cuachi jáchi coó toho ley nasahin tiempo já. ¹⁴ Janda tiempo nasahin Adán nacasáhá xihí ñayivi sahá cuachi na ta janda naxinu tiempo nasahin Moisés naxihi na vatí coó nacaja na mé cuachi nacaja Adán. Nasacomí Adán cuachi jáchi naquehe nú da ña nacachi Ndióxi xihin dá. Ta mé Adán yóho nasacuu da tátuhun yuhú nuú da quixi tá nu ndihí.

¹⁵ Joo a cuú jándique táhan í cuachi nacaja Adán xihin tóco ndihi ña vaha sahan Ndióxi nu yo. Jáchi sahá cuachi nacaja

in túhún taa, xihí cuahá ndivaha ñayivi. Joo ñamani nacaja Ndióxi xoho sahá ña nacaja in túhún taa naní Jesucristo cúu á in ñamani cáhnu ndivaha ña ñéhe táhvi cuahá ndivaha ñayivi. ¹⁶ A cuú jácatáhan í cuachi nacaja in dataa xihín ñamani cája Ndióxi xoho jáchi saha in túhún cuachi naxinu cháhan jatá ñayivi ta já nacasáhá xihí na. Vatí nandicuahá cuachi ñayivi joo nacaja Ndióxi ñamani xihin ná já nandaja ndaa mé á na ta nacachi a ña coó ga cuachi na nu mé á. ¹⁷ Sahá cuachi nacaja in túhún taa naní Adán nacasáhá xihí ñayivi. Joo sahá ña nacaja in túhún taa naní Jesucristo ñéhe táhvi yó ndoo máni uun cuachí nu Ndióxi. Jáchi cáhnu ndivaha ñamani cája Ndióxi xoho ña cán queá ñéhe ndeé chága iní yo caca í íchi cuéntá Ndióxi sahá ña nacaja Jesucristo.

¹⁸ Sahá cuachi nacaja Adán nacachi Ndióxi ña cómi tóco ndihi ñayivi cuachi nu á. Joo sahá ña ndaa nacaja Jesucristo nacachi Ndióxi ña ndá ñayivi nacuu cuu nduu ndaa na nu mé á jáchi co cómi ga na cuachi nu á. ¹⁹ Sáa nasahin ini Adán jáchi coó naxeén da caja da ña cúni Ndióxi. Ta sahá ña nacaja Adán cuahá ndivaha ñayivi nandu na ñayivi cuachi. Joo nacaja Jesucristo tóco ndihi ña cúni Ndióxi ta xihín ña nacaja in túhún taa Jesucristo nandu ndaa cuahá ndivaha ñayivi nu Ndióxi.

²⁰ Tá nasahan Ndióxi ley nu Moisés já nacandaa ini ñayivi ña cuahá chága cúu cuachi na. Joo tá nandicuahá cuachi ñayivi já natahvi chága ini Ndióxi saha ná. ²¹ Nandihvi cuachi ñuyiví ta nasacomí a cuéntá sahá ñayivi. Ta sahá ña nacaja na cuachi sahá ña cán queá nacasáhá xihí na. Joo nacaja Ndióxi cuahá ñamani xihin yo ta nasacomí a cuéntá saha yo já ná cuu nduú ñayivi ndaa nu mé á ta já ná cuu cacu ndaa ínima yo anda ama cáa quivi sahá ña nacaja Jesucristo, xitoho í.

6

Naxihi yó nuú cuachi joo tácu yo xoo Jesucristo

¹ Ama ná cachi xihin táhan í: “Cóho caja tá caja í cuachi já ná coo cáhnu chága ini Ndióxi saha yo.” ² Ama ná cachi rí já jáchi

cúu yō tátuhun na sa naxihí nuú cuachi ta tá sa naxihí yó nuú cuachi ama ná cacomí ga cuachi cuéntá saha yo. ³ Tá nacandúta yō cuéntá Jesucristo cúu á tátuhun in yó naxihí xihín Jesucristo. ⁴ Jáchí tá nacandúta yō já cúu á tátuhun in yó nanduxu xihín Jesucristo ta naxihí yó nuú cuachi. Ta tá najánditacu Ndióxi Jesucristo já cúu á tátuhun in yó nanditacu xihín mé á. Jáchí xihín ndée cáhnu Ndióxi, tátá yō nanditacu Jesucristo ta sa xihín mé ndée cán cuu caca í ichí saá viti.

⁵ Tá quiahva in nanduú xihín Jesucristo tá naxihí a quiahva já in nanduú xihín á tá nanditacu a. ⁶ Tá cámaní cándéé iní Jesús já nacatóo ndivaha í cája í cuachi jáchi nasahnda cuachi chuun nu yo. Joo sahá ña naxihí Jesucristo ndica crúxu sahá ña cán quéa najándacoo í cuachi cája í ta viti co sáhnda ga cuachi chuun nu yo. ⁷ Jáchí tá sa naxihí in dataa co sáhnda ga cuachi chuun nu dá ña cán quéa cúu á tátuhun sa naxihí yó xihín Jesucristo sahá ña cán quéa co sáhnda ga cuachi chuun nu yó viti. ⁸ Ta cúu á tátuhun naxihí yō tá naxihí Jesucristo ña cán quéa xini vaha í ña cuhun yó coo í nu ín mé á anda ama cáa quivi. ⁹ Sa xini yo ña nanditacu tucu Jesucristo ta a ndíco coo ga quivi a jáchi ni in ñaha a cuú caja ña ná quivi tucu a. ¹⁰ In táláa tañu naxihí a sahá cuachí ta viti xihín chí nuu co ndítahan ga nu á quivi a sahá cuachí. Ta viti tácu Jesucristo cuéntá Ndióxi. ¹¹ Ña cán quéa ndítahan catacu ndó ñuyiví yóho tátuhun na sa naxihí nuú cuachi já ná a cáhnda ga cuachi chuun nu ndo. Ndítahan catacu ndó cuéntá Ndióxi ña in ná nduu ndó xihín Jesucristo.

¹² Ña cán quéa a quiahva ndó ñamaní nuú cuachi ña ná cacomí a cuéntá sahá yiquí cuñu ndó jáchi tá ná ndiquiahva ndó mé ndó ndahá cuachi já quéa caja ndó cuachi ña xica ini ndó caja ndó. ¹³ A ndiquiahva ga ndó yiquí cuñu ndó ndáha cuachi ná a caja ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndii nu Ndióxi jáchi nacaja ndó cuachi joo viti cúu ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña

ná caja ndó ña vaha. ¹⁴ Co cómí ga cuachi cuéntá saha ndó viti jáchi tácu ndo sahá ñamaní cája Ndióxi ta co tácu ndo sahá ña sácú vaha ndó ley Moisés.

Ndítahan nu yo ndicaxí ndá ichí candico yo

¹⁵ Ama ná caja rí cuachi sahá ña co cómí ga ley Moisés cuéntá saha yo. Uhun. A caja toho í ña jáchi xihín ñamaní cája Ndióxi xihín yo cánda iní ña cómí mé á cuéntá saha yo. ¹⁶ Sa xini ndó ña ndiquiahva in mozo mé dá ndáha xitoho da ta cája da ndá chuun nacuu ña sahan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cuhun ndó indayá. Ta tá ná ndicaxi ndó caja ndó ña cuni Ndióxi já quéa cacuu ndó cuéntá mé á ta caja mé á ña ná nduu ndaa ndó nu á viti. ¹⁷ Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cája ndó ña ndaa, ña nacatiahva ndó cuéntá Ndióxi. ¹⁸ Nandoo cuachi ndó ta co cúu ga ndó mozo cuéntá cuachi viti. Nanduu ndó mozo cuéntá Ndióxi ta cája ndó ña ndaa viti. ¹⁹ Najánaha i sahá in mozo nu ndó já ná canda vaha chága ini ndó ña ndaa. Mé ndó nasacuu ndó tátuhun mozo jáchi jihna ndiquiahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nacahvi ini ndó caja ndó. Joo viti ndiquiahva ndó mé ndó ndahá Ndióxi ta nasacuu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yii nu mé á.

²⁰ Tá nasacuu ndó mozo cuachi coo naxeén ndó caja ndó ña ndaa ña cuni Ndióxi. ²¹ Ni in ña vaha coo nañehe ndó saha cuachi nacaja ndó. Ta viti cácan nuu ndo saha mé cuachi nacaja ndó. Ta ndá ñayivi sá cája cuachi cuhun na coo na indayá anda ama cáa quivi. ²² Joo co cómí ga cuachi cuéntá saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cuni mé á jáchi já xinu coo ndó cacuu ndó ñayivi yii nu Ndióxi ta já cuhun ndó coo ndó xihín mé á anda ama cáa quivi. ²³ Jáchí tá cája í cuachi cúu á tátuhun ndíyíca yo nu Ndióxi sahá ña nacaja í ta ini

indayá chahví sahá. Joo ñamaní cája Ndióxi xohó sahá ña naxihí Jesucristo, xitoho í cúú á ña cohó catacú indiví xihín mé á anda ama cáa quivi.

7

Có cómi ga ley cuénta saha yo

¹ Candehe ndo ñani mí i, na cúú cuénta Jesús. Sa xini vaha ndó ley Moisés ta sa xini ndó ña cómi ley cuénta sahá ñayivi nani tácu cuití va na. ² Cúú á tátuhun tá natandaha in ñañáha xihín in dataa já quea cáchí ley cúú ña ñájihí da anda ná xinu coo quivi quivi da. Joo cáchí mé ley ña tá sa naxihí da co cúú ga ña ñájihí da. ³ Sahá ña cán quea cuu tandaha tucu ña xihín inga taa jáchi co sáhdá ga mé ley chuun nu ña. Ta co cája ña cuachi nu Ndióxi tá ná tandaha tucu ña jáchi sa naxihí va yí ña. Joo tá ná tandaha tucu ña nani tácu yí ña já quea cája ña cuachi nu Ndióxi.

⁴ Ta quiahva já ndóho ri ndóho va ñani mí i, na cúú cuénta Jesús. Cúú á tátuhun naxihí ndó nu ley Moisés ña cán quea co cómi ga mé ley cuénta saha ndo. Ta viti núná nuú Jesucristo cacomí a cuénta saha ndo ña ná cacuu ndó cuénta mé a nanditacu tucu. Ta viti cuu caja í ña vaha, ña cúni Ndióxi. ⁵ Tá cámaní candeé iní Jesucristo nacaja í ndinuhu ña núu ña nasacahvi iní caja í. Vatí sa xini yó ña cáchí mé ley joo nacaja chaga yó cuachi ña nahvi iní caja í. Ña cán quea nanditahan nu yó quivi ná cuhun í ndoho iní indayá, nduu. ⁶ Joo nacaja Ndióxi ña ná janí yó nuú ña sáhdá ley Moisés ña nasacomí cuénta saha yo. Ta viti núná nu yó caja í ña cúni mé á jáchi nandijama ínima yí Ndióxi mí sahá ña cán quea co cómi ga ley, ña nahví na jihna cuénta saha yo viti.

Cája tá cája í cuachi vatí candeé iní Jesucristo

⁷ Á cúni cachi ña yóho ña a váha toho ley Moisés. Uhun. Ña vaha cúú á jáchi xihín ña cahan mé ley cánda vaha iní ndá a cúú cuachi. Já cáchí mé ley já: “A ndiáva toho iní ndó cacomí ndó ñaha cómi inga na”, cáchí a. Ña cán quea cánda iní viti ña a váha toho tá ná caja í já. ⁸ Tá ná a cóo toho ley, nduu já quea a cánda iní i ña cúú cuachi. Ta

coó toho cuachi caja i tá coó ley, nduu. Joo viti cánda iní i ña a váha toho ndiáva iní i cacomí i ñaha ñani táhan i jáchi cáchí ley a caja i ña. Ña cán quea nandihvi cuachi iní i ta nacasáhá cáhvi iní i ndaja caja i cacomí i ñaha inga na. ⁹ Tá cámaní cánda iní i ña cáchí ley Moisés já nahán i cúú u da vaha. Joo tá natandaa quivi natacu iní i xihín ña cáchí ley Moisés anda jáví nacandaa iní i ña ñúhu cuachi iní i ta nacandaa iní i ña cúú u da cája cuachi ta nditahan nuú i cuhun i indayá sahá. ¹⁰ Tá ná cuu caja ñayivi tóco ndihi ña cáchí ley Moisés já cuhun na coo na nu in Ndióxi anda ama cáa quivi. Joo coó nacuu caja i ña cáchí mé ley sahá ña cán quea nditahan nuú i cuhun i indayá sahá. ¹¹ Najándahvi cuachi yehe jáchi nahán i cuu cuhun i indiví sahá ña cája i ña cáchí ley joo sahá ña coó nacuu xinu coo i caja i ña sahá ña cán quea cuhun i indayá.

¹² Ta yí ndivaha cúú ley Moisés. Ta yí ndivaha cúú tuhun nasahnda Ndióxi caja í. Ta cúú á ña ndaa ta cúú á ña vaha. ¹³ Ama ná jáqueta nuu ley yehe iní indayá nani cúú á ña vaha. Uhun. A cúú cuití caja ley jáqueta nuu a yehe iní indayá. Cuachi quea ndúcú chindahá yehe cuhun i indayá. Nañehe iní cuachi cañehe a yehe cuhun i indayá saha ley. Xihín ña yóho cánda iní i ña quini ndivaha cúú cuachi ta vaha ndivaha cúú mé ley.

¹⁴ Sa xini yo ña cúú ley cuénta Ndióxi joo yehe cúú u in da cája cuachi ta cája i ña núu jáchi mé cuachi cómi a cuénta sahá i. ¹⁵ Co cánda iní i ña cája i jáchi cúni caja i ña vaha joo co cája i ña. Ña cája i quea mé ñaha ña cándají i. ¹⁶ Tá cája i cuachi ña co cúni caja i já cánda iní i ña vaha cúú ley. ¹⁷ Mé a ndaa co cúni caja i cuachi joo cuachi ndacaan iní i cúú á ña jáchan yehe cája i ña. ¹⁸ Sa xini ña co ndeé yiquí cuñu i caja ña vaha jáchi coó ña vaha ndacaan iní i. Vatí cúni caja i ña vaha joo co sahan mé á caja i ña. ¹⁹ Cúni caja i ña vaha joo co cája toho i ña. Ña cája i cúú á ña núu ña co cúni caja i. ²⁰ Caja i ña co cúni caja i já cánda iní i ña cuachi ndacaan iní i quea chindahá nihni a yehe cája i ña núu.

²¹ Candehe ndo ña yóho: Vatí cúni caja i ña vaha joo cája i ña núu jáchi ña cán cuití va xinu iní i caja i. ²² Janda ínima

ĩ xĩnu coo ña cátóo ĩ caja ĩ ña cáhan ley Ndióxi. ²³ Joo ndácaan inga ñaha ini ĩ ta cáni táhan mé ñaha cán xihĩn xíní túní ĩ. Ta mé ñaha ndácaan ini ĩ cúú á cuachi. Ta cándeé cuachi xihĩn ĩ já sáhndá a chuun nuú ĩ.

²⁴ Ndáhvi nahá nacuu u. Yo cuu jácaacu yehe ná a cája ga ĩ cuachi ña cañehe yehe cuhun ĩ indayá. ²⁵ Ndiquiahva ĩ ndixahvi nu Ndióxi jáchi xihĩn ña nacaja Jesucristo, xitoho í cuu jácaacu Ndióxi yehe já ná a cája ga ĩ cuachi. Ña cán quéa cándaá ini ĩ ña ndítahan cája ĩ ña sáhndá ley Ndióxi joo cuachi ndícaan ini ĩ sáhndá chuun nuú ĩ.

8

Ndíco í in íchi nu cája í ña cúnĩ ínima yĩ Ndióxi

¹ Ta sahá ña in nanduú xihĩn Jesucristo sahá ña cán quéa a chínúu Ndióxi cuachi jata yo viti. Jáchi co cája ga í ña xíca ini yiquí cuñu í. Ña cája í cúú ña cúnĩ ínima yĩ Ndióxi. ² Jáchi xihĩn ña nacaja Jesucristo najácaacu ínima yĩ Ndióxi mí ta nasahnu a cuachí já ná a cuhun yó indayá. ³ Coó nacuu caja í tóco ndihĩ ña sáhndá ley Moisés ña cán quéa coó nacuu nduu ndaa yó nu Ndióxi xihĩn mé ley. Ña cán quéa nacaja Ndióxi inga ñaha tá nachindahá mé á Jesucristo, jahyi a. Nanduú Jesucristo in ñayivi ta tá quiahva cácu ñayivi quiahva já nacacu Jesucristo ñuyíví. Ta tá naxihĩ mé á ndíca crúxu já nachahvi a saha tóco ndihĩ cuachí sahá ña cán quéa co sáhndá ga cuachi chuun nu yo. ⁴ Ta nacaja Ndióxi ña yóho já ná cuu xĩnu coo í caja í ña sáhndá ley mé á tá ndáca ínima yĩ Ndióxi mí. Jín va caja í viti jáchi co ndúu ga yó ndahá cuachi.

⁵ Ñayivi, na cája ña xíca ini yiquí cuñu, na cán cúú na ndícani cuahá ini sahá yiquí cuñu. Joo na cája ña cúnĩ ínima yĩ Ndióxi na cán cúú ná ndúcú jácavatá na Ndióxi. ⁶ Tá ná ndicani cuahá ini na sahá ña cúnĩ yiquí cuñu na já quéa cuhun na indayá. Joo tá ná ndicani ini na sahá ña cúnĩ ínima yĩ Ndióxi já quéa coo vaha ini na ta ñehe táhvi ná cuhun na indiví. ⁷ Joo ñayivi ndícani ini saha yiquí cuñu, na cán cúú ná na ihvi Ndióxi jáchi co cúnĩ na caja na ña cáchi ley Ndióxi ta ni a cuú caja na ña. ⁸ Sahá ña cán

quéa tá cómĩ cuachi cuéntá saha ná já quéa a cuú caja na ña cáji ini Ndióxi xihĩn.

⁹ Ta tá mé a ndaa ndácaan ínima yĩ Ndióxi ini ndó já quéa co ndíco ga ndó íchi cuéntá ña núu, ña nasacaja ndó jihna. Ta viti ndíco ndó íchi vaha ta cája ndó ña cúnĩ Ndióxi. Jáchi ndá na co ndácaan ínima Jesucristo ini, na cán co cúú ná cuéntá mé á. ¹⁰ Tá ndácaan Jesucristo ini ínima ndo vaxi quivĩ quivĩ yiquí cuñu ndó saha cuachi nacaja ndó. Joo mé a ndaa catacu ínima ndo nu ín Ndióxi anda ama cáa quivĩ jáchi nanduú ndaa ndó nu Ndióxi nacaja mé á. ¹¹ Nacaja ínima yĩ Ndióxi ña ná nditacu tucu Jesucristo ta tá ndácaan ínima yĩ Ndióxi ini ínima ndo já tandaa quivĩ caja mé á ña ná nditacu tucu yiquí cuñu ndó saha mé ínima yĩ Ndióxi ndícaan ini ndó.

¹² Candehé ndó ñani mí ĩ, na cúú cuéntá Jesús. Co ndítahan nu ndó caja ndó ña núu, ña xíca ini ndó caja ndó. ¹³ Jáchi tá ndinuhu ini ndó caja ndó ña núu, ña xíca ini ndó já quéa ndítahan nu ndó cuhun ndó indayá. Joo tá xihĩn ndée ínima yĩ Ndióxi jándihĩ ndó sahá ña núu xíca ini ndó caja ndó já quéa vaxi quivĩ cuhun ndó coo ndó xihĩn mé á anda ama cáa quivĩ.

¹⁴ Ndá na nandiquiahva mé ndáha ínima yĩ Ndióxi ña ná candaca a na, mé a ndaa táhyí cúú ná jahyi Ndióxi. ¹⁵ Nasahan Ndióxi ínima yĩ mé á nu ndo joo coo nasahan ña nu ndo ña ná catavi nihni a ndohó ta já quixĩ ña jáyihví a ndohó. Nasahan Ndióxi ínima yĩ mé á nu ndo jáchi xihĩn ña yóho ndája Ndióxi ndohó jahyi mé á ta saha mé ínima yĩ yóho cáhan yó xihĩn Ndióxi ta cáchi yo: “Tátá maní ĩ.” ¹⁶ Ta cáchi ínima yĩ Ndióxi xihĩn ínima yo ña mé a ndaa cúú yó jahyi Ndióxi. ¹⁷ Ta sahá ña cúú yó jahyi mé á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña ñehe táhvi yo yóho tahnda java ña xihĩn Jesucristo. Tá ta mé a ndaa táhyí ndoho iní xihĩn á já quéa tá ndihĩ cohó coo í xihĩn mé á indiví ta cán ndicáhnu í xihĩn á.

¹⁸ Coó a caja toho a tá ná ndoho ini í ñuyíví yóho jáchi vaxi quivĩ ndicáhnu ndivaha í xihĩn Jesucristo caja Ndióxi. ¹⁹ Tóco ndihĩ ña nacavaha mé á ndátĩ ndihĩ a ta ndiáva ínĩ a ña ná tandaa quí quivĩ

cachi Ndióxi ndá ñayivi cúu cuéntá mé á. ²⁰ Nacaja Ndióxi ña ná ndoho ini tóco ndihi ña nacavaha mé á. Mé ñaha nacavaha Ndióxi cō cūni a ndoho ini a joo sácú ini Ndióxi ña ná ndoho ini tóco ndihi ña nacavaha mé á. Ta ndátí tiahva ndihi ñaha ²¹ andá tandaa quiví caja Ndióxi ña janí ña já ná a cácomí ga cuachi cuéntá sahá já ná a tíví ga ña. Ta ñúchí ndivaha mé quiví já tá cají ini tóco ndihi ñaha nacavaha Ndióxi xihín tóco ndihi na cúu jahyi mé á. Jáchí a cácomí ga cuachi cuéntá saha ná. ²² Sa xíní yo ña janda sanahá ndivaha ta andá viti tána ndivaha tóco ndihi ña nacavaha Ndióxi ta ndóho ndivaha ini a tátuhun ndóho ini in ñañáha tá ndúcú ndéé ña cacu jahyi ñá. ²³ Ta quiahva já ndóho ri ini mí ví. Ínima yíi Ndióxi cúu ña sahan tiahva mé á nu yo já ná candaá iní ndá quiahva ín ña quiahva mé á nu yo chága chí nuu. Ta tána ndivaha í andá quiahva ná yaha ña ndóho iní. Ta ndátí tandaa quiví ndaja Ndióxi tóco ndihi mí ná nduú jahyi mé á já ná ndiquehé yiquí cuñu saá. ²⁴ Najácaacu Ndióxi mí jáchí nacandéé iní mé á vatí coó naxiní ña nacachi mé á quiahva nu yo. Tá xíní cáxí yo in ñaha já candaá iní ña cō xíní ñúhú toho candatí quehé ña jáchí cō xíní ñúhú candatí ñaha cómí yo. ²⁵ Joo tá ná candatí in ñaha ña cō xíní yo já quéa cō ndihi iní nani ndátí ña.

²⁶ Tá cávitá iní já chindeé ínima yíi Ndióxi mí jáchí cō tiáhva í ndaja caça tahví yo nu Ndióxi tá quiahva ndítahan caça tahví yó nu á. Joo sa mé ínima yíi Ndióxi yóho tána ta cáhan xihín tuhun ña a cuú cahan yo. Já caja mé á tá xíca tahví a nu Ndióxi saha yo. ²⁷ Ta sa xíní Ndióxi ña cáhvi iní ta sa xíní a ña xíca tahví ínima yíi mé á saha yo. Ña cūni Ndióxi caja saha yo ña jan quéa xíca tahví ínima yíi mé á saha yo, na cúu ñayivi cuéntá mé á.

Ni in ñaha a cúu cahnu a mí tá cándéé iní Jesucristo

²⁸ Ta sa xíní yo ña tóco ndihi ña ndóho í ndaja Ndióxi ña ná nduu a ña vaha tá quíhvi iní mé á. Jáchí mí cúu yó na sa nasacu ini Ndióxi ña ná caja í ña cūni mé á.

²⁹ Ndá ñayivi nacaxi Ndióxi anda saha nacaxi a na ña ná nduu na tátuhun Jesucristo, mé á cúu jahyi Ndióxi. Jáchí cūni Ndióxi ña ná nduu Jesucristo jiní nuú ndihi na cúu cuéntá mé á. ³⁰ Ta nacana Ndióxi na nacaxi a ña ná candeé ini na mé á. Ta nacaja mé á ña ná nduu ndaa na nu á. Ta vaxi quiví caja mé á ña ná ndináhnu ndihi na cán xihín á.

³¹ Ndía cachí sahá ña yóho. Ni in túhún ñaha a cúu caní táhan xoho ta ni a cúu quee vaha xoho jáchí cuahan Ndióxi xoo í. ³² Ta coó nacajíhnda Ndióxi jahyi a jáchí nandiquiahva Ndióxi Jesucristo, jahyi a ña ná quiví a saha yo. Xihín ña yóho candaá iní ña cō ndáhvi cúu ini a quiahva tóco ndihi ñaha nu yo. ³³ Yo já cuu chícaan cuachi jatá na nacaxi Ndióxi. Ni in ñayivi a cúu chícaan cuachi jatá na jáchí sa mé Ndióxi nandaja mé á na ñayivi ndaa nu á. ³⁴ Yo já cuu jácojo cuachi jatá na cúu cuéntá mé á. Ni in ñayivi jáchí naxihí Jesucristo saha yo. Nanditacu tucu a ta ín coo a xoo cuáha Ndióxi indiví xíca tahví a nu Ndióxi saha yo. ³⁵ Yo já cuu caji nuu nu Jesucristo quíhvi ini a mí. Ni in ñaha a cúu caja ña jándacoo Jesucristo ña quíhvi ini a mí. Vatí ná ndoho ndivaha iní ta vatí ná quixi ña yíhvi yo ta vatí ná ndicuita na caja xíxi na xoho ta vatí ná quixi joco ta vatí janda jáhma yo ná ndimaní ta vatí tondóho vaxi nu yo á ñayivi ndúcú cahní mí joo ni in ña yóho a cúu caji nuu a nu Jesucristo ña quíhvi ini a mí. ³⁶ Já cáchí tuhun Ndióxi já:

Saha Ndióxi sácú ini ñayivi cahní na ndehe ndijáá ní quiví.

Tá quiahva cája na xihín ndicachi, rí cuhun quivi quiahva já cája na xihín nde, cáchí tuhun Ndióxi.

³⁷ Vatí ndóho í tóco ndihi ña yóho joo quee vaha tá quee vaha í caja Jesucristo jáchí quíhvi ini a mí. ³⁸ Sa xíní vaha í ña ni in ñaha a cuú caja tavá mí ndáha Jesucristo, mé a quíhvi ini mí. Ta coó a caja toho a á tácu yo á sa naxihí yo. Ni tátō Ndióxi ni ña sáhdá chuun nuú ñayivi ta ni ña ndóho iní viti ni ña ndoho iní chí nuu ³⁹ ta ni in ñaha ín indiví ta ni in ñaha ín tíxi ñúhu ta ni in ñaha nacavaha Ndióxi a cuú tavá mí ndáha Ndióxi, mé a quíhvi ini mí. Ta najánaha

Jesucristo, xitoho í nu yo ña quíhvi ndivaha ini Ndióxi mí.

9

Ñayivi naquixi chichi Israel cúu na nacaxi Ndióxi

¹ Ña ndaa cúu ña cáhan i xihín ndó viti ta co cávaha i ña tuhún jáchi cúu u cuéntá Jesucristo. Sáhndá ínimá yii Ndióxi chuun nu xíní túní i sahá ña cán quéa co cáhan i ña tuhún. ² Ín cuéha ndivaha ini i ta já táhvi ndivaha ini i sahá na Israel. ³ Mé a ndaa cúni yehe chindeé e na naquixi chichi nuú naquixi mí i ña ná candeé ini na Jesucristo. Ta janda ín tiahva i cacuu u da chícáan na cháhan jata tá ta xihín ña yóho cuu cacu ndaa ínimá ná. Joo a cuú caja i ña. ⁴ Mé na cán naquixi na chichi Israel ta nacaxi Ndióxi na já ná nduu na ñayivi cuéntá mé á. Najánaha Ndióxi nu ná ndá quiahva cáhnu cúu mé á. Ta nasahan tuhun a nu ná ña nasacu ini a caja saha ná. Nasahan Ndióxi ley Moisés nu ná ta najánaha mé á na ndaja ndítahan nu ná caja cáhnu na mé á. Nacaxi tuhun a xihín ná sahá ñamaní caja mé á xihín ná chí nuu. ⁵ Ta ñayivi Israel naquixi na chichi na nasanduu sanahá. Ta nacacu Jesucristo chichi mé na cán ta nanduu a in ñayivi. Chí anda ama cáa quívi ná caja cáhnu yó Jesucristo, mé á cúu Ndióxi, mé á cómi cuéntá saha tóco ndihi ñaha. Já ná coo.

⁶ A juú cahán ndo ña coó najáxinu Ndióxi tuhun a nasahan nuú na Israel. A juú ndihi ñayivi jan cúu na cuéntá Ndióxi vatí naquixi na chichi Israel. ⁷ A juú tóco ndihi na naquixi chichi Abraham cúu ná cuéntá Ndióxi jáchi janda saha nacachi Ndióxi xihín dá: “Ñayivi cuaha quixi chichún cacuu na jahyi Isaac”, cáchi a xihín Abraham. ⁸ Ña yóho cúni cachi a ña ni in tuhún ñayivi co cúu ná jahyi Ndióxi sahá ña naquixi na chichi Abraham. Na cúu ndusa jahyi Ndióxi cúu ná naquixi chichi Isaac jáchi cuéntá Isaac najáxinu coo Ndióxi tuhun nasahan nu Abraham. ⁹ Sanahá ndivaha nasahan Ndióxi tuhun a nu Abraham já cáchi a já: “Xinu cuia já quixi tucu u ta cacu jahyi taa ñájhún, Sara.”

¹⁰ Candehé ndo ná ndicani i nu ndo ña nayaha chága chinuu. Isaac, da cúu tásáhnu jícó yo nasacuu da tátá ndíví taa valí jahyi Rebeca. ¹¹ Tá cámaní cacu taa cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví taa valí ni ña vaha ni ña núu. Já nasacu ini a caja ¹² ta já nacachi a xihín Rebeca: “Jahyún, da cacu chí ivi cahnda chuun nuú da cacu nu cuítí.” ¹³ Ta já cáchi tucu tuhun Ndióxi já sahá jahyi Rebeca: “Nacaxi i Jacobo, da nacacu chí ivi caja i ñamaní xihín dá joo nasacu xóo i Esaú, da nacacu nu cuítí.” Já nacaja Ndióxi jáchi já nasacu ini a caja.

¹⁴ Ama ná cachi rí ña co caja ndaa Ndióxi. A cáchi toho í já. ¹⁵ Já nacachi Ndióxi xihín Moisés sanahá: “Tahvi ini i sahá ñayivi joo mí i caxi i yo tahvi ini i saha. Ta tahnda ini i sahá ñayivi, joo mí i caxi i yo tahnda ini i saha”, nacachi Ndióxi sanahá. ¹⁶ Ña cán quéa co caja Ndióxi ña cúni ñayivi ta a cúu caja ndusa ñayivi xihín á ña ná tahnda ini a saha ná jáchi tahnda ini a sahá ñayivi, na cúni mé á tahnda ini a saha. ¹⁷ Já cáchi tuhun Ndióxi já xihín da cúu rey nuú nación Egipto: “Nandaja i yohó rey jáchi cúni jánaha i nuun ña cuu caja i tóco ndihi ñaha tá cúni já ná candaa ini tóco ndihi ñayivi ndúu ñuyíví ña cáhnu ndivaha cúu yehe”, nacachi Ndióxi. ¹⁸ Ña cán quéa tá cúni Ndióxi tahnda ini a sahá ñayivi já cuu tahnda ini a saha ná. Ta tá cúni a ndaja táhyí a ínimá ná já cuu ndaja táhyí a ña.

¹⁹ Joo a cuú cachí ña co caja ndaa Ndióxi tá cáchi a ña cómi yo cuachi. Vatí sácú ini Ndióxi ña caja in in ñayivi joo co chindahá a na caja na cuachi. ²⁰ Co ndítahan nuú ñayivi ndaja ndichí na Ndióxi sahá ña caja mé á. Jáchi sa xíní yo ña co ndítahan nuú in quiji cachi a xihín da cávaha ñaha: “Co catóo i coo i tá quiahva nacavaha ndó yehe.” ²¹ A cuú cachi quiji cán já jáchi mé da cávaha quiji cán, cávaha da ña tá quiahva cúni mé dá. Xihín in mbohla loho ñuhú quiji cuu cávaha da in quiji cacuu a javí á in quiji cuéntá yávi núhu.

²² Ta quiahva já caja Ndióxi xihín ñayivi. Ín tiahva mé á jánaha nu ná ña xójo ndivaha ini a sahá cuachi na. Ta ín tiahva mé á jánaha nu ná ña cuu caja mé

á tóco ndihi ñaha. Joo ñacaja ndeé ini Ndióxi ta ñasandati a jándoho a ini ñayivi vatí ñanditahan nu ná ndoho ini na sahá cuachi na. ²³ Mé a ndaa táhnda ini Ndióxi sahá ñayivi ta cúni a jánaħa nu ná ña cáhnu ndivaha cúu mé á ta cúni a jánaħa nu ná ndá quiahva quíhvi ini a na. Andá sanahá ndivaha sácú ini a jánaħa nu yo ndá quiahva cáhnu cacuu yó nu mé á. ²⁴ Ñacaxi a ñayivi tañu na ñaquixi chichi Israel ta ñacaxi mé á ñayivi tañu na coó ñaquixi chichi Israel. Ta mí cúu yó na ñacaxi a. ²⁵ Já ñacachi Ndióxi já sanahá ta já ñacahyí Oseas ini tuhun Ndióxi:

Tandaa quívi caxi yehe ñayivi, na co cúu cuéntá mí i ta ndaja i na cuéntá mí i.

Ta na coó ñaquíhvi ini i jihna quíhvi ini i na viti.

²⁶ Ta sa mé nu ndúu ñayivi, na coó ñasacuu cuéntá Ndióxi,

cán cuħun mé á caxi a na ta caja ña ná nduu na cuéntá mé á jáchi cúu á in Ndióxi tácu, já cáchi tuhun mé á.

²⁷ Ta sahá na ñaquixi chichi Israel já ñacachi Isaías: “Vatí ndícuahá ñayivi Israel tá quiahva cuahá ñuti yuhú tañuhú joo chá va cacuu na cacu ndaa ínima. ²⁸ Jáchi jonáa va jáxinu coo Ndióxi tuhun a ta anda jávi caja víi a saħa tóco ndihi ñayivi ndúu ñuyívi”, ñacachi Isaías. ²⁹ Ta já ñacachi tucu Isaías já sanahá:

Tá quiahva ñacaja Ndióxi najándihi a sahá ñayivi ñuu Sodoma xihín ñuu Gomorra quiahva já caja Ndióxi jándihi a saħa yo, nduu.

Joo sahá ña ñatahvi ini Ndióxi sahá na Israel sahá ña cán quea coó najándihi a saħa ná, já cáchi tuhun Ndióxi.

Nditahan nuú na Israel candeé ini na Jesucristo

³⁰ Ña cán quea ndícani i nu ndo sahá ñayivi, na coó ñaquixi chichi Israel. Co ndínducú na nduu ndaa na nu Ndióxi joo tá ñacasahá na candeé ini na Jesucristo já ñacaja Ndióxi ña ná nduu ndaa na nu mé á. ³¹ Joo ñayivi Israel cája na ña sáhdá ley Moisés xihín ndinuhu ini na jáchi cáhan na cuu nduu ndaa na nu Ndióxi sahá ña sácú vaha na ley Moisés. Joo coó ñacuu nduu ndaa na nu Ndióxi xihín ña yoho. ³² Já

ñandoho na Israel jáchi ñanditahan nu ná candeé ini na Jesucristo. Xihín ndinuhu ini na cája na ña cáchi ley joo coó ñacuu nduu ndaa na nu Ndióxi xihín ñaha cája na. Ña cán quea cúu ná tátuhun in na ñacachihin saħa xihín yuu cáhnu. ³³ Jáchi cáchi tuhun Ndióxi ña cúu Jesucristo tátuhun yuu cáhnu nu cáchihin sahá ñayivi. Já cáchi tuhun Ndióxi já:

Nasacu yehe in yuu tóto cáhnu ñuu Sión ta xihín yuu cáhnu cán cuahá ná cachihin saħa.

Joo ndá na ná candeé ini mé a ñachindahá i, na cán cúu ná na a cáchan nuu, já ñacachi tuhun Ndióxi.

10

¹ Cuni joho vaha ndó, ñani i, na cúu cuéntá Jesús. Jáchi ndinuhu ini i xíca tahvi i nu Ndióxi sahá ñayivi Israel ña ná candeé ini na Jesús já ná cuu jácacu Ndióxi na nuú cuachi na. ² Mé a ndaa ná caħan i xihín ndo ña cája cáhnu na Israel Ndióxi xihín ndinuhu ini na joo coo cándaá cáxi ini na ña cúni Ndióxi caja na. ³ Jáchi coo xíni na ndaja cája Ndióxi ña ná nduu ndaa ñayivi nu mé á sahá ña cán quea ndúcú na nduu ndaa na nu mé á xihín ña cája mé va na. Ta coo cúni na ndiquiahva na mé ná ndáħa Ndióxi ña ná caja na ña ñasacu ini mé á caja na. ⁴ Coo xíni na ña ñaquixi Jesucristo ta ñaxihí a saħa yo já najáxinu coo a caja ña cáchi ley ña ná nduu ndaa tóco ndihi na candeé ini mé á.

⁵ Sanahá ndivaha ñacahyí Moisés sahá ñayivi, na cúni nduu ndaa nu Ndióxi xihín ley Moisés. Já cáchi a já: “Ndá na coo cómi cuachi nu Ndióxi, na cán cuu nduu ndaa nu mé á ta jácacu a na”, já ñacahyí da. ⁶ Joo tá ná jácacu Ndióxi mí sahá ña candeé ini mé á já quea coo xíni ñuhú cuħun yo indiví jánuu í Jesucristo ña ná nuu a chindeé a mí jáchi sa ñacaja mé á ña. ⁷ Ta coo xíni ñuhú cuħun yo nu ndúu ínima ndii ña ná ndiquehé Jesucristo tañu na sa ñaxihí jáchi mé Jesucristo sa ñanditacu tucu a. ⁸ Coo xíni ñuhú cuħun xíca nahá yo ndínducú yo Jesucristo jáchi ín yati ndivaha mé á nu yo jáchi ín a xoho. Ta mé tuhun cáħan nde yoho cúu á tuhun cáħan saħa Jesucristo já ná candeé ini ndó mé á. ⁹ Ta tá

cachún ña cúu Jesús xitohún ta tá cándúsún xihín ndinuhu ínimun ña najánditacu Ndióxi Jesús tañu na naxihí já quéa cuu cacu ndaa ínimun. ¹⁰ Jáchi tá cándéé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cáhan na xihín java ga ñayivi ña cándéé ini na mé á já quéa cuu cacu ndaa ínima ná.

¹¹ Já cáchi tuhun Ndióxi já: “Ndá na ná cándéé ini Jesús a xínu toho quivi cahán na ña najándahvi Ndióxi na.” ¹² In cúu tóco ndihi ñayivi nu Ndióxi. Tá quiahva jácacu Ndióxi na naquixi chichí Israel quiahva já jácacu a na coó naquixi chichí Israel. Jáchi sa mé Ndióxi cán cúu Ndióxi nu tóco ndihi ñayivi ta co ndáhvi cúu ini a quiahva ñaha nuú na xíca tahví nu mé á. ¹³ Já cáchi tuhun Ndióxi: “Ndá na ná cacá tahví nu Ndióxi ña ná chindeé a na, na cán cacu ndaa ínima.” ¹⁴ Ta ndaja caja na cacá tahví na nu Jesús tá ta cámani cándéé ini na mé á. Ta ndaja caja na cándéé ini na mé á tá a ñaha cuni johó na tuhun vaha cáhan saha Jesús. Ta ndaja caja na cuni johó na tuhun vaha saha Jesús tá cámani cuhun in na caxi tuhun na ña nu ná. ¹⁵ Ta ndaja caja na cuhun na cáhan na tuhun Ndióxi xihín ná tá ta co ín in na chindahá na cuhun na. Já cáchi tuhun Ndióxi já: “Ndaja ñúchí chá tá xínu coo na ñéhe tuhun vaha saha Ndióxi ña ná coo vaha í xihín mé á.”

¹⁶ Joo a juú ndihi ñayivi cándúsa tuhun Ndióxi. Ña yóho cúu á tá quiahva nacachi Isaías: “Ndióxi, mé ndó cúu ndó xitoho nde. Chá cuití ñayivi cándúsa tuhun nacahan nde xihín ná.” ¹⁷ Jáchi jihna ñúhú cáhan na tuhun vaha saha Jesucristo nuú ñayivi ta xihín ña xíni johó na cán jáxinu ini na xihín á. Anda jáví cásahá na cándéé ini na mé á ta cája na ña cúní a.

¹⁸ Á sa naxini johó na tuhun vaha cáhan saha Jesús. Ajan. Sa naxini johó na ña. Jáchi já cáchi tuhun Ndióxi já:

Nasahan na cahán na tuhun Ndióxi nuú ñayivi,
ta níí cúu sahá ñuyíví naxinu tuhun cáhan na, já cáchi tuhun Ndióxi.

¹⁹ Á nacandaa ini ñayivi Israel ña yóho. Ajan. Cándaa vaha ini ná ña. Jáchi já nacahí Moisés sanahá:

Ndióxi quéa nacachi a: Caja i ña ná candúsa na tóho yehe já ná cahihvi ini na Israel.

Ta cojo ini na xihín na tóho sahá ña cája i ña ná candúsa mé na tóho cán yehe, nacachi tuhun Ndióxi.

²⁰ Xihín ña yóho nasahan ndeé ini Isaías cahí da ña nacachi Ndióxi tá nacachi a já: Mé na co ndínducú yehe, na cán cúu na nandiñehé yehe.

Ta najánaha i mí i nu ná vatí coó nandaca tuhun na sahá i, nacachi tuhun Ndióxi.

²¹ Joo já nacachi Ndióxi sahá ñayivi Israel: “Níí tiempo cúní ndiquehe vaha i ñayivi Israel joo co cúní na quixi na nuú i jáchi sáa ini na ta co cúní na caja na ña cúní”, nacachi tuhun Ndióxi.

11

Cája Ndióxi ñamaní xihín ñayivi Israel

¹ Ta viti ná ndaca tuhún i ndohó ña yóho: Á cáhan ndo ña najándacoo ndáha Ndióxi ñayivi Israel. A juú ña ndaa cúu á jáchi sa mé yehe cúu u da Israel, da naquixi chichí Abraham ta naquixi i chichí Benjamín, da nasacuu jahyi ñání jícó Abraham. ² Janda mé saha nacachi Ndióxi ña nacaxi mé á na Israel cacuu na cuéntá mé á ta co cándají a na viti. Sa xíni ndó ña nacachi tuhun Ndióxi sahá da nasacuu profeta Elías. Mé da yóho tá naxíca tahví da nu Ndióxi já najácojo da cuachi jatá na Israel. ³ Já nacachi da já: “Cándehé ndo Ndióxi, xitoho i. Sa nasahní na profeta cuéntá mé ndó ta nandicaní na nu náa ndo. Ta viti nú laá in tuhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihín Ndióxi. ⁴ Ta já nacachi Ndióxi xihín dá: “A juú in tálaá yóho cája ña cúní jáchi ndúu yíi va usa mil taa cája ña cúní ta coó nacaxítí na nuú tñiñu yúú Baal”, nacachi Ndióxi xihín dá. ⁵ Quiahva já ín a viti. Ndúu chá na cája ña cúní Ndióxi jáchi nacaja Ndióxi ñamaní xihín ná ta nasacu ini a jácacu a na. ⁶ Nacaxi Ndióxi na jáchi natahvi ini a saha ná. Coó nasacuu a sahá ña nacaja na jáchi tá ná cacuu a sahá ña cája na já co cúu ga ñamaní Ndióxi ta ña yóho cúu ña cúní Ndióxi caja.

7 Ña cán quéa cuahá ndivaha ñayivi Israel coó nanduu ndaa na nu Ndióxi sahá ña ñacaja na jáchi nandaja táhyí na ínima ná. Joo na ñacaxi Ndióxi, na cán cúu na nanduu ndaa nu mé á. 8 Já cáhí tuhun Ndióxi já: “Co cúní na candúsa na Ndióxi sahá ña cán quéa ñasaji Ndióxi xíní túni ná chí in ndeé. Ta quiahva já ndaa na janda víti jáchi co cándaá ini na ña cáhan Ndióxi xihín ná.” 9 Já ñacahyí David sanahá: Ná cahán na ña cuahan vaha na ichí Ndióxi sahá cuahá ñaha cómi na, ta ná ndoho ini na sahá cuachi cája na.

10 Ta ná cuaá na já ná a cúní na, ta ná nditojo jata ná ní tiempo sahá ña vee ndójo na, ñacachi David.

Jácaçu Ndióxi na coó ñaquixi chichi Israel

11 Ta viti ná ndaca tuhún i ndohó ña yoho: Á cáhán ndo ña a cuú cacu ndaa ínima na Israel. A juú ña ndaa cúu á. Jáchi vatí sáá ini na Israel ta vatí co cúní na candeé ini na Jesús joo xihín ña ñacaja na yoho ñanuna nuú na tóho cuni johu na tuhun vaha saha Jesús ta já cuu cacu ndaa ínima ná nu mé á. Ta sahá ña yoho casahá na Israel cahihvi ini na xihín na tóho. 12 Ñacaja Ndióxi cuahá ñamaní xihín tóco ndihi na tóho jáchi ñacaja ña ná cuu ndihvi na íchi cuéntá mé á sahá ña najándacoo na Israel íchi cuéntá mé á. Joo cuaha chága ñamaní caja Ndióxi xihín tóco ndihí tá ná xinu quivi ndiquehe na Israel íchi cuéntá mé á.

13 Joo ín in ñaha ña cúní cahan i xihín ndo, na tóho. Ndióxi quéa ñachindahá yehe tañu ndohó, na coó ñaquixi chichi Israel ta chuun cáhnu ndivaha quéa ndójo i xíní i. 14 Jáchi ña cúní mí i quéa ná cahihvi ini na Israel xihín ndo sahá tuhun Ndióxi ta já ná ndinducú mé ná Ndióxi já ná cacu ndaa ínima na Israel nu Ndióxi jáchi mé ná cúu ná chichi nuú ñaquixi mí i. 15 Ñasacu xóo tóo Ndióxi na ñaquixi chichi Israel jáchi ñasacu ini a jándique táhan maní á tóco ndihi ñayivi ndúu ñuyíví xihín mé á. Ta tá ná xinu quivi casahá na Israel ndiquehe na tuhun Ndióxi cacuu a in ñaha ñúchí ndivaha. Cacuu a tátuhun casahá nditacu tucu na jáchi viti cúu ná tátuhun na ñaxihí jáchi coó ñaxeén na ndiquehe na tuhun Ndióxi. 16 Abraham ñasacuu da cuéntá Ndióxi ña cán quéa jahyi

da, na ñacacu chichi da cúu ná ñayivi cuéntá Ndióxi. Abraham, da cúu cuéntá mé á cúu dá tátuhun yoho in yitó olivo. Ta ñayivi ñacacu chichi da cúu ná cuéntá mé á ta cúu ná tátuhun ndaha mé yitó olivo cán.

17 Cúu á tátuhun ñasahnda Ndióxi java ndaha, dó vaha ta ñachitivi ndaa mé á ndaha yitó olivo yúcu mé nuú ñasahin ndaha cán. Ta viti quiahva dó ndeé nu ndaha yitó olivo yúcu cán ña ná catacu dó. Quiahva já ñacaja Ndióxi ñasacu xóo a na Israel ta ñacaja mé á ñamaní xihín mé ndó, na tóho já ná nduu ndó cuéntá mé á. Ta viti cája Ndióxi cuahá ñamaní xihín ndo tá quiahva cája xihín na Israel. 18 Joo ndohó, na cúu na tóho a cáhán ndo ña vaha chága mé ndó a juú ga na Israel. Co ndítahan cahán ndo já. Co cúu ndó tátuhun yoho yitó jáchi cúu ndó tátuhun ndaha do. Ta tá co yoho dá já quéa a cúu catacu ndaha do. Sahá ña cán quéa co ndítahan caja cáhnu ndó mé ndó.

19 A váha cahvi ini ndó ña náhnu chága mé ndó nu Ndióxi a juú ga na Israel sahá ña ñasacu xóo mé á na Israel ta ñasuna a íchi nu ndohó candeé ini ndó mé á. 20 Candehe ndo. Ñasacu xóo Ndióxi na Israel sahá ña coó ñacandeé ini na mé á ta ñandacaxi a ndohó sahá ña candeé ini ndó mé á ña cán quéa co ndítahan caja cáhnu ndó mé ndó. Ña ndítahan caja ndó quéa cayihvi ndo Ndióxi. 21 Xíní ñúhú ndicuhun ini ndó ña cuu jácaxoo tucu Ndióxi ndohó. Coó ñatahnda ini a jándacoo xóo a na Israel, mé na ñacaxi á. Sahá ña cán quéa cachí ga ví mé ndó, na tóho ndaa náha caja Ndióxi cacu xóo tucu a ndohó. 22 Candehe ndo jáchi táhvi ini Ndióxi sahá ñayivi tá candeé ini na mé á joo cuhe ndivaha mé á xihín na sáá ini. Ña cán quéa tá co candeé ini ndó mé á ta ní co quihvi ini ndó a já cacu xóo a ndohó tá quiahva ñacaja xihín na Israel. 23 Joo tá ná ndihvi na Israel íchi Ndióxi candeé ini na mé á já quéa ndiquehe tucu Ndióxi na jáchi cuu caja mé á tóco ndihi ñaha. 24 Nandiquehe Ndióxi ndohó vatí ñasanduu xicá ndó nu á ta nandaja mé á ndohó cuéntá mé á vatí cúu ndó na tóho. Mé ndó cúu ndó tátuhun ndaha yitó olivo, dó yúcu, dó ñachitivi ndaa Ndióxi tóco dó vaha. Ta ña yoho quéa a cúu coo já, nduu.

Joo ñacaja Ndióxi já xihín ndo. Ta ndáa náha cuu caja tucu Ndióxi xihín na Israel ña ndiquehe tucu a ña ta cacu tucu a ña nu ndahá yíto olivo, dó vaha nuú nasandaa na jihna.

Vaxi quivi tá candeé ini na Israel Jesús

²⁵ Ñani mí i, ña cúu cuénta Jesús. Cúni ña ná candaa ini ndó ña nasacu ini Ndióxi caja chága chí nuú já ná a cája cáhnu ndó mé ndó. Cuahá na Israel nandaja táhyi na ínimá ná ta co cúni ña ndiquehe na tuhun Ndióxi. Joo tá sa ñandiquehe ndihi na tóho, ña nasacu ini Ndióxi jácacu a anda jávi casahá na Israel ndiquehe na tuhun Ndióxi. ²⁶ Anda jávi cacu ndaa ínimá ndihi na Israel. Ta já cáhí tuhun Ndióxi sahá ña yóho:

Ñuu Sión quixi in da jácacu ñayivi Israel, ña ña quixi chichi Jacob ná a cája ga ña cuachi.

²⁷ Ta jándoo i cuachi ñacaja na, tá quiahva ñacachi i xihín ná caja i, cáhí Ndióxi.

²⁸ Tiempo viti cuahá ndivaha na Israel co cúni ña tuhun vaha saha Jesús sahá ña cán quea co cúni ña Ndióxi. Joo cája na ña yóho ña ná nuná nu ndóhó, ña tóho já ná cuu candeé ini ndó Ndióxi. Vatí cája ña Israel ña yóho joo quíhvi ini tá quíhvi ini Ndióxi ña sahá tuhun nasahan nu tásáhnu jícó ña.

²⁹ Tá sahan Ndióxi ña cáhí a quiahva nu yo já quea co ndímaní mé á nuú tuhun a ta co ndícó coo a cándaa ña sahan nu yo. Ta ni co ndícó coo ini a tá sa ñandacaxi a mí.

³⁰ Sáa nasahjin ini ndóhó, ña tóho sanahá joo viti ñacaja mé á cuahá ñamaní xihín ndó sahá ña sáa ini na Israel. ³¹ Ta vatí sáa ini ña Israel viti joo xihín ña yóho núná nu ndóhó, ña tóho ndiquehe ndó ñamaní Ndióxi. Joo vaxi quivi tá tahvi ini Ndióxi sahá ña Israel tá quiahva ñatahvi ini a saha ndóhó, ña tóho. ³² Ñachicaji Ndióxi xíní túni ña Israel xihín ña tóho ña ná nduu na ña sáa ini. Ñacaja Ndióxi ña yóho já ná cuu tahvi in nuú ini a saha tóco ndihi ñayivi.

³³ Cáhnu ndivaha cúu tóco ndihi ñaha Ndióxi. Ndíhí ndivaha jiní mé á ta cándaa ini a tóco ndihi ñaha. Ni in ñayivi a cuú ndicani na ña cáhvi ini Ndióxi. Ta ni in na a cuú candaa ini ña cája Ndióxi. ³⁴ Já cáhí

tuhun Ndióxi já: “Ni in ñayivi a cuú candaa ini na ña cáhvi ini Ndióxi. Ta ni in ñayivi a cuú jácahan ña mé á caja ña ndítahan caja. ³⁵ Coó ñayivi cája ñamaní xihín Ndióxi ña ná ndaca ña ña nu mé á”, cáhí tuhun Ndióxi. ³⁶ Jáchi Ndióxi quea ñacavaha tóco ndihi ñaha ta ndúu a saha mé á ta ndúu a cuénta mé á. Anda ama cáa quivi ná caja cáhnu í Ndióxi. Já ná coo.

12

Tácú yo caja chúun í cuénta Ndióxi

¹ Ñatahvi ini Ndióxi saha ndó, ñani mí i, ña cúu cuénta Jesús. Sahá ña cán quea xíca tahvi i nu ndo ña ná ndiquiahva ndó mé ndó ndahá Ndióxi já ná cacuu a tátuhun joco ndó mé ndó nu Ndióxi. Ta caja ndó tóco ndihi ña cúni Ndióxi caja ndó ña ná cajii ini a. Jáchi xihín ña yóho náha ña mé a ndaa táhyi cája cáhnu ndó Ndióxi ta ña yóho cúu á ña ndítahan nu ndó caja ndó.

² A cája ga ndó ña núu ña cája ñayivi ñuyiví. Quiahva ndó ñamaní nu Ndióxi ña ná ndaja víi a xíní túni ndo. Anda jávi candaa ini ndó ña cúni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúni mé á xihín ndinuhu ini ndó.

³ Ñacaja Ndióxi ñamaní xihín i tá ñacaxi a yehe. Ña cán quea cáhan i xihín ndihi ndó ña co ndítahan cáhan ndo ña cúu ndó ña náhnu ndivaha joo ná cahvi ini ndó ña ndaa saha mé va ndó. Ña ndítahan caja ndó quea coto ndojó ndo mé ndó jáchi nasacu ini Ndióxi ña ná candeé ini ndó mé á já ná cuu caja ndó ña cúni a. ⁴ Candehe ndó tá quiahva ín yiquí cuñu í. In túhún cúu yiquí cuñu í joo cuahá nuú ñaha ndáca ta sa jín sa jín chuun cája in in ña ndáca yiquí cuñu í. ⁵ Quiahva já ín tóco ndihí, ña cúu cuénta Jesús. Sa jín sa jín chuun cája in in í joo in va cúu yo xihín Jesucristo. Ta sa jín sa jín chuun cája in in í.

⁶ Sa jín sa jín chuun nasahan Ndióxi nuú in in í caja í ta mé á nasacu ini a ndá chuun quea quiahva nuú in in í. Sahá ña cán quea tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi candeé ini ndó a. ⁷ Ta tá nasahan Ndióxi chuun nu ndó ña

na chindeé ndó ñayivi já quéa ndítahan nu ndó chindeé vaha ndó na. Ta tá nasahan Ndióxi chuun nu ndó jánaha ndó ñayivi já quéa ndítahan nu ndó jánaha vaha ndó na. ⁸Tá ta nasacu Ndióxi ini ínimá ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jásá ndo nuú ñayivi xíní ñúhú cajii ini ndó jasá ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajii ini ndó chindeé ndó na.

Ña ndítahan caja na cúu cuéntá Jesús

⁹Xihín ndinuhu ini ndó quihvi ini táhan ndó. Candají ndó ña núu ta caja ndó ña vaha xihín ndinuhu ini ndó. ¹⁰Xíní ñúhú quihvi ini ndó na cúu cuéntá Jesús jáchi cúu ná tátuhun na vehe ndó ta cajii ini ndó tá caja cáhnu táhan ndó.

¹¹Nducú ndeé ndo ta a cácuu ndó na jusá ta xihín ndinuhu ini ndó caja chúun ndó cuéntá Ndióxi, xitoho í.

¹²Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiahva ndeé vaha ini ndó tá ndóho ini ndó ta a jándacoo ndó ña cacá tahví ndo nu Ndióxi.

¹³Ndá ñaha ndímani nuú java ga na cúu cuéntá Jesús ná chindeé ndó na. Ta ndiquehe vaha ndó ñayivi xito nihni ndohó.

¹⁴Cacá tahví ndo nu Ndióxi sahá na cája xíxi xihín ndo ña ná caja Ndióxi ñamani xihín ná. Cacá tahví ndo nu Ndióxi saha ná ta a chícaan ndó cháhan jata ná.

¹⁵Cajii ini ndó xihín na cájii ini ta cuacu ndó xihín na sácu.

¹⁶In nuú quihvi ini táhan ndó. A cája ichi ini ndó. Ña ndítahan caja ndó quéa jánuu ndáha ndó mé ndó xihín ñayivi ndáhví, na co ndíñehe jícó mé. Ta a cáhan ndo ña cúu ndó na ndíchí ndivaha.

¹⁷Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo. ¹⁸A ndúcú ndo cani táhan ndó xihín ñayivi ta ndihí ini ndó coo vaha ndó xihín ndihi na. ¹⁹Ñani mí i, na cúu cuéntá Jesús. Tá cája xíxi na xihín ndo a ndúcú ñehe toho ndó ña núu nu ná jáchi cojo

ini Ndióxi xihín na cája já ta ndítahan nu mé á jándoho a ini na. Já cáchi tuhun Ndióxi: “Yehe ndítahan nuú jándoho i ini ñayivi, na cája ña núu”, cáchi Ndióxi. ²⁰Vaha chága ná caja ndó ña cáchi tuhun Ndióxi: “Tá cuíco ñayivi, na co cúní ndohó quiahva ndó ná cuxu na. Ta tá ichi ini na co cúní ndohó quiahva ndó ticuí nu ná coho na. Tá ná caja ndó ña yóho já quéa cacahan nuú na cán sahá ña núu cája na xihín ndó.” ²¹A quiahva ndó ñamani quee vaha ña quini xihín ndó. Ña ndítahan caja ndó quéa caja ndó ña vaha já ná cuu quee vaha ndó cahnu ndó ña quini.

13

¹Xíní ñúhú coo johó ndó nuú ña cáhan na jutixia xihín ndo. Jáchi sahan Ndióxi ñamani nuú na cán cahnda na chuun nuú ñayivi. Tá mé Ndióxi quéa nasacu a na. ²Ta ndá na co cúní cuni johó nu sáhdá na jutixia cúu ná na sáji nuu nu Ndióxi jáchi Ndióxi quéa nasacu a na cán. Ta ndá na co cúní caja ña sáhdá na ndoho ini na. ³Jáchi coo nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cúní ndó cayihví ndo na jutixia xíní ñúhú caja ndó ña vaha já ná cajii ini na jutixia xihín ndo. ⁴Nasacu Ndióxi na jutixia ña ná chindeé na ndohó. Joo tá cája ndó ña núu já quéa xíní ñúhú cayihví ndó na jáchi mé na cán cahnda na chuun ña ná chahvi ndó sahá ña núu cája ndó. Sahá ña cán nasacu Ndióxi na ña ná jándoho na ini na cája ña núu. ⁵Ña cán quéa ndítahan nu ndó caja ndó ña sáhdá na jutixia já ná a jándoho na ini ndó jáchi sa náha mé va xíní túní yo cahan xohó ña xíní ñúhú candúsa í ña sáhdá na jutixia nu yo. ⁶Sahá ña cán quéa chahvi ndó jjuhún cuéntá impuesto jáchi sa xíní ndó ña ndítahan nu ndó chahvi ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

⁷Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú na jataca ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihín. ⁸A cáyicá ndo ñaha nuú ni in ñayivi.

Ña ndíyicá ndo quea quihvi ini táhan ndó. Jáchí ndá na quihvi ini ñayivi, na cán cúu na cája ña sáhdá ley Moisés. ⁹ Jáchí tá quihvi ini ndó ñani táhan ndó já quea a ndiáva ini ndó cajú ndó ña núu xihín na. Ta a cáhvi ini ndó coo ndó xihín ñájíhí ñani táhan ndó. Ta a cáhni ndó ndíi. Ta a cáhvi ini ndó cajú cuíhná ndo ñaha inga na. Ta ni a ndiáva ini ndó cacomí ndo ñaha cómi inga na. Tá quihvi ini ndó ñani táhan ndó já quea cúni cachi a ña cája ndó ña sáhdá ley Moisés tá cáhí a já: “Quihvi ini ndó ñani táhan ndó tá quiahva quihvi ini ndó mé ndó.” ¹⁰ Ndá na quihvi ini ñani táhan, na cán cúu na cája vaha xihín ñani táhan na. Ña cán quea tá quihvi ini ñani táhan í já quea jáxinu yó nuú ña sáhdá ley Moisés.

¹¹ Saha tóco ndihi ña cáhan í xihín ndo yóho xíní ñuhú candehé ndo ndá quiahva cáa tiempo ndúú viti. Xíní ñuhú ndicáxi vaha ini ndó cajú ndó ña cúni Ndióxi jáchi viti sa nacayati chága quivi jácacu Ndióxi mí a juú ga tá jacá nacandúsa í tuhun Ndióxi. ¹² Cúu á tátuhun ja chá cúni vaha ñuu ta casáhá tivi yaa. Ña yóho cúni cachi a ña sa nacayati quivi quixi tucu Jesucristo. Ña cán quea xíní ñuhú jándacoo í ña núu cája í tátuhun cája ñayivi xíca nuu naá. Ta xíní ñuhú cajú í ña vaha já quea quee vaha í xihín ña núu. ¹³ Ndísáhnú ná coo iní cajú í tóco ndihi ñaha tátuhun cúu yó na ndúu nu yehe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva iní coo í xihín najihí. Ta a ndúcú yo caní táhan í xihín ñani táhan í ta ni a cáhiví iní xihín ná. ¹⁴ Ña ndítahan cajú í quea caca chága yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quiahva ndó ñamaní nuú yiquí cuñu ndó cajú ña núu.

14

Có ndítahan candehé ndaa táhan í

¹ Ndiqeehe vaha ndó na cúu cuéntá Jesús vatí co cánda vaha ini na ña jánaa tuhun Ndióxi. Ta a cáni táhan yúhu ndó xihín ná sahá ña cándúsa na. ² Ín java na cúu cuéntá Jesús cáhan na ña cuu cuxu na cuñu, ña najoco na nuú yoco. Joo java na cúu cuéntá

Jesús, na saá xihín tuhun Ndióxi cáhan na ña a cúu toho cuxu na cuñu, ña najoco na nuú yoco sahá ña cán quea co xíxi na ña. ³ Na xíxi mé cuñu cán co ndítahan nu ná candehé ndaa na na co xíxi ña ta na co xíxi cuñu cán co ndítahan nu ná candehé ndaa na na xíxi ña. Jáchí ndíquehe vaha Ndióxi ndiví na cán vatí sa jii cáhan na. ⁴ Ta quiahva já co ndítahan nu ndó candehé ndaa ndó mozo ñani táhan ndó á cája vaha da á co cája vaha da nuú xitoho da. Vaha ri cajú vaha da tá vaha ri co cája vaha da jáchi mé va xitoho da cán xíní sahá ña cán. Joo cuu cajú Ndióxi ña ná candoo vaha mozo cán nuú xitoho da.

⁵ Java ñayivi cáhí na ña ín quivi náhnú chága nuú java ga quivi. Ta java na cáhí na ña in cúu tóco ndihi quivi. Ta ndítahan nuú in in na caxi na ña cáhvi ini na sahá ña yóho.

⁶ Tá sácú ini na caxi na in quivi cajú cáhnú na Ndióxi ta vaha va cája na. Ta tá cáhan na cuu cajú cáhnú na Ndióxi ndá quivi nacuu va ta vaha ri já va. Ta vatí xíxi na cuñu, ña sa najoco na nuú yoco á co xíxi toho na ña joo ndiquiahva na ndixahvi nu Ndióxi sahá ta xihín ña yóho cája cáhnú na mé á.

⁷ Ni in yó co tácu saha mí ta ni in yó co xíhi saha mí. ⁸ Ta tá tácu yo á tá naxihí yo mé a ndaa cúu yó na cómi Ndióxi cuéntá saha ta cúu mé á xitoho í. ⁹ Saha ña cán quea naxihí Jesucristo ta nanditacu tucu a já nanduu a xitoho ñayivi, na tácu xihín na sa naxihí.

¹⁰ Ña cán quea a váha toho cája ndó tá sándehe ndaa ndó ñani táhan ndó. A váha cajú ndó candají ndó na jáchi vaxi quivi ndique táhan ndihí candita í nu Ndióxi ña cajú víi a saha yo. ¹¹ Jáchí já cáhí tuhun Ndióxi já:

Yóho ín í cáhí í xihín ndo ña xinu quivi ndica xítí tóco ndihi ñayivi nuú í, ta casáhá na cajú cáhnú na yehe, ña cúu Ndióxi, cáhí Ndióxi, xitoho í.

¹² Jáchí ndítahan nuú in in í ndiquiahva í cuéntá sahá ña nacaja í nu Ndióxi.

A cája ndó ñaha ña cuu jándicava ñayivi nuú cuachi

¹³ Saha ña cán quea co ndítahan candehé ndaa táhan í. A cácu ini ndó cajú ndó ñaha, ña cuu jándacava na cúu cuéntá Jesús nuú cuachi ta já ná jándacoo na ña cándeé ini

na Ndióxi. ¹⁴ Sahá ña cándeé ini i Jesús, xitoho i sahá ña cán quéa cándaá vaha ini i ña co cája i cuachi tá xíxi i ña najoco na nuú yoco. Joo tá ndúu na cáhán ña a váha toho cuxu na ña já quéa co ndítahan cuxu na ña jáchi cuu candojo na cuachi sahá tá ná cuxu na ña. ¹⁵ Joo tá ndíhivi ñanún, na cúu cuéntá Jesús sahá ñaha xísún já quéa cúni cachi a ña cándajún na. Cuéntá coún ná a cájún ña ndicava na cán nuú cuachi sahá ña xísún jáchi cúu ná na naxihí Jesucristo saha. ¹⁶ Vatí cándaá ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi sahá ña cája ndó. ¹⁷ Jáchi a juú sahá ña xíxi ni sahá ña xíhí cacomí Ndióxi cuéntá saha yo. Ña cúni Ndióxi caja í quéa ná canduu ndaa yo nu mé á ta ná coo vaha ini xihín ñayivi ta ná cajii ini. Tóco ndihi ña yóho cúu á ña quixi nu ínimá yii Ndióxi. ¹⁸ Tá ná caja ndó ña yóho já quéa caja cáhnu ndó Jesucristo ta cajii ini Ndióxi caja ndó ta candoo vaha ndó nuú ñayivi.

¹⁹ Ña cán quéa xíní ñuhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi. ²⁰ Nasacu ini Ndióxi jácaacu a ñayivi sahá ña cán quéa coto a cáji nuu ndó nuú ña cúni Ndióxi caja sahá ñaha xíxi ndó. Mé a ndaa tóco ndihi ñaha cúu á ña vaha cuxú. Ña co váha quéa jándacava í ñayivi nuú cuachi sahá ña xíxi. ²¹ Vaha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú cuachi. ²² Tá ta cándaá cáxi ini ndó ña co cája ndó cuachi nu Ndióxi, a ndícani ndó ña nuú java ga ñayivi. Jáchi tahví nacuu ñayivi tá xíní na co cája na cuachi nu Ndióxi. ²³ Joo ndá na ndúcú cuxu in ñaha ta cáhvi ivi johó ini na xihín á tá xíxi na ña já quéa xínu cuachi jatá ná. Jáchi ndá ñaha nacuu ná caja í ta tá ta cándúsa yó ña cúu á cuachi já quéa xínu a cacuu a cuachi nu yo.

15

Chindeé ndó na cáhvi ivi johó ini

¹ Tá ndacú cuahan yó xihín tuhun Ndióxi já quéa co ndítahan cacu xóo í na vitá xihín tuhun Ndióxi. A ndúcú ndo caja ndó ña

jándivaha ini mé cuití va ndó. ² Tóco ndihi xíní ñuhú caja í ñaha ña táhan ini ñani táhan í xihín. Ta xíní ñuhú caja í ña já ná chindeé yó na ña ná canduu vaha na ta já ná cuu cuahnu chága na xihín tuhun Ndióxi. ³ Jáchi mé Jesucristo coo nanducú a caja ña táhan ini mé cuití a. Ña nacaja mé á quéa najaxinu coo a nuú tuhun Ndióxi tá nacachi a já: “Tuhun núu ña najácana na nu mé ndó naxinu ri a jatá yehe viti.” ⁴ Tóco ndihi ña nacayhi nuú tuhun Ndióxi sanahá nacayhi a já ná jánaha nu yo ña co ndítahan ndicani ini. Ta, náha ña ndítahan quiahva tuhun ndeé ini ñani ndátí jáxinu Ndióxi tuhun nasahan nu yo. ⁵ Ndióxi quéa sahan ndeé nu yo ña ná coo cáhnu ini ta sa mé á sahan tuhun ndeé ini. Ña cúni Ndióxi quéa chindeé a ndohó caja ndó tá quiahva nacaja Jesucristo ta já in ná nduu xihín táhan ndó. ⁶ Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

Xíni johó na coo naquixi chichi Israel tuhun vaha saha Jesús

⁷ Ndiqhehe vaha ndó tóco ndihi na cúu cuéntá Jesús tá quiahva nandiquehe vaha Jesucristo ndohó já ná ndicáhnu Ndióxi. ⁸ Ndítahan ndicuhun ini ndó ña naquixi Jesucristo chindeé a ñayivi Israel. Ta naquixi a jánaha nu ná ña mé a ndaa táhyí jáxinu coo Ndióxi tóco ndihi nuú tuhun ña nasahan nuú tásáhnu jícó yo jáchi co ndímaní Ndióxi nuú tuhun a. ⁹ Ta naquixi a jácaacu a ñayivi, na coo naquixi chichi Israel ña ná caja cáhnu na mé á sahá ñamaní nacaja mé á xihín ná. Jáchi já cáhí tuhun Ndióxi:

Yehe xihín na coo naquixi chichi Israel caja cáhnu nde ndohó, Ndióxi,

ta yehe cata i nu ndo caja cáhnu i quivi ndo.

¹⁰ Ta íin inga tucu nu cáhí a já:

Ndohó, na coo naquixi chichi Israel xíní ñuhú ndique táhan ndó cajii ini ndó xihín na naquixi chichi Israel.

¹¹ Anda já nacachi tucu a já:

Tóco ndihi ndó, na coo naquixi chichi Israel caja cáhnu ndó Ndióxi, xitoho í, ta ná a jándacoo toho ndihi ñayivi caja cáhnu na Ndióxi.

12 Tá naçahyí Isaías nuú tuhun Ndióxi já naçahyí da tuhun yóho:

Vaxi quivi cacu in da chichi Isai,
ña ná cacomí da cuéntá sahá ñayivi, na coó
naquixi chichi Israel.

Ta mé ñayivi yóho candeé ini na mé da
quixi chichi Isai cán.

13 Ndióxi quéa cája ña ná candeé ini ndó
mé á ta já cuu jácacu a ndohó. Ná caja mé
á ña ná ndicutú ini ndó xihín ña cájii ini
ndó ta ná caja mé á ña ná coo vaha ini ndó
jáchi candeé ini ndó a. Xihín ndée ínima yii
Ndióxi ná quiahva mé á cuaha ndée nu ndó
candeé chága ini ndó a.

14 Cándehé ndó ñani i, na cúu cuéntá
Jesús. Sa xini vaha i ña nachutú ndo xihín
ña vaha ta cándaã vaha ini ndó tuhun
Ndióxi. Ta xihín ña jan cuu jánaã táhan
ndó. 15 Joo tá naçahyí i carta yóho nu ndo
já naçaja ndeé ini i cáhyi i saha java ñaha
jáchi co cuni ña ná ndindójó ndo ña. Cáhyi
i ña yóho jáchi naçaja Ndióxi ñamanj xihín i
16 cája chúun i cuéntá Jesucristo cáxi tuhun
i tuhun vaha saha mé á nuú ñayivi, na coó
naquixi chichi Israel. Ta cúu u tátuhun jutú
jáchi xica i cahan i tuhun Ndióxi xihín ná já
ná cuu cacu ndaa ínima ná. Cúu á tátuhun
jóco i na nu Ndióxi já ná cajii ini mé á xihín
ná ta já ná cuu ndaja ínima yii mé á ña ná
nduu na ñayivi vii nu mé á.

17 Ta sahá ña cándusa i Jesucristo sahá ña
cán quéa ndivaha ini i caja chúun i cuéntá
Ndióxi. 18 Jáchi sahan ndeé ini i cahan i sahá
ña naçaja Jesucristo tá naçaja chúun mé á
yehe ña candaca i na coó naquixi chichi
Israel ña ná caja na ña cuni Ndióxi. Ta
sahá ña naçahan i xihín na cán já naxini
joho na ta naçaja na ña cáchi tuhun Ndióxi.
19 Ta sa naxini na ña xituhún xihín ña náhnu
ndivaha naçaja i nu ná xihín ndée ínima
yii Ndióxi. Ta quiahva já naçaxi tuhun
i tuhun vaha saha Jesucristo nuú ñayivi
ndúu ñuu Jerusalén xihín nu tóco ndihi na
ndúu ndijáá ñuu anda estado Ilírico. 20 Ña
ndúcú u caja i quéa cahan i xihín ñayivi ña
cuni Ndióxi jácacu a na. Ta sá cahan i ña
yóho nuú ñayivi, na a ñaha cuni joho saha
Jesucristo jáchi co cuni ndiquehe e chuun ña
sa najácava sahá inga na. 21 Cáhyi ini i ña
vaha chága ná cuhun i nuú ñayivi, na coó

naxini joho tuhun vaha saha Jesús jáchi já
cáchi tuhun Ndióxi já:

Vatí coó naxini joho na tuhun vaha saha
mé á joo vaxi quivi xinu coo na
cahan xihín ná,

ña ná cándaã ini na ña coó naçandaã ini na
jihna, cáchi tuhun Ndióxi.

Sácú ini Pablo cuhun da ñuu Roma

22 Ta sahá chuun cája i yóho coó naçuu
saa i coto nihni i ndohó vatí sa cuahá tañu
nasacu ini i saa i jan. 23 Joo viti sa najándihi
i chuun naçaja i tañu ñayivi ndúu yóho.
Ta sa cáhyi ini i saa i coto nihni i ndohó
anda sanahá. 24 Sahá ña cán quéa sácú
ini i saa i coto nihni i ndohó tá ná yaha i
cuhun i chí España. Ta tá ná ndihi cajii ini i
cuni i ndohó anda jáví ndiquehe tucu u íchi
cuhun i. Joo cuni ña ná chindeé ndó yehe
já ná cuu ndiquehe tucu u íchi cuhun i.
25 Joo viti cuhun i chí ñuu Jerusalén chindeé
na cúu cuéntá Jesús ndúu cán. 26 Jáchi na
cúu cuéntá Jesús ndúu estado Macedonia
xihín na ndúu estado Acaya nasacu ini na
játaca na jihún ta chindahá na ña nuú na
cúu cuéntá Jesús, na cándahví ndúu ñuu
Jerusalén. 27 Mé na tóho yóho nasacu ini
na caja na ña ta vaha cája na jáchi cáhan
na ña ndítahan nu ná chahvi na sahá ña
naçaja na Israel, mé na cúu cuéntá Jesús
ndúu ñuu Jerusalén xihín ná. Jáchi nasahan
na Israel naçaxi tuhun na tuhun vaha saha
Jesús nu ná. Ta viti ndúcú ñehe na tóho yóho
ñamanj naçaja na Israel xihín ná. Ña cán
quéa chindeé ñahá na toho xihín ña cómi
na. 28 Ta tá sa najándihi i caja i chuun
yóho ta tá sa nandihí ndiquiahva i jihún
nataca na tóho nuú na cúu cuéntá Jesús
ndúu ñuu Jerusalén anda já nuná nuú i
cuhun i España ta já yaha i jan coto nihni
i ndohó. 29 Ta xini vaha i ña tá ná saa i
jan caja Jesucristo cuahá ñamanj xihín ndo
sahá tuhun vaha cahan i xihín ndo.

30 Xica tahví i nu ndo ñani mí i, na cúu
cuéntá Jesús, ña in nuú ná caça tahví yo nu
Ndióxi sahá chuun cája i. Jáchi candeé ini
ndó Jesucristo ta quihvi ini ndo yehe naçaja
ínima yii Ndióxi. 31 Caça tahví ndo nu á
ña ná chindeé a yehe ná a cája ñayivi, na
co cándusa Ndióxi ndúu estado Judea ni in
ñaha xihín i. Ta caça tahví ndo nu Ndióxi

ña ná candúsa na cúu cuéntá Jesús ndúu ñuu Jerusalén cán ndiquehe vaha na jiuhún ñéhe cuahan i nu ná. ³² Já queá tá ná cúní Ndióxi já caji ini i saá i coto nihni i ndohó ta ndiquehe ndeé e nani xíto nihni i ndohó. ³³ Ndióxi ná coo xihín ndo ta ná caja mé á ña ná coo vaha ini ndó. Já ná coo.

16

Chíndahá Pablo Ndióxi coo na ndúu ñuu Roma

¹ Já chá va casaá ñá naní Febe, ñá cúu cuéntá Jesús nu ndo. Mé Febe yóho nacaja chúun ñá veñuhu Cencrea. ² Caja ndó ñamaní ndiquehe vaha ndó ña sahá ña cúu ñá cuéntá Jesús, xitoho í ta já ndítahan caja na cándéé ini Jesús. Chindeé ndó ña yóho xihín ndihi ñaha ña cámaní nu ña jáchi nachindeé ña cuahá ndivaha ñayivi ta nachindeé ri ña yehe va.

³ Chíndahá i Ndióxi coo Priscila xihín Aquila jáchi in cúu ná xihín i cája chúun na cuéntá Jesucristo. ⁴ Mé na yóho nasahin tiahva na quivi na já ná cuu cacu yehe tá naquixi tondohó nuú i. Ta a juú in túhún yehe ndiquiahva ndixahvi nu ná vaha. Tóco ndihi na cúu cuéntá Jesús, na coo naquixi chichi Israel ndiquiahva na ndixahvi nu ná. ⁵ Ta jári chíndahá i Ndióxi coo na cúu cuéntá Jesús, na ndique táhan vehe Priscila xihín Aquila. Ta cahan Ndióxi ndó xihín Epeneto jáchi quíhvi ndivaha ini i da. Mé dá nasacuu da nu cuítí nandihvi íchi cuéntá Jesús estado Acaya. ⁶ Ta cahan Ndióxi ndó xihín María, ña chindeé cuahá ndohó. ⁷ Ta chíndahá i Ndióxi coo Andrónico xihín Junias. Ndíví da yóho cúu dá da naquixi chichi nuú naquixi mí i. Ta in nasañuhu nde vecaa xihín dá. Ta cúu dá da náhnu tañu na apóstol. Ta jihna ñúhú ndíví mé da yóho nacasahá cándúsa da Jesucristo a juú ga yehe.

⁸ Ta cahan Ndióxi ndó xihín Amplias jáchi quíhvi ndivaha ini i da. Ta in cúu nde cuéntá Jesús. ⁹ Ta chíndahá i Ndióxi coo Urbano. In cúu mé dá xihín nde cája chúun da xihín nde cuéntá Jesucristo. Ta chíndahá i Ndióxi coo Estaquis, da quíhvi ndivaha ini i. ¹⁰ Ta chíndahá i Ndióxi coo Apeles jáchi cuahá tañu najánaha da nuú ñayivi ña mé a ndaa táhyí cándéé cáhnu ini da Jesucristo.

Ta quiahva já chíndahá i Ndióxi coo na vehe Aristóbulo. ¹¹ Ta cahan Ndióxi ndó xihín Herodión jáchi in naquixi nde chichi Israel. Ta cahan Ndióxi ndó xihín na vehe Narciso jáchi cándúsa na Jesús, xitoho í. ¹² Ta cahan Ndióxi ndó xihín Trifena ta xihín Trifosa, na cája chúun cuéntá Jesucristo, xitoho í. Ta cahan Ndióxi ndó xihín Pérsida, jáchi quíhvi ndivaha ini i ña ta cuahá ndivaha nacaja chúun ña cuéntá Jesucristo, xitoho í. ¹³ Ta cahan Ndióxi ndó xihín Rufo jáchi cúu dá da cáhnu ndivaha tañu na cúu cuéntá Jesús. Ta cahan Ndióxi ndó xihín náná da jáchi cúu ña tátuhun náná mí i viti. ¹⁴ Ta chíndahá i Ndióxi coo Asíncrito xihín Flegonte xihín Hermas xihín Patrobas xihín Hermes. Ta chíndahá i Ndióxi coo tóco ndihi na cúu cuéntá Jesús ndúu xihín na cán. ¹⁵ Ta cahan Ndióxi ndó xihín Filólogo xihín Julia xihín Nereo ta xihín quiahva da. Ta cahan Ndióxi ndó xihín Olimpás ta xihín tóco ndihi na cúu cuéntá Jesús ndúu xihín na cán.

¹⁶ Ña cúní queá ná cahan Ndióxi xihín táhan ndó ta ná tatí yúhu táhan ndó ta yíi caja ndó ña. Tóco ndihi na cúu cuéntá Jesús, na táca veñuhu yóho chíndahá na Ndióxi coo ndihi ndó.

¹⁷ Cándehé ndó ñani mí i, na cúu cuéntá Jesús. Xíca tahví i nu ndo ña ná coo cuéntá ndó xihín na catóo ndicahnda ñayivi, na cúu cuéntá Jesús jáchi sáji nuu na nuú na cája ña cúní Ndióxi. Ña cája na jan queá cáxoo na nuú ña najánaha nde nu ndo. Coto a catáhan ndó xihín ná. ¹⁸ Jáchi mé na yóho co cúu ná na cája chúun cuéntá Jesucristo, xitoho í. Ña cája na queá ndúcú na ña vaha mé cuití va na. Ta xihín tuhun ñúchí ta xihín tuhun víi jándahvi na ñayivi, na co tácu vaha ini. ¹⁹ Tóco ndihi ñayivi xíní na ña cája ndó ña cúní Ndióxi ña cán queá caji ndivaha ini i. Ña cúní queá ná nahá ndó ña ndíchí jini ndo xihín ña vaha cája ndó. Ta a cáñuhu ini ndó caja ndó ña núu. ²⁰ Yachi chá jándihi Ndióxi sahá Satanás, rí cúu tiñáhá sacuaña ta já cuu cahnu ndó ri xihín ndeé Ndióxi. Cacuu a tátuhun chiníhni saha ndó ri. Ná caja Ndióxi ña ná coo vaha ini ndó. Ta ná caja cuahá Jesucristo, xitoho í ñamaní xihín ndihi ndo.

²¹ Chíndahá Timoteo Ndióxi coo ndó ta in cúú dá cája chúun da xihín i. Ta chíndahá ri Lucio xihín Jasón xihín Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

²² Yehe naní Tercio ta cáhyí i carta yóho ta chíndahá ri yehe va Ndióxi coo ndó cuéntá Jesucristo, xitoho í.

²³ Chíndahá Gayo Ndióxi coo ndó. Vehe mé dá ín i ta sa mé yóho táca na cúú cuéntá Jesús. Ta chíndahá ri da naní Erasto Ndióxi coo ndó. Mé Erasto cómi da cuéntá sahá jjuhún ñuu yóho. Ta chíndahá ri Cuarto, da cúú cuéntá Jesús Ndióxi coo ndó.

²⁴ Ná caja cuahá Jesucristo, xitoho í ñamaní xihín ndihi ndó. Já ná coo.

Cája cáhnu Pablo Ndióxi

²⁵ Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha saha Jesús ña jánaha nde nu ndo. Anda sanahá tá cámani cava sahá saha ñuyíví nasacu ini Ndióxi jácaacu a ndohó ta viti naxinu quíví jánaha mé á ña nu ndo. Nahá ndivaha nasahin jehé tuhun vaha saha Jesús. ²⁶ Ta viti cándaá iní ña nacahan Ndióxi saha Jesús nuú na profeta ta na yóho nacahyí na ña nuú tutu. Ta nasahnda Ndióxi chuun nuú na cúú cuéntá mé á ña ná cuhun na caxi tuhun na ña nu tóco ndihi ñayivi ndúu ñuyíví. Ta xihín mé ña yóho nacaja Ndióxi ña ná cuu candeé ini ñayivi mé á ta já ná caja na ña cúni a, mé a tácu anda ama cáa quívi.

²⁷ Ta mé cuití va cúú Ndióxi ta mé cuití va ndichí jiní sahá ña cán queá ndítahan caja cáhnu yó a anda ama cáa quívi sahá ña nacaja Jesucristo, xitoho í. Já ná coo.

Carta nu cuití nacahyí Pablo nuú na cúu cuéntá Jesús ndúu ñuu Corinto

*Cáhan Ndióxi Pablo xihín na cúu cuéntá
Jesús ndúu ñuu Corinto*

¹ Yehe cúu Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani Sóstenes ² chindahá nde Ndióxi coo ndó, na cúu cuéntá Jesús ndúu ñuu Corinto jan jáchi in cúu ndó xihín Jesucristo. Mé Ndióxi nacaxi a ndohó cacuu ndó ñayivi yí, na nandiquiahva mé ná ndáha mé á. Ta quiahva já nacaxi ri a java ga na ndúu ndijáá ñuu cacuu na cuéntá mé á, na cája cáhnu Jesucristo, xitoho í jáchi cúu ri a xitoho mé ná. ³ Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

*Ñamaní cája Ndióxi xoho sahá ña cándeé
iní Jesucristo*

⁴ Ní tiempo ndíquiahva i ndixahvi nu Ndióxi jáchi nacaja mé á cuahá ñamaní xihín ndo sahá ña cándeé ini ndó Jesucristo. ⁵ Ta sahá ña in nanduu ndó xihín mé á sahá ña cán queá nacaja Ndióxi cuahá ñamaní xihín ndo já ná cuu cahán vaha ndó saha mé á. Ta já nasuná a xíní túní ndo já ná candaa vaha ini ndó saha mé á. ⁶ Ta ña nacachi i xihín ndó sahá Jesucristo naxinu a ini ndó ta viti cája ndó ña cúní mé á caja ndó. ⁷ Ta viti nani ndáti ndó quiví quixi tucu Jesucristo, xitoho í ñuyiví yóho ni in túhún toho ñaha a ndímaní nu ndo ña ná caja ndó ña cúní Ndióxi jáchi nasahan mé á tóco ndihi ñaha nu ndo. ⁸ Mé Ndióxi chindeé a ndohó já ná caca tuun ndó íchi cuéntá mé á janda quiví nu ndíhí. Ta já ná a cúu chícáan ñayivi cuachi jata ndo tá ná xinu coo quiví quixi tucu Jesucristo, xitoho í ñuyiví yóho. ⁹ Jáchi cája tá cája Ndióxi ña sahan mé á tuhun a caja. Ta mé á queá nacaxi a mí ña ná in cacuu xihín Jesucristo, xitoho í ña cúu in túhún jiní já jahyi mé á.

Tává xoo java na cúu cuéntá Jesús mé ná

¹⁰ Candehé ndo, ñani mí i, na cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan víi tuhun ndihi ndó ta a cáhndá táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jiní ndihi ndó. ¹¹ Candehé ndo, ñani mí i, na cúu cuéntá Jesús. Cáhan i ña yóho xihín ndo jáchi nacaxi tuhun na vehe Cloé xihín i ña ndaja mé ndó cáni táhan ndó. ¹² Jáchi nañehé e tuhun ña java ndó cáchi ndo ña cúu ndó cuéntá yehe, da cúu Pablo. Ta java ndó cáchi ndo ña cúu ndó cuéntá Apolos. Ta java ndó cáchi ndo cúu ndó cuéntá Pedro. Ta java ndó cáchi ndo cúu ndó cuéntá Jesucristo. ¹³ Ta xihín ña yóho ña cája ndó queá sáhndá java táhan ndó. Candehé ndo. Coó naxihí i, da cúu Pablo ndica crúxu saha ndo já ná jácacu u ndohó. Ta ni coó nacandúta ndó cuéntá mí i. ¹⁴ Ndixahvi Ndióxi coó najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuití va. ¹⁵ Ña cán queá ni in túhún ndó a cúu cachi ndó ña nacandúta ndó cuéntá mí i jáchi coó najácandúta toho i ndohó. ¹⁶ Ta ndícuñun ini i ña najácandúta ri na vehe Estéfanos. Na yóho cuití cúu na ñúhu ini i najácandúta i. ¹⁷ Jáchi coó nachindahá toho Jesucristo yehe ña ná caca nuu i jácandúta i ñayivi. Nachindahá mé á yehe ña ná caca nuu i cahán i tuhun vaha saha mé á xihín ñayivi já ná cuu cacu ndaa ínima ná. Ta coó toho tuhun ndíhí cáhan i xihín ná jáchi co cúní jánuu ndáha i xihín tuhun cahán i yóho tóco ndihi ña nacaja Jesucristo tá naxihí a ndica crúxu saha yo.

*Ndíhí jiní Jesucristo ta ún ndéé mé á quíxi
nu Ndióxi*

¹⁸ Ñayivi, na xíca cuahán ndihi saha ná ini indayá, mé na cán cáhán na ña cúu yó na tachí tá cahán yó ña naxihí Jesucristo ndica crúxu já ná cacu ndaa ínima ná. Joo nu mí, na nasacu ini Ndióxi jácacu a cávatá yo cándaa iní ña xihín ndéé Ndióxi naxinu tuhun mé á nu yo. ¹⁹ Já cáhí tuhun Ndióxi já:

Jándihi i sahá ña ndíhí jiní ñayivi ñuyiví,

ta a quéhe e cuénta sahá ña cánda ini ñayivi, já naçahyi a nuú tuhun Ndióxi.

²⁰ Sahá ña cán quea coó saha toho ñaha ñuyivi yóho nu Ndióxi vatí da ndíchí jini xihín da tácu ini cáhán da ña cúu dá da ndíchí ndivaha sahá ña xini da cahan da sahá ñaha ñuyivi yóho. Joo naçaja Ndióxi ña ná cacuu a ña coó saha. ²¹ Sahá ña ndíchí jini Ndióxi, co cúni mé á ña ná cuu candaa ini ñayivi saha mé á xihín ña ndíchí quixi jini ñayivi ñuyivi. Ña naçaja mé á quea nachindahá a java ñayivi ña ná cahan na tuhun vaha saha mé á já quea ndá na cándusa ña ta cándeé ini na Ndióxi já cuu cacu ndaa ínima ná. Ta ña yóho cúu á in ña tachí ndivaha nuú ñayivi ñuyivi.

²² Jáchí ñayivi Israel cáchí na ña ndúsa cuni na ña xituhún ndivaha já cuu candúsa na tuhun vaha saha Jesús. Ta na tóho, na ñuu Grecia cúni na ña ná cahan ndíchí ndivaha ñayivi xihín ná já cuu candúsa na ña. ²³ Joo mé nde xica nuu nde cáxi tuhun nde nuú ñayivi sahá Jesucristo, mé a naxihi ndica crúxu sahá ñayivi. Joo tá xini johó na Israel ña yóho já ndíhíhvi na. Ta tá xini johó na tóho ña yóho já cáhán na ña cúu á ña tóntó ndivaha. ²⁴ Joo tóco ndihi na naçaxi Ndióxi cacuu na cuénta mé á, á cúu ná na tóho á cúu ná na Israel, cánda ini na ña cahan nde sahá Jesucristo, ña ín ndée mé á jácacu a ñayivi. Ta xini vaha na ña ndíchí ndivaha jini mé á naçaja Ndióxi. ²⁵ Nuú ñayivi ñuyivi ña cája Ndióxi cúu á ña tóntó ndivaha. Joo ña cája Ndióxi cúu á ña ndíchí chága nu ndíhi ñaha cája ñayivi ñuyivi. Ta vatí cáchí ñayivi ña co ndíyahvi ña naxihi Jesucristo ndica crúxu joo yahvi chága ña yóho a juú ga inga ñaha cuu caha ñayivi. ²⁶ Candehé ndo, ñani i, na cúu cuénta Jesús. Naçaxi Ndióxi ndohó cacuu ndó cuénta mé á vatí chá cuití ndó cúu ndó na ndíchí jini nuú ñayivi ñuyivi. Ta chá ndó cúu ndó na náhnu nuú ñayivi ta chá cuití ndo cúu ndó na cuicá. ²⁷ Joo naçaxi Ndióxi ñayivi, na cáchí ñayivi ñuyivi cúu ná na tóntó jini já quea ná cacahan nuú na ndíchí jini. Mé Ndióxi naçaxi a ñayivi vitá ná cacuu na cuénta mé á já ná cacahan nuú na náhnu ndúu ñuyivi yóho. ²⁸ Ñayivi, na coó saha

ñuyivi yóho, na quéhe núu ñayivi saha, na cán cúu na naçaxi Ndióxi. Ta naçaxi a na co ndáyahvi toho ñuyivi yóho ña ná nuu ndáha na náhnu cuénta ñuyivi yóho. ²⁹ Ta xihín ña yóho cánda ini ñayivi ña a cúu ndiñehe jícó na mé ná nu Ndióxi. ³⁰ Mé Ndióxi quea naçaja ña ná in nduú xihín Jesucristo. Ta naçaja mé á ña ná ndindíchí jini yo. Ta naçaja mé á ña ná canduu ndaa yó nu Ndióxi. Naçaja mé á ña ná nduú ñayivi yii, na cúu cuénta mé á. Ta mé á najácacu a mí nuú cuachi. ³¹ Ta já cáchí tuhun Ndióxi já: “Ndá na cúni caha lándá, xini ñúhú caha lándá na sahá ña náhnu naçaja Ndióxi saha ná.”

2

Cáxi tuhun Pablo ña naxihi Jesucristo ndica crúxu sahá cuachi ñayivi

¹ Candehé ndó, ñani i, na cúu cuénta Jesús. Tá nasahan i naçahan i ña ndaa cuénta Ndióxi nu ndo, coó naçahan i ña xihín tuhun ndíchí ñuyivi yóho. ² Joo nasacu ini i cahan i sahá Jesucristo cuití va tañu ndó, mé a naxihi ndica crúxu. ³ Tá nasahiin i tañu ndó, coó nandiñehe jícó i mí i. Ña naçaja i quea yíhvi yíhvi cúu u anda quiji ninu i. ⁴ Ta tá naçasahá i cáxi tuhun i tuhun vaha sahá Jesucristo nu ndo, coó toho tuhun ndíchí naçahan i xihín ndo ña ná cava i jini ndó xihín á, vaha. Ña naçaja i quea naçahan i xihín ndo xihín ndée ínima yii Ndióxi ta mé a najáxinu a ini ndó xihín ndée mé á. ⁵ Já quea ná candaa ini ndó ña Ndióxi quea cája ña ná candee ini ndó mé á xihín ndée mé á. Ta co cúu á sahá ña ndíchí quixi jini ñayivi ñuyivi yóho.

Ínima yii Ndióxi cája ña ná candaa ini ñayivi saha mé á

⁶ Joo tá ndítuhún nde xihín na sa cánda vaha ini ñaha Ndióxi já cahan nde tuhun ndíchí xihín ná. Joo co cahan nde tátuhun cahan ta ndíchí ndúu ñuyivi yóho. Ta ni co cúu á tátuhun ña cahan da ndíchí, da cómi cuénta sahá ñuyivi yóho. Jáchí yachí ndihi sahá na cán. ⁷ Ña cahan nde cúu á ña ndíchí cuénta Ndióxi. Ta cúu á ña nasahiin jehé, ña co xini ñayivi saha janda tá cámani cava sahá saha ñuyivi. Jáchí janda mé tiempo já nasacu ini Ndióxi ndá quiahva caha jácacu a mí anda ama cá quivi. ⁸ Ta ni in tühún

na náhnu cómí cuéntá sahá ñuyíví yóho có cándaꝯ ini na ña ñasacu ini Ndióxi jácꝯcu a mí. Jáchi tá ná candúsa na ña já queá a cáta caa toho na Jesucristo, xitoho índica crúxu, nduu. Jáchi mé Jesucristo cúú á ña cáhnu ndivaha. ⁹ Ta já cáchí tuhun Ndióxi já:

Ni in túhún ñayivi a ñaha cuni na ta a ñaha cuni johu na,

ta ni a ñaha cahvi ini na,

ndá quiahva ín ña náhnu sácú ini Ndióxi quiahva nuú ñayivi tá quíhvi ini na mé á, cáchí tuhun Ndióxi.

¹⁰ Nacaja ínimá yíi Ndióxi ña ná candaa iní tóco ndihi ña yóho. Jáchi ínimá yíi mé á sándehe a tóco ndihi ñaha ta xíní a janda ña cáhvi ini mé Ndióxi.

¹¹ Ni in túhún ñayivi có xíní na ña cáhvi ini inga na. Ínimá in in na cuití va xíní a ña cáhvi ini in in na. Quiahva já ín ri xihín Ndióxi va. In túhún ínimá yíi mé á xíní ndía cáhvi ini a. ¹² Nasahan Ndióxi ínimá yíi mé á nu yo ta có cúú á tátuhun ínimá ñayivi ñuyíví. Ta nacaja mé á ña ná candaa iní ndaja ín ña náhnu sahan mé á nu yo. ¹³ Ta tá cahan nde sahá ña yóho, cahan nde tá quiahva najanaha ínimá yíi Ndióxi nuú nde. Ta có cahan nde ña xihín tuhun ndíchí nacatiahva nde ñuyíví yóho. Quiahva já ndícani nde ñaha Ndióxi xihín na ñúhu ínimá yíi Ndióxi ini.

¹⁴ Tóco ndihi ña yóho cúú á ña tóntó ndivaha nuú ñayivi, na có ñúhu ínimá yíi Ndióxi ini. Có ndíquehe vaha na ña ta ni a cúú candaa ini na ndaja ín a jáchi na ñúhu ínimá yíi Ndióxi ini, na cán cúú ndusa na cándaꝯ ini ñaha Ndióxi. ¹⁵ Joo na ñúhu ínimá yíi Ndióxi ini, na cán cúú na cándaꝯ ini ndá ñaha cúú ña vaha ta ndá ñaha có cúú toho ña vaha. Ta xihín ña yóho cátóntó ñayivi ñuyíví jáchi có cándaꝯ ini na ña cúú cuéntá Ndióxi. ¹⁶ Jáchi cáchí tuhun Ndióxi: “Ni in túhún ñayivi a cúú candaa ini na ña cáhvi ini Ndióxi, xitoho í. Ta ni in túhún na a cúú cachi xihín mé á ña ndítahan nu á caja”, cáchí tuhun Ndióxi. Joo mí, na cúú cuéntá Jesús, cáhvi iní tá quiahva cáhvi ini Jesucristo jáchi ñúhu ínimá yíi Ndióxi ini mí, na cúú cuéntá mé á.

3

Na cája chúun cuéntá Ndióxi

¹ Candehé ndó, ñani í, na cúú cuéntá Jesús. Cóo nacuu cahan í xihín ndo tá quiahva cahan í xihín na nachutú ndaa xihín ínimá yíi Ndióxi. Jáchi mé ndó cúú ndó tátuhun lee loho ña chíchí jáchi a ñaha cuahnu ndó xihín tuhun Ndióxi jáchi cája ndó ña xíca ini yiquí cuñu ndó caja tá quiahva cája ñayivi ñuyíví. ² Sahá ña cán queá tá najanaha í tuhun Ndióxi nu ndo, cóo nacuu janaha í ña ihvi chága nu ndo jáchi a cúú candaa ini ndó ña. Ña nacaja í xihín ndo queá nasahan í tátuhun leche nu ndo jáchi cúú ndó tátuhun na valí chíchí sahá ña a cúú cuxu ndó ñaha vee. Ta janda viti có ín tiahva ndó jácuaha ndó ña ihvi chága cuéntá tuhun Ndióxi. ³ Jáchi cúú yíi va ndó tátuhun ñayivi ñuyíví. Ndaja táhan mé ndó cáhíhvi ini xihín táhan ndó ta caní táhan ndó ta sáhdá java táhan ndó. Ta xihín ña yóho cája ndó ña cúni mé cuití ndo tá quiahva cája ñayivi ñuyíví. ⁴ Java ndó cáchí ndo ña cúú ndó cuéntá yehe, da cúú Pablo. Ta java ndó cáchí ndo ña cúú ndó cuéntá Apolos. Ta xihín ña yóho sáhdá java táhan ndó ta náha ndó ña cája ndó tá quiahva cája ñayivi ñuyíví.

⁵ Ndá da cúú Apolos xihín yehe ña ná caní táhan ndó sahá nde. Có ndítahan caja ndó já jáchi mé nde cúú nde da xíca nuu cája chúun cuéntá Jesucristo, xitoho í cuití va. Ta sahá chuun cája nde yóho nacuu nacandúsa ndó mé á. Ta ña yóho cúú chuun nanaha Jesucristo, xitoho í nuú yehe xihín nu Apolos caja nde. ⁶ Ña nacaja nde cúú á tátuhun ña cája na tá xútu na. Ta yehe cúú u tátuhun da nachihin tata jáchi nacaxi tuhun í tuhun Ndióxi nu ndo. Ta Apolos cúú dá tátuhun da naxojo ticuí nuú a cán jáchi najanaha chága da tuhun Ndióxi nu ndo. Joo Ndióxi queá nacaja ña ná cuahnu a jáchi cája mé á ña ná cuu cuahnu ndó xihín tuhun mé á. ⁷ Sahá ña cán queá vatí yehe cúú u da naxutu ta Apolos cúú dá da naxojo ticuí joo ni in túhún nde cóo saha. Cáhnu cúú Ndióxi jáchi mé á queá nacaja ña ná cuahnu mé tata naxutu nde cán. ⁸ Xíní ñúhú candaa ini ndó ña in cúú va na chíhin tata xihín na xójo ticuí nu á. Ta tá

in tá in chuun ñacaja in in ña cán quehe na yahvi saha. ⁹Yehe xihin Apolos in cúu nde cajú chún nde cuéntá Ndióxi. Ta mé ndó cúu ndó tátuhun in yójo nuú nasacu Ndióxi ndehe cajú chún nde cuéntá mé á.

Ta jári cúu ndó tátuhun in vehe ña cávaha Ndióxi. ¹⁰Ta yehe cúu u tátuhun ña cávaha mé vehe yóho. Ta mé Ndióxi quea nasahan ñamaní nuú i ña ná taán i yuu ndúhu sahá ta ná jácava sahá i ña. Ta inga na xíní ñúhú cajú chún xihin á. Joo ndítahan candehe vaha na ndaja cajú na chuun yóho. ¹¹Jáchí in túhún Jesucristo cúu á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha. ¹²Mé ña cávaha vehe nuú yuu ndúhu yóho cuu jáxinu na ña xihín jjuhún cuáán ta cuu cajú na ña xihín jjuhún cúxú ta cuu cajú ri na ña xihín yuu ñúchí. Ta jári cuu cajú na ña xihín yító ta cuu cajú ri na ña xihín xehe ndíyoho ta janda xihín toñamá cuu cajú na ña. ¹³Joo vaxi quivi quixi tucu Jesucristo coto ndojó mé á chuun ñacaja in in ñayivi cuéntá mé á. Cacu a tátuhun coto ndojó a ña xihín ñuhú cáyi já quea ná ñaha nu á, á ndihi sahá, á co ndíhi sahá. Ta xihín ña yóho ñaha nu á, á vaha ñacaja chún ñayivi cuéntá mé á, á a váha toho ñacaja na. ¹⁴Ta tá coó ndihi sahá ña ñacaja na cán já quea chahvi Ndióxi na sahá chuun ñacaja na. ¹⁵Joo tá ná cáyi ña ñacavaha na cán já ndihi saha tóco ndihi chuun ñacaja na vatí mé ná cacu ndaa ínimá ná. Ta ña yóho cacu a tátuhun tá jácacu in ñataa mé dá tá quéta da ini in vehe tá cáyi a xihín ñúhu ita.

¹⁶Á co xíní ndó ña cúu ndó tátuhun veñuhu Ndióxi tá ndacaan ínimá yí mé á ini ínimá in in ndó. ¹⁷Ta ndá ña ná jándihi na sahá veñuhu Ndióxi yóho já quea jándihi Ndióxi sahá na cán. Jáchí yí ndivaha veñuhu Ndióxi. Ta mé ndó cúu ndó tátuhun veñuhu Ndióxi cáhan i saha jan.

¹⁸Candehe ndo. Ndá ndó cáhán ña cúu ndó ña ndíchí jiní sahá ña xíní ndó ñaha ñuyiví yóho, xíní ñúhú candaa ini ndó ña cúu á tátuhun jándahvi ndó mé ndó. Xíní ñúhú ndaja ndó mé ndó tátuhun ña co xíní já quea ná nuná nu Ndióxi jáñaha nu ndo ndaa cúu ndusa ña ndíchí jiní. ¹⁹Jáchí ña ndíchí quíxi jiní ñayivi ñuyiví cúu á ña

tóntó ndivaha nu Ndióxi. Já cáhí tuhun Ndióxi já: “Ña cajú mé á quea ná cachihin saha ná xihín ña ndíchí quíxi jiní mé va na.” ²⁰Quiahva já cáhí ri tuhun Ndióxi: “Cánda cáxi ini Ndióxi ña coó sahá ña cáhvi jiní ña ndíchí ndúu ñuyiví yóho”, já cáhí tuhun Ndióxi. ²¹Sahá ña cán quea ni in túhún ñayivi co ndítahan ndíhehe jíco ña mé ná sahá ña tiahva in ñayivi ñuyiví yóho cajú na. Xíní ñúhú ndicuhún ini ndó ña nasahan Ndióxi tóco ndihi ñaha nu ndo. ²²Nandiquiahva mé á ndehe, ña cúu Pablo xihín Apolos xihín Pedro nu mé ndó já ná cuu jáñaha nde tuhun Ndióxi nu ndo. Nasahan mé á ñuyiví yóho nu ndo já ná cuu catacu ndó. Ta nasacu ini mé á quivi quivi ndó ta já tandaa quivi cuhún ndó coo ndó xihín mé á. Tóco ndihi ña yóho nasahan Ndióxi nu ndo. ²³Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

4

Ndicani Pablo ndaja in chuun cajú na apóstol

¹Co ndítahan toho ndaja cáhnu ndó ndehe. Xíní ñúhú quehe ndó cuéntá ña ñatahnda chuun nuú nde cajú chún nde cuéntá Jesucristo jáñaha nde ña coó nasaxíní ñayivi jihna, ña nasacu ini Ndióxi cajú. ²Ta ndá ña ndíquehe in chuun, xíní ñúhú ñaha ña mé a ndaa cuu candeé ini na ña, ña mé a ndaa cajú tá cajú da chuun ñatahnda nu dá cajú da. ³Ta cajú i cuéntá ñacaja vaha i chuun nasahnda Ndióxi nuú i cajú i. Sahá ña cán quea co sáhní toho i mí i tá chícaan ndó cuachi jatá i. Ta co ndicani ini i tá java ga ñayivi chícaan na cuachi jatá i. Jáchí cajú i cuéntá coó toho cuachi ñacaja i. ⁴Tá ná cachi i xihín ndo ña coó toho cuachi ñacaja i, co cúní cachí i ña mé a ndaa co ndójo ga i cuachi. Jáchí xíní vaha Jesucristo, xitoho i á ñacaja vaha i á coó ñacaja vaha i. ⁵Sahá ña cán quea co xíní ñúhú ndihi ini ndó candehe ndaa ndó ñayivi. Xíní ñúhú candati ndó janda quiahva ná quixi Jesucristo cajú vií mé á sahá ñayivi já ná nditivi ña ñúhu ínimá in in ñayivi. Ta xihín ña yóho cuni tóco ndihi ñayivi ña cáhvi ini na. Andá jáví ndaja cáhnu Ndióxi na ñacaja vaha.

⁶ Candehé ndo ñani i, na cúu cuéntá Jesús. Sahá ña cúni nde ña ná candaa ini ndó ndía ndítahan caja ndo sahá ña cán queá ndicani i nu ndo saha Apolos xihín saha mí i. Jáchí ín in tuhun ta cáchí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaa ini ndó ña co ndítahan ndiñehe jícó ndo mé ndó sahá ña cúu ndó cuéntá in da jáchí xihín ña yóho jánuu ndáha ndó inga na táhan nde. ⁷ Jáchí ni in ndó co cúu ndó na náhnu chága a juú ga inga na. Xíní ñúhú candaa ini ndó ña tóco ndihi ña cómi ndo cúu á ña nasahan Ndióxi nu ndo. Sahá ña cán queá co ndítahan caja cáhnu ndó mé ndó sahá ña nañehe táhvi ndo nu Ndióxi.

⁸ Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó na cuicá joo co cúu á ña ndaa. Ta cáhán ndo cúu ndó na cómi cuéntá sahá ñayivi joo co cúu á ña ndaa. Caja ndó tátuhun co xíní ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo. ⁹ Cúu á tátuhun nasacu Ndióxi ndehe, na cúu apóstol janda nu ndíhí. Cúu nde tátuhun na ndícuíta yíco cuhun quivi. Ta janda johó sándehe ñayivi ñuyíví ndehe ta sácu ndaa na ndehe. Ta janda mé táto Ndióxi sándehe na ndehe cuahan nde. ¹⁰ Sahá ña quíhvi ini nde Jesucristo cúu nde tátuhun ñayivi tóntó ndivaha nuú ñayivi ñuyíví. Joo mé ndó nandaja ndó mé ndó tátuhun na xíní ndivaha saha mé á. Mé nde cúu nde tátuhun ñayivi vitá nuú ñayivi ñuyíví joo caja ndó tátuhun na ndacú ini. Ndája cáhnu ñayivi ñuyíví mé ndó nani quehe núu na ndehe. ¹¹ Ta janda viti ndóho tá ndóho ini nde. Java tañu coó ña cuxu nde ta coó ticuú coho nde ta ni jáhma candixi nde coó. Ta janda johó caja xíxi ñayivi xihín nde. Ta ni vehe nde coó. ¹² Ta a juú quiahva ndúcú ndeé nde caja chúun nde catacu nde. Ta tá chícān ñayivi cuachi jatá nde já xíca táhvi nde nu Ndióxi ña ná caja mé á ñamani xihín ná. Ta caja ndeé ini nde tá caja xíxi na xihín nde. ¹³ Ta vitá cahan nde tá ndúcú ñehe nde tuhun nuú ñayivi vatí cahan núu na sahá nde. Mé nde cúu nde tátuhun xehe nuú ñayivi ñuyíví. Ta caja na xihín nde tá quiahva caja na xihín ñaha coó saha, ña

naçandoo cuhun cuíta. Ta quiahva já caja na xihín nde janda viti.

¹⁴ Xíní ñúhú candaa ini ndó ña co cáhyí i ña yóho nu ndo sahá ña cúni jácacahan i nu ndo. Cáhyí i ña nu ndo jáchí cúu ndó tátuhun jahyi i. Ta jánaha i ña nu ndo tá quiahva caja in dataa xihín jahyi da jáchí quíhvi ini i ndohó. ¹⁵ Jáchí vatí ná coo uxu mil ñayivi jánaha na ndohó sahá Jesucristo joo in tuhún yehe cúu tátuhun tátá ndo. Jáchí yehe cúu u da naçahan tuhun vaha sahá Jesucristo nu ndó nu cuítí ta já naçandeé ini ndó mé á. ¹⁶ Sahá ña cán queá xíca táhvi i nu ndó ña ná caja ndó tá quiahva caja i.

¹⁷ Sahá ña cán queá chindahá i Timoteo nu ndo jáchí cúu dá tátuhun jahyi maní i ta caja chúun da cuéntá Jesucristo, xitoho í xihín ndinuhu ini da. Ta jándicuhun ini da ndohó ndá quiahva caja i tañu na cúu cuéntá Jesús ta ndá quiahva jánaha i nu ná ndijáá veñuhu nu xíca i cuahan i. ¹⁸ Java ndó naçasáhá ndo caja lándá ndó jáchí cáhán ndo ña a sáa ga i coto nihni i ndohó. ¹⁹ Joo yachi saa i coto nihni i ndohó tá cúni Ndióxi. Anda já candehé e, á mé a ndaa ín ndeé Ndióxi ini na xíca caja lándá jan á yúhu uun na cahan na. ²⁰ Tá mé a ndaa cómi Ndióxi cuéntá sahá in ñayivi já queá ín ndeé mé á ini na caja na ña cúni mé á. Ta coó saha toho a á tiahva ndivaha na cahan na. ²¹ Ta viti cachí ndó xihín i ndía queá catóo chága ndo. Á catóo chága ndo ña ná saa i jánani i ndohó sahá ña caja ndó ña núu. Á catóo chága ndó ña ná saa i ta vií vií cahan i xihín ndo jáchí najándacoo ndó ña núu caja ndó. Ndía cúni ndó.

5

Cahan Pablo sahá in da ín xihín náná queén da

¹ Sa nañehe e tuhun ña ín in da cúu cuéntá Jesús tañu ndó jan ta ín da xihín náná queén da. Ta ña yóho cúu á in cuachi cáhnu ndivaha. Ta ni ñayivi ñuyíví co caja ña yóho. ² Ta vatí ín cuachi cáhnu yóho tañu ndó joo cáa ga ri ndohó caja cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó da caja cuachi yóho tañu ndó jan. ³ Vatí co ín i xihín ndo

jan joo ndícani ndivaha ini i sahá ña cúu jan. Ta cúu á tátuhun ín i xihín ndó jan ña cán quea sa nasacu ini i ña xíní ñúhú caja ndó xihín da cája cuachi jan. ⁴ Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndée á nu ndo caja ndó ña cúní mé á. Ta cacuu a tátuhun coo i xihín ndó jan. ⁵ Anda já xíní ñúhú ndiquiahva ndó da jan ndáha tiñáhá sacuahá já ná jándoho rí ini yiquí cuñu da viti ta já ná cuu cacu ndaa ínima dá tá ná xinu coo quiví quixi tucu Jesucristo.

⁶ Co ndítahan caja lándá ndo sahá ña cája ndó. Xíní ñúhú ndicuhun ini ndó in tuhun ña cáchí já: “Chá cuití yúsa naxaa játiví ndihi a java yúsa ña ín vaha.” ⁷ Xíní ñúhú tavá ndo da jan tañu ndó jáchi cúu dá tátuhun yusá naxaa, ña játiví ña ín vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu vií ndo tátuhun mé pan xíxi na vicó pascua jáchi coo yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihi a ndica crúxu sahá cuachi já ná cuu cacu ndaa ínima yo. ⁸ Sahá ña cán quea ndítahan cajji ini sahá ña nacaja Jesucristo. Xíní ñúhú jándacoo í ña núu sa nacaja í jihna, ña cúu tátuhun pan naxaa. Ta xíní ñúhú caja í ña ndaa xihín ndinuhu ini. Ta ña yóho cúu á tátuhun pan ña coo nacava táhan yusá naxaa xihín.

⁹ Nu carta nachindahá i nu ndó jihna ga, nacachi i xihín ndo ña ná a catáhan ndó xihín ñayivi, na ndúu xihín na coo cúu yí ná á ñájíhí na. ¹⁰ Tá nacachi i ña yóho xihín ndo coo cúní cachi a ña xíní ñúhú tavá xóo ndó mé ndó chí in ndée nuú ñayivi ñuyiví yóho jáchi a cuú quee ndó ñuyiví yóho cuhun ndo. Ta mé a ndaa ndúu cuahá na ñuyiví yóho cája na cuahá cuachi xihín yiquí cuñu na ta catóo ndivaha na jiuñun ta cája cuíhná na ta cája cáhnu na yoco. ¹¹ Ña cúní cachi i xihín ndo quea coo ndítahan catáhan ndó xihín na cáchí cúu cuéntá Jesús nani cája na ña núu xihín yiquí cuñu na, á tá cúu ná na catóo ndivaha jiuñun, á tá cúu ná na cája cáhnu yoco, á tá cúu ná na tuhún, á tá cúu ná na xíhi, á tá cúu ná na

cuihná. Ta ni a cácco ndó cuxu ndó xihín ná tá cája na ña yóho. ¹² Co cáhan i sahá ñayivi ñuyiví jáchi coo ndítahan nuú i caja vií i saha ná. Joo ndítahan nu ndó candehé ndo ndaja cája na cúu cuéntá Jesús ndúu tañu ndó jan. ¹³ Jáchi mé Ndióxi quea caja vií a sahá cuachi ñayivi ñuyiví. Ña cán quea ndítahan nu ndó tavá ndó da cája cuachi tañu ndó jan.

6

Tá sácú saha táhan na cúu cuéntá Jesús nuú na jutixia

¹ Tá co táhan ini ndó xihín ña cája ñani ndó, na cúu cuéntá Jesús coo ndítahan nu ndó cuhun ndó cacu ndó saha ná nuú na jutixia, na coo cúu cuéntá Jesús. Ña ndítahan caja ndó quea cáhan ndó xihín mé na cúu cuéntá Jesús ña ná caja vií na sahá ña coo táhan ini ndó xihín jan. ² Á co xíní ndó tandaa quiví caja vií na cúu cuéntá Jesús saha tóco ndihi ñayivi ñuyiví. Ta tá mé ndó cacuu ndó na caja vií saha tóco ndihi ñayivi ñuyiví, nda cuéntá quea coo cúní ndó caja vií ndó sahá ña válí cúu tañu mé ndó jan. ³ Ña xíní ñúhú caja ndó quea nducú ndo caja vií ndo sahá ña cúu tañu ndó jan. Jáchi xíní ñúhú ndicuhun ini ndó ña janda táto Ndióxi caja vií yo saha. ⁴ Sahá ña cán quea tá cáni táhan ndó sahá ñaha válí ñuyiví yóho coo xíní ñúhú toho cuhun ndó cavií saha ndó nuú na coo cúu cuéntá Jesús. ⁵ Candehé ndó. Cáhan i ña yóho xihín ndo já ná cacahan nuu ndo. Á co ín in da tácu ini tañu ndó jan ña ná caja vií da saha ndó, vaha. Xíní ñúhú ndindita in da tácu ini já ná cuu caja vií da sahá ña cúu tañu ndó jan. ⁶ Joo ña cája ndó quea cáni táhan ndaja táhan mé ndó ta já ndaca táhan ndó cuahan ndó cavií saha ndó nuú na coo cúu cuéntá Jesús. Co ndítahan toho caja ndó já.

⁷ Sa cuachi cáhnu ndivaha quea cája ndó tá cáni táhan ndaja táhan mé ndó jan. Vaha ná caja ndeé ini ndó tá coo cája vaha in na xihín ndo. Vaha ná caja ndeé ini ndó tá ná caja cuíhná na ñaha ndó. Jáchi coo ndítahan cacu saha táhan ndó nuú na coo cúu cuéntá Jesús. ⁸ Joo ña cája ndó quea ña núu xihín ñani táhan ndó ta janda cája cuíhná ndo ñaha ñani ndó, na cúu cuéntá Jesús.

⁹ Xíní ñúhú candaa ini ndó ña coó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchi na ndúu xihín na co cúu yíi ná á ñájíhí na a cuhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yíi á ñájíhí inga na ta ni da cúu taa líhi a cuhun toho na nu Ndióxi. ¹⁰ Ta ni na cuíhná ta ni na cátoó ndivaha jiuhún ta ni na xihí ta ni na ndahnda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá saha ná. ¹¹ Ta táhan na yóho nasacuu ri java ndóhó va, nduu. Joo viti sa nandaja víi Ndióxi ndohó ta nacaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña nacaja Jesucristo, xitoho í ta sahá ña cája ínimá yíi Ndióxi.

Xíní ñúhú candaa í yiquí cuñu í jáchi cúu á ña yíi

¹² Ndúu java ñayivi ta cáchí na ña núná nu ná caja na ña cúni mé va na. Vatí mé a ndaa núná nu ná caja na ña cúni mé ná joo xíní ñúhú candehé na á vaha, á a vaha ña cája na. Jáchi mé a ndaa núná nu yo caja í ña cúni mí joo co ndítahan quiahva í ñamaní ña ná cahnu ña núu yiquí cuñu í. ¹³ Ta cáchí na ña íin tíxi yó sahá ña cán queá xíní ñúhú cuxú. Ta cáchí na ña xíní ñúhú cuxú jáchi íin tíxí. Joo vaxi quívi jándihi Ndióxi saha ndívi ña yóho. Ta coó nasahan Ndióxi yiquí cuñu í nu yo ña ná caja í cuachi xihín á tátuhun ña ná coo í xihín na co cúu ñájíhí yo á yíi yo. Nasahan Ndióxi yiquí cuñu í nu yo já ná caja í ña cúni mé á. Ta nacaja mé á ña ná cacomí a cuéntá saha yo. ¹⁴ Ta tá quiahva nacaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndée mé á.

¹⁵ Xíní ñúhú candaa ini ndó ña in cúu ndó xihín Jesucristo. Ta tá cuahan ndó cája ndó cuachi xihín najihí xíca jii, cúu á tátuhun ñehe ndó Jesucristo cuahan cája ña núu. Co ndítahan caja ndó já. ¹⁶ Sa xíni vaha ndó ña tá quíhvi nuu in dataa xihín najihí xíca jii já queá ndúu na tátuhun in víxí ñayivi. Jáchi cáchí tuhun Ndióxi já: “Tá ná ndique táhan in dataa xihín in ñáñáha já queá ndúu na tátuhun in víxí ñayivi.”

¹⁷ Ndá na ndiquiahva mé ndáha Jesucristo, xitoho í já queá in ndúu na xihín mé á jáchi ñúhu ínimá yíi Ndióxi ini na.

¹⁸ Cama caxoo ndó nu tóco ndihi ña núu xíca ini yiquí cuñu ndó caja. Co ndítahan coo ndó xihín na co cúu ñájíhí ndo á yíi ndo jáchi ni in túhún toho cuachi co cája quini nahá xihín yiquí cuñu ñayivi tátuhun cuachi yóho. Jáchi ndá na íin xihín na co cúu yíi ná á ñájíhí na já queá cája na cuachi nuú yiquí cuñu mé va na. ¹⁹ Xíní ñúhú ndicuhun ini ndó ña mé yiquí cuñu ndó jan cúu á tátuhun in veñuhu nu ndacaan ínimá yíi Ndióxi, mé a nasahan Ndióxi nu ndo. Ta viti yiquí cuñu ndó a juu ñaha mé ndó cúu á jáchi cúu á ñaha Ndióxi. ²⁰ Jáchi yahvi ndivaha nachahvi Ndióxi saha ndo tá naxihí Jesucristo ndica crúxu. Sahá ña cán queá ndítahan caja cáhnu ndó Ndióxi xihín yiquí cuñu ndó ta jári xihín ínimá ndo jáchi ndívi a cúu á cuéntá Ndióxi.

7

Tá tándaha ñayivi

¹ Ta viti cúni nducú ñehé e tuhun nu ndo sahá ña nandaca tuhún ndó yehe nu carta nachindahá ndó nuú í. Cáchí í xihín ndó sahá da cámaní tandaha ña vaha cája da tá ná coo tacú da. ² Joo sahá cuachi cája ñayivi tá ndúu na xihín na co cúu ñájíhí na á yíi ná sahá ña cán queá vaha chága ná tandaha ná já ná coo ñájíhí in in taa ta jári najihí va ná coo yíi in in na. ³ Ta in dataa ndítahan ndiquiahva da mé dá nu ñájíhí da ta jári ñáñáha ndítahan ndiquiahva ña mé ña nu yíi ña jáchi quiahva já sáhdá a coo a. ⁴ Jáchi in ñáñáha, ña natandaha co cómi ga ña cuéntá saha mé ña jáchi yíi ña cúu da cómi cuéntá saha yiquí cuñu ña. Ta ni in dataa, da natandaha co cómi ga da cuéntá sahá yiquí cuñu da. Ñájíhí da cúu ña cómi cuéntá sahá yiquí cuñu da. ⁵ Sahá ña cán queá ndítahan ndiquiahva nu táhan ndó ta a cándají táhan ndó. Ta tá co cúni ndó cuju xitáhan ndó xíní ñúhú cacuu a sahá ña sa najándique táhan tuhun ndó ña a cúju xitáhan ndo sahá ña cúni ndó caça tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchi tiahva náa jácahan Satanás, mé tiñáhá

sacuaḥa ndohó ña ná caja ndó cuachi sahá ña a cuú cañu ndó nuú ña xíca ini yiquí cuñu ndó caja.

⁶ Tóco ndihi ña cáhan i xihín ndo yóho co cúni cachi a ña xíní ñúhú tándaḥa ndo vatí cuu tandaha ndo tá cúni ndo. ⁷ Vatí mé a ndaa cáji iní i tá ná canduu tacú ndihi ndó tátuhun yehe. Joo sa jíin sa jíin ñacaja Ndióxi xihín in in í. Java na ñéhe táhvi ná tandaha na ta java na ñéhe táhvi na canduu tacú na.

⁸ Ndá na ndúu tacú xihín ndá na ndúu cuáan, ña vaha chága quea ná a tándaḥa ná ta ná canduu na tátuhun yehe. ⁹ Joo tá co ndeé ini na cañu na yiquí cuñu na, vaha chága ná tandaha ná jáchi vaha chága ná tandaha ñayivi a juú ga ña ná ndiava iní na coo na xihín na coo cúu yí ná á ñájíhí na.

¹⁰ Ta nu ndohó, na sa ín yí á ñájíhí, sáhdá i chuun nu ndó ña ná a jándacoo táhan ndó. Ta ña sáhdá i nu ndo yóho co cúu á ña ñaquixi jini mí i. Cúu á ña sáhdá Ndióxi caja ndó. Co ndítahan nuú in ñáñáha jándacoo ná yí ña. ¹¹ Ta tá ná jándacoo ná da, co ndítahan nu ña tandaha ña xihín inga da. Á tá coo ta ña ndítahan caja ña quea ndique táhan mañi tucu ña xihín yí ña. Ta jári in dataa co ndítahan nu dá jándacoo da ñájíhí da.

¹² In java ga ñaha cúni cahan i xihín ndo. Mí i cáhan i ña vaha caja ndó ña vatí mé a ndaa coo cúu á ña nasahnda Ndióxi nuú i jánaḥa i nu ndo. Ta ña yóho quea ña cahan xihín ndo: Tá ín in da cúu cuéntá Jesús ta ín ñájíhí da, ná coo cúu cuéntá Jesús. Ta tá cáji ini ña coo ná xihín dá já quea co ndítahan nu dá jándacoo da ña. ¹³ Ta tá ín in ña cúu cuéntá Jesús ta ín yí ña, da coo cúu cuéntá Jesús. Ta tá cáji ini da coo da xihín ña já quea co ndítahan jándacoo ná da. ¹⁴ Jáchi cája yí Ndióxi in dataa sahá ña ín da xihín ñájíhí da, ña cúu cuéntá Jesús. Ta jári cája yí Ndióxi in ñáñáha sahá ña ín ña xihín yí ña, da cúu cuéntá Jesús. Jári cája yí Ndióxi jahyi na yóho ná a cacuu na tátuhun na coo xíní Ndióxi. Ta xihín ña yóho cuu candaa ini na ndaja ín íchi cuéntá Jesús. ¹⁵ Joo tá cúni yí ndo á ñájíhí ndo, na coo cúu cuéntá Jesús jan, quee na cuhun na já quea quiahva ndó ñamaní nu ná caja na ña. Jáchi

co ndítahan nu ndó caja ndúsa ndó xihín na coo xíní Ndióxi cán ña ná coo na xihín ndo. Jáchi cúni Ndióxi ña ná canduu vií ndo. ¹⁶ Ta ni coo xíní ndo á ndiquehe yí ndó á ñájíhí ndo íchi cuéntá Jesús, á a ndiquehe na ña.

¹⁷ Ta cáxi tuhun i nu tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva nasahin na tá nandihvi na íchi cuéntá Jesús jáchi quiahva já cúni Ndióxi. ¹⁸ Ta tá ñaquihvi ndó íchi cuéntá Jesús ta sa ndacaan marca yiquí cuñu ndó coo caja toho a. Joo tá coo marca jan yiquí cuñu ndó co ndítahan chícacoo ndó ña yiquí cuñu ndó. ¹⁹ Jáchi coo caja toho a á ín marca yiquí cuñu ndó á coo a. Ña cúni Ndióxi quea ná caja ndó ña sáhdá mé á nu ndo caja ndó xihín ndinuhu ini ndó. ²⁰ Ta ndítahan coo ndó tá quiahva nasahin ndó tá nandiquehe ndó íchi cuéntá Jesús. ²¹ Ta tá nasacoo ndó na naxeen xitoho ndó caja chúun ndó tá nandiquehe ndó íchi cuéntá Jesús já quea co ndítahan ndicani ini ndó sahá. Joo tá ná quiahva xitoho ndó íchi nu ndó ña ná quee ndó cuhun ndo já quea caja ndó ña. ²² Jáchi da cúu cuéntá Jesús cúu dá da najaní Ndióxi nuú cuachi da vatí cándo da cája chúun da cuéntá xitoho da, da naxeen ñahá. Ta da naxica núná mé tá nandiquehe da íchi cuéntá Jesús cúu dá mozo cuéntá Jesucristo. ²³ Jáchi yahvi ndivaha ñachahvi Ndióxi saha ndo tá naxihí Jesucristo ndica cruxu ña ná cacomí a cuéntá saha ndo. Sahá ña cán quea a ndiquiahva toho ndó mé ndó ndáha ñayivi ña ná cañu na ndohó. ²⁴ Candehé ndo ñani mí i, na cúu cuéntá Jesús. Ndítahan coo ndó tá quiahva nasahin ndó tá nacana Ndióxi ndohó cacuu ndó cuéntá mé á jáchi ín mé á xihín ndo.

²⁵ Ta viti cúni cahan i sahá na tacú, na camañi tandaha. Coo nacachi toho Ndióxi xihín i sahá ña yóho ña cán quea cahan i ña cáhvi ini mí i sahá. Ta cuu candúsa ndó ña cáhan i xihín ndo jáchi ñacaja Ndióxi ñamaní xihín i ña cúu u in da tácu ini. ²⁶ Ta cáhan i ña ndítahan coo tacú in dataa jáchi ihvi ndivaha cáa tiempo ndúu viti. ²⁷ Joo tá ín ñájíhí ndo, a jándacoo ndó ña. Ta tá coo ñájíhí ndo, a ndúcú ndó ña. ²⁸ Joo a juú cuachi quea cája ndó tá ná tandaha ndo. Ta ni a juú cuachi quea cája in ña tacú tá

ná tandaha ña. Joo mé a ndaa ná cahan i xihin ndo, yáncá a tá ná tandaha ñayivi jáchi cuahá ndivaha ndoho ini na. Ta co cuni ña ná ndoho ini ndó já sahá ña cán quéa cahan i ña yóho xihin ndo.

²⁹ Candehé ndo ñani i, na cúu cuéntá Jesús. Ña cuni cachi i cúu ña yóho: Sa nacayati tiempo quixi Jesucristo. Sahá ña cán quéa na íin ñájíhí xini ñúhú ndihi ini na caja chúun na cuéntá mé á tá quiahva caja chúun na tacú cuéntá mé á. ³⁰ Ta ndá na ndúu cuéha ndivaha ndítahan caja na tátuhun na cájii ini. Ta na cájii ini ndítahan caja na tátuhun na ndúu cuéha ndivaha ini. Ta na xéen ñaha ñuyíví yóho ndítahan caja na tátuhun naxeen na ña co cúu ñaha na. ³¹ Ta na cómí ñaha ñuyíví yóho, xini ñúhú ndindójó na sahá ñaha cán. Jáchi vaxi quivi ndihi saha ñuyíví yóho xihin tóco ndihi ñaha íin nu á.

³² Ña cuni yehe quéa ña ná a ndícani nahá ini ndó sahá ñaha ñuyíví yóho. Jáchi tá camani tandaha in dataa já quéa núná nu dá caja chúun da cuéntá Ndióxi xihin nd-inuhu ini da. Ta ndúcú da ndá quiahva caja da ña cájii ini Ndióxi xihin. ³³ Joo da sa natandaha ndítahan caja chúun da ñuyíví yóho já ná cana ña cuxu na vehe da. Ta cája da ña cájii ini ñájíhí da xihin. ³⁴ In da natandaha co xini da ndía ndihi chága ini da saha, á Ndióxi á ñájíhí da. Ta jári najihí tá cúu ná na tacú ndihi ini na caja na ña cuni Ndióxi jáchi ndiquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínima ná. Joo najihí ndúu yí ndihi ini na sahá chuun vehe na jáchi cuni na ña ná tahan ini yí ná xihin ná.

³⁵ Cahan i ña yóho xihin ndo jáchi cuni chindeé e ndohó ta co cahan i ña sahá ña co cuni ña ná tandaha ndo. Ña cuni quéa ná núná nu ndó caja chúun ndó cuéntá Ndióxi xihin ndinuhu ini ndó ta ná a cájii nuu ni in ñaha nu ndó caja ndó ña cuni Ndióxi.

³⁶ Ta ndá da íin jahyi jíhí ta cahan da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cuni da. A juú toho cuachi cúu ña yóho. ³⁷ Ta tá cahan ndo ña co ndítahan toho tandaha jahyi ndó ta cahan ndo ña cájii ini ñá ña coo mé ñá já quéa vaha va cája ndó

tá co cája ndúsa ndó xihin ñá ná tandaha ña. ³⁸ Vaha cája in dataa tá sahan da ñamani nuú jahyi jíhí da ña ná tandaha ña. Joo vaha chága cája da tá co cája ndúsa dá xihin ña ña ná tandaha ña.

³⁹ Ta a cúu tandaha in ñañáha xihin inga dataa nani tácu yí ña. Joo tá naxihi yí ña já quéa candoo núná nu ña tandaha tucu ñá. Joo ndítahan tandaha ña xihin da cúu cuéntá Jesús. ⁴⁰ Vatí cahan i ña cajii chága ini ñá tá ná a tandaha tucu ñá. Ña yóho quéa cáhvi ini i sahá ña yóho. Ta ínima yii Ndióxi quéa jácahan yehe cáhí i ña yóho xihin ndo.

8

Cahan Pablo saha ña najoco ñayivi nuú yoco

¹ Ta viti cuni ndicani i nu ndo sahá ña ndítahan caja ndó xihin ña najoco na nuú yoco. Vatí cúu á ña ndaa tá cáhí java na ña xini vaha na sahá ña yóho joo tá cahan yo cúu yó na xini vaha já quéa casahá yo ndínehe jícó yo mí. Joo tá quihvi ini ñani táhan í já ndindacú chága yó xihin ñaha Ndióxi. ² Tá ndúu java na tañu ndó ta cahan na ña sa xini na ndaja táhan ñaha, na yóho náha ña camani cándaq ini na ña ndítahan cándaq ini na. ³ Jáchi mé a ndaa xini vaha Ndióxi ndá na cúu na quihvi ini mé á.

⁴ Ta viti cahan i xihin ndo sahá ña najoco na nuú yoco. Cándaq cáxi ini ña coo a cúu toho yoco ndúu ñuyíví. Ta cándaq cáxi ini ña in tálaá Ndióxi cúu ndusa Ndióxi. ⁵ Vatí cáhí ñayivi ña ndúu cuahá ndióxi ta ndúu cuahá xitoho indivi xihin ñuyíví ⁶ joo mí cándaq vaha ini ña íin in túhún Ndióxi, mé a cúu tátá yo. Ta mé á quéa nacavaha tóco ndihi ñaha. Ta nacavaha mé á mí ña ná caja cáhnu í mé á. Ta íin in túhún xitoho í ña cúu Jesucristo. Ta mé á quéa cája ña ná coo tóco ndihi ñaha ta cája ña ná catacu mí viti.

⁷ Joo a juú tóco ndihi na cúu cuéntá Jesús xini ña yóho. Jáchi java táhan na sa cája cáhnu yoco sanahá cán tá xixi na ña najoco ñayivi nuú yoco cahan na ña cúu á ña najoco na nuú java ndióxi. Ta xihin ña yóho cahan na ña cúu ná na sa nayuxu sahá ña naxixi na ña najoco ñayivi nuú yoco. Ta co xini na á ndítahan cuxu na ña á co ndítahan cuxu na ña. ⁸ Candehé ndo. Co ndíquehe

toho Ndióxi mí sahá ña xíxi. Jáchi co cúu yó na ín chága saha tá xíxi in ñaha. Ta ni co cúu yó na coó saha tá co xíxi ñaha. ⁹ Joo xíní ñúhú candehé ndo ña ná a jándicava ndó inga na nuú cuachi sahá ña cája ndó jan. Jáchi vatí xíní vaha ndó ña cuu cuxu ndó ña cán joo ndúu java na vitá cuahan íchi cuéntá Jesús. ¹⁰ Cúu á tátuhun sácoo ndó cuxu ndó nu cáyahvi ña najoco na nuú yoco jáchi sa xíní ndo sahá ña yóho. Ta nani ín ndó xíxi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xíní da ndohó já quíhvi da jan xíxi da xihín ndo vatí cáhan da cúu á cuachi. ¹¹ Xihín ña cája ndó jan cuu jándicava ndó da vitá xihín ñaha Ndióxi cán nuú cuachi vatí xíní vaha ndó ña co cája ndó cuachi tá ná cuxu ndó ña najoco na nuú yoco. Xíní ñúhú ndicuhun ini ndó ña naxihí Jesucristo sahá da jan. ¹² Tá jándicava ndó ñani ndó, da vitá xihín ñaha Ndióxi cán nuú cuachi já quea cája ndó cuachi nuú Jesucristo viti. ¹³ Sahá ña cán quea tá ná jándicava i ñani i nuú cuachi sahá ña xíxi i cuñu, ña najoco na nuú yoco cája i cuéntá a cúxu ga i ña já ná a jándicava i inga da nuú cuachi.

9

Ña núná nuú in na apóstol caja

¹ Mé a ndaa yehe cúu u in apóstol cuéntá Jesucristo sahá ña cán quea núná nuú i caja i ña cája in apóstol. Jáchi mí i sa naxini i xihín nuú i Jesucristo, xitoho í. Ta mé ndó nandiquehe ndó íchi cuéntá mé á sahá chuun nacaja i ta ña yóho náha ña mé a ndaa cája chúun i cuéntá mé á. ² Cája i cuéntá ndúu java na ta co ndiquehe na yehe tátuhun in apóstol cuéntá Jesucristo. Joo ndohó ndítahan ndiquehe ndó yehe jáchi nanduu ndó cuéntá mé á sahá chuun nacaja i. Ta xihín ña yóho náha ña mé a ndaa cúu u in apóstol cuéntá mé á.

³ Ta ña yóho cúu tuhun ndúcú ñehe e nuú na cáhan núu sahá i jan: ⁴ Ín sahá i ña ná coto ndó yehe. ⁵ Ta tá ná coo ñájíhí i, ña cúu cuéntá Jesús ín sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. ⁶ Á cáhan ndo ña in túhún yehe xihín Bernabé cúu nde da coó saha ña ná coto

na cúu cuéntá Jesús ndehe, vaha. ⁷ Jáchi ni in túhún toho soldado co quéhe da jiuhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchi já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchi já cáni a coo a. ⁸ Ta a juú cahán ndo ña cáhan i ña quíxi jini mé cuití vi jáchi cáchi ley mé Moisés ña yóho viti. ⁹ Já cáchi a já: “A chícayun ñunu yuhú tindiquí nani cája chúun rí sání rí trigo. Joo xíní ñúhú quiahvún ñamaní nu rí caxí rí a”, cáchi tuhun Ndióxi. Joo co ndíhi ini Ndióxi sahá tindiquí cuití va. ¹⁰ Saha mí ví nacahyí Moisés ña yóho ta saha mí ví cáhan ña yóho tá cáchi a já. Cúu á tátuhun cája da xútu tátí xihín da jáquee tátí jáchi ndáti ndíví da ndiquehe da táhan nuní cán sahá ña nacaja chúun da xihín á. ¹¹ Tá nacahan nde tuhun Ndióxi xihín ndó já cúu á tátuhun nachihin nde tata cuéntá Ndióxi ini ínimá ndo. Saha ña cán quea ndítahan nu ndo chindeé loho ndó ndehe xihín ña cómi ndo jáchi najánahe nde tuhun Ndióxi nu ndo. ¹² Ta mé a ndaa ín chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coó nacaja ndúsa nde xihín ndo ña ná caja ndó ña. Ta cuahá tañu cája ndeé ini nde jáchi co cúní nde caji nuu nde ña ná ndicuíta nuu tuhun vaha sahá Jesucristo. ¹³ Mé ndó sa cándaá vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quítí, rí najoco ñayivi nu Ndióxi. ¹⁴ Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde. ¹⁵ Joo ni in túhún tañu coó nacaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa ín vaha ini i cáhan i tuhun Ndióxi xihín ndo ta coó caja toho a ña ná quivi i joco.

¹⁶ Yehe co ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúu á chuun ndítahan nuú i caja i. Ta ndáhví nahá nacuu u tá ná caja

sáa ini i caxi tuhun i ña. ¹⁷ Tá ná cája i chuun yóho sahá ña cúní mí i cuití va já queá cuu quehe e yahvi sahá. Joo co cája toho i já jáchi nacaxi Ndióxi yehe cahan i tuhun mé á sahá ña cán queá ndúsa cája i ña. ¹⁸ Ta sa mé yahvi quehe e sahá chuun cája i queá cáji ini i tá cahan i tuhun vaha sahá Jesús nuú ñayivi ta co cháhvi na sahá. Ta cáji ini i jáchi co cája ndúsa i xihín ndo ña ná coto ndo yehe tá quiahva cája ndó xihín java ga na cahan tuhun Ndióxi xihín ndo.

¹⁹ Vatí mí i co cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchi caxi tuhun i tuhun vaha sahá Jesucristo nu ná já ná cuu ndicuaḥa chága na cúu cuénta Jesús. ²⁰ Tá xíca nuu i tañu na Israel ndája i mí i tátuhun in da Israel jáchi ña cúní queá ná ndiquehe na íchi cuénta Jesús. Ña cúní cachi i queá tá ín i tañu na cája ley Moisés in cája i xihín ná vatí co ndíco i íchi cuénta ley Moisés viti. Joo cája i ña sahá ña cúní i ña ná ndiquehe na íchi cuénta Jesús. ²¹ Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchi cúní ña ná ndiquehe na íchi cuénta Jesús. Joo co cája i cuachi tá quiahva cája na cán jáchi sáhdá ley Ndióxi chuun nuú i viti ta cája i ña cúní Jesucristo cuití va. ²² Ta tá xíca nuu i tañu na vitá xihín ñaha Ndióxi já queá jánuu ndáha i mí i jáchi cúní ña ná ndindacú na xihín tuhun mé á. Ña cúní cachi i xihín ndo queá ndája i mí i tátuhun ndá na nacuu va jáchi cúní quee vaha i xihín ná já ná ndihvi na íchi cuénta Jesús ña ná cacu ndaa ínima ná. ²³ Cája i tóco ndihi ña yóho já queá ná ndicujta nuu tuhun vaha cahan sahá Jesucristo. Jáchi xihín ña yóho caja cuaha Ndióxi ñamaní xihín i.

²⁴ Candehé ndo. Sa xíni vaha ndó ña tá jáquehe táhan java ta tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíni ñuhú nducú ndo cuhun vaha ndó íchi cuénta Jesús janda quiahva ná xínu coo ndó janda nu ndíhi cuíi já ná quiahva Ndióxi nu ndo ña ndítahan ndiquehe ndó. ²⁵ Tóco ndihi ñayivi tá cája tiaḥva na mé ná

ñá ná cuhun na cunu na, co cúní na caja na ndá ña nacuu jáchi ndáa na mé ná. Tóco ndihi ña yóho cája na sahá ña cúní na quee vaha na ña ná ñeḥe ná in tiyivi ita sánúu jini ná vatí cama chá íchi ita cán. Joo mí ndúcú ndéé yo cuahan yó íchi cuénta Jesús jáchi ña ndátí mí quiahva Ndióxi nu yo co ndíhi saha anda ama cáa quivi. ²⁶ Joo co cúu u in da xínu cuáa. Ta ni co cúu u tátuhun in da jácana yiquí nuú tachí. Jáchi ndúcú ndéé e quee vaha i já ná ndiquehe e ña quiahva Ndióxi nuú i. ²⁷ Ña cája i queá cája ndúsa i xihín yiquí cuñu i ña ná caja i ña cúní Ndióxi. Jáchi a juú tiaḥva náa jándacoo Ndióxi yehe vatí mí i cúu u da najánaḥa tuhun Ndióxi nuú ñayivi.

10

Cáhan Pablo ña co ndítahan caja cáhnu na yoco

¹ Candehé ndo ñani i, na cúu cuénta Jesús. Co cúní ña ná ndindójo ndo ndá quiahva nacaja Ndióxi sanahá xihín tásáhnu jícó yo tá nasandaca mé á na yucú íchi cán. Nacaja mé á ña ná xínu in vico núhú xoo nuú cuahan na ña ná candaca a na. Ta nachindeé a na ña ná cuu cojo cava na tañuhú nani tañuhú cuahá. ² Ta tóco ndihi na cán in nanduu ndihi na xihín Moisés tá nayaha na tañuhú nani ndáca vico núhú na. Nasacuu a tátuhun nacandúta ná ña ná cacomí Moisés cuénta saha ná. ³ Ta tóco ndihi na cán naxixi na ña nachindahá Ndióxi, ña naquixi a nu ná chí indiví. ⁴ Ta quiahva já tóco ndihi na cán naxihi na ticuú, dó nasahan mé á nu ná coho na. Mé ticuú cán cúu dó dó nacana tixi in tóto. Ta mé tóto cán cúu á tátuhun yuhú nuú Jesucristo, mé a nasahiin xihín ná nani naxica nuu na yucú íchi cán. ⁵ Joo cuahá ndivaha táhan na cán nacaja na ña núu ña co cáji iní Ndióxi xihín. Sahá ña cán queá naxihí na mé yucú íchi nu xíca na cuahan na cán.

⁶ Tóco ndihi ña nayaha yóho jánaḥa nu mí ña co ndítahan ndiava iní ña co táhan ini Ndióxi xihín tá quiahva nacaja na cán. ⁷ Sahá ña cán queá coto a juú caja cáhnu ndó yoco tá quiahva nacaja java na cán jáchi já cáchi tuhun Ndióxi já: “Tóco ndihi ñayivi cán nasacanduu na xíxi na ta xíhi

na ta já nandicuïta na xíta sáhá ña ña cája cáhnu na yoco”, já ñacaja na cáchí tuhun Ndióxi. ⁸ Joo mí xíní ñúhú candaa í mí já ná a cája í cuachi ña quihvi nuu í xihín inga najihí á xihín inga ñataa tá quiahva ñacaja java na cán. Ta sahá cuachi ñacaja na cán naxihí oco uní mil na in túhún quívi. ⁹ Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já ñacaja java na cán va ta sahá ña cán naxihí na ñacaja cuahá coo. ¹⁰ Coto a cáhan cuéhé ndó saha Ndióxi tá quiahva ñacaja java tásáhnu jícó yo cán. Jáchi sahá ña ñacaja na naxihí na ñacaja tátó Ndióxi, mé a xíca sáhní ñahá.

¹¹ Tóco ndihi ña nayaha xihín tásáhnu jícó yo cúu á ña náha nu yo ña co ndítahan quehe núu í Ndióxi. Ta ñacayí a nuú tuhun Ndióxi já ná cuni mí, yó ndúu tiempo yóho ña co ndítahan caja í tá quiahva ñacaja na cán jáchi sa ñacayati quívi ndihi saha ñuyívi. ¹² Ña cán quea tá cáhan ndo cuahan vaaha ndó íchi cuéntá Ndióxi já quea xíní ñúhú candaa vaaha ndó mé ndó já ná a ndícava ndó nuú cuachi. ¹³ Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuu jáchi quixi tondóhó ñan nu tóco ndihi java ga ñayivi. Ta ndítahan candee ini ndó Ndióxi jáchi a quiahva toho mé á ñamani ña ná quixi tondóhó náhnu nu ndo ña co cándee ndó xihín. Ña cája Ndióxi quea chindee a ndohó tá ná quixi tondóhó nu ndo já ná cuu caja ndee ini ndó tá ná ndoho ndó ña.

¹⁴ Candehé ndo ñani i, na cúu cuéntá Jesús. Xíní ñúhú jándacoo vaaha ndó ña cája cáhnu ndó yoco. ¹⁵ Tá quiahva cáhan i xihín ñayivi tácu ini quiahva já cáhan i xihín ndo. Ta mé ndó cándaa vaaha ini ndó á ndaa á a ndaa quea cáhan i xihín ndo. ¹⁶ Ná ndiquiahva í ndixahvi nu Ndióxi tá ndicuhun iní sahá ña ñacaja Jesucristo tá naxihí a saha yo. Jáchi tá xihí vino ña yíi já cúni cachi a ña in nanduú xihín mé á sahá ña naxita ñi mé á ndica crúxu saha yo. Ta jári tá xixí pan ña yíi ña sáhdá java nu táhan í cúni cachi a ña in nanduú xihín mé á jáchi nandiquiahva yiquí cuñu a saha yo. ¹⁷ Ta vatí cuahá ndivaha cúu yó joo in túhún pan

sáhdá java í xixí jáchi xihín ña yóho náha ña in cúu ndihí xihín Jesucristo.

¹⁸ Xíní ñúhú candehé ndo ndá quiahva cája na Israel jáchi tá sáxi na cuñu quítí, rí najoco inga na nu náa cán já cúu á tátuhun mé ná nasahní na mé quítí cán ta najoco na rí. Quiahva já yáha xihín mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. ¹⁹ Joo xíní ñúhú ndicuhun ini ndó tá cáchí i ña yóho xihín ndo co cúni cachi i ña in sahá yoco. Ta ni co cúni cachi i ña in chága sahá cuñu najoco na nuú yoco a juú ga inga cuñu. ²⁰ Ña cúni cachi i xihín ndo quea tá ná joco ñayivi, na co xíní Ndióxi ñan in quítí nuú yoco cúu á tátuhun joco na ñan rí nuú tiñahá va. Ta co cája toho na ña nu Ndióxi. Ta cáxi tuhun i ña yóho xihín ndo já ná a cáxi ndó cuñu ñan jáchi tá ná caxí ndó ña cacuu a tátuhun najoco rí ndohó va ña nuú tiñahá. ²¹ Jáchi a cúu cuhun ndo coho ndó ña najoco na nuú rí quini ta já quixi ndó coho ndó ña yíi cuéntá Jesucristo, xitoho í. Ta ni a cúu cuxu ndó ña najoco na nuú rí quini ta já cuxu ndó ña yíi, ña xixi na tá ndicuhun ini na ña naxihí Jesucristo, xitoho í. ²² A cája ndó ña yóho jáchi cúu á tátuhun cúni ndó jácojo ndó ini Ndióxi. Xíní ñúhú ndicuhun ini ndó ña co cúu ndó na ndacú chága a juú ga Ndióxi.

Sahá ña quihvi iní ñani táhan í co ndítahan caja í ndá ña nacuu cúni mí caja í

²³ Ndúu java na ta cáchí na já: “Núná nu yo caja í ndá ña cúni mí caja í.” Vatí ña yóho cúu á ña ndaa joo a juú ndihi ña cája í cája vaaha xoho. Mé a ndaa núná nu yo caja í ndá ña cúni mí joo co chindee a mí cuahnu í xihín ñaha Ndióxi. ²⁴ Co ndítahan nu yo nducú yó ña vaaha mí cuití yo. Ndítahan ndihi iní caja í ña vaaha sahá ñani táhan í.

²⁵ Cuu caxí ndó ndijáa cuñu cáyahvi nuú yahvi ta a ndaca tuhún ndo ndájá naquixi a já ná a cáhvi i vi joho ini ndó xihín á. ²⁶ Jáchi ñaha Ndióxi, xitoho í cúu ñuyívi yóho xihín tóco ndihi ña in nu á.

²⁷ Candehé ndo. Tá ná cana in na co cúu cuéntá Jesús ndohó ña ná cuhun ndó cuxu ndó xihín ná, cuahán ndo tá cúni ndo ta cuxu ndó tóco ndihi ña sácú na nu ndó cuxu ndó. Ta a ndaca tuhún ndó na á naquixi a nuú yoco. Cuxu ndó ña jáchi tá ná ndaca

tuhún ndo na já cuu casáhá ndicani ini ndó xihín á. ²⁸ Joo tá sa nacaxi tuhun yachi na xihín ndo ña cúu á cuñu najoco na nuú yoco já quea a cúxu toho ndó ña. Jáchi tá ná cuxu ndó ña já quea caja ndó ña ná a váha cuu ini mé na cán. ²⁹ Cáhan i ña yóho jáchi cúni ña ná caja váha ndó sahá inga na. Co cáhan i ña saha mé ndó.

Mé a ndaa ndúu java ndó ta cáhán ndo ña co ndítahan ndihi ini ndó sahá ña cáhvi ini inga na jáchi cáhán ndo ña núná nu ndó caja ndó ña cúni ndo. ³⁰ Ta java ndó cáhán ndo ña tá sa nandiquiahva ndó ndixahvi nu Ndióxi sahá ña xixi ndó já quea a cuú cahan núu ñayivi sahá ña cája ndó. ³¹ Joo cáchi i xihín ndó ña xíní ñúhú candehé váha í ña cája í ná a jándicava í inga na nuú cuachi. Jáchi janda xihín ña xixi ta xihín ña xihí, xíní ñúhú caja cáhnu í Ndióxi. ³² Co ndítahan cacuú na jándicava inga ñayivi nuú cuachi jáchi tá cája í já cúu yó tátuhun yuu cándúhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cúu cuéntá Jesús. ³³ Ta tóco ndihi ña cája i, cája i ña ná cajii ini ndihi ñayivi xihín. Ta co ndúcú u ña váha mí i jáchi ndúcú u ña ná cajii ini ñayivi já ná cuu cacu ndaa ínimá ná.

11

¹ Xíní ñúhú caja ndó tá quiahva cája yehe jáchi quiahva já cája i ña nacaja Jesucristo, xitoho í.

Ña ndítahan nuú najihí caja na tá cája cáhnu na Ndióxi

² Cájii íní i xihín ndo, ñani i, na cúu cuéntá Jesús. Jáchi níi tiempo ñúhu ini ndó sahá i ta cája ta cája ndó ña najánaha i nu ndo. ³ Joo cúni ña ná candaa ini ndó ña cúu Jesucristo jini nuú in in taa. Ta quiahva já in in taa cúu dá jini nu ñájihí da. Ta quiahva já Ndióxi cúu á jini nuú Jesucristo. ⁴ Sahá ña cán quea tá co cándaa in dataa yijini dá nani xíca tahví da nu Ndióxi á nani cáhan da tuhun Ndióxi nu táca ñayivi já quea náha ña co cája cáhnu da Jesucristo, mé a cúu jini nu mé dá. ⁵ Ta in ñáñáha tá co chíjahvi ña jini ña nani xíca tahví ña nu Ndióxi á nani cáhan ña tuhun Ndióxi nuú ñayivi veñuhu já quea náha ña quehe núu ña yíi ña, da cúu jini nu mé ñá. Cúu á tátuhun najatá ña jini

ña. ⁶ Jáchi tá co chíjahvi in ñáñáha jini ña janda váha chága ví ná jatá táhyí ña jini ña. Joo tá cáhán ña ña quini canáha jini ña tá ná jatá táhyí ña jini ña já quea xíní ñúhú chíjahvi ña jini ña. ⁷ Co ndítahan toho nuú in dataa chíjahvi da jini dá veñuhu jáchi mé dá cúu dá da nacavaha Ndióxi xihín yuhú nuú mé á. Ta mé dá cúu dá da náha ndá quiahva cáhnu cúu Ndióxi. Ta náha in ñáñáha ña yíi ña cúu da jini nu ña. ⁸ Jáchi xíní ñúhú ndicuhun ini ndó ña coo natavá toho Ndióxi lásá yiquí ndícá ñáñáha já nacavaha mé á dataa, váha. Ña nacaja mé á quea natavá a lásá yiquí ndícá dataa ta já nacavaha mé á ñáñáha. ⁹ Jihna ñúhú nacavaha Ndióxi dataa ta já nacavaha mé á in ñáñáha chindeé ná da. ¹⁰ Ta sahá ña jihna ñúhú ga nacavaha Ndióxi dataa sahá ña cán quea ndítahan nuú in ñáñáha chíjahvi ña jini ña ná náha ña nu táto Ndióxi ña mé a ndaa cája cáhnu ña yíi ña. ¹¹ Joo mí, na cúu cuéntá Jesús ndítahan candaa íni ña xíní ñúhú táhan taa xihín náha. ¹² Vatí nacavaha Ndióxi ñáñáha nu cuítí xihín lásá yiquí ndícá dataa joo viti tóco ndihi dataa cácu da ñuyíví yóho cája najihí. Joo tóco ndihi ñayivi tácu na jáchi já cúni Ndióxi.

¹³ Mé ndó xíní ñúhú candehé ndo á váha á a váha toho ña ná a chíjahvi in ñáñáha jini ña nani xíca tahví ña nu Ndióxi veñuhu. ¹⁴ Jáchi sa cándaa váha íni ña a váha toho cája dataa tá lín nani ijí jini dá. ¹⁵ Joo ndisáhnu náha ñáñáha tá lín nani ijí jini ña jáchi Ndióxi nasahan ijí jini ña nu ña já ná chíjahvi a jini ña. ¹⁶ Joo tá ndúu java na ta co táhán ini na xihín ña cáhan i yóho já quea co cúni toho i ndituhún ihvi i xihín ná sahá ña yóho. Jáchi xíní ñúhú cándaa ini na ña ndijáa java ga na cúu cuéntá Jesús cája na tá quiahva cáchi i yóho tá táca na veñuhu.

Jánani Pablo na cúu cuéntá Jesús jáchi co cája ndisáhnu na tá táca na cajini na ña yíi cuéntá Jesús

¹⁷ Ta lín inga náha cúni cahan i xihín ndó saha ta co táhán ini i xihín á. Jáchi nañehé e tuhun ña co cája váha ndó tá táca ndo veñuhu. ¹⁸ Candehé ndo. Sa nañehé e tuhun ña sáhdá java táhan ndó tá táca ndo cája cáhnu ndó Ndióxi. Ta cája i cuéntá

cándusa i ña cáchí na saha ndo. ¹⁹ Vati mé a ndaa náha xicá a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó co cúu cuéntá Jesús. ²⁰ Ta sahá ña sáhdá táhan ndó nu táca ndó jan, náha ña quehe núu ndó ña yii xijini ndó ta xihín ña yóho co cúu ga ña cuéntá Jesucristo, xitoho í. ²¹ Jáchi tá ndíndaa hora cajini ndó tá in tá in ndó sa jihna ñuhú ndo ndáva ndó cuahan ndó quehe ndó ña cajini mé cuití ndo. Ta java ndó ni co ñehe ndó ña cuxu ndó. Joo java ndó xíhi ndó janda jáxini ndó mé ndó. ²² Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a váha cája ndó jáchi co ñehe na ndahví ña cuxu na cája ndó ta xihín ña yóho cácahan nu ná. A cándati toho ndó ña cajii íni i xihín ña cája ndó yóho jáchi a juú ña vaha queá cája ndó.

Ña ndítahan caja na cúu cuéntá Jesús tá xijini na ña yii cuéntá Jesús

(Mt. 26:26-29; Mr. 14:22-25; Lc 22:14-20)

²³ Ña jánaha i nu ndo yóho cúu ña najánaha Jesucristo, xitoho í nuú i. Jáchi mé ñuu tá cámaní ndiquiahva na mé á ndáha na ihvi a já natiin a in pan. ²⁴ Tá nandihí nandiquiahva ndixahví nu Ndióxi já nasahnda java ña ta já nacachi a já xihín ná: “Mé pan yóho cúu á tátuhun yiquí cuñu i ña ndiquiahva i saha mé ndó. Xíni ñuhú caja ndó ña yóho ña ná ndicuhun ini ndó ña naxihí i saha ndo”, nacachi Jesús. ²⁵ Ta tá nandihí naxijini na cán já natiin a in vaso nu ñuhu tó uva. Ta já nacachi a já: “Dó ñuhu ini vaso yóho cúu dó tátuhun níi i, dó cuíta saha ndó. Ta xihín dó yóho xinu coo nuú tuhun nasahan Ndióxi nuú ñayivi sanahá tá nacachi a jácau a ñayivi. Ndijáa tañu tá ná coho ndó mé tó uva, dó yii ndítahan ndicuhun ini ndó ña naxihí i saha ndo”, nacachi Jesús. ²⁶ Sahá ña cán queá ndijáa tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naxihí Jesucristo, xitoho í saha ndo. Ta xíni ñuhú caja ndó ña janda quiahva ná quixi tucu mé á ñuyívi yóho.

²⁷ Candehé ndo. Tá ná cuxu ndó pan ta tá ná coho ndó tó uva, ña yii cuéntá Jesucristo,

xitoho í ta co íin vii ínima ndo já queá cája ndó cuachi nu mé á ta quehe núu ndó ña naxihí a ndica crúxu saha ndo. ²⁸ Sahá ña cán queá tá cámaní casahá cajini ndó ña yii cuéntá Jesús xíni ñuhú coto ndojó jihna ndó mé ndó á vii ínima ndo nu Ndióxi á coó vii a. ²⁹ Jáchi tá ná cuxu ndaja nacuu ndó ña yii cuéntá Jesús já queá náha ña quehe núu ndó mé á. Jáchi ña xíxi ndó jan cúu á tátuhun yiquí cuñu mé á ta dó xíhi ndó jan cúu dó tátuhun níi á. Ta tá ná quehe núu ndó ña já quixi ña ndoho ini ndó caja Ndióxi. ³⁰ Sahá ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihí ná sahá ña naquehe núu na ña yii cuéntá Jesús. ³¹ Joo tá ná coto ndojó yo mí ña á íin vii ínima yo nu Ndióxi já queá a ndítahan toho nu mé a cúu xitoho í caja vii a sahá cuachí. ³² Joo tá jándoho mé á ini mí cúu á sahá ña co cúni a ña ná ndoho iní xihín ñayivi ñuyívi tá ná xinu coo quívi caja vii mé a cúu xitoho í sahá cuachi nacaja na cán.

³³ Candehé ndo, ñani i, na cúu cuéntá Jesús. Ña ndítahan caja ndó cúu ña yóho. Tá ná nditaca ndó cajini ndó ña yii cuéntá Jesús xíni ñuhú candati táhan ndó janda quiahva ná taca tóco ndihi ndó. ³⁴ Ta tá cuico ndó já queá xíni ñuhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajini ndó ña yii jan. Ta caja vii i sahá java ga ñaha tá ná saa i coto nihni i ndohó jan.

12

Ña ñehe táhvi ñayivi nu ínima yii Ndióxi

¹ Candehé ndó, ñani i, na cúu cuéntá Jesús. Cáhyi i ña yóho nu ndo jáchi cúni ña ná candaa ini ndó ndaja íin ña sahan ínima yii Ndióxi nu yo.

² Mé ndó sa cándaa vaha ini ndó ña tá cámaní ndiquehe ndó íchi cuéntá Jesús já nasacuu ndó tátuhun ñayivi cuáá jáchi nasanduu ndó ndáha tá nuú yoco, ña coo tachi cáhan. ³ Ta viti cúni caxi tuhún i xihín ndo ña ni in ñayivi a cuú chicaan na chahan jata Jesús tá ta ínima yii Ndióxi queá sahan tuhun nu ná cahan na. Ta tá cáchí na xihín ndinuhu ini na ña Jesús cúu xitoho na já

quéa náha ña ínima yii Ndióxi quéa sáhan tuhun nu ná cahan na.

⁴ Cuahá nuú ñaha ñéhe táhvi ñayivi caja na cuénta Ndióxi ta in túhún ínima yii Ndióxi sáhan ña nu ná. ⁵ Cuahá nuú chuun cuu caja ñayivi cuénta Ndióxi ta tóco ndihí cája chúun í cuénta mé a cúu xitoho í. ⁶ Ta sa jíin sa jíin cája in in í chuun nasahan Ndióxi nu yó caja í. Joo in túhún mé á quéa sáhan ña yóho nuú in in í caja í. ⁷ Ta sáhan Ndióxi in ñaha nuú in in í já náha ña ñúhu ínima yii Ndióxi iní ta xihín ña yóho cuu chindeé yo tóco ndihi na cúu cuénta Jesús. ⁸ Ínima yii Ndióxi yóho quéa cája ña ná cuu candaa ini java ñayivi ndaja íin ña vaha xihín ña a váha ta já ndicani na ña nuú ñayivi. Ta sa mé ínima yii Ndióxi quéa cája ña ná cuu cahan ñayivi ña ndichí ndivaha. ⁹ Ta cája mé ínima yii Ndióxi yóho xihín java na ña ná candee cáhnu ini na mé á. Ta sáhan mé ínima yii Ndióxi nuú java na ña ná cuu ndaja vaha na na quíhvi. ¹⁰ Java na ñéhe táhvi ná caja na ña xituhún. Ta java na ñéhe táhvi ná jáyaha na tuhun nacahan Ndióxi xihín ná nuú ñayivi. Ta java na ñéhe táhvi ná ndicuni na ndá na cúu na cája chúun cuénta ínima yii Ndióxi ta ndá na co cája chúun toho cuénta mé á. Ta java na ñéhe táhvi ná cahan na tuhun ña coó nasatiahva na. Ta java na ñéhe táhvi ná nducú ñehe na ña cúni cachi tuhun cahan na cán nuú ñayivi. ¹¹ Ta sa mé ínima yii Ndióxi cája tóco ndihi ña yóho ta in túhún mé á sáhan nuú in in ñayivi ña sácú ini a caja chúun vaha na xihín.

In cúu tóco ndihi na cúu cuénta Jesús saha ña candee ini na mé á

¹² Candehé ndo. Cuahá ndivaha nu ndáca yiquí cuñu í joo in víxí cúu á. Quiahva já íin xihín na cúu cuénta Jesús. ¹³ Ta quiahva já yáha xihín tóco ndihi mí, coó caja toho a á cúu yó na Israel á co cúu yó na Israel. Ta coó caja toho a á cúu yó na cómi in xitoho cuénta saha, á cúu yó na xíca núná mé. Jáchi cája ínima yii Ndióxi ña cúu yó tátuhun in víxí ñayivi sahá ña in nanduú xihín Jesucristo tá nacandúta yó cuénta mé á. Ta in túhún ínima yii mé á nasacu a ini ínima in in í.

¹⁴ Xíní ñúhú ndicuhun iní ña a juú in víxí nu ndáca yiquí cuñu í jáchi cuahá ndivaha

nu ndáca yiquí cuñu ñayivi. ¹⁵ Candehé ndo. Cúu á tátuhun tá ná cahan in xoo saha yo já cáchi a já: “Yehe co cúu toho í ndáha ñayivi sahá ña cán quéa coó chuun toho í nuú yiquí cuñu na”, cáchi a. Joo co cája toho ña cahan saha yo yóho jáchi cúu á cuénta yiquí cuñu í. ¹⁶ Ta cúu á tátuhun tá ná cachi in johó í já cáchi a já: “Yehe co cúu toho í nduchú núu ñayivi sahá ña cán quéa coó chuun toho í nuú yiquí cuñu na”, cáchi a. Joo co cája toho ña cahan johó í yóho jáchi cúu á cuénta yiquí cuñu í. ¹⁷ Jáchi caja mé ndó cuénta ndaja caja í cuni johó í tá níí cúu yiquí cuñu í ná cacuu a nduchú núu yo. Ta ndaja caja í tahmí ñaha tá níí cúu yiquí cuñu í ná cacuu a johó í. ¹⁸ Joo in in ña ndáca yiquí cuñu í yóho nasacu Ndióxi ña mé nu ndítahan coo a jáchi já nasacu ini a caja. ¹⁹ Xíní ñúhú caja ndó cuénta tá in víxí johó ná candaca níí cúu yiquí cuñu í já quéa co íin ndihi toho yiquí cuñu í. ²⁰ Ta vatí cuahá ndivaha nu ndáca yiquí cuñu in in í joo in víxí cúu yiquí cuñu í. Ta quiahva já íin a xihín na cúu cuénta Jesús.

²¹ Candehé ndo jáchi sácú u in quiahva nu ndo: Nduchú núu yo a cúu cachi a xihín ndáha yo ña co xíní ñúhú a ña. Ta ni yiquí jíní yo a cúu cachi a xihín saha yo ña co xíní ñúhú a ña. ²² Ña yáha xihín yiquí cuñu í cúu ña yóho. Java tañu cáhan yo ña vitá in ñaha ndáca yiquí cuñu í joo ña jan xíní ñúhú chága yó ña. ²³ Ta mé xoo yiquí cuñu í ña cáhan yo coó cuahá saha, ña co cúni yo ña ná candehé ñayivi, ña cán cúu ña chijahví vaha í ²⁴ vatí co xíní ñúhú caja í já xihín ñaha ña cuu candehé ñayivi. Xihín ña yóho cuu candaa ini ndá quiahva nacavaha Ndióxi in in xoo yiquí cuñu í ta cuu candaa ini ndaja candaa vaha chága yó ña cáhan yo coó cuahá saha. ²⁵ Ta xihín ña yóho co sáhdá java táhan yiquí cuñu í jáchi in in xoo yiquí cuñu í ndihi ini a sahá java ga xoo yiquí cuñu í. ²⁶ Ña cán quéa tá ndicuehe in xoo yiquí cuñu í ndijáa java ga ña cán ndíhíhvi a sahá ña ndóho in xoo yiquí cuñu í. Joo tá víí cája na xihín in xoo yiquí cuñu í já quéa cáji ini java ga xoo yiquí cuñu í.

²⁷ Ta tóco ndihi ndó, na cúu cuénta Jesús cúu ndó tátuhun yiquí cuñu Jesucristo jáchi

in nanduu ndihi ndó xihín á ta in in ndó cúu ndó tátuhun in xoo yiquí cuñu a. ²⁸ Ta tá quiahva ín chuun cajú in in xoo yiquí cuñu í quiahva já ín chuun cajú in in na cúu cuéntá Jesús. Jihna ñúhú ñacaxi Ndióxi na apóstol ta já ñacaxi a na jáyaha tuhun Ndióxi nuú ñayivi ta já ñacaxi a na jánaha tuhun Ndióxi nuú ñayivi ta já ñacaxi a na cajú ña xitúhún. Ta já ñacaxi a na ndája vaha na quíhvi xihín na chindeé ñayivi xihín na sáhdá chuun nuú java ga ñayivi xihín na cáhan tuhun ña coó nasatiahva na. ²⁹ Joo a juú ndihi na cán cúu apóstol. Ta ni a juú ndihi na cúu ná na jáyaha tuhun cáhan Ndióxi nuú ñayivi. Ta ni a juú ndihi na jánaha ñayivi. Ta ni a juú ndihi na cajú ña xitúhún. ³⁰ Ta ni a juú ndihi na ndája vaha na na quíhvi. Ta ni a juú ndihi na cáhan tuhun ña coó nasatiahva na. Ta ni a juú ndihi na tiahva nducú ñehe ña cúní cachi tuhun cáhan na cán. ³¹ Joo mé ndó xíní ñúhú ndinducú ndo ña ná quiahva Ndióxi in ña vaha chága nu ndo. Ta viti cúní jánaha í ña cúu ña vaha chága nu ndo.

13

Ña ndítahan cajú í tá quíhvi iní ñayivi

¹ Tá ná cuu cahan í tá nuú tuhun cáhan ñayivi ndúu ñuyíví yóho ta tá ná cuu cahan í tuhun cáhan tátó Ndióxi joo tá co quíhvi iní í ñayivi já queá coó saha toho ña cáhan í. Jáchi xihín ña jan cúu u tátuhun in caa jácasá na, á tátuhun in caa xoo tá jácasá na ña. Quiahva já ín í tá co quíhvi iní í ñayivi. ² Ta ni coó sahá ña ná cacuu u in da jáyaha tuhun cáhan Ndióxi nuú ñayivi tá co quíhvi iní í ñani táhan í. Jáchi tá co quíhvi iní í ñayivi coó cajú toho ña ná cuu candaa iní í tóco ndihi ñaha ta ni coó cajú toho a tá xíní tóco ndihi ña xíní da ndichí ta ni coó saha toho tá cándéé cáhnu ndivaha iní í Ndióxi janda quiahva cuu cahan í xihín in yucu ña ná ndicanda ña. Coó saha toho tóco ndihi ña yóho tá co quíhvi iní í ñani táhan í. ³ Ta vatí ná ndicahnda í tóco ndihi ña cómí í ta já quiahva í ña nuú na ndahví coó sahá toho ña cajú í tá co quíhvi iní í ñayivi. Ta ni coó cajú toho ña ná ndiquiahva í yiquí cuñu í ña ná cayí a sahá ña cáhan í tuhun Ndióxi tá co quíhvi iní í ñayivi.

⁴ Jáchi tá mé a ndaa táhyí quíhvi iní ñayivi co ndihi iní xihín ná. Ta tá quíhvi iní na táhvi iní saha ná ta co cáhvi toho iní xihín ná. Ta ni co cajú lándá yo nu ná ta ni co cajú cáhnu í mí nu ná. ⁵ Tá quíhvi iní ñayivi ín toní ñúhú yo xihín ná ta co cájihnda yo ñaha nu ná jáchi co nducú yo ña vaha mé cuití yo. Ta ni co xójo iní xihín ná. Ta ni co quehé cuéntá sahá ña núu cajú na xihín yo tá quíhvi iní na. ⁶ Ta tá quíhvi iní ñayivi co cáji toho iní tá cajú núu na joo cáji iní tá cajú na ña ndaa. ⁷ Tá quíhvi iní ñayivi ín tiahva í ndoho iní saha ná ta cáhvi iní ña vaha cuití va saha ná. Ta cándusa í ña cajú na ña ndaa. Ta sahan ndeé iní xihín tóco ndihi ñaha.

⁸ Tá mé a ndaa quíhvi iní ñani táhan í já queá anda ama cáa quívi a ndihi sahá ña quíhvi iní na. Joo vaxi quívi a jáyaha ga ñayivi tuhun cáhan Ndióxi xihín ná nuú ñayivi jáchi vaxi quívi ndihi sahá. Ta a cáhan ga na tuhun ña coó nasatiahva na. Ta vaxi quívi ndihi sahá ña ndichí jini ñayivi. Joo a ndihi toho saha ña quíhvi iní táhan í. ⁹ Jáchi chá cuití xíní yo saha Ndióxi ta chá cuití tiahva í jáyaha í tuhun cáhan Ndióxi nuú ñayivi. ¹⁰ Joo tá ná xinu coo quívi ndaja Ndióxi ña ná nduú ñayivi víí já queá a cúní ñúhú ga yo ña tóco ndihi java ga ña ndihi saha cán jáchi sa nanduu ñayivi víí nu mé á.

¹¹ Candehé ndo. Tá nasacuu u in taa loho nacahan í tá quiahva cáhan na valí ta quiahva já nahvi iní í ta quiahva já nacaja í. Joo tá nasahnu í najándacoo í ña cajú na valí. ¹² Viti co cándaa vaha iní ndá quiahva cáa Ndióxi. Cúu á tátuhun tá sándehe yo nuú in yutatá ña co jíñu vaha ga. Joo vaxi quívi cuní mé á tá quiahva cáa. Viti cuahá ñaha co cándaa iní saha mé á. Joo vaxi quívi candaa iní saha mé á tá quiahva xíní mé á mí viti. ¹³ Ín uní nuú ñaha ña a ndihi sahá. Ta ña yóho cúu á: ña cándéé iní Ndióxi, ta inga cúu ña ndatí casaa, ta inga cúu ña quíhvi iní Ndióxi xihín ñani táhan í. Ta cúní Ndióxi ña ná cajú í ndihuní ña yóho joo ña cáhnu chága cúu ña quíhvi iní Ndióxi xihín ñani táhan í.

14

Tá cáhan ñayivi tuhun ña coó ñacatiahva na

¹ Xíní ñúhú ndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínimá yíi Ndióxi nu yo. Ña xíní ñúhú ndíhi chága ini ndó ndinducú ndo cúu ña ná cuu jáyaha ndó tuhun cáhan Ndióxi xihín ndó nuú ñayivi. ² Jáchí ndá na ñacuu cáhan tuhun ña coó ñacatiahva na já quéa cáhan na xihín Ndióxi joo co cáhan na xihín ñayivi jáchi co cándaá ini ñayivi ña cáhan na. Ña cáhan na cúu ña ñaquixi cuéntá ínimá yíi Ndióxi ta cúu á ña co xíní ndíhi ga ñayivi. ³ Joo ñayivi tiahva jáyaha tuhun cáhan Ndióxi xihín ná nuú ñayivi cája na ña ná cuu cuahnu chága na cúu cuéntá Jesús xihín tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán. ⁴ Ta na ñehe táhvi cáhan tuhun ña coó ñacatiahva na sáhnú mé cuití va na xihín tuhun sáhan Ndióxi nu ná cahan na. Joo na tiahva jáyaha tuhun cáhan Ndióxi nuú ñayivi chindeé na na cúu cuéntá Jesús ña ná cuahnu chága na xihín ñaha cuéntá Ndióxi.

⁵ Mí i cájii íni i tá ná cuu cahan ndíhi ndó tuhun ña coó ñacatiahva ndó. Joo cájii chága ini i tá ná jáyaha ndó tuhun cáhan Ndióxi xihín ndó nuú ñayivi jáchi xíní ñúhú chága ña yóho a juú ga ña ná cahan ndó tuhun ña coó ñacatiahva ndó. Vaha cája ndó ña ná cahan ndó tuhun ña coó ñacatiahva ndó tá íni in na tiahva nducú ñehe ña cúni cachi tuhun cáhan ndo nuú ñayivi já quéa ná cuu cuahnu na cúu cuéntá Jesús xihín mé tuhun cán. ⁶ Xíní ñúhú candehé vaha ndó ña cáhan i xihín ndo, ñani mí i na cúu cuéntá Jesús. Coó saha toho ña cája i tá ná saa i coto nihni i ndohó ta já casahá i cahan i inga tuhun ña co cándaá ini ndó. Tá ná caja i já ndaja caja ndó candaa ini ndó tuhun Ndióxi. Ña ndítahan caja i quéa cahan i xihín ndo ña najánaha Ndióxi nuú i. Ta ndítahan cahan i ña ndíchi cuéntá Ndióxi. Ta ndítahan cahan i tuhun nasahan Ndióxi nuú i jáyaha i ña nu ndo. Ta ndítahan jánaha i ña ndaa cuéntá Ndióxi nu ndo.

⁷ Sácú u in quiahva nu ndó saha in tóyoo xihín dó jácaha. Ndaja caja ñayivi candaa ini na ndá yaa tiví yo tá co tiáhva í tiví vaha í, á tá co tiáhva í jácaha vaha í. ⁸ Ta ndaja

caja na soldado cacu tiahva na mé ná ña ná cuhun na caní táhan na tá ta co tiáhva vaha da tiví trompeta tiví da do. ⁹ Quiahva já yaha ri xihín mé ndó jáchi tá co cáhan ndó tuhun ña cuu candaa ini ñayivi ndaja caja ri na cán candaa ini na ña cáchi ndo. Cúu á tátuhun cáhan ndó nu táchi cuití va. ¹⁰ Cája i cuéntá íni cuahá ndivaha nuú tuhun cáhan ñayivi ndijáá ñuyíví. Joo ndijáá tuhun yóho cáxi cáhan nuú ñayivi cáhan na mé tuhun yóho. ¹¹ Joo tá co cándaá ini i ña cáhan inga ñayivi xihín i já cúu u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co cándaá ini i tuhun cáhan na. ¹² Sahá ña cán quéa tá mé a ndaa cúni ndó ndiquehe ndó ña sáhan ínimá yíi Ndióxi nu ndo já quéa xíní ñúhú ndinducú ndó ña ná cuu chindeé ndó na cúu cuéntá Jesús ná cuahnu chága na xihín tuhun Ndióxi.

¹³ Ña cán quéa ndá ndó ñehe táhvi cáhan ndó tuhun ña coó ñacatiahva ndó já quéa xíní ñúhú caça ndó nu Ndióxi ña ná cuu ndicani ndó ña cúni cachi a nuú ñayivi. ¹⁴ Jáchí tá ná casahá cáhan i tuhun ña coó ñacatiahva i nani xíca tahví i nu Ndióxi já quéa mé a ndaa cája cáhnú i Ndióxi xihín ínimá i joo co cája i ña xihín xíní túni i jáchi co cándaá ini i ña cáhan i. ¹⁵ Ndía caja i. Ña xíní ñúhú caja i quéa caça tahví i nu Ndióxi xihín ínimá i ta xihín xíní túni i. Ta quiahva já xíní ñúhú cata i xihín ínimá i ta xihín xíní túni i viti. ¹⁶ Candehé ndó. Ná caja í cuéntá tá ndúu ndó veñuhu ta casahá ndo cáhan ndó tuhun ña coó ñacatiahva ndó nani cája cáhnú ndó Ndióxi xihín ínimá ndo ta ndaja coo quíhvi in ñayivi ini veñuhu, na co cándaá cuahá ini sahá ñaha cuéntá Ndióxi. Ta xíní johó na ña cáhan ndo joo a cúu caja na ndiquiahva na ndixahvi nu Ndióxi in nuú xihín ndo jáchi co cándaá ini na tuhun cáhan ndo. ¹⁷ Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaá ini na tuhun cáhan ndo. ¹⁸ Ndiquiahva i ndixahvi nu Ndióxi jáchi cáhan cuaha chága i tuhun ña coó ñacatiahva i a juú ga ndohó. ¹⁹ Joo nani jánaha i ndohó ini veñuhu cájii chága íni i cahan chá cuití va i tuhun já ná cuu candaa cáxi ini ndó ña cáhan i. Jáchí ndá chuun

quéa ná caħan cuahá nahá i tuħun ña co cándaä ini ndó.

²⁰ Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na co cája cuachi. ²¹ Xíní ñúhú ndicuhun ini ndó ndaja cáchi ley naçahyi Moisés sanahá tá naçachi Ndióxi já: “Vatí ná chindahá i na cáħan java tuħun tóħo nuú ñayivi Israel joo a cuni joho na nuú caħan na tóħo cán jáchi sáa ini na Israel”, naçachi Ndióxi. ²² Tá cáħan ndó tuħun ña coó naçatiahva ndó nani cája cáħnu ndó Ndióxi co chindeé cuahá ña yóho na cúu cuéntá Jesús cuahnu na xihín tuħun Ndióxi vatí mé a ndaa na co xíní tuħun Ndióxi cátońtó na xihín ña yóho. Joo tá jáyaha ndó tuħun cáħan Ndióxi xihín ndó nuú na cúu cuéntá Jesús já cuu cuahnu chága na xihín tuħun Ndióxi vatí co chindeé cuahá ña yóho na cámaní ndihvi íchi cuéntá Jesús. ²³ Caja mé ndó cuéntá tá ná taca cuahá na cúu cuéntá Jesús ta casahá cáħan ndó tuħun ña coó naçatiahva ndó nani cája cáħnu ndó Ndióxi ta ndaja coo quíhvi na co xíní tuħun Ndióxi nu ndúu ndó jan. Ta tá ná cuni na ña sa jín tuħun cáħan ndihí ndó já quéa caħán na ña cúu ndó na tachí. ²⁴ Joo tá ná jáyaha tóco ndihí ndó tuħun cáħan Ndióxi nuú ñayivi ta ndaja coo quíhvi in na co xíní tuħun Ndióxi. Ta tá ná cuni joho na ña cáħan ndo já quéa tahnda ini na saħá cuachi na ta já casahá ndícani ini na saħá ña núu cája na. ²⁵ Ta já nahma na cuachi na nuú ñayivi ta já ndicava xítí na caja cáħnu na Ndióxi. Ta xihín ña yóho candaä ini na ña mé a ndaa táhyí ín Ndióxi tañu ndó.

Tóco ndihí ña cája ndó cuéntá Ndióxi xíní ñúhú caja ndó ña xihín toní ñúhú

²⁶ Candehé ndó, ñani i, na cúu cuéntá Jesús. Tá ná nditaca ndihí ndó caja cáħnu ndó Ndióxi ndítahan nuú java ndó cata ndó salmo ta java ndó jánaħa ndó nuú ñayivi. Ta ndítahan nuú java ndó jáyaha ndó tuħun cáħan Ndióxi xihín ndó nuú ñayivi ta java ndó caħan ndó tuħun ña coó naçatiahva ndó. Ta ndítahan nuú java ndó nducú ñehe ndó ña cuni cachi tuħun cáħan na cán. Tóco ndihí ña cája ndó xíní ñúhú chindeé

a ndohó ná cuahnu chága ndó xihín tuħun Ndióxi. ²⁷ Ta ndítahan nuú ivi á uní ñayivi cuití va caħan na tuħun ña coó naçatiahva na. Joo tá in tá in na caja na ña. Ta ndítahan canduu na tiahva nducú ñehe na ña cuni cachi tuħun cáħan na jan. ²⁸ Ta nu táca ndo tá coó ni in na tiahva nducú ñehe ña cuni cachi tuħun cáħan na jan já quéa vaha chága ná a cáħan na tuħun ña coó naçatiahva na. Ña vaha chága quéa ná caħan yaá na ña ná cuni joho mé ná xihín Ndióxi cuití va. ²⁹ Ta quiahva já tá jáyaha na tuħun cáħan Ndióxi xihín ná nuú ñayivi ná caħan ivi á uní na cuití va. Ta xíní ñúhú caħan na nani ndúu tútu java ga na veñuhu sándehe na á mé a ndaa cáħan na cuéntá Ndióxi. ³⁰ Cája i cuéntá nani jáyaha in na tuħun cáħan Ndióxi xihín ná nuú ñayivi ta jácaħan Ndióxi ini inga na ña ná jáyaha na tuħun cáħan Ndióxi xihín na nuú ñayivi já quéa xíní ñúhú cacoo na nu cuití cán. ³¹ Xihín ña yóho tá in tá in ndó cuu jáyaha ndó tuħun cáħan Ndióxi xihín ndó nuú ñayivi. Já cuu catiahva na xíní joho ña yóho ña ná ndindeé chága ini na xihín tuħun Ndióxi. ³² Na jáyaha tuħun Ndióxi nuú ñayivi xíní ñúhú cañehe na quiahva xihín ña cája na nani ndáti na jáyaha na tuħun cán. ³³ Jáchi cuni Ndióxi ña ná coo vaha iní caja í tóco ndihí ñaha ta ná a jána í nuú cája í ña.

Ta cáji ini mé á tá cája vaha ndó tá quiahva cája java ga na cúu cuéntá Jesús ndúu ndijáa ga ñuu. ³⁴ Nani táca ndo veñuhu co ndítahan nuú najihí caħan na jáchi co cáni a nu ná caħan na. Ta co ndítahan nu ná cacomí na cuéntá saħá na veñuhu jáchi quiahva já saħnda ley Moisés. ³⁵ Ta tá cuni na candaä ini na saħá ña jánaħa na veñuhu xíní ñúhú ndaça tuħun na yí ná saħá tá casaä na vehe na. Jáchi co náħa vaha tá cáħan in ñañáħa nani táca na veñuhu.

³⁶ Xíní ñúhú ndicuhun ini ndó ña a juú ndohó cúu na nandiquehe tuħun Ndióxi nu cuití. Ta a juú ndohó cuití xíní tuħun Ndióxi, vaha. ³⁷ Ta ndá na cáħán ña naçhutú ndaa ínima ná xihín ínima yí Ndióxi ña ná jáyaha na tuħun cáħan Ndióxi xihín ná nuú ñayivi, mé na cán ndítahan nu ná ndicuni na ña cáħan i ña saħnda Ndióxi

nuú i cahan i. ³⁸ Joo tá co cúni na cán cuni johó na ña cahan i cuéntá Ndióxi já quea a cúni johó ndó ña cahan na cán.

³⁹ Candehé ndo, ñani i, na cúu cuéntá Jesús. Xíní ñúhú ndíhi ini ndó nducú ndó ña ná jáyaha ndó tuhun cahan Ndióxi xihín ndó nuú ñayivi. Ta a cáji nuu ndó nuú na cúu cuéntá Jesús tá ñéhe táhvi ná nu Ndióxi cahan na tuhun ña coó nasatiahva na. ⁴⁰ Joo tóco ndíhi ña cája ndó xíní ñúhú caha ndó ña xihín toní ñúhú já ná a jána ndó nu cája ndó ña.

15

Ndicani Pablo sahá quivi tá nanditacu Jesús

¹ Candehé ndó, ñani i, na cúu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánaha i nu ndo. Mé tuhun vaha yóho sa nandiquehe vaha ndó ña ta candeé vaha ini ndó a janda viti. ² Ta jivi saha mé tuhun vaha najánaha i nu ndo yóho cuu cacu ndaa ínima ndo tá ná caha ndó ña najánaha i nu ndo xihín ndinuhu ini ndó. Joo tá ná a cája ndó ña já quea mé a uun va quea nacandúsa ndó ña.

³ Candehé ndó. Ña jihna ñúhú nacaja i quea najánaha i ndohó ña nacatiahva mí i cuéntá Jesucristo, mé a naxihí ndica crúxu sahá cuachí tá quiahva cáchí tuhun Ndióxi. ⁴ Ta najánaha i ndohó ña najánduxu na mé a joo tá naxinu quivi uní já nanditacu tucu a tá quiahva cáchí tuhun Ndióxi coo. ⁵ Ta já nanaha mé a nu Pedro xihín nuú java ga táhan da uxu ivi naxica tuun xihín a cán. ⁶ Ta tá nandíhi já nanaha mé a nu yáha ga nuú uhun ciento na cúu cuéntá mé á. Ta in naxini tocó ndíhi na mé á. Ta cuaha táhan na naxini ñahá cán tácu yíi va na vatí java na sa naxihí na. ⁷ Ta tá nandíhi já nanaha mé a nu Jacobo ta anda já nanaha mé a nu tóco ndíhi na naxica tuun xihín á.

⁸ Ta tá nu ndíhí já nanaha ri Jesús mé a nuú i vatí cúu u da nacacu tá sa nayaha mé tiempo tá naxica nuu Jesús ñuyíví yóho. ⁹ Yehe cúu u in apóstol joo ín chága saha tóco ndíhi java ga na apóstol a juú ga yehe. Ta ni coó sahá i cahan na apóstol xihín i jáchi naxica nuu i nacaja xíxi i xihín na cúu cuéntá Ndióxi jihna. ¹⁰ Joo mé a ndaa cúu u

in apóstol jáchi nacamáni Ndióxi yehe. Ta a juú ña uun cúu ñamaní nacaja Ndióxi xihín i jáchi cuahá ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihín ndée mí i. Sahá ña táhvi ini Ndióxi sahá i sahá ña cán quea chindeé a yehe cája i chuun mé á yóho. ¹¹ Joo co cája toho a á yehe á na java apóstol cán cája chúun chága. Ña vaha quea tóco ndíhi nde jánaha nde sahá Jesucristo ta mé ndó sa nacandúsa ndó ña najánaha nde nu ndo.

Vaxi quivi nditacu tóco ndíhi ndíi

¹² Tá nacahan nde tuhun Ndióxi xihín ndo najánaha nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co nditacu toho na sa naxihí. ¹³ Joo tá cáchí ndo ña co nditacu toho na sa naxihí cúu á tátuhun co cándúsa ndó ña nanditacu tucu Jesucristo. ¹⁴ Ta tá co cándúsa ndó ña nanditacu tucu Jesucristo já quea coó saha toho tuhun Ndióxi ña xíca nde jánaha nde nuú ñayivi. Ta xihín ña yóho mé a uun va candeé ini ndó mé á. ¹⁵ Ta tá mé a ndaa coó nanditacu Jesucristo já quea cúu nde na cahan ña tuhún saha Ndióxi jáchi cáchí nde xihín ndo ña mé Ndióxi najánditacu a Jesucristo. Joo tá co nditacu toho ndíi ta ndehe cáchí nde ña nanditacu Jesucristo já quea cúu nde na tuhún. ¹⁶ Jáchi tá co nditacu ndíi já quea cúni cachi a ña coó nanditacu toho Jesucristo. ¹⁷ Ta tá coó nanditacu Jesucristo já quea coó saha toho ña candeé ini ndó mé á ta cómí yíi va cuachi cuéntá saha ndó. ¹⁸ Ta xihín ña yóho cúni cachi a ña a cacu ndaa toho ínima na cúu cuéntá Jesús tá ná quivi na. ¹⁹ Tá ndíyahvi ña cúu yó cuéntá Jesús nani tácu yo ñuyíví yóho cuití va já quea ndáhví nahá nacuu.

²⁰ Joo mé a ndaa nanditacu ndusa Jesucristo. Ta mé a cúu á ña nu cuití nanditacu. Ta vaxi quivi nditacu tóco ndíhi yó, na cúu cuéntá mé á. ²¹ Candehé ndo. Naquihvi cuachi ñuyíví sahá ña nacaja Adán, da nasacuu taa nu cuití ta sahá cuachi yóho nacasahá xíhi ñayivi. Ta jivi sahá ña nacaja Jesucristo tá naxihí a ndica crúxu cuu nditacu tóco ndíhi na sa naxihí. ²² Xíhi ñayivi sahá ña naquixi na chichi Adán ta cája na ña núu tá quiahva nacaja Adán sanahá. Ta

viti sahá ña cúu yó cuéntá Jesucristo catacú anda ama cáa quivi sahá ña ñacaja mé á. ²³ Ta tá ná ndindaa nuú in in na nditacu na já nditacu na caja Ndióxi. Mé Jesucristo quea nanditacu nu cuítí. Ta tá ná ndicó coo tucu mé á ñuyívi yóho já caja mé á ña ná nditacu tóco ndihi na cúu cuéntá mé á. ²⁴ Anda já ndihi sahá tóco ndihi ñaha ñuyívi yóho jáchi jándihi Jesucristo sahá tóco ndihi na cómi cuéntá sahá ñayivi ñuyívi yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá sahá ná. ²⁵ Jáchi Jesucristo quea ndítahan nu cacomí cuéntá sahá na cúu cuéntá mé á janda quiahva ná xinu coo quivi jándihi Ndióxi sahá tóco ndihi na coo cúní ñahá. ²⁶ Ta janda nu ndíhí jándihi mé á sahá ña ná quivi ñayivi. Ta xihín ña yóho a quivi ga ñayivi. ²⁷ Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchi tuhun Ndióxi ña cómi Jesucristo cuéntá sahá tóco ndihi ñaha, coo cúní cachi a ña cómi a cuéntá sahá Ndióxi viti jáchi mé Ndióxi quea nandiquiahva tóco ndihi ñaha ndáha mé á ña ná cacomí a cuéntá sahá. ²⁸ Ta tá sa cómi Jesucristo cuéntá sahá tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in túhún jiní já jahyi Ndióxi ta mé Ndióxi quea nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

²⁹ Ndúu java ñayivi ta cándúta ná sahá na sa ñaxihí já ná cacu ndaa ínima ná. Joo cáchi na coo cándúsa toho na ña ndítacu ndii. Ta ndá sahá quea cája na já tá coo cándúsa na nditacu ndii. Joo xini vaha í ña nditacu ndii.

³⁰ Ndá chuun quea chícaan yo mí ndijáá ní quivi nuú tondóhó nuú cuu cahní na mí tá coo cándúsa í ña nditacu tucu ndii. ³¹ Candehé ndo, ñani i, na cúu cuéntá Jesús. Ndijáá ní quivi vaxi tondóhó nuú i. Ta jalóho cúní quivi i. Mé ndó cándaa vaha ini ndó ña cáji ini i sahá in nanduu ndó xihín Jesucristo, xitoho í. Sahá ña cán quea ndítahan nu ndo candúsa ndó ña cáhan i xihín ndo. ³² Cuahá tañu ñaquihvi táhan i xihín ñayivi quini ñuu Efeso. Mé na cán cúu ná tátuhun quití yúcu. Joo coo sahá toho ña ndóho ini i yóho tá mé a ndaa coo ndítacu

toho ndii. Jáchi tá coo ndítacu toho ndii já quea cuu cohó caja í tá quiahva cáchi java ñayivi tá cáchi na já: “Cóho cuxu vaha í ta coho vaha í jáchi yó quivi itaan á iajá cúu yó.”

³³ A quiahva ndó ñamaní jándahvi inga na ndohó. Xini ñuhú ndicuhun ini ndó in tuhun ña cáchi já: “Tá cátahan í xihín ñayivi, na coo cája vaha já quea játiví na mí.” ³⁴ Xini ñuhú ndicaxí vaha ini ndó ta a cája ndó cuachi jáchi ndúu java ndó ta coo xini toho ndó Ndióxi. Cáhan i ña yóho xihín ndo já ná cacahan nuu ndo sahá ña núu cája ndó.

Ndaja coo tá ná nditacu ndii

³⁵ Cája i cuéntá ña ndúu java ndó ta ndícani ini ndó já cáhan ndo já: “Ndaja caja Ndióxi jánditacu a na sa ñaxihí. Ndá yiquí cuñu ndiquehe na caja Ndióxi.” Já ndáca tuhún java ndó ndícani ini ndó. ³⁶ Joo ña ndícani ini ndó sahá jan cúu á ña tóntó ndivaha. Xini ñuhú candehé ndo ndá quiahva yaha xihín in tata tá chíhin na ña. Mé tata yóho xini ñuhú quivi a já ná nduta utu loho nu á. ³⁷ Tá xútu ñayivi, coo xútu toho na in yucu. Ña xútu na cúu mé tata ta coo cája toho a á cúu á trigo á inga nuú tata. ³⁸ Ta mé Ndióxi quea cája ña ná ñehe táhvi in in a cán ndá quiahva coo a ta ndá javí cañehe in in a. ³⁹ Ta a juú in javí ñehe tóco ndihi ñaha. Sa jín sa jín javí in in a. Tátuhun yiquí cuñu in dataa, sa jín in yiquí cuñu da xihín yiquí cuñu quití. Ta yiquí cuñu laa sa jín in a xihín yiquí cuñu tiyacá. Sa jín ñacaja Ndióxi xihín in in ña ñacavaha mé á. ⁴⁰ Ta quiahva já ñacavaha Ndióxi ña ndúu indiví ta jín va ndaa a. Ta jín yiquí cuñu ñayivi ñuyívi yóho. Ta sa jín quiahva ndató ña in indiví ta sa jín quiahva ndató ña in ñuyívi. ⁴¹ Jín ñacaja Ndióxi ña ná yehe candii ta jín ñacaja mé á ña ná yehe yoo. Ta jín ñacaja mé á ña ná yehe quimi ta in java quimi sa jín sa jín yehe rí nuú inga rí. ⁴² Quiahva já vaha ri xihín ñayivi tá ná xinu coo quivi jánditacu Ndióxi na. Jáchi yiquí cuñu yó ña jánduxu na tixi ñuhú cúu á ña ndihi sahá. Joo tá ná nditacu tucu já a ndíhi ga sahá yo anda ama cáa quivi. ⁴³ Mé yiquí cuñu í jánduxu na tixi ñuhú yóho cúu á tátuhun in ña núu ndivaha jáchi ndihi sahá. Joo tá ná xinu

coo quiví ndicoo tucu a caja Ndióxi já cacuu a ña ndató ndivaha jáchi a ndíhi sahá. Ña jánduxu na tixi ñúhu cúu á ña vitá ndivaha joo ña nditacu tucu cacuu a ña ndacú vaha. ⁴⁴ Jáchi tá ná jánduxu na mí tixi ñúhu, ña jánduxu na cúu yiquí cuñu cuénta ñuyíví yóho. Joo tá ná nditacu tucú já ñehe yó inga yiquí cuñu, ña cúu cuénta indiví. Jáchi tá íin yiquí cuñu cuénta ñuyíví, ña ndíhi sahá ta já íin ri yiquí cuñu cuénta indiví, ña a cuú ndíhi sahá.

⁴⁵ CÁCHI tuhun Ndióxi ña tá nacavaha Ndióxi Adán, da nasacuu taa nu cuití já nacaja mé á ña ná catacu da. Joo cáhnu chága Jesucristo a juú ga Adán jáchi mé á cajú ña ná catacu ñayivi anda ama cúa quiví. ⁴⁶ Ña jihna ñúhú sahan Ndióxi nu yó cúu yiquí cuñu í, ña ndíhi yachi sahá. Ta tá nu ndíhi já sahan mé á inga yiquí cuñu nu yó cuénta indiví ta ña cán cúu á ña co ndíhi sahá. ⁴⁷ Mé Adán, da nacavaha Ndióxi nu cuití nasacuu da da nacavaha mé á xihín ñundáhyi ta cúu dá da ñuyíví yóho. Ta Jesucristo, xitoho í, cúu á inga táhan dataa joo cúu á ña naquixi chí indiví. ⁴⁸ Tá in tá in ñayivi ñehe na yiquí cuñu tátuhun yiquí cuñu Adán jáchi cúu á ña nacavaha Ndióxi xihín ñundáhyi. Joo ñayivi, na ndiquiahva mé ndáha Jesucristo vaxi quiví ndiquehe na inga yiquí cuñu cuénta indiví, ña co ndíhi sahá. ⁴⁹ Ta viti íin yiquí cuñu í tátuhun yiquí cuñu Adán joo vaxi quiví ndiquehé inga yiquí cuñu í cuénta indiví ta cacuu a tátuhun yiquí cuñu Jesucristo.

⁵⁰ Candehé ndo, ñani í, na cúu cuénta Jesús. Cúni caxi tuhun í xihín ndo ña a cúu toho cahun yiquí cuñu í yóho indiví ña ná cacomí Ndióxi cuénta sahá jáchi mé yiquí cuñu í yóho co cúu á ña cuu catacu anda ama cúa quiví. Joo ña inga, ña quiahva mé á nu yó cán, a ndíhi toho sahá. ⁵¹ Ta viti cúni caxi tuhun í nu ndo sahá in ñaha nasahjin jehé nuú ñayivi ta ña yóho quéa: A juú ndíhi toho í quiví jáchi tá ná xinu coo quiví quixi tucu Jesucristo ñuyíví yóho anda jáví ndijama ndíhi tá quiahva ndáa í ta mé Ndióxi quiahva inga yiquí cuñu nu yó. ⁵² Ta in náa cuití yaha ña yóho jáchi cacuu a tátuhun in ndicuani nu yó ta já ndahyi trompeta, mé dó ndahyi nu ndíhi

cuí cán já nditacu tóco ndíhi na sa naxihí ta a ndíco coo ga na quivi na. Ta mí, tá tácu yó, ña caja Ndióxi xihín yó quéa ndijama yiquí cuñu í. ⁵³ Jáchi mé yiquí cuñu í ña ndíhi sahá yóho a cuú toho nduu a tátuhun yiquí cuñu ña quiahva Ndióxi nu yó. Sahá ña cán quéa xíní ñúhú ndijama mé á yiquí cuñu í yóho já ná cuu cohó coo í xihín mé á anda ama cúa quiví. ⁵⁴ Ta tá sa nandijama yiquí cuñu í ta nandu a ña co ndíhi sahá anda ama cúa quiví já quéa xinu coo nuú tuhun ña nacachi na profeta sanahá: “Vaxi quiví ndíhi sahá ña xihí ñayivi jáchi nacandee Jesucristo nasahnu a nuú ña xihí na. ⁵⁵ Ta xihín ña yóho cajú cáhnu í mé á jáchi a quiví ga ñayivi sahá ña naquee vaha Jesucristo”, cÁCHI tuhun Ndióxi. ⁵⁶ Tá cajú ñayivi cuachi já quivi tá quivi na sahá ña cajú na. Ta cúu á tátuhun tá tén líhma na jáchi ndóho ini na sahá cuachi na. Anda sanahá ndivaha sahdá ley Moisés ña quivi ñayivi sahá cuachi na jáchi ñehe íni cuachi caja ña ná quivi ñayivi. ⁵⁷ Joo ndixahvi Ndióxi jáchi chindee a mí ña ná cuu quee vaha í sahá ña nacaja Jesucristo, xitoho í sahá yó.

⁵⁸ Sahá ña cán quéa ndítahan nu ndó, ñani máni í, na cúu cuénta Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándee ini ndó mé á. Ta ndítahan nu ndó ndíhi ini ndó caja chúun ndó cuénta mé á jáchi sa cándaq vaha ini ndó ña a juú ña uun cúu toho chuun cajú ndó jáchi íin Jesucristo, xitoho í xihín ndo.

16

Tá ndítaca jiuhún ña jasá na nuú na cúu cuénta Jesús

¹ Ta viti cúni ndicani í nu ndo ndá quiahva ndítahan caja ndó tá jánditaca ndó jiuhún ña jasá ndo nuú na cúu cuénta Jesús ndúu ñuu Jerusalén. Xíní ñúhú caja ndó tá quiahva najánaa í nuú na cúu cuénta Jesús ndúu estado Galacia. ² Ña ndítahan caja ndó quéa: tá in in domingo xíní ñúhú tavá xóo ndó táhan jiuhún ña sácú ini ndó jasá ndo jatá ña nandiquehe ndó sahá chuun nacaja ndó. A cándati toho ndó janda quiahva ná saq í jan jáchi xíní ñúhú jánditaca cuéé ndó ña. ³ Ta caxi mé ndó ndá na cúni ndó cañehe jiuhún jan ñuu

Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihin ná ña ná quiahva na ña xihin jiuhún jan nuú na cúu cuéntá Jesús ndúu mé cán. ⁴ Ta tá cuni Ndióxi já cuhun ri yehe va xihin na jan anda ñuu Jerusalén.

Sácú ini Pablo cuhun da coto nihni da na cúu cuéntá Jesús ndúu java ga ñuu

⁵ Saa i coto nihni i ndohó cuni. Joo jihna ñuhú yaha i coto nihni i na cúu cuéntá Jesús ndúu estado Macedonia. Ta anda jáví saa i ñuu Corinto jan. ⁶ Ta tá cuni Ndióxi candoo nahá chá i xihin ndo. Á tá coo ta coo i ní tiempo vixi xihin ndó jan. Ta tá sa ná quee e cuhun i inga ñuu já cuu chindeé ndó yehe. ⁷ Co cuni toho i coto nihni númí i ndohó. Ña cuni quéa candoo too i coo nahá chá i xihin ndo jan tá cuni Ndióxi. ⁸ Joo candoo too i coo i ñuu Efeso yóho janda quiahva ná yaha vicó Pentecostés. ⁹ Jáchi mé a ndaa núná nuú i cája chúun i cuéntá Ndióxi yóho jáchi cuahá ndivaha na ndíquehe vaha na tuhun Ndióxi vatí ndúu cuahá na co cuni yehe sahá chuun cája i yóho.

¹⁰ Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajii íni da coo da xihin ndo. Jáchi cája chúun da cuéntá Jesucristo, xitoho í tá quiahva cája chúun yehe. ¹¹ A cándají ndó da. Ña ndítahan caja ndó quéa chindeé ndó da já ná coo vaha ini da quixi da nuú i. Jáchi yehe xihin java ga na cúu cuéntá Jesús ndáti nde xinu coo da nu ndúu nde yóho.

¹² Ta viti cuni ndicani loho i nu ndó sahá ñani, da naní Apolos. Mí i naxica tahví ndivaha i nu dá ña ná saa da xihin java ga na cúu cuéntá Jesús coto nihni da ndohó. Joo co cuni da caja da ña viti. Cája i cuéntá tá ná nuná nu dá já saa da coto nihni da ndohó.

Ndíndayí Pablo na cúu cuéntá Jesús ndúu ñuu Corinto

¹³ Cuéntá vaha coo ndó. Xini ñuhú ndacú coo ini ndó jáchi cándéé ini ndó Jesús. A yíhví toho ndó. Canduu ndacú ndó íchi cuéntá Jesús. ¹⁴ Xini ñuhú caja ndó tóco ndihi ñaha sahá ña quíhvi ini ndó ñani táhan ndó.

¹⁵ Candehé ndo ñani i, na cúu cuéntá Jesús. Sa xini vaha ndó sahá na vehe Estéfanos, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé na na cúu cuéntá Jesús. ¹⁶ Ña cuni caca i nu ndo cúu ña ná cuni johó ndó ña sáhdá na cán nu ndó caja ndó. Ta xini ñuhú caja ndó tá quiahva cuni ndihi na cán jáchi chindeé na ñayivi ta cája chúun vaha na cuéntá Jesús. ¹⁷ Cájii ini i jáchi naxinu coo Estéfanos xihin Fortunato xihin Acaico nu íin i ta nachindeé na yehe. Ta vatí a cuú quixi mé ndó nuú i ¹⁸ joo na yóho sahan na tuhun ndéé ini i xihin ñaha cuéntá Ndióxi tá quiahva nacaja na xihin mé ndó. Mé a ndaa ndítahan nu yo caja cáhnu í na cája tátuhun na yóho.

¹⁹ Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihin Priscila chindahá na Ndióxi coo ndó. Ta jári na cúu cuéntá Jesús táca cája cáhnu Ndióxi vehe na cán chindahá na Ndióxi coo ndó. ²⁰ Tóco ndihi na cúu cuéntá Jesús ndúu chóho chindahá na Ndióxi coo ndó. Ta xini ñuhú cahan Ndióxi xihin táhan ndó ta tatí yuhu táhan ndó ta yii caja ndó ña.

²¹ Yehe cúu Pablo ta xihin ndáha mí i cáhyí i ña yóho nu ndó ta chindahá i Ndióxi coo ndó.

²² Ta ndá na co quíhvi ini Jesucristo já ná cuhun cháhan jatá ná. Cama chá ná quixi Jesucristo, xitoho í.

²³ Ña cuni quéa ná caja cuaha Jesucristo, xitoho í ñamani xihin ndo. ²⁴ Quíhvi ini i tóco ndihi ndó jáchi tóco ndihí cúu yo cuéntá Jesucristo, xitoho í. Já ná coo.

Carta chí ivi nacahyí Pablo nuú na cúú cuéntá Jesús ndúu ñuu Corinto

*Cáhan Ndióxi Pablo xihín na cúú cuéntá
Jesús ndúu ñuu Corinto*

¹ Yehe cúú Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani, Timoteo cáhyí nde carta yóho nu ndóhó, na cúú cuéntá Ndióxi ndúu ñuu Corinto ta nu tóco ndihi na cúú cuéntá Ndióxi ndúu estado Acaya. ² Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

Ndóho ini Pablo

³ Cóho caja cáhnu í Ndióxi, mé a cúú tátá xitoho í, Jesucristo. Jáchi Ndióxi cúú á tátá yo, mé á sá tahví ini saha yo ta cúú á Ndióxi ña chindeé mí tá ndóho ini. ⁴ Mé a cán sahan tuhun ndeé ini nu tóco ndihi ña ndóho ini já queá ná cuu caja ri mé ví quiahva í tuhun ndeé ini ñayivi tá ndóho ini na. Tá quiahva cája mé á xoho quiahva já ndítahan caja í xihín ñayivi. ⁵ Jáchi tá quiahva ndóho ndivaha ini saha Jesucristo ta sa mé quiahva já sahan cuahá ndivaha mé á tuhun ndeé ini tá ndóho ini. ⁶ Tá ndóho ini mé nde já cuu quixi tuhun ndeé ini mé ndó ta já cuu cacu ndaa ínimá ndo. Tá sahan Ndióxi tuhun ndeé ini nde já queá sahan ri mé á tuhun ndeé ini mé ndó viti. Ta xihín ña yóho cuu coo ndacú vaha ini ndó tá ná quixi ña ndoho ini ndó tá quiahva ndóho ini mé nde. ⁷ Cándéé ini nde ña a jándacoo ndó tuhun Ndióxi jáchi cándaá cáxí ini nde ña tá quiahva ndóho ini quiahva já sahan Ndióxi tuhun ndeé ini.

⁸ Candehé ndó, ñani i, na cúú cuéntá Jesús. Cúní nde caxi tuhun nde nu ndo tá quiahva nandoho ini nde estado Asia. Nasacuu a tondóhó chicáhnu nuú nde ta chí a cándéé ga ini nde nacahán nde, nduu. Ta chí nasahnda ini nde: “Yóho quiví”, nacahán nde. ⁹ Nacahán nde ña jándá ndáti cuití nde quivi nde joo nachindeé ña yóho ndehe jáchi náha nuú nde ña co

ndítahan cándéé ini nde mé nde. Jáchi ña ndítahan cándéé ini nde cúú Ndióxi, mé a jánditacu tucu ndii. ¹⁰ Najácaacu Ndióxi ndehe tañu tondóhó ná a quiví toho nde. Ta mé á queá jácaacu a ndehe nuú ndihi tondóhó vaxi chága chí nuu. Jáchi cándéé ini nde mé á ña chindeé tá chindeé a ndehe nuú ndihi tondóhó. ¹¹ Ta mé ndó chindeé ndó ndehe tá xíca tahví ndó nu Ndióxi sahá nde. Jáchi tá ná caca tahví cuahá ñayivi nu Ndióxi sahá nde, sa mé quiahva já ndiquiahva cuahá ñayivi ndixahvi nu Ndióxi sahá ñamaní cája Ndióxi xihín nde.

*Ndicani Pablo ndá saha queá coo
nasahan da ñuu Corinto*

¹² Ín java ñaha cája ña ná coo vaha ini nde ta cúú á ña yóho: cándaá cáxí ini nde ña co cája nde ña núu ta tóco ndihi ña cája nde ñuyiví yóho cája nde ña xihín ndinuhu ini nde. Ta xihín ndinuhu chága ini nde cája nde ña cán tañu mé ndó. Ta ni in ña cája nde co cája nde ña sahá ña ndíchí quixi jiní mé nde jáchi mé Ndióxi queá táhvi ini sahá nde ta chindeé a ndehe cája vaha nde. ¹³ Tá nacahyí nde carta nu ndo jihna coo nacahyí nde tuhun ña a cúú cándaá ini ndó jáchi ndacú ndacú cáhan nde xihín ndo nu carta cáhyí nde. Jáchi cúní nde ña ná cándaá vaha ini ndó ¹⁴ ña co cándaá cuahá ini ndó viti. Ta cúní nde ña ná cajji ini ndó saha mé nde tá quiahva cajji ini nde saha ndo tá ná tandaa quiví quixi tucu Jesucristo ñuyiví yóho.

¹⁵ Sahá ña cándéé ini i ndohó sahá ña cán queá nasacu ini i coto nihni jihna ñuhú i ndohó ña ná cajji ndivaha ini ndó tá ná cuni ndó yehe ivi tañu. ¹⁶ Jáchi nasacu ini i coto nihni i ndohó tá ná yaha i cuhun i chí estado Macedonia ta já coto nihni tucu u ndohó tá ná ndicó coo i cán. Anda já cuu chindeé ndó yehe quehé e íchi cuhun i chí estado Judea. ¹⁷ Coto a cáhán ndo ña nacahvi ivi johó ini i tá nasacu ini i caja i ña yóho. Ta ni a cáhán ndo ña sácú ivi johó ini i xihín ña cája i tá quiahva cája ñayivi ñuyiví jáchi ndá chuun queá cáhí i jivi a tá a juú a. ¹⁸ Sándehé cáxí Ndióxi ña co jándahvi nde ndohó jáchi co cáhí nde xihín ndo “ajan” tá cúní cachi nde “uhun.” ¹⁹ Jáchi co cája Jesucristo já. Co cáhí a “ajan” tá

cúni a cachi a “uhun.” Ndinuhu ña ndaa quea cáhan Jesucristo jáchi mé á cúu á in túhún jini já jahyi Ndióxi, mé a cáhan Timoteo xihin Silvano xihin yehe sahá nu ndo. ²⁰ Jáchi xihin Jesucristo jáxinu coo Ndióxi tóco ndihi tuhun nasahan mé á nu yo. Sahá ña cán quea tá caja cáhnu í Ndióxi cuu cachi yó “Já ná coo.” Ta tá cáchi yo “Já ná coo” cúu á sahá ña nacaja Jesucristo. ²¹ Ta mé Ndióxi nandaja ndacu a ndehe ta nandaja ndacu a ndohó. Ta nacaxi a mí cacuu ñayivi cuéntá mé á. ²² Jáchi mé á cúu á xitoho mí ta cómi a cuéntá saha yo. Ta nasacu a inima yii mé á ini inima yo já ná candaa vaha ini ndá quiahva in ñamaní caja Ndióxi xihin yo chí nuu.

²³ Sándehé cáxi Ndióxi ña mé a ndaa táhyi cáhan i xihin ndo. A ñaha saa i ñuu Corinto jan tá quiahva nasacu ini i caja i jáchi coo cúni jácacuéha i ini ndó. ²⁴ Coo cúu á sahá ña cúni nde caja ndúsa nde sahá ña ndítahan candúsa ndó. Jáchi sa xini nde ña sa ndúu ndacu ndó cándéé ini ndó Jesucristo. Ña cúni nde quea chindeé táhan nde xihin ndo já ná cajii ini ndó.

2

¹ Sahá ña cán quea nasacu ini i ña ná a cuhun tucu u coto nihni i ndohó já ná a cacuéha ini ndó. ² Jáchi tá ná jácacuéha yehe ini ndó a cúu caja ndó jácajii ndó ini i jáchi mé ndó cúu na jácajii ini i. Joo ndaja caja ndó jácajii ndó ini i tá sa najácacuéha i ini ndó. A cúu caja ndó ña. ³ Sahá ña cán quea nacahyí i in carta ña nachindahá i nu ndo cán jáchi coo cúni xinu i jan ta jácacuéha ndó ini i sahá ña cája ndó. Jáchi ndítahan jácajii ndó ini i nani in i xihin ndo. Jáchi xini vaha i ña tá cájii ini i já cájii ini ri ndohó va. ⁴ Joo nani nacahyí i mé carta cán já nacasáhá táhvi ini i ta ndícani ini i janda quiahva nacasáhá sácu u. Coo nacahyí i ña sahá ña cúni ña ná catati ini ndó xihin á joo cúni ña ná candaa ini ndó ndá quiahva quihvi ndivaha ini i ndohó.

Ndítahan caja cáhnu ini na ndúu ñuu Corinto sahá in da nacaja cuachi

⁵ Ta mé da nacaja cuéha ini i cán coo nacaja cuéha da ini in túhún yehe tá nacaja da cuachi. Joo cúu á tátuhun nacaja cuéha

ri da ini ndihi ndó. Cáhan i ña yóho xihin ndo ña ná a jánani ndivaha ndó da. ⁶ Jáchi cuaha ndó sa najánani ndó da cán. Vati já va caja xixi ndó xihin dá. Ndáhví da. ⁷ Ña ndítahan caja ndó quea caja cáhnu ini ndó saha dá viti ta quiahva ndó tuhun ndeé ini da jáchi a juú tiahva náa cacuéha ini da xihin ña cája ndó xihin dá. ⁸ Sahá ña cán quea xica táhvi tucu u nu ndo ña ná jánaha ndó nu dá ña mé a ndaa quihvi ini ndó da. ⁹ Sa nacahyí vi in carta nu ndo nu ndícani i sahá ña yóho. Nacahyí i ña sahá ña nasacu ini i coto ndojó i ndohó á mé a ndaa táhyi cája ndó tá in nacachi i xihin ndo. ¹⁰ Ña cán quea ndá na ná caja cáhnu ini ndó saha já caja cáhnu ri ini yehe va saha ná. Ta tá in in ñaha ndítahan caja cáhnu ini i saha já quea cája i ña saha mé ndó. Ta sándehé cáxi Jesucristo ña cája i. ¹¹ Jáchi tá ná a cája i ña já quea cándéé tiñahá sacuaaha xihin yo jáchi sa xini vaha i ña cúni rí jándahvi rí ñayivi.

Ndícani ini Pablo nani in da ñuu Troas

¹² Tá naxinu coo i ñuu Troas ña caxi tuhun i tuhun vaha saha Jesucristo já nanuná nuú i caja chúun vaha i cuéntá mé á cúu xitoho í. ¹³ Joo coo nasahin vaha ini i jáchi coo nañehé e ñaní Tito. Sahá ña cán quea nandindayí i ñaní, na ndúu ñuu Troas já naquee e cuahan i chí estado Macedonia ndinducú u da.

Sáhan Jesucristo ndéé á nu yó quee vaha i

¹⁴ Ndíquiahva i ndixahvi nu Ndióxi jáchi sahá ña nacaja Jesucristo quee vaha í ní tiempo. Tá quiahva ndícuíta nuu in jico támi sahan quiahva já ndícuíta nuu tuhun Ndióxi cája nde já quea ná cuu candaa ini ñayivi tuhun vaha saha Jesucristo. ¹⁵ Jáchi mí cúu yó tátuhun jusa vaha ña támi sahan ña jóco Jesucristo nu Ndióxi. Ta ndícuíta nuu a tañu na jácacu Ndióxi sahá ña cándéé ini na mé á. Ta jári ndícuíta nuu a tañu na cuhun indayá sahá ña coo nacandúsa na mé á. ¹⁶ Mí cúu yó tátuhun jusa támi sahan nuú na sa cándaa ini tuhun Ndióxi jáchi xini na ñehe yó tuhun ña cuu jácacu inima ná. Ta nuú na coo xini tuhun Ndióxi cúu yó tátuhun in ña quini ndivaha sahan jáchi cuhun na indayá. Ndá na cúu caja jáxinu ini ñayivi, da já. ¹⁷ Jáchi xini Ndióxi

ña mé nde co xíca nuu nde cáhan nde tuhun Ndióxi sahá jjuhún ta co jáma nde ña tá quiahva cája cuahá ñayivi. Ña cája nde queá cáhan nde xihín ñayivi xihín ndinuhu ini nde ña sahan Ndióxi nuú nde cahan nde. Jáchi mé nde cúu nde na nachindahá Ndióxi ta cája chúun nde saha Jesucristo.

3

Cáxi tuhun Pablo sahá tuhun saá ña sahan Ndióxi nuú ñayivi

¹ Co cáhan nde ña yóho xihín ndo sahá ña cúní nde caja cáhnu nde mé nde. Jáchi co xíní ñuhú nde caça nde in tutu ña cáhí cúu nde ñayivi ndísáhnu ini nu ndo tá quiahva cája java na. ² Mé va ndó cuu quiahva ndó tuhun vaha sahá nde jáchi tá ná cuni ñayivi tá quiahva nandijama Ndióxi ínima ndo xihín tuhun naçahan nde xihín ndo já candaá ini na ña naçaja vaha nde tá naçaja chúun nde tañu mé ndó. ³ Jáchi náha cáxi táhyí a ña cúu ndó tátuhun in carta naçahyí Jesucristo ta mé nde jána ha nde ña nuú ñayivi. Co cúu á in carta naçahyí nuú tutu. Cúu á ña naçahyí ínima yíi Ndióxi, mé a tácu indiví. Ta cúu á in carta ña coo naçahyí nuú yuu jáchi cúu á tátuhun naçahyí a ini ínima ñayivi.

⁴ Ta cáhan nde ña yóho jáchi cándéé cáhnu ini nde Ndióxi sahá ña naçaja Jesucristo. ⁵ Co cúu á sahá ña quíxi jini mé nde cája nde ña. Jáchi Ndióxi queá sahan ndeé á nuú nde caja nde chuun yóho. ⁶ Ta mé á queá chindeé ndehe caja chúun nde cuéntá mé á xihín cuéntá tuhun saá naçahan nu yo. Co cája chúun nde saha ley naçahyí nuú tutu joo cája chúun nde saha ínima yíi Ndióxi. Mé ley cája ña ná quivi ñayivi joo cája ínima yíi Ndióxi ña ná catacu ñayivi anda ama cá quivi.

⁷ Tá naçahyí ley Moisés nuú yuu, já nandiyehé ndivaha nuu Moisés janda quiahva coo naçuu ga candehe na Israel nuu dá. Joo nuú nandiyehé nahá cán naçasahá ndáhva ña janda quiahva ndáhva ña. Candehe ndó. Vatí nandiyehé ndivaha nuú naquixi mé ley, ña cuu chindahá ñayivi cuhun na indayá ⁸ joo ndaja ga ví ndiyehé chága nuú quixi tuhun vaha cáhan saha Jesús nuú ñayivi

jáchi sahan ínima yíi Ndióxi tuhun yóho nu yo. ⁹ Candehe ndo. Vatí ndató naçahyí tá naquixi mé ley ña cuu chindahá ñayivi indayá joo ndaja ga ví ndató coo tá cáxi tuhun í xihín ñayivi ña coo ga cuachi na nu Ndióxi. ¹⁰ Jáchi coo sahá ga ña ndató mé ley naquixi jihna cán tá ná jácatáhan í ña xihín ña ndató chága naçahan Ndióxi nu yo viti. ¹¹ Ta tá ndató naçahyí nuú naquixi ña nandihí saha cán ndaja ga ví ndató chága coo ña sahan Ndióxi nu yo yóho jáchi a ndihí toho sahá.

¹² Ta sahá ña ndátí tiahva nde coo ña yóho sahá ña cán queá co yíhvi nde cáhan nde ña xihín ñayivi. ¹³ Co cája nde tá quiahva naçaja Moisés tá nachijahvi da nuu dá xihín in jáhma ña ná a cúní na Israel ña sa cuahan ndáhva ña nandiyehé nuu dá cán. ¹⁴ Joo mé na Israel cán coo naçandaá ini na ndá cuéntá queá nachijahvi Moisés nuu dá. Ta janda viti ndájí yíi xíní túni ná jáchi vatí cáhvi na tuhun Ndióxi ña naçahyí sanahá joo co candaá ini na ña jáchi najahvi xíní túni na ta a cúu nuná. Jesucristo cuití va cuu jándinuna xíní túni ná tá cándéé ini na mé á. ¹⁵ Mé na Israel ndájí yíi xíní túni ná janda viti jáchi tá cáhvi na ña naçahyí Moisés co candaá ini na ña. Cúu ná tátuhun in na jáhvi jáhma nuu. ¹⁶ Joo tá ná ndicó coo ini ñayivi nu Ndióxi já ndinuna xíní túni ná. Cúu á tátuhun ndicava jáhma naçandají nuu ná. ¹⁷ Jáchi ínima yíi Ndióxi cúu á xitoho í. Ta nu ín mé á, cán núná xíní túni ñayivi. ¹⁸ Ta viti cúu yó tátuhun in yutátá nuu cuu cuni ñayivi tá quiahva cáhnu cúu Ndióxi. Jáchi co ndájí ga xíní túni yo viti sahá ña naçasahá ndíjama Ndióxi mí viti ná nduú tá quiahva cá Jesucristo. Ta tá quiahva cáhnu cúu mé á quiahva já loho loho nduu cáhnu yó tá quiahva cá mé á. Já cája xitoho í, mé a cúu ínima yíi Ndióxi.

4

¹ Sahá ña cán queá ín ndacú ini nde cáhan nde tuhun Ndióxi xihín ñayivi jáchi sahá ña natahvi ini Ndióxi sahá nde sahá ña cán queá naçahan mé á chuun yóho nuú nde. ² Mé nde naçacu xóo nde tóco ndihí ña núu cája jehé ñayivi. Ta co sácú ini nde jándahvi nde ñayivi tá cáhan nde tuhun Ndióxi xihín

ná. Ña cája nde quea cáhan nde ndinuhu ña ndaa ta xihín ña yóho sándehe cáxi Ndióxi tá quiahva náha nde nuú ñayivi ña cája nde ña vaha. ³ Tá co cándaá ini ñayivi tuhun vaha sahá Jesús ña cáhan nde xihín ná, cúu á sahá ña xíca na íchi cuahan indayá. ⁴ Jáchi sahá ña co cándusa na ña cáhan nde xihín ná sahá ña cán quea nandaji xíní túni ná nacaja tiñahá, mé rí cúu xitoho ñuyívi yóho ña ná a cúni na ndá quiahva ndató ndíyehé tuhun vaha cáhan saha Jesucristo, mé a cáhnu ndivaha, mé a cúu á yuhú nuu Ndióxi. ⁵ Mé nde co xíca nuu nde cáhan nde saha mé va nde. Ña cája nde quea xíca nuu nde cáhan nde saha Jesucristo, mé á cúu xitoho í. Ta cáhan nde xihín ndo ña cája chúun nde nu ndo sahá ña cúni nde Jesús. ⁶ Jáchi nasahnda Ndióxi chuun ña ná queta ña yéhe tañu ña naá cán. Ta mé a cán quea nacaja ña ná ndíyehé ínima yo xihín tuhun Ndióxi já quea ná cuu candehé yo ndá quiahva yéhe nuu Jesucristo, ña náha ndá quiahva cáhnu cúu Ndióxi.

Ndá quiahva cuu canduú tá cándéé ini Jesucristo

⁷ Joo tóco ndihi ña ndáyahvi ña nasahan Ndióxi nu yo yóho cúu á ña ndácaan yiquí cuñu í vatí yiquí cuñu í cúu á tátuhun in quiji ndahyi. Nasahan Ndióxi ña ndáyahvi nu yo já quea ná cuu cuni ñayivi ña ín ndée Ndióxi cája tóco ndihi ñaha ta co cúu á ndée mí. ⁸ Ta vatí vaxi cuahá tondóho nu yo joo jáyaha tá jáyaha Ndióxi mí. Ta vatí ndicani ndivaha ini joo co jándihi nahá yo mí. ⁹ Ta vatí ndícuíta ñee na mí joo co jándacoo ndáha toho Ndióxi mí. Ta vatí jándicava na mí joo co jándihi na sahá yo chí uun. ¹⁰ Ta ndá nacuu nu xíca nuu í a íhvi toho cahni na mí tá quiahva nacaja na xihín Jesús. Ta xihín ña ndóho yiquí cuñu í náha ña tácu yíi va Jesucristo ta ín a xoho. ¹¹ Jáchi ndijáá níi quívi ndúcú na cahni na mí sahá Jesucristo. Joo xihín ña yóho núná nu yo jánaña í nuú ñayivi ña ndácaan ndée mé á ini yiquí cuñu í nani ndúú ñuyívi yóho. ¹² Ta sahá ña xíca nuu nde cáhan nde tuhun Ndióxi xihín ndo sahá ña cán quea ndúcú na cahni na ndehe. Joo sahá ña ndóho ini nde yóho cuu cacu ndaa ínima ndóho anda ama cáa quívi.

¹³ Jáchi já cáchí tuhun Ndióxi: “Sahá ña nacandee ini í Ndióxi sahá ña cán quea nacahan í cuéntá mé á.” Ta quiahva já cája ri ndehe va sahá ña cándéé ini nde Ndióxi. Ña cán quea co yíhvi nde cahan nde saha mé á nuú ñayivi. ¹⁴ Jáchi cándaá cáxi ini nde ña tá quiahva najánditacu Ndióxi Jesucristo, xitoho í quiahva já jánditacu a mí coo í xihín mé á. Ta já ndóho xihín ndehe xinu coo í nu ín mé á. ¹⁵ Nasacu ini Ndióxi ndoho ini nde tóco ndihi ña yóho saha mé ndó. Ña cán quea tá ná caja Ndióxi cuahá ñamaní xihín cuaha chága ñayivi já nduu cuahá na ndiquiahva ndixahvi nu á ña ná ndicáhnu mé á.

¹⁶ Sahá ña cán quea co cátañi ini xihín ña ndóho í vatí sa cáyatá yiquí cuñu í. Joo ndíyuta ini in in quívi yáha. ¹⁷ Cama chá yáha tóco ndihi ña válí ndóho ini ñuyívi yóho joo tá nandihí nandoho ini já vaxi cuahá ndivaha ña náhnu chága cuéntá mé á nu yo ta anda ama cáa quívi a ndíhi sahá. ¹⁸ Ta co ndítahan nu yo quehé cuéntá sahá ña sándehe yó viti. Ña ndítahan caja í quea cahvi ini sahá ña a cuú cuni xihín nuu yo. Jáchi vaxi quívi ndihi saha tóco ndihi ña sándehe yo viti joo ña a cuú cuni coo a anda ama cáa quívi.

5

¹ Jáchi sa cándaá ini ña cúu yiquí cuñu í tátuhun vehe nu ndácaan ínima yo. Mé vehe nu ndácaan ínima yo yóho cúu á ña vaxi quívi ndihi sahá. Ta anda jáví nasacu ini Ndióxi quiahva nu yo inga yiquí cuñu nuú coo ínima yó indiví. Ta mé nuú coo ínima yó cán a ndíhi sahá anda ama cáa quívi jáchi nacavaha Ndióxi ña. ² Nani ndácaan ínima yó yiquí cuñu í yóho já ndóho ini ta tána í jáchi xíca quíi ini ndiquehé inga tucu yiquí cuñu saá cuéntá indiví. ³ Jáchi jácandixi Ndióxi mí xihín yiquí cuñu saá cuéntá indiví já ná a cácuú tátuhun na coo jáhma. ⁴ Jáchi nani ndácaan ínima yo ini yiquí cuñu í yóho tána í ta táhnda ini vatí co cúu á sahá ña cúni yo jándacoo í yiquí cuñu í. Cúu á sahá ña ndiáva cáhnu ini coo ínima yo ini in yiquí cuñu saá. Anda jáví jándacoo í yiquí cuñu í ña ndíhi saha ta ndiquehé yiquí cuñu saá ña cuu cañehé anda ama cáa

quivi. ⁵ Jáchí mé Ndióxi quéa nasacu tiahva mí ndiquehé in yiquí cuñu saá jáchí mé á quéa nasahan ínima yíí á nu yó já ná candaa vaha iní ndá quiahva ín ña sácú ini Ndióxi quiahva nu yó chí nuu.

⁶ Sahá ña cán quéa ín ndeé iní jáchí cándaá iní ña nani ndácaan ínima yó yiquí cuñu í yóho ndúu xíca yó nu Jesucristo, xitoho í. ⁷ Ta vatí co xíní yó mé á joo xíca í íchi cuéntá mé á sahá ña cándeé iní mé á. ⁸ Ta co yíhví ga yó quiví viti jáchí cúní chága í jándacoo í yiquí cuñu í yóho já ná cuu cohó coo í xihín Jesucristo, xitoho í indiví. ⁹ Sahá ña cán quéa ní tiempo ndúcú yó caja í ña táhán ini mé á xihín. Vatí tácu yó á naxihí yó cúní tá cúní yó caja í ña táhán ini mé á xihín. ¹⁰ Jáchí vaxi quivi tá ná ndique táhan ndihí candita í nuú Jesucristo ndiquiahva tá in tá in í cuéntá nu mé á sahá ña nacaja í xihín yiquí cuñu í ñuyíví yóho, á cúu á ña vaha á cúu á ña núu.

Nandique táhan máni yó xihín Ndióxi sahá ña nacaja Jesucristo

¹¹ Caja cáhnu í Jesucristo xihín ndinuhu iní ta cándaá iní ña vaxi quiví cohó candita í nu mé á. Sahá ña cán quéa ndíhi ini nde jácahan nde ñayivi ña ná ndicó coo ini na. Ta xíní vaha Ndióxi ña caja nde ta cúní nde ña ná candaá ini ri mé va ndó ña. ¹² Ña cáhan nde yóho co cúu á sahá ña cúní tucu nde ndiñehe jícó nde mé nde. Ña cúní nde quéa ná coo vaha ini ndó xihín ña caja nde já ná cuu nducú ñehe ndó tuhun nuú na xíca ndíñehe jícó mé, na xíca cáhan lándá ta coó ña vaha quíxi ínima ná. ¹³ Vatí cúu nde na tachí nuú ñayivi joo cúu á sahá ña caja nde chuun Ndióxi. Ta tá co cúu nde na tachí já quéa cúu á sahá ña vaha mé ndó. ¹⁴ Ta sahá ña quíhví ini Jesucristo ndehe sahá ña cán quéa ndúsa caja nde ña cúní mé á. Jáchí cándaá cáxí ini nde ña naxihí Jesucristo saha tóco ndihí ñayivi ta in nanduú xihín Jesucristo tá naxihí a. ¹⁵ Naxihí Jesucristo saha tóco ndihí ña ná a catacú ga í saha mé cuití yó. Joo cúní a ña ná catacú saha mé a naxihí saha yó ta tá nandihí nanditacu tucu a. ¹⁶ Sahá ña cán quéa co sándehe ndaa ga nde ñayivi tá quiahva caja ñayivi ñuyíví. Vatí nacahan núu nde saha Jesucristo sanahá joo co caja

ga nde já viti. ¹⁷ Jáchí tá in nanduú xihín Jesucristo já nanduú tátuhun ñayivi saá. Ña cán quéa nandihí sahá ña yatá ta nanduú ñayivi saá nacaja Ndióxi.

¹⁸ Ta tóco ndihí ña yóho cúu á ña caja Ndióxi jáchí najándique táhan máni á mí xihín mé á sahá ña nacaja Jesucristo. Ta najándacoo a chuun yóho nuú nde ña ná jándique táhan máni nde tóco ndihí ñayivi xihín mé á. ¹⁹ Ta nasahan ñamaní nuú ñayivi ndique táhan máni ná xihín á sahá ña nacaja Jesucristo. Ta coó naquehe Ndióxi cuéntá sahá cuachi nacaja na. Ta ña yóho cúu chuun natahnda nuú nde nacaja Ndióxi ña ná caxi tuhun nde nuú ñayivi ña cúní mé á ndique táhan máni á xihín ná. ²⁰ Mé nde cúu nde na nachindahá Jesucristo ta xíca nde cáhan nde saha mé á. Ta viti cúu á tátuhun xíca tahví Ndióxi nu ndo tá cáhan mé nde. Ta viti xíca tahví nde nu ndó saha Jesucristo ña ná ndique táhan máni ndó xihín mé á. ²¹ Mé Jesucristo coó nacaja ni in cuachi joo sahá mí nacaja Ndióxi ña ná ndoho Jesucristo tátuhun in da nacaja cuachi. Ta sahá ña nacaja mé á co quehe ga Ndióxi cuéntá sahá cuachi nacaja í ta nanduú ñayivi ndaa nu mé á tátuhun cúní mé á.

6

¹ Ta sahá ña in cúu ndó xihín nde caja chúun yó cuéntá Ndióxi sahá ña cán quéa xíca tahví nde nu ndo ña ná a quehe núu ndó ñamaní caja Ndióxi xihín ndo. ² Jáchí já cáhí tuhun Ndióxi já:

Tá natandaa tiempo caja í ñamaní xuhun já naxini johó í nuú nacahun. Ta tá naxinu quivi jáca cu u yohó já nachindeé e yohó, cáhí tuhun Ndióxi.

Candehé vaha ndó. Viti ñuhú cúní Ndióxi caja cuahá ñamaní xihín ndo. Ta viti ñuhú cúní a jáca cu a ndohó.

³ Ta ni in túhún ña núu co caja nde já ná a cáhan núu ñayivi sahá chuun caja nde.

⁴ Ña caja nde quéa jánaha nde nuú ñayivi ní tiempo ña cúu nde na caja chúun cuéntá Ndióxi. Jáchí sahan ndeé ini nde tá ndóho ini nde. Ta tá ndímaní ñaha nuú nde ta tá vaxi tondóho nuú nde co ndíhi ini nde. ⁵ Jáchí nacani na ndehe ta nataán ná ndehe vecaa

ta ndívaa na xoo nde. Ta a juú quiahva najácaja chúun na ndehe ta java tañu cō quíji nde ta java tañu vaxi joco nuú nde. ⁶ Joo jánaħa nde nuú ñayivi ña cúu nde ñayivi cuéntá Ndióxi jáchi ndúu vií nde ta cándaā ini nde ña ndaa ta íin cáhnu ini nde xihín ñayivi ta cúu nde na vaħa ini. Ta saħá ña ndácaan ínima yii Ndióxi ini nde ta saħá ña quíhvi ini ndusa nde ndohó ⁷ ta saħá ña cáħan nde ña ndaa xihín ndée na saħan mé á nuú nde saħá ña cán jánaħa nde nuú ñayivi ña cája chúun nde cuéntá mé á. Ta saħá ña cúu nde ñayivi ndaa nu Ndióxi saħá ña cán quéa quíhvi nuu nde cáni táħan nde xihín rí quini tá cúni rí caja xíxi rí xihín nde. ⁸ Java tañu cája cáhnu ñayivi ndehe ta java tañu cáħan ihvi na xihín nde. Java tañu cáħan vaħa na saħá nde ta java tañu cáħan núu na saħá nde. Ta java tañu tá quiahva cája na xihín na tuħún quiahva já cája na xihín nde vatí cáħan nde ña ndaa. ⁹ Ta java tañu cája na tátuhun cō xíni na ndehe vatí xíni vaħa na ndehe. Ta mé a ndaa cúu nde tátuhun na sa xíhi vatí tácu yii va nde. Cája xíxi na xihín nde joo cō sáħní na ndehe. ¹⁰ Ta java tañu ndúu cuéħa ini nde joo níi tiempo cájii ini nde. Ta java tañu cándaħví ndivaha nde joo já cuahá ndivaha na cúu ná tátuhun na cuicá viti jáchi naçaxi tuħun nde tuħun Ndióxi nu ná. Ta ndaa nde tátuhun na cōó ñaha nuu joo íin ndihi ñaha cuéntá Ndióxi nuú nde.

¹¹ Ñani mí i, na ndúu ñuu Corinto jan. Tá cáħan nde xihín ndo cō chíjehé tuħun nde nu ndo jáchi quíhvi ini nde ndohó xihín ndinuhu ini nde. ¹² Vatí cō quíhvi ini ndó ndehe tá quiahva quíhvi ini nde ndohó joo cō jándacoo nde ña quíhvi ini nde ndohó. ¹³ Saħá ña cán quéa xíca taħví i nu ndo tá quiahva cája in dataa tá xíca taħví da nuú jahyi da. Ña cúni quéa ña ná quíhvi vaħa ini ndó yeħe tá quiahva quíhvi ndivaha ini i ndohó.

Cō ndítahan quíhvi nuu na cúu cuéntá Jesús xihín ñayivi cuéntá ñuyívi

¹⁴ Cuéntá coo ndó ná a ndíque táħan ndó xihín na cō cúu cuéntá Jesús jáchi cōó in cúu na xihín ndo. Jáchi ndaja cuu ndique táħan ña vaħa xihín ña núu. Ta ndaja cuu ndique táħan ña yeħe xihín ña naá. Ni in ña yóho a

cúu coo já. ¹⁵ Ta ama cuéhé Jesucristo coo a xihín Satanás, mé rí quini. Ta quiahva já ama ná cuu ndique táħan in na ndíco íchi cuéntá Jesús xihín in na cō cúu cuéntá mé á. ¹⁶ Ta ama ná cuu cachi ndó ña in cuu nu cája cáhnu na Ndióxi xihín nu cája cáhnu na yoco. Jáchi mí cúu yó tátuhun veñuhu Ndióxi, mé á tácu indivi. Ta já naçachi a já: Ndacaan i ínima na cúu cuéntá mé i ta caca nuu i xihín ná.

Yeħe cacuu u Ndióxi ña caja cáhnu na, ta mé ná cacuu na ñayivi, na cacomí i cuéntá saħa, cáchi Ndióxi.

¹⁷ Saħá ña cán quéa já naçachi Ndióxi, xitoho í já xihín ná:

Tavá ndo mé ndó tañu ñayivi quini jan.

Caxoo ndó nu ná ta a cája ndó ña núu ña cája na já ná cuu ndiquehe vaħa i ndohó.

¹⁸ Ta já yeħe cacuu u tátá ndo, ta mé ndó cacuu jahyi ta a i xihín jahyi jíhi i, cáchi Ndióxi, mé a cúu cája tóco ndihi ñaha.

7

¹ Candehé ndó ñani máni, na cúu cuéntá Jesús. Ña yóho cúu tuħun na saħan Ndióxi nu yo. Saħá ña cán quéa cō ndítahan nu yo caja í in ña núu ña cuu jácaquini yiquí cuñu í á ínima yo. Ña ndítahan caja í quéa cayihví yo Ndióxi ta cacu iní ndaja vií yo mí já ndiquiahva í mí ndáħa mé á.

Cájii ini Pablo jáchi nañdicó cōo ini na ndúu ñuu Corinto

² Xíca taħví nde nu ndo ña ná a cáji nuu ga ndó nu ínima ndo ta ná quíhvi ini ndó ndehe. Jáchi ni in ndó cōó naçaja xíxi nde xihín ta ni in ndó cōó najátivi nde ta ni in ndó cōó najándahvi nde. ³ Cō cáħan i ña yóho xihín ndo saħá ña cúni candehé ndaa i ndohó, vaħa. Jáchi janda jihna va naçachi i xihín ndo ña ñúhu ndó ínima i. Ta vaħa ri catacu u ta vaħa ri quivi i joo quíhvi ini tá quíhvi ini i ndohó. ⁴ Mé a ndaa cándeé cáhnu ndivaha ini i ndohó ta cájii ini i xihín ña cája ndó. Ta tá ndícuħun ini i saħa ndo já ndíndacú ini i ta ndícutú ndaa ini i xihín ña cájii ini i vatí ndóho ini i.

⁵ Janda naní na xinu nde estado Macedonia chí a cuú canduu vaħa nde jáchi ndáchi naçuu ndáca náħa tondóho nuú nde. Jáchi

ndijáá quixi ñaha jáquihvi ndehe janda quiahva yíhvi nde ndúu nde yóho. ⁶ Joo sahan Ndióxi tuhun ndeé ini ñayivi ndúu cuéha ini. Ña cán quéa nasahan tuhun ndeé ini nde jáchi naxinu Tito nu ndúu nde yóho. ⁷ Ta a juú sahá ña naxinu da yóho cuití va, vaha. Nandihvi tuhun ndeé ini nde jáchi nacajji ndivaha ini mé dá nacaja ndóhó. Ta nandicani da nuú nde ña xica ndivaha ini ndó cuni ndó ndehe ta anda quiahva táhnda ini ndó sahá nde. Ta nacachi da xihín i ndá quiahva ndicani ini ndó sahá i ta xihín ña yóho nacajji chága ví ini i.

⁸ Vatí nacacuéha ini ndó xihín carta nacahyí i nu ndo joo viti co táhnda toho ini i ña nachindahá i ña nu ndo. Vatí natahnda ini i tá naxini i ña nacacuéha ini ndó tixi chá tiempo ⁹ joo cájii ini i viti. Co cúu á sahá ña nacaja cuéha carta cán ndohó. Cájii ini i jáchi tóco ndihi ña nacaja cuéha ini ndó cán nanducú ñehe a ndohó nu Ndióxi. Mé ndó nacaja ndeé ini ndó tá quiahva cuni Ndióxi. Sahá ña cán quéa cándaá ini nde ña coo nacaja núu nde xihín ndo. ¹⁰ Jáchi tá cácuéha ini ta tá cája ndeé ini tá quiahva cuni Ndióxi caja í já quéa chindeé a mí ndicó coo ini. Ta xihín ña yóho jácacu a mí ta coo ñaha ndítahan táhnda ini saha. Joo tá cácuéha ini ñayivi ñuyíví co ndicó coo ini na sahá ña cán quéa ndihi saha ná indayá. ¹¹ Cándehé ndó ndaja nacaja ndeé ini ndó tá nacacuéha ini ndó tá quiahva cuni Ndióxi. Joo tá coo ña yóho ná yaha ta a jándacoo toho ndó cuachi nasacaja ndó, nduu. Joo viti a juú quiahva naxojo ini ndó saha mé cuachi ta nayihví ndo saha. Ta tá nandihvi já naxica ini ndó cuni ndó yehe ña ná chindeé e ndohó. Ta anda já nasahin tiahva ndó jándoho ndó ini da nacaja cuachi cán. Ta xihín ña yóho náha ña co táhan ini ndó xihín cuachi nacaja da cán. ¹² Ña cán quéa tá nacahyí i carta cán nu ndo coo nacaja i ña sahá da nacaja cuachi cán. Ta ni coo nacaja i ña sahá ñayivi nandoho ini sahá cuachi nacaja da. Nacahyí i ña jáchi xihín ña yóho cuu jánaha ndó nu Ndióxi ndá quiahva quíhvi ini ndó ndehe. ¹³ Ta ña yóho quéa sahan tuhun ndeé ini nde.

Joo nandindeé chága ví ini nde ta nacajji

ini nde tá naxini nde ña cájii ini Tito. Jáchi mé ndó nachindeé ndó da ña ná ndivaha ini da. ¹⁴ Jáchi mí i sa nacachi i xihín Tito ña cájii ini i xihín ña cája ndó ta coo nacandoo núu i nu Tito xihín ña nacachi i xihín dá saha ndo. Joho nacandoo vaha johó i nu dá jáchi tá quiahva cáhan nde ña ndaa xihín ndo quiahva já nacahan ndaa nde xihín mé dá. Ta ña cáchi nde quéa cájii ini nde xihín ña cája ndó. ¹⁵ Ta cásahá quíhvi ini chága da ndohó tá ndicuhun ini da ña nacaja ndó ña cuni mé dá. Ta nasahin toní ñuhú ndó xihín dá ta nandiquehe ndó da xihín ndinuhu ini ndó. ¹⁶ Ta cájii ndivaha ini i jáchi cuu candeé ini i ndohó sahá ña cája vaha ndó.

8

Játaca na jiuhún quiahva na nuú na ndahví

¹ Ta viti cuni nde ndicani nde nu ndóhó, ñani i ndá quiahva cája Ndióxi ñamaní xihín na cúu cuéntá Jesús ndúu estado Macedonia. ² Vatí a juú quiahva cuahá tondóhó quíxi nu ná joo cájii tá cájii ndivaha ini na. Ta vatí cúu ná ñayivi cándahví ndivaha joo ín vaha ndivaha ini na jóco ná jiuhún tátuhun na cuicá. ³ Cáhan ndaa i nu ndo ña cájii ini na jásá na ña ín nu ná ta janda java na coo cuahá nu ná sáhdá java na ña. ⁴ Ta xihín ndinuhu ini na naxica tahví na nuú nde ña ná quiahva nde ñamaní nu ná ñehe táhvi ná chindeé na na cúu cuéntá Jesús ndúu Jerusalén. ⁵ Chí nayaha quiahva najasá na ñaha na chí coo nacahan nde caja na já. Jáchi jihna ñuhú nandiquiahva na mé ná ndáha Ndióxi, xitoho í ña ná caja na ña cuni mé á. Anda já nandiquiahva na mé ná ndáha mé nde ná chindeé na ndehe. ⁶ Sahá ña cán quéa naxica tahví nde nu Tito ña ná saa tucu da nu ndó jan já ná jáxinu coo da nuú chuun nacasahá cája da jihna ña játaca da ña jóco maní uun ndó. ⁷ Jáchi mé ndó yójó johó ndó nu ndíhi ña cája ndó. Yójó ndó xihín ña candeé ini ndó Ndióxi. Ta yójó ndó xihín tuhun cáhan ndo cuéntá Ndióxi. Ta yójó ndó xihín ña xini ndo. Ta yójó ndó xihín ña ndíhi ini ndó cája ndó ña vaha xihín ñayivi. Ta quiahva já yójó ndó xihín ña quíhvi ini ndó ndehe. Ta quiahva

já ndítahan cayojó ndo nuú ña jásá ndo nuú na ndahví.

⁸ Ña cáhan i xihín ndo yóho co cúu á in chuun sáhndá i nu ndo. Ña cúni quea ná candaa ini ndó ndá quiahva chindeé na cán ñayivi xihín ndinuhu ini na. Ta tá cája ndó tá quiahva cája na cán já quea jánaha ndó ña mé a ndaa quíhvi ini ndó ñayivi. ⁹ Jáchi sa cándaa vaha ini ndó ña natahvi ini Jesucristo, xitoho í saha yo. Ta vatí nasacomí a tóco ndihi ñaha joo najándacoo a ña ta nandaja ndahví a mé á ña ná cuu nduu ndó tátuhun na cuicá ndivaha. Ta nacaja mé á ña yóho jáchi quíhvi ndivaha ini a ndohó.

¹⁰ Cája i cuénta ña vaha chága ná jáxinu coo ndó ña nacasáha cája ndó ava. Jáchi jihna ñuhú mé ndó nacasáha ndó játaca ndó jjuhún jan ta nacaja ndó ña xihín ndinuhu ini ndó. ¹¹ Candehé ndo. Xíní ñuhú jáxinu coo ndó ña nacasáha cája ndó jan. Ta ná caja ndó ña xihín ndinuhu ini ndó tá quiahva nacaja ndó janda tá mé saha. Ta xíní ñuhú quiahva ndó ña cuu jásá ndo ¹² jáchi ndá na cúni jásá ñaha já ndíquehe vaha Ndióxi ndá ña cuu jásá na. Saha ña cán quea xíní ñuhú quiahva ndó ña cuu quiahva ndó jáchi co xíca Ndióxi nu yo quiahva í ña co cómi yo.

¹³ A cáhan ndo ña co ndítahan nuú na cán caja chúun na nani cája chúun mé ndó ña ná chindeé ndó na. ¹⁴ Ña cúni Ndióxi quea ná a ndímani ni in ñaha nu táhan ndó. Jáchi ña ndímani nuú na cán, in cuahá nu ndóhó viti ña ná cuu chindeé ndó na. Joo inga tañu ña ndímani nu ndóhó, coo a nuú na cán ta já cuu chindeé na cán ndohó. Ta quiahva já canduu in nuú xihín táhan ndó. ¹⁵ Já cáchi tuhun Ndióxi já: “Ni coo nacayojó a nuú na najátaca cuahá. Ta ni coo nandimani á nuú na najátaca chá ña.”

Tito xihín na xíca xihín dá

¹⁶ Ndíquiahva i ndixahvi nu Ndióxi jáchi nacaja mé á ña ná ndihi ini Tito saha ndo tá quiahva ndíhi ini mí i saha ndo. ¹⁷ Jáchi nacandúsa da caja da ña nasahnda i nu dá. Ta sa ndícani ini ri mé dá saha ndo ta saha ña cán quea cúni da coto nihni da ndohó cuénta mé dá viti.

¹⁸ Ta chindahá i in dataa, da cúu cuénta Jesús saa da xihín Tito jan. Ta tóco ndihi ñayivi ndúu java ga veñuhu cáhan vaha na saha da cán ta saha ña cája chúun vaha da cáxi tuhun da tuhun vaha saha Jesús nuú ñayivi. ¹⁹ Ta mé na cúu cuénta Jesús, na táca ndijáa veñuhu yóho nandacaxi na da ña ná caca da xihín nde cañehe nde jjuhún cuhun nde ñuu Jerusalén. Ta tá cája nde ñamani xihín ñayivi cán já quea jánaha nde ña mé a ndaa táhyí cúni nde chindeé nde na. Ta xihín ña yóho cája cáhnu nde Ndióxi. ²⁰ Jáchi co cúni nde ña ná cáhan nuú ñayivi saha ña cája nde xihín jjuhún cuahá cán, ña najátaca ndó. ²¹ Saha ña cán quea ndíhi ini nde cája nde ña vaha. Ta a juú nu Ndióxi cuití va ndíhi ini nde cája nde ña vaha jáchi cúni nde caja nde ña vaha nuú ñayivi viti.

²² Ta xihín mé ñaní, da chindahá i nu ndó jan chindahá i inga tucu da cúu cuénta Jesús. Mé da yóho cuahá ndivaha tañu nanaha da ña in ini da caja da ña vaha xihín ñayivi. Ta viti xíca chága ini da caja da ña jáchi candeé ini da ña a jándacoo nuú ndó da. ²³ Ta ndá na ná ndaca tuhún ndohó saha Tito ndítahan cáhan ndó xihín ná ña cúu dá da xíca xihín mí i. Ta cáhan ndó ña in nuú cája chúun da xihín i chindeé nde ndohó. Ta tá ná ndaca tuhún na ndohó saha java ga na cúu cuénta Jesús cuahán xihín dá ndítahan cáhan ndó ña cúu ná na nachindahá na cúu cuénta Jesús táca veñuhu chóho. Ta cáhan ndó xihín ná ña cúu ná na cája cáhnu Jesucristo. ²⁴ Ta xíní ñuhú jánaha ndó nuú na cán ña mé a ndaa táhyí quíhvi ini ndó na já ná candaa ini na táca veñuhu cán ña in saha nde cáji ini nde xihín ndo.

9

Sa natataca jjuhún cuhun nuú na cúu cuénta Jesús

¹ Co xíní ñuhú cahyí chága i nu ndo saha jjuhún ña játaca ndó chindeé ndó na cúu cuénta Jesús ñuu Jerusalén. ² Jáchi sa xíní vi ña in vaha ini ndó caja ndó ña. Ta ndivaha ini i tá cáxi tuhun i nuú na ndúu estado Macedonia ña mé ndó, na ndúu estado Acaya jan nasacu ini ndó chindeé ndó ñayivi janda ava. Ta cuahá na ndúu estado Macedonia nandindeé ini na chindeé na

ñayivi sahá ña vaha ini mé ndó. ³ Joo chin-dahá i na cúu cuéntá Jesús yóho nu ndo já queá ná a cándo nuu i jáchi naçahan vaha i saha ndo nuú na yóho. Ta ña cuni queá ña ná coo tiahvá ndó ndiquiahva ndó jiuhún ña najátaca ndó jan tá quiahva naçachi i xihín ná. ⁴ Jáchi tiahvá náá java na ndúu estado Macedonia saa na xihín i ta cuni na ña co ndúu tiahvá ndó xihín mé jiuhún. Tá ná yaha ña yóho ta já cacahan ndivaha nuú nde caja ndó xihín ña jan sahá ña nasandee cáhnu ini i ndohó ta sa mé quiahva já cacahan ri nuú ndohó va. ⁵ Ta saha mé ña jan queá naçahan i ña xini ñuhú caça i ñamaní nuú na cúu cuéntá Jesús yóho ña ná cuhun na coto nihni jihna ñuhú na ndohó. Ta já ná chindee na ndohó nu játaca ndó jiuhún ña nasahan ndó tuhun ndó quiahva ndó jan. Já queá ná coo tiahvá jiuhún cán tá ná saa i ña ná nahá ña sahan ndó jiuhún jan sahá ña ín maní ini ndó ta co sahan ndó ña xihín ña ndúsa.

⁶ Xini ñuhú ndicuhun ini ndó ña yóho: Da xútu loho, chá va jáquee da. Da xútu cuaha, cuaha jáquee da. ⁷ Tá in tá in ndó xini ñuhú quiahva ndó tá quiahva nasacu ini ndó quiahva ndó. A quiahva cajihnda johó ini ndó ñaha ta ni a quiahva ndó ña xihín ña ndúsa. Jáchi quihvi ini Ndióxi na cájji ini jasá ñaha. ⁸ Ta cuu quiahva Ndióxi cuahá ndivaha nuú ña vaha nu ndó já queá ná a ndímaní ni in ñaha nu ndo. Jáchi johó cayojó johó a nu ndo já ná cuu chindee ndó na ndímaní ñaha nuú nani ná cacuu a nuú ña vaha. ⁹ Jáchi já cáchi tuhun Ndióxi já: Cuahá ndivaha ñaha jasá Ndióxi nuú na ndahví, ta já coo ña vaha cája mé á xihín ñayivi anda ama cáa quivi, cáchi tuhun Ndióxi.

¹⁰ Jáchi Ndióxi queá sahan tata nuú in dataa já ná cutu da ña. Ta mé a cán sahan ña cuxu da viti. Ta quiahva já caja Ndióxi xihín ndo. Quiahva mé á ña xini ñuhú ndo já ná cuu chindee chága ví ndó ñayivi. Ta já queá ñehe táhvi ndó canduu vaha ndó sahá ñamaní cája ndó. ¹¹ Ta já xinu ndó cacomí ndo cuahá ndivaha nuú ña cuicá ta xihín ña yóho cuu chindee cuaha ndó ñayivi xihín á. Ta mé jiuhún játaca ndó jan tá ndiquiahva nde ña nuú na ñuu Jerusalén já queá ndiquiahva na cán ndixahvi nu

Ndióxi sahá. ¹² Jáchi mé jiuhún játaca ndó cán tá ná ndiquiahva nde ña nuú na cúu cuéntá Jesús cán já queá chindee a na xihín ña ndímaní nu ná. Ta xihín ña yóho ndiquiahva ndivaha na cán ndixahvi nu Ndióxi. ¹³ Ta já caja cáhnu na Ndióxi jáchi xihín ña cája ndó yóho náha ña co quehe núu ndó tuhun vaha cáhan sahá Jesucristo. Jári caja cáhnu na Ndióxi sahá ña vaha ín ini ndó xihín ná. Jáchi chindee ndó na xihín ña jasá ndó nu ná ta chindee ri ndó java ga ñayivi. ¹⁴ Ta ndiquiahva na ndixahvi nu Ndióxi saha ndo jáchi xihín ña cája ndó náha cáxi a ña cája cuaha Ndióxi ñamaní xihín ñayivi. ¹⁵ Ndixahvi Ndióxi jáchi najasá mé á in ña cáhnu ndivaha nu yo ta ni co ñehe yó tuhun ndá quiahva ndicaní ña.

10

Cáhan Pablo saha mé dá

¹ Yehe cúu Pablo ta cuni caça i ñamaní nu ndo. Joo cuni cahan vii i ña nu ndo tá quiahva cáhan vii Jesucristo xoho. Ndúu java na tañu ndó ta cáchi na ña tá ín i tañu ndohó já cúu u in taá uun ini. Joo cáchi na tá ín xicá i já cúu u da co yíhvi cahan ndacú xihín ndo. ² Ta viti xica táhvi i nu ndo ña ná a cája ndó ni in ñaha ña cuu jánani i ndohó saha. Tá ná saa i coto nihni i ndohó jan co cuni jánani i java ndó, na jácojo cuachi jatá nde, na cáchi ña cája nde tóco ndihi ñaha tá quiahva cája ñayivi ñuyiví. Jáchi mé a ndaa sácú ini i saa i quihvi táhan i xihín na jan. ³ Vatí cúu yó ñayivi ndúu ñuyiví joo co cája nde tá quiahva cája ñayivi ñuyiví. ⁴ Jáchi ña chindee ndehe co cúu á ña chindee ñayivi ñuyiví. Joo ña chindee ndehe cúu ndee Ndióxi ña sahan mé á nuú nde já ná cuu jándihi nde sahá ña cája tiñahá sacuaha. ⁵ Ta quiahva já jándihi nde sahá ña cája ihvi xihín Ndióxi ta xihín ndee mé á jándihi nde sahá ña cáhan ñayivi, na cája cáhnu mé jáchi co xini na Ndióxi. Ta tóco ndihi ña cáhvi ini nde ndiquiahva nde ña ndáha mé á já ná caja nde tóco ndihi ña cuni Jesucristo. ⁶ Ña cán queá tá ná nahá ña ín tiahvá ndó caja ndó tóco ndihi ña nasahnda nde nu ndó já queá cacu ini nde jánani nde ndá na nacuu, na co cuni caja ña sáhdá Jesucristo.

7 Mé ndó cō xíní ndó ndá quiahva cáa ínima ñayivi jáchi sándehe ndó ña cáa chí jata cuití va. Joo tá mé a ndaa táhyí cáhán java ndó ña cómí Jesucristo cuéntá saha ndo xíní ñúhú quehe ndó cuéntá ña cúu ri ndehe va na cómí Jesucristo cuéntá saha. 8 Cō cáchan nuú i caja cáhnu loho i mí i sahá chuun nasahan Ndióxi nuú i. Jáchi nacaja mé á ña ná cahnda i chuun nu ndo jáchi mé Jesucristo, xitoho í nasahan chuun nuú i ña ná jácuahnu i ndohó tá quiahva cúni mé á. Ta cō cúni a ña ná jándihi i saha ndo. 9 Cō cúni ña ná cahán ndo ña jáyihví i ndohó xihín carta chindahá i nu ndo. 10 Ndúu java na ta cáchí na ndacú ndivaha yuhú u cahán i nu carta cáhyí i. Joo tá ín i xihín ndo cō náha i ña cúu u da jáyihví ndohó jáchi tá cásahá cáhan i xihín ndo cō náha i ña cúu u da ndítahan coo toni ñúhú ñayivi xihín. 11 Joo na xíca cáhan ña yóho xíní ñúhú candaa ini na ña tá quiahva ndacú yuhú i tá cáhan i xihín carta tá ín xíca i quiahva já caja i tá ná xinu cōo i tañu ndó jan.

12 Mé a ndaa cō sáhan i ínima i jácatáhan i mí i xihín na cája cáhnu mé jan. Joo ndía cáa mé cája na jan tá jácatáhan ndaja táhan mé va na ta xihín ña yóho náha ña tóntó ndivaha cája na. 13 Cō cája cáhnu i mí i jáchi cō ndítahan nuú i caja i ña. Cáhan cuití va i sahá chuun nasahan Ndióxi nuú i caja i cuéntá mé á ta mé á quea nachindahá yehe saa i anda nu ndúu ndó jan. 14 Cō cája cáhnu i mí i tá cáhan i sahá chuun nasahan Ndióxi nuú i caja i. Jáchi mé nde cúu nde na nu cuití nasahan nacahan nde tuhun vaha saha Jesucristo nu ndo. 15 Sahá ña cán quea cándaa vaha ini ndó ña cō cáhan nde sahá chuun najacava sáhá inga na. Ta ni cō yáha nde cája cáhnu nde mé nde sahá chuun cája nde yóho. Ña cúni nde quea ná candee chága ini ndó Jesucristo nani caja chúun chága nde tañu ndó tá cúni Ndióxi. 16 Ta cúni nde cahán nde tuhun vaha saha Jesús nuú ñayivi, na ndúu xíca chága nuú ñuu Corinto jan. Joo cō cúni nde quihvi nuu nde nuú sa nacaja chúun inga na já ná a cája lándá nde sahá chuun nacaja inga na.

17 Ta já cáchí tuhun Ndióxi já: “Ndá na cúni caja lándá, xíní ñúhú caja lándá na sahá ña náhnu nacaja Ndióxi xihín ná.” 18 Jáchi

cō táhán ini Ndióxi xihín na ndíñehe jícó mé joo ndíñehe jícó Ndióxi ñayivi tá táhán ini a xihín ña cája na.

11

Cáhan Pablo sahá na cō cúu apóstol

1 Xíca tahví i nu ndo ña ná a quehe ndó cuéntá sahá ña cája i tá ná caja i tátuhun in taa tachí. Caja ndó ñamaní xihín i. 2 Ndióxi quea nacaja ña ná quihvi ndivaha ini i ndohó sahá ña cán quea cō cúni ña ná jándacoo ndó íchi cuéntá mé á. Cája i tátuhun cája da cuíñú jáchi nasacu ini i ndiquiahva víi i ndohó ndáha Jesucristo tátuhun cája in dataa ndiquiahva da jahyi jíhí da, ña cúu ña tacú ndinuhu nuú da cacuu yíi ña. 3 Á cō ndícuhun ini ndó ndaja nacaja tiñahá sacuaaha tá najándahvi rí ña nani Eva sanahá. Ta viti yíhvi i ña ná jándahvi java ñayivi ndohó tá quiahva najándahvi rí mé ña. Jáchi viti cándee ini ndó Jesús ta cája cáhnu ndó mé á xihín ndinuhu ini ndó. Joo yíhvi i jándacoo ndó ña jan. 4 Jáchi mé ndó sáhan ndó ñamaní ña ná saa ndá ñayivi nacuu va vatí jánaaha na ña tuhún saha Jesucristo. Cō jánaaha na ndohó tá quiahva najánaaha mé nde nu ndo jáchi jíin va cáhan na saha ínima yíi Ndióxi ta jíin va cáchí na jácau Ndióxi ñayivi. Joo nandiquehe vaha ndó na. 5 Ta cáhán ndo ña cúu ná na apóstol, na náhnu ndivaha joo xíní vaha i ña cō cúu ná na vaha chága a juú ga yehe. 6 Vatí cō tiahva i cahán víi i joo ín vaha xíní túní i jánaaha i tuhun Ndióxi nu ndo. Ta xíní vaha ndó ña yóho jáchi cuahá tañu najánaaha vaha i tuhun Ndióxi nu ndo.

7 Java tañu cáhán i ña coo nacaja vaha i jáchi coo naquehe e yahvi nu ndo tá nacahan i tuhun Ndióxi xihín ndo. Ta java tañu cáhán i ña coo nacaja vaha i tá najánuu i mí i já ná cuu ndindita jícó ndohó. 8 Mé a ndaa cúu á tátuhun nacandaa joho i jjuhún nuú java na cúu cuéntá Jesús ta naquehe e yahvi i nuú na cán ña ná quixi i caja chúun i tañu mé ndo. 9 Ta tá naxini ñúhú i in ñaha tá nasahin tañu ndó jan coo najáquihvi toho i ndohó sahá ña naxini ñúhú i. Jáchi mé na cúu cuéntá Jesús, na naquixi Macedonia nasahan na nuú i ña naxini ñúhú i catacu u. Mí i coo naxeen

toho i jáquihvi i ndohó. Ta a cája toho i ña viti. ¹⁰ Cáhan i ña ndaa xihín ndo jáchi ín Jesucristo xihín i. Ta ni in ñaha a cáji nuu toho nuú i cahan i ña yóho nuú na ndúu estado Acaya. ¹¹ Coto a cáhán ndo ña co quíhvi ini i ndohó sahá ña cáhan i quiahva já xihín ndo. Jáchi xíní vaha Ndióxi ña quíhvi ndivaha ini i ndohó.

¹² Joo a jándacoo toho i caja i ña cája i yóho já ná a quiahva i ñamaní nuú na cán ndíñehe jícó na mé ná. Jáchi cáchí na cája chúun na cuéntá Ndióxi tá quiahva cája ndehe. Joo co cúu á ña ndaa. ¹³ Mé a ndaa co cúu toho na jan apóstol cuéntá Jesucristo vatí ndája na mé ná tátuhun apóstol. Ta jándahvi na ñayivi tá cáchí na ña cúu ná na apóstol. ¹⁴ Joo co ndítahan catóntó yo sahá ña yóho jáchi janda Satanás, mé tiñáhá sacuahá ndája rí mé rí tátuhun in tátó Ndióxi, ña yehe ndivaha. ¹⁵ Ta jári na ndíco jata rí cán co yáncá toho na ndája na mé ná tátuhun ñayivi cája ña vaha. Joo vaxi quiví ndiquehe na yahvi sahá ñaha nacaja na.

Ndóho ini Pablo sahá ña cúu dá apóstol

¹⁶ Ta ná cahan tucu u ña yóho xihín ndo: coto a cáhán ndo ña cúu u da nacatachi. Joo tá cáhán ndo ña cúu u da nacatachí i quiahva loho ndó ñamaní nuú i ña ná cahan i xihín ndó tátuhun in da tachí já ná cuu ndíñehe jícó loho i mí i. ¹⁷ Tá cáhan lándá i yóho co cúu á tuhun nasahan Ndióxi nuú i. Cáhan i ña tátuhun in da nacatachi cuití va. ¹⁸ Ta sahá ña ndúu cuahá na cátoó ndíñehe jícó mé sahá ña cája na ñuyiví yóho sahá ña cán quéa ná caja ri yehe va quiahva já. ¹⁹ Mé ndó cáhán ndo cúu ndó ñayivi ndíchí ndivaha jini joo cájii ini ndó táa johó ndó nu cáhan ñayivi tachí cán xihín ndo. ²⁰ Ta ni co sáhní ndo mé ndó tá cája ndúsa na cán xihín ndo caja ndíví ndó nu ná vatí quéhe na ñaha cómi ndo. Ta jándahvi na ndohó ta quéhe núu na ndohó janda cáni na jahndá nuu ndo. ²¹ Á cáhán ndo ña ndítahan cacahan nuú i sahá ña coó nasahan ndeé toho ini nde caja nde tá quiahva cája na jan xihín ndo.

Joo tá co sáhní na jan mé ná cája lándá na, caja ri yehe va já vatí cáhan i ña yóho tátuhun in da tachí. ²² Ta tá cáhan lándá

na jan ña cúu ná na hebreo, mé a ndaa da hebreo cúu ri yehe va. Ta tá cáhan lándá na jan ña cúu ná na Israel, mé a ndaa da Israel cúu ri yehe va. Ta tá cáhan lándá na jan ña naquixi na chichi Abraham, mé a ndaa da naquixi chichi Abraham cúu ri yehe va. ²³ Ta tá cáhan lándá na jan ña cúu ná na cája chúun cuéntá Jesucristo, mé a ndaa yehe cúu da cája chúun chága cuéntá mé á. Vatí cáhan i tátuhun in da tachí joo mé a ndaa cuahá chága cája chúun yehe a juú ga na jan. Cuahá chága tañu nachicaan na yehe vecaa a juú ga na jan. Ta cuahá chága tañu nacaja xíxi na xihín yehe a juú ga na jan. Ta cuahá ndivaha tañu sa yáti quivi i a juú ga na jan. ²⁴ Ta uhun tañu najácaxáhan na Israel yehe xihín churú. Ta in tá in táhndá cán najáxinu na churú jata i oco sahun comi tañu. ²⁵ Ta uní tañu najácaxáhan na yehe xihín vara ta in tañu nacati na nacuun na yuú yehe. Ta sa uní tañu nasacoo barco, mé dó cuahan i cán cahá tañuhú. Ta nasanúu i nuú tañuhú in ñuú ta in ndiví. ²⁶ Ta ndóho ndivaha ini i nu xíca nuu i jáchi cuahá tañu ndúcú tani i xihín yuta. Ta janda ta cuihná a íhvi queta nuú i. Ta naxica iyo i tañu na ñuu i xihín tañu na tóho. Ta tá ín i ñuu náhnu á ín i yúcu á ín i tañuhú já vaxi tá vaxi tondóho nuú i. Ta janda tañu na cáchí cúu cuéntá Jesús vatí co cúu na naquixi tondóho nuú i. ²⁷ Ta cánaa i cája chúun i janda ndíhíhvi ndivaha i. Ta cuahá tañu co quíji vaha i. Ta cuahá tañu naquixi joco nuú i ta naquixi ña íchi ini i ticuú i ta janda ínima uun i ín i jáchi co ñehe e ña cuxu u. Ta cuahá tañu ndóho ini i sahá ña vixi xíní i jáchi coó jáhma candixi i.

²⁸ Ta vatí ndóho i ña yóho xihín java ga ñaha joo ndícani tá ndícani ini i saha tóco ndihi na cúu cuéntá Jesús, na táca ndijáá veñuhu. ²⁹ Jáchi tá cuítá ini ñayivi já cúu á tátuhun cuítá ri ini yehe va xihín ná. Ta tá ndícava in na nuú cuachi cája inga na já quéa xójo ndivaha ini i xihín na najándicava ñahá cán. ³⁰ Ta tá ín in ñaha ña cuu cahan lándá i saha já ná cahan lándá i sahá ña náha ña coó cuahá ndeé mí i. ³¹ Ta Ndióxi, tátá Jesucristo, xitoho í, mé a ndítahan caja cáhnu í anda ama cáa quiví xíní vaha ña cáhan i ña ndaa xihín ndo. ³² Jáchi in tañu

naṣah̄iin i ñuu Damasco ta ndaja coo da cúu gobernador, da naçaja chúun nu rey Aretas naṣahnda da chuun ña ná chicaji na yéhe ñuu cán já ná cuu tiin na yehe. ³³ Joo java na cúu cuéntá Jesús najánuu na yehe ini in toyicá chí ventana mé corra yuu ndájí ñuu cán já naçuu najáçacu na yehe.

12

Ña naxini Pablo naçaja Ndióxi

¹ Ni in ñaha co ñehe e tá ndíñehe jícó i mí i. Joo já ndítahan nuú i ndicani i nu ndo sahá ña naxini i cuéntá indiví, ña najánaḥa Ndióxi nuú i ta sahá ña naçachi mé á xihín i coo. ² Sa ín uxu comí cuiã nayaha ña yóho. Najándaa Ndióxi yehe, da cándée ini i Jesucristo naṣahan i indiví uní nu ín mé á. Co xini yehe á nandaa yiquí cuñu i xihín i á naçandoo a ñuyívi yóho. In túhún Ndióxi xini. ³ Joo xini vaḥa i ña yehe cúu da naṣahan cán vatí co xini i á nandaa yiquí cuñu i á naçandoo a ñuyívi yóho. Ndióxi cuití va xini. ⁴ Joo xini vaḥa i ña naṣahan i nu ndató ndivaḥa indiví. Ta mé cán naxini joḥo i tuhun, ña co ndíñehé e ndaja ndicani i ña nuú ñayivi ta ni co sáhan Ndióxi ñamañi nuú i ndicani i ña nu ná. ⁵ Cuu ndíñehe jícó i mí i sahá ña naxini i yóho joo a cája toho i ña. Vaḥa chága ná caja lándã i sahá ña coó toho ndée mí i. ⁶ Ta tá ná cacu ini i ndíñehe jícó i mí i já queã a cacuu toho i da tachí jáchi ña ndaa táhyí cacuu tuhun çahan i. Joo co cája toho i ña jáchi cuni ña ná çahán ñayivi ña ndaa cuití va sahá i ta sahá ña naçaja i xihín sahá ña naçahan i.

⁷ Ta sahá ña co cuni Ndióxi ña ná caja cáhnu i mí i sahá ña naxini i sahá ña cán queã naquixi in ña ndóho i. Cúu á tátuhun in ínũ sa cáñee nuú yiquí cuñu i xini i, ña quixi nuú tiñáhã sacuaḥa cája xixi rí xihín i já ná a cája cáhnu i mí i. ⁸ Ta sa uní tañu naxica taḥví i nu Ndióxi, xitoho í ña ná tavá a ña ndóho i yóho. ⁹ Joo nanducú ñehe mé á tuhun nuú i já naçachi a já: “Sa quiahva cúu mé a quíhvi ini i yohó ñan va jáchi ña cúu cája i xihín ñayivi náḥa cáxi chága tá co ndée ná”, naçachi Ndióxi. Ña cán queã cájii ini i cúu u in da cámaní ndée já queã náḥa ña xihín ndée Jesucristo cája i tóco ndihi ñaha. ¹⁰ Sahá ña quíhvi ini i Jesucristo, cájii tá cájii

ini i tá cávitá ini i, á tá cánahá na xihín i, á tá cámaní ñaha nuú i, á tá ndúcú na yehe ña caja xixi na xihín i. Jáchi tá cávitá ini i já ndíndacú chága i xihín ndée Ndióxi.

Ndícani ini Pablo sahá na cúu cuéntá Jesús ndúu ñuu Corinto

¹¹ Tá quiahva cája da tachí já cája i joo ndóhó cúu na naçaja ndúsa xihín i caja i ña. Jáchi mé ndó cúu na ndítahan çahan vaḥa sahá i, nduu. Joo já coó toho chága sahá na cáhán ndó cúu apóstol ñan a juú ga yehe vatí mé a ndaa nu Ndióxi coó saḥa toho i. ¹² Jáchi xihín ña náñnu naçaja i nu ndo ñan ta xihín ña xitúhún naxini ndó naçaja i ñan najánaḥa i nu ndo ña mé a ndaa táhyí cúu u in apóstol. Coó nandíhi ini i tá naçaja i ña xitúhún ñan nu ndo. ¹³ Ta tá quiahva naçaja i xihín java ga na cúu cuéntá Jesús quiahva já naçaja rí xihín ndóhó va. In túhún ña coó naçaja i xihín ndó queã coó najáquihvi toho i ndohó sahá ña xini ñuhú i catacu u tá quiahva naçaja i xihín java ga na cúu cuéntá Jesús. Á cáhán ndo ña vaḥa chága ná caja ndúsa i xihín ndó quiahva ndó nuú i ña xini ñuhú i.

¹⁴ Ta viti sa ín tiaḥva i saa i coto nihni i ndohó ña chí uní. Ta ni viti a jáquihvi toho i ndohó jáchi co xica toho ini i quehe e ña comí ndo. Ña cuni queã ná quíhvi ini ndó yehe tá quiahva quíhvi ini i ndohó. Jáchi mé ndó cúu ndó tátuhun jaḥyi i sahá ña najánaḥa i tuhun Ndióxi nu ndo. Ta ndá naçuu na valí co xito na tátã na joo mé tátã na cúu na xito mé na valí. ¹⁵ Ta cájii ini i jándihi i tóco ndihi ñaha comí i já ná chindeé e ndohó. Ta jandã ndiquiahva i mí i já ná cacu ndaa ínima ndo. Cája i cuéntá tá quíhvi chága ini i ndohó já co cúu chága ini ndó xihín i.

¹⁶ Mé a ndaa coó najáquihvi toho i ndohó. Joo ndúu java na tañu ndó ta cáchi na ña naçaja ndúsa i xihín ndo já najándahvi tá najándahvi i ndohó. ¹⁷ Á cáhán ndó ña najándahvi i ndohó tá nachindahá i java ñayivi nu ndo ñan. A juú a já. ¹⁸ Jáchi naxica taḥví i nu Tito ña ná saa da coto nihni da ndohó ñan. Ta nachindahá i inga da cúu cuéntá Jesús xihín dá. Á najándahvi da ndohó, vaḥa. Sa xini vaḥa i ña coó najándahvi da ndohó. Ta tá quiahva cája

Tito quiahva já cajú ri yehe va jáchi in ínima ñehe nde xihín dá.

19 Á cáhan ndo ña sa ñacasáhá cáhan chíjín tucu nde xihín ndo viti. Co cúu á já. Jáchi sándehe cáxí Ndióxi ña cáhan nde ña yóho xihín ndo tá quiahva cúni Jesucristo. Ta cajú nde tóco ndihi ña yóho jáchi quíhvi ini nde ndohó ta cúni nde ña ná cuahnu chága ndó xihín tuhun Ndióxi. 20 Yíhvi i jáchi tá ná saa i coto nihni i ndohó co cúni i ndiñehé e ndohó cajú ndó ña núu, ña co cátóo i. Ta sa mé quiahva já yíhvi i ña cuni ndó yehe cajú i ña co cátóo ndo. Yíhvi i jáchi tiahva náa cani táhan ndó, á cahíhvi ini xihín táhan ndó, á cojo ini xihín táhan ndó, á ndacahnda táhan ndó, á cáhan ndó ña tuhún sahá ñani táhan ndó, á candehé ndaa táhan ndó, á ndiñehe jícó ndo mé ndó, á sa jíin sa jíin cajú in in ndó. 21 Ta yíhvi i ña tá ná saa i coto nihni i ndohó jan cajú Ndióxi ña ná cacahan nuú i saha tóco ndihi ña cajú ndó jan. Ta yíhvi i cuacu u sahá cuahá na cajú cuachi, na sa janda jihna ñacasáhá cajú cuachi ña a ñaha jándacoo na cajú na xihín yiquí cuñu na. Ta cuacu u jáchi a ñaha jándacoo na ña ndúu na xihín na co cúu ñájíhí na á yíi ná. Ta ni a ñaha jándacoo na tóco ndihi ña núu, ña xíca ini yiquí cuñu na cajú.

13

Jáxinu coo Pablo tuhun cáhan da xihín na ñuu Corinto

1 Ta xihín ña yóho xinu uní táhnda saa i coto nihni i ndohó. Ta xíní ñuhú ndicuhun ini ndó ña sáhnda tuhun Ndióxi chuun nu yo ta cáhí a ña tá ná cáhan ivi á uní testigo sahá cuachi ñacaja in ñayivi anda jávi candaa ini ndó ña mé a ndaa in cuachi na. 2 Tá quiahva ñacahan i xihín ndo tá ñaxito nihni i ndohó ña chí ivi quiahva já cáhan i xihín ndo viti vatí in xíca i. Ta tá quiahva ñacahan i xihín na ñacaja cuachi jihna jan quiahva já cáhan i xihín ndihi ndó viti. Ta tá ná casaa tucu u coto nihni i ndohó jan já queá a táhnda ga ini i saha ndo sahá cuachi cajú ndó. 3 Ta xihín ña yóho candaa ini ndó ña mé a ndaa táhyí cáhan i ña sáhnda Jesucristo cáhan i. Cúni ña ná candaa ini ndó ña co cáhan chíjín toho Jesucristo xihín

ndo. Ña cajú mé á xihín ndo queá náha nu ndo ña in ndée mé á cajú ña cúni a. 4 Mé Jesucristo queá ñacata caa na ndica crúxu tátuhun in da co ndée. Joo viti tácu mé á saha ndée Ndióxi. Ta tá quiahva vitá ñasahin yiquí cuñu a quiahva já vitá ndúu yó viti. Joo sahá ña in ñanduú xihín mé á já cuu catacú xihín ndée a. Ta xihín ña yóho cajú chúun nde tañu mé ndó.

5 Xíní ñuhú candehé vaha ndó mé ndó á mé a ndaa táhyí cándeé cáhnu ini ndó Ndióxi. Xíní ñuhú coto ndojó ndó mé ndó. Ta tá mé a ndaa táhyí cúu ndó cuénta Jesús xíní ñuhú ndicuhun ini ndó ña ndacaa Jesucristo ini ínima ndo á tá coo yúhu uun va ndó cúu ndó cuénta Jesús. 6 Ta ndati i xinu quívi candaa ini ndó ña coo najándahvi nde ndohó. 7 Xíca tahví nde nu Ndióxi ña ná a cajú ndó ni in ña núu. Ta co cúu á sahá ña cúni nde cáhan vaha ñayivi sahá nde, vaha. Ña cúni nde queá ná a jándacoo ndó cajú ndó ña vaha vatí ná cáhan ñayivi ña coo ñacaja vaha nde xihín ña najánaha nde nu ndo. 8 Co xíní ñuhú nde jánani nde ndohó nani cajú ndó ña ndaa joo tá cajú ndó ña núu já queá xíní ñuhú jánani nde ndohó. 9 Ta cájii ini nde tá ndaa nde tá quiahva ndaa na vitá ini tá cúu á sahá ña ndacú ini mé ndó cuénta Ndióxi. Ta a jándacoo toho nde caça tahví nde nu Ndióxi saha ndo ña ná xinu coo ndó cacuu ndó ñayivi coo cuachi nu mé á. 10 Jihna ñuhú cáhyí i carta yóho nu ndo já saa i coto nihni tucu u ndohó. Jáchi tá ná saa i jan co cúni cáhan ihvi nahá i xihín ndo vatí ñasahan Ndióxi chuun yóho nuú i. Ta coo ñasahan mé á ña nuú i ña ná jándihi i saha ndo. Ñasahan mé á chuun yóho nuú i já ná cuu ndaja ndacú u ndohó cuénta mé á.

11 Candehé ndo, ñani i, na cúu cuénta Jesús. Xihín tuhun yóho jáxinu coo i tuhun cáhan i xihín ndo. Ná coo Ndióxi xihín ndó. Ta ná ndindacú chága ndó já ná nduu ndó ñayivi ndaa. Ta quiahva tuhun ndée ini táhan ndó. Coo vaha ndó xihín ñani táhan ndó já queá coo Ndióxi xihín ndo. Mé a cán quíhvi ini a ndohó ta cúni a ña ná coo vaha ini ndó. 12 Cáhan Ndióxi xihín táhan ndó ta tatí yúhu táhan ndó ta yíi cajú ndó ña. 13 Tóco ndihi na cúu cuénta Jesús chíndahá na Ndióxi coo ndó.

¹⁴ Ná tahvi ini Jesucristo, xitoho í saha ndo jáchi quíhvi ini Ndióxi ndohó. Ta ná coo tuun ínima yji mé á xihin ndo. Ña yóho quéa cúni ña ná caja Ndióxi xihin ndo. Já ná coo.

Carta nachindahá Pablo nuú na cúu cuéntá Jesús ndúu ñundáhyi Galacia

Chíndahá Pablo Ndióxi coo na cúu cuéntá Jesús ndúu ñundáhyi Galacia

¹ Yehe cúu Pablo, da cáhyi carta yóho nu ndo. Naçaxi Ndióxi yehe cacuu u in apóstol ta a juú toho ñayivi naçaxi yehe. Ta ni coó nachindahá ñayivi yehe jáchi Jesucristo xihín Ndióxi, tátá yo, mé a najánditacu Jesucristo, mé a cán queá naçaxi a yehe cacuu u in apóstol. ² Yehe xihín tóco ndihi java ga na cúu cuéntá Jesús ndúu xihín i yóho, chíndahá nde carta yóho nu ndóho, na ndúu ñundáhyi cuéntá Galacia jan. ³ Ña cuni nde queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó. ⁴ Xíni ñuhú ndicuhun ini ndó ña nandiquiahva Jesucristo mé á quivi a saha cuachi cája í ta xihín ña yóho najáçacu a mí nuú ña núu cája ñayivi ñuyívi. Ta nayaha ña yóho jáchi já cuni Ndióxi, tátá yo. ⁵ Cáhnu ndivaha ná cacuu Ndióxi anda ama cáa quivi. Já ná coo.

Coó ga inga tuhun cáhan sahá Jesucristo ña cuu jáçacu a mí

⁶ Mé a ndaa naçatontó ndivaha i jáchi cama chá naçasáhá ndo cáxoo ndó nu Ndióxi, mé a naçana ndóho cacuu ndó cuéntá mé á sahá ña quíhvi ini Jesucristo ndóho. Ta viti naçasáhá ndo xini joho ndó inga tuhun ña cáchi ñayivi cuu jáçacu a ndóho. ⁷ Mé a ndaa coó toho inga tuhun ña cuu jáçacu a ñayivi. In túhún va cúu tuhun Ndióxi ta cáhan sahá Jesucristo. Joo ndúu java ñayivi ta cuni na jájana na jini ndo ta cuni na ndijama na tuhun vaha cáhan sahá Jesucristo, mé a jáçacu mí. ⁸ Joo tá vaxi in na ta jánaña na inga tuhun ña cáchi na cuu jáçacu a ndóho ta coó cúu á tuhun vaha ña najánaña nde nu ndó já queá ná cuhun cháhan jata ná ta coó caja toho a ndá ñayivi cúu ná janda mí i á janda in táto Ndióxi ná quixi indivi. ⁹ Sa naçachi i ña yóho xihín ndó jihna ta viti ndicó coo tucu u cahan i ña

xihín ndo: tá jánaña in ñayivi inga tuhun ña cáchi na cuu jáçacu a ndóho ta coó cúu á tuhun najánaña nde nu ndo já queá ná cuhun cháhan jata ná.

¹⁰ Co ndúcú u candoo vaha i nuú ñayivi. Ña cuni queá candoo vaha i nu Ndióxi jáchi tá cuni candoo vaha i nuú ñayivi já cuni cachi a ña coó cúu ga i da cája chúun cuéntá Jesucristo xihín ndinuhu ini i.

Ndicani Pablo ndaja nanduu da apóstol

¹¹ Candehé ndó ñani mí i, na cúu cuéntá Jesús. Mé tuhun naçahan i xihín ndó coó naquixi a jini ñayivi ñuyívi. ¹² Ta coó nandiquehe e ña nuú ñayivi. Ta ni in túhún toho ñayivi coó najánaña na ña nuú i jáchi Jesucristo queá najánaña ña nuú i. ¹³ Cája i cuéntá sa naxini joho ndó sahá ña naçaja i jihna tá nasandico i costumbre na Israel. Jáchi naxojo ndivaha ini i xihín na cúu cuéntá Jesús mé tiempo cán. Ta naçaja xixi ndivaha i xihín ná ta nasacu ini i jándihi i saha ná. ¹⁴ Ta mí i nasacuu u da naçayojó chága cája costumbre na Israel nuú ndihi na ñuu i, na nasahnu xihín i. Jáchi nasativi i xihín ndinuhu ini i costumbre tásahnu jícó nde. ¹⁵ Joo Ndióxi naçaxi a yehe janda tá cámaní cacuu u ñuyívi yóho ta sahá ña cuni a caja ñamaní xihín i sahá ña cán queá naçana mé á yehe. Ta tá naxinu coo quivi nasacu ini mé á ¹⁶ já najánaña Ndióxi Jesucristo, jahyi a nuú i já ná cuu caxi tuhun i tuhun vaha saha mé á nuú na coó naquixi chichi Israel. Ta mé tiempo cán coó nasahan i cahan i xihín ni in ñayivi sahá ña najánaña Ndióxi nuú i. ¹⁷ Ta ni coó nasahan i ñuu Jerusalén cahan i xihín na cúu apóstol nu cuítí a juú ga yehe. Ña naçaja i queá ivi laá naquee nasahan i ñundáhyi cuéntá Arabia. Ta tá nandihí nandicó coo i chí ñuu Damasco.

¹⁸ Ta tá sa nayaha uni cuia já nasahan i ñuu Jerusalén ndicuni táhan i xihín Pedro ta nasahin i sahun quivi xihín dá. ¹⁹ Ta cán naxini ri da cúu Jacobo, ñani Jesucristo joo coó naxini toho i na java ga cúu apóstol cán. ²⁰ Sándehé cáxi Ndióxi ña coó jándahvi toho i ndóho. Ña ndaa queá cáhyi i nu ndó yóho.

²¹ Tá nandihí já naquee e cuahan i chí ñundáhyi cuéntá Siria xihín Cilicia. ²² Joo

mé tiempo cán na cúu cuéntá Jesús ndúu estado Judea a ñáha cuni na yehe, nduu. ²³ Joo naxini johu na ña cáhan java ñayivi sahá i: “Da nacaja xíxi xihín yo jihna, da cán cúu da xíca nuu cáhan tuhun Ndióxi xihín ñayivi viti. Da nacúni jándihi sahá tuhun Ndióxi jihna, da cán cúu da jánaña ñayivi cándéé ini na mé á”, cáchí na. ²⁴ Ta viti cája cáhnu na Ndióxi sahá ña nandijama mé á yehe.

2

Na apóstol ndíquehe vaha na Pablo.

¹ Tá sa nayaha uxu comí cuja já nasahan tucu u ñuu Jerusalén. Nasahan Bernabé xihín i ta nasañehe ri i Tito nasahan da xihín nde. ² Ta nasahan i jáchi nanaña Ndióxi nuú i ña ndítahan cuhun i. Ta tá nataca jíin ndihi na náhnu, na comí cuéntá sahá na cúu cuéntá Jesús ñuu Jerusalén cán, já nacasáhá i ndícani i nu ná ndaja cáa tuhun vaha saha Jesús ña jánaña i nuú na coó naquixi chichi Israel. Nacaja i ña yóho jáchi coó nacúni ña ná cachi na náhnu cán ña coó saha toho ña jánaña i. ³ Ta nandiquehe vaha na ndehe ta ni coó nacaja ndúsa na xihín Tito, da nasahin xihín i ña ná chican da marca yiquí cuñu da vatí co cúu dá da naquixi chichi Israel. ⁴ Joo java na, na co xíca ndaa íchi cuéntá Jesús, nandihvi jehé na tañu nde ña ná candehé na ndá quiahva núna nuú nde cája cáhnu nde Ndióxi sahá ña cándéé ini nde Jesús. Jáchi nanducú na cája ndúsa na xihín nde ña ná ndicó coo nde caja nde tóco ndihi ña sáhdá ley Moisés. ⁵ Joo coó nacandúsa toho nde tuhun cáhan na xihín nde jáchi cúni nde cánda ini ndó ña ndaa cáhan saha Jesucristo, ña cuu jácaacu ndaa ínima ndó tá ná candéé ini ndó mé á.

⁶ Joo mé na náhnu, na comí cuéntá sahá na cúu cuéntá Jesús cán coó nacachi na xihín i ña ná ndijama i ña jánaña i nuú ñayivi. Cáchí i ña cúu ná na náhnu vatí co cája toho a nuú i ndá quiahva náhnu chuun ndójo na jáchi in cúu tóco ndihí nu Ndióxi. ⁷ Táhán ini na náhnu cán xihín ña cája i jáchi nandicuni na ña mé Ndióxi quéa nasahan chuun yóho nuú i ña caca nuu i cáhan i tuhun vaha sahá Jesús nuú na coó

naquixi chichi Israel. Ta sa mé Ndióxi quéa nasahan chuun nu Pedro ña ná cuhun da cáhan da tuhun vaha sahá Jesús nuú na naquixi chichi Israel. ⁸ Ta sa mé Ndióxi, mé a nachindahá Pedro cáhan da tuhun mé á nuú na naquixi chichi Israel, mé a yóho cúu ri ña nachindahá yehe cáhan i tuhun mé á nuú na coó naquixi chichi Israel.

⁹ Jacobo xihín Pedro xihín Juan cúu ná na náhnu comí cuéntá sahá na cúu cuéntá Jesús ñuu Jerusalén cán. Ta nandicuni na cán ña nacaja Ndióxi cuahá ñamaní xihín i tá nasahan mé á chuun yóho nuú i. Sahá ña cán quéa natiin na ndahá yehe xihín ndáha Bernabé ta xihín ña yóho náha ña in cúu nde cája chúun nde xihín tuhun Ndióxi. Ña cája na cán quéa cája chúun na xihín na naquixi chichi Israel nani ndehe cája chúun nde xihín na coó naquixi chichi Israel. ¹⁰ Ta in tuhún ñamaní naxica na nuú nde caja nde quéa ña ná a ndíndójó nde chindeé nde na ndahví. Ta ña yóho cúu ndusa ña ndíhi ini i cája i.

Pablo jánani da Pedro ñuu Antioquía

¹¹ Joo tá nandique táhan i xihín Pedro ñuu Antioquía já nu táhyí da najánani i da jáchi coó nacaja vaha da. ¹² Ña nacaja da quéa naxixi da xihín na coó naquixi chichi Israel tá cámaní xinu coo java na Israel, na nachindahá Jacobo. Joo tá naxinu coo na Israel cán já nacasáhá táva jíin Pedro mé dá nuú na coó naquixi chichi Israel ta ni co xíxi ga da xihín ná. Jáchi nayihví da ndía cachi na Israel, na jánaña ña co ndítahan cuxu na xihín na co cúu na Israel. ¹³ Ta xihín ña yóho nachijehé Pedro ña cáhvi ini da sahá na cán. Ta java na cúu cuéntá Jesús, na naquixi chichi Israel cán nacasáhá cája na tá quiahva cája Pedro. Ta janda Bernabé nacaja da tá quiahva cája na cán. ¹⁴ Anda já naxini i ña co xíca na íchi cuéntá ña ndaa xihín ndinuhu ini na tá quiahva sáhdá tuhun Ndióxi cája na sahá ña cán quéa najánani i Pedro nu táhyí tóco ndihi ñayivi ndúu cán. Já nacachi i já xihín dá: “Yóho cúun da Israel joo nacasáhá cájún tá quiahva cája na coó naquixi chichi Israel jáchi co cájún ña sáhdá ley Moisés viti. Sahá ña cán quéa co ndítahan nuún caja ndúsa tohún xihín na coó naquixi chichi

Israel ña ná caja na ña sáhdá ley Moisés”, ñacachi i xihin dá.

Jácaçu Ndióxi ñayivi sahá ña cándéé ini na mé á

¹⁵ Janda quivi ñacacú cúu yó na Israel ta cō cúu yó tátuhun na tóho, na cáchi yō cája cuachi sahá ña cō cája na ña sáhdá ley Moisés. ¹⁶ Joo sa cándaá vaha iní ña cō ndúu ndaa ñayivi nu Ndióxi sahá ña cája na ña sáhdá ley Moisés. Jáchi nduu ndaa na nu Ndióxi sahá ña cándéé ini na Jesucristo cuití va. Ta sa saha mé ña cán ñacandéé iní Jesucristo já nanduu ndaa yó nu Ndióxi ta cō cúu á sahá ña cája í ña sáhdá ley Moisés jáchi ni in na a cuú nduu ndaa na nu Ndióxi sahá ña cája na ña sáhdá ley Moisés.

¹⁷ Cándehé ndo. Sahá ña cūni yō canduu ndaa yō nu Ndióxi sahá ña cándéé iní Jesucristo cuití va sahá ña cán quéa cō cája ga í ña sáhdá ley Moisés. Joo cáchi java ñayivi ña ndójo í cuachi sahá ña cō cája í ña cáchi mé ley. Vatí cō cája í ña cáchi ley Moisés, cō cūni cachi ña yóho ña jácahan Jesucristo mí caja í cuachi. Ña yóho cō cúu á ña ndaa jáchi cō jácahan Jesucristo mí caja í cuachi.

¹⁸ Joo mé a ndaa caja í cuachi tá ná casahá tucu candeé iní ley Moisés ña ná jácaçu a mí jáchi sa najándacoo í ña tá ñacandéé iní Jesucristo. ¹⁹ Ta viti cúu á tátuhun ñaxihí yehe cuéntá ley jáchi cō cómi ga ley cuéntá sahá i jáchi sahá ña cándéé ini i Jesucristo sahá ña cán jácaçu Ndióxi yehe ña ná catacu u cuéntá mé á. ²⁰ Cúu á tátuhun ñaxihí i ndica crúxu xihín Jesucristo tá ñaxihí a. Sahá ña cán quéa cō cája i tá quiahva cūni mé vi jáchi Jesucristo quéa ndicaan ini i ta mé a cán quéa ndaca yehe. Ta viti tóco ndihi ña cája i ñuyiví yóho cája i ña jáchi cándéé ini i Jesucristo, jahyi Ndióxi, mé á ñaxihí ndica crúxu sahá i sahá ña quíhvi ini a yehe.

²¹ Ta cō cūni quehe núu i ñamaní cája Ndióxi xihín i jáchi tá ná cuu nduu ndaa yō nu Ndióxi sahá ña cája í ña sáhdá ley Moisés já quéa mé a uun va quéa ñaxihí Jesucristo, nduu.

3

Vaha chága candeé iní Jesús a juú ga cándéé iní ña sáhdá ley Moisés

¹ Á jána va jini ndó, na ndúu ñundáhyi Galacia. Yo já najándahvi ndohó ña ná jándacoo ndó ña ndaa. Jáchi tá ñacahan nde tuhun Ndióxi xihín ndo já nandicani cáxi nde nu ndo ndá quiahva ñaxihí Jesucristo sahá cuachi. ² Cuni johó ndó ná ndaca tuhún i ndohó: Á nandihvi ínima yii Ndióxi ini ínima ndo sahá ña ñacaja ndó ña sáhdá ley Moisés. Cō cúu toho a já. Ñasacuu a sahá ña ñacandúsa ndó tuhun vaha sahá Jesucristo ña ñacahan nde xihín ndo. ³ Mé a ndaa táhyí cúu ndó na najana jini. Jáchi tá ñacasahá ndó xíca ndó íchi cuéntá Jesús já ñasandaca ínima yii Ndióxi ndohó. Ta viti cūni ndó ndicó cō ndó caja ndó ña sáhdá ley Moisés jáchi cáhan ndo ña cuu xinu cō ndó cacuu ndó ñayivi ndaa nu Ndióxi sahá ña cája ndó. Joo a cuú toho a. ⁴ Xíni ñúhú ndicuhun ini ndo ndá quiahva nandoho nahá ini ndó sahá tuhun Ndióxi. Á mé a uun va ñasacuu ña nandoho ndó jan. Cája i cuéntá uhun. ⁵ Jáchi sahan Ndióxi ínima yii mé á nu ndó ta cuahá ndivaha ña náhnu cája mé á tañu ndó ta cō cúu á sahá ña cája ndó ña sáhdá ley Moisés. Cúu á sahá ña cándéé ini ndó mé á.

⁶ Cáchi tuhun Ndióxi ña nanduu Abraham ta ndaa nu mé á sahá ña ñacandéé ini da Ndióxi. ⁷ Sahá ña cán quéa nditahan candaá ini ndó ña ndá na cándéé ini Ndióxi, mé na cán cúu ndusa na tátuhun na ñaquixi chichi Abraham. ⁸ Jáchi sa janda jihna ñacachi tuhun Ndióxi ña vaxi quivi casahá Ndióxi jácaçu a ñayivi, na cō ñaquixi chichi Israel tá ná candeé ini na mé á. Ña cán quéa ñacahan Ndióxi tuhun vaha yóho xihín Abraham já ñacachi a já: “Saha mún tandaa tiempo caja cuahá i ñamaní xihín ñayivi canduu ndijáá ñuyiví”, cáchi a. ⁹ Sahá ña cán quéa tá quiahva ñacaja Ndióxi cuahá ñamaní xihín Abraham quiahva já cája ri a xihín tóco ndihi ñayivi tá cándéé ini na mé á tá quiahva ñacaja Abraham.

¹⁰ Joo ndá ñayivi ndúcú nduu ndaa nu Ndióxi sahá ña cája na ña cáchi ley Moisés já quéa cuahan cháhan jata ná. Jáchi cáchi tuhun Ndióxi já: “Cháhan va cuahan jata tóco ndihi na cō xinu cō cája tóco ndihi cuí ña cáchi ley ña ñacahyí Moisés.” ¹¹ Ta cáxi

táhyí cáhan ña yóho xihin yo ña a cuú nduu ndaa ñayivi nu Ndióxi sahá ña sácú vaha na ley Moisés. Já cáhí tuhun Ndióxi já: “Ndá na cúú ñayivi ndaa nu Ndióxi catacu na sahá ña cándéé ini na mé á”, cáhí a. ¹² Joo jín va cáhí ley Moisés jáchi cáhí a ña tá cúní na nduu ndaa na nu Ndióxi saha ley Moisés xíní ñúhú caja na tóco ndihi cuíí ña cáhí mé ley. Ta co cáhan mé ley sahá ña cándéé ini na Ndióxi.

¹³ Joo najácau Jesucristo mí já ná a xínu coo cháhan jata yo caja ley. Jáchi naquixi cháhan jata mé á saha mí tá naxihí a ndica crúxu. Jáchi cáhí tuhun Ndióxi: “Cháhan cuahan jata ndihi na xihí ndica crúxu.” ¹⁴ Ta sahá ña nacaja Jesucristo tá naxihí a ndica crúxu sahá ña cán queá tóco ndihí vatí cúú yó na Israel á na co cúú na Israel, ñehe táhvi yo ñamaní Ndióxi tá cándéé ini mé á. Jáchi já nasahan Ndióxi tuhun a nu Abraham jihna. Ta viti quiahva mé á ínimá yíí á nu yo tá cándéé ini mé á jáchi já nasahan Ndióxi tuhun a nu yo.

Ña cáhí ley Moisés xihín ña cáhí tuhun nasahan Ndióxi nuú Abraham

¹⁵ Ñani mí i, na cúú cuéntá Jesús, candehé ndo ná cahan i xihín ndo ndá quiahva cája ñayivi tá sahan na tuhun na nuú inga ñayivi. Tá cávaha na in tutu ta tá nandihí nacañhi na quívi ná nu á já queá ni in túhún toho ñayivi a cuú ndijama na ña sa nacañhi cán ta a cuú chícaan chága na tuhun nuú mé tutu. ¹⁶ Cándehé ndo. Nasahan Ndióxi tuhun a nuú Abraham ta nuú in da quixi chichi da. Joo coo nacañhi Ndióxi sahá cuahá ñayivi quixi chichi da. Nacañhi Ndióxi sahá in talaá jahyi da ta mé a cán cúú á Jesucristo. ¹⁷ Ña cúní cachi i queá: Nasahan Ndióxi tuhun a nuú Abraham ta nasacuu a tátuhun nacañhi Ndióxi quívi á nuú in tutu. Sahá ña cán queá a cuú jándihí ley Moisés sahá tuhun nasahan Ndióxi nuú Abraham. Jáchi jihna ñúhú nasahan Ndióxi tuhun a nuú Abraham ta tá sa nayaha comi ciento oco uxu cuía já nasahan Ndióxi ley nuú Moisés. Ta mé ley yóho a cuú toho ndijama tuhun nasahan Ndióxi nuú Abraham. Ta mé ley a cuú ndaja núu a tuhun nasahan Ndióxi nu dá jihna. ¹⁸ Joo ña sahan Ndióxi nuú ñayivi co quíxi a sahá ña sácú vaha na

ley Moisés. Jáchi tá ná quixi a quiahva já co cúú ga sahá ña nasahan Ndióxi tuhun a ña caja mé á ña. Ña nayaha queá nacañhi Ndióxi caja ñamaní uun xihín Abraham ta coo nasacuu a sahá ña nasacu vaha da ley Moisés.

¹⁹ Ta viti, á ndaca tuhún ndó ndá saha nasahan Ndióxi ley nuú Moisés. Nasahan Ndióxi ña jáchi cúní a ña ná candaa ini ñayivi ndá quiahva saá ini na caja na ña cúní Ndióxi. Ta nasacu ini a candoo ley janda quiahva ná xínu coo mé a quixi chichi Abraham cán. Jáchi mé a cán queá nasahan Ndióxi tuhun a quixi. Ta táto Ndióxi queá nacañhi ley yóho xihín Moisés ta najayaha da ña nuú ñayivi. ²⁰ Joo tá nasahan Ndióxi tuhun a nuú Abraham coo naxini ñúhú toho a ñayivi jáyaha na ña. Ta coo nacaja chúun a táto mé á jáchi in túhún Ndióxi nacaja mé á ña.

Ña cúní ley caja í

²¹ Jihna ñúhú nasahan Ndióxi tuhun a nuú Abraham anda jáví nasahan ley nuú Moisés. Á cúní cachi ña yóho ña co ndique táhan ley Moisés xihín tuhun nasahan Ndióxi nuú Abraham. Co cúú a já. Jáchi tá ná cuu jácau ley Moisés ñayivi já queá cuu nduu ndaa na nu Ndióxi sahá ña sácú vaha na ña sáhdá mé ley. Joo co cúú a já. ²² Jáchi cáhí tuhun Ndióxi ña mé cuachi cándihí a tóco ndihi ñayivi. Joo tá ná cándéé ini Jesucristo já cuu ndiquehé ña nasahan Ndióxi tuhun a quiahva nu tóco ndihi ñayivi sahá ña cándéé ini na mé á.

²³ Tá cámaní quixi Jesucristo já nasacomí ley cuéntá saha yo ta nasandaca mí janda quiahva naxínu quívi nanaha Ndióxi nu yo ña ndítahan cándéé ini Jesucristo. ²⁴ Nasandaca ley mí tá quiahva cája in dataa xihín jahyi válí da anda quiahva naquixi Jesucristo, mé á nacaja ña ná canduu ndaa yo nu Ndióxi sahá ña cándéé ini mé á. ²⁵ Ta viti co cómí ga ley cuéntá saha yo jáchi cómí Jesucristo cuéntá saha yo tá cándusa í mé á.

²⁶ Ta in nanduu ndó xihín Jesucristo sahá ña cándéé ini ndó mé á ta já nanduu ndó jahyi Ndióxi. ²⁷ Ta tá nacandúta ndo já in nanduu ndó xihín Jesucristo ta nanduu ndó tá quiahva íin mé á. ²⁸ Ta co cája toho

a tá cúú ndó na naquixi chichi Israel, á co cúú toho ndó na. Ta co cája toho a á cúú ndó na naxeen ñayivi caja chúun nu ná, á co cúú toho ndó na. Ta co cája toho a á cúú ndó taa á ñáha. Jáchi tá nacandúsa ndó Jesucristo já in nanduu tóco ndihi ndó jáchi in nanduu ndó xihin mé á. ²⁹ Ta sahá ña cómi Jesucristo cuéntá saha ndo sahá ña cán quea cúú ndó tátuhun na naquixi chichi Abraham. Ta sahá ña cán quea ñehe táhvi ndó ña nacachi Ndióxi quiahva nuú da cán tá nasahan tuhun a nuú Abraham sanahá.

4

¹ Ña cúní cáchí i cúú ña yóho: Cúú á tátuhun tá sahan in dataa tóco ndihi ña cómi da nuú jahyi da. Joo nani cúú dá taa loho já a cuú cacomí da cuéntá saha ña nandiquehe da ndáha tátá da. Cúú dá tátuhun mozo vatí tandaa quivi cacomí da cuéntá saha tóco ndihi ñaha tátá da. ² Jáchi ndúu java ñayivi, na cómi tóo cuéntá saha mé dá ta saha tóco ndihi ña najándacoo tátá da nu dá janda quiahva ná xinu coo quivi nasacu ini tátá da. ³ Quiahva já yáha ri xihin mé ví. Jáchi jihna nasacuu tátuhun navalí. Nasacomí ley na Israel cuéntá saha yo tátuhun cája xitoho xihin mozo da. ⁴ Joo tá naxinu coo quivi nasacu ini Ndióxi já nachindahá mé á Jesucristo, jahyi a. Ta in ñañáha ñuyiví yóho nasacuu ña najácacu ñahá. Ta nacaja mé á ña sáhdá ley Moisés. ⁵ Ta naxihí a ndica crúxu já ná cuu chahvi a saha cuachí ña ná janí yó nu ley ña nasacomí cuéntá saha yo. Ta xihin ña yóho nacuu nanduu jahyi Ndióxi.

⁶ Ta sahá ña nanduu jahyi mé á sahá ña cán quea nachindahá Ndióxi ínima jahyi a ña ná ndicaan mé á ini ínima yo já quea ná cuu cahan yó xihin Ndióxi já cachí yó já: “Tátá maní i.” ⁷ Ta viti co cúú ga yó tátuhun mozo jáchi co cómi ga ley cuéntá saha yo ta nanduu jahyi Ndióxi viti. Ta viti cuu ñehe táhvi yó quehé ña nasacu ini mé á quiahva nuú na cúú cuéntá mé á sahá ña nacaja Jesucristo.

Ndicani ini Pablo sahá na cúú cuéntá Jesús ñundáhyi Galacia

⁸ Jihna ga tá coo nacandaa ini ndó saha Ndióxi já nacaja cáhnu ndó java ga ndióxi ña co cúú toho ndióxi joo nasacomí a cuéntá saha ndo. ⁹ Ta viti sa xini ndó Ndióxi joo vaha chága ná cachi i ña sa xini Ndióxi ndohó. Ta ndivaha cúní ndó ndicó coo tucu ndó caja ndó tá quiahva nacaja ndó jihna. Jáchi co ndiyahvi toho ña nacaja ndó cán ta ni a cuú chindee a ndohó. ¹⁰ Joo cája tucu ndó víco ta xihin ña yóho cája cáhnu ndó java quivi xihin yo xihin cuia. ¹¹ Ndicani ndivaha ini i saha ña cája ndó jan. Jáchi viti co cánda ini i á mé a uun va nasacuu chuun nacaja i tañu ndó jan.

¹² Candehé ndó, ñani mí i, na cúú cuéntá Jesús. Xíca tahví i nu ndo ña ná caja ndó tá quiahva cája i viti. Jáchi najándacoo i cája i ña sáhdá ley tá nandihvi i íchi cuéntá Jesús. Vaha ndivaha nacaja ndó xihin i tá nasahin i xihin ndó jan. ¹³ Ta cája i cuéntá ndicuhun ini ndó ña quihvi ndivaha i tá nu cuítí nasahan i caxi tuhun i tuhun vaha sahá Jesús tañu ndó jan. ¹⁴ Ta sahá cuehe nandoho i nacuu candají ndó yehe, nduu. Joo coo nacaja ndó ña. Ña nacaja ndó quea nandiquehe vaha ndó yehe ta nacaja ndó xihin i tá quiahva ná caja ndó xihin in táto Ndióxi á xihin Jesucristo. ¹⁵ Ta nacajii ndivaha ini ndó mé tiempo cán. Jáchi xini vaha i ña nasahin tiahva ndó tavá ndó nduchú nuú ndo quiahva ndó ña nuú i, nduu tá ná cuu caja ña ná ndivaha i. ¹⁶ Joo viti nanduu u tátuhun in da ihvi ndo sahá ña cahan i ña ndaa sahá Jesucristo xihin ndo.

¹⁷ Ndúu java ñayivi tañu ndó jan ta co jánaha na ña ndaa nu ndo. Cája cuaha ná ñamaní xihin ndo joo a juú ña vaha quea cúní na xihin ndo. Ña cúní na quea ná jácaxoo táhan í ta ná ndihi ini ndó saha ña jánaha mé ná. ¹⁸ Co cúní cachi i ña a váha toho ndihi ini sahá ñayivi. Vaha va ná caja i ña ní tiempo ta xihin ndinuhu ini. Joo ñayivi jan ndíhi ini na saha ndó tá ín yehe tañu ndó cuítí va. ¹⁹ Candehé ndó, jahyi a. Nacasahá ndihihvi tucu ini i saha ndo. Tá quiahva ndihihvi in ñañáha tá sáhdá a tixi ña cácu jahyi ña quiahva já ndihihvi ini i saha ndo. Ta ndoho tá ndoho chága ini i saha ndo janda quiahva ná caja ndó ña

cúni Jesucristo. ²⁰ Viti ñúhú cúu ini i coo i jan já ná cuu caḥan vaḥa chága i xihín ndo jáchi janda nu ín i yóho ndícani ndivaha ini i saḥa ndo.

Ña naçaja Agar xihín ña naçaja Sara sanahá

²¹ Candehé ndo. Mé ndó, na cúni ndiquiahva tucu ndáha ley Moisés, xini ñúhú candehé vaḥa ndó ña cáchi mé ley cán. ²² Cáchi a ña naçacu ivi jahyi ta Abraham. In jahyi da naçacu xihín Agar, ña cúu mozo ñájihí da ta inga jahyi da naçacu xihín Sara, ña cúu ñájihí vaḥa da. ²³ Tá naçacu jahyi ta Abraham xihín Agar cán, naçacu a tá quiahva cácu tóco ndihi ñayivi. Joo jahyi ta da, da naçacu xihín ñájihí vaḥa da, ña naní Sara cán naçacu a jáchi naṣahan Ndióxi tuhun a nu dá ña ná cacu a. ²⁴ Candehé ndo ña náha ña yóho nu yo. Ndívi najihí yóho cúu ná tátuhun ivi tuhun naṣahan Ndióxi nu yo. In táhan tuhun yóho cúu á ley naṣahan Ndióxi nuú Moisés jini yucu naní Sinaí cán. Ta Agar cúu yuhú nuú ley yóho. Ta jahyi ña cán tá naçacu a nanduu a mozo. Ta na ndico ley cúu ná tátuhun jahyi Agar jáchi cómi ley cuénta saḥa ná. ²⁵ Ta Agar cúu ña yuhú nuú ley ña naṣahan Ndióxi nuú Moisés yucu naní Sinaí, ña ndacaan chí ñundáhyi Arabia cán. Ta jári mé ña cúu ña yuhú nuú Jerusalén, ña cúu jini nu tóco ndihi na cája ña sáhdá ley Moisés. Ta mé ña xihín na ndúu cán cúu ná tátuhun mozo jáchi cómi ley cuénta saḥa ná. ²⁶ Joo ín inga ñuu Jerusalén, ña ín indivi cán. Ta ñayivi ndúu cán co cúu toho na mozo jáchi cúu ná tátuhun jahyi Sara, ñájihí vaḥa Abraham. Ta mí cúu yó tátuhun na ndúu ñuu cán jáchi cándeé iní Jesucristo. ²⁷ Já cáchi tuhun Ndióxi já: Xini ñúhú cajji ini ndó najihí, na a cuú cacu jahyi.

Cayuhú ndó xihín ña cajji iní ndo, vatí a náha cahnda tixi ndó cacu jahyi ndó. Jáchi najihí, na najándacoo too yí canduu chága jahyi na a juú ga najihí ndúu yí, cáchi tuhun Ndióxi.

²⁸ Candehé ndo, ñani i, na cúu cuénta Jesús. Cúu yó tátuhun Isaac, jahyi Sara cán saḥa ña cándeé iní Jesús jáchi cúu yó jahyi naṣahan Ndióxi tuhun a quiahva nuú

Abraham. ²⁹ Joo tá quiahva naçaja da cúu jahyi Agar sanahá tá naçasáhá da cája xixi da xihín da cúu jahyi Sara quiahva já ín a viti jáchi na sácú vaḥa ley Moisés cája xixi na xihín na cándeé ini Jesucristo. ³⁰ Joo cuni johó ndó ña cáchi tuhun Ndióxi tá naçahan Ndióxi xihín Abraham: “Tavá ña cúu mozo jan ná quee ña cuhun ña xihín jahyi ña. Jáchi da cúu jahyi mozo jan a cúu ñeḥe táhvi dá ndiquehe da ña quiahva i nuú da cúu jahyi ñájihí vahún jan”, naçachi Ndióxi sanahá. ³¹ Candehé ndó, ñani i, na cúu cuénta Jesús. Co cúu yó tátuhun jahyi ña cúu mozo jan jáchi co cómi ga ley cuénta saḥa yo. Viti cúu yó tátuhun jahyi Sara, ña cúu ñájihí vaḥa Abraham cán jáchi co ndúu ga yó ndáha ley Moisés saḥa ña cándeé iní Jesucristo.

5

Sa najani yo ndáha ley Moisés naçaja Jesucristo

¹ Co ndúu ga yó ndáha ley Moisés saḥa ña naçaja Jesucristo. Ta viti cándeé ini ndó mé á saḥa ña cán quéa xini ñúhú canduu ndacú ndo ta co ndítahan nu ndó ndicó coo ndó caja ndó ña sáhdá mé ley cán.

² Cuni johó ndó ña caḥan i xihín ndo. Tá ná cándeé ini ndó ña cuu nduu ndaa ndó nu Ndióxi saḥa ña chícaan na marca yiquí cuñu ndó já quéa cúni cachi a ña quéhe núu ndó ña naçaja Jesucristo tá nañihí a ndica crúxu saḥa ndo. ³ Candehé ndó ná caḥan tucu u xihín ndo. Tá cúni ndó canduu ndaa ndó nu Ndióxi saḥa ña chícaan ndó marca yiquí cuñu ndó já quéa ndítahan nu ndó caja ndó tóco ndihi cuí ña sáhdá ley Moisés. ⁴ Mé ndó cúu ndó na cúni canduu ndaa nu Ndióxi saḥa ña sácú vaḥa ndó ley Moisés. Ta viti naçaxoo ndó nu Jesucristo ta naçaxoo ndó nuú ñamaní cúni Ndióxi caja xihín ndo. ⁵ Joo mé nde xini vaḥa nde ndúu ndaa nde nu Ndióxi saḥa ña cándeé ini nde Jesucristo. Ta ndáti tiaḥva nde jáchi chindeé ínima yii Ndióxi ndeḥe. ⁶ Jáchi tá in nanduu xihín Jesucristo já quéa coo caja toho a á naquihvi marca yiquí cuñu í á coo a. Ña ndiyahvi ndusa quéa ña cándeé iní Jesucristo jáchi xihín ña yóho cuu quihvi iní ñani táhan í.

⁷ Sa vaha ndivaha va cuahan ndó xihín ña cándéé ini ndó Jesús. Yo já nandijama jiní ndo ña ná a cándúsa ga ndó ña ndaa. ⁸ A juú toho Ndióxi nandijama jiní ndo jáchi mé a cán quéa nacana ndohó ña ná cacuu ndó cuéntá mé á. ⁹ Xíní ñuhú ndicuhun ini ndó in tuhun ta já cáchí a “Vatí loho yusá naxaa ná cava táhan í xihín yusá cuaha cán játiví ñahá a.” Quiahva já cája na cúni ndijama jiní ndó jan. ¹⁰ Joo cándéé ini í Jesucristo, xitoho í sahá ña cán quéa xíní vaha í ña a cándúsa ndó na jan ta ndicó coo ndó cahvi ini ndó tá quiahva cáhvi ini yehe. Ta jándoho Ndióxi ini na xíca jájaca xíní túni ndó jan ta coo caja toho a ndá na cúu ná.

¹¹ Joo yehe jána ha í nuú na cúu cuéntá Jesús ña co ndítahan ga chícáan na marca yiquí cuñu na ta sahá ña cán quéa ndicuita na Israel xihín í. Tá ná jána ha í nuú ñayivi ña ndítahan chícáan na marca yiquí cuñu na já quéa a ndicuita ga na cán xihín í. Joo mé a ndaa cándají na cán yehe jáchi jána ha í nuú ñayivi ña cuu cacu ndaa ínima ná sahá ña cándéé ini na Jesucristo cuití va, mé a naxihí ndica crúxu saha yo. ¹² Sahá ña cúni na cán caja ndúsa na xihín ndó chícáan ndó marca yiquí cuñu ndó sahá ña cán quéa cája í cuéntá vaha chága ná chitúhun ndihi mé ná yiquí cuñu na ta ná jándacoo táji ná ndohó.

¹³ Candehé ndó, ñani í. Co ndúu ga ndó ndáha ley Moisés nacaja Jesucristo. Joo co cúni cachi ña yóho ña najani ndo já ná cuu caja ndó ndá ña núu ña xíca ini yiquí cuñu ndó caja. Jáchi nacana Ndióxi ndohó ña ná quihvi ini táhan ndó ta ná chindeé táhan ndó. ¹⁴ Joo tóco ndihi ña cúu ley Moisés in cáchí ndihi a tá cáchí a já: “Quihvi inún ñani táhún tá quiahva quihvi inún mún.” ¹⁵ Joo cuéntá coo ndó jáchi tá cásahá ndo cája xíxi xihín táhan ndó ta cája quini xihín táhan ndó já quéa xinu quiví jándihi saha táhan ndó.

Ña cúni ínima yii Ndióxi caja í xihín ña cúni yiquí cuñu í caja í

¹⁶ Candehé ndo, ñani í. Ndítahan caja ndó ña cúni ínima yii Ndióxi ta co ndítahan caja ndó ña xíca ini yiquí cuñu ndó caja. ¹⁷ Jáchi tóco ndihi ña núu ña cúni yiquí cuñu yó caja í cáni táhan xihín ña vaha ña cúni ínima yii

Ndióxi caja í. Ta a cuú cuni táhan ínima yii Ndióxi xihín ña núu jáchi co ndíque táhan vaha ña núu xihín ña vaha sahá ña cán quéa a cuú caja í ndá ña nacuu cúni yó caja í. ¹⁸ Ta tá ná ndiquiahva ndó mé ndó ña ná candaca ínima yii Ndióxi ndohó já quéa a cácomí ga ley Moisés cuéntá saha ndo.

¹⁹ Ta co yáncá toho ndícuni ndá na cúu na cája ña núu ña cúni mé ná caja na. Jáchi ña cája na cúu ña yóho: ndúu na xihín na co cúu ñájíhí na á yíi ná ta cája na tá nuú ña núu xihín yiquí cuñu na. Ta ndicají ini na cuju na xihín ñaha á taa. ²⁰ Cája cáhnu na yoco xihín tiniñu yúu ta cája na ña tají. Ta cándají táhan na. Ta cáni táhan na ta ndácaan ña cuiñú jiní ná. Ta cama chá jáa xihín táhan na. Ta cáhvi ini na saha mé cuití va na. Ta cátóo na jácane táhan na ñayivi já ná canduu jín na. Ta xihín ña yóho sáhdá táhan na ñayivi. ²¹ Cúu ná ñayivi ihvi ini ta cúu ná na sáhní ndii ta cúu ná na xíhi. Ta a juú quiahva ndehé na ta cuahá ndivaha java ga táhan ña yóho cája na. Joo mé ndó cuni johó ndó ná cahan tucu u ña sa nacachi í jihna xihín ndo: Ndá na cája já a ñehé táhvi toho na cacomí Ndióxi cuéntá saha ná.

²² Joo tá ndícaan ínima yii Ndióxi iní já quéa cája mé á ña ná quihvi ini táhan í ta cája ña ná cajii iní ta cája ña ná coo vaha iní ta cája ña ná a cójo cama iní ta cája ña ná chindeé yó ñayivi ta cája ña ná cacuu ñayivi vaha ini ta cája ínima yii Ndióxi yóho ña ná cacuu ñayivi, na co cáhvi ivi johó ini. ²³ Ta cája ña ná cacuu ñayivi, na co ndínehe jícó mé, na cúu sáhnú mé. Ta ni in túhún toho ley a cuú chícáan cuachi jatá ñayivi tá sácú vaha na tóco ndihi ña cáchí tuhun yóho. ²⁴ Tóco ndihi na cómí Jesucristo cuéntá saha, sa najándacoo na ña núu nasacahvi ini na caja na xihín yiquí cuñu na. Ta cúu ná tátuhun na sa naxihí nuú cuachi nasacaja na. ²⁵ Co cája ga yó cuachi nacaja í jihna sahá ña ndácaan ínima yii Ndióxi iní. Ta xíní ñuhú quiahva í ñamaní nu mé á ña ná candaca a mí nuú ndihi ña caja í.

²⁶ Ta co ndítahan ndínehe jícó yo mí ta ni co ndítahan jácane táhan í ñayivi ta ni co ndítahan cahihvi ini xihín táhan í.

6

Ndítahan nuú na cúú cuéntá Jesús chindeé táhan na

¹ Candehé ndó, ñani i. Tá naxini ndó nandicava in na cúú cuéntá Jesús nuú cuachi já queá ndítahan nu ndóhó, na nachutú ndaa ínima xihin ínima yii Ndióxi, chindeé ndó na já ná ndicaca vaha na íchi cuéntá Jesús. Joo vii vii cahan ndó xihin ná jáchi ndítahan cahvi ini ndó ña vaxi quivi tá cuu ndicava ri ndóhó va nuú cuachi. ² Xíni ñúhú chindeé táhan ndó tá ndóho ini ndó. Ta xihin ña yóho jáxinu coo ndó ña sáhdá Jesucristo nu ndó caja ndó.

³ Tá ndúu java na tañu ndó ta cáhán na cúú ná na náhnu ndivaha vatí coo cúú á ña ndaa já queá jándahvi na mé va na. ⁴ Tá in tá in ndó ndítahan candehé ndó ndá quiahva cája ndó já ná cuu cajii ini ndó tá cája vaha ndó. Ta coo ndítahan ndiñehe jícó ndó mé ndó sahá ña cáhán ndó ña vaha chága cája mé ndó a juú ga inga ga na. ⁵ Jáchi tá in tá in ndó ndítahan nu ndó candehé ndó ña cája ndó, á cúú á ña vaha á cúú á ña núu.

⁶ Tóco ndihi ndó, na jácuaha tuhun Ndióxi ndítahan nu ndó chindeé ndó na jánañha ndóhó xihin ña cómi ndó.

⁷ Jándahvi ndó mé ndó tá cáhán ndó ña cuu jándahvi ndó Ndióxi jáchi a cuú jándahvi ñayivi Ndióxi. Sa xini ndó tá xutu ndó in tata nu ñúhú já queá vaxi quivi tá jáquee ndó mé ñaha naxutu ndó. ⁸ Tá cája ñayivi ña núu ña cúni mé cuití na já queá vaxi quivi cuhun na indayá sahá ña núu nacaja na. Joo tá cája na ña vaha ña cájii ini ínima yii Ndióxi xihin já queá ñeñe táhvi na cuhun na coo na xihin Ndióxi anda ama cáa quivi, caja ínima yii Ndióxi. ⁹ Sahá ña cán queá a cánaa yó cája í ña vaha jáchi tá ná a jándacoo í cája í ña cúni Ndióxi já queá vaxi quivi quiahva Ndióxi nu yo ña ndítahan ndiquehé sahá ña táhan ini mé á xihin ña nacaja í. ¹⁰ Sahá ña cán queá tá núná nu yó caja vaha í xihin tóco ndihi ñayivi cóho caja í ña. Ta cachí ga ví tá cúú ná na cándéé ini Jesús.

Ndíndayí Pablo na cúú cuéntá Jesús

¹¹ Candehé ndó ndaja náhnu letra cáhyí i nu ndó xihin ndáha mí i viti. ¹² Cúni ña ná candaa ini ndó sahá java ga ñayivi, na cúni caja ndúsa xihin ndó ña ná chicaan ndó

marca yiquí cuñu ndó. Cája na ña yóho jáchi cúni na candoo vaha na nuú na Israel. Ta yihví na ndicuita ñayivi xihin ná sahá ña cándúsa na Jesucristo, mé a naxihí ndica crúxu sahá cuachi. ¹³ Joo mé na chicaan marca yiquí cuñu cán coo sácú vaha na tóco ndihi ña sáhdá ley Moisés. Joo cúni na ña ná chicaan ndó marca yiquí cuñu ndó já ná cuu cahan lándá na nuú na Israel sahá ña nacaja ndúsa ná xihin ndó. ¹⁴ Joo yeñe, ni in túhún toho ñaha coo cúni cahan lándá i saha. Ña cúni caja i queá cahan i sahá Jesucristo, mé á naxihí ndica crúxu. Ta sahá ña cándéé ini i Jesucristo sahá ña cán queá cúú á tátuhun naxihí i nuú ña núu ñuyiví yóho. Coo cúni ga i cája i ña cája ñayivi ñuyiví ta coo cúni na cán catáhan na xihin i. ¹⁵ Ta coo ndiyahvi nu Ndióxi á naquihvi marca yiquí cuñu í á coo a. Ña ndiyahvi ndusa queá ña nanduú ñayivi saá sahá ña cándéé ini Jesucristo. ¹⁶ Cúni ña ná coo vaha ini ndó, na cája ña cáhan i yóho. Ta ná caja Ndióxi cuahá ñamaní xihin ndó ta xihin tóco ndihi na cúú cuéntá mé á.

¹⁷ Ta viti xihin chinuu coo cúni ga i ña ná jáquihvi ga ñayivi yeñe. Jáchi tóco ndihi yanda ndáa a nu yiquí cuñu i náha ña mé a ndaa cúú u da cája chúun cuéntá Jesucristo.

¹⁸ Ñani i na cúú cuéntá Jesús, ña cúni queá ná caja Jesucristo, xitoho í cuahá ñamaní xihin ndihi ndó. Já ná coo.

Carta nacahyí Pablo nuú na cúu cuéntá Jesús ndúu ñuu Efeso

Chíndahá Pablo Ndióxi coo na cúu cuéntá Jesús ndúu ñuu Efeso

¹ Yehe cúu Pablo, da nacaxi Ndióxi cacuu apóstol cuéntá Jesucristo. Cáhyíi carta yóho nuú na cúu cuéntá Ndióxi ndúu ñuu Efeso, na cándeé ini Jesucristo. ² Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndó ta ná caja mé á ña ná coo vaha ini ndó.

Ñehé táhvi yó cuahá ñamaní cája Ndióxi sahá ña cándeé ini Jesucristo

³ Cóho caja cáhnu í Ndióxi, mé a cúu tátá Jesucristo, xitoho í. Cóho caja cáhnu í mé á jáchi cuahá ndivaha ñamaní nacaja xoho. Ta tá nuú ña vaha quíxi indiví nasahan ndihi mé á nu yo jáchi in cúu yo xihín Jesucristo. ⁴ Janda tá camaní cava sahá saha ñuyíví já nacaxi Ndióxi mí ña ná cacuu cuéntá mé á sahá ña nacaja Jesucristo. Ta nasacu ini a ndaja mí ña ná cacuu ñayivi yíi, na coo ga cuachi nu mé á. ⁵ Quíhvi ndivaha ini a mí sahá ña cán queá sa nasacu ini mé á ña ná quivi Jesucristo saha yo já ná nduú jahyi mé á. Já nacaja jáchi já cúní a coo. ⁶ Sahá ña cán queá ndítahan nu yo caja cáhnu í Ndióxi ní tiempo jáchi cuahá ndivaha ñamaní cája mé á xihín yo tá nacaja mé á ña in nanduú xihín Jesucristo, jahyi maní á. ⁷ Nacaja Ndióxi ñamaní cáhnu xihín yo tá naxita ni Jesucristo ndica crúxu saha yo. Anda jáví cuu jácacu a mí ta cuu caja cáhnu ini a sahá cuachí. ⁸ Mé a ndaa nacaja cuahá ndivaha Ndióxi ñamaní xihín yo. Nacaja mé á ña ná ndindichí jini yo já ná candaá ini tuhun mé á. ⁹ Ta nasahan ñamaní nu yo ña ná candaá ini ña nasacu ini mé á caja jáchi janda sanahá nasahin jehé a nu yo joo viti sa candaá ini ndá saha nachindahá mé á Jesucristo. ¹⁰ Ta vaxi quivi coo ña nasacu ini mé á coo. Ta mé quivi cán caja Ndióxi ña ná cacomí Jesucristo cuéntá saha tóco ndihi ñaha ndúu ñuyíví xihín ña ndúu indiví

jáchi tóco ndihi ñaha xinu a canduu a ndáha Jesucristo.

¹¹ Ta coo tá quiahva nasacu ini Ndióxi coo jáchi cája mé á tóco ndihi ña sácú ini a caja. Janda sanahá ndivaha nasacu ini a caxi a mí cacuu ñayivi ñehé táhvi ndiquehé ña vaha, ña quíxi nu in mé á sahá ña in nanduú xihín Jesucristo. ¹² Sahá ña cán queá ndítahan nuú nde caja cáhnu nde Ndióxi ña ná ñaha ndaja cáhnu cúu mé á jáchi jihna ñuhú nde nacahá cándeé ini nde Jesucristo. ¹³ Ta quiahva já nacaja ri ndóhó va jáchi tá naxini johó ndó ña ndaa sahá Jesucristo já nacandeé ini ndó mé á. Mé tuhun yóho najánaha nu ndo ndá quiahva najáca cu mé á ndohó. Ta tá nacandúsa ndó a já in nanduú ndó xihín á ta cúu á tátuhun nanani marca Ndióxi ndohó ña náha ña mé a ndaa cúu ndó cuéntá mé á. Ta mé marca yóho cúu ínimá yíi mé á ña nasahan tuhun a nu ndó quiahva nu ndo. ¹⁴ Ta ndacaan ínimá yíi mé á ini ínimá yo sahá ña cán queá candaá vaha ini ña vaxi quivi ndiquehé ña vaha, ña quiahva Ndióxi nu yo jáchi sa nasahan mé á tuhun a caja ña. Ta sa já ndacaan ínimá yíi mé á ini ínimá yo janda quiahva ná xinu quivi jácacu a mí nuú cuachí. Sahá ña cán queá cóho caja cáhnu í mé á ña ná ñaha ndaja cáhnu cúu mé á.

Xíca tahví Pablo nu Ndióxi ña ná quiahva mé á ña ndichí jini na cúu cuéntá Jesús

¹⁵ Ta sahá ña sa candaá vaha ini i ña cándeé ini ndó Jesucristo, xitoho í ta sahá ña sa candaá ini i ña quíhvi ini ndó tóco ndihi na cúu cuéntá Ndióxi ¹⁶ sahá ña cán queá co jándacoo i ña ndiquiahva i ndixahvi nu Ndióxi saha ndo. Ta co ndíndójó i caca tahví i nu Ndióxi saha ndo. ¹⁷ Ta tá xíca tahví i nu Ndióxi, mé a cúu tátá Jesucristo, xitoho í, mé a cúu Ndióxi cáhnu ndivaha já xíca tahví i nu á ña ná quiahva ínimá yíi mé á nu ndó. Anda já caja mé á ña ná ndindichí jini ndo já ná ñaha ndaja cáa Jesucristo. Ta xihín ña yóho candaá vaha chága ini ndó saha mé á. ¹⁸ Ta xíca tahví i nu Ndióxi ña ná jándiyehé a xíní túni ndo já ná candaá ini ndó sahá ña vaha caja mé á chága chí nuu xihín ndo. Ta ñúchí ndivaha coo tá ná xinu quivi ndiquehe

Ndióxi ndohó cūhun ndó coo ndó xihin mé á anda ama cáa quivi sahá ña cúu ndó cuéntá mé á. ¹⁹ Ta xíca tahví i nu á ña ná candaa ini ndó ña co vāja xinu coo nu ndíhi ndée Ndióxi jáchi ín ndivaha ndée mé á. Ta ín mé ndée yóho tañu mí, na cúu cuéntá mé á. Ta sa mé ndée yóho quéa nacaja chuun Ndióxi ²⁰ tá najánditacu a Jesucristo. Anda jávi nasacu coo a ña xoo cuáha mé á indiví. ²¹ Ta nacaja Ndióxi ña ná nduu Jesucristo jiní nu tóco ndíhi na ín ndée cahnda chuun ñuyívi yóho xihín na ín ndée cahnda chuun indiví. Sáhnda Jesucristo chuun nu tóco ndíhi na cán vatí cúu ná na ndúu tiempo viti á cúu ná na vaxi chága chí nuu. ²² Tóco ndíhi ñaha ndúu indiví xihín ñuyívi nandiquiahva Ndióxi ña ndáha Jesucristo ña ná cacomí mé á cuéntá sahá. Ta sa mé á cúu á jiní nu tóco ndíhi na cándeé ini mé á. ²³ Ta tóco ndíhi na cúu cuéntá Jesucristo cúu ná tátuhun yiquí cuñu mé á sahá ña nandicutú ndaa ínima ná xihín mé á. Ta mé a cán jáchutú a tóco ndíhi na ndúu ñuyívi xihín indiví.

2

Najácacu Ndióxi mí jáchi quíhvi ini a mí

¹ Ta jihna nasacuu ndó tátuhun na sa naxihí jáchi nasacaja ndó cuahá cuachi. Joo viti cúu ndó tátuhun na nanditacu tucu jáchi Ndióxi najácacu ndohó. ² Ta nasacaja ndó tá quiahva cája ñayivi ñuyívi yóho. Ta nasacaja ndó ña cúní tiñáhá sacuaña, rí cúu jiní nu tóco ndíhi rí quini. Ta mé rí cán cómi rí cuéntá sahá ñayivi, na co cája ña cúní Ndióxi. ³ Ta quiahva já nasanduú jihna jáchi nasacaja í ña xíca ini mí ví ta nasacaja í tóco ndíhi ña núu, ña nasacahvi iní caja í. Ta saha tóco ndíhi ña núu nacaja í yóho nanditahan nu yo jándoho ndivaha Ndióxi iní tá quiahva cája mé á xihín java ga na co cúní candúsa mé á. ⁴ Joo natahvi ndivaha ini Ndióxi saha yo ta naquihvi ini ndivaha mé á mí. ⁵ Ta vatí nasacuú tátuhun ndii ta coo nacuu ndique táhan máni yó xihín Ndióxi sahá cuachi nasacaja í joo natahvi ini Ndióxi saha yó sahá ña cán quéa najácacu a mí sahá ña nacaja Jesucristo. ⁶ Vatí nasacuú tátuhun ndii sahá cuachi nasacaja í joo tá nanditacu Jesucristo já

nasacuu a tátuhun nanditacu yó xihín mé á nacaja Ndióxi. Ta nacaja mé á ña ná cacoo í xihín Jesucristo tá ná xinu coo í indiví. ⁷ Nacaja Ndióxi ña yóho jáchi nasacu ini a jánaha nu yo viti xihín chága chí nuu ña quíhvi ndivaha ini a mí ta táhvi ndivaha ini a saha yo sahá ña nacaja Jesucristo. ⁸ Ta sahá ña natahvi ini Ndióxi saha ndo ñañehe táhvi ndó cacu ndaa ínima ndo jáchi cándeé ini ndó mé á. Ta co cúu á sahá ña cája mé ndó jáchi cúu á ñamaní nacaja Ndióxi xihín ndo. ⁹ Ta coo najácacu a ndohó sahá ña vaha cája ndó jáchi co cúní a ña ná caja cáhnu ndó mé ndó. ¹⁰ Jáchi nacavaha Ndióxi mí tá quiahva cúní a ña in ná nduú xihín Jesucristo já ná caja í ndinuhu ña vaha, ña nasacu ini a caja í anda jihna.

Ín vaha iní sahá ña nacaja Jesucristo xoho

¹¹ Candehé ndó, na tóho, na cúu cuéntá Jesús. Ná ndicuhun ini ndó ndaja nasacuu ndó jihna. Nacachi na Israel saha ndó ña coo yahvi toho ndó jáchi coo nachicaan na marca yiquí cuñu ndó. ¹² Ndítahan ndicuhun ini ndó ña mé tiempo cán co xini toho ndó Jesucristo. Ta ni coo nasacuu ndó na Israel, na nacaxi Ndióxi. Ta ni coo nasacuu ndó ñayivi nasahan Ndióxi tuhun a nuu. Nasanduú uun ndó ñuyívi yóho jáchi coo nasaxini ndo Ndióxi ta ni coo nacaán ndo cūhun ndó indiví. ¹³ Vatí coo nasacuu ndó na cúu cuéntá Ndióxi joo viti nacayati ndó nu á ta já in nanduu ndó xihín Jesucristo sahá ña naxihí a ndica crúxu saha ndo. ¹⁴ Ta nacaja Jesucristo ña ná coo vaha ini na Israel xihín na tóho. Ta nacaja ña in nanduu na cuéntá mé á. Jáchi najándihi á sahá ña nasaji nuu nuú na cán ña ná ndique táhan máni xihín táhan na. ¹⁵ Ta tá naxihí Jesucristo najáxinu coo a nu ley ña nasahnda chuun nu yo sahá ña nanditahan caja í. Ta nandaja mé á ña in nanduu na Israel xihín na coo naquixi chichi Israel. Ta tá nandíhi já nandaja mé á ña nanduu na cuéntá mé á já nanduu vaha ini xihín táhan na. ¹⁶ Tá naxihí Jesucristo ndica crúxu já nacaja mé á ña ná ndique táhan máni xihín táhan na ta já nandíhi sahá ña cáni táhan na. Anda já

najándique táhan máni á na xihin Ndióxi ta já in nanduu na.

¹⁷ Ta naquixi Jesucristo caxi tuhun a tuhun vaha nu yo ña ná coo vaha iní xihin Ndióxi. Ta coo caja toho a á cúu ná na tóho, na nasacuu xíca nu á tátuhun mé ndó, á cúu ná na Israel, na nasanduu yati nu á tátuhun mé nde jáchi nasahan mé á tuhun vaha nu tóco ndihí. ¹⁸ Ta sahá ña nacaja Jesucristo cuu cayatí nu Ndióxi viti. Coo caja toho a á cúu yó na naquixi chichi Israel á coo cúu yó na naquixi chichi Israel jáchi ínima yii mé á quea chindeé a mí cayatí nu Ndióxi. ¹⁹ Sahá ña cán quea coo cúu ga ndó na tóho, na naquixi xíca jáchi in nanduu ndó xihín na cúu cuénta Ndióxi viti ta cúu ndó na vehe mé á. ²⁰ Ta viti tóco ndihí, na cúu cuénta mé á cúu yó tátuhun in vehe. Ta na apóstol xihín na profeta cúu ná tátuhun yuu ndúhu sahá vehe jan jáchi najánaha na tuhun Ndióxi nu ndó nu cuítí. Ta Jesucristo cúu á tátuhun yuu ndúhu cuahan titó vehe jan ña sahan ndée vehe jan. ²¹ Ta nacaja Jesucristo ña nandique táhan vaha tóco ndihi na cúu cuénta mé á. Ta nandaja mé a mí ña loho loho ná nduú tátuhun in veñuhu yii nu sá ndacaan Ndióxi, xitoho í. ²² Sahá ña in nanduu ndó xihín Jesucristo sahá ña cán quea nandique táhan máni xihín táhan ndó. Ta nacaja Ndióxi ña ná nduu ndó tátuhun in vehe nu ín Ndióxi jáchi ndacaan ínima yii mé á chí ini ndó.

3

Nachindahá Ndióxi Pablo cahan da tuhun mé á nuú na coo naquixi chichi Israel

¹ Yehe cúu Pablo ta sahá ña xíca nuu i cahan i tuhun vaha sahá Jesucristo nuú na coo naquixi chichi Israel saha ña cán quea ndacaan i vecaa viti. ² Ta sa cándaq ini ndó ña sahá ña natahvi ini Ndióxi saha ndó sahá ña cán quea nasahan mé á chuun yóho nuú i ña ná cahan i tuhun Ndióxi xihín ndo. ³ Jihna nachijehé Ndióxi ña nasacu ini a caja joo viti najánaha mé á nuú i ña nasacu ini a caja. Ta sa nacahan chá i sahá ña jan tá nacahyí i carta nu ndo. ⁴ Tá ná cahvi tucu ndó ña já cuni ndó ña mé a ndaa táhyí sa cándaq ini i ña nasahin jehé sahá Jesucristo. ⁵ Coo nacandaq ini ñayivi ña yóho jáchi nasahin jehé ña. Joo viti

nacaja ínima yii Ndióxi ña ná candaq ini na apóstol xihín na profeta, na cúu cuénta mé á sahá ña yóho. ⁶ Ta ña nasahin jehé jihna cúu ña yóho: xihín ña nacaja Jesucristo ña in nanduu na cúu chichi Israel xihín na coo cúu chichi Israel já ná ñehe ná ña vaha ña nasacu ini Ndióxi quiahva nuú na cúu jahyi mé á. Jáchi in nanduu na Israel xihín na tóho ta in cúu ná ndati na ñehe ná ña nacachi Ndióxi quiahva nu ná sahá ña nacaja Jesucristo.

⁷ Joo nacaja Ndióxi ñamaní xihín i ta xihín ndée mé á xíca nuu i cahan i tuhun vaha saha mé á nuú ñayivi. ⁸ Nacaja Ndióxi ñamaní xihín i jáchi nasahan mé á chuun yóho nuú i ña ná cahan i tuhun vaha sahá Jesucristo nuú na coo naquixi chichi Israel. Vati cúu u tátuhun in da coo saha tañu na cúu cuénta Jesús joo nacaja mé á ñamaní xihín i ña ná ndicani i nuú na tóho ndá quiahva náhnu nahá cája Jesucristo xihín ná. ⁹ Ta nasahan Ndióxi chuun nuú i ña ná jánaha i tuhun vaha ña nasahin jehé nuú ndihi ñayivi. Ta anda sanahá nasahin jehé a nacaja Ndióxi, mé a nacavaha tóco ndihi ñaha. ¹⁰ Nacaja Ndióxi ña yóho jáchi sahá ña in nanduu na Israel xihín na tóho anda jáví náha nu tóco ndihi na sáhdá chuun nuú na ndúu indiví ndá quiahva ndichí ndivaha jini mé á. ¹¹ Sanahá ndivaha nasacu ini Ndióxi ña yaha chága chí nuu. Ta viti xihín ña nacaja Jesucristo, xitoho í naxinu coo nuú ña nasacu ini mé á coo anda ama cáa quivi. ¹² Ta sahá ña in nanduu xihín Jesucristo sahá ña cán quea coo yíhvi ga í cayatí nu Ndióxi. Ta xini vaha í ña ndiquehe mé á mí jáchi candeé iní mé á. ¹³ Sahá ña cán quea xíca tahvi i nu ndo ña ná a cávita ini ndó sahá ña ndóho ini i. Jáchi sahá ña nacahan i tuhun Ndióxi nu ndo sahá ña cán quea ndóho ini i viti já ná cuu canduu vaha mé ndó. Ta xini ñuhú cajji ini ndó sahá ña cája i saha ndo.

Quíhvi ini Jesucristo ñayivi

¹⁴ Sahá ña cán quea ndaca xítí i nu Ndióxi, mé a cúu tátá Jesucristo, xitoho í tá cahvi ini i ndá quiahva náhnu cája mé á. ¹⁵ Jáchi mé á cúu tátá tóco ndihi na ndúu indiví xihín tóco ndihi na ndúu ñuyiví yóho sahá ña cúu ná na vehe mé á. ¹⁶ Ta cuni mé á

caja cuahá ndivaha ñamaní xihin yo sahá ña cán queá xíca tahví i nu á ña ná chindahá ínimá yíi á nu ndo já ná quiahva tuhun ndeé ini ndó ta já ná coo ndacú ini ndó. ¹⁷ Ta xíca tahví i nu Ndióxi ña ná ndacaan Jesucristo ínimá ndo sahá ña cándéé ini ndó mé á ta ná coo ndeé ini ndó sahá ña quíhvi ini a ndohó. Ta tá quiahva tín yohó yíto ñundáhyi quiahva já ndítahan coo ndó xihin Jesucristo. ¹⁸ Ta anda jáví mé ndó xihin tóco ndihi na cúu cuéntá Jesús cuu candaá ini ndó ndá quiahva quíhvi ini a ndohó. ¹⁹ Ta xíca tahví i nu Ndióxi ña ná candaá ini ndó ndá quiahva quíhvi ini Jesucristo ndohó já queá ná ndicutú ndaa ínimá ndó xihin Ndióxi. Joo mé a ndaa a cúu xinu coo ndó candaá ini ndó ndá quiahva quíhvi ini a ndohó.

²⁰ Ta viti cáhnu nahá ná cacuu Ndióxi, mé a íin ndivaha ndéé cája cuahá nuú ñaha jáchi cája cuaha chága mé á ñamaní xihin yó a juú ga nuú ña cáhvi iní caca yó nu á jáchi chindeé Ndióxi mí xihin ndéé mé á. ²¹ Cохо ndihí, na cúu cuéntá Jesús ña ná caja cáhnu í Ndióxi sahá ña nacaja Jesucristo. Viti xihin ndijáá níi quívi ta anda ama cáa quívi ná caja cáhnu í mé á. Já ná coo.

4

Cája ínimá yíi Ndióxi ña in nanduu tóco ndihi na cúu cuéntá Jesús

¹ Yehe ndácaan i vecaa sahá ña cája chúun i cuéntá Jesucristo, xitoho í. Sahá ña cán queá xíca tahví i nu ndo ña ná caja ndó ña cúni Ndióxi caja na cúu cuéntá mé á. Jáchi nacaxi a ndohó sahá ña cán queá ndítahan caja ndó tá quiahva cúni mé á. ² Coto a cája cáhnu ndó mé ndó. Vii caja ndó xihin ñayivi. A cójo cama ini ndó xihin ná. Ta tá yáha nu cája xihin táhan ndó caja cáhnu ini saha táhan ndó jáchi quíhvi ini táhan ndó. ³ Xíni ñuhú ndinducú ndo in ná nduu ndó jáchi chindeé ínimá yíi Ndióxi ndohó caja ndó ña. Ta coto a ndácahnda táhan ndó já ná coo vaha ini xihin táhan ndó. ⁴ Tóco ndihi mí, na cúu cuéntá Jesús naxinu coo í cúu yó tátuhun in túhún ñayivi. Jáchi íin in túhún ínimá yíi Ndióxi iní ta in túhún cúu ri ña ndátí quiahva Ndióxi nu yo sahá ña nacaxi a mí ndiquehé ña. ⁵ In túhún jini

Jesucristo, xitoho í queá íin. Ta in túhún jini mé á ndítahan cándéé iní jáchi in nacandúta yo cuéntá mé á. ⁶ Ta íin in túhún Ndióxi, mé a cúu á tátá tóco ndihí. Ta mé a cán cómi a cuéntá saha tóco ndihí. Ta sahan mé á ndéé yó caja í ña cúni a. Ta ndacaan ínimá mé á ini tóco ndihi ñayivi cuéntá mé á.

⁷ Joo tá in tá in mí nañehe tahvi yo nasacu ini Jesucristo quiahva nu yo. ⁸ Sahá ña cán queá cáchi tuhun Ndióxi já:

Naquee vaha mé á xihin na ihvi a ta nasandaca mé á na tá nandicó coo a nandaa indiví.

Anda já nasahan tahvi nuú in in ñayivi, nacachi tuhun Ndióxi.

⁹ Tá cáchi a ña nandaa Jesucristo indiví já cúni cachi a ña nu cuítí nanuu a indiví anda ñuyívi yóho. ¹⁰ Ta mé Jesucristo, mé á naquee indiví cán ta nanuu a ñuyívi yóho nandaa tucu a cuahan janda nu jícó cuíi indiví ta já najándicutú a ñuyívi xihin indiví xihin ña nacaja mé á. ¹¹ Ta tá nasahan tahvi nuú in in ñayivi já nañehe tahvi java na cacuu na apóstol ta java na cacuu na profeta ta java na caca nuu na cahan na tuhun Ndióxi ña cuu jácacu ñayivi. Ta java na nañehe tahvi ná cacuu na na cómi cuéntá sahá na cúu cuéntá mé á ta java na cacuu na na jánaha tuhun Ndióxi nuú ñayivi. ¹² Já nacaja Ndióxi xihin na cán já ná canduu tiahva na caja chúun na cuéntá mé á ta já ná cuu caja na jácuahnu na na cúu cuéntá Jesús. ¹³ Já queá ná xinu coo ndihí in canduu xihin na cúu cuéntá Jesús sahá ña cándéé iní mé á. Já ná cuu xinu coo í candaá vaha chága iní sahá Jesucristo, mé a cúu in túhún jini já jahyi Ndióxi. Ta xihin ña yóho cuu ndindacú yo cuéntá mé á janda quiahva cuahnu vaha í jáxinu coo í ndicutú ndaa yó xihin mé á. ¹⁴ Ná a cacuu ga í tátuhun na valí, na co tácu ini, na ndijama jini tá tóo. Ta tá nandihí ndíco na jatá ña jánaha inga na janda quiahva jándahvi na na. Ta mé na jándahvi ñahá yóho xini vaha na ndá quiahva cája na cañehe na na cuhun na in íchi ña co cúu ichi vaha. ¹⁵ Ña ndítahan caja í queá cahan ndaa xihin táhan í xihin ndinuhu iní sahá ña quíhvi ini táhan í ta já cuahnu í xihin Jesucristo, mé a cúu jini nu tóco ndihi na cúu cuéntá mé á

janda quiahva ná nduú tá quiahva cáa mé á. ¹⁶ Sahá ña cúu mé á jiní nu yo sahá ña cán quea cuu ndique táhan vaḥa í xihín java ga na cúu cuéntá Jesús. Ta ñúchí ndivaha ndique táhan na cúu cuéntá mé á tá cája in in na ña cúní mé á. Ta xihín ña yóho cuu canduu vaḥa í ta cuu ndindacú chága yo cuéntá mé á ta já cuu quihvi ini táhan í.

Ña saá cája í viti

¹⁷ Ña yóho quea cáxi tuhun i xihín ndo. Xíca tahví i nu ndó cuéntá Jesucristo, xitoho í ña ná a cája ga ndó cuachi tá quiahva cája ñayivi ñuyiví jáchi coo yahvi toho tá nuú ña núu cáhvi ini na caja na. ¹⁸ Mé na cán nandaji xíní túni ná. Ta co cúu ná na jácacu Ndióxi jáchi nachicaji na xíní túni ná nu mé á ta nandaja táhyí na ínima ná. ¹⁹ Co cácahan nuu ná jáchi nayaha va quiahva cája na ña núu xihín ndinuhu ini na. Ta co sáji nuu na nuú yiquí cuñu na tá cúní a caja tá nuú ña núu. ²⁰ Joo tá nandiquehe ndó íchi cuéntá Jesús já najánaḥa nde ndohó ña ná caxoo ndó nuú cuachi tátuhun ña yóho. ²¹ Jáchi naxini johó ndó saḥa mé á ta nandiquehe ndó tuhun ndaa, ña najánaḥa nde nu ndo, ña cáhan saḥa mé á. ²² Sahá ña cán quea ndítahan nu ndó jácaxoo ndó nu tóco ndihi ña núu nasacaja ndó jihna. Jáchi cuachi quea nacaja ndusa xihín ndó ña ná caja ndó ña núu ta játiví a ndohó saḥa ña nandiava íni ndo caja ndó ña núu, ña jándahvi ndohó. ²³ Xíní ñúhú cacuu ndó na nanduu saá ínima xihín xíní túni saḥa ña cúu ndó cuéntá Jesús. ²⁴ Ta xihín ña yóho cuu xinu coo ndó cacuu ndó tátuhun ñayivi saá, na cáa tá quiahva cáa mé á. Ta náha ña mé a ndaa táhyí cúu ndó ñayivi ndaa, na nandivii nu mé á.

²⁵ Sahá ña cán quea a cáhan ga ndó ña tuhún. Ña ndítahan nu ndó caja ndó quea cahan ndó ña ndaa xihín ñani táhan ndó jáchi in nanduu ndihí cuéntá Jesucristo.

²⁶ Ta tá jáa ndo xihín ñayivi coto a cája ndó cuachi jáchi xíní ñúhú yaha yachi ña xójo ini ndó xihín ná. Ta tá sa nahini sa co ndítahan ndacaan ga ña xójo ini ndó xihín ná. ²⁷ Ta a quiahva ndó ñamaní nuú tiñáha sacuaḥa ña ná caja rí ña cúní rí xihín ndo.

²⁸ Ndá na nasacaja cuíhná jihna coto ná a cája cuíhná ga na viti. Ndítahan caja chúun vaḥa na ña ná cuu chindeé na na cámaní ñaha nuu.

²⁹ A cáhan ga ndó tuhun núu. Ña ndítahan nu ndó quea chindeé ndo ñayivi xihín tuhun cáhan ndó. Ta já cuu cuahnu na xihín á ña ná ñeḥe ná ñamaní nu Ndióxi. ³⁰ A cája ndó ña ná cacuéha ínima yii Ndióxi xihín ndo jáchi mé ínima yii Ndióxi cán quea náha ña mé a ndaa cúu ndó cuéntá mé á. Cúu á tátuhun nanani marca Ndióxi ndohó ña náha ña a jándacoo toho a ndohó janda quiahva ná xinu coo quivi tá chí in ndeé va jácacu Ndióxi ndohó.

³¹ Xíní ñúhú tavá xóo ndó tóco ndihi ña núu, ña co sahan ñamaní nu ndó canduu vaḥa xihín táhan ndó. Ta co ndítahan ja ndo xihín ñayivi ta ni co ndítahan cojo ini ndó. Ta co ndítahan cayuhú nu táhan ndó ta ni a cánahá ndó xihín ná. Ña ndítahan caja ndó quea tavá xóo ndó mé ndó nu tóco ndihi ña núu. ³² Ña ndítahan caja ndó quea ná caja vaḥa xihín táhan ndó ta candahvi ini táhan ndó. Ta caja cáhnu ini saḥa táhan ndó tá quiahva nacaja cáhnu ini Ndióxi saḥa ndó saḥa ña nacaja Jesucristo saḥa ndo.

5

Ña ndítahan caja na cúu jahyi Ndióxi

¹ Mé ndó cúu ndó jahyi máni Ndióxi saḥa ña cán quea ndítahan ndihi ini ndó caja ndó tá quiahva cája mé á. ² Xíní ñúhú quihvi ini ndó ñani táhan ndó tá quiahva nacaja Jesucristo. Naquihvi ini a mí ta nandiquiahva mé á quivi a ndica crúxu saḥa yo tátuhun in quítí, rí nasahní na joco na nu Ndióxi. Ta mé a ndaa nasacuu a ña nacajii ini Ndióxi xihín.

³ Co cúní cuni johó i ña cája ndó cuachi tátuhun tá íin in ñayivi xihín ñájihí a yí ñani táhan na á tá cája na ña núu xihín yiquí cuñu na á tá chínúu na ínima ná jatá jjuhún na. Co ndítahan nu ndó caja ndó ña yóho jáchi cúu ndó na cúu cuéntá Ndióxi viti. ⁴ Coto a cáhan ndó ña núu ña coo saḥa. Ta ni a ndítuhún jiquí xihín táhan ndó xihín tuhun núu. Jáchi co cája vaḥa toho ña yóho xohó. Ña ndítahan caja ndó quea ndiquiahva ndó

ndixahvi nu Ndióxi. ⁵ Jáchi sa cánda ini ndó ña ndá na ndúu xihín na co cúu ñájíhí na á yíi ná, á tá cája na ña núu xihín yiquí cuñu na á tá cúu ná na chínúu ínimá jatá jjuhún, mé na cán a ñéhe táhvi toho na cacomí Jesucristo xihín Ndióxi cuéntá saha ná. Jáchi na chínúu ínimá jatá jjuhún cúu ná tátuhun na cája cáhnu yoco. ⁶ A cándúsa ndó cája ndó cuachi cája na jan jáchi cúni na jándahvi na ndohó xihín ña tuhún. Jáchi cúu ná ñayivi sáá ini, na jácojo ini Ndióxi. Ta tandaa quivi jándoho a ini na cán. ⁷ Sahá ña cán queá co ndítahan ndique táhan ndó cája ndó ña núu xihín na jan.

⁸ Mé ndó nasanduu ndó nuú naá ndivaha jihna joo sahá ña in nanduu ndó xihín Jesucristo ndúu ndó nu yehe viti. Sahá ña cán queá ndítahan cája vaha ndó já ná nahá ña mé a ndaa cúu ndó ñayivi mé á, na xíca nu yehe. ⁹ Jáchi tóco ndihi na ndúu nu yehe cája na ndinuhu ña vaha ta xíca ndacú na íchi cuéntá ña ndaa. ¹⁰ Xíní ñúhú jácuaha ndó cája ndó ña cájii ini Ndióxi xihín. ¹¹ A catáhan ndó xihín ñayivi ndúu nuú naá yávi ta a cája ndó ña núu xihín ná, ña co ndáyahvi. Ña ndítahan cája ndó queá jánani ndó na ta nahá tuhun ndó sahá ña núu cája na. ¹² Jáchi chínúu cacahan nuu yo nditúhún yo sahá ña cája jehé na jan. ¹³ Joo tá ná xinu quivi canáha ndihi ña cája na jan já canda ini tóco ndihi ñayivi ña nacaja jehé na. Jáchi tóco ndihi ña ñúhu jehé quee ndihi a nu yehe. ¹⁴ Sahá ña cán queá já cáchi tuhun Ndióxi já:

Xíní ñúhú ndicaxí inún jáchi cúun tátuhun da quíji tañu na naxihí.

Ta tá ná ndicaxí inún já jándiyehé Jesucristo ínimun já ná a cájún cuachi, cáchi tuhun Ndióxi.

¹⁵ Xíní ñúhú candehé vaha ndó ndá quiahva ndítahan cája ndó. A cája ndó tá quiahva cája ñayivi co xíní túni. Ndítahan cacuu ndó ñayivi ndíchí jini. ¹⁶ Xíní ñúhú ndihi ini ndó cája ndó ña cúni Ndióxi jáchi quini ndivaha cáa tiempo viti. ¹⁷ Coto a cája ndó ña tóntó. Xíní ñúhú ndicani vaha ini ndó sahá ña cúni Ndióxi, xitoho í cája ndó. ¹⁸ A jáxini ndó mé ndó jáchi co cája vaha ña jan xihín ndo. Ña ndítahan cája ndó queá quiahva ndó ñamani nu Ndióxi ña ná

jándicutú a ínimá ndo xihín ínimá yíi mé á. ¹⁹ Ta tá ná nditúhún ndo xíní ñúhú ndinuhu ini ndó cája cáhnu ndó Ndióxi, xitoho ndó xihín tuhun cáhan ndó. Xíní ñúhú cata ndó salmo xihín himno xihín canto, ña sahan ínimá yíi Ndióxi nu ndo. Joo xíní ñúhú cacuu a ña quíxi ínimá ndó cája cáhnu ndó Ndióxi. ²⁰ Níi tiempo ndítahan ndiquiahva ndó ndixahvi nu Ndióxi, tátá yo saha tóco ndihi ñaha. Ta cahan ndó quivi Jesucristo, xitoho í tá ná cája ndó ña.

Ña ndítahan cája na sa natandaha

²¹ Ndítahan nu ndó candúsa táhan ndó já ná cuu ndicáhnu Ndióxi sahá ña cája ndó.

²² Ndóhó, najihí ndúu yíi ndítahan candúsa ndó yíi ndo tá quiahva cándúsa ndó Jesucristo, xitoho í. ²³ Jáchi yíi ndó cúu da cómi cuéntá saha ndo tá quiahva cómi Jesucristo cuéntá sahá na ndíco íchi mé á. Ta tóco ndihi na cúu cuéntá mé á cúu ná na ndáca tátuhun yiquí cuñu mé á. Ta mé á queá jácacu a na nuú cuachi. ²⁴ Tá quiahva cája na cúu cuéntá Jesús cándúsa na ña sáhdá mé á nu ná quiahva já ndítahan cája najihí ndúu yíi. Xíní ñúhú cája ndihi na ña cúni yíi na cája na.

²⁵ Ta ndóhó, da ndúu ñájíhí, xíní ñúhú quihvi ini ndó na tá quiahva naquihvi ini Jesucristo na cúu cuéntá mé á tá naxihí a saha ná. ²⁶ Nacaja Jesucristo ña yóho jáchi cúni mé á ña ná nduu na cúu cuéntá mé á ñayivi víi sahá ña nandoo na xihín ticuí ta sahá ña sácú vaha na ña cáchi tuhun Ndióxi. ²⁷ Sahá ña cán queá cuu cayati na nu Ndióxi sahá ña cúu ná ñayivi víi cuéntá mé á, na naquee vaha xihín ña núu, na co jácaquini mé xihín cuachi. Ta viti cúu ná ñayivi yíi nu mé á jáchi co cája ga na cuachi. ²⁸ Ndítahan nuú in dataa quihvi ini da ñájíhí da tá quiahva quihvi ini da yiquí cuñu da jáchi in nanduu na. Tá quihvi ini da ñájíhí da já queá quihvi ini da mé dá. ²⁹ Jáchi ni in tuhún toho ñayivi co cándají na yiquí cuñu na. Ña cája na queá sahan na ña cuxu a ta ndáá vaha na ña ta quiahva já ndáá Jesucristo na cúu cuéntá mé á. ³⁰ Jáchi tóco ndihí mí, na cúu cuéntá Jesús cúu yó java na ndáca yiquí cuñu mé á. ³¹ Sahá ña cán queá cáchi tuhun Ndióxi já: “Tá ná tandaha in dataa já ndítahan quee xóo da nu tátá

náná da já ná ndique táhan da coo da xihín ñájíhí da. Ta já ná nduu ndíví nā tátuhun in túhún jiní ñayivi”, cáchí tuhun Ndióxi. ³² Mé a ndaa yáncá ndivaha cándaá ini tóco ndihi ña yóho. Joo náha nu yo ndá quiahva cúu yó tátuhun yiquí cuñu Jesucristo tá in nanduú xihín á. ³³ Xíní ñúhú ndicuhun ini ndó ña ndítahan quihvi ini in in ndó ñájíhí ndo tá quiahva quihvi ini ndó mé ndó. Ta jári ndóhó, najihí xíní ñúhú caja cáhnu ndó yí ndo.

6

¹ Ndóhó, nā valí xihín nā tacú, xíní ñúhú coo johó ndó nu sáhdá tátá náná ndo chuun nu ndo. Jáchi ña yóho queá cúní Ndióxi caja ndó. ² Xíní ñúhú caja cáhnu ndó tátá ndo ta caja cáhnu ndó náná ndo jáchi jihna ñúhú nasahnda Ndióxi ña yóho nu yó caja í. Ta jatá ña yóho nasahan mé á tuhun a nu yo tá cáchí a já: ³ “Tá ná cajún ña yóho já cuahnu yatún ta quixi cuahá ña vaha nuun.”

⁴ Ta ndóhó, nā ndúu jahyi, a jácojo ndó ini jahyi ndó. Ña ndítahan caja ndó queá jánaḥa vaha ndó nu ná ña ndítahan caja na. Ta jánaḥa ndó nu ná ndá quiahva caca na íchi cuéntá Ndióxi, xitoho í.

⁵ Ta ndóhó, nā naxeen nā caja chúun nu ná xíní ñúhú coo johó ndó nu cáhan xitoho ndó, nā cómí cuéntá saḥa ndo ñuyíví yóho. Ta ndítahan caja cáhnu ndó nā ta cayihví ndó nā. Joo xíní ñúhú caja ndó ña xihín ndinuhu ini ndó jáchi cúu á tátuhun cája chúun ndó nuú Jesucristo.

⁶ Ndítahan nu ndó caja chúun vaha ndó nu ná ta a juú tá ndíta cuití nā sándeḥé nā nu cája chúun ndó saḥá ña cúní ndó candoo vaha ndó nuú nā cán, vaha. Ndítahan caja chúun ndó xihín ndinuhu ini ndó nuú xitoho ndó jáchi cúu á tátuhun cája chúun ndó nuú Jesucristo. Saḥá ña cán queá ndítahan caja ndó ña cúní Ndióxi xihín ndinuhu ini ndó. ⁷ Xíní ñúhú cajii ini ndó ta ndinuhu ini ndó tá cája chúun ndó. Ta ndítahan caja ndó cuéntá ña cája chúun ndó nu Ndióxi ta co cája chúun ndó nuú ñayivi cuití va. ⁸ Jáchi sa cándaá ini ndó ña vaxi quiví xinu yó nuú Jesucristo, xitoho í ndiquehé yahvi saḥá ña vaha nācāja í ñuyíví yóho. Ta coo caja toho

a á cúu yó xitoho á cúu yó nā cája chúun nuú xitoho.

⁹ Ta jári ndóhó va, nā cúu xitoho mozo naxeen ndó jan ndítahan nu ndó caja vaha ndó xihín ná ta co ndítahan jáyihví ndó nā xihín tuhun cáhan ndó xihín ná. Ndítahan ndicuhun ini ndó ña in Jesucristo indiví ta cúu á xitoho mé ndó ta sa mé á cán cúu xitoho nā cája chúun xihín ndo. Ta co sáhní toho a cán mé á saḥa ndá ñayivi in chága saḥa a juú ga inga na jáchi in cúu ndihí nu mé á.

Ndaja caja í quee vaha í xihín ña quini

¹⁰ Ta viti xíní ñúhú caja ndacú ndo mé ndó xihín ndéé cáhnu Jesucristo, xitoho í jáchi in nanduú ndó xihín mé á viti. ¹¹ Xíní ñúhú caja chúun ndó xihín tóco ndihi ndéé sahan Ndióxi nu ndo já ná cuu quee vaha ndó xihín tiñáhá sacuaḥa tá cúní rí jándahvi rí ndohó. ¹² Jáchi a juú xihín ñayivi, nā in yiquí cuñu cáni táhan í, vaha. Ña cáni táhan í xihín cúu táto tiñáhá sacuaḥa, rí xíca nuu nu táchi indiví ta rí cán cúu rí rí cómí cuéntá saḥá ñayivi ndúu nuú naá yávi ñuyíví yóho.

¹³ Saḥá ña cán queá xíní ñúhú caja chúun ndó xihín tóco ndihi ndéé sahan Ndióxi nu ndó já queá ná cuu quee vaha ndó xihín rí quini tá ná xinu rí caní táhan rí xihín ndo. Ta xihín ña yóho cuu candita ndacú ndó tá sa nandihí nācani táhan ndó xihín rí. ¹⁴ Ta candita ndacú ndó xihín ña ndaa ña sahan Ndióxi nu ndo jáchi cúu á tátuhun in cinturón pañi tixi sahan ndéé ndácaan tóco ndo. Ndicuhun ini ndó ña cúu ndó ñayivi ndaa nu Ndióxi. Saḥá ña cán queá cúu á tátuhun ndíxi ndó cotó caa. ¹⁵ Xíní ñúhú canduu tiaḥva ndó caḥan ndó tuhun vaha saḥá Jesús xihín ñayivi jáchi tuhun yóho queá cája ña ná coo vaha ini na xihín Ndióxi. Saḥá ña cán queá cúu á tátuhun yíhi ndó tuhun Ndióxi. ¹⁶ Xíní ñúhú candeé ini ndó Ndióxi já queá ná cuu quee vaha ndó caji nuu ndó nuú ña núu cúní tiñáhá sacuaḥa chindahá rí nu ndo. Saḥá ña cán queá cúu á tátuhun ñéhe ndó in caa jáhdá ña chícájí a ndohó. Ta xihín mé ña yóho cuu candaji nuu nu ndo nuú ña ñéhe ñuhú ita jácana mé rí cán nu ndo. ¹⁷ Ndicuhun ini ndó ña najácaacu Ndióxi ndohó nuú cuachi saḥá ña cán queá cúu á tátuhun ñuhu ndó yíjiní caa. Tá ná caḥan cáxi ndó tuhun

sáhan ínimá yíi Ndióxi nū ndó já quéa cúú á tátuhun ñéhe ndó machiti, ña cúú tuhun Ndióxi. ¹⁸ A jándacoo ndó caca tahví ndó nū Ndióxi. Níi tiempo xíní ñúhú caca tahví ndó nū mé á. Joo ndítahan caca ndó ña jánaħa ínimá yíi mé á nū ndó caca ndó. Xíní ñúhú canduu tiaħva ndó ta a cáva ini ndó ta xíní ñúhú caca tahví ndó saħa tóco ndihi na cúú cuénta Ndióxi. ¹⁹ Ta caca tahví ndó nū Ndióxi saħa mí i viti já ná chindeé Ndióxi yeħe caħan i xihín ñayivi tuhun mé á ta caca tahví ndó nū á ña ná quiaħva mé á ndéa a nuú i já ná cuu caħan i tuhun mé á ña coo naħaxíni na jihna, nduu. Jáchi ña yóho quéa cuu jácacu a na nuú cuachi. ²⁰ Ndióxi quéa naħindahá a yeħe cuħun i caħan i tuhun yóho ta saħa ña xíca i caħan i tuhun yóho ndácaan i vecaa viti. Caca tahví ndó saħa i já ná a cáyhvi i caħan i saħa Jesús nuú ñayivi ndúu yóho tá quiaħva ndítahan nuú i caja i.

Ndíndayí Pablo ñayivi, na cúú cuénta Jesús

²¹ Ñani máni yo, da naní Tíquico mé a ndaa cúú dá da chindeé táhan xihín i chuun Jesucristo, xitoho í. Ta mé dá cán cañeħe da tuhun saħa i tá ná saa da nū ndó já ná candaa ini ndó ndátahvi yáha i. ²² Saħa ña cán chindahá i da nū ndó já ná caxi tuhun da nū ndó ndá quiaħva yáha nde ndúu nde yóho ta xihín ña yóho ná cuu quiaħva da tuhun ndeé ini ndó.

²³ Ña cúni quéa ná caja Ndióxi, tátá yo xihín Jesucristo, xitoho í ña ná coo vaħa ini tóco ndihi ndó, na cúú cuénta Jesús. Ta ná caja mé á ña ná quihvi ini táhan ndó saħa ña cándéé ini ndó mé á. ²⁴ Ta ná jándicutú ndaa mé á ñamañi jata tóco ndihi na quihvi ini Jesucristo, xitoho í xihín ndinuhu ini na. Já ná coo.

Carta nachindahá Pablo nuú na cúu cuéntá Jesús ndúu ñuu Filipos

Carta naçahyí Pablo nuú na cúu cuéntá Jesús ndúu ñuu Filipos nani nasandacaan da vecaa

¹ Yehe cúu Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihi na cúu cuéntá Jesús, na ndúu ñuu Filipos jáchi in nanduu na xihín Jesucristo. Ta cáhyí ri nde carta yóho nuú na sacuaḥa nuú na cúu cuéntá Jesús xihín nuú na chíndeé mé na sacuaḥa veñuhu. ² Xíca tahví i nu Ndióxi, tátá yo xihín nuú Jesucristo, xitoho í ña ná caja cuahá mé á ñamaní xihín ndo ta ná caja mé á ña ná coo vaha ini ndó.

Xíca tahví Pablo nu Ndióxi sahá na cúu cuéntá Jesús

³ Ndíquiahva ndivaha i ndixahvi nu Ndióxi tá ndícuḥun ini i saḥa ndo. ⁴ Níi tiempo tá xíca tahví i nu Ndióxi saḥa ndihi ndo cájii ini i. ⁵ Jáchi janda tá nandiquehe ndó íchi cuéntá Jesús ta janda viti nachindeé ndó yehe cáhan i tuhun Ndióxi xihín ñayivi. ⁶ Naçasáhá Ndióxi cája ña ná nduu ndó ñayivi ndaa nu mé á ta xini vaha i ña jáxinu coo a ña janda quiahva ná xinu coo quiví quixi tucu Jesucristo ñuyiví yóho. ⁷ Cája i cuéntá vaha ndivaha va ndíquiahva i ndixahvi nu Ndióxi saḥa ndo jáchi mé a ndaa quíhvi ndivaha ini i ndohó. Tá quiahva cája Ndióxi ñamaní xihín i quiahva já cája ri a ñamaní xihín mé ndó. Ta coo caja toho a tá ndacaan i vecaa. Ta coo caja toho a tá ná ndiquehe vaha i saḥa tuhun Ndióxi nuú na jutixia á tá caxi tuhun i xihín ñayivi ña mé a ndaa cúu á tuhun Ndióxi, ña cúu jácaacu ñayivi. ⁸ Ta cándaá cáxi ini Ndióxi ña quíhvi ndivaha ini i ndohó tá quiahva quíhvi ini Jesucristo ndohó. ⁹ Xíca tahví i nu Ndióxi ña ná xinu ini ndó quíhvi chága ini ndó ñayivi. Ta ná ndindíchi chága jini ndó ta ná coo chága xini túni ndo. ¹⁰ Já ná cuu caxi ndó ña vaha chága níi tiempo ta xihín ña yóho cacuu ndó

ñayivi ndaa, na co ndójo cuachi tá ná xinu quiví quixi tucu Jesucristo. ¹¹ Ndítahan caja ndó ña vaha xihín ndinuhu ini ndó jáchi xihín ña yóho jánaḥa ndó nuú ñayivi ña mé a ndaa cúu ndó cuéntá Jesús ta xihín ña yóho ndicáhnú ndivaha Ndióxi.

Ná caja í ña cúni Jesucristo xihín ndinuhu ini i

¹² Candehé ndó, ñani mí i, na cúu cuéntá Jesús. Cúni ña ná candaa ini ndó ña ndóho i vecaa yóho. Mé a ndaa saḥa ña ndacaan i vecaa yóho naḥini johu cuahá chága ñayivi tuhun vaha saḥa Jesucristo. ¹³ Tóco ndihi soldado, na ndúu vehe rey yóho xihín java ga ñayivi sa cándaá ndihi ini na ña ndacaan i vecaa saḥa ña ndíco i íchi cuéntá Jesucristo. ¹⁴ Ta saḥa ña naçandaa ini cuahá na cúu cuéntá Jesús ña ndacaan i vecaa yóho, nandindeé ini na caca nuu na cahan na tuhun Ndióxi xihín ñayivi ta co yíhvi na caja na ña jáchi cándeé cáhnú chága ini na Ndióxi viti.

¹⁵ Mé a ndaa ndúu java na xica nuu cáhan tuhun Ndióxi nuú ñayivi saḥa ña cáhíhvi cuití ini na. Ta java na cája na ña jáchi cúni na cayojó na nuú i. Joo mé a ndaa java na cáhan na tuhun Ndióxi saḥa ña cúni na caja na ña vaha. ¹⁶ Joo java na cáhan na tuhun Ndióxi saḥa ña vaha mé cuití va na ta co cája na ña xihín ndinuhu ini na. Ña cúni na caja na quea jáquihvi chága na yehe nani ndacaan i vecaa yóho. ¹⁷ Joo mé a ndaa java na cáhan na saḥa Jesucristo jáchi quíhvi ndusa ini na yehe ta sa cándaá ini na ña nasacu Ndióxi yehe yóho ña ná ndiquehe e saḥa tuhun vaha cáhan saḥa Jesucristo. ¹⁸ Joo co sáhní toho i mí i ndá saḥa cája na ña jáchi cájii ini i tá cáhan na saḥa Jesucristo nuú ñayivi. Ta cájii chága ini i ¹⁹ jáchi cándaá ini i ña quee vaha i nu tóco ndihi ña ndóho i yóho saḥa ña chíndeé ínimá Jesucristo yehe ta saḥa ña xíca tahví ndó nu Ndióxi saḥa i. ²⁰ Cándéé ini i ña a cándoó núu i. Ta ndátí tiahva i chíndeé Ndióxi yehe já ná cuu cáhan i saḥa Jesucristo nuú ñayivi. Xihín ña cáhan i yóho jánaḥa i ndá quiahva cáhnú cúu Jesucristo. Ta co cája toho a á tácu u á naḥihí i jáchi caja cáhnú tá caja cáhnú i Jesucristo. ²¹ Ta nani tácu u íni i ñuyiví yóho cája cáhnú i Jesucristo xihín ndinuhu

ini i. Ta tá ná quivi i já vaha chága ví jáchi cuhun i coo i xihín mé á. ²² Ta cō cándaā ini i ndía vaha chága jáchi tá ná catacu u já cuu ñehē chága íní i cahan i sahá Jesucristo xihín ñayivi. ²³ Ivi joho cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laá xinu coo i coo i xihín Jesucristo. Ta vaha chága ná cuhun i coo i cán a juú ga ña ná coo i ñuyíví yóho. ²⁴ Joo saha mé ndó xíní ñúhú coo tóo chága i ñuyíví yóho. ²⁵ Ta viti cándaā vaha ini i ña coo chága i ñuyíví yóho ña ná chindeé e ndohó catiahva chága ndó tuhun Ndióxi já ná cajji chága ini ndó sahá ña cándéé ini ndó mé á. ²⁶ Sahá ña cán quēa cuu cajji ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

²⁷ Cúni ña ná ndihi ini ndó caja ndó tá quiahva cáchi tuhun vaha cahan sahá Jesucristo. Já quēa tá ná saa i á tá ná a saa toho i coto nihni i ndohó cúni ñehé e tuhun ña in cúu ndihi ndó ta ndúu ndacú ndó cuéntá Ndióxi. Ta cúni ñehé e tuhun ña in cúu ndó ndúcú ndéé ndó cahan ndó tuhun vaha sahá Jesucristo nuú ñayivi ña ná cándéé ini na mé á. ²⁸ Ta coto a quiahva ndó ñamani nuú na ihvi ndó jan ña ná jáyihví na ndohó. Jáchi xihín ña yóho cándaā ini na cán ña xíca na cuahan na nuú ndihi saha ná. Joo mé ndó cándaā ini ndó ña xíca ndó íchi nuú cacu ndaa ínimā ndó caja Ndióxi. ²⁹ Jáchi sahá ña ñacaja Jesucristo ñehē táhvi ndó cándéé ini ndó mé á. Ta quiahva já ñehē táhvi ri ndó ndóho ini ndó sahá ña cándéé ini ndó mé á. ³⁰ In nuú ndóho ini sahá Jesucristo. Sa ñaxini ndó ndá quiahva nandoho ini i jihna. Ta sa ñehē ndó tuhun ndá quiahva ndóho ini i viti.

2

Nanduu Jesucristo ñayivi vatí cúu á Ndióxi

¹ Xíní vaha i ña sahan Jesucristo tuhun ndéé ini ndó ta quíhvi ini a ndohó. Xíní vaha i ña in nanduu ndó jáchi ndácaan ínimā yii Ndióxi ini ínimā ndó. Xíní vaha i ña quíhvi ini táhan ndó ta táhnda ini saha táhan ndó. ² Sahá ña cán quēa ndítahan caja ndó ña ná cajji ndivaha ini i sahá ña in cúu ndihi ndó ta sahá ña quíhvi chága ini táhan

ndó. Ta sahá ña in nanduu ndó ñacaja ínimā yii Ndióxi já in nanduu xíní túni ndó nuú ña cúni ndó caja ndó. ³ Coto a ndúcú cuachi xihín táhan ndó. Ta coto a ndíñehē jícó ndó mé ndó. Ndítahan coo ndísáhnu ini ndó. Ta ndítahan cahan ndó ña cáhnu chága inga ñayivi a juú ga mé ndó. ⁴ Ta cō ndítahan ndihi ini ndó sahá ña vaha mé ndó cuití va. Xíní ñúhú ndihi ri ini ndó sahá ña vaha inga na.

⁵ Xíní ñúhú cahvi ini ndó tá quiahva ñasacahvi ini Jesucristo. ⁶ Jáchi tá quiahva íin Ndióxi quiahva já íin Jesucristo. Ta vatí cúu á Ndióxi joo coo nandaja cáhnu a mé á vatí cuu caja ña, nduu. ⁷ Ña ñacaja Jesucristo quēa ñasacu xóo a tóco ndihi ña cáhnu cúu mé á cán ta ñaquixi a ñacacu a ñuyíví yóho tá quiahva cácu ñayivi. Ta ñasacuu a in dataa, da cája chúun cuéntá xitoho da. ⁸ Tá nandihí nanduu a ñayivi já najánuu a mé á janda quiahva ñasahan mé á quivi a ndica crúxu nuú ñaxihí a tátuhun da cája cuachi quini. ⁹ Sahá ña cán quēa najándindita jícó ndivaha Ndióxi Jesucristo ta ñasahan in quivi á nu á ta quivi Jesucristo yóho quēa cáhnu chága nu tóco ndihi quivi. ¹⁰ Sahá ña cán quēa tóco ndihi na ndúu indiví xihín na ndúu ñuyíví cuni joho na quivi Jesucristo ta já ndaca xítí na nu á. Ta janda na ndúu tixi ñúhu ndaca xítí na nuú Jesucristo ña caja cáhnu na mé á. ¹¹ Anda jáví cahan in in na cán ña cúu Jesucristo xitoho na ta xihín ña yóho ndicáhnu ndivaha Ndióxi, tátá yo.

Na cúu cuéntá Jesús cúu ná tátuhun ñúhu, ña jándiyehē ñuyíví yóho

¹² Candehé ndó ñani mí i, na cúu cuéntá Jesús. Tá quiahva ñacandúsa ndó caja ndó ña ñasahnda i nu ndó tá ñasahin i tañu ndó jan quiahva já ndítahan candúsa chága ndó yehe viti nani íin xíca i nu ndó. Xíní ñúhú ndihi ini ndó caja ndó ña cúni Ndióxi jáchi najácaacu a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhu ini ndó. ¹³ Jáchi Ndióxi quēa cája ña xíca ini ndó cája ndó ña vaha ta chindeé a ndohó cája ndó ña táhan ini mé á xihín.

¹⁴ Ta a cahan cuachi ndó saha tóco ndihi ña caja ndó. Ta ni a ndítuhún ihvi xihín táhan ndó. ¹⁵ Já ná ñaha ña cúu ndó ñayivi

vií, na coó cuachi. Ndítahan caja ndó tá quiahva cája na cúu jahyi Ndióxi, na co cáquini xihín cuachi ña cája ñayivi quini cuéntá ñuyíví yóho. Cúu á tátuhun ndíyihvi ndaa ndó xihín ña vaha cája ndó tá quiahva ndíyihvi ndaa quimi indiví. ¹⁶ Jáchí cáhan ndó tuhun vaha sahá Jesucristo nuú ñayivi já ná cuu catacu na anda ama cáa quívi. Tá ná caja ndó ña yóho já queá cajii ini i xihín ndó tá ná xinu quívi quixi tucu Jesucristo. Jáchí xihín ña yóho candaá ini i ña a juú ña uun nasacuu chuun nacaja i. ¹⁷ Ta vatí ná ndiquiahva i mí i quivi i saha ndo joo cajii tá cajii ini i. Jáchí tá ná quivi i cúu á tátuhun cátahan i xihín ña joço ndó nu Ndióxi sahá ña cándeé ini ndó mé á. Ta sahá ña yóho cajii ini i ta in nuú cajii ini ndihí. ¹⁸ Sahá ña cán queá ndítahan cajii ini mé va ndó já ná cajii ini ndihí.

Sácú ini Pablo chindahá da Timoteo xihín Epafrodito nuú na ñuu Filipos

¹⁹ Ta cúni Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda jáví cajii ini i tá ná candaá ini i saha ndo. ²⁰ Mé a ndaa quíhvi ini da ndohó ta coó ga inga da ñúhu ini saha ndo tá quiahva ñúhu ini yehe saha ndo. ²¹ Jáchí java ga na cúu cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo. ²² Joo sa xini ndó ña cúu Timoteo ta vaha ndivaha ta sa candaá ini ndó ndá quiahva chindeé da yehe nu xica i cáhan i tuhun Ndióxi xihín ñayivi. Cúu dá tátuhun jahyi i jáchí chindeé cuahá da yehe. ²³ Sahá ña cán queá sácú ini i chindahá i da nu ndo tá sa nacandaá ini i ndaja cáa sahá i. ²⁴ Ta cándeé ini i ña quiahva Ndióxi ñamaní nuú i saa yachi mé vi coto nihni i ndohó jan.

²⁵ Cája i cuéntá xini ñúhú chindahá i ñani Epafrodito ña ná ndicó coo tucu da nu ndo jáchí mé ndó nachindahá ndó da nuú i ña ná chindeé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i. ²⁶ Joo viti xica ndivaha ini da cuni ndihi da ndohó. Ndícani ini da saha ndo jáchí nañehé ndó tuhun ña sa naquihvi da. ²⁷ Ta mé a ndaa nandoho da cuehe ta jalóho quivi da, nduu. Joo nacaja Ndióxi ñamaní xihín da ta já

nandivaha da. Ta xihín ña yóho nacaja ri mé á ñamaní xihín yehe ña ná a cácuéha chága ví ini i jáchí sa ín cuaha ña ndóho i viti. ²⁸ Sahá ña cán queá chindahá númí i da ña ná saa quíi dá nu ndo já ná cajii ini ndó cuni tucu ndó da ta xihín ña yóho ndivaha ri ini yehe va. ²⁹ Ndítahan cajii ini ndó ndiquehe ndó da jáchí cúu dá ñani ndó da cúu cuéntá Jesús. Ta ndítahan coo toní ñúhú ndó xihín tóco ndihi na cája tá quiahva cája mé dá. ³⁰ Jáchí mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondóho naquixi nu dá sahá ña nachindeé da yehe jáchí nacaja mé dá ña a cúu caja mé ndó yóho sahá i.

3

Ña ín chága saha nu Ndióxi

¹ Candehé ndó ñani mí i, na cúu cuéntá Jesús. Xini ñúhú cajii ini ndó xihín ña cája Ndióxi. Co cája toho a nu mí i cáhyí i tucu u ña sa nacahyí i nu ndó jihna jáchí chindeé a ndohó. ² Cuéntá coo ndó xihín ñayivi quini, na xica cája ña núu jan. Jáchí jánaha na ña ndítahan cahnda ndó yiquí cuñu ndó ña ná chícaan ndó marca yiquí cuñu ndó já ná cacuu ndó cuéntá Ndióxi. ³ Joo mí co cándúsa í ña cúu yó cuéntá Ndióxi sahá ña sáhdá yo yiquí cuñu í vatí mé a ndaa cúu yó tátuhun na naquihvi marca yiquí cuñu sahá ña cája cáhnu í Ndióxi jáchí ndacaan ínima yii mé á ini ínima yo. Ta viti cájii ini yo sahá ña cúu yó cuéntá Jesucristo. Co cándeé ini ña cája í ⁴ vatí mí i cuu cachi i ña cándeé ini i ñaha nacaja i, nduu. Jáchí nasacaja i ña cáchí ley xihín ndinuhu chága ini i a juú ga inga na. ⁵ Jáchí tá naxinu una quívi nacacu u já nachicaan na marca jan yiquí cuñu i. Ta mí i cúu u da Israel, da naquixi chichi Benjamín. Ta tátá náná i naquixi na chichi Israel ta cáhan nde tuhun hebreo. Ta nasandico i táhan da cúu fariseo, da sácú vaha ley Moisés. Ta nacaja i tóco ndihi ña nasahnda ley Moisés. ⁶ Nasandico cáhnu ndivaha i íchí cuéntá na fariseo cán sahá ña cán queá nacasahá nandicuíta i cája xixi i xihín na cúu cuéntá Jesús. Xihín ndinuhu ini i nacaja i tóco ndihi ña cáchí ley sahá ña cán queá ni in na coo nacuu chícaan na cuachi jatá i saha ley Moisés. ⁷ Tóco ndihi

ña yóho nasacuu a ña náhnu ndivaha nuú i. Joo viti coó sahá ga ña cán nuú i jáchi nasasáhá cándéé ini i Jesucristo. ⁸ Ta mé a ndaa yahvi chága ña cándéé ini i Jesucristo a juú ga tóco ndihi ña nacaja i jihna. Sahá ña cúní candaá chága ini i sahá Jesucristo, xitoho i sahá ña cán queá najándacoo i tóco ndihi ña nacaja i cán. Ta tóco ndihi ña cán cúú á tátuhun xehe ta coó sahá toho a nuú i viti jáchi cúní candico chága i Jesús. ⁹ Ta cúní cacuu u in da in ná nduu xihín Jesucristo. Joo co ndáti i nduu ndaa i nu mé á sahá ña sácú vaha i ley Moisés jáchi xíní vaha i ña cája Ndióxi ña ná nduu ndaa i nu mé á sahá ña cándéé ini i Jesucristo cuití va. ¹⁰ Ña cúní queá candaá chága ini i sahá Jesucristo. Ta cúní ña ná chutú ndaa ínima i xihín ndée Ndióxi, mé ndée ña nacaja ña nanditacu tucu Jesucristo. Ta cúní ndoho ini i tá quiahva nandoho ini mé á tá naxihí a ndica crúxu. ¹¹ Já queá ndáti i xinú coo quiví nditacu u tá ná nditacu na sa naxihí.

Ndítahan nducú ndée yo janda quiahva ná xinú coo í ndiquehé ña quiahva Ndióxi nu yo

¹² Co cúní cachi i ña sa naquee vaha vi. Ni co cúní cachi i ña sa naxinú coo i cúú u in ta ndaa tátuhun cúní Ndióxi. Ña cája i queá ndíhi ini i jáxinú coo i cacuu u in da cája tá quiahva cúní Jesucristo jáchi sahá ña cán najácau a yehe. ¹³ Candehé ndo ñani i, na cúú cuéntá Jesús. Co cúní cachi i ña sa nanduu u tá quiahva cúní mé á. Ña cája ndusa i queá ndíndójó i sahá ña nasacaja i jihna ta ndíhi ini i jáxinú coo i cája i ña sácú ini Ndióxi caja i. ¹⁴ Já caja i janda quiahva ná xinú coo i ndiquehe e ña sácú ini Ndióxi quiahva nuú i sahá ña nacaja Jesucristo. Jáchi cána Ndióxi yehe cuhun i coo i indiví xihín mé á.

¹⁵ Tóco ndihi mé ndó, na sa nandindacú xihín ña cándéé ini ndó Ndióxi, xíní ñúhú cahvi ini ndó tá quiahva cáhvi ini yehe. Ta tá co cáhvi ini ndó tá quiahva cáhvi ini yehe já queá jándiyéhe Ndióxi xíní túní ndo ña ná cajii ini ndó xihín á. ¹⁶ Joo ndítahan nu yo caja i ña ndaa, ña coó najándacoo í cája í anda viti.

¹⁷ Candehé ndo ñani i, na cúú cuéntá Jesús. Ndítahan candehé ndo ndá quiahva cája yehe ña ná caja ndó ña. Ta ndítahan

candehé ndo ndá quiahva cája java ga na sa najánaha nde jáchi nacatiahva na cája na tá quiahva cája mé nde. ¹⁸ Sa cuahá ndivaha tañu nacachi i ña yóho xihín ndó ta viti táhvi ticuú nuú i cáhan tucu u ña xihín ndo. Ndúu cuahá ñayivi ta cáhí na cúú ná cuéntá Jesús joo cája na tátuhun na co cándusa ña naxihí Jesucristo ndica crúxu. ¹⁹ Joo vaxi quiví ndihi saha ná anda ama cáa quiví sahá ña núu cája na jáchi a juú quiahva ndíhi ini ná sahá ña xíxi na. Ta ndíñehe jícó na mé ná sahá ña núu cája na ta chí coo a cáchan nuu ná. Ñaha ñuyiví yóho cuití va cáhvi ini na saha. ²⁰ Joo mí cúú yó ñayivi cuéntá Ndióxi, na canduu indiví xihín mé á. Ta ndáti tiahva i ña quixi Jesucristo, xitoho í chí indiví, mé á jácau mí. ²¹ Ta ndijama mé á yiquí cuñu í, ña nacavitá já ná nduu a tátuhun yiquí cuñu mé á jáchi cáhnu ndivaha cúú á. Ta ndijama mé á mí xihín ndée a jáchi mé á sáhdá chuun nu tóco ndihi ñaha xihín ndée á.

4

Xíní ñúhú cajii ini ndó xihín ña cája Ndióxi xihín ndo

¹ Candehé ndo ñani mí i, na cúú cuéntá Jesús. Xíca ndivaha ini i cuni i ndohó jáchi quíhvi ini i ndohó. Ta cajii ndivaha ini i xihín ndo jáchi co cáchan nuu i saha ndo. Cúní ña ná candico ndacú ndo íchi cuéntá Jesucristo, xitoho í.

² Xíca tahví i nu Evodia xihín nu Síntique ña ná ndique táhan vaha na jáchi in quíhvi cúú ná cuéntá Jesús. ³ Ta xíca tahví i nu mún, da cája chúun tuun xihín i ña ná cajún ñamaní cahún xihín ndíví quiahva i jan ña ná ndique táhan máni ná. Jáchi ndíví na jan nachindeé cuahá na yehe tá naxica nuu i nacahan i tuhun Ndióxi, mé tuhun cúú jácau ñayivi. Ta quiahva já nachindeé ri ñaní, da naní Clemente yehe. Ta java ga da cúú cuéntá Jesús nachindeé táhan na xihín i. Sa ndaa va quiví ná nu libro nu ndaa quiví tóco ndihi na catacu anda ama cáa quiví.

⁴ Níi tiempo ndítahan cajii ini ndó xihín ña cája Ndióxi xihín ndo. Á sa xíní joho ndó. Níi tiempo ndítahan cajii ini ndó. ⁵ Ta xihín ña yóho candaá ini tóco ndihi ñayivi ña cúú

ndó ñayivi vaha ini. Sa nacayati quivi quixi tucu Jesucristo, xitoho í.

⁶ A ndícani nahá ini ndó sahá ni in ñaha. Ña ndítahan caja ndó queá caça tahví ndo nu Ndióxi ní tiempo ta ndicani ndó nu mé á ndaja cáa ña ndóho ndó. Caça tahví ndó nu á ta a ndíndójó ndo ndiquiahva ndó ndixahvi nu mé á. ⁷ Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu candaa ini ñayivi. Ta tá ná caja Ndióxi ña ná coo vaha ini ndó já queá chindeé a ndohó já ná ndindacú ínima ndo xihín xíní túní ndo sahá ña in nanduu ndó xihín Jesucristo.

Xíní ñúhú cahvi ini ndó caja ndó ndinuhu ña vaha

⁸ Jandá ña yóho cuití va cúni cahan i xihín ndo, ñani i, na cúu cuéntá Jesús. Xíní ñúhú cahvi ini ndó sahá ña ndaa ta sahá ña cuu coo toní ñúhú ndó xihín. Ta xíní ñúhú cahvi ini ndó sahá ndaja caja ndó ña ndaa. Ta xíní ñúhú cahvi ini ndó sahá ñaha vií. Ta xíní ñúhú cahvi ini ndó sahá ñaha cuu cajji íní ñayivi xihín, ña cuu cahan vaha na saha. Ta xíní ñúhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

⁹ Caja ndó tóco ndihi ña najánaha i nu ndó caja ndó. Ndítahan caja ndó ña naxini johó ndó nacahan i xihín ña naxini ndó nacaja i. Ta ná coo Ndióxi xihín ndo ta mé á queá caja ña ná coo vaha ini ndó.

Na cúu cuéntá Jesús ndúu ñuu Filipos chindeé na Pablo

¹⁰ Cájji ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó sahá i. Co cúni cachi i ña sa nandindójó ndó sahá i, vaha. Ña cúni i cachi i queá co núná nu ndo chindeé ndó yehe. ¹¹ Co cahan i ña yóho xihín ndó sahá ña ndímaní ñaha nuú i jáchi sa nacatiahva i cájji íní i xihín ña ín nuú i. ¹² Sa xíní coo ndáhví ndivaha i ta sa xíní i coo cuahá ndivaha ñaha nuú i. Nacatiahva i coo ndéé ini i nu tóco ndihi ña quixi nuú i. Sahá ña cán queá ín vaha ini i vatí ín cuahá ña cuxu u á coó a. Ta vatí yójó ñaha nuú i á ndímaní ña nuú i ín vaha ini i. ¹³ Sahan ndéé ini i nu tóco ndihi ña quixi nuú i jáchi Jesucristo queá chindeé a yehe caja i ña.

¹⁴ Joo vaha nacaja ndó jáchi nachindeé ndó yehe tá nandoho ini i sahá ña nandimaní nuú i.

¹⁵ Sa xíní ndó ña in túhún mé ndó, na cúu cuéntá Jesús ndúu ñuu Filipos jan cúu ndó na nachindeé yehe tá naquee e cuahan i chí Macedonia cahan i tuhun Ndióxi, ña cuu jácacu ñayivi. Ta nacaja ndó ña yóho jáchi nacamáni ndó yehe sahá ña nachindeé e ndohó xihín tuhun Ndióxi. ¹⁶ Jáchi tá nasahin i ñuu Tesalónica cán já nachindahá ta nachindahá ndó ñaha nandimaní nuú i. Ta a juú in tañu cuití va nacaja ndó ña. ¹⁷ Co cahan i ña yóho xihín ndo sahá ña cúni ñehe cuití vi ñaha. Ña cúni queá ná chahvi Ndióxi sahá ñamaní nacaja ndó. ¹⁸ Ta viti coó ga ñaha ndímaní nuú i. Jandá yójó johó a nuú i viti xihín tóco ndihi ña nachindahá ndó xihín Epafrodito ñehe da naquixi da nuú i yóho. Tóco ndihi ña nachindahá ndó nuú i yóho cúu á ña cájji ndivaha ini Ndióxi xihín. Cúu á tátuhun jóco ndó in ña támi sahan nu mé á. ¹⁹ Ta Ndióxi, mé a cája cáhnu i chindeé a ndohó ná a ndímaní ga ni in ñaha nu ndo. Jáchi cuahá ndivaha ña cuicá cómi Ndióxi ta quiahva mé á ña nu ndo sahá ña cúu ndó cuéntá Jesucristo. ²⁰ Cáhnu ná cacuu Ndióxi, tátá yo anda ama cáa quivi. Já ná coo.

Ndíndayí Pablo na cúu cuéntá Jesús

²¹ Sahá ña in cúu yó cuéntá Jesucristo chindahá i Ndióxi coo tóco ndihi na cúu cuéntá mé á cán. Ta ñaní, na cúu cuéntá Jesús ndúu xihín i yóho chindahá na Ndióxi coo ndó. ²² Ta jári java ga na cúu cuéntá Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúu na cája chúun vehe da cómi cuéntá sahá ñuu Roma.

²³ Ná caja Jesucristo, xitoho í cuahá ñamaní xihín tóco ndihi ndó. Já ná coo.

Carta nachindahá Pablo nuú na cúu cuéntá Jesús ñuu Colosas

Chindahá Pablo Ndióxi coo na cúu cuéntá Jesús ñuu Colosas

¹ Yehe cúu Pablo, da nandicaxi Ndióxi cacuu u apóstol cuéntá Jesucristo. Ta yóho íin Timoteo, ñaní, da cúu cuéntá Jesús. ² Chindahá nde carta yóho nu ndo, na cúu cuéntá Ndióxi ndúu ñuu Colosas jan. Jáchi cúu ndó na cúu cuéntá Jesucristo, na cándeé cáhnu ini mé á. Ña cúní nde queá ná caja cuaha Ndióxi, tátá yo ñamaní xihín ndo ta ná caja ña ná coo vaha ínimá ndo.

Xíca tahví Pablo sahá na cúu cuéntá Jesús cán

³ Ní tiempo ndiquiahva nde ndixahvi nu Ndióxi, mé a cúu tátá Jesucristo, xitoho í tá xíca tahví nde nu mé á saha ndo. ⁴ Jáchi sa ñañehé nde tuhun ña cándeé ini ndó Jesucristo ta ñañehé nde tuhun ña quíhvi ini ndó tóco ndihi na cúu cuéntá mé á. ⁵ Ta cája ndó ña yóho jáchi sa ñacandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta janda naní naxini johó ndó tuhun vaha cáhan sahá Jesucristo já ñacasáhá cúní ndó cuhun ndó indiví. ⁶ Mé tuhun vaha naxini johó ndó sahá Jesucristo yóho ñacasáhá ndícuíta nuu a nuú ñayivi ta cuahá na sa cándúsa ña ndijáá ní cúu saha ñuyíví. Ta tóco ndihi na cán cája na tá quiahva ñacaja mé ndó tá naxini johó ndó ña quíhvi ini Ndióxi ndohó ta já ñacandaa ini ndó ña mé a ndaa táhyí quíhvi ini Ndióxi ndohó. ⁷ Ña yóho queá najánaha da naní Epafra nu ndo. Mé a ndaa quíhvi ini nde da jáchi in cúu da cája chúun da xihín nde ta mé a ndaa ñacaja chúun da nu mé ndó xihín ndinuhu ini da tá najánaha da ndohó tuhun Ndióxi. ⁸ Ta tá ñaxixi da yóho já ñacaxi tuhun da xihín nde ña cája ínimá yíi Ndióxi ña quíhvi ini ndó na cúu cuéntá Jesús.

⁹ Ta janda naní ñacandaa ini nde sahá ña cája ndó já ñacasáhá xíca tahví nde nu Ndióxi saha ndó ndijáá ní quívi. Ta xíca

tahví nde nu á ña ná naha nu ndo ña cúní mé á caja ndó. Ta xíca tahví nde nu á ña ná quiahva mé á ndaja táhan ña ndichí nu ndo ta ná caja mé á ña ná candaa ini ndó tóco ndihi ñaha cuéntá mé á. ¹⁰ Já queá ná cuu caja ndó tá quiahva ndítahan caja ndó jáchi cúu ndó ñayivi cómí Ndióxi cuéntá saha. Ní tiempo xíní ñuhú caja ndó ña cáji ini mé á xihín. Ta quiahva já xíní ñuhú ñaha ndó ña cája tá cája ndó ña vaha xihín ñayivi ta quiahva já xíní ñuhú candaa chága ini ndó saha Ndióxi. ¹¹ Ta quiahva já xíca tahví nde nu Ndióxi ña ná ndaja ndacú a ndohó xihín ndeé cáhnu ndivaha mé á já queá cuu caja ndeé ini ndó ta já a ndíhi ini ndó tá ná quixi cuahá tondohó nu ndo. Ta cáji ini ndó ¹² ndiquiahva ndó ndixahvi nu Ndióxi jáchi ñasacu tiaha mé á ndohó ña ná ndiquehe ndó ña ñasacu ini mé á quiahva nu tóco ndihi na cúu cuéntá mé á tá ná xinu coo na nu yehe ndivaha nuú cacomí mé á cuéntá saha ná. ¹³ Ñasanduu yó nuú ñaá ndivaha ta cán ñatavá Ndióxi mí ndáha ña quini ta nandiquiahva mé a mí ndáha Jesucristo, jahyi máni á ña ná cacomí a cuéntá saha yo. ¹⁴ Ta mé Jesucristo najácacu a mí tá ñaxihí a ndíca crúxu ta ñacaja cáhnu ini a sahá cuachí.

Jesucristo cúu á jini nu tóco ndihi ñaha

¹⁵ Ta Jesucristo cúu yuhú nuu Ndióxi, ña a cúu cuní tívi ta janda tá cámaní casáhá cavaha Ndióxi ñuyíví yóho sa íin jahyi a, Jesucristo. ¹⁶ Ta sa mé Jesucristo ñacavaha tóco ndihi ñaha ndúu ñuyíví yóho xihín ña ndúu indiví. Ta mé á ñacavaha tóco ndihi ña xíní xihín nuu yo xihín ña a cúu cuní. Ta ñacavaha mé á tátó Ndióxi, ña cómí chuun cuéntá Ndióxi ta ñacavaha java ga tátó a, na íin cuaha ndeé cahnda chuun. Tóco ndihi ña yóho ñacavaha Jesucristo ña ná cacuu a ñaha mé á. ¹⁷ Ta sa íin va mé á tá cámaní cavá sahá saha tóco ndihi ñaha ta cája mé á ña ná cuu canduu tóco ndihi ñaha indiví xihín ñuyíví. ¹⁸ Ta cúu á jini nu tóco ndihi na cúu cuéntá mé á, na cúu tátuhun yiquí cuñu a. Ta mé a cán caja ña ná ndíhvi ñayivi íchi mé á catacu na xihín ndeé a jáchi anda saha ñasahjin mé á ta jihna ñuhú nanditacu tucu a tañu na sa ñaxihí. Ta xihín ña yóho ñaxinu coo a ñanduu a jini nu

tóco ndihi ñaha. ¹⁹ Tá quiahva cáa Ndióxi quiahva cáa ri Jesucristo jáchi já cúní Ndióxi coo. ²⁰ Ta cúní ri Ndióxi ndique táhan máni tucu a xihín tóco ndihi ña nacavaha. Ña cán queá naxihí Jesucristo ndica crúxu já ná cuu ndique táhan máni tóco ndihi ña ndúu ñuyíví xihín indiví xihín Ndióxi.

²¹ Mé ndó nasanduu xíca ndo nu Ndióxi ta naxini ihví ndó a jáchi ndinuhu ña núu nasacahvi ini ndó caja ndó, nduu. Joo viti najándique táhan máni Ndióxi ndohó xihín mé á ²² sahá ña nacaja Jesucristo, jahyi a tá naxihí yiquí cuñu a ndica crúxu. Já nacaja mé á ña ná cuu xinú ndó canduu vií ndó nu á. Ta nandiquiahva mé á ndohó ndáha Ndióxi já ná cacuu ndó ñayivi vií, na coo ga cuachi nu á. ²³ Joo xíní ñúhú candeé cáhnu ini ndó Jesús ta a jándacoo xóo ndó ña ndáti ndó quiahva Ndióxi nu ndo. Jáchi tá naxini johó ndó tuhun vaha sahá Jesucristo já nacandaa ini ndó ña cuu jácaacu a ndohó. Ta sa mé tuhun yóho ndícuíta nuu ndijáá níí cúu sahá ñuyíví ta yehe cúu da chindeé táhan jándicuíta nuu a nuú ñayivi.

Cája chúun Pablo cuéntá na cúu cuéntá Jesús

²⁴ Ta viti cájii ini i jáchi ndóho ini i sahá ndo ta ña cája i queá jáxinu coo i ña nasacu ini Jesucristo ndoho i sahá na cúu cuéntá mé á, na cúu tátuhun yiquí cuñu a. ²⁵ Nandaja Ndióxi yehe ña ná nduu u in da caja chúun nuú na cúu cuéntá Jesús. Jáchi nasahan mé á chuun yóho nuú i ña ná chindeé e ndohó sahá ña jánaha cáxi i tuhun Ndióxi nu ndo. ²⁶ Ta janda tá nacava sahá sahá ñuyíví nasahiin jehé a nuú ñayivi joo viti najánaha Ndióxi nuú na cúu cuéntá mé á ña nasahiin jehé jihna. ²⁷ Ta viti sácú ini Ndióxi nahá nuú na cúu cuéntá mé á ndá quiahva náhnu ñamaní cúní caja mé á xihín na tóho. Ta ña nasahiin jehé cúu ña yóho: ndacaan Jesucristo ini ínimá ndo ta xihín ña yóho vaxi quívi ndicáhnu ndó xihín mé á.

²⁸ Cáxi tuhun nde nuú ndihi ñayivi sahá Jesucristo. Ta jácahan nde na ña ná a cája na cuachi. Ta xihín ndinuhu ini nde jánaha nde nu ná ña ndítahan caja na já ná nduu na ñayivi ndaa nu Ndióxi sahá ña nacaja Jesucristo. ²⁹ Ta ña yóho cúu chuun ndúcú ndéé

e caja i xihín ndéé cáhnu sahan Jesucristo nuú i.

2

¹ Cúní ña ná candaa ini ndó ña ndúcú ndéé e xíca tahví i nu Ndióxi sahá ndó xihín sahá na cúu cuéntá Jesús ndúu ñuu Laodicea. Ta quiahva já ndúcú ndéé e xíca tahví i nu Ndióxi sahá na cúu cuéntá Jesús, na a ñaha cuni táhan xihín i. ² Ndúcú ndéé e xíca tahví i nu Ndióxi sahá ná já ná ndihvi ndéé Ndióxi ini ínimá na ta in ná nduu na sahá ña quíhvi ini táhan na. Ta xíca tahví i nu Ndióxi ña ná candaa vaha ini ná ña ndaa sahá Jesucristo, ña mé a ndaa ndiyahvi ndivaha. Jáchi ña nasahiin jehé jihna najánaha Ndióxi nu ná viti ta ña yóho cúu Jesucristo. ³ Ta mé Jesucristo cándaa ini a tóco ndihi ñaha. Cándaa ini a ndía queá ña núu ta ndía queá ña vaha ta cúní mé á ña ná candaa ri ini mé ví ña jan. ⁴ Cáxi tuhun i ña yóho xihín ndó ná a jándahvi inga na ndohó jáchi ndúu java na ta ndató ndivaha cáhan na joo cúu ná na jándahvi ñayivi. ⁵ Ta vatí coo íin mí i xihín ndo nu ndúu ndó jan joo ñúhu ini i sahá ndo níí tiempo. Ta cájii ini i tá xíní i ña ndúu vií xihín táhan ndó. Ta cájii ini i sándehe e ña coo jándacoo ndó ña candeé ini ndó Jesucristo.

⁶ Tá nandiquehe ndó íchi cuéntá Jesús já nanduu mé á xitoho ndó. Ta viti ndítahan nu ndó caca nuu ndó xihín á ndijáá níí quívi. ⁷ Xíní ñúhú cativi tuun ndó Jesucristo já ná quiahva mé á ndéé á nu ndo. Xihín tuhun Ndióxi ña najánaha nde nu ndó jan ndítahan candeé chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

Íchi saá xíca í viti

⁸ Cuéntá coo ndó ná a jándahvi na ndohó xihín ña tuhún cúní na jánaha na nu ndo. Jáchi nahá ña quíxi a nu Ndióxi joo cúu á ña quíxi jiní mé va na cuití va. Ta cáhan na sahá ña jánaha ñayivi ñuyíví ta coo cúu á ña jánaha Jesucristo nu yo.

⁹ Tá quiahva cáa Ndióxi quiahva já cáa Jesucristo vatí nanduu a in ñayivi. ¹⁰ Ta nandicutú ndaa mé ndó xihín mé á jáchi in nanduu ndó xihín Jesucristo, mé a sáhdá chuun nu tóco ndihi na cómí cuéntá sahá

indiví xihín ñuyiví yóho. ¹¹ Ta sahá ña in nanduu ndó xihín Jesucristo sahá ña cán quea nanduu ndó ñayivi cuéntá mé á ta cúu á tátuhun nachicaan Ndióxi marca ndohó ta co cúu á tátuhun marca chicaan ñayivi yiquí cuñu na. Ña cája Jesucristo quea jácaxoo a mí nuú cuachi já quea ná a cája ga yó ña. ¹² Jáchi tá nacandúta ndo cuéntá Jesucristo já nasacuu a tátuhun naxihi ndó ta nanduxu ndó xihín Jesucristo jáchi najándacoo ndó cuachi nacaja ndó. Ta tá nanditacu mé á nasacuu a tátuhun nanditacu ri mé va ndó xihín á sahá ña cán quea cúu ndó ñayivi saá viti jáchi nacandéé ini ndó ña íin ndéé Ndióxi caja ña ná nditacu Jesucristo. ¹³ Jihna nasacuu ndó tátuhun ndii sahá cuahá cuachi nacaja ndó ta sahá ña coó naxeen ndó caja ndó ña sáhdá Ndióxi. Ta nasacaja ndó tá quiahva cúni mé va ndó jáchi nasacomí cuachi cuéntá saha ndo. Joo viti nacaja Ndióxi ña ná ñehe táhvi ndó catacu ndó xihín Jesucristo ta nacaja cáhnu ini a saha tóco ndihi cuachi ndó. ¹⁴ Nasacomí yo cuachi nu Ndióxi jáchi naquehe núu í ña nasahnda mé á caja í. Ta ndácaan cuachi jata yó nacaja ley joo najándoo Ndióxi cuachi tá naxihi Jesucristo ndica crúxu saha yo. ¹⁵ Ta tá naxihi a ndica crúxu já naquee vaha mé á xihín tiñahá sacuahá ta naquee vaha mé á xihín rí quini, rí sáhdá chuun nuú ñayivi ñuyiví. Ta sahá ña najacacahan Jesús nuu ri nuú ñayivi sahá ña cán quea a cuú chinúu ga rí cuachi jata yó viti. Xihín ña nacaja Jesucristo yóho najánaña Ndióxi nu yo ña a cuú ga caja tiñahá sacuahá ni in ñaha xoho.

Ndítahan ndinducú yo ñaha íin indiví

¹⁶ A quehe ndó cuéntá sahá ñayivi tá ná candehé ndaa na ndohó sahá ña xíxi ndó á sahá ña xíhi ndó. Ta ni a quehe ndó cuéntá tá sáhdéhe ndaa na ndohó sahá ña co cája ndó víco cája mé ná ta ni sahá ña co cája ndó víco quiví cája cáhnu na yoó saá. Ta ni a quehe ndó cuéntá tá sáhdéhe ndaa na ndohó sahá ña co cája cáhnu ndó quivi ndiquehe ndéé na. ¹⁷ Sanahá tá cámaní cacu Jesucristo já nasahnda Ndióxi chuun nuú ñayivi ña ná caja na ley Moisés joo coó chuun a viti jáchi sa najáxinu coo Jesucristo tóco ndihi ña nasahnda ley Moisés. ¹⁸ A

cándúsa ndó ñayivi tá cáchí na xihín ndó ña cuhun ndó indayá sahá ña co cája ndó ña cáchí mé ná. Caja cáhnu na táto Ndióxi ta sahá ña jan ndája tohó ndivaha na mé ná. Ta cáchí na nacahan tívi Ndióxi xihín ná sahá ña cán quea ndíñehe jícó ndivaha na mé ná. Xíní túni na yóho cúu á xíní túni ñayivi ñuyiví cuití va. ¹⁹ Jáchi co xíca tuun na jan xihín Jesucristo, mé a cúu jiní nu mí. Mé á sahan ndéé á nu yo cuahnu í ta jándique táhan mé á mí xihín á tá quiahva nasacu ini Ndióxi.

²⁰ Tá naxihi Jesucristo ndica crúxu já cúu á tátuhun naxihi ndó nuú cuachi, jáchi co cómi ga ñaha ñuyiví yóho cuéntá saha ndó viti. Sahá ña cán quea co ndítahan nu ndó caja ndó tá quiahva cája ñayivi ñuyiví yóho. Co ndítahan caja ndó ña cáchí na xihín ndo tátuhun ña yóho: ²¹ “A tীন toho ndó ña jan. A cáxi toho ndó ña cáa. A cáni ndaa ndáha ndó ña yóho”, cáchí na xihín ndó. ²² Tóco ndihi ña yóho ndihi saha. Tóco ndihi ña cája na yóho cúu á ña sáhdá ñayivi ñuyiví cuití va ta co cúu á ña naquixi nu Ndióxi. ²³ Jáchi tóco ndihi ña jánaña na jan cúu á ña quíxi jiní mé va na vatí ndáa na tátuhun na ndíchí jiní. Ta jánaña na ña ndítahan caja cáhnu ñayivi Ndióxi xihín costumbre nacavaha mé va na. Ta náha na tátuhun ñayivi tohó joo ndíñehe jícó na mé ná. Ta jánaña na ña xíní ñúhú jándoho í yiquí cuñu í joo coó saha toho ña yóho jáchi co chindeé a mí jándihi sahá ña xíca ini yiquí cuñu í caja.

3

¹ Tá nanditacu Jesucristo tañu na sa naxihi cúu á tátuhun nanditacu ndó xihín mé á. Sahá ña cán quea xíní ñúhú ndinducú ndo ñaha cúu cuéntá Ndióxi, mé ñaha quíxi indiví nu íin coo Jesucristo xoo cuáha Ndióxi. ² Xíní ñúhú cáhvi ini ndó sahá ñaha cúu cuéntá Ndióxi ta co xíní ñúhú ndicani ini ndó sahá ñaha ñuyiví yóho. ³ Jáchi mé ndó cúu ndó tátuhun na sa naxihi tá naxihi Jesucristo. Sahá ña cán quea co xíní ñúhú ndiava ini ndó cacomí ndó ñaha ñuyiví yóho jáchi cuhun ndó coo ndó xihín Jesucristo indiví nu íin Ndióxi. ⁴ Ta sahá ña nacaja Jesucristo sahá ña cán quea tácu yo viti ta tá ná canáha nuu Jesucristo ñuyiví yóho já ndacanáha nuu ndó xihín á. Tá

quiahva ndiyehe ndivaha mé á quiahva já ndiyehe ri ndóhó va ta ndicáhnu ndó xihín mé á.

Jihna naxica í ichí cuachi joo viti xica í ichí saá

⁵ Ndítahan jácaxoo ndó nuú cuachi, ña cája ñayivi ñuyíví. Coto a cóo ndó xihín ñayivi, na co cúu ñájíhí ndó á yíi ndó. Ta ni a cája ndó ña núu xihín yiquí cuñu ndó ta ni a cája ndó ña núu, ña xica ini yiquí cuñu ndó caja. Ta ni a chínúu ndó ínima ndó jatá jjuhún ndó jáchi cúu ndó tátuhun na cája cáhnu yoco tá cája ndó já. ⁶ Jáchi vaxi quíví jándoho Ndióxi ini na cája ña yóho sahá ña co xéén na caja na ña cúní Ndióxi. ⁷ Ta janda mé ndó tá naxica nuu ndó ichí cuachi já nacaja ndó ña jan. ⁸ Joo viti xíní ñúhú jándacoo ndó tóco ndihi ña jan: a cójo ga ini ndó xihín ñayivi ta ni a cája ga ndó ña xica ini yiquí cuñu ndó caja ta a cája ga ndó ña núu ta ni a cáhahá ga ndó xihín ñani táhan ndó ta a cáhan ga ndó tuhun quini. ⁹ Ta a cáhan túhún xihín táhan ndó jáchi co cúu ga ndó na nasacuu ndó jihna ta tóco ndihi ña núu nasacaja ndó jihna jan co cómí ga cuéntá saha ndó viti. ¹⁰ Jáchi viti sa nanduu ndó ñayivi saá, na loho loho ndivií chága ínima na cája Ndióxi janda quiahva ná xinu coo ndó nduu ndó tá quiahva cáa Jesucristo ta já candaá vaha chága ini ndó a. ¹¹ Jáchi viti coó sahá ga á tá cúu yó na Israel á tá co cúu yó na Israel, á tá cúu yó na naquihvi marca yiquí cuñu í á tá coó naquihvi marca yiquí cuñu í, á tá cúu yó na toho á tá co cúu toho í na. Ta ni coó saha toho a á tá cúu yó na yucú ñúhú ta ni coó saha toho a á tá cúu yó na cómí xitoho cuéntá saha, á tá cúu yó na xica núná mé. Joo ña ín saha queá tá ná ndiquiahva ndó mé ndó ndáha Jesucristo ña ná cacomí a cuéntá saha ndó jáchi tóco ndihi na cán cúu ná na ndácaan Jesucristo ínima.

¹² Quíhvi ini Ndióxi ndohó ta nacaxi a ndohó ña ná cacuu ndó ñayivi cuéntá mé á. Ta tá quiahva natahnda ini Ndióxi saha ndó quiahva já xíní ñúhú tahnda ini ndó sahá ñayivi. Xíní ñúhú caja vaha ndó xihín ná. Coto a cája cáhnu ndó mé ndó. Xíní ñúhú coo víi ini ndó xihín ñayivi ta a ndihi ini ndó xihín ná. ¹³ Xíní ñúhú coo cáhnu ini xihín táhan ndó. Ta caja cáhnu ini saha táhan ndó

tá yáha nu cája xihín táhan ndó. Tá quiahva nacaja Jesucristo, xitoho í tá nacaja cáhnu ini a saha ndó quiahva já ndítahan caja cáhnu ini saha táhan ndó. ¹⁴ Xíní ñúhú ndicutú ndaa ndó xihín ña quíhvi ini táhan ndó já queá ná cuu canduu in nuú xihín táhan ndó ta já a cúu cahnda java táhan ndó. ¹⁵ Ta ná caja Ndióxi ña ná coo vaha ini xihín táhan ndó já ná caja ndaa ndó xihín ná. Jáchi nasacu ini mé á ña ná caja ndó já ta nacaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

¹⁶ Ta ná ndicutú ndaa ínima ndó xihín tuhun vaha cáhan sahá Jesucristo. Ta xihín tuhun yóho xíní ñúhú jánahá táhan ndó ta xíní ñúhú quiahva tuhun ndeé ini táhan ndó ña ná candaá vaha ini ndó ña. Ta xihín ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihín himno xihín canto ña sahan ínima yíi Ndióxi nu ndó. ¹⁷ Ta tóco ndihi ña cája ndó xíní ñúhú caja ndó ña cuéntá Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña nacaja Jesucristo, xitoho í.

Ndá quiahva ndítahan canduu na cúu cuéntá Jesús

¹⁸ Ndóhó, najihí ndúu yíi, xíní ñúhú coo johó ndó nu cáhan yíi ndó xihín ndó jáchi já ndítahan caja najihí, na cúu cuéntá Jesús. ¹⁹ Ta jári ndóhó, dataa, xíní ñúhú quíhvi ini ndó ñájíhí ndó ta co ndítahan caja ndó ndaja nacuu xihín ná. ²⁰ Ta jári ndóhó va, na valí xíní ñúhú taa johó ndó tóco ndihi ña sáhdá tátá náná ndó nu ndó jáchi ña yóho queá cáji ini Ndióxi xihín. ²¹ Ta jári ndóhó va, na ndúu jahyi, a jácojo quini ndó ini jahyi ndó já queá ná a cávitá ini na caja na ña vaha. ²² Ta ndóhó, na naxeen xitoho caja chúun uun va ndó, xíní ñúhú caja ndó tóco ndihi ña sáhdá xitoho ndó, na ndúu ñuyíví yóho nu ndó. Ta a juú tá ndíta cuití na sánehé na nu cája chúun ndó sahá ña cúní ndó candoo vaha ndó nuú na cúu xitoho ndó cán. Ña xíní ñúhú caja ndó queá caja chúun ndó xihín ndinuhu ini ndó nu ná jáchi cúu ndó na cája cáhnu Ndióxi. ²³ Ndítahan cajji ini ndó caja ndó tóco ndihi ñaha. Ta ndicuhun ini ndó ña nu Ndióxi

cája ndó ña ta cō cúu á nuú ñayivi cuití va. ²⁴ Jáchi sa cándaā ini ndó ña cháhvi Jesucristo nu ndó saha tóco ndihi ña cája ndó. Ta ñehe táhvi ndo cūhun ndo indivi jáchi cája cáhnu ndó Jesucristo, mé á cúu ndusa xitoho ndó. ²⁵ Joo ndá na cája ña núu tandaa quivi ndoho ini na sahá ña núu naçaja na jáchi caja Ndióxi ña ná cháhvi in in na sahá ña naçaja na.

4

¹ Ta jári ndóhó va, na cúu xitoho cō ndítahan jándoho nahá ndó na naxeen ndó caja chúun nu ndó jan. Ndítahan caja vaha ndó xihín ná jáchi vaxi quivi ndiquiahva ri ndóhó va cuéntá nuú Ndióxi, xitoho ndó, ña ín indivi.

² A jándacoo ndó caça tahví ndó nu Ndióxi xihín ndinuhu ini ndó. Ta ndítahan coo tiahva vaha ndó ndiquiahva ndó ndixahvi nu mé á. ³ Caça tahví ndó nu Ndióxi sahá nde ña ná cuná mé á íchi nuú nde cahan nde tuhun vaha sahá Jesucristo, mé tuhun naçahin jehé anda viti. Ta saha mé ña yóho ndácaan i vecaa viti. ⁴ Caça tahví ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i caja i.

⁵ Cō ndítahan caja ndó ña yóho á ña cāa nuú na cō cúu cuéntá Jesús. Ta xíní núhú ndihi ini ndó cahan ndó tuhun Ndióxi xihín ná. ⁶ Tóco ndihi ña cáhan ndó xíní núhú cacuu a ña vaha, ña cuu cajii ini Ndióxi xihín. Ta xíní núhú candaā ini ndó ndaja caja ndó nducú ñehe vaha ndó tuhun nuú ñayivi.

Ndindayí Pablo na ndúu ñuu Colosas

⁷ Chindahá i da naní Tíquico nu ndó jan já ndicani da sahá i nu ndó. Mé da cúu ñani máni yo ta xihín ndinuhu ini da in cúu dá cāja chúun da xihín i. ⁸ Chindahá i da saa da nu ndo já ná çaxi tuhun da xihín ndo ndá quiahva ndóho nde yóho. Ta chindahá i da já ná quiahva da tuhun ndeé ini ndó. ⁹ Ta chindahá ri ñani máni yo Onésimo, da ndíco cáhnu íchi cuéntá Jesús cuahan xihín dá ta mé Onésimo yóho cúu da ñuu ndó jan. Ta mé dá xihín Tíquico çaxi tuhun da nu ndó ndaja cándo nde janda viti.

¹⁰ Aristarco, da ndácaan vecaa xihín i chindahá da Ndióxi coo ndó. Ta jári Marcos, da cúu ñani cuachí Bernabé chindahá

da Ndióxi coo ndó. Ta sa naçaxi tuhun i xihín ndo ndá quiahva ndítahan caja ndó xihín Marcos tá ná saa da coto nihni da ndóhó. Xíní núhú ndiquehe vaha ndó da.

¹¹ Ta jári da naní Jesús, da naní tucu Justo chindahá da Ndióxi coo ndó. Janda ndihuni na yóho cuití va cúu na cuéntá Jesús, na naquixi chichi Israel cāja chúun na xihín i tá xíca nuu nde cáhan nde nuú ñayivi ña cómi Ndióxi cuéntá saha ná. Ta mé a ndaa nachindeé cuaha ndihuni na cán yehe. ¹² Ta jári Epafras, da ñuu ndó jan chindahá da Ndióxi coo ndó. Mé da cán cúu dá da cāja chúun cuéntá Jesucristo. Ta ní tiempo xíca tahví da nu Ndióxi saha ndó xihín ndinuhu ini da já ná candita ndacú ndó ta ná ndiquiahva ní ndo mé ndó caja ndó ña cūni Ndióxi. ¹³ Ta xíní i xihín nuú i ndá quiahva ndihi ini Epafras xíca tahví da nu Ndióxi saha ndo ta sahá na cúu cuéntá Jesús ndúu ñuu Laodicea xihín na ndúu ñuu Hierápolis viti. ¹⁴ Lucas, da cúu doctor maní yo chindahá da Ndióxi coo ndó. Ta jári Demas chindahá da Ndióxi coo ndó.

¹⁵ Caahan Ndióxi ndó xihín na cúu cuéntá Jesús, na ndúu ñuu Laodicea ta cahan Ndióxi ndó xihín ña naní Ninfas ta xihín tóco ndihi na cúu cuéntá Jesús táca vehe ña. ¹⁶ Ta tá nandihí naçahvi ndó carta yóho caja ndó ñamaní chindahá ndó ña ná cūhun a nuú na cúu cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña nachindahá i nuú na cán. ¹⁷ Ta caja ndó ñamaní çaxi tuhun ndó nu Arquipo ña xíní núhú ndihi ini da caja chúun vaha da chuun naçahan Ndióxi nu dá caja da.

¹⁸ Ta yehe, da cúu Pablo cáhyi i java tuhun yóho nu ndó xihín ndahá i ña ná chindahá i Ndióxi coo ndó. Xíní núhú ndicūhun ini ndó ña ndácaan i vecaa. Ta ña cūni quéa ná caja cuaha Ndióxi ñamaní xihín ndo. Já ná coo.

Carta nu cuití naçahyí Pablo nuú na cúu cuéntá Jesús ñuu Tesalónica

Pablo xihín da xíca xihín dá chíndahá da Ndióxi coo na cúu cuéntá Jesús ñuu Tesalónica

¹ Yehe cúu Pablo, da cáhyí carta yóho xihín Silvano xihín Timoteo ta chíndahá i ña nuú ndihi ndó, na cúu cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. Ná caja Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

Cándeé cáhnu ini na Tesalónica Jesús

² Já cuití ndíquiahva nde ndixahvi nu Ndióxi sahá ndihi ndó. Ta co ndíndójó nde xíca tahví nde nu mé á saha ndo. ³ Ndíquiahva nde ndixahvi nu Ndióxi, tátá yo saha ndo jáchi cándeé cáhnu ini ndó mé á. Ta sahá ña quíhvi ini ndó mé á sahá ña cán queá cája chúun vaha ndó cuéntá mé á. Sahá ña cándeé ini ndó Jesucristo ña quixi tucu a ñuyiví yóho sahá ña cán queá cája ndeé ini ndó tá ndóho ini ndó. ⁴ Cuni johó vaha ndó, ñani mí i, na cúu cuéntá Jesús. Sa xíní nde ña quíhvi ini Ndióxi ndohó ta naçaxi a ndohó cacuu ndó cuéntá mé á. ⁵ Tá naçaxi tuhun nde tuhun vaha sahá Jesús nu ndo a juú tuhun uun naçahan nde xihín ndo. Naçahan nde mé tuhun xihín ndeé ña naçahan ínima yíi Ndióxi nuú nde. Ña cán queá sa xíní ndo ña ndaa cuití va naçahan nde xihín ndo. Ta sa xíní vaha ndó ña naçaja ndaa nde tá naçanduu nde xihín ndo jáchi cúní nde chindeé nde ndohó.

⁶ Andá javí naçasahá ndó cája ndó ña naçaja mé nde xihín ña naçaja Jesucristo. Jáchi nandiquehe vaha ndó ña najánaha nde nu ndo. Ta vatí nandoho ndivaha ini ndó joo naçavatá ndo naçaja ínima yíi Ndióxi. ⁷ Ta tá nandihí nanduu ndó na jánaha nu tóco ndihí na cúu cuéntá Jesús, na ndúu estado Macedonia xihín estado Acaya ña ndítahan caja na. ⁸ Ta a juú Macedonia xihín Acaya cuití va vaha jáchi ndijáá

ñuu nandicuita nuu tuhun vaha sahá Jesús naçaja ndó. Ña cán queá sa xíní tóco ndihí ñayivi ña cándeé cáhnu ini ndó Ndióxi. Ña cán queá ndá ñuu cása nde cáxi tuhun na cán nuú nde saha ndo chí co xíní ñuhú ga nde cahan nde saha ndo nu ná. ⁹ Ta viti tóco ndihí na cán cáxi tuhun na nuú nde ndaja nandiquehe vaha ndó tuhun naçahan nde xihín ndo tá naçanduu nde xihín ndó ñuu Tesalónica cán. Ta cáxi tuhun na ndaja nandijama ndó tá nandicoo ndó ña cája cáhnu ndó yoco jáchi viti cája cáhnu ndó Ndióxi cuití va. Ta cáxi tuhun na ndaja nandicoo coo ini ndó ta naçasahá ndo cája chúun ndó cuéntá Ndióxi, mé a cája ña ndaa cuití va, ña tácu a íin a indiví viti. ¹⁰ Ta cáxi tuhun na nuú nde ndá quiahva ndáti ndó ndicó coo Jesucristo quixi a indiví, mé a cúu jahyi Ndióxi. Ta Ndióxi najánditacu a Jesús, mé á jácaacu mí ná a ndóho ini tá ná xínu quiví caja víi Ndióxi sahá cuachi ñayivi.

2

Chuun naçaja Pablo tá naçahiin da ñuu Tesalónica

¹ Ta sa xíní ndihí ndó, ñani mí i, na cúu cuéntá Jesús ña coo naçasa uun va nde ñuu Tesalónica jan jáchi nandiquehe vaha ndó tuhun Ndióxi. ² Joo tá cámani saa nde ñuu ndó jan sa xíní ndo ndaja naçaja xíxi na ñuu Filipos xihín nde ta naçanahá na xihín nde. Joo tá naçasa nde ñuu ndó naçahan ndeé ini nde naçaja Ndióxi já naçaxi tuhun nde tuhun vaha saha Jesús nu ndo vatí ndúu cuahá na co cúní ndehe. ³ Ta coo naçahan nde ña tuhún xihín ndo jáchi tuhun ndaa cuití va cúu ña najánaha nde nu ndo. Ta coo naçahvi núu ini nde ta coo najándahvi nde ndohó. ⁴ Joo naçaxi Ndióxi ndehe ta naçahnda mé á chuun nuú nde ña ná caxi tuhun nde tuhun vaha saha Jesús nuú ñayivi. Ta vatí co táhán ini ñayivi xihín ña cáhan nde joo coo nandijama toho nde ña. Jáchi Ndióxi queá sándehe ínima yo ta táhán ini a xihín ña cáhan nde. ⁵ Sa xíní vaha ndó naçahan ndaa nde xihín ndo ta coo naçahan chíjín nde xihín ndo. Ta coo najándahvi nde ndohó sahá jihún. Joo xíní ndaa táhyí Ndióxi ña ndaa cuití va naçahan nde xihín ndo. ⁶ Ta sa xíní

vaha ndó ña ni tañu mé ndó ta ni tañu java ga ñayivi coó nandinducú nde ña ná caja cáhnu ñayivi ndehe vatí ín saha nde cahnda nde chuun nu ndo jáchi cúu nde na apóstol nachindahá Ndióxi nu ndo. ⁷ Joo nacaja vii nde xihin ndo tá quiahva ndáa vaha in ñañaáha jahyi ná. ⁸ Ta cúni ndivaha nde ndohó ña cán queá nacaxi tuhun nde tuhun vaha sahá Jesús nu ndo. Ta ín tiahva nde quivi nde saha ndo jáchi quíhvi ini nde ndohó. ⁹ Ñani nde, na cúu cuénta Jesús, á co ndícuhun ini ndó ndá quiahva nacaja nde tá nasanduu nde xihin ndo cán. Ñuu tá ndiví nacaja chúun nde já ná cuu चाहvi nde sahá ña xíxi nde. Jáchi co cúni nde jáquihvi nde ndohó nani cáxi tuhun nde tuhun vaha sahá Jesús nu ndo.

¹⁰ Ta sa xíni ndaa táhyi ndihi ndó, na cúu cuénta Jesús ña nacaja vaha nde xihin ndo ta cuu cahan ndó saha nde. Ta xíni táhyi Ndióxi ña nacaja ndaa nde xihin ndo ta nacaja vii nde xihin ndo ña cán queá a cuú chicaan ñayivi cuachi jatá nde. ¹¹ Sa xíni vaha ndó ndaja najacahan nde in in ndó ta ndaja nasahan nde tuhun ndeé ini ndó ña ná candico cáhnu ndó íchi cuénta Jesús. Tátuhun cája in dataa xihin jahyi da já nacaja nde xihin ndo. ¹² Ta nasahnda nde chuun nu ndo caja ndó ña cúni Ndióxi jáchi cúu ndó cuénta mé á. Mé Ndióxi, mé a sáhdá chuun indiví, mé a cán queá nacaxi a ndohó cahnda ndó chuun xihin á. Mé á cúu á in Ndióxi cáhnu ndivaha ta ndaja cáhnu mé á ndohó xihin á.

¹³ Ña cán queá níi tiempo ndíquiahva nde ndixahvi nu Ndióxi jáchi nandiquehe vaha ndó tuhun Ndióxi ña nacaxi tuhun nde nu ndo. Tá naxini johó ndó ña já nacandaa ini ndó ña cúu á tuhun Ndióxi ta co cúu á tuhun ñayivi ñuyívi. Ta mé a ndaa cúu á tuhun Ndióxi jáchi tá naxini johó ndó ña já queá najándicoo ndó cuachi cája ndó sahá ña cándéé ini ndó Jesús. ¹⁴ Anda javí mé ñayivi ñuu ndó nacasahá na jándoho na ini ndóhó, ñani mí i ta nacaja xíxi na xihin ndó. Ta quiahva já nandoho na cúu cuénta Jesús estado Judea. Jáchi na Israel, na ndúu estado Judea nacaja xíxi na xihin ná. ¹⁵ Jihna nasahní java na Israel na profeta cuénta Ndióxi. Ta quiahva já nasahní

java ri na Israel Jesucristo, xitoho í. Ta viti java na Israel cája xíxi na xihin nde ta nataxí na ndehe veñuhu. Co cájii ini Ndióxi xihin ná jáchi cándají na tóco ndihi ñayivi. ¹⁶ Ta coó nasahan na ñamaní nuú nde caxi tuhun nde tuhun vaha sahá Jesús nuú ñayivi, na coó naquixi chichi Israel ña ná jácacu Ndióxi na. Ta sahá ña yóho nandicuahá cuachi na nu Ndióxi ta sahá ña cán queá xójo ini a xihin ná ta viti naxinu coo hora jándoho a ini na.

Cúni Pablo coto nihni tucu da ñayivi ñuu Tesalónica

¹⁷ Ñani mí i, na cúu cuénta Jesús, tá nandihí naquee nde ñuu ndó jan já nandicuhun ini nde saha ndo. Ñuhu ini nde saha ndo vatí co xíni nde ndohó xihin nuú nde. Ta ndiáva ini nde ndicó coo nde ñuu ndó coto nihni nde ndohó. ¹⁸ Nasacu ini nde saa nde nu ndo. Ta yehe, da cúu Pablo cuahá tañu nacacúni saa i ñuu ndó joo tiñahá sacuahá nasaji nuu ri nuú i sahá ña cán queá coó nacuu saa i jan. ¹⁹ Ndá saha queá cándéé ini nde ndohó ta ndá saha queá cájii ini nde ta ndá saha queá coo vaha ini nde tá tandaa quivi quixi tucu Jesucristo ñuyívi yóho. Sahá ña ndico ndo íchi cuénta Jesucristo, xitoho í sahá ña cán queá cájii ini nde. ²⁰ Mé a ndaa ín vaha ini nde ta cájii ini nde cája ndó.

3

¹ Ta sahá ña cúni ndivaha i candaá ini i ndaja ndúu ndó cán sahá ña cán queá nasacu ini i candoo in tálaá mí i ñuu Atenas. ² Ta nachindahá i ñaní Timoteo, mé da cája chúun xihin nde cuénta Ndióxi cáxi tuhun da tuhun vaha sahá Jesucristo nuú ñayivi. Nachindahá i da saa da coto nihni da ndohó já queá jácahan da ndohó ña ná coo ndacú chága ínima ndó nu Ndióxi ta ná chindeé da ndohó cándéé cáhnu chága ini ndó Ndióxi. ³ Jáchi cúni nde ña ná coo ndacú ini ndó ná a jándicoo ndó íchi cuénta Jesús vatí cája xíxi ñayivi xihin ndo. Jáchi sa xíni vaha ndó ña ndítahan nu yo ndóho tá ndóho ini sahá Jesucristo. ⁴ Á co ndícuhun ini ndó tá nasanduu nde xihin ndo nacaxi tuhun nde nu ndo ña vaxi quivi ndoho ini saha mé á. Ta viti sa xíni ndó ña nayaha

ñā naçahan nde xihin ndo. ⁵ Sahá ñā coó nañehé e tuhun saha ndo sahá ñā cán quea nachindahá i Timoteo nu ndo ná cañehe da tuhun saha ndó quixi a nuú i já ná candaa ini i á mé a ndaa táhyí ndíco cáhnu ndó íchi cuéntá Jesús. Jáchi nayihví i ñā jándahvi tiñahá sacuaḥa ndohó. Ta tá ná quee vaha tiñahá sacuaḥa xihin ndo, nduu já quea mé a uun quea naçahan nde tuhun Ndióxi xihin ndo.

⁶ Joo viti chá va naquixi Timoteo yóho tá nandihí naxito nihni da ndohó jan. Ta nañeḥe dá tuhun vaha saha ndo ñā cándéé ini ndó Jesucristo ta quihví ini táhan ndó. Ta cáchi da ñā ñúhu ndivaha ini ndó sahá nde. Ta xíca ndivaha ini ndó cuni ndó ndeḥe tá quiahva xíca ndivaha ini nde cuni nde ndohó. ⁷ Cándehé ndó, ñani i. Vatí ndóho ndivaha ini nde yóho joo nasahan ndeé ini nde jáchi nañehé nde tuhun ñā cándéé cáhnu ini ndó Jesús ta ndíco cáhnu ndó íchi cuéntá mé á. ⁸ Ta nandivaha ini nde jáchi cándaa ini nde ñā ndacú ín ini ndó xihín Jesucristo, xitoho í. ⁹ Ta co ñeḥe ga nde ndá quiahva ndiquiahva nde ndixahvi nu Ndióxi saha mé ndó jáchi cájii ndivaha ini nde naçaja ndó. ¹⁰ Chí ñuú ta ndiví xíca tahví nde nu Ndióxi ñā ná quiahva ñamaní nuú nde saḥa nde coto nihni nde ndohó jáchi cúni nde xinu coo nde jánaḥa chága nde tuhun Ndióxi nu ndo já ná cándéé cáhnu chága ini ndó mé á.

¹¹ Ñā cán quea xíca tahví nde nu Ndióxi, tátá yo xihin Jesucristo, xitoho í ñā ná chindeé a ndeḥe saḥa nde nu ndo coto nihni nde ndohó. ¹² Ta ná caja Ndióxi ñā ná quihví chága ini táhan ndó. Ta ná chutú ndaa ini ndó xihín ñā quihví ini ndó tóco ndihí ñayivi tá quiahva quihví ini nde ndohó. ¹³ Ta ná caja Ndióxi ñā ná coo ndacú ínima ndo nu mé á. Ta ná jándoo a ínima ndo já ná coo víi a nu mé á tá ná quixi tucu Jesucristo ñuyiví xihín ndihí na cúu cuéntá mé á.

4

Ñā ndítahan nu yo caja í já ná tahan ini Ndióxi xihin yo

¹ Cuni johó vaha ndó ñani mí i, na cúu cuéntá Jesús. Jihna najánaḥa nde ndohó ndaja ndítahan caja ndó já ná tahan ini

Ndióxi xihin ndo. Ta xíni nde já caja ndó anda viti. Xihin ndeé sahan Jesucristo nuú nde xíca tahví nde nu ndo ta sáhdá nde chuun nu ndo ñā ná a jándicoo ndó caja ndó ñā najánaḥa nde nu ndo.

² Sa xíni vaha ndó ñā sáhdá nde chuun nu ndó jáchi nasahnda Jesucristo, xitoho í chuun nuú nde çahan nde ñā yóho xihin ndo. ³ Ñā cúni Ndióxi quea ná coo víi ínima ndó nu mé á ta ná a caja ndó cuachi ñā coo ndó xihín najihí á taa, na coo cúu ñájihí ndo á yíi ndo. ⁴ Ñā cúni Ndióxi quea ná tandaha ndó xihín in tálaá ñañaḥa. Ta ná coo víi ndó xihin ñā ta ná caja cáhnu ndó ñā. ⁵ Ta ná a ndiáva ini ndó caja núu ndó xihin ñā tá quiahva caja ñayivi, na coo xíni Ndióxi. ⁶ Co ndítahan caja ndó cuachi xihin ñájihí ñani táhan ndó jáchi xihín ñā yóho jándahvi ndó yíi ñā. Ta jándoho ndivaha Ndióxi ini tóco ndihí na caja já. Ta sa xíni vaha ndó ñā yóho jáchi naçaxi tuhun nde ñā nu ndó jihna. ⁷ Jáchi coo naçana Ndióxi mí ñā ná caja í cuachi. Naçana mé á mí jáchi cúni a ñā ná cacuú ñayivi yíi, na ín víi ínima. ⁸ Ta ndá na coo cúni cuni johó ñā jánaḥa nde já quea cándaa ini ndó ñā a juú ndeḥe cuití va cándají na. Jáchi quehe núu na Ndióxi sahá ñā coo caja na ñā cúni mé á. Ta Ndióxi quea nasahan ínima yíi mé á nu yo cañuhu a iní.

⁹ Sa najánaḥa va Ndióxi ndohó ndá quiahva ndítahan quihví ini táhan ndó, na cúu cuéntá Jesús. Sahá ñā cán quea nu carta yóho coo ndítahan çahví tucu u ñā nu ndo. ¹⁰ Ta sa xíni víi ñā mé a ndaa quihví ini ndó tóco ndihí na cúu cuéntá Jesús ndúu estado Macedonia. Joo xíca tahví i nu ndó, ñani mí i ñā ná quihví chága ini ndó na. ¹¹ Xíni ñúhú nducú ndo coo vaha ini ndó xihín ndihí ñayivi. Ta nducú ndo coo ndisáhnu ini ndó. Ta ndítahan nu in in ndó caja ndó chuun mé ndó jáchi já najánaḥa nde nu ndó jihna. ¹² Ta tá ná caja chúun vaha ndó já quea çahan vaha ñayivi, na coo cúu cuéntá Jesús saha ndo. Ta tá ná caja chúun vaha ndó já quea a ndímaní ni in ñaha nu ndo catacu ndó.

Vaxi quiví quixi tucu Jesucristo ñuyiví yóho

¹³ Ta viti cúni nde ndicani nde nu ndó, ñani i, na cúu cuéntá Jesús ñā ná candaa

vaha ini ndó ña ndaa sahá ñayivi, na sa naxihí. A cácuéha ini ndó saha ná tá quiahva cája ñayivi, na co cándeé ini Ndióxi. ¹⁴ Tá quiahva cándusa nde ña naxihí Jesucristo ta nanditacu tucu a quiahva já cándusa nde ña jánditacu tucu Ndióxi na sa naxihí, na nasandeeé ini mé á tá nasatacu na. Caja Ndióxi ña ná quixi na cán xihín Jesús tá ná quixi tucu a ñuyiví yóho.

¹⁵ Ña cán quéa cáhan nde ña yóho xihín ndo ta cúu á ña najánaha Jesucristo, xitoho í nuú nde. Tá ná quixi tucu mé á ñuyiví yóho ndiquehe a mí já quéa a cühun toho jihna ñúhú na tácu ñuyiví yóho jáchi jihna ñúhú ndindita na sa naxihí. ¹⁶ Jihna ñúhú nuu Jesucristo quixi tucu a ñuyiví yóho. Ta mé já cayuhú a cahnda a chuun nuú ndihi ñayivi. Já cayuhú tátó sacuahá Ndióxi ta ndahyi trompeta Ndióxi. Já nditacu nu cuití na sa naxihí, na cándusa Jesucristo. ¹⁷ Anda jáví tóco ndihi mí, na tácu ndique táhan í xihín na nanditacu nu cuití ta cañehe Ndióxi mí tañu vico. Já ndique táhan í xihín Jesucristo, xitoho í nu táchi ta já coo í xihín mé á anda ama cáa quivi. ¹⁸ Sahá ña cán quéa ndítahan nu ndó quiahva tuhun ndeé ini táhan ndó xihín tuhun yóho.

5

¹ Candehé ndo, ñani i, na cúu cuéntá Jesús. Co xini ñúhú cahyí i nu ndo saha ndá ama quixi tucu Jesucristo ñuyiví yóho. ² Jáchi cándaá vaha ini ndó ña mé quivi co cáhan yo quixi Jesucristo ñuyiví yóho já quixi mé á. Tá quiahva jonáá cuití va xinu in da cuihná tá ñuú quiahva já jonáá xinu Jesucristo ñuyiví yóho. ³ Tá ná cáhan ñayivi sa ndúu vaha ndivaha na ta ni in ñaha a cúu yihví na anda jáví jonáá xinu ña ndoho ndivaha ini na. Tá quiahva jonáá xinu ña sáhdá a tixi in ñáñáha tá cuni cacu jahyi ña quiahva já xinu quivi ndihi saha ná. Ta ni in na a cuú cacu toho. ⁴ Joo mé ndó, ñani mí i, na cúu cuéntá Jesús co ndúu ga ndó nuú naá sahá ña cándaá ini ndó ña quixi tucu Jesucristo ñuyiví yóho. Ta vatí catóntó ndo tá ná xinu in da cuihná nu ndo joo co ndítahan catóntó ndo tá ná quixi tucu Jesucristo. ⁵ Jáchi tóco ndihi ndó, na cándeé ini Jesucristo ndúu ndó nu yéhe sahá ña xica ndó íchi cuéntá Jesús. Co

xica toho ndó íchi nuú naá nu xica ñayivi ñuyiví, na co cándeé ini Jesucristo. ⁶ Sahá ña cán quéa ndítahan coo tiaha í candatí quixi Jesucristo ta a cúju yo tá quiahva cája java ga ñayivi. Ña ndítahan caja í quéa cañuhu táhyí ini xihín tóco ndihi xini túni yo candatí xinu Jesucristo. ⁷ Jáchi na quiji, quiji na tá ñuú ta na xihí, xihí na tá ñuú. ⁸ Joo mí sa xica í nu yéhe ta ndítahan cañuhu táhyí ini. Ndítahan nu yó chindeé yo mí. Tá cándeé ini Jesucristo ta tá quihvi ini táhan í já cúu á tátuhun ndixi yo cotó caa. Tá ndatí quixi tucu Jesucristo jácacu a mí já cúu á tátuhun ñúhu ndó yijini caa. ⁹ Jáchi coo nacaxi Ndióxi mí ndicuehe a xihín yo jáchi naxihí Jesucristo, xitoho í sahá cuachí sahá ña cuni a jácacu a mí ná a cühun yo indayá. ¹⁰ Naxihí Jesucristo saha yo ta tá tácu yo á sa naxihí yo mé quivi quixi tucu a ñuyiví yóho já quéa cañehe a mí cohó coo í xihín mé á anda ama cáa quivi. ¹¹ Ña cán quéa quiahva tuhun ndeé ini táhan ndó ta chindeé táhan ndó tá quiahva sa cája ndó.

Ndicani Pablo nuú na cúu cuéntá Jesús ña ndítahan caja na

¹² Ta viti xica tahví nde nu mé ndó, na cúu cuéntá Jesús ña ná caja cáhnu ndó ñayivi, na caja chúun tañu ndó jáchi ndáca na ndohó íchi cuéntá Jesucristo, xitoho í ta jánaha na tuhun Ndióxi nu ndo. ¹³ Ndítahan coo toní ñúhú ndo xihín ná ta quihvi ini ndó na xihín ndinuhu ini ndó jáchi cája chúun na cuéntá Ndióxi tañu ndó. Coo vaha ini ndó xihín ñani táhan ndó.

¹⁴ Xica tahví nde nu ndó ña ná jánani ndó ndá na co cuni caja chúun. Quiahva ndó tuhun ndeé ini ndá na cácuéha ini. Chindeé ndó ñayivi, na vitá ini xihín tuhun Ndióxi. Ta coo cáhnu ini ndó xihín ndihi ñayivi.

¹⁵ Candehé ndo. A ndúcú ñehe ndó ña núu cája inga na xihín ndo. Ta ndinducú ndo caja vaha xihín táhan ndó ní tiempo ta quiahva já caja ndó ña vaha xihín tóco ndihi ñayivi.

¹⁶ Ná coo vatá ini ndó ní tiempo. ¹⁷ Ta caça tahví ndó nu Ndióxi ní tiempo. ¹⁸ Ndá nacuu ña ndóho ndó ndítahan nu ndo ndiquiahva ndó ndixahvi nu Ndióxi sahá jáchi ña yóho cuni Ndióxi caja mé ndó, na cúu cuéntá Jesús.

¹⁹ A cáji nuu ndó nuú ña cúni ínima yii Ndióxi caja xihin ndo. ²⁰ A quéhe núu ndó ñayivi, na jáyaha tuhun, ña nasahan Ndióxi nu ná cahan na xihin ndo. ²¹ Coto ndojó ndo tóco ndihi ña cahan na xihin ndo. Caxi ndó ña vaha ²² ta caxoo ndó nu tóco ndihi ña núu.

²³ Ta Ndióxi, mé a cája ña coo vaha ini ndó, ná caja yii ndihi a ndohó. Ná caja yii á ínima ndo xihin yiquí cuñu ndó já ná coo vii ndo tá ná xinu quivi quixi tucu Jesucristo, xitoho í. ²⁴ Jáchi sa naçaxi Ndióxi mí ta a jándicoo a mí anda quiahva jáxinu coo a tóco ndihi ña nacachi a.

Jáxinu coo Pablo ña cahan da ta ndíndayí da na

²⁵ Ñani mí i, na cúu cuénta Jesús, caça tahví ndo nu Ndióxi sahá nde.

²⁶ Cahan Ndióxi ndó xihin ndihi na cúu cuénta Jesús ta tatí yúhu táhan ndó ta yii caja ndó ña.

²⁷ Candehé ndo, ñani i, na cúu cuénta Jesús. Sáhndá i chuun nu ndó cuénta Jesucristo, xitoho í ña ná cahvi ndó carta yóho nuú ndihi na cúu cuénta Jesús ndúu xihin ndó jan.

²⁸ Ná caja Jesucristo, xitoho í cuahá ñamani xihin ndo. Já ná coo.

Carta chí ivi nacahyí Pablo nuú na cúú cuéntá Jesús ñuu Tesalónica

Pablo xihín da xíca xihín da chíndahá da Ndióxi coo na cúú cuéntá Jesús ñuu Tesalónica

¹ Yehe cúú Pablo, da cáhyí carta yóho xihín Silvano xihín Timoteo ta chíndahá i ña nuú ndihi ndó, na cúú cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. ² Ná caja Ndióxi, tátá yo xihín Jesucristo, xitoho í cuahá ñamani xihín ndihi ndó ta ná caja mé á ña ná coo vaha ini ndó.

Caja víi Ndióxi sahá na cája cuachi tá ná quixi tucu Jesucristo ñuyívi yóho

³ Ndijáá níi quivi ndítahan nuú nde ndiquiahva nde ndixahvi nu Ndióxi saha ndóhó, na cúú cuéntá Jesús. Ta íin saha cája nde já jáchi nini quivi cándéé chága ini ndó Jesús ta quíhvi chága ini táhan ndó na cúú cuéntá Jesús. ⁴ Sahá ña cán quéa cáji ini nde cáhan nde saha ndo nuú java ga na cúú cuéntá Jesús ndá nacuu nu táca na jáchi cándéé ini ndó Jesús ta sahan ndeé ini ndó tá ndóho ini ndó sahá ña cája xíxi ñayivi xihín ndo. ⁵ Jánaha Ndióxi nu yo ña ndaa cája mé á tá cája víi a saha yo. Ta sahá ña yóho sácú tiahva mé á ndohó cuhun ndó indivi cacomí a cuéntá saha ndó jáchi ndóho ini ndó cuéntá mé á viti.

⁶ Ta ndaa cája Ndióxi tá jándoho a ini ñayivi, na cája xíxi xihín ndó viti. ⁷ Ta sahá ña ndóho ini ndó ná caja mé á ña ná ndiquehe ndéé ndo tá quiahva caja mé á ña ná ndiquehe ndéé ri ndehe va mé quivi quixi tucu Jesucristo ñuyívi yóho. Ta quixi a xihín tátó ndéé mé á ta cuni yó a ña quixi a indivi tañu ñúhu ita. ⁸ Quixi a jándoho a ini na co cándéé ini Ndióxi ta ni co cándúsa na tuhun vaha sahá Jesús, xitoho í, mé a cuu jáca cu mí. ⁹ Ta ndá na co cándéé ini Jesucristo já quéa ndoho ndivaha ini na anda ama cáa quivi ini indayá ta a cóo ga na nu Ndióxi. Ta tavá jín Ndióxi na já ná a cúni ga na nuú á anda ama cáa quivi. Ta a

cúni ga na ña náhnu cája Ndióxi xihín ndéé mé á. ¹⁰ Tá ná quixi tucu Jesucristo ñuyívi yóho já caja cáhnu ndivaha tóco ndihi na cúú cuéntá Jesús mé á nuú quixi a. Ta já catóntó ndivaha tóco ndihi na sahá ña náhnu ndivaha caja Jesucristo. Ta quiahva já caja cáhnu ri ndóhó va Jesucristo mé quivi cán jáchi cándéé ini ndó tuhun vaha sahá Jesús ña nacahan nde xihín ndo.

¹¹ Ña cán quéa ndijáá níi quivi xíca tahví nde nu Ndióxi saha ndo ña ná cacuu ndó ñayivi ndaa tá quiahva cúni mé á jáchi sahá ña yóho nandicaxi a ndohó. Ta xíca tahví nde nu Ndióxi saha ndo ña ná quiahva mé á ndéé a nu ndo já ná cuu jáxinu coo ndó ña vaha ña cúni ndó caja ndó nani cája chúun ndó cuéntá mé á sahá ña cándéé ini ndó mé á. ¹² Ta sahá ña vaha cája ndó, caja cáhnu ñayivi Jesucristo. Anda jávi ndiñehe jícó Jesucristo ndohó jáchi cúú ndó cuéntá mé á ta cája ndó ña cúni mé á. Mé a ndaa cúni Ndióxi xihín Jesucristo, xitoho í caja cuahá ñamani xihín yo.

2

Cáhan Pablo sahá da ihvi Jesucristo, mé da quixi chí nuu

¹ Cuni johó vaha ndó, ñani mí i, na cúú cuéntá Jesús jáchi cáxi tuhun i xihín ndo saha mé quivi quixi tucu Jesucristo ñuyívi játa mé a mí ndique táhan í xihín á. Xíca tahví i nu ndó ² ña ná a cándúsa ndó java ñayivi tá cáchi na ña sa naxinu quivi ndicó coo Jesucristo ñuyívi. A ndicani ga ini ndó sahá ña cáchi na jáchi a juú ña ndaa cúú á. Tá ná cachi na cán ña nacahan Ndióxi xihín ná á tá ná cachi na ña nacachi mé nde ña nandindaa mé quivi cán á tá ná cachi na cán ña nacahyí nde in carta nu ná já quéa a cándúsa toho ndó na jáchi a juú ña ndaa cúú á. ³ A cándúsa ndó ña cáchi na cán jáchi cúni na jándahvi na ndohó. Ta viti cáhan nde ña ndaa xihín ndo saha mé quivi quixi tucu Jesucristo. Jáchi jihna ñúhú casahá cuahá ndivaha ñayivi nduu na na ihvi Ndióxi ta jándicoo na íchi cuéntá mé á. Anda jávi casa in da quini, da cája cuahá ndivaha nuú cuachi. Joo vaxi quivi tá jándihi Ndióxi saha dá ini indayá. ⁴ Ta mé da quini yóho, da cúú da ihvi Ndióxi cándají da mé á ta

cándají da tóco ndihi ña cúu cuéntá mé á. Anda jáví casaá da veñuhu cáhnu ndácaan ñuu Jerusalén cacao da cán tátuhun Ndióxi. Ta cachi da xihín ñayivi ña cúu dá Ndióxi.

⁵ Á co ndícuñun ini ndó tá nasahin i xihin ndo já cuití naçahan i ña yóho xihin ndo. ⁶ Ta viti sa cándaá ini ndó ndía sáji nuu nuú da ihvi cán ña ná a xinu coo da mé quivi ña co ndítahan nu dá xinu da. ⁷ Vatí cámani jánaħa da ihvi mé dá nuú ñayivi joo cája chúun jehé da viti ñúhú jándihi da saħá ñaha Ndióxi cúni da. Ta viti in in a sáji nuu nuú da ihvi ta co sahan ñamani jánaħa da ihvi mé dá nuú ñayivi. Joo vaxi quivi caxoo ña sáji nuu nuú da ihvi cán. ⁸ Ta anda jáví jánaħa da mé dá nuú ñayivi. Ta cahni Jesucristo mé da ihvi cán xihín taçhi yúhu a tá ná quixi a ñuyivi yóho. Ta jándihi a saħa dá xihín ña ndiyihvi ndaa nuú quixi a. ⁹ Tá cámani quixi tucu Jesucristo ñuyivi já casaá mé da ihvi xihín cuahá ndivaha ndée ña nasahan tiñáhá sacuaħa nu dá. Ta jándahvi da ñayivi jáchi caja da cuahá ñaha náhnu, ña co cúu ña ndaa. ¹⁰ Ta caja da tóco ndihi nuú cuachi jáchi cúni da jándahvi da ñayivi, mé na xica íchi cuahan indayá. Cuhun na indayá jáchi coo naheen na candúsa na ña ndaa saħa Jesucristo ta coo naheen na quihvi ini na ña ndaa, ña cuu jácacu ñahá. ¹¹ Ña cán quea quiahva Ndióxi ñamani jándahvi da ihvi cán na já ná candúsa na ña tuhún. ¹² Já quea jándoho Ndióxi ini tóco ndihi na cán jáchi coo na candúsa na ña ndaa ta ndinuhu cuachi naçatoo na cája na.

Naçaxi Ndióxi ndohó ña ná jácacu a ndohó

¹³ Ta ndijáá ní quivi ndítahan nuú nde ndiquiahva nde ndixahvi nu Ndióxi saħa ndó, na cúu ñani nde cuéntá Jesús saħá ña quihvi ini a ndohó. Jáchi janda tá cámani cava saħa saħa ñuyivi naçaxi Ndióxi ndohó ña ná jácacu a ndohó. Jáchi nandaja vii ínima yii mé á ínima ndo saħá ña candeé ini ndó ña ndaa saħa Jesús. ¹⁴ Cúni Ndióxi ña ná candeé ini ndó mé á ña cán quea nachindahá a ndehe çaxi tuhun nde tuhun vaha saħa Jesucristo nu ndo. Naçaxi

Ndióxi ndohó ña ná in nduu ndó xihin Jesucristo, xitoho í. Cáhnu ndivaha cúu mé á ta ndaja cáhnu a mí xihin á.

¹⁵ Ñani mí i, na cúu cuéntá Jesús coo ndacú ini ndó xihín ña candeé ini ndó Jesucristo. A ndíndójó ndo tiin tuun ndó ña ndaa ña najánaħa nde nu ndo tá nasanduu nde xihin ndó. Ta tiin tuun ndó ña naçahyí nde nu ndó viti. ¹⁶ Jesucristo, xitoho í xihin Ndióxi, tátá yo, mé a quihvi ini mí ná quiahva tuhun ndeé ini ta anda ama cá quivi a ndíhi saħá. Ta viti ndátí tiaħva caja Ndióxi cuahá ñamani xihin yo. ¹⁷ Ta xica taħví nde nu Ndióxi ña ná jachutú a ínima ndó xihin ndée mé á. Ta ná chindeé a ndohó çahan ndó tuhun vaha ta caja ndó ña vaha cuití va.

3

Cúni Pablo ña ná caça taħví na nu Ndióxi saħa dá

¹ Candehé ndó, ñani i, na cúu cuéntá Jesús. Nu ndíhi çahan i tuhun yóho xihin ndo. Caça taħví ndo nu Ndióxi saħá nde. Ta caça taħví ndo nu mé á ña ná ndicuita nu yaçhi tuhun vaha saħa Jesús ndijáá ñuu ta ná ndiquehe vaha ñayivi mé tuhun vaha tá quiahva nandiquehe ndó ña. ² Ta caça taħví ndó nu Ndióxi saħá nde ña ná jácacu a ndehe ndahá ñayivi quini. Vatí nduu cuahá na co candeé ini Jesucristo ³ joo jáxinu coo Ndióxi tuhun mé á. Já quea quiahva mé á tuhun ndeé ini ndó ta candaa mé á ndohó já ná a cája tiñáhá sacuaħa ña núu xihin ndo. ⁴ Candeé ini nde Jesucristo ta candeé ini nde ndohó ña cája tá cája ndó ña najánaħa nde nu ndo. ⁵ Ná chindeé Ndióxi ndohó candaa ini ndó ndá quiahva quihvi ini á ndohó. Ta ná chindeé a ndohó caja ndeé ini ndó tá ndóho ini ndó tá quiahva naçaja ndeé ini Jesucristo tá nandoho ini a.

Xíni ñúhú caja chúun í catacú

⁶ Cuni joho vaha ndó, ñani mí i, na cúu cuéntá Jesús. Nasahnda Jesucristo chuun nu yo saħá ña cán quea saħndá nde chuun nu ndo ña ná caxoo ndó nuú na cúu cuéntá Jesús tá cájúsá na caja chúun na tá quiahva najánaħa nde nu ndó. ⁷ Ta sa xini ndó ña ndítahan nu ndó caja ndó tá quiahva naçaja mé nde tá nasanduu nde

xih̄in ndo jáchi coó n̄acajúsá nde caja chúun nde. ⁸ N̄achah̄vi nde sahá ña naxixi nde cán. N̄acaja chúun vaha nde ñuú ta ndiví já nañehé nde jiūh̄un catacu nde já ná a ndóho ni in ndó sahá ña naxito ndó ndehe. ⁹ Vatí íin sahá nde cachi nde xih̄in ndo ña ná coto uun ndó ndehe joo coó n̄acaja nde já. Ña n̄acaja nde quéa n̄acaja chúun vaha nde já najánāha nde nu ndo ndá quiahva ndítahan nu ndó caja ndó. ¹⁰ Á co ndícuh̄un ini ndó chuun nāsahnda nde nu ndo tá nāsanduu nde xih̄in ndo. Já n̄acachi nde já: Ndá na co cúni caja chúun, ná a cúxu toho na, n̄acachi nde. ¹¹ Jáchi nañehé nde tuhun ña ndúu java na jusá tañu ndó ta co cúni na caja chúun na ta xíca nuu na játa ca na tuhun sahá ñayivi. ¹² Ta sáhnda nde chuun nuú na jan ta jácahan nde na xih̄in nde nāsahan Jesucristo, xitoho í nuú nde ña ná caja chúun ndísáhnu na já ná ñeh̄e ná ña cúxu na.

¹³ Candehé ndo, ñani i, na cúú cuéntá Jesús. A cánaá ndó caja ndó ña vaha. ¹⁴ Tá ná canduu java na tañu ndó ta co cúni na caja na ña cáchi nde xih̄in carta yóho já quéa xíní ñúhú candehé vaha ndó ndá na cúú ná ta a cáca nuu ga ndó xih̄in ná já ná cacahan nuu ná sahá ña cája na. ¹⁵ Joo a cája ndó cuéntá ña cúú ná na ih̄vi Jesucristo. Xíní ñúhú jácahan ndó na ña ná caja vaha na jáchi cúú ná ñani ndó, na cúú cuéntá Jesús.

Ndíndayí Pablo ñayivi Tesalónica

¹⁶ Ta Jesucristo, xitoho í, mé a íin vaha ini ná quiahva mé á nu ndo ña ná coo vaha ini ndó ndaja táhan quiví. Ta ná coo vaha ini ndó xih̄in ndá ñaha n̄acuu vaxi nu ndo. Ná coo Jesucristo, xitoho í xih̄in ndih̄i ndó.

¹⁷ Yehe cúú Pablo ta chíndahá i Ndióxi coo ndó ta cáhyí i quiví i xih̄in ndáha i já ná candaa vaha ini ndó ña mé a ndaa yehe cúú da n̄acahyí i ña yóho nu ndo. ¹⁸ Ná caja Jesucristo, xitoho í cuahá ñaman̄i xih̄in ndo. Já ná coo.

Carta nu cuití nacahyí Pablo nuú Timoteo

Chíndahá Pablo Ndióxi coo Timoteo

¹Yehe cúú Pablo, da cúú in apóstol cuéntá Jesucristo sahá ña nasahnda Ndióxi xihín Jesucristo chuun yóho nuú i. Ta Ndióxi cúú á ña jácacu mí ta Jesucristo cúú á ña ndátí quixi. ²Cáhyí i carta yóho nu mún, Timoteo jáchi cúún tátuhun jahyi maní i sahá ña cándéé inún Jesucristo. Ta cúni ña ná caja Ndióxi, tátá yo xihín Jesucristo, xitoho í cuahá ñamaní xuhun. Ta ná tahvi ini a sahun ta ná caja ña ná coo vaha inún.

Ndícani Pablo sahá na co jánaha ña ndaa

³Tá jalóho cámaní quee e ñuu Efeso quixi i estado Macedonia yóho já naxica tahvi i nuun ña ná candoún ñuu Efeso jan. Ta viti xica tahvi tucu u nuun ña ná coún cán. Jáchi ndúu java ñayivi cán ta jánaha na ña tuhún nuú ñayivi. Ta ndítahan nu mún cahndún chuun nu ná ña ná a jánaha ga na ña tuhún. ⁴Ta ná a táa johu na cuento nání, ña cáhan sahá chichi naquixi tásáhnú jícó yo. Jáchi ndítuhún uun va na sahá ña yóho ta co chindeé a na cándéé ini na Ndióxi, mé á nasacu ini jácacu a mí.

⁵Ndítahan cahún ña yóho xihín ná jáchi cúni Ndióxi ña ná quihvi ini táhan í xihín ndihi ínimá yo ta cúni a ña ná caja í ña vaha cuití va ta cúni a ña ná cándéé ini mé á xihín ndinuhu ini. ⁶Joo java ñayivi najándicoo na ña ndaa ta najátivi na ña cája na jáchi ña quihvi cuití va ndítuhún xihín táhan na. ⁷Vatí cúni na cán jánaha na ley Moisés joo co cándaá ini na ña jánaha na ta ni co cándaá ini na ña cáhan mé ley.

⁸Joo sa xini yo ña mé ley Moisés cúú á ña vaha tá ná caja chúun vaha í ña tá quiahva cúni Ndióxi. ⁹Xini ñúhú ndícuhun ini ña ni in ley co chícaan cuachi jatá ñayivi vaha. Joo chícaan cuachi jatá ñayivi quini, na sáá ini jáchi co cája na ña cúni Ndióxi. Ta chícaan cuachi jatá ñayivi núu, na cája cuahá nuú cuachi. Ta chícaan cuachi jatá ñayivi co cája cáhnú Ndióxi, na cánahá xihín mé á. Ta chícaan cuachi jatá ñayivi sáhnú

tátá náná na xihín jatá tóco ndihi na sáhnú ndii. ¹⁰Ta chícaan cuachi jatá ñayivi ndúu xihín taá á ñáha, na co cúú yí ná á ñájíhí na. Ta chícaan cuachi jatá taá líhi, da quihvi nuu xihín inga taá. Ta chícaan cuachi jatá na cája cuíhná ñayivi sahá ña cúni na jícó ñahá na. Ta chícaan cuachi jatá ñayivi cáhan ña tuhún, mé na janda quivi Ndióxi tává na tá cáhan na ña tuhún. Ta chícaan cuachi jatá tóco ndihi ñayivi tá co cája na ña ndaa, ña jánaha Ndióxi nu yó caja í. ¹¹Ta nasahnda Ndióxi chuun nuú i ña ná jánaha i ña ndaa yóho nu ndo jáchi cúni a jácacu a tóco ndihi ñayivi. Cáhnú ndivaha cúú mé á ta ndítahan caja cáhnú í mé á.

Ndíquiahva Pablo ndixahvi nu Ndióxi jáchi táhnú ini a saha dá

¹²Ndíquiahva i ndixahvi nu Jesucristo, xitoho í jáchi nacaxi a yehe caja chúun i cuéntá mé á ta nasahan mé á tuhun ndée ini i ña ná caja i ña xihín ndinuhu ini i. ¹³Vatí jihna nacahan ihvi i saha Ndióxi ta nacaja xixi i xihín á ta nacannahá i xihín á joo nacaxi a yehe. Ta natahnú ini a sahá i tá cámaní cándéé ini i Jesucristo jáchi coo nacandaá ini i ña nacaja i. ¹⁴Nacaja Ndióxi cuahá ñamaní xihín i tá nacaja ña ná cándéé ini i mé á. Ta nacaja mé á ña nachutú ndaa ini i xihín ña quihvi ini i na cúú cuéntá mé á sahá ña in nanduu u xihín mé á.

¹⁵Ña yóho cúú á ña ndaa ta ndítahan nuú ndihi ñayivi candúsa na ña cáchi i yóho: naquixi Jesucristo ñuyívi yóho jácacu a ñayivi, na cája cuachi. Ta yehe cúú u da yójó nu ndíhi na cája cuachi. ¹⁶Ta sahá ña yóho natahvi ini Ndióxi sahá i já ná cuu nahá Jesucristo ndaja cáhnú coo ini mé á. Ta vatí nacaja cuaha chága i cuachi a juú ga java ga ñayivi joo já nasacuu u yuhú nuú tóco ndihi na vaxi chága chí nuu ña ná cándéé ini na mé á ta já coo na xihín mé á anda ama cáa quivi. ¹⁷Ña cán quea cóho caja cáhnú í Ndióxi anda ama cáa quivi jáchi mé á cómi a cuéntá saha yo anda ama cáa quivi. Ta mé Ndióxi a cuú quivi a ta ndíchí ndivaha jini á ta ín a indivi vatí a cuú cuní a. Cáhnú ndivaha cúú mé á. Já ná coo.

¹⁸Candehún Timoteo, da cúú tátuhun jahyi mí i. Jándacoo i chuun yóho nu mún

jáchi quiahva já nacachi profeta sahún jihna. Ta xíní ñúhú quiahva ndeé inún cajún ña jáchi cúú á tátuhun cáni táhún xihín ña núu. ¹⁹ A jándacoún ña cándéé inún Jesucristo ta xihín ndinuhu inún cajún ña ndaa. Jáchi java ñayivi coó nacaja na ña xíní na cúní Ndióxi caja na ta chí nandihí sahá ña cándéé ini na Jesucristo. ²⁰ Ivi táhan da cán cúú Himeneo xihín Alejandro. Nandiquiahva i da cán ndáha tiñáhá sacuahá va já ná candaa ini da ña a cuú quehe núu da Ndióxi xihín tuhun cáhan da.

2

Ndaja caja í cacá tahví yo nu Ndióxi

¹ Ña xíní ñúhú chága caja ndó queá cacá tahví ndó nu Ndióxi sahá ndihí ñayivi ña ná tahví ini a saha ná. Ndiquiahva ndó ndixahvi nu Ndióxi sahá ñamaní cája mé á xihín ndó. ² Ta sa mé quiahva já ndítahan cacá tahví ndó nu Ndióxi saha tóco ndihí na cómi cuéntá saha yo. Jáchi tá cája í ña yóho já cuu coo vaha iní xihín ndihí ñayivi ta já coo toní ñúhú xihín táhan í. Ta já nuná nu yo caja cáhnu í Ndióxi. ³ Tá xíca tahví yo nu Ndióxi sahá ndihí ñayivi já queá cája í ña vaha ta cájii ini Ndióxi, mé á jácacu mí. ⁴ Jáchi cúní a jácacu a tóco ndihí ñayivi ña ná candaa ini na ña ndaa saha mé á. ⁵ Jáchi íin in táláá Ndióxi. Ta íin in táláá Jesucristo, mé á cúú á taa ta cája mé á ña ná ndique táhan máni ñayivi xihín Ndióxi. ⁶ Ta nandiquiahva Jesucristo mé á quivi a sahá cuachi tóco ndihí ñayivi. Xihín ña yóho náha Ndióxi nu yo ña nandindaa tiempo tá cúní a jácacu a tóco ndihí ñayivi. ⁷ Sahá ña cán queá nacaxi Ndióxi yehe cacuu u apóstol ña ná caxi tuhun i tuhun vaha sahá Jesús nuú na tóho, na coo cúú na Israel. Jáchi cúní Ndióxi ña ná candaa ini na ña ndaa já ná cuu cándéé ini na Jesús. Cáhan i ndinuhu ña ndaa xihín ndo ta coo cáhan i ña tuhún xihín ndo.

⁸ Ña cúní queá ná cacá tahví nataa nu Ndióxi tóco ndihí nu táca ndo. Ta ndítahan nu ná coo víi ínimá ná já ná cuu ndíñehe na ndáha ná nu Ndióxi. Ta ndítahan nu ná jándicoo na ña xójo ini na ta ná a cáni táhan yúhu ná. ⁹ Jári coo ndítahan nuú najihí candixi na jahmá lándá. Ta ná a cája lándá

na xihín ijí jini ná. Ta ná a ndíhi ini na caja cutú na mé ná xihín ñaha jiuuhun cuáán á xihín jíqui yahvi tátuhun perla. Ta ná a cándixi na jahmá yahvi ña cája lándá ná xihín. ¹⁰ Vaha chága ná caja na ndinuhu ña vaha tá quiahva ndítahan nuú najihí, na cúú cuéntá Jesús caja na. ¹¹ Ndítahan nuú najihí canduu táji ná cuni johó na tuhun Ndióxi ta coto ná a ndíñehe jíco na mé ná. ¹² Ta coo sahan i ñamaní nuú najihí ña ná jánaha na nu táca ñayivi. Ta ni coo sahan i ñamaní nu ná ña ná cacomí na cuéntá sahá dataa. Joo ndítahan nu ná coo táji ná. ¹³ Jáchi jihna ñúhú nacavaha Ndióxi Adan ta anda jávi nacavaha mé á Eva. ¹⁴ Ta a juú Adan cúú da najándahvi tiñáhá sacuahá, vaha. Joo najándahvi tiñáhá sacuahá Eva ta já nandicava ña nuú cuachi. ¹⁵ Sahá ña cán queá nacaja Ndióxi xihín najihí ña ná ndoho ini na tá cacu jahyi na. Joo jácacu Ndióxi na tá ná a jándacoo na ña cándéé ini na mé á. Ta já ndítahan nu ná quihvi ini na ñayivi. Ta ná a cája lándá ná ta ná ndiquiahva víi na mé ná ndáha Ndióxi.

3

Ndaja ndítahan caja na sacuahá nuú na cúú cuéntá Jesús

¹ Ta ña ndaa cúú tuhun yóho: ndá da cúní cacuu da sacuahá nuú na cúú cuéntá Jesús, ña vaha queá cúní da. ² Jáchi ndítahan nuú da sacuahá caja da ndinuhu ña ndaa já ná a ñehe iní ñayivi cahan núu na saha dá. Ta in tuhún ñájihí da ndítahan coo. Ta ndítahan cacuu da da tácu ini ta ndítahan nu dá cañehe vaha da quiahva ta ndítahan cacuu da da íin toní ñúhú ñayivi xihín. Ta ndítahan nu dá cajii ini da ndiquehe vaha da ñayivi vehe da. Ta xíní ñúhú cacuu da da tiaha vaha jánaha da ñayivi. ³ Coo ndítahan cacuu da da xihí ta coo ndítahan cacuu da da ndúcú cuachi xihín ñayivi. Joo ndítahan coo víi da xihín ñayivi ta ná a cáni táhan da xihín ná. Ta coo ndítahan cacuu da da ndiáva ini quehe cuahá da jiuuhún. ⁴ Ta ndítahan nuú da sacuahá cacomí vaha da cuéntá saha na vehe da. Ta ndítahan nuú jahyi da coo johó na nu cáhan tátá na xihín ná ta ná coo toní ñúhú na xihín dá. ⁵ Jáchi tá ta a cúú cañehe vaha da cuéntá sahá na

vehe da já quéa a cúu caja da cacomí da cuéntá sahá na cúu cuéntá Jesús. ⁶ Ta mé da sacuaḥa co ndítahan cacuu da da jacá nandihvi íchi cuéntá Jesús. Jáchi tiahva ná casáhá da ndiñehe jícó da mé dá ta sahá ña yóho jándoho Ndióxi ini da tá quiahva nacaja mé á xihín tiñáhá sacuaḥa. ⁷ Mé da sacuaḥa nuú na cúu cuéntá Jesús yóho ndítahan cacuu da da ín toní ñuhú ñayivi, na co cúu cuéntá Jesús xihín. Jáchi tiahva náá ndicava da ndáha tiñáhá sacuaḥa ta xihín ña yóho caḥan núu ñayivi ñuyiví saḥa dá.

Ndaja ndítahan caja na tá ná chindeé na na sacuaḥa veñuhu

⁸ Ta ndá da cúni cacuu da chindeé na sacuaḥa veñuhu ndítahan nu dá cacuu da da ín toní ñuhú ñayivi xihín. Ta xini ñuhú cacuu da da cáhan ndinuhu ña ndaa. Co ndítahan cacuu da da xihí ta co ndítahan nu dá cacuu da da ndiáva ini coo cuahá jiuḥun nuu. ⁹ Ta xini ñuhú tiin tuun da ña ndaa ña nanaha Ndióxi nu yo ta ña yóho cúu á ña ndítahan candeé ini mé á. Ta ná a cáhvi ivi joho ini da. ¹⁰ Jihna ñuhú xini ñuhú coto ndojó ndo mé da cúni chindeé na sacuaḥa veñuhu. Ta tá co cája da cuachi nu Ndióxi já quéa cuu chindeé da na sacuaḥa veñuhu. ¹¹ Ta jári najihí viti ndítahan cacuu na na ín toní ñuhú ñayivi xihín. Co ndítahan cacuu na na ndahnda yúhu. Ná cacuu na na ndísáhnú ini ta ná caja chúun na xihín ndinuhu ini na. ¹² Ta mé da chindeé na sacuaḥa veñuhu ndítahan nu dá cacuu da da coo inga ñaha xihín ta in túhún ñájihí da ndítahan coo. Ta ndítahan nu dá cacomí vaha da cuéntá sahá jahyi da xihín sahá ndihi na vehe da. ¹³ Jáchi tá ná chindeé vaha da yóho na sacuaḥa veñuhu já casáhá cahvi vaha ini ñayivi saḥa dá ta xihín ña yóho ñeḥe ini da caḥan chága da sahá ña candeé ini da Jesucristo.

Cáhan Pablo saḥa ndá a cúu mé Jesucristo

¹⁴ Vatí ndúcú u saa yachi i jan joo cáhyi i carta yóho nuun. ¹⁵ Jáchi tá ná cacuáchi loho i saa i jan já quéa sa cándaá inún xihín carta yóho ndaja ndítahan caja mí, na cúu na vehe Ndióxi. Mé a ndaa cúu yó cuéntá Ndióxi, mé á tácu ta ndítahan nu yo

quiahva ndeé ini ndiquehé sahá ña ndaa cáhan saḥa Jesucristo. ¹⁶ Jáchi mé a ndaa cáhnú ndivaha cúu ña náha Ndióxi nu yo: Naquixi Jesucristo ñuyiví yóho ta nasacuu a ñayivi.

Ta nacahan ínima yii Ndióxi saḥa mé á ña coo nacaja ni in cuachi.

Ta naxini táto Ndióxi Jesús.

Ta ndijáá ñuyiví nacaxi tuhun na tuhun vaha saḥa mé á ta cuahá ndivaha ñayivi nacandeé ini na mé á ta tá nandihí nandaa cuahán indiví.

4

Cáhan Pablo sahá na co jánaha ña ndaa

¹ Cáhan cáxi ínima yii Ndióxi ña vaxi quivi jándacoo java ñayivi ña candeé ini na Jesús. Ta casáhá na candico na na jándahvi ñahá, na jánaha ña naquixi nuú tiñáhá sacuaḥa. ² Ta mé na jánaha ña tuhún yóho co cúu ná tá quiahva ndaa na. Jáchi cúu ná ñayivi túhún, na nandaji xini túni xihín ña núu. ³ Ta jánaha na yóho ña a cuú tandaha ñayivi ta jánaha na ña a cuú cuxu ñayivi java ñaha, ña nacavaha Ndióxi cuxú. Joo cúni Ndióxi ña ná cuxú ña jan tá ná ndiquiahva í ndixahvi nu mé á sahá jáchi candeé ini mé á ta xini vaha í ña ndaa. ⁴ Jáchi tóco ndihi ña nacavaha Ndióxi cúu á ña vaha ta ni in ñaha co ndítahan candají yo. Joo ná ndiquehe vaha í ña ta ná ndiquiahva í ndixahvi nu Ndióxi sahá. ⁵ Jáchi tá ná caça tahví yo nu Ndióxi já caja yii mé á ña xihín tuhun mé á.

Ña ndítahan caja da cája chúun vaha cuéntá Jesucristo

⁶ Tá ná jánahún ña yóho nuú na cúu cuéntá Jesús já quéa caja chúun vahún cuéntá mé á. Ta quiahva ndeé inún tá jácuaha chágún ña ndaa sahá Jesucristo já ná candico cáhnú chágún íchi cuéntá mé á. ⁷ Coto a táa johún cuento ña cáhan ñayivi ñuyiví jáchi coo saḥa toho ña jan. Ña ndítahan cajún quéa jácuaha chágún nda quiahva caja cáhnún Ndióxi. ⁸ Tá ná caja chúun cuahá í xihín yiquí cuñu í já quéa chindeé a mí ñuyiví yóho cuití va. Joo tá ná caja cáhnú í Ndióxi já quéa chindeé chága yó mí jáchi xihín ña yóho cuu coo vaha ini ñuyiví yóho ta sa xihín mé ña yóho cuu coo

vaha í xihín Ndióxi tá ná cūhūn yó coo í xihín mé á. ⁹ Ta ña yóho cúú á ña ndaa ta xíní ñúhú candúsa í ña. ¹⁰ Ta sa saha mé ña ndaa yóho cája chúun vaha í jáchi cāndeé iní Ndióxi, mé á tácu. Mé a cán cūni a jácacu a tóco ndihi ñayivi ta mé a ndaa jácacu a tóco ndihi na cāndeé ini mé á.

¹¹ Ta xíní ñúhú jánahún nuú ñayivi tóco ndihi ña cáhí í xuhūn yóho ta xíní ñúhú cahndún chuun nu ná ña ná caja na ña. ¹² Coto a quiáhvún ñamaní nuú ñayivi quehe núu na yohó sahá ña cúún da yúta. Joo xihín ña cájún xíní ñúhú jánahún nuú na cúú cuéntá Jesús ndá quiahva ndítahan caja na ta ndá quiahva ndítahan cahan na. Ta xíní ñúhú jánahún nu ná ndá quiahva ndítahan quihvi ini na ñayivi ta ndá quiahva ndítahan cāndeé ini na Ndióxi. Ta víi uun cajún tóco ndihi ñaha já ná a cáhvi núu ini ñayivi sahūn. ¹³ Nani ndátún saa í jan xíní ñúhú cahvún tuhun Ndióxi nuú na cúú cuéntá Jesús nu táca na. Ta quiahvún tuhun ndeé ini na ta jánahún na. ¹⁴ Coto a ndíndójún sahá ña nasahan Ndióxi nuun tá naxica tahví na cúú profeta nu mé á sahūn tá nachojó na sacuaḥa ndáha ná jinūn.

¹⁵ Xihín ndinuhu inún caja chúún cuéntá Ndióxi já ná cuu cuni tóco ndihi ñayivi ndá quiahva xica vahún xihín ñaha Ndióxi. ¹⁶ Cuéntá vaha coún xihín mún ta cuéntá vaha coún xihín ña jánahún nuú ñayivi. Ta xíní ñúhú coo ndacú inún xihín ndihi ña cajún. Jáchi tá ná cajún ña yóho já quea cacu ndaa ínimun ta jári cacu ndaa ínima na xíní johō nu cáhūn.

5

Jānaḥa Pablo nu Timoteo ndaja ndítahan caja da xihín na cúú cuéntá Jesús

¹ Co ndítahan jánanún da sáhnū. Ña ndítahan cajún quea jácahūn dá tá quiahva cáhūn xihín tátún. Ta xíní ñúhú cajún xihín da yúta chága tá quiahva cájún xihín ñanún. ² Ta xihín na sáhnū xíní ñúhú cajún tá quiahva cájún xihín nánún. Ta xihín na tacú xíní ñúhú cajún tá quiahva cájún xihín quiahvún. Víi uun cajún xihín ná ta a cáhvi núu inún saha ná.

³ Xíní ñúhú chindeé ndó na cuān tá co ndíni cúu na tá ta coo na vehe na. ⁴ Joo tá ín in ña cuān ta ndúu jahyi ñá á ndúu jahyi ñání ña já quea ndítahan nuú na cán chindeé na ña. Jáchi táhan ini Ndióxi xihín ñayivi tá chindeé na tátá náná na ta xihín ña yóho chahvi na ñamaní nacaja tátá na xihín ná tá najacuahnu ñaha na. ⁵ Jáchi mé ña cuān ña mé a ndaa coo na vehe ña chindeé na ña mé ña cán cúú ña cāndeé chága ini ña Ndióxi. Ta ñuú ta ndiví xica tahví ña nu mé á ña ná chindeé a ña. ⁶ Joo ña cuān, ña cája ña núu ña cūni mé cuití ña, ña cán cúú ña tátuhun ndii vatí tácu ña. ⁷ Ña cūni quea ná cahndún chuun yóho nuú na cán já ná a ñeḥe iní yo jánaní na. ⁸ Jáchi ndá na co chindeé na táhan na ta ni co chindeé na na vehe na já quea náha cáxi a ña co cāndeé ini na Jesucristo ta jandá núu chága cája na a juú ga na co cúú cuéntá Jesús.

⁹ Tá ndúu na cuān ta tá cūni na chindeé na na sacuaḥa veñuhu já quea cahyún quiví ná nuú tutu. Xíní ñúhú cacuu na na naxinū uní jícó cuia á chága ta xíní ñúhú cacuu na na nasahiin xihín in tuhún yí. ¹⁰ Mé na yóho xíní ñúhú cacuu na na cahan vaha ñayivi sahá ña vaha cája na. Tátuhun tá nasandaa vaha na jahyi na á tá nandiquehe vaha na ñayivi xínū coo vehe na. Ta xíní ñúhú cacuu na na cája ndiví nuú na cúú cuéntá Jesús. Ta ndítahan coo tiahva na chindeé na ñayivi tá ndóho ini na. Tá cája na ña yóho xihín java ga ñaha vaha já cuu quehe ndó na ná chindeé na na sacuaḥa veñuhu.

¹¹ Joo a cáhyí tohún nuú tutu jan quiví na cuān, na yúta chá jáchi tiahva náa casáha ndiava ini na tandaha tucu na ta anda javí jándicoo na chuun cája na cuéntá Jesucristo. ¹² Ta xihín ña yóho cája na cuachi nu Ndióxi jáchi coo najaxinū coo na tuhun nasahan na nu Ndióxi. ¹³ Ta jári casáha xica nuu na tá vehe tá vehe ta ndúu na na jusá. Ta a juú ña cán cuití va vaha jáchi casáha na ndahnda yuhu ná ta quihvi nuu na nuú co ndítahan coo na ta casáha cahan na ña co ndítahan cahan na. ¹⁴ Sahá ña cán quea cáhí í xuhūn ña vaha chága ná tandahá najihí cuān, na yúta ta ná cacu jahyi na ta ná candaa vaha na vehe na. Ta xihín ña yóho a quiahva toho na ñamaní nuú na ihvi yo cahan núu na

saha ná. ¹⁵ Jáchí ndúu java najihí cuáan ta sa nacaxoo na nu íchi cuéntá Jesús ta nacasáhá na ndíco na tiñáhá sacuaḥa.

¹⁶ Joo ndóhó, na cúu cuéntá Jesús tá íin ña cuáan nu ndo ndítahan chindeé mé ndó ña já queá ná nuná nuú java ga na cúu cuéntá Jesús chindeé na na cuáan, na coó na vehe.

¹⁷ Na sacuaḥa, na cája chúun vaha na veñuhu ta cómi na cuéntá sahá na cúu cuéntá Jesús, na cán cúu na ndítahan ndiquehe cuahá chága yahvi sahá chuun cája na. Ta chága ví tá xíca nuu na jánaha na tuhun Ndióxi nuú ñayivi. ¹⁸ Jáchí já cáchí tuhun Ndióxi já: “A chícayun ñunu yuhú tindiquí nani cája chúun rí sání rí trigo. Joo xíní ñúhú quiahvún ñamaní nu rí caxí rí ña.” Ta íin inga tucu nu cáchí a: “Da cája chúun ndítahan quehe da yahvi sahá chuun cája da.”

¹⁹ A cándúsa tohún na chícayun cuachi jatá in da sacuaḥa veñuhu tá ta co ndúu ivi á uní testigo na sahan tuhun sahá ña nacaja da cán. ²⁰ Joo ndá na co cúni jándacoo cuachi cája na já queá xíní ñúhú jananún na nu táhyí ndíhi na cúu cuéntá Jesús já queá ná cayihví na java cán caja na cuachi. ²¹ Nu Ndióxi ta xihín nu Jesucristo xitoho í ta xihín nu táto Ndióxi sáhdá i chuun nu mún Timoteo ña ná cajún ña nacahyí i yóho. Tá jananún in da cúu cuéntá Jesús sahá cuachi cája da xíní ñúhú jananún da vatí cúu dá da xíní táhan vaha xuhun. ²² Coto a chójó yachún ndáhún jiní in da cúni cacuu da sacuaḥa nuú na cúu cuéntá Jesús. Jáchí nu cuítí xíní ñúhú ndicani vaha inún sahá ña cájún. Jáchí tá ná caja da cán cuachi já queá cahán java ñayivi ña íin vaha inún xihín cuachi cája da. Coto a cájún ña núu.

²³ Ta sahá ña já cuítí quíhvi tisún sahá ña cán co ndítahan cohún ticuú uun va. Joo ndítahan coho lohún vino.

²⁴ Ndúu java ñayivi ta náha cáxí táhyí cuachi cája na nuú ñayivi vatí camaní nahma na ña. Joo ndúu java ga ñayivi ta ñúhu jehé cuachi na joo vaxi quívi tá ndacanáha cuachi na. ²⁵ Ta sa mé quiahva já ndacanáha cáxí táhyí ña vaha cája java ñayivi. Ta vatí ná caja jehé na ña vaha joo vaxi quívi ndacanáha nuú ña vaha nacaja na.

6

¹ Ta ndúu na cúu cuéntá Jesús ta cómi xitoho na cuéntá saha ná já queá xíní ñúhú caja cáhnu na xitoho na xihín ndinuhu ini na já ná a cahán nuú ñayivi sahá quívi Ndióxi ta ni ná a quehe núu na ña jánaha nde. ² Ta tá ndúu java na ta xitoho na cúu dá cuéntá Jesús já queá xíní ñúhú caja cáhnu na xitoho na sahá ña cúu da cán da candeé ini Jesús. Ña ndítahan caja na cán queá caja ndíví vaha chága na nu sáhdá xitoho na caja na jáchi xíní ñúhú ndicuhun ini na ña tá cája ndíví vaha na nuú da cán já queá cája ndíví vaha na nuú ñani maní ná, da cúu cuéntá Jesús. Ña yóho queá xíní ñúhú jánahún nuú ñayivi ta xíní ñúhú cahndún chuun nu ná ña ná caja na ña.

Ñayivi, na jánaha ña co cúu ña ndaa

³ Ta ndá ñayivi tá jánaha na ña co cúu ña ndaa, ña co ndíque táhan vaha xihín tuhun nacahan Jesucristo, xitoho í nu yó ta ni co ndíque táhan vaha xihín tuhun Ndióxi ⁴ já queá na cán cúu ná na ndínehe jícó ndivaha mé ta co xíní na ni in ñaha. Ndiáva ini na caní táhan yúhu ná ta casáhá cáhíhvi ini na xihín ñayivi ta ndícuehe xihín táhan na. Cánahá na xihín ñayivi ta co candeé ini táhan na. ⁵ Ta co jándacoo na ña cáni táhan na sahá ña najaca xíní túni na ta nandindójó na ña ndaa. Ta cúni na ndicuicá na xihín ña jánaha na nuú ñayivi sahá Jesús. Candehún. Xíní ñúhú caxóun nuú na cán. ⁶ Vatí mé a ndaa tá ndíco yó íchi cuéntá Jesús cúu yó na cuicá ndivaha nani íin vaha iní xihín ña cómi yo. ⁷ Jáchí coó ñaha ñehé tá naquixí ñuyiví yóho ta ni coó ñaha cuu cañehé cohó tá ná quiví. ⁸ Sahá ña cán queá tá íin ña cuxú ta tá íin ña candixí já queá ndítahan coo vaha iní. ⁹ Joo na cúni ndicuicá co candeé na cahnu na nuú ña cúni yiquí cuñu na ta já ndícava na nuú cuachi. Ta xihín ña yóho casáhá ndicají ini na caja na cuahá nuú ña núu. Ta cája ña yóho ña ná ndíhi saha ná. ¹⁰ Ta sahá ña catóo ndivaha ñayivi jjuhún sahá ña cán queá quixi cuahá ña núu jiní ná. Ndúu java na najándacoo na ña candeé ini na Jesús sahá ña catóo na jjuhún. Ta sahá ña yóho nacasáhá ndóho ini na janda nuú co ndéé ga ini na.

Ndítahan nuú na cúu cuéntá Jesús candico cáhnu na mé á

¹¹ Candehún, Timoteo, da cúu cuéntá Ndióxi. Xíní ñúhú caxóun nuú tóco ndihi ña núu já ná candico cáhnún íchi cuéntá ña ndaa. Cajún ña vaha, ña cúni Ndióxi ta candeé inún Jesús. Xíní ñúhú quihvi inún ñani táhún. Quiahva ndeé inún tá ndóho inún ta vii cajún tóco ndihi ñaha. ¹² Xíní ñúhú candico cáhnún íchi ña candeé inún Jesús. Coto a jándacoún íchi ña cañehe yohó cuhún coún indivi xihin Ndióxi. Jáchi saha mé ña jan nacana Ndióxi yohó tá nacaxi tuhún nuú cuahá ñayivi ña candeé inún Jesucristo. ¹³ Nu Ndióxi, mé á cája ña tácu tóco ndihi ñaha ndúu ñuyíví, xihín nu Jesucristo, mé á coó nayihví cahan ña ndaa tá nasandichi a nu Poncio Pilato, nu ndíví a cán sáhdá i chuun nu mún, Timoteo ¹⁴ ña ná cajún xihín ndinuhu inún tóco ndihi ña sáhdá Ndióxi nuun. Ta coto a ndíjama tohún ña jáchi quiahva já ñehe íni ñayivi jananí na yohó. Ta xíní ñúhú cajún ña yóho janda quiahva ná tandaa quivi quixi tucu Jesucristo, xitoho í. ¹⁵ Ta tá ná xinu coo quivi nasacu ini Ndióxi já caja mé á ña ná coo tóco ndihi ña yóho. Jáchi in tuhún Ndióxi cúu á ña yii ta cúu á xitoho nu tóco ndihi ñaha. Ta mé á cúu á jini nuú in in da cómi cuéntá sahá ñayivi ndúu ñuyíví. Ta mé á cúu á xitoho nuú ndihi da cúu xitoho nuú ñayivi ndúu ñuyíví. ¹⁶ Mé á cúu á in tuhún jini Ndióxi, ña a cúu quivi. Ta ni in ñayivi a cúu cativi yati nu íni mé á jáchi yéhe ndivaha nu íni mé á. Ta ni in ñayivi ndúu ñuyíví coó naxini na mé á jáchi a cuú cuni ñayivi Ndióxi. Ndítahan caja cáhnu í mé á anda ama cáa quivi jáchi a ndíhi toho sahá ña sáhdá mé á chuun. Já ná coo.

¹⁷ Ndítahan nu mún, Timoteo cahndún chuun nuú na cómi cuahá ñaha cuicá ñuyíví yóho ña ná a cácuu na ñayivi catóo ndíñehe jícó mé. Ta xíní ñúhú cahndún chuun nu ná ña ná a candeé ini na ñaha cuicá cómi na jáchi cuu ndihi saha tóco ndihi ñaha cómi na. Ña ndítahan caja na quea candeé ini na Ndióxi, mé á quiahva tóco ndihi ñaha nu yo já ná cajii íni yo. ¹⁸ Cahndún chuun nu ná ña ná caja vaha na ta ná cayojó joho ña vaha cája na. Ta xíní ñúhú coo tiahva na cahnda java na ña cómi na xihín java

ga ñayivi. ¹⁹ Jáchi xihín ña yóho ñehe táhvi ná coo cuahá ñaha cuicá na indivi tá ná tandaa quivi cuhun na coo na xihin Ndióxi anda ama cáa quivi.

²⁰ Candehún Timoteo. Xíní ñúhú quehe cuéntá vahún ña jánaha i nuun. Coto a cúni johún tuhún ña cahan ñayivi ñuyíví jáchi coó saha toho a ta ni co xini na ña cahan na saha. ²¹ Jáchi java na cán cáchí na xini ndivaha na joo najándacoo na ña candeé ini na Ndióxi.

Ná caja Ndióxi cuahá ñamaní xihín ndihi ndó. Já ná coo.

Carta ivi nacahyí Pablo nuú Timoteo

Chíndahá Pablo Ndióxi coo Timoteo

¹ Yehe cúu Pablo ta cúu u da apóstol, da cája chúun cuéntá Jesucristo. Nacaxi Ndióxi yehe ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasahan Ndióxi tuhun a nuú ñayivi ña cán queá tá cándéé ini na mé á já queá cuhun na coo na xihin mé á anda ama cáa quivi. ² Cáhyi i carta yóho nu mún, Timoteo jáchi cúun tátuhun jahyi mí i ta quihvi ndivaha ini i yohó. Ná caja cuaha Ndióxi, tátá yo xihin Jesucristo, xitoho í ñamaní xuhun ta ná tahnda ini a sahun ta ná caja mé á ña ná coo vaha inún.

Jácahan Pablo Timoteo ña ná ndicani da nuú ñayivi sahá Jesucristo

³ Ndiquiahva i ndixahvi nu Ndióxi saha mún, Timoteo jáchi ndicuhun ini i yohó tá xíca tahví i nu Ndióxi ñuú ta ndiví. Cája chúun vaha i cuéntá mé á tátuhun nacaja chúun tásahnu jícó i sanahá. Ta xini ña iin vaha ínimá i nu Ndióxi. ⁴ Ndícuhun ini i ndaja nasacu ndivahún ta natahnda inún sahá i tá naquee e cán vaxi i yóho. Jári yehe va cuni ndivaha i cuni tucu u yohó já ná chutú ndaa ini i xihin ña cáji ndivaha ini i. ⁵ Ndiquiahva i ndixahvi nu Ndióxi tá ndicuhun ini i ña mé a ndaa cándéé inún Jesucristo. Nu cuítí nacandéé cáhnu ini ná chéhun, Loida xihin nánún, Eunice Jesucristo ta quiahva já xini vaha i ña cándéé cáhnu inún mé á.

⁶ Ña cán queá jácahan i yohó ña ná ndicuhun inún caja chúun chágun xihin ña nañehe táhvun nu Ndióxi tá nachinúu i ndahá i jinun. ⁷ Jáchi co cuni Ndióxi ña ná cayihví yo. Já queá nasahan ínimá yí á nu yo já ná nduu ndeé ini ta ná quihvi ini táhan í ta ná cahnu yo mí cañehe vaha í quiahva xihin á. ⁸ A cácahan toho nuun cahun tuhun vaha sahá Jesucristo, xitoho í. Ta a cácahan nuun saha mí i vatí ndácaan i vecaa sahá Jesucristo. Joo ña ndítahan cajún queá quiahva ndeé inún tá ná ndoho inún sahá Jesucristo jáchi sahan Ndióxi ndeé mé á

nuun. ⁹ Najácaacu Ndióxi mí ta nacaxi a mí ña ná cacuu ñayivi yí cuéntá mé á. Ta a juú sahá ña nacaja vaha í joo nacaxi a mí jáchi nasacu ini a caja ñamaní xohó anda tá cámaní cava sahá saha ñuyiví. Sahá ña cán queá nachindahá a Jesucristo quivi a sahá cuachí. ¹⁰ Ta anda viti naxinu coo ña nasacu ini a jáchi naquixi Jesucristo ñuyiví yóho ta naxihi a ndica crúxu. Ta sahá ña nacaja mé á co ndítahan yihví yo quivi jáchi cuhun i coo í xihin mé á anda ama cáa quivi tá ná cándéé ini tuhun vaha cáhan sahá Jesucristo.

¹¹ Nacaxi Ndióxi yehe ná cacuu u in apóstol cuéntá mé á ña ná jánaha i tuhun vaha sahá Jesús nuú ñayivi, na coo naquixi chichi Israel. ¹² Ta vatí ndóho ini i sahá ña yóho joo co cácahan toho nuú i jáchi xini vaha i yo cúu Jesucristo, mé a cándéé ini i. Nandiquiahva i mí i ndáha mé á ta xini vaha i ña candaa mé á yehe anda quiahva ná tandaa quivi quixi tucu a ñuyiví yóho.

¹³ Ta jácahan i yohó ña ná candico cáhnún ichi ndaa, ña najánaha i nuun. A jándicoún ña cándéé inún Jesucristo ta a jándicoún ña quihvi inún ñayivi jáchi in nanduú xihin Jesucristo sahá ña cándéé ini mé á. ¹⁴ Sahá ña ndácaan ínimá yí Ndióxi ini in in yó ta sahá ña chindeé a mí sahá ña cán queá xini ñuhú cacu vahún ña nasahan Ndióxi nuun.

¹⁵ Sa xini vahún ña najándicoo tóco ndihi na cúu cuéntá Jesús nduu estado Asia yehe. Tañu mé na cán ndácaan Figelo xihin Hermógenes. ¹⁶ Cuni ña ná tahvi ini Ndióxi sahá Onesíforo xihin na vehe da jáchi cuahá tañu nachindeé da yehe ta já nandivaha ini i. Ta coo nacacahan nu da sahá ña ndácaan i vecaa. ¹⁷ Ña nacaja da queá nandinducú da yehe tá nasaa da ñuu Roma yóho ta coo nandiquehe ndeé da anda quiahva nandinehe dá yehe. ¹⁸ Ná tahvi ini Ndióxi sahá da cán tá ná ndinda quivi quixi tucu Jesucristo ñuyiví yóho. Ta sa xini vahún ña nachindeé da yehe tá nasahin i ñuu Efeso.

2

Ná quiahva ndeé ini tá ndóho ini sahá Jesucristo

1 Ta mún, Timoteo cúun tátuhun jahyi mí i ña cán quea jácahan i yohó ña ná coo ndacú inún xihín ndée ña nasahan Jesucristo nuun. 2 Sa xini johún tuhun vaha naçaxi tuhun i nuú cuahá ñayivi. Ta viti ndítahan nu mún jánahún ña cán nuú java ñayivi, na cúu ñayivi ndísáhnú ini já ná cúu jánahá ná ña nuú java ga ñayivi.

3 Quiahva ndeé inún tá ndóho inún sahá Jesucristo jáchi cúun tátuhun in soldado vaha cuéntá mé á. 4 Jáchi in soldado cája cuití da ña sáhdá jefe da nu dá ta co cája da inga ga ñaha jáchi cúni da ña ná tahan ini jefe da sahá ña cája da. Tá quiahva cája mé soldado yóho quiahva já ndítahan nu yo caja í. 5 Jári sa xini vaha ndó ndaja cája da sájíquí pelota. Tá co sájíquí vií da já quea a cuú quee vaha da. Quiahva já cúu á xihín mí jáchi tá co cája í ña cúni Ndióxi já quea a cuú quee vaha í. 6 Tá ndíhi ini in da xútu já quea ndítahan nu dá jáquee da nu cuítí ñaha naxutu da. Ta quiahva já ndítahan ndíhi ini caja chúun í cuéntá Jesucristo já quea cuu ndiquehé ña quiahva Ndióxi nu yo. 7 Ndicaní vaha inún saha tóco ndíhi ña naçahan i xuhun ta já chindeé Ndióxi yohó candaa vaha inún tóco ndíhi ña cáchi i xuhun.

8 Xini ñúhú ndicuhun inún Jesucristo, mé á naquixi chichi David. Najánditacu Ndióxi mé á tá naxihí a. Ta viti cáxi tuhun i tuhun vaha saha mé á nuú ñayivi. 9 Ta ndóho ndivaha ini i sahá tuhun cáhan i nuú ñayivi. Naçató na yehe xihín cadena ta nachicaan na yehe vecaa tá quiahva cája na xihín in da quini. Joo a cuú caja na ña yóho xihín tuhun Ndióxi jáchi cuaha chaga ñayivi cáhan na sahá Jesús viti. 10 Ña cán quea ín tiahva i ndoho ini i sahá ñayivi, na naçaxi Ndióxi cacuu na cuéntá mé á. Jáchi cúni Jesucristo jácaçu a ndíhi na cándéé ini mé á já ná coo na xihín mé á anda ama cáa quivi. Ta ñúchí ndivaha cán. 11 Ña cáchi mé ña yóho cúu á ña ndaa:

Tá ná quiví sahá Jesucristo já quea cuu canduú xihín mé á anda ama cáa quivi.

12 Tá ná caja ndeé ini ña ndóho ini sahá Jesucristo já quea vaxi quivi cahnda í chuun xihín mé á.

Tá ná cachí ña co cúu yo cuéntá Jesucristo já quea cachi mé á ña co xini toho a mí.

13 Vatí ná ndindójó yo sahá Jesucristo joo a ndíndójó toho mé á saha yo,

jáchi mé a ndaa jáxinu coo mé á tuhun sahan nu yó caja.

Táhán ini Ndióxi xihín da cája chúun vaha cuéntá mé á

14 Ña yóho ndítahan jándicuhun inún ñayivi. Cahndún chuun nu ná ña ná a cáni táhan yuhu ná saha ndá tuhun cúu ña vaha chaga jáchi coo saha cúu á. Joo ña cája na cán quea játiví na xini túni mé ñayivi xini johó ña cán. 15 Ndinuhu inún caja chúun vahún cuéntá Ndióxi já ná tahan ini mé á xuhun. Tá ná cajún ña yóho já quea a cácahan nuun jáchi ndinuhu ña ndaa najánahún nuú ñayivi. 16 A quíhvi nuún ndituhún xihín ñayivi tá ndituhún quíhvi na jáchi quéta nuu chaga na tañu cuachi tá ndituhún quíhvi na. 17 Ta java tañu ña cáhan xihín táhan na jan jándihíhvi a ñani táhan na jáchi tá quiahva jándíhi cuehe táhyi sahá yiquí cuñu ñayivi quiahva já jándíhi tuhun cáhan na sahá ñayivi. Já nandoho Himeneo xihín Fileto. 18 Nacaxoo ndíví da nu íchi ña ndaa ta viti jánahá da ña tuhún jáchi cáchi da ña sa nayaha va quivi tá nditacu tucu na sa naxihí. Jájana da jiní java ñayivi ña ná a cándéé ga ini na Jesús. 19 Joo Ndióxi cáhan ña ndaa ta a cuú ndijama mé á ña naçahan. Ta já cáchi tuhun Ndióxi sahá ñayivi cuéntá mé á: “Xini Ndióxi ndá na cúu na cuéntá mé á.” Já cáchi tucu tuhun Ndióxi já: “Tá ná cachí ñayivi ña cándéé ini na Jesucristo, xitoho na já quea ndítahan nu ná jándicoo na cuachi cája na”, cáchi tuhun Ndióxi.

20 Ta viti ná cacu u in quiahva nuun: ini in vehe cáhnú ín ñaha jihun cuáan xihín ñaha jihun cúxú. Jári ñúhu ri ñaha naçavaha xihín yító ta ñúhu ri ñaha naçavaha xihín ndahyi. Ta java ña cán ín javí a ta java ña cán ín chuun a ndijáá ní quivi. 21 Tá najándicoo í cuachi cája í já quea cacuú ñayivi vií nu Ndióxi. Ta cacuú tátuhun in coho vaha jáchi cuu caja chúun í cuéntá Ndióxi ta já cuu coo tiahva í caja í tóco ndíhi ña vaha.

²² Cama chá caxoún nuú cuachi ña ndiáva ini da tacú caja da. Ta candico cáhnún íchi cuéntá ña ndaa ta candeé inún Ndióxi ta quihvi inún ñayivi ta coo vaha inún xihin ná. Tá ná cajún ña yóho in cacuún xihin tóco ndihi na cúu cuéntá Jesús, na ín vií ínimá nu Ndióxi jáchi xíca na nu Ndióxi ña ná chindeé a na. ²³ A quihvi nuún nditúhún quihvún xihín ñayivi jáchi tá ná cajún ña yóho já queá vaxi quivi tá casahá caní táhan na xuhun. ²⁴ Ta ndá da ndíco íchi cuéntá Jesús co ndítahan nu dá nducú da cuachi xihín ñayivi. Ña ndítahan caja da queá caja vaha da xihin tóco ndihi ñayivi ta ná cacuu da in da tiahva jánahá vaha ñayivi ta ná coo cáhnu ini da xihin ná. ²⁵ Ta co ndítahan nu dá ndiñehe jíco da mé dá nani jánahá da nuú ñayivi, na sáá ini xihín tuhun Ndióxi jáchi tiahva náá caja Ndióxi ña ná ndicó coo ini na ta já candaa ini na ña ndaa sahá Jesucristo. ²⁶ Jáchi tá ná ndicó coo ini na já queá janí ná ndáha tiñáhá sacuahá jáchi nasacomí mé rí cuéntá saha ná ña ná caja na ña cúni mé rí.

3

Ña tandaa caja ñayivi tá jalóho cúni ndihi sahá ñuyívi

¹ Ta ndítahan candaa vaha inún, Timoteo ña tá ná cayati quivi quixi tucu Jesucristo ñuyívi yóho já queá ndoho ndivaha ini na cúu cuéntá Jesús. ² Jáchi vaxi quivi tá caja ñayivi cuahá ndivaha cuachi. Cuahá ñayivi cajihnda ná ta quihvi ndivaha ini na jjuhún na. Ta já caja cáhnu na mé ná ta ichi ndivaha coo ini na ta candají na Ndióxi ta a cúni johó na nuú cahán tátá náná na xihin ná. Ta ni ndixahvi a ndiquiahva na nu Ndióxi ta ni a cája cáhnu na mé á. ³ Ta a quihvi ini táhan na ta ni a cája cáhnu ini saha táhan na. Ta cahán jíquí na saha java ga ñayivi ta catuhún na. Ta a cuú cahnu na nuú ña xíca ini na caja na. Xíxi coo ini na xihin ñayivi ta candají na tóco ndihi ña vaha. ⁴ Jíco túhún táhan na. Ta cacuu na ñayivi cama jiní. Ta caja ichi ndivaha ini na. Catóo chága na cájii ini na xihin ñaha ñuyívi yóho a juú ga xihín ñaha Ndióxi. ⁵ Ta caja na tá quiahva cája na cúu cuéntá Ndióxi joo chijehé tuhun na saha Ndióxi,

mé á sahan ndée nu ná caja na ña cúni mé á.

Caxoún nuú ndihi na cája cuachi yóho. ⁶ Jáchi tañu na jan ndúu java ñayivi, na quihvi vehe tá vehe jándahvi na najihí quihvi xihín ña jánahá na. Ta mé najihí yóho ndójo cuahá ndivaha na cuachi jáchi nayaha quiahva cája na tá nuú ña núu xíca ini na caja na. ⁷ Ta mé najihí yóho jácuaha ta jácuaha na joo co xínu coo nu ná candaa ini na ña ndaa. ⁸ Sañahá ndivaha nasanduu ivi da tají. In da naní da Janes ta inga da naní da Jambres. Tá quiahva nasaji nuu da cán nuú Moisés quiahva já sáji nuu java ñayivi nuú ña ndaa viti. Ña núu ndacaan xíní túni na ta coó naxeen na candeé ini na Jesucristo. ⁹ Joo vaxi quivi tá a cúu ga jándahvi na ñayivi jáchi mé quivi cán candaa cáxi ini ñayivi ndaja tóntó nacaja na cán. Já nandoho Janes xihin Jambres sañahá jáchi nacandaa cáxi ini ñayivi ña nacaja núu da xihin Moisés.

Sáhdá tucu Pablo chuun nuú Timoteo

¹⁰ Joo sa xini vahún tá quiahva nacaja i tá najánahá i nuun. Ta sa xínun ña cája i catacu u xihín ña nasacu ini i caja i chága chí nuu. Ta sa xínun ndaja candeé ini i Jesús. Ta sa mé quiahva já xini vahún ña co xójo ini i xihin ñayivi. Ta sa xini vahún ña quihvi ini i tóco ndihi ñayivi. Ta xínun ndaja nasahan ndee ini i ¹¹ tá nacaja xíxi na xihin i ta ndaja najándoho na ini i tá nasahin i ñuu Antioquía xihin ñuu Iconio xihin ñuu Listra. Joo nachindeé Ndióxi yehe ta natavá mé á yehe nu tóco ndihi ña nandoho i. ¹² Ta mé a ndaa ndoho tá ndoho ini ñayivi tá cúni na candico cáhnu na íchi cuéntá Jesús. ¹³ Ta ñayivi quini, mé na jándahvi ñayivi cája chága ví na cuachi ta co xini na ndájá xínu coo nuú ndihi cuachi cája na. Xíca na jándahvi na ñayivi ta janda mé na cán najándahvi ñayivi.

¹⁴ Joo jácahan i yohó, Timoteo ña ná a jándicoún ña ndaa, ña nacatiahvún tá najácuahún xihin nde jáchi xini vahún ña cúu á ña ndaa. Ta sa xini vahún ndá ñayivi cúu nde. ¹⁵ Ta cándaa vaha inún tuhun Ndióxi jáchi anda tá lohún najácuahún ña. Ta mé tuhun Ndióxi cuu jánahá yohó cajún ña cúni mé á ta cuu jácacu a yohó

jáchi cándeé inún Jesucristo. ¹⁶ Nacahyí ñayivi tóco ndihi tuhun Ndióxi yóho jáchi najácahan Ndióxi inima ná ña ná caja na ña. Ta mé tuhun Ndióxi yóho chindeé a mí jáchi jánaha mí caja í ña cúni Ndióxi ta jánani ri a mé ví tá co cája vaha í. Ta jándicaca vaha mí tá co xíca vaha í íchi cuéntá Ndióxi. Ta sa mé quiahva já jánaha mí ña ná cacuu ñayivi ndaa, na co cája cuachi. ¹⁷ Já queá ná cuu nduu ndacú chága ini na cándeé ini Ndióxi xihín tuhun mé á ta xihín ña yóho cuu coo tiahva na caja na tá nuú ña vaha.

4

¹ Vaxi quivi quixi tucu Jesucristo ñuyiví yóho cacomí a cuéntá sahá yo ta mé já caja vií a sahá na tácu xihín sahá na sa naxihi. Sahá ña cán queá nu Ndióxi xihín nuú Jesucristo, xitoho í sáhdá i chuun nu mún, Timoteo ² ña ná coo tiahvún cahun tuhun Ndióxi nuú ñayivi ní tiempo tá núná nuún á tá coó. Ta ndítahan nuun cavún jiní na cája cuachi ta jácahún na ña ná caja na ña cúni Ndióxi. Ta ndítahan quiahvún tuhun ndeé ini na. Ta vií vií jánahún tuhun Ndióxi nu ná ní tiempo. ³ Jáchi vaxi quivi tá a cándusa ga ñayivi cuni johó na tuhun ña ndaa. Joo ndihi ini na nducú cuahá na maestro, da jánaha ña xíca ini mé ná taa johó na. ⁴ Ta a cándusa na taa johó na ña ndaa jáchi cájii chága ini na taa johó na ña tuhún cuéntá ñayivi ñuyiví. ⁵ Sahá ña cán queá sáhdá i chuun nu mún, Timoteo ña ná cañehe vahún quiahva xihín ña cajún. Ta quiahva ndeé inún tá ná ndoho inún. Caxi tuhún tuhun vaha sahá Jesús nuú ñayivi xihín nd-inuhu inún. Ta xíní ñuhú jáxinu coún tóco ndihi chuun nasahan Ndióxi nuun cajún.

⁶ Sa íin tiahva i joco i mí i nu Ndióxi. Sa xíní vi ña sa nacayati quivi quivi vi. ⁷ Nacaja chúun vaha i cuéntá Ndióxi tátuhun cája chúun vaha in soldado nu jefe da. Najáxinu coo ndihi i chuun nasahan Ndióxi nuú i tátuhun cája in da xínu tá sa naquee vaha da. Ta nandico cáhnu i íchi ña cándeé ini i Jesús. ⁸ Ta viti ndáti i casaa quivi caja vií Jesucristo, xitoho í saha tóco ndihi ñayivi. Mé tiempo cán ndiquehe e ña quiahva mé á nuú i sahá ña nacaja i ña ndaa. Ta quiahva já caja Jesucristo, mé á cúu ña ndaa xihín java ga ñayivi, mé na

cájii ini ndáti na casaa quivi quixi tucu a ñuyiví.

Cáhan Pablo cuéntá mé da viti

⁹ Ndihi inún quixi camún coto nihnún yehe. ¹⁰ Najándicoo Demas yehe jáchi nacatoo chága da ñaha ñuyiví yóho ta cuahan da ñuu Tesalónica viti. Ta naquee Crescente cuahan da estado Galacia ta já naquee Tito cuahan da chí estado Dalma-cia. ¹¹ In tuhún Lucas íin da xihín i. Ndin-ducún Marcos ná quixi da xuhun tá ná quisún yóho jáchi cuu chindeé vaha da yehe xihín chuun cája i yóho. ¹² Sa nachindahá i Tiquico ñuu Efeso. ¹³ Tá ná quisún yóho cajún ñamani cañehún cotó ndeé e ña najándicoo i ñuu Troas vehe Carpo. Ta jári libro va cañehún ña quisún yóho. Ta a ndíndójún cañehún ní quiti ña nacahyí i nuun.

¹⁴ Á co ndícuhun inún Alejandro, da cája chúun cáni caa. Cuahá ndivaha ña núu nacaja da xihín i joo vaxi quivi tá chahvi da sahá, caja Jesucristo, xitoho í. ¹⁵ Cuéntá coún xihín dá jáchi cándají ndivaha da tuhun Ndióxi, ña jánaha yó nuú ñayivi.

¹⁶ Tá nandiquehe e sahá i nu cuítí nuú na jutixia ni in ñayivi coo nachindeé yehe. Tóco ndihi na najándicoo na yehe. Ná caja cáhnu ini Ndióxi sahá ña nacaja na cán. ¹⁷ Joo Ndióxi queá nachindeé a yehe ta nasahan ndeé á nuú i ña ná cuu caxi tuhun i tuhun vaha sahá Jesús ná cuni johó tóco ndihi na coo naquixi chichi Israel. Tá nachindeé Ndióxi yehe já cúu á tátuhun nacacu yehe yuhú león. ¹⁸ Ta cándeé ini i ña jácacu a yehe nuú ndihi ña núu. Ta candaa vaha Ndióxi yehe anda quivi cuhun i indivi coo i xihín mé á nu cahnda Ndióxi chuun anda ama cáa quivi. Cóho caja cáhnu í mé á anda ama cáa quivi. Já ná coo.

Ndíndayí Pablo na cúu cuéntá Jesús

¹⁹ Chindahá i Ndióxi coo Prisca xihín Aquila xihín na vehe Onesíforo. ²⁰ Nacandoo Erasto ñuu Corinto. Ta nacandoo Trófimo ñuu Mileto jáchi quihvi da. ²¹ Ndihi inún quisún yóho tá camani xinu coo tiempo vixi. Eubulo xihín Pudente xihín Lino xihín Claudia chindahá na Ndióxi coún. Ta jári ndihi na cúu cuéntá Jesús ñuu yóho chindahá na Ndióxi coún.

²² Ná coo Jesucristo, xitoho í xuhun. Ná
caja Ndióxi cuahá ñamanj xihín ndihi ndó.

Carta n̄achindahá Pablo nu Tito

Cáhan Ndióxi Pablo xih̄in Tito

¹ Yehe cúu u Pablo, da c̄aja chúun cuéntá Ndióxi ta cúu u in apóstol cuéntá Jesucristo. N̄achindahá Ndióxi yehe c̄axi tuhun i tuhun v̄aha sah̄a mé á nuú ñ̄ayivi ñ̄a ná candeé ini na mé á. Ta já ná candāa ini na ñ̄a ndaa sah̄a mé á jáchi n̄andicaxi a na. ² Ta ndáti tiahva n̄a cuhun n̄a coo na xih̄in mé á and̄a ama cáa quiv̄i jáchi já nasahan Ndióxi tuhun a nu yó tá cáman̄i cav̄a s̄ahá sah̄a ñ̄uyiv̄i. Ta c̄o cáhan Ndióxi ñ̄a tuhun. ³ Ta viti n̄axinu c̄o quiv̄i nasacu ini Ndióxi jánah̄a nuú ñ̄ayivi ndá quiahva cuu candeé ini na mé á. Ta viti ndójo i chuun ñ̄a nasahnda Ndióxi nuú i ñ̄a ná c̄axi tuhun i tuhun v̄aha sah̄a Jesucristo nuú ñ̄ayivi, mé a jác̄acu mí. ⁴ Chindahá i tutu yóho nu mún, Tito, da cúu tátuhun jah̄yi mí i jáchi in nuú c̄andeé ini Jesucristo. Ta xica tah̄vi i nu Ndióxi, tátá yó xih̄in nuú Jesucristo, xitoho í, mé a jác̄acu mí ñ̄a ná c̄aja cuah̄á ñ̄aman̄i xuhun ta ná c̄aja ñ̄a ná coo v̄aha inún.

Chuun n̄acaja Tito isla Creta

⁵ Najándicoo i yohó isla Creta jan ñ̄a ná jáxinu c̄oun chuun ñ̄a najándicoo ñ̄ah̄nu i jan. Ndítahan ndicasún n̄a sacuah̄a nuú n̄a cúu cuéntá Jesús in in ñ̄uu tá quiahva n̄andicani i nuun cajún. ⁶ Ta mé da sacuah̄a yóho ndítahan cacuu da ñ̄ayivi v̄aha, da a cúu ñ̄ehe ini ñ̄ayivi jánani na sah̄a ñ̄a c̄aja da. Ta ndítahan nu dá cacuu da da c̄oó inga ñ̄ah̄a xih̄in ta in túhún ñ̄ájihí da ndítahan coo. Ta ndítahan nuú jah̄yi da candeé ini na Ndióxi. Ta c̄o ndítahan nuú jah̄yi da c̄aja na ñ̄a núu joo ndítahan nu ná candúsa na c̄aja na ñ̄a cáchi náná tátá n̄a já ná a cúu chícaan ñ̄ayivi cuachi jata ná. ⁷ Jáchi ndá da cúu da sacuah̄a c̄aja chúun da cuéntá Ndióxi sah̄a ñ̄a cán queá ndítahan cacuu da in ñ̄ayivi ndaa. Ta c̄o ndítahan nu dá c̄aja ichi ini da ta ni c̄o ndítahan nu dá c̄aja cama ini da xih̄in ñ̄ayivi. Ta ni ná a cácuu da da xih̄i ta ni ná a cátóo da caní táhan da xih̄in ñ̄ayivi

ta ni ná a cátóo da ñ̄ehe cuah̄a dá jiuhún. ⁸ Ñ̄a ndítahan nu dá c̄aja da queá c̄ajii ini da ndiquehe v̄aha da ñ̄ayivi vehe da ta ná c̄aja da ñ̄a v̄aha cuití va ta ná cacuu da da ndísáhn̄u ini, da cañehe v̄aha quiahva. Ta ndítahan nu dá c̄aja da ñ̄a ndaa cuití va ta ná candico cáhn̄u da ichi cuéntá Ndióxi ta ná candaca vií da yiquí cuñu da ná a c̄aja da cuachi. ⁹ Ta ndítahan nu dá cativi tuun da ñ̄a ndaa sah̄a Jesucristo, ñ̄a nacatiahva da já queá cuu chindeé da ñ̄ayivi xih̄in ñ̄a ndaa jánah̄a da nu na. Ta xih̄in mé tuhun v̄aha yóho cuu jáxinu da ini java ga ñ̄ayivi, n̄a cáhan núu sah̄a tuhun Ndióxi.

¹⁰ Jáchi cuah̄á ñ̄ayivi c̄o c̄uni n̄a c̄aja na ñ̄a cáchi tuhun Ndióxi. Ta tañu n̄a yóho ndúu cuah̄á n̄a Israel. C̄oó sah̄a toho tuhun cáhan n̄a ta xih̄in ñ̄a yóho jándahvi na ñ̄ayivi. ¹¹ Yuhú n̄a yóho ndítahan chicají jáchi xica na jájaca n̄a jiní ñ̄ayivi ta janda tóco ndihi n̄a ndúu vehe nacava na jiní ná xih̄in ñ̄a c̄o cúu ñ̄a ndaa já ná ñ̄ehe cuah̄á n̄a jiuhún jatá ñ̄ayivi jándahvi ñ̄ahá n̄a.

¹² Ta tañu n̄a yóho nasah̄iin in profeta ta já nacachi da já sah̄a ñ̄ayivi ñ̄uu da, n̄a ndúu isla Creta cán: “N̄a ndúu Creta cáhan n̄a ñ̄a tuhún ní tiempo. Yucú n̄a ta ndehé n̄a ta júsá ndivaha na c̄aja chúun na”, nacachi da. ¹³ Ta ñ̄a ndaa cúu ñ̄a nacahan da cán sah̄a ná. Ñ̄a cán queá ndítahan nuun jánani vahún n̄a ñ̄a ná candeé cáhn̄u ini na Jesús ¹⁴ ta ná a táa joh̄o na cuéntó ñ̄a ndicani ñ̄ayivi Israel nu ná jáchi ñ̄a quixi jiní mé va na queá. Ta ná a táa joh̄o na nu cáhan ñ̄ayivi, n̄a nacaxoo nuú ñ̄a ndaa.

¹⁵ Ta tá ndacaan vií xini túni ñ̄ayivi já queá tóco ndihi ñ̄aha cúu á ñ̄aha vií nu ná. Joo tá c̄o candúsa ñ̄ayivi Ndióxi ta ndacaan ñ̄a núu xini túni n̄a já queá tóco ndihi ñ̄aha cúu á ñ̄a núu nu ná jáchi c̄o in vií inima ná xih̄in xini túni n̄a. ¹⁶ Vatí cáchi n̄a yóho ñ̄a c̄andeé ini na Ndióxi joo xih̄in ñ̄a núu c̄aja na nah̄a ñ̄a mé a ndaa c̄o c̄andeé ini na mé á. Sáa ndivaha ini na ta a xeén toho na c̄aja na ñ̄a ndaa sah̄a ñ̄a cán queá ni in ñ̄aha v̄aha a cuú c̄aja na.

2

Ndítahan jánah̄a yó tuhun v̄aha sah̄a Jesús nuú ñ̄ayivi

¹ Ta ndítahan nu mún, Tito jánahún ñayivi ndaja caja na ña ndaa, ña cáchí tuhun Ndióxi caja na. ² Jánahún na sacuahá ña ndítahan cacuu na ñayivi ndisáhnú ini, na ín toní ñúhú ñayivi xihín, na ñéhe vaha quiahva xihín ñaha. Ta ndítahan candeé vaha ini na Ndióxi ta ndítahan quihvi ini na ñayivi ta ndítahan coo ndacú ini na já ná cuu candeé ini na tá ná ndoho ini na. ³ Ta quiahva já ndítahan coo toní ñúhú najihí sacuahá xihín ñayivi. Ta co ndítahan cacuu na najihí tuhún ta ni ná a cacuu na na xihí. Jáchi ndítahan nu ná cacuu na na ín toní ñúhú ñayivi xihín sahá ña vaha cája na. ⁴ Ta ndítahan jánahá na najihí yúta ña ná quihvi ini na yí ná xihín jahyi na. ⁵ Ta ndítahan cahnu na mé ná ta ndítahan cacuu na ñayivi vii ta ná candaa vaha na vehe na ta ná caja na ña vaha cuití va. Ta ndítahan candúsa na caja na ña sáhná yí ná nu ná. Tá cája na tóco ndihi ña yóho já queá a ñéhe ini ñayivi cahan núu na saha tuhun Ndióxi.

⁶ Ta quiahva já ndítahan jácahún da tacú ná coo ndisáhnú ini da. ⁷ Xihín ña cájún jánahún nu ná ndaja caja na ña vaha. Ta xini ñúhú jánahá ndisáhnú ña yóho nu ná ta ná cajún ña xihín ndinuhu inún. ⁸ Ta ná cahún ña vaha cuití va já queá a cúu chican ñayivi cuachi jatun. Ta xihín ña yóho cacahan nu na co cúní yohó jáchi a cúu cahan ihvi ná saha ndihi ndó, na cúu cuéntá Jesús.

⁹ Ta jácahún ndá na cája chúun xihín xitoho na ña ná caja na tóco ndihi ña sáhná xitoho na nu ná jáchi xini ñúhú coo toní ñúhú na xihín ná ta ná a ndúcú ñéhe ichi na tuhun nuú xitoho na. ¹⁰ Ta ná a cája cuíhná na nu ná joo ná cacuu na ndinuhu ñayivi ndaa. Ta xihín ña yóho náha ndá quiahva ndató ndivaha cúu tuhun Ndióxi, ña cahan saha mé á jácaacu a mí.

¹¹ Najánañá Ndióxi mí ña cúní a caja cuahá ñamaní xihín ñayivi ta ín tiahva mé á jácaacu a tóco ndihi ñayivi. ¹² Ta jánahá mé á nu yo ña ndítahan jándicoo í tóco ndihi ña núu, ña xica ini caja í ñuyiví yóho. Jáchi ndítahan nu yo cahnu í mí ta ná caja í ña ndaa cuití va ta ná candico cáhnú í ichi cuéntá Ndióxi. ¹³ Ta cáji ini nani ndátí tiahva í xinú coo quivi ndicó coo tucu Jesucristo xihín ndéé á. Ta cúu á Ndióxi cáhnú

ta jácaacu a mí. ¹⁴ Nandiquiahva Jesucristo mé á quivi a sahá ndihí jáchi cúní a jácaacu a mí ná a cája ga yo ña núu. Ta cúní a jándoo a tóco ndihi cuachí já ná nduú ñayivi cuéntá mé á ña ná ndihi ini caja í ña vaha.

¹⁵ Ndítahan jánahún tóco ndihi ña yóho nuú ñayivi ta jácahún na ña ná caja na ña naçahyí yóho. Ta ndítahan nu mún jánanún ñayivi cája cuachi jáchi ín sahnú cahdún chuun nu ná. Coto a quiahvún ñamaní nuú ñayivi quehe núu na yohó.

3

Ña ndítahan caja na cúu cuéntá Jesús

¹ Xini ñúhú jándicuhun inún na cúu cuéntá Jesús ña ná coo johó na nu sáhná na jutixia nu ná. Ta ná coo tiahva na caja na ndá ña naçuu nani cúu á ña vaha. ² Ta xini ñúhú cahún xihín ná ña ná a cahan núu na sahá inga ñayivi ta ná a cáni táhan na xihín inga na joo vii caja na xihín ná. Ta ná a ndíñehe jícó na mé ná nuú ndihi ñayivi.

³ Jáchi ndítahan ndicuhun ini ña tá cámaní ndihví ichi cuéntá Jesús já naçaja í cuahá nuú cuachi. Quihví naçajaja í ta coo naçaja í ña cúní Ndióxi. Naçandúsa í ña tuhún, ña naçachi na jándahvi mí. Ta naçajaja í ta nuú ña núu jáchi nandiava ini yo caja í ña ta mé cuachi naçahnda chuun nu yo. Tóco ndihi quivi naçajaja í ña núu ta naçacuú ñayivi ihvi ini. Naçandají ñayivi mí ta ndaja mí naçandají táhan í viti. ⁴ Anda jáví Ndióxi, mé a jácaacu mí najánañá nu yo ña táhvi ini a saha yo ta quihvi ini a mí. ⁵ Sahá ña cán queá najácaacu a mí. Ta coo naçajaja ña sahá ña vaha naçajaja í. Joo najácaacu a mí jáchi táhnda ini a saha yo. Najándoo a cuachí ta xihín ña yóho naçajaja ínima yí Ndióxi ña nanduú ñayivi saá, na xica ichi saá viti. ⁶ Naxihí Jesucristo saha yo ña ná jácaacu a mí ta xihín ña yóho naçhutú ndaa ínima yo xihín ínima yí mé á. ⁷ Naçajaja Ndióxi ñamaní uun xihín yo ña ná canduu ndaa yo nu mé á sahá ña cán queá ndátí tiahva í cuhun yo coo í xihín mé á anda ama cáa quivi.

⁸ Ta tóco ndihi ña cáhyí yóho cúu á ña ndaa. Sahá ña cán queá cúní ña ná ndinuhu inún jánahún ña yóho nuú ñayivi, na cúu cuéntá Jesús ña ná ndihi ini na caja na ña

vaha. Jáchi ña ñacahyí i yóho cúú á ña vaha ta cuu chindeé a tóco ndihi ñayivi. ⁹ Joo coto a quíhvi nuún nditúhún xihín ñayivi cáhan tuhun quíhvi, ña ndícani sahá chichi tásáhnú jícó yó. Ta a ndíhvi ndó cani táhan yúhu ndó xihín ná saha ley Moisés jáchi coó saha toho ña yóho ta mé a uun va quéa cani táhan ndó xihín ná.

¹⁰ Tá ín ín na cúú cuéntá Jesús ta tá cúní na cani táhan na xihín java ga na cúú cuéntá Jesús, xíní ñúhú jánanún na ña ná a cája ga na ña yóho. In á ivi tañu cuití va cahún xihín na ta tá co cúní na cuni johó na ña cáhun xihín ná já quéa tavún na ña ná cuhun na.

¹¹ Jáchi sa xíní vahún ña nandeta nuu ña núu xíní túní ná ta sa xíní vaha na ña cája na cuachi.

Sáhdá Pablo chuun nu Tito

¹² Tá ná chindahá i Artemas á Tíquico nuun já quéa ndihi inún cuhun ñuu Nicópolis jáchi cán cája i cuéntá coo i tiempo vixi. ¹³ Xíní ñúhú ndinducún ndaja cuu chindeún Apolos xihín Zenas, mé da tiahva ley. Quiahvún ñaha nu ná já ná a ndímaní ñaha tá ná quee na cuhun na viaje na.

¹⁴ Ta ndítahan nu ndihi na cúú cuéntá Jesús jácuaha na ndaja caja na ña vaha xihín java ga ñayivi. Ta ndítahan nu ná chindeé na ndá ñayivi nacuu na ndímaní ñaha nu. Tá ná caja na ña yóho já quéa a cóo uun va na ñuyíví yóho.

Ndínqayí Pablo Tito

¹⁵ Tóco ndihi na ndúu xihín i chindahá na Ndióxi coún ta chindahá nde Ndióxi coo ndihi na cúú cuéntá Jesús cán jáchi xíní vaha i ña quíhvi ini na ndehe sahá ña cándeé iní Jesús. Ná caja Ndióxi cuahá ñamaní xihín ndihi ndó. Já ná coo.

Carta nacahyí Pablo nuú Filemón

Chíndahá Pablo Ndióxi coo Filemón

¹ Yehe cúú ʋ Pablo ta ndácaan ʋ vecaa yóho saha ña cúú ʋ cuéntá Jesucristo. Yehe xihín Timoteo, ñani í, da cúú cuéntá Jesús cáhyí nde carta yóho nu mún, Filemón. Quihvi ini nde yohó ta in cúun xihín nde sahá ña cája chúun cuéntá Jesucristo. ² Ta jári cáhyí nde carta yóho nuú na cúú cuéntá Jesús táca vehún jan xihín nu Apia, ña cúú quiahva í sahá ña cándeé ini ñá Jesús. Ta quiahva já cáhyí nde carta yóho nu Arquipo jáchi in cúú da ndóho ini da cája chúun da cuéntá Jesucristo. ³ Ndióxi, tátá yo xihín Jesucristo, xitoho í ná caja cuahá ñamaní xihín ndo ta ná caja ña ná coo vaha ini ndó.

Cándeé cáhnu ini Filemón Jesucristo

⁴ Tá xíca tahví ʋ nu Ndióxi sahan co ndíndójó ʋ ndiquiahva ʋ ndixahvi nu mé á saha mún. ⁵ Jáchi nañehé e tuhun ña cándeé inún Jesucristo, xitoho í ta quihvi inún mé á xihín ndihi na cúú cuéntá mé á. ⁶ Ta xíca tahví ʋ nu Ndióxi ña ná ndicanún nuú java ñayivi ndá quiahva cándeé inún mé á. Ta xihín ña yóho cuu candaá vaha ini na ndaja náhnu ñamaní cája Ndióxi xihín tóco ndihi mí, na cándeé ini Jesucristo. ⁷ Cájji ini ʋ ñani mí ʋ ta sahan tuhun ndeé ini ʋ jáchi quihvi inún na cúú cuéntá Jesús. Ta jári sahan tuhun ndeé ini cuahá na cúú cuéntá Jesús jáchi quihvi inún na.

Xíca Pablo ñamaní nu Filemón saha Onésimo, da naxeen Filemón caja chúun nu dá

⁸ Yehe cúú ʋ in apóstol Jesucristo ña cán queá ín sahá ʋ cahnda ʋ chuun nuun cajún ña ndítahan nuun cajún. ⁹ Joo co cája ʋ ña. Ña cája ʋ queá xíca ʋ ñamaní nuun jáchi quihvi ini ʋ yohó. Xíní ñúhú ndicuhun inún ña cúú ʋ Pablo, da sahanu, da ndácaan vecaa saha Jesucristo. ¹⁰ Ta viti xíca ʋ ñamaní nuun saha Onésimo, da nanduu tátuhun jahyi mí ʋ cuéntá Jesús nani ndácaan ʋ vecaa yóho.

¹¹ Jihna ga nasacuu Onésimo da coo chuun nuun joo viti ín chuun da nu ndívi

yo. ¹² Ta viti chíndahá ʋ da nuun. Ndiqehé vahún da saha mí ʋ jáchi quihvi ndivaha ini ʋ da. ¹³ Cúni ña ná candoo da yóho xihín ʋ já ná cuu chindeé da yehe nu mún. Jáchi ndácaan ʋ vecaa yóho sahá ña cáhan ʋ tuhun vaha sahá Jesucristo nuú ñayivi. ¹⁴ Joo nasacu ini ʋ chíndahá ʋ da nuun jáchi tiahvá ná a váha cúú inún xihín ʋ tá ná candoo da yóho xihín ʋ. Jáchi tá ná cajún ñamaní xihín ʋ cúni ña ná cájji inún cajún ña ta co cúni caja ndúsa ʋ xuhun. ¹⁵ Cája ʋ cuéntá nacaxoo too Onésimo nuun joo viti ndicó coo da ná coo da níi tiempo xuhun. ¹⁶ A cája gaún cuéntá ña cúú dá da naxeún. Joo vaha chága viti jáchi cúú da ñani máni yohó cuéntá Jesucristo. Quihvi ndivaha ini ʋ da joo xíní ñúhú quihvi ini chágun da jáchi cája chúun da nuun ta cúú da ñanún cuéntá Jesús viti.

¹⁷ Ta tá mé a ndaa quihvi inún yehe já queá ndiquehe vahún da tá quiahva ndiquehe vahún yehe tá ná xinu coo ʋ nu iún jan. ¹⁸ Ta tá nacaja da in cuachi nuun á tá yíca da nuun já queá ndacún ña nuú ʋ ta já chahvi ʋ sahá. ¹⁹ Yehe cúú ʋ Pablo ta cáhyí ʋ ña yóho xihín ndáha ʋ já ná candaá inún ña sahan ʋ tuhun ʋ nuun ña chahvi ʋ ña. Xíní ñúhú ndicuhun inún ña yícun nuú ʋ jáchi nandihvún íchi cuéntá Jesús sahá tuhun nacahan ʋ xuhun. ²⁰ Inga tucu xíca ʋ ñamaní nuun ña ná ndiquehe vahún Onésimo jáchi cúun ñani mí ʋ, da cúú cuéntá Jesús. Tá ná cajún ña yóho sahá ña cándeé inún mé á já queá quiahvún tuhun ndeé ini ʋ.

²¹ Cándaa vaha ini ʋ ña cajún ña xíca ʋ nuun cajún sahá ña cán queá cáhyí ʋ carta yóho nuun ta candaá ini ʋ ña yaha chága cajún nuú ña xíca ʋ nuun. ²² Inga tucu xíca ʋ ñamaní nuun ña ná caja tiahvún in vehe loho nuú coo ʋ. Jáchi sahá ña xíca tahví ndihi ndó nu Ndióxi ña ná saa ʋ coto nihni ʋ ndohó sahá ña cán queá cája ʋ cuéntá caja mé á ñamaní xihín ʋ saa ʋ jan.

Ndíndayí Pablo Filemón

²³ In da naní Epafras, da ndácaan vecaa xihín ʋ saha Jesucristo chíndahá da Ndióxi coún. ²⁴ Chíndahá Marcos xihín Aristarco xihín Demas xihín Lucas Ndióxi coún. Mé

na yóho cája chúun na xihín i cuéntá Jesucristo.

²⁵ Ná caja Jesucristo, xitoho í cuahá ñamaní xihín ndihi ndó, na ndúu jan. Já ná coo.

Hebreos, mé carta cuahan nuú na Israel

*Nachindahá Ndióxi Jesucristo ña ná quixi
a jáyaha tuhun Ndióxi nu yo*

¹ Cuahá ndivaha tañu naçahan Ndióxi sanahá xihín tásáñnu jíco yo. Ta cuahá ndivaha nuú naçahan xihín ná tá najáyaha na profeta tuhun cáhan mé á nuú ñayivi. ² Joo tiempo nu ndihí yóho nachindahá mé á Jesucristo, in túhún jiní já jahyi a ña ná jáyaha tuhun Ndióxi nu yo viti. Ta naçaja Ndióxi ña naçavaña Jesucristo ndijáá ñaha ñuyiví xihín ñaha indiví. Ta najándacoo Ndióxi tóco ndihi ñaha yóho ndáha mé á. ³ Ta mé á quéa náha ndá quiahva cáñnu cúu Ndióxi jáchi yehe a tá quiahva yehe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuéntá saha tóco ndihi ñaha jáchi in ndivaha ndée tuhun mé á. Ta nandaja vií mé a mí nuú ndihi cuachí ta já nasacoo a indiví xoo cuáha Ndióxi, tátá a.

*Cáñnu chága Jesucristo a juú ga tátó
Ndióxi*

⁴ Ta Jesucristo, mé jahyi Ndióxi naxinu a nanduu a ña cáñnu chága a juú ga tátó Ndióxi. Ta naçaja Ndióxi ña ná ñehe táhvi á ña cáñnu chága quivi naní a a juú ga quivi tátó mé á. ⁵ Jáchi a ñaha cachi Ndióxi xihín ni in túhún toho tátó mé á tá quiahva naçachi a xihín jahyi a já: Jahyi yehe cúu yóho, ta viti cáchi i ña nanduu u tátún, cáchi a. Ta ni coo naçachi Ndióxi xihín ni in túhún toho tátó á tá quiahva naçachi a xihín jahyi a já: Yehe cacuu u tátún, ta yóho cacuún in túhún jiní já jahyi yehe, cáchi a.

⁶ Joo tá jalóho cúni chindahá Ndióxi Jesucristo, jahyi a ñuyiví yóho já naçachi a já: Ndítahan nu tóco ndihi tátó mí i caja cáñnu na jahyi i, naçachi a.

⁷ Já naçachi Ndióxi já saha tátó mé á: Tá quiahva cama chá xíco tachi quiahva já cama chá cuahan tátó mí i.

Ta yehe na tá quiahva yehe ñuhú cáyi ita, já naçachi Ndióxi.

⁸ Joo tá naçahan Ndióxi sahá jahyi a já naçachi a já:

Yóho cúun Ndióxi ta cacomún cuéntá sahá ñayivi anda ama cáa quivi, ta cáñndún chuun xihín ña ndaa.

⁹ Ta a juú quiahva cátóun ña vaha ta naçandajún ña núu.

Sahá ña cán quéa naçaxi i yóho jáchi yehe cúu u Ndióxi ta cúu u tátún.

Ta najácutú ndaa i yóho xihín ña cájii inún já ná cajii chága inún a juú ga na xíca xuhun, naçachi a.

¹⁰ Ta jári já naçachi a já xihín jahyi a:

Naçavahún tóco ndihi ñaha tá naçava sahá saha ñuyiví ta cúun xitoho nuú ña cán.

Ta xihín ndáñun naçavahún indiví.

¹¹ Ta vaxi quivi tá ndihi saha tóco ndihi ña yóho joo mún coo tá coún anda ama cáa quivi.

Ta tóco ndihi ña jan cayatá ña tá quiahva cayatá jáhma ndíxi na.

¹² Tá quiahva sáñnu ñayivi jáhma quiahva já chicanún ñuyiví xihín indiví.

Ta tá quiahva ndíjama ñayivi jáhma ndíxi na quiahva já ndíjama ña jan cajún.

Joo mún a ndíjama tohún jáchi coo tá coún anda ama cáa quivi,

ta a ndíjama tohún ta a ndíhi toho sañun, naçachi Ndióxi xihín Jesucristo.

¹³ A ñaha cachi Ndióxi xihín ni in túhún toho tátó mé á tá quiahva naçachi a xihín jahyi a já:

Naha quíi cacuún xoo cuáha i yóho, janda quiahva ná cañnu i nu tóco ndihi na coo cúni yóho ta janda ná chinduu u na sañun jan, naçachi Ndióxi xihín Jesucristo.

¹⁴ Jáchi tóco ndihi tátó Ndióxi cúu ná na tácu ta ín ínima ná joo coo toho yiquí cuñu na. Cája chúun na cuéntá Ndióxi ta mé á chindahá a na ñuyiví ña ná chindeé na ñayivi, na naçaxi Ndióxi cacu ndaa ínima.

2

Naquixi Jesucristo jácacu a mí

¹ Sahá ña cán quéa ndítahan nu yó taa joho í ña ndaa, ña naxini joho í já ná a cáxoo í íchi cuéntá Ndióxi. ² Naçahan tátó Ndióxi

tuhun nasahan mé á nu ná ta cúu á ña ndaa joo coó naxeen ñayivi cacu vaha na ña. Sahá ña cán quéa najándoho Ndióxi ini na tá quiahva ndítahan ndoho ini na sahá cuachi nacaja na. ³Joo mí, ndaja caja í cacu ndaa ínima yo tá ta coo táa johó í tuhun cáhan sahá Jesús, mé a jácacu mí. Ta ña yóho cúu á ña cáhnu ndivaha jáchi jihna ñúhú ga mé Jesucristo, xitoho í nacaxi tuhun a ña yóho nuú ñayivi. Ta na nataa johó nu cáhan mé á, na cán sahan na tuhun na nu yo ña cúu á ña ndaa. ⁴Ta náha Ndióxi ña cúu á ña ndaa jáchi cája mé á cuahá ndivaha ña náhnu xihín ña xítuhún ndivaha. Ta nachindahá Ndióxi ínima yii mé á nuú na cúu cuéntá Jesús ña ná caja na ña xítuhún tá quiahva nasacu ini mé á caja na.

Nanduu Jesucristo in ñayivi

⁵Coó nasahan toho Ndióxi ñamaní nu tátó mé á ña ná cacomí na cuéntá sahá ñuyiví saá, ña vaxi chága chí nuu. ⁶Jáchi já cáchi tuhun Ndióxi já:

Tátá Ndióxi, coó saha toho ñayivi ta coó ña náha cúu ná.

Joo mé ndó ñúhu ini ndó saha ná ta ndíhi ini ndó saha ná.

⁷Tá nacavaha ndó ñayivi nandaja ndó na nanduu na ña náhnu ndivaha.

Ta tátó mé ndó cuití va cúu ná nasayojó loho nu ná tixi chá tiempo.

Ta tóco ndihi ña nacavaha ndó nandiquiahva ndó ña ndahá ñayivi,

⁸já ná cacomí na cuéntá sahá, cáchi tuhun Ndióxi.

Ta mé a ndaa ni in ñaha coó nacandoo xóo jáchi nasacu ini Ndióxi cacomí ñayivi cuéntá saha tóco ndihi ñaha joo cámani yii va xinu coo mé quiví cán. ⁹Vatí cámani yaha ña yóho joo xini yo ña nandoho Jesús. Tixi chá tiempo nacaja Ndióxi ña ná nuu ndáha chága mé á nu tátó Ndióxi jáchi sahá ña quihvi ini Ndióxi mí sahá ña cán quéa nasacu ini a ña ná quivi Jesucristo sahá ndihi ñayivi. Ta viti nandindita mé á nanduu a ña cáhnu ndivaha sahá ña nandoho a tá naxihí a ndica crúxu.

¹⁰Tóco ndihi ñaha ña nacavaha Ndióxi cúu á cuéntá mé á sahá ña nacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najáxinu coo a nuú chuun natahnda nu á

ñá ná jácacu a mí. Jáchi ña cúni Ndióxi cúu ña ná canduu ndihí, na cúu cuéntá mé á nu ín a. ¹¹Nandaja víi Jesucristo mí ta sahá ña yóho cúu yó jahyi Ndióxi. Ta viti Ndióxi cúu tátá ndihí ta cúu á tátá Jesucristo. Ña cán quéa coo cáchan toho nuú Jesucristo cáhan ñani a mí ta cáhan quiahva mí viti. ¹²Jáchi nacahyi ini tuhun Ndióxi ña nacahan Jesús xihín tátá a. Ta nacachi a já:

Ndicani i nuú ñani i saha mé ndó.

Ta nu ndítutú na cata i caja cáhnu i ndohó, cáchi Jesús.

¹³Ta cáchi tucu a já:

Yehe cándéé ini i Ndióxi, tátá i.

Ta cáchi tucu a já xihín Ndióxi:

Yóho ín i xihín ndihi jahyi ndó, na nasahan mé ndó nuú i cacomí i cuéntá saha, cáchi Jesús.

¹⁴Sahá ña ín yiquí cuñu ñayivi, na cúu jahyi Ndióxi sahá ña cán quéa nanduu Jesús in ñayivi ta nasahin yiquí cuñu a tátuhun mí. Ta tá naxihí yiquí cuñu a já nacandéé a nasahnu a nuú tiñhá sacuaña, rí cája ña xihí ñayivi. ¹⁵Ta xihín ña yóho najácacu a tóco ndihi na nasayihví quivi jáchi ní tiempo nasanduu na ndáha tiñhá sacuaña sahá ña yihví na. ¹⁶Jáchi mé a ndaa coo naquixi Jesucristo ña ná chindeé a na cúu tátó Ndióxi. Ña naquixi mé á caja quéa chindeé a ñayivi, na cándéé ini Ndióxi tá quiahva nacandéé ini Abraham Ndióxi.

¹⁷Ña cán quéa naxini ñúhú Jesús nduu a in ñayivi cacu ñuyiví yóho tátuhun mí. Ta xihín ña nandoho a naxinu a nanduu a in jutú sacuaña nu Ndióxi indiví. Ta naxihí a ndica crúxu sahá cuachí jáchi cája ndaa mé á tóco ndihi ñaha ta táhvi ini a saha yo. Ta xihín ña yóho nacaja cáhnu ini a sahá cuachí. ¹⁸Ta sahá ña nandoho ini mé á ta sahá ña naxito ndojó rí quini mé á sahá ña cán quéa xini a ndá quiahva ndóho ini. Ña cán quéa cuu chindeé a ndaja táhan na ndóho ini, na xito ndojó tiñhá sacuaña.

3

Cáhnu chága Jesús a juú ga Moisés

¹Candehé ndo, ñani i, na cúu cuéntá Jesús. Mé ndó cúu ndó na nacaxi Ndióxi cacomí a cuéntá saha. Candehé ndó Jesucristo, mé á cúu á tátuhun apóstol, ña

nachindahá Ndióxi cacuu jutū sacuahā saha yo nū Ndióxi sahá ña cāndeé iní mé á. ² Ta xihín ndinuhu ini a nacaja chúun a cuéntá Ndióxi, mé a nacaxi ñahá. Jáchí tá quiahva nacaja Moisés tóco ndihi ña cūni Ndióxi tañu na cúu cuéntá mé á quiahva já nacaja Jesús tóco ndihi ña cūni Ndióxi, tátá a. ³ Joo ndítahan ndicáhnu chága Jesús a juú ga Moisés jáchi cáhnu chága Jesús a juú ga Moisés. Cúu á tátuhun tá cávaha in dataa in vehe ta ndítahan ndicáhnu chága mé dá a juú ga vehe da. ⁴ Ndúsa coo in da cávaha vehe já cuu cavaha ña joo tóco ndihi ñaha ín a jáchi nacavaha Ndióxi ña. ⁵ Ña cán quéa nacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun nacaja da quéa cáxi tuhun jini da xihín ná ña cūni Ndióxi cahan xihín ná chága chí nuu. ⁶ Joo jín va chuun nacaja Jesús, mé á cúu in túhún jini já jahyi Ndióxi jáchi cómi a cuéntá sahá na cúu cuéntá mé á xihín ndinuhu ini a. Cuéntá mé á cúu mí tá ndacú coo ínima yó ta tá ná cāndeé iní mé á. Ta xíní ñúhú cajji iní candatí anda quixi mé á.

Cūni Ndióxi ña ná ndihvi na cúu cuéntá mé á nuú ndiquehe ndée ná

⁷ Candehé ndó ndá quiahva cáchí ínima yii Ndióxi ini tuhun mé á tá cáchí a já: Tá ná cuni johó ndó ña cáhan Ndióxi xihín ndó quivi víti, ⁸ a cája sáa ini ndó xihín á tá quiahva nacaja na Israel tá naxica nuu na yucú íchí cán. Jáchi nandiñehe yúhu ná nu Ndióxi ta ihvi ndivaha nasacuu ini na xihín Ndióxi.

⁹ Ta já cáchí Ndióxi já: “Mé yucú íchí jan naxito ndojó tásáhnú jíco ndó yehé, vatí naxini na ña náhnú ndivaha nacaja i tixi ivi jíco cuia.

¹⁰ Sahá ña cán quéa naxojó ini i xihín tóco ndihi na cán, ta nacachi i saha ná ña cúu ná na cáhvi ivi, johó ini,

ta sáa ini na caca na íchí cuéntá mí i.

¹¹ Sahá ña cán quéa naxojó ini i xihín ná, ta nasahan i tuhun i ña a quiahva toho i ñamaní nu ná

ndihvi na nuú ndiquehe ndée na xihín i”, nacachi Ndióxi xihín na Israel.

¹² Ña cán quéa cuéntá vaha coo ndó, ñani i já ná a cáñehe ndó ínima quini ña jácaxoo ndó nu Ndióxi, ña tácu, sahá ña co cūni ndó candúsa ndó mé á. ¹³ Ña ndítahan caja ndó quéa quiahva tuhun ndeé ini táhan ndó nini quivi. Ta a quiahva ndó ñamaní yaha quivi víti tá núná nu ndó caja ndó ña cūni Ndióxi. Jáchi co cūni a ña ná jándahvi ña núu ñuyiví yóho ndohó ta já ná ndisáa ini ndó nu Ndióxi. ¹⁴ Jáchi tá ná cāndeé ndusa iní mé á janda quiahva ná xinu quivi nu ndihí cuí tá quiahva nacaja í janda saha já quéa cūni cachi a ña in nanduú xihín Jesucristo.

¹⁵ Jáchi quiahva já cáchí tuhun Ndióxi: Tá xini johó ndó ña cáhan Ndióxi xihín ndo quivi víti, a cája sáa ini ndó xihín á tá quiahva nacaja na Israel tá nandiñehe yúhu ná nu Ndióxi yucú íchí cán, cáchí a.

¹⁶ Jáchi sa xini ndó ndá na nandiñehe yúhu nu Ndióxi tá naxini johó na ña nasahnda mé á nu ná. Na cán cúu na tóco ndihi na nasandaca Moisés tá naqueta na nación Egipto. ¹⁷ Ta xihín mé na cán naxojó ini Ndióxi tixi ivi jíco cuia jáchi nacaja na cuachi nu mé á ta sahá ña cán quéa nacuyu na naxihí na yucú íchí cán. ¹⁸ Ta sahá ña coo naxeen na caja na ña cūni Ndióxi sahá ña cán quéa nasahan Ndióxi tuhun a ña a quiahva toho a ñamaní nu ná canduu na nuú ndiquehe ndée na xihín á. ¹⁹ Ta mé a ndaa cándaa iní ña coo nacuu ndihvi na nuú nasacu ini Ndióxi coo na sahá ña co naxeen na candúsa na mé á.

4

¹ Sahá ña cán quéa viti sahan yii va Ndióxi ñamaní nu yó yaha í nuú nasacu ini mé á ndiquehe ndée yo xihín á. Joo xíní ñúhú cuéntá vaha coo ndó jáchi tiahva náa a xinu coo java ndó ndihvi ndó cán. ² Jáchi tá quiahva naxini johó na Israel tuhun Ndióxi quiahva já naxini johó í tuhun mé á, ña cáchí a cūni jácacu Ndióxi ñayivi. Joo coo nacandúsa na cán ña sahá ña cán quéa coo chuun a nu ná. ³ Joo mí cúu yó na cāndeé ini Ndióxi ta sahá ña yóho tandaa quivi xinu coo í ndihvi nuú ndiquehe ndée yó xihín á. Ta já cáchí Ndióxi já sahá ña yóho:

Naxojo ini i xihín na co cándúsa yehe, sahá ña cán quéa nasahan i tuhun i ña ná a ndíhvi toho na nuú nasacu ini i ndiquehe ndée ná xihín i, cáchí a.

Nacachi Ndióxi ña yóho vatí sa nacaja tiahva mé á nuú ndíhvi na ndiquehe ndée na anda tá nacava sahá saha ñuyívi. ⁴ Ndáa ini tuhun Ndióxi ña nacaja mé á quívi usa. Já cáchí a já:

Quívi usa nandiquehe ndée Ndióxi nuú chuun nacaja tá nacavaha tóco ndihi ñaha, cáchí tuhun Ndióxi.

⁵ Ta já cáchí tucu a já sahá na co cándúsa Ndióxi:

A ndíhvi toho na canduu na nuú ndiquehe ndée ná xihín i, nacachi a.

⁶ Ta coo nandíhvi toho na nacahan Ndióxi xihin nu cuítí cán jáchí coo naxeen na candúsa na mé á. Joo núna yí va nuú java ñayivi ndíhvi na ndiquehe ndée ná xihin mé á. ⁷ Jáchí nasacu Ndióxi inga quívi ta cúu á quívi víti ta já cuu ndíhvi ñayivi ndiquehe ndée na xihin mé á. Sanahá ndivaha nacahan Ndióxi xihin rey David sahá ña yóho ta nacahyí da ña ta já cáchí a já:

Tá xini johó ndó ña cáhan Ndióxi xihin ndó quívi víti a cája sáa ini ndó xihin á, cáchí tuhun Ndióxi.

⁸ Ta sa xini yo ña coo najándíhvi Josué ñayivi nu ndiquehe ndée na xihin Ndióxi jáchí nacahan Ndióxi sahá inga quívi vaxi chága chinuu. ⁹ Sahá ña cán quéa sa xini yo ña cámani xinu coo quívi ndiquehe ndée na cúu cuénta mé á tá quiahva nandiquehe ndée mé á quívi usa. ¹⁰ Jáchí ndá na ná ndíhvi ndiquehe ndée nu íin mé á cán já quéa ndiquehe ndée ná nuú chuun nacaja na tá quiahva nandiquehe ndée Ndióxi nuú chuun nacaja mé á. ¹¹ Sahá ña cán quéa ndítahan ndíhi ini ndíhvi nuú ndiquehe ndée yo cán. Ta ná a cája í tá quiahva nacaja na Israel cán tá coo naxeen na candúsa na nuú nacahan mé á xihin ná.

¹² Íin cuaha ndée tuhun Ndióxi ta cúu á tátuhun ña tácu. Ta íin chága ndée tuhun Ndióxi a juú ga in yúchu ña ívi yúhu. Ta tá quiahva quíhvi yúchu ña ívi yúhu tá sáhdá yiquí cuñu quiahva já quíhvi tuhun Ndióxi janda maá ini ínima ñayivi xihin xini túni ná ta já xinu a ini na. Ta náha ndá quiahva

cáhvi ini na. ¹³ Jáchí xini Ndióxi tóco ndíhi ñaha ta a cúu chijehé yo ña cáhvi ini jáchí sánehé mé á tóco ndíhi ñaha nacavaha mé á. Ta vaxi quívi nahma yo nu mé á tóco ndíhi ña nacaja í.

Jesús cúu á jutú sacuaḥa nuú ndíhi indivi

¹⁴ Mé Jesús cúu á jutú sacuaḥa nuú ndíhi sahá ña cán quéa co ndítahan jándacoo í ña cándeé ini Jesús, mé a cúu in tuhún jini já jahyi Ndióxi. Ta nandíhvi a indivi nu íin Ndióxi. ¹⁵ Ta cándahví ini Jesús mí jáchí cúu á jutú sacuaḥa nu yo ta cánda ini a ña cúu yó ñayivi vitá ndivaha ini. Jáchí tá naxica nuu a ñuyívi yóho naxito ndojó tiñahá sacuaḥa mé á xihin tá nuú ñaha tá quiahva cája rí xihin mí joo ni in tuhún cuachi coo nacaja mé á. ¹⁶ Ña cán quéa a cáyhvi toho í cayatí nu íin coo Ndióxi, mé a quíhvi ini a mí jáchí táhvi ini a saha yo ta chindeé a mí tá ná caca i ñamani nu á.

5

¹ Tóco ndíhi da cúu jutú sacuaḥa chága nu ndíhi jutú cúu dá da sá caxi na tañu ñayivi Israel já ná cahan cuachí da sahá ñayivi nu Ndióxi. Ta jári jóco da ñaha nu Ndióxi ta sáhní da quítí nu náa sahá cuachi na. ² Ta sahá ña cúu dá da vitá ini, da ñuyívi yóho sahá ña cán quéa cuu candahví ini da ñayivi, na co xini ña sáhdá Ndióxi. Ta cuu candahví ini da na cája cuachi. ³ Ta sahá ña vitá ini da sahá ña cán quéa ndítahan cahní da quítí jóco da rí nu Ndióxi sahá cuachi mé dá xihin sahá cuachi ñayivi viti.

⁴ Ta ni in da cán a cúu chinuu da mé dá cacuu da jutú sacuaḥa chága nu ndíhi jutú. Jáchí xini ñuhú cacuu da da nacana Ndióxi caja chúun cuénta mé á tá quiahva nacaja Ndióxi sanahá tá nacana mé á Aarón ña ná caja chúun da cuénta mé á. ⁵ Quiahva já nayaha xihin Jesucristo jáchí coo nachinuu a mé á ña ná nduu a jutú sacuaḥa. Ndióxi quéa nachinuu ñahá tá nandaja cáhnu a Jesús. Ta já nacachi Ndióxi já xihin á:

Jahyi yehe cúu yóhó,

ta viti cáchí i ña nanduu u tátún, cáchí a.

⁶ Ta inga nu cáhan tuhun Ndióxi já cáchí a já:

Anda ama cáa quívi cacuún jutú,

ta cajún tá quiahva ñacaja in jutú, da ñasananí Melquisedec sanahá, cáchí a.

⁷ Nani ñasahiin Jesucristo ñuyívi yóho a juú quiahva ñaxica tahví a nu Ndióxi. Ta java tañu ñasacu a ta java tañu ñacayuhú a nu Ndióxi, mé a cúu chindeé ñahá ña ná a quívi toho a. Ta sahá ña ñasacaja Jesús tóco ndihi ña sáhdá Ndióxi, tátá a sahá ña cán queá ñaxini johó Ndióxi nu cáhan mé á. ⁸ Ta vatí cúu Jesucristo in túhún jiní já jahyi Ndióxi joo xihín ña ñandoho ini a ñuyívi yóho ñacatiahva coo johó a nu cáhan Ndióxi, tátá a xihín á. ⁹ Ta xihín ña yóho najáxinu coo mé á ñacaja tóco ndihi ña ñatahnda nu á caja. Janda javí ñacuu jácacu a mí ña ná coo í xihín mé á anda ama cáa quívi tá ná caja í ña sáhdá mé á. ¹⁰ Ta ñandicojo a chuun ñacaja Ndióxi ña ná nduu a jutú sacuahá tátuhun mé jutú, da ñasananí Melquisedec.

Cuénta coo ndó ná a jándacoo ndó ña cándéé ini ndó Jesús

¹¹ Ín cuahá ndivaha ñaha cúni ndicani i nu ndo sahá ña yóho joo yáncá ndivaha ndicani i ña nu ndo jáchi coo cúni ndo taa johó ndó nu cáhan i. ¹² Anda jihna ñandihvi ndó íchi cuénta Jesús ta viti sa ndítahan nu ndó jánahá ndó tuhun Ndióxi nuú ñayivi. Joo coo cája ndó já jáchi ñacavitá ndo ta tucu tucu jácuaha ndó ña coo íhvi toho. Ta viti cúu á tátuhun coo ndeé ini ndó cuxu ndó ña xíxi ñayivi náhnu joo ña cája ndó queá xíxi yíi va ndó leche tátuhun na valí va. ¹³ Ta tá quiahva xíxi na valí leche quiahva já cája ri na coo tiáhva ndícuni ndía cúu ña vaha ta ndía cúu ña núu. ¹⁴ Joo ñayivi, na cándaa vaha ini tuhun Ndióxi cúu ná tátuhun ñayivi náhnu, na tácu ini, na xíxi cuñu va jáchi sá tiahva na ndícuni na ndía cúu ña vaha ta ndía cúu ña núu.

6

¹ Sahá ña cán queá ña ndítahan caja í queá ndindacú chága yo xihín ñaha Ndióxi janda quiahva ná xinu coo í cacuu ñayivi tácu ini xihín ñaha Ndióxi. Co ndítahan jácuaha tucu ña najácuaha í tá jacá ñandihví íchi cuénta Jesús jáchi ndítahan catiahva í ña jan. Ndítahan cándaa ini ña cacu ndaa ínimá yo

sahá ña cándéé ini Jesucristo cuití va ta coo cúu á sahá ña cája í ña vaha. ² Ta sa cándaa ini ña ndítahan candúta na cúu cuénta Jesús. Ta sa cándaa ini ndaja cája í chinúu ndáha yó jiní ñayivi tá xica tahví yó nu Ndióxi saha ná. Ta sa cándaa ini ña vaxi quívi nditacutucu tóco ndihi ndii ña ná caja vii Ndióxi saha ná. ³ Sahá ña cán queá cáchí i xihín ndó: Coho ndindacú chága yó xihín ñaha Ndióxi, tá ná quiahva Ndióxi ñamaní nu yo.

⁴ Ta a cuú ga ndicó coo ñayivi nu Ndióxi tá sa najándacoo na ña ñasandéé ini na mé á. Jáchi sa najándiyéhe Ndióxi ínimá ná ña ná cándaa ini na saha mé á ta sa xini na ndá quiahva ín ñaha Ndióxi. Ta janda ínimá yíi Ndióxi sa ñandacaan ínimá ná. ⁵ Ta sa ñacándaa ini na tuhun vaha cáhan sahá Jesucristo ta sa ñacándaa ini na ndá quiahva náhnu caja Ndióxi chága chí nuu. ⁶ Joo tá ná jándacoo na jan ña cándéé ini na Ndióxi já queá a cuú ga ndicó coo na nu mé á jáchi xihín ña cája na cúu á tátuhun cata caa tucu na Jesucristo, jahyi Ndióxi ndica crúxu ta já sácu ndaa na mé á nuú ñayivi. ⁷ Jáchi sa xini ndo ndaja ín ñundáhyi nu cúun vaha javi ta ndíndáhyi a. Ta tá ná cana cuahá ñaha nuú ñaxutu ñayivi cán já queá cúni cachi a ña cája Ndióxi ñamaní xihín ñundáhyi cán. ⁸ Joo tá ná nana tohínú xihín tochihmá nu ñúhu cán já queá coo saha toho a ta ña yóho cúni cachi a ña coo cája toho Ndióxi ñamaní xihín á ta vaxi quívi cayi a caja Ndióxi.

Vaxi quívi coo í xihín Ndióxi tá coo jándacoo í íchi cuénta mé á

⁹ Candehé ndó, ñani maníi, na cúu cuénta Jesús. Vatí cáhan nde ña yóho xihín ndo joo cándéé ini nde ndohó ña cája tá cája ndó ña vaha ña ndítahan caja na cándéé ini Jesús. ¹⁰ Ta xini nde ña cája Ndióxi ña ndaa cuití va ta a ndíndójó toho mé á sahá ña vaha ñacaja ndó tá ñachindeé ndó na cúu cuénta Jesús jáchi xihín ña yóho náha ña quíhvi ini ndusa ndó mé á. Ta mé a ndaa janda viti chindeé ndó na cán. ¹¹ Ta a juú quiahva cúni nde ña ná ndihi ini in in ndó chindeé ndo na cúu cuénta Jesús anda quívi nu ndíhí. Ta xihín ña yóho vaxi quívi tá quiahva Ndióxi nu ndo tóco ndihi ña ndáti ndó quiahva mé á nu ndo. ¹² Coo cúni nde ña ná cajúsá ndo caca ndó íchi cuénta Jesús. Ña cúni nde

quéa ná ndihini ini ndó caja ndó tá quiahva cája ná cándeé ini Ndióxi, ná coó najándacoo ña cándeé ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

13 Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coó inga ga ña cáhnu chága a juú ga mé á. 14 Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamani xuhun ta caja i ña ná ndicuahá ndivaha na quixi chichún.” Já nacachi Ndióxi xihín Abraham tá nasahan tuhun a nu dá. 15 Ta coó nandihini ini Abraham nani nasandati da jáxinu coo Ndióxi tuhun a ta chí nañehe dá ña nasahan Ndióxi tuhun a quiahva nu dá. 16 Tá sahan ñayivi tuhun na nuú inga ñayivi já tává na quivi in na cáhnu chága a juú ga mé ná ña ná cacuu na testigo. Jáchi cája ndúsa in testigo xihín ná jáxinu coo na ña nasahan na tuhun na caja na. 17 Sahá ña cán quéa natavá Ndióxi quivi mé á jáchi cúni a janaha cáxi a nuú ñayivi ña a ndijama toho a tuhun nasahan nu ná ta ndúsa jáxinu coo a tuhun a nuú na ñehe táhvi ndiquehe a. 18 Ta cándaá iní ña nasahan Ndióxi tuhun a nu yó ta natavá a quivi á cacuu a testigo ta xihín ndívi ña yóho sa xini ví ña a cuú ndijama Ndióxi ta ni a cuú cahan mé á ña tuhún. Ta xihín ña yóho sahan mé á tuhun ndeé iní jáchi cándeé iní mé á ta sa nandiquiahva í mí ndáha mé á ña ná jácacu a mí. 19 Sahá ña cán quéa cátivi tuun í xihín Ndióxi ta cándeé iní ña quiahva mé á nu yo ña sahan tuhun a quiahva nu yo. Ta sahá ña cándeé cáhnu iní mé á sahá ña cán quéa co yíhvi toho í cayatí nu mé á jáchi sa nandihvi Jesús nuú yii ndivaha indiví. 20 Ta cúni Jesús chindeé a mí ña ná xinu coo í nu in a cán sahá ña cán quéa nandihvi jihna ñúhú ga cán a juú ga mí. Ta cuu caja Jesús ña yóho jáchi nanduu a jutú sacuahá nu Ndióxi ta anda ama cáa quivi cája mé á chuun yóho tá quiahva nacaja da naní Melquisedec sanahá ndivaha.

7

Chuun nacaja Melquisedec sanahá

1 Mé Melquisedec yóho nasacuu da rey nuú ñayivi ñuu Salem ta nasacuu da jutú nu Ndióxi, mé á cúu ña cáhnu chága a juú ga inga ga. In tañu tá nandicó coo Abraham nasahan da nacani táhan da xihín java rey ta najándihini da sahá na cán já naqueta Melquisedec íchi nuú vaxi Abraham ta já nacaja yii dá Abraham. 2 Ta mé Abraham nandaja da uxu táhnda tóco ndihini ña nacandaa da ndáha java rey tá naquee vaha da xihín na cán. Ta já nasahan da in táhnda nuú Melquisedec. Ta quivi Melquisedec yóho cúni cachi a rey, da cája ña ndaa. Ta sahá ña cómi da cuénta sahá ñuu Salem, ña cúni cachi a nuú in vaha ini ñayivi sahá ña cán quéa cúu dá rey, da cája ña ná coo vaha ini ñayivi. 3 Ta ni in ñayivi co xini na saha tátá náná mé Melquisedec yóho ta co ndaa nuú tutu quivi tásáhnu jícó da. Ta co xini na ndá tañu nacacu da ta ni co xini na ndá tañu naxihini da. Joo ña xini na quéa cúu dá jutú anda ama cáa quivi tá quiahva cúu Jesucristo jutú anda ama cáa quivi, mé a cúu in túhún jini já jahyi Ndióxi.

4 Ta viti cuu candehé ndó ndaja cáhnu nasacuu Melquisedec jáchi janda mé Abraham, da nasacuu tásáhnu jícó yo nasahan da nuú Melquisedec in táhnda nuú uxu táhnda ñaha ña nacandaa da ndáha rey, da naquee vaha da xihín cán. 5 Ta sa xini ndo ña cáchi ley Moisés ña in saha nuú jutú, na naquixi chichi Leví ndiquehe na in táhnda nuú uxu táhnda ña cómi na Israel. Jáchi mé jutú cán cája chuun na nu Ndióxi cuénta táhan na na Israel vatí in cúu tóco ndihini na sahá ña naquixi ndihini na chichi Abraham. 6 Vatí coo naquixi Melquisedec yóho chichi Leví joo naqueehe tá naqueehe da in táhnda nuú uxu táhnda ñaha nu Abraham, da nasahan Ndióxi tuhun a nuú ña caja cuahá ñamani xihín. Tá nacaja yii Melquisedec Abraham 7 náha ña mé a ndaa cáhnu chága da cája yii ñayivi a juú ga na nacayii cán. Ta ni in na a cuú cachi na ña co cúu ña yóho ña ndaa. 8 Ta sa xini yo ña cáhnu chága Melquisedec a juú ga jutú, na naquixi chichi Leví, na quehe in táhnda nuú uxu ñaha jáchi cúu ná ñayivi, na ndihini saha. Joo cahan tuhun Ndióxi sahá Melquisedec tátuhun tácu yii va da. 9 Ta náha ña cáhnu chága Melquisedec a juú ga

Leví, da cúú tásáhnú jícó tóco ndihi jutú, na quéhe in táhndá nuú uxu a cán. Jáchí cúú á tátuhun nachahvi Leví in táhndá nuú uxu a tá nachahvi Abraham ña nu Melquisedec.

10 Jáchí tá naquehe Melquisedec in táhndá nuú uxu ñaha nu Abraham, cúú á tátuhun nasanehe Abraham tóco ndihi na vaxi chichi da ini yiquí cuñu da jáchí cámaní yí cacu na mé tiempo já.

11 Ta tóco ndihi jutú, na naquixi chichi Aarón, naquixi na chichi Leví viti. Ta vatí nacaja na chuun Ndióxi ña jáyaha na ley Moisés nuú ñayivi joo a cúú nduu ndaa ñayivi nu Ndióxi xihín mé ley. Sahá ña cán quéa nachindahá Ndióxi Jesucristo ñuyívi yóho já ná cacuu a inga jutú, ña ná caja tá quiahva nacaja Melquisedec sanahá. Ta coó nacaja mé á tá quiahva nacaja Aarón, da nasacuu tásáhnú jícó jutú cán. 12 Ta tá nachindahá Ndióxi in jutú saá xíní ñúhú a ndijama ri a ley va. 13 Ta mé jutú saá cúú Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví ta ni coó naquixi a chichi Aarón. Jíin va chichi naquixi a ta ni in da taa naquixi chichi cán a ñaha cacuu da jutú. 14 Joo cándaá vaha ini ñayivi ña naquixi Jesucristo chichi Judá ta coó cúú á chichi nu sá cana jutú ta ni coó nacahan Moisés sahá na quíxi chichi Judá tá nacahan da sahá na cacuu jutú.

15 Ta cándaá vaha chága iní ña yóho jáchí sa xíní yo ña mé jutú saá ña cúú Jesucristo nandiquehe a chuun tátuhun nacaja Melquisedec sanahá. 16 Ta coó nanduu a jutú sahá ña nacacu a chichi Leví nu sá cacu jutú. Joo nanduu a jutú sahá ña cúú caja tóco ndihi ñaha ta sahá ña tácu a anda ama cáa quívi. 17 Jáchí tá cáhan Ndióxi saha Jesucristo já cáhí a já:

Yóho cúún jutú anda ama cáa quívi,

tátuhun mé jutú, da nasananí Melquisedec jáchí cájún chuun tá quiahva nacaja mé dá, cáhí tuhun Ndióxi.

18 Sahá ña cán quéa nacandoo xoo ley Moisés jáchí coó chuun a ta a cúú chindeé a ñayivi. 19 Ta ni coó nacuu caja mé ley Moisés ña ná nduu ndaa ñayivi nu Ndióxi. Joo viti cájii iní jáchí xihín ña nacaja Jesucristo já cuu nduu ndaa yó nu Ndióxi tá já

cuu cayatí nu mé á.

20 Ta tá nacaja Ndióxi ña nanduu Jesucristo jutú já nasahan tuhun a ta nasacu a mé á cúú á testigo sahá. 21 Joo tá nanduu na naquixi chichi Leví cán jutú coó nasahan Ndióxi tuhun a saha ná tá quiahva nacaja xihín Jesucristo tá nanduu a jutú. Ta já nacachi Ndióxi ini tuhun mé á:

Yehe cúú Ndióxi ta nasahan i tuhun i nu yóho ta a ndijama toho i tuhun cáhan i:

“Nachínúu i yóho cacuún jutú anda ama cáa quívi.

Ta cajún chuun tá quiahva nacaja Melquisedec sanahá”, cáhí Ndióxi.

22 Sahá ña nandicojo Jesucristo chuun nasahan Ndióxi nu á sahá ña cán quéa cándeé iní ña jáxinu coo Ndióxi tuhun nasahan nu yo. Ta vaha chága ña yóho a juú ga ley Moisés. 23 Ta ndaja coo nasanduu cuahá jutú, na naquixi chichi Leví cán jáchí naxihí ndihi na ta nacandoo chuun na nuú inga na. 24 Joo tácu Jesucristo anda ama cáa quívi ña cán quéa a jándacoo toho a chuun a nuú inga ga. 25 Ña cán quéa anda ama cáa quívi in tiahva Jesucristo jácacu a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta iní mé á nu Ndióxi xíca tahví a nu mé á sahá na cándeé iní mé á.

26 Mé a ndaa xíní ñúhú yo Jesucristo ña ná cacuu a jutú sacuahá nu Ndióxi saha yo. Jáchí mé á cúú á ña yíi ndivaha ta ni in cuachi coó nacaja mé á ta ni in cuachi a cúu chícaan yó jatá. Ta coó xíca nuu ga mé á tañu na caja cuachi jáchí in a indiví nu ndicáhnú ndivaha mé á. 27 Coó xíní ñúhú caja Jesucristo tá quiahva nacaja java ga jutú sacuahá, na naquixi chichi Leví. Jáchí nini quívi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jáví nacaja na ña sahá cuachi ñayivi. Joo jíin va nacaja Jesucristo jáchí in túhún tañu cuítí va najoco a mé á tá naxihí a ndica crúxu sahá cuachi tóco ndihi ñayivi. 28 Tá nacaja na ña cáhí ley Moisés já nasacu na in dataa, da caja cuachi ña ná cacuu da jutú sacuahá. Joo tá nandihí já nachínúu Ndióxi Jesucristo, jahyí a ña ná cacuu a jutú sacuahá, ña caja ña ndaa anda ama cáa

quivi. Ta nasahan Ndióxi tuhun a nu yo ña jaxinu coo a tóco ndihi ña cáchi a.

8

Jesús cúu á jutu sacuahá saha yo indivi

¹ Nacachi nde ña yóho ña ná candaa ini ndó ña cúu Jesucristo jutu sacuahá saha yo nu Ndióxi ta ín coo a xoo cuáha Ndióxi indivi nu ndicáhu ndivaha mé á. ² Cúu á jutu sacuahá cája ndivi a veñuhu indivi ña nacavaha Ndióxi ta co cúu á ña nacavaha ñayivi. ³ Ndítahan nu tóco ndihi na cúu jutu sacuahá cahní na quíti nu Ndióxi ta joco na ñaha nu á. Ña cán queá ndítahan ri nu Jesucristo joco a ñaha nu Ndióxi. ⁴ Tá ná caca nuu Jesucristo ñuyíví yóho, nduu já queá a cacuu toho a jutu, nduu. Jáchi sa nduu cuahá ndivaha jutu ñuyíví yóho ta joco na ñaha nu Ndióxi tá quiahva sáhdá ley Moisés. ⁵ Joo ña cája mé ndihi jutu ñuyíví yóho cúu á tátuhun yuhú nuu ña cája Jesucristo indivi. Ta cándaá ini ña cúu á tátuhun yuhú nuu ña ín indivi jáchi sanahá ndivaha tá nasahnda Ndióxi chuun nu Moisés ña ná cavaha da veñuhu xihin ní quíti já nacachi Ndióxi já xihin da: “Cuéntá coún ndaja cavahún veñuhu xihin ní quíti jan. Jáchi xíní ñúhú coo a tá quiahva cáa ña nanaha i nuún jiní yucu cán”, nacachi Ndióxi xihin Moisés. ⁶ Joo Jesucristo, mé á cúu jutu sacuahá saha yo indivi nandicojo a in chuun ña vaha chága a juú ga chuun cája jutu ñuyíví. Vaha chága ña nacaja Jesucristo a juú ga ley Moisés jáchi jándique táhan máni a mí xihin Ndióxi ta xihin ña yóho xínu coo tuhun nasahan Ndióxi nu yó jihna.

⁷ Tá ná cuu caja ley Moisés ña jácacu a mí ná a cahun toho í indayá, nduu já queá co xíní ñúhú quivi Jesucristo jándique táhan máni a mí xihin Ndióxi, nduu. ⁸ Joo xíní vaha Ndióxi ña mé ley Moisés a cuú jácacu a ñayivi sahá ña cán queá já nacachi a já:

Vaxi quivi tá quiahva i tuhun saá nuú ñayivi Israel ta nuú na naquixi chichi Judá.

⁹ Jín va cúu tuhun saá quiahva i nu ná, jáchi co cúu toho a tuhun nasahan i nu tásahnu jícó na sanahá ndivaha,

tá natiin ndahá i na ta natavá i na nuú nasanduu na nación Egipto.

Ta sahá ña coo najaxinu coo na tóco ndihi ña nasahnda i nu ná caja na sahá ña cán queá najandacoo i na.

¹⁰ Ta vaxi quivi tá quiahva i tuhun saá nuú ñayivi Israel.

Ta caja i ña ná candaa vaha ini na ley mí i ta cañuhu a ini ínimá ná ña ná caja na ña cúní mí i.

Ta yehe cacuu Ndióxi caja cáhnu na, ta mé na cán cacuu ñayivi cacomí i cuéntá saha.

¹¹ Ta a cúní ñúhú ga na jánaha ñani táhan mé ná ña ná candaa ini na saha Ndióxi, jáchi tóco ndihi ñayivi anda na valí anda na sáhnu candaa ini na yo cúu yehe.

¹² Ta caja cáhnu ini i saha ndaja táhan ña núu nacaja na, ta a ndicuhun ga ini i sahá cuachi na, cáchi Ndióxi.

¹³ Tá nacahan Ndióxi sahá tuhun saá ña quiahva mé á nuú ñayivi já queá náha ña coo chuun ga mé tuhun nasahan nu ná jihna ta cama chá ndihi sahá.

9

Veñuhu ñuyíví xihin veñuhu indivi

¹ Tá nasahan Ndióxi tuhun a nuú na Israel sanahá ndivaha já nasahnda chuun sahá ndaja caja cáhnu na mé á ini veñuhu ña cávaha na ñuyíví yóho. ² Ta ndacaan ivi cuarto ini mé veñuhu cán. Ta ña ndacaan ini cuarto nu cuítí cúu in candelero xihin in mesa nu cándójó pan yii. Ta mé cuarto nu cuítí yóho naní a in nuú yii. ³ Ta ín in jahmá ndeé ña ndájí nuu táhan tañu ndívi cuarto yóho. Ta cuarto ndacaan maá naní a nuú yii ndivaha. ⁴ Ta mé cán ín in nu ná ña nacavaha xihin jiuhun cuáán nu chíníhmá jutu jusa vaha. Ta jári cán ín sató arca ñaha Ndióxi ta tóco ndihi jata mé sató arca nandicuchu xihin jiuhun cuáán. Ta chí ini sató cán ndacaan in tindojo jiuhun cuáán nu ñúhu maná ña naxixi na Israel tá naxica nuu na yucú íchí cán. Ta jári ndacaan mé yító ñaha Aarón, dó nasaa núma sanahá. Ta chí ini arca cán ndacaan ri ivi yuu jáhdá nu ndaa ley nasahan Ndióxi nuú Moisés. ⁵ Ta jiní mé sató arca cán ndíndójó ña cúu yuhú nuu tátó Ndióxi naní a querubines.

Cándójó a cán ña ná ndicuhun ini ñayivi ña ín Ndióxi cán cája cáhnu ini a sahá cuachi na. Ta mé táto Ndióxi cán ndicaa ndixi a cándójó a jata arca. Joo a cúu ndicani chága yo sahá ña yóho viti.

6 Já nasahin tiahva tóco ndihi ñaha veñuhu. Ta ndijáa níi quivi nandihvi jutú cuarto nu cuití cán cája ndívi na ñaha caja cáhnu na Ndióxi. 7 Joo in tañu tá nu cuía in túhún da cúu jutú sacuahá naquihvi da cuarto maá cán. Ta ñéhe da níi quítí ña joco da nu Ndióxi sahá cuachi mé dá xihín sahá cuachi ñayivi. 8 Ta xihín ña yóho jánaha ínima yii Ndióxi nu yo ña a cuú ndihvi ndá ñayivi nacuu cuarto maá nuú yii ndivaha jáchi sa ín va cuarto nu cuití. 9 Ta tóco ndihi ña yóho cúu á tátuhun yuhú nuú nuú ña ín tiempo viti. Ta sa xini yo ña a cuú ndaja vii ñayivi ínima ná xihín ña joco na nu Ndióxi tá sáhní na quítí ña quiahva na níi rí nu mé á. 10 Jáchi tóco ndihi ña nacaja na cán nasacuu a cuénta ña sáxi na xihín ña xíhi na ta nasacuu a cuénta ndaja nandaja vii na mé ná xihín ticuú. Joo já nanditahan cája na janda quiahva tandaa quivi ndijama Ndióxi tóco ndihi ñaha jáchi a cúu ndaja vii na ínima ná xihín ña yóho.

11 Ta ndaja coo naquixi Jesucristo ñuyívi yóho ta nanduu a jutú, da sacuahá chága nu yo. Naquixi a ña ná quiahva mé á ña vaha Ndióxi nu yo. Joo viti ín a indivi cája chúun a tátuhun jutú veñuhu ña vaha chága cán. Cúu á veñuhu ña coo nacavaha ñayivi ta coo cúu á ñaha ñuyívi. 12 In tañu cuití va nandihvi a nuú yii ndivaha ta coo nasañehe a níi tijúhu ni níi chélo ña joco a nu Ndióxi. Nii mé á cúu dó naxita ndica crúxu saha yo ña ná cacu ndaa ínima yo anda ama cáa quivi. 13 Jihna nacaja ñayivi ña nacachi ley Moisés ta nu yiquí cuñu na naxihnu ndaa jutú níi tindiquí á níi tijúhu ta naxihnu ndaa ri da na xihín yaá chélo, rí nasahmi na nu náa. Ta xihín ña yóho nandivií yiquí cuñu na nu Ndióxi. 14 Joo ndiyahvi chága nii Jesucristo a juú ga nii quítí. Jáchi tá naxihí Jesucristo já nandivií ínima yo já ná a cája ga yo ña coo ndiyahvi cán ta ná caja í tóco ndihí ña cúni Ndióxi. Nacaja ínima yii Ndióxi, mé a tácu a anda ama cáa quivi ña ná ndiquiahva Jesucristo

mé á ndáha Ndióxi já naxihí a ndica crúxu saha cuachí vatí coo toho cuachi mé á.

15 Ta sahá tuhun saá nasahan Ndióxi nu yo sahá ña cán quéa cáhan Jesucristo xoo mí nu Ndióxi. Ta sahá ña nacaja Jesucristo tá naxihí a ndica crúxu cája cáhnu ini Ndióxi sahá cuachí nacaja í tá nasandico yó ley Moisés. Ta nandacaxi Ndióxi ñayivi, na cúni candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná. 16 Cúu á tátuhun tá cávaha in dataa tutu cuénta ña ñeñe táhvi ná candoo ñaha nu ná. Joo xini ñúhú candaa ini na ña mé a ndaa naxihí da jándacoo ñaha cán anda jávi ndiyahvi mé tutu cán. 17 Jáchi nani tácu da coo ndiyahvi toho tutu nacavaha da sahá ñaha ndicoo táhvi da. Janda quiahva ná quivi da já ndiyahvi a. 18 Ña cán quéa tá nu cuití nasahan Ndióxi tuhun a nuú ñayivi nacaja mé á ña ná quivi quítí ta xihín níi rí cán nandoo cuachi ñayivi. 19 Jáchi tá nandihí nacahan Moisés ley nasahan Ndióxi nuú ñayivi Israel já natiin da in yito, dó nani hisopo ta nacató da loho cachí cuahá nu do. Ta nachindaxi da dó cán xihín níi chélo xihín níi tijúhu, dó nacava táhan xihín ticuú. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. 20 Anda já nacachi da já xihín na Israel: “Xihín níi quítí yóho jáxinu coo Ndióxi tuhun a ña nasahnda nu ndó caja ndó”, nacachi Moisés. 21 Ta quiahva já naxihnu ndaa Moisés níi quítí nuú veñuhu níi quítí xihín nuú tóco ndihi ñaha ñúhu cán ña cája chúun na cája cáhnu na Ndióxi. 22 Jáchi cáchí ley Moisés ña xihín níi cuití va ndivií ndaja táhan ñaha, vatí a juú ndihi a. Ta janda quiahva ná cuita níi já cuu caja cáhnu ini Ndióxi sahá cuachi ñayivi.

Nandoo cuachí xihín níi Jesucristo

23 Sahá ña cán quéa nanditahan nu Moisés ndaja vii da ñaha veñuhu ñuyívi yóho xihín níi quítí. Ta mé ñaha cán cúu á yuhú nuú ña ín indivi. Joo ñaha ín indivi ndivií a xihín níi, dó vaha chága a juú ga níi quítí. 24 Ta veñuhu ñuyívi cúu á yuhú nuú cuití va ña ín indivi. Coo nandihvi Jesucristo nuú yii ndivaha veñuhu, ña nacavaha ñayivi. Joo nandihvi

mé á indiví ta cán ín a viti ta cáhan mé á xoo mí nu Ndióxi. ²⁵ Jáchi da cúu jutú sacuaḥa nandihvi da tá nu cuía nuú yíi ndivaha veñuhu joco da níi quítí nu Ndióxi. Joo ña nacaja Jesucristo quea nandiquiahva a mé á quivi a saha yo ta in tañu cuití va naxita níi á ndica crúxu. ²⁶ Jáchi tá ná nditahan nuú Jesucristo quivi a cuahá tañu já quea janda mé saha tá nacava sahá saha ñuyíví casahá quivi a, nduu. Joo a juú a já jáchi tá jalóho cúni ndihi saha tiempo viti já nacasaḥa Jesucristo ñuyíví yóho ta in tañu cuití va naxihí a sahá cuachi ñayivi. ²⁷ Quiahva já yáha xihín ñayivi jáchi in tálaá tañu quivi na ta anda jáví nditahan candichi na nu Ndióxi caja víi mé á sahá ña nacaja na tá nasandu na ñuyíví yóho. ²⁸ Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quívi quixi tucu mé á ñuyíví yóho joo a quíví ga ña jáchi quixi a ndiquehe a na ndáti tiaḥva cuḥun coo xihín mé á indiví.

10

¹ Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chínuu. Nasacuu a yuhú nuú uun ña vaha ña vaxi nu yo. Jáchi mé ley yóho coo nacuu caja ndaja víi a ínima ñayivi vatí ná cayati na nu Ndióxi tá nu cuía sá sánní na quítí joco na nu Ndióxi. ² Jáchi tá ná cuu ndivií ínima ná sahá ña cája na ña cáchí ley Moisés já quea in tañu cuití va joco na níi quítí nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. ³ Joo tá nu cuía tá sá sánní na quítí joco na níi rí nu Ndióxi já quea ndicuhun ini na ña cómi na cuachi nu Ndióxi. ⁴ Jáchi a cuú jándoo na cuachi na xihín níi tindiquí á xihín níi tijúhu.

⁵ Ña cán quea tá jalóho cúni casaa Jesucristo ñuyíví yóho já nacachi a já xihín Ndióxi, tátá a:

Có cúni ndó ña ná cahní ñayivi quítí joco na rí nu ndo ta ni coo cúni ndo ña ná joco na java ga ñaha nu ndo.

Sahá ña cán quea nasahan ndó in yiquí cuñu nuú i já ná ndiquiahva i ña nu ndo.

⁶ Co cájii ini ndó tá ná cahmi na quítí nu náa joco na rí nu ndo. Ta ni coo táhan

ini ndó tá ná joco na java ga ñaha nu ndo ña ná jándoo na cuachi na.

⁷ Sahá ña cán quea já nacachi i já xihín ndo: “Tátá Ndióxi, yóho ín i ta ín tiaḥva vi caja i ndá ña nacuu cúni ndo.

Jáchi quiahva já ndaa ini tuhun mé ndó sahá i”, nacachi Jesucristo.

⁸ Nu cuití nacachi Jesucristo ña coo cúni Ndióxi ña ná cahní ñayivi quítí quiahva na níi rí nu á. Ta ni coo táhan ini a tá ná cahmi na quítí nu náa ña ná ndivií ínima ná. Ta nacachi a ña yóho vatí sáhdá ley Moisés caja ñayivi já. ⁹ Joo tá nandihí nacachi Jesucristo já xihín Ndióxi: “Yóho ín i ta ín tiaḥva vi caja i ndá ña nacuu cúni ndo”, nacachi a. Ña cán quea nasacu xoo Ndióxi ña nacaja na jihna ta viti ndiquehe vaha mé á ñayivi sahá ña naxihí Jesucristo ndica crúxu. ¹⁰ Nacaja Jesucristo ña nasacu ini Ndióxi caja sahá ña cán quea nacandoo víi uun tóco ndihi mí jáchi in tálaá tañu nandiquiahva Jesucristo yiquí cuñu a tá naxihí a sahá cuachí.

¹¹ Jihna ga ña nacaja ndihi jutú cúu á ña nini quívi sándita da nu náa joco da quítí nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho.

¹² Joo in tañu cuití va naxihí Jesucristo sahá cuachi tóco ndihi ñayivi já ná cuu cacu ndaa ínima ná anda ama cáa quívi. Anda jáví nasacoo a xoo cuaha Ndióxi, tátá a indiví. ¹³ Ta cán ín coo a viti cándati a janda quiahva ná cacu Ndióxi na cándají mé á tíxi sahá. ¹⁴ Jáchi in tálaá tañu naxihí Jesucristo ndica crúxu ta xihín ña yóho nandaja víi a ínima ñayivi, na nacaxi mé á. ¹⁵ Ta sa xini yo ña cúu ña yóho ña ndaa jáchi já cáchí ínima yíi Ndióxi já:

¹⁶ Vaxi quívi tá quiahva i tuhun saá nuú ñayivi Israel ta quiahva johu coo a.

Caja i ña ná candaḥ vaha ini na ley mí i ta caja i ña cañuhu a ini ínima ná.

¹⁷ Ta já cáchí tucu a já:

Caja cáhnu ini i sahá ndaja táhan ña núu nacaja na ta a ndicuhun ga ini i sahá cuachi na, cáchí tuhun Ndióxi.

¹⁸ Ta sahá ña nacaja cáhnu ini Ndióxi sahá cuachi ñayivi sahá ña cán quea coo xini ñuhú ga cahní na quítí ña joco na rí nu mé á sahá cuachi na.

Xíni ñúhú cayatí nu Ndióxi

19 Candehé ndo, ñani i, na cúu cuénta Jesús. A cáyihví toho í viti ndihví nu íin Ndióxi, mé nuú yíi ndivaha jáchi naxihí Jesucristo sahá cuachi. 20 Ta tá nandiquiahva mé á yiquí cuñu a já naxihí a ta xihín ña yóho nasuná a íchi saá já ná cuu cayatí nu íin mé á. 21 Ta mé Jesús cúu á jutú sacuahá saha yo nu Ndióxi jáchi cómi a cuénta sahá ndihí, na cúu cuénta mé á. 22 Ña cán quéa xíni ñúhú cayatí nu íin Ndióxi xihín ndinuhu iní jáchi cándéé iní mé á. Cúu á tátuhun nandoo yiquí cuñu í tá naxihí Jesucristo ndica crúxu. Ta viti co ndítahan ndicani iní sahá cuachi nacaja í jáchi najándoo mé á cuachi. 23 A jándacoo í ña cándéé iní Ndióxi ta ná candati tiahva í janda ná yaha ña cáchi mé á jáchi xíni vaha í ña jáxinu coo Ndióxi tuhun nasahan nu yo. 24 Ta ndítahan nu yo ndinducú yo ndaja caja í chindeé táhan í já ná quihví chága iní ñani táhan í. Ta ndítahan caja chága yó ña vaha. 25 Co ndítahan toho caja í tá quiahva cája java na cúu cuénta Jesús, na co cuni nditaca xihín ndihi java ga na cúu cuénta Jesús. Ña ndítahan caja í quéa jácahan chága táhan í ña ná taca í xihín java ga na cúu cuénta Jesús jáchi sa xíni yo ña vaxi quivi quixi tucu Jesucristo ñuyívi yóho.

26 Tá sa cándaá vaha iní ña co ndítahan caja í cuachi ta chínee tucú mí cuahan í cája í cuachi vatí sa cándaá iní ña ndaa, a cúu ga ndoo cuachi nu Ndióxi. 27 Ta cáyihví yo candati janda quiahva ndoho ndivaha iní caja Ndióxi. Jáchi jácana mé á ñayivi nu ñúhu cáyi ita, mé nu ndihi sahá na íhvi mé á. 28 Jáchi ndá na Israel, na co cuni caja ña sáhdá ley Moisés já quéa ndítahan quivi na tá ná cacu ivi á uní testigo sahá na nu juéxe. Ta ni in na a cándahví iní ñahá. 29 Joo ndaja ga ví ndítahan ndoho iní na quéhe núu Jesús, mé in túhún jini já jahyi Ndióxi. Jáchi cúu á tátuhun sáni nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínimá yíi Ndióxi, mé a cája cuahá ñamaní xoho. 30 Cándaa vaha iní yo cúu mé a nacachi ña yóho: “Yehe jándoho í iní ñayivi, na cája cuachi. Ta caja í ña ná chahvi na sahá cuachi na”, cáchi a. Ta já

cáchi tucu Ndióxi, xitoho í já: “Yehe caja víi í sahá na cúu cuénta mí í”, cáchi a. 31 Mé a ndaa ndahví nahá nacuu tá ná tiin Ndióxi mí ña ná chahví sahá cuachi jáchi mé á cúu á Ndióxi, ña tácu indiví.

32 Ndítahan ndicuhun ini ndó ña nayaha tá jacá nacandee ini ndó Jesús. Vatí nandoho ndivaha ini ndó nacaja java ñayivi joo nasahan ndeé ini ndó. 33 Java tañu nasacu ndaa íchi na ndohó nuú ñayivi ta java tañu nacaja xíxi na xihín ndo ta java tañu nacatáhan ndó xihín java ga na tá nandoho ri ini na sahá Jesús. 34 Ta táhnda ini ndó sahá na cúu cuénta Jesús ñúhu vecaa. Ta coo nacahan cuachi ndo ta janda cájii ini ndó vatí nacaja cuíhna na ñaha ndó jáchi cándaá vaha ini ndó ña cómi ndó ña vaha chága indiví ta a ndihi toho sahá ña cán. 35 Ña cán quéa a jándacoo ndó ña cándéé ini ndó Jesús jáchi tandaa quivi quiahva cuahá Ndióxi ña vaha nu ndo tá cándéé ini ndó mé á. 36 Ndítahan nu ndó quiahva ndeé ini ndó caja ndó ña cuni Ndióxi já quéa ndiquehe ndó ña vaha nasahan mé á tuhun a quiahva nu ndo. 37 Jáchi já cáchi tuhun Ndióxi já:

Jalóho cuni ta já quixi mé a ndítahan nu quixi ta a cáyancá toho a.

38 Joo ndá na cúu ñayivi ndaa nu mí i catacu na sahá ña cándéé ini na yehe.

Ta tá co cuni ga na cándéé ini na yehe ta já ndicó coo na caja na cuachi já quéa a cájii iní i xihín ná, já cáchi Ndióxi.

39 Joo a cája toho í tá quiahva cája java ñayivi jáchi co cuni na cándéé ga iní na Jesús ta tandaa quivi cuhun na indayá. Joo mí cúu yó na cándéé iní Jesús ta tandaa quivi coo í nu íin mé á.

11

Ndítahan nu yó cándéé iní Ndióxi

1 Tá ná cándéé iní Ndióxi já quéa cuni cachi a ña sa xíni vaha í ña yaha tá yaha ña ndátí yó yaha. Ta vatí co xíni yó ña ndátí joo cándéé iní ña já coo. 2 Jáchi sahá ña nacandee ini tásáhu jícó yo Ndióxi sanahá ndivaha sahá ña cán quéa cájii ini Ndióxi xihín ná.

3 Ta sahá ña cándéé iní Ndióxi sahá ña cán quéa cándaá vaha iní ña nacahan Ndióxi ta

já nacavaha mé á ñuyiví xihín indiví. Jihna coó nasahiin ni in ñaha joo viti náha nuú ña nacavaha mé á.

⁴ Ta sahá ña nacandeeé ini da naní Abel Ndióxi sahá ña cán queá natahan ini Ndióxi xihín ña nacaja da tá najocó da ñaha nu á. Ta coó natahan ini a xihín ña najocó da naní Caín, da cúu ñani Abel jáchi coó nacandeeé ini Caín mé á. Sahá ña cán queá nandiquehe Ndióxi ña najoco Abel nu á ta xihín ña yóho nanduu da da ndaa nu á. Ta vatí naxihí Abel joo xihín ña nacaja da sanahá jánaha da nu yo ndaja ndítahan nu yó candeeé ini Ndióxi.

⁵ Ta sahá ña nacandeeé ini da naní Enoc Ndióxi sahá ña cán queá coó naxihí toho da. Joo nasañehe Ndióxi da indiví ta coó nacuu ndiñehé ñayivi mé dá jáchi nandaa da cuahan da indiví nacaja Ndióxi. Ta cáchi tuhun Ndióxi já nacaja mé á jáchi táhán ini a xihín ña nacaja Enoc nani nasahiin da ñuyiví yóho. ⁶ Tá coó candeeé ini Ndióxi já queá coó táhán ini Ndióxi xoho. Jáchi ndá na cúni cayati nu Ndióxi xini ñuhú cándusa na ña íin mé á indiví ta xini ñuhú cándusa na ña quiahva mé á ña vaha nuú ñayivi tá ndinducú na mé á.

⁷ Ta sahá ña nacandeeé ini da naní Noé Ndióxi sahá ña cán queá nataa johó da tá nacaxi tuhun Ndióxi xihín dá ña ndoho ini ñayivi chága chí nuú vatí coó nasannahá nu á. Nacandúsa Noé Ndióxi ta chí nacasáhá da cávaha da in barco cáhnu nuú cuu cacu ndaa mé dá xihín na vehe da. Ta sahá ña nacandeeé ini da Ndióxi sahá ña cán queá nanduu da taa ndaa nu mé á. Ta xihín ña nacaja da najácojo da cuachi jatá ñayivi ñuyiví jáchi náha cáxi a ña coó nacandúsa na caja na ña cáchi Ndióxi.

⁸ Ta sahá ña nacandeeé ini da naní Abraham Ndióxi sahá ña cán queá nacandúsa da ña nacahan Ndióxi xihín dá. Ta chí naquee da ñuu da ta cuahan da in ñundáhyi, ña nasahan Ndióxi tuhun a quiahva nu dá. Najándacoo da ñuu da vatí coó nasaxini da ndaja naní mé ñuu nuú cuhun da. ⁹ Ta sahá ña candeeé ini Abraham Ndióxi sahá ña cán queá naxinu coo da ñundáhyi ña nasahan Ndióxi tuhun a quiahva nu dá. Joo nandíñehe dá java ñayivi ndúu cán chí nasahiin da tá quiahva ndúu na tóho. Vehe

tienda nasahiin da xihín na vehe da. Ta quiahva já nasahiin Isaac xihín Jacob jáchi nasahan Ndióxi tuhun a nu mé dá xihín nuú na vehe da. ¹⁰ Nacaja Abraham ña yóho jáchi ndáti da coo da in ñuu ña íin indiví, ña nacavaha Ndióxi nuú coo a anda ama cáa quivi.

¹¹ Ta jári nacandeeé ini Sara, mé ñájíhí Abraham Ndióxi sahá ña cán queá nacaja Ndióxi ña nacuu quee jahyi ñá vatí sa nacayatá ña. Ta tá nandihí já nacacu jahyi ñá ta nasacuu a sahá ña nacandeeé ini ñá jáxinu coo Ndióxi tuhun nasahan nu ña. ¹² Sahá ña cán queá vatí nacayatá ndivaha Abraham ta nacayati quivi quivi da joo nacacu jahyi da xihín ña ta nanduu da tásáhnu jicó na Israel. Ta cuahá ndivaha na cúu chichi da janda a cuú candahvi na. Cúu á tátuhun quimi ña íin indiví á tátuhun ñuti yuhú tañuhú jáchi a cuú candahvi a.

¹³ Tóco ndihi na naquixi chichi Abraham yóho vatí naxihí na joo nacandeeé tá nacandeeé ini na Ndióxi. Ta vatí coó naxini na ña nasahan mé á tuhun a quiahva nu ná joo nasacuu a tátuhun naxini na ña. Jáchi nacandeeé ini na ña nacachi Ndióxi xihín ná ta nacajii ini na. Ña cán queá nacachi na ña ndúu tóo cuití na ñuyiví yóho ta cúu ná tátuhun na tóho jáchi coó ñuu na ñuyiví yóho. ¹⁴ Cándaa ini ña ndá na cáchi já cúni cachi a ña ndinducú na inga ñuu nuú canduu na. ¹⁵ Ta coó nataknda ini na sahá ñuu naquee na cán jáchi cuu ndicó coo na, nduu joo coó nacacúni na caja na ña. ¹⁶ Joo ña nducú na cúu in ñuu ña vaha chága, ña íin indiví. Ta nacaja tiahva Ndióxi mé ñuu indiví nuú cuu coo na já queá a cácan nuú mé á cachi a ña cúu ná cuéntá mé á.

¹⁷ Ta sahá ña nacandeeé ini Abraham Ndióxi sahá ña cán queá nasahiin tiahva da cahní da Isaac, jahyi da joco ñahá da nu Ndióxi tá naxito ndojó Ndióxi da. Já nacaja Abraham vatí nasahiin in túhún jini jahyi da ta sa nasahan Ndióxi tuhun a nu Abraham ¹⁸ tá nacachi a já xihín dá: “Cacu jahyún, da cananí Isaac ta xihín da cán ndicuhá ndivaha chichún chága chí nuú”, nacachi Ndióxi. ¹⁹ Sa nacandaa vaha ini Abraham ña cuu caja Ndióxi ña ná nditacu tucu Isaac tá sa naxihí da. Ta vatí coó nasahní toho Abraham Isaac joo cúu

á tátuhun naxihí da ta nanditacu tucu da jáchi nasahin tiahva da cahní da da sahá ña nacandeeé ini da Ndióxi.

²⁰ Ta sahá ña nacandeeé ini Isaac Ndióxi sahá ña cán queá nasahan da tuhun da nu ndívi jahyi da, da naní Jacob xihín da naní Esaú ña caja cuaha Ndióxi ñamaní xihín ndívi da chága chí nuu. ²¹ Ta sahá ña nacandeeé ini Jacob Ndióxi sahá ña cán queá tá jalóho cúní quivi da já queá nacachi da ña caja cuaha Ndióxi ñamaní xihín ivi jahyi ñaní da, da cúu jahyi da naní José. Anda javí nacaja cáhnu da Ndióxi naní tii ndaa da garrote da. ²² Ta sahá ña nacandeeé ini José Ndióxi sahá ña cán queá tá jalóho cúní quivi da nacahan da xihín na Israel sahá mé quivi tá ná quee na nación Egipto cuhun na. Ta nasahnda da chuun nu ná ña ná cañehe na lasa yiquí cuñu mé dá cuhun ña xihín ná.

²³ Ta sahá ña nacandeeé ini náná tátá Moisés Ndióxi sahá ña cán queá tá nandihí nacacu da já nachicaan jehé na da tañu uní yoo. Náha ña cúu dá in lee ñúchí ndivaha ta chí coó nayihví toho na tuhun nacahan rey cán tá nasahnda da chuun ña quivi ndihí tavalí jacá nacacu nuu na Israel. ²⁴ Ta sahá ña nacandeeé ini Moisés Ndióxi sahá ña cán queá tá nasahnu da najándacoo da vehe rey Egipto vatí najácuahnu ña cúu jahyi jhí rey cán da tátuhun jahyi ñá. ²⁵ Ta ña nacaja da queá nasahan da nandoho ini da xihín na cúu cuéntá Ndióxi. Jáchi co cúní da cáji ini da cája da cuachi vatí chá tiempo. ²⁶ Ta nacahan da ña vaha chága ná ndoho ini da sahá Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuicá nación Egipto cán. Jáchi nacahvi ini da sahá ñamaní caja Ndióxi xihín da chága chí nuu. ²⁷ Ta sahá ña nacandeeé ini Moisés Ndióxi sahá ña cán queá najándacoo da nación Egipto ta coó nayihví da ña ná ndicuehe rey Egipto cán xihín dá. Ta nasahan ndeeé ini da jáchi naxica da tátuhun in da xica xihín Ndióxi vatí coó naxini da mé á.

²⁸ Ta sahá ña nacandeeé ini Moisés Ndióxi sahá ña cán queá nasahnda da chuun ña ná caja na Israel vicó pascua. Nasahnda da chuun ña ná cahní na ndicachi ta já cuihna ndaa na nji rí yuyéhé vehe na Israel

ña ná a quívi jahyi ta na, da nacacu nu cuítí tá ná yaha tátó Ndióxi, mé a cája ña ná quivi ñayivi. ²⁹ Ta sahá ña nacandeeé ini na Israel Ndióxi sahá ña cán queá nayaha na mahñú ndaa tañuhú naní tañuhú cuahá. Nasacuu a tátuhun xica na nu ñundáhyi íchí uun. Joo tá nacasahá na Egipto yaha na mé tañuhú cán já queá coó nacuu caja na ña. Nacandaa na ini ticuítí ta já naxihí ndihí na.

³⁰ Ta sahá ña nacandeeé ini na Israel Ndióxi sahá ña cán queá nacava nuu na ñuu Jericó tañu usa quivi ta já nacuyu ndihí náma ñuu cán. ³¹ Ta sahá ña nacandeeé ini ña xica jii naní Rahab cán Ndióxi sahá ña cán queá coó naxihí ña xihín ndihí ñayivi ñuu Jericó, na coó nacandúsa Ndióxi. Najáacu Ndióxi Rahab cán jáchi sa nandiquehe vaha ña java ta Israel tá nacasa da nu cuítí sándehe da ñuu cán.

³² Ndá chága cahan i xihín ndo. Sa nacahan cuahá i xihín ndo joo cámaní cahan i sahá da naní Gedeón xihín da naní Barac xihín da naní Sansón xihín da naní Jefté xihín da naní David xihín da naní Samuel xihín java ga na nasacuu profeta.

³³ Sahá ña nacandeeé ini na cán Ndióxi sahá ña cán queá naquee vaha na tá nacani táhan na xihín java nación ta nasacomí vaha na cuéntá sahá ñayivi ta nandiquehe na ña vaha nasahan Ndióxi tuhun a quiahva nu ná. Java na nachicaji na yuhu león.

³⁴ Ta java na nandahva na ñuhu cáyi ña ná a cáyi toho na. Ta java na nacacu na ndahá ñayivi, na nacacúní cahní ñahá xihín machiti. Ta java na vatí vitá ini na joo nandihvi ndée ná. Ta java na naquee vaha na tá nacani táhan na xihín na ihvi na. ³⁵ Ta java najihí nacandeeé ini na Ndióxi ta sahá ña cán queá naxini na ña nanditacu tucu na vehe na nacaja Ndióxi.

Joo java na nandoho ndivaha ini na janda quiahva naxihí na. Ta coó nacandúsa na cacu xoo na Ndióxi jáchi nacandaa vaha ini na ña cuhun na coo na in ñuu vaha chága nu in mé á. ³⁶ Java na nandoho ini na tá nasacu ndaa ichí ñahá na ta nacani ñahá na. Ta java na nasandico na xihín cadena ta nachicaan na na vecaa. ³⁷ Ta java na naxihí na jáchi nacuun ñayivi yuu ná ta java na naxihí na tá nasahnda tuhun ñahá na. Ta java na

naxito ndojó ñayivi na ña ná caja na cuachi. Ta java na naxihí xihín machiti. Ta java na nasandíxi na xihín níí ndicachi xihín níí tijúhu cuití va jáchi coó toho jiuhún na. Nacaja xíxi ñayivi xihín ná ta najándoho na ini na. ³⁸ Naxica ndáhví na nu íchí ndivaha ta naxica nuu na yucú ñúhú ta nasanduu na tixi cáva xihín yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyíví yóho. ³⁹ Ta cájii ini Ndióxi xihín tóco ndihi na cán jáchi nacandeé ini na mé á. Joo cámani ndiquehe na ña nasahan mé á tuhun a quiahva nu ná. ⁴⁰ Jáchi cúni Ndióxi ña ná candati na cán anda tandaa quivi ndiquehe tóco ndihí ña vaha chága quiahva Ndióxi nu yo.

12

Ná candee ini Jesús cuití va

¹ Mé ñayivi cuaha cán naquee vaha na jáchi nacandeé ini na Ndióxi. Ta jánaha na nu yo ndaja caja í ña ná quiahva ndeé ini tá ná ndoho ini. Ña cán quéa ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó íchí Ndióxi xihín ndinuhu ini tá quiahva ndítahan caja í. ² Ta ná candehé cáxi yo nuu Jesús jáchi mé á cán cája ña ná casahá candeé ini Ndióxi ta cája ña ná candee ini mé á anda tandaa quiví quiví. Nandoho ini Jesús tá naxihí a ndica crúxu ta coó nacacahan nuu á vatí cacahan nuu ñayivi quiví na quiahva já. Jáchi nacandaa ini a ña tá ná ndihi ndoho ini a já tandaa quivi cajii ndivaha ini a. Ta viti íin coo a xoo cuáha Ndióxi indiví.

³ Xíní ñúhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán quéa a jándacoo ndó ña candeé ini ndó Jesús ta a cácuitá ínimá ndó tá ndóho ini ndó. ⁴ Jáchi cámani yii va cahní na cája cuachi ndohó sahá ña co xeén ndó caja ndó cuachi. ⁵ Á nandindójó ndó tuhun nacahan Ndióxi xihín ndo sahá ña cúu ndó jahyi mé á. Já cáchí tuhun Ndióxi já:

Jahyi maní i, a quéhe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá jánani mé á ndohó.

⁶ Jáchi já cája Ndióxi xihín na quíhvi ini a. Jándoho a ini na já ná jándacoo na ña núu ta já nduu na jahyi mé á, cáchí tuhun Ndióxi.

⁷ Quiahva ndeé ini ndó tá cája Ndióxi ña ná ndoho ini ndó. Jáchi tá quiahva cája in da taa xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da. ⁸ Ta tá co jándoho Ndióxi ini ndó já quéa co cúu ndó jahyi mé á. Cúu ndó tátuhun jahyi ndáhví na. Joo tá ná jándoho Ndióxi ini ndó já cándaa ini ndó ña mé a ndaa cúu ndó jahyi mé á. ⁹ Tá nasacuú na valí nacaja cáhnu yó tátá yo vatí najácaxáhan na mí. Joo íin chága saha caja cáhnu í Ndióxi, tátá yo, mé á íin indiví vatí jándoho a ini mí jáchi xihín ña yóho cuu coo í xihín mé á anda ama cáa quivi. ¹⁰ Tá valí yo najándacaca vaha tátá yo mí tá najánani na mí jáchi já vaha xíní na vatí mé ñuyíví yóho cúu á nu ndúu tóo cuití ví. Joo tá jánani Ndióxi, tátá yo, mí cúu á ña vaha chága jáchi xihín ña yóho ndaja yii á mí tá quiahva íin yii mé á. ¹¹ Mé a ndaa co táhán ini tá jánani na mí jáchi cáhíhvi yo xihín á. Joo tá nandihí já coo vaha ini jáchi nacatiahva í ndaja caca vaha í sahá ña nandoho ini ta xihín ña yóho cacuú ñayivi ndaa nu mé á.

Ndítahan nu yó taa joho í nu cáhan Ndióxi

¹² Ña cán quéa ndicuíta ndó ta a jándacoo ndó mé ndó. ¹³ Ta ndinducú ndó íchí ndacú já ná cuu chindeé ndó ñayivi, na cáva ivi joho ini ña ná a ndicó coo na nuu cuachi.

¹⁴ Xíní ñúhú ndinducú ndó ndaja caja ndó coo vaha ini ndó xihín tóco ndihi ñayivi. Jándacoo ndó cuachi cája ndó ta ndinuhu ini ndó caja ndó ña cúni Ndióxi já ná cuu coo ndó nu íin mé á. ¹⁵ Cuéntá coo ndó ná a jándacoo ni in ndó íchí cuéntá Ndióxi jáchi cúni a caja cuahá ñamani xihín ndo. Cuéntá coo ndó ná a cácuu ndó tátuhun in yucu ova ña jativí ña xíxi na jáchi na cája cuachi cája quini na ta jativí na java ga na cúu cuéntá Ndióxi. ¹⁶ Coto a quíhvi nuu ndó coo ndó xihín in na coo cúu yii ndo á ñajlíhí ndo. Coto a quéhe núu ndó ñaha Ndióxi tá quiahva nacaja Esaú. Jáchi in quivi cuíco

ndivaha da ta najicó da tóco ndihi ñaha ndítahan ndiquehe da nu tátá da sahá ña ná cuxu da in coho cuití va. ¹⁷ Joo cándaá ini ña tá nandindaa nu dá ndiquehe da ñaha ndáha tátá da coó nacuu ndiquehe da ni in ñaha. Jáchí najicó da ña nuú ñani da sahá ña ná cuxu da in coho. Ta vatí nasacu ndivaha da joo coó nacuu caja da ndijama da tuhun da ña sa nasahan da nuú ñani da.

¹⁸ Ta mé ndó coó nacayati ndó nu Ndióxi tá quiahva nacaja na Israel sanahá. Mé na cán nataca na saha in yucu naní Sinai xihín da naní Moisés. Ta nacayi ñuhu cán ta nanaá ndivaha ta naxicó ndivaha tachí naxini na. ¹⁹ Ta naxini johó na nativi trompeta ta nacahan Ndióxi xihín ná. A juú quiahva nayihví na tá naxini johó na nu cahan Ndióxi chí naxica tahví na nu á ña ná a cahan ga xihín ná. ²⁰ Jáchí coó nacandee ini na táa johó na ña sáhdá Ndióxi nu ná tá nacachi a já: “Tá ná cani ndaa in ñayivi á in quítí yucu Sinai yóho já queá xíní ñúhú cuun ndó yuu ná á tuxú ndó na xihín póyá anda ná quivi na”, cáchí Ndióxi. ²¹ Ta a juú quiahva nayihví na sahá ña naxini na cán. Ta anda Moisés viti nayihví ndivaha da ta já nacachi da já: “Quíji ninu i xihín ña yíhvi i”, cáchí da.

²² Joo ña nacaja mé ndó queá sa nacayati ndó in nuú naní Sión, mé nu ín Ndióxi, mé a tácu indiví. Mé ñuu cán cúú á tátuhun inga Jerusalén, ña ín indiví ta ndúu cuaha mil tátó Ndióxi cán. ²³ Sa nataca ndó cán caja cáhnu ndó Ndióxi xihín tóco ndihi ñayivi, na mé a ndaa cúú jahyi Ndióxi, mé na ndaa quivi nu libro Ndióxi indiví. Ta sa nacasaá ndó nu Ndióxi, mé a cája vii saha tóco ndihi ñayivi. Ta nataca ndó xihín tóco ndihi ñayivi, na sa naxihí sanahá, mé na sa nanduu ndaa nu Ndióxi nacaja mé á. ²⁴ Ta sa nacayati ndó nuú Jesús, mé a cahan xoo mí nu Ndióxi. Jáchí sahá ña nacaja Jesús tá naxita nji á ndica crúxu sahá ña cán queá nasahan Ndióxi tuhun a nu yo ña ná ndoo cuachí. Joo jíin va nacaja Ndióxi tá naxita nji Abel sanahá ndivaha jáchí najándoho a ini ñani da, da naní Caín sahá ña nasahní ñahá da.

²⁵ Cuéntá coo ndó já ná a quehe núu ndó nu cahan Ndióxi xihín yo. Jáchí ñayivi cán, na coó naxeen cája ña cáchí Ndióxi

nachahvi na sahá ña núu nacaja na mé ñuyiví yóho. Ta já caja ri Ndióxi xihín mí tá ná quehe núu í tuhun mé á jáchí janda indiví ín mé á cahan xoho. ²⁶ Mé tiempo cán najataan Ndióxi ñuyiví yóho tá nacahan mé á. Joo já cáchí a já viti: “Vaxi quivi ta jataan tucu i ñuyiví ta mé tiempo cán jáquiji nuu i indiví viti”, cáchí a. ²⁷ Tá nacachi Ndióxi ña inga tucu jataan mé á ñuyiví yóho já cándaá ini ña ndihi sahá ñaha nacavaha mé á. Ta tóco ndihi ñaha, ña a cuú quiji nuu, ña cán coo a anda ama cáa quivi. ²⁸ Ñehe táhvi yo coo í nuú cacomí Ndióxi cuéntá saha yo ta mé cán a cuú quiji nuu a. Sahá ña cán queá ná ndiquiahva í ndixahvi nu Ndióxi ta ná caja cáhnu í mé á xihín ndinuhu ini jáchí cájii ini mé á xihín ña yóho. ²⁹ Jáchí mé a ndaa Ndióxi cúú á tátuhun ñuhu ña cáyi ña jándihi sahá ñaha. Ña cán queá caja mé á ña ná ndihi saha tóco ndihi cuachi.

13

Ná caja í ña táhán ini Ndióxi xihín

¹ A jándacoo ndó ña quíhvi ini ndó na cúu cuéntá Jesús jáchí cúu ná tátuhun ñani ndó á quiahva ndó. ² A ndíndójó ndó ndiquehe vaha ndó na tóho tá ná casaá na vehe ndó jáchí xihín ña yóho java na nandiquehe vaha na tátó Ndióxi vatí coó nacandaá ini na ña.

³ A ndíndójó ndó sahá ñayivi ñuhu vecaa ta xíní ñúhú tahnda ini ndó xihín ná jáchí xíní ñúhú cacuu a tátuhun ndacaan mé ndó vecaa xihín ná. Ta a ndíndójó ndó sahá ñayivi, na cája xíxi na xihín ta xíní ñúhú tahnda ini ndó xihín ná jáchí cuu ndoho ini ri ndóhó va tá quiahva ndóho ini na cán.

⁴ Vaha va cája ndó tá tándaha ndó ta xíní ñúhú caja cáhnu ndó yíi ndó á ñájihí ndó. Ta a ndúcú toho ndó coo ndó xihín inga na jáchí jándoho Ndióxi ini ndá na quíhvi nuu coo xihín na coo cúu yíi na á ñájihí na.

⁵ A ndiáva ini ndó cacomí ndó cuaha jiuhún. Ndítahan cajii ini ndó xihín ña cómi ndó jáchí já cáchí Ndióxi já: “A jándacoo toho i ndóhó ta ni a ndíndójó i saha ndó”, cáchí a.

⁶ Sahá ña cán queá cuu candee ini Ndióxi ta cuu cachí já:

Mé á cúu Ndióxi, xitoho i ta chindeé a yehe.

Ta a cáyihví toho i ndá ñaha ndúcú ñayivi caja na xihín i.

⁷ A ndíndójó ndo sahá na nasacomí cuénta saha ndo ta ni sahá na naçaxi tuhun tuhun Ndióxi nu ndo. Candehé ndó ndaja naçaja na ñuyíví yóho jáchi naçandeé ini na Ndióxi anda quiahva naxihi na. Ta ndítahan nu mé ndó candeé ini ndó a tá quiahva naçaja na cân.

⁸ Co ndíjama toho Jesucristo. Tá quiahva nasacuu a sanahá ndivaha quiahva já cúu ri a anda viti ta quiahva já coo a anda ama cáa quivi. ⁹ A quiahva toho ndó ñamani nuú ñayivi ña ná jándahvi na ndohó xihín ña jánaħa na nu ndo. Jáchi cúu á sahá ñamani cája Ndióxi xohó ña ndíndacú ínima yo. Ta co cúu á sahá ña jánaħa java ñayivi tá cáchi na ña a cúu cuxú java ñaha ña ná nduu ndaa ínima yo. Mé a ndaa ña yóho co chindeé a mí.

¹⁰ Tá naxihi Jesucristo ndica crúxu já najoco a mé á nu Ndióxi saha yo. Joo jiin va naçaja jutú cuénta na Israel sanahá tá najoco na quíti nu Ndióxi. ¹¹ Jáchi da cúu jutú sacuaħa nasañehe da nii rí naxihi cân ini veñuhu nuú yii ndivaha ta já najoco da dó nu Ndióxi sahá cuachi ñayivi. Joo natavá da yiquí cuñu rí jatá ñuu nu sáhmi na ri. ¹² Ta quiahva já naxihi Jesús jatá ñuu Jerusalén. Ta naxita nii a ña ná jándoo a cuachi ñayivi. ¹³ Ña cân quéa cóho nuú Jesús. Cúu á tátuhun cuħun í jatá ñuu ta a cáchan nuú yó ndoho iní xihín mé á. ¹⁴ Jáchi ñuyíví yóho coó toho ni in nuú cuu coo í anda ama cáa quivi. Joo ndínducú yo inga ñuu nuú cuu coo í chága chí nuu. ¹⁵ Cóho caja cáħnu í Ndióxi ní tiempo ta chindeé Jesús mí caja í ña. Ta ña yóho cúu á tátuhun ña jóco yo nu mé á sahá ña naçaja tá naxihi a ndica crúxu. Cóho caja cáħnu í mé á xihín yúħu yo jáchi cúu yó cuénta mé á. ¹⁶ A ndíndójó ndo caja vaha ndó ta ná chindeé ndo ñani táhan ndó xihín ña cómi ndo. Jáchi ña yóho cúu á tátuhun ñaha jóco ndo nu Ndióxi ta cájii ini mé á xihín á.

¹⁷ Candúsa ndó na cómi cuénta saha ndo ta caja ndó ña cúni na. Jáchi nasaha Ndióxi chuun yóho nu ná. Ta tandaa quivi ndítahan ndicani na nu Ndióxi sahá ña naçaja na. Caja ndó ña cúni na já ná cajii ini na ta

na a cóo cuéħa ini na jáchi a cuú quee vaha ndó já.

¹⁸ Caça tahví ndo nu Ndióxi sahá nde jáchi nandivií ínima nde ta cúni nde caja vaha nde ní tiempo. ¹⁹ Caja ndó ñamani caça tahví ndo sahá i ña ná quiahva Ndióxi ñamani nuú i saa yachi i nu ndó coto nihni i ndohó.

Xihín tuhun yóho ndihi carta yóho

²⁰ Ña cúni quéa ná quiahva Ndióxi ña ná coo vaha iní. Mé a cân najánditacu tucu a Jesucristo, mé a cúu xitoho í. Ta sahá ña naçaja Jesucristo tá naxita nii a ndica crúxu sahá ña cân quéa nasaha Ndióxi tuhun a nu yo ta a ndihi toho sahá. Ta mé Jesús cómi a cuénta saha yo tá quiahva in pastó cómi da cuénta sahá ndicachi jana dá. ²¹ Ta ná caja Ndióxi ña ná ndíndacú ínima ndó já ná cuu caja ndó tóco ndihi ña cúni a. Ta sahá ña naçaja Jesucristo ná caja Ndióxi xihín yo ndá ña naçuu ña táħan ini mé á xihín. Ná caja cáħnu í Jesucristo anda ama cáa quivi. Já ná coo.

²² Xíca tahví i nu ndo ña ná coo cáħnu ini ndó xihín tuhun cáħan i xihín ndo, ñani i, na cúu cuénta Jesús. Jáchi carta loho cuití va naçahyí i nu ndo já ná ndíndacú ínima ndo. ²³ Ta cáxi tuhun i xihín ndo sahá Timoteo, mé da nasandacaan vecaa joo sa najani dá viti. Tá ná casa a yachi da yóho já saa da xihín i coto nihni nde ndohó.

²⁴ Caħan Ndióxi ndó xihín tóco ndihi na jánaħa tuhun Ndióxi nuú ñayivi ta caħan Ndióxi ndó xihín tóco ndihi na cúu cuénta Jesús. Tóco ndihi na cúu cuénta Jesús, na ndúu nación Italia yóho chíndahá na Ndióxi coo ndó.

²⁵ Ná caja cuaha Ndióxi ñamani xihín tóco ndihi ndó. Já ná coo.

Carta nacahyí Santiago nuú na cúú cuéntá Jesús

Cáhan Ndióxi Santiago xihín na cúú cuéntá Jesús

¹ Yehé cúú Santiago, da cája chúun cuéntá Ndióxi ta cája chúun i cuéntá Jesucristo, xitoho í. Chíndahá i Ndióxi coo na Israel, na cúú cuéntá Jesús, mé na nandicuíta nuu ndúu níi cúú ñuyíví.

Ndaja caja í candaq iní ña cúní Ndióxi caja í

² Cuni johó vaha ndó, ñani mí i, na cúú cuéntá Jesús. Ndítahan cájii ini ndó tá vaxi tá nuú ña ndóho ini ndó. ³ Jáchí sa xíní ndo ña tá ndóho ini ndó sahá ña cándéé ini ndó Jesucristo já queá catiahva chága ndó quiahva ndeé ini ndó sahá ña ndóho ini ndó. ⁴ Quiahva ndeé ini ndó tá ndóho ini ndó anda quiahva ná xinu coo ña cúní Ndióxi já queá cacuu ndó ñayivi ndaa nu mé á. Ta cuahnu vaha ndó xihín tuhun a ta ni in ñaha a cámani ga nu ndo.

⁵ Tá co candaq ini ndó ña cúní Ndióxi caja ndó já queá xíní ñuhú caça tahví ndó nu mé á ta quiahva mé á cuahá ña candaq ini ndó. Jáchí co ndáhví cúu ini a quiahva ña nuú ndihi ñayivi. ⁶ Joo tá xíca tahví ndo nu Ndióxi xíní ñuhú candeé ini ndó mé á ta a cáhvi ivi johó ini ndó jáchí mé na cáhvi ivi johó ini, na cán cúú na tátuhun tañuhú tá ndácojo do cája tachí. Ta co ín táji do jáchí xíca dó tá xoo yóho tá xoo cáa cája tachí. ⁷ Jáchí tá ná cahvi ivi johó ini na já queá a cáhán na ña quiahva Ndióxi ñaha nu ná. ⁸ Mé na cáhvi ivi johó ini co xíca ndaa na ta tucu tucu ndíjama na íchi nu xíca na.

⁹ Ta na cúú cuéntá Jesús tá cúú ná na ndáhví ndítahan cájii ini na jáchí na náhnu cúú ná nu Ndióxi. ¹⁰ Ta na cuicá, na cúú cuéntá Jesús ndítahan cajii ini na jáchí co yáhví toho jjuhún na nu Ndióxi. Jáchí tá quiahva ín itá yucu yachi íchi a ta ndicava ña quiahva já yachi quivi na cuicá. ¹¹ Jáchí tá naxinu coo candii ta nacahihní já queá cama ndivaha íchi mé yucu ta ndicava ita nu á. Já ndihi va ña ñúchí ndaa jáchí

nandihí sahá. Quiahva já ndoho na cuicá jáchí jonáá va ndihi saha ná ta jándicoo na ña cája na.

Tá ndóho ndó tondóho

¹² Ndaja tahví nacuu na sahan ndeé ini tá ndóho ini na jáchí tá nandihí nasahan ndeé ini na já queá ñehé táhví ná coo na xihín Ndióxi anda ama cáa quivi. Jáchí nasahan Ndióxi tuhun a nu yo ña tá cúní yo mé á já queá coo í xihín á anda ama cáa quivi. ¹³ Tá ná ndicají ini ndó caja ndó ña núu já queá a cáhán ndo ña xito ndojó Ndióxi ndohó. Jáchí a cúu caja Ndióxi ña núu ta co cúní a ña ná caja ñayivi ña núu. ¹⁴ Joo tá cája ndó ña núu cúú á sahá ña xíca ini ndó caja ndó ña ta xihín ña yóho ndicava ndó nuú cuachi. ¹⁵ Jáchí sahá ña núu xíca ini ñayivi caja na sahá ña cán cásahá na cája na cuachi. Ta tá sa nandicuahá cuachi na já queá cuhun na चाहvi na sahá ña cája na ini indayá anda ama cáa quivi.

¹⁶ Cúní ndivaha i ndohó, ñani mí i na cúú cuéntá Jesús. A jándahvi ndó mé ndó. ¹⁷ Jáchí tóco ndihi ña vaha quíxi a indiví nu ín Ndióxi ta mé á sahan ña vaha nu yo. Já ín va Ndióxi jáchí cája tá cája ña vaha cuití va. Ta co ndíjama toho Ndióxi. Ta mé Ndióxi, tátá yo nacavaha ña ndiyéhe ín indiví. Ta ndá tañu ndíjama táhan ña ín indiví joo Ndióxi co ndíjama toho a. ¹⁸ Jáchí cúní Ndióxi jácacu a mí sahá ña cándúsa í tuhun mé á ña cúú ña ndaa. Jáchí cúní Ndióxi ña ná cacuu na nu cuítí tañu tóco ndihi ñaha nacavaha mé á.

Ndaja caja í ndiquehe vaha í tuhun vaha cáhan sahá Jesús

¹⁹ A ndíndójó ndo ña cáhan i xihín ndo jáchí cúní ndivaha i ndohó, na cúú cuéntá Jesús. Ndítahan nu ndó cuni johó vaha ndó tá cáhan inga na xihín ndo. Ta a cácana ini ndó nducú ñehé ndó tuhun ña cáhan inga na xihín ndo. Ta a cójo ini ndó xihín ná. ²⁰ Jáchí tá xójo ini ndó xihín inga na já queá cája ndó ña co cúní Ndióxi. ²¹ Ña cán queá cacu xoo ndó ndihi ña núu ta jándicoo ndó ndihi cuachi cája ndó jáchí ndúu cuahá na cája tá nuú cuachi tañu ndó. Joo xíní ñuhú jánuu ndáha ndó mé ndó nu Ndióxi ta ndiquehe vaha ndó tuhun mé á ña nacahan na xihín ndo jáchí tá

ná candúsa ndó ña já quea jácacu Ndióxi ndohó.

²² Xíni ñúhú candúsa ndó caja ndó tuhun Ndióxi jáchi co yáhi toho a tá xini johó uun va ndó ña. Ta xihín ña yóho jándahvi ndó mé ndó. ²³ Ndá na co candúsa caja ña cáchi tuhun Ndióxi cúu ná tátuhun in da sándehe nuu nuú yutátá. ²⁴ Tá nandihí nasandehé da nuu dá já quee da cuahan da ta cama chá ndindójó da ndaja cáa nuu dá. ²⁵ Joo mé ñayivi tá jácuaha na tuhun Ndióxi ta co ndindójó na caja na ña cáchi a já quea caja yii Ndióxi tóco ndihí ña cája na jáchi ña ndaa cúu tuhun Ndióxi. Tá cája í ña sáhdá tuhun Ndióxi nu yó caja í já quea co sáhdá ga cuachi chuun nu yó ta já ndinuhu iní caja í ña cuni Ndióxi.

²⁶ Cúu á tátuhun tá íin in dataa tañu ndó ta cáhan da cája da ña cuni Ndióxi joo co ndáa da yúhu dá tá cáhan da sahá ñani táhan da já quea jándahvi da mé va da ta coo saha toho ña cája da nu Ndióxi jáchi co cája da ña cáchi tuhun Ndióxi. ²⁷ Jáchi tá mé a ndaa nandihvi in da íchi cuéntá Jesús já cúu dá taa ndaa nu Ndióxi, tátá yó. Ta chindee da na cuaan ta chindee da na sánchó tá ndóho iní na. Ta cándéé ini da Ndióxi ta tává da mé dá nuu cuachi jáchi co cája da ña núu tá quiahva cája ñayivi ñuyíví.

2

A cája ichi ini ndó xihín na ndahví

¹ Cuni johó vaha ndó, ñani mí i, na cúu cuéntá Jesús. Mé ndó cándéé ini ndó Jesucristo, xitoho í, mé a cúu ña cáhnu ndivaha. Ndítahan quihvi ini ndó na ndahví tá quiahva quihvi ini ndó na cuicá.

² Ña ndítahan caja ndó cúu ña yóho: Tá ná taca ndó caja cáhnu ndó Ndióxi ta vaxi in da cuicá ndihvi da nu táca ndo ta ndíxi da jáhma vaha ndivaha ta ndácaan jéhe jiuhun cuaan nducu ndáha dá. Ta mé tañu já vaxi in da ndahví, da ndíxi jáhma núu ña yatá.

³ Ta ndíquehe vaha ndó mé da cuicá ta cáchi ndó xihín dá: “Silleta vaha coo ndó”, cáchi ndó xihín da cuicá. Joo xihín da ndahví cáchi ndó já: “Candichi ndó jan á coo ndó nu ñúhu yóho”, cáchi ndó xihín da ndahví.

⁴ Tá cája ndó ña yóho já quea cája ichi ini ndó xihín da ndahví ta cája cáhnu ndó da cuicá

sahá jiuhun da. Ta cáhvi núu ini ndó jáchi cáhan ndo ña íin chága sahá da cuicá a juú ga da ndahví.

⁵ Cuni ndivaha i ndohó, ñani i, na cúu cuéntá Jesús. Ña cán quea cuni ña ná candaa vaha ini ndó ña nacaxi Ndióxi na ndahví ndúu ñuyíví yóho ná cacuu na na náhnu nu Ndióxi tá cándéé ini na mé á. Jáchi nasahan Ndióxi tuhun a nuú ndihí na cán ña ná cacuni na mé á já quea ñehe táhvi ná cuhun na indiví coo na xihín mé á anda ama cáa quivi. ⁶ Joo mé ndó cája ichi ini ndó xihín na ndahví. Á co ndícuhun ini ndó ña mé na cuicá cúu ná na cája xixi xihín ndó ta ñúhu na ndohó cuahan na nuú na jutixia chicaan na cuachi jata ndo. ⁷ Jáchi mé na cuicá cáhan núu na saha Jesucristo ta mé ndó cúu ndó cuéntá mé á.

⁸ Sáhdá tuhun Ndióxi chuun nu yó já cáchi a já: “Tá quiahva quihvi ini ndó mé ndó quiahva já ndítahan quihvi ini ndó ñani táhan ndó”, cáchi tuhun Ndióxi. Tá ná caja ndó ña cáchi a yóho já quea cája vaha ndó jáchi ña yóho cúu á ley cáhnu nu Ndióxi. ⁹ Joo cája ndó cuachi nu Ndióxi tá ndíquehe vaha chága ndó na cuicá a juú ga na ndahví. Ta xihín ña yóho chicaan ley Moisés cuachi jata ndo. ¹⁰ Jáchi vatí nasacu vaha in ñayivi ndihí ley Moisés joo sahá in ñaha coo nacaja na sahá ña cán quea ndójo na cuachi saha tóco ndihí ley. ¹¹ Jáchi sa mé Ndióxi cáchi a já: “A quihvi nuu ndó xihín ñájihí ñani táhan ndó”, ta já cáchi tucu a já: “A cáhni ndó ndi”, cáchi a. Ña cán quea cája ndó cuachi nu Ndióxi tá sáhní ndo ñayivi vatí co quihvi nuu ndó coo ndó xihín ñájihí ñani táhan ndó. ¹² Ndítahan caja vaha cuití va ndó ta cahan ndaa cuití va ndó jáchi vaxi quivi caja víi Ndióxi saha yó xihín ley mé á ña jácacu mí. ¹³ Tá co táhnda ini ndó sahá ñayivi já quea a táhnda ini Ndióxi saha ndó tá ná casa quivi caja víi a sahá cuachi nacaja ndó. Joo tá natahnda ini ndó sahá ñayivi já quea quee vaha ndó tá ná caja víi Ndióxi sahá ña nacaja ndó ñuyíví yóho.

Tá cándéé ini Ndióxi já cája í ña cuni mé á

¹⁴ Cuni johó vaha ndó, ñani mí i, na cúu cuéntá Jesús. Tá cáchi ndo cándéé ini ndó Jesucristo joo co cája ndó ña vaha já quea co yáhi toho nu Ndióxi ña cándéé ini ndó mé

á. Ta sahá ña yóho a cúu toho jácaacu Ndióxi ndohó. ¹⁵ Cúu á tátuhun tá íin in na cúu cuéntá Jesús ta cámaní jáhma candixi na ta cámaní ña cuxu na quiví víti. ¹⁶ Ta cáchí ndó xihín na cán já: “Ná coo vahún ta ná candixi vahún ta ná cuxu vahún”, cáchí ndó xihín ná. Joo co sahan ndó jáhma candixi na ta ni ña cuxu na co sahan ndó nu ná ña cán queá coo chuun cúu ña cáhan ndó xihín ná. ¹⁷ Ña cán queá tá cáchí ndó cándéé ini ndó Jesucristo joo co cúni ndó caja ndó ña vaha, ña cúni Ndióxi caja ndó já queá mé a uun cándúsa ndó Jesucristo.

¹⁸ Tá íin in da cúu cuéntá Jesús ta co cúni da caja da ña cúni Ndióxi já queá co jánaha da nuú ñayivi ña mé a ndaa cándéé ini da Jesucristo. Tá íin inga da ta cája tá cája da ña cúni Ndióxi já queá jánaha da nuú ñayivi ña mé a ndaa cándéé ini da Jesucristo. ¹⁹ Tá cándúsa ndó ña íin in tálaá cuití Ndióxi já queá vaha cája ndó. Jári rí quini cándúsa rí ña íin in tálaá cuití Ndióxi. Joo co cándúsa rí caja rí ña cúni Ndióxi ta yíhví ndivaha rí mé á janda quíji ninu rí. ²⁰ Á nacatontó jini ndó. Candehé vaha ndó. Tá cáchí ndó cándéé ini ndó Ndióxi joo co náha ndó xihín ña cája ndó ña mé a ndaa cándéé ini ndó mé á já queá coo saha mé va ña cája ndó. ²¹ Á co ndícuhun ini ndó Abraham, tásáhnú jícó yo. Nandiquehe vaha Ndióxi Abraham sahá ña nacaja da ta cáchí Ndióxi ña cúu dá ta ndaa nu mé á jáchí nacandúsa mé Abraham cahní da Isaac, jahyi da, ña joco ñahá da nu mé á. ²² Candehé ndó. Tá nacandúsa Abraham joco da jahyi da nu Ndióxi já najána ha da nuú ndihi ñayivi ña cándéé ini da Ndióxi. Ta sahá ña nacaja da já naxinu coo da cándéé cáhnu ini da Ndióxi. ²³ Jatá ña nacaja Abraham naxinu coo tuhun Ndióxi tá cáchí a já: “Nacandéé ini Abraham Ndióxi ña cán queá nanduu da ta ndaa nu mé á”, cáchí tuhun Ndióxi. Nacachi na sahá Abraham ña cúu dá da nandique táhan máni xihín Ndióxi.

²⁴ Ña cán queá cándaa vaha iní ña nduu ndaa yo nu Ndióxi sahá ña cándéé ini Ndióxi anda quiahva cándúsa í caja í ña cúni mé á. ²⁵ Já nayaha xihín Rahab, mé ña naxica jii sanahá ndivaha. Nanduu ndaa ña nu Ndióxi sahá ña nacaja ña xihín

ñayivi Israel jáchí nandiquehe vaha ña java dataa nachindahá Josué ñuu Jericó. Ta nachindeé ña da ña ná ndijama da íchí nuú cuhun da. ²⁶ Ña cán queá tá cáchí yo cándúsa í Ndióxi joo co cája í ña cúni mé á já queá cúu yo tátuhun ñayivi sa naxihí, na sa cuahan inima.

3

¹ Cuni johó vaha ndó, ñani mí i, na cúu cuéntá Jesús. A ndúcu cuaha ndó cacuu ndó na jána ha tuhun Ndióxi nuú ñayivi jáchí cándaa vaha ini ndó ña tá co jána ha ndó ña ndaa já queá jándoho chága Ndióxi ini ndó a juú ga java ga ñayivi. ² Tóco ndihí cája cuaha yo cuachi. Joo ndá na cuu cahnda chuun nu yúhu ná ña ná a cáhan quini a já queá cuu cahnda na chuun nuú yiquí cuñu na viti ña ná a cája na cuachi ta já xinu coo na cacuu na ñayivi ndaa nu Ndióxi. ³ Á co ndícuhun ini ndó ndaja chícáan na in freno yúhu cuáyí ña ná candaca na rí. Vatí loho ndivaha cúu mé freno joo cuu cañehe na rí nu cúni mé ná cuhun na. ⁴ Candehé ndó in barco. Vatí cáhnu ndivaha cúu dó ta vaxi tachí ndeé ndivaha joo mé da ñehe dó cuu candaca da do xihín in timon loho ta cuu cañehe da do cuhun dó nu cúni mé dá. ⁵ Tá quiahva sáhdá na chuun nu cuáyí xihín barco quiahva já cája í xihín yúhu yo. Vatí loho ndivaha cúu mé yúhu yo joo xihín mé yúhu yo cuu caja cáhnu í mé ví. Candehé ndó ndaja náhnú yúcu jáquihvi ñúhu in titó loho tá ndicava dó nu á ta chícáyí yúcu anda quiahva ndihi sahá. ⁶ Tátuhun in ñuhú cáyi cúu yúhu yo. Cúu á in ña núu ndivaha ndacaan tañu yiquí cuñu í ta játiví ndihi a mí. Ta cúu á tátuhun ña sa mé indayá sahan chága ví a ñúhu nu á ña ná caja quini a ta jándihi a saha yo. ⁷ Vatí ñayivi cándéé na sáhnú na nu tóco ndihí quítí xihín laa xihín coo xihín quítí ñúhu tañuhú ta cúu sáhdá na chuun nu rí. ⁸ Joo ni in ñayivi a cuú cahnu na yúhu na jáchí co sáji yo yúhu yo tá cáhan quini sahá ñayivi. Cúu á tá quiahva cája coo tá tীন rí ñayivi chícáan rí veneno rí na já sáhní rí na. ⁹ Xihín mé yúhu yo cuahá tañu cája cáhnu í Ndióxi ta sa xihín mé yúhu yo yóho cána há yo xihín ñayivi, na nacavaha Ndióxi yuhú nu mé

á. ¹⁰ Ndá tañu cáhan vaha í xihín yúhu yo ta java tañu quini cáhan yo xihín mé yúhu yo. Candehé ndó, ñani mí í, na cúu cuéntá Jesús. Co ndítahan toho caja í ña yóho. ¹¹ Jáchí cúu á tátuhun in chichoho nu cána ticuúí. A cuú cana ticuúí viji xihín ticuúí ova ini in chichoho. ¹² Ta sa xini vaha ndó, ñani mí í ña in titó ñuhú co sáhan dó aceituna jáchí cúu dó titó ñuhú va. Já in yucu uva co sáhan toho a titó ñuhú jáchí cúu á yucu mé uva va. Ña cán queá sa xini vaha ndó ña co ñuhu ticuúí viji xihín ticuúí ova ini in chichoho.

Ndaja ín na ndíchí jini cuéntá Ndióxi

¹³ Tá ín in taa ndíchí, da tácu ini tañu ndó já queá ndítahan caja vaha da ta xihín ña yóho jánaħa da nuú ñayivi ña cúu dá taa ndíchí. Tá co cája lánħa da sahá ña cája da já queá jánaħa da nuú ñayivi ña mé a ndaa cúu dá taa ndíchí. ¹⁴ Tá ná ndicutú ndaa ini ndó xihín ña ihvi ini ndó já queá a cáhan ndo cúu ndó na ndíchí. Ta tá ná caja ndó ñaha sahá ña cúní ndó ndiñehe jícó ndo mé ndó já queá a cáhan ndo ña cúu ndó na ndíchí. Jáchí mé da ndíchí co cája cáhnu da mé dá ta co cáhan túhún da jáchí mé a ndaa cúu dá taa ndíchí. ¹⁵ Joo tá cája cáhnu da mé dá já queá cándaħa ini ndó ña co ndíchí jini dá nu Ndióxi jáchí tuhun cáhan da coo naquixi a indiví nu ín Ndióxi. Cáhan da tuhun ñayivi ñuyíví yóho va ta jini mé va da vaxi a. Ta tuhun cáhan da cúu á tuhun núu, ña quixi nuú tiñáħa sacuaħa. ¹⁶ Jáchí nu ndúu na ihvi ini mé cán ndúu na co cúní táhan ta sa mé cán cáni táhan na ta cája na tóco ndihi nuú cuachi. ¹⁷ Joo na ndíchí jini cáhan na tuhun quíxi indiví nu ín Ndióxi. Ndinuhu ña vaha cája na ta co xójo ini na xihín ñayivi. Cája cáhnu ini na sahá ñayivi. Co xíxi ini na xihín ñayivi jáchí táhnda ini na sahá ná. Cája na ña vaha cuití va. Cáhan na ña ndaa cuití va ta co jándahvi na ñayivi. ¹⁸ Vatí cúní ñayivi cáni táhan na xihín na ndíchí joo ndúcú na coo vaha ini na xihín ndihi ñayivi ta já cúu ná ñayivi ndaa nu Ndióxi.

4

A cándico toho ndó íchi cuéntá na ñuyíví

¹ Ndávaha ri cáni táhan ndó ta já quihvi ndó tondóħo tañu ñayivi. Cáni táhan ndó

sahá ña ndicají ini ndó caja ndó cuahá nuú cuachi ña xíca ínima ndo. Ta cúu á tátuhun cáni táhan ña vaha xihín ña núu ini ínima ndo ² jáchí xíca ini ndó coo cuahá ñaha nu ndo joo a cuú ñeħe ndó a. Ña cán queá sáhní ndó ñayivi já ñeħe ndó ña cúní ndo. Cáhivi ini ndó tá xíní ndo ñaha inga na ta a cuú ñeħe ndó a, ña cán queá cáni táhan ndó xihín ná. Joo co ñeħe ndó ña cúní ndo jáchí co xíca tahví ndo nu Ndióxi sahá ñaha cámaní nu ndo. ³ Tá xíca ndo ñaha nu Ndióxi ta co sáhan mé á ñaha nu ndo já queá cándaħa vaha ini ndó ña co ín vaha ínima ndó nu Ndióxi jáchí nasacu ini ndó caja ndó ña cúní mé cuití ndo. ⁴ Tá quiahva cája ñañáħa tá jándahvi ña yí ña xihín inga dataa quiahva já cája ndó cuachi ña co táhan ini Ndióxi xihín. A co cándaħa ini ndó ña tá ná caja í tá quiahva cája ñayivi ñuyíví yóho já queá nduú na co cúní táhan xihín Ndióxi. Ta a cuú ndique táhan máni yó xihín mé á tá ná caja í ña núu ñuyíví yóho. ⁵ Jáchí sa xini vaha ndó ña ín saħa cáhan tuhun Ndióxi tá cáchí a já: “Nachicaan Ndióxi ínima yíi mé á ini in in í jáchí cúní ndivaha mé a mí ta chí táhvi ndivaha ini a saħa yo.” ⁶ Joo cája Ndióxi cuahá ga ñamaní xihín yo ta chindeé a mí. Já cáchí tuhun Ndióxi já: “Co táhan ini Ndióxi xihín ñayivi, na ndiñehe jícó mé. Joo chindeé Ndióxi ñayivi vaha, mé na co ndiñehe jícó mé”, cáchí tuhun Ndióxi. ⁷ Ndiquiahva ndó mé ndó ndáħa Ndióxi ta chicají ndó ínima ndo nuú tiñáħa sacuaħa ná a cája ndó ña cúní ri. Anda jáví cunu rí cuhun ri. ⁸ Cayati ndó nu Ndióxi ta já cayati Ndióxi nu ndo. Jándicoo ndó cuachi cája ndó ta ndaja víí ndó ínima ndo ña ná cándico ndó in túhún íchi cuéntá Jesús cuití va. ⁹ Cajuchú ini ndó ta ndahyi cóħo ndo sahá cuachi cája ndó. Ndiama ndó ña cájii ini ndó ta ná nduu a ña cacuéħa ini ndó sahá cuachi ndó. ¹⁰ A ndiñehe jícó ndo mé ndó nu Ndióxi já queá ndiñehe jícó Ndióxi ndohó.

A cáhan núu ndó saħa inga na

¹¹ Candehé ndo, ñani mí í, na cúu cuéntá Jesús. A cáhan núu saħa táhan ndó ta a cándehé ndaa táhan ndó. Jáchí ndá da cáhan núu sahá inga na já cáhan núu da saħa ley Ndióxi ta sájí nuu da nu ley. Co ndítahan nu

yo caji nuu í nu ley Ndióxi jáchi tá cája í já já queá quehe núu í ley Ndióxi ta sándehe ndaa í ña. Ña ndítahan nu yo caja í queá candúsa í ña ta caja í ña. ¹² Jáchi in túhún Ndióxi nasahan ley nu yo. Ta mé Ndióxi cúu á juéxe cáhnu nuú ndihi ñayivi ta mé á cuu caja víi a sahá cuachi. Ndióxi cuití va cuu jácacu mí ta sa mé Ndióxi cuu chindahá mí indayá. Ña cán queá co ndítahan nu yo candehé ndaa táhan í.

Tá cahan í sahá ña caja í itaan

¹³ Ndúu java na tañu ndó ta cáchi na: “Viti á itaan cuhun tá cuhun nde in ñuu cáhnu ta cán canduu nde in cuiá caja chúun nde ta ñehe cuahá nde jjuhún”, já cáchi java na. Tá cahan ndo já ndítahan cuni johu vaha ndó ña cahan í xihin ndo. ¹⁴ Co xini toho ndó ndia ndoho ndó itaan. Co xini toho ndó ndá quivi quivi ndó. Cúu ndó tátuhun in vico ña íin too loho ta tá nandihí sa coó a. ¹⁵ Vaha chága ná cachi ndó já: “Catacu nde quivi itaan tá cuni Ndióxi. Ta caja nde ña jan á ña yóho tá cuni Ndióxi”, já cachi ndó. ¹⁶ Joo cája cáhnu ndó mé ndó tá cáchi ndó ña cánda in ndó ndia ndoho ndó quivi itaan. Ta núu ndivaha cája ndó tá cája cáhnu ndó mé ndó. ¹⁷ Cuachi ndacaan nuú na tiahva caja ña vaha ta co cája na ña.

5

Cahan Santiago nuú na cuicá

¹ Cuni johu vaha ndó na cuicá. Ndítahan nu ndó ndahyi cóhó ndo ta tahnda ini ndó jáchi vaxi quivi ndoho ini ndó. ² Nacasahá táhyi tóco ndihi ñaha najátaca ndó ta nasaxi ndihi tiquijí jáhma ndo. ³ Nacuju ndihi jjuhun cuáan xihín jjuhun cúxú ña najátaca ndó catacu vaha ndó quivi chága chí nuu. Joo co yáhví ga viti jáchi vaxi quivi tá naha ña nacajihnda ndivaha ndó xihín jjuhún ndó. Tá quiahva jándihí ñuhú cáyi sahá tutu quiahva já ndihi saha ndó tá chínúu ndó ínimá ndó jatá jjuhún ndó. ⁴ Candehé ndó. Mé ndó coo nachahvi ndó mozo ndo tá najácaja chúun ndó na nuú utu ndó. Ta viti sácu cóhó na ndaca na cuénta nu ndo. Ta tá xíca tahví na nu ndo já queá anda nu Ndióxi, mé á cáhnu ndivaha, xinu coo ña cahan na xihin ndo. ⁵ Mé ñuyiví yóho ndúu vaha ndó xihín ña cuicá ndo ta cája ndó

ña xíca ini cuití va ndó. Xíxahan vaha ndó ta viti nandaha ndó tátuhun tindiqui, rí najándaha chuun na cahní na. ⁶ Ta chícaan ndó cuachi jatá ñayivi ndaa ta ndá tañu sahní ndó ñayivi vaha, mé na a cuú chindeé mé.

A cándati númi ndó quivi quixi tucu Jesucristo

⁷ Candehé ndo, ñani mí i, na cúu cuénta Jesús. A ndíhi ini ndó ta cuéé coo ini ndó candati ndó quivi quixi tucu Jesucristo, mé a cúu xitoho í. Tá quiahva ndati in dataa jáquee da nuú utu da quiahva já ndítahan candati Jesucristo ña quixi tucu a. Jáchi sa xini ndo ndaja cája in dataa tá ndati da cuun vaha javi nuú tata ña nachihin da. Joo co ndati númi dá ña ná jáquee da nu á. ⁸ Quiahva já ndítahan cuéé coo ini ndó candati ndó quivi quixi tucu Jesucristo. Cacú ndacú ndó ínimá ndo jáchi jalóho cuni ndinda quivi quixi tucu Jesucristo. ⁹ Candehé ndo, ñani mí i. A cahan cuachi nu táhan ndó ná a jándoho Ndióxi ini ndó. Ta viti jalóho cuni quixi Ndióxi, ña cúu juéxe cáhnu caja víi a sahá cuachi ñayivi. ¹⁰ Á co ndicuhun ini ndó, ñani mí i. Sanahá ndivaha mé na profeta Ndióxi nacahan na tuhun Ndióxi nuú ñayivi. Tá quiahva nasahan ndeé ini na tá nandoho ini na quiahva já ndítahan nu mí quiahva ndeé ini tá ná casaa quivi ndoho ini. ¹¹ Ta ñehe táhví mé profeta ña cájii ini na viti jáchi nasahan ndeé ini na tá nandoho ini na. Á coo naxini johu ndó saha in da naní Job. Vati nandoho ndivaha ini da joo nasahan ndeé ini da tá nandoho ini da já queá nacaja cuahá Ndióxi ñamaní xihin dá. Xihín ña yóho cánda in ña táhnda ini Ndióxi sahá ñayivi jáchi quíhví ini a na. ¹² Cuni johu vaha ndo, ñani mí i jáchi cáhnu chága tuhun yóho nuú ndihi tuhun. Co ndítahan tává ndo quivi indiví ni quivi ñuyiví ni quivi inga ñaha. Jáchi ndítahan cahan ndó ña ndaa cuití va. Ta tá ndúcú ñehe ndó tuhun já cáchi ndó já: “ajan”, á tá coo já cáchi ndó: “uhun.” Já cuití va cachi ndó ná a jándoho Ndióxi ini ndó.

¹³ Tá íin in na ndóho ini tañu ndó, ndítahan nu ná caça tahví na nu Ndióxi sahá ña ndóho ini na. Tá íin in na cájii ini tañu ndó, ndítahan nu ná cata na nu

Ndióxi já ná caja cáhnu na mé á. ¹⁴ Tá ín in na quíhvi tañu ndó já quéa ndítahan nu ná caca na ñamani nuú na sacuaḥa veñuhu ña ná quixi na caca taḥví na nu Ndióxi saḥa ná. Ta ná cuyu na sítí jiní na quíhvi ña ná ndivaḥa na. ¹⁵ Ndítahan nu ndó candeé ini ndó Ndióxi tá ná caca taḥví ndo nu á saḥá na quíhvi já quéa ndivaḥa na quíhvi caja Ndióxi. Ta tá nacaja na cuachi já quéa caja cáhnu ini Ndióxi saḥá cuachi na. ¹⁶ Ña cán quéa ndítahan nu ndó nahma nu táhan ndó cuachi ndó. Ta ndítahan nu ndo caca taḥví ndo nu Ndióxi saḥá ndaja táhan ndo já quéa ndaja vaḥa Ndióxi ndohó tá quíhvi ndo. Jáchi chíndeé Ndióxi ñayivi vaḥa tá xihín ndinuhu ínimá ná xica taḥví na nu mé á. ¹⁷ Á co ndícuḥun ini ndó da naní Elías, da nasacuu profeta sanahá. Nasacuu da ñayivi tátuhun mí. Ta xihín ndinuhu ini da naxica taḥví da nu Ndióxi ña ná a cúun javi. Ña cán quéa tañu uní cuia java coo nacuun toho javi. ¹⁸ Ta tá nandihí cán naxica taḥví tucu da nu Ndióxi ña ná casáhá cuun tucu javi. Ña cán quéa nacasáhá cúun tucu javi chí nanana ndihí yucu cuí ñundáhyi cán.

¹⁹ Candeḥé vaḥa ndó, ñani mí i, na cúu cuéntá Jesús. Tá ín in na tañu ndó ta najándicoo na íchi cuéntá ña ndaa ta tá in ndó najándicó coo ndó na cán ña ná caca tucu na íchi cuéntá Jesús ²⁰ já quéa najáca cu ndó mé na cán ña ná a cúhun toho na in-dayá. Ta já caja cáhnu ini Ndióxi saḥá cuahá cuachi nacaja na.

Cártá nacahyí Pedro nu cuítí

Cáhan Ndióxi Pedro xihín na cúu cuéntá Jesús

¹ Yehe cúu Pedro ta cúu u in apóstol cuéntá Jesucristo. Ta chindahá i Ndióxi coo ndó, na nacaxi mé á jáchi cúu ndó na tóho ñuu jan sahá ña nataxí ñayivi ndohó ñuu ndó. Ta viti nandicuita nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia. ² Cúu ndó na nacaxi Ndióxi, tátá yo jáchi janda saha nasacu ini mé á caja já xihín ndo. Ta xihín ínimá yji mé á nandaja ndohó ña ná nduu ndó cuéntá mé á já ná caja ndó ña sáhdá a nu ndó caja ndó. Ta nacaxi a ndohó já ná ndivií ndo xihín ni Jesucristo. Ná caja cuahá ndivaha Ndióxi ñamaní xihín ndo ta ná caja mé á ña ná coo vaha ndivaha ini ndó.

Jácaacu Ndióxi ñayivi

³ Ná caja cáhnu yó Ndióxi, mé á cúu tátá Jesucristo, xitoho í jáchi táhdá ndivaha ini mé á saha yo ta nacaja ña tácu yó cuéntá mé á viti. Já nacaja jáchi nanditacu tucu Jesucristo ta mé á ndaa cándaá vaha ini ña jáxinu coo Ndióxi tuhun a nasahan nu yo. ⁴ Ta nasacu ini a quiahva cuahá ndivaha ña vaha ín indiví cán nu ndo. Mé ña vaha ín cán a cuú ndihi sahá ta ni co íchi a ta a cáyatá toho ña. Ta nasacu vaha Ndióxi mé ña vaha ín indiví cán anda tandaa quiví saa ndó cán. ⁵ Cándéé ini ndó Ndióxi sahá ña cán quéa xihín ndéé mé á chindeé a ndohó nuú ña ihvi vaxi nu ndo anda xinu coo quiví nu ndíhí. Janda javí cuni ndó ndá quiahva jácaacu a ndohó.

⁶ Ña cán quéa ndítahan nu ndó cajií ndivaha ini ndó viti vatí vaxi quiví ndoho ini ndó sahá tondóho quixi nu ndo. ⁷ Tá ná candéé cáhnu ini ndó Ndióxi cúu á tátuhun jiuhun cuáán. Ta tá quiahva cája in dataa tá jáyaha da jiuhun cuáán nu ñuhú cáyi ña xító ndojó da ña quiahva já cája ri Ndióxi coto ndojó a ndohó ña ná nahá ña mé a ndaa cándéé cáhnu ini ndó mé á. Ta ndíyahvi chága ña cándéé ini ndó mé á a juú ga

jiuhun cuáán, ña ndihi saha. Ña cán quéa tá ná quixi tucu Jesucristo já cahán vaha mé á sahá ña nacaja ndó ta já ndaja cáhnu a ndohó jáchi nacandéé ini ndó mé á.

⁸ Quíhvi ini ndó Jesucristo ta cándéé ini ndó a vatí a ñaha cuni ndó a. Ña cán quéa nacaan ndó cajií ini ndó ta ña yóho cúu á ña cáhnu ndivaha nu mé á. Ta ni co ñéhe ndó tuhun ndá quiahva ndicani ndó ña yóho nuú ñayivi. ⁹ Cajií ini ndó jáchi cándaá ini ndó ña jácaacu Ndióxi ndohó sahá ña cándéé ini ndó mé á.

¹⁰ Anda sanahá ndivaha najáyaha na profeta tuhun nacahan Ndióxi xihín ná nuú ñayivi. Ta cáchi na ña vaxi quiví caja cuahá Ndióxi ñamaní xihín ñayivi ña jácaacu a na nuú cuachi na. Ta vatí najácuaha na tuhun mé á joo coo nacandaá ini na ndaja caja Ndióxi jácaacu a ñayivi. ¹¹ Ta ñuhu ínimá yji Jesucristo ini ínimá na profeta ta nacaja mé á ña ná cahyí na nuú tutu ña nacahan mé á xihín ná. Ta nacahyí na ña vaxi quiví ndoho ndivaha ini Jesucristo joo tá nandihí já ndicáhnu ndivaha mé á. Ta nanducú na cán candaá ini na yo cacuu Jesucristo ta ndá tiempo cacu a. ¹² Nacaja Ndióxi ña ná candaá ini na profeta ña a yáha yachi toho ña nacahyí na nuú tutu jáchi cacuu a ña coo tiempo vaxi chí nuu. Jáchi saha mé ndó nacahyí na ña nuú tutu ta java ñayivi sa nacaxi tuhun na mé tuhun vaha saha Jesucristo nu ndo. Ta nachindahá Ndióxi mé ínimá yji mé á ña ná quixi a indiví ta nachindeé a na ña ná cahán na tuhun vaha saha Jesucristo nu ndó. Ta janda mé tátó Ndióxi cúni na candaá ini na ña yóho.

Ndítahan nu yo caja í tá quiahva cája Ndióxi

¹³ Ña cán quéa caja tiahva ndó xíní túní ndo ña ná caja ndó ña cúni Ndióxi. Cahnu ndó xíní túní ndo ta coo tiahva ndó candati ndó ná jáxinu coo Ndióxi tuhun a ña caja cuaha mé á ñamaní xihín ndo tá ná xinu quiví quixi tucu Jesucristo. ¹⁴ A cacuu ndó ñayivi sáá ini jáchi cúu ndó jahyi Ndióxi. Co ndítahan ga cája ndó ña núu ña naxica ini ndó caja ndó tá cámaní candaá ini ndó tuhun Ndióxi. ¹⁵ Ña ndítahan caja ndó quéa caja ndó ña cúni Ndióxi xihín ndinuhu ini

ndó já ná cacuu ndó ñayivi yii. Jáchi Ndióxi, mé á naçaxi ndohó cúú á ña yii. ¹⁶ Jáchi já cáchí tũhun Ndióxi: “Ndítahan cacuu ndó ñayivi yii jáchi yehe cúú ũ Ndióxi yii.”

¹⁷ Ta tá ná cachi ndó “tátá Ndióxi” já ndítahan caja cáhnu ndó a nani ndúu ndó ñuyíví yóho. Jáchi mé á cája vií a sahá ña cája in in ñayivi ta co sáhní toho a mé á ndá ñayivi cúú ná. In nuú cája mé á xihín ndihi na. ¹⁸ Jáchi mé Ndióxi najáçacu a ndohó nuú ndihi ña núu naçaja ndó sanahá. Ta ña yóho cúú ña naçatiahva ndó naçaja tásáhnu jícó ndo. Ta sa cándaã vaaha ini ndó ña coó naçahvi Jesucristo sahá cuachi ndó jan xihín jiuahun cuáán á xihín jiuahun cúxú, ña ndihi saha. ¹⁹ Ña naçaja mé á quea naçahvi a sahá cuachi ndó xihín nii mé á, dó yahvi ndivaha. Naxita do cán tá naxihi a ndica cruxu vatí coó naçaja mé á cuachi. Najoco a mé á nu Ndióxi sahá cuachí tá quiahva nasacaja ñayivi tá najoco na in ndicachi vií nu Ndióxi sanahá sahá cuachi na. ²⁰ Tá cámani cava sahá saha ñuyíví já nasacu ini Ndióxi quivi Jesucristo sahá cuachi ñayivi. Tá naxinu tiempo já naquixi a ñuyíví ña ná chindee a ndohó. ²¹ Xihín ña naçaja Jesucristo candeé ini ndó Ndióxi viti, mé á najánditacu a Jesús ta naçaja cáhnu ndivaha Ndióxi Jesús. Sahá ña naçaja Ndióxi candeé ini ndó mé á ta ndátí ndó xinu quivi quiahva mé á ña vaaha, ña íin indivi nu ndó.

²² Ta viti naçasahá ndo cája ndó ña ndaa já nandaja vií ndó ínima ndo ña ná quihvi ini ndó na cúú cuéntá Jesús. Sahá ña cán quea xini ñuhú quihvi ini ndó na xihín ndinuhu ini ndó. ²³ Cúú á tátuhun naçacu tucu ndó joo a juú ñayivi naçaja ña naçacu tucu ndó. Jáchi cúú á sahá ña candeé ini ndó tũhun Ndióxi, ña co ndíhi saha anda ama cáa quivi. Sahá ña cán quea cúú á tátuhun naçacu tucu ndó naçaja tũhun Ndióxi. ²⁴ Jáchi já cáchí tũhun Ndióxi:

Tóco ndihi ñayivi cúú ná tátuhun yucu cuí ña cáa yucu ña ndíhi yachi saha.

Ta tóco ndihi ña náhnu cája na cúú á tátuhun in ita cánúu nuú yucu cán.

Jáchi mé yucu cán ichi a ta ndicava ita nu á ta quiahva já ndíhi ri sahá ña cája na cán.

²⁵ Joo tũhun Ndióxi, xitoho í a ndíhi sahá anda ama cáa quivi.

Ta mé tũhun yóho cúú á ña sa naçaxi tũhun i xihín ndo. Ta cúú á tũhun vaaha cáhan sahá Jesucristo.

2

¹ Xini ñuhú jándacoo ndó tóco ndihi ña núu cája ndó ta a jándahvi ga ndó ñayivi. Ndítahan cacuu ndó tá quiahva ndaa ndó ta a cáhivi ga ini ndó ta a cácuu ga ndó ñayivi ndahnda yuhu. ² Tá quiahva cája na valí ndúcú na chichí na quiahva já ndítahan ndinducú ndó candaã ini ndó tũhun Ndióxi já ná cuu cuahnu ndó xihín á ña ná jáçacu Ndióxi ndohó. ³ Tá ná caja ndó já jánaha ndó ña mé a ndaa táhyí naçandaã ini ndó ña vaaha ndivaha ini Ndióxi, xitoho í.

Jesús cúú á tátuhun in yuu cáhnu ndacaan titó vehe

⁴ Cayati ndó nuú Jesucristo, xitoho í jáchi tácu va mé á ta cúú á tátuhun yuu ndúhu ña naçandají da cávaaha vehe. Joo nu Ndióxi cúú Jesucristo tátuhun in yuu vaaha ndivaha ña naçaxi a. ⁵ Ta caja Ndióxi xihín ndohó ña ná cacuu ndó tátuhun yuu tácu ta cavaaha Ndióxi veñuhu mé á xihín ndihi ndó. Ta sa cúú ndó jutú yii nu á. Ta sahá ña naçaja Jesucristo xihín ndó cuu joco ndó mé ndó caja ndó ña cúni mé cuití va jáchi ña jan quea cájii ini Ndióxi xihín. ⁶ Sahá ña cán quea cáchí tũhun Ndióxi tá cáhan sahá Jesús já cáchí a já:

Yehe nasacu ũ in a ñuu Sión ta cúú á tátuhun in yuu ndúhu ta mé yuu yóho cúú á ña naçaxi mí i ta cúú á ña yahvi ndivaha.

Ta ndá na ná candeé ini mé á a cándoo núu toho na caja i, cáchí tũhun Ndióxi.

⁷ Mé yuu cáhan Ndióxi saha yóho cúú á Jesucristo ta ndiyahvi ndivaha nu mé ndó jáchi candeé ini ndó a. Joo na co candeé ini Jesús na cán cúú na jáxinu nuú tũhun Ndióxi tá naçachi a já:

Mé yuu ndúhu, ña naçandají da cávaaha vehe,

nandu a yuu ña íin chága saha.

⁸ Ta íin inga tucu nu cáchí a sahá Jesús:

Cúú á tátuhun in yuu cáhnu nuú cachihin saha ná ta jándicava a na, cáchí tũhun Ndióxi.

Ta mé na cán cáchihin saha ná jáchi co cuni na cuni johu na tuhun vaha cahan saha Jesucristo. Ta janda saha nasacu ini Ndióxi ndoho na.

Ñayivi, na cúu cuéntá mé á

⁹ Joo mé ndó cúu ndó na nacaxi Ndióxi ña ná nduu ndó na vehe mé á. Ta nanduu ndó jutú cuéntá mé á ta mé á cúu á rey. Ta cúu ndó in táhnda cáhnu ñayivi yí ndácaan ndó in ñuu ña nandiquehe Ndióxi cacomí a cuéntá saha. Ta nacaxi Ndióxi ndóhó ña ná cahan ndó xihín ñayivi ndaja ndáa ña náhnu cája Ndióxi. Mé a nacana ndóhó tá nasanduu ndó nuú naá cán já ná quixi ndó nuú ndató ndivaha yéhe nu ín a. ¹⁰ Coó nasacuu toho ndó ñayivi cuéntá Ndióxi jihna joo viti cúu ndó cuéntá mé á. Coó natahvi ini Ndióxi saha ndó jihna joo viti táhvi ini a saha ndo.

Xíní ñúhú caja í ña cúní Ndióxi

¹¹ Candehé ndo, ñani í. Xíca tahvi í nu ndó, na cúu tátuhun na ndúu ñuu toho jáchi indivi cúu ñuu ndó. Saha ña quihvi ini í ndóhó saha ña cán quea xíca í ñamaní nu ndo ña ná a cája ndó ña xíca ini yiquí cuñu ndó caja. Jáchi cúu á tátuhun cani táhan yiquí cuñu ndó xihín ínima ndo. ¹² Mé ndó ndúu ndó tañu ñayivi ñuyíví, na co xíca íchi cuéntá Ndióxi. Xíní ñúhú caja vaha ndó já ná cuni na jan ndá quiahva cája ndó. Vatí viti cahan núu na saha ndo ta cáchí na ña cúu ndó na quini joo tá ná cuni na ña vaha cája ndó já quea caja cáhnu na Ndióxi tá ná xinu quívi caja víí mé á saha tóco ndihi ñayivi.

¹³ Saha ña cája cáhnu ndó Jesucristo, xitoho í xíní ñúhú coo johu ndó nu sáhnda na jutixia ndúu ñuyíví yóho nu ndo. Coo johu ndó nu cahan presidente, da ndójo chuun cáhnu chága. ¹⁴ Ta coo johu ndó nu sáhnda da cúu gobernador jáchi mé presidente cúu da sáhnda chuun nuú gobernador ña ná caja víí da saha na co cája vaha. Ta ndítahan nu dá cahan vaha da saha na cája vaha. ¹⁵ Cúní Ndióxi ña ná caja vaha ndó. Já quea na tóntó jiní, na co xíca íchi cuéntá Ndióxi cuni na ña vaha cája ndó já ná a ñéhe íní na cahan núu na saha ndo.

¹⁶ Vatí najaní ndó ndáha ley Moisés ña nasacomí cuéntá saha ndó jihna joo co cuni

cachi a ña núná nu ndó caja ndó ndá cuachi cúni ndo. Jáchi xíní ñúhú ndicuhun ini ndó ña cúu ndó na cája chúun cuéntá Ndióxi viti. ¹⁷ Xíní ñúhú coo toni ñúhú ndo xihín tóco ndihi ñayivi. Ta ndítahan quihvi ini ndó na cúu cuéntá Jesús. Ta ndítahan nu ndó caja cáhnu ndó Ndióxi. Ta ndítahan coo toni ñúhú ndó xihín da cómi chuun ñuyíví yóho.

Coó nacahan núu Jesús xihín na nacaja xíxi xihín á ta quiahva já nditahan caja ri mé ví

¹⁸ Ndóhó, na cómi xitoho cuéntá saha xíní ñúhú caja ndó xihín ndinuhu ini ndó ña sáhnda xitoho ndó nu ndo. Ta a ndíñehe yúhu ndó nu ná. Coó a caja toho a á cúu ná ñayivi xíxi ini xihín ndo á cúu ná na quihvi ini ndóhó, na co jándoho nahá ini ndó. ¹⁹ Sa xíní ndó ña cúní Ndióxi caja ndó. Saha ña cán quea caja ndeé ini ndó tá cája xíxi na xihín ndó saha in ñaha coó nacaja ndó. Jáchi saha ña yóho cají ini Ndióxi xihín ndó. ²⁰ Vatí cája ndeé ini ndó tá ndóho ini ndó saha cuachi nacaja ndó, co ñéhe táhvi toho ndó ñamaní nu Ndióxi. Joo tá cája ndeé ini ndó tá ndóho ini ndó saha ña vaha cája ndó já quea cají ini Ndióxi xihín ndo. ²¹ Jáchi saha ña yóho nacana mé á ndóhó. Ta najánaña Jesucristo ña yóho nu ndo tá nandoho ini mé á saha ndo vatí coó nacaja mé á cuachi. Ta ña yóho cúu in quiahva nasacu a caja ndó. ²² Ni in túhún toho tañu coó nacaja mé á cuachi ta ni in túhún tañu coó najándahvi a ñayivi. ²³ Tá nacasáhá na cánahá quini na xihín á coó nanducú ñehe mé á tuhun quini nu na. Ta tá najándoho na ini a coó nasacu ini a caja núu a xihín na cán. Ña nacaja mé á quea nasacu ndihi a ña ndáha Ndióxi, mé a cája víí ndaa saha tóco ndihi ñaha. ²⁴ Mé Jesucristo nandicojo a cuachí jatá yiquí cuñu a cahan tá naxihí a ndica crúxu. Ta cúu á tátuhun naxihí yó nuú cuachí ña ná cuu catacú cuéntá mé á tá ná caja í ña vaha cuití va. Najándicuehe na Jesucristo ña ná cuu ndivaha mé ndó. ²⁵ Jáchi mé ndó naxica nuu ndó ñuyíví yóho tá quiahva xíca nuu in ndicachi, rí nandiñúhú nuú xitoho. Joo viti nandico coo ndó nu Jesucristo ta mé a cán ndáa a ndóhó tá quiahva ndáa in dataa

ndicachi jana dá. Ta co jándacoo ndáha mé á ndohó.

3

Ña ndítahan caja na sa natandaha

¹ Candehé ndó, najihí, na ndúu yí. Xíní ñúhú caja ndó ña sáhdá yí ndó nu ndo. Já quea tá co cándusa da tuhun Ndióxi cuu xinu ini da candúsa da ña sahá ña cája ndó ta a juú ga sahá ña cáhan ndó xihín dá. ² Jáchi tá ná cuni yí ndó ña cája vaha ndó ta cáhan toni ñúhú ndó xihín dá já quea cuu jáxinu ndó ini da xihín ña cája ndó. ³ A ndíhi nahá ini ndó caja cutú ndó mé ndó xihín ñaha ña cuu canaha lándá ndó xihín, tátuhun ña chuhun lándá ndó yutu jini ndo á tátuhun ña cañuhu lándá jíqui jico ndo. Ta a ndíhi ini ndó cañuhu lándá jéhe ndáha ndo. Ta a ndíhi ini ndó candixi ndó jáhma lándá. A ndíhi ini ndó saha tóco ndihi ña yóho. ⁴ Ña ndítahan ndihi ini ndó sahá cúu ña ndiyahvi nu Ndióxi. Ta ña yóho cúu in ínima ña nandicutú xihín ña vaha já ná coo vií ini ndó. Tóco ndihi ña yóho cúu ña co ndíhi saha. ⁵ Jáchi quiahva já ñúchí ndivaha nasacaja najihí yí, na nasacuu cuéntá Ndióxi sanahá. Nacandee ini na Ndióxi ta nacaja na chuun nasahnda yí ná nu ná. ⁶ Quiahva já ñúchí ndivaha nacaja ña nasananí Sara tá nacandúsa ña yí ñá, da nasananí Abraham. Ta mé ña cán nacachi ña sahá Abraham ña cúu dá xitoho ñá. Ta viti mé ndó cúu ndó tátuhun jahyi mé Sara cán tá cája ndó ña vaha ta tá co yihví ndo ni in ñaha.

⁷ Ta jári ndóhó va dataa, da ín ñájihí, a cája ndivaha ndó xihín ñájihí ndo. Coo toni ñúhú ndó xihín ña jáchi cúu ñá ña chíjín chága nu mé ndó. Ta ñamani, ña nasacu ini Ndióxi quiahva nu ndóhó, dataa, nasacu ini mé á quiahva ri a nuú ña cán va. Sahá ña cán quea ndítahan caja vaha ndó xihín ñájihí ndo já ná cuni johó Ndióxi ña xíca tahví ndó nu á.

Ndóho ini java na sahá ña vaha cája na

⁸ Candehé ndo. In ndítahan cacuu ndihi ndó. Co ndítahan cahnda táhan ndó. Ndítahan quihvi ini táhan ndó tátuhun in cúu tátá ndihi ndó. Ta ndítahan candahví ini ndó ñayivi. Ta coto a ndínehe jícó ndo

mé ndó. ⁹ Tá ná caja núu ñayivi xihín ndo a ndícó coo ndó caja ndó já xihín ná. Ta ni tá ná canahá na xihín ndo a ndícó coo ndó canahá ndó xihín ná. Vaha chága ná caça tahví ndó nu Ndióxi ña ná caja vaha mé á xihín na cán. Ta nacana Ndióxi ndohó ña ná caja mé á ñamani xihín ndo. ¹⁰ Jáchi já cáchi tuhun Ndióxi já:

Ndá na cuni canduu nahá ñuyiví yóho ta co cuni na quixi tondóhó nu ná nani ín na yóho,

já quea ndítahan nu ná candaa na yuhu ná já ná a cáhan quini na.

Ta quiahva já ndítahan candaa na yuhu ná já ná a cáhan na ña tuhún.

¹¹ Ndítahan caxoo na nu tóco ndihi ña núu ta caja na ña vaha cuití va.

Ta ndítahan ndinducú na ña coo vaha ini na xihín ñayivi ta a jándacoo na caja na ña.

¹² Jáchi ndáa Ndióxi na cája ndaa, ta táa johó a nu cáhan na tá xíca tahví na nu mé á.

Joo xójo ini a xihín ñayivi cája cuachi, já cáchi tuhun Ndióxi.

¹³ Ni in ñayivi a cuú ndusa caja xíxi xihín ndó tá ná ndihi ini ndó caja ndó ña vaha.

¹⁴ Joo tá cája xíxi na xihín ndó vatí cája ndó ña vaha, tahví nahá nacuu ndó. A cáyhví toho ndó ñayivi ta a ndícani toho ini ndó.

¹⁵ Ña ndítahan caja ndó quea caja cáhnu ndó Jesucristo, xitoho í xihín ndinuhu ínima ndo. Ta xíní ñúhú coo tiahva ndó nducú ñehe vií ndó tuhun nuú ñayivi, na cuni candaa ini sahá ña candeé ini ndó Jesús. Ta ná coo toni ñúhú ndó xihín ná ta a ndínehe jícó ndo mé ndó nani ndícani ndó tuhun Ndióxi nuú na cán. ¹⁶ Ndítahan caja ndó ña vaha já ná a cáchan nuú ndo. Ta tá cáhan núu na saha ndo sahá ña cúu ndó cuéntá Jesús já quea cacahan nuú mé na cán sahá tuhun núu cáhan na saha ndó. ¹⁷ Ta tá mé Ndióxi quea cuni ña ná ndoho ini ndó já quea vaha chága ná ndoho ini ndó sahá ña vaha cája ndó a juú ga sahá ña núu.

¹⁸ Ta in túhún tañu cuití va naxihí Jesucristo sahá cuachí. Ni in túhún toho cuachi coo nacaja mé á joo nandoho ini a sahá ñayivi quini já ná cuu ndihvi ndihí íchi cuéntá Ndióxi. Ta sahá ña nasacomí a in yiquí cuñu ñayivi naxihí a joo mé á

cúu á ña ñaquixi indiví sahá ña cán queá nanditacu tucu a ta tácu yíi va ínimá mé á. ¹⁹ Ta ñasahan ínimá mé á nu ndájí ínimá ndíi ta cán ñacahan mé á tuhun Ndióxi xihín na. ²⁰ Mé ínimá ndíi cán ñasacuu na ña cóo ñaxeen cuni johó tuhun Ndióxi sanahá ndivaha. Tá ñasatacu Noé já ñasandatí Ndióxi ña ná cava ini ña cán nani cávaha Noé mé barco cáhnu, dó jácacu ñahá. Joo chá cuití ñasacuu ña ñacacu. Una víxí laá ña ñacacu nuú ticuúí cán. ²¹ Ta viti tá cándúta yo xihín ticuúí já cacu ínimá yó tá quiahva ñacacu ña cán ini barco sanahá. Tá cándúta yo xihín ticuúí co ndóo cuachí sahá ña ñandoo yiquí cuñu í xihín ticuúí cán. Ñacacú nuú cuachí jáchi cándeé ini Jesucristo ta cúni yó ña ná ndaja víi mé á ínimá yo. Ta náha ña ñacacú nuú indayá tá nanditacu tucu Jesucristo ²² ta sa ñandaa mé á indiví ta íin a xoo cuáha Ndióxi. Ta sáhdá mé á chuun nuú táto Ndióxi xihín nuú ña cómí cuéntá sahá ña ndúu indiví.

4

Náha Ndióxi nu yo ndá quiahva ndítahan nu yo caja chúun í ña ná ñehe táhvi yó nu mé á

¹ Tá quiahva ñandoho yiquí cuñu Jesús quiahva já ndítahan canduu tiahva ri ndóhó va ndoho ini ndó. Jáchi ndá ña ndóhó ini yiquí cuñu, ña cán cúu ña co cája cuachi ndaja ñacuu. ² Ta viti co cája ga yiquí cuñu ndó ña núu cuéntá ñuyíví yóho. Ta ní tiempo ndúcú ndó caja ndó ña cúni Ndióxi. ³ Jáchi sa ñayaha ndivaha quiahva ñacaja ndó ña núu jihna tá quiahva cája ñayivi, ña co xini Ndióxi. Mé tiempo tá cámani candaa ini ndó saha íchi cuéntá Jesús já ñasacaja ndó tá nuú ña núu tátuhun ña xica ini ndó caja ndó xihín yiquí cuñu ndó. Ta ñasacuu ndó ñayivi xihí. Ta ñacatóo ndó cája ndó vicó lándá ndivaha. Ta chí najáyaha quini ndivaha ndó ña ñasaxihi ndó. Ta ñacaja cáhnu ndó yoco ña ñacachi Ndióxi co ndítahan caja cáhnu ndó. ⁴ Ta ñacasahá cáhan núu ñayivi ñasátahan xihín ndó tá ñasacaja ndó ña núu jihna. Jáchi viti co xica nuu ga ndó cája ndó tá nuú ña núu xihín ná. Ta viti sa ñacasahá ndíhi ini na ndáti na ndicó coo ndó xihín ná. ⁵ Joo vaxi quíví cuhun ña cán cavií saha ná nu

Ndióxi, mé a íin tiahva caja víi sahá ña tácu xihín sahá ña sa ñaxihí. ⁶ Jáchi sa ñaxini johó va ñayivi, ña sa ñaxihí cán tuhun vaha sahá Jesús tá ñasatacu na. Ñaxini johó na tuhun vaha sahá Jesús ña ná cuu catacu ínimá ná tá quiahva tácu Ndióxi vatí ñacavií saha ná ñuyíví yóho tá quiahva cávií saha tóco ndíhi ñayivi.

⁷ Jalóho cúni xinu coo quíví ndíhi saha tóco ndíhi ñaha. Saha ña cán queá ndítahan nu ndo coo cáxi táhyí ini ndó ta xihín ndínuhu ini ndó ndítahan caça táhvi ndó nu Ndióxi. ⁸ Ña cúni queá ná quíhvi ini táhan ndó jáchi tá quíhvi ini táhan ndó já cája cáhnu ini saha táhan ndó tá ná yaha xihín táhan ndó. ⁹ Ta a cójo ini ndó tá xinu coo ñani táhan ndó xito nihni na ndohó vehe ndó jáchi ndítahan ndiquehe vaha ndó ña. ¹⁰ Ñasahan Ndióxi nuú in in ndó ña ná ñehe táhvi ndó in in ñamani mé á. Ta ndítahan caja chúun ndó a ña ná chindeé ndó ña cúu cuéntá Jesús. Ta ndítahan caja ndó ña tá quiahva sahan Ndióxi ndée ndó caja ndó ña. ¹¹ Ta ndá tuhun ná cahan ndó xihín ñani táhan ndó, ná cacuu a tuhun yíi tátuhun ña cáhan Ndióxi. Ta ndá ndó cája ñamani xihín inga na, ná caja ndó ña xihín ndée sahan Ndióxi nu ndo. Jáchi tóco ndíhi ña cája ndó ndítahan cacuu a ña cuu caja cáhnu í Ndióxi xihín. Ta cája Jesucristo ña ná cuu caja cáhnu í Ndióxi. Cáhnu ndivaha cúu a ta sáhdá a chuun nuú tóco ndíhi ñaha anda ama cáa quíví. Já ná coo.

Ndóho ini jáchi cándeé ini Jesús

¹² Candehé ndo, ñani í. Coto a cátóntó nahá ndo tá quíxi tondóhó náhnu nu ndo. A cája ndó tátuhun ña co xini quixi tondóhó nuu. ¹³ Ña ndítahan caja ndó queá cajii ini ndó jáchi xihín ña yóho cándaá ini ndó ndá quiahva ñandoho ini Jesús. Ta xihín ña yóho cajii ndivaha ini ndó tá ná cuni ndó ndá quiahva cáhnu cúu mé á tá ná quixi tucu a. ¹⁴ Tá cánahá ñayivi xihín ndo saha ña cándeé ini ndó Jesucristo, táhvi ñacuu ndó. Jáchi sa ñandicutú ndaa ínimá in in ndó xihín ínimá yíi Ndióxi ta mé á cúu á ña cáhnu ndivaha. Mé ñayivi cán cáhan núu na saha joo mé ndó cája cáhnu ndó a. ¹⁵ Tá ñacasahá cája xixi na xihín ndó co ndítahan cacuu a saha ña cúu ndó ta sáhní

ndii. Ta ni co ndítahan cacuu a sahá ña cája cuíhná ndo. Ta ni co ndítahan cacuu a sahá ña a váha toho ñacaja ndó. Ta ni co ndítahan cacuu a sahá ña ñaquihvi nuu ndó nuú co ndítahan nu ndo. ¹⁶ Joo tá ndóho ini ndó sahá ña cúu ndó cuéntá Jesucristo co ndítahan cácahan nuu ndo. Ña ndítahan caja ndó queá caja cáhnu ndó Ndióxi jáchi ñañehe táhvi ndó cacuu ndó cuéntá Jesús.

¹⁷ Viti sa ñaxinu coo tiempo casahá Ndióxi caja vii a sahá ña cúu cuéntá mé á. Ta jihna mé yó, ña cúu cuéntá mé á caja vii a saha. Ta a juú quiahva jándoho a ini java ga ñayivi, ña co cuni coo joho nuú ña sáhdá mé á nu ná caja na. ¹⁸ Jáchi cáchi tuhun Ndióxi ña janda mí, ña cúu ñayivi ndaa nu Ndióxi ta ihvi cáa saha yo jácacu Ndióxi mí. Ndaja ga ví caja Ndióxi xihín ñayivi sáá ini, ña co cuni jándacoo cuachi. ¹⁹ Sahá ña cán queá tá ndóho ini ndó tá quiahva cuni Ndióxi, ndítahan nu ndó caja vaha ndó. Ta jári ndítahan nu ndó ndiquiahva ndó mé ndó ndáha Ndióxi, mé á ñacavaha ndóho. Ta cája mé Ndióxi ña sáhan tuhun a caja.

5

Ndicani Pedro nuú ña cúu cuéntá Jesús ndia ndítahan nu ná caja na

¹ Ta viti cuni cahan loho i xihín ña sacuaña nuú ña cúu cuéntá Jesús ndúu tañu ndó ñan jáchi ña sacuaña cúu ri yehe va. Ta cúu u in ña ñaxini xihín nuú i tá quiahva ñandoho ini Jesucristo. Ta tá quiahva cuni ña sacuaña ndaja cáhnu cacuu na nu Ndióxi tá cuhun ña coo na xihín mé á quiahva já caja ri Ndióxi xihín yehe va tá ná xinu coo quivi nu ndíhi. ² Xíca tahvi i nu ndó ña ná cacomí vaha ndó cuéntá sahá ña cúu cuéntá Jesús. Caja ndó ña xihín ndinuhu ini ndó jáchi mé Ndióxi najándicoo a na ndáha ndo. Sahá ña cán queá xini ñúhu coo cuéntá vaha ndó xihín ná tá quiahva cuni Ndióxi. Ta coto a cája ndó ña xihín ña ndúsa. Ta ni a cája ndó ña sahá jjuhún. Ña ndítahan caja ndó queá cajii ini ndó xihín chuun yóho. ³ Ta co ndítahan cahvi ini ndo ña cúu ndó xitoho ña cúu cuéntá Jesús ñan jáchi ña ñan cúu ná ña najándacoo Ndióxi nu ndó candaa ndó. Xini ñúhu caja vaha ndó já ná cuni ri ña ñan va caja na ña. Jáchi ña

ñan cúu ná tátuhun ndicachi ta ndóho cúu ndó tátuhun ña ndáa ñahá. ⁴ Ña cán queá tá ná quixi Jesucristo, mé á cúu ña sacuaña nuú ndihi ña ndáa ña cúu cuéntá mé á ña ña ndiquiahva mé á ña ndítahan ndiquehe ndó sahá chuun ñacaja ndó yóho. Ta ña quiahva mé á nu ndó a cacuu toho a in ñaha ña ndihi saha.

⁵ Ta viti cahan ri xihín ndóho, ña tacú. Xini ñúhu coo joho ndó nu sáhdá ña sacuaña nu ndo. Tóco ndihi ndó ndítahan candúsa táhan ndó ta co ndítahan nu ndó ndiñehe jícó ndo mé ndó jáchi já cáchi tuhun Ndióxi:

Xójo ini Ndióxi xihín ña cátóo ndiñehe jícó mé,

joo cája ñamaní xihín ña jánuu ndáha mé.

⁶ Ña cán queá ndítahan jánuu ndáha ndó mé ndó nu Ndióxi jáchi sa cándañ ini ndó ña cáhnu ndivaha cúu mé á. Vaxi quivi jándiñehe jícó mé á ndóho sahá ña najánuu ndáha ndó mé ndó. ⁷ Tá ndicani ndivaha ini ndó ndítahan caça tahvi ndó nu Ndióxi ña ná chindee a ndóho jáchi ñúhu ini a saha ndo.

⁸ Cuéntá coo ndó ta coto a ná ini ndó jáchi tiñahá sacuaña cúu ri ri ihvi yo ta xíca nuu ri tañu mí yóho. Ta tá quiahva cája in león ndáhyi ri ndúcú ri yo caxi ri quiahva já cája tiñahá sacuaña yóho jándicava ri ñayivi nuú cuachi. ⁹ Xini ñúhu coo ndacú ini ndó ta candeé ndusa ini ndó Ndióxi já cuu quee vaha ndó xihín ri. Ta ndítahan ndicuhun ini ndó ña tá quiahva ndóho ini ndó quiahva já ndóho ri java ga ña cúu cuéntá Jesús ndúu ndijáá ñuyivi. ¹⁰ Ta tá sa ñayaha chá tiempo ndóho ini ndó ña jávi caja Ndióxi ña ná ndoo cuachi ndó ta jándihvi mé á ndee a ini ínimá ndo. Nii tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamaní xihín yo. Ta ñacana mé á mí ña ná cohó coo í indivi ña ná ndaja cáhnu Ndióxi mí ña ña ama cáa quivi sahá ña in ñanduú xihín Jesucristo. ¹¹ Cáhnu ná cacuu mé á ta in ndee a cája tóco ndihi ña cuni a ña ña ama cáa quivi. Já ná coo.

Ndindayi Pedro ña cáhyi ña carta nuú cán

¹² Chindee Silvano yehe cáhyi i carta yóho ta chindahá i ña nu ndo. Ta cája i cuéntá mé

Silvano yóho cája chúun da cuéntá Ndióxi xihín ndinuhu ini da. Naçahyí i mé carta loho nu ndo jáchi cúní ndicani i ña ndaa nu ndó ña cája tá cája Ndióxi ñamaní xihín ndo. Xíní ñúhú coo ndacú ini ndó ta a ndíndójó ndó tóco ndihi ña naçachi i xihín ndó yóho.

¹³ Na cúu cuéntá Jesús ndúu ñuu Babilonia chíndahá na Ndióxi coo ndó. Ta tá quiahva nandacaxi Ndióxi ndohó quiahva já nandacaxi ri á na cán va. Ta jári Marcos, da cúu tátuhun jahyi i chíndahá da Ndióxi coo ndó. ¹⁴ Cañan Ndióxi xihín táhan ndó ta tatí yúhu sajóho táhan ndó jáchi quiahva já ndítahan caja ndó sahá ña quíhvi ini táhan ndó.

Ta ña cúní quéa ná coo vaha ini ndihi ndó, na cúu cuéntá Jesucristo. Já ná coo.

Carta nacahyí Pedro chí ivi

Cáhyí tucu Pedro inga carta nuú na cúu cuéntá Jesús

1 Yehe cúu Simón Pedro ta cája chúun i cuéntá Jesucristo ta cúu u in apóstol nachindahá mé á ña ná cahan i sahá tuhun a. Cáhyí i carta yóho nu ndóhó, na nañehe táhvi candee ini Ndióxi tá quiahva candee ini ndehe mé á. Jáchí cája ndaa Jesucristo tóco ndihi ñaha ta mé á cúu Ndióxi cája cáhnu í. Ta mé á quea jáca cu mí. 2 Ña cuni quea ná caja cuaha Ndióxi ñamaní xihín ndo ta ná caja mé á ña ná coo vaha ini ndó sahá ña xini ndó yo cúu Ndióxi ta sahá ña xini ndo yo cúu Jesús, xitoho í.

Jáxinu Ndióxi ini ña ná caja i ña cuni mé á

3 Xihín ndee Ndióxi nacaja ña ná a ndimaní ñaha nu yo catacú ñuyivi yóho. Ta náha mé á nu yo ndá quiahva caja cáhnu í mé á xihín ña cája í. Jáchí nacaja mé á ña ná candaa ini saha Jesucristo. Ta xihín ndee mé á ta xihín tóco ndihi ña náhnu cája mé á nacaxi a mí candee ini mé á. 4 Ta sahá ña yóho nasahan tuhun a nu yo. Ta náhnu ndivaha cúu tuhun nasahan mé á nu yo ta ndiyahvi ndivaha ña. Jáchí xihín tuhun nasahan mé á nu yó já cuu xinu coo í coo í tá quiahva ín mé á. Ta xihín ña yóho cuu caxoo í nuú ña núu xica ini yiquí cuñu í caja ñuyivi yóho. 5 Sahá ña cán quea tá cuni ndó ñehe táhvi ndó ñamaní nu Ndióxi xini ñuhú candee ini ndó Jesús. Ta vatí sa candee ini ndó Jesús joo xini ñuhú caja vaha ndó. Ta vatí sa cája vaha ndó joo xini ñuhú candaa vaha ini ndó tuhun Ndióxi. 6 Ta vatí sa candaa ini ndó tuhun Ndióxi joo xini ñuhú cahnu ndó nuú ña núu ña xica ini yiquí cuñu ndó caja. Ta vatí sa sáhnú ndó nuú ña xica ini yiquí cuñu ndó caja joo ndítahan coo cáhnu ini ndó. Ta vatí sa ín cáhnu ini ndó joo ndítahan ndinducú ndo caja ndó ña cuni Ndióxi. 7 Ta vatí sa cája ndó ña cuni Ndióxi joo ndítahan quihvi ini ndó ñani táhan ndó, na cúu cuéntá Jesús. Ta xihín ña yóho cuu quihvi ini ndó tóco ndihi ñayivi.

8 Tá cája ndó tóco ndihi ña yóho ta tá ndihi ini ndó cuahnu ndó xihín á, a cácuu toho ndó ñayivi coo chúun nu Ndióxi. Ta tá ná xinu coo ndó candaa ini ndó saha Jesucristo, xitoho í já quea a cácuu a ña uun. 9 Joo ndá na coo cája tóco ndihi ña nacachi i xihín ndo cúu ná tátuhun in na cuaá, in na a cuú candehé vaha. Jáchí nandindójó na ña najándoo Ndióxi cuachi nacaja na sanahá. 10 Sahá ña cán quea ndítahan nu mé ndó, ñani i, na cúu cuéntá Jesús ndihi ini ndó nahá ndo nuú ñayivi ña mé a ndaa táhyí cúu ndó na nacana Ndióxi cacomí a cuéntá saha. Jáchí tá ná caja ndó tóco ndihi ña vaha nacachi i xihín ndo yóho a ndícava toho ndó nuú cuachi. 11 Ta xihín ña yóho núna nu ndó cuhun ndo indivi nu ín Jesucristo, xitoho í, mé á jáca cu mí ta cacomí a cuéntá saha yó anda ama cá quivi.

12 Sahá ña cán quea cahan tá cahan i sahá ña yóho nu ndo vatí sa xini va ndó ña ta vatí sa candee ini ndó ña ndaa, ña najánaha i nu ndo yóho. 13 Cája i ña yóho jáchí cáhán i ña ndítahan caja i ña nani tácu u ñuyivi yóho. Jáchí xini ñuhú ndicani i nu ndo ndía quea vaha ta ndía quea a váha. 14 Jáchí sa nacaja Jesucristo, xitoho í ña ná candaa ini i ña sa nacayati quivi quivi i ta jándacoo i ñuyivi yóho. 15 Joo ndúcú ndee e ndinducú u ndá quiahva caja i já ná a ndindójó ndó saha tóco ndihi ña yóho tá sa naxihí i.

Ndicani Pedro ña naxini da ndá quiahva cáhnu cúu Jesús

16 Tá najánaha nde ndohó ña ín cuahá ndee Jesucristo, xitoho í ta tá nacachi nde xihín ndo quixi tucu mé á, coo nasacuu a tuhun nacana jini mé nde ña jándahvi nde ndohó vaha. Jáchí naxini xihín nuu mé nde ndá quiahva cáhnu cúu Jesucristo, xitoho í.

17 Naxini nde xihín nuú nde tá nandaja cáhnu Ndióxi, tátá yo Jesucristo já nandicáhnú ndivaha mé á. Ta ñuchí ndivaha nasahin tá naxini johó nde nacachi Ndióxi já: “Mé a yóho cúu jahyi maní i ta cáji ndivaha ini i xihín tóco ndihi ña cája”, nacachi Ndióxi sahá Jesús. 18 Ta mé nde naxini johó nde nacahan Ndióxi chí indivi jáchí nasanduu nde xihín Jesús jini mé yucu yi cán.

19 Ta íin inga tucu ñaha cáhan ndá quiahva cáhnu cúu Jesús ta ña cán cúu ña ñacahyí na profeta sanahá. Ta sa xini vaha yó cúu á ña ndaa. Vaha cája ndó táa johó ndó ña ñacahyí na profeta cán jáchi cúu á tátuhun in lámpara ña jándiyéhe nuú naá janda quiahva ná quixi Jesucristo. Ta mé á cúu á tátuhun quimi cáhnu, rí quéta tá nativi jáchi jándiyéhe a ínima ñayivi. 20 Joo coto a ndíndójó ndo ña ni in túhún toho na a cuú nducú ñehe ña cáchi tuhun Ndióxi nuú inga na sahá ña cána jini mé va na. 21 Jáchi ni in profeta coó ñacahyí na ña nasacu ini mé ná cahyí. Ña ñacaja na quea nandiquiahva na mé ná ndáha ínima yí Ndióxi ta mé Ndióxi nasahan tóco ndihi ña ñacahan na.

2

Na xica jánaha ña tuhún (Judas 4-13)

1 Joo mé tiempo já nasanduu ri profeta túhún tañu na Israel cán. Quiahva já canduu ri na jánaha ña tuhún tañu ndóhó. Ta na cán casahá na jácahan jehé na ñayivi sahá ña cáhvi jini mé va na. Joo jáquihvi ndivaha na ñayivi xihin á. Ta xihin ña yóho a ndícuni na ña najácaacu Jesús na ta casahá na cácahan nuu ná sahá ña ñacaja mé á saha ná. Ta ña yóho quea caja ña ná ndihi yachi chága sahá na cán. 2 Cuahá ndivaha ñayivi casahá candico na jatá na cán ta casahá na cája na ña núu xihin na. Ta sahá ña núu cája na cán casahá ñayivi cahan núu na saha tuhun vaha cáhan saha Jesús vatí cúu á íchi ndaa. 3 Ta sahá ña catóo ndivaha na jiuhún sahá ña cán quea nducú na tavá na jiuhún xihin ndo xihin mé ña tuhún jánaha na cán. Ta xini Ndióxi ña cája na ña cán quea ndihi tá ndihi saha ná. Jáchi sa janda sanahá nasacu ini mé á taán a ñayivi jan ini indayá.

4 Coó ñacaja cáhnu toho ini Ndióxi saha tátó mé á tá ñacaja na cuachi nu mé á. Ña ñacaja mé á quea nachindahá a na indayá. Ta najándicoo a na nuú naá ndivaha ta ñacató a na xihin cadena ndúu na ndáti na xinu coo quivi caja víi Ndióxi saha ná. 5 Ta ni coó ñacaja cáhnu ini Ndióxi sahá ñayivi nasanduu sanahá ndivaha. Ña ñacaja mé á quea najácuun ndeé ndivaha javi já naxihi

ndihi ñayivi quini cán. Ta in túhún da naní Noé xihin ndihusa na vehe da najácaacu a. Najácaacu Ndióxi Noé jáchi ñacandúsa da mé á ta najácahan da ñayivi ña ná caja vaha na. 6 Ta quiahva já najándihi ri Ndióxi sahá ñayivi nasanduu ñuu Sodoma xihin ñuu Gomorra. Nachicaan ñuhu a na janda quiahva nanduu na yaá uun. Ñacaja Ndióxi ña yóho já ná cuni ñayivi vaxi chága chí nuu ña quiahva já caja Ndióxi jándihi a sahá ñayivi quini. 7 Joo najácaacu Ndióxi in da naní Lot jáchi nasacu da in ta vaha ta mé Lot yóho natahvi ndivaha ini da saha tóco ndihi cuachi nasacaja ñayivi quini nasanduu tiempo cán. 8 Ndijáa ní quivi ñacacuéha ini Lot cán sahá cuachi ñayivi cán jáchi quini nasacahan na ta quini nasacaja na. 9 Ta tá quiahva ñacaja Ndióxi xihin Lot quiahva já cuu caja mé á jácaacu a ñayivi, na ndíquiahva mé ndáha mé á. Ta chindeé a na tá casahá ndóho ini na. Joo sácú xoo mé á ñayivi quini já ná canduu xoo na candati na xinu quivi caja víi a sahá cuachi na.

10 Mé Ndióxi jándoho a ini tóco ndihi na catóo caja ña xica ini yiquí cuñu na jáchi cándají na caja na ña sáhdá Ndióxi nu ná. Cúu ná na ñihi ini ta ni co sáhní na mé ná ta ni co yíhvi na canahá na xihin na ndójo chuun náhnu 11 jáchi ni mé tátó Ndióxi, na ndúu nu íin mé á vatí íin chága ndeé ná a juú ga ñayivi, na cánahá xihin mé na ndójo chuun cán. Joo co sahan ndeé ini mé tátó Ndióxi chicaan na cháhan jatá na náhnu sáhdá chuun cán.

12 Joo ñayivi quini jan cúu ná tátuhun quítí, rí co xini túni. Ñacacu rí ñuyívi yóho ta tíin táhan rí ta sáhní táhan rí. Ta quiahva já cája na cán jáchi cája na ndá ña xinu ini na caja na ta cáhan núu na sahá ñaha, ña co cándaq ini na saha. Ta tá quiahva xíhi quítí já quivi na cán. 13 Tá quiahva jándoho na ini ñayivi quiahva já ndoho ini mé ná. Cáhan na ña ndató ndivaha ndúu na jáchi tá yéhe candii xica nuu na cája na ña núu. Ta tá ndúu na xihin ndó in víco catóo na ndítati na, chínuú cácahan nuu ndo quea cája na. Cáji ndivaha ini na xihin ña cája na joo jándahvi uun na mé ná.

14 Ta tá xini uun na najihí ivi laá casahá cáhvi núu ini na xihin ná. Chí co cánaá

loho na cája na cuachi. Ta jándahvi na na coó ndacu cuahan íchi cuénta Ndióxi ta xini vaha na ndaja caja na quehe na ña cuni na. Na jan cúu ná ñayivi natavi cháhan jata, na cuhun indaya. ¹⁵ Mé na jan nandiñuhú na jáchi najandacoo na íchi cuénta ña ndaa. Cája na tá quiahva nacaja da naní Balaam, jahyi Beor sanahá, da nacacuni ñehe cuahá jiuñun jata ña núu nacaja da. ¹⁶ Joo nanani da sahá cuachi da nacaja in búro jhí jáchi tá quiahva cáhan ñayivi quiahva já nacahan rí cán xihin dá ta nasaji nuu rí nu dá ña ná a cája ga da ña núu.

¹⁷ Tóco ndihi ta, na jánaha ña tuhún yóho cúu ná tátuhun chicoño nuú co ñúhu ticuú jáchi coó chuun na. Ta cúu ná tátuhun vico jácuico tachí xoo nu cuni a ta viti ña ñañehe ná quea cuhun na coo na nuú naá yávi anda ama cáa quivi. ¹⁸ Jáchi tuhun cáhan na cúu á ña jándindita jícó na mé ná xihin joo tóco ndihi ña cáhan na cúu á ña coó saha. Ta xihin ña núu, ña xica ini yiquí cuñu na caja, xihin ña jan jándahvi na na jacá nacaxoo nuú cuachi. ¹⁹ Mé na jánaha ña tuhún yóho jacahan ná ñayivi ña núna nu ná caja na ña cuni mé va na. Joo mé na cán cúu ná tátuhun mozo nuú cuachi jáchi cómi tá cómi cuachi cuénta saha ná. Núhu ñayivi ndahá ña tññahá jáchi sáhná a chuun nu ná. ²⁰ Ta ndá ñayivi nacaxoo nuú ña núu ñuyívi yóho sahá ña nacanda in na yo cúu Jesucristo, xitoho í, mé á jacacu mí joo tá nandihí casahá tucu na cája na ña núu ta ndiquiahva na mé ná ndaha ña núu cán já quea ndiquini chaga ví na a juú ga tá camani ndiquehe na íchi cuénta Jesús. ²¹ Janda vaha chaga ná a ndihví na íchi cuénta Jesucristo, nduu. Jáchi a váha toho tá sa xini na ña cúu á ña yí ña nasahan Ndióxi nu ná ta tá nandihí já jándacoo na ña. ²² Joo xihin ña cája na yóho xinu nuú tuhun ña cáchi: “Ndíco coo tucu tina sáxi rí ña sa nandusa rí. Ta cóhí, rí jacá nandihí najacuchu na ndíco coo tucu rí chiníhni rí mé rí nuú ndahyi.”

3

Vaxi tucu Jesucristo, xitoho í

¹ Candehé ndo, ñani máni. Xihin ña yóho xinu carta ivi chindahá i nu ndo. Ta nu ndívi

carta ndícani i nu ndo ndá quea ndítahan caja ndó já ná ndicani ini ndó ndinuhu ña vaha. ² Ndítahan ndicuhun ini ndó ña nacachi na profeta yí Ndióxi sanahá ta ndítahan ndicuhun ini ndó ña nacachi Jesucristo, xitoho í, mé á jacacu mí jáchi cúu á ña najánaha na apóstol nu ndo.

³ Nu cuítí cuni ña ná canda ini ndó ña tá sa nacayati quívi quixi tucu Jesucristo já queta ñayivi ta casahá na cuacu ndaa na tóco ndihi ña yí cuénta Ndióxi. Ta caja na tóco ndihi ña núu, ña xica ini yiquí cuñu na caja. ⁴ Ta casahá na ndaca tuhún ichi na já cachi na já: “Nasahan Jesucristo tuhun a quixi tucu a ta ndá cuénta quea a ñaha quixi a. Jáchi janda tá nasatacu tásahnu jícó yo, tá cáa ñuyívi yóho anda saha já cáa yí va.” ⁵ Ta cachi na ña yóho jáchi co cuni na candúsa na ña sa janda sanahá ndivaha va nacahan Ndióxi ta já nacavaha indivi xihin ñuyívi. Ta mé Ndióxi quea nasahnda chuun ña ná ndinuna ticuú cán já ná canaha nuú ñundahyi ta ín ticuú tóco ndihi xoo ñundahyi viti. ⁶ Ta xihin ticuú najánaa a saha ñayivi ñuyívi sanahá tá najacuun mé á javi quini. ⁷ Joo indivi xihin ñuyívi ña ín viti yóho, ndúu a ndati a xinu quívi chican ñúhu Ndióxi ña já ná ndihi sahá. Cája Ndióxi ña yóho já ná ndoho ini ñayivi quini cán ta jándihí a saha ná quívi caja víi Ndióxi saha ñayivi quini cán.

⁸ Ta viti candehé ndo, ñani maní i. In quívi cúu á tátuhun in mil cuja nu Ndióxi ta in mil cuja cúu á tátuhun in quívi nu Ndióxi. A ndíndójó ndó ña yóho. ⁹ A cáhan ndo ña cácuáchi Jesús jáxinu coo a nuú tuhun a tá nacachi a ña quixi tucu a tá quiahva cáhan java na. Joo a ñaha quixi Jesucristo jáchi táhvi ndivaha ini mé á saha ñayivi. Ta co cuni mé á ña ná cuhun ni in tuhún na indaya ndihi saha ná. Ña cuni mé á quea ná ndíco coo ini na ña ná jándacoo na cuachi cája na.

¹⁰ Mé quívi co cáhan na quixi Jesucristo já quixi mé á. Tá quiahva cája ta cuíhna tá xinu coo da ñuú ta ni in na co xini na ña xinu da cája cuíhna da ñaha na quiahva já coo nuú quixi rí Jesucristo va. Ta mé quívi cán in cuítí cuni joho ñayivi ñhi ndivaha indivi ta já casahá ña nditaní a. Ta já cayi

ñuyíví yóho xih̄in tóco ndihi ñaha ín nu á. Ta já cayi ñaha ndúu nu táchi indivi ta ndihi saha tóco ndihi ñaha.

¹¹ Mé a ndaa vaxi quivi coo tóco ndihi ña yóho sahá ña cán quéa ndítahan nu ndó caca vaha ndó íchi cuéntá Ndióxi ta caja ndó ña cuni mé á xih̄in ndinuhu ini ndó. ¹² Candati ndó xinu quivi quixi tucu Jesucristo ñuyíví yóho. Ta nducú ndéé ndo cája chúun ndó cuéntá mé á já ná xinu yachi quivi cán. Tá ná xinu quivi cán já jándihi Ndióxi sahá indivi xih̄in ñúhu ita. Ta tóco ndihi ñuyíví jándutu mé á ña xih̄in ñúhu cáyi. ¹³ Joo mí, yó cúu cuéntá Jesús ndátí inga indivi saá xih̄in in ñuyíví saá jáchi nasahan Ndióxi tuhun a nu yo ña quiahva ña nu yo. Ta cán tóco ndihi ñaha cacuu a ña vaha ta ndinuhu ña ndaa coo cán.

¹⁴ Ñani i, quihvi ndivaha ini i ndohó sahá ña cán quéa cáhan i ña yóho xih̄in ndo. Nani camani xinu quivi caja Ndióxi tóco ndihi ña cán, ndítahan ndihi ini ndó caja ndó ña vaha já quéa ná cuni Ndióxi ña ín vaha ini ndó xih̄in mé á ta já ná cuni a ña coo cuachi ndó.

¹⁵ Ta a ndíndójó ndo ña ndátí yii Jesucristo quixi tucu a ñuyíví yóho jáchi táhvi ndivaha ini mé á saha yo ta cuni a jácacu a mí. Ta tá quiahva cáhyi yehe nu ndo yóho quiahva já nacahyí ri ñani maní yo, da cúu Pablo carta nachindahá da nu ndo jáchi nacaja Ndióxi ña ná candaa ini da cán ña cuni mé á.

¹⁶ Nu tóco ndihi carta nacahyí Pablo nu ndo cáhan da xih̄in ndo saha tóco ndihi ña yóho. Java ña yóho cúu á ña yáncá ndivaha candaa ini saha. Ta na co candaa ini xih̄in na co candeé vaha ini Ndióxi nacasáhá ndíjama na ña nacahyí da. Quiahva já cája na ndíjama na java ga ña cáchi tuhun Ndióxi joo ndihi saha tóco ndihi na cán.

¹⁷ Candehé ndo, ñani maní i. Sahá ña sa xini vaha ndó saha tóco ndihi ña nandicani i nu ndo yóho, xini ñúhú candaa vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahan vaha ndó íchi cuéntá Ndióxi viti. ¹⁸ Xini ñúhú candaa vaha chága ini ndó yo cúu Jesucristo, xitoho í jáchi mé á quéa jácacu mí. Ta xini ñúhú candaa vaha chága ini ndó ña cája Ndióxi cuahá ñamani xoho. Cáhnu ná cacuu Jesucristo anda ama cáa quivi. Já ná coo.

Carta nu cuití nacahyí Juan nuú na cúu cuéntá Jesús

Cáxi tuhun Juan nuú ñayivi sahá Jesucristo

¹ Cáhyí nde carta yóho nu ndó sahá Jesucristo, mé á nasahíin janda tá cámaní cava sahá saha ñuyíví. Mé nde naxini johó nde ña nacahan mé á ta chí naxini xihín nuú nde mé á. Nasandehé nde a ta nacani ndaa ndahá nde a. Cahan nde sahá Jesucristo mé á cúu tuhun Ndióxi, ña cája ña ná catacu ñayivi anda ama cáa quívi. ² Najánaḥa mé á nuú ñayivi ta mé nde naxini nde a sahá ña cán queá cáxi tuhun nde nuú ñayivi saha mé á. Ta ndícani nde nu mé ndó viti saha Jesucristo, mé á sa janda ama cáa quívi íin a xihín Ndióxi, tátá a ta co ndíhi toho sahá. Viti naquixi a najánaḥa mé á nu yo. ³ Ta cáxi tuhun nde nu ndo ña naxini nde xihín ña naxini johó nde já ná cuu in canduu ndó xihín mé nde. Jáchi in nanduu yó xihín Ndióxi, tátá yo ta xihín Jesucristo, mé a cúu in túhún jini já jahyi Ndióxi. ⁴ Ta cáhyí nde ña yóho nu ndo já ná ndicutú ndaa ínima yo xihín ña cajii íni yo.

Jándiyehé ndaa Ndióxi nu íin a

⁵ Ña najánaḥa Jesucristo nuú nde cúu á ña jánaḥa nde nu ndó viti: Jándiyehé ndaa Ndióxi nu íin a ta ni loho ña naá co íin nu íin mé á. ⁶ Tá ná cachi yó ña in nanduu xihín Jesucristo nani cája í cuachi já queá cúu á tátuhun ndúu yíi yó nuú naá jáchi catúhún yo ta co cája í ña ndaa. ⁷ Joo tá ndúu yó nu yéhe tá quíahva íin Ndióxi nuú ña yéhe já queá in nduu ndihí. Ta Jesucristo, mé a cúu in túhún jini já jahyi Ndióxi jándoo ndihí a cuachí jáchi naxita nii á saha yo tá naxihí a ndica crúxu.

⁸ Ta tá ná cachi yó ña coó toho cuachi cája í já queá jándahví mé ví ta co ndácaan ña ndaa íni. ⁹ Joo tá ná nahma yó cuachí nu Ndióxi já queá cuu candeé íni ña caja ndaa Ndióxi xihín yo jáchi caja cáhnu ini a sahá cuachí ta ndaja víi a mí nu tóco ndihí ña núu. ¹⁰ Joo tá ná cachí ña ni in túhún toho

cuachi coó nacaja í já queá ndája túhún yo Ndióxi ta xihín ña yóho náha ña mé a ndaa táhyí coó nandiquehe vaha í tuhun vaha cáhan saha mé á.

2

Jesucristo queá cáhan cuachí a saha yó nu Ndióxi

¹ Candehé ndó. Mé ndó cúu ndó tátuhun jahyi válí i ta cáhyí i ña yóho nu ndo ña ná a cája ndó cuachi. Ta vatí ná caja ndó cuachi joo íin Jesucristo cáhan cuachí a saha yó nu Ndióxi, tátá a. Ta cája mé á ña ndaa cuití va. ² Jáchi nachahvi Jesucristo sahá cuachí tá naxihí a ndica crúxu. Já queá xihín ña yóho cuu caja cáhnu ini Ndióxi sahá cuachí. Ta a juú sahá cuachi mé cuití yo, vaha jáchi naxihí rí a sahá cuachi ndaja táhan na ndúu ñuyíví.

³ Jáchi tá cája í ña sáhdá Ndióxi já queá náha ña mé a ndaa táhyí xini yo mé á. ⁴ Joo tá cachí in na ña xini na Ndióxi nani co cája na ña sáhdá mé á já queá cúu ná na tuhún ta co ndácaan ña ndaa ini na. ⁵ Joo na cája ña sáhdá Ndióxi, náha ña mé a ndaa táhyí quíhvi ini na mé á ta xihín ña yóho cándaa ini yó ña in nanduu na xihín mé á. ⁶ Ta ndá na cachí ña in nanduu na xihín Ndióxi, xini ñúhú caja na tá quíahva nacaja Jesucristo tá nasahíin a ñuyíví yóho.

Sáhdá Ndióxi chuun ña ná quíhvi ini táhan í

⁷ Candehé ndó ñani i, na cúu cuéntá Jesús. Co cáhyí i nu ndó in chuun saá ña nasahnda Ndióxi caja ndó. Cúu á mé chuun natahnda nu ndó caja ndó janda mé saha tá nandihvi ndó íchi cuéntá Jesús. Ta cúu á ña sa naxini johó ndó anda mé cán. ⁸ Joo mé a ndaa ña cáhyí i yóho cúu á chuun saá jáchi sáhdá Ndióxi ña ná quíhvi ini táhan í. Ta tá cája í ña sáhdá Ndióxi já queá quee ndihí ña naá cuahan ta mé a ndaa jándiyehé Jesucristo ínima yo jáchi quíhvi ini táhan í tá quíahva nacaja mé á.

⁹ Ta ndá na ná cachi ña sa nandiyehé ínima ná nacaja Jesucristo nani cándají na ñani na, na cúu cuéntá Jesús já queá cuni cachi a ña ndúu yíi ná nuú naá ndivaha. ¹⁰ Ta ndá na quíhvi ndusa ini ñani na já queá cuni cachi a ña mé a ndaa jándiyehé

Jesucristo ínimã ná ta ni in ñaha a cúu caja ña ná ndacava na nuú cuachi. ¹¹ Joo ndá na cándají ñani na já queá ndúu na nuú naá ta xíca na nuú naá yáve. Ta ni co xíní na ndáchí xíca na jáchi cúu ná tátuhun na cuaá jáchi ndúu na nuú naá.

¹² Mé ndó cúu ndó tátuhun jahyi i ta cáhyí i carta yóho nu ndo jáchi sahá ña nacaja Jesucristo nacaja cáhnu ini Ndióxi sahá cuachi. ¹³ Ta cáhyí i carta yóho nu ndó, naṭaa, na cúu tátá jáchi nacandaa ini ndó sahá Jesucristo, mé a sa íin janda tá nacava sáhá saha ñuyíví. Ta cáhyí ri carta yóho nu ndó, ṭaa yúta jáchi nacandeeé ndó nasahnu ndó nuú tiñáhá sacuahá.

Candehé ndo. Mé ndó cúu ndó tátuhun jahyi i ta cáhyí i carta yóho nu ndo jáchi nacandaa ini ndó yo cúu Ndióxi, tátá yo. ¹⁴ Ta cáhyí ri carta yóho nu ndó, na cúu tátá jáchi nacandaa ini ndó sahá Jesucristo, mé a sa íin janda tá nacava sáhá saha ñuyíví. Ta cáhyí ri carta yóho nu ndó, ṭaa yúta jáchi sahan ndeé ini ndó ta ndacaan tuhun Ndióxi ini ínimã ndo ta nacandeeé ndó nasahnu ndó nuú tiñáhá sacuahá.

¹⁵ Ta coto a catóo ndó ña cúu cuéntá ñuyíví yóho ta ni a ndiáva ini ndo cacomí ndó ña ndúu ñuyíví yóho. Jáchi ndá na cúní ñaha ñuyíví yóho já queá cúní cachi a ña co cúní na Ndióxi, tátá yo. ¹⁶ Jáchi ni in ña núu ndúu ñuyíví yóho coó vaxi a cuéntá Ndióxi, tátá yo. Ta ña yóho cúu á ña a váha toho cáhvi ini ñayivi caja na ta jári ndiáva ini na cacomí na ña xíní na xihín nuu ná ta jári ndiñehe jícó ndivaha na mé ná sahá ña comí na. Ndijáá ña yóho cúu á ña núu quíxi mé ñuyíví yóho. ¹⁷ Vaxi quiví ndihi saha tóco ndihi ña ndiáva ini ñayivi ta janda mé ñuyíví yóho ndihi sahá joo ndá na cája ña sáhndá Ndióxi, na cán cúu na catacu nu íin mé a anda ama cáa quiví.

Na co cúní táhan xihín Jesucristo

¹⁸ Candehé ndo jáchi cúu ndó tátuhun jahyi i. Jalóho cúní ndihi saha ñuyíví ta sa xíní joho ndó sahá in da vaxi caja ihvi xihín Jesucristo. Ta mé tiempo yóho sa naqueta cuahá na co cúní táhan xihín mé á. Sahá ña yóho sa cándaa ini yó ña sa nacayati quiví ndihi sahá ñuyíví yóho. ¹⁹ Mé na co cúní táhan xihín Jesucristo yóho nasañúhu

na tañu mí. Joo a juú toho na cuéntá mí nasacuu na. Jáchi tá ná cacuu na cuéntá mí já canduu na tañu mí, nduu. Joo naqueta na cuahan na já ná ñaha ña mé a ndaa co cúu ná cuéntá mí.

²⁰ Joo nu mé ndó nasahan Jesucristo ínimã yíi mé á sahá ña cán queá tóco ndihi ndó cúu ndó ñayivi xíní ña ndaa. ²¹ Tá cáhyí i carta yóho nu ndo, co cúu á sahá ña co xíní ndó ña ndaa. Joo cúu á sahá ña sa xíní ndó ña ndaa ta sa xíní ndo ña ni in túhún ña túhún a cúu quixi tañu ña ndaa.

²² Na túhún cúu ná na co cúní ndicuni ña cúu Jesucristo mé á nachindahá Ndióxi jácacu a ñayivi. Mé na túhún yóho cúu ná na co cúní táhan xihín Jesucristo jáchi co cúní na ndicuni na Ndióxi, tátá yo ta ni co cúní na ndicuni na Jesucristo, mé a cúu in túhún jini já jahyi Ndióxi. ²³ Jáchi ndá na chíjehé tuhun ña xíní na Jesucristo, jahyi Ndióxi já cúní cachi a ña coó in nanduu na xihín Ndióxi, tátá yo. Joo na cuahan xoo Jesucristo, jahyi Ndióxi in nanduu na xihín Ndióxi, tátá yo.

²⁴ Sahá ña cán queá xíní ñúhú cacu vaha ndó tuhun Ndióxi ini ínimã ndó, jáchi cúu á ña naxini joho ndó janda mé saha tá nandiquehe ndó íchi cuéntá Jesús. Ta tá mé a ndaa ndicaan ña naxini joho ndó ini ínimã ndo já queá anda ama cáa quiví in nduu ndó xihín Ndióxi, tátá yo ta in nduu ndó xihín Jesucristo, mé a cúu in túhún jini já jahyi Ndióxi. ²⁵ Ta nasahan Jesucristo tuhun a nu yo ña catacú xihín mé á anda ama cáa quiví.

²⁶ Cáhyí i ña yóho nu ndo já ná candaa ini ndó sahá na cúní jándahvi ndohó. ²⁷ Joo ndacaan ínimã yíi Ndióxi ini ndó, mé a nasahan Jesucristo nu ndo. Sahá ña cán queá co xíní ñúhú toho ndó inga na jánaha na ndohó jáchi mé ínimã yíi Ndióxi, ña ndacaan ini ndó jan jánaha tóco ndihi ñaha nu ndo. Ta ña jánaha mé á nu ndó cúu á ña ndaa ta co cúu á ña túhún. Sahá ña cán queá xíní ñúhú catáhan tuun ndó xihín Jesucristo tá quiahva sácaja ndó jáchi quiahva já najánaha ínimã yíi Ndióxi nu ndo.

²⁸ Candehé ndo jáchi cúu ndó tátuhun jahyi i. Xíní ñúhú catáhan tuun í xihín Jesucristo já ná cuu candeeé ini mé á tá ná

canáha mé á quixi a ta já ná a cácahan nuu yo tá ná cuní mé á. ²⁹ Mé ndó sa cándaá ini ndó ña cája Jesucristo ndinuhu ña ndaa cuití va. Ta tá cája mé ndó ña ndaa já queá jánaha ndó ña mé a ndaa cúu ndó jahyi Ndióxi.

3

Ná cúu jahyi Ndióxi

¹ Candehé ndó. A juú quiahva quíhvi ini Ndióxi, tátá yo mí anda nasahan ñamani nu yo cananí yo jahyi Ndióxi ta mé a ndaa cúu yó jahyi mé á. Joo ñayivi ñuyíví co xíní na Ndióxi sahá ña cán queá co ndícuni na ña cúu yó jahyi mé á. ² Candehé ndo, ñani máni, na cúu cuéntá Jesús. Sa cúu yó jahyi Ndióxi vatí viti ñúhú co cándaá ini ndá quiahva nduú. Joo cándaá vaha iní ña tá ná quixi Jesucristo já nduú tá quiahva cáa mé á jáchi cuní mé á tá quiahva cáa tá ín a. ³ Ta tóco ndihi na ndáti nduu na tá quiahva cáa mé á já queá ndaja víi na mé ná jáchi cúni na coo víi na tá quiahva ín víi Jesucristo.

⁴ Tóco ndihi na cája cuachi sáhnú na nu ley Ndióxi jáchi tóco ndihi ña núu cúu á cuachi nu ley Ndióxi. ⁵ Mé ndó sa cándaá ini ndó ña naquixi Jesucristo ñuyíví yóho ta naxihí a já ná cuu ndoo cuachi ñayivi. Ta coó ni in túhún toho cuachi mé á. ⁶ Sahá ña cán queá tóco ndihi na cáti tuun xihín mé á co xíca nuu ga na cája na cuachi. Joo na xíca cája cuachi jánaha na ña co xíní toho na mé á ta jánaha na ña co cúu na cuéntá mé á. ⁷ Candehé ndó jáchi cúu ndó tátuhun jahyi i. Cuéntá coo ndó ná a jándahvi ni in na ndohó. Jáchi ñayivi ndaa cája ndaa na tá quiahva cája Jesucristo. ⁸ Joo na xíca nuu cája cuachi cúu ná cuéntá tiñáhá sacuaḥa jáchi janda mé saha nacija rí cuachi. Sahá ña cán queá naxinu Jesucristo ñuyíví yóho, mé á cúu in túhún jiní já jahyi Ndióxi ta naquixi a jándihi a sahá ña núu cája tiñáhá sacuaḥa.

⁹ Ni in túhún toho na cúu jahyi Ndióxi co xíca na cája na cuachi jáchi viti nanduu na tá quiahva ín mé á. Ta co cúni ga na caca nuu na caja na cuachi jáchi cúu ná jahyi Ndióxi. ¹⁰ A ihvi toho ndicuní ndá na cúu jahyi Ndióxi ta ndá na cúu jahyi tiñáhá sacuaḥa. Jáchi na co cája ña ndaa ta na co

quíhvi ini ñani táhan na cán cúu ná jánaha ña co cúu ná cuéntá Ndióxi.

Ndítahan nu yo quíhvi ini táhan í

¹¹ Janda mé saha tá nandiquehe ndó íchi cuéntá Jesús já naxini johó ndó ña cáchi túhun Ndióxi ña ndítahan quíhvi ini táhan í. ¹² Co ndítahan caja í tá quiahva nacija Caín sanahá jáchi nasacuu da cuéntá tiñáhá sacuaḥa. Ta nasahní da ñani da jáchi mé Caín nasacaja da ña núu cuití va ta nandicuni da ña vaha cuití va nasacaja ñani da.

¹³ Candehé ndó, ñani mí i, na cúu cuéntá Jesús. A cátontó ndo tá cándají ñayivi ñuyíví ndohó. ¹⁴ Tá quíhvi ini na cúu cuéntá Jesús já queá sa xíní yo sa najáca cu mé á mí ná a cúnú toho í indayá joo cúnú í coo í nu ín mé á indiví. Joo ndá na co quíhvi ini ñani táhan na, cúu ná tátuhun in ndii. ¹⁵ Ta tóco ndihi na cándají ñani táhan cúu ná tátuhun in na sáhní ndii jáchi sáhní na ñani táhan na iní ínima na. Ta mé ndó sa cándaá ini ndó ña ni in na sáhní ndii co núná nu ná cúnú na indiví catacu na anda ama cáa quívi. ¹⁶ Mé Jesucristo najánaha nu yo ndá quiahva cája ndusa in na quíhvi ini ñani táhan jáchi naxihí a saha yo. Quiahva já ndítahan rí nu mí ví coo tiahva í quívi sahá ñani táhan í, na cúu cuéntá Jesús. ¹⁷ Joo tá ín in na ta ín cuahá ndivaha ñaha nu ná ta co cúni na chindeé na na cúu cuéntá Jesús, na ndímaní ñaha nuu já queá a cuú cachi na ña quíhvi ini na Ndióxi. ¹⁸ Mé ndó cúu ndó tátuhun jahyi i sahá ña cán queá cáhan i xihín ndo ña xíní ñúhú jánaha yó xihín ña cája í ña quíhvi ini ñani táhan í ta a juú xihín yuhú nínú un í cuití va.

Co ndítahan cayihví yo Ndióxi tá cája í ña sáhdá a

¹⁹ Tá cája í ña ndaa, ña cúni Ndióxi já queá cándaá iní ña cúu yó cuéntá mé á ta ín vaha iní xihín mé á. ²⁰ Ta vatí cáhvi iní ña coo nacija vaha í joo xíní vaha chága Ndióxi á mé a ndaa nacija núu í á coo a jáchi xíní mé á tóco ndihi ñaha. ²¹ Candehé ndó ñani máni, na cúu cuéntá Jesús. Tá xíní vaha í ña ndacaan ña vaha ínima yo já queá co yíhvi toho í cáhan í xihín á. ²² Ta mé Ndióxi queá quiahva tóco ndihi ña xíca yó nu á jáchi mé a ndaa cája í ña sáhdá a nu yo ta cáji iní mé

á xihín ña cajú í. ²³ Ta ña sáhdá Ndióxi nu yo cúu á ña ná candeeé iní Jesucristo, mé a cúu in túhún jini já jahyi mé á. Ta sáhdá a nu yo ña ná quihvi ini táhan í tá quiahva ñatahdá chuun nu yó cajú í. ²⁴ Ta na cajú ña sáhdá Ndióxi in nanduu na xihín mé á ta in nanduu mé á xihín na. Ta sahá ña nasacu Ndióxi ínimá yii mé á ini in in í sahá ña cán queá náha ña in nanduu yó xihín mé á.

4

Ínimá yii Ndióxi co ndíque táhan xihín ínimá quini ña ndácaan ini na co cúni táhan xihín Jesucristo

¹ Candehé ndo, ñani mí i, na cúu cuéntá Jesús. A cándusa ndó tóco ndihi na cáchi ña cúu ná cuéntá Ndióxi jáchi cuaha ná cúu ná na tuhún. Ña xini ñuhú cajú ndó queá coto ndojó ndó na já ná candaa ini ndó á mé a ndaa ndácaan ínimá yii Ndióxi ini na á coó a. Jáchi cuahá ndivaha na tuhún nandicuita nuu na ñuyiví yóho jándahvi na ñayivi vatí cáchi na cáhan na cuéntá Ndióxi. ² Xihín ña yóho cuu candaa ini ndó ndá na cúu na ñuhu ínimá yii Ndióxi ini jáchi tóco ndihi na cándusa ña nanduu Jesucristo in ñayivi ñuyiví yóho na cán cúu ná na ñuhu ínimá yii Ndióxi ini. ³ Joo na co cándusa ña nanduu Jesucristo in ñayivi ñuyiví yóho, na cán cúu ná na co ñuhu ínimá yii Ndióxi ini jáchi ña ndácaan ini na cán cúu ínimá quini, ña co cúni táhan xihín Jesucristo. Sa naxini joho ndó ña quixi tá quixi mé ínimá quini, ña co cúni táhan xihín Jesucristo ta sa íin a ñuyiví yóho viti.

⁴ Candehé ndo jáchi cúu ndó tátuhun jahyi i ta cúu ndó cuéntá Ndióxi. Nacandeeé ndó nasahnu ndó nuú na jánaña ña tuhún jan jáchi tóyíí chága ínimá yii Ndióxi ndácaan ínimá ndo a juú ga ínimá quini ndácaan ínimá ñayivi ñuyiví. ⁵ Mé na jan cúu ná cuéntá ña núu ñuyiví yóho ta ñaha ñuyiví yóho cuití cáhan na saha. Ta ñayivi ñuyiví táa joho na ña cáhan na. ⁶ Joo mí cúu yó cuéntá Ndióxi. Sahá ña cán queá na cúu cuéntá Ndióxi xini joho na ña cáhan yo. Joo na co cúu cuéntá Ndióxi co xini joho na ña cáhan yo. Ta xihín ña yóho cuu ndicuní ndá na cúu na ndácaan ínimá yii Ndióxi ini ta

ndá na cúu na ndácaan ínimá quini ini. Jáchi ña ndaa cúu ínimá yii Ndióxi ta ínimá quini cúu á ña tuhún.

Quihvi ini ndusa Ndióxi ñayivi

⁷ Candehé ndo, ñani máni, na cúu cuéntá Jesús. Xini ñuhú quihvi ini táhan í jáchi ña yóho quixi a cuéntá Ndióxi. Tóco ndihi na quihvi ini ñani táhan cúu ná jahyi Ndióxi ta xini na yo cúu Ndióxi. ⁸ Na co quihvi ini ñani táhan jánaña na ña co xini na Ndióxi jáchi Ndióxi queá sahan nu yo ña ná quihvi ini táhan í. ⁹ Ta nachindahá Ndióxi Jesucristo, mé in túhún jini já jahyi a ñuyiví yóho ña ná quivi a saha yo já ná catacú anda ama cáa quivi. Xihín ña yóho najánaña Ndióxi ndá quiahva quihvi ini a mí. ¹⁰ Candehé ndo ndá quiahva quihvi ini Ndióxi mí. A juú jihna ñuhú mí naquihvi ini Ndióxi jáchi jihna ñuhú ga Ndióxi naquihvi ini a mí. Ta nachindahá a Jesucristo, mé in túhún jini já jahyi a ña ná chahvi mé Jesús sahá ndihi cuachí tá naxihí a ndica crúxu.

¹¹ Candehé ndo, ñani máni, na cúu cuéntá Jesús. Tá ta quiahva joho nacaja Ndióxi sahá ña quihvi ini a mí já queá ndítahan ri nu mí ví quihvi ini táhan í. ¹² Ni in ñayivi coó naxini xihín nuu ná Ndióxi. Joo ñuhú mé á ini tá quihvi ini táhan í. Ta xihín ña yóho jáxinu coo í ña quihvi ndusa ini ñani táhan í. ¹³ Ta sahá ña nasacu Ndióxi ínimá yii mé á ini in in yó sahá ña cán queá náha ña in nanduu xihín mé á ta in nanduu mé á xihín yo. ¹⁴ Ta mé nde naxini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cúu in túhún jini já jahyi a ña ná jaca cu a ndaja táhan na ndúu ñuyiví. ¹⁵ Ndá na cándusa ña cúu Jesucristo in túhún jini já jahyi Ndióxi, na jan cúu na in nanduu xihín Ndióxi ta in nanduu Ndióxi xihín ná.

¹⁶ Ta viti sa nacandaa ini ta cándusa í ña mé a ndaa quihvi ini Ndióxi mí. Ta ndá na quihvi ini Ndióxi já in nanduu na xihín Ndióxi ta in nanduu Ndióxi xihín ná. ¹⁷ Ta xihín ña yóho jáxinu coo í ña quihvi ini ñani táhan í xihín ndinuhu ini. Sahá ña cán queá tá ná xinu coo quivi cajú víí Ndióxi sahá ñayivi já queá a cácahan nuu yo tá candichí nu Ndióxi. Jáchi tá quiahva nasacaja Jesucristo tá nasahin a ñuyiví yóho quiahva já

cája í viti. ¹⁸ Mé a ndaa quíhvi ini Ndióxi mí ña cán quea co yíhvi toho í mé á. Jáchi tá ná cahán yo jándoho Ndióxi iní já quea cayíhvi yo mé á. Joo tá ná candaá vaha iní ña mé a ndaa quíhvi ndusa ini Ndióxi mí já quea a cáyihvi toho í mé á. Ña cán quea tá yíhvi yo mé á já quea co xíni yo ña quíhvi ndusa ini a mí.

¹⁹ Quíhvi iní Ndióxi jáchi jihna ñúhú ga mé á naquíhvi ini a mí. ²⁰ Joo tá in in na ta cáchi na quíhvi ini na Ndióxi joo cándají na ñani táhan na já quea jánahá na ña cúu ná na tuhún. Jáchi tá co quíhvi ini na ñani táhan na, da sándehe na xihín nuu ná ndaja caja na cachi na quíhvi ini na Ndióxi, ña a cúu cuni tívi na. ²¹ Nasahnda Jesucristo chuun yóho nu yo: Ndá na quíhvi ini Ndióxi já ndítahan nu ná quíhvi ri ini na ñani táhan na viti.

5

Ndaja caja í quee vaha í xihín ña núu ndúu ñuyívi yóho

¹ Tóco ndihi na cándúsa ña cúu Jesús mé á nachindahá Ndióxi cacomí a cuénta sahá ñayivi, na jan cúu ndusa jahyi Ndióxi. Ta ndá na quíhvi ini Ndióxi, tátá yo, xíni ñúhú quíhvi ri ini na tóco ndihi na cúu jahyi mé á. ² Tá quíhvi iní Ndióxi ta tá cája í ña sáhdá mé á nu yó caja í, xihín ña yóho candaá cáxi iní ña quíhvi ini na cúu jahyi Ndióxi. ³ Ta na cája ña sáhdá Ndióxi, na cán cúu na jánahá ña mé a ndaa táhyi quíhvi ini na mé á ta chuun sáhdá mé á nu yo co cúu á in ñaha ña a cúu candeé yó xihín. ⁴ Ta tóco ndihi na cúu ndusa jahyi Ndióxi candeé na sáhnú na nuú ña núu ñuyívi yóho. Sahá ña cán quea tá candeé iní Jesucristo já quea quee vaha í xihín ña núu ndúu ñuyívi yóho. ⁵ Ndá na cándúsa ña cúu Jesucristo in tuhún jini já jahyi Ndióxi, na cán cúu na candeé sáhnú nuú ña núu ndúu ñuyívi yóho.

Sáhan ínimá yii Ndióxi tuhun sahá Jesús ña cúu á in tuhún jini já jahyi Ndióxi

⁶ Tá naquixi Jesucristo ñuyívi yóho já nacandúta mé á xihín ticuú. Ta jári naxita nii á tá naxihi a ndica crúxu sahá yo. Nacaja Jesucristo ndívi ña yóho: nacandúta xihín ticuú ta naxita nii á tá naxihi a ndica crúxu. Ta mé ínimá yii Ndióxi sáhan tuhun

sahá ña yóho ta ña cáhan mé á cúu á ña ndaa. ⁷ Ndúu uní testigo indivi ta sáhan tuhun sahá Jesús ña cúu á in tuhún jini já jahyi Ndióxi: In testigo cúu Ndióxi, tátá yo ta inga testigo cúu tuhun Ndióxi ta inga testigo cúu ínimá yii Ndióxi. Ta in cúu ndíhuni a sáhan tuhun sahá Jesús. ⁸ Ta ndúu uní testigo ñuyívi yóho. Ta in testigo cúu á ínimá yii Ndióxi ta inga testigo cúu á tá nacandúta Jesús ta testigo cáhuni cúu á tá naxita nii Jesús ndica crúxu. Ta ndíhuni testigo yóho sáhan tuhun a sahá Jesús ña cúu á in tuhún jini já jahyi Ndióxi. ⁹ Ín tiahva í cándúsa í ña cáhan ñayivi xihín yo tá sáhan na tuhun sahá in ñaha. Ña cán quea ama ná a cándúsa í ña cáhan Ndióxi xihín yo jáchi ña cája mé á quea sáhan tuhun sahá Jesucristo, jahyi a ta ña yóho cúu á ña ndíyahvi chága a juú ga ña cáhan ñayivi. ¹⁰ Ta tá cándúsa í ña cúu Jesucristo in tuhún jini já jahyi Ndióxi já cúu á tátuhun ndiquehe vaha í ña cáchi mé á ini ínimá yo. Joo na co cándúsa ña yóho ndája na ña ná nduu Ndióxi ña tuhún jáchi co cándúsa na ña cáhan mé á sahá Jesucristo, jahyi a. ¹¹ Ta tuhun sáhan Ndióxi cúu ña yóho: Nasahan mé á ñamaní catacú anda ama cáa quívi. Ta Jesucristo, jahyi mé á quea cája ña ná catacú indivi anda ama cáa quívi. ¹² Ta ndá na nandiquiahva mé ndáha Jesucristo, mé á cúu in tuhún jini já jahyi Ndióxi, na jan cúu na catacu na anda ama cáa quívi nu in mé á. Joo ndá na coo naxeen ndiquiahva mé ndáha mé á a cúu catacu na anda ama cáa quívi xihín mé á.

Cáhyi chága Juan sahá ña ndítahan caja í

¹³ Cáhyi í ña yóho nu ndóhó, na candeé ini Jesucristo, jahyi Ndióxi já ná candaá ini ndó ña catacu ndó indivi anda ama cáa quívi.

¹⁴ Ta co yíhvi toho í xíca í nu mé á in ñaha, ña cúní a quiahva nu yo jáchi candaá cáxi iní ña xíni johó a nu cáhan yo. ¹⁵ Ta tá candaá iní ña xíni johó Ndióxi nu cáhan yo já quea candeé iní ña quiahva tá quiahva mé á ña nu yo.

¹⁶ Tá ná cuni ndó ñani ndó, na cúu cuénta Jesús ta caja na cuachi ña cuu caja cáhnu ini Ndióxi sahá já quea ndítahan caça tahví ndó nu Ndióxi sahá na cán. Ta xihín ña yóho caja cáhnu ini Ndióxi sahá na jan já ná catacu

na anda ama cáa quivi. Joo íin cuachi ña cañehe ñahá cuhun indayá ta co ndítahan caca tahví yo nu Ndióxi sahá ña jan. ¹⁷ Tóco ndihi ña núu cája í ñuyíví yóho cúú á cuachi nu Ndióxi joo cuahá ndivaha cuachi cája cáhnu ini Ndióxi saha.

¹⁸ Ta cándaá ini ña tóco ndihi na cúú jahyi Ndióxi co xíca ga na nuú cuachi jáchi ndáá Jesucristo mé ná, mé á cúú in túhún jini já jahyi Ndióxi já ná a cája tiñahá sacuaḥa ni in ña núu xihin ná.

¹⁹ Cándaá vaha ini ña cómi Ndióxi cuénta saha yo joo tóco ndihi ñayivi cuénta ñuyíví ñúhu na ndahá tiñahá sacuaḥa ta cómi rí cuénta saha ná.

²⁰ Ta cándaá cáxi ini ña naquixi Jesucristo, mé á cúú jahyi Ndióxi ta najándiyehé a xini túni yo já quea ná candaá ini ña cúú mé á ña ndaa. Ta viti in nanduú xihin mé á jáchi in nanduú xihin Jesucristo, mé a cúú in túhún jini já jahyi Ndióxi. Mé a yóho cúú ndusa Ndióxi ta cúú á ña cája ña ná catacú anda ama cáa quivi. ²¹ Candehé ndo. Mé ndó cúú ndó tátuhun jahyi i ña cán quea cáhan i ña yóho xihin ndo. Coto a cája cáhnu ndó ni in yoco ta ni a cája cáhnu ndó ni in ñaha tá co cúú á Ndióxi. Já ná coo.

Carta chí ivi nacahyí Juan nuú na cúú cuéntá Jesús

Cáhan Ndióxi Juan xihín na cúú cuéntá Jesús

¹ Yehe cúú u in da sacuaḥa ta cáhyí i carta yóho nu ndóhó, quiahva i na cúú cuéntá Jesús jáchi nacaxi Ndióxi ndohó. Tá jári cáhyí i carta yóho nuú jahyi ndó jáchi mé a ndaa quihvi ndivaha ini i ndihi ndó. Ta a juú yehe cuití va jáchi tóco ndihi na nacandaḥa ini ña ndaa quihvi ini na ndohó. ² Quihvi ini i ndohó jáchi ndacaan ña ndaa ini ínimā ndihí ta anda ama cáa quivi coo a xihín yó. ³ Ña cuni quéa ña ná caja Ndióxi, tátá yo xihín Jesucristo, jahyi mé á cuahá ñamaní xihín yo. Ta ná tahnda ini mé á saḥa yó ta ná caja mé á ña ná coo vaha iní. Ta cuu caja mé á ña yóho jáchi cúú á ña ndaa ta quihvi ini a mí.

⁴ Cájii ndivaha ini i jáchi nanditahan i java jahyi ndó ta cája na ña ndaa tá quiahva naḥanda Ndióxi, tátá yo caja í. ⁵ Candehé ndo quiahva i, na cúú cuéntá Jesús. Xíca tahví i nu ndó ña ná quihvi ini táhan í. Ta ña cáhyí i yóho co cúú á chuun saá jáchi cúú á ña sa naxini johó í janda mé saḥa tá nandiquehé íchi cuéntá Jesús. ⁶ Ta tá mé a ndaa quihvi iní Ndióxi náha ña mé a ndaa cája í ña sáhdá Ndióxi caja í. Ta ña naḥanda Ndióxi caja í janda mé saḥa cúú á ña ná quihvi ini táhan í.

Na xíca nuu jándahvi na cúú cuéntá Jesús

⁷ Níi cúú ñuyíví nandicuḥta cuahá na xíca nuu jándahvi na na cúú cuéntá Jesús. Ta na cán co cuni na ndicuni na ña nanduu Jesucristo in ñayivi ñuyíví yóho. Ta na cán cúú ná na tuhún ta cúú ná na co cuni táhan xihín Jesucristo. ⁸ Cuéntá coo ndó ná a jándahvi na ndohó já ná a tívi chuun nacaja ndó saḥa Jesucristo. Xiní ñúhú jáxinu coo ndó chuun cája ndó cuéntá mé á já ná cuu quiahva mé á tóco ndihi ña ndítahan nu ndó ndiquehe ndó saḥa mé chuun nacaja ndó.

⁹ Ta ndá na quéta xoo nuú ña najánaḥa Jesucristo ta co xíca ndacú na íchi cuéntá mé á, na cán náha ña coo in nanduu na

xihín Ndióxi. Joo ndá na xíca na cája na ña najánaḥa Jesucristo, na cán cúú na in nanduu xihín Ndióxi, tátá yo ta in nanduu na xihín Jesucristo, jahyi mé á. ¹⁰ Ta ndá na vaxi nu ndo ta co jánaḥa na ña najánaḥa Jesucristo nu ndo já quéa a ndiquehe ndó na cán vehe ndó ta ni a cáhan Ndióxi ndó xihín ná. ¹¹ Jáchi tá ná jáyaha ndó na cán vehe ndó já quéa in nanduu ri mé ndó xihín na ta catáhan ndó xihín ña núu cája na.

Ndindyí Juan na cúú cuéntá Jesús

¹² Íin cuahá ndivaha ñaha cuni cahan i xihín ndo joo co cuni cáhyí i ña nu ndo. Jáchi ña cuni quéa saá i coto nihni i ndohó já ná cuu ndituhún yo ña ná cavatá ndivaha ini ndihí.

¹³ Ta na cúú jahyi quihvi ndo chindahá na Ndióxi coo ndó jáchi mé ña cúú ña ña nacaxi Ndióxi viti. Já ná coo.

Carta chí uní nacaḥyí Juan nuú na cúú cuéntá Jesús

Cáḥan Ndióxi Juan xihín in da naní Gayo

¹ Yeḥe cúú u in da sacuaḥa ta cáhyi i carta yóho nu mún ñani máni, da naní Gayo. Ta mé a ndaa quíhvī ndusa ini i yohó.

² Candehé, ñani máni, da cúú cuéntá Jesús. Xíca ṭahví i nu Ndióxi ña ná quiahva mé á tá nuú ña vaḥa nuun. Ta ná caja mé á ña ná a quíhvun ta já coo vaḥa inún tá quiahva in vaḥa inún xihín Ndióxi. ³ A juú quiahva ná cajii iní i tá naquixi java na cúú cuéntá Jesús yóho ta nandicani na nuú i ña coo cáxoun nuú ña ndaa jáchi cája tá cájún ña. ⁴ A juú quiahva cajii iní i tá ñéhé e tuhun ña xíca ndó íchi cuéntá ña ndaa jáchi mé ndó cúú ndó tátuhun jahyi i.

⁵ Candehé, ñani máni. Vaḥa ndivaha cájún jáchi xihín ndinuhu inún chindeún na cúú cuéntá Jesús tá saa na jan vatí cúú ná na quíxi ñuu tóho. ⁶ Ta nu tóco ndihi na táca veñuhu yóho ndícani mé na tóho ndá quiahva quíhvī ndivaha inún na. Ña cán quéa xíca i ñamaní nu yohó, Gayo ña ná chindeún na tá ná saa tucu na cán ta ná quiahvún ña ndímaní nu ná cañehe na íchi cūhun na jáchi ña yóho cúú á ña cajii ini Ndióxi xihín. ⁷ Ndítahan chindeún na jáchi naqueta na xíca nuu na cája na chuun cuéntá Jesucristo ta coo cúni na caça na ñaha catacu na nuú na coo cúú cuéntá Jesús. ⁸ Sahá ña cán quéa ndítahan nu mí, na cúú cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáḥan na ña ndaa xihín ñayivi.

Cuachi cája in da naní Diótreres

⁹ Sa nachindahá i in carta nu tóco ndihi na cúú cuéntá Jesús nduu jan joo Diótreres coo naxeen da cándusa da ña cáchi nde. Jáchi cája cáhnu da mé dá ta cúni da cacuu da jiní nu tóco ndihi na cúú cuéntá Jesús nduu jan. ¹⁰ Sahá ña cán quéa tá ná saa i jan caxi tuhun i nuun saḥá ña cája da jáchi xíca nuu da cáḥan ndivaha da ña tuhún saḥá nde. Ta a juú ña yóho cuití cája da,

vaḥa jáchi ni coo cúni da ndiquehe da na cúú cuéntá Jesús xínu coo jan. Ta sáji nuu da nuú na cúni ndiquehe vaḥa ñahá ta janda táxi da na veñuhu.

¹¹ Candehé, ñani máni. A cájún ña núu tá quiahva cája Diótreres jan. Xíni ñúhú cájún ndinuhu ña vaḥa jáchi da cája ña vaḥa cúú dá cuéntá Ndióxi joo da cája quini coo xíni da Ndióxi.

Ña vaḥa cája Demetrio

¹² Joo tóco ndihi na cúú cuéntá Jesús cáḥan vaḥa na saḥá da naní Demetrio jáchi ña ndaa cuití va cája da. Ta quiahva já cáḥan vaḥa ri ndeḥe va saḥá dá ta cándaa inún ña cáḥan nde ña ndaa.

Ndíndayí Juan Gayo

¹³ Mé a ndaa in cuahá ndivaha ñaha cúni caḥan i xuhun joo coo cúni cáhyi i ña nuú tutu yóho ¹⁴ jáchi cúni cuni yachi i yohó já ná nditúhún yúhu mí i xuhun.

¹⁵ Ña xíca i nu Ndióxi quéa ná caja mé á ña ná coo vaḥa inún. Na cúú cuéntá Jesús nduu yóho chindahá na Ndióxi coún. Ta cájún ñamaní caḥan Ndióxi lohún xihín in in na cúú cuéntá Jesús nduu jan.

Carta nacahyí Judas nuú na cúu cuéntá Jesús

Cáhyí Judas carta nuú na nacaxi Ndióxi cacuu na cuéntá mé á

¹ Yehé cúu Judas, da cája chúun cuéntá Jesucristo ta cúu u ñani Jacobo. Cáhyí i carta yóho nu ndóhó jáchi cúu ndó na nacana Ndióxi, tátá yo. Cúu ndó na quíhvi ini mé á ta cúu ndó na ndáá Jesucristo jáchi in nanduu ndó xihín mé á. ² Ña xíca tahví i nu Ndióxi queá ña ná tahnda ndivaha ini mé á saha ndo. Ta ná caja mé á ña ná coo vaha ndivaha ini ndó. Ta ná chutú ndaa ini ndó xihín ña quíhvi ini a ndohó.

Cáhan Judas sahá na jánaha ña tuhún (2 Pedro 2:1-17)

³ Candehé ndo, ñani mí i, na cúu cuéntá Jesús. A juú quiahva naxinu ini i cáhyí i nu ndo saha ndá quiahva najacacu Ndióxi ndihí. Joo viti ndíhi ini i cáhyí i carta yóho nu ndo ná caca tahví i nu ndo ña ná a jándacoo ndó ña candeé ini ndó Jesucristo jáchi ña yóho cúu á ña in tañu cuití va nasahan Ndióxi nu yo, na cúu cuéntá mé á. ⁴ Jáchi java ñayivi nandaja na mé ná tátuhun na cúu cuéntá Jesús ta naquihvi nuu na tañu ndó jan. Mé ñayivi yóho cúu ná na sa cáhan tuhun Ndióxi saha janda jihna ndivaha ta cáchi a ndítahan nu ná cuhun na indayá. Cúu ná ñayivi quini jáchi jánaha na ña tá sa nacaja cáhnu ini Ndióxi sahá cuachi na já cuu caja na tá nuú cuachi ña cúní mé ná. Ta xihín ña yóho náha ña co xéen na candúsa na Ndióxi, mé á cómí cuéntá saha tóco ndihi ñaha. Ta jári náha ña co cúu ná cuéntá Jesucristo, xitoho í.

⁵ Sa xíní ndo ña nandoho na Israel tá natavá Ndióxi na ñundáhyi Egipto sanahá. Ta viti jándicuhun ini i ndohó ña vatí natavá Ndióxi tóco ndihi na Israel cán Egipto joo tá nandihí najándihí a sahá na coó naxeen candúsa ñahá. ⁶ Ta quiahva já nacaja ri mé á xihín na nasacuu tátó mé á jáchi coó naxeen na caja na ña cúní Ndióxi ta najándacoo na nuú nasanduu na. Sahá ña cán queá nachicaji Ndióxi na nu naá ndivaha nu ñúhu na anda ama cáa quivi.

Ta ndáti na cán xinú quivi caja vií mé á saha ná. ⁷ Ta tá quiahva nacaja Ndióxi xihín mé tátó cán quiahva já nacaja ri a xihín ñayivi ñuu Sodoma xihín na ñuu Gomorra ta xihín na nanduu ñuu ñéhe táhan xihín ndíví ñuu yóho. Najándihí Ndióxi saha ná jáchi nandiquiahva na yiquí cuñu na ña ná caja na tá nuú cuachi. Ta ndaja táhan mé taa nacaja cuachi xihín táhan da. Sahá ña cán queá najacuyu Ndióxi ñúhu cáyi jata ná. Ta quiahva já ndoho na anda ama cáa quivi. Ta xihín ña yóho jánaha Ndióxi nu yo ña quiahva já cuu ndoho ri mé ví tá co cája i ña cúní mé á.

⁸ Tá quiahva nacaja ñayivi sanahá quiahva já cája ri na jándahvi ndohó viti. Jáchi cúu ná ñayivi quini, na cája cuachi ta tá xíní na cája na in cuachi já cuahan na cája ná ña. Mé na cán cája na ña núu xihín yiquí cuñu na ta quehe núu na Ndióxi jáchi co quehe na cuéntá nu cáhan mé á xihín ná ta co yíhvi na cánahá na xihín tátó Ndióxi indiví, mé á lin ndéé cája cuahá ñaha. ⁹ Ta janda mé á cúu sacuahá nu tóco ndihi tátó Ndióxi naní a Miguel ni coó nacanahá a xihín tiñahá sacuahá. Ta ni co naxeen a cahan núu a xihín rí tá nacani táhan mé á xihín rí sahá yiquí cuñu Moisés. Ña nacachi a xihín rí queá: “Ndióxi ná janani a yohó”, nacachi a xihín rí. ¹⁰ Joo ñayivi quini, na xíca jándahvi na cúu cuéntá Jesús yóho, co yíhvi na cánahá na xihín ña co cándaa ini na saha. Joo cája na ña xíca ini yiquí cuñu jáchi cúu ná tátuhun quítí, rí co xíní túní ta ña núu cája na yóho jándihí a saha ná.

¹¹ Ndáhví ndivaha nacuu na jan jáchi cája na tá quiahva nacaja Caín, da nasahní ñani sanahá ndivaha. Ta jatá jjuhún cuití va cája na ñaha tá quiahva nacaja Balaam sanahá. Ta cája ri na tá quiahva nacaja Coré sanahá tá nandínehe yúhu dá nu Ndióxi. Ta sahá ña yóho ndihi saha ná. ¹² Jáchi na jándahvi ndóhó jan jácacahan na nuu ndo tá táca ndo xíxi ndó xihín java na cúu cuéntá Jesús. Jáchi yáha ndivaha ña xíxi na jan ta coó toní ñúhú na xihín ña cája na. Ta saha mé cuití va na ndíhi ini na. Cúu ná tátuhun vico núhú, ña xíca nuu cája tachí ña co ndójo javí. Ta cúu ná tátuhun yító cuíhi, do co cún ñaha nuu tá ndítahan cuun cuíhi nu do. Cúu

na tátuhun yíto, dó natuhun na janda yóho dó jáchi coo nacuun cuihi nu do. Ta cúu ná tátuhun na nandihí saha chí in ndeé. ¹³ Ña cajú na jan cúu á tátuhun yáco cándo nuu chíquiñu tañuhú tá ndícojo do jáchi ña cácahan nuu yo cúu ña cajú na jan. Cúu ná tátuhun quimi, rí najana ta co ndíñehe rí nuú nasahin rí. Ta sahá ña cajú na cañuhu na nuú naá ndivaha anda ama cáa quivi caja Ndióxi.

¹⁴ Ta janda sanahá da naní Enoc, da nasacuu da usa nuú chichi Adán najáyaha da tuhun nacahan Ndióxi sahá ña núu cajú na jándahvi ndohó cán. Ta já nacachi da já: “Candehé ndó. Sa vaxi Jesucristo, xitoho í xihín cuaha mil tát yí mé á ¹⁵ ña ná caja vií a saha tóco ndihí na ndúu ñuyiví. Ta jándoho a ini tóco ndihí ñayivi sahá ndihí ña núu nacaja na. Ta quiahva já jándoho a ini na saha tóco ndihí tuhun ihvi nacahan na saha mé á”, nacachi Enoc saha ná. ¹⁶ Mé ñayivi quini yóho ni in ñaha co táhan ini na xihin ta cáhan núu na saha tóco ndihí ñaha. Ta ní tiempo cajú na ña xíca yiquí cuñu na cuití va. Ta ndíñehe jíco ndivaha na mé ná tá cáhan na nuú ñayivi. Ta cáhan vaha na sahá ñayivi ña ná nuná nuu ná jándahvi ñahá na.

Jácahan Judas na cúu cuénta Jesús ña ná candéé cáhnu ini na Ndióxi

¹⁷ Candehé ndo, ñani máni, na cúu cuénta Jesús. Xíní ñuhú ndicuhun ini ndó ña nacachi na apóstol cuénta Jesucristo, xitoho í xihin ndo sanahá. ¹⁸ Mé na cán nacachi na xihin ndó já: “Tá ná cayati quivi ndihí sahá ñuyiví yóho já quea cacu nuu ñayivi cuacu ndaa na Ndióxi. Ta caja na tá nuú ña núu ña xíca ini mé ná caja na”, nacachi na cán. ¹⁹ Mé ñayivi quini yóho cúu ná na xíca sáhdá java táhan na cúu cuénta Jesús. Ta cajú na ña núu ña cáhvi ini na caja na ta co ndácaan ínimá yí Ndióxi ini na.

²⁰ Joo mé ndó, ñani máni, na cúu cuénta Jesús xíní ñuhú coo ndacú ini ndo xihin ña cándeé ini ndó Jesús jáchi ña jan cúu á ña yí ndivaha. Ta xíní ñuhú caça tahví ndo nu Ndióxi xihin ndeé ña sáhan ínimá yí mé á nu ndo. ²¹ A cáxoo ndó nu Ndióxi jáchi quíhvi ini a ndohó. Ta candati tiahva ndó xinu coo quivi caja Jesucristo, xitoho í ña ná catacú

anda ama cáa quivi jáchi mé a ndaa táhvi ini a saha yo.

²² Ta ndítahan candáhvi ini ndó ndá na cáhvi ivi johó ini saha Jesús. ²³ Já quea jácacu Ndióxi na ña ná a cuhun toho na indayá. Xíní ñuhú candáhvi ini ndó na. Joo cuénta coo ndó xihin ná já ná a casahá ndo caja ndó cuachi tá quiahva cajú mé ná jáchi na cán cuu jácaquini na ndohó.

Cája cáhnu Judas Ndióxi

²⁴ Mé Ndióxi quea íin tóco ndihí ndeé chindeé a mí ña ná a ndácava í nuú cuachi já ná cuu coo vií yo tá ná xinu coo í nu íin mé á. Ta caja mé á ña ná chutú ndaa yo xihin ña cáji ini tá ná xinu coo í nu íin mé á ta a juú quiahva ndató cáa cán. ²⁵ In túhún jini mé á cúu Ndióxi, mé á jácacu mí sahá ña nacaja Jesucristo, xitoho í. Cóho caja cáhnu í Ndióxi jáchi yehe ndivaha mé á ta cáhnu ndivaha cúu á ta íin cuahá ndeé á ta mé á quea cómi cuénta saha tóco ndihí ñaha. Cáhnu cúu mé á viti ta anda saha ta anda ama cáa quivi cáhnu cúu mé á. Já ná coo.

Ña najánaḥa Jesucristo nu Juan

Tá nanaha Jesucristo mé á nu Juan

¹ Ña yóho cúu ña nanaha Ndióxi nuú Jesucristo ña ná cuu jánaḥa mé á ña nuú na cúu cuéntá mé á. Ta nāchindahá Jesucristo in tátō mé á nuú yeḥe, da cúu Juan, da cāja chúun cuéntá mé á já ná caxi tuhun tátō mé á xihín i ndá a quéa yaha chága chí nuu. Ta cúu á ña sa cáyati vaxi. ² Ta ndícani ndaa ndihi i sahá ña naxini i xihín nuú i ta nācahyí i tóco ndihi ña yóho. Ta nāsaḥan Jesucristo tuhun a nuú i ña cúu á ña ndaa.

³ Cajii ini ñayivi tá cáhvi na ña nācahyí i yóho ta cajii ini na xini johō na ña yóho nani cáhvi inga na ña jáchi cúu á ña nāquixi cuéntá Ndióxi. Cajii ini ñayivi tá cāja na ña cáchi a jáchi sa nācayati quiví coo tóco ndihi ña yóho.

Cáhyí Juan ña yóho nu ndihusa ñuu nu ndítaca na cúu cuéntá Jesús

⁴ Yeḥe cúu Juan ta cáhyí i carta yóho nuú ndihusa ñuu nu ndúu na cúu cuéntá Jesús estado Asia. Ña cúní quéa ná cāja cuaha Ndióxi ñamaní xihín ndó ta ná cāja mé á ña ná coo vaha ini ndó. Mé Ndióxi in a viti ta nāsaḥin a janda tá cámaní cava sáhá saḥa ñuyiví ta quixi a ñuyiví yóho. Ta cúní ña ná cāja cuahá ínima yii Ndióxi ñamaní xihín ndo. Mé a cán cāa tátuhun usa ínima yii ta ndúu na nu Ndióxi, mé nu in coo a cómí a cuéntá sahá indiví cán. ⁵ Ta cúní ña ná cāja cuahá Jesucristo ñamaní xihín ndo, mé á cáhan ña ndaa sahá ña naxini a. Ta mé á nāsaḥuu ña nu cuítí nānditacu tañu na sa naxihí. Ta cómí a cuéntá saḥa tóco ndihi rey, nā cómí cuéntá sahá ñayivi ñuyiví yóho. Ta quíhvi ini Jesucristo mí ta najándoo a cuachí tá naxita nji á ndica crúxu. ⁶ Ta tóco ndihi mí, nā cándeé ini mé á najándique táhan mé á mí já ná cacomí a cuéntá saḥa yo. Ta nāndaja mé á mí nānduú tátuhun jutū ña ná cāja cáhnu yó Ndióxi, mé a cúu tátá Jesucristo. Cáhnu ná cacuu mé á andā ama cāa quiví jáchi in ndée mé á cāja tóco ndihi ñaha andā ama cāa quiví. Já ná coo.

⁷ Sa nācayati quiví quixi Jesucristo tañu vico. Ta tóco ndihi ñayivi cuni ñahá ta janda na nāsaḥní ñahá cán cuni na a. Ta tóco ndihi ñayivi ndúu ndijáá ñuu níí cúu saḥa ñuyiví canduu cuéha ndivaha ini na saḥa mé á. Já ná coo.

⁸ Ta já cáchi Jesucristo, xitoho í saḥa mé á: “Yeḥe cúu mé a nu cuítí ta yeḥe cúu mé a nu ndihí jáchi janda tá cámaní cava sáhá saḥa tóco ndihi ñaha sa in va yeḥe ta coo tá coo i vatí ná ndihi saḥá”, cáchi a. Mé a cúu Ndióxi, ña in ndée cāja tóco ndihi ñaha. Ta mé á in a viti ta nāsaḥin a janda tá cámaní cava sáhá saḥa ñuyiví ta quixi a ñuyiví yóho.

Náha Jesucristo nu Juan ndá quihva cáhnu cúu mé á

⁹ Yeḥe cúu Juan ta cúu u ñani ndó, na cúu cuéntá Jesús. Ta sahá ña cándeé ini i Jesús sahá ña cán quéa nañeḥe táhvi i xihín mé ndó cacomí Ndióxi cuéntá saḥa ndihí. Ta coo cāja toho ña ná ndoho iní ñuyiví yóho jáchi sahan Ndióxi tuhun ndée iní já ná cuu cāja ndeé iní tá ndóho iní. Nātava xóo na yeḥe ta nāsaḥan ñeḥe na yeḥe isla naní Patmos sahá ña naxica nuu i nācaḥan i tuhun Ndióxi, ña cúu ña ndaa, ña najánaḥa Jesucristo nuú i. ¹⁰ Ta ndaja coo nāndindaa quiví coo ña nāsaḥu ini Jesucristo, xitoho í ta mé tañu já nāchutú ndaa ínima i xihín ínima yii Ndióxi ta já naxini johō i cáhan cóhó in a chí jatá i ta nāsaḥuu a tátuhun tá tívi na trompeta. ¹¹ Ta mé tuhun naxini johō i cán nācachi a já xihín i:

—Yeḥe cúu mé a nu cuítí ta yeḥe cúu mé a nu ndihí jáchi janda tá cámaní cava sáhá saḥa tóco ndihi ñaha sa in va yeḥe ta coo tá coo i vatí ná ndihi saḥá. Tóco ndihi ña ná cunún yóho xini ñuhú cahyún ña nuú in libro. Ta já chindahún ña nuú ndihusa ñuu estado Asia nu ndúu na cúu cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú na ndúu ñuu Filadelfia xihín nuú na ndúu ñuu Laodicea viti —nācachi a xihín i.

¹² Tá naxini johō i ña yóho já nāndicoto nihni jatá i sándeḥé e yo cáhan xihín i. Ta já naxini i usa ña jjuhun cuáan nu sándójó ña túun. ¹³ Ta tañu ña cán naxini i in a cúní coo tá cúní coo ñayivi ta ndíxi a in jáhma

cáni ña janda sahá xínu coo a xihín quiahva cáni á. Ta naxini i ndácaan in cinturón ña jiuñun cuáan tóco á ta cáni a janda yati yicá ndicá a. ¹⁴ Ta ijí jiní á cúú á ña yaa cachi tátuhun yaa yucú yáhvá. Ta nduchú núú a cúú á tátuhun ñúhu ita. ¹⁵ Ta tá quiahva yehe caa ña jándutu na ini horno quiahva já yehe sahá. Ta nihi ndivaha cáhan mé á ta cúú á tátuhun tá xójo cýyu ticuí yuta tañu cáva. ¹⁶ Ta naxini i ñúhu usa quimi ini ndahá cuáha mé á. Ta ini yúhu a naxini i quéta in yuchú cáni ña jeen ndíví xoo yúhu. Ta naxini i yehe ndivaha nuu á tá quiahva yehe candii caxivi ndaa.

¹⁷ Tá naxini i mé á já nandicava i sahá tátuhun in ndii. Joo mé á naxinuú a ndahá cuáha jatá i já nacachi a já xihín i:

—A cáyihví tohún. Yehe cúú mé á nu cuítí ta cúú u mé a nu ndíhí. ¹⁸ Tácú tá tácú va yehe. Mé a ndaa nasacuu u ndii joo viti tácú u ta catacu u anda ama cáa quivi. Ta yehe naquee vaha i tá nanditacu tucu u tañu ndii ta viti cómí i cuénta sahá nu ndúu ínima na sa naxihí. ¹⁹ Xíní ñúhú cahyún ña naxinún. Ta xíní ñúhú cahyún sahá ña cúu viti ta já cahyún sahá ña coo chága chí nuu. ²⁰ Ña yóho quéa cuni cachi ndihusa quimi naxinún ñúhu ini ndahá cuáha i xihín ndihusa ña jiuñun cuáan nu sándójó ña túun. Ndihusa quimi cán cúú rí yuhú nuu in in na cómí cuénta sahá usa veñuhu nu tácá na cúú cuénta Jesús. Ta ndihusa nu sándójó ña túun cán cúú á yuhú nuu usa veñuhu. Ta ña yóho coo naxini ñayivi jáchi nasacuu a ña jehé.

2

Ña nacachi Jesús xihín na cúú cuénta mé á ndúu ñuu Efeso

¹ Cahyún in carta nuú da cómí cuénta sahá na cúú cuénta mí i ndúu ñuu Efeso. Ta ña cahyún cúú ña yóho: “Ña yóho cúú tuhun cáhan Jesús, mé a ñúhu usa quimi ini ndahá cuáha, mé a xíca nuu tañu usa ña jiuñun cuáan nu sándójó ña túun. Ta ña yóho quéa cáhan Jesús xihín ndó, na ñuu Efeso: ² Sa cándaa ndihi ini i ndá quiahva cája ndó. Cándaa vaha ini i ña ndúcú ndéé ndo cája chúun ndó cuénta mí i. Ta coo jándacoo ndó chuun cája ndó cuénta mí i.

Ta sa cándaa vaha ini i ña coo ndéé ini ndó xihín ña cája ñayivi quini. Ta sa cándaa ini i ña sa naxito ndojó ndó na cáchi cúú apóstol cuénta Ndióxi joo coo cúú toho na apóstol jáchi cúú ná na tuhún cuití va. ³ Ta sa cándaa cáxi ini i ña coo jándacoo ndó cája chúun ndó cuénta mí i. Ta cuahá ndivaha tañu ndóho ini ndó sahá i. Ta coo cánaá ndó xihín ña yóho. ⁴ Joo in in ñaha cáhan cuachí i nu ndó saha: Ta ña cuni cáhan i saha cán quéa coo cuni ga ndó yehe tá quiahva nacacuni ndó yehe janda mé saha. ⁵ Ña cán quéa ndítahan ndicuhun ini ndó ndá quiahva nacacuni ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó janda mé saha. Á tá coo ta xínu yachi i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. ⁶ Joo mé a ndaa cáji ini i xihín ndo jáchi cándají ndó ña núu cája na xíca cuénta nicolaítas jan. Jáchi coo táhan ri ini yehe xihín ña núu cája na jan. ⁷ Cuni johó vaha ndó, na vaha johó ña cáhan ínima yii Ndióxi xihín na cúú cuénta mí i, na tácá veñuhu: Ndá na ná quee vaha tañu tóco ndihi ña núu ñuyiví yóho, na cán cúú na quiahva i ñamaní nuu caxí cuñi cúun nu yíto, dó cája ña ná catacu ñayivi anda ama cáa quivi. Mé yíto cán cándichi dó nu in Ndióxi.”

Carta cuahan nuú na cúú cuénta Jesús ndúu ñuu Esmirna

⁸ Cahyún inga carta cuhun nuú da cómí cuénta sahá na cúú cuénta mí i ndúu ñuu Esmirna. Ta ña cahyún nu ná cúú ña yóho: “Ña yóho quéa cáchi Jesús, mé a cúú á nu cuítí ta cúú á nu ndíhí, mé á sa naxihí ta já nanditacu tucu a. Ta já cáchi a já xihín ndó, na ñuu Esmirna: ⁹ Sa xíní vaha i ndá quiahva ndóho ini ndó. Ta xíní ndá quiahva cándahví ndo. Joo mé a ndaa cúú ndó na cuicá nu Ndióxi. Ta sa xíní ndá quiahva cáhan núu na saha ndo jáchi cáchi na cúú ná na Israel joo a juú na. Cúú ná in táhdá na cája cáhnu Satanás, mé tiñahá sacuaña va. ¹⁰ A cáyihví toho ndó sahá ña vaxi nu ndó ndoho ini ndó. Jáchi ñayivi quini, na cúú cuénta tiñahá sacuaña taan na java ndohó vecaa já coto ndojó na ndohó. Ta tixi uxu quivi ndoho ini ndó.

Ta xíní ñúhú cándéé tá cándéé ini ndó yehe vatí ná cahní ña ndohó ta já ná caja i ña ñehe táhvi ndó catacu ndó anda ama cáa quivi. ¹¹ Cuni johó vaha ndó, ña vaha johó ña cáhan ínimá yíi Ndióxi xihín ña cúu cuéntá mí i, ña táca veñuhu: Ndá ña ná quee vaha nu tóco ndihi ña núu ñuyiví yóho, ña cán cúu ña a cùhun toho na ndoho ini na indayá. Jáchi tá ndóho ini ñayivi indayá cúu á tátuhun xíhi ña chí ivi.”

Carta cuahan nuú ña cúu cuéntá Jesús ndúu ñuu Pérgamo

¹² Cahyún inga carta cùhun nuú dá cómi cuéntá sahá ña cúu cuéntá mí i ndúu ñuu Pérgamo. Ta já cachún já nu carta ñan: “Jesús, mé a ñehe yúchú cáni ña jeen ndiví xoo yúhú cán quéa cáchi já: ¹³ Sa xíní vaha i ña íin ndó ñuu Pérgamo nu cája Satanás, mé tiñáhá sacuahá ña cúni mé rí xihín ñayivi. Joo xihín ndinuhu ini ndó cája ndó ña táhan ini i xihín. Ta cóo najándacoo ndó ña cándéé ini ndó yehe vatí ñaxini ndó ndá quiahva ñacaja na xihín Antipas, mé da ñacandéé cáhnu ini yehe cán. Jáchi ñasahní ña da mé ñuu ñan nu cómi Satanás, mé tiñáhá sacuahá cuéntá sahá ñayivi. ¹⁴ Joo íin in ñaha cáhan cuachi i nu ndó saha. Jáchi sáhan ndó ñamaní nuú java ñayivi cán ña ná candico cáhnu na ña najánaḥa Balaam. Mé Balaam ñan cúu dá da najánaḥa Balac ndaja caja da jácahan da ña Israel caja na cuachi tátuhun ná cuxu na ña najoco ñayivi nuú yoco ta ná cuju xihín táhan ñayivi vatí có cúu ná yíi ná á ñájíhi ña. ¹⁵ Ta có íin vaha ini i xihín ndó, ña ñuu Pérgamo jáchi sáhan ndó ñamaní nuú java ñayivi ña ná candico ña jatá ña nicolaítas. Ta cándají ndivaha i ña jánaḥa ña ñan. ¹⁶ Xíní ñúhú ndicó cóo ini ndó ta caca vaha ndó íchi cuéntá mí i. Á tá cóo ta saá yachi nu ndúu ndó ñan. Ta xihín tuhun cahan i caní táhan i xihín ña cája cuachi ñan. Ta mé tuhun cahan i cacuu a tátuhun yúchú cáni ña cana yuhú u. ¹⁷ Cuni johó vaha ndó, ña vaha johó ña cáhan ínimá yíi Ndióxi xihín ña cúu cuéntá mí i, ña táca veñuhu: Ndá ña ná quee vaha nuú ña núu já quéa quiahva i ñamaní nu ná cuxu na pan yíi, ña cúu tátuhun maná, ña ñaquixi indiví. Ta ña yóho cúu á ña ñasahíin jehé nuú ñayivi. Ta já quiahva ri in yuú yaa nuú

in in ñayivi nu ndáa quiví saá na. In túhún ña ná ndiquehe yuú yaa cán cúu ña xíní yo quivi quéa ndáa nu á.”

Carta cuahan nuú ña cúu cuéntá Jesús ndúu ñuu Tiatira

¹⁸ Cahyún inga tucu carta ná cùhun a nuú dá cómi cuéntá sahá ña cúu cuéntá mí i ndúu ñuu Tiatira. Ta já cachún já xihín ná: “Ña yóho quéa cáchi Jesús, mé a cúu in túhún jini já jahyi Ndióxi. Ta mé á quéa yehe nduchú núu a tátuhun ñuhú ita ta yehe saha tá quiahva yehe caa, ña jándutu ña ini horno. Ta mé á cáchi a já xihín ndóhó, ña ñuu Tiatira: ¹⁹ Sa xíní vaha i tóco ndihi ña cája ndó. Xíní vaha i ña cúni ndó yehe. Ta xíní vaha i ña cándéé cáhnu ini ndó yehe. Ta sa xíní vaha i ña có jándacoo ndó cája ndó ña cáji íni i xihín. Ta sa cándaḥa vaha ini i ña ndíhi chága ini ndó cája chúun ndó cuéntá mí i a juú ga tá ñacasáhá ndó cándéé ini ndó yehe. ²⁰ Joo íin in ñaha ña cúni cahan cuachi i xihín ndó saha. Jáchi có cúni ndó jánani ndó ña naní Jezabel, ña íin tañu ndó ñan. Vatí cáchi ña ña cáhan ña cuéntá Ndióxi joo xihín ña quixi jini mé ña jándahvi ña ña cúu cuéntá mí i. Jáchi jácahan ña ña ná cuju xihín táhan na, ña có cúu yíi ná á ñájíhi ña. Ta jánaḥa ña ña ná cuxu na ña najoco ñayivi nuú yoco. ²¹ Sa ñasandati ndivaha i ña ná ndicó cóo ini ña sahá cuachi cája ña joo có cúni ña jándacoo ña ña quíji ña xihín ña có cúu yíi ña. ²² Sahá ña cán quéa caja i ña ná quihvi ndeé ña candúhu ña xito ña. Ta caja i ña ná ndoho ndivaha ini ndíhi da quíji xihín ña tá ná a jándacoo da cuachi cája da xihín ña jáchi ña ñan cúu ña najánaḥa ña nu dá caja da. ²³ Ta caja i ña ná quivi ndíhi jahyi ña. Ta xihín tóco ndíhi ña yóho cuni ña cúu cuéntá mí i, ña ndúu ndijáá ñuu ña mé a ndaa xíní vaha i ña cáhvi ini ñayivi ta xíní ndaja íin ínimá ná. Ta quiahva i nuú in in ndó ña ndítahan quehe ndó sahá ña ñacaja ndó. ²⁴ Ta viti cúni cahan i xihín java ga ndó, ña cúu cuéntá mí i ndúu ñuu Tiatira ñan. Jáchi có ndicó ndó jatá ña jánaḥa ña cán ta có ndicó ndó jatá ña cáchi ñayivi cúu ña ndíchi ndivaha cuéntá Satanás, mé tiñáhá sacuahá. ña cúni cachi i xihín mé ndó quéa cóo ga inga chuun sáhdá i nu ndó. ²⁵ Joo xíní ñúhú candita ndacú ndo janda

quiahva ná saa i nu ndúu ndó jan. ²⁶ Ta ndá na ná quee vaha nuú ña núu ñuyiví yóho ta cája na ña cúní yehe xihín ndinuhu ini na janda quiví nu ndíhí já quea caja i ña ná ñehe táhvi ná cahnda na chuun nuú ndijáá ñayivi ndúu ñuyiví. ²⁷ Tá quiahva ñacaja Ndióxi, tátá i xihín i tá nasahan mé á ndée á nuú i quiahva já caja i xihín na cándeé ini yehe. Ñehe táhvi ná cacomí na cuéntá sahá ñayivi ñuyiví ta cuu caja na tá quiahva cúní mé ná. Ta cuu jándihi na saha mé ñayivi ñuyiví tá quiahva cája ñayivi tá táhvi na quiji ndahyi. ²⁸ Ta quiahva ri yehe ñamaní nuú na cúu cuéntá mí i ña ná cacomí na quimi cáhnu, rí quéta tá ñatívi. ²⁹ Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu.”

3

Carta cuahan nuú na cúu cuéntá Jesús ndúu ñuu Sardis

¹ Cahyún inga tucu carta cuhun nuú da cómí cuéntá sahá na cúu cuéntá mí i ndúu ñuu Sardis ta já cachún já xihín dá: “Ña yóho quea cáhí Jesús, mé a ñúhu ínimá yíi Ndióxi ini, ña cúu ndíhusa yuhú nuu ínimá yíi mé á. Ta mé á cómí a ndíhusa quimi ta ña yóho quea cáhí a xihín ndó, na ñuu Sardis jan: Xíni vaha i tóco ndihi ña cája ndó. Ta sa xíni vaha i ña cáhan ñayivi ña cája ndó tátuhun ñayivi tácu vatí mé a ndaa cúu ndó tátuhun ndíi. ² Xíni ñúhú ndícaxi vaha ini ndó ta a jándacoo ndó ña vaha cája ndó jan jáchi jalóho cúní ndihi sahá. Sándehé vaha i ña co cája ndó ña ndaa nu Ndióxi, tátá i. ³ Xíni ñúhú ndicuhun ini ndó ña ñacatiahva ndó cuéntá mí i ta a jándacoo ndó caja ndó ña. Ta xíni ñúhú ndicó coo ndó nu Ndióxi ta ndicaxí vaha ini ndó. Á tá coo ta jonáa cuití xínu coo i nu ndo já caja vii i saha ndo. Mé quiví co cáhan ndo xínu coo i nu ndo tá quiahva jonáa xínu da cuíhná. ⁴ Joo mé a ndaa ndúu java ndó mé Sardis jan, na coo ñacaja quini mé xihín cuachi. Sahá ña cán quea cuu candixi na jahmá yaa ta já cuu caca tuun na xihín i jáchi íin sahá caja na já. ⁵ Jáchi ndá na ná quee vaha nuú ña núu ñuyiví yóho já quea candixi na jahmá yaa. Ta a jándoo i quiví ná nu libro, mé nu ndaa

quiví tóco ndihi na catacu anda ama cáa quiví. Ta nu Ndióxi, tátá i xihín nu tátó mé á cáhan cáxi i ña jivi ndusa cúu ná cuéntá mí i. ⁶ Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu.”

Carta cuahan nuú na cúu cuéntá Jesús ndúu ñuu Filadelfia

⁷ Cahyún inga tucu carta cuhun nuú da cómí cuéntá sahá na cúu cuéntá mí i ndúu ñuu Filadelfia ta já cachún já xihín dá: “Ña yóho quea cáhí Jesús, mé á cúu ña yíi ndivaha ta cúu á ña ndaa. Ta nu mé á íin yaví, ña nasacomí rey David. Ta tá súná mé á in yéhe ni in na a cuú chicaji ña. Ta tá chicaji mé á in yéhe ni in na a cuú cuná ña. Ta ña yóho quea cáhí a xihín ndó, na ndúu ñuu Filadelfia jan: ⁸ Xíni vaha i tóco ndihi ña cája ndó. Nasuná i yéhe nu ndo ta ni in túhún na a cuú chicaji ña. Ta cándaa vaha ini i ña cája tá cája ndó ña nasahnda i nu ndo caja ndó vatí coo cuaha ndée ndó. Ta co chíjehé tuhun ndó ña xíni ndó yehe. ⁹ Candehé ndo ña caja i xihín na tuhún, na cája cáhnu Satanás, mé tiñahá sacuaha sahá ña cáhí na cúu ná na Israel joo a juú toho na. Caja i ña ná caxítí na nu ndo já ná ndicuni na ña mé a ndaa quíhvi ini i ndohó. ¹⁰ Coo najándacoo ndó cája ndó ña nasahnda i nu ndo caja ndó ta nasahan ndeé ini ndó sahá ña cán quea chindeé vi ndohó ná a ndóho toho ndó ña núu vaxi jatá ñayivi ñuyiví yóho. Jáchi tá ná cayati mé hora já casahá coto ndojó i tóco ndihi ñayivi ndúu ñuyiví. ¹¹ Yachi saa i nu ndo. Ta coto a jándacoo ndó ña cándeé ini ndó yehe já quea ná a ndíquiahva i nuú inga na ña sácú vaha i quiahva i nu mé ndó. ¹² Ta ndá na ná quee vaha nu tóco ndihi ña núu ñuyiví yóho, ndaja i na cán ná cacuu na tátuhun jihin, dó cúu ndee veñuhu Ndióxi, tátá i. Ta cán canduu na anda ama cáa quiví. Ta jata mé ná cahyí i quiví Ndióxi, tátá i. Ta sa mé yóho cahyí i quiví ñuu nu íin Ndióxi. Mé ñuu yóho cúu á inga Jerusalén, ña saá, ña vaxi chí indiví nu íin Ndióxi. Ta jivi jata mé ná cahyí i inga quiví saá i. ¹³ Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu.”

Carta cuahān nuú na cúu cuéntá Jesús ndúu ñuu Laodicea

14' Cahyún inga tucu carta cūhun nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho queá cáhí Jesús, mé a cúu ña ndaa. Mé a cáhan ña ndaa sahá ña naxini a xihín nuu á ta sahan tuhun a sahá. Ta mé á cúu á ña nacavaha tóco ndihi ñaha, ña sácú ini Ndióxi coo. Ta ña yóho queá cáhí a xihín ndó, na ñuu Laodicea: 15 Xíni vaha i tóco ndihi ña cája ndó. Ta xíni vaha i ña mé ndó co cúu ndó tátuhun in ñaha ihní ndinuhu. Ta ni co cúu ndó tátuhun in ñaha vixi ndinuhu jáchi co cája cáhnu ndó yehe xihín ndinuhu ini ndó. Vaha ná ndinuhu ña vixi ná cacuu ndó á tá ndinuhu ña ihní ná cacuu ndó. 16 Joo mé ndó ín java uun ndó jáchi in ivi ndácaan ínima ndo ta sahá ña cán queá tavá xoo i ndohó nuú i. 17 Jáchi mé ndó cáhí ndo ña cúu ndó na cuicá ndivaha. Ta cáhí ndo ña vaha ndivaha quehe ndó jáchi ñehe cuaha ndó jjuhún. Ta cáhí ndo ña ni in ñaha co ndímaní nu ndo. Joo mé ndó cúu ndó tátuhun na cuaá ndáhvi ndivaha jáchi a ñaha cuni ndó ña co ñehe táhvi ndó nu Ndióxi. Cúu ndó na ndáhvi ndivaha ta cúu ndó tátuhun na cuaá xíca lahla. 18 Sahá ña cán queá cúní jácahan i ndohó ña ná quixi ndó nuú i cueen ndó jjuhun cuaán nuú i ña sa naxito ndojó na nu ñúhu ita ta já queá ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cachi nuú i candixi ndó já ná chijahví ndó mé ndó jáchi cacahan nuu ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú núu ndo já queá ná cuu candehé vaha ndó. 19 Jáchi jánani i tóco ndihi ñayivi, na quíhvi ini i ta jándoho i ini na ña ná caja vaha na. Sahá ña cán queá xihín ndinuhu ini ndó ndítahan ndicó coo ini ndó caja ndó ña cúní Ndióxi. 20 Candehé ndo. Yehe cúu u tátuhun in da cándichi cáni ndáha yéhe vehe ndó ta cána i ndohó. Ta ndá na xíni johu nu cáhan i ta súná na yéhe vehe na nuú i já quíhvi i vehe na ta cajíni i xihín ná ta mé ná cajíni na xihín i. 21 Ta ndá na ná quee vaha nu tóco ndihi ña núu ñuyiví yóho, caja i ña ná cuu cacoo na xihín i indiví nuú cacomí i cuéntá saha ná indiví. Jáchi quiahva já

naquee vaha i nuú ña núu ta viti ín coo i xihín Ndióxi, tátá i nu ín coo mé á sáhdá chuun indiví. 22 Cuni johu vaha ndó, na vaha johu ña cáhan ínima yíi Ndióxi xihín na cúu cuéntá mí i, na táca veñuhu” —nacachi a.

4

Tá cája cáhnu na Ndióxi indiví

1 Tá sa nayaha tóco ndihi ña yóho já naxini i núná in yéhe indiví. Ta mé a naxini johu i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná naha i nuun ndá queá coo chága chí nuu —já nacachi a já xihín i.

2 Chí mé hora já nandeta nuu ínima yíi Ndióxi ini i. Já naxini i mé indiví cán in nu sácoo rey ta ín coo in a cán. 3 Ta mé a ín coo cán nasayéhe nuu á tátuhun yehe in yuu naní jaspe xihín yuu naní cornalina. Ta naxini i nacava nuu in coyánquí nu ín coo a. Ta mé coyánquí cán yehe ri tá quiahva yehe yuu cuí naní esmeralda. 4 Ta nu ín coo mé a cán naxini i nacava tiyivi inga oco comi táyi vaha nu sácoo na cómi chuun. Ta naxini i oco comi na sacuaaha, in in na ín coo nuú in in táyi vaha cán. Ta ndíhoco comi mé na sacuaaha cán ndíxi na jahmá yaa cachi. Ta cándójó in tiyivi jjuhun cuaán jini in in na cán. 5 Ta naxini i ña quéta tasa nu ín coo mé a cán. Ta sa mé cán cáhndi tátuhun tá cána javi ta yati mé cán cáyi usa ití xihín ñuhú ita. Ta ña yóho cúu á ndíhusa yuhú nuu ínima yíi Ndióxi. 6 Ta yati mé cán naxini i in ñaha ta náha tátuhun in tañuhú, ña yehe tátuhun in yutátá.

Ta yati jín nu ín coo a cán nacava tiyivi comi ña tácu. Ta chí a juú quiahva cuaha nduchú núu a chí nuu á ta chí jatá. 7 Ta in táhan mé ña tácu cán, ña nu cuítí cán cáa tá quiahva cáa in león. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cúní coo a tá quiahva cúní coo nuú ñayivi. Ta ña comi cán cáa tá quiahva cáa in tiyaha tá ndáchí ri. 8 Ta in in mé ña tácu yóho nasahin iñu ndixi a. Ta nuu á ta jatá nachutú ndaa ña xihín nducú núu. Ta ni ñuu ta ni ndiví co jándacoo ndícomi ña cán cáhan já cáhí a já:

Yii ndivaha cúu mé ndó, Ndióxi, xitoho nde.

Ta cuu caja ndó tóco ndihi ñaha.

Mé ndó sa já íin va ndó tá ñacava sahá saha ñuyívi.

Ta sa já íin ndó viti ta já coo tá coo ndó anda ama cáa quivi —ñacachi ndícomi ña tácu cán.

⁹ Ta tá cáhan mé ña tácu cán já cája cáhnu a Ndióxi ta ndíquiahva ndixahvi nu mé a íin coo nu sácoo rey, mé a tácu anda ama cáa quivi. Ta tá cáhan mé ña tácu cán ¹⁰ já ndíaxítí ndíhoco comi na sacuahá cán cája cáhnu na Ndióxi, mé a tácu anda ama cáa quivi. Ta já tíin na tiyivi cándójo jini na jáxinu na ña nu íin coo Ndióxi cán ta já cáchi na já:

¹¹ Ndióxi maní nde, cúu ndó xitoho nde ta ndítahan nuú nde caja cáhnu nde ndohó jáchi mé ndó ndítahan ndicáhnu ndivaha.

Íin ndée ndo caja ndó tóco ndihi ñaha ta ndítahan caja cáhnu nde ndohó.

Jáchi ñacavaha ndó tóco ndihi ñaha, ta ndúu ndihi ñaha jáchi cúni mé ndó ña ná canduu a.

Ta ndúu a jáchi cúni mé ndó cavaha ndó ña, já ñacachi ndíhoco comi na sacuahá cán cája cáhnu na Ndióxi.

5

Tá naxini Juan in libro xihín in ndicachi

¹ Tá nandihí já naxini i in libro indivi ini ndáha cuáha mé a íin coo nu sácoo rey. Ta mé libro cán cúu á tutu ñatívi tuun a ta ñachyi ndívi xoo nu á. Ta ndájí tuun a xihín usa sello. ² Ta já naxini i in táto Ndióxi, ña íin ndivaha ndée a. Ta naxini johó i cáhan cóhó a ta ndáca tuhún a já cáchi a já:

—Ndá na cúu na íin saha cahnda ndíhusa sello yóho já ná cuná na mé libro ña ñatívi tuun cán —ñacachi mé táto Ndióxi cán.

³ Joo cóo ñañehe ná ni in na íin saha cahnda ndíhusa sello cán. Ni indivi ni ñuyívi ni nu ndúu na naxihí cóo nandíñehe ná ni in na cuu cahnda ndíhusa sello cán ña ná candehé na ña ndáa nu mé libro cán. ⁴ Ta já ñacasáhá sácu ndivaha i jáchi cóo nandíñehe ná ni in tuhún na íin saha cahnda ndíhusa sello cán ña candehé na ini

mé libro cán cahvi na ña ndáa nu á. ⁵ Joo in táhan na sacuahá cán ñacachi a já xihín i:

—A cuácu gaún jáchi Jesús, mé á cúu tátuhun león, ña ñaquixi chichi Judá ta ñaquixi a chichi rey David, mé a cán ñaquee vaha ta ñasahnu a nu tóco ndihi ña núu ñuyívi. Sahá ña cán quéa cuu cahnda ndíhusa sello ta já cuná mé á libro cán —ñacachi a xihín i.

⁶ Ta naxini i cándichi Jesús, mé á cúu tátuhun ndicachi loho tañu na sacuahá ta tañu ndícomi ña tácu cán. Ta mé a cúu tátuhun ndicachi loho cán cándichi a nu sácoo rey ta náha xicá ña najándicuehe na mé á tá ñasahní ñahá na. Ta naxini i íin usa ndíqui a xihín usa nduchú núu a. Ta ña yóho cúu á ndíhusa yuhú nuu íinima yii Ndióxi, ña ñachindahá mé á níi cúu sahá ñuyívi. ⁷ Ta mé á cúu tátuhun ndicachi loho cán naxinu a ta ñatiin a mé libro cán ndahá cuáha mé á íin coo nu sácoo rey.

⁸ Ta tá ñatiin a mé libro ña ñatívi tuun cán já nandíca xítí ndícomi ña tácu cán xihín ndíhoco comi na sacuahá cán nu mé a cúu tátuhun ndicachi loho cán. Ta tóco ndihi na cán cáñee arpa ndáha ná jácaha na. Ta cáñee cóho chíñíhmá, ña jjuhun cuáan ndáha ná ta ñachutú ndáa ña xihín jusa támi sahan. Ta ña cán cúu yuhú nuu tuhun ña xicá tahvi na cúu cuéntá Ndióxi nu á. ⁹ Ta xihín ña saá xíta na cája cáhnu na mé á já cáchi na já:

Nu mé ndó cáni ndiquehe ndó mé libro ñan ta cahnda ndó sello ña ná cuná ndó ña.

Jáchi mé ndó naxihí ndó ñacaja ñayivi.

Ta tá naxita nii ndo já ñaxeen ndó ñayivi ná cacuu na cuéntá Ndióxi.

Ta mé ndó ñachahvi ndó sahá na ñaquixi ndijáa chichi xihín na cáhan tá nuú tuhun xihín na ndúu ndijáa ñuu xihín ndijáa nación.

¹⁰ Ta mé ndó ñandaja ndó ñayivi yóho cacuu na tátuhun jutú já ná caja cáhnu na Ndióxi.

Ta mé na cán cacomí na cuéntá sahá ñayívi ndúu ñuyívi, cáchi na cája cáhnu na mé a cúu tátuhun ndicachi loho cán.

¹¹ Tá nandihí já ñasandehé tucu u. Anda já naxini johó i cáhan cuhá ndivaha millón táto Ndióxi cája cáhnu na mé á íin coo nu sácoo rey. Ñacava tiyivi na ndúu na jatá

ndícomi mé ña tácu cán xihín jatá ndíhoco comi na sacuahá cán. ¹² Ta já cáhan cóhó tóco ndihi mé táto Ndióxi cán já cáchí ña já: Mé Jesús, mé a cúu tátuhun ndicachi loho, rí naxihi nacaja ñayivi, íin sahá caja tóco ndihi ñaha xihín ndée á.

Ta íin sahá ndiquehe a tóco ndihi ña cuíca ta íin sahá ndiquehe ndihi a ña ndichí ta íin sahá ndiquehe a tóco ndihi ndée.

Ta íin sahá ña ná ndiñehe jícó ñayivi mé á. Ta íin sahá caja cáhnu na mé á ta íin sahá ña ná cata na nu mé á, cáchí tóco ndihi na cán caja cáhnu na mé á.

¹³ Ta quiahva já naxini johó rí cáhan tóco ndihi ñaha ña nacavaha Ndióxi ndúu indivi xihín ña ndúu ñuyíví xihín ña ndúu tixi ñundáhyi ta xihín ña ñúhu ini tañuhú. Tóco ndihi ña nacavaha Ndióxi yóho cája cáhnu a mé á ta já cáchí a já:

Ná ndicáhnu ndivaha Ndióxi, mé á íin coo nu sácoo rey.

Ta ná ndicáhnu ndivaha Jesús, mé á cúu tátuhun ndicachi loho.

Ná caja cáhnu í mé á ta ná ndiñehe jícó ñayivi mé á jáchí mé á queá íin ndée caja tóco ndihi ñaha.

Ná caja cáhnu yó mé á anda ama cáa quivi, já cáchí tóco ndihi na cán.

¹⁴ Já nanducú ñehe ndícomi mé ña tácu cán tūhun já cáchí a já:

—Já ná coo.

Ta tá nacachi a ña yóho já nacaxítí ndíhoco comi na sacuahá cán cája cáhnu na Ndióxi, mé á tácu anda ama cáa quivi.

6

Tá nasahnda Jesucristo ndíhusa sello

¹ Tá nandihí já naxini í nasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihí já naxini johó í cáhan in táhan ndícomi mé ña tácu cán xihín í ta tachí yúhu a cúu á tátuhun tá cána javi. Ta já nacachi a já xihín í:

—Naha quí, candehún yóho —nacachi a xihín í.

² Anda já nasandehé e ta já naxini í in cuáyí cúxú ta naxini í cánúu in dataa jata rí. Ta ndáha da cán naxini í cáñee in arco. Ta naxini í ña ñañehe dá in tiyivi cánúu jini

dá. Ta cájii íní da naqueta da jáchí cúu dá da sa ñaquee vaha ta ñeñe táhvi dá quee vaha tucu da.

³ Ta anda já naxini í nasahnda Jesús, mé a cúu tátuhun ndicachi loho cán inga sello, ña cáhivi cán. Já naxini johó í ña nacahan inga tucu táhan ndícomi mé a tácu cán xihín í. Já cáchí a já xihín í:

—Naha quí, candehún yóho —nacachi a xihín í.

⁴ Ta já naxini í naqueta inga cuáyí ta cúu rí rí cuáhá. Ta mé da cánúu jata rí cán ñañeñe táhvi dá jácani táhan da ñayivi ndúu ñuyíví. Ta ñañeñe táhvi dá caja da ña ná cahní ndaja táhan mé ñayivi ndúu ñuyíví. Ta naxini í ñañeñe dá in yuchú cáni ña cáhnu cáñee a ndáha dá.

⁵ Ta tá nasahnda Jesús, mé a cúu tátuhun ndicachi loho inga sello, ña cáhuni já naxini johó í nacahan mé ña tácu, ña cáhuni cán xihín í já nacachi a já:

—Naha quí, candehún yóho —nacachi a xihín í.

Ta tá nasandehé e já naxini í in cuáyí ndáhyí tuun ta já naxini í ña cáñee in ña sácuíta ñaha ndáha mé da cánúu jata rí cán.

⁶ Ta tañu ndícomi mé ña tácu cán naxini johó í cáhan in a ta já cáchí a já:

—Ndiví yaa xíní ñúhú caja chúun í já cuu cueén in túhún laá kilo trigo. Ta in quivi níí xíní ñúhú caja chúun í já cuu cueén uní kilo cebada. Joo a quiahva ndó ñamaní ña ná tiví sítí xihín vino —nacachi a.

⁷ Ta tá nasahnda Jesús, mé a cúu tátuhun ndicachi loho inga sello, ña cácomi cán já naxini johó í nacahan mé ña tácu, ña cácomi cán xihín í já nacachi a já:

—Naha quí, candehún yóho —nacachi a xihín í.

⁸ Ta tá nasandehé e já naxini í in cuáyí cuáán johó. Ta da cánúu jata rí cája ña ná quivi ñayivi. Ta jata mé da cán naxini í ndíco da sáhdá chuun sahá nu ndúu ndii. Ta ñañeñe táhvi ndíví da cavaha da tondóhó ñuyíví já ná caja da ña ná cahní táhan cuahá ndivaha ñayivi ndúu ñuyíví. Ta jári nasahní da na xihín tama ndeé ta xihín cuehe ta xihín ndijáá quití yúcu ndúu ñuyíví janda quiahva naxihí in táhdá nuú comi táhdá ñayivi ndúu níí cúu saha ñuyíví.

⁹ Ta tá nasahnda Jesús, mé a cúu tátuhun ndicachi loho cán inga sello, ña cáhuhun já naxini i in nu náa ta tixi mé cán ndúu ínima ñayivi, na naxihí sahá ña naçaxi tuhun na tuhun Ndióxi nuú ñayivi xihín ndinuhu ini na. ¹⁰ Ta cáyuhú cóhó na já cáchí na já:

—Tátá Ndióxi, mé ndó cúu ndó ña yii ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa chá quiví caja vii ndó sahá ñayivi ndúu ñuyíví. Ta já caja ndó ña ná चाहvi na sahá ña naçaja na nasahní na ndehe —cáchí na ndúu tixi náa cán.

¹¹ Anda já nañehe ná jahmá yaa candixi na ta natahnda chuun nu ná ña ná candati tóo chága na janda quiahva ná xinú coo nuú java ga na cúu cuéntá Jesús quivi na caja ñayivi ñuyíví sahá ña cája chúun na cuéntá Jesucristo. Ta janda quiahva ná quivi ndihi na yóho já cavií sahá ñayivi naçaja quini xihín ná.

¹² Tá nandihí já naxini i nasahnda Jesús, mé a cúu tátuhun ndicachi loho inga sello, ña cáhiñu cán. Já naxini i nataan ndivaha ta naxini i nanduu tuún candii tátuhun in jáhma tuún sá ndíxi na ndúu ndií. Ta níi cúu yoo naxinu cuahá níi rí. ¹³ Ta ndijáa quimi naquee rí indiví ta nacuyu rí nu ñúhu. Cúu á tátuhun tá quíji nihni tachí ndeé ndivaha titó ñúhu ta já cuyu cuihi, rí cuij nu ñúhu. ¹⁴ Nandihí sahá indiví ta nandacoo vaha ña tátuhun tá ndítivi in yívi ña co xíní ñúhu ga na. Ta tóco ndihi yúcu xihín tóco ndihi isla mahñú tañuhú nandijama ndihi ña ta co ndúu ga ña nuú nasanduu a. ¹⁵ Ta tóco ndihi na cómí cuéntá sahá ñuyíví nandacoo jehé na tañu cáva. Ta nachihé na tañu tóto chí yúcu cuahan na. Ta cán nachihé na rí na sáhdá chuun nu soldado xihín tóco ndihi na cuicá xihín tóco ndihi na ín ndéé cája ña náhnu ñuyíví yóho. Ta jári tóco ndihi na cómí in xitoho cuéntá sahá xihín tóco ndihi na xíca núná mé nandacoo jehé na tañu cáva xihín tañu tóto cán. ¹⁶ Ta cáchí na cáhan na xihín yúcu ta cáhan na xihín cáva ña ná cuyu a jata ná ta ná chihé a na ña ná a cuni mé a ín coo nu sácoo rey cán na. Ta yíhví na Jesús, mé á cúu tátuhun ndicachi loho cán jáchí sa naxojo ini a ta vaxi a jándihí a sahá ná. ¹⁷ Jáchí sa naxinu coo quiví jándoho mé á ini na ta ni in na co ndéé ini.

7

Ndiçaxi Ndióxi in táhdá na Israel

¹ Tá sa nayaha tóco ndihi ña yóho já naxini i ndíta comi táto Ndióxi ndícomi xoo nu quíxi tachí nu ndícomi xoo níi cúu saha ñuyíví. Ta tiiin a tachí já ná a cuicó ga tachí jatá ñuyíví ta ná a cuicó ga tachí nuú tañuhú ta ni nuú ni in yíto. ² Ta já naxini i naquixi inga táto Ndióxi xoo nu quéta candii. Ta mé táto Ndióxi yóho naxini i ñehe a sello Ndióxi, mé á tácu indiví. Ta já naxini johó i naçayuhú mé táto Ndióxi yóho nuú ndícomi java ga táto Ndióxi, mé na nañehe táhvi caja ña núu xihín ñuyíví ta xihín tañuhú viti ta já naçachi a já xihín ná:

³ —Candati ndó. A cája núu ndó xihín ñuyíví ta ni xihín tañuhú ta ni xihín ni in yíto. Jáchí jihna ñúhu xíní ñúhu cacú in sello taan na cúu cuéntá Ndióxi, mé a cája cáhnu mí —naçachi a.

⁴ Ta naxini johó i cáhan in a ndaja cúu ñayivi nanani sello yóho taan na. Cúu ná in ciento ivi jico comi mil ñayivi Israel ta cúu ná na naquixi ndíhuxu ivi chichi na Israel. ⁵ In táhdá cúu uxu ivi mil na naquixi chichi Judá ta nanani sello taan na cán. Ta inga uxu ivi mil na naquixi chichi Rubén naquehe sello taan na. Ta quiahva já naquihvi ri sello taan uxu ivi mil na naquixi chichi Gad ⁶ xihín uxu ivi mil na naquixi chichi Aser xihín uxu ivi mil na naquixi chichi Neftalí xihín uxu ivi mil na naquixi chichi Manasés ⁷ xihín uxu ivi mil na naquixi chichi Simeón xihín uxu ivi mil na naquixi chichi Leví xihín uxu ivi mil na naquixi chichi Isacar ⁸ xihín uxu ivi mil na naquixi chichi Zabulón xihín uxu ivi mil na naquixi chichi José xihín uxu ivi mil na naquixi chichi Bejamín nanani sello taan na.

Tá naxini Juan cuahá ndivaha ñayivi ndíxi jahmá yaa

⁹ Tá nandihí já nasandehé e já naxini i cuahá ndivaha ñayivi. Ta ni in na a cuú cahvi ñahá sahá ña cuaha cúu ná. Ta cúu ná na naquixi ndijáa chichi ñayivi ndúu ñuyíví. Ta cúu ná na cáhan tá nuú tuhun. Ta cúu ná na ndúu ndijáa ñuu xihín ndijáa nación ñuyíví. Ta naxini i ndíta na nu Ndióxi, mé a ín coo nu sácoo rey. Ta ndíta

na nu Jesús, mé a cúu tátuhun ndicachi loho cán. Ta tóco ndihi na ndíxi na jahmá yaa cachi ta cáñee ñuu ndáha ná. ¹⁰ Ta tóco ndihi na cáyuhú cóhó na já cáchí na já:

Ndióxi, mé a íin coo nu sácoo rey xihin Jesús,
mé a cúu tátuhun ndicachi loho cán najácau a mí, cáchí na.

¹¹ Ta naxini i ndíta tóco ndihi tátō Ndióxi cája cáhnu na mé á íin coo nu sácoo rey. Ta nacava tiyivi na ndúu na jatá na sacuaḥa cán xihín jatá ndícomi mé ña tácu cán. Ta já nacaxítí tóco ndihi na janda quiahva nacani ndaa taan na nu ñúhu ta já nacasáhá na cája cáhnu na Ndióxi. ¹² Já cáchí na já:

Já ná coo. Cája cáhnu nde ndohó ta ndíñehe jíc nde quivi mé ndó.

Jáchi ndíchí ndivaha jini ndo ta ndiquiahva nde ndixahvi nu ndo.

Ta ndítahan coo toní ñúhú nde xihin ndo jáchi mé ndó cúu ndó ña íin ndée cája tóco ndihi ñaha.

Ta já ná coo tóco ndihi ña yóho nu mé ndó anda ama cáa quivi. Já ná coo, nacachi na cán cája cáhnu na Ndióxi.

¹³ Anda já naxinu in táhan na sacuaḥa cán nuú i já nandaca tuhún na yehe já nacachi na já xihín i:

—Á co xínun ndá na cúu na ndíxi jahmá yaa yóho ta ndá naquixi na —nacachi na xihín i.

¹⁴ Já nanducú ñehe e tuhun nu ná já nacachi i já xihin ná:

—Yehe co xini toho i joo mé ndó sa xini vaha ndó ndá na cúu ñayivi yóho —nacachi i xihin ná.

Ta já nacachi na já xihin i:

—Na ndíxi jahmá yaa yóho cúu ná na nayaha nuú cuahá ndivaha tondóhó mé quivi tá nandoho ndivaha ini na. Ta viti sa nandoo cuachi na xihín nii Jesús, mé a cúu tátuhun ndicachi loho. ¹⁵ Sahá ña cán quea ndíta na nu Ndióxi, mé á íin coo nu sácoo rey. Ta ñuú ta ndivi cája ndívi na nu mé á ini veñuhu a. Ta mé Ndióxi, mé a íin coo nu sácoo rey cán ndáa vaha mé á na jáchi íin tuun a xihin ná. ¹⁶ Ta coó ga joco quixi nu ná ta ni a íchi ga ini na ticuii ta ni a cáyi ga na cája candii ta ni a ndíhi ga ini na sahá ña ihní. ¹⁷ Jáchi Jesús, mé

a cúu tátuhun ndicachi loho cán ndácaan mahnú nu sácoo rey cán ta candaa mé á na tá quiahva ndáa in pastó ndicachi jana dá. Ta candaca mé á na cuhun na nu cána ticuii, dó cája ña ná catacu na anda ama cáa quivi. Ta yacó Ndióxi ticuii nuú tóco ndihi na sácu —nacachi na sacuaḥa cán xihín i.

8

Tá nasahnda Jesús, mé a cúu tátuhun ndicachi loho cán inga sello, ña cáhusa

¹ Tá nasahnda Jesús, mé a cúu tátuhun ndicachi loho cán inga sello, ña cáhusa já nacatáji ní tóco ndihi ñaha indivi tátuhun tixi java hora. ² Tá nandihí já naxini i ndíta usa tátō Ndióxi nu á. Ta in in mé tátō Ndióxi cán nañehe ná in in trompeta. ³ Já naxinu inga tátō Ndióxi candichi a nu náa ña íin yati nu íin coo Ndióxi nu sácoo rey cán. Ta cáñee in cohó chíñíhmá ndáha á, ña jiuḥun cuáán. Ta nañehe á cuahá ndivaha jusa, ña joco a ña nu náa, ña nacavaḥa xihin jiuḥun cuáán. Ta quiahva já joco ri a nu náa cán ña xica tahvi na cúu cuéntá Jesús nu Ndióxi. ⁴ Ta mé ñihma nacana nuú cohó chíñíhmá cáñee ndáha tátō Ndióxi cán nandindita cuahan nu Ndióxi tá quiahva ndíndita ña xica tahvi na cúu cuéntá mé á nu á. ⁵ Anda já natiin tátō Ndióxi cán cohó chíñíhmá ta já najácutú a ña xihin tití ñúhu, ña naquehe a nu náa cán. Ta já nacuihna ña jatá ñuyívi. Anda já nacasáhá cáhndi tátuhun tá cána javi. Ta jandá johó xójo cúu ta cána tasa ta naquixi in ndítáan ndeé ndivaha jatá ñuyívi.

Tá nativi ndíhusa tátō Ndióxi trompeta

⁶ Tá nandihí já nasacanduu tiaḥva ndíhusa tátō Ndióxi tiví na trompeta ña cáñee ndáha na.

⁷ Ta in táhan ndíhusa tátō Ndióxi cán nacasáhá nativi a mé trompeta cán. Ta já nacuyu ñúhu cáyi xihin níi ña nacava táhan xihin nii jatá ñuyívi. Ta chí nacayi in táhndá nuú uní táhndá ñuyívi yóho ta jári naquihvi ñúhu in táhndá nuú uní táhndá yító ndíta yucu ta jári yucu cuí nacayi ndihí a.

⁸ Tá nandihí já nativi tátō Ndióxi ña cáhivi cán inga trompeta. Ta naxini i najani tátuhun in yucu cándaha xihin ñúhu cuahan ndicava nuú tañuhú. Ta in táhndá nuú uní

táhn^{da} tañuhú cán nanduu dó nⁱⁱ. ⁹ Ta in táhn^{da} nuú unⁱ táhn^{da} tóco ndi^{hi} ñaha ñúhu ini tañuhú naxi^{hi} a. Ta quiahva já nandi^{hi} saha in táhn^{da} nuú unⁱ táhn^{da} barco nasandoj^o nuú tañuhú cán.

¹⁰ Ta táto Ndióxi ña cáhunⁱ cán nativⁱ a inga trompeta ta já naxini i naquee in quimi cáhnu cándaha xihⁱⁿ ñúhu ita vaxi rí ndícava rí ñuyívⁱ. Naquee rí indivⁱ ta nandicava rí nu ñúhu nuú in táhn^{da} nuú unⁱ táhn^{da} yuta xihⁱⁿ chico^{ho} nu cána ticu^í. ¹¹ Ta mé quimi cán naní rí ña ova. Ta ñajaja rí ña ñacahova in táhn^{da} nuú unⁱ táhn^{da} ticu^í. Ta naxi^{hi} cuahá ndivaha ñayivi tá naxi^{hi} na dó ova cán.

¹² Tá nandi^{hi} já nativⁱ táto Ndióxi ña cácomⁱ cán inga trompeta já nanaá in táhn^{da} nuú unⁱ táhn^{da} nuú candii cán. Ta quiahva já ñajaja rí a xihⁱⁿ yoo ta xihⁱⁿ quimi. Saha ña cán queá co^o ñacuu tuun vaha candii xihⁱⁿ yoo xihⁱⁿ quimi cán. Ña cán queá ñacamaní tátuhun in táhn^{da} nuú unⁱ táhn^{da} tuun candii cán jatá ñuyívⁱ. Ta quiahva já ñacamaní tuun yoo xihⁱⁿ quimi ñuú.

¹³ Tá nandi^{hi} já nasandehé e ta já naxini joh^o i cati ndixi in táto Ndióxi ndáchⁱ a mahñú indivⁱ. Ta cáyuhú cóh^o a já cáchⁱ a já:

—Ay, ay, ay ndáhvⁱ nahá ñacuu ñayivi ndúu ñuyívⁱ jáchi ndajⁱ ndoho ini na tá ná tivⁱ unⁱ ga táto Ndióxi trompeta —cáchⁱ a.

9

¹ Tá nandi^{hi} já naxini i nativⁱ táto Ndióxi ña cáhunⁱ cán inga trompeta. Ta naxini i naquee in quimi indivⁱ ta nandicava rí jatá ñuyívⁱ. Ta ñañehe táhvⁱ rí cacomⁱ rí yávⁱ ña cuu cuná rⁱ yávⁱ cuná ndivaha, ña co xinu nu ndi^{hi} nuu. ² Ta mé quimi nasuná rⁱ yuyéhé mé yávⁱ cuná já nandindita ñihma tátuhun ña ndíndita yúhu horno cáyⁱ. Ta mé ñihma ñacana cán najánaá nuú candii xihⁱⁿ nuú tachⁱ viti. ³ Ta tañu ñihma cán ñaqueta cuahá ndivaha tica, rí nandicuita nuu ní cúu ñuyívⁱ. Ta ñañehe táhvⁱ rí cacuu rí rí cuehe tá quiahva cuehe líhma. ⁴ Ta ñatahnda chuun nu rí ña ná a jándi^{hi} toho rí sahá yucu ni sahá ñaha cuⁱ ni sahá yitó cuⁱ ñuyívⁱ yóho. Jáchi ñatahnda chuun nu rí ña ná tiin rí ñayivi cuití va, na co cándaa

marca Ndióxi taan. ⁵ Joo co^o ñañehe rí ñamaní cahní rí na. Ña ñajaja rí xihⁱⁿ ná queá ná tiin rí na ña ná cahma na tixi uhun yoo. Ta tá quiahva cáhma na tá tiin líhma na quiahva já cáhma na tiin rí na. ⁶ Mé quivi já nducú ñayivi quivi vaha na joo a cúu quivi na. Vatí cúni quivi na joo a cúu quivi na.

⁷ Mé tica tiin ñahá cán ndáa rí tá quiahva ndáa cuáyⁱ, rí ndúu tiahva cahun caní táhan. Ta tá quiahva cúni coo tⁱyivi, ña jiu^{hun} cuáán sándoj^o jⁱni rey quiahva já cúni coo ña cándoj^o jⁱni rí cán. Ta tá quiahva cúni coo nuú ñayivi quiahva já cúni coo nuu rⁱ. ⁸ Ta tá quiahva iin ijⁱ jⁱni najihí quiahva já iin ijⁱ jⁱni rⁱ. Ta tá quiahva ndáa nuhu león quiahva já ndáa nuhu rí. ⁹ Ta jáhvⁱ yicá ndicá mé tica cán xihⁱⁿ jahmá caa, ña sándixi soldado cáni táhan na. Ta tá cáhma cati ndixi rⁱ cúu á tátuhun tá cati saha cuaha cuáyⁱ tá ñúhu rí carreta xinu rí cuahan rí caní táhan rí. ¹⁰ Ta iin iñu ndóho rⁱ ña tiin tátuhun ndohó líhma. Ta xihⁱⁿ ña cán ñañehe táhvⁱ rí tiin rí ñayivi ña ná cahma na tixi uhun yoo. ¹¹ Ta mé da cómi cuéntá saha mé tica cán naní da Abadón tuhun hebreo ta naní da Apolión tuhun griego. Ta quivi dá cúni cachⁱ a da jándi^{hi} saha tóco ndi^{hi} ñaha. Ta da cán cúu da cómi cuéntá saha yávⁱ, ña co xinu nu ndi^{hi} nuu cán.

¹² Sa ñayaha in tondóh^o cáhnu joo cámanⁱ ivi chága ña quixi.

¹³ Tá nandi^{hi} já nativⁱ táto Ndióxi ña cáhñu cán inga trompeta ta já naxini joh^o i cáhan in a ñaqueta tañu ndícomⁱ ndíqui queta in in xoo tⁱto nu náa, ña jiu^{hun} cuáán, ña cándichi nu iin Ndióxi cán. ¹⁴ Ta já ñacachi mé a cán já xihⁱⁿ mé táto Ndióxi cáhñu, ña ñéhe trompeta cán:

—Janí ndícomⁱ táto ña ndíco yuhú yuta cáhnu naní Eufrates jan —ñacachi a.

¹⁵ Tá nandi^{hi} já naxini i najani ndícomⁱ táto nasandico cán ña ná cahní na in táhn^{da} nuú unⁱ táhn^{da} ñayivi ndúu ñuyívⁱ. Jáchi sa ñaquee jⁱni va na chuun ña caja na ña yóho. Ta sa xini na ndá hora ta ndá quivi ta ndá yoo ta ndá cuia caja na ña. ¹⁶ Ta naxini joh^o i cáhan in a ndaja cúu na soldado cándoj^o cuáyⁱ cuahan cán. Ta cúu ná ivi ciento millón soldado.

¹⁷ Ta cúni ndicani i nu ndo ndaja ndáa cuáyⁱ jana ná, rí naxini i cán. Naxini i

ña yóho tátuhun in sani joo co quiji toho i. Ta naxini i mé da cándójó cuayi cán naxijahvi da yicá ndicá da xihín in caa, ña cúu á color cuahá ñi xihín color ndihí ticayi xihín color cuáán ita. Ta ndáa jini cuayi tá quiahva ndáa jini león ta yuhu ri quéta ñuhu ita xihín ñihma xihín azufre. ¹⁸ Ta in táhndá nuú uni táhndá ñayivi naxihi na ñajaja uni nuú tondóhó ñaquixi jatá ñuyivi yóho. Naxihi na xihín ñuhu cáyi ta xihín ñihma ta xihín azufre, ña ñaqueta yuhú cuayi. ¹⁹ Jáchí yuhu mé cuayi cán xihín ndóho ri cúu nu ndácaan ndée ri. Tá quiahva ndáa coo quiahva já ndáa ndóho ri. Ta xihín mé yiquí jini coo cán cája quini ri xihín ñayivi.

²⁰ Tóco ndihi java ga ñayivi, na coo ñandihí saha xihín tondóhó ñaquixi jatá ñuyivi, na cán ñajaja yii va na ña núu ñajajaja na. Ta ñajaja cáhnu yii va na ña quini. Ta coo ñajándacoo na cája cáhnu na yoco, ña ñacavaha na xihín jiuhun cuáán ta xihín jiuhun cúxú ta xihín caa cuáán ta xihín yuu ta janda ña ñacavaha na xihín yito viti. Ta mé yoco yóho a cuú candehé a ta ni coo tácu joho a ta ni a cuú caca nuu a. Joo ñajaja cáhnu tá ñajaja cáhnu na ña. ²¹ Ta ni coo ñajándacoo na ña sáhní na ndii. Ta ni coo ñajándacoo na ña tají cája na. Ta ni coo ñajándacoo na ña ndúu na xihín na coo cúu yíi ná á ñájihí na. Ta ni coo ñajándacoo na ña cája cuíhna na.

10

Tá naxini Juan ña cáñee in libro loho ini ndáha inga táto Ndióxi

¹ Anda já naxini i inga táto Ndióxi, ña íin cuahá ndivaha ndée. Naxini a indivi ñaquee a vaxi a tañu in vico ta cánúu in coo yánqui jini á. Ta yéhe nuu á tá quiahva yéhe candii. Ta sahá cúu á tátuhun ivi jihin cándaha xihín ñuhu. ² Ta ini ndáha mé á naxini i cáñee in libro loho ña ñativí tátuhun yivi joo ñandindica ña. Ta ñachinúu mé á saha cuáha nuú tañuhú ta ñachinúu a saha íti a nu ñuhu. ³ Ta ñacayuhú cóhó a tátuhun tá ndáhyi león. Ta tá ñacayuhú a já naxini joho i ña ñacahan cóhó usa tasa tá ñacana ña. ⁴ Tá ñandihí ñacahan ndihusa tasa cán já ñanducú u

cahyi i ña ñacachi a joo naxini joho i cáhan in a ñaquixi chí indivi ta já cáhí a já xihín i:

—A cáhyún ña ñacachi ndihusa tasa ñacana jan. Xini ñuhú coo jehé a —ñacachi mé a cán xihín i.

⁵ Anda já naxini i mé táto Ndióxi ña cánúu in sahá nuú tañuhú ta inga sahá nu ñuhu cán, ñandinehe a ndahá cuáha indivi. ⁶ Ta já ñacahan mé á quivi Ndióxi ta já ñacahan tuhun a jáchi Ndióxi tácu a anda ama cáa quivi, mé á ñacavaha indivi xihín ñuyivi xihín tañuhú xihín tóco ndihi ñaha íin nuu á. Ta já ñacachi mé táto Ndióxi já:

—A cáyancá ga ⁷ jáchi tá ná casahá tiví táto Ndióxi ña cáhusa cán trompeta já xinu coo nu tóco ndihi ña ñasacu ini Ndióxi coo jehé janda sanahá. Jáchi sa ñacaxi tuhun mé á xihín profeta cuénta mé á ña ná cahan na sahá ña yóho nuú ñayivi —cáhi táto Ndióxi.

⁸ Anda jávi naxini joho i ñacahan tucu mé táto Ndióxi indivi já ñacachi a já xihín i:

—Cuahán quehe libro loho núna nuu cán. Ndiuehe a ndáha táto Ndióxi, mé a cánúu in saha nuú tañuhú ta inga sahá nu ñuhu jan —ñacachi a.

⁹ Tá ñasaa i nu táto Ndióxi cán já naxica i nu á ña ná quiahva libro loho cán nuú i. Ta já ñanducú ñehe táto Ndióxi cán tuhun nuú i já ñacachi a já xihín i:

—Yóho íin libro loho joo xini ñuhú casún ña. Vatí mé a ndaa tá ná casún ña cacuu a tátuhun tá casún ñuñu jáchi caviji ndivaha yuhun caja ña. Joo tá ñandihí nduu a ña ova ini tisún —ñacachi a xihín i.

¹⁰ Tá ñandihí já ñatiin i mé libro loho ndáha táto Ndióxi cán ta já ñasaxi i ña. Ta ñacaviji yuhú u xihín á tátuhun ñuñu. Joo tá sa ñacocó i ña já ñacahova ña ini tixi i. ¹¹ Anda já ñatahnda chuun nuú i já ñacachi a já xihín i:

—Ndítahan nuun caxi tuhun tucún xihín ñayivi ña cáhan Ndióxi sahá cuahá ndivaha ñuu xihín cuahá ndivaha nación nu cáhan na ndijáa tuhun. Ta xini ñuhú caxi tuhún ña nuú ndijáa na cómi cuénta sahá ñuyivi —ñacachi a xihín i.

11

Ivi na cúu testigo

¹ Tá nandihí já nasahan na in yító vara, dó chiquiahvá nuú í. Ta tá cúní coo ndoo já cúní coo mé vara cán. Ta já nacachi na já xihín í:

—Candichi ta chiquiahvún veñuhu cáhnu Ndióxi. Ta ndítahan chiquiahvún nu ná Ndióxi viti. Ta ndítahan cahvún ndaja cúu na cája cáhnu Ndióxi mé jan. ² Joo coto a chíquiahvún ñundáhyi, ña cáva nuu ndícomí tito yéhe veñuhu cán. Jáchi sa nandíquiahva Ndióxi ña yóho nuú ñayivi tóho ña ná caja tá quiahva cúní mé ná xihín Jerusalén, ña cúu ñuu yí ñaha Ndióxi tixi ivi jico ivi yoo. ³ Ta já chindahá yehe ivi testigo, na candixi jahmá ndáhyí, ña ndíxi ñayivi tá cándí ini na. Ta cūhun na cahan na sahá yehe tixi in mil ivi ciento uní jico quivi —nacachi na.

⁴ Ta naxini í ivi yitó olivo xihín ivi nu sándójó íti, dó cúu yuhú nuu testigo ndíta nu Ndióxi, mé a sáhdá chuun nuú ñuyívi. ⁵ Ta ni in na a cuú caja ni in ñaha xihín ndíví testigo Ndióxi yóho jáchi cuu caja na ña ná cana ñúhu ita ini yúhu ná ta cuu chicaan ñúhu na já ná jándihí na sahá na ihvi na. Ta quiahva já quivi ndá na ná nducú caja xixi xihín ná. ⁶ Ndíví mé testigo Ndióxi yóho íin ndée ná chicaji na indiví já ná a cúun javi nani cahan na cuénta Ndióxi nuú ñayivi. Ta íin ndée ná ndaja na ticuúí ña ná nduu dó nji. Ta íin ndée ná chicaan na ndá cuehe cúní mé ná chicaan na jatá ñuyívi yóho. Ta núná nu ná caja na ña ndaja tañu cúní mé ná. ⁷ Joo tá sa nandihí nacahan ndíví testigo yóho xihín ñayivi janda jáví quixi in quití quini, rí queta tañu yávi, ña co xínu nu ndíhi nuu cán. Ta já cani táhan rí xihín ndíví na cán ta quee vaha rí xihín ná ta cahní rí na. ⁸ Ta já canduu yiquí cuñu ndíví na cán mahñú java ndaa cáyé ñuu Jerusalén nuú nasahní na Jesucristo, mé á cúu xitoho í. Ta mé ñuu Jerusalén yóho cúu á yuhú nuu ñuu Sodoma xihín nación Egipto sahá cuachi cuahá cája ñayivi ndúu cán. ⁹ Ta ñayivi ndúu ndijáá ñuu xihín ndijáá nación xihín na cahan tá nuú tuhun xihín na naquixi ndijáá chichi cuni na yiquí cuñu mé testigo Ndióxi yóho tixi uní quivi java. Ta a quiahva toho na ñamaní jánduxu na ndíví testigo

Ndióxi yóho. ¹⁰ Ta ñayivi ndúu ñuyívi cajji ndivaha ini na sahá ña naxihí ndíví testigo Ndióxi yóho. Ta cávatá na janda quiahva jasá ñaha nu táhan johu na sahá ña naxihí ndíví testigo Ndióxi, na najándoho ndivaha ini ñayivi ñuyívi xihín ña nacahan na. ¹¹ Joo tá sa nayaha uní quivi java chí jánditacu Ndióxi ndíví testigo cán já ná ndacoo tucu na. Ta tá ná cuni ñayivi ña yóho casahá quiji ninu na xihín ña yíhví na. ¹² Anda já cuni johu ndíví testigo cán in a cahan cóhó indiví. Ta já cachi a já xihín ná:

—Cuándaa ndó chóho —cachi a já xihín ná.

Já ndaa na indiví tañu in vico nuú ndihí na ihvi na. ¹³ Ta mé hora já taan ndee ndivaha. Ta jándihí a in táhdá nuú uxu táhdá mé ñuu cáhnu cán ta já quivi usa mil ñayivi. Ta na coo naxihí cán chutú ndaa na xihín ña yíhví na ta já casahá na caja cáhnu na Ndióxi, mé a íin indiví.

¹⁴ Sa nayaha va tondóhó cáhivi. Joo sa cátivi tondóhó cáhuní vaxi a.

Tá nativí tátó Ndióxi trompeta cáhusa

¹⁵ Ta tátó Ndióxi ña cáhusa cán nativí a inga trompeta. Ta tá nativí a do já naxini johu í cahan cóhó cuaha ná indiví. Já cáhí na já:

Ta viti nandindaa hora sáhdá Ndióxi, xitoho í xihín Jesucristo chuun.

Ta mé á quea nachindahá Ndióxi cacomí a cuénta sahá ñayivi.

Ta íin ndée a cahnda chuun nuú ñuyívi yóho anda ama cáa quivi, nacachi cuaha ná mé indiví.

¹⁶ Ta ndíhoco comí na sacuaha, na nacava tiyivi nasanduu coo nu táyi vaha yati nu íin coo Ndióxi cán, nacaxítí na janda quiahva nacani ndaa taan na nu ñúhu ta nacaja cáhnu na Ndióxi. ¹⁷ Já nacachi na já xihín á:

Ndíquiahva nde ndixahvi nu ndóhó, Ndióxi, xitoho nde, mé a íin ndée caja tóco ndihí ñaha.

Janda tá cámaní cava sáhá saha ñuyívi nasahin va mé ndó.

Ta sa já íin ndó viti ta quixi tucu ndó.

Ndáha mé ndó íin ndihí ndée viti sahá ña cán quea nacasahá ndo sáhdá ndo chuun nuú ñayivi.

18 Ta ñayivi ndúu ní cúu ñuyíví ñacasáhá na xójo ndivaha ini na.

Joo viti ñaxinu coo quivi caja xíxi ndó xihín na cán.

Ta viti ñaxinu coo hora caja víi ndó sahá na sa ñaxihi.

Ta sa ñaxinu coo hora chahvi ndó nuú na profeta, na cáhan cuénta mé ndó.

Já ñaxinu coo hora chahvi ndó nuú na cúu cuénta mé ndó, na cája cáhnu mé ndó,

ta coo caja toho a á cúu ná na náhnu á cúu ná na válí.

Ta ñaxinu coo hora jándihi ndó sahá ñayivi quini, na cája ña núu xihín ñuyíví yóho, cáchi na cán cája cáhnu na Ndióxi.

19 Tá ñandihí já ñaxini i ñanuna yéhe veñuhu Ndióxi, ña íin indiví. Ta cán tívi ndácaan sató arca ñaha Ndióxi. Ta já ñacasáhá cána tasa. Ta ñaxini joho i jánda joho vaa cúu tácu cáhan na. Ta ñacasáhá cána javi ta táan ndeé ndivaha ta cúun ndivaha ñíí.

12

Ñaxini Juan ña ndúcú in coo quini caja xíxi rí xihín in ñáñáha

1 Tá ñandihí já ñaxini i ñayaha in ña xituhún ndivaha indiví. Naqueta in ñáñáha, ña cátví jáhma ña cúu candii. Ta cándichi ña jatá yoo. Ta cánúu in tiyivi jini ña, ña ñacacutú xihín uxu ivi quimi. 2 Ta sa víxi ña cacu jahyi ña. Ta ndáhví ndáhyi ña jáchi ndóho ndivaha ini ña jánda quiahva ná cacu jahyi ña. 3 Tá ñandihí já ñayaha inga ñaha cáhnu indiví. Ñaxini i in coo quini, rí cuhá. Ta íin usa jini ri xihín uxu ndíqui ri. Ta cánúu in tiyivi jatá in in yiquí jini ri cán. 4 Ta mé coo quini cán ñañuhu rí in táhnda nuú uní táhnda quimi ndúu indiví xihín ndóho ri. Ta já najaní ri mé quimi cán jatá ñuyíví. Ta mé coo quini cán ñandaca ndichi rí yati nu íin ñáñáha cácu jahyi cán jáchi cúni rí caxí rí jahyi ña tá ná cacu a.

5 Tá ñandihí já ñacacu in ña jahyi ña, ña cahnda ndeé chuun saha tóco ndihí ñayivi ñuyíví. Joo ñasañehe Ndióxi a ñinu nu íin coo mé á. 6 Ta ñaxinu ñáñáha cán cuahan ña chí xoo yucú íchí jáchi mé cán sa ñasacu

tiahva Ndióxi nuú cuu coo ña coto ñahá tixi in mil ivi ciento uní jico quivi.

7 Tá ñandihí já ñacasáhá cúu tondóho indiví. Ta ñaxini i Miguel xihín tátó Ndióxi ñacani táhan na xihín coo quini cán ta xihín tátó mé rí. 8 Joo coo ñacuu quee vaha coo quini cán xihín tátó Ndióxi ña cán quea coo ñacuu canduu chága rí cán indiví. 9 Ña cán quea najácana Ndióxi mé rí cán jánda ñuyíví yóho. Mé rí ñasahíin rí jánda sanahá ndivaha. Ta naní rí Satanás, mé tiñáhá sacuaña, rí jándahvi tóco ndihí ñayivi ndúu ñuyíví. Mé rí xihín tóco ndihí tátó rí ndíco jata ri najácana Ndióxi ri jánda ñuyíví yóho.

10 Tá ñandihí já ñaxini joho i cáhan cóho in a indiví já cáchi a já:

—Sa ñaxinu coo quivi cacu ndaa ínima ñayivi jáchi cómí Ndióxi cuénta saha ná xihín ndeé mé á. Ta sa ñaxinu coo quivi cahnda Jesucristo chuun, mé a ñachindahá Ndióxi cacomí cuénta saha ñayivi. Saha ña cán quea sa ñataxí Ndióxi tiñáhá sacuaña nu íin mé á jáchi ñuú ta ndiví ñasahíin rí nu mé á chicaan rí cuachi jatá na cúu cuénta Jesús. 11 Mé na cúu cuénta Jesús ñaquee vaha na xihín ri saha ña ñacaja Jesús, mé a cúu tátuhun ndicachi loho tá ñaxita nii á ndica crúxu saha ná. Ta ñaquee vaha na xihín ri jáchi coo najándacoo na cáhan na ña ndaa saha Jesús. Ta co yíhví toho na quivi na saha mé á. 12 Tóco ndihí ndó, na ndúu indiví xini ñuhú cajji ini ndó. Joo ndáhví ñahá ñacuu na ndúu ñuyíví xihín na ndúu ini tañuhú. Jáchi xójo ndivaha ini tiñáhá sacuaña ta ñanuu rí caja xíxi rí xihín ndó jáchi cándaa vaha ini rí ña sa ja chá cuití cúni ndihí saha ri —ñacachi a indiví.

13 Tá ñacandaa ini mé coo quini cán ña najácana Ndióxi rí ñuyíví já ñacasáhá ri ndicujta ñee rí ñáñáha, ña ñacacu jahyi cán.

14 Joo ñañehe ña ivi ndixi náhnu ndivaha, ña cúu tátuhun ndixi tíyaha. Saha ña cán quea ñandachí xíca ña nu mé coo quini cán cuahan ña yucú íchí nuú ñasahíin ña. Ta cán coto na ña tixi uní cuia java. 15 Tá ñandihí já ñacaja mé coo quini cán ña ná queta cuahá ndivaha ticuú yúhu ri. Ta já ñacavaha rí in yuta jáchi cúni rí jatañu rí mé ñáñáha cán. 16 Joo ñachindeé ñundáhyi

ñáñáha cán jáchi nandata ta naxihi ndihi a ticuú naçana yúhu mé rí cán. ¹⁷ Ta xihín ña yóho ví ga ví naxojo ini coo quini cán xihín ñáñáha. Sahá ña cán quea naquee rí cuahan rí cani táhan rí xihín java ga táhan na naquixi chichi mé ñá. Mé na yóho cúu ná na cája ña sáhdá tuhun Ndióxi ta co jándacoo na cája na ña ndaa ña najánaña Jesucristo nu ná.

13

Tá naxini Juan ivi quití quini

¹ Tá cándichi i nuú ñutí yuhú tañuhú já naxini i naqueta in quití quini tañuhú cán. Ta nasahin usa yiquí jíní rí xihín uxu ndíqui rí. Ta cánúu in tiyivi jatá in in ndíqui rí. Ta ndaa tuhun ña cáhá xihín Ndióxi nuú in in yiquí jíní rí. ² Mé quití quini naxini i yóho, cáa rí tá quiahva cáa ndicaha. Ta saha rí ndaa ña tá quiahva ndaa saha oso. Ta yúhu rí cúu á tátuhun yúhu león. Ta mé coo quini cán nasahan rí ndée rí nu mé quití quini, rí naqueta ini tañuhú yóho ña ná cuu cacomí rí cuénta saha ña cómi mé coo quini cán cuénta saha. Ta cúu cája rí ña cúu cája mé coo quini. ³ Ta in táhan ndihusa yiquí jíní mé quití quini cán nandicuehe cáhví ña. Joo tá nandihí já nandivaha ña. Sahá ña cán quea ndaja táhan ñayivi ndúu ñuyíví naçatontó ndivaha na. Ta já naçasáha na ndico na jata mé quití quini cán. ⁴ Ta naçaja cáhnu ñayivi coo quini cán jáchi nasahan rí ndée rí nuú quití quini cán. Ta quiahva já naçaja cáhnu na mé quití quini cán já cáhí na já:

—Coo ga inga rí cáhnu chága nu quití quini yóho. Ta ni in rí a cúu quihvi cani táhan xihín rí —cáhi na cája cáhnu na mé quití quini cán.

⁵ Ta mé quití quini cán nañehe rí ñamaní ña ná cahan rí tuhun quini ndivaha, ña jándihivi rí Ndióxi. Ta nañehe rí ñamaní cahnda rí chuun tixi ivi jico ivi yoo. ⁶ Sahá ña cán quea naçasáha cahan quini rí saha Ndióxi ta jándihivi rí mé á xihín ña núu cahan rí. Ta cahan núu rí saha mé nu in Ndióxi cán xihín saha tóco ndihi na ndúu indiví. ⁷ Ta nañehe rí ñamaní cani táhan rí xihín na cúu cuénta Ndióxi janda quiahva quee vaha rí xihín ná. Ta nañehe rí ñamaní

cahnda rí chuun saha ndaja táhan ñayivi naquixi ndijáa chichi xihín na cahan tá nuú tuhun xihín na ndúu ndijáa ñuu xihín ndijáa nación. ⁸ Tóco ndihi ñayivi ñuyíví caja cáhnu na quití quini cán jáchi janda tá cámaní cava saha saha ñuyíví coo naçahyi toho quivi ná nu libro nu ndaa quivi tóco ndihi na catacu anda ama cáa quivi. Mé libro yóho in a nu Jesús, mé á cúu tátuhun ndicachi loho, rí naxihí ndica cruxu.

⁹ Cuni johó vaha ndó, na vaha johó. ¹⁰ Ndá na ná chicaan in na vecaa, cuhun rí mé va na vecaa. Ta ndá na ná cahní inga na xihín yuchú cáni, xihín yuchú cáni quivi rí mé va na. Sahá ña cán quea xíní ñuhú quiahva ndee ini na cúu cuénta Ndióxi ta xíní ñuhú candeé cáhnu ini na mé á.

¹¹ Tá nandihí já naxini i inga tucu quití quini, rí naqueta nuú ñundáhyi. Ta nasahin ivi ndíqui rí ta ndaa ña tá quiahva ndaa ndíqui ndicachi. Joo cahan rí tátuhun cahan in coo quini. ¹² Ta naçaja chuun rí tóco ndihi ndee mé quití quini nu cuítí cán nu in mé rí. Naçaja rí ña ná caja cáhnu tóco ndihi ñayivi ndúu ñuyíví mé rí naqueta nu cuítí cán. Jáchi nandicuehe cáhví jini rí nu cuítí cán joo nandivaha rí. ¹³ Mé inga quití quini cáhivi cán naçaja cuhá ndivaha rí ñaha xituhún. Naçaja rí ña ná quixi ñuhú cáyi chí indiví ta naxinu a naçayu a ñuyíví nu tóco ndihi ñayivi. ¹⁴ Ta najándahvi rí ñayivi ndúu ñuyíví xihín tóco ndihi ña xituhún, ña nañehe rí ñamaní caja rí yóho nu mé rí nu cuítí cán. Ta nasahnda mé inga rí cán chuun nuú ñayivi ñuyíví ña ná cavaha na in tiniñu yúu quití quini nu cuítí cán. Mé rí nandicuehe quini ndivaha rí xihín yuchú cáni joo nandivaha rí. ¹⁵ Ta mé rí cáhivi cán nañehe rí ñamaní ña jánditacu rí tiniñu yúu mé rí nu cuítí cán já ná cuu cahan rí. Ta já ná cuu cahnda rí chuun ña ná cahní rí ñayivi, na coo cuni caja cáhnu mé rí quini cán. ¹⁶ Ta mé rí cáhivi cán naçaja rí ña ná quihvi marca ndahá cuáha ñayivi á taan na. Ta coo caja toho a á cúu ná na valí á na náhnu, á cúu ná na cuicá á na ndahví. Ta ni coo caja toho a á cúu ná na xica núná, á cúu ná na cómi xitoho cuénta saha. Nu tóco ndihi ñayivi naquihvi marca naçaja mé rí cán. ¹⁷ Ta ni in ñayivi a cuú cueen na ñaha ta ni a cuú jicó na ñaha tá coo

nanani mé marca cán na. Ta tá co cándaa quiví mé quití quini, rí nu cuítí cán taan na á tá coó numero mé rí cándaa taan na já quéa a cuú cueen na ñaha jáchi numero yóho náha ndaja naní mé rí nu cuítí cán. ¹⁸ Xihín ña yóho cuu candaa ini ndó ndá na cúu na ndíchí jiní. Ndá ndó, na cándaa ini xíní ñúhú jítá ndo cuéntá xihín numero ña cúu quiví mé rí nu cuítí cán jáchi cúu á tátuhun quiví ñayivi. Ta numero yóho cúu á iñu ciento uní jico iñu.

14

Tá xíta in ciento ivi jico comi mil ñayivi cája cáhnu na Ndióxi

¹ Tá nandihí já naxini i Jesús, mé á cúu tátuhun ndicachi loho cándichi a jata yúcu naní Sión. Ta xihín mé á ndíta in ciento ivi jico comi mil ñayivi, na ndáa quiví Jesús taan, mé a cúu tátuhun ndicachi loho cán. Ta quiahva já ndáa quiví Ndióxi, tátá a taan na. ² Ta naxini johó i in a cáhan chí indiví. Ta tá cáhan mé a cán cúu á tátuhun tá níhi cúyu ticuítí tañu tóto. Ta níhi a tátuhun tasa tá cána. Ta tácu a tá quiahva tácu nu jácaha cuahá ndivaha na arpa. ³ Ta naxini johó i ña saá xíta mé in ciento ivi jico comi mil ñayivi nu ín coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuítí va cúu na cuu catiahva cata na ña jáchi cúu ná na nacaxi Ndióxi jácacu a tañu ñayivi ndúu ñuyiví. ⁴ Ta na yóho cúu ná na víi, na coó nacaja quini mé jáchi coó nasanduu na xihín najihí. Cúu ná na nasandico níi tiempo jata Jesús, mé a cúu tátuhun ndicachi loho. Cúu ná na nacaxi Ndióxi jácacu a nu cuítí ña ná johó a na nu mé á xihín nu Jesús, mé a cúu tátuhun ndicachi loho. ⁵ Ta ni in táláá ña tuhún coó nacahan na. Ta ni in na coó nacuu ñeñe íni chícaan cuachi jata ná.

Tá cáhan uní tátó Ndióxi tuhun vaha saha Jesucristo nuú ñayivi ndúu ñuyiví

⁶ Tá nandihí já naxini i inga tátó Ndióxi ndáchí a mahñú ndaa indiví. Ta ñeñe a tuhun vaha sahá Jesucristo ña ín anda ama cáa quiví caxi tuhun a ña nuú ñayivi ndúu ñuyiví, mé na naquixi ndijáa chíchi xihín na cáhan tá nuú tuhun xihín na ndúu ndijáa

ñuu xihín ndijáa nación. ⁷ Ta já cáyuhú mé tátó Ndióxi cán já cáchí a já:

—Xíní ñúhú cayihví ndó Ndióxi ta xíní ñúhú caja cáhnu ndó mé á jáchi sa naxinu coo quiví caja víi mé á sahá ñayivi. Xíní ñúhú caja cáhnu ndó mé á jáchi mé á quéa nacavaha indiví xihín ñuyiví ta mé á quéa nacavaha tañuhú xihín ndijáa nu cána ticuítí —cáchí tátó Ndióxi cán.

⁸ Tá nandihí já naxini i inga tátó Ndióxi ta já nacachi a já:

—Ay, ay, sa nandihí va sahá ñuu cáhnu naní Babilonia xihín sahá ñayivi nasanduu jan. Ta na jan nasacuu na na najánañaha ichí quini nuú ñayivi ndúu ñuyiví já ná caja na tá nuú ña núu. Joo viti sa nandicava va mé Babilonia —cáchí tátó Ndióxi, ña cáhiví cán.

⁹ Tá nandihí já naxini i naqueta inga tátó Ndióxi, ña cáhuni. Ta nacasáhá cáyuhú cóhó a já cáchí a já:

—Ndá na ná caja cáhnu quití quini xihín tiníñu yúu rí ta sahan na ñamaní ña ná nani marca mé rí cán taan na á ndáha na ¹⁰ já quéa ndoho ndivaha ini na caja Ndióxi jáchi xójo ndivaha ini mé á xihín ñayivi quini. Jácana Ndióxi na nu cándaha ñúhu cáyi xihín azufre ta candehé tóco ndihí tátó Ndióxi ta candehé Jesús, mé a cúu tátuhun ndicachi loho cán ña ndóho na. ¹¹ Ta cána ñihma ini nu ñúhu mé na ndóho ini cán anda ama cáa quiví. Ta ni ñuu ni ndiví co ndiquehe ndée ná nu ndóho ini na jáchi nacaja cáhnu na quití quini cán xihín tiníñu yúu rí ta nasahan na ñamaní ña nanani marca quiví rí cán yiquí cuñu na. ¹² Xíní ñúhú quiahva ndeé ini na cúu cuéntá Ndióxi, mé na cája tóco ndihí ña sáhdá Ndióxi ta co jándacoo na ña cája cáhnu na Jesús —cáchí tátó Ndióxi cáhuni.

¹³ Tá nandihí já naxini johó i naquixi in a cáhan chí indiví já nacachi a já xihín i:

—Cahyún ña ná cahan i xuhun yóho: “Viti ta chí nuu cajii ini na naxihí, na cándeé ini Jesús, xitoho na” —cáchí a.

Ta já cáchí ínima yii Ndióxi já:

—Mé a ndaa cajii ini na cán jáchi ndiquehe ndée ná sahá ña nacaja chúun vaha na cuéntá mí i. Ta ña vaha nacaja na cán coo a níi tiempo xihín ná —cáchí ínima yii Ndióxi.

Tá jándoho Ndióxi ini ñayivi

¹⁴ Tá nandihí já nasandehé e ta já naxini i in vico yaa. Ta cánúu in da cáa tá quiahva cáa in ñayivi jatá mé vico. Ta cánúu in tiyivi jiuahun cuáán yiquí jíní da ta cáñee in machiti tojo jeen ndáha dá. ¹⁵ Tá nandihí já naqueta inga tátō Ndióxi ini veñuhu Ndióxi cán ta já cáyuhú cóhó a já cáchí a já xihín mé da in coo jatá vico cán:

—Xíní ñúhú casáhún jáqueún ña in ñuyíví xihín machiti tojo ñéhún jan jáchí sa naxinu coo va hora jáqueún ña in jatá ñuyíví jáchí sa nachichi va viti —nacachi a.

¹⁶ Anda já naxini i nacasáhá mé da nasanúu jatá vico cán jáquihvi da machiti tojo da jatá ñuyíví ta já najáquee da ñaha jatá ñundáhyi.

¹⁷ Tá nandihí já naxini i naqueta inga tucu tátō Ndióxi ini veñuhu in indiví cán ta quiahva já cáñee inga machiti tojo jeen ndahá a. ¹⁸ Ta nu in nu náa mé veñuhu cán naqueta inga tátō Ndióxi, mé a cómí cuéntá saha ñúhu ita ña cáyi. Ta já nacahan cóhó a xihín mé tátō Ndióxi nu cuítí cán, ña cáñee machiti tojo jeen ndáha cán já nacachi a já:

—Xíní ñúhú jáquihvún machiti tojo jeen cáñee ndáhun jan ta casáhá cahndún uva cúun nu dó uva ndúu ñuyíví jáchí sa nachichi uva nu do —nacachi a.

¹⁹ Anda já jáyaha tátō Ndióxi cán machiti tojo nuú ñundáhyi ta já nasahnda ndihi a uva nu tó uva cán ta nataán a uva cán ini in pila cáhnu ña ná cuhní ri. Ta ña yóho náha ndá quiahva quini ndoho ini ñayivi caja Ndióxi jáchí xójo ndivaha ini a xihín ná sahá cuachi cája na. ²⁰ Ta tá nasuhní uva cán ini mé pila cáhnu yuhú ñuu cán já nacana nij, dó cúu tátuhun yuta cúná janda quiahva cani ndaa dó yati yuhú in cuáyí. Ta tá quiahva cáni xíca dó cuahan do cúu á tátuhun uní ciento kilómetro.

15

Tá xinu coo tátō Ndióxi xihín usa chága tondóhó quixi jatá ñuyíví

¹ Tá nandihí já naxini i inga tucu ña cáhnu chí indiví ta chí nacatontó i. Ta ña naxini i cúu usa tátō Ndióxi ta in in ña yóho ñéhe a chága tondóhó quixi jatá ñuyíví ña ná jándihí a ña xójo ini Ndióxi.

² Ta naxini i in ñaha ta náha tátuhun in tañuhú ta tá quiahva in nuú yutátá quiahva já in nuu do joo cúu dó dó cáva táhan xihín ñúhu cáyi. Ta yati jin mé tañuhú náha tátuhun yutátá cán ndíta ñayivi, na nacandee nasahnu nu tóco ndihi ña núu sahá ña coo nacaja cáhnu na quití quini xihín tiniñu yúu ri. Ta ni coo naquehe na túni ña cúu numero mé rí quini cán. Ta mé na ndíta cán cáñee arpa ndáha na, dó nasahan Ndióxi nu ná. ³ Ta xíta na ña naxita Moisés, mé da nacaja chúun cuéntá Ndióxi. Ta xíta na ña naxita Jesús, mé a cúu tátuhun ndicachi loho cán ta já cáchí na já:

Cátontó nde tá xíní nde tóco ndihi ña nacavaha mé ndó, Ndióxi, xitoho nde,

jáchí in ndée ndó caja ndó tóco ndihi ñaha. Íchí cuéntá mé ndó cúu á íchí ndacú ta cúu á íchí cuéntá ña ndaa.

Ta mé ndó cúu ndó ña cómí cuéntá saha ndaja táhan nación ndúu ñuyíví yóho.

⁴ Tóco ndihi ñayivi yíhví na ndohó, mé a cúu xitoho nde ta cáhan na ndaja cáhnu cúu mé ndó.

Jáchí in túhún mé ndó cúu ndó Ndióxi yij. Ta tóco ndihi ñayivi ndúu ndijáa nación xinu na caja cáhnu na mé ndó, jáchí náha ndá quiahva cája ndó ña ndaa, cáchí na xíta na.

⁵ Ta tá sa nayaha ña yóho já nasandehé ta naxini i nanuna veñuhu indiví, ña nacavaha na xihín ñíi quití. Ta nasahnu ley Moisés cán. ⁶ Ta ini mé veñuhu indiví naqueta ndíhusa tátō Ndióxi, mé a ñéhe usa nuú tondóhó quixi jatá ñuyíví. Ta ndíxi tátō Ndióxi cán jahmá vií, ña lino, ña ndató ndivaha yéhe. Ta ndacaan in cinturón ña jiuahun cuáán tóco á ta cáni a janda yati yicá ndíca a. ⁷ Ta in táhan ndícomí mé ña tácu cán nasahan in in cóhó, ña jiuahun cuáán nuú in in táhan ndíhusa tátō Ndióxi cán. Ta ini in in cóhó cán ñúhu ndaja táhan tondóhó ña vaxi jatá ñayivi ndúu ñuyíví caja Ndióxi, mé a tácu anda ama cáa quivi. ⁸ Ta nachutú ndaa veñuhu cán xihín ñihma, ña náha ndá quiahva cáhnu cúu Ndióxi xihín ndá quiahva cáhnu cúu ndee mé á. Ta ni in na coo nañehé ñamaní quihvi ini veñuhu cán janda quiahva naxinu ndíhusa tondóhó, ña ñéhe ndíhusa tátō Ndióxi cán.

16

Usa coho ña ñúhu usa tondóhó

¹ Tá nandihí já naxini i joho i nacahan cóhó in a tañu veñuhu indiví cán. Ta já cáchí a xihín ndíhusa tátō Ndióxi cán já:

—Cuáhán ndó cuyu ndó ndíhusa coho jan jata ñuyíví. In in a cán cúú á in tondóhó chindahá Ndióxi jata ñuyíví ta ndoho ndivaha ini ñayivi xihín á —cáchí a.

² Anda já in tátō Ndióxi, mé a nu cuítí nasahan nacuyu a ña ñúhu ini coho ñéhe a cán jata ñuyíví. Ta já naxinu cuehe táhyi, ña ihvi ndivaha yiquí cuñu ñayivi, na naquehe marca quití quini cán, mé na nacaja cáhnu tinñu yúu rí.

³ Tá nandihí já inga tátō Ndióxi ña cáhivi cán nacuyu a ña ñúhu ini coho ñéhe a jata tañuhú. Ta tóco ndihí dó nanduu dó niji tátuhun niji ndii. Ta tóco ndihí ña tácu ini tañuhú cán naxihí ndihí a.

⁴ Ta tá nandihí já nacuyu tátō Ndióxi ña cáhuni cán ña ñúhu ini coho ñéhe a jata ndijáá yuta xihín ndijáá nu cána ticuítí ta nanduu dó niji. ⁵ Tá nandihí já naxini joho i cáhan in tátō Ndióxi, mé a cómi cuéntá sahá ticuítí cán já cáchí a já:

—Tátá Ndióxi, mé ndó cája ndó ña ndaa jáchi nacaja vií ndó sahá ñayivi jan. Yii ndivaha cúú ndó ta ín ndó viti ta janda saha nasahin ndó. ⁶ Najándoho ndó ini ñayivi jan jáchi nasata na niji na cúú cuéntá mé ndó xihín niji na profeta tá nasahni ñahá na. Joo viti nacaja ndó xihín ná ña ná coho na niji já ná ndoho ini na. Ta quiahva já cáni a coo a —nacachi tátō Ndióxi cán.

⁷ Tá nandihí já naxini joho i in a cáhan nu náa Ndióxi cán já cáchí a já:

—Tátá Ndióxi, mé ndó cúú ndó xitoho nde ta ín ndée ndó caja ndó tóco ndihí ñaha. Ta nacaja ndó ña ndaa tá nacaja vií ndó sahá ñayivi —cáchí a.

⁸ Tá nandihí já naxini i inga tátō Ndióxi ña cácomi cán ta nacuyu a ña ñúhu ini coho ñéhe a jata candii. Ta xihín ña yóho nañehé candii cán ndée á chican ñúhu a ñayivi xihín ñúhu cáyi. ⁹ Ta já nacayi quini ndivaha tóco ndihí ñayivi. Joo coo naxeen na ndicó coo ini na ta ni coo nacaja cáhnu na Ndióxi. Ña nacaja na quea nacasahá na cánahá ndivaha na xihín Ndióxi, mé a ín

ndée nu tóco ndihí tondóhó quixi jata ñuyíví yóho.

¹⁰ Tá nandihí já naxini i inga tátō Ndióxi, ña cáhuhun cán ta nacuyu a ña ñúhu ini coho ñéhe a jata táyi nu ín coo quití quini cán. Ta já naxini i nacanaá yávi mé nu ndúu na sáhdá rí chuun nu cán. Ta já nacasahá mé na cán sáxi yihí na yaa ná jáchi nacasahá ndóho ndivaha ini na. ¹¹ Joo coo najándacoo na ña núu cája na. Ta sahá ña nahihvi ndivaha yiquí cuñu na cán xihín cuehe ndóho na já nacanahá ndivaha na xihín Ndióxi, mé a ín indiví.

¹² Tá nandihí já naxini i inga tátō Ndióxi, ña cáhiñu cán ta nacuyu a ña ñúhu ini coho ñéhe a jata in yuta cáhnu naní Eufrates. Ta já nahichí ndihí ticuítí nasahnu ini yuta cáhnu cán ta já nanuná nuú yaha na cúú rey, na naquixi chí xoo nu cána candii.

¹³ Tá nandihí já naxini i naqueta uní ínima quini. In rí naqueta yúhu coo quini ta inga rí naqueta yúhu da cúú profeta túhún cán. Ta mé ínima quini cán ndaa tá quiahva ndaa láhva cúhdó. ¹⁴ Ta rí cán cúú ínima rí quini, rí nacaja ña xituhún nuú ñayivi. Ta cúú rí rí queta cuahan jataca ndaja táhan rey sáhdá chuun nuú ñayivi ndúu ñuyíví já ná cani táhan na xihín Ndióxi. Jáchi sa nacayati quiví nahá ndá quiahva cáhnu cúú Ndióxi jáchi mé á quea ín ndée cája tóco ndihí ñaha. ¹⁵ Anda já nacachi Ndióxi já: “Cuéntá coo ndó jáchi tá quiahva jonáá xinu da cuíhná quiahva já jonáá xinu i nu ndó. In saha cáji ini ndá na sa ndáti tiahva saa i jáchi cúú ná tátuhun na nasandíxi tiahva jáhma. Já quea ná a cáchan nuu ná tá ndaa lahla na nuú ñayivi”, cáchí a. ¹⁶ Ta rí quini cán najataca rí tóco ndihí rey sáhdá chuun nuú ñayivi in nuú naní Armagedón tuhun hebreo.

¹⁷ Tá nandihí já inga tátō Ndióxi ña cáhusa cán nacuyu a ña ñúhu ini coho ñéhe a nu táchi. Ta já naxini joho i cáhan in a ini veñuhu indiví nu ín coo Ndióxi nu sácoo rey cán. Ta cáhan cóhó á já cáchí a já:

—Sa nayaha tóco ndihí ña ndítahan coo —nacachi a.

¹⁸ Tá nandihí já naxini i nacasahá cána tasa. Ta naxini joho i jandá vaa joho cúu

tácu cáhan na. Ta naxini joho i jandá joho cána javi. Ta nacasáhá quíji ninu ñundáhyi jáchi nacasáhá táan ndeé ndivaha. Ta mé nditáan yóho nasacuu a ña ndeé chága nu tóco ndihi ña táan jáchi janda quivi nasacu Ndióxi ñayivi ñuyivi coo naquixi inga nditáan ndeé tátuhun ña yóho. ¹⁹ Ta mé ñuu cáhnu ndivaha cán nandata uni ña. Ta ndijáá ga ñuu náhnu ndúu ñuyivi nacuyu ndihi a. Ta nandicuhun ini Ndióxi sahá ñuu cáhnu naní Babilonia cán ta najándoho mé á ini na ndúu cán jáchi xójo ndivaha ini a xihín ná. Ta ña ndóho na cúu á tátuhun xihí na vino cuénta tondóho. ²⁰ Ta tóco ndihi isla ñúhu ini tañuhú xihín ndijáá java ga yucu ndúu jata ñundáhyi nandihí sahá. ²¹ Ta naxini i nacuun ñíí náhnu ña vee ndivaha tátuhun ivi jico kilo in in a. Ta janda indivi naquee a nacuyu a jata ñayivi ndúu ñuyivi. Ta nacasáhá na cáhahá na xihín Ndióxi sahá ña najácuyu a ñíí yóho jata ná. Jáchi mé a ndaa ña yóho nasacuu a in tondóho cáhnu ndivaha naquixi nu ná nacaja Ndióxi.

17

Tá jándihí Ndióxi saha ña xíca jii

¹ In táhan ndihusa tátó Ndióxi ña cáñee in táhan usa cohó ndáha cán naxinu a nuú i já nacachi a já xihín i:

—Naha quí yóho jáchi cúni jánaha i nuun ndá quiahva ndoho ini ña xíca jii, ña cáhnu, ña ín coo nuú cuahá ticuí. ² Tóco ndihi na cúu rey ndúu ñuyivi yóho naquiji na xihín ña cán. Najáxini ña tóco ndihi ñayivi ñuyivi xihín ña núu nacaja ña tá naquiji ña xihín na coo cúu yí ña —nacachi tátó Ndióxi cán xihín i.

³ Anda já nacaja ínima yii Ndióxi xihín i ña ndáca tátó Ndióxi yehé nasahan i yucú íchí xihín á. Ta cán naxini i in ñañáha cánúu jata in quití quini, rí cuahá. Ta núí cúu rí nacacutú xihín tuhun quini ña cáhahá xihín Ndióxi. Ta naxini i ín usa yiquí jíní rí xihín uxu ndíqui rí. ⁴ Ta mé ña cánúu jata rí cán ndíxi ña jáhma ndíhí ticayí, ña nacava táhan xihín ña cuahá. Ta nacacutú ña xihín jiuhun cuáan xihín yuu yáhví ndivaha xihín perla. Ta naxini i cáñee in cohó jiuhun cuáan ndáha ña. Ta nachutú ndaa cohó cán xihín ña núu ta

xihín ña tiquíni nacaja ña xihín dataa. ⁵ Ta ndaa in tuhun taan ña, ña co cándaq ini ñayivi. Ta já cúni cachi mé tuhun cán: “Ñuu Babilonia cúu ñuu cáhnu ta cúu á tátuhun náná tóco ndihi najihí xíca jii. Ta cúu á tátuhun náná ndaja táhan ga ña núu ndúu ñuyivi yóho.” ⁶ Tá nandihí já náha ña naxini ndivaha mé ñañáha jáchi naxihí ña níí na cúu cuénta Ndióxi, na naxihí sahá ña coo najándacoo na cáhan na saha Jesús. Ta tá naxini i ña yóho já nacatontó ndivaha i. ⁷ Ta já nacachi tátó Ndióxi cán já xihín i:

—Ndá cuénta quea catontó nahún. Xíní ñúhú cuni joho vahún ña cahán i xuhun jáchi ndicani i nuun ndía cúni cachi ña ín jehé saha ñañáha yóho. Ta jári ndicani i nuun ndía cúni cachi quití quini, mé rí cánúu ña, rí ín usa yiquí jíní xihín uxu ndíqui cán. ⁸ Mé quití quini naxinún yóho nasatacu rí sanahá joo viti coo tácu ga rí. Joo vaxi quivi ndindita rí ta queta rí tañu yávi, ña coo xínu nu ndíhi nuu cán. Ta tá nandihí já cuhun rí ndihi saha rí chí uun. Ta catontó ndivaha tóco ndihi ñayivi ndúu ñuyivi, na coo nacahyi quivi janda tá cámaní cava sahá saha ñuyivi nu libro nu ndaa quivi tóco ndihi na catacu anda ama caa quivi. Catontó ndivaha na tá ná cuni na mé quití quini yóho, rí nasahiin sanahá ta coo tácu ga rí viti joo nditacu tucu rí nu ná.

⁹ Ta ndá ndó, na ndíhí jini, cuu candaq ini ndó ña yóho: Ndihusa yiquí jíní quití quini cán cúu á yuhú nuú usa yucu nu ín coo mé ñañáha xíca jii cán. ¹⁰ Ta jári cúu á yuhú nuú usa rey. Ta uhun táhan rey yóho sa nandihí va saha. Ta inga táhan rey yóho sáhdá da chuun nuú ñayivi viti ñúhú. Ta inga ga rey ña cáhusa cán cámaní xínu coo. Joo tá ná xínu coo da yóho já a coo nahá toho da cahnda da chuun nuú ñayivi. ¹¹ Ta quití quini, rí nasatacu sanahá ta viti sa coo ga rí, rí cán cúu rí yuhú nuu rey, da cáhuna cán. Vatí cúu dá táhan java ndihusa rey cán joo tá nandihí cahnda da chuun cuhun da ndihi saha dá chí uun.

¹² Ta ndihuxu ndíqui naxinún yóho cúu á yuhú nuú uxu rey, mé na cámaní casahá cahnda chuun nuú ñayivi ndúu ñuyivi. Joo in tálaá hora ñehé táhvi na cahnda na chuun xihín mé quití quini cán nuú

ñayivi tátuhun rey. ¹³ Ta ndíhuxu rey yóho jándique táhan na tuhun na ña ná quiahva na ndée ná nu mé quití quini já ná cahnda rí chuun. ¹⁴ Ta cani táhan ndíhusa na cán xihín Jesús, mé a cúu tátuhun ndicachi loho cán. Joo quee vaha Jesús xihín ná jáchi cúu á xitoho na náhnu ndúu ñuyívi yóho ta cúu á rey nuú ndaja táhan rey. Ta xoo Jesús cán canduu na ñacana Ndióxi, mé na ñacaxi a cacomí a cuénta saha. Cúu ná na coo najándacoo ña cándeé ini na mé á —ñacachi táto Ndióxi xihín i.

¹⁵ Tá nandíhi já ñacachi tucu táto Ndióxi cán já xihín i:

—Ticují, dó naxinún nu íin coo ña xíca jii jan cúu dó yuhú nuu ndijáa ñuu xihín ndijáa nación xihín ndijáa ñayivi, na cáhan tá nuú tuhun. ¹⁶ Ta ndíhuxu ndíqui naxinún nuú quití quini jan cúu á yuhú nuu mé uxu rey, na candají ña xíca jii jan. Ta jándacoo na ña ta já caca lahla ña. Ta caxí ndáa na yiquí cuñu ña. Ta chicaan ñúhu ná ña xihín ñúhu cáyi. ¹⁷ Jáchi jáxinu Ndióxi ini na cán ña ná caja na ña cúni mé á. Ta jándique táhan na cán tuhun na ña ná ndiquiahva na chuun ndójo na nu mé quití quini cán ña ná cacuu rí tátuhun rey janda quiahva ná xinu coo nuú ña ñacachi Ndióxi coo. ¹⁸ Ta ñáñáha naxinún cán cúu ña yuhú nuu ñuu cáhnu cán ña sáhdá chuun nuú ndaja táhan na cúu rey —cáchi táto Ndióxi cán.

18

Tá jándíhi Ndióxi sahá ñuu Babilonia

¹ Tá sa ñayaha tóco ndíhi ña yóho já naxini i inga táto Ndióxi, ña ndójo chuun cáhnu ta nanuu a chí indiví. Ta chí nandiyihvi ndaa jatá ñuyívi xihín quiahva yéhe mé táto Ndióxi cán. ² Ta já ñacasáhá cáyuhú cóhó a já cáchi a já:

—Ay, ay, sa nandíhi va sahá ñuu cáhnu Babilonia cán ta nanduu a tátuhun cavá tiñhá. Cúu á tátuhun nuú nandicutú ndaa ínimá quini ñúhu rí. Ta nanduu a tátuhun in choho nu ñúhu tá nuú laa quini, rí cándají ñayivi. ³ Nandíhi sahá ñuu Babilonia yóho, mé a cúu tátuhun in ñáñáha xíca jii. Jáchi najáxiní ña ndaja táhan ñayivi ndúu ñuyívi ta najácahan ña na ña ná caja na tá nuú ña núu ña xíca ini na caja na. Ta mé na ñuu Babilonia jan nasahan na ñamaní ña

ná xinu coo ndaja táhan da náhnu sáhdá chuun nuú nación ña ná xinu da ñuu Babilonia jan cuju da xihín ña xíca jii jan. Ta na cája ndahvi ndicuicá na xihín tá nuú ña núu caja ña jáchi sátá joho ña ña cuicá ña —cáchi táto Ndióxi cán.

⁴ Tá nandíhi já naxini joho i inga cáhan chí indiví ta já cáchi a já:

—Ndóhó, na cúu cuénta mí i, cuáqueta ndó jatá ñuu jan já ná a cája ndó cuachi cája na ñuu jan. Ta já ná a xinu coo tondóhó vaxi nuú na ñuu jan jatá ndo. ⁵ Jáchi sa ñacacuahá ndivaha cuachi na ta janda indiví xinu coo cuachi na. Ta co ndíndójó Ndióxi sahá cuachi cája na. ⁶ Ta tá quiahva ñacaja na jan xihín inga ñayivi quiahva já ndítahan caja ndó xihín ná viti. Ta janda ivi táhdá chága ví ndicó coo ndó caja ndó xihín ná. Ta tá quiahva najácoho na jan inga ñayivi quiahva já ivi táhdá chága ví ndítahan quiahva ndó nu ná coho na. ⁷ Nandiñehe jícó ndivaha na mé ná sahá ña cán quéa ndítahan jándoho ndivaha ndó ini na viti. A juú quiahva nanduu cuicá na sahá ña cán quéa ndítahan caja xíxi ndó xihín ná viti. Cáhan na ña cahnda na chuun nuú in nación. Ta cáhan na ña a ndóho toho ini na. Ta cáhan na ña coo cúu ná tátuhun in ña cuaan. ⁸ Sahá ña cán quéa tixi in tálaa quivi quixi tá nuú ña núu nu ná. Já casáhá quivi na ta cacuéha ndivaha ini na ta xinu joco nu ná. Ta já chicaan Ndióxi na nu ñúhu cáyi jáchi jándíhi Ndióxi, xitoho í saha ná, mé a íin ndée cája tóco ndíhi ñaha —cáchi a.

⁹ Ta já casáhá cuacu ndijáa rey, na sáhdá chuun nuú ñayivi ndúu ñuyívi. Ta táhdá ini na tá ná cuni na ñihmá cána ñuu Babilonia cán. Jáchi mé na náhnu yóho ñaquihvi nuu na xihín ña xíca jii cán ta najátivi na jiuhún na xihín ña. ¹⁰ Ta xíca xíca ñasacandichi na jáchi yíhvi na sahá ndá quiahva quini ndóho ini ña cúu yuhú nuu ñuu Babilonia cán. Ta já casáhá cáchi mé rey cán já:

—Ay, ay, ndáhvi nahá nacuu ndó, ñuu Babilonia jáchi vatí cúu ndó ñuu cáhnu ndivaha joo in too joho naxinu hora ndóho ini ndó —cáchi na cán.

¹¹ Ta ndijáa na cája ndahvi ndúu ñuyívi cuacu ri na cán va ta táhdá ndivaha ini

na sahá ñuu Babilonia jan jáchi a cóo ga na cueen ñaha ndójo na xínu coo na. ¹² Ta ña sádojo na cán quixi na jicó na cúu jiuñun cuáán xihín jiuñun cúxú xihín yuu yahvi ndivaha xihín perla vaha xihín jahmá vaha ndivaha ña cávaha xihín yahva naní lino xihín jahmá seda xihín jáhma ndihí ticayí xihín jáhma cuáhá ñii xihín ndijáá nuú yító támi sáhan xihín ñaha cávaha xihín nuñu yócó elefante xihín ndijáá yító yahvi ndivaha xihín ndijáá ñaha cávaha xihín caa cuáán xihín ña cávaha xihín caa uun ta jári ñaha cávaha xihín yuu naní mármol. ¹³ Ta quiahva já sáñehe na canela xínu coo na xihín ndijáá ñaha támi sáhan. Ta ñeñe na jusa xihín mirra xihín perfume viti. Ta quiahva já ñeñe ri na vino xihín aceite xihín harina vaha xihín trigo. Ta quiahva já sáñehe ri na quití xójo xihín ndicachi xihín cuáyí xihín carreta. Ta janda ñayivi xéen na caja chúun nu ná sáñehe na. Ña yóho sádojo na quíxi na joo ni in na a cuéen ga ñaha na. ¹⁴ Ndjáá na cája ndahvi cán cañan na xihín ñuu Babilonia cán já cachi na já:

—Coó ga cuihi vaha, rí catóo nahá ndó caxí ndó. Ta viti sa nandihí saha tóco ndihí ña lándá xihín ña cuicá nasanduu nu ndó jan —cáchi na.

¹⁵ Ta na ñacaja ndahvi xihín tóco ndihí ñaha yóho nandicuicá ndivaha na xihín ndahvi ñacaja na xihín na ñuu Babilonia cán. Ta xicá xicá candita na candehé na ñuu Babilonia cán jáchi yíhví na ndoho na tá quiahva ndóho ini na cán. Ta cuacu ndivaha na ta táhnda ndivaha ini na. ¹⁶ Ta já cáchi na já:

—Ay, ay, ndáhví nahá ñacuu ñuu cáhnu Babilonia jan. Ndató ndivaha nasanañá ñuu yóho tátuhun in ñañáha ndíxi jahmá lino vaha ndivaha xihín jahmá ndihí ticayí xihín jahmá cuáhá ñii. Ta ñacacutú ña xihín jiuñun cuáán ta xihín yuu yahvi ndivaha ta xihín perla. ¹⁷ Joo in too joho nandihí saha tóco ndihí ña cuicá nasacomí mé ñuu Babilonia jan —ñacachi na.

Ta ndijáá na sáhnda chuun nuú na ñeñe barco, xihín ndijáá na cándójó xica xihín ndijáá na cája chúun ini mé barco cán xihín ndaja táhan na cája ndahvi xihín ña quixi chí tañuhú cán nasandita xicá na sáñdehé

na. ¹⁸ Ta tá ñaxini na ndíndita ñihma ña cáyi ñuu cán já ñacayuhú na já ñacachi na já:

—Ni in túhún toho inga ga ñuu co queé táhan xihín ñuu Babilonia ña cáhnu yóho —ñacachi na.

¹⁹ Ta xihín ña táhnda ini na ñachojó na ña yacá jiní ná. Ta ñacasáhá sácu ndivaha na já cáyuhú na já cáchi na já:

—Ay, ay, ndáhví nahá ñacuu ñayivi nasanduu ñuu cáhnu jan jáchi xihín ña cuicá nasacomí na najácacuicá na ndijáá ña xica nuú tañuhú xihín barco. Joo in too joho nandihí sahá ña jan —cáchi na cán sácu na.

²⁰ Ta ndítahan cajii ini na ndúu indiví sahá ña nandoho ñuu cáhnu yóho. Ta quiahva já ndítahan cajii ri ini ndijáá na cúu cuéntá Ndióxi xihín na cúu apóstol xihín na cúu profeta. Jáchi xihín ña ñacaja Ndióxi xihín ñuu Babilonia yóho nandiquehe a cuéntá sahá ña núu ñacaja mé na cán xihín ndó, na cúu cuéntá Ndióxi.

²¹ Tá nandihí já ñaxini i in tátó Ndióxi, ña iin cuahá ndé. Ndiñehe a in yuu cáhnu ña cúu á tátuhun in yuu yojó. Ta najácana a ña ini tañuhú ta já ñacachi a já:

—Tá quiahva najácana i yuu yojó yóho ini tañuhú ta nasacoo a cahá tañuhú cuahán quiahva já vaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndicó coo ga ñayivi cuni na ña. ²² Ta ni música a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu jan jáchi ni in túhún toho ndahvi a cája na. Ta ni a tácu ga yuu yojó ña ndíco najihí. ²³ Ta janda ni in ití loho a túun ga ñuu jan. Ta ni a cañan ga ñayivi vicó tándaha jáchi coó ga ña jan coo. Jáchi na najicó ñaha cán nasacuu na na náhnu ndúu ñuyiví ta najándahvi na ndaja táhan ñayivi ndúu ñuyiví xihín ña tají ñacaja na —cáchi tátó Ndióxi.

²⁴ Ta ndoho ini na jáchi mé ñayivi ñuu Babilonia jan nasahní na na profeta xihín na cúu cuéntá Jesús ta anda cuahá ñayivi ndijáá ñuu ñuyiví nasahní ñahá na.

19

¹ Tá sa ñayaha tóco ndihí ña yóho já ñaxini joho i cañan cóhó cuahá ndivaha ñayivi indiví ta já cáchi na já:

Cáhnú cúú Ndióxi jáchi in túhún mé á quéa jácau mí.

Ta ín ndéé mé á caja tóco ndihi ñaha ta cáni nu yó caja cáhnú ndivaha í mé á.

² Jáchi ndaa cája ndihi mé á ñaha tá cája víi a sahá ñayivi.

Ta ndaa ñacaja mé á tá ñasacu ini a jándihi a sahá ñuu Babilonia jan jáchi ñasacuu a tátuhun ñá xíca jii.

Jáchi xihín tóco ndihi ña núu ñasacaja ñá ña quíji ñá xihín na co cúu yí ña najátivi ndihi ñá ñayivi ndúu ñuyívi.

Sahá ña cán quéa najándihi Ndióxi saha ña ta já ñatahnda cuénta sahá ña ñacaja ñá tá ñasahní ñá na cúu cuénta Ndióxi, cáchi na cáhan indiví cán.

³ Tá ñandihí já ñacasahá tucu na cán cáhan na já cáchi na já:

—Cáhnú cúú Ndióxi jáchi ñacaja mé á ña cáyi ñuu cán ta anda ama cáa quívi ndíndita ñihma ña —já cáchi na indiví cán.

⁴ Ta ndíhoco comí na sacuahá ndúu cán xihín ndícomí mé ña tácu cán ñacaxítí na janda quiahva ñacani ndaa taan na nu ñúhu ta já ñacaja cáhnú na Ndióxi, mé a ín coo nu sácco rey cán. Ta tá cája cáhnú na Ndióxi já cáchi na já:

—Já ná coo. Cáhnú cúú Ndióxi —cáchi na.

⁵ Ta janda nu ín coo Ndióxi cán ñaxini johó i cáhan in a ta já ñacachi a já:

—Tóco ndihi ndó, na cája chúun cuénta mé á xíní ñúhú caja cáhnú ndó Ndióxi, mé a cája cáhnú í. Coó caja toho a á cúu ndó na náhnú á na valí jáchi cája ndó ña sáhdá mé á —cáchi a.

Tá coo víco indiví sahá ña ndiquehe Jesucristo na cúu cuénta mé á

⁶ Tá ñandihí já ñaxini johó tucu u ña tácu tátuhun tá cáhan cuahá ndivaha ñayivi. Ta tácu ña tátuhun tá cáha cúyu ticuú tañu cáva ta tácu ña tátuhun tá cána tasa. Ta já cáchi na já:

Cáhnú cúú Ndióxi, xitoho í, mé á cája cáhnú í jáchi sa ñacasahá mé á comí a cuénta sahá ñayivi viti.

Ta ín ndéé mé á caja tóco ndihi ñaha.

⁷ Xíní ñúhú cavatá yo ta xíní ñúhú cajii ndivaha iní caja cáhnú ndivaha í mé á.

Jáchi sa ñaxinu coo quívi ndiquehe Jesucristo, mé a cúu tátuhun ndicachi loho, na cúu cuénta mé á.

Cacuu a tátuhun tándaha Jesucristo xihín na cúu cuénta mé á, na sa ndúu tiáhva na tándaha na xihín mé á.

⁸ Ta ñehé táhvi ná candixi na jahmá vaha ndivaha, ña naní lino ta cúu á ña víi ndivaha ta ndató ndíyihvi a, cáchi na.

Jáchi mé jahmá víi ña naní lino cán náha ña ñaxica vaha na cán íchi cuénta Ndióxi.

⁹ Tá ñandihí já ñacachi mé táto Ndióxi já xihín i:

—Cáhyún ña yóho. Cajii ini ñayivi, na ñacana Ndióxi chúun indiví tá ná xinu coo quívi ndiquehe Jesucristo, mé a cúu tátuhun ndicachi loho cán, na cúu cuénta mé á —ñacachi táto Ndióxi cán xihín i.

Ta ñacachi tucu a já:

—Mé a ndaa ndinuhu túhun Ndióxi cúu ña yóho —ñacachi a xihín i.

¹⁰ Anda já ñacaxítí i nu táto Ndióxi cán ña ná caja cáhnú i ña. Joo já ñacachi a já xihín i:

—A cáxítí tohún nuú yehé jáchi ndítahan caja cáhnún Ndióxi. Jáchi yehé cúu u da cája chúun nu Ndióxi tá quiahva cája chúun yóho xihín java ga na cúu cuénta Jesús, na cúu ñanún, na co jándacoo cáhan ña ndaa, ña najánaha Jesús nuú ñayivi. Caja cáhnún Ndióxi —cáchi a.

Jáchi na cúu profeta cándéé ini na ña jáñaha Jesús ña ndaa sahá ña cán quéa cáhan na ña nuú ñayivi.

Tá ñaxini Juan in a cánúu cuáyí yaa

¹¹ Tá ñandihí já ñaxini i ñanuna indiví ta ñaqueta in cuáyí yaa. Ta mé a cánúu rí cán naní a: mé a co cáva ivi johó ini. Ta naní tucu a: ña ndaa. Jáchi ndaa cája víi a sahá ñayivi ta ndaa cája mé á tá quíhvi táhan cáni táhan xihín ná. ¹² Ta tá quiahva yehé nu cándaa ñúhu cáyi quiahva já yehé nduchú núu a. Ta cándojó cuahá ndivaha tiyivi jiní á. Ta ndaa in quívi taan mé á joo in túhún mé á xíní ndá quívi quéa ndaa taan. ¹³ Ta ñandaxi jáhma mé á xihín nij. Ta naní a: túhun Ndióxi. ¹⁴ Ta ñaxini i ndíco in táhdá cáhnú soldado cuénta indiví jatá cuahan na xihín á. Ta ndíxi na jahmá vaha ña naní lino. Ta cúu á jahmá yaa cachi, ña

ndató vií ña. Ta in in na cán cánúu cuáyí yaa cásahan na xihín á. ¹⁵ Ta yúhu mé á ña cúu tuhun Ndióxi cán quéta in yúchu cáni ña jeen ndivaha. Ta xihín mé yúchu jeen cán jándicuehe quini ndivaha mé á ndijáá ñayivi ndúu ñuyíví. Ta cahnda ndeé mé á chuun saha ná. Ta cája vií a saha ná tá quiahva cája da sání nihni jata uva ini pila ña ná cuhní rí. Ta mé Ndióxi cúu á jándoho ndivaha ini ñayivi jáchi xójo ndivaha ini mé á xihín ná ta mé á cúu á Ndióxi ña íin ndeé caja tóco ndihi ñaha. ¹⁶ Ta jata jáhma ndíxi mé a cán xihín nu jíhin a ndáa java tuhun já cáchi ña já: “Yehe cúu rey nuú ndaja táhan rey ta cúu u xitoho nuú na náhnu ndúu ñuyíví”, cáchi a.

¹⁷ Tá nandihí já naxini i in táto Ndióxi cándichi a jata cándii. Ta já nacayuhú cóho a nuú ndijáá laa, rí ndáchí nu táchi. Ta já nacachi a já xihín rí:

—Naha ndihí ndó taca ndó cajíni ndó ña quiahva Ndióxi nu ndo. ¹⁸ Ta ña caxí ndo cacuu a yiquí cuñu na náhnu, na sáhdá chuun nuú ñayivi. Ta caxí ndo yiquí cuñu na cúu sacuaḥa nu soldado xihín yiquí cuñu na ndacú. Ta caxí ndó yiquí cuñu cuáyí xihín yiquí cuñu da cándójó jata rí. Ta caxí ndó yiquí cuñu na xíca núná mé xihín na cómí xitoho cuéntá saha. Ta quiahva já caxí ndó yiquí cuñu na valí xihín na náhnu viti —cáchi a.

¹⁹ Tá nandihí já naxini i rí cúu quití quini cán nataca rí xihín na náhnu, na sáhdá chuun nuú ñayivi ndúu ñuyíví ta xihín soldado na. Nataca na caní táhan na xihín mé a cánúu jata cuáyí yaa cán xihín soldado mé á. ²⁰ Ta natíin mé á quití quini cán xihín da cúu profeta túhún, mé da nacaja ña xitúhún nu mé rí cúu quití quini cán. Jáchi xihín ña xitúhún nasacaja mé profeta túhún cán najándahvi da ñayivi ta najácahan da na ña ná nani marca mé rí quini cán yiquí cuñu na. Ta já nacaja cáhnu na tiniñu yúu rí. Ta naxini i najácana tácu Ndióxi mé quití quini cán xihín profeta túhún cán ini indayá, ña cúu tátuhun in mìní nu cándaha ñúhu cáyi xihín azufre. ²¹ Ta na java ga cán naxihí na xihín yúchu cáni ña naqueta yúhu mé a cánúu jata cuáyí yaa cán. Ta ndijáá laa nataca ndihí rí caxí rí yiquí cuñu na janda

quiahva nandivaha ini rí.

20

Cáhan Juan sahá in mil cuiá tá ná candico ndaa tiñáhá sacuaḥa

¹ Tá nandihí já naxini i nanuu in táto Ndióxi chí indiví ta ñéhe a yáví ña súná yuhú yáví cúná, ña co xínu nu ndíhi nuú cán. Ta cáñee in cadena ndeé ndáha á. ² Ta natíin mé á coo quini, rí cúu tiñáhá sacuaḥa naní Satanás, rí nasahíin janda saha. Ta nacató a rí xihín cadena cán tíxi in mil cuiá. ³ Ta najácana a rí ini yáví cúná nuú nachicaji a rí. Ta nasacu a in sello yuhú yéhe nu ndácaan rí já ná a quéta rí jándahvi rí ñayivi ñuyíví janda quiahva ná yaha mé in mil cuiá. Ta tá sa nayaha in mil cuiá já janí tucu rí caca nuu rí tíxi chá tiempo cuití va.

⁴ Tá nandihí já naxini i ndíta cuaḥa táyi vaha nu ndúu coo na candojo chuun ña caja vií na sahá ñayivi. Ta quiahva já naxini rí cán ndúu ínimá na nachitúhún na yiquí jíní na jáchi nacahan na tuhun Ndióxi, ña ndaa najánaha Jesús nuú ñayivi. Ta cúu ná na coo nacaja cáhnu quití quini cán xihín tiniñu yúu rí. Ta ni coo nasahan na ñamaní nani marca rí taan na ni ndáha ná. Ta naxini i nanditacu tucu mé na cán ta anda jáví mé ná xihín Jesús nasacomí na cuéntá sahá ñayivi tíxi in mil cuiá. ⁵ Ta na yóho cacuu na nu cuití nditacu tucu. Joo java ga na naxihí cán camaní nditacu na jáchi ndítahan nu ná candati na janda quiahva ná yaha in mil cuiá. ⁶ Cajíi ini ñayivi, na nditacu tañu na jánditacu Ndióxi nu cuití cán jáchi cúu ná na nandicaxi mé á. Jáchi a cúhún toho na indayá nu ndoho ini ñayivi quini. Ña cán cacuu a tátuhun quivi na chí iví. Ña yaha xihín ná quéa nduu na jutú caja ndíví na nu Ndióxi xihín nuú Jesucristo. Ta xihín mé á cacomí na cuéntá sahá ñayivi tíxi in mil cuiá.

⁷ Ta tá sa ná yaha in mil cuiá cán já janí Satanás, mé tiñáhá sacuaḥa nu ndácaan rí ndájí rí cán. ⁸ Ta já queta rí jándahvi rí ndijáá ñayivi ndúu ñuyíví. Ta jándahvi rí ñayivi ndúu ñuu naní Gog xihín ñuu naní Magog ña ná taca na caní táhan na. Ta na soldado taca cán cacuu na tátuhun ñutí ndúu yuhú tañuhú xihín ña cuaḥa cúu ná.

⁹ Ta ndicuita nuu ñayivi ndijáá ñuu ñuyívi ta cava yivi na jatá tóco ndihi na cúu cuénta Ndióxi. Ta quiahva ja cava yivi na jatá ñuu Jerusalén, mé ñuu ña quíhvi ini Ndióxi. Joo jácyu Ndióxi ñúhu cáyi indivi ta jándihi a saha ná. ¹⁰ Ta mé tiñáha sacuaña, mé rí najándahvi ñahá cán jácana Ndióxi ri ini in mîni nu cándaha ñúhu cáyi xihín azufre. Ta sa mé cán cúu nu jácana mé á quití quini xihín da cúu profeta túhún. Ta cán cañuhu na ndoho ini na ñuu ta ndivi anda ama cáa quivi.

Tá cája víi Ndióxi sahá ñayivi

¹¹ Tá nandihí ja naxini i in táyi cáhnu, dó yaa cachi nu sácoo Ndióxi. Ta nuu mé á nandíñúhú tóco ndihi ñuyívi xihín indivi ta chí a vája ga cuu cuní ña. ¹² Ta naxini i ndijáá na sa naxihí, na válí xihín na náhnu ndíta na nu íin coo Ndióxi. Tá nandihí ja naxini i nanuna nuú java libro. Ta nanuna inga libro nu ndáa quivi tóco ndihi na catacu anda ama cáa quivi. Ta ja nacavií sahá ña nacaja in in na sa naxihí cán jáchi ini mé libro cán ndáa tóco ndihi ña nacaja in in ñayivi. ¹³ Ta nandindita tóco ndihi na naxihí ini tañuhú xihín na nanduxu ja ná caja víi Ndióxi sahá ndihi na tá quiahva cáa nacaja in in na cán. ¹⁴ Janda jávi a quivi ga ñayivi ta a cuhun ga ínimá na nuú nataca ínimá na naxihí. Joo najácana Ndióxi ñayivi quini ini mé mîni nu cándaha ñúhu cáyi. Mé mîni cán cúu á indayá nuú ndoho ini ñayivi ta cúu á tátuhun quivi na chí ivi. ¹⁵ Ta mé cán cúu nuú najácana Ndióxi tóco ndihi na co ndáa quivi nu mé libro nu ndáa quivi ñayivi catacu anda ama cáa quivi.

21

Tá naxini Juan indivi saá xihín ñuyívi saá

¹ Tá nandihí ja naxini i indivi saá xihín ñuyívi saá. Jáchi sa nandihí va sahá indivi xihín ñuyívi ña nu cuítí cán. Ta jári tañuhú sa coo ga dó ñúhu viti. ² Ta yehe, da cúu Juan naxini i nanuu ñuu Jerusalén saá, ña yíi ta naquixi a chí indivi nu íin Ndióxi. Ta tá quiahva ndató cacutú in ñáñáha tándaha ndiquehe ña yíi ña quiahva ja ndató nacacutú ñuu Jerusalén cán. ³ Tá nandihí ja naxini johó i nacayuhú cóhó a chí indivi ta ja cáchi a ja:

—Ndióxi íin a tañu ñayivi viti jáchi cúu ná cuénta mé á. Ta coo a xihín ná jáchi cúu á Ndióxi, mé á cája cáhnu na. ⁴ Ta mé á yaco ndihi a ticuítí nuu ná ña nasacu na. Ta a quívi ga na. Ta ni a cuácu ga na. Ta ni a táhnda ga ini na. Ta ni a ndíhíhvi ga na. Jáchi sa najándihi Ndióxi saha tóco ndihi ña cán, ña nasahiin jihna —cáchi a.

⁵ Ta mé a íin coo nu sácoo rey nacahan ta ja nacachi a ja:

—Candehé. Yehe ndája saá i tóco ndihi ñaha.

Ta ja nacachi tucu a ja:

—Cahyún tóco ndihi ña cáhan i xuhun yóho jáchi cúu á ña ndaa ta cuu candee ini ndó ña —cáchi a.

⁶ Tá nandihí ja nacachi tucu a ja xihín i:

—Sa najáxinu coo i tóco ndihi ñaha. Yehe cúu u nu cuítí ta yehe cúu u nu ndíhí jáchi janda tá cámaní cava sahá saha tóco ndihi ñaha sa íin va yehe ta coo tá coo i vatí ná ndihi sahá. Ta ndá na cuní candaa chága ini sahá yehe ja caja i ña ná cuu candaa ini na sahá i. Ta cúu á tátuhun íchi ini na ticuítí, dó cája ña ná catacu na anda ama cáa quivi. Ta coo toho yahvi quehe e nu ná saha do. ⁷ Ta ndá na ná cana vaha nu tóco ndihi ña núu ñehe táhvi na ndiquehe na tóco ndihi ña yóho nuú i. Ta yehe cacuu u Ndióxi, mé á caja cáhnu na ta mé ná cacuu na jahyí i. ⁸ Joo na láhá xihín na co cuní candúsa tuhun Ndióxi xihín na cándají na cúu cuénta Ndióxi, mé ná cán cuhun na indayá nu cándaha ñúhu cáyi xihín azufre. Ta cán cuhun ri na sáhní ndíi xihín ndijáá na ndúu xihín na co cúu yíi á ñájíhí na. Ta cán cuhun ndijáá na cája tá nuú ña tají xihín na cája cáhnu yoco xihín na cáhan ña tuhún. Ña yóho cacuu a tátuhun quivi na chí ivi jáchi ndoho ndivaha ini na ini indayá nu cándaha ñúhu cáyi xihín azufre —cáchi a.

Cáhan Juan sahá ñuu Jerusalén saá

⁹ Ta ndaja coo in táhan ndíhúsa táto Ndióxi ña ñehe usa coho nu ñúhu usa ña núu quixi jatá ñuyívi naxinu a nuú i ta ja nacachi a ja xihín i:

—Naha quíi yóho candehún. Jáchi jánaha i nuun na cúu cuénta mé a cúu tátuhun ndicachi loho. Na yóho cúu ná tátuhun in

ñá tándaḥa ta Jesucristo cúú á tátuhun yí ña —cáchi a.

¹⁰ Anda já naçaja ínimā yí Ndióxi xihín i ña ndáca tátō Ndióxi yeḥe já naṣahan i in yúcu jícó ña cáhnu. Ta cán naṣini i ñuu Jerusalén ña yí, ña naṣuu chí indivi nū ín Ndióxi cán. ¹¹ Ta mé ñuu cán ndató ndivaḥa yeḥe ña jáchi cája mé á ña ná ndiyehē ña. Ta jíñu ña tá quiahva jíñu yuu yahvi ndivaḥa tátuhun yuu jaspe. Ta cúú á tátuhun yutátá jáchi cuu candehé yó chíhini a janda inga xoo a. ¹² Ta jata mé ñuu cán naçava nuu in náma yuu cáhnu ta jícó ndivaḥa. Ta naṣahin uxu ivi yehé a nū ndíta in in tátō Ndióxi in in yehé a. Ta ndica yehé cán ndáa quiví ndihuxu ivi táhnda na naquixi chichi Israel. ¹³ Ta uní yehé sándeḥé nū xoo cána candii. Ta uní yehé sándeḥé nū xoo chí norte. Ta uní yehé sándeḥé nū chí sur. Ta uní yehé sándeḥé nū xoo quéta nuu candii. ¹⁴ Náma yuu ñuu Jerusalén cán naṣahin uxu ivi yuu ndúhu saḥa. Ta jata yuu cán ndáa quiví ndihuxu ivi na apóstol, na naṣica tuun xihin Jesús, mé a cúú tátuhun ndicachi loho cán.

¹⁵ Mé tátō Ndióxi ña cáhan xihín i cán cáñee in tóyoó jiuḥun cuáán ndáḥa ña ná chiquiahvá mé á ñuu cáhnu xihin yehé a xihin náma yuu ña ndájí jata. ¹⁶ Ta nachiquiahvá a ña xihin tóyoó cán ta in quiahva ndáa ndicomí xoo mé ñuu cán ta chí in quiahva cáni a ta in quiahva ndica ña. Ta quiahva ñeḥe a cúú á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndica ña. ¹⁷ Tá nandihí já nachiquiahvá tátō Ndióxi cán náma yuu ndájí jata ñuu cáhnu cán. Ta quiahva ñeḥe a cúú uní jico comí metro. Ta metro cája chúun tátō Ndióxi cán cúú dó tátuhun dó chiquiahvá ñayivi ndúu ñuyiví ñaha.

¹⁸ Ta mé náma yuu ndájí jata ñuu cáhnu cán naçavaḥa ña xihín yuu jaspe. Ta mé ñuu cáhnu cán naçavaḥa ña xihín jiuḥun cuáán, ña cúú tátuhun yutátá ña víi ndivaḥa nuu. ¹⁹ Ta mé yuu ndúhu ña naçana saḥa mé náma yuu cán naçacutú a xihin tá nuú yuu yahvi ndivaḥa. Yuu ndúhu nū cuití cán naçacutú a xihín yuu naní jaspe. Ta ña cáhivi cán naçacutú a xihín yuu naní zafiro. Ta ña cáhuni cán

naçacutú a xihín yuu naní ágata. Ta ña cácomi cán naçacutú a xihín yuu naní esmeralda. ²⁰ Ta ña cáhuhun cán naçacutú a xihín yuu naní ónice. Ta ña cáhiñu cán naçacutú a xihín yuu naní cornalina. Ta ña cáhusa cán naçacutú a xihín yuu naní crisólito. Ta ña cáhuna cán naçacutú a xihín yuu naní berilo. Ta ña cáhijn cán naçacutú a xihín yuu naní topacio. Ta ña cáhuxu cán naçacutú a xihín yuu naní crisoprasa. Ta ña cáhuxu in cán naçacutú a xihín yuu naní jacinto. Ta ña cáhuxu ivi cán naçacutú a xihín yuu naní amatista. ²¹ Ta ndihuxu ivi yehé ini ñuu cáhnu cán cúú á uxu ivi perla. Ta tá in tá in yehé cán naçavaḥa xihin in tálaá perla ní. Ta mé cáyē cáhnu ñuu cán cúú á ña naçavaḥa xihin ndinuhu jiuḥun cuáán, ña cúú tátuhun yutátá jáchi janda inga xoo a tívi.

²² Ta ni in túhún veñuhu coó naṣini i ini mé ñuu cáhnu cán. Jáchi mé Ndióxi, xitoho í, mé a ín ndée cája tóco ndihí ñaha cúú á tátuhun veñuhu na. Ta jári Jesús, mé á cúú tátuhun ndicachi loho cán cúú á tátuhun veñuhu na. ²³ Ta mé ñuu cáhnu cán co xini ñúhú toho a candii ni yoo ña ná jándiyehē ñahá jáchi xihin quiahva yeḥe Ndióxi cán jándiyehē a mé ñuu cán. Ta Jesús, mé a cúú tátuhun ndicachi loho cán cúú á tátuhun lámpara jándiyehē a ñuu cán. ²⁴ Ndijáá ñayivi, na naquixi ndijáá nación ñuyiví caca nuu na ini ñuu cáhnu cán xihin quiahva yeḥe a. Ta ndijáá na sáhnda chuun nuú ñayivi ñuyiví xinu na ñuu cán ta ndiquiahva na tóco ndihí ña cuicá comí na nū mé ñuu cán. ²⁵ Ta a cándaji toho yehé a tá ndivi ta coó toho ña ñuu coo cán. ²⁶ Ndijáá ña cuicá xihin ña náhnu cuéntá ñayivi ñuyiví yóho cañeḥe na ña nū mé ñuu cán. ²⁷ Joo ni in túhún ña quini a quihvi toho ini ñuu cán. Ta ni in na cája ñaha cándají Ndióxi a quihvi cán. Ta ni na cátoó jándahvi ñayivi a quihvi cán. Na ndihvi cán cuití va cúú ná na ndáa quivi nū libro nū ndáa quivi tóco ndihí na catacu anda ama cáa quivi. Mé libro yóho ín a nuú Jesús, mé á cúú tátuhun ndicachi loho.

22

¹ Tá nandihí já najánaḥa tátō Ndióxi cán in yuta víi nuú i nū ñúhu ticuí, dó cája ña

ná catacu ñayivi anda ama cáa quivi. Ta tá quiahva yehe yutátá quiahva já yehe nuu do. Ta cána dó chí xoo nu in coo Ndióxi xihín Jesús, mé a cúu tátuhun ndicachi loho cán. ² Ta yáha dó mé mahñú ndaa ichi cáhnu mé ñuu cán. Ta in in xoo yuta cán sáhnu yító, dó cája ña ná catacu ñayivi anda ama cáa quivi. Ta tá yoo tá yoo cúun cuihi nu dó cán. Ta uxu ivi tañu cúun cuihi nu do nu cuía. Ta ndáha do cája ña ná ndivaha ñayivi ñuyívi. ³ Ta cán ni in ga ñaha a cúhun chahan jata. Ta Ndióxi xihín Jesucristo, mé a cúu tátuhun ndicachi loho cán coo a nu sácoo rey mé ñuu cáhnu cán. Ta na cúu cuéntá Ndióxi caja cáhnu na mé a cán. ⁴ Ta cuni táhyi na nuu mé á ta candaa quivi mé á taan na. ⁵ Ta cán coo toho ñuu coo. Ña cán quea na canduu cán a cuni ñúhú ga na ñúhú lámpara ta ni a cuni ñúhú ga na ña ná yehe candii jáchi mé Ndióxi, xitoho na jándiyehé a nu ná. Ta cahnda na chuun tátuhun rey anda ama cáa quivi.

Sa cáyati quivi quixi Jesucristo

⁶ Tá nandihí já nacachi tátó Ndióxi cán já xihín i:

—Tuhun yóho cúu á ña ndaa ta cuu candeé inún ña. Jáchi mé Ndióxi, xitoho í, mé a cája ña ná cahan profeta, mé a cán quea nachindahá a tátó mé á já ná caxi tuhun a nuu na cúu cuéntá mé á ña yachi quixi tóco ndihí ña yóho —nacachi a.

⁷ Ta já cáchi Jesús já:

—Sa saa yachi va yehe. Cajii ini na cándusa tuhun cahan sahá ña yaha chí nuu, ña ndaa nu libro yóho —cáchi a.

⁸ Yehe, da cúu Juan naxini johó i ta naxini ndihí i ña yóho. Ta tá nandihí naxini i ña já nacaxítí i nu tátó Ndióxi ña caja cáhnu i ña jáchi mé a najánaña ña yóho nuu i. ⁹ Joo nacahan tátó Ndióxi cán xihín i já nacachi a já:

—A cáxítí tohún nuu yehe jáchi ndítahan caja cáhnún Ndióxi. Jáchi yehe cúu u da caja chúun nu Ndióxi tá quiahva caja chúun mún xihín ñanún, na cúu profeta cuéntá Ndióxi xihín na cándusa ña cahan libro Ndióxi yóho —nacachi tátó Ndióxi cán xihín i.

¹⁰ Tá nandihí já nacachi tucu a já xihín i:

—A chíjehé tuhún sahá tuhun Ndióxi, ña ndaa nu libro yóho jáchi sa nacayati tiempo

xinu nuu á coo a. ¹¹ Joo ndá da cája quini ná caja quini chága da tá cuni da. Ta ndá da coo víi ná caca tiquini mé dá tá cuni da. Joo ndá da vaha ná ndihí ini da caja da ña vaha. Ta ndá da nandiquiahva vaha mé ndáha Ndióxi ná ndihí ini da caca ndacú da ichi cuéntá mé á —cáchi tátó Ndióxi xihín i.

¹² Ta já nacachi Jesús já xihín i:

—Candehé. Sa saa yachi vi. Ta vaxi i ñehe e yahvi quehe in in ñayivi. Ta ndiquiahva i nuu in in na ña ndítahan quehe na sahá ña nacaja na. ¹³ Yehe cúu u nu cuítí ta yehe cúu u nu ndihí jáchi jándá tá camaní cava sahá saha tóco ndihí ñaha sa in va yehe ta coo tá coo i vatí ná ndihí sahá —cáchi a.

¹⁴ Cajii ini ñayivi, na nandaja víi ínima jáchi cúu á tátuhun ndícata na jáhma ná já ná cuu ñehe táhvi na caxí na cuihi nuu yitó cuihi, dó cája ña ná catacu ñayivi anda ama cáa quivi. Jáchi xihín ña yóho cuu quihvi na chí yehé ñuu cáhnu cán. ¹⁵ Joo chí jata mé ñuu cán candoo tóco ndihí na na caan cája ña núu xihín tóco ndihí na cája ña tají xihín ndijáa na ndúu xihín na coo cúu yíi ná á ñájíhi na. Ta jata ñuu cán candoo ri na sáhní ndii xihín na cája cáhnu yoco xihín na cahan ña tuhún xihín na jándahvi ñani táhan.

¹⁶ —Yehe cúu Jesús ta nachindahá i tátó mí i já ná caxi tuhun a ña yóho xihín ndijáa na cúu cuéntá mí i, na ndítaca ndijáa veñuhu. Yehe nacaja i ña nacacu rey David ta naquixi i chichi mé David. Cúu u tátuhun quimi cáhnu, ri quéta tá nativi —cáchi Jesús.

¹⁷ Mé ínima yii Ndióxi xihín na cúu cuéntá Jesús cana na Jesús ña ná quixi a ta já cachi na já:

—Naha quíi ndo.

Ta ndá na xini johó ña yóho xini ñúhú cachi ri na cán va:

—Naha quíi ndo.

Ta ndá na ichi ini ticuú, na cuni coho dó ná quixi na nu mé á já quiahva ticuú nu ná, dó caja ña ná catacu na anda ama cáa quivi. Ta coo toho yahvi quehe mé á nu ná saha do.

¹⁸ Ta ña yóho quea cuni cachi i xihín tóco ndihí ndó, na xini johó ña ndaa nu libro yóho: Ta ndá na ná chinúu chága tuhun jata ña sa cahan libro yóho já quea chinúu ri Ndióxi tondóhó, ña ndaa nu libro yóho

jata ná. ¹⁹ Ta ndá nā ná tavá tuhun cáhan Ndióxi, ña ndáa nu libro yóho já quéa tavá Ndióxi quivi ná ña ndáa nu libro mé nu ndáa quivi tóco ndihi ñayivi catacu anda ama cáa quivi. Ta mé nā cán a cūú quihvi na ñuu yi ndivaha cán ta ni a quiáhva Ndióxi nu ná ñaha cáhan mé libro yóho saha.

²⁰ Ta sáhan Jesús tuhun saha tóco ndihi ña yóho já cáchi a já:

—Mé a ndaa sa saa yachi vi —cáchi a.

Já ná coo. Naha quíi ndó Jesús, xitoho nde.

²¹ Ña cúni quéa ná caja cuahá Jesucristo, xitoho í ñamaní xihín ndihi ndó. Já ná coo.